


Tí Nuevo Testamento cuènte Inchéni Jesucristo

C'óna Nquìva



New Testament in Popoloca, San Juan Atzingo

Tí Nuevo Testamento cuènte Inchéni Jesucristo C'óna Nquìva
New Testament in Popoloca, San Juan Atzingo

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Juan Atzingo

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
b9b09122-b3f6-59f0-9594-749907b32b5b

Contents

SAN MATEO	1
SAN MARCOS	69
SAN LUCAS	112
SAN JUAN	183
LOS HECHOS	236
ROMANOS	299
1 CORINTIOS	325
2 CORINTIOS	352
GALATAS	368
EFESIOS	377
FILIPENSES	386
COLOSENSES	392
1 TESALONICENSES	398
2 TESALONICENSES	404
1 TIMOTEO	407
2 TIMOTEO	414
TITO	419
FILEMÓN	422
HEBREOS	424
SANTIAGO	443
1 PEDRO	450
2 PEDRO	457
1 JUAN	461
2 JUAN	467
3 JUAN	468
SAN JUDAS	469
APOCALIPSIS	471

Tí tan jína chrónka ch'ín Mateo

Tí sín k'uaxrjeníxin ch'ín Jesús (Lc. 3.23-38)

¹ Tíhi mé chrónka nkexro kaín tí sín k'uaxrjeníxin ch'ín Jesucristo. Mé jehe ch'án k'uaxrjeníxin ch'án tí ch'ín David la ko tí ch'ín Abraham.

² Ch'ín Abraham mé it'é tí ch'ín Isaac la ko ch'ín Isaac mé it'é tí ch'ín Jacob la jehe ch'án mé it'é tí ch'ín Judá la ko kaín kíchó ch'án.

³ Ch'ín Judá mé it'é tí ch'ín Fares la ko ch'ín Zara la tí ìné sín mé it'in Tamar. Ch'ín Fares mé it'é tí ch'ín Esrom la jehe ch'án mé it'é tí ch'ín Aram.

⁴ Ch'ín Aram mé it'é tí ch'ín Aminadab la jehe mé it'é tí ch'ín Naasón la jehe mé it'é tí ch'ín Salmón.

⁵ Ch'ín Salmón mé it'é tí ch'ín Booz la ìné mé tjan Rahab. Ch'ín Booz mé it'é tí ch'ín Obed la ìné tí ch'ín Obed mé tjan Rut. Tí ch'ín Obed mé it'é tí ch'ín Isaí.

⁶ Ch'ín Isaí mé it'é tí rey David la jehe ch'án la ko tí tjan k'uéchjién ch'ín Urías mé táha it'é la ko ìné tí ch'ín Salomón.

⁷ Ch'ín Salomón mé it'é tí ch'ín Roboam la jehe mé it'é tí ch'ín Abías la jehe ch'án mé it'é tí ch'ín Asa.

⁸ Ch'ín Asa mé it'é tí ch'ín Josafat la ch'ín Josafat mé it'é tí ch'ín Joram la ch'ín Joram mé it'é tí ch'ín Uzías.

⁹ Ch'ín Uzías mé it'é tí ch'ín Jotam la ch'ín Jotam mé it'é tí ch'ín Acaz la ch'ín Acaz mé it'é tí ch'ín Ezequías.

¹⁰ Ezequías mé it'é tí ch'ín Manasés la ch'ín Manasés mé it'é tí ch'ín Amón la ch'ín Amón mé it'é tí ch'ín Josías.

¹¹ Ch'ín Josías mé it'é tí ch'ín Jeconías la ko kíchó ch'án. Tí sín a mé k'uéjón sín tí yaon a ntá xrínahya ikui tí sín Babilonia sákjuíko sín tí sín israelita kixin ts'ejóchjina sín tí chjasén sín Babilonia.

¹² Ntá kjuixin sákjuí sín mé ch'ín Jeconías mé it'é tí ch'ín Salatiel la ch'ín Salatiel mé it'é tí ch'ín Zorobabel.

¹³ Ch'ín Zorobabel mé it'é tí ch'ín Abiud la ch'ín Abiud mé it'é tí ch'ín Eliaquim la ko ch'ín Eliaquim mé it'é tí ch'ín Azor.

¹⁴ Ch'ín Azor mé it'é tí ch'ín Sadoc la ko ch'ín Sadoc mé it'é tí ch'ín Aquim la ko ch'ín Aquim mé it'é tí ch'ín Eliud.

¹⁵ Ch'ín Eliud mé it'é tí ch'ín Eleazar la ch'ín Eleazar mé it'é tí ch'ín Matán la ch'ín Matán mé it'é tí ch'ín Jacob.

¹⁶ Ch'ín Jacob mé it'é tí ch'ín José la ch'ín José mé k'óna xii tjan María la jehe tjan María mé ìné tí ch'ín Jesús. Tí ch'ín Jesús la mé nchek'in sín Cristo.

¹⁷ Mé xikaha catorce t'áchrjii k'uaxrjeníxin tí ch'ín Abraham ntá kjuák'e ch'ín David la í jnko catorce t'áchrjii k'uaxrjeníxin tí ch'ín David la ntá tí sín Babilonia sákjuíko tí sín israelita chjasén sín la ntá í jnko catorce t'áchrjii k'uéjón la ntá kokjíhi Cristo.

Kokjíhi Jesucristo (Lc. 2.1-7)

¹⁸ Tí kokjíhi Jesucristo mé xikihi kónhen. Tí tjan María ìné ch'án mé tsotehe tjan ch'ín José. A ntá naxa kuákjahya kíchó sín ntá kónoxín kixin jehe tjan la ó tjejá tjan kixin tíha la kjuachaxién Nchakuen Dios.

¹⁹ Ch'ín José mé tí nkexro ts'óna xii tjan María, mé ijnko chojni jína la tjinkakonhya ch'án noxín chrók'óxroan ch'án tjan ntá kjuenkayáxin ch'án imó chrókjuákehę ch'án tjan kixin tjinkaon ch'án kixin ninkexró tsonoehya.

²⁰ Ntá tí *naxa* tjenkayáxin ch'án kixin *xikaha* sich'e ch'án ntá kotáchrien ch'án chrónkaxín titàya k'uikuèn ch'án ikui ijnko ángel kuènte Ìnchéni nixja, chrónka kixin:

—José jaha mé k'uaxrjeníxian David. Tóxakuanhya la ko chrakonhya chrókuákjá tjan María ts'óna ichjián kixin tí xjan tsochónta tjan la kjuachaxin kuènté Nchakuen Dios ikui mé k'óna tí xjan a.

²¹ Sinchekokjíhi tjan ijnko xjan ntoa la its'in xjan Jesús mé *xikaha* its'in xjan kixin jehe xjan tsjakjìn ijié chojni —mé *xikaha* chrónka tí ch'ín ángel.

²² Kaín tíha kónhen kixin tsoxiteyá tí nkehe chrónka Ìnchéni k'uénixja tí sín k'uéchrónka itén ch'án ósé. Mé ntáchro *xikihi*:

²³ Ijnko tjan *naxa* chóntahya chojni ntoa mé tsjak'eyá tjan la tsochónta tjan ijnko xjan,

la sinchek'in sín ch'án Emanuel,*

la tíha t'axrjexín kixin Dios tjejókoni. Mé *xikaha* chrónka itén Dios.

²⁴ Ntá k'uàya ch'ín José ntá kjuínchexiteyá ch'án tí nkehe k'uetoan tí ángel kuènte Ìnchéni la kuákja ch'án tjan María ts'óna ichjién ch'án.

²⁵ A ntá kjónté *xikaha* la *naxa* kójnkojiéhya sín tí *naxa* kokjéhya xjan la ntá tí xjan mé kjuínchek'in sín Jesús.

2

Tí sín mago kjuítsjehe sín xjan

¹ Tí kokjíexín ch'ín Jesús tí chjasin Belén estado Judea la tí yaon a kjuák'e ijnko ch'ín rey it'in Herodes mé k'uetoenhen ch'án tí nación a. A ntá xrinahya iso chojni ntoa kjuixín ijnko chjasin nó tjitoxín yaon mé kjuíji sín chjasin Jerusalén. Jehe sín mé sín mago mé tónoexín sín tí konotsé.

² Ntá kjuanchankí sín kixin:

—¿Nketí tjen tí xjan tsíkokjíhi ts'óna tí rey ts'etuèhen tí sín judío? K'uíkonxínni tí konotsé kuènte ch'án nó tjitoxín yaon na ntá ó kjuini kixin tsochjéheni ch'án kjuasáya —ichro sín.

³ Ntá kuínhin tí ch'ín rey Herodes tí *xikaha* ichro sín ntá imá tóxakonhen ch'án la ko tóxakonhen kaín tí sín chjasin Jerusalén.

⁴ Ntá tí ch'ín rey k'uetoan kixin síxrakoa kaín tí sín nchat'á t'etoan la kaín tí sín tjako tí ley la ntá kjuanchankíhi sín ch'án nketí chrókokjíexín tí nkexro Cristo.

⁵ Ntá jehe sín kjuátehe sín kixin:

—Tsokjíexín xjan chjasin Belén estado Judea mé *xikaha* tsíkin tí sín tsíchrónka itén Dios. Ntáchro *xikihi*:

⁶ Jaha chjasin Belén nonte Judá, jaha la jehya ijnko chjasin imá ntsí;

kixin tí nonte ts'axrjexín tí nkexro antsí t'etoan,

la jehe ch'án ts'ayakonhen tí chjasin kuèntana mé chjasin Israel.*

Mé *xikaha* nixja itén Dios.

⁷ Ntá imó k'uíyehé ch'ín Herodes tí sín mago la kjuanchankíhi ch'án sín nkesá kjuankixin k'uíkon sín tí konotsé.

⁸ Ntá chrónka sín ntá tuénxín k'uetoan ch'án kixin sátsji sín chjasin Belén la ntáchro ch'án kixin:

—Sátjirá ntiha la tjéyará tí xjan la tió ts'itjará xjan la tsochronkará kixin ntá kjaxian janhan sátsjia ntiha tsotjahá xjan kjuasáya —mé *xikaha* k'uetoan ch'ín Herodes.

* 1:23 Isaías 7.14 * 2:6 Miqueas 5.2

⁹ Ntá kuínhin tí sín mago tí nkehe k'ueṭoan tí ch'ín rey ntá sákjuí sín la xík'ikon sín tí konotsé ínaá la kjuítaón va nt̄ia la ntá chréhe sín hasta kjuák'e va chrítaón tí nchia tjen tí xjan a.

¹⁰ Ntá tió k'uíkon tí sín mago nketí kjuák'e tí konotsé la imá kóchéhe sín.

¹¹ La k'uíxehen sín tí nchia la k'uíkon sín tí xjan kjuák'eko tí tjan María ìné xjan. Ntá k'uéjoxin toch'in sín la chjéhe sín kjuasáya ntá kuakitjehe sín tí nkehe kjuíkəo sín la kjuanjon sín chica oro la ko ihnti tsochéxin chjincə la ko xroan xraxé náxrjón.

¹² Ntá chr'éxin kotáchrién sín chrónkaxín kixin chrókjanhya sín tí tjen ch'ín Herodes. Méxra kjanxin sín í jnko nt̄ia la sákjuí sín chjasén sín.

Ch'ín José la ko tjan María sákjuí sín chjasin Egipto

¹³ Ntá tió kjuixin sákjuí tí sín mago la ntá kotáchrién ch'ín José chrónkaxín titàya k'uíkon ch'án ijnko ángel kuènte Ìnchéni chrónka kixin:

—T'àyá sátsjioa xjan la ko ìné xjan la sátsjirá chjasin Egipto la ntahó ts'ejorá hasta tsoxrjankajia, kixin tí ch'ín Herodes xritjeyá tí xjan chrók'óyán ch'án xjan —mé xíkaha chrónka tí ángel.

¹⁴ Ntá ch'ín José k'uàya la ntá sákjuíko ch'án xjan la ko ìné xjan la sákjuí sín chjasin Egipto tí tie a.

¹⁵ Ntahó k'uéjó sín hasta ik'uén ch'ín Herodes. Mé xíkaha kónhen kixin tsoxiteyá kaín tí nkehe chrónka Ìnchéni, k'uénixja tí sín tsíchrónka itén ch'án. Mé ntáchro sín kixin: “Chjasin Egipto kjuák'e xjanna ntá k'uíyaha ch'án”.†

Ch'ín Herodes mé k'ueṭoan its'en xjan

¹⁶ A ntá kónohe ch'ín rey Herodes kixin tí sín mago mé kjuích'iyehé sín ch'án ntá imá kónínkaon ch'án la k'ueṭoan ch'án kixin its'en kaín tí chánjan ntoá siín chjasin Belén ó chóna iyó nánó la ko tí xjan naxa chónahya iyó nánó. Mé xíkaha k'ueṭoan ch'án kixin ó xraxinkaon ch'án nkehe kuínhin ch'án chrónka tí sín mago.

¹⁷ Mé xíkaha ó xiteyá tí nkehe tsíkjin tí ch'ín Jeremías ntáchro ch'án kixin:

¹⁸ Kuínhin sín itén chojni chjasin Ramá

mé tsjánka sín.

Tíha mé tí tjan Raquel la tsjánkama tjan xjeen tjan.

Kohya nkexro sinchechéhe tjan kixin ó kaín xjan tsík'en xjan.‡

Mé xíkaha chrónka itén Dios.

¹⁹ Ntá tió kjuixin k'uén ch'ín Herodes ntá ijnko ángel kuènte Ìnchéni mé k'uíkonxín ch'ín José kotáchrién ch'án tí kjuák'e ch'án chjasin Egipto mé ntáchro kixin:

²⁰ —T'àyá sátsjioa tí xjan la ko tí ìné xjan la tsokjan chjasin Israel kixin ó kjuixin k'uén tí nkexro chrók'óyán tí xjan a —mé xíkaha k'ueṭoan tí ch'ín ángel.

²¹ Ntá ch'ín José mé k'uàya ch'án la sákjuíko ch'án tí xjan la ko tí ìné xjan la sákjuí sín chjasin Israel.

²² A ntá kuínhin ch'ín José kixin ch'ín Arquelao xjeen ch'ín Herodes mé k'ueṭoan ch'án tí estado Judea la ntá chrakon ch'án la sáchrókjuihya ch'án ntiha. A ntá kotáchrién ch'án chrónkaxín Dios kixin sáchrókjuí ch'án estado Galilea.

²³ Ntá tió kjuíji sín ntiha ntá sákjuí sín ijnko chjasin it'in Nazaret la ntaha k'uéjó sín. Mé xíkaha xiteyá tí nkehe tsíchrónka tí sín k'uénixja itén Dios senó. K'uéntáchro sín kixin jehe ch'án mé tsíkítexín sín nazareno.

† 2:15 Oseas 11.1 ‡ 2:18 Jeremías 31.15

3

Juan el Bautista mé kjuák'e ch'án nteje

(Mr. 1.1-8; Lc. 3.1-9, 15-17; Jn. 1.19-28)

¹ A ntá tí yaon a kjuák'e ch'ín Juan Bautista nteje Judea la kjuako ch'án.

² Ntáchro ch'án kixin:

—Títóherá ijiará la tjínkírá tí nkehe tjenkayáxinrá kixin í séhya itsi kjuachaxién Dios.

³ Tí ch'ín Isaías, mé ijnko ch'ín tsíchrónka itén Dios, mé tsíkjin ch'án kuènte tí ch'ín Juan mé chrónka ch'án kixin:

Tsinhin sín itén ijnko nkexro tsjak'e nteje ts'èya tsontáchro kixin:

“Tóxakonhanrá ncheyóxinrá ntja tsixin Ìnchéni.

Takitjehérá ijnko ntja ntoí.”*

⁴ Tí iké ch'ín Juan mé tsík'óna kaxree kocamello la ko tí nkehe chr'ínkat'óxin ch'án mé tsík'óna tjoa. A ntá tí nkehe kjóne ch'án mé kochjoá la ko itsjen kotsjenta tónoxín nteje.

⁵ Itsjé chojni kuixin sín chjasin Jerusalén la ko í so chjasin siín estado Judea la ko chjinaxón tí ntarío Jordán kixin tsin hin sín nkexrí tjechrónka ch'án.

⁶ Ntá chrónka sín ijié sín ntá ch'ín Juan kuikítexín ch'án sín tí ntarío Jordán.

⁷ Ntá xrínahya k'uikon ch'ín Juan ikui nchónhya tí sín fariseo la ko tí sín saduceo kixin tjinkaon chrókuikite sín la ntá ntáchro ch'án kixin:

—Jahará tsík'axrjeníxinrá konche. ¿Xá nkexro kjuíntanohará kixin chrókuinkéhérá tí kjuanínkaon kuènte Dios ó tsi?

⁸ T'ichjánxin kixin chrók'uejorá jnkójina chrókjuákoxinrá kixin chaxín kjuítoxinhínrá tí nkehe tjenkayáxinrá.

⁹ Jahará nchehnerá ntáchrórá kixin k'uaxrjeníxinrá ch'ín Abraham. Janhan ntáxrjan kixin kjónté tí xro i la Dios tsjacha chrókjuich'éna ch'án chojni k'uaxrjeníxin ch'ín Abraham.

¹⁰ Tí chica hacha ó tjechónhen tsochrínjinxín tí nta. A ntá kaín xín nta t'ónahya to jína mé tsochrínjin kixin tsoche.

¹¹ Janhan mé inta tíkitexián chojni kixin tsjakoxín sín kixin ó kjuítoxinhin sín ntjé sín. A ntá tí nkexro itsi chr'éxin mé tsíkítexínrá tí Nchakuen Dios la ko xrohi. Antsí tjetóxin t'etóan ch'án a ntá janhan la kánhyó. Méxra chrókósuàna sáchrókjuíkian tokaté ch'án.

¹² Jehe ch'án la ó tjexraá ch'án pala sinchetjuáxin ch'án noatrigo kixin tí ntáchjiji trigo la ókjé ts'ejo ch'án a ntá tí noatrigo la tsjenájín ch'án la ts'enkachjina ch'án. A ntá tí ntáchjiji trigo la tsjakaxín ch'án ijnko xrohi ts'ankahya jnkochrínxín —mé xíkaha kjuako ch'ín Juan.

Kuíkite ch'ín Jesús

(Mr. 1.9-11; Lc. 3.21-22)

¹³ Ntá ch'ín Jesús kjuixin ch'án nó estado Galilea ikui ch'án tí ntarío Jordán tí tjen ch'ín Juan kixin ch'ín Juan tsíkite tí jehe ch'án.

¹⁴ A ntá tí saoxín chrohya ch'ín Juan chrókuíkite tí ch'ín Jesús ntáchro ch'án kixin:

—Náhi. Jeheni t'ichjánxinhinni jaha chrókuíkite tí jeheni. A ntá jaha k'uinka kixin jeheni chrókuíkítia tí jaha —ichro ch'ín Juan.

¹⁵ Ntá kjuátehe ch'ín Jesús kixin:

—A ntá jie la títóhé tí xíkaha tjenkayáxian kixin t'ichjánxin tsikiteni kixin sinchexiteyáni tí nkehe k'uetóan Dios.

Ntá ch'ín Juan kuítekaon ch'án la xíkaha kjuích'e ch'án.

* 3:3 Isaías 40.3

¹⁶ Ntá tió kuíkite tí ch'ín Jesús la ntá xrínahya titàya xitjehe nkajní la k'uíkon ch'án tí Nchakuen Dios, éxí kontóá tsjehe, k'uínkajinxin nkaya nkajní ntá kjuák'e chrítaón kja ch'ín Jesús.

¹⁷ Ntá xrínahya kuínhin sín ijnko tan kuixin nkaya nkajní ntáchro kixin: —Tíhi mé xjanna la imá tjuahá ch'án la imá chàna kixin nchexiteyàna ch'án.

4

Ch'ín Tsochren chrókjuachroe ch'ín Jesús

(Mr. 1.12-13; Lc. 4.1-13)

¹ Ntá tí Nchakuen Dios mé sákjuíko ch'ín Jesús tí nteje a ntá ch'ín Tsochren tjinkaon chrókjuachroe ch'ín Jesús.

² Tí nteje a mé kjuák'e ch'án kjónehya ch'án cuarenta yaon la ko cuarenta tie la ntá chr'éxin kónohe ch'án ik'uén ch'án kjinta.

³ Ntá ch'ín Tsochren mé kóchjinehe tí ch'ín Jesús kixin tjinkaon chrókjuachaxin ch'án. Ntáchro ch'án kixin:

—Tí chaxín jaha Xjeen Dios la ntáche tí xro i kixin chrók'óna niotja.

⁴ Ntá kjuátehe ch'ín Jesús ntáchro kixin:

—Náhi. Ntáchro xroon itén Dios kixin: “Jehya niotja ó chrók'uejóchónxin chojni. Náhi. Kaín tí tán nixja Dios tjejóchónxin chojni”^{*} —ichro ch'án.

⁵ Ntá ch'ín Tsochren mé sákjuíko ch'ín Jesús tí chjasin tjóá mé chjasin Jerusalén, la sákjuíko ch'án tí chrítaón tí kja nínko a

⁶ la ntáchro ch'án kixin:

—Tí chaxín Xjeen Dios jaha la títóhé t'anótjenxian tí noi ntihi kixin ntáchro xroon itén Dios kixin:

Dios mé ts'etuénhen tí sín ángel kuènte ch'án kixin ts'ayakonhan sín.

Tsotsé sín itjá

kixin tsotéhya totá ts'itja xro tí ts'anótjen†

—ichro ch'ín Tsochren.

⁷ Ntá kjuátehe ch'ín Jesús ntáchro ch'án kixin:

—Náhi. Kjaxin ntáchro xroon itén Dios kixin: “Chjíníhya chrókjuásixián kjuaxroan kjuachaxin kuènte Ìnchéni Dios”‡ —ichro ch'ín Jesús.

⁸ A ntá tió kjuixixín sákjuíko ch'ín Tsochren tí ch'ín Jesús ijnko jna imá noi ntá kjuako tí Jínahya kaín xín tí nación siín chjasintajni la ko tí nkehe t'etoan kuènte.

⁹ La ntáchro ch'ín Tsochren kixin:

—Kaín tíha mé tsotjaha tí tsjak'éxian tóch'ian tsjikosáyana tí janhan —mé xikaha ichro ch'ín Tsochren.

¹⁰ Ntá kjuátehe ch'ín Jesús ntáchro ch'án kixin:

—Sátjia Satanás kixin xroon itén Dios ntáchro kixin: “Chrókjuíkosáyehé Ìnchéni Dios la jehó ch'án chrókjuich'ehé xra”§ —ichro ch'ín Jesús.

¹¹ A ntá ch'ín Tsochren mé kuítóhe tí ch'ín Jesús la iso tí sín ángel ikui tsjinkitsa tí jehe ch'án.

Ch'ín Jesús kjuankíxin ch'án tí xra kuènte ch'án estado Galilea

(Mr. 1.14-15; Lc. 4.14-15)

¹² A ntá ch'ín Jesús mé kuínhin ch'án kixin tí ch'ín Juan mé tjechjina ch'án ntóechiso a, a ntá jehe ch'án mé sákjuí ch'án estado Galilea.

¹³ Kuítóehya ch'án chjasin Nazaret ntiha. Náhi. Sákjuí ch'án chjasin Capernaum la kjuák'e ch'án ntiha. Tí chjasin a mé tjen chrínta ntayaon chjino estado Zabulón la ko estado Neftalí.

* 4:4 Deuteronomio 8.3 † 4:6 Salmo 91.11-12 ‡ 4:7 Deuteronomio 6.16 § 4:10 Deuteronomio 6.13

¹⁴ Mé xikaha kjuích'e ch'án kixin tsoxiteyá tí nkehe tsíkjin ch'ín Isaías, ijnko nkexro k'uechrónka itén Dios. Ntáchro ch'án kixin:

¹⁵ Tí estado Zabulón la ko Neftalí tí ntja chrínta ntayaon la tí nó chók'á tjitoxin yaon tí ntario Jordán, mé tí estado Galilea tí tjejó tí sín jehya judío.

¹⁶ Mé ntiha tjejó tí sín sín tí sítié mé ts'ikon sín ijnko xrohi jíé, la tí sín éxí tsík'en xritjejó sín mé ts'inkaséyanxín ts'ejó sín.

¹⁷ Ntá kjuankixin kjuako ch'ín Jesús ntáchro ch'án kixin:

—Tjitóxinhinrá ntjará. Tsákjára ijnko ntja nixin kixin kjuachaxin kuènte Dios tjen nkaya nkajní la í séhya tsi.

*Ch'ín Jesús k'uíyehé noó chojni k'uétsé koche
(Mr. 1.16-20; Lc. 5.1-11)*

¹⁸ Ntá sákjuí ch'ín Jesús chrínta ntayaon Galilea ntá xrínahya k'uikon ch'án yaá sín jnkokoá kichó sín, ijnko mé it'in Simón mé kjaxin it'in ch'án Pedro la ko í jnko it'in Andrés. Jehé sín mé koche xritsé sín. Ntá tinkák'e sín nchísén chrínkí nta.

¹⁹ Ntá ch'ín Jesús nixjehé sín ntáchro ch'án kixin:

—Chréhéra tí janhan ntá tsotjahará xra tsjeyará chojni.

²⁰ Ntá tuénxín kuítóhe sín tí nchísén k'uétséya sín koche, ntá sákjuíko sín ch'án.

²¹ Ntá kjínhya kjuíji ch'án ntá k'uikon ch'án ijnko yaá sín, jnkokoá kichó sín, mé tí ch'ín Jacobo la ko ch'ín Juan, mé xjeen tí ch'ín Zebedeo. Tjejóko sín it'é sín tí ntabarco la tjejótjonite sín tí nchísén tséya sín koche. Ntá kjaxin tí sín a k'uíyehé ch'ín Jesús.

²² La ntá tuénxín kuítóhe sín tí ntabarco la ko tí it'é sín ntá sákjuíchréhe sín tí ch'ín Jesús.

*Kjuakohe ch'ín Jesús nchónhya chojni
(Lc. 6.17-19)*

²³ Ntá sákjuí ch'ín Jesús nkuíxín tí estado Galilea la kjuakoxin ch'án tí ninko Israel síin jnkojnko chjasin mé kjuako ch'án tí tan jína chrónka nkexrí tí kjuachaxin kuènte Dios la ko kjuínchekitohe ch'án jína kaín chojni chóntha kaín xín chin la ko kaín kjuatjoté.

²⁴ Ntá kaín xín tí sín tjejó tí estado Siria mé kuínhin sín kuènte Jesús la kjuikao sín kaín xín tí sín níhi chóntha kaín chin la ko tí sín imá tjetéhe sín la ko tí sín chóntha nchakuen tí jínahya la ko tí sín t'aniáte sín la ko tí sín síxénká toté sín, la ntá ch'ín Jesús mé kjuínchekitohe ch'án sín jína.

²⁵ Ntá itsjé chojni kjuíchréhe tí ch'ín Jesús, mé kjuixín sín estado Galilea la ko tí chjasin chjinaxón Decápolis la ko chjasin Jerusalén la ko kuenté tí estado Judea la ko tí nó chók'á tjitoxin yaon tí ntario Jordán.

5

Kjuakoxin ch'ín Jesús ijnko jna

¹ K'uikon ch'ín Jesús kixin k'uejó nchónhya chojni la ntá chrín ch'án ijnko jna la ntaha kjuák'etjaxin ch'án. Ntá tí sín k'uájiko ch'án a mé kóchjina sín chjinaxón tjejontaxin sín tí tjen ch'án.

² Ntá ch'ín Jesús kjuankixin kjuakohe ch'án sín kixin:

*Tí nkexro tjejó náxrjón
(Lc. 6.20-23)*

³ —Náxrjón tjejó tí sín nohe kixin t'ichjánxinhin sín nkehe kuènte Dios kixin ntá jehé sín mé tsochóntha sín tí kjuachaxin kuènte Dios.

4 'Náxrjón tjejó tí sín t'ává kixin Dios mé sinchechéhe asén sín.

5 'Náxrjón tjejó tí sín hnkehya asén kixin jehe sín mé ts'áyéhe sín tí nonte tsjanjon Dios.

6 'Náxrjón tjejó tí sín éxí yóhe chrók'uenxín sín kjinta la chrók'uenxín sín ntá kixin xikaha imá tjinkaon sín sinchexiteyéhe sín Dios ntá Dios tsjinkitsa sín kixin ts'áyéhe sín tí nkehe tjinkaon sín.

7 'Náxrjón tjejó tí sín tikonóhe kichó sín kixin ntá Dios kjaxin tsikonóhe tí jehe sín.

8 'Náxrjón tjejó tí sín kótjóá asén kixin ntá jehe sín sátsjik'ikon sín Dios.

9 'Náxrjón tjejó tí sín tjinkaon kjuaxróxin kixin Dios sinchek'in ch'an xjeen ch'an tí jehe sín.

10 'Náxrjón tjejó tí sín kjónté tjejóttjasótexín sín kixin kjuínchexiteyéhe sín Dios kixin ntá jehe sín mé kuènte sín nkaya nkajní.

11 'Náxrjón tjejórá kjónté t'ántaxínhanrá sín la ko ntachrakonrá sín la ko kaín nkehe náxrjónhya ntáchro sín kixin tinkachónkirá tí janhan.

12 Chrókócháhará la ko kjuaxróxin chrók'uejórá kixin ntá chr'éxin jahará ts'ayéherá ijnko nkehe antsí má jína nkaya nkajní. Mé xikaha kjuasóte tí sín k'uéjó óse k'uéchrónka sín tí itén Dios.

*Jahará la éxí yóhe xijnta la ko éxí xrohi t'inkaséyanxín chjasintajni
(Mr. 9.50; Lc. 14.34-35)*

13 'Jahará mé yóhe éxí xijnta chjasintajni. A ntá tí chrók'uánkéhé tí jní tí xijnta la ntá xitjahya chrókójní inaá. Ninkehó chrókjuich'ehya xra la chrók'uikitjí ntója la ko chrókuinkátja chojni.

14 'A ntá jahará la mé tí xrohi t'inkaséyanxín chjasintajni. Ijnko chjasin itjen chrítaón jna la xitjahya tsjak'emá.

15 La ko kohya nkexro sinchek'ákjen ijnko lámpara ntá tsjak'e chrínkí ijnko ntacajón. Íchá jína tsjak'e ch'an xrohi noi kixin ntá ts'inkaséyanxín kaín nkexro síin tí nchia ntiha.

16 Mé xikaha tí jahará chrókóyóhará éxí tí xrohi t'inkaséyanxín kixin ts'ikon kaín chojni tí xra jína tjejoch'erá la ntá chrókjuanchehe sín kjuasáyé It'eni tjen nkaya nkajní.

Kjuako ch'in Jesús kuènte tí ley

17 'Jahará chróntáchrohyará kixin k'uinka kixin tsjakjíyan tí ley tsík'etoan ch'in Moisés la ko tí nkehe kjuako tí sín k'uéchrónka itén Dios. Náhí. Jehya xikaha k'uinka kixin tsjakjíyan tíha. Náhí. K'uinka janhan kixin tsjakoqian nkehe chaxín t'axrjexín tíha.

18 Chaxín xrjanka kixin tí naxa tjen nkajní la ko chjasintajni la kohya ninkehó ley tsjínhya, mé tsjínhya nijnko punto la nijnko letra kuènté tí ley tsjixinjian tsoxiteyá kaín tí nkehe t'ichjánxin tsoxiteyá.

19 Mé xikaha tí nkexro tsitekakonhya tí nkehe k'ueñoan tí ley kjónté ijnko nkehe imá intsí, la ko chrókjuako kixin xikaha chrókuitekakonhya chojni, la jehe sín la imá tsontsí sín tí tsi tí kjuachaxin kuènte Dios. A ntá tí nkexro tsitekaon la ko tsjakohe ókjé nkexro tsitekaon sín, mé antsí imá ts'etoan sín tí tsi kjuachaxin kuènte Dios.

20 Méxra tjonkará kixin t'ichjánxin kixin antsí jína ts'ejorá la tsoyóahyará tí sín tjako ley la ko tí sín fariseo kixin tí tsoyóhará sín la ntá xitjahya tsákjára tí kjuachaxin kuènte Dios tjen nkaya nkajní.

*Kjuako ch'in Jesús kuènte tí kjuanínkaon
(Lc. 12.57-59)*

21 'Jahará tsíkinhínrá kixin tí sín ósé tsík'ítuenhen sín kixin: “T'oyánhyará kichuárá* kixin tí nkeexo t'oyán kichó mé t'ichjánxin tsjasóte sín.”

22 A ntá janhan tjonkará kixin jnkojín nkeexo tsonínkakonhen kichó mé t'ichjánxin tsjasóte. A ntá tí nkeexo t'ántaxínhin kichó la mé tí sín t'etoan mé sinchekitoexín ijje ch'án. La ntá tí nkeexo tsontáche kichó kixin tsixénká ch'án la tíha mé sátsji tsjasótexín tí siín xrohi.

23 A ntá tí tsjikuehérrá Dios nkehe tsochjehérrá ch'án ntá tsjasánrrá tí altar ntá tsoxráxinkáonrrá tí jnkojín kichuárá kjuánjonkoará sín

24 la ntá tí xikaha la titohérrá tí nkehe tí altar la sátsjirá tsonixjehérrá ch'án jnkojína kixin í tsokohya kjuanínkaon. La ntá tsjixin la ntá tsjihará tsjánjonrrá tí nkehe tjinkáonrrá tsjánjonrrá.

25 'Tí siín jnkojín nkeexo tjanchia jie tí jahará la tjinkaon chrókjuikoárrá ch'án juzgado, a ntá íchá jína jnkokoá chrókjuenkayáxinrrá, jehe ch'án la ko jahará, ntia ó, kixin ntá sáchrókjuihyará tí tjen ch'ín juez. Kixin sáchrókjuirá tí tjen ch'án ntá jehe ch'án ts'etuenhen ch'án tí policía kixin ts'ixenhenrrá ntoechiso.

26 A ntá chaxín tjonkará kixin tí ts'ikjahará sín ntoechiso la ts'axrjéxinhyará ntiha tsjixinjian tsjenkeherá sín kaín xín chichaon chontará.

Ch'ín Jesús kjuako kixin chrókjuasinhya sín jie, chróchóntahya sín chojni chjin ókjé

27 'Jahará tsíkinhínrá tí nkehe tsík'ítuenhen tí sín ósé ntáchro kixin: “Chrókjuásinhyará jie, chróchóntahyará chojni chjin ókjé.”†

28 A ntá janhan tjonkará kixin tí nkeexo tsokomá ijnko tjan ókjé tjak'e asén chrókuákja ch'án la ó kjuixin kjuasin ch'án jie nkaya asén ch'án.

29 'A ntá tí ikuan chjina chrókjuásixián jie la chrókuakitsjenkiá ikuan la chróchr'an ikjín kixin íchá jína ts'ítjáyán it'ò cuerpo kuéntá kixin jehya kuenté cuerpo kuéntá sátsji tsjasótexín tí siín xrohi.

30 A ntá tí itja chjina chrókjuásixián jie la chróchróchrínjian tí tjá a la chróchr'an ikjín kixin íchá jína ts'ítjáyán it'ò cuerpo kuéntá kixin jehya kuenté cuerpo sáchrókjuí tsjasóte tí siín xrohi.

*Ch'ín Jesús kjuako kixin chrók'uitjéhyá kichó sín
(Mt. 19.9; Mr. 10.11-12; Lc. 16.18)*

31 'Kjaxin tsík'ítuenhen tí sín ósé kixin tí nkeexo tjinkaon chrók'uitjéhi ichjién t'ichjánxin ts'óna xroon tsakja tí ichjién kixin ts'itjéxín kichó sín.‡

32 A ntá janhan tjonkará kixin ijnko nkeexo tsjákehe ichjién tí chróchóntahya tjan ókjé nkeexo la jehe ch'án kuítóhe ch'án tjan kixin tsjasin tjan jie. A ntá tí nkeexo tsotehe ijnko tjan tsíkítsínkehe la kjaxin ó kjuasin ch'án jie.

Ch'ín Jesús kjuako kixin chjiníhya chrók'uákjénxinni ihnié Dios

33 'Kjaxin tsíkinhínrá tsík'ítuenhen tí sín ósé kixin: “T'ichjánxin sinchexiteyará tí nkehe tsíntáchorá kixin chrók'uákjénxinhyará ihnié Ìnchéni chjiní.”§

34 A ntá janhan mé tjonkará kixin chrók'uákjénxinhyará ihnié Dios ninkehó la ko chrók'uákjénxinhyará nkajní kixin ntaha tjen Dios t'etoan.

35 La ko chrók'uákjénxinhyará chjasintajni kixin ntaha tjejókjén toté ch'án la ko chrók'uákjénxinhyará chjasin Jerusalén kixin ntiha la itjen tí Rey t'etoan.

36 La tjenkayáxixinhyará ikjárá ó kixin jahará xitjahya tsjakérrá ijnko kaxihi tjóá o nijnko kaxihi tié.

* 5:21 Éxodo 20.13; Deuteronomio 5.17 † 5:27 Éxodo 20.14; Deuteronomio 23.21 ‡ 5:31 Deuteronomio 24.1-4 § 5:33 Números 30.2; Deuteronomio 23.21

³⁷ Tí nkehe tsontáchrórá chaxín la chaxín la tí nkehe náhí la náhí la kohya nkehe chrókjuakét'oxinrá chróchronkará. A ntá ichrén nkehe tjakét'oxinrá tsochronkará la táha mé jínahya.

Ch'ín Jesús tjako ch'án kuènte tí sín t'itjáyenhya ichrén kjuanínkaon (Lc. 6.29-30)

³⁸ Jahará mé ó tsíkinhínrá tsík'ítuenhen tí sín ósé kixin tí takitsjenkí sín ikonrá la kjaxinrá chrókuakitsjenkírá ikon sín. A ntá tí chrókuakitsjenkí sín nènorá la kjaxinrá chrókuakitsjenkírá neno sín kjaxin.*

³⁹ A ntá janhan mé tjonkará kixin tí jnkojín nkexro ichrén nkehe jínahya sit'ahará la jahará ch'ehyará xíkaha. Náhí. Tí chjéhe ijnko nkexro ijnko tuāan la ntá tjóka tí í jnko nàngo tuāan.

⁴⁰ La tí síin jnkojín nkexro tjanchia jie la tjinkaon sín chrókuakitsjaha sín camisá la tjtóhé sín sátsjiko sín tí ka t'ínkayate kjaxin.

⁴¹ La tí t'etuānhanrá sín tsámárá nkehe ijnko kilómetro la tjakét'oxinrá í yaá kilómetro.

⁴² Tí jnkojín nkexro tsjanchia nkehe la tí tjinkaon ch'án nkehe la chróntáchrohyará kixin “náhí”, chrókjuinçekjenrá ch'án.

Tjuèhérá tí sín nínkakonhanrá sín (Lc. 6.27-28, 32-36)

⁴³ 'Kjaxin ó tsíkinhínrá tsík'ítuenhen tí sín ósé kixin: “Tjuèhérá tí nkexro choxinrá la tsoninkákonhénrá tí sín jínahya kjuít'ahará.” †

⁴⁴ A ntá janhan mé tjonkará kixin chrótjuèhérá tí sín nínkakonhanrá la chrókjuincheyaonrá tí sín jínahya kjuít'ahará la jína chrókjuinkitsará tí sín tjinkakonhya tí jahará la chrónixjehérá Dios kixin chrókjuinkitsa ch'án tí sín t'ántaxínhanrá la ko tí sín t'ahará tí jínahya.

⁴⁵ Tí xíkaha sich'erá la ntá jahará chaxín xjeen It'eni tjen nkaya nkajní kixin jehe ch'án mé t'etoan ch'án tsjiton yaon ts'inkaséyenhen tí sín jínahya la ko tí sín jína la ko kjaxin t'etoan ch'án kixin ts'aniá ichrin tí síin tí sín jína la ko tí sín jínahya.

⁴⁶ Tí jehó tjuèhérá tí nkexro tjuàhará, ¿la ntá nkehe chrókjuachará? A ntá kjaxin tí sín nchekjènkí la xíkaha ch'e sín.

⁴⁷ La tí jehó nixjehérá tí sín kichuárá la ntá, ¿á chaxín imá jína tíha ní? Kixin tí xíkaha la kjaxin tí sín chónhya Dios la xíkaha ich'e sín.

⁴⁸ Kjaxinrá jahará ntoá chrók'uejorá kixin It'eni tjen nkaya nkajní la antsí má ntoá tjen ch'án.

6

Kjuako ch'ín Jesús kuènté tí xra jína

¹ Chrókjuásixínhyará kjuaxroan tí nkehe tinkachónkirá kixin tjinkáonrá chrók'uikon chojni ó. A ntá jahará tí xíkaha chrókjuich'erá ntá It'eni tjen nkaya nkajní la ninkehó nkehe tsotjáhyará ch'án.

² Tí tjínkitsará ijnko chojni nòa la ninkexró chróchenkahyará. Jahará chrókóyóahyará tí sín ntoáhya tjenkayáxin ixri t'óxroan kixin mé xíkaha ch'e sín t'óxroan sín nkaxenhen nínko la ko tí ntia kixin chrók'uikon chojni la chrókjuikosáyehe sín tí jehe sín kixin jína tjejóch'e sín. A ntá janhan ntáxrjan kixin ó kjuixin k'uáyéhe sín nkehe la í ts'áyèhya sín ínaá.

³ A ntá tí jahará tió chrókjuínkitsará ijnko chojni chaxín nòa la íchá jína kixin chrókónoehya ninkexró kjónté ijnko nkexro tjuá jína.

* 5:38 Éxodo 21.24; Levítico 24.20; Deuteronomio 19.21 † 5:43 Levítico 19.18

⁴ A ntá jahará tí chrókjuánjonrá ichrén nkehe la ninkexró chrókónoehya la ntá tí It'éni ts'ikon ch'án kixin xikaha ch'erá la ninkexró noehya la ntá tí jehe ch'án mé tsotjáhará ch'án nkehe.

*Tjako ch'ín Jesús nkexrí tsonixjeheni Dios
(Lc. 11.2-4)*

⁵ 'A ntá tió nixjehérá Dios la jehya éxi tí sín jnkojínxónhya tjenkayáxin sín chrónixjará. Jehe sín mé tóxrjínhin sín ts'ejóxin toté sín nkaxenhen ninko la ko ts'ejó sín esquina calle kuènte ntašin kixin ts'ikon kaín chojni kixin tjejónixjehe sín Dios. Ntá janhan chaxín ntáxrjan kixin jehe sín la xikaha kjuích'e sín la ó kjuixin k'uáyéhe sín nkehe la í ts'áyèhya sín inaá.

⁶ A ntá tió nixjehérá Dios la t'ixenhénrá nchia ntoará la t'ikjehérá tí puerta la nixjehérá It'éni kixin ntaha tjekoará ch'án. A ntá jehe ch'án ts'ikon kixin xikaha ninkexró ts'ikonhya ntá jehe ch'án tsjanjon ch'án nkehe ts'ayéhérá.

⁷ 'Ntá tió chrónixjehérá Dios la chrókjateehya chrónixjará kixin chrókóyóahyará éxi tí sín chónhya Dios kixin jehe sín tjenkayáxin sín kixin nchónhya tsonixja sín, la mé xikaha mé chrókuinhin Dios, ichro sín.

⁸ A ntá jahará chrókóyóahyará éxi tí jehe sín. It'éni ó nohe ch'án nkehe t'ichjánxinhanrá kjónté naxa tjanchéhyará ch'án.

⁹ Méxra xikihi chróntáchorá:
It'éni tjen nkaya nkajní jaha imá tjóá.

¹⁰ Chrókui tí kjuachaxin kuènta.

Chrókjuích'e tí nkehe tóxrjínhan jaha ntihi chjasintajni éxi tjech'e nkaya nkajní.

¹¹ Ijie la tsjánjuan tí niotja t'ichjánxinhinni.

¹² T'oxíka tí nkehe jínahya kjuích'eni kixin kjaxin jeheni ts'itjáyenheni tí nkehe kjuích'eheni chojni.

¹³ Títoéhyani kixin xrahya chrókjuasinni jie. Nchekaáni kaín tí jínahya chrókónheni,

kixin jaha mé kuèntá tí kjuachaxin kixin ó noheni kixin jaha tjetétoan tí kjuachaxin jnkochrín. Amén.

¹⁴ 'Tí jahará ts'itjáyanhanrá tí nkexro kjuasinhánrá ichrén jie la mé kjaxin It'éni tjen nkaya nkajní mé ts'ikon ch'án kixin xikaha kjuích'erá la ntá kjaxin jehe ch'án ts'óxíka ch'án tí jie kjuásinrá.

¹⁵ A ntá tí jahará ts'itjáyanhyará tí jie kjuasinhánrá í jnko chojni la ntá kjaxin It'éni tjen nkaya nkajní ts'ikon kixin xikaha kjuích'erá k'uitjáyanhyará la ntá kjaxin jehe ch'án la ts'óxíkahya ch'án tí jie chontará.

Ch'ín Jesús kjuako kixin chrók'óxroanhya sín kixin kjónehya sín

¹⁶ 'A ntá tí jahará tí naxa kjóntehyará kixin tjinkáonrá tsonixjehérá Dios la ntá chrók'uejohyará éxi t'avará éxi ch'e tí sín jehya jnkojínxón tjenkayáxin sín. Mé xikaha ch'e sín kixin tjinkaon sín ts'ikon chojni kixin naxa kjónehya sín. Tí xikaha ch'e sín la janhan ntáxrjan kixin ó kjuixin k'uáyéhe sín nkehe la í ts'áyèhya sín inaá.

¹⁷ A ntá tí jahará kjónté naxa kjóntehyará kixin tjinkáonrá tsonixjehérá Dios la t'ontirá ikonrá la tjéntoará kjará

¹⁸ kixin tsonoehya chojni kixin naxa kjóntehyará. Jehó It'éni tjekoará ntiha mé jehe ch'án nohe ch'án xikaha ntá tsjanjon ch'án nkehe ts'ayéhérá.

*Tí nkehe chaxín tje te síin nkaya nkajní
(Lc. 12.33-34)*

19 'Jahará chrókjuásitonhyará nkehe tjete ntihi chjasintajni kixin ntihi la ts'ín kué tí nkehe tjete sinchek'itjáyanhanrá va la ko tsochjisen tí chichaon la ko xíchee ts'ixenhen tsaáhará.

20 Íchá jína tjásitonrá tí nkehe tjete nkaya nkajní kixin ntaha kohya iko sinchek'itjáyan nkehe la tsochjisenhya tí nkehe la ko kohya xíchee ts'ixenhen tseeé.

21 A ntá tí nkaya nkajní tsochontará nkehe tjete la ntá tí nkehe tjenkayáxinrá la kjaxin ntaha tjen.

Tí xrohi t'inkaséyanxín cuerpo
(Lc. 11.34-36)

22 'Tí ikonrá mé éxí yóhe ijnko xrohi t'inkaséyanxín tí cuerpo kuèntará. Tí jína ikonrá la ntá kjaxin kuènté ti cuerpo kuèntará mé chóna xrohi.

23 A ntá tí ikonrá la jínahya la ntá kuènté tí cuerpo kuèntará la sítié tjen. A ntá tí chrókjuak'ehya tí xrohi la ntá antsí má chrókjuinchetié tí sítié.

Dios la ko tí chichaon
(Lc. 16.13)

24 'Kohya ninkexró tsjacha sich'ehe xra yaá lamó. Tí xikaha chrókjuich'e ch'án la ntá ijnko tsonínkakonhen ch'án la tí í jnko tsotjuèhe ch'án o ijnko la tsitekakonhen ch'án la tí í jnko la tsitekakuenhya ch'án. Méxra xitjahya chrókjuich'ehe chojni xra Dios tí tjinkaon sín chróchóna sín itsjé chichaon.

Dios mé t'áyakonhen tí xjeen ch'án
(Lc. 12.22-31)

25 'A ntá ntáxrjan kixin chrókóxakuanhyará tí nkehe chrókjónterá o tí nkehe chrók'uirá o tí ka chrók'uitsará. ¿Á jehya antsí má sínkí tí kjuachón chróchontará, a ntá kánhyó sínkí tí nkehe chrókjónterá, la á jehya antsí má sínkí tí cuerpo kuèntará, a ntá kánhyó sínkí tí ka chrók'uitsará?

26 Xráxinkáonrá nkexrí síin tí koxroxé xritjaka. Jehé va la t'enkahya va noa la ko tjáhya va la ko chóntahya va nketí ts'inkachjinayá va tí noa, la kjánchó It'éni tjen nkaya nkajní la tjanjon ch'án nkehe sine va. A ntá jahará mé antsí tjetoan a ntá tí koxroxé la kénhyó.

27 ¿Á tjejó jnkojínrá tjenkayáxinrá kixin tí chrókóxakonhanrá imá a ntá naxa chrók'uankirá it'o metro ntetoxinrá inaá?

28 '¿Nkekuènté kixin imá tóxakonhanrá ikará ó? Tsjehérá nkexrí sít'ánkí tí catsjo síin nteje. Tí itsjo la ní ch'ehya xra la ko tjonhya.

29 La tjonkará kixin kjónté ch'ín rey Salomón k'uéchóna itsjé chichaon la naxa kjuíncheyóehya ch'án nkexrí náxrjón tsjehe tí tsjo a.

30 A ntá tí Dios la nchek'itsa tí ka yoa síin nteje kjónté ijie síchón ka la ntóye tsochexín tí nkaxenhen tja, a ntá jahará mé antsí chrókjuintak'itsará ch'án. ¿A ntá nkekuènté títekákonhyará ch'án?

31 Méxra xikaha chrókóxakuanhyará chrókjuanchankíhyará kixin nkehe chrókjónterá o nkehe chrók'uirá o nkehe chrók'uitsará.

32 Kaín tí nkehe la tí sín chónhya Dios mé tóxakonhen sín tíha. A ntá jahará chontará It'éni tjen nkaya nkajní la mé nohe ch'án kaín nkehe t'ichjánxinhanrá.

33 A ntá senó mé chrókjuéyará tí kjuachaxin kuènté Dios la chrókjuínchexiteyará tí nkehe jína tjinkaon ch'án, a ntá jehé ch'án mé tsjanjon ch'án kaín nkehe t'ichjánxinhanrá.

34 Tóxakuanhyará tí nkehe tsonhen ntóye xikaha kixin ntóye la í jnko yaon táha la jnkojnko yaon tjikao kjuaxikaon kuènte.

7

*Chrók'uantaxíenhyará kíchuára**(Lc. 6.37-38, 41-42)*

¹ 'Chrókuékahyará ókjé chojni jie kixin ntá Dios kjaxin chrókjuanchahya jie tí jahará.

² A ntá Dios la tsjanchia ch'án jie tí jahará tí tsékará ókjé chojni jie. A ntá tí xikaha sich'erá la mé xikaha tsonhanrá kjaxin.

³ ¿A ntá nkekuènte tsjehé tí chjínínó ntsí tjenkánkí ikon tí kichuá tí naxa ántosán tí inta jie tjenkánkí ikuan?

⁴ A ntá tí chonta jaha tí nta jie tjenkánkí ikuan, ¿a ntá nkexrí kixin chróntáche tí kichuá kixin: "Títohé tsakitsjenkíni tí chjínínó ntsí tjenkánkí tí kuan?"

⁵ A ntá jaha la ntoáhya tjenkayáxian. Senó chrókuakitsjenkiá tí nta jie tjenkánkí ikuan kixin ntá chrók'uikuan tsakitsjenkiá chjínínó ntsí tjenkánkí ikon tí kichuá.

⁶ 'Chróchjeéhyará tí nkehe tsikótjóá tí koniá kixin jehe va tsokjan va tsonínkakonhanrá va ntá sinchekuenrá va. La ko kjaxin chróchjeéhyará tí cochíno tí xro perla tjete kixin tsinkátja va la tsokuen.

*Tjanchia la tjeyá la t'inka puerta**(Lc. 11.9-13; 6.31)*

⁷ 'Tjanchiará nkehe la Dios tsotjáhará. Tjeyará nkehe la ts'itjará. T'inkará puerta la ntá tsoxitjehe.

⁸ Kixin tí nkexro tjanchia nkehe la ts'áyéhe tí nkehe la tí nkexro tjeyá nkehe la ts'itja la tí nkexro t'inka puerta la tsoxitjehe.

⁹ '¿Á tjejó jnkójín nkexro ntihi chrókjuanjon xro chrókjóne xjeen tí chrókjuanchia xjan niotja? Kja náhi.

¹⁰ Q tí chrókjuanchia xjan ijnko koche la, ¿á chróchjehe ch'án tí xjeen ch'án konche chrókjóne ní? Kja náhi.

¹¹ A ntá jahará kjónté jínahyará la ó nohará nkehe jína chjehérá xjaanrá. A ntá It'eni tjen nkaya nkajni kjaxin antsí tsochjehe ch'án nkehe jína tí nkexro tsjanchia nkehe.

¹² 'Méxra xikaha chrókjuíkosáyehérá kíchuára éxí yóhe nkexrí tjinkáonrá chrókjuíkosáyahará sín mé xikaha k'uetóan ch'in Moisés la ko xikaha ntáchro tí xroon kuente tí sín k'uéchrónka itén Dios ósé.

*Tí puerta tekahya**(Lc. 13.24)*

¹³ 'T'ixeenxínrá tí puerta tekahya. Kixin tí puerta la ko tí ntia ts'itjáyanxín chojni la imá iton la ko teka la nchónhya chojni sátsji tí ntia ntiha.

¹⁴ A ntá tí puerta la ko tí ntia sátsjixinni tí kjuachón la tekahya ntiha la ko tsjéhya chojni ts'itja tí ntia a.

*Tí to mé tjátsoanxínni tí nta**(Lc. 6.43-44)*

¹⁵ 'Méxra tóxakonhanrá tí ts'ikonrá itsi tí sín ch'ia tsontáchro sín kixin kjaxin sín nixja sín itén Dios. Jehe sín la chrítaón ó tjoé kolélo ó, a ntá nkaya la kolobo jiehe.

¹⁶ Jahará la chrókjuátsoanxínrá tí jehe sín kixin tí xra ch'e sín kixin tí ntach'i la xitjahya chrók'óna to uva la ko tí kach'i xitjahya chrók'óna to higo.

¹⁷ Méxra kaín inta jína la t'óna to jína la ntá tí nta jínahya la kjaxin tí to la jehya to jína.

¹⁸ Tí nta jína la xitjahya chrók'óna to jínahya, la ko tí nta jínahya xitjahya chrók'óna to jína.

¹⁹ Kaínxín tí nta t'ónahya to jína mé tsochrínjin la tsoche.

²⁰ Mé xíkaha chrókjuatsoanxínrá jahará tí sín jehya jína kíxin tí xra tjejóch'e sín.

Jehya kaín chojni ts'ixenhen tí kjuachaxién Dios tjen nkaya nkajní
(Lc. 13.25-27)

²¹ 'Kénhya chojni tsontácho: “Ìnchéni, Ìnchéni”, mé ts'ixenhen sín tí kjuachaxién Dios tjen nkaya nkajní. Náhi. Jehó tí nkexro sinchexiteyá tí nkehe tóxrjínhin T'aná t'etóan tjen nkaya nkajní.

²² Tsjixraká tí yaon a la ntá itsjé sín tsontácho sín kíxin: “Ìnchéni, Ìnchéni, k'uénixjaxínni ihniá la ko tí ihniá mé kuakitsjexínni nchakuen tí jínahya la ko kjuachaxién ihniá kjuasixínni nchónhya kjuaxroan.”

²³ A ntá janhan tsjataha kíxin: “Janhan la chonhya tí jahará. Tìtonará sátjirá kíxin jahará imá jínahyará.”

Ch'ín Jesús kjuíncheyóexin ch'án kíxin yaá nchia
(Lc. 6.47-49; Mr. 1.22)

²⁴ Méxra tí nkexro tinhin tí nkehe ntáxrjan la titekaon ch'án la jehe ch'án mé éxí yóhe ijnko nkexro chóna kjuaxrexinkaon jína la kjuích'éna nchia chrítaón tjo.

²⁵ A ntá xrínahya xrakoa chrin, ikui yeé ntāninche la tjan chjéhe xrinto la kjónté xíkaha la xíkaha tí nchia kíxin itjo tjejen nchia.

²⁶ A ntá tí nkexro tinhin tí xrjanka la titekakonhya mé jehe la éxí yóhe ijnko nkexro lontí la kjuích'éna ch'án ijnko nchia tí síin nchesen.

²⁷ La ntá xrínahya xrakoa chrin ntá antsí kóyeé ntāninche tí tsaka la ko chjéhe xrinto la ntá xíka tí nchia, la ijnko kjuachakon kónhen tíha.

²⁸ A ntá tió kjuixin nixja ch'ín Jesús la ntá imá chrakon tí chojni kíxin nkexrí kjuako ch'án.

²⁹ Kíxin kjuako ch'án éxí ijnko nkexro chóna imá kjuachaxin la tóyóehya ch'án tí sín maestro kjuako tí ley.

8

Ch'ín Jesús kjuínchekitōhe jína ijnko chojni chóna chin lepra
(Mr. 1.40-45; Lc. 5.12-16)

¹ A ntá ch'ín Jesús k'uínkajinxin ch'án tí jna la chréhe nchónhya chojni.

² La ntá kóchjina ijnko ch'ín níhi chóna chin lepra la kjuák'exín toh'in ch'án nkayakon ch'ín Jesús la ntácho ch'án kíxin:

—Ìnchéni tí tjinkávan la jína chrókjuínchekitōhéni jína —ichro ch'án.

³ Ntá ch'ín Jesús mé kjuak'etja itja ch'án chrítaón tí ch'ín a la ntácho ch'án kíxin:

—Méxra xíkaha tjínkavan. Ntá jie sintakitōha jína.

A ntá tuénxín kuítóhe ch'án jína la ó kjuin tí chin k'uéchóna ch'án.

⁴ La ntá ntácho ch'ín Jesús kíxin:

—Ninkexró chenkahya ntihi. Jehó sátjia tjácohé tí ch'ín nchat'á kíxin kuítóha jína la ko sátjíkoa tí nkehe tsík'etóan ch'ín Moisés* kíxin ntá xíkaha tsonoexín kaín xín chojni kíxin ó kuítóha jína —mé xíkaha k'uetoan ch'ín Jesús.

Ch'ín Jesús kjuínchekitōhe jína ijnko nkexro ch'ehe xra ijnko capitán romano
(Lc. 7.1-10)

⁵ A ntá tió k'uixenhen ch'ín Jesús chjasin Capernaum la ntá xrínahya kóchjina ijnko capitán romano la chróna ch'án

⁶ ntácho ch'án kíxin:

* 8:4 Levítico 14.1-32

— Ìnchéni ntoeni itjen ijnko ch'ín ch'ehe ni xra mé níhi ch'án, tjetsínka ch'án, tsík'en toté ch'án la imá tjotéhe ch'án — ichro ch'án.

⁷ A ntá ch'ín Jesús kjuátehe ch'án ntáchro ch'án kixin:

— ¿Á sátsjia sintakitoha jína tí ch'ín a? — ichro ch'án.

⁸ Ntá tí ch'ín capitán kjuátehe kixin:

— Náhí, Ìnchéni, tósuèheni kixin chrók'uixenhén ntoeni kixin jehya chojni jínani. Jehó chrókjuánjuan kjuachaxin kuéntá, ntá tí ch'ín ch'ehe ni xra chrókuitohe ch'án jína.

⁹ Janhan na kjaxin chonta chojni t'etuanna la ko kjaxin janhan tétuannahán tí sín soldado. Tió tétuannahán ijnko sín sátsji sín la ntá ó sátsji sín. La kjaxin tió tétuannahán ijnko sín kixin xrakoa sín la mé tji sín. La ko tió tétuannahán ijnko nkexro ch'ena xra kixin sich'e xra la ich'e xra — ichro ch'án.

¹⁰ Ntá kuínhin ch'ín Jesús ntá kóxakonhen ch'án kixin xikaha chro tí ch'ín a, ntá nixjehe ch'án tí sín chréhe ch'án ntáchro ch'án kixin:

— Chaxín ntáxrjan kixin kuenté tí nación Israel la k'uitjahya janhan ninkexró tinkáchónki xikaha éxí tinkáchónki tí ch'ín i.

¹¹ Janhan xrjanka kixin nchónhya chojni ókjé tjixin tí tjitoxin yaon la ko tí tjiátóxin yaon la sineko sín tí ch'ín Abraham la ko Isaac la ko Jacob tí tjen tí kjuachaxin kuènte Dios.

¹² A ntá itsjé tí sín chrók'uejó tí tjen tí kjuachaxin kuènte Dios la ts'axrjexín sín ntiha, sátsji sín tí sítié la ntaha tsotsjánka sín la sinetaón neno sín.

¹³ La ntá ch'ín Jesús mé nixjehe ch'án tí ch'ín capitán ntáchro ch'án kixin:

— Sátjia ntóa. Éxí kuítekávan jaha la tsoxiteyá tsonhen tíha — ichro ch'án.

La ntá tí ch'ín ch'e xra la o tuénxín tí hora a tsíkitohe ch'án jína.

Ch'ín Jesús kjuínchekitohe ich'ee ch'ín Pedro jína

(Mr. 1.29-31; Lc. 4.38-39)

¹⁴ A ntá sákjuí ch'ín Jesús tí ntóe ch'ín Pedro la ntaha k'uikon ch'án kixin tí ich'ee ch'ín Pedro la níhi tjan tjetsínka tjan la chóna tjan sóa.

¹⁵ Ntá itsé ch'án itja tjan la ntá kjuínhin tjan tí sóa la ntá k'uínkatjen tjan la kjuankixin yaxínhin tjan kixin tsjanjon tjan nkehe sine sín.

Ch'ín Jesús kjuínchekitohe nchónhya tí sín níhi jína

(Mr. 1.32-34; Lc. 4.40-41)

¹⁶ La ntá tí ó kóntanonte ntá kjuikohe sín ch'ín Jesús nchónhya chojni chóna nchakuen tí jínahya. La ntá jnkokoá nixja ch'án la k'uaxrjexín tí nchakuen tí jínahya tí jehe sín la kjaxin kjuínchekitohe ch'án jína kaín tí sijníhi.

¹⁷ Mé xikaha kjuích'e ch'án kixin tsoxiteyá tí nkehe tsíchrónka tí ch'ín Isaías tí ch'ín k'uéchrónka itén Dios. Mé ntáchro ch'án xikihi: “Jehe ch'án kuákja ch'án tí chin chóntani la ko jehe ch'án kuámá ch'án tí kjuatjoté.”† Mé xikaha ichro itén Dios.

Tí sín tjinkaon tsochréhe tí ch'ín Jesús

(Lc. 9.57-62)

¹⁸ Tió k'uikon ch'ín Jesús kixin nchónhya chojni k'uántatjen sín ch'án la ntá k'uetóan ch'án kixin ts'átòye sín í jnko chrínta nta.

¹⁹ La ntá ijnko tí sín maestro tjako tí ley mé kóchjinehe ch'án tí ch'ín Jesús la ntáchro ch'án kixin:

— Maestro tjinkaonni chróchréheni tí jaha kjónté nketí tjinkávan sátsjia — ichro tí ch'ín a.

²⁰ La ntá kjuátehe ch'ín Jesús ntáchro ch'án kixin:

† 8:17 Isaías 53.4

—Tí koxróntá chóna va itjueé va la ko tí koxroxé chóna va káké va. A ntá tí Xjeen Dios K'óna Chojni mé chóntahya nketí ts'ok'èxin ch'án.

²¹ A ntá ijnko tí chojni k'uájiko ch'án, mé ntáchro ch'án kixin:

—Ìnchéni, tìtòhéni senó sátsjikjáváni it'èni —ichro ch'án.

²² La ntá kjuátehe ch'ín Jesús ntáchro ch'án kixin:

—Náhí, chréhé tí janhan. Tìtòhé kixin tí chojni tsík'en la jnkokón sín tsík'en tsjavá kichó sín —mé xikaha ichro ch'ín Jesús.

Ch'ín Jesús kjuínchek'ixrata tí xrìnto la ko tí nta

(Mr. 4.35-41; Lc. 8.22-25)

²³ Ntá ch'ín Jesús k'uixenhen tí ntabárcò la k'uixenko ch'án tí sín k'uájiko ch'án.

²⁴ La ntá xrinahya imá síchrica ntà la ó chjina sítikia ntà tí ntabárcò. La kjánchó ch'ín Jesús la tjejua ch'án.

²⁵ La ntá tí sín k'uájiko ch'án kjuínchek'àya sín ch'án la ntáchro sín kixin:

—Ìnchéni nchekaáni kixin tí ntabárcò la ó meró ts'aniánkí ntà —ichro sín.

²⁶ Ntá kjuátehe ch'án ntáchro ch'án kixin:

—¿Nkekuènté kixin imá chrakonrá? Intsíkoá tinkachónkirá Dios —ichro ch'án.

Kjuixin ntáchro ch'án xikaha ntá k'uàya ch'án la k'uètuènen ch'án tí xrìnto la ko tí ntayaon la ntá tuénxín k'uixrata.

²⁷ La ntá imá chrakon sín la ntáchro sín kixin:

—¿Xá nkexro tíhi? Kjonté xrìnto la ko ntayaon la mé nchexiteyéhe ch'án —ichro sín.

Tí sín chóna nchakuen tí jínahya tí nonte Gadara

(Mr. 5.1-20; Lc. 8.26-39)

²⁸ Ntá tió k'uátòye ch'ín Jesús tí ntayaon a ntá kjuíji sín tí nonte Gadara. La ntá yaá chojni chóna nchakuen tí jínahya k'uaxrjexín tòyé chojni tsík'en la kóchjinehe sín ch'án. Jehe sín mé imá jìehe sín la kohya ninkexró tjacha ts'atsínka tí ntja ntiha.

²⁹ La ntá kjuankíxin k'óyako sín ntáchro sín kixin:

—Tjiatéhya jaha tí jeheni jaha Jesús mé Xjeen Dios. ¿Á k'uinka ntihi kixin sínchekjasóteni kjónte naxa kjuixrakáhya tí yaon tsjasóteni? —ichro sín.

³⁰ A ntá ntiha kánhyó kjín síin itsjé cochíno xrine va.

³¹ La ntá tí nchakuen tí jínahya mé chrónóehe tí ch'ín Jesús kixin:

—Tí tsétoan kixin sátsjini la chrókjuánjuan kjuachaxin chrók'uixenhenni tí cochíno —ichro sín.

³² Ntá ntáchro ch'ín Jesús kixin:

—Tí xikaha la sáttja —ichro ch'án.

La ntá tí nchakuen tí jínahya a mé k'uaxrjexín tí chojni la k'uixenhen tí cochíno. La ntá kaín xín tí cochíno kuinká va, k'uínkajìnxìn va ntiha kjuítsínkayá va tsaka, ntá kjuítsínkankí va ntà, kjuínhin va ntà.

³³ La ntá tí chojni t'ayakonhen tí cochíno mé chrakon sín ntá kuinká sín sákjuí sín chjasin la kjuankíxin chrónka sín kaín tí nkehe kónhen la ko kaín nkehe kónhen tí sín k'uéchóna tí nchakuen tí jínahya.

³⁴ A ntá kaín tí sín chjasin ntiha sákjuítsjehe sín ntá kjuíji sín tí tjen ch'ín Jesús ntá k'uíkon sín kixin xikaha tsíkónhen la chrónóehe sín ch'án kixin sáchrókjuí ch'án ókjé.

9

Ch'ín Jesús kjuínchekìtohe jína ijnko chojni tsík'en toté

(Mr. 2.1-12; Lc. 5.17-26)

¹ La ntá kjuixin tíha ntá ch'ín Jesús mé k'uíxenhén ch'án ijnko ntabárc̄o la k'uátsínka ch'án í jnko lado chrínta ntá la kjuíji ch'án chjasén ch'án.

² A ntá ntiha kuikao sín ijnko ch'ín tsík'en toté la tjetsínkaták'á ijnko kania. Ntá k'uíkon ch'ín Jesús kíxin chaxín tinkáchónki sín ch'án la ntá nixjehe ch'án tí s̄inníhi ntáchro ch'án kíxin:

—Xjeenni nchechéhé asán. Tí jie chonta la ó kjuixin kjuínhan —ichro ch'án.

³ La ntá iso tí sín maestro tjako tí ley mé jehó sín ikjo sín asén sín, ntáchro sín kíxin:

—Tí ch'ín i mé ncheyóhe ch'án asén ch'án Dios kíxin xikaha nixja ch'án.

⁴ Ntá ch'ín Jesús mé ó nohe ch'án kíxin nkehe tí kjo sín asén sín ntá ntáchro ch'án kíxin:

—¿Nkekuènté kíxin xikaha jínahya tjenkayáxinrá?

⁵ ¿Nkehe antsí xrahya chróntátjan ch'án? ¿Á antsí xrahya chróntátjan ch'án kíxin ó kjuixin kjuínhin ch'án tí jie yámá ch'án o á antsí xrahya chróntátjan ch'án kíxin chrók'uínkatjen ch'án sáchrókjuí ch'án?

⁶ Méxra tsjákoxian kíxin tí Xjeen Dios K'óna Chojni mé ntihi chjasintajni chóna kjuachaxin tsjakjínhin ijje chojni.

Ntá ntáche ch'án tí s̄inníhi a kíxin:

—Ijie la t'inkatjen tjatsíyan kaniãa na sátsjia ntoã —ichro ch'án.

⁷ Ntá tí ch'ín tsík'en toté na tuénxín k'uínkatjen ch'án la sakjuí ch'án ntoe ch'án.

⁸ Ntá kaín tí sín siín ntiha k'uíkon sín kíxin xikaha kónhen la imá chrakon sín la kjuanchehe sín Dios kjuasáya kíxin tí nkexro imá kjuakoxin ch'án kjuachaxin kuènte Dios.

Ch'ín Jesús k'uíyehé ch'án tí ch'ín Mateo

(Mr. 2.13-17; Lc. 5.27-32)

⁹ A ntá ch'ín Jesús sákjuixín ch'án ntiha la k'uíkon ch'án ijnko ch'ín it'in Mateo tjetjaxin ch'án ntiha nchekjènkí ch'án. Ntá ntáchro ch'ín Jesús kíxin:

—Chrèhé tí janhan —ichro ch'án.

Ntá ch'ín Mateo tuénxín k'uínkatjen ch'án chrèhe ch'án tí ch'ín Jesús.

¹⁰ A ntá chr'éxin ch'ín Jesús kjuák'e ch'án ntoe tí ch'ín Mateo la ntaha xranjon nkehe sine ch'án la ntá itsjé tí sín nchekjènkí la ko í so sín chóna jie mé kjuíji sín la kjaxin kjóneko sín tí ch'ín Jesús la ko tí sín k'uájiko ch'án.

¹¹ La ntá tí sín fariseo kjaxin k'uíkon sín xikaha la kjuanchankíhi sín tí sín k'uájiko ch'ín Jesús, ntáchro sín kíxin:

—¿Nkekuènté kíxin tí ch'ín maestro kuèntará mé neko ch'án tí sín nchekjènkí la ko tí í so sín chóna jie? —ichro sín.

¹² Ntá ch'ín Jesús la kuínhin ch'án nkehe tí tjo sín la ntáchro ch'án kíxin:

—Tí sín níehya la t'ichjánxienhya sín nkexro sich'e xroã. Náhí. Jehó tí chojni níhi mé t'ichjánxínhin sín nkexro sich'ehe sín xroã.

¹³ Sátjirá la ts'ítjará nkexrí t'axrjexín tí nkehe ntáchro xroon itén Dios. Mé ntáchro kíxin: “Janhan tjínkavan kíxin chrókjuánjonrá.”* Mé xikaha ichro itén Dios. Janhan na k'uinkahya ntihi kíxin chrók'uíyahã chojni jína tjejó. Náhí. K'uinka kíxin ts'íyahã tí chojni chóna jie kíxin chrókuítøhe sín tí ijje sín ntá chrókjuinkí sín tí tjenkayáxin sín —ichro ch'án.

Kjuanchankí sín kuènte tí nehya sín

(Mr. 2.18-22; Lc. 5.33-39)

¹⁴ Ntá iso tí sín k'uék'ajiko tí ch'ín Juan Bautista mé kóchjinehe sín ch'ín Jesús la kjuanchankíhi sín ch'án, ntáchro sín kíxin:

* 9:13 Oseas 6.6

—Jeheni la ko tí sín fariseo la jnkoyaxon nehyani, a ntá tí sín xrikoá la, ¿nkekuènte xikahya ch'e sín? —ichro sín.

¹⁵ Ntá kjuátehe ch'ín Jesús, ntáchro ch'án kixin:

—¿Xá chrók'uává kaín tí sín tsík'íyehé sín tsochjina tsoṭehé ijnko chojni kixin naxa tjen tí ch'ín tsíkóṭehé tjejóko sín ntiha? A ntá tsjixraká ijnko yaon tsotsé sín tí ch'ín tsíkóṭehé sátsjiko sín ch'án ntá kaín tí sín tsíkóchjina mé ts'ává sín la í sinehya sín.

¹⁶ 'Nijnko chojni chrókjuak'eniehe tí ka ó ntaxin it'ò ka nixin kixin ntá chrókjuixéhe tí ka nixin chrók'uitjjan tí ka ntaxin ntá antsí má chrók'uichje.

¹⁷ La ko kjaxin éxí yóhe chrókuikiahya chojni xranvino nixin ijnko tjuaxran ó ntaxin kixin tí xikaha chrókjuich'e sín ntá chrók'uichje ti tjuaxran ntaxin. Ntá chrók'uitjyan tí xran la ko chrok'uitjyan tí tjuaxran. Ntá tí xranvino nixin chrókuikia ijnko tjuaxran nixin la ntá xikaha la yóí nkehe chrók'uitjyanhya.

Ch'ín Jesús kjuínchexechón tí tjachjin xjeen ch'ín Jairo la ko kjuínchekitohe jína ijnko tjan kuákóxín iké ch'án

(Mr. 5.21-43; Lc. 8.40-56)

¹⁸ Ntá naxa tjenixja ch'ín Jesús la ntá ikjui ijnko ch'ín t'etoan kuènte tí sín judío la kjuák'exín toch'in ch'án nkayakon tí ch'ín Jesús la chrónóehé ch'án kixin:

—Tí xjanna na ntá kjuixin k'uén. Xrjanóaha sáchrókjuini chrókjuakétja tjá jehe tjan ntá chróxechón tjan —ichro ch'án.

¹⁹ Ntá k'uínkatjen ch'ín Jesús ntá sákjuíko ch'án tí ch'ín a la ko sákjuíkotoxin ch'án tí sín k'uájiko ch'án.

²⁰ A ntá itjen ijnko chojni chjin níhi tjan, ó teyó nánó chóna tjan ijnko chin ts'ítji tjan jni. Ntá kóchjina tjan nóton tí ch'ín Jesús ntá kuákóxín tjan tí iké ch'án

²¹ kixin tjenkayáxin tjan kixin kjónté chrínta iké ch'án ó chrókuákóxín tjan, la táhó chrókuítōexín tjan jína.

²² Ntá nkátjía ch'ín Jesús la k'uíkon ch'án tí tjan a ntá ntáchro ch'án kixin:

—Xjeenni, nchechéhé asán jaha. Jaha la ó kuítóha jína kixin kuítekávan tí janhan —ichro ch'án.

Na ntá tuénxín ó kuítóhe tjan jína.

²³ Ntá tió kjuíji ch'ín Jesús ntōe tí ch'ín judío t'etoan la k'uíkon ch'án kixin ó yaxínhin tí sín músico kixin ó sátsjixravá xjan. La kaín tí chojni tsíkójnkotsé la tsjánkàma sín xjan.

²⁴ La ntá ntáchro ch'ín Jesús kixin:

—Tí xjan méhe tjtōhéra, kixin tsík'enhya xjan, la tjejua xjan ó —ichro ch'an. Ntá kjuanoá sín ch'án.

²⁵ A ntá tí k'uaxrje kaín chojni la ntá ch'ín Jesús la k'uíxenhén ch'án la itsé ch'án itja tí tjan a la ntá tuénxín k'uínkatjen tjan.

²⁶ Ntá kuenté chjasin ntiha la kuínhin sín kixin xikaha kónhen.

Ch'ín Jesús kjuínchekitohe jína yaá sín t'ikonhya

²⁷ Ntá sákjuíxin ch'ín Jesús ntiha la ntá yaá chojni t'ikonhya kjuíchréhe tí jehe ch'án la k'uíyehé sín ch'án ntáchro sín kixin:

—Tíkonóehéni jaha tsík'axrjeníxian David.

²⁸ Ntá k'uíxenhén ch'ín Jesús ijnko nchia na ntá kóchjina tí yaá sín t'ikonhya la ntá ch'ín Jesús kjuanchankíhi sín ch'án, ntáchro ch'án kixin:

—¿Á titekávan kixin tsjácha sít'a xikaha? —mé xikaha kjuanchankí ch'án.

Ntá kjuátehe sín kixin:

—Jeén, Ìnchéni, titekaonni.

²⁹ Ntá ch'ín Jesús kjuak'etja tja ch'án chrítaón ikon sín la ntáchro ch'án kixin: —Tí xikaha kuítekávan la tsoxiteyá —mé xikaha ichro ch'án.

³⁰ La ntá tuénxín ó jína t'ikon sín. Ntá ch'ín Jesús k'uētuenhen sín ch'án kixin: —Ninkexró tsochenkahyará —ichro ch'án.

³¹ Ntá tuénxín sákjuí sín la nkuíxín chjasin ntiha chrónka sín tí kjuaxroan kjuasin ch'ín Jesús.

Ch'ín Jesús kjuínchekitohe jína ijnko ch'ín nósin

³² Tió sákjuí tí sín k'uék'ikonhya, a ntá iso chojni kjuikaó sín ijnko ch'ín nósin ch'án la chóna ch'án nchakuen tí jínahya.

³³ Ntá ch'ín Jesús kuakitsje tí nchakuen tí jínahya ntá tí ch'ín nósin la ó kjuankixin nixja ch'án. Ntá kaín chojni la k'uíkon sín la ntáchro sín kixin:

—Nunca t'ikonhyéni ijnko kjuaxroan xikaha kuenté tí nación Israel —ichro sín.

³⁴ A ntá tí sín fariseo ntáchro sín kixin:

—Tí nkexro t'etuenhen tí nchakuen tí jínahya tsíkjanjon kjuachaxin mé xikaha takitsje tí ch'ín i tí nchakuen tí jínahya —mé xikaha ichro sín.

Ch'ín Jesús kuikonóhe ch'án chojni

³⁵ Ntá k'uátsínka ch'ín Jesús itsjé chjasin jié la ko chjasin ntsí la kjuakoxin ch'án jnkojnko njnko Israel. Chrónka ch'án tí tan jína nkexrí tjen tí kjuachaxin kuènte Dios. La ntá kjuínchekitohe ch'án jína chojni níhi chóna kaín xín chin la ko chojni chóna kjuatjoté.

³⁶ K'uíkon ch'án kixin nchónhya chojni k'uéjé sín ntá kuikonóhe ch'án sín kixin imá tóxakonhen sín la k'uéjé sín éxí kolélo chónahya nkexro t'ayakonhen.

³⁷ Ntá ntáche ch'án tí sín k'uájiko ch'án kixin:

—Chaxín ntáxrjan janhan kixin imá tsík'óna, kjánchó chojni sich'e xra mé tsjéhya.

³⁸ Chrókjuanchehéra tí Ìnché tí nonte kixin chróchr'án ch'án itsjé chojni chrókuich'e xra —mé xikaha ichro ch'ín Jesús.

10

Ch'ín Jesús kjueyá teyó sín ts'ajiko ch'án

(Mr. 3.13-19; Lc. 6.12-16)

¹ Ntá ch'ín Jesús mé kjueyá ch'án teyó sín ts'ajiko ch'án la kjuanjon ch'án kjuachaxin tsakitsje sín kaín tí nchakuen tí jínahya t'etuenhen asén chojni la ko sinchekitohe sín jína kaín chojni chóna kaín chin la ko kaín xín kjuatjoté.

² Na mé tí teyó sín k'uájiko ch'án mé it'in sín xikihi: saoxín mé ch'ín Simón na mé kjaxin it'in ch'án Pedro la ko kichó ch'án Andrés la ko ch'ín Jacobo la ko kichó ch'án Juan mé tí xjeen ch'ín Zebedeo.

³ La ko kjaxin ch'ín Felipe la ko ch'ín Bartolomé la ko ch'ín Tomás la ko ch'ín Mateo mé tí ch'ín nchekjènkjé la ko ch'ín Jacobo xjeen ch'ín Alfeo la ko ch'ín Lebeo, mé jehe ch'án kjaxin it'in ch'án Tadeo.

⁴ La ko kjaxin ch'ín Simón, mé kuènte tí sín cananista, la ko kjaxin ch'ín Judas Iscariote, mé tí nkexro chr'éxin kjuínchekji tí ch'ín Jesús.

Ch'ín Jesús k'uētuenhen tí teyó sín kixin sátsjikjako sín kjuachaxin kuènte Dios

(Mr. 6.7-13; Lc. 9.1-6)

⁵ Ntá k'uētuenhen ch'ín Jesús tí teyó sín kixin sátsji sín la k'uētōan ch'án kixin: —Tjíhyará tí tjejó tí sín jehya judío la ko t'ixeenhyará tí chjasin siín estado Samaria.

⁶ Náhí. Íchá jína sátjirá tí tjejó tí chojni éxí kolélo kjuíchroe kuènte nación Israel.

7 Sátjírǎ tǎkóhéǎ sǎn kǎxin kjuachaxién Dios tjen nkaya nkajní la í séhya tsi.

8 Sinchekitoherǎ jǎna chojni níhi la ko sinchekitoherǎ jǎna tí sǎn chónǎ chin lepra la ko sinchexechónǎ chojni tsík'en la takítsjerǎ tí nchakuen tí jǎnahya. Jaharǎ kǎxin kuitonhanǎ tí kjuachaxién Dios, méxǎ chrókjuachahyarǎ jaharǎ kǎxin.

9 'Chrókjuikuahyarǎ ninkehó chichaon oro la ko ninkehó chichaon plata la ko ninkehó chichaon cobre

10 la ko tí sátjírǎ ntǎa la chrókjuikuahyarǎ ka bolsa la chrókjuikuahyarǎ yaá ka chrók'uínkayaterǎ la ko chrókjuankahyarǎ tokatǎǎ la ko chrókjuikuahyarǎ ntǎ tǎxinǎ. Tí nkexro ch'e xǎ la jehí síin kjuachaxin ntiha chrókjóné.

11 'ǎ ntǎ tió tsjasǎnǎ ijnko chjasin jié o ijnko chjasin ntsí la tjéyǎǎ ijnko nkexro tsjanjon kjuachaxin la ntǎe sǎn ntahó chrókuitoharǎ ntǎ tsjixin tí xǎ ntǎ sátsjírǎ.

12 ǎ ntǎ tió t'ixenhénǎ ntǎe sǎn la nixjehérǎ sǎn tǎkoxinǎ jnkójǎna.

13 ǎ ntǎ tí chaxín jǎna asén sǎn la ts'áyéhe sǎn tí kjuaxroxin, ǎ ntǎ tí náhi la sátjikorǎ tí kjuaxroxin.

14 ǎ ntǎ tí tsochrohya sǎn tsjanjon sǎn kjuachaxin tsitoharǎ la tjinkakonhya sǎn tsinhin sǎn tí nkehe tsochronkarǎ na mé t'axrjéxinǎ tí ntǎe sǎn o tí chjasén sǎn la t'oxénjinǎ tí inche chónǎ totǎǎ.

15 ǎ ntǎ chaxín tjonkarǎ kǎxin tió tsjixrakǎ tí yaon tsjixixín na mé tí sǎn chjasin Sodoma la ko tí sǎn Gomorra kjónté imǎ k'uéchónǎ sǎn jie la kánhyó tsjasóte sǎn, ǎ ntǎ tí sǎn chjasin a la antsí tsjasóte sǎn kǎxin k'uéjóróxinhya sǎn tí tan chrókuaáxin sǎn.

Ókjé sǎn tsonínkakonhen tí sǎn kuènte Cristo

16 'Janhan tsochr'an tí jaharǎ éxi yóhe chróchr'an kolélo ts'ejóyakjan kolóbo. Listo chrók'uejorǎ éxi konche xǎkaha la chrók'uejorǎ éxi kontóá chrókójiǎhyarǎ.

17 Chrókóxakonhanǎ kǎxin itsi chojni tsotsé sǎn tí jaharǎ la sátsjikoarǎ sǎn tí tjejó tí sǎn t'etoan la ko nkaxenhen tí nǎnkóé sǎn tsjatiaxínǎ sǎn.

18 La ntǎ tsjikaánǎ sǎn tí tjejó tí sǎn t'etoan la ko tí síin tí sǎn rey kǎxin tinkachónkirǎ tí janhan. Ntǎ jǎna tsochronkarǎ kǎxin tinkachónkirǎ tí janhan nkayakon tí jehe sǎn la ko nkayakon tí sǎn chónhya Dios.

19 ǎ ntǎ tió sátsjikoarǎ sǎn tí tjejó tí sǎn t'etoan la tóxakuanhyarǎ nkehe tsontáchrórǎ o nkexrí tsonixjarǎ kǎxin tió tsjixrakǎ tí hora la ntǎ Dios mé tsjinkitsarǎ tsonixjarǎ.

20 Kǎxin jehya jaharǎ tsonixjarǎ. Náhi. Tí Nchakuen It'eni mé tsochronka nkehe tsonixjarǎ.

21 'Ntǎ iso chojni mé tsjikaán sǎn tí kǎchó sǎn kǎxin its'en la ko tí it'é mé tsjikaán tí xjeen. ǎ ntǎ tí xjan mé tsokjan tsonínkakonhen tí it'é kǎxin its'en.

22 Kaínxín chojni chjasintajni tsonínkakonhanǎ sǎn kǎxin tinkachónkirǎ tí janhan. ǎ ntǎ tí nkexro tsítóehya tsinkáchónki sǎn tí janhan hasta tsjéje chjasintajni mé tsaá.

23 Tió má chónkíharǎ sǎn ijnko chjasin la ntǎ sátsjírǎ í jnko chjasin. La ntǎ chaxín tsoxrǎnka kǎxin tí Xjeen Dios K'óna Chojni mé tsokjan tí naxǎ tjixinhya ts'atsínkarǎ kaín tí chjasin Israel.

24 'Tí nkexro xrakohe la kánhyó tjetoan la tí maestro la antsí tjetoan, la ko kǎxin tí nkexro ch'e xǎ la tjetoanhya la antsí tjetoan tí lamo.

25 ǎ ntǎ tí nkexro xrakohe chrókjuakoxin ch'án éxi tí nkexro kjuakohe ch'án la ko tí nkexro ch'e xǎ chrókjuakoxin ch'án éxi tí lámóé ch'án ch'ehe ch'án xǎ. Tí ch'ín ñché nchia la kǎxin nchek'in sǎn Beelzebú la kǎxin tí sǎn kjéhya xǎkaha nchek'in sǎn.

*Nkexro tí chróchrakonhénrá
(Lc. 12.2-9)*

²⁶ 'Méxra chróchrakúenhyará chojni. Kohya ninkehó nkehe imó chrókónoehya chojni la ko kohya nkehe tjemá ijie kixin chrókónoehya chojni chr'éxin.

²⁷ Tí nkehe tjonkará sítié la t'ichjánxin tsochronkará tió itsi xrohi t'inkaséyanxín tí yaon. La ko tí nkehe tjonkará ijie ninkexró noehya la t'ichjánxin chronkará chrókuinhin kaín sín.

²⁸ Chróchrakúenhyará tí sín t'óyán cuérpóé chojni kixin asén chojni xitjahya ts'óyán sín. Íchá jína chróchrakonhénrá tí nkexro tsjacha sinchek'itjáyanxín cuérpóé chojni la ko asén chojni tí xrohi ts'ankahya.

²⁹ '¿Á chrókóxixinhya yaá koxroxé ntsíntsí ijnko chichaon ntsí? A ntá kjónté xikaha la chrók'uánótjenhya nijnko tí jehe va nonte tí chrókjuanjonhya It'eni kjuachaxin.

³⁰ A ntá kjónté tí kaxihí chóna ikjára la ó nohe ch'án nkekjaín ka chontará.

³¹ A ntá jahará chróchrakonhyará kixin tóyóahyará tí koxroxé kixin antsí sínkí tí jahará, a ntá tí koxroxé, kjónté nchónhya va, la kánhyó sínkí tíha.

*Tí sín tósuèhya tsochrónka sín kixin tinkáchónki sín Cristo nkayakon chojni
(Lc. 12.8-9)*

³² 'Kaín tí chojni tsochrónka kixin tinkáchónkina sin nkayakon chojni la janhan mé kjaxin tsoxrjanka kixin choxian tí jehe sín nkayakon T'aná tjen nkaya nkajní.

³³ A ntá tí nkexro sinchemána tsontáchro sín kixin chónhya sín tí janhan nkayakon chojni la kjaxin janhan tsontáxrjan kixin chonhya tí jehe sín nkayakon T'aná tjen nkaya nkajní.

*Jnkokoáhya tsjenkayáxin chojni kixin ó kui Inchéni Jesús
(Lc. 12.51-53; 14.26-27)*

³⁴ 'Tjenkayáxinhyará kixin k'uinkakian kjuaxróxin chjasintajni. Náhi. Janhan k'uinkakianhya kjuaxróxin. Tsjanjonko kichó chojni kixin k'uinka janhan.

³⁵ Janhan k'uinka kixin tsonínkakonhen chojni it'é, la ko tí xjeen sín chjin mé tsonínkakonhen iné, la ko tí tikinta tsonínkakonhen ich'ee.

³⁶ Mé xikaha tí sín tsonínkakonhen kichó la mé tí sín naxa kjéhya sín.

³⁷ 'A ntá tí nkexro antsí tjuèhe it'é sín la ko iné sín la kánhyó tjuèhe tí janhan la mé xitjahya ts'óna sín kuèntana, la ko tí nkexro antsí tjuèhe xjeen sín la kánhyó tjuana sín la mé xitjahya ts'óna sín kuèntana.

³⁸ La tí nkexro tamáhya ntacruz, chrèhya sín tí janhan la mé xitjahya ts'óna sín kuèntana.

³⁹ Tí nkexro tjinkaon kixin kohya nkehe chrókónhen sín mé ts'itjáyan sín, a ntá tí nkexro chrókjuinchek'itjáyanxín asén kixin tinkáchónki sín tí janhan la mé tsaá sín.

*Tí nkexro ts'áyéhe nkehe
(Mr. 9.41)*

⁴⁰ 'Tí nkexro chrókjuanjon kjuachaxin chrók'uejorá la mé éxí chrók'uáyéhe sín tí janhan la ko tí nkexro chrók'uáyéhe tí janhan la éxí yóhe chrók'uáyéhe sín tí nkexro ichr'ánna k'uinka.

⁴¹ La tí nkexro chrókjuanjon kjuachaxin tsjak'e ijnko nkexro nixja itén Dios kixin táha la Dios ichr'án la mé ts'áyéhe nkehe éxí ts'áyéhe tí nkexro kjuako. La ko tí nkexro chrókjuanjon kjuachaxin tsjak'e ijnko chojni jína kixin jína ch'án mé xikaha ts'áyéhe sín nkehe éxí ts'áyéhe tí nkexro jína.

42 **A** ntá tí nkexro sinchekitonhen ijnko vaso ntá kin kjónté ijnko chojni noehya má, chréhe tí janhan, la mé chaxín ntáxrjan kixin tí ch'ín a mé chaxín ts'áyéhe ch'án nkehe jína kixin xikaha kjuích'e ch'án.

11

*Ch'ín Juan Bautista k'uetuēhen iso sín
(Lc. 7.18-35)*

1 Ntá ch'ín Jesús kjuixin kjuakohe ch'án tí teyó sín xriko ch'án la ntá sákjuíxin ch'án ntiha la sákjuíkjako ch'án iso chjasin chjinaxón ntiha.

2 **A** ntá ch'ín Juan mé tjechjina ch'án ntoechiso ntá xrínahya kuínhin ch'án nkerí xra tjech'e Cristo. La ntá k'uetuēhen ch'án iyó tí sín k'uék'ajiko ch'án kixin sátsjtsjehe sín tí ch'ín Jesús.

3 Ntá sákjuí sín kjuíji sín ntiha ntá kjuanchankíhi sín ch'án ntáchro sín kixin: —¿Á jaha tí nkexro itsi ní o á naxa tsochónhenni í jnko nkexro? —ichro sín.

4 **A** ntá kjuátehe ch'ín Jesús, ntáchro ch'án kixin:

—Sátjirá tjichenkará tí ch'ín Juan tí nkehe k'uíkonrá la ko tí nkehe kuínhínrá.

5 Chenkará ch'án kixin tí sín k'uék'ikonhya la ó t'ikon sín jie la tí sín xitjahya k'uékji la ó tji sín la ko tí sín k'uéchóna chin lepra la ó kótjóá sín kuítóhe sín jína la ko tí sín k'uékienhya la ó tinhin sín jie. Kjaxin tí sín tsík'en na ó xechón sín inaá la ko kaín tí sín nòa mé síxrakehé sín tí tan jína tsaáxin sín.

6 Méxra imá náxrjón tí nkexro kohya nkehe t'inkákonhen tinkáchónki tí janhan.

7 Tió sákjuí sín ntá ch'ín Jesús kjuankixin nixjehe ch'án tí sín k'uéjé la chrónka ch'án kuènte ch'ín Juan ntáchro ch'án kixin:

—Tí sákjuítsjehérá ch'ín Juan nteje la, ¿nkexrí k'uíkonrá tí jehe ch'án? ¿Á k'uíkonrá ch'án éxi ijnko tji nchexrayehe xrínto?

8 Tí náhi, la ¿nkehe k'uíkonrá? ¿Á k'uíkonrá ch'án éxi ijnko nkexro tsík'itsa jína? Jahará ó nohará kixin chojni tsík'itsa jína la tjejó sín tí nchia kuènte tí sín rey.

9 ¿**A** ntá nkehe k'uíkonrá? ¿Á ijnko nkexro chrónka itén Dios? Jehe chaxín la antsí chóna ch'án kjuachaxin la tí sín k'uéchrónka itén Dios la kánhyó.

10 Ch'ín Juan mé tí nkexro kui éxi xikaha chrónka xroon itén Dios ósé. Mé ntáchro xikihi:

Janhan mé tsochr'an ijnko nkexro tsochrónka itan kuèntana tsitónxin ntja, kixin tsjasiyóxin ch'án ntja kuénta.*

Mé xikaha chrónka itén Dios.

11 Ntá ijnko nkehe chaxín tsotjonkará kixin kaín tí nkexro k'uéjé senó la kánhyó tjetóan sín la antsí tjetóan tí ch'ín Juan Bautista. Kjánchó ijnko nkexro kjónté tjetuanhya la tí ts'áyéhe sín tí kjuachaxién Dios tjen nkaya nkajní la antsí tjetóan sín la ntá jehe ch'ín Juan la kénhyó.

12 'Tí ikui ch'ín Juan Bautista hasta ijie la imá tjanjonxin tí sín tjinkaon ts'ikon sín tí kjuachaxin kuènte nkaya nkajní. La jehó tí sín imá chóna kjuachaxin mé tsjacha sín.

13 Kaín tí sín profeta la ko tí ley kuènte ch'ín Moisés mé chrónka nkexrí tí kjuachaxin kuènte Dios hasta ikui ch'ín Juan.

14 **A** ntá tí jahará chrókuítekáonrá tíhi; kixin ch'ín Juan la mé ikui kixin tí xra kuènte ch'ín Elías tsjintaxín sich'e ch'án kixin ch'ín Elías la t'ichjánxin chrókui ch'án inaá.

15 Tí nkexro tjinkaon chrókuinhin la chrókuinhin.

* 11:10 Malaquías 3.1

16 '¿Nkexrí chrókjuintayóaxian tí chojni tjejó ijie? Tóyóhe sín tí chánjan tjejótxaxin sín ntasin tsítán sín la t'íyehē sín kíchó sín

17 ntáchro sín kixin: “K'uánoani flauta kjánchó jahará la tēhyará. Itsjeni isón kuènte chojni tsík'en la ntá k'uaváhyará la ko tsjankahyará.”

18 Kíxin tí ikui ch'ín Juan la kjónehya ch'án la k'uíhya ch'án vino la jahará ntáchrorá kixin ijnko nchakuen tí jínahya mé chóna ch'án.

19 A ntá tió kui tí Xjeen Dios K'óna Chojni ntá kjóne ch'án la ko ik'ui ch'án, ntá ntáchrorá kixin imá itsjé kjóne ch'án la imá ik'ui ch'án la ko imá t'ito ch'án tí chojni chóna jie la ko tí sín nchekjènkí, ichrorá. A ntá tí kjuachaxin kuènte Dios mé tjakoxin tí xjeen ch'án.

Tí chjasin titekakhya (Lc. 10.13-15)

20 Ntá ch'ín Jesús mé kjuankíxin ch'án ntáche ch'án tí sín tjejó iso tí chjasin imá kjuasixín ch'án kjuaxroan kixin kjónté xikaha la naxa kuinkáchónkihya sín Dios.

21 Ntá ntáchro ch'án kixin:

—Nòará jahará tjejorá chjasin Corazín la ko nòará jahará tjejorá chjasin Betsaida. Tí chrók'uixin tí kjuaxroan tí chjasin Tiro la ko chjasin Sidón éxí k'uíkonrá jahará ntá tí chrókójehe sín la tjoka chrókuinkáchónki sín Dios la tjoka chrókjuakoxin sín chrók'uinkáya sín ka tié la ko nteso chrókjuinçek'ia sín asén sín.

22 Ntá ntáxrjan kixin tí yaon tsitoexín ijie chojni a ntá jahará antsí tsjasótiará, a ntá tí sín chjasin Tiro la ko chjasin Sidón la kénhyó tsjasóte sín.

23 A ntá jahará chojni chjasin Capernaum tjenkayáxinrá kixin imá nohará a ntá sátsjirá nkaya nkajni, ichrorá, kjánchó chaxínhya. Jahará la tsjaskajinxinrá ntiha sátsjirá tsjasótiará tí sín tí sín tsík'en. Tí chrókjuásian tí kjuaxroan tí chjasin Sodoma éxí kjuásian chjasánrá la tí chjasin la kjá naxa chrók'uixin sín naxa chrók'uitjányanhya sín tí yaon ijie kixin tjoka chrókuitekaon sín.

24 A ntá tjonkará kixin tió sinchekitoéxín Dios ijie chojni la antsí tsjasótiará la tí sín chjasin Sodoma la kénhyó tsjasóte sín.

Xrákirá tí tjén janhan la ts'ok'áhará (Lc. 10.21-22)

25 Ntá tí yaon a ch'ín Jesús mé nixjehe ch'án It'é ch'án ntáchro ch'án kixin:

—Tjáncháha kjuasáya It'eni mé Ìnché nkaya nkajni la ko chjasintajni kixin jaha kjuánjonhya kjuachaxin chrók'uitja tí sín imá nohe a ntá kjuánjuan kjuachaxin kixin ts'itja tí sín noehya.

26 Mé xikaha It'eni jaha kóxrjínhan kixin xikaha tsonhen —ichro ch'ín Jesús.

27 Ntá ntáchro ch'ín Jesús kixin:

—T'aná mé chjina kaín xín nkehe. Kohya ninkexró chaxín chóxin tí Xjeen ch'án. Jehó It'é ch'án mé chóxin ch'án la kohya ninkexró chóxin tí It'é ch'án. Jehó tí Xjeen ch'án mé chóxin ch'án la ko tí sín tsíkjejá ch'án tsochóxin sín ch'án.

28 Xrákirá kaín rá tí tjén janhan tí jahará imá tsíkóxrjérá kjuich'erá xra la yamará nkehe iye la ntá janhan mé sjintak'ok'áhará.

29 Tákjára tí xra kuèntana la ts'itjará kuèntana kixin janhan mé jína asenná la ntahnkehya. Ntaha mé ts'itjará ts'ok'èxin asánrá.

30 Tí xra tsotjahará la xrahya la tí nkehe tsotjahará la yehya.

12

Tí sín k'uajiko ch'ín Jesús mé ik'uín sín iso noatrigo ijnko yaon t'ok'éhe tí sín Israel

(Mr. 2.23-28; Lc. 6.1-5)

¹ A ntá ijnko yaon la ch'ín Jesús k'uátsínka ch'án ijnko nonte siín noatrigo tí yaon t'ok'éhe tí sín Israel. Na ntá tí sín xriko ch'án mé tsík'en sín kjinta la ntá kjuankíxin sín ik'uín sín iso noatrigo a kixin sine sín.

² A ntá iso tí sín fariseo k'uíkon sín kixin xíkaha kjuích'e tí sín xriko ch'ín Jesús la ntá ntáchro sín kixin:

—Tsjehé tí sín xrikoa mé tjejóch'e sín xra tí yaon t'ok'éheni na mé kohya kjuachaxin tsonhen xra tí yaon i —ichro sín.

³ Ntá kjuátehe ch'ín Jesús kixin:

—Jahará ¿a kjuínchekuáxinhyará tí xroon chrónka nkehe kjuích'e ch'ín David la ko tí sín k'uájiko ch'án tió k'uén sín kjinta?

⁴ A ntá jehe sín mé k'uíxehen sín tí nchia kuènte Dios la kaín sín kjóne sín tí niótja tsíkóyaon kuènte Dios kjónté kohya kjuachaxin sine ch'án ni tí sín k'uájiko ch'án. Jehó siín kjuachaxin sine tí sín nchat'á.

⁵ Jahará ¿a nchekuáxinhyará tí xroon tsíkjin ch'ín Moisés ntáchro kixin tí sín nchat'á kuènte nínko mé t'ok'èhya sín tí yaon sábadó la kjónté xíkaha la jehya jié tíha?

⁶ Ntáxrjan kixin itjén janhan la antsí má chonta kjuachaxin la ntá tí nínko la kénhyó.

⁷ Jahará la tiénxinhyará nkexrí t'axrjexín tí nkehe ntáchro xroon itén Dios. Mé ntáchro kixin: “Janhan Dios tjínkavan kixin chrókuiikonóhéherá chojni la tjínkakhya kixin chrók'oyánrá iko chrókjuánjonrá.”* Tí chrókuiénxinrá tíha la ntá chrókóninkákuénhyará tí janhan kixin ninkehó jié chontahya.

⁸ A ntá tí Xjeen Dios K'óna Chojni mé chóna kjuachaxin ts'etóan nkexrí tsonhen tí yaon t'ok'éheni —ichro ch'ín Jesús.

Ch'ín Jesús kjuínchekitohe jína ijnko chojni tsíxámá tja

(Mr. 3.1-6; Lc. 6.6-11)

⁹ Ntá ch'ín Jesús mé sákjuíxin ch'án ntiha la k'uíxehen ch'án ijnko nínko Israel.

¹⁰ Mé ntiha itjen ijnko ch'ín tsíxámá tja. Na ntá tjejóntaxín iso sín fariseo a tjínkaon sín tsjanchia sín jié. La ntá kjuanchankíhi sín ch'án kixin:

—¿Á siín kjuachaxin sinchekitoheni jína ijnko chojni níhi tí yaon t'ok'éheni ní? —ichro sín.

¹¹ Ntá kjuátehe ch'ín Jesús ntáchro ch'án kixin:

—Jnkojín tí jahará chontará ijnko kolélo chrókjuítsínkáya ijnko tòye tí yaon t'ok'éheni ¿a chrókjuíhyará chrókuakitsjetaónrá va tòye ní?

¹² Kjánchó tí chojni antsí má tjete sínkí a ntá tí kolélo la kénhyó. Méxra jína sich'eni tí xra jína kjónté tí yaon t'ok'éheni.

¹³ Méxra nixjehe ch'án tí ch'ín níhi a, ntáchro ch'án kixin:

—Tjéntoá tjá —ichro ch'án.

A ntá tí ch'ín níhi tja kjuentoá tja ch'án la ó kjuixin kuítóhe jína éxí tí í jnko tja ch'án xíkaha.

¹⁴ Ntá tí sín fariseo kónínkaon sín k'uaxrjexín sín ntiha sákjuí sín la kjuenkayáxin sín nkexrí ts'óyan sín tí ch'ín Jesús.

Itén Dios senó chrónka kuènte ch'ín Jesús

* 12:7 Oseas 6.6

15 **A** ntá ch'ín Jesús mé kónohe ch'án kixin xikaha tjenkayáxin sín la ntá sákjuíxin ch'án ntiha la itsjé sín chréhe sín ch'án. Kjuínchekitohe ch'án jína kaín tí sinníhi

16 la k'ueṭoan ch'án kixin tsochrónkahya sín noxín kixin nkexro tí jehe ch'án.

17 Mé xikaha ó xiteyá tí nkehe chrónka ch'ín Isaías, tí nkexro chrónka itén Dios ósé, mé tsintáchro ch'án xikihi:

18 Ntihi tjen tí nkexro ch'ena xra la janhan mé kjuéyá ch'án, janhan tjuahá ch'án la chàna kixin itjen ch'án.

Tsotjahá ch'án tí nchakuenná

la jehe ch'án mé tsochrónka ch'án nkexrí sintakitoaxián ijié chojni chjasintajni.

19 Tsonínkakuenhya ch'án chojni la chjinihya ts'óyako ch'án, la ko kohya nkexro tsinhin itén ch'an tí ntia.

20 Ts'óchjenjinhya ch'án kjónté itji tsíxréya,

la ts'ók'ankahya ch'án kjónté ijnko nkehe síhnhikoá.

Jehe ch'án naxa sich'e ch'án xra tsjixrakájia tí yaon ts'etoan ch'án.

21 La kaín xín chojni chjasintajni mé tsitekaon sín tí jehe ch'án.†

Mé xikaha chrónka itén Dios ósé.

Tí sín fariseo mé ntáchro sín kixin ch'ín Tsochren t'etuēhen asén tí ch'ín Jesús (Mr. 3.19-30; Lc. 11.14-23; 12.10)

22 Ntá iso chojni sákjuíkohe sín ch'ín Jesús ijnko ch'ín t'ikonhya la ko nixjahya kixin chóna ch'án nchakuen tí jínahya. **A** ntá ch'ín Jesús mé kjuínchekitohe ch'án jína la ntá jína nixja ch'án la ko jína t'ikon ch'án.

23 Ntá kaín xín chojni la chrakon sín la tjanchankíhi kichó sín ntáchro sín kixin:

—¿Á jehya xjeen David tíhi? —ichro sín.

24 Ntá kuínhin tí sín fariseo la ntáchro sín kixin:

—Tí ch'ín a takitsje ch'án nchakuen tí jínahya kixin chóna ch'án tí kjuachaxin kuente ch'ín Beelzebú, mé tí ch'ín mé Tsochren t'etuēhen kaín tí nchakuen tí jínahya.

25 Ntá ó kónohe ch'ín Jesús tí nkehe tjenkayáxin sín ntá ntáchro ch'án kixin:

—Jnkójín gobierno jnkokoáhya tjenkayáxin sín ntá tjanjonko kichó sín na mé ts'itjáyan tí kjuachaxin ts'etoanxín sín, la ko kjaxin tí sín jnkokoá chjasin o tí sín jnkokoá nchia jnkokónhya tjenkayáxin sín la kjaxin xikaha ts'itjáyan sín.

26 **A** ntá tí chaxín ch'ín Tsochren chrókuakitsjexín asén ntihi kja í chróchóntahya kjuachaxin naxa chrók'ueṭoan.

27 Jahará ntáchrórá kixin janhan kuakítsjexián tí nchakuen tí jínahya kjuachaxin kuente ch'ín Beelzebú. **A** ntá tí chaxín xikaha la ntá ¿nkexro chjéhe kjuachaxin tí sín chréhe tí jahará kixin tjacha sín takitsje sín nchakuen tí jínahya? Jehe sín mé tjakoxín sín kixin ntoáhya tjenkayáxinrá.

28 **A** ntá janhan mé kuakítsjexián tí nchakuen tí jínahya kjuachaxin kuente Nchakuen Dios la tíha mé chrókónoaxínrá kixin tí kjuachaxián Dios mé ó kui tí tjejorá.

29 ¿Nkexrí chrók'uixenhen ijnko nkexro ijnko ntōe ijnko ch'ín jiehe la chrókuakitsjehe ch'án tí nkehe chóna ch'án? Senó la chrókónteto ch'án kixin jína chrókueéhe sín ch'án.

30 "Tí nkexro titekakonhya tí janhan la mé nínkakonna sín. **A** ntá tí nkexro tjinkakonhya tí janhan mé t'inkákonhen tí xra it'a.

† 12:21 12.18-21 Isaías 42.1-4

³¹ 'Méxra xrxanka kixin Dios tsjakjin jnkojnko jie tjasin chojni la ko kaín nkehe jínahya nixja sín. A ntá tí t'ántaxínhin sín Nchakuen Dios la xitjahya tsjin ijie sín.

³² La ko xrxanka kixin kaín nkehe t'ántaxínhínrá tí Xjeen Dios K'óna Chojni la tsjakjin Dios. A ntá tí ts'antaxínhínrá Nchakuen Dios la ntá mé í tsjinhya tí ijará kjónté ntihi chjasintajni la ko kjónté tí chr'éxin.

*Tí nta chrókjuatsqanxin sín tí to jína
(Lc. 6.43-45)*

³³ 'Tí nta tsík'ánkí jína la t'óna to jína la tí nta tsík'ánkíhya jína la t'ónahya to jína. Méxra tí nta mé chrókjuatsqanxinni tí to a.

³⁴ Jahará tsík'axrjeníxinrá konche. ¿Nkexrí jína chróntáchrora jahará tí jehya jínará? Tí nixja ir'vará la éxí ntáchro asánrá mé nixja ir'vará.

³⁵ Ijnko chojni jína mé jína nixja kixin jína asén ch'án. A ntá ijnko chojni jínahya mé nixja tí nkehe jínahya kixin tí asén ch'án kjaxin jínahya.

³⁶ Ntá tjonkará kixin itsi tí yaon tsjixixín tió sinchekitoexín Dios ijie chojni ntá tsonohará kaín nkehe chjini tsínixjará.

³⁷ Kixin tí nkehe nixjará tsjakoxin á kjuásinrá jie ní o náhí.

*Tí sín jehya jína tjanchehe sín ch'ín Jesús kixin tsjakoxin ch'án ijnko kjuaxroan
jie
(Mr. 8.12; Lc. 11.29-32)*

³⁸ Ntá iso tí sín fariseo la ko tí sín maestro tjako tí ley mé nixjehe sín ch'ín Jesús ntáchro sín kixin:

—Maestro, tjinkaonni chrók'uikonni chrókjuásian ijnko kjuaxroan náxrjón tsonoxinni kixin nkexro jaha —ichro sín.

³⁹ Ntá kjuátehe ch'ín Jesús ntáchro ch'án kixin:

—Tí sín jínahya la ko tí sín kuítóhe Dios mé tjanchia sín chrókjuásian kjuaxroan náxrjón. Kjánchó tsjakoxinhya í jnko kjuaxroan la jehó tí kjuaxroan kónhen ch'ín Jonás, tí nkexro k'uéchrónka itén Dios ósé.

⁴⁰ Éxí yóhe kjuák'e ch'ín Jonás iní yaon la iní tie nkaxenhen tsee koche jie mé xikaha tí Xjeen Dios K'óna Chojni tsjak'e nkaxenhen tòye tsoxravá iní yaon la iní tie.

⁴¹ A ntá tí yaon tsitoexín ijie chojni la ntá tí sín chjasin Nínive mé tsjanchia sín jie kixin tí sín tjejó jie, kixin tí sín chjasin Nínive mé kuítóhe sín ijie sín tió kuínhin sín itén Dios chrónka ch'ín Jonás. A ntá ijie itjén janhan la antsí má chonta kjuachaxin. A ntá tí ch'ín Jonás la kénhyó k'uéchóna ch'án kjuachaxin, kjánchó jahará kuítekákonhyará tí janhan.

⁴² Kjaxin tí yaon tsitoexín ijie chojni la tí tjan reina k'uetqan kjuixin nó Sur mé tsjanchia tjan jie kixin tí sín tjejó ijie kixin jehe tjan kjuixin imá ikjín kixin chrókuinhin tjan tí kjuaxrexinkaon jína k'uékjako ch'ín Salomón. A ntá ijie itjén janhan la janhan antsí má nòna a ntá ch'ín Salomón la kénhyó k'uénohe ch'án.

*Tió tsokjan tí nchakuen tí jínahya
(Lc. 11.24-26)*

⁴³ 'A ntá ijnko nchakuen tí jínahya tsík'axrjexín ijnko chojni la mé ixri tí nonte xamá xritjeyá nketí náxrjón ts'ok'éhe. A ntá k'uitjahya nketí náxrjón ts'ok'éhe.

⁴⁴ La ntá kjuenkayáxin kixin: “Áxri tsokjan ntona k'uaxrjéxian”, ichro. A ntá tió ikjan tí nchakuen la t'ikon éxí ijnko nchia kohya ninkexró la éxí ijnko chojni tsík'ánjón ntqe la náxrjón tsjehe tí nkaxenhen nchia.

⁴⁵ A ntá k'uíkon tí jínahya xikaha tjen nchia la ntá sákjuíkajín í jnko yato nchakuen tí jínahya antsí má jínahya. A ntá kaín k'uíxenhen tí ntiha. A ntá antsí

má jínahya kónhen tí ch'ín a, a ntá tí senó la kénhyó. Mé xíkaha tsonhen kaín tí sín síin ijie titekakonhya.

*Tí iné la ko kichó ch'ín Jesús
(Mr. 3.31-35; Lc. 8.19-21)*

⁴⁶ Ntá ch'ín Jesús naxa tjenixjehe ch'án chojni la ntá xrínahya kjuíji iné ch'án la ko kichó ch'án. Ntá kuítóhe sín ntója ó la tjinkaon sín chrónixjehe sín ch'ín Jesús.

⁴⁷ Ntá ijnko nkexro ntiha sákjuíchénka tí ch'ín Jesús, ntáchro ch'án kixin:
—Íná la ko kichua tjejó sín ntója la tjinkaon sín chrónixjaha sín tí jaha.

⁴⁸ A ntá ch'ín Jesús kjuátehe ch'án nixjehe ch'án tí nkexro chrónka a, ntáchro ch'án kixin:

—¿Xá nkexro tí naná la ko nkexro tí kichiná? —ichro ch'án.

⁴⁹ Ntá kjuakoxin tja ch'án tí sín xriko ch'án la ntáchro ch'án kixin:

—Tí sín i la mé naná la ko kichiná.

⁵⁰ Tí jnkojín sín i nchexiteyá nkehe tjinkaon T'aná tjen nkaya nkajní na mé táha mé naná la ko kichiná mé xíkaha t'íkuān tí jehe sín —ichro ch'án.

13

*Ch'ín Jesús mé kjuíncheyóexin ch'án éxi ijnko chojni t'enka nontee
(Mr. 4.1-9; Lc. 8.4-8)*

¹ A ntá tí yaon a ntá ch'ín Jesús k'uaxrjexín ch'án nchia la sákjuí ch'án kjuák'etjaxin ch'án chrínta ntayaon.

² Ntá k'uixikóchjina nchónhya chojni tí tjen ch'án la ntá jehe ch'án mé k'uit'ótjen ch'án ijnko ntabárcō kjuák'etjaxin ch'án la kaín sín na tí chrínta ntá ó kuítóhe sín.

³ A ntá nchónhya nkehe kjuako ch'án kjuíncheyóexin ch'án, ntáchro ch'án kixin:

—Éxi ijnko ch'ín sákjuík'enka nontee

⁴ mé xíkaha sákjuík'enka ch'án iso tí noatrigō a. Ntá iso noa la tsík'ánótjen ntia ntá ikui koxroxē k'uínka va noa.

⁵ A ntá iso noa na mé k'uitji chrík'á xro tí kohya itsjé nche ntá tjoka k'uayan kixin ntaha tjínhya chóna nche.

⁶ Ntá tí kjuiton yaon la ntá tí ka la xamá kixin nínkahya chóna nuèe.

⁷ A ntá í so noa kjuítsínkak'á tí síin kach'í na k'uánkí tí kach'í a na ntá í xitjahya k'uánkí tí noatrigō a kixin tsík'ate tí kach'í.

⁸ A ntá tí noa tsík'itjí nche jína na ntá tió k'uánkí la mé k'óna jína. Iso tí no na jnkokoá noatje mé k'óna ciento neno noa, a ntá í jnko mé k'óna sesenta neno noa, a ntá í jnko mé k'óna treinta.

⁹ Tí nkexro tjinkaon chrókuinhin la chrókuinhin —ichro ch'ín Jesús.

*Nkekuènté kjuíncheyóexin ch'ín Jesús
(Mr. 4.10-12; Lc. 8.9-10)*

¹⁰ Ntá iso tí sín k'uájiko ch'ín Jesús mé kóchjinehe ch'án sín la ntá kjuanchankíhi sín kixin:

—¿Nkekuènté xíkaha nixjehé sín ncheyóexián? —ichro sín.

¹¹ A ntá ch'ín Jesús kjuátehe ch'án ntáchro ch'án kixin:

—Jahará la Dios me tsjinkitsa tsonohará tí nkehe noehya í so chojni kuènte tí kjuachaxin kuènte Dios. A ntá tí jehe sín a la náhi.

¹² Tí nkexro ó chóna nkehe la antsí ts'áyéhe sín kixin antsí má tsochóna sín. A ntá tí nkexro chónahya la kjónté tí ntsí chóna sín la ts'axrjehe sín.

¹³ Mé xíkaha kjuintayóaxuán kjuákuaxian sín kixin jehe sín t'ikon sín la ntá kjónté tjátsōanhya sín la tjejótinhin sín a ntá kjónté kienxínhya sín.

14 Mé xikaha ó xiteyá tí nkehe k'uéchrónka ch'ín Isaías tí nkexro k'uéchrónka itén Dios, mé ntáchro ch'án xikihi:

Jehe sín tshin sín a ntá tsienxínhya sín
la ts'ikon sín la tsjatsqanhya sín tí nkehe ts'ikon sín.

15 Imá icha asén tí sín chjasin i.

Chónta sín ntatsjon kjánchó ts'íkjehe
la chónta sín ikon sín kjánchó t'ikonhya sín,
kíxin chrók'uikonhya sín
la chrókuienhya sín la ko

xitjahya kíenxín sín,

kíxin í tjinkakonhya sín chrókjan sín kíxin janhan mé chrókjuintakitohá sín
jína.*

Mé xikaha tsíkjin ch'ín Isaías.

16 Ntá ntáchro ch'ín Jesús inaá kíxin:

—A ntá jahará la imá náxrjón tjejórá kíxin t'ikonrá la ko tinhínrá.

17 Chaxín xrjanka kíxin itsjé tí sín k'uéchrónka itén Dios la ko tí sín jína mé k'uétjinkaon sín chrók'uikon sín tí nkehe t'ikonrá la ntá k'uíkonhya sín la ko k'uétjinkaon sín chrókuinhin sín tí nkehe tjejotinhínrá la ntá kuíenhya sín.

*Ch'ín Jesús chrónkaxín nkexrí t'axrjexín tí nkexro sákjuík'enka
(Mr. 4.13-20; Lc. 8.11-15)*

18 "Tinhínrá nkexrí t'axrjexín tí ch'ín sákjuík'enka nontee.

19 Tí nkexro kuínhin tí itén Dios chrónka nkexrí tí kjuachaxin kuènte Dios la ntá kíenxínhya sín la yóhe tí noa xènjintja ntia. Ó kui ch'ín Tsochren ntá kjuínchek'itjáyan ch'án tí itan jína kuínhin sín.

20 A ntá tí tje kjuítsínkak'á xrj la mé t'axrjexín kíxin tí chojni kuínhin itén Dios la tjoka kóxrjínhin sín la kuínkáchónki sín.

21 Kjánchó nínkahya chónta nuèe na ntá itsi tí kjuaxróxinhya o tsochónkíhi sín chojni chrók'óyán sín kíxin tí itén Dios kuítekaon sín, a ntá tsítóhe sín tí tinkáchónki sín Dios.

22 A ntá tí tje kjuítsínkak'á kach'i na mé éxí yóhe ijnko chojni kuínhin itan jína kjánchó tjitoxienhya ntje sín kíxin tóxakonhen sín tí xrj chónta sín chjasintajni la ko tjinkaon sín tsochónta sín itsjé nkehe. Kaín tíha mé t'inkákonhen tí itén Dios kuínhin sín la ntá xikaha xitjahya sich'ehe sín xrj Dios.

23 A ntá tí tje k'uínka tí nonte chónta nche jína na mé yóhe tí chojni kuínhin tí itén Dios na ko kíenxín sín la ntá xikaha jína ch'ehe sín Dios xrj. Na iso sín la yóhe éxí tí tje k'óna ijnko ciento neno noa la iso sín la yóhe tí k'óna sesenta neno noa la iso sín la yóhe tí k'óna treinta neno noa —mé xikaha chrónka ch'ín Jesús.

Ch'ín Jesús kjuíncheyóexin ch'án éxí tí kajnto k'uánkíkué tí noatrigo

24 Ntá ch'ín Jesús kjuíncheyóexin ch'án inaá ntáchro ch'án kíxin:

—Tí kjuachaxin kuènte Dios mé yóhe ijnko ch'ín k'uénka noa jína nontee ch'án.

25 A ntá tió k'uéjójua kaín sín ntá ikui ijnko nkexro nínkakonhen sín la k'uénka ch'án kajnto chrík'á tí noa a la ntá sákjuí ch'án.

26 La ntá tí noatrigo k'uánkí la ntá ó sítinta la ntá ntiha kjaxin kónoxín k'uánkí tí kajnto.

27 Ntá tí sín ch'e xrj mé sákjuínixjehe sín tí lámoe sín la ntáchro sín kíxin: "Tí noa k'uénká nontaa la noa jína tíha. A ntá ¿nketí kjuixín tí kajnto tsík'ayan?" ichro sín kjuanchankí sín.

* 13:15 13.14–15 Isaías 6.9–10

²⁸ Ntá kjuátehe tí inché tí nonte ntáchro kixin: “Kjá ijnko nkexro nínkakonna mé kjuích'e xikaha”, ichro ch'án. Ntá tí sín ch'e xra mé kjuanchankí sín kixin: “¿Á tjinkávan kixin sátsjini tsakitsjenkíni tí kajnto?” ichro sín.

²⁹ A ntá kjuátehe ch'án kixin: “Náhí. Tí sátsjia tsakítsjenkiá tí kajnto la kjá chónite tí katrigo ts'axrjenkí.

³⁰ Íchá jína títóhé kixin ts'ánkíkué tsjixin tsotjájiani. Ntá ts'etuenhenni tí sín tsotjá kixin senó ts'ejo sín tí kajnto la sinchenteto sín kixin tsoche la ntá chr'éxin tsotjá sín tí noatrigo ntá ts'inkachjina tí noa a” —mé xikaha chrónka ch'ín Jesús.

Ch'ín Jesús kjuíncheyóexin ch'án éxí tí xroan ijnko ntayoa it'in mostaza (Mr. 4.30-32; Lc. 13.18-19)

³¹ Ntá ch'ín Jesús kjaxin kjuíncheyóexin inaá ntáchro ch'án kixin: —Tí kjuachaxin kuènte Dios mé éxí yóhe ijnko tje mostaza k'uenka ijnko chojni nontee ch'án.

³² Tí tje a mé antsí má ntsí la ntá tí í so tje la kánhyó, a ntá chr'éxin ntá ts'ayan tí nta mostaza la ts'ánkí ijnko nta imá jíe la tí í so nta la kánhyó. Ntá koxroxé xritjaká mé itsi va sich'éna va kaké va tí chrík'á tí chaon nta.

Ch'ín Jesús kjuíncheyóexin ch'án éxí tí xroan t'ánkíxin niotja (Lc. 13.20-21)

³³ Kjaxin kjuíncheyóexin ch'án tíhi mé ntáchro ch'án kixin: —Tí kjuachaxin kuènte Dios mé éxí yóhe tí xroan t'ánkíxin niotja. Kjuinkíjxanxin ijnko chojni chjin iní medida harina ntá tí ch'o mé k'uánkí.

Tí nkehe kjuíncheyóexin ch'ín Jesús tí nixja ch'án (Mr. 4.33-34)

³⁴ Ch'ín Jesús kjuakohe ch'án tí chojni la kjuíncheyóexón ch'án la nixjahya ch'án ninkehó tí kohya nkehe chrókjuíncheyóexin ch'án.

³⁵ Mé xikaha kjuako ch'án kixin tsoxiteyá tí nkehe tsíchrónka ijnko nkexro k'uéchrónka itén Dios ntáchro xikihi: Mé tsoníxjaxian sintayóaxión nkehe tsontáxrjan tí nkehe ninkexró noehya desde k'óna chjasintajni.†

Ch'ín Jesús chrónkaxín ch'án nkexrí t'axrjexín tí kjuíncheyóexin ch'án tí kajnto la ko tí notrigo

³⁶ Ntá kjuixin nixjehe ch'ín Jesús tí sín a ntá sákjuí sín kaín sín la jehe ch'án k'uíxenhén ch'án nchia. Ntá kóchjina tí sín k'uájiko ch'án la ntáchro sín kixin:

—Chrónkaxián nkexrí t'axrjexín tí kajnto k'uánkíkué tí noa trigo tí nonte —ichro sín.

³⁷ Ntá ch'ín Jesús kjuátehe ch'án ntáchro ch'án kixin:

—Tí nkexro k'uenka tí noa jína mé tí Xjeen Dios K'óna Chojni.

³⁸ A ntá tí nonte mé chjasintajni tíha. Tí noa jína mé éxí yóhe tí chojni kuákja kjuachaxin kuènte Dios. La ntá tí kajnto mé éxí yóhe tí chojni t'etuenhen Tsochren.

³⁹ Tí nkexro nínkakönhenni mé k'uenka tí kajnto mé Tsochren tíha. A ntá tí tsotjá sín la mé tsjeje chjasintajni. A ntá tí sín tsotjá la mé tí sín ángel.

⁴⁰ Éxí xrenájín tí kajnto la tsoche mé xikaha tsonhen tió tsjixixín tsjeje chjasintajni.

⁴¹ Tí Xjeen Dios K'óna Chojni mé ts'etuenhen tí sín ángel kixin tsakitsjexín sín tí tjet'etoan Dios kaín tí chojni tjachroe í so chojni la ko tí sín ch'e tí nkehe jínahya.

† 13:35 Salmo 78.2

⁴² La tsochr'án sín sátsji sín tí tja síin xrohi la ntaha tsotsjánka sín la sinetaón neno sín.

⁴³ Ntá kaín xín tí sín nchexiteyá tí nkehe tjinkaon Dios mé éxí tí yaon xíkaha tsotsjehe sín tí tjet'etoan It'eni Dios. Tí nkexro tjinkaon chrókuinhin la chrókuinhin —mé xíkaha ichro ch'ín Jesús.

Ch'ín Jesús kjuíncheyóexin ch'án éxí ijnko nkehe tjete tjemá

⁴⁴ 'Tí kjuachaxin kuènte Dios mé éxí yóhe ijnko nkehe tjete tjemá ijnko nonte. Ijnko chojni k'uitja ch'án tí nkehe tjete la ntá kjuak'emā ch'án inaá ntahó. Ntá chéhe ch'án sákjuí ch'án la kjuínchekji ch'án kaín nkehe chóna ch'án la ntá ikjan ch'án la k'uena ch'án tí nonte a.

Ch'ín Jesús kjuíncheyóexin éxí ijnko xro perla tjete

⁴⁵ Ntá ntáchro ch'ín Jesús kixin:
—Kjāxin tí kjuachaxin kuènte Dios mé éxí yóhe ijnko nkexro tjejá xro perla náxrjón.

⁴⁶ Ntá tió ts'itja ch'án ijnko xro imá tjete la ntá sátsji ch'án sinchekji ch'án kaín nkehe chóna ch'án kixin ts'ena ch'án tí xro perla.

Ch'ín Jesús kjuíncheyóexin éxí ijnko nchísén tséya sín koche

⁴⁷ Ntáchro ch'ín Jesús kixin:
—Kjāxin tí kjuachaxin kuènte Dios mé éxí yóhe ijnko nchísén tséya chojni koche t'enkí sín tí ntayaon la ntá tsotsé nchónhya clase koche.

⁴⁸ Ntá tió tsíkaón koche tí nchísén tséya sín va la ntá tsakitsjenkí sín la tsjak'e sín chrínta ntā la ntaha ts'ejótjāxin sín la tsíchéhe sín koche jína la t'enka sín ntaxra. La ntá tí jehya koche jína la it'e sín.

⁴⁹ Mé xíkaha tsonhen tió tsjeje chjasintajni. Sátsji tí sín ángel la tsakitsjekjan sín chojni jínahya la tsitōhe tí chojni jína.

⁵⁰ La tsochr'án sín tí sín jínahya sátsji sín tí tjen tja tí síin xrohi la ntaha tsotsjánka sín la ko sinetaón neno sín.

Tí nkehe tjete nixin la tí nkehe tjete ntaxin

⁵¹ Ntá ch'ín Jesús mé kjuanchankí ch'án kixin:
—¿Á tiénxinrá jahará kaín tí nkehe ní? —ichro ch'án.
Ntá kjuátehe sín kixin:

—Jeén, Inchéni, ó kienxínni —ichro sín.

⁵² Ntá ntáchro ch'ín Jesús kixin:
—Ijnko maestro nohe tí nkehe kuènte ley la ntá ó nohe ch'án kuènte tí kjuachaxin kuènte Dios la jehe ch'án la éxí yóhe ijnko inché nchia chóna itsjé nkehe tjete tjejóchjina la ntá nohe ch'án tsakitsje tí nkehe tjete nixin la tí nkehe tjete ntaxin —mé xíkaha ichro ch'ín Jesús.

*Ch'ín Jesús kjuák'e ch'án chjasin Nazaret
(Mr. 6.1-6; Lc. 4.16-30)*

⁵³ Ntá kjuixin nixja ch'ín Jesús kjuíncheyóexin ch'án tíha na ntá sákjuíxin ch'án ntíha.

⁵⁴ La ntá sákjuí ch'án chjasén ch'án Nazaret. Ntaha kjuankíxin kjuákoxin ch'án tí nínko Israel. Ntá itsjé sín la kóxakonhen sín kuínhin sín tí tjako ch'án la ntáchro sín kixin:

—Tí ch'ín i la, ¿nketí tsíxrakohe ch'án kixin imá nohe ch'án la ko nkexrí kixin tjasin ch'án kjuaxroan?

⁵⁵ ¿Á jehya tíhi xjeen tí ch'ín carpintero la iné ch'án mé María? La ko chóxinni tí kichó ch'án a mé ch'ín Jacobo la ko ch'ín José la ko ch'ín Simón la ko ch'ín Judas.

⁵⁶ Kjaxin tí sín chjin kichó ch'án na ntihi tjejó sín. Méxra ¿nkexrí nohe ch'án kaín tí nkehe? —ichro sín.

⁵⁷ Mé xikaha chrohya sín tsitekakonhen sín ch'án. Ntá ntáchro ch'ín Jesús kixin:

—Nkuixín tjikosáyehe chojni ijnko nkexro chrónka itén Dios. A ntá tí sín chjasén ch'án la ko kaín tí sín ntøe ch'án mé tjikosáyehya sín ch'án —ichro ch'án.

⁵⁸ A ntá tsjéhya kjuaxroan kjuasin ch'án ntiha kixin kuítékakuenhya sín ch'án.

14

Ik'uén ch'ín Juan Bautista

(Mr. 6.14-29; Lc. 9.7-9)

¹ A ntá tí yaon a ntá tí ch'ín Herodes mé tí nkexro k'uetøan tí estado Galilea mé kuínhin ch'án nkexrí ichro ch'ín Jesús.

² Ntá nixjehe ch'án tí sín ch'ehe ch'án xra, ntáchro ch'án kixin:

—Kjá tíha la ch'ín Juan Bautista ó tsíxechón ch'án inaá. Mé xikaha chóna ch'án kjuachaxin tjasin ch'án kjuaxroan —ichro ch'ín Herodes.

³ Méxra tí ch'ín Herodes mé tsík'etøan kixin ch'ín Juan tsontetoxín cadena la ko tsjak'echjina ch'án. Mé xikaha kjuích'e ch'án kixin xikaha tsíkjanhia tí tjan Herodías, tí tjan ichjién tí ch'ín Felipe, kichó ch'án.

⁴ Tí ch'ín Juan tsintáche ch'án tí ch'ín Herodes kixin:

—Jehya jina tsochonta tí ichjién tí kichuá —mé xikaha tsintáchro ch'án.

⁵ Ntá ch'ín Herodes tjinkaon ch'án chrók'óyán ch'án tí ch'ín Juan kjánchó chrakonhen ch'án tí chojni kixin kaín sín ntáchro sín kixin ch'ín Juan mé nixja itén Dios, ichro sín.

⁶ A ntá tí yaon kia tsíkjitoxinhin nánó ch'ín Herodes la tí xjeen tjan Herodías mé ité tjan tí tjejó tí chojni tsík'íyehē ch'án. A ntá imá kóxrjinhin ch'ín Herodes nkexrí ité tjan.

⁷ La ntá nixjehe ch'án tjan k'uákjenxin ch'án ihnié Dios ntáchro ch'án kixin tsochjéhe ch'án tjan kjónté jnkojín nkehe tsjanhia tjan, ichro ch'án.

⁸ Ntá jehe tjan la senó kjuíkjanchankíhi tjan iné tjan ntá iné tjan tsintachro kixin ikja ch'ín Juan mé tsjanhia tjan ntá jehe tjan mé nixjehe tjan tí ch'ín Herodes inaá ntáchro tjan kixin:

—Chjehéni ijnko plato tsjak'enkáya kja ch'ín Juan Bautista —ichro tjan kjuanchia tjan.

⁹ Na ntá ch'ín Herodes la mé imá k'uává ch'án kixin xikaha kjuanchia tjan. Na ntá kaín tí sín siín ntiha ó kuínhin sín kixin kjuínchenohe ch'án Dios kixin ichrén nkehe tsjanhia tjan tsjanjon ch'án.

¹⁰ Méxra k'uetøan ch'án kixin ts'óchrínjin sín ikja ch'ín Juan tí tjen ch'án ntøechiso.

¹¹ Ntá kjuíkao sín kjuíkoyá sín tí kja ch'ín Juan ijnko plato la chjéhe sín tí tjan tjarisoá ntá jehe tjan la sákjuíkénhen tjan iné tjan.

¹² Ntá tí sín k'uék'ajiko ch'án a mé sákjuíkakitsje sín tí cuérpoé ch'án la sákjuíkjavá sín. La ntá chr'éxin la sákjuí sín sákjuíchénka sín tí ch'ín Jesús kixin xikaha tsíkónhen ntiha.

Ch'ín Jesús kjuínchekjine ch'án in'ó mil chojni

(Mr. 6.30-44; Lc. 9.10-17; Jn. 6.1-14)

¹³ Ntá tí kuínhin ch'ín Jesús kixin xikaha tsíkónhen la ntá jehó ch'án sákjuí ch'án k'uit'ótjen ch'án ijnko ntabárcø la sákjuí ch'án ijnko nonte ninkexró tjihya. A ntá kaín tí chojni la kuínhin sín nketí tjen ch'án la ntá k'uaxrjexín sín chjasén sín la ntá totó sín sákjuíchréhe sín ch'án.

14 A ntá k'uaxrjexín ch'ín Jesús tí ntabárc̣o a, a ntá k'uíkon ch'án kixin nchónhya chojni siín ntiha ntá kuikonóeh̄e ch'án tí jehe sín na ntá kjuínchekitohe ch'án jína tí sín níhi tsíkjiḳao sín.

15 La ntá ó k'uíxin tie na ntá tí sín k'uájiko ch'ín Jesús a mé kóchjinehe sín ch'án, ntáchro sín kixin:

—Ntá ó kóntó la kohya nkexro tjejó ntihi. Na ntá jaha chrókuétuēnhén sín kixin sátsji sín tí chjasin ntsí chjinaxón tsjik'ena sín nkehe sine sín —ichro sín.

16 Ntá kjuátehe ch'ín Jesús, ntáchro ch'án kixin:

—T'ichjánxinhya sátsji sín. Chjehérá sín nkehe sine sín —ichro ch'án.

17 Ntá kjuátehe sín kixin:

—Chóntahyani itsjé nkehe. Jehó in'ó niotj̄a la ko yaá koche chóntani —ichro sín.

18 Ntá ntáchro ch'ín Jesús kixin:

—Xrakoanará tí nkehe méhe ntihi —ichro ch'án.

19 Ntá k'ueṭoan ch'án kixin kaín xín sín ts'ixitj̄axin sín tí chrítaón kaxi a. Ntá kuákja ch'án tí in'ó niotj̄a la ko tí yaá koche ntá konta ch'án nkajní la kjuanchehe ch'án kjuasáyé Dios. Ntá kóchrít'õ ch'án tí niotj̄a chjéhe ch'án tí sín k'uájiko ch'án la jehe sín mé k'ókikayeh̄e sín chjéhe sín tí chojni siín a.

20 Ntá kaín sín kjuixin kjóne sín kókjeh̄e sín. Ntá kjuixin ntá tí sín k'uájiko ch'ín Jesús kjuenájín kaín tí nkehe síxèhe sín la mé teyó ntaxra kaón.

21 Na mé in'ó mil chojni ntoa kjóne sín, la tí chojni chjin la ko chánjan la kuákjahya sín cuenta nkekjaín tí sín a.

Ch'ín Jesús mé tjetjitaón ch'án nt̄a
(Mr. 6.45-52; Jn. 6.16-21)

22 Ntá kjuixin tíha ntá k'ueṭuēnhen ch'ín Jesús tí sín k'uájiko ch'án kixin ts'it'ótjen sín tí ntabárc̣o ts'atòye sín í jnko nángo ntayaon. Ntá jehe ch'án nax̄a kuítóhe ch'án nixjeh̄e ch'án tí sín siín ntiha.

23 Ntá kjuixin xíkayeh̄e sín na ntá jehó ch'án chr̄iin ch'án ijnko jn̄a tsonixjeh̄e ch'án It'é ch'án tjen nkaya nkajní. Na ntá ó k'uíxin tie la jehó ch'ín Jesús itjen ch'án ntiha.

24 La ntá tí ntabárc̣o na mé tjenkátaón nt̄a jnk̄osiné ntayaon. Ntá imá chjéhe nt̄a tí ntabárc̣o kixin tí xr̄into la chjéhe la xitjahya sátsji ntabárc̣o.

25 Na ntá las tres nantóye a mé sákjuíchréhe ch'án sín. Totó ch'án mé sákjuítónxin ch'án tí ntayaon la ntá kóchjinehe ch'án tí tjejó sín.

26 Na ntá tí sín k'uájiko ch'án mé k'uíkon sín kixin tjetjitaón ch'án tí ntayaon na ntá imá chrakon sín la k'óyako sín. Ntáchro sín kixin kjuacha sín ichro sín, chrakon sín.

27 Na ntá nixjeh̄e ch'ín Jesús tí jehe sín ntá ntáchro ch'án kixin:

—Nchefuérte asánrá, chrakonhyará. Janhan kjuihá —ichro ch'án.

28 Ntá ch'ín Pedro mé nixjeh̄e ch'án Ìnchéni, ntáchro ch'án kixin:

—Ìnchéni tí chaxín jaha la ntá chrókjuánjuan kjuachaxin chrókjuitaónni tí nt̄a tsjjini tí tjen jaha —ichro ch'án.

29 Ntá ntáchro ch'ín Jesús kixin:

—Xrákiá.

Ntá k'uínkajinxin ch'ín Pedro tí ntabárc̣o la kjuankixin ch'án tjetjitaón ch'án nt̄a sákjuíchréhe ch'án tí tjen ch'ín Jesús.

30 A ntá xr̄inahya ntá kónohe ch'án kixin imá chjéhe xr̄into chrítaón nt̄a, ntá chrakon ch'án la kjuankixin tinkák'aniánkí ch'án nt̄a, ntá k'uèya ch'án ntáchro ch'án kixin:

—Ìnchéni, nchekaáni —ichro ch'án.

31 A ntá tuénxín ch'ín Jesús mé itsé ch'án tja ch'ín Pedro la ntáchro ch'án kixin:

—Intsíkoá tinkachónkia tí janhan. ¿Nkekuènté títekákonhya? —ichro ch'án.

³² Na ntá tió k'uit'ótjen sín yói sín tí ntabárc̄o la ntá tuénxín k'uixratá tí xr̄into.

³³ Ntá kaín sín tí sín tjejóxehen tí ntabárc̄o mé k'uéjóxin tochr'in sín nkayakon ch'in Jesús la ntáchro sín kixin:

—Jaha mé chaxín Xjeen Dios —ichro sín.

Ch'in Jesús mé kjuínchekit̄ohe jina tí chojni níhi nonte Genesaret

(Mr. 6.53-56)

³⁴ Ntá tió k'uátòye sín tí ntayaon ntá kjuíji sín tí nonte Genesaret.

³⁵ Ntá tí sín siín ntiha tjoka kjuátsoan sín kixin jehe ch'in Jesús tíha, ntá kuínhin tí sín chjasin chjinaxón ntiha la ntá kuik̄ao sín kaín tí sín níhi tí tjen ch'án.

³⁶ Na ntá chrónóeh̄e sín ch'án kixin chrókuít̄ohe ch'án kixin kjónté chrínta iké ch'án chrókuákóxin sín, la ntá kaín tí sín kuákóxin iké ch'án mé kuít̄ohe sín jina.

15

Tí jie tjasin chojni

(Mr. 7.1-23)

¹ A ntá chjasin Jerusalén kjuix̄in iso sín fariseo la ko iso tí sín maestro tjako tí ley la kjuíchr̄eh̄e sín tí ch'in Jesús. Ntá kjuanchankíhi sín ch'án kixin:

² —¿Nkekuènté kixin tí sín xrikoa la nchexiteyáhya sín tí nkehe k'uékinkáchónki tí sín tsík'axrjeníxinni kixin t'óntihya sín itja sín ntá kjónté ine sín? —ichro tí sín fariseo a.

³ A ntá kjuanchankí ch'in Jesús kixin:

—¿Nkekuènté jahará kjaxin títekákonhyará nkehe tsík'et̄oan Dios? A ntá jahará tjinkáonrá nax̄a chrókuinkachónkirá tí nkehe kuinkáchónki tí sín tsík'axrjeníxinrá.

⁴ Ntáchro Dios kixin: “Tsochontehérá kjuasáya it'ará la ko inará”, la ko ntáchro ch'án kixin: “Tí nkexro t'ántaxínhin it'é la ko iné la chrók'uen.”*

⁵ A ntá jahará tsíntáchorá kixin ó nchoxon kixin ijnko nkexro tsochénta it'é la ko iné kixin: “It'éni, inéni, chrokjuahya tsjink̄itsani tí jaha kixin kaín nkehe chóntani la ó chjéheni Dios.”

⁶ A ntá jnkojín nkexro tsontáchro ch'án tíhi ntá í t'ichjánxinhya tsjink̄itsa tí it'é la ko tí iné, mé xikaha tsixrorá. Mé xikaha jahará kuít̄ohérá tí nkehe k'uet̄oan Dios kixin tjinkáonrá chrókjuich'erá éxí kjuích'e tí sín tsík'axrjeníxinrá.

⁷ Jahará la jehya jnkojínxón tjenkayáxinrá. Ntoá tsíntáchro tí ch'in Isaías, tí nkexro k'uéchrónka itén Dios ósé. Mé chrónka ch'án kixin nkexrí tjejorá la xikaha tsíkjin ch'án kixin:

⁸ Tí chojni tí chjasin i ir'va ó xraxinkakonxín sín tí janhan a ntá tí asén sín la ikjín kuít̄ohe sín tí janhan.

⁹ Méxra ó chónko tóchjina sín xraxinkaon sín tí janhan kixin tí nkehe tjako sín la tí nkehe tsík'et̄oan chojni ó.† Mé xikaha ichro itén Dios.

¹⁰ Ntá k'uíyeh̄e ch'in Jesús tí chojni inaá la ntáchro ch'án kixin:

—Chrókuinhínrá la ko chrókuiénxinrá.

¹¹ Kaín nkehe ine chojni la ó nchoxon, jehya jie. Tí jie la tí nkehe t'axrjexín ir'va chojni —mé xikaha ichro ch'in Jesús.

¹² A ntá tí sín k'uájiko ch'in Jesús mé kóchjinehe ch'án la ntáchro sín kixin:

—¿Á noha kixin tí sín fariseo mé kónínkaon sín tí kuínhin sín tí nkehe ntáche sín? —ichro sín.

* 15:4 Éxodo 20.12; 21.17; Levítico 20.9 † 15:9 15.8-9 Isaías 29.13

¹³ Ntá kjuátehe ch'án ntáchro ch'án kixin:
—Kaín tí ka jehya T'aná tjen nkaya nkajní k'uenkaxin la mé ts'axrjenkixin nuèe.

¹⁴ Nté tìtohé sín. Tí jehe sín la ntakótán sín la t'etuēhen sín í so sín ntakótán. A ntá tío ijnko chojni ntakótán tjitaón ntia la ntá yóí sín ts'anótjenyá sín ichrén tòye —ichro ch'án.

¹⁵ Ntá ntáchro ch'ín Pedro kixin:

—Chronka nkexrí t'axrjexín tíha —ichro ch'án.

¹⁶ Ntá kjuátehe ch'ín Jesús ntáchro ch'án kixin:

—¿Á kjaxinrá jahará tiénxinhyará?

¹⁷ ¿Á tiénxinhyará kixin kaín tí nkehe ineni na sátji nkaya tseeni na ko xík'axrjexín tí cuérpoeni ínaá?

¹⁸ A ntá tí nkehe t'axrjexín ir'va chojni la t'axrjeníxin asén chojni la tíha la mé tí jìe tjasixín chojni.

¹⁹ Kaín tíha mé t'axrjeníxin asén chojni, mé tí jínahya tjenkayáxin sín la ko tí t'óyán kichó sín la ko tí tjachehe kichó sín la ko tí chóna sín í jnko chojni chjin ókjé la ko teé sín la ko tí kjuach'ia la ko tí t'ántaxínhìn kichó sín.

²⁰ Tí nkehe a mé tjasixín chojni jìe. A ntá tí sineni kjónté nchexiteyáhyani ts'ónti tjani la tíha la jehya jìe —mé xíkaha ichro ch'ín Jesús.

*Ijnko tjan jehya sín israelita mé kuinkáchónki tí ch'ín Jesús
(Mr. 7.24-30)*

²¹ Ntá ch'ín Jesús mé k'uaxrjexín ch'án ntiha la ntá sákjuí ch'án nó chjasin Tiro la ko chjasin Sidón.

²² Ntá ikui ijnko chojni chjin na mé ijnko tjan cananea na kjuák'e tjan tí chjasin ntiha. Kóchjinehe tjan tí ch'ín Jesús la k'uèya tjan ntáchro tjan kixin:

—Ìnchéni, Xjeen David, tikonóehéni kixin tí xjeenni chjin la mé níhi tjan chóna tjan ijnko nchakuen tí jínahya —ichro tí tjan a.

²³ A ntá ch'ín Jesús la ninkehó kjuátehehya ch'án. A ntá tí sín k'uájiko ch'án na kóchjina sín la ntáche sín ch'án kixin:

—Tétuēhén tjan sátsji tjan kixin tinkák'óyako tjan chréhe tjan tí jeheni —ichro sín.

²⁴ Ntá ntáchro ch'ín Jesús kixin:

—Dios mé ichr'ánna tsjéyá jehó tí kolélo kjuíchroe kuènte nación Israel —ichro ch'án.

²⁵ A ntá tí tjan a kóchjina la kjuák'exín toch'in tjan nkayakon tí ch'ín Jesús la ntáchro tjan kixin:

—Ìnchéni, tjínkítsani —ichro tjan.

²⁶ A ntá ch'ín Jesús kjuátehe ch'án ntáchro ch'án kixin:

—Jehya tí jína chrókuakitsjahā niotjā tí xjan ntá chrótjahā koniā chrókjóne va —ichro ch'án.

²⁷ A ntá jehe tjan la ntáchro tjan kixin:

—Chaxín xíkaha, ìnchéni. Kjánchó kjónté tí koniā na tí nkehe tsjixènjinnkí mesa kuènte ìnché la ine va —ichro tjan.

²⁸ Ntá ntáchro ch'ín Jesús kixin:

—Jaha imá tinkachónkia tí janhan. Tí nkehe tjinkávan la tsoxiteyá —ichro ch'án.

Ntá tuénxín tí hora la tí xjeen tjan ó kuítóhe jína.

Ch'ín Jesús mé kjuínchekitòhe jína nchónhya chojni níhi

²⁹ Ntá ch'ín Jesús mé sákjuíxin ch'án ntiha la kjuíji ch'án chrínta ntayaon Galilea. Ntá chrìn ch'án ijnko jnā la ntiha kjuák'etjaxin ch'án.

³⁰ Ntá kójnkotsé itsjé chojni tí tjen ch'án la kjuikao sín tí sinníhi, mé tí sín xitjahya tji la ko tí sín t'ikonhya la ko tí sín nixjahya la ko tí sín tsixénká la kaín xín tí í so sinníhi. K'uejo sín tí sinníhi toté tí ch'ín Jesús kixin jehe ch'án mé sinchekitohe ch'án sín jína.

³¹ Kaín chojni la imá chrakon sín kixin k'uíkon sín kixin tí sín k'uénixjahya la ó nixja sín la tí sín tsixénká la tsíkitohe sín jína la tí sín xitjahya tji la ó tji sín la ko tí sín k'uék'ikonhya la ó t'ikon sín. Méxra kjuanchehe sín kjuasáyé tí Dios kuènte tí sín Israel.

*Ch'ín Jesús mé kjuínchekjine noó mil chojni
(Mr. 8.1-10)*

³² Ntá k'uíyehē ch'ín Jesús tí sín k'uájiko ch'án la ntáchro ch'án kixin:
—Imá tikonóaha kaín tí chojni kixin ó ní yaon tjejókoni sín ntá kjuèhe sín nkehe sine sín. Tjinkakonhya chrókuétuanhan sín sáchrókjui sín ntəe sín kixin naxa nehya sín la ntja ó tsotienxín sín kjinta —ichro ch'án.

³³ Ntá ntáchro tí sín k'uájiko ch'án kixin:
—Ntá jaha la ó noha kixin nteje tjejóni la kohya nkehe tsochjéheni kaín xín tí chojni a —ichro sín.

³⁴ Ntá ch'ín Jesús mé kjuanchankíhi sín, ntáchro ch'an kixin:
—¿Nkekjaín niotja chontará? —ichro ch'án.

Ntá ntáchro sín kixin:
—Yato niotja chóntani la ko iso koche ntsíntsí —ichro sín.

³⁵ Ntá ch'ín Jesús k'uetəan ch'án kixin kaín xín sín ts'ixitjaxin sín nonte, ichro ch'án.

³⁶ Ntá kuákja ch'án tí yato niotja la ko tí koche ntsíntsí la kjuanchehe ch'án kjuasáyé Dios. Ntá kóchrít'o ch'án tí niotja a la ntá k'uetuenhen ch'án tí sín k'uájiko ch'án kixin ts'óxíkayehē sín tí niotja la ko tí koche kaín xín tí sín siín a, sine sín.

³⁷ Na mé kaín xín sín kjóne sín na kókjehe sín ntá kjuenájín sín yato ntaxra tot'o tí nkehe naxa tsixehe.

³⁸ A ntá tí sín kjóne mé noó mil chojni ntoa. A ntá tí chojni chjin la ko chánjan la mé kuákjahya sín cuenta nkekjaín tí sín a.

³⁹ Ntá ch'ín Jesús mé nixjehē ch'án sín sákjuí sín la ntá k'uit'ótjen ch'án ntabarco la sákjuí ch'án nó Magdala.

16

*Tí sín fariseo la ko tí sín saduceo tjanchia ijnko kjuaxroan náxrjón
(Mr. 8.11-13; Lc. 12.54-56)*

¹ A ntá iso tí sín fariseo la ko iso tí sín saduceo mé sákjuítsjehe sín tí ch'ín Jesús. Tjinkaon sín chrókjuachaxin sín ch'án la kjuanchehe sín ch'án kixin chrókjuakoxin ch'án ijnko kjuaxroan kixin á chaxín jehe ch'án tsíkixin ch'án tí tjen Dios.

² A ntá ch'ín Jesús na kjuátehe ch'án, ntáchro ch'án kixin:
—Jahará ntáchrora kixin ijie ntá kónjín ó tsi ijnko yaon jína kixin kjátse nkajní.

³ La ntá nchítjen ntáchrora kixin ijie la náxrjónhya kixin kjátse nkajní la tjenkáya tjuí. Méxra jahará ntoáhya tjenkayáxinrá. Ó nohará tjátsoanrá tí nkajní, a ntá tjátsoanhyará tí kjuaxroan sitónhen jie.

⁴ Tí sín jínahya la tí sín titekakonhya la tjanchia sín ijnko kjuaxroan jié. A ntá ts'ikonhyará í jnko kjuaxroan, jehó tí kjuaxroan kuènte ch'ín Jonás mé ts'ikonrá —mé xikaha ichro ch'ín Jesús.

Ntá kuítóhe ch'án sín la sákjuí ch'án.

Ch'ín Jesús ntáchro kixin chrókuitekakonhya sín tí nkehe tjako tí sín fariseo
(Mr: 8.14-21)

⁵ Ntá tí sín k'uájiko ch'ín Jesús mé k'uátòye sín ntayaon la ntá k'uitjáyenhen sín tsíkjikohya sín niotja.

⁶ Ntá ntáchro ch'ín Jesús kixin:

—Chrókóxakonhanrá kixin tí xroan ts'ánkíxin niotjé tí sín fariseo la ko tí sín saduceo.

⁷ Ntá tí sín k'uájiko tí ch'ín Jesús mé ikjo sín kichó sín ntachro sín kixin:

—Mé xikaha ichro ch'án kixin tsíkjikohyani niotja —ichro sín.

⁸ Ntá kónohe ch'ín Jesús kixin nkehe tí kjo sín kichó sín, ntá ntáchro ch'án kixin:

—¿Nkekuènté tjóra kixin chontahyará niotja? Jahará la intsíkoá tinkachónkirá tí janhan.

⁹ Jahará ¿á naxa tiénxinhyará la ko á xráxinkákonhyará tí in'ó niotja k'óxikayeheni kjóne tí in'ó mil chojni la ko á xráxinkákonhyará nkekjaín ntaxra kjuenájinrá tí nkehe tsíxehe?

¹⁰ La ko ¿á xráxinkákonhyará jahará tí yato niotja xikayehe kjóne tí noó mil chojni la ko á xráxinkákonhyará nkekjaín ntaxra kjuenájinrá tí nkehe tsíxehe?

¹¹ A ntá ¿nkekuènté kixin kuiénxinhyará kixin janhan la jehya kuènte niotja tjénixja tíó ntáxrjan kixin chrókóxakonhanrá kixin tí xroan ts'ánkíxin niotjé tí sín fariseo la ko tí sín saduceo? —mé xikaha ichro ch'ín Jesús.

¹² Na ntá kuiénxín sín kixin nixjahya ch'án kuènte tí xroan t'ánkíxin niotja. Náhi. Tjenixja ch'án kixin chrókóxakonhen sín kixin tí nkehe tjako tí sín fariseo la ko tí sín saduceo.

Chrónka ch'ín Pedro kixin ch'ín Jesús mé tí nkexro Cristo
(Mr: 8.27-30; Lc: 9.18-21)

¹³ Kjuíji ch'ín Jesús chjino tí chjasin Cesarea de Filipo ntá jehe ch'án mé kjuanchankíhi ch'án tí sín k'uájiko ch'án, ntáchro ch'án kixin:

—¿Nkehe tjo sín kixin nkexro tí Xjeen Dios K'óna Chojni? —ichro ch'án.

¹⁴ Ntá jehe sín kjuátehe sín ntáchro sín kixin:

—Iso sín mé ntáchro sín kixin Juan Bautista, ichro sín. A ntá í so sín na mé ntáchro sín kixin Elías, ichro sín. A ntá í so sín mé ntáchro sín kixin Jeremías o í jnko nkexro k'uéchrónka itén Dios —ichro sín.

¹⁵ Ntá ntáchro ch'ín Jesús kixin:

—¿A ntá jahará nkechorá kixin nkexro tí janhan? —ichro ch'án.

¹⁶ A ntá ch'ín Simón Pedro kjuátehe ch'án ntáchro ch'án kixin:

—Jaha mé tí Cristo mé Xjeen Dios tjechón —ichro ch'án.

¹⁷ Ntá kjuátehe ch'ín Jesús ntáchro ch'án kixin:

—Náxrjón tjen jaha Simón xjeen Jonás kixin kohya nijnko chojni kjuakoha tíha. Jehó T'aná tjen nkaya nkajní mé kjuakoha tíha.

¹⁸ Méxra ntáxrjan kixin jaha mé Pedro mé t'axrjexín kixin ijnko xro la chrítaón tí xro mé sít'ána nínko la kjónté tí kjuachaxin kuènte kjuach'én la tsjachahya sinchek'itjáyan.

¹⁹ Méxra jaha mé tsotjaha tí llave kuènte kjuachaxin nkaya nkajní la ntá tí nkehe tjánjonhya kjuachaxin tsonhen ntihi chjasintajni la kjaxin nkaya nkajní tsochóntahya kjuachaxin. A ntá tí nkehe tsjánjuan kjuachaxin tsonhen ntihi chjasintajni la ntá kjaxin nkaya nkajní siín kjuachaxin.

²⁰ Ntá ch'ín Jesús mé k'uetuenhen ch'án tí sín k'uájiko ch'án kixin ninkexró tsochénkahya sín kixin jehe mé tí Cristo.

Ch'ín Jesús chrónka ch'án kixin its'en ch'án
(Mr: 8.31—9.1; Lc: 9.22-27)

21 Ntá ch'ín Jesús kjuankíxin ch'án chénka ch'án tí sín k'uájiko ch'án kixin t'ichjánxin satsji ch'án chjasin Jerusalén la ntaha la tí sín t'etoan kuènte nínko la tí sín nchat'á tjetooan la ko tí sín maestro tjako ley mé imá sinchekjasóte sín ch'án. La chrónka ch'án kixin ts'óyán sín ch'án kjánchó tí nixin yaon mé tsoxechón ch'án inaá.

22 Ntá ch'ín Pedro mé kuakitsjenta ch'án tí ch'ín Jesús la kjuankíxin nixjehe ch'án ntáchro ch'án kixin:

—Kjá Dios tsjanjonhya kjuachaxin xikaha tsonhan Ìnchéni kixin jaha la xitjahya tsjasóte xikaha —ichro ch'ín Pedro.

23 A ntá ch'ín Jesús mé kuinkátjá ch'án la nixjehe ch'án tí ch'ín Pedro, ntáchro ch'án kixin:

—Sátjia ntáha, Sátanas. Tjiatéhya tí jaha tí nkehe tsonna. Jaha chrók'uínkakohén tí nkehe tjinkaon Dios. Jaha tjenkayáxinhya éxi tjinkaon Dios. Náhí. Tjenkayáxian éxi tjenkayáxin chojni ó —ichro ch'ín Jesús.

24 Ntá nixjehe ch'ín Jesús tí í so sín k'uájiko ch'án, ntáchro ch'án kixin:

—Jnkojínrá tjinkáonrá tsochréhérá tí janhan la t'ichjánxin tsitohérá kaín tí nkehe tjaké asánrá, ntá tsámárá tí ntacruz kuéntará, a ntá tsochréhérá tí janhan.

25 A ntá tí nkexro tjinkaon jehó sinchekaá asén la ts'itjáyan. A ntá tí nkexro chrókjuinçek'itjáyanxín asén kixin tinkáchónki sín tí janhan la tsaá.

26 ¿A ntá nkehe tsonhen tí chrókjuacha ijnko chojni chróchónta kaín nkehe siín chjasintajni a ntá tí kjuachón chrókjuinçek'itjáyan? ¿Nkehe chrókjuenka chojni kixin chróchónta tí kjuachón?

27 Tí Xjeen Dios K'óna Chojni tsikao ch'án tí kjuachaxin jié kuènte It'é ch'án tjen nkaya nkajni la kaín tí sín ángel tsikao ch'án na ntá tsjenkehe ch'án jnkojnko chojni nkexrí tí xra kjuich'e jnkojnko tí jehe sín.

28 Chaxín xrjanka kixin isorá tjejorá ntihi la naxa ts'ényhará naxa ts'ikonjiará kixin nkexrí tí kjuachaxin tsochónta tí Xjeen Dios K'óna Chojni tí tsikao ch'án kjuachaxin jié —ichro ch'ín Jesús.

17

Ch'ín Jesús mé k'uixitóxin nkexrí tsjehe ch'án

(Mr. 9.2-13; Lc. 9.28-36)

1 Ntá injón yaon chr'éxin ntá ch'ín Jesús mé sákjuiko ch'án ch'ín Pedro la ko ch'ín Jacobo la ko ch'ín Juan, kichó ch'ín Jacobo, la k'uit'ótjen sín ijnko jna imá noi.

2 Ntá ntiha tjejó sín ntá xrínahya k'uíkon sín kixin ch'ín Jesús mé k'uixitóxin nkexrí tsjehe ch'án. Tí nkayakon ch'án la imá tjákiní tsjehe éxi yaon la ko iké ch'án la k'óna imá tjóá la tsjehe éxi yóhe ijnko xrohi t'inkaséyan.

3 Na ntá xrínahya k'uíkon sín itjen ch'ín Moisés la ko tí ch'ín Elías tjejótjo sín tí ch'ín Jesús.

4 Na ntá ch'ín Pedro mé ntáche ch'án tí ch'ín Jesús kixin:

—Ìnchéni, jína kixin tjejóni ntihi. Tí tjinkávan la chrókjuich'énani iní nchia la mé ijnko kuéntá jaha la ijnko kuènte ch'ín Moisés la í jnko kuènte ch'ín Elías —ichro ch'án.

5 Ntá naxa tjenixja ch'ín Pedro na ntá xrínahya ikui ijnko tjuí imá t'inkaséyan kjuák'etja chrítaón tí jna tjejó sín. Ntá xrínahya chríkjan tí tjuí kuínhin sín itén ijnko nkexro nixja na mé ntáchro kixin:

—Tíhi mé xjanna. Imá tjuaha ch'án la ko chána kixin itjen ch'án. Chrókuinhínrá tí nkehe tjako ch'án —ichro Dios.

6 Kuínhin tí sín k'uájiko ch'án xikaha la ntá kjuítsínka sín nonte kixin imá chrakon sín.

⁷ Na ntá ch'ín Jesús mé kóchjina tí tjejó sín la kuákóxin sín ch'án la ntáchro ch'án kixin:

—T'àyá chrakonhyará —ichro ch'án.

⁸ Na ntá xrínahya k'uíkon sín kixin kohya ninkexró. Jehó ch'ín Jesús mé tjen.

⁹ Na ntá tí k'uínkajinxin sín tí jnā ntá k'uetōan ch'ín Jesús, ntáchro ch'án kixin:
—Ninkexró chenkahyará tí nkehe k'uíkonrá ijie hasta tsoxechónjian tí Xjeen Dios K'óna Chojni —ichro ch'án.

¹⁰ Ntá tí sín k'uájiko ch'ín Jesús mé kjuanchankí sín, ntáchro sín kixin:
—¿Nkekuènté ntáchro tí sín maestro tjako tí ley kixin saoxín itsi tí ch'ín Elías la ntá chr'éxin itsi tí nkexro tsaáxinni? —ichro sín.

¹¹ Ntá kjuátehe ch'ín Jesús, ntáchro ch'án kixin:

—Chaxín senó itsi ch'ín Elías kixin tsjasiyóxin ch'án kaín nkehe.

¹² Kjánchó ó xrjanka kixin chaxín ó kui ch'ín Elías la tí sín chjasintajni la mé kjuátsoanhya sín ch'án la kjuínchekjasóte sín ch'án éxí kóxrjínhin sín. Mé xikaha kjaxin tí Xjeen Dios K'óna Chojni la mé kjaxin sinchekjasóte tí jehe sín —mé xikaha ichro ch'ín Jesús.

¹³ Ntá tí sín k'uájiko ch'án mé kónohe sín kixin ch'ín Jesús la nixja ch'án kuènte Juan Bautista.

Ch'ín Jesús mé kjuínchekitohe jina ijnko xjan t'aniáte

(Mr. 9.14-29; Lc. 9.37-43)

¹⁴ Ntá tió k'uíji sín tí siín nchónhya chojni la ntá kóchjina ijnko ch'ín tí tjen ch'ín Jesús la kjuák'exín toch'in ch'án nkayakon ch'án. La ntáchro ch'án kixin:

¹⁵ —Ínchéni, tikonóehéni kixin xjeenni la níhi, chóna ch'án chin t'aniáte. Nchónhya veces tjítsínkate ch'án xrohi la tjítsínkankí ch'án ntá.

¹⁶ Ntá kjuikāoni ch'án ntihi la tí sín xrikoá la kjuachahya sín kjuínchekitohe ch'án jina.

¹⁷ A ntá kjuátehe ch'ín Jesús ntáchro ch'án kixin:

—Jahará la chaxínhya tinkachónkirá tí janhan la imá tjásinrá jie. ¿Xá hasta nkesá tjinkáonrá naxa ts'ejóni? ¿Hasta nkesá tsjácha tsjak'é tsjákohará? Xrakoa tí xjan méhe ntihi —ichro ch'án.

¹⁸ Ntá ch'ín Jesús mé k'uetuēnhen ch'án tí nchakuen tí jínahya la ntá k'uaxrjéxin tí nchakuen tí jínahya tí chánjan la tuénxín kuítóhe xjan jina.

¹⁹ Ntá kjuixin sákjuí sín la jehó ch'ín Jesús tjen ch'án la ntá tí sín k'uájiko ch'án mé kjuanchankíhi sín ch'án, ntáchro sín kixin:

—¿Nkekuènté kixin kjuachahyani kuakítsjeni tí nchakuen tí jínahya a? —ichro sín.

²⁰ Ntá ntáchro ch'ín Jesús kixin:

—Jahará la kjuachahyará kuakítsjerá nchakuen tí jínahya kixin intsíkoá tinkachónkirá tí janhan. Chaxín xrjanka kixin tí chrókuinkachónkirá kaín asánrá kjónté intsíkoá éxí ijnko tje mostaza intsí la ntá chróntácherá tí jnā kixin: “Sátjixian ntihi la sátsjia ókjé”, chróchorá chróntácherá tí jnā la ntá tí jnā sáchrókjuixin ntiha. Mé xikaha kaín nkehe chrókjuachará chrókjuich'erá tí chaxín tinkachónkirá tí janhan.

²¹ A ntá tí tsakítsjerá ijnko nchakuen tí jínahya la t'ichjánxin tsonixjehérá Dios la ko sintehyará.

Ch'ín Jesús chrónka ch'án inaá kixin its'en ch'án

(Mr. 9.30-32; Lc. 9.43-45)

²² Naxa k'uék'laji sín jnkokoá tí estado Galilea la ntáchro ch'ín Jesús kixin jehe ch'án tí Xjeen Dios K'óna Chojni mé tsotsé sín ch'án la ko tsjikaán sín ch'án tí siín chojni t'etōan sinchekjasóte sín ch'án

²³ la ts'óyán sín ch'án. A ntá tí yaon níxin ntá tsoxechón ch'án inaá, ichro ch'án. Ntá tí sín k'uájiko ch'án mé kuínhin sín la imá k'uává sín.

Ch'ín Jesús kjuenkā ch'án tí nkehe kjuanchia tí sín kuènte n̄nko

²⁴ Ntá tió kjuíji ch'ín Jesús la ko tí sín k'uájiko ch'án tí chjasin Capernaum la ntá tí sín nchekjènk̄i kuènte n̄nko mé sákjuítsjehe sín tí ch'ín Pedro la kjuanchankí sín kixin:

—Tí maestro kuéntá la, ¿a t̄jenk̄ahya ch'án tí nkehe t̄janchia tí sín nchekjènk̄i kuènte n̄nko? —ichro sín.

²⁵ Ntá kjuátehe ch'ín Pedro, ntáchro ch'án kixin:

—Kjá t̄jenk̄a ch'án —ichro ch'án.

Ntá k'uíxehen ch'ín Pedro tí nchia la ch'ín Jesús mé senó nixja ch'án ntáchro kixin:

—¿Nkechrua, Simón? ¿Nkexro chrókjuenk̄a tí nkehe t̄janchia tí sín t'et̄oan chjasintajni, á tí sín kuènte n̄tihó o á tí sín tsík̄j̄ix̄in ókjé? —ichro ch'ín Jesús.

²⁶ Ntá kjuátehe ch'ín Pedro, ntáchro ch'án kixin:

—Tí sín tsík̄j̄ix̄in ókjé mé t̄jenk̄a sín —ichro ch'án.

Ntá ntáchro ch'ín Jesús kixin:

—A ntá tí sín chjasén sín la t'ichj̄ánx̄inhya chrókjuenk̄a sín.

²⁷ Kjánchó t̄j̄nk̄akonhya t̄sonínkaon ninkexró n̄t̄ih̄i. La ntá sátsjia tí ntayaon sátsjikoá tí ichj̄on chóna gancho tséxin sín koche la ntaha itsé tí chj̄on chrínkí ntayaon. Ntá tsákjá tí koche saoxín sítsé gancho. Ntá takitjehe nkaya ir'va va la ts'itja ijnko chichaon. Táha mé tsjacha tsjenk̄a kaín tí t̄jásik̄ah̄a sín la ko tí t̄jásikehé sín jaha. Táha mé sátsjikoá t̄jenk̄a —ichro ch'ín Jesús.

18

¿Nkexro tí imá ts'et̄oan?

(Mr. 9.33-37; Lc. 9.46-48)

¹ A ntá tí yaon a tí sín k'uájiko ch'ín Jesús mé kóchjinehe sín ch'án ntá kjuanchankíhi sín ch'án kixin:

—¿Nkexro tí ant̄sí má ts'et̄oan tí kjuachaxin kuènte nkaya nkajní? —ichro sín.

² Ntá ch'ín Jesús mé k'uíyeh̄e ch'án ijnko chánjan la kjuak'e jnk̄osiné tí t̄jejó tí jehe sín

³ la ntáchro ch'án kixin:

—Chaxín xr̄j̄anka kixin tí ts'ónahyará éxí ijnko xjan ntsí ntá xitjahya tsákjárá tí kjuachaxin kuènte Dios.

⁴ Tí jnk̄ojín nkexro ts'óna éxí tí chánjan ihnkehya la mé ant̄sí t̄jetoan n̄tiha.

⁵ A ntá tí nkexro ts'áyeh̄e ijnko chánjan kixin tinkáchónki sín tí janhan la mé x̄ikaha éxí chrók'uáyeh̄e sín tí janhan —mé x̄ikaha ichro ch'ín Jesús.

Tí chojni t̄jasin j̄ie mé tsjasóte sín

(Mr. 9.42-48; Lc. 17.1-2)

⁶ Tí jnk̄ojín nkexro chrókjuachroe ijnko chánjan ntsí tinkáchónki tí janhan la íchá j̄ina chrókjuincheteyá sín ch'án ijnko xro tsík'óna xrochre ntá chrókjuíkkakánkí ch'án ntayaon n̄inka.

⁷ Imá náxrjónhya t̄jejó tí sín chjasintajni kixin siín nkehe t̄jasixín chojni j̄ie. Xr̄axín la jehí siín, a ntá nòa tí nkexro t̄jasin tí nkehe tsjasixín chojni j̄ie.

⁸ Tí it̄já o totá t̄jásixián j̄ie na chrókójina chrókochr̄injian chróchr'an ikj̄ín kixin íchá j̄ina chróchonta kjuachón kjónté it'oó it̄já o it'oó totá. Á ntá tí yóí it̄já o yóí totá chróchonta tsjásixián j̄ie la tíha mé sátsjixián tí síche xrohi jnkochr̄ixín.

⁹ La ko kjaxin tí ikuan tjásixian jię na chrókójina chrókuakitsjenkiá tí ikuan chróchr'an ikjín kixin kjónté náyo ikuan na chróchonta kjuachón. A ntá tí yóí ikuan chróchonta tsjásixián jię la tíha mé sátsixián tí síche xrohi jnkochrín.

Kjuíncheyóexin ch'ín Jesús éxi ijnko kolélo tsík'itjáyan
(Lc. 15.3-7)

¹⁰ Chrókókjoniéhyará nijnko tí chánjan ntsíntsí. Tjonkará kixin nkaya nkajní la tí sín ángel kuente tí xjanntsí la xráxín tjejó sín tí tjen T'aná nkaya nkajní.

¹¹ Tí Xjeen Dios K'óna Chojni la mé ikui kixin chrókjuinchekaá tí chojni xrichroe.

¹² ¿Jahará nkechorá? Ijnko chojni chóna ijnko ciento kolélo ntá chrók'uitjáyan ijnko va na ¿á chrókuítóehya ch'án tí noventa y nueve va tí jna ó a ntá á chrókjuikjeyáhya ch'án tí ijnko tí ko k'uitjáyan ní?

¹³ A ntá tí tsjacha ch'án ts'itja ch'án va ntá antsí tsochéhe ch'án kixin tí kolélo k'uitja ch'án la ntá kánhyó tsochéhe ch'án kixin tjejó tí noventa y nueve ko tsík'itjáyanhya va.

¹⁴ Mé xikaha kjaxin It'éni tjen nkaya nkajní la tjinkakonhya ch'án kixin chrók'uitjáyan ninkexró kjónté ijnko chojni kánhyó tjetóan.

Chrók'uitjáyanhanrá tí jię kjuasinhanrá kichuára
(Lc. 17.3)

¹⁵ Tí kichuá tí chrókjuít'aha ichrén nkehe jínahya la ntá jahvá chrónixjehé ch'án la nchexraxinkaon ch'án tí jię kjuasin ch'án. A ntá tí kjuacha nixjehé tí kichuá la í kohya kjuanínkaon.

¹⁶ A ntá tí tahya ch'án kuentá nkechrua la ntá ntáche á jnko o yaá chojni sájtjkoa kixin tsinhin sín á chaxín titekakonhya ch'án.

¹⁷ A ntá tí kjónté xikaha naxa titekakuenhya ch'án sín la ntá chenka tí sín tsíkójnksé nkehe tí jię kjuasin ch'án la ntá tí naxa titekakuenhya ch'án tí sín tsíkójnksé la ntá ts'ikonrá ch'án éxi ijnko chojni tinkáchónkihya Dios o éxi ijnko chojni nchekjènkj.

¹⁸ Chaxín ntáxrjan kixin tí tsjánjonhyará kjuachaxin nkehe tsonhen ntihí chjasintajni la ntá kjaxin nkaya nkajní tsjanjonhya Dios kjuachaxin la ko tí tsjánjonrá kjuachaxin nkehe tsonhen ntihí chjasintajni la kjaxin ntaha nkaya nkajní tsjanjon Dios kjuachaxin.

¹⁹ Kjaxin ntáxrjan kixin tí tjejó yaará ntihí chjasintajni la tí jnkokoá tjejó tjenkayáxinrá chrókjuancheherá Dios ijnko nkehe tjinkáonrá la ntá jehe ch'án mé tsotjáhará ch'án.

²⁰ Kixin tí tjejó yaá o iy'á chojni tjejó jnkokoá t'ákjenxin sín niná la janhan koína tjéntaxian tí tjejó sín ntihá.

²¹ Ntá kóchjina ch'ín Pedro mé kjuanchankí ch'án ntáchro ch'án kixin:

—Inchéni, ¿nkekjaín veces chrók'uitjáyenheni tí jię kjuasin kichó ni? ¿Á yato veces ó ní? —ichro ch'án.

²² Ntá kjuátehe ch'ín Jesús, ntáchro ch'án kixin:

—Náhí, jehya yato veces ó. Náhí, hasta setenta veces tí yato.

Ch'ín Jesús kjuíncheyóexin ch'án ijnko chojni ch'exón xra k'uitjáyenhya ch'án ijje kichó ch'án

²³ Tí kjuachaxin kuente Dios la éxi yóhe ijnko rey tjinkaon ch'án tsjentoáko ch'án kuentá tí sín ch'ehe ch'án xra.

²⁴ Ntá kjuankíxin ch'án tsítsínkaxín cuenta la ntá xrínahya kóchjina ijnko ch'ín ch'e xra síká nchónhya millones chichaon.

²⁵ Tí ch'ín a mé chóntahya ch'án chichaon ts'ókjenhen ch'án tí ch'ín rey la ntá tí ch'ín rey mé k'uetóan ch'án kixin tí nkexro a mé tsoxi ch'án la koí tí

ichjién ch'án la ko xjeen ch'án la ko kaín nkehe kuènte ch'án kixin ntá xikaha mé tsoxenka kaín tí síká ch'án.

²⁶ A ntá tí nkexro ch'e xra mé kjuák'exín toch'in ch'án nkayakon tí rey la chrónóehē ch'án, ntáchro ch'án kixin: “Jaha Ìnchéni tikonóehéni la kjónté kjaxón tsjenkahani kaín tí síkáhani”, ichro ch'án.

²⁷ A ntá tí ch'ín rey kuikonóehē ch'án tí ch'ín a kjónté itsjé síká ch'án, ntá kuítóhe ch'án sákjuí.

²⁸ A ntá tí sákjuí tí ch'ín a ntá xrínahya xéta ch'án ijnko nkexro ch'eko ch'án xra mé ijnko nkexro síkéhe ch'án iso chichaon. La ntá tí ch'ín a mé tsénkíhi ch'án isin la ntáchro ch'án kixin: “¡Tsjénkana tí nkehe tjasíkàna ní o náhí!” ichro ch'án.

²⁹ A ntá tí ch'ín chóxin ch'án mé kjuák'exín toch'in ch'án nkayakon ch'án la chrónóehē ch'án ntáchro ch'án kixin: “Tikonóehéni ijie la kjónté kjaxón tsjenkahani kaín tí nkehe síkáhani”, ichro ch'án.

³⁰ A ntá jehe ch'án la kuikonóehya ch'án. K'ueṭoan ch'án kixin tí ch'ín a mé tsjak'echjina ch'án tsjixinjian tsjenka ch'án kaín tí síká ch'án.

³¹ Ntá tí í so sín ch'exón xra mé k'uíkon sín la ntá imá kóxonhen sín la sákjuíchénka sín tí lámoé sín nkexrí kaá kónhen tí ch'ín síká.

³² A ntá tí lamo mé k'ueṭoan tsjik'íyehē sín tí nkexro jínahya la ntá ntáchro ch'án kixin: “Imá jínahya jaha. Janhan mé kjuíntak'itjáyanhan tí nkehe tjasíkàna kixin jaha chrónóana.

³³ A ntá jaha mé kjaxin chrókuikonóehé tí nkexro choxian éxí janhan kuikonóaha tí jaha”, ichro tí ch'ín lamo.

³⁴ A ntá imá kónínkaon tí lamo a la k'ueṭoan ch'án kixin tsjasóte tí ch'ín a tsjixinjian tsjenka ch'án kaín tí síká ch'án.

³⁵ A ntá tí ch'ín Jesús ntáchro ch'án kixin:

—Mé xikaha T'aná tjen nkaya nkajní xikaha sit'ahará jahará tí jehya kaín asánrá ts'itjáyanhanrá tí jie chóna kichuárá —ichro ch'ín Jesús.

19

*Tjako ch'ín Jesús kuènte tí sín t'itjíhi kichó
(Mr. 10.1-12; Lc. 16.18)*

¹ A ntá kjuixin nixja ch'ín Jesús kaín tíha, ntá sákjuíxin ch'án estado Galilea la kjuíji ch'án estado Judea nó tóhe tí ntario Jordán.

² Ntá nchónhya chojni kjuíjichréhe sín ch'án ntá ntiha mé kjuínchekitōhe ch'án jína tí chojni níhi.

³ Ntá iso sín fariseo mé kóchjinehe sín tí ch'ín Jesús kjuanchankíhi sín ch'án kixin tsotsjehe sín nkexrí tsixro ch'án, ntáchro sín kixin:

—¿Á siín kjuachaxin tsjákehē jnkojín chojni ichjién kjónté kohya jie jie? —mé xikaha kjuanchankí sín.

⁴ Ntá kjuátehe ch'ín Jesús ntáchro ch'án kixin:

—¿Á nunca kjuínchekuáxinhyará jahará kixin ntáchro xroon itén Dios kixin tí nkexro kjuích'éna kaín chojni siín chjasintajni tí xrankíxixín, la tí nkexro mé “kjuích'éna ch'án chojni ntoa ko chojni chjin”?*

⁵ La ko ntáchro kixin: “Mé xikaha tí chojni ntoa la tsítóhe sín it'é sín la ko ìné sín la tsakja sín ichjién sín la yóí sín la éxí ó jnko chojni xikaha ts'óna sín.”†

⁶ Mé xikaha la í jehya yaá chojni tí jehe sín. Náhi. Ó jnko chojni k'óna tí jehe sín la mé Dios kjuanjon kjuachaxin kixin kuákja kichó sín, la i xitjahya ts'itjíhi kichó sín.

⁷ Ntá tí sín fariseo mé kjuanchankíhi sín ch'án kixin:

* 19:4 19.4: Génesis 1.27; 5.2 † 19:5 Génesis 2.24

—¿Ntá nkexrí kixin tí ch'ín Moisés k'uetōan kixin ts'óna ijnko xroon tsakja tí ichjién kixin tsjákeexín kichó sín?‡ —ichro tí sín fariseo.

⁸ Ntá ntáchro ch'ín Jesús kixin:

—A ntá jahará titekákonhyará. Méxra ch'ín Moisés kjuanjon ch'án kjuachaxin kixin ts'óna tí xroon ts'itjéxín kichuára. Kjánchó tí xrankixín la xikahya kónhen.

⁹ Méxra ntáxrjan kixin jnkojín sín tjákehe ichjién tí kjuasinhya jie, chóntahya tjan í jnko chojni, ntá kjuákehe ch'án tjan ntá tsakja ch'án í jnko chjin mé xikaha la ó jie tíha. La ko kjaxin tí ijnko chojni chjin tsíkítsinkehe ntá tsakja í jnko chojni la kjaxin jie tíha.

¹⁰ La ntá tí sín k'uájiko ch'ín Jesús ntáchro sín kixin:

—Tí xikaha tjanjonko kichó sín chrók'uitjíhi kichó sín la íchá jína chrókóteehya sín.

¹¹ Ntá ntáchro ch'ín Jesús kixin:

—Kénhya chojni tsjacha tienxín tíha. Jehó tí sín kjuanjon Dios kjuachaxin tienxín sín.

¹² Sín iso chojni tí tsík'ónaxín sín la chóntahya sín kojé sín la xitjahya tsochónta sín ichjién sín. La í so sín la chrokjuahya tsakja kichó sín kixin ókjé chojni kjaxin kjuich'ehe sín xikaha, la ko í so sín la takjahya kichó sín kixin tjinkaon Dios kixin xikaha sich'ehe sín ch'án xra. Tí sín tsjacha sich'e tíha la chrókjuich'e sín xikaha.

Ch'ín Jesús mé kjuíncheyaon ch'án chánjan

(Mr. 10.13-16; Lc. 18.15-17)

¹³ Ntá ikjui chojni kjuikao sín iso xjan kixin tjinkaon sín tsjak'etja tja ch'ín Jesús chrítaón tí chánjan la sincheyaon ch'án sín. Ntá tí sín k'uájiko ch'án mé kónínkakohen sín tí sín kjuikao tí xjan.

¹⁴ A ntá ntáchro ch'ín Jesús kixin:

—Nté títóhéra tsoxrakoa xjan tí tjén janhan la t'ínkakuènhyará xjan kixin tí sín kuènte kjuachaxin nkaya nkajní la mé tóyóhe éxí tí jehe xjan —ichro ch'án.

¹⁵ Ntá kjuak'etja tja ch'án chrítaón tí xjan la ntá kjuixin ntá sákjuí ch'án ókjé.

Ijnko ch'ín ntasoá rico mé kjuínixjehé ch'án tí ch'ín Jesús

(Mr. 10.17-31; Lc. 18.18-30)

¹⁶ A ntá ijnko ch'ín ntasoá sákjuítsjehe ch'án tí ch'ín Jesús la kjuanchankíhi ch'án kixin:

—Jaha la ijnko Maestro jína. La ntá ¿nkehe jína chrókjuich'eni kixin chróchóntani kjuachón jnkochrín? —ichro ch'án.

¹⁷ Ntá ch'ín Jesús kjuátehe ch'án, ntáchro ch'án kixin:

—¿Nkekuènté ntáchrúa kixin jína tí janhan? Jehó jnkokoá nkexro la mé jína la tíha mé Dios. A ntá tí tjinkávan tsochonta kjuachón jnkochrín la titekávan tí nkehe k'uetōan Dios —ichro ch'ín Jesús.

¹⁸ Ntá ntáchro tí ch'ín ntasoá kixin:

—¿Nkehe tíha? —ichro ch'án.

Ntá ntáchro ch'ín Jesús kixin:

—Chrók'oyánhya chojni la ko chrókjuich'iyehya nijnko chojni chjin la ko chrókueehya la ko chrókjuich'énahya kjuach'ia kuènte ókjé chojni

¹⁹ la ko chrókjuíkosáyehé it'á la ko iná la ko chrótjuèhé kichuá éxí tjuèxian asán. § —mé xikaha ichro ch'ín Jesús.

²⁰ Ntá ntáchro tí ch'ín ntasoá kixin:

‡ 19:7 Deuteronomio 24.1-4 § 19:19 Éxodo 20.12-16; Deuteronomio 16.20; Levítico 19.18

—Kaín tíha la kjuínchexiteyáni desde tí ntasoáni. ¿A ntá nkehe tí naxa t'itjáyan? —ichro ch'án.

²¹ Ntá ntáchro ch'ín Jesús kixin:

—Tí tjinkávan antsí ntoá sìnchexiteyá la sátjia sìnchekjia kaín tí nkehe chonta la sìnchekitonhén tí sín nò. Ntá kaín tí nkehe tjete la tsochonta nkaya nkajní. Ntá tsjixin ntá tsjihá la chréhe tí janhan —ichro ch'ín Jesús.

²² Ntá kuínhin tí ch'ín ntasoá a xíkaha ntá t'ává ch'án sákjuí ch'án kixin imá itsjé nkehe chóna ch'án.

²³ Ntá ch'ín Jesús mé nixjehe ch'án tí sín k'uájiko ch'án, ntáchro ch'án kixin:

—Chaxín tjonkará kixin tí chojni chóna imá itsjé nkehe na imá xra ts'áyéhe sín tí kjuachaxin kuente nkaya nkajní.

²⁴ Kjatée xrjanka kixin antsí xrahya chrók'uatsínka ijnko kocamello ijnko tjar'i ntachica tjexrja. A ntá antsí xra kixin tí sín chóna itsjé nkehe chrók'uáyéhe tí kjuachaxin kuente Dios —ichro ch'ín Jesús.

²⁵ Ntá tí sín k'uájiko ch'án mé kuínhin sín la imá chrakon sín, la jehe sín kjuanchankíhi kichó sín kixin:

—Tí xíkaha la ¿xá nkexro chrókjuacha chrókuaá? —ichro sín.

²⁶ Ntá komá ch'ín Jesús tí jehe sín la ntáchro ch'án kixin:

—Chojni chjasintajni la xitjahya xíkaha sich'e. A ntá Dios mé tsjacha sich'e xíkaha —ichro ch'ín Jesús.

²⁷ Ntá ntáchro ch'ín Pedro kixin:

—Ínchéni, jeheni kaín ni la kuítóheni kaín nkehe chóntani kixin tsochréheni tí jaha. A ntá ¿nkehe ts'áyéheni? —ichro ch'án.

²⁸ Ntá kjuátehe ch'ín Jesús kixin:

—Chaxín ntáxrjan kixin tió itsi tí yaon tsonixin kaín nkehe la tí Xjeen Dios K'óna Chojni la mé tsjak'e tí trono tsochóna kjuachaxin jié la ntá kjaxinrá jahará chréherá tí janhan la ts'ejorá teyó trono sìnchekitoexínrá ijje kaín tí sín tsík'axrjenixin tí teyó xjeen ch'ín Israel.

²⁹ La ko kaín tí sín kuítóhe sín ntoe sín la ko kuítóhe sín tí kichó sín la ko kuítóhe sín it'é sín o iné sín la ko kuítóhe sín ichjién sín la ko xjeen sín la ko nontee sín kixin tinkáchónki sín tí janhan, na ntá antsí má tsochóna sín la ko kjaxin tsochóna sín kjuachón jnkochrín.

³⁰ A ntá nchónhya tí sín t'etōan ijie, mé tsjixixín tsochréhe sín. A ntá nchónhya tí sín t'ítuenhen ijie la tí sín a mé ts'etōan sín tí ntiha.

20

Ch'ín Jesús kjuíncheyóexin ch'án éxí tí sín ch'e xra

¹ Tí kjuachaxin kuente Dios la éxí yóhe ijnko chojni chóna xra nontee ch'án la ntá ijnko yaon imá nchítjen sákjuíkjejá ch'án chojni tsotjehe ch'án to uva.

² Ntá tí k'uitja ch'án tí sín sich'ehe ch'án xra ntá ikjo ch'án sín kixin ijnko denario tsjenkehe ch'án sín tí xra sich'e sín nontee ch'án tí yaon a.

³ Ntá chr'éxin como las nueve nchítjen ntá sákjuí ch'án ntasin la k'uíkon ch'án í so sín tjejó ntasin chóntahya sín xra.

⁴ Ntá nixjehe ch'án sín ntáchro ch'án kixin: “Kjaxinrá sáchrókjuirá chrókjuích'erá xra nonteeni la jína chrókjuénkajhará”, ichro ch'án. La ntá jehe sín sákjuí sín.

⁵ A ntá tí ínché nonte la sákjuí ch'án inaá chonkixin naxa xík'itja ch'án í so sín ch'ehe ch'án xra la nta tí las tres kónjín la xíkaha naxa xík'itja ch'án í so sín inaá.

⁶ A ntá las cinco kónjín sáxíkji ch'án ntasin ínaá la k'uitja ch'án í so chojni ntaha chóntahya sín xra la ntá kjuanchankíhi ch'án sín kixin: “¿Nkekuènté tjejorá ntihi ch'ehyará xra kuenté yaon? —ichro ch'án.

⁷ Ntá ntáchro sín kixin: “Kohya nkexro kjuanjón xra chrókjuich'eni”, ichro sín. Ntá ntáchro ch'án kixin: “Kjaxinrá chrókjuirá chrókjuich'erá xra nontèni la jina chrókjuénkàhará”, ichro ch'án.

⁸ A ntá ó kóntó ntá tí ìnché nonte mé nixjehe ch'án tí ch'ín t'etòan sítónhen xra nontèe ch'án la ntáchro ch'án kixin: “T'iyehé kaín tí sín kjuích'e xra tjenkehé sín. Tjankíxian tjenkehé tí chojni kjuixixín k'uixenhen xra la chr'éxin tjenkehé tí sín saoxín k'uixenhen xra”, ichro ch'án.

⁹ A ntá kóchjina kaín tí sín k'uixenhen xra las cinco kónjín la jnkójnko sín k'uáyéhe sín jnkójnko denario.

¹⁰ Ntá chr'éxin, tió kóchjina tí sín k'uixenhen xra nchítjen la ntá kjuenkayáxin sín kixin antsí itsjé chichaon chrókjuacha sín, ichro sín. Kjánchó kjaxin sín k'uáyéhe sín jnkójnko denario ó.

¹¹ A ntá tí kjuachahya sín tjete ntá kjuankíxin sín kónínkakonhen sín tí ìnché nonte

¹² la ntáchro sín kixin: “Tí sín ikui kjuixixín la kjuích'e sín xra jnkokoá hora la ntá kjaxin kjuénkehé sín jnkokón éxí kjuacha tí jeheni. La ntá jeheni kjuích'eni xra kjónté sóa la kuenté yaon kjuích'eni xra”, ichro sín.

¹³ A ntá kjuátehe tí ìnché nonte nixjehe ch'án ijnko tí jehe sín, ntáchro ch'án kixin: “Janhan la kjuít'ayahyará ninkehó. Ó kuítòexínni kixin ijnko denario tsjénkàhará tí yaon.

¹⁴ Ntá tsákjá chìchakoan la sátjia. Janhan tjínkavan tsjénkàha tí sín k'uixenhen kjuixixín éxí tí kjuénkàha jaha.

¹⁵ ¿Á chontahya janhan kjuachaxin xíkaha chrókjuénkàha sín kixin tíha la chìchakonna? ¿Nkekuènté tóchjinoxínhan jaha kixin xíkaha kjuénkàha sín?” ichro ch'án.

¹⁶ Mé xíkaha iso tí sín tsjixixín chréhe sín la tí sín a senóxin ntiha la ntá itsjé tí sín senó la mé tsjixixín tsochréhe sín ntiha kixin nchónhya sín k'uíyaha kjánchó tsjéhya sín k'uitja —ichro ch'ín Jesús.

Chrónka ch'ín Jesús ínaá kixin its'en ch'án

(Mr. 10.32-34; Lc. 18.31-34)

¹⁷ Ntá ch'ín Jesús sákjuí ch'án ntia nó chjasin Jerusalén la ntá k'uaxrjentako ch'án tí teyó sín k'uájiko ch'án la ntáchro ch'án kixin:

¹⁸ —Jahará ts'ikonrá ó sátsjini chjasin Jerusalén la ntá tí Xjeen Dios K'óna Chojni mé tsotsé chojni tsjikaán sín ch'án tí siín tí sín nchat'á t'etòan la ko tí sín maestro tí tjako ley. Ntá jehe sín ts'etòan sín kixin its'en ch'án.

¹⁹ Ntá tsjikaán sín ch'án tí siín chojni jehya judío la jehe sín mé tsjanoá sín ch'án la ko tsjate sín ch'án ntá tsjak'enkaní sín ch'án ijnko ntacruz kjánchó yaon níxin mé tsoxechón ch'án ínaá —mé xíkaha chrónka ch'ín Jesús.

Tí nkehe kjuanchia tí ìné ch'ín Jacobo la ko ch'ín Juan

(Mr. 10.35-45)

²⁰ A ntá tí ìné tí xjeen ch'ín Zebedeo mé kjuikao tí jehe sín mé ch'ín Jacobo la ko ch'ín Juan mé kóchjinehe tjan tí ch'ín Jesús. Kjuák'exín toch'ín tjan nkayakon tí ch'ín Jesús la chrónóehé tjan ch'án.

²¹ Ntá ch'ín Jesús kjuanchankíhi ch'án tjan kixin:

—¿Nkehe tjinkávan? —ichro ch'án.

Ntá kjuátehe tjan ntáchro tjan kixin:

—Tió tsétòanxián tí kjuachaxián jié la tsjánjuan kjuachaxin kixin tí iyó xjeenni chrók'uejó sín ijnko la itjá chjina la í jnko la itjá ikjon —ichro tjan.

22 Ntá kjuátehe ch'ín Jesús, ntáchro ch'án kixin:
—Jahará la noahyará nkehe tjanchará.

¿Á chrókjuachará chrók'uirá tí nkehe itsjá its'ia janhan la ko á chrókjuachará chrókuikiterá éxí tsikite janhan? —ichro ch'án.

Ntá kjuátehe sín, ntáchro sín kixin:
—Kja tsjachani —ichro sín.

23 Ntá ntáchro ch'ín Jesús kixin:

—Chaxín kjónté chrókjuachará chrók'uirá éxí tí nkehe itsjá its'ia la ko chrókuikiterá éxí tsikite janhan, kjánchó janhan xitjahya tsjánjuan kjuachaxin kixin ijnkora chrókjuak'erá tjaná chjina la í jnkora chrókjuak'erá tjaná ikjon kixin janhan la tónahya tocar kixin tsjánjuan tíha. Jehó T'aná tjen nkaya nkajní mé nohe kixin nkexro tsíkjejá ch'án ts'áyéhe tíha —ichro ch'ín Jesús.

24 Ntá kuínhin tí ite sín kixin xikaha tsíkjanhia tí sín a ntá kónínkakohen sín tí yaá a.

25 A ntá ch'ín Jesús mé k'uíyehé ch'án tí jehe sín ntá ntáchro ch'án kixin:

—Jahará ó nohará kixin tí sín t'etōan chjasintajni la imá t'etuenhen sín kaín chojni la tí sín t'etōan imá nchehnkehe asén sín kixin ihyé sín t'etōan sín.

26 Kjánchó jahará la xikahya chrókjuich'erá. Náhí. Tí jnkójínrá tjinkáonrá chrókuétōanrá la chrókuínkĩtsará tí í so sín.

27 A ntá tí jnkójínrá tjinkáonrá chrókuétōanrá mé t'ichjánxin senó chrókjuákoxínrá chrókjuich'eherá kíchuará xra.

28 Mé xikaha tí Xjeen Dios K'óna Chojni mé kuihya kixin chojni chrókjuich'ehe xra. Náhí. Ikui ch'án kixin sich'ehe ch'án sín xra la ko ts'enyákonhen chojni kixin tsaáxin nchónhya sín.

*Ch'ín Jesús kjuínchekitohe jina yaá chojni t'ikonhya
(Mr. 10.46-52; Lc. 18.35-43)*

29 Ntá k'uaxrjexín sín chjasin Jericó la nchónhya chojni chréhe tí ch'ín Jesús.

30 Ntá ntaha chrínta ntia tjejótjāxin yaá sín t'ikonhya. La ntá kuínhin sín kixin k'uatsínka ch'ín Jesús la ntá kjuankixin t'íyehé sín ch'án ntáchro sín kixin:

—Ìnchéni, jaha tsík'axrjeníxian David, tikonóehéni —ichro sín.

31 Ntá nchónhya chojni mé ntáche sín tí sín t'ikonhya kixin:

—Tánírá tí jahará —ichro sín.

Ntá tí jehe sín antsí itsén k'uèya sín, ntáchro sín kixin:

—Ìnchéni, jaha tsík'axrjeníxian David, tikonóehéni —ichro sín.

32 Ntá ch'ín Jesús kjuák'echónhen ch'án ntá k'uíyehé ch'án tí sín t'ikonhya la kjuanchankíhi ch'án sín ntáchro ch'án kixin:

—¿Xá nkehe tí tjinkáonrá chrókjuít'ahará? —ichro ch'án.

33 Ntá jehe sín kjuátehe sín ntáchro sín kixin:

—Jaha Ìnchéni, tjinkaonni chrókjuínchek'ikuanni —ichro sín.

34 Ntá ch'ín Jesús mé kuíkonóehé ch'án tí jehe sín la kjuínchekuákóxin tja ch'án tí ikon tí sín t'ikonhya. Ntá tuénxín k'uíkon sín la chréhe sín tí ch'ín Jesús.

21

*K'uixenhen ch'ín Jesús chjasin Jerusalén
(Mr. 11.1-11; Lc. 19.28-40; Jn. 12.12-19)*

1 Ntá kjuíji chjina sín chjasin Jerusalén, mé kjuíji sín tí chjasin ntsí Betfagé itjen chjinaxón tí jna Olivo. Ntá ch'ín Jesús k'uētuenhen ch'án iyó tí sín k'uájiko ch'án

2 ntáchro ch'án kixin:

—Sátjirá tí chjasin ntsí itjen tóhe ntiha. Ntiha mé ts'ítjará ijnko kolócho tjechroé va la ko ijnko kolóchóxjan. Ntá tjasintankehéra va ntá tsjúkuanará va ntihi.

³ A ntá tí jnkojín nkexro tsjanchankíhará nkekuènté tjasintankehéra va la ntá tsontáchrora kixin “Ìnchéni t'ichjánxinhin va la ntá tió tsjixin ntá tuénxín tsjikaáni va”, ichrorá —ichro ch'ín Jesús.

⁴ Mé xíkaha kónhen kixin tsoxiteyá tí nkehe chrónka ijnko ch'ín k'uéchrónka itén Dios ósé ntáchro xíkahi:

⁵ Ntáche tí chojni chjasin Sión kixin:

“Tsjeherá ó kui tí ch'ín Rey kuéntará.

Ihnkehya ch'án la ijnko kolócho ó tjejkjen ch'án,

mé ijnko kolóchóxjan, xjeen ijnko kolócho támá nkehe.”*

Mé xíkaha ichro tí itén Dios ósé.

⁶ Ntá tí iyó sín mé sákjuí sín la kjuínchexiteyá sín tí nkehe k'uetoan ch'ín Jesús.

⁷ Ntá kjuíkəo sín kolócho la ko xjeen va la kuakitsje sín ika titsáte sín ntá kjuínchekamá sín va ntá kjuák'ekjen ch'ín Jesús.

⁸ Ntá itsjé chojni kuakitsje sín ka titsáte sín na kjuentoá sín ka tinkák'ikjínxín sín ka tí ntia ts'atsínkaxín ch'ín Jesús. La iso sín xraá kajni la ko chaon nta yoa tsíkóchrínjin sín la tinkákjasin sín ntia a.

⁹ Ntá iso sín tsítaón ntia la ko í so sín chréhe iton ch'án mé kjuankixin sín itsje sín kixin:

—Tjancheheni kjuasáyé tí nkexro k'uaxrjeníxin tí rey David. Jína tí nkexro kjuixín kjuachaxién ihnié Ìnchéni. Tjancheheni kjuasáyé Dios —ichro sín itsje sín.

¹⁰ Ntá k'uíxenhén ch'ín Jesús tí chjasin Jerusalén la ntá kaín tí sín ntiha mé kóxakonhen sín la itsjé sín kjuanchankí sín kixin:

—¿Xá nkexro tíhi? —ichro sín.

¹¹ La ntá nchónhya sín kjuátehe sín ntáchro sín kixin:

—Tíhi mé tí nkexro Jesús chrónka itén Dios kjuixín ch'án chjasin Nazaret estado Galilea —ichro sín.

Ch'ín Jesús kjuínchetjóá tí nínko

(Mr. 11.15-19; Lc. 19.45-48; Jn. 2.13-22)

¹² A ntá ch'ín Jesús mé k'uíxenhén ch'án tí nínko la ntá kuakitsje ch'án kaín tí sín nchekjixin nkehe ntiha la ko tí sín t'ena nkehe ntiha. La kótéka ch'án tí mesa tjinkítóxixín sín chichaon la ko tí silla tjejókjen tí sín nchekji kontóá.

¹³ La ntá ntáchro ch'án kixin:

—Tí xroon itén Dios tsíkjin sín ósé mé ntáchro kixin: “Tí ntona imé it'in nchia tsonixjanaxian sín.” A ntá jahará tí nchia i tsíkjich'énará itjueé xíchee† —mé xíkaha ichro ch'ín Jesús.

¹⁴ Ntaha nkaxenhén nínko kóchjinehe ch'ín Jesús iso tí sín t'ikonhya la ko iso tí sín xitjahya tji la ntá ch'ín Jesús mé kjuínchekitohe ch'án sín jína.

¹⁵ A ntá tí sín nchat'á tjeetoan la ko tí sín maestro tjako tí ley mé k'uíkon sín kaín tí kjuaxroan kjuích'e ch'án la ko kuínhin sín kixin iso chánjan mé itsje sín nkaxenhén nínko ntáchro sín kixin: “Chjéheni kjuasáyé tí nkexro k'uaxrjeníxin rey David”, ichro sín. Ntá kuínhin tí sín a xíkaha ntá kónínkaon sín

¹⁶ la nixjehe sín tí ch'ín Jesús ntáchro sín kixin:

—¿Á kuínhín tí nkehe itsje tí chánjan? —kjuanchankí sín.

Ntá ntáchro ch'ín Jesús kixin:

—Ó kuínhan. Kjánchó, ¿á nunca kjuínchekuáxinhyará tí xroon itén Dios? La xíkahi chro:

* 21:5 Isaías 62.11; Zacarías 9.9 † 21:13 Isaías 56.7; Jeremías 7.11

Jaha kjuánjuan kjuachaxin kixin tí sín chánjan hyé la ko chánjan naxa tjejótaki mé tsotsje sín‡

—mé xikaha ichro ch'ín Jesús.

¹⁷ Ntá jehe ch'án mé kuítóhe ch'án sín la k'uaxrjexín ch'án chjasin Jerusalén la sákjuí ch'án chjasin Betania la ntiha k'ok'éhe ch'án tí tie a.

*Ch'ín Jesús kónínkakohen ch'án ijnko nta t'óna to higo
(Mr. 11.12-14, 20-26)*

¹⁸ A ntá tí kóyaon nchítjen ntá kjan sín chjasin Jerusalén inaá la ikui sín ntia ntá ch'ín Jesús mé ik'uén ch'án kjinta.

¹⁹ Ntá k'uíkon ch'án itjen ijnko nta t'óna to higo chjino ntia. La ntá sákjuítsjehe ch'án tí nta, ntá k'uíkon ch'án kixin jehó ka itsa tí nta, naxa k'ónahya to. A ntá jehe ch'án mé nixjehe ch'án tí nta, ntáchro ch'án kixin:

—Í nunca ts'ónahya to inaá —ichro ch'án.

Ntá tí nta t'óna to higo mé tuénxín xamá.

²⁰ Ntá tí sín k'uájiko ch'ín Jesús mé k'uíkon sín kixin xikaha kónhen tí nta, ntá chrakon sín la kjuanchankíhi sín tí ch'ín Jesús kixin:

—¿Nkekuénté kixin tí nta t'óna to higo tuénxín xamá? —ichro sín.

²¹ Ntá kjuátehe ch'ín Jesús, ntáchro ch'án kixin:

—Ntá chaxín ntáxrjan kixin tí tinkachónkirá Dios chaxín la ntá jehya jehó tí nta xikaha kónhen, la kjaxin chrónixjeherá tí jna i kixin: “Sátjixian ntihi sájtjkjankiá ntayaon”, la mé xikaha tsonhen.

²² Tí tinkachónkirá Dios kaín nkehe tsjancheherá ch'án la ts'ayéhérá —ichro ch'ín Jesús.

*Tí kjuachaxin chóna ch'ín Jesús
(Mr. 11.27-33; Lc. 20.1-8)*

²³ Ntá kjuixin ntá ch'ín Jesús mé k'uixenhen ch'án tí nínko ntiha. Ntá tió tjetjako ch'án ntá kóchjina iso tí sín nchát'a t'etōan la ko tí sín táda judío t'etōan la kjuanchankíhi sín ch'án ntáchro sín kixin:

—¿Nkehe tí kjuachaxin chonta kixin xikaha ch'e la ko nkexro tí kjuanjon kjuachaxin? —mé xikaha kjuanchankí sín.

²⁴ Ntá kjuátehe ch'ín Jesús ntáchro ch'án kixin:

—Ntá kjaxian janhan tsjánchánkíhará ijnko nkehe siná tsjateherá ntá janhan tsotjōnkará nkehe tí kjuachaxin chonta tjet'a tí xra i.

²⁵ ¿A ntá nkexro k'uetuēhen ch'ín Juan kixin tsikite ch'án chojni? ¿Á Dios ní o á chojni ó? —mé kjuanchankí ch'ín Jesús.

Ntá jehe sín itjo sín kichó sín kixin:

—A ntá tí tsontáchroni kixin Dios tsík'etuēhen tí ch'ín Juan ntá tsjanchankí tí ch'ín a kixin nkekuénté kuítekakuēnyani ch'án.

²⁶ A ntá tí tsontáchroni kixin chojni ó tsík'etuēhen ch'án la ntá chrakonhenni tí chojni kixin kaín sín kuítekaon sín kixin ch'ín Juan la nixja ch'án itén Dios —ichro sín.

²⁷ A ntá kjuátehe sín ntáche sín tí ch'ín Jesús kixin:

—Náhí, noehyani —ichro sín.

Ntá ntáchro ch'án kixin:

—La ko kjaxin janhan tsōxrjankahya nkexro kjuanjon kjuachaxin kixin tjet'a tí xra —ichro ch'án.

Ch'ín Jesús mé kjuíncheyóexin ch'án kixin éxí yaá xjan

²⁸ Ntá ntáchro ch'ín Jesús kixin:

‡ 21:16 Salmo 8.2

—¿Nkehe tsixrorá? Itjen ijnko chojni chóna yaá xjeen ch'án la ijnko yaon nixjehe ch'án ijnko xjan ntáchro ch'án kixin: “Xjeenni ijie la sátsjia t'akjínjián to uva nonteeni”, ichro ch'án.

²⁹ Ntá kjuátehe tí xjan kixin: “Náhi tjinkakonhyani”, ichro ch'án. A ntá chr'éxin ntá k'uixitoxin tí kjuenkayáxin ch'án la sákjuíkjich'e ch'án tí xra a.

³⁰ A ntá tí it'é xjan a mé kjuínixjehe ch'án tí í jnko xjan la jnkokón k'uētuenhen ch'án la kjuátehe tí xjan kixin: “Jeén, ó sátsjini”, ichro ch'án. La ntá chaxínhya sátsíkji ch'án —ichro ch'ín Jesús.

³¹ Ntá kjuanchankí ch'ín Jesús kixin:

—¿Nkexéhe tí yaá chánjan kjuínchexiteyá tí nkehe k'uētuenhen it'é? —ichro ch'án.

Ntá kjuátehe sín kixin:

—Tí xjan saó —ichro sín.

Ntá ntáchro ch'ín Jesús kixin:

—Méxra chaxín tjonkará kixin tí sín nchekjènkí la ko tí chojni chjin ch'iyehé nchónhya chojni ntoá la saoxín ts'ixenhen sín tí kjuachaxin t'etoan Dios la ntá jahará la náhi.

³² Kixin ch'ín Juan Bautista mé ikui ch'án kjuakohará ch'án nkexrí chrók'uejorá la ntá jahará kuítekákuenhyará tí chrónka ch'án. A ntá tí sín nchekjènkí la ko tí chojni chjin ch'iyehé nchónhya chojni ntoá mé kuítekaon sín. A ntá jahará kjónté xikaha k'uíkonrá la kjuítoxiénhyará tí tjenkayáxinrá la ko kuítekákonhyará —ichro ch'ín Jesús.

Ch'ín Jesús kjuíncheyóexin ch'án kixin éxí chojni ch'e xra la jínahya asén sín (Mr. 12.1-12; Lc. 20.9-19)

³³ Ntá ch'ín Jesús ntáchro ch'án kixin:

—Tsinhínrá ijnko nkehe sintayóaxian. Éxí ijnko ch'ín k'uenkaxin ch'án itsjé ntanoa t'óna to uva nontee ch'án. Ntá kjuích'éna ch'án ijnko corral. La ko ijnko tjó kjuích'éna ch'án tòye kixin ts'énya sín ìnté to uva. La ko kjuích'éna ch'án ijnko tjàt'ò noi kixin ts'it'ótjen ch'án tsotsjehe ch'án nkuíxín. §

'A nta kjuínchekjen ch'án tí nontee ch'án iso tí sín ch'e xra ntá kjuixin ntá sákjuí ch'án imá ikjín.

³⁴ A ntá tí kjuixraká tí yaon k'óna nkehe ntá jehe ch'án mé ichr'án ch'án iso tí chojni ch'ehe ch'án xra kixin tsjikjanchehe sín tí sín ch'e xra nontee ch'án kixin tsjanjon sín tí nkehe tsakja ch'án.

³⁵ A ntá tí sín t'ayakonhen tí nonte mé itsé sín tí sín kjuíkjanchia tí nkehe la kjuate sín iso la ko í so la k'óyán sín la í so la ixro k'uíchexín sín.

³⁶ A ntá tí inché nonte a xíchr'án ch'án iso chojni ch'ehe ch'án xra inaá, a ntá tí sín ch'e xra la kjaxin xikahó kjuích'ehe sín tí sín kjuíji.

³⁷ 'A ntá xikaha tsíkónhen ntá kjuenkayáxin ch'án ichr'án ch'án tí xjeen ch'án, la kjá chróchónthehe sín kjuasáyé tí xjeen ch'án, ichro ch'án.

³⁸ A ntá tí k'uíkon tí sín ch'e xra tí xjeen ch'án la ntá jehó sín kjuenkayáxin sín kixin: “Tí ch'ín i mé ts'áyéhe ch'án kaín nkehe. Ts'óyánni ch'án kixin ntá tsitoekoni kaín tí nkehe kuénte ch'án”, ichro sín.

³⁹ Ntá itsé sín tí xjeen ch'án ntá kuakitsjexín sín ch'án tí nonte ntaha ntá k'óyán sín ch'án —mé xikaha kjuako ch'ín Jesús.

⁴⁰ Ntá kjuanchankíhi ch'ín Jesús tí sín kóchjina, ntáchro ch'án kixin:

—Tió itsi tí inché tí nonte a la, ¿nkehe sich'ehe ch'án tí sín ch'e xra? —ichro ch'ín Jesús.

⁴¹ Ntá kjuátehe sín kixin:

—Mé tsjiji ch'án la tsikonóehya ch'án tí sín jínahya la ts'óyán ch'án sín la tsjeyá ch'án ókjé chojni sinchekjen ch'án tí nonte a. Tsjeyá ch'án chojni jína tsjanjon tí to tsjixraká tí yaon ts'ínjin sín to —ichro sín.

⁴² Ntá ntáchro ch'ín Jesús kixin:

—¿Á nunca kjuínchekuáxinhyará tí xroon itén Dios tsíkjin sín ósé? Mé ntáchro xikihi:

Tí xro náxrjónhya kuítóenta tí sín ch'éna tjat'o,

a ntá mé jie k'óna tí xro tjetoo.

Mé xikaha kjuích'e Ìnchéni Dios,

na ntá tíha mé ijnko nkehe kjuachrakon k'uíkonni.*

Mé xikaha ichro itén Dios.

⁴³ Ntá ntáchro ch'ín Jesús kixin:

—Tjonkará kixin Dios tsakitsjehará tí kjuachaxin kuente ch'án la ntá sinchek'áyéhe ch'án tí sín ch'e xra jína.

⁴⁴ A ntá jnkójín nkexro tsjitsínka chrítaón tí xro i mé tsokuen ch'án la tí ts'ánótjen tí xro tsoxratja ijnko chojni la jehe sín ts'óna inche —mé xikaha ichro ch'ín Jesús.

⁴⁵ Ntá tí sín nchat'á tjetoo la ko tí sín fariseo mé kuínhin xikaha kjuíncheyóexin ch'ín Jesús ntá kienxín sín kixin kaín tí ntáchro ch'án kjuíncheyóexin ch'án kixin tí jehe sín xikaha tsonhen sín.

⁴⁶ La ntá tjinkaon sín chrókjuinchekjasóte sín ch'án kjánchó chrakonhen sín tí chojni kixin kaín sín ntáchro sín kixin chaxín tí nkehe nixja ch'ín Jesús la kuente Dios.

22

Ch'ín Jesús kjuíncheyóexin éxi ijnko kia kótehe sín

¹ Ntá ch'ín Jesús mé kjuankixin nixja ch'án inaá la kjuíncheyóexin ch'án ntáchro ch'án kixin:

² —Tí kjuachaxin kuente Dios mé éxi yóhe ijnko ch'ín rey kjuasin ch'án ijnko kia kixin tsotehe xjeen ch'án.

³ K'uetuenhen ch'án tí sín ch'ehe ch'án xra kixin tsjik'íyehé sín tí sín kjueyá ch'án, kjánchó jehe sín mé tjinkakonhya sín tsochjina sín.

⁴ A ntá k'uetuenhen ch'án inaá í so tí sín ch'ehe ch'án xra ntáchro ch'án kixin: “Chenka tí sín ó k'uíyahá kixin kaín tí nkehe sineni la ó tjechónhen. Ó kuétoan its'en tí koxinta la ko í so ko tsanká la kaín nkehe la ó síchónhen. A ntá chróxrakoa sín tí siín kia”, mé xikaha k'uetooan ch'án.

⁵ A ntá tí sín tsík'íyehé ch'án mé ántosén sín. Ijnko sín la sákjuí nontee la í jnko la sákjuí ch'án í jnko xra chóna ch'án.

⁶ La í so tí sín a mé tsítsé sín tí sín tsík'etuenhen tí ch'ín rey la k'óka tí sín a hasta ik'uén tí jehe sín.

⁷ Ntá tí ch'ín rey mé kónínkaon ch'án ntá k'uetuenhen ch'án tí sín soldado kixin its'en tí sín kjuàya la ko tsoche tí chjasén sín.

⁸ Ntá nixjehe ch'án tí sín ch'ehe ch'án xra inaá ntáchro ch'án kixin: “Kaín nkehe la ó síchónhen kixin tí nkexro tsotehe la ntá tí sín k'uíyahá kuitekakonhya sín la kjuihya sín.

⁹ Méxra sátsjirá tí esquina tí ntia jié la t'iyehérá kaín tí sín tsoxetará kixin itsji sin ti kia”, ichro ch'án.

¹⁰ Ntá tí sín ch'e xra mé sákjuí sín la k'uíyehé sín kaín tí sín t'átsínka tí ntia ntiha, mé chojni jína la ko chojni jínahya hasta k'uíxikaón chojni tí nchia ntiha.

* 21:42 Salmo 118.22-23

¹¹ Ntá tí ch'ín rey mé kuitsjehe kaín tí sín tsík'íyehē ch'án la ntá k'uíkon ch'án ijnko ch'ín ntiha chóntahya ka jína kuènte tí kia a.

¹² La ntá nixjehē ch'án, ntáchro ch'án kixin: “Amigo, ¿nkexrí k'uixenhén kixin tsík'ítsahya kuènte kié chojni tsotēhe?” ichro ch'án. Ntá tí ch'ín a kjuátēehya ch'án ninkehó.

¹³ A ntá tí ch'ín rey mé k'uíyehē ch'án tí sín ch'ehe ch'án xra la ntáchro ch'án kixin: “Sinchenteto toté la ko itja tí ch'ín a la ité ntója sítié la nta ntiha a mé tsotsjánka ch'án la sinetaón ch'án neno ch'án.”

¹⁴ Ntá ntáchro ch'ín Jesús kixin:

—Nchónhya sín k'uíyahā la séhya sín k'uitja —mé xíkaha kjuako ch'án Jesús.

*Ch'ín Jesús ntáchro ch'án kixin ó nchoxon tsjenkehē sín gobierno
(Mr. 12.13-17; Lc. 20.20-26)*

¹⁵ Ntá tí sín fariseo mé sákjuí sín ókjé la jnkokoá kjuenkayáxin sín kixin tsjachaxin sín tí ch'ín Jesús kixin ách'e ichrén jiē tsjasin ch'án la ntá tsjanchia sín jiē.

¹⁶ Ntá ichr'án sín iso tí sín ch'ehe sín xra la iso tí sín ch'ehe tí ch'ín Herodes xra kixin tsjachaxin sín tí ch'ín Jesús. Ntá tí sín a nixjehē sín ch'án ntáchro sín kixin:

—Maestro, ó noheni kixin tí nkehe ntáchrúa jaha la chaxín, la ko ntoá tjákua ntje Dios, la ko jehya nkexrí tsjehe chojni tjenkayáxixián kixin á jína sín.

¹⁷ A ntá jaha chroxka nkehe tjenkayáxian. ¿Á jína chrókjuenkehēni tí gobierno romano o náhí? —ichro sín kjuanchankí sín.

¹⁸ Ntá ch'ín Jesús kónohe ch'án kixin ntoáhya tjenkayáxin sín ntá ntáchro ch'án kixin:

—Jahará ntoáhya tjenkayáxinrá. ¿Nkekuènte chrókjuáchaxinráni?

¹⁹ Tjákoxará tí chichaon tjenkehérá sín méhe —mé xíkaha k'ueṭoan ch'ín Jesús.

Ntá kjuikohe sín ch'án tí chichaon a.

²⁰ Ntá k'uíkon ch'ín Jesús ntá kjuanchankí ch'án kixin:

—¿Nkexro tí tsík'axrjexín tjenkání tí chichaon méhe la ko nkexro ihnié chóna? —ichro ch'án.

²¹ Ntá kjuátēhe sín kixin:

—Tí ch'ín t'etōan mé tjenkání ch'án —ichro sín.

Ntá ntáchro ch'ín Jesús kixin:

—Chróchjehérá tí ch'ín gobierno t'etōan tí nkehe kuènte ch'án la kjaxin tí nkehe kuènte Dios la chróchjehérá Dios —mé xíkaha chro ch'ín Jesús.

²² Ntá tí kuínhin sín xíkaha la chrakon sín la komá sín ch'án ntá sákjuí sín.

*Kjuanchankí sín kixin á tsoxechón chojni
(Mr. 12.18-27; Lc. 20.27-40)*

²³ Ntá tí yaon a la iso sín saduceo sákjuítsjehe sín tí ch'ín Jesús. A ntá tí sín saduceo mé titekakonhya sín kixin tsoxechón chojni tsík'en la mé xíkaha chrókjuachaxin sín ch'ín Jesús. Ntáchro sín kixin:

²⁴ —Maestro, tsintáchro ch'ín Moisés kixin tí its'en ijnko chojni la naxa itjen tí ichjién ch'án la tsík'ikonhya sín xjeen sín, ntá tí kichó tí nkexro tsík'en chrókuakja ch'án tí tjan k'án, a ntá tí xjeen sín mé ts'óna éxí xjeen tí ch'ín sao tsík'en.

²⁵ Ntá ntihi k'uejó yato sín jnkokoá kichó sín. Ntá tí ch'ín sao kótehe ch'án. La ntá ik'uén ch'án. A ntá k'uechóntahya sín xjeen sín la ntá tí ichjién ch'án kótehe tjan tí ch'ín tsoyo.

26 **A** ntá tí ch'ín yóxin ik'uén kjaxin la tí ch'ín níxin kuákja ch'án tjan la ntá xikaha kónhen inaá. La kayatoé tí sín k'uéchóna sín tjan xikaha kónhen sín kaín sín ik'uén sín.

27 **A** ntá kjuixixín ntá kjaxin tjan ik'uén tjan.

28 Ntá tió tsoxechón kaín xín chojni tsík'en, ¿ntá nkexro ts'óna xì tí jehe tjan kixin kayatoé sín kótehe tjan? —mé xikaha kjuanchankíhi sín tí ch'ín Jesús.

29 Ntá ch'ín Jesús kjuátehe ch'án ntáchro ch'án kixin:

—Jahará la ntoáhya tjenkayáxinrá kixin noahyará nkehe chro xroon itén Dios la ko chonhyará tí kjuachaxin kuènte Dios.

30 **A** ntá tí chojni tsík'en tió tsoxechón la tsoteehya sín la ko tsoteehya tí xjeen sín kixin tí sín tsík'en la éxí tí sín ángel kuènte Dios ts'ejó sín nkaya nkajní.

31 **A** ntá tí kaín tí sín tsík'en tsoxechón, ¿á kjuinchekuáxinhyará nkehe ntáchro Dios? Jehe ch'án xikihi chro ch'án:

32 “Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob.”* Méxra tí Dios i la jehya tinkáchónki tí sín tsík'en. Náhí. Tí Dios i la tinkáchónki tí sín tjejóhón —mé xikaha ichro ch'ín Jesús.

33 Ntá kuínhin sín nkexrí kjuako ch'án ntá chrakon sín.

Ch'ín Jesús chrónka tí nkehe imá tjetooan

(Mr. 12.28-34)

34 Ntá tí sín fariseo mé tsíkójnkotsé sín tió kónohe sín kixin nkehe chro ch'ín Jesús la ninkehó kjuáteehya tí sín saduceo.

35 La ijnko tí sín maestro tjako tí ley mé tjinkaon ch'án chrókjuachaxin ch'án tí ch'ín Jesús. Ntá kjuanchankí ch'án kixin:

36 —Maestro, ¿nkexéhe tí nkehe imá tjetooan kuènte tí ley? —ichro ch'án.

37 Ntá ntáchro ch'ín Jesús kixin:

—“Chrótjuèhérá Ìnchéni Dios kaín asánrá la ko kaín kjuaxrexinkaon kuèntará.”†

38 Mé tíha mé tí ley imá tjetooan la ko saoxín k'uetooan Dios tíha.

39 **A** ntá tí nkehe yóxin la tóyóhe la mé ntáchro xikihi: “Chrótjuèhérá kíchuará éxí tjuèxínrá asánrá.”‡

40 Tí iyó nkehe i la mé antsí tjetooan kuènte tí ley tsík'etooan Moisés la ko tí nkehe kjuako tí sín k'uéchrónka itén Dios.

¿Xá nkexro it'é tí Cristo?

(Mr. 12.35-37; Lc. 20.41-44)

41 **A** ntá tí sín fariseo la naxa jnkokoá tjejó sín

42 la ntá ch'ín Jesús mé kjuanchankí ch'án ntáchro ch'án kixin:

—¿Nkehe tjenkayáxinrá jahará? ¿Nkexro tí Cristo la nkexro tí tsík'axrjeníxin ch'án? —kjuanchankí ch'án.

Ntá ntáchro sín kixin:

—Tí Cristo mé tsík'axrjeníxin ch'án ch'ín David —ichro sín.

43 Ntá ntáchro ch'ín Jesús kixin:

—¿Ntá nkexrí kixin Nchakuen Dios chénkaxín ch'ín David kixin David chróntáchro ch'án kixin Ìnché ch'án tí Cristo? Ntáchro ch'ín David xikihi:

44 Ìnchéni Dios ntáche tí Ìnchéni kixin:

“Tjak'e tjaná chjina ntihó tsétoan,

tsjixinjian kaín xín tí sín nínkakonhan la tsjachahya sín ts'etooan sín kixin jahvá mé tsétoan.”§

Mé xikaha chro itén Dios.

* 22:32 Éxodo 3.6 † 22:37 Deuteronomio 6.5 ‡ 22:39 Levítico 19.18 § 22:44 Salmo 110.1

45 'A ntá çá nkexrí kixin Cristo chrók'óna xjeen David a ntá jehe ch'ín David kuik̄itexín ch'án Ìnché ch'án tí Cristo? —ichro ch'ín Jesús.

46 'A ntá ninkexró xitjahya kjuátehe sín ninkehó la desde tí yaon a chrakon sín la í nínkehó kjuanchankíehya sín ch'án.

23

*Ch'ín Jesús tjanchia jie tí sín fariseo la ko tí sín maestro tjako tí ley
(Mr. 12.38-40; Lc. 11.37-54; 20.45-47)*

1 Ntá kjuixin tíha ntá ch'ín Jesús mé nixjehe ch'án tí chojni la ko tí sín k'uájiko ch'án, ntáchro ch'án kixin:

2 —Tí maestro tjako tí ley la ko tí sín fariseo mé chóna sín kjuachaxin tsochrónkaxín sín tí ley kjuako ch'ín Moisés.

3 Méxra chrókjuinchexiteyéhérá kaín tí nkehe t'etōan sín la ko chrókjuich'erá kaín nkehe ntáchro sín kjánchó chrókuankíehyará tí jehe sín kixin jehe sín la ijnko nkehe ntáchro sín la ókjé nkehe ch'e sín.

4 T'etuenhen sín chojni tsamá ijnko nkehe imá ye, mé ijnko nkehe chrókjuachahya chrókuamá chojni. 'A ntá jehe sín na nijnko dedo tja sín chrókjuinkitsa sín tí nkehe imá ye yamá chojni.

5 Ich'e sín kaín xín nkehe kixin tsotsjehe chojni. Tóxrjínhín sín tsjak'enkání totjen sín la ko itja sín ijnko xroon kjínjin iton ts'ínixín itén Dios la tjínkaon sín iké sín síxinkání nkehe tjákini.

6 Tjínkaon sín tsochóna sín silla jína ts'ejókjen sín sine sín tió sátsji sín tí siín kia la ko xritjeyá sín tí silla antsí náxrjón chrók'uejóya sín nkaxenhen nínko.

7 La ko tjínkaon sín kixin chojni chrókjuikosáyehe sín tsoxeta sín tí ntia la ko tjínkaon sín kixin tsontáchro chojni kixin maestro tí jehe sín.

8 'A ntá jahará la titoéhyará kixin tsontáchro sín kixin maestro tí jahará kixin jehe sín la ko jahará la ó jnkokónrá, la jahará chontará jnkokoá Maestro la mé Cristo tíha.

9 La ntá chróntáchrohýará kixin ninkexró mé it'ará ntihi chjasintajni kixin jahará la chontará jnkokoá It'ará mé itjen nkaya nkajní.

10 La ko jehe sín chróntáchrohýa sín kixin jefe tí jahará kixin jehó Cristo mé jefe.

11 Tí nkexro antsí tsjinkitsa iso chojni la jehe ch'án mé antsí t'etōan ch'án.

12 Kixin tí nkexro ntáchro kixin imá ijié la mé imá tsontsí. 'A ntá tí nkexro nchehnkehya la antsí tsojié.

13 'Nòará tí jahará maestro tjàkorá tí ley la ko tí jahará chojni fariseo. Jahará la jnkójínxónhýa tjenkayáxinrá. Jahará la t'ikjéherá tí puerta ts'ixenxín chojni tí kjuachaxin kuente Dios kixin titoéhyará ts'ixenhen ókjé chojni. 'A ntá ni jahará la xitjahya t'ixenhyará la ko tjánjonhyará kjuachaxin ts'ixenhen tí sín tjínkaon chrók'uixenhen.

14 'Nòará tí jahará maestro tjàkorá tí ley la ko chojni fariseo. Jnkójínxónhýa tjenkayáxinrá. Jahará takitsjeherá ntōe tí chojni tsíkók'án la ntá isé nixjeherá Dios kixin ch'iyexínrá chojni kixin jína tí jahará. 'A ntá xikaha kjuich'erá jahará la antsí tsjasótiará.

15 'Nòará tí jahará maestro tjàkorá tí ley la ko chojni fariseo. Jahará la jnkójínxónhýa tjenkayáxinrá. Jahará sátiará nonte la chrítaón ntayaon kixin tsjákohérá ijnko chojni tsinkáchónki xikaha tí tinkachónkirá la ntá tió kjuachará kjuachroerá sín la ntá jehe sín antsí má tsjasótexín sín tí xrohi la kánhyó jahará.

16 'Nòará tí jahará kixin tētoanrá kjánchó ntakótánrá. Ntáchrorá kixin tí jnkójín chojni tsontáchro kixin sinchexiteyá sín nkehe la t'ákjenxin sín tí

ninko la ntá t'ichjánxinhya sinchexiteyá sín. A ntá tí tsontáchro sín kixin sinchexiteyá sín nkehe la t'ákjenxin sín tí chica oro siín nkaxenhen ninko la ntá t'ichjánxin sinchexiteyá sín.

¹⁷ Imá lontirá la ko ntakótánrá. ¿Á imá tjetooan tí chica oro o á imá tjetooan tí ninko kixin tí ninko mé kótjuáxin tí chica oro?

¹⁸ Kjaxin ntáchorá kixin: “Tí jnkojín chojni tsontáchro sín kixin sinchexiteyá sín nkehe la t'ákjenxin sín tí altar la ntá t'ichjánxinhya sinchexiteyá sín. A ntá tí tsontáchro sín kixin sinchexiteyá sín nkehe la t'ákjenxin sín tí nkehe tjokehé sín Dios chrítaón tí altar la ntá t'ichjánxin sinchexiteyá sín tí nkehe tsintáchro sín.”

¹⁹ Imá lontirá la ko ntakótánrá. ¿Á imá tjetooan tí nkehe tsochjehérá Dios o á imá tjetooan tí altar kixin tí altar mé tótjuáxin tí nkehe tsjánjonrá?

²⁰ Kixin tí nkexro tsontáchro kixin sinchexiteyá nkehe la t'ákjenxin ch'án tí altar la jehya t'ákjenxin ch'án tí altar ó. Náhí. Kjaxin t'ákjenxin ch'án kaín tí nkehe siín chrítaón ntiha.

²¹ A ntá tí nkexro tsontáchro kixin sinchexiteyá ch'án nkehe la t'ákjenxin tí ninko la jehya t'ákjenxin ch'án ninko ó. Náhí. Kjaxin t'ákjenxin ch'án tí Dios itjen ntiha.

²² A ntá tí nkexro t'ákjenxin nkaya nkajní la ntá kjaxin t'ákjenxin sín tí trono kuènte Dios la ko tí nkexro tjet'etooan ntiha.

²³ 'Nòará jahará maestro tjàkorá ley la ko jahará chojni fariseo. Jahará jnkojínxónhya tjenkayáxinrá. Jahará la chjehérá Dios ijnko ite parte kaín tí kaxroan tsjiko tí nkehe ineni, mé tí menta la ko anís la ko comino. Kjánchó tahyará kuentá tí nkehe imá tjetooan kuènte tí ley. Mé ntoá chrókjuenkayáxinrá la ko chrókjuikonóehérá kíchuará la ko chrókuinkachónkirá Dios. Tíhi la antsí tjetooan chrókjuinchexiteyará la kjaxin chrókuitoéhyará chrokujuich'erá tí í so nkehe.

²⁴ Jahará la tétooanrá kjánchó ntakótánrá. Jahará la nchek'ankihirá kjónté ijnko kochjisen intsí chóna tí nkehe its'irá, a ntá ijnko kocamello kjónté ijie va la t'ínkará.

²⁵ 'Nòará tí jahará maestro tjàkorá ley la ko jahará fariseorá. Jahará la jnkojínxónhya tjenkayáxinrá. Jahará la imá nchetjóará chrítaón tí vaso la ko tí plato, a ntá tí nkaxenhen tsíkaón kjuachee la ko jahórá tjinkáonrá chróchontará itsjé nkehe.

²⁶ Jahará chojni fariseorá imá ntakótán jahará. Saoxín chrókjuinchetjóará tí nkehe nkaxenhen tí vaso la ko tí plato la ntá ó chrókótjóá tí chrítaón kjaxin.

²⁷ 'Nòará jahará maestro tjàkorá tí ley la ko chojni fariseorá. Jnkojínxónhya tjenkayáxinrá. Jahará la éxí yóhē ijnko tòyē tsíxravá chojni, imá náxrjón tsjehe ntója, a ntá nkaxenhen mé tsíkaón huésoé chojni tsík'en la ko kaín nkehe tjuáhya.

²⁸ Mé xikaha tí jahará la tsjehe éxí chojni jína xikaha, a ntá jnkojínxónhya tjenkayáxinrá la ko jínahyará.

²⁹ 'Nòará tí jahará maestro tjàkorá ley la ko chojni fariseorá. Jahará la jnkojínxónhya tjenkayáxinrá. Jahará la kjuich'énará tjat'o náxrjón chrítaón tí tòyē tsíxravá tí sín k'uékjako itén Dios ósé la ko nchek'ítsará tjat'o chrítaón tòyē kuènte tí sín jína asén.

³⁰ La ntá ntáchorá kixin tí chrók'uejorá tí k'uéjé tí sín tsík'axrjeníxinrá la ntá chrókjuínkítsahyará chrók'uén tí sín kjuako itén Dios.

³¹ Méxra xikaha jahórá ntáchorá kixin chaxín tsík'axrjeníxinrá tí sín k'óyán tí sín k'uékjako itén Dios.

³² Méxra ijie la tjinkáonrá tsjixinhanrá tí xra kjuich'e tí sín tsík'axrjeníxinrá.

³³ 'Jahará la tsík'axrjeníxinrá konche. ¿Ntá nkexrí chrókuaará kixin itsi tí tsjasótiará?

³⁴ Méxra janhan mé tsétuñhan chojni chrónka itén Dios la ko chojni imá nohe la ko chojni tjako, itsi sín. A ntá jahará la ts'oyánrá sín ts'ejoyánirá sín ntacruz la í so sín la tsjatexínrá sín nkaxenhen nínko la ko tsochonkíhirá sín chjasin la chjasin.

³⁵ Méxra jahará la yamará tí jie kixin tí sín jína k'úitjixín ijnié senó. Méxra tsamará tí jie kixin ik'uén ch'ín Abel, tí nkexro jína, la ko kaín tí í so sín hasta ik'uén ch'ín Zacarías, xjeen Berequías, tí nkexro k'oyánxinrá chjino tí altar.

³⁶ Chaxín tjonkará kixin kaín tí jie a mé yámá tí chojni siín ijie.

*Tsjánka ch'ín Jesús
(Lc. 13.34-35)*

³⁷ Ntá ntáchro ch'ín Jesús kixin:

—Jerusalén, Jerusalén, jahará t'oyánrá tí sín tjako itén Dios la chjehérá xro tí sín ichr'án ch'án ikui chrókjuinkitsará. Nchónhya veces tjínkavan chrókójnkotsérá la chrók'uáyakonhánrá éxí ijnko cochíká mé t'ayakonhen xjeen va chrínkí kanenee va mé xikaha tjínkavan chrók'uáyakonhánrá tí jahará. Kjánchó jahará la tjínkákonhyará xikaha.

³⁸ Ntá jie la Dios la tsítóhe tí jahará.

³⁹ Ntáxrjan kixin í ts'ikonhyará tí janhan ínaá tsjixrakájia tí yaon tsontáchrórá kixin: “Imá jína tí nkexro kuixín kjuachaxién ihnié Ìnchéni” —mé xikaha ichro ch'ín Jesús.

24

*Chrónka ch'ín Jesús kixin ts'itjáyan tí nínko
(Mr. 13.1-2; Lc. 21.5-6)*

¹ Ntá ch'ín Jesús k'uaxrjexín ch'án tí nínko la ntá ó sáchrókjuí ch'án la ntá tí sín k'uájiko ch'án mé kóchjina sín kixin tsochónhen ch'án kixin kjaxin ch'án chrótsjehe ch'án kixin náxrjón tsík'óna tí nínko a.

² A ntá ch'ín Jesús mé kjuátēhe ch'án kixin:

—Jahará ¿á tjejotsjehérá kaín tíha? Chaxín tjonkará kixin tsjixraká tí yaon ts'oya kuenté nínko. Nijnko xro ts'ejókjenhya kichó kixin kaín tíha la tsoxíka —ichro ch'án.

*Tí nkehe tsonhen tió tsjixixín
(Mr. 13.3-23; Lc. 21.7-24; 17.22-24)*

³ Ntá sákjuí sín chrítaón tí jna Olivo la ch'ín Jesús kjuák'etjaxín ch'án la ntá tí sín k'uájiko ch'án mé kjuanchankíhi sín ch'án kixin:

—Tjinkaonni tsochronka nkesá tsonhen tíha. ¿Nkexrí tsonoexínmi tió ts'inka tí jaha la ko nkexrí tsonoexínmi tí itsi tí tsjixixín chjasintajni? —ichro sín.

⁴ Kjuátēhe ch'ín Jesús kixin:

—Tóxakonhanrá titoéhyará kixin ninkexró chrókjuít'áyahará.

⁵ Nchónhya chojni itsi sich'iyaxín nina tsontáchro kixin: “Janhan mé tí Cristo” tsixro sín, la sich'iyehé sín nchónhya chojni.

⁶ A ntá tió tsinhínrá tsontáchro chojni kixin ó siín kjuanínkaon la ko ts'ixín kjuachrakon kixin tsjanjonko kichó sín la kjónté xikaha tsonhen la chrakonhyará. Ó jehí tsonhen tíha tí naxa ts'itjáyanhya chjasintajni.

⁷ Ijnko nación tsjanjonko í jnko nación la tsjanjonxin sín tí xra ts'etōan sín. La ko itsjé chjasin na tsokjinta la ko tsoníhi chojni la ko ntihi la ntaha tsinkí nonte.

⁸ Kaín tíha la ntá tsoxrankíxixón tí kjuatjoté tsonhen chojni.

⁹ 'A ntá tsotsérá chojni la tsjikaánrá sín tí tjejó tí síxreé kixin sinchekjasótiará sín la ntá ts'óyánrá sín. La ko kaín xín chojni siín chjasintajni tsonínkakonhanrá sín kixin tinkachónkirá tí janhan.

¹⁰ Ntá tí yaon a la itsjé sín la tsítóhe sín tsinkáchónkihya sín tí janhan la ko tsonínkakonhen sín kíchó sín la ko sinchekji kíchó sín.

¹¹ Ntá itsi nchónhya chojni ntoáhya tsjako la ntá sich'iyeyehe sín nchónhya chojni.

¹² La ts'ixín nchónhya jię jínahya la ntá ts'ixín itsjé chojni tsotjuèhya sín kíchó sín.

¹³ 'A ntá tí nkexro naxa tjejó tinkáchónki tí janhan hasta tí tsjixixín la mé tsaá.

¹⁴ La ko tí itán jína chrónka nkexrí tjen tí kjuachaxin kuènte Dios la t'ichjánxin tsinhin sín kuenté chjasintajni, la tió tsjixin tsinhin sín kuenté chjasintajni la ntá ó ts'ítjáyán chjasintajni.

¹⁵ 'Ch'ín Daniel k'uéchrónka itén Dios mé tsíkjin ch'án kixin tsjixraká ijnko yaon tsjak'e ijnko nkehe jínahya nkaxenhen nínko tjóá.* Ntá jahará ts'ikonrá tíha. 'A ntá tí nkexro nchekuáxin mé tsienxín nkehe tíha.

¹⁶ Ntá kaín tí sín tjejó estado Judea tsochrin sín jna sátsji sín.

¹⁷ 'A ntá tí sín tjejó chrítaón nchia ntoé sín la í xitjahya tsakitsje sín ninkehó.

¹⁸ Ntá tí tjejóch'e sín xra nontee sín la kjá í tsokjanhya sín tsjikakja sín iké sín.

¹⁹ Ntá nòà tí chojni chjin tjejóyá sín la ko nòà tí sín nchekakí xjan tí yaon a.

²⁰ Chrókjuanchehérá Dios kixin tí tsonhen tíha la chrókójehya nchakuen kin la ko chrókójehya tí yaon t'ok'éhe chojni.

²¹ Kixin tíha mé ijnko kjuachrakon imá ijié la desde tí xrankíxixín chjasintajni la nunca xikahya kónhen.

²² Ntá tí chrók'uetóanhya Dios kixin tjoka ts'atsínka tíha ntá chrókuaáhya ninkexró. Ntá ts'etóan ch'án kixin tjoka ts'atsínka tí kjuachrakon jié kixin jehe ch'án mé imá tjuèhe ch'án tí sín tsíkjejá ch'án.

²³ 'Ntá tí tsontáchro chojni kixin: “Tsjehe ntihi itjen Cristo”, o “Tsjehe ntihi itjen ch'án”, la ntá chrókuítekákuénhyará sín.

²⁴ Kixin ntá itsi iso sín tsontáchro sín kixin Cristo tí jehe sín la ko kjaxin itsi í so sín ntoáhya tsjako la ko tsjasin sín kjuaxroan jié kixin tjinkaon sín chrókjuich'iyeyehe sín chojni kjónté tí sín tsíkjejá Dios.

²⁵ Ó xrjanka senó nkehe tsonhen kixin tsonohará.

²⁶ Méxra tí chróntáchro sín kixin: “Tsjehérá tí nteje ntihi tjen ch'án”, la ntá tsjihyará nó ntihi. O tí chróntáchro sín kixin: “Tsjehérá ntihi tí cuarto mé tjen ch'án”, la chrókuítekákonhyará.

²⁷ Méxra éxi tsjonkíxín la t'ikon chojni t'inkaséyanxín tí tjitoxin yaon hasta tsjiatóxin yaon mé xikaha ts'ikon chojni tió itsi tí Xjeen Dios K'óna Chojni.

²⁸ Mé éxi yóhe tí tjen ijnko cuerpo tsík'en la ntihi tsojnkotsé tí kontexjuen.

Tsokjan tí Xjeen Dios K'óna Chojni

(Mr. 13.24-37; Lc. 21.25-33; 17.26-30, 34-36)

²⁹ 'A ntá séhyó tí tsjixixín tí kjuachrakon jié la ntá tí yaon la tsotie a ntá tí nitjó la í ts'inkaséyanxínhya. La ko tí konotsé la tsoxènjinxín nkajní la kjaxin kaín nkehe siín nkaya nkajní la tsínki.

³⁰ La ntá ts'ikon chojni kixin nkajní tsixin tí Xjeen Dios K'óna Chojni. La ntá kaín chojni chjasintajni tsochrakon sín la tsotsjánka sín la ts'ikon sín kixin itsi tí Xjeen Dios K'óna Chojni, mé chríkjan tjuí mé tsjak'enkakjan ch'án tsikao tí kjuachaxin jié.

* 24:15 Daniel 9.27

31 Ntá tsochr'án Dios tí sín ángel kixin ts'ánoa sín tí trompeta itsen kixin tsochjina kaín tí nkexro kjueyá Dios tsjixin kanqé lado chjasintajni.

32 'Chrók'uitjará nkexrí sintayóaxian kuènte ijnko nta to higo. Éxí yóhē tió chóna ntahtē la ko ts'ixin kayoa la nta tsonoaxínra kixin í séhya tsokjan ichrin.

33 Mé xikaha tí ts'ikonra ts'atsínka kaín tíha la ntá xikaha tsonoaxínra kixin í séhya itsi Inchéni.

34 Ntá tjonkará chaxín kixin kaín tíha senó tsonhen tí naxa ts'enhya tí chojni síin jie.

35 A ntá tí nkajni la ko tí chjasintajni mé ts'itjayan. A ntá tí nkehe ntáxrjan la nunca ts'itjanyha tsoxiteyá tíha.

36 Á ntá tí yaon la ko tí hora tsoxiteyá tíha la kohya ninkexró nohe. Ni tí sín ángel tjejó nkaya nkajni noehya sín la ko ni tí Xjeen Dios noehya. Ó jehó tí It'é mé nohe.

37 'Éxí yóhē tí nkehe kónhen tí yaon k'uékjak'e ch'ín Noé mé xikaha tsonhen tí tsokjan tí Xjeen Dios K'óna Chojni.

38 Tí naxa titjiéhya sín nta la kaín chojni la jina k'uéjó sín la kjóne sín la ko ik'uí sín la ko sitótehe sín kjuixrakája tí yaon k'uixenhen ch'ín Noé ntabarco.†

39 A ntá jehe sín mé kienxínhya sín hasta kuijia tí k'uániá chrin ntá ikui nta la k'uátjoá kaín sín. Mé xikaha tsonhen tió itsi tí Xjeen Dios K'óna Chojni.

40 A ntá yaá chojni ntoa tjejóch'e sín xra nonte la ntá ijnko la sátsji la í jnko la tsitohe.

41 La ko yaá chojni chjin mé tjejó't'o sín la ijnko la sátsji la í jnko la tsitohe.

42 'Chrók'uejotsjehérá kixin noahyará nkehora la ko nkesá ts'inka janhan.

43 Chrókónohará tíhi: tí chrókónohe ijnko ìnché nchia nkehora tie chrókjui ijnko nkexro tseé la ntá chrókjuak'echónhen tí ìnché tí nchia ntá xitjahya ts'ixenhen tí nkexro tjinkaon chrókueé.

44 Méxra jahará la jina chrók'uejorá kixin tí Xjeen Dios K'óna Chojni me titàya itsi.

Tí nkexro jina ch'e xra la tí nkexro ch'ehya xra jina

(Lc. 12.41-48)

45 'Tí nkexro chaxín ch'e xra jina la ko imá nohe la ntá tí lámoe ch'án ts'etuenhen kixin ts'ayakonhen ch'án tí sín síin ntqe ch'án la ko tsjanjon ch'án nkehe sine sín chintji tí hora a.

46 Náxrjón tjen tí nkexro ch'e xra tió itsi tí lamo la ts'ikon kixin xikaha tjenchexiteyá ch'án tí xra k'uituenhen ch'án.

47 Chaxín tí lamo la tsjanjon ch'án kaín tí xra chóna ch'án ts'etoan tí ch'ín a.

48 A ntá ijnko chojni ch'ehya xra jina la ntá tsjenkayáxin ch'án kixin kjá tjokahya tsokjan tí lámoe ch'án

49 la ntá tsjankíxin ch'án tsjanjonko ch'án tí í so sín ch'e xra la ko tsjankíxin sineko ch'án la ko its'ikao ch'án kaín tí sín sitókoan.

50 Ntá xrínahya tsokjan ti lamo ijnko yaon la ko ijnko hora noehya tí nkexro ch'e xra.

51 La ntá jehe ch'án la sinchekjasóte tí ch'ín kuitóhehe xra kjuínchexiteyáhya la ts'etoan ch'án kixin tsjasóte tí ch'ín a éxí tí sín jnkojínxónhya tjenkayáxin. Ntá ntiha la tsotsjánka ch'án la ko sinetaón neno ch'án.

25

Ch'ín Jesús kjuíncheyóexin ch'án kixin ite sín tjarisoá

1 Ntáchro ch'ín Jesús kixin:

† 24:38 Génesis 6.5-8

—Tí kjuachaxin kuènte Dios mé éxí yóhe ite sín tjarisoá sátsji tí tsotēhe chojni chuénko linterna tjiá aceite la sákjuíchónhen sín tí ch'ín tsíkótehe.

² In'ó sín la tsíkóyaxíenhya sín la in'ó sín ó tsíkóyaxínhin sín.

³ Tí sín tsíkóyaxíenhya na kjaxin la tsíkijijiko sin linterna kjánchó tsíkijikohya sín aceite tsíkja inaá.

⁴ A ntá tí sín tsíkóyaxínhin la sátsíkjiko sín xro tjiá aceite la ko tí linterna kuènte sín.

⁵ A ntá tí ch'ín tsíkótehe la tjokahya kui ch'án la ntá jehe sín mé tsíkíhi sín kotáchrín la tsík'ejójuá sín kaín sín.

⁶ A ntá kuichjina k'áxrótjen la kuínhin sín t'èya ijnko chojni kixin: “Ó kui tí ch'ín tsíkótehe na t'axrjerá ntója tsoxetará ch'án”, ichro ch'án.

⁷ A ntá kaín tí sín tjarisoá la k'uàya sín la kjuasiyóxin sín tí linterna kuènte sín.

⁸ A ntá ti in'ó sín tsíkóyaxíenhya la nixjehe sín tí sín in'ó tsíkóyaxínhin ntáchro sín kixin: “Chjehéni intsí aceite kuéntará kixin ó k'uànká aceite tjiá linternéni”, ichro sín.

⁹ A ntá tí sín tsíkóyaxínhin mé ntáchro sín kixin: “Náhi, tí aceite tí xikaha tsjanjonni intsí jahará la antsí jeheni la tsjachahya. Íchá jína sátsjik'ènará tí sítoxín ntiha”, ichro sín.

¹⁰ Ntá tí in'ó tí sín kóyaxíenhya mé sákjuík'èna sín aceite la ntá ó kui tí ch'ín tsíkótehe. Tí in'ó sín tjejóchónhen mé sákjuíkko sín ch'án tí kia tsíkótehe sín la ntá ó tuénxín k'uikjéhe tí puerta.

¹¹ Ntá chr'éxin ikui tí in'ó sín tjarisoá tsíkóyaxíenhya la t'ínka sín puerta ntáchro sín kixin: “Ó kuini takitjehé nchia.”

¹² A nta jehe ch'an kjuátēhe ch'án ntáchro ch'án kixin: “Chaxín tí jahará la ní chonhyará”, ichro ch'an.

¹³ Ntá ntáchro ch'ín Jesús inaá kixin:

—Méxra xikaha tí jahará chrók'uejótshjehérá kixin noahyará nkeyaon la nkehora itsi tí Xjeen Dios K'óna Chojni —ichro ch'án.

Ch'ín Jesús kjuíncheyóexin ch'án kuènte chichaon

¹⁴ Ntá ntáchro ch'ín Jesús kixin:

—Tí kjuachaxin kuènte Dios la yóhe ijnko chojni tjinkaon sáchrókjui ch'án í jnko nación la ntá k'uíyehē ch'án tí sín ch'ehe ch'án xra la ntá chjéhe ch'án sín tí chichaon a kixin ts'ayakonhen sín.

¹⁵ Ijnko ch'án la k'uáyéhe ch'án in'ó mil chichaon, la í jnko la k'uáyéhe ch'án iyó mil chichaon, la í jnko la k'uáyéhe ijnko mil chichaon. Tí nkexro kjuanjon chichaon la mé kónohe ch'án nkexro ti tsjacha sich'e jnkojnko xra. Ntá jehe ch'án tió kjuixin kjuanjon ch'án la ntá sakjuí ch'án ikjín.

¹⁶ Ntá tí nkexro k'uáyéhe in'ó mil chichaon la kjuích'eko ch'án xra tí chichaon kuákja ch'án la kjuacha ch'án í jnko in'ó mil.

¹⁷ Kjaxin tí nkexro k'uáyéhe iyó mil chichaon mé xíkjacha ch'án í jnko iyó mil.

¹⁸ A ntá tí nkexro k'uáyéhe ijnko mil chichaon mé sákjuí ch'án la kjuích'éna ch'án ijnko tòye kjuavá ch'án tí chichaon kuènte lámóé ch'án.

¹⁹ A ntá nchónhya nánó k'uátsínka la ntá ikjan tí lámóé sín kixin ntá tsjentoáko sín ch'án cuenta.

²⁰ Saoxín kui tí nkexro k'uáyéhe tí in'ó mil la chjéhe ch'án tí lamo í jnko in'ó mil la ntáchro ch'án kixin: “Jaha me chjehéni in'ó mil la ó kjuachani í jnko in'ó. Tákjá tjinhin tí chichaon i”, ichro ch'án.

²¹ Ntá tí lamo mé ntáchro kixin: “Nchoxon tí xikaha. Jaha la ijnko chojni jína ch'e xra. La ó kjuínchexiteyá jína. Kjónté jehya xra jié la kjuínchexiteyá jína la ntá tsotjaha ijnko xra antsí jié la tjak'e tsochéheni.”

²² Ntá chr'éxin ikui tí nkexro k'uáyéhe iyó mil la ntáchro ch'án kixin: “Jaha mé chjehéni iyó mil la kjuachani í jnko iyó. Tákjá tjinhin tí chichaon í”, ichro ch'án.

²³ La ntá tí lamo ntáchro kixin: “Nchoxon jaha mé ijnko nkexro jína ch'e xra la ó kjuínchexiteyá. Kjónté jehya xra jié la kjuínchexiteyá jína la ntá tsotjaha í jnko xra antsí jié. Tjak'e tsochéheni”, ichro ch'án.

²⁴ A ntá ikui tí ch'in k'uáyéhe ijnko mil la ntáchro ch'án kixin: “Ó nòna kixin ijnko chojni imá jjehe tí jaha la itjaa tí nonte jehya jaha k'uénkaxian la tsákjá nkehe kjónté k'uénkahya.

²⁵ Méxra chrakonni la sákjuíkjak'emáni tí chichaon chrínki nche. Tákjá chichakōan tjinhin”, ichro ch'án.

²⁶ A ntá kjuátehe tí lamo kixin: “Jaha ijnko chojni jínahya la ko séhe. Jaha la ó noha kixin chrótjaa tí nonte k'uénkahya la chrókuákjaá tí nkehe k'uénkahya.

²⁷ A ntá tí chichaon chróchr'an banco. Ntiha chrókuich'exín xra ntá tí ikjan janhan ntá chrók'uayáha antsí itsjé chichaon chrókuacha kichó chica”, ichro tí lamo.

²⁸ A ntá nixjehe ch'án tí í so sín tjejó la ntáchro ch'án kixin: “Takitsjehérá tí mil chóna ch'án la chjehérá tí nkexro chóna tí ite mil chichaon

²⁹ kixin tí nkexro kjónté itsjé chóna la mé ts'áyéhe antsí la ntá tí nkexro chónahya la kjónté tí intsí chóna la ts'axrjehe.

³⁰ A ntá tí nkexro ch'ehya xra la tsétuenhén sátsji ch'án tí sítié ntója la ntá ntiha la tsotsjánka ch'án la ko sinetaón ch'án neno ch'án.”

Tsitōexín ijie chojni chjasintajni

³¹ 'A ntá tí tsi tí Xjeen Dios K'óna Chojni la tsikao ch'án kjuachaxién jié éxi ijnko Réy la ko tsikao ch'án kaín xín tí sín ángel ntá ntaha tsjak'etjāxin ch'án tí trono ts'etōanxín tí kjuachaxién jié.

³² Ntiha kaín xín tí chojni tsíkjin nkuíxín nación tsochjina tí tjen ch'án la jehe ch'án tsakitsjekjan ch'án ijnko la í jnko. Éxi ijnko nkexro t'ayakonhen kolélo mé tsakitsjekjan ch'án tí kolélo la ókjé ts'ixin va la ko tí kotentso la ókjé ts'ixin.

³³ Méxra ts'etōan ch'án kixin tí kolélo la ts'ixin nó tja ch'án chjina, a ntá tí kotentso la nó ti tja ch'án kjon.

³⁴ Ntá tí Rey tsonixjehe tí sín tjejó tja ch'án chjina tsontáchro kixin: “Xrákirá jahará tí tjen kjuachaxin kuènte T'aná kixin T'aná ó kjuíncheyaonrá ch'án. Tí naxa kjuích'énahya Dios chjasintajni la xráxín kjuenkayáxin ch'án xikaha tsonhen.

³⁵ Janhan mé k'uén kjinta la jahará kjuánjonrá nkehe kjoné. La ik'uén ntá la jahará kjuánjonrá nkehe ik'uia, la k'uájia éxi ijnko chojni kjuixin ikjín la jahará kjuánjonrá nketí k'ok'àna.

³⁶ La ko k'uéchontahya kaná la jahará kjuánjonrá ika k'uítsa, la ko kónina la jahará kjuasántsjeherá tí janhan, la kjuak'échjina la ntá jahará kjuasántsjeherá tí janhan.”

³⁷ A ntá tí sín jína la tsjanchankí sín kixin: “Inchéni, ¿nkesá k'uíkoni kixin ik'uén kjinta ntá kjuanjoni nkehe kjónte? ¿La nkesá k'uíkoni kixin ik'uén ntá la kjuanjoni nkehe ik'uia?

³⁸ ¿La ko nkesá k'uíkoni kixin ikjín kjuixian ntá kjuanjoni nketí k'ok'áha? ¿La ko nkesá k'uíkoni kixin chontahya iká la kjuanjoni ika k'uítsa?

³⁹ ¿La nkesá k'uíkonní kixin kóniha o kjuák'echjina la ntá kjuíjtsjeheni tí jaha?" mé xikaha tsjanchankíhi sín ch'án.

⁴⁰ A ntá tí Rey tsontáchro kixin: "Tió kjuínkĩtsará ijnko kichó ni kjónté ijnko chojni nóè la mé yóhe kixin tí janhan chrókjuínkĩtsará."

⁴¹ 'A ntá tí Rey t'etoan mé tsonixjehe tí sín tjejó nó tja ch'án kjon tsontáchro kixin: "Sátjirá jahará kixin jahará tsjasótiará. Sátjirá tsjasótiará tí tjen tí xrohi ts'ankahya. Mé tí xrohi tjechónhen kixin tsoche tí ch'ín Tsochren la ko kaín tí sín ángel kuènte ch'án.

⁴² Tí ik'uén kjinta la jahará kjuánjonhyará nkehe kjoné la ko ik'uén ntá la jahará kjuánjonhyará nkehe ik'uaia.

⁴³ K'uájia éxí ijnko nkexro kjuixín kjín la jahará kjuánjonhyará nketí k'ók'àna la ko k'uéchontahya kaná la jahará kjuánjonhyará ka chrók'uítsa la ko k'uénina la kjuak'échjina la jahará kjuasántsjehyará tí janhan."

⁴⁴ Ntá tí jehe sín la tsjanchankí sín kixin: "Ínchéni, ¿nkesá k'uíkonní kixin ik'uén kjinta la ik'uén ntá la ko kjuixian kjín la ko chontahya iká la ko níha la ko kjuák'echjina? ¿Mé nkesá k'uíkonní xikaha la ntá kjuínkĩtsahyani tí jaha?" tsixro sín.

⁴⁵ La ntá tí Rey tsjatehe ch'án tsontáchro ch'án kixin: "Tí xikaha kaín tíha kjuínkĩtsahyará ijnko chojni imá nóè la éxí xikaha kjuínkĩtsahyará tí janhan."

⁴⁶ A ntá tí sín jínahya xikaha kjuích'e la mé sátsjixin sín ntihi tsjasóte sín jnkochrín. A ntá tí sín jína la sátsji sín ts'áyéhe sín kjuachón jnkochrín —mé xikaha chrónka ch'ín Jesús.

26

Tí sín nínkakonhen ch'ín Jesús tjenkayáxin sín kixin nkexrí ts'óyán sín ch'án (Mr. 14.1-2; Lc. 22.1-2; Jn. 11.45-53)

¹ Ntá kjuixín chrónka ch'ín Jesús kaín tíha, ntá nixjehe ch'án tí sín k'uájiko ch'án, ntáchro ch'án kixin:

² —Jahará ó nohará kixin t'itjáyan iyó yaon ntá tsjasín sín tí kia pascua la ntá tí Xjeen Dios K'óna Chojni mé tsotsé sín ch'án tsjikaán sín ch'án tí tjejó tí sín t'etoan ntá tsjak'enkani sín ch'án ijnko ntacruz —ichro ch'ín Jesús.

³ Ntá tí sín nch'at'á t'etoan la ko tí sín maestro tjako tí ley la ko tí sín tada kuènte tí sín judío mé kójnkotsé sín tí ntasin kuènte tí nchia kjuák'e ch'ín Caifás tí ch'ín nch'at'á t'etoan.

⁴ Ntaha tjenkayáxin sín kixin nkexrí tsotsé sín ch'ín Jesús la ts'óyán sín ch'án.

⁵ A ntá ntáchro sín kixin:

—Tí siín kia la chrótséhyani ch'án kixin imá tsonínkaon tí chojni —ichro sín.

Ijnko tjan kjuikao aceite xraxé kuikite tjan ikja ch'ín Jesús (Mr. 14.3-9; Jn. 12.1-8)

⁶ Ch'ín Jesús tjen chjasín Betania ntøe ch'ín Simón tí ch'ín k'uéchóna chinlepra.

⁷ Ntá xrínahya kóchjina ijnko tjan kjuikao tjan ijnko xro tsík'óna xro mármol mé kuíkaón aceite xraxé náxrjón la imá tjete k'uíte. A ntá tí tjene ch'ín Jesús ntá tí tjan a mé kuikite aceite ikja ch'án.

⁸ A ntá tí sín k'uájiko ch'ín Jesús mé k'uíkon sín xikaha ntá kónínkaon sín la ntáchro sín kixin:

—¿Nkekuènté kóxénhen tí xroan a?

⁹ Íchá jína chrókóxixin itsjé chichaon tí xroan ntá tí chichaon a chrókjuinkĩtsa tí sín nóè a —ichro sín.

¹⁰ Ntá kuínhin ch'ín Jesús tí nkehe tjo sín, ntá ntáchro ch'án kixin:

—¿Nkekuènté t'antaxínhínrá tí tjan i? Ó nchòxon ijnko nkehe jína kjuích'e tjan.

¹¹ Tí sín nòé la ó xráxín ts'ejókoará sín, a ntá janhan la jnkochrínhya ts'ejóni.

¹² Tí nkehe kjuích'e tjan mé kjuíncheka tjan aceite xraxé tí cuerpo kuèntana la mé xíkaha kjuakoxín tjan kixin xíkaha tsoxravána.

¹³ Ntá chaxín tjonkará kixin kuenté chjasintajni tió tsjako sín tí tán jína tsaáxin sín ntá tsochrónka sín kixin xíkaha kjuích'e tjan ntá tsoxraxinkakonxín sín kixin nkehe tí kjuích'e tjan —ichro ch'ín Jesús.

Ch'ín Judas kjuínchekji tí ch'ín Jesús

(Mr. 14.10-11; Lc. 22.3-6)

¹⁴ A ntá ijnko tí teyóxin sín k'uájiko ch'ín Jesús mé it'in Judas Iscariote sákjuínixjehé ch'án tí sín nchát'á t'etòan

¹⁵ la ntáchro ch'án kixin:

—¿Nkekjaín tsochjìnará tsoxrjanka nketí tjan tí ch'ín Jesús? —mé xíkaha chro tí ch'ín Judas.

Ntá tí sín nchát'á t'etòan kjuenkehe sín ch'án treinta chichaon plata.

¹⁶ Ntá tuénxín tí hora tí ch'ín Judas mé xritjeyá ch'án nkexrí tsochénka ch'án sín nketí tjan tí ch'ín Jesús.

Kjuixixín kjóneko sín tí ch'ín Jesús

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Ntá ikui tí yaon xrankíxixín kia sine sín niotja tsíkjhokhya tí xroan t'ánkixin niotja. Ntá tí sín k'uájiko ch'ín Jesús mé kóchjina sín kjuanchankíhi sín ch'án kixin:

—¿Ìnchéni, nketí tjinkávan sincheyaxíxinni tí sineni tí kia pascua? —ichro sín.

¹⁸ Ntá ntáchro ch'án kixin:

—Sátsjirá Jerusalén la tsjasánrá ntòe ijnko ch'ín la nixjehérá ch'án tsontáchrórá kixin: “Ntáchro Maestro kuènténi kixin í séhya naxa tsjak'e ch'án la ntá ijie ntòa ntihi tsoyaxíxin kixin sineko ch'án tí sín xriko ch'án tí kia pascua”, tsixrorá —mé xíkaha ichro ch'ín Jesús.

¹⁹ A ntá tí sín k'uájiko ch'ín Jesús mé kjuínchexiteyá sín la kjuíncheyaxíxin sín ntiha tí nkehe sine sín kia pascua.

²⁰ Tió ntá kóntó la ntá ch'ín Jesús k'uéjoko tí teyó sín k'uájiko ch'án kjóne sín.

²¹ La ntá tió naxa tjejóne sín la ntáchro ch'ín Jesús kixin:

—Chaxín tjonkará kixin jnkojínrá tjejorá ntihi mé sinchekjirána —ichro ch'án.

²² Ntá kaín sín la kjuankíxin kóxakonhen sín k'uává sín la ntá kjuankíxin sín jnkojnko sín kjuanchankíhi sín tí ch'ín Jesús kixin:

—Ìnchéni, ¿á jeheni ní? —ichro sín.

²³ Ntá kjuátehe ch'ín Jesús kixin:

—Tí nkexro tsochr'ánkíkian niotja tí plato a mé tí nkexro a mé sinchekjina ch'án.

²⁴ Tí Xjeen Dios K'óna Chojni xíkaha tsjasóte ch'án éxí nixja xroon itén Dios, a ntá nòa tí ch'ín sinchekji ch'án. Íchá jína chrókokjéhya ch'án —mé xíkaha ichro ch'ín Jesús.

²⁵ Na ntá tí ch'ín Judas tí ch'ín sinchekji ch'ín Jesús, mé ntáchro ch'án kixin:

—Maestro, ¿á janhan? —ichro ch'án.

Ntá ntáchro ch'ín Jesús kixin:

—Méxra xíkaha tsíntáchrúa —ichro ch'án.

²⁶ Ntá tió tjejóne sín na ch'ín Jesús mé kuákja ch'án tí niotja ntá kjuanchehe ch'án kjuasáyé Dios. Ntá kóchrít'ó ch'án tí niotja ntá chjéhe ch'án kaín tí sín k'uájiko ch'án sine sín. Ntá ntáchro ch'án kixin:

—Sinterá tíhi mé cuerpo kuéntana —ichro ch'án.

²⁷ Na ntá kuákja ch'án ijnko vaso tjiá ìnté to uva na ntá kjuanchehe ch'án kjuasáya Dios ntá kjuixin ntá chjéhe ch'án kaín tí sín tjejóko ch'án ik'ui sín. Ntá ntáchro ch'án kixin:

—Tíhi mé kaín rá it'irá

²⁸ kixin tíhi mé jnina mé chrónkaxín ijnko nkehe nixin tsonhen. Mé tí jnina ts'ítji na mé tsjacha tsjinkitsa nchónhya chojni kixin ts'íjmáxin ijje sín.

²⁹ Tjonkará kixin ts'íhya janhan tí ìnté to uva ínaá tsjixrakájia tí yaon ts'ayàjia kjuachaxin kuènte T'aná ntá xík'ini ìnté to uva ínaá —mé xíkaha ichro ch'ín Jesús.

Ntá chrónka ch'ín Jesús kixin ch'ín Pedro sinchemá ch'án kixin chónhya ch'án tí ch'ín Jesús

(Mr. 14.26-31; Lc. 22.31-34; Jn. 13.36-38)

³⁰ Ntá itsje sín ijnko himno ntá kjuixin ntá sákjuí sín tí jna Olivo.

³¹ Ntá ntáchro ch'ín Jesús kixin:

—Jahará tsítōnaráni kaín rá ijje tie kixin ntáchro tí xroon itén Dios kixin: “Its'en tí nkexro Pastor t'ayakonhen kolélo ntá kaín tí ko mé tsjichroe va.”*

³² Na ntá tió tsoxechónna ntá sátsjia senó estado Galilea, a ntá jahará la chr'éxin tsochréhérá —ichro ch'án.

³³ Ntá kjuátehe ch'ín Pedro ntáchro ch'án kixin:

—Kjónté kaín sín tsítóha sín ntá janhan la náhi —ichro ch'án.

³⁴ Ntá ntáchro ch'ín Jesús kixin:

—Chaxín tsoxrjanka kixin tí tie i naxa tsotsjehya kochíntōa la ó sinchemána níya —ichro ch'án.

³⁵ Ntá ntáchro ch'ín Pedro kixin:

—Kjónté koína its'én la sintamáhya tí jaha —ichro ch'án.

La ntá kaín tí sín k'uájiko ch'án na xíkaha ichro sín kaín sín.

Ch'ín Jesús chrónóhe ch'án It'é ch'án tí tjen ch'án tí Huerto Getsemaní

(Mr. 14.32-42; Lc. 22.39-46)

³⁶ Ntá ch'ín Jesús la ko tí sín k'uájiko ch'án mé kjuíji sín tí nonte ntiha mé nchek'in sín Getsemaní. Ntá jehe ch'án mé ntáchro ch'án kixin:

—Tjejorá ntihó ntá janhan sátsjia tsonixjahā T'aná —ichro ch'án.

³⁷ Ntá sákjuiko ch'án tí ch'ín Pedro la ko tí iyó xjeen ch'ín Zebedeo la kjuankixin kóxakonhen ch'án la ko k'uává ch'án.

³⁸ Ntá ntáche ch'án tí iy'á sín kixin:

—Imá t'ává asenná éxí its'én ntá ts'axrje asenná. Ntá jahará ntihó tsitōhará ts'ejotsjehekoárána —ichro ch'án.

³⁹ Ntá sákjuí ch'án antsí kjínxin ntá kjuák'exín toch'in ch'án k'uísén ch'án hasta caxin kja ch'án nonte ntá chrónóhe ch'án It'é ch'án tjen nkaya nkajní, ntáchro ch'án kixin:

—It'eni, tí tjinkávan chrókjuinchekaáni kixin chrók'uihyani tí nkehe tsjá tjiá tí copa i. Kjánchó jehya éxí tjinkaonni jeheni. Náhi. Éxí tjinkávan jaha —ichro ch'án.

⁴⁰ Ntá ikjan ch'án tí kuítóhe sín la ó k'uíkon ch'án kixin tjejójua sín. Ntá nixjehe ch'án tí ch'ín Pedro ntáchro ch'án kixin:

—Xá xitjahya chrók'uejótsjehekoarána ijnko hora.

* 26:31 Zacarías 13.7

⁴¹ Titohará tjeotsjehérá la nixjehérá Dios kixin tsjinkitsará ch'án kixin chrókjuachroehyará ch'ín Tsochren. Asánrá tóxrjínhín kjánchó tí cuerpo chontará la imá ntá —mé xikaha ichro ch'ín Jesús.

⁴² Ntá sákjuí ch'án yóxin inaá chrónóehé ch'án It'é ch'án, ntáchro ch'án kixin: —Jaha It'éni tí xitjahya tsjakjíyan tí nkehe tsjasótexínni la ntá tjinkaonni éxí jaha tjinkávan —mé xikaha ichro ch'án.

⁴³ Ntá ikjan ch'án la k'uíkon ch'án tjejójua tí sín k'uájiko ch'án inaá kixin tjehya sín kotáchrin.

⁴⁴ Ntá kuítóhe ch'án sín inaá la nixin sáxíkji ch'án ntá ó xikahó xínixja ch'án inaá.

⁴⁵ Ntá kjan ch'án tí k'uéjé sín la ntáchro ch'án kixin: —¿A ntá jie, tjeochrinrá la t'ok'áhará ní? Ntá ó tjen. Ntá jie kjuixraká tí hora ntá tí Xjeen Dios K'óna Chojni tsotsé tí sín chóna jie tsjikaán sín ch'án.

⁴⁶ Ntá ijie t'inkatjenrá sátsjini kixin ó kjuí tí ch'ín sinchekjina —ichro ch'án.

*Sákjuíko sín tí ch'ín Jesús tsjak'echjina ch'án ntqechiso
(Mr. 14.43-50; Lc. 22.47-53; Jn. 18.2-11)*

⁴⁷ Ntá naxa tjenixja ch'ín Jesús ntá xrínahya kui ch'ín Judas, mé ijnko tí teyóxin sín k'uájiko ch'án. A ntá jehe ch'án kuikao ch'án nchónhya chojni kjuíjiko sín chica espada la ko inta. Na mé kjuachaxién tí sín nchat'á t'etoan la ko tí sín táda kuénte tí sín judío mé kui sín.

⁴⁸ Ntá ch'ín Judas, tí ch'ín kjuínchekji, mé tsintáchro ch'án kixin: —Tí ch'ín tsakihá tueen ch'án na mé tsonoaxínrá kixin jehe ch'án. Ntá itserá ch'án —mé xikaha tsintáchro ch'ín Judas.

⁴⁹ Ntá kóchjinehe ch'án tí ch'ín Jesús la nixjehé ch'án ntáchro ch'án kixin:

—¿Á jina tjen, Maestro? —ichro ch'án.

Ntá kjóneko ch'án kochíto.

⁵⁰ Ntá kjuátehe ch'ín Jesús, ntáchro ch'án kixin:

—Amigo, á ó k'uinka tí xra tjinkávan sich'e?

Ntá xikaha kaín sín kóchjinehe sín ch'án la itsé sín ch'án.

⁵¹ Ntá ijnko ch'ín k'uájiko ch'ín Jesús mé kuakitsje ch'án chica espada kóchrínjin ch'án tatsjon ijnko tí sín ch'ehe tí nchat'á t'etoan xra.

⁵² Ntá ntáchro ch'ín Jesús kixin:

—Chr'axenhén tjoé chica espada méhe. Kaínxín tí sín tjàyaxín chica espada la xikaha ts'énxín sín.

⁵³ ¿Á noahyará kixin janhan jina chrókjuáncháha T'aná la ntá tuénxín chróchr'án ch'án teyó ejército sín ángel?

⁵⁴ Kjánchó tí xikaha chrókónhen la chróxiteyáhya éxí nixja xroon itén Dios kixin itén Dios mé chrónka kixin t'ichjánxín ó jehí xikaha tsónhen —ichro ch'ín Jesús.

⁵⁵ Ntá ch'ín Jesús mé ntáche ch'án tí sín ikui kixin:

—Jahará k'uinkakoará chica espada la ko inta kixin tsotserána éxí chrótserá ijnko síchee xikaha. A ntá kaín yaon kjuak'é nkaxenhen njnko kjuákua ¿na ntá nkexrí ntiha mé tsexinhyarána?

⁵⁶ Kjánchó jehí kaín tíha tsónhen kixin tsoxiteyá tí chrónka tí sín tsíkjin xroon itén Dios ósé —ichro ch'án.

Mé xikaha ntá kaín tí sín k'uájiko ch'ín Jesús na mé kuítóhe sín ch'án, ntá sákjuí sín.

*Ch'ín Jesús kóchjina ch'án tí síxré t'etoan
(Mr. 14.53-65; Lc. 22.54-55, 63-71; Jn. 18.12-14, 19-24)*

⁵⁷ Ntá tí sín itsé ch'ín Jesús la sákjuíko sín ch'án ntøe ch'ín Caifás, tí nchat'á t'etoan. Ntaha mé tsíkójnkotsé kaín tí sín maestro tjako tí ley la ko tí sín t'etoan kuènte nínko.

⁵⁸ Ntá ch'ín Pedro ikjín tinkáchréhe ch'án ntá kjuíji ch'án tí ntasin ntøe tí nchat'á t'etoan la kjaxin k'uixenhen ch'án tí ntasin la kjuák'eko ch'án tí sín policia kuènte nínko kixin tsotsjehe ch'án nkerí tsonhen.

⁵⁹ Ntá tí sín nchat'á t'etoan la ko tí sín táda la ko kaín tí sín t'etoan mé kjueyá sín nkexrí ts'eka sín jie tí ch'ín Jesús kixin jina chrók'óyán sín ch'án.

⁶⁰ Ntá kjónté nchónhya chojni kuikjanchia sín jie kjánchó k'uitjahya sín nkerí jie t'íká ch'án. Ntá kjónté la kóchjina iyó testigo ntoáhya chrónka sín

⁶¹ la ntáchro sín kixin:

—Ó kuínhinni ntáchro ch'án kixin: “Janhan na ts'oxíka tí nínko kuènte Dios la ntá iní yaon koá la ó tsjaké inaá”† —mé xikaha chro sín.

⁶² Ntá tí nchat'á t'etoan k'uínkatjen la kjuanchankíhi ch'án tí ch'ín Jesús, ntáchro ch'án kixin:

—¿Nkekuènté tjáteéhya ninkehó? ¿Á chaxín xikaha tsintáchrua éxí xikaha ichro sín? —ichro ch'án.

⁶³ Ntá ch'ín Jesús la táníkoá ch'án nixjahya ch'án. Ntá ntáchro tí nchat'á t'etoan kixin:

—Kjuachaxién ihnié tí Dios tjechón t'akjénxian chronka ntoá, ¿á jaha tí Cristo Xjeen Dios? —kjuanchankí ch'án.

⁶⁴ Ntá kjuátehe ch'ín Jesús ntáchro ch'án kixin:

—Éxí tí ntáchrua jaha. Ntá kjaxin xrjanka kixin chr'éxin ts'ikuan kixin tí Xjeen Dios K'óna Chojni mé tsjak'etjaxin nánko tí tja chjina Dios chónka kaín xín kjuachaxin la ko ts'ikuan itjuí mé tsixín ch'án nkaya nkajní —ichro ch'ín Jesús.

⁶⁵ Ntá kuínhin tí nchat'á t'etoan la ntá imá kónínkaon ch'án ntá kótséchje ch'án tí iké ch'án la ntáchro ch'án kixin:

—Tí ch'ín a k'uántaxinhin ch'án Dios kixin xikaha nixja ch'án. Méxra t'ichjánxinhya í so chojni tsochrónka. La ntá jahará la ó kuínhínra kixin nkexrí nixja ch'án.

⁶⁶ ¿A ntá jahará la, ¿nkechorá? —mé ichro tí nchat'á a.

Ntá kjuátehe sín ntáchro sín kixin:

—Chónka ch'án jie la chrók'uen ch'án —ichro sín.

⁶⁷ Ntá iso sín la kuikite sín ntate sín nkayakon ch'án na í so sín na kjuate sín ch'án la í so la chjéhe sín ikon ch'án.

⁶⁸ La ntáchro sín kixin:

—Tí chaxín tí Cristo jaha la tónoha nkexro kjuatia —ichro sín.

Ch'ín Pedro kjuínchemá ch'án kixin chónhya ch'án tí ch'ín Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Ntá ch'ín Pedro naxa tjetjaxin ch'án tí ntasin la ntá ikui ijnko tjan ch'e xra ntiha kóchjinehe ch'án, la ntáchro tjan kixin:

—Kjaxian xríkoa tí ch'ín Jesús tsíkjaxin estado Galilea —ichro tjan.

⁷⁰ A ntá ch'ín Pedro kjuínchemá ch'án nkayakon kaín sín la ntáchro ch'án kixin:

—Nonahya nkehe tí ntáchrua —ichro ch'án.

⁷¹ Ntá sákjuí ch'án kjuíji ch'án chjina tí puerta. La ntá í jnko tjan k'uíkon tí jehe ch'án la nixjehe tjan kaín sín tjejontaxín, la ntáchro tjan kixin:

—Tí ch'ín i la kjaxin k'uájiko ch'án tí ch'ín Jesús tsíkjaxin chjasin Nazaret —ichro tjan.

† 26:61 Juan 2.19

⁷² Ntá ch'ín Pedro kjuínchemá ch'án inaá, k'uákjenxin ch'án ihnié Dios, ntáchro ch'án kixin:

—Chonhya tí nkexro a —ichro ch'án.

⁷³ Ntá antsí chr'éxin tí sín k'uéjontaxín kóchjinehe sín ch'ín Pedro la ntáchro sín kixin:

—Chaxín jaha kjaxin jnkójín tí sín a kixin tjátsəanxínni tí nixja jaha —ichro sín.

⁷⁴ Ntá k'uákjenxin ch'án ihnié Dios ntáchro ch'án kixin:

—Chonhya tí nkexro a —ichro ch'án.

Na ntá xrínahya itsje kochíntəa.

⁷⁵ Ntá ch'ín Pedro mé xraxinkaon ch'án kixin nkexrí chrónka ch'ín Jesús senó kixin: “Naxa tsotsjehya kochíntəa mé ó tsjixin sìnchemána níya kixin chonhyana.”‡ Ntá xikaha xraxinkaon ch'ín Pedro ntá k'uaxrjenta ch'án ntiha la imá tsjánka ch'án la ó mero ts'enxín ch'án tí kjuancheníhi, la sákjuí ch'án.

27

Kjuikénhen sín ch'ín Jesús tí ch'ín Pilato

(Mr. 15.1; Lc. 23.1-2; Jn. 18.28-32)

¹ Ntá tí kóyaon k'uínkaséyan ntá kaín sín nchat'á t'ətoan la ko tí sín t'ətoan kuènte tí sín judío kjuenkayáxin sín nkexrí ts'óyán sín tí ch'ín Jesús.

² Ntá tjechronteto ch'án sákjuiko sín ch'án tí tjen tí ch'ín Poncio Pilato, tí ch'ín gobernador romano.

Ik'uén ch'ín Judas

³ Ntá tí ch'ín Judas, tsíkjinckeki ch'ín Jesús, mé k'uíkon ch'án kixin ts'óyán sín tí ch'ín Jesús. La ntá xraxinkaon ch'án tí jię kjuasin ch'án la sákjuikénhen ch'án sín inaá tí treinta chichaon plata kuákja ch'án, mé chjéhe ch'án tí sín nchat'á t'ətoan la ko tí sín táda.

⁴ La ntá ntáchro ch'án kixin:

—Ó kjuasinni jię kixin kjuínckekjini ijnko nkexro tjóá —ichro ch'án.

A ntá jehe sín kjuátehe sín kixin:

—Ntá janhanna la nonahyana tíha. Tíha la ó jię kuènta —ichro sín.

⁵ Ntá ch'ín Judas mé sákjuík'e tí chichaon nkaxenhen njnko ntá sákjuí ch'án kjuísik'á isin ch'án nta.

⁶ Ntá tí sín nchat'á t'ətoan kjuenájín sín tí chichaon la ntáchro sín kixin:

—Tí chichaon la kóxixín ijnié chojni la chrokjuahya chr'áxenhenni tí caja kuènte ofrenda —ichro sín.

⁷ La ntá kjuenkayáxin sín jnkokoá kixin tí chichaon la ts'ənaxín sín ijnko nonte it'in Nontee Tí Ch'ín Ch'éna Nchésen kixin tsochónta sín nketí tsoxravá tí chojni tsíkjixín ikjín.

⁸ Mé xikaha kjuínckek'in sín tí nonte mé Campo Kuènte Jnı la hasta ijie la naxa xikaha nckek'in sín.

⁹ Mé xikaha ó xiteyá tí nkehe k'uéntáchro profeta Jeremías, ntáchro ch'án kixin: “Kuákja sín tí treinta chichaon plata (tí chichaon kjuanjon tí sín israelita kuènte tí ch'ín a),

¹⁰ la k'uənaxín sín tí nonte kuènte tí ch'ín ch'éna nchésen kixin xikaha kjuínckexiteyá sín tí nkehe k'uətuəanna İnchéni.”*

Ch'ín Jesús kóchjina nkayakon tí gobernador Pilato

(Mr. 15.2-5; Lc. 23.3-5; Jn. 18.33-38)

¹¹ Na ntá ch'ín Jesús sákjuíko sín ch'án nkayakon tí ch'ín gobernador la ntá jehe ch'án kjuanchankí ch'án kixin:

‡ 26:75 Mateo 26.34 * 27:10 Zacarias 11.12-13

—¿Á jaha tí Rey kuènte tí sín judío? —ichro ch'án.

Ntá kjuátehe ch'ín Jesús, ntáchro ch'án kixin:

—Éxí ntáchrua jaha —ichro ch'án.

¹² Na ntá tí sín nchat'á t'etoan la ko tí sín táda t'etoan t'eka sín jie tí ch'ín Jesús kjánchó la ch'ín Jesús la ninkehó kjuáteheya.

¹³ A ntá ch'ín Pilato kjuanchankí ch'án kixin:

—¿Á kiénhya kaín tí jie t'eka sín tí jaha? —ichro ch'án.

¹⁴ Kjánchó ch'ín Jesús la ninkehó kjuáteheya ch'án. Ntá tí ch'ín gobernador la chrakon ch'án.

K'uetōan sín kixin its'en ch'ín Jesús

(Mr. 15.6-20; Lc. 23.13-25; Jn. 18.38—19.16)

¹⁵ A ntá tí kié pascua mé kuèhen tí ch'ín gobernador kixin jnkojnko nánó takitsjexín ch'án ntoechiso ijnko chojni tjechjina. Ntá tí chojni mé tsjanchia sín nkexro tí tsítóhe ch'án sátsji.

¹⁶ Ntá tjechjina ijnko ch'án, mé kaín sín ntiha ó nohe sín kixin jínahya ch'án, mé it'in ch'án Barrabás.

¹⁷ Ntá itsjé chojni kójnkotsé la ntá ch'ín Pilato mé kjuanchankí ch'án kixin:

—¿Nkexro tjinkáonrá ts'atjánta, á tí ch'ín Barrabás o á tí ch'ín Jesús nchek'in sín Cristo? —ichro ch'án.

¹⁸ Kixin tí ch'ín Pilato la ó nohe ch'án kixin kjuachjinoxínhin chóna tí sín kjuíkaán tí ch'ín Jesús.

¹⁹ Ntá jehe ch'án naxa tjetjaxin ch'án tí nchekitoexixin ch'án ijie chojni la ntá tí ichjién ch'án mé k'uetuenhen tjan ijnko chojni tsjichénka ch'án kixin tsjiatehya ch'án tí nkexro jína kixin kóntó náxrjónhya k'uíkonxín tjan kotáchrien tjan kixin tí jehe ch'án.

²⁰ A ntá tí sín nchat'á t'etoan la ko tí sín táda t'etoan a mé nixjehe kaín tí chojni tsíkóchjina kixin chrókjuanchia sín kixin chrókuítóhe ch'án tí ch'ín Barrabás sáchrókjui, a ntá ch'ín Jesús mé chrók'uen.

²¹ A ntá tí ch'ín gobernador mé nixjehe ch'án sín inaá kjuanchankí ch'án kixin:

—¿Nkexro tí yaá sín tjejó ntihi tjinkáonrá ts'atjánta? —ichro ch'án.

Ntá kjuátehe sín ntáchro sín kixin:

—Ch'ín Barrabás mé chrók'uatjánta ch'án —ichro sín.

²² A ntá ch'ín Pilato mé kjuanchankí ch'án kixin:

—¿A ntá nkehe sít'ahá tí ch'ín Jesús tí ch'ín nchek'inrá Cristo? —ichro ch'án.

Ntá kaín sín kjuátehe sín kixin:

—¡Tsjak'enkáni ch'án ntacruz! —ichro sín.

²³ Ntá ch'ín Pilato kjuanchankí ch'án ntáchro ch'án kixin:

—¿Xá nkehe tí kjuích'e tí ch'ín i kixin? —ichro ch'án.

Ntá antsí má itsen k'uíxite sín, k'óyako sín, ntáchro sín kixin:

—¡Tsjak'enkáni ch'án ntacruz! —ichro sín.

²⁴ Ntá ch'ín Pilato k'uíkon ch'án kixin í kohya tsjitóxinhin sín tsjenkayáxin sín la antsí má k'uíxite sín, nínkaon sín, la ntá kjuanchia ch'án xrakao sín ìnta, la nkayakon kaín tí sín tsíkójnkotsé ntaha k'ònti ch'án tja ch'án. La ntáchro ch'án kixin:

—Janhan tsámahya jie tí its'en tí nkexro í chóntahya jie. Jahará xikaha tjinkáonrá tsonhen —ichro ch'án.

²⁵ Ntá kaín sín kjuátehe sín kixin:

—Jeheni la ko xjeenni mé yámáni tí jie tí its'en tí nkexro i —ichro sín.

26 Ntá ch'ín Pilato kuítóhe ch'án kixin sáchrókjui tí ch'ín Barrabás. Ntá tuénxín k'uetōan ch'án kixin tsjate sín tí ch'ín Jesús la ntá kjuínchek'áyéhe ch'án tí sín tsjak'enkani sín ch'án ntacruz.

27 A ntá tí sín soldado a mé sákjuíko sín tí ch'ín Jesús tí palacio kuènte tí ch'ín gobernador. Ntaha kójnkotséxin kaín tí sín soldado romano la k'uántatjen sín tí jehe ch'án.

28 Ntá kuakitsjehe sín tí iké ch'án la ntá kjuínchek'inkáya sín ch'án ijnko ka kjátse tié.

29 La kjuak'enkaya sín kja ch'án ijnko corona tsíkijch'éna sín ntach'i la ko kjuanjon sín ijnko nta vara kixin tjenkáya tja ch'án chjina. La ntá k'uéjoxin toch'in sín nkayakon ch'án la kjuanoá sín ch'án, ntáchro sín kixin:

—Jnkochrín tsjak'é tsétuēnhén tí sín judío —ichro sín.

30 La ko kjaxin ntaté sín kujukite sín nkayakon ch'án la ko kuákja sín tí nta tjexraá ch'án la t'íchjéxin sín kja ch'án.

31 Ntá kjuixin kjuanoá sín ch'án na ntá kuakitsjehe sín ch'án tí ka kjátse tié ntá kjuínchek'inkáya sín tí iké ch'án xráxin. Ntá sákjuíko sín ch'án kixin tsjak'enkani sín ch'án ntacruz.

Kjuák'enkáni ch'ín Jesús ntacruz

(Mr. 15.21-32; Lc. 23.26-43; Jn. 19.17-27)

32 A ntá sákjuixin sín ntiha la xéta sín ijnko ch'ín kjuixin ch'án chjasin Cirene, mé it'in ch'án Simón. Ntá k'uetuēnhen sín ch'án kixin tsámá ch'án tí ntacruz tsjak'enkáni ch'ín Jesús.

33 Ntá kjuíji sín ijnko tjo it'in Gólgota na mé nkívee sín t'axrjéxin Nta Hueso Kja Chojni Tsík'en.

34 Ntá chjéhe sín ch'ín Jesús xranvino tsík'ixinkíkjanxín xroan tsjá kjánchó jehe ch'án k'uíhya ch'án.

35 A ntá tí sín soldado kjuixin kjuak'enkani sín ch'án tí ntacruz ntá tí iké ch'án kjuích'exín sín suerte kixin nkexro tsakja. Mé xíkaha xiteyá tí nkehe nixja tí sín k'uéchrónka itén Dios ósé, ntáchro kixin: “Nchónhya suerte kjuích'exín sín tí kaná.”†

36 Ntá tí sín soldado ntaha k'uéjóna sín t'ayakonhen sín ch'án.

37 Ntá kjuak'enkani sín tí ikja tí ntacruz ijnko ntachiso ntáchro kixin: “Ch'ín Jesús mé tí ch'ín Rey t'etuēnhen tí sín judío.”

38 Kjaxin yaá tí síchee k'uéjójyáni sín ntacruz ijnko la nó tja chjina la í jnko la nó tja kjon.

39 Ntá tí sín tinkák'atsínka mé kjuanoá sín ch'án tinkátjía kja sín

40 la ntáchro sín kixin:

—Jaha ntáchrua kixin chrók'oxíka tí nínko a ntá iní koá yaon la ó chrókjuixin chrókjuích'éna ínaá,‡ ichrua. Méxra ijie jahvá nchekaá asán. Tí chaxín jaha Xjeen Dios la jahvá tjasinkajinxín tí ntacruz méhe —ichro sín.

41 La ntá kjaxin tí sín nchat'á t'etōan la ko tí sín maestro tjako tí ley la ko tí sín fariseo la ko tí sín k'uetōan kuènte nínko kjuanoá sín ch'án, ikjo sín kíchó sín kixin:

42 —Jehe ch'án mé kjuínchekaá ch'án ókjé chojni ntá jehe ch'án xitjahya sinchekaá asén ch'án. Kja tí chaxín jehe ch'án tí Rey kuènte Israel ntá jehó ch'án chrókjuinkajinxín ch'án asén ch'án tí ntacruz kixin ntá kjaxinni chrókuitekaonni tí jehe ch'án.

43 Jehe ch'án tsintáchro ch'án kixin Dios tjinkítsa tí jehe ch'án la ntá tsotsje-heni á chaxin tjinkaon Dios sinchekaá tí jehe ch'án kixin tsintáchro ch'án kixin Xjeen Dios tí jehe ch'án —ichro sín.

† 27:35 Salmo 22.18 ‡ 27:40 Juan 2.19

44 Kjaxin tí síchee sínkáni ntacruz k'uántaxínhin sín ch'án.

Ik'uén ch'ín Jesús

(Mr. 15.33-41; Lc. 23.44-49; Jn. 19.28-30)

45 Ntá chonkíxin hasta las tres kónjín mé k'uíxin tie chjasintajni.

46 Ntá tí hora a ch'ín Jesús itsen k'uèya ch'án, ntáchro ch'án kíxin:

—Elí, Elí, ¿lama sabactani? —mé tíhi t'axrjexín kíxin: It'éni, It'éni, ¿nkekuèté kuitohéni?§ —mé xikaha ichro ch'án.

47 Ntá iso sín tjejótaxín kuínhin sín ntá ntáchro sín kíxin:

—Tí ch'ín a mé t'íyehé tí ch'ín profeta Elías —ichro sín.

48 Ntá ijnko ch'ín kuínká ch'án sákjuíkakja ch'án ijnko ka ntá chr'ánkí ch'án xranvino isán ntá tí ka a kjuak'ekjen ch'án ijnko nta kjínjin ntá kjuínchechrin ch'án kíxin chrók'ui ch'ín Jesús.

49 Ntá í so sín ntáchro sín kíxin:

—Nté títóhé ch'án. Tsotsjeheni á tsi ch'ín Elías sinchekaá tí jehe ch'án —ichro sín.

50 Ntá ch'ín Jesús itsen k'uíyato ch'án inaá, ntá kjuixin ik'uén ch'án.

51 Mé ntá tuénxín k'uíchje tí ka tjenkákuènxín nkaxenhen nínko. Mé k'uíchje tí ka k'óna yaá tí kjuankíxixín noi hasta nonte. La ko kuínkí nonte la ko tí tjo la kjaxin xitjehe.

52 La ko ó xitjehe tí tòye tsíxravá chojni la ko ó xechón itsjé tí sín k'uékinkáchónki Dios.

53 Kaín tí sín a mé k'uaxrjexín sín tí tòye, la tió kjuixin xechón ch'ín Jesús ntá k'uíxehen sín tí chjasin tjóá mé chjasin Jerusalén la ntaha itsjé chojni k'uíkon kíxin xíxechón tí sín a.

54 Ntá tí ch'ín capitán la ko tí sín k'uéjoko ch'án, mé tí sín t'ayakonhen ch'ín Jesús, na ntá k'uíkon sín kuínkí nonte la kaín tí í so nkehe la ntá imá chrakon sín, la ntáchro sín kíxin:

—Chaxín tí nkexro a mé Xjeen Dios.

55 Ntá ntiha nchónhya chojni chjin ikjín tjejó sín, tjejótsehe sín. Jehe sín k'uékinkáchréhe sín ch'ín Jesús tí kjuixin ch'án estado Galilea kíxin mé ntiha kjuankíxixín sín k'uékjinkítsa sín ch'án.

56 Ntaha kjaxin tjen tjan María Magdalena la ko tjan María, ìné tí ch'ín Jacobo, la ko ch'ín José la ko tí ìné tí xjeen tí ch'ín Zebedeo.

Ntá xrává ch'ín Jesús

(Mr. 15.42-47; Lc. 23.50-56; Jn. 19.38-42)

57 Ntá tí ó ntá kóntó ikui ijnko ch'ín it'ín José, mé ijnko ch'ín rico. Chjasén ch'án mé Arimatea la jehe ch'án kjaxin k'uéchréhe ch'án tí ch'ín Jesús.

58 Ntá tí ch'ín José sákjuítsjehe ch'án ch'ín Pilato kjuíkjanhia ch'án tí cuérpóé tí nkexro Jesús. Ntá ch'ín Pilato mé kjuanjón ch'án kjuachaxin.

59 Ntá ch'ín José mé kuákja ch'án tí cuerpo ntá kjuínchek'isímá ch'án ijnko ka tjóá.

60 Na ntá kjuak'enkaya ch'án ijnko tòye nixin kuènte ch'án kíxin senó tsíkich'éna ch'án. Ntá ijnko xro jíé k'uíkjàxín ch'án tí ntója tí tjo, ntá kjuixin ntá sákjuí ch'án.

61 Ntaha kjuák'e tí tjan María Magdalena la ko í jnko tjan María tjejótjaxin sín ntoí chok'èxin tjen tòye.

Tí sín soldado k'uáyakonhen tí tòye xrává ch'ín Jesús

62 A ntá tí yaon ó kjuixin kjuasiyóxin sín nkehe kuènte tí yaon t'ok'éhe sín, la ntá tí sín nchát'á t'etoan la ko tí sín fariseo sákjuítsjehe sín tí ch'ín Pilato

§ 27:46 Salmo 22.1

⁶³ la ntá ntáchro sín kixin:

—Ó xraxinkaonni kixin tió naxa kjuák'echón tí nkexro kjuích'ia la tsintáchro ch'án kixin ts'atsínka iní yaon ntá tsoxechón ch'án inaá, tsíchro ch'án.

⁶⁴ Méxra tsétuénhén tí sín soldado kixin ts'ayakonhen sín tí tòye tsoxétjajia tí nixin yaon. Tí náhí, la kjá tie itsi tí sín k'uájiko ch'án la tsee sín tí cuerpo kuènte ch'án la ntá chr'éxin tsochénta sín chojni kixin ó xíxechón tí nkexro a, mé xikaha sich'ia sín. La ntá tí xikaha sich'e sín antsí má sich'ia sín que tí xrankixín —mé xikaha ichro sín.

⁶⁵ Ntá ntáchro ch'ín Pilato kixin:

—Ntihi tjejó soldado. Sátsjirá la ts'ayakonhenrá jina tí tòye éxí tjinkáonrá —ichro ch'án.

⁶⁶ Na ntá sákjuí sín la kjuak'e sín ijnko sello chrítaón tí xro tjejkèxin tí tòye la kútohe sín tí sín soldado ntahó kixin ts'ayakonhen sín.

28

Ó xechón ch'ín Jesús

(Mr. 16.1-8; Lc. 24.1-12; Jn. 20.1-10)

¹ Ntá ó k'uátsínka tí yaon t'ok'éhe sín. Ntá chjino t'inkaséyan tí yaon xrankixín semana, la ntá tjan María Magdalena la ko tí í jnko tjan María sákjuítsjehe sín tí tsíkixravá Jesús.

² Ntá xrínahya kuínkí nonte imá tjian kixin ijnko ángel kuènte Inchéni k'uínkajinxín nkaya nkajní la kjuíji ch'án tí tsíxravá Jesús la kjuakjìn ch'án tí xro a tjejkèxin tòye la ntá chrítaón tí xro a kjuák'ekjen ch'án.

³ Tí ángel la imá tjákini tsjehe éxí ijnko xrohi la tí iké ch'án la imá tjóá tsjehe éxí chrinta.

⁴ Tí sín soldado mé k'uíkon sín xikaha la ntá síxrànka sín chrakon sín la éxí tsík'en sín xikaha k'uéjéj sín.

⁵ La ntá tí ángel mé ntáche ch'án tí chojni chjin kixin:

—Chrakonhyará. Janhan ó nòna kixin xritjéyará tí nkexro Jesús mé tí nkexro tsíkjak'enkání ntacruz.

⁶ Kjánchó í kohya ch'án ntihi ó tsíxechón ch'án inaá éxí chrónka ch'án senó. Xrákirá tsjehérá tí tsíkjak'e sín ch'án, í kohya ch'án.

⁷ Ntá sátsjirá tjoka tjíchenkará tí sín k'uájiko ch'án kixin: “Tí nkexro la ó tsíxechón. Ó kuítónxin ch'án ntia sátsji ch'án estado Galilea. Ntiha ts'ikonrá ch'án”, mé xikaha tsochronkará. Kaín tíha mé tjonkará —mé xikaha chrónka tí ch'ín ángel.

⁸ A ntá tí chojni chjin tjoka sákjuíxin sín tí tsíxravá tí nkexro Jesús, la chrakon sín la ko chéhe sín la sákjuíchénka sín tí sín k'uék'ajiko ch'ín Jesús.

⁹ Ntá xrínahya titaya k'uíkuèn sín kixin itjen tí ch'ín Jesús la nixjehe sín ch'án. Ntá kóchjinehe sín ch'án la kjóa sín toté ch'án, kuítekaon sín ch'án.

¹⁰ La ntáchro ch'án kixin:

—Chrakonhyará sátsjirá tjíchenkará tí sín kichó ni kixin sáchrókjuí sín estado Galilea la ntaha ts'ikon sín tí janhan —mé xikaha ichro ch'ín Jesús.

Tí nkehe chrónka tí sín soldado

¹¹ Tió sátsíkji tí chojni chjin la nta iso tí sín soldado k'uáyakonhen tí tsíxravá ch'ín Jesús mé sákjuí sín chjasin Jerusalén la chénka sín tí nchat'a t'etōan kaín tí nkehe tsíkónhen tí k'uéjéj sín ntiha.

¹² Ntá tí sín nchat'a t'etōan kjuínixjehe sín tí sín táda la ntá jnkokoá kjuenkayáxin sín ntá chjéhe sín nchónhya chichaon tí sín soldado.

¹³ La ntáchro sín kixin:

—Chronkará kixin tí tie naxa tjejochrinrá ikui tí sín k'uék'ajiko tí nkexro Jesús, mé kueé sín cuerpo kuènte ch'án, ichrorá.

¹⁴ A ntá tí chrókónohe tí ch'ín gobernador tíha la ntá jeheni tsonixjeheni ch'án kixin tsonínkakuanhyará ch'án —mé xikaha ichro tí sín nchat'á.

¹⁵ La ntá tí sín soldado k'uáyéhe sín tí chichaon la sákjuí sín la xikaha kjuíche sín éxí k'uítuenhen sín. La mé xikaha chrónkaxín tí sín judío, la hasta tí yaon ijie la xikahó ichro sín, chrónkaxín sín.

*Ch'ín Jesús k'uétuenhen ch'án tí sín k'uék'ajiko ch'án tí xra sich'e sín
(Mr. 16.14-18; Lc. 24.36-49; Jn. 20.19-23)*

¹⁶ A ntá tí tejnko sín k'uék'ajiko ch'ín Jesús sákjuí sín ijnko jna estado Galilea kixin xikaha tsík'etōan ch'ín Jesús.

¹⁷ Ntá k'uíkon sín ch'ín Jesús la ntá kuinkáchónki sín ch'án kjónté iso sín naxa kjuenkayáxin á chaxín jehe ch'án o náhí.

¹⁸ Ntá ch'ín Jesús kóchjinehe tí jehe sín la ntáchro ch'án kixin:

—Dios mé chjina kaín xín kjuachaxin nkaya nkajní la ko chjasintajni.

¹⁹ Méxra sátjirá kaín xín nación la tjácohérá chojni kixin tsitekaon sín tí janhan. Tíkítexínrá sín kjuachaxién ihnié It'éni la ko ihnié tí Xjeen la ko Nchakuèn Dios.

²⁰ Tjácohérá sín kixin sinchexiteyá sín kaín xín nkehe kuétuanhanrá. Ijie la ó nohará kixin tsjak'é ts'ejokoará jnkochrín hasta tsjeje chjasintajni. Mé xikaha tsonhen. Amén —ichro ch'ín Jesús.

Tí tan jína chrónka ch'ín Marcos

*Nteje mé kjuakoxin ch'ín Juan Bautista
(Mt. 3.1-12; Lc. 3.1-9, 15-17; Jn. 1.19-28)*

¹ Xíkihi mé xrankíxixín tí tan jína kuènte Jesucristo mé tí Xjeen Dios.

² Ósé mé kjuák'e ch'ín Isaías mé ijnko nkexro tsíchr'án Dios chrónka itén ch'án k'uékjin ch'án nkexrí nixjehe Dios tí Xjeen ch'án ntáchro kixin: Janhan tsochr'an ijnko nkexro tsochrónka tan kuèntana tsitónxin ntja, kixin tsjasiyóxin ch'án ntja kuèntá.*

³ Ntá tsinhin sín itén ijnko nkexro tsjak'e nteje ts'èya tsontáchro kixin:

“Tóxakonhanrá ncheyóxinrá ntja tsixin Inchéni, takitjehérá ijnko ntja ntoí.”†

⁴ Tíha mé xíteyá ikui ch'ín Juan Bautista, mé xíkaha kjuák'e ch'án nteje kuíkite ch'án chojni. Kjuakohe ch'án chojni ntiha kixin chrókjuinkí sín tí nkehe tjenkayáxin sín chrókuítóhe sín tí ijíé sín ntá chrókuikite sín kixin xíkaha mé chrókjuin ijíé sín.

⁵ Itsjé chojni kuixin estado Judea la ko tí chjasin Jerusalén ikui sín tí kjuák'e ch'ín Juan kuínhin sín tí nkehe kjuako ch'án ntá chrónka sín tí jie yamá sín ntá ch'ín Juan mé kuíkitezín sín ch'án ntarío Jordán.

⁶ Tí ké ch'ín Juan mé tsík'óna kaxree kocamello la ko tí nkehe chr'ínkat'óxin ch'án mé tsík'óna tjoa. A ntá tí nkehe kjóne ch'án mé kochjoá la ko tsjen kotsjenta tónoxín nteje.

⁷ Mé kjuák'ekjakohe ch'án chojni ntáchro ch'án kixin:

—Iton tí janhan mé tsichréhe ijnko nkexro antsí má chóna kjuachaxin, a ntá janhan la kánhyó. Méxra chrókósuàna chrókjuasintanka tí correa tí tokaté ch'án.

⁸ Janhan mé ìnta ó kuíkitezínrá. Ntá jehe ch'án mé tsikitezínrá ch'án tí Nchakuen Dios —ichro ch'ín Juan.

*Ch'ín Juan kuikite ch'án tí ch'ín Jesús
(Mt. 3.13-17; Lc. 3.21-22)*

⁹ Ntá tí yaon a ch'ín Jesús, k'uaxrjexín ch'án chjasin Nazaret estado Galilea. Na ntá ch'ín Juan mé kuíkitezín ch'án tí ntarío Jordán.

¹⁰ Tió k'uaxrjenkixin ch'ín Jesús tí ìnta, ntá xrínahya titàya k'uúkuèn ch'án na ó xitjehe nkajní la ntá tí Nchakuen Dios éxí kontóá k'uínkajinxin ntiha ntá kjuák'e chrítaón kja ch'án.

¹¹ Ntá xrínahya kuínhin sín nixja Dios nkaya nkajní, ntáchro kixin:

—Janhan mé xjanna imá tjuaha tí jaha. Imá chàna kixin nchexiteyàna tí jaha —mé xíkaha kuínhin sín.

*Ch'ín Tsochren chrókjuachroe tí ch'ín Jesús kixin chrókjuasin ch'án jie
(Mt. 4.1-11; Lc. 4.1-13)*

¹² Ntá tí Nchakuen Dios mé sákjuíko tí ch'ín Jesús nteje.

¹³ Kjuák'e ch'án cuarenta yaon tí nteje la ko ntiha mé k'uúxin ko jiehe ntá ch'ín Tsochren a na mé tjinkaon chrókjuachroe ch'án. La ntá tí sín ángel kui k'uàyakonhen tí jehe ch'án.

*Ch'ín Jesús kjuankíxixín kjuako ch'án estado Galilea
(Mt. 4.12-17; Lc. 4.14-15)*

¹⁴ Kjuixin kjuák'echjina ch'ín Juan ntóechiso ntá ch'ín Jesús na mé sákjuí ch'án nó estado Galilea sákjuíkjaköhe ch'án tí sín ntiha tí tan jína kuènte Dios.

* 1:2 Malaquías 3.1 † 1:3 Isaías 40.3

¹⁵ Ntá ntáchro ch'án kixin:

—Ó kjuixraká tí yaon, la ó tsi tí kjuachaxin kuènte Dios ts'etoan ch'án. Chrókuítóhéra tí nkehe jínahya k'uékjenkayáxinrá a ntá chrókuítekáonrá tí tan tsaáxinrá —mé xíkaha kjuako ch'ín Jesús.

Ch'ín Jesús k'uíyehé noó tí sín itsé koche
(Mt. 4.18-22; Lc. 5.1-11)

¹⁶ Ch'ín Jesús tjetji ch'án chrínta ntayaon Galilea ntá xrínahya k'uikon ch'án tí ch'ín Simón la ko tí kichó ch'án mé it'in Andrés, mé koche xritsé sín, ntá tinkák'e sín tí nchísén chrínkí ntá.

¹⁷ Ntá ntáchro tí ch'ín Jesús kixin:

—Chréhérá tí janhan, ntá tsotjahára xra tsjéyára chojni —ichro ch'án.

¹⁸ Ntá tuénxín kuítóhe sín tí nchísén k'uétséya sín koche ntá sákjuiko sín ch'án.

¹⁹ Ntá kjínhya kjuíji ch'ín Jesús ntá k'uikon ch'án tí yaá xjeen ch'ín Zebedeo. Ijnko mé it'in Jacobo. A ntá tí í jnko la mé it'in Juan. Jehé sín la ko tí it'é sín tjejóxehen sín tí ntabárcq tjejótjonité sín tí nchísén tséya sín tí koche.

²⁰ Na ntá ch'ín Jesús mé k'uíyehé tí jehé sín kixin kjaxin tsochréhe sín ch'án. A ntá tuénxín kuítóhe sín tí it'é sín ch'ín Zebedeo kuítóeko ch'an tí ntabárcq la ko tí sín tjinkítsa ch'án ch'e xra. A ntá jehé sín sákjuiko sín ch'ín Jesús.

Ijnko chojni chóna ijnko nchakuen tí jínahya
(Lc. 4.31-37)

²¹ Ntá kjuíji sín tí chjasin it'in Capernaum. Na ntá tí yaon t'ok'éhe sín mé k'uixenhen ch'in Jesús tí nínko Israel. Na ntá ntaha mé kjuankíxin ch'án kjuako ch'án.

²² A ntá tí chojni síin ntiha mé chrakon sín kuínhin sín tí nkehe kjuako ch'án kixin kjuakoxin ch'án kixin chóna ch'án kjuachaxin, la jehya éxí tí sín maestro tjako tí ley, ichro sín.

²³ Ntá tí nínko Israel chjasin ntiha itjen ijnko chojni chóna ijnko nchakuen tí jínahya k'uíyato ntáchro kixin:

²⁴ —¿Nkekuènté tjiaté tí jeheni kaín ni? Jaha Jesús kjuíxian Nazaret. ¿Á k'uinka kixin sínchek'itjáyanni? Janhan mé ó kjuátsoan tí jaha, la ko nóna kixin jaha tí nkexro tjóá kuènte Dios —mé xíkaha ichro tí nchakuen tí jínahya.

²⁵ Ntá ch'ín Jesús mé k'uetuenhen tí nchakuen tí jínahya ntáchro ch'án kixin:
—Tániá, t'axrjéxian tí jehé ch'án —mé xíkaha ichro ch'ín Jesús.

²⁶ A ntá tí nchakuen tí jínahya mé kjuínchek'aniáte tí ch'ín a la ko k'uíyatoxín tsen ntá k'uaxrjexín tí ch'ín a.

²⁷ A ntá kaín sín chrakon sín ntá kjuanchankíhi sín kichó sín, ntáchro sín kixin:

—¿Xá nkexro tíha kixin tjako ch'án nkehe nixin? Jehé ch'án chóna kjuachaxin kixin t'etuenhen ch'án tí nchakuen tí jínahya la titekakonhen —mé xíkaha ichro sín.

²⁸ A ntá imá tjoka k'uíxikónohe kaín xín sín estado Galilea kixin nkexrí tí kjuachaxin chóna tí ch'ín Jesús a.

Ch'ín Jesús kjuínchekitohe jína tí ich'ee tí ch'ín Simón Pedro
(Mt. 8.14-15; Lc. 4.38-39)

²⁹ Ntá tí ch'ín Jesús mé k'uaxrjexín ch'án tí nínko, a ntá tuénxín sákjuiko ch'án ch'ín Jacobo la ko ch'ín Juan, sákjuí sín ntqe ch'ín Simón la ko ch'ín Andrés.

³⁰ Ntá tí ich'ee ch'ín Simón na tjetsínka tjan, níhi tjan kixin chóna tjan sóa. Ntá chénka sín tí ch'ín Jesús.

³¹ Ntá kóchjina ch'án tí tjetsínka tjan ntá itsé ch'án tja tjan k'uínkatjen tjan. Ntá tuénxín kjuínhin tjan tí sóa chóna tjan. Ntá kjuanjon tjan nkehe sine sín.

Ch'ín Jesús kjuínchekitohe jína nchónhya chojni níhi
(Mt. 8.16-17; Lc. 4.40-41)

³² A ntá tió kjuíátaón yaon tió k'uíxin tie kuikohe sín tí ch'in Jesús kaín tí sín níhi la ko tí sín chóna nchakuen jínahya;

³³ na ntá kuenté chjasin kójnkotsé sín k'uíxintankí sin ntója tí nchia a.

³⁴ Ntá kjuínchekitohe ch'án jína kaín tí chojni níhi chóna nchónhya clase chin la ko kuakitsje ch'án kaín tí nchakuen tí jínahya. Na í kjuanjonhya ch'án kjuachaxin kixin tsonixja tí nchakuen tí jínahya kixin ó kjuátsoan tíha nkexro tí jehe ch'án.

Ch'ín Jesús mé kjuako ch'án estado Galilea
(Lc. 4.42-44)

³⁵ Ntá naxa sítié k'uàya ch'ín Jesús k'uaxrjexín ch'án tí chjasin a sákjuí ch'án nteje kixin ntiha nixjeexín ch'án It'é ch'án tjen nkaya nkajní.

³⁶ Ntá ch'ín Simón la ko tí sín xriko ch'án mé sákjuíkjoyá sín ch'án.

³⁷ Ntá k'uitja sín ch'án ntá chénka sín kixin:

—Kaín sín xritjeyá sín tí jaha —ichro sín.

³⁸ Ntá ntáchro ch'ín Jesús kixin:

—Sátsjini ókjé chjasin chjinaxón kixin ntaha kjaxin tsjákoḥa sín tí tan jína, kixin xikaha mé tí k'uaxrjexian chjasin ntiha.

³⁹ Ntá nkuíxín estado Galilea sákjuí ch'án kuinkákjako ch'án jnkojnko nínko la ko kuakitsje ch'án tí nchakuen tí jínahya chóna sín.

Ch'ín Jesús kjuínchekitohe jína ijnko ch'ín chóna chinlepra
(Mt. 8.1-4; Lc. 5.12-16)

⁴⁰ Ntá kui ijnko ch'ín chóna chinlepra kjuák'exín toch'in ch'án nkayakon ch'ín Jesús ntá chrónóḣe ch'án ntáchro ch'án kixin:

—Tí tjínkavan jaha la jína chrókjuínchekitoḣéni jína —ichro ch'án.

⁴¹ Ntá ch'ín Jesús na imá kuikonóḣe ch'án tí ch'ín a na ntá kjuentoá tja ch'án kjuak'e tja ch'án chrítaón tí ch'ín níhi a ntá ntáchro ch'án kixin:

—Méxra xikaha tjínkavan. Ntá jie sintakitoha jína —ichro ch'án.

⁴² A ntá xikaha ntáchro ch'án ntá tuénxín kjuín tí chinlepra ntá kuítóhe ch'án jína.

⁴³ Ntá k'uetuēnhen ch'ín Jesús tí ch'ín a kixin tjoka sátsji ch'án, ntáchro ch'án kixin:

⁴⁴ —Ninkexró chenkahya ntihi; jehó sátsja tjákoḣé tí ch'ín nchát'á kixin ó kjuínhan tí chinlepra la ko tjánjuan tí nkehe tsík'etōan ch'ín Moisés‡ kixin tsonoexín kaín xín chojni kixin ó kuítóha jína —ichro ch'án.

⁴⁵ A ntá tí ch'ín tsíkitohe jína, a ntá sákjuí ch'án kjuankixin ch'án chénka ch'án kaín xín chojni kixin nkexrí kuítóhe ch'án jína. Méxra xitjahya ts'ixenhen ch'ín Jesús noxín nijnko chjasin na ntá k'uaxrjenta ch'án tí kohya chojni. Ntá kjónté la kjuitsjehe sín ch'án kjuixín sín nkuíxín chjasin.

2

Ch'ín Jesús mé kjuínchekitohe jína ijnko chojni tsík'en toté
(Mt. 9.1-8; Lc. 5.17-26)

¹ Ntá ó k'uátsínka iso yaon ntá ch'ín Jesús mé xíkjan ch'án chjasin Capernaum. Ntá k'uixikónohe chojni kixin ijnko nchia ntiha kjuák'e ch'án.

² Ntá tuénxín nchónhya chojni kóchjina ntá kjuachahya tí nchia k'uixixenhen sín la ko kjaxin kjuachahya tí ntója nchia chrók'uixintankí sín. A ntá ch'ín Jesús kjuako tí tan jína kuente Dios.

³ Ntá kui noó sín tinkátsénki sín ijnko ch'ín tsík'en toté ch'án.

‡ 1:44 Levítico 14.1-32

⁴ Kjánchó xitjahya kóchjina sín tí tjen ch'ín Jesús kixin nchónhya chojni síin. La ntá k'úi't'ótjen sín tí chrítaón nchia a ntá k'óxrat'ò sín. Na ntá ijnko hno kjuak'ete sín tí kania tjenkáya tí sinníhi a ntá kjuinkajin sín ntoí tí tjen ch'ín Jesús a.

⁵ Tió k'uíkon ch'ín Jesús tí nkehe kjuích'e sín ntá ó nohe ch'án kixin chaxín imá tinkáchónki sín tí jehe ch'án. Ntá nixjehe ch'án tí sinníhi ntáche ch'án kixin: —Xjeenni, ó kjuixin kjuìnhan tí jie chonta —mé xikaha ichro ch'án.

⁶ Na ntá iso tí sín maestro tjako tí ley tjejótjaxin sín ntiha na ntá jehó sín mé kjo sín asén sín kixin:

⁷ “¿Nkekuènté xikaha nixja tí ch'ín i ncheyóhe ch'án asén ch'án Dios? Kixin ninkexró xitjahya tsjatsiin ijie kixin jehó Dios mé chóna kjuachaxin tsjatsen ijie chojni”, mé xikaha ikjo sín asén sín.

⁸ Ntá ch'ín Jesús la ó nohe ch'án nkehe tjenkayáxin sín. Ntá ntáchro ch'án kixin:

—¿Nkekuènté kixin xikaha tjenkayáxinrá?

⁹ ¿Nkehe antsí má xrahya chróntátjan ch'án? ¿Á antsí xrahya chróntátjan ch'án kixin ó kjuixin kjuìnhan ch'án tí jie yamá ch'án, o á antsí xrahya chróntátjan ch'án kixin chrók'uinkatjen ch'án chrókjuenájín ch'án kaniee ch'án ntá sáchrókjui ch'án?

¹⁰ Méxra jie tsjákoxian kixin tí Xjeen Dios K'óna Chojni mé ntihi chjasintajni chóna kjuachaxin tsjakjìnhan ijie chojni —ichro ch'án.

Ntá ntáche ch'án tí ch'ín xitjahya tji kixin:

¹¹ —Jaha tétuñhan t'inkatjen, tjenájian kaniãa na sátjia ntoã —ichro ch'án.

¹² A ntá tí sinníhi na tuénxín k'uínkatjen ch'án kjuák'exín toté ch'án na kjuenájín ch'án kaniee ch'án na kuámá ch'án k'uaxrjexín ch'án nchia sákjuí ch'án. Na ntá kaín tí sín síin a tsjehe sín nkexrí kónhen na chrakon sín la ko kjuanchehe sín Dios kjuasáyé. Ntá ntáchro sín kixin:

—K'uíkonhyéni tí nkehe i —ichro sín.

Ch'ín Jesús k'uíyehé ch'ín Leví (Mt. 9.9-13; Lc. 5.27-32)

¹³ A ntá chr'éxin ch'ín Jesús mé sáxíkji ch'án inaá chrínta ntayaon. Ntá kaín xín chojni kóchjina sín tí tjen ch'án ntá kjuako ch'án.

¹⁴ Ntá k'uátsínka ch'án k'uíkon ch'án tí ch'ín Leví xjeen ch'ín Alfeo tjetjaxin ch'án tjenchekjènkj ch'án. Ntá ch'ín Jesús mé k'uíyehé ch'án, ntáchro ch'án kixin:

—Chr'éhé tí janhan —ichro ch'án.

Ntá ch'ín Leví mé tuénxín k'uínkatjen ch'án chréhe ch'án tí ch'ín Jesús.

¹⁵ A ntá ch'ín Jesús kjuák'e ch'án ntoe tí ch'ín Leví, la ntá kjuanjón sín nkehe sine ch'án la ko kjaxin k'uéjó nchónhya tí sín nchekjènkj la ko kjaxin í so chojni chóna jie. Mé kaín tí sín a mé tjejótjaxin sín tjejóneko tí ch'ín Jesús la ko tí sín k'uájiko ch'án, kixin nchónhya chojni chréhe sín tí jehe ch'án.

¹⁶ Na ntá tí sín maestro tjako tí ley la ko tí sín fariseo k'uíkon sín kixin ch'ín Jesús tjejóneko kaín ti sín nchekjènkj la ko tí í so sín chóna jie, a ntá ntáche sín tí sín k'uájiko ch'án kixin:

—¿Nkekuènté kixin tí maestro kuèntará neko ch'án la ko t'ikao ch'án tí sín nchekjènkj la ko tí í so sín chóna jie? —ichro sín.

¹⁷ Na ntá ch'ín Jesús kuínhan ch'án nkehe tí tjo sín a. Ntá nixjehe ch'án tí sín a ntáchro ch'án kixin:

—Tí sín níehya t'ichjánxienhya sín nkexro sich'e xroan. Náhí. Jehó tí sín níhi mé t'ichjánxinhin sín nkexro sich'ehe sín xroan. Janhan na k'uinkahya

ntihi kixin chrók'uíyaha chojni jina tjejó sín. Náhí. K'uinka kixin ts'íyaha chojni chóna jie —ichro ch'án.

Tjanchankíhi sín tí ch'ín Jesús kixin á chrókjónehya sín tió tsonixjehe sín Dios (Mt. 9.14-17; Lc. 5.33-39)

¹⁸ Ijnko yaon na mé kaín xín tí sín k'uék'ajiko ch'ín Juan Bautista la ko tí sín fariseo a mé kjónehya sín kuenté yaon kixin mé xikaha ts'áyéhe sín kjuaxróxin, ichro sín. A ntá kui iso chojni nixjehe sín tí ch'ín Jesús ntáchro sín kixin:

—¿Nkekuènté kixin tí sín k'uék'ajiko sín tí ch'ín Juan la ko tí sín fariseo la nehya sín jie, a ntá tí sín xrikoa la ine sín? —ichro sín.

¹⁹ Ntá kjuátehe ch'ín Jesús ntáchro ch'án kixin:

—¿Xá chrókjónehya tí chojni tsík'íyehé sín kóchjina ijnko kia tsotehe chojni tí naxa tjejóko sín tí nkexro tsotehe? Tí naxa tjen tí nkexro tsotehe la xitjahya kixin chrókjónehya sín.

²⁰ A ntá itsi ijnko yaon itsi chojni sátsjiko sín tí ch'ín tsíkótehe, ntá tí yaon la chaxín sinehya sín.

²¹ 'Ninkexró chrókjuak'eniehe ijnko ka ó ntaxin it'ó ka nixin kixin ntá chrókjuixéhe tí ka nixin ntá antsí má chrók'uichje tí ka ntaxin a.

²² La ko kjaxin ninkexró chrókuikía xran vino nixin ijnko tjuaxran ó ntaxin; kixin tí xran vino nixin la chrókótséchje tí tjuaxran ntaxin ntá chrók'uitjayan tí xran la ko tí tjoa. Méxra tí xran vino nixin chrókuikia ijnko tjuaxran nixin —mé xikaha ichro ch'ín Jesús.

Tí sín k'uájiko ch'ín Jesús mé ik'uín sín iso neno noatrigó ijnko yaon t'ok'éhe sín (Mt. 12.1-8; Lc. 6.1-5)

²³ Ijnko yaon t'ok'éhe sín na ch'ín Jesús la ko tí sín k'uájiko ch'án mé k'uátsínka sín ijnko nonte siín noatrigó. Na ntá tí sín k'uájiko ch'án kjuankixin sín ik'uín sín iso noatrigó.

²⁴ Na ntá iso tí sín fariseo kjuanchankíhi sín tí ch'ín Jesús a kixin:

—¿Nkekuènté kixin tí sín xrikoa tjejóch'e sín xra ijie? Na mé kohya kjuachaxin tsonhen xra tí yaon t'ok'éheni —ichro sín.

²⁵ Ntá kjuátehe ch'án ntáchro ch'án kixin:

—¿Á kjuinchekuáxinhyará jahará tí xroon chrónka nkehe kjuích'e ch'ín David la ko tí sín k'uájiko ch'án tí k'uén sín kjinta?

²⁶ A ntá jehe ch'án k'uixenhen ch'án ntøe Dios tió kjuák'e nchat'á Abiatar k'uetóan, a ntá kjóne ch'án tí niotja tsikóyaon kjónté jehó tí sín nchat'á mé k'uéchóna kjuachaxin sine sín la kjaxin chjehe ch'án tí sín k'uájiko ch'án* —ichro ch'ín Jesús.

²⁷ Kjaxin ntáchro ch'ín Jesús kixin:

—K'óna tí yaon ts'ok'éhe chojni kixin t'ichjánxin sín, la jehya kixin chrókjuikosáyehe tí yaon a.

²⁸ A ntá tí Xjeen Dios K'óna Chojni mé chóna kjuachaxin ts'etóan nkehe tsonhen tí yaon t'ok'éheni —ichro ch'án.

3

Ijnko chojni tsixámá tja (Mt. 12.9-14; Lc. 6.6-11)

¹ Ntá ch'ín Jesús k'uixenhen ch'án ijnko nínko Israel ínaá. Na mé ntaha tjen ijnko ch'ín tsixámá ijnko tja ch'án.

* 2:26 1 Samuel 21.1-6; Levítico 24.5-9

² Na ntá kóchjina iso chojni tsáyehe sín ch'ín Jesús ts'ikon sín kixin á sinchekitohe ch'án jína tí ch'ín tsíxámá tja tí yaon t'ok'éhe sín kixin mé jína tsjanchia sín jie, ichro sín.

³ Ntá ch'ín Jesús mé ntáche ch'án tí ch'ín tsíxámá tja a kixin:

—T'inkatjen, tjak'e jnkosiné ntihi —ichro ch'án.

⁴ A ntá kjuanchankíhi ch'ín Jesús tí sín siín ntiha kixin:

—¿Nkehe siín kjuachaxin tsonhen tí yaon t'ok'éheni? ¿Á chrókjuich'eni tí jína ní o á chrókjuich'eni tí jínahya? ¿Á chrókjuinchekitoheni chojni jína ní o á chrók'óyánni chojni? —ichro ch'án.

A ntá jehe sín la táníkoá sín.

⁵ Na ntá ch'ín Jesús la nínkaon ch'án komá ch'án tí jehe sín la ko t'ává ch'án kixin tjinkakonhya sín tsikonóehé sín chojni. Na ntá k'uetuēnhen ch'án tí ch'ín a kixin:

—Tjéntoá tjá —ichro ch'án.

A ntá kjuéntoá ch'án tja ch'án la ó kuítóhe tja ch'án jína.

⁶ Na ntá tí sín fariseo a k'uaxrjexín sín n̄nko sákjuí sín k'uító sín tí sín kuēnte ch'ín Herodes ntá kjuenkayáxinko kíchó sín kixin nkexrí chrók'óyán sín tí ch'ín Jesús.

Nchónhya chojni siín chrínta ntayaon

⁷ Ntá ch'ín Jesús la ko tí sín k'uájiko ch'án sákjuí sín chrínta ntayaon a. A ntá nchónhya chojni kjuíjichréhe sín tsíkixín sín nó estado Galilea la ko kjaxin tsíkixín sín nó estado Judea

⁸ la ko chjasin Jerusalén la ko estado Idumea la ko ikjé sín kuixín sín nó tóhe ntarío Jordán la ko iso sín tsíkixín sín nó chjasin Tiro la ko nó chjasin Sidón. Na mé kaín sín tsíkinhin sín kixin nkexrí tí kjuaxroan jie kjuasin ch'ín Jesús ntá kuichréhe sín ch'án kixin chrók'uikon sín tíha kjaxin.

⁹ Ntá k'uetuēnhen ch'án tí sín k'uájiko ch'án a kixin ntahó chrókjuak'e chonhen sín ijnko ntabarco. A ntá tí imá chrók'uixitja sín ch'án ntá chrók'uixenhen ch'án tí ntabarco, a ntá ntiha chrókjuak'e ch'án tsochrónka ch'án.

¹⁰ Kixin itsjé chojni tsíkjinchekitohe ch'án jína, na ntá kaín xín tí sín níhi k'uixitja sín ch'án kixin tjinkaon sín chrókuákóxin sín ch'án.

¹¹ Kjaxin tí sín chóna nchakuen tí jínahya na mé tió k'uíkon sín tí ch'ín Jesús ntá k'uéjóxin sín toch'in sín nkayakon ch'án. Ntá k'óyako tí nchakuen tí jínahya a ntáchro kixin:

—Jaha mé tí Xjeen Dios.

¹² A ntá ch'ín Jesús ntáche ch'án tí nchakuen tí jínahya kixin kohya kjuachaxin tsochrónka kixin nkexro tí jehe ch'án.

Ch'ín Jesús kjueyá ch'án teyó sín ts'ajiko ch'án

(Mt. 10.1-4; Lc. 6.12-16)

¹³ A ntá chr'éxin chríin ch'ín Jesús ijnko jna, a ntá ntiha k'uíyehé ch'án tí sín tjinkaon ch'án chrók'uajiko ch'án ntá kóchjinehe sín ch'án.

¹⁴ Ntá kjueyá ch'án teyó tí sín ts'ajiko ch'án kixin ts'etuēnhen ch'án sín sátsji sín tsjako sín tí tan jína.

¹⁵ Kjuanjon ch'án kjuachaxin sinchekitohe sín chojni níhi jína la ko tsakitsje sín nchakuen tí jínahya chóna chojni.

¹⁶ A ntá tí sín i mé tí teyó sín tsíkjejá ch'án mé it'in sín xikihi: Simón na mé kjuínchek'in ch'án Pedro;

¹⁷ la ko Jacobo la ko tí kicho ch'án Juan mé xjeen ch'ín Zebedeo. Kjaxin kjuínchek'in ch'án sín Boanerges mé t'axrjexín kixin Xjeen Sítjonta.

18 La ko Andrés la ko Felipe la ko Bartolomé la ko Mateo la ko Tomás la ko Jacobo, it'é mé it'in Alfeo, la ko Tadeo la ko í jnko Simón tíhi mé kuènte tí sín cananista,

19 la ko Judas Iscariote, mé kjuínchekji tí ch'ín Jesús chr'éxin.

Ntáchro sín kixin ch'ín Jesús chóna kjuachaxin kuènte tí Jínahya (Mt. 12.22-32; Lc. 11.14-23; 12.10)

Na ntá chr'éxin ch'ín Jesús la ko tí sín k'uájiko ch'án k'uixenhen sín ijnko nchia.

20 A ntá inaá kójnkotsé nchónhya chojni, a ntá xitjahya sine sín.

21 Ntá kónohe tí sín naxa kjéhya ch'ín Jesús ntá ikui sín sátsjiko sín ch'án kixin ntáchro sín kixin ó tsík'ixikján ch'án.

22 Kjaxin tí sín tjako ti ley kuixin sín Jerusalén, ntáchro sín kixin:

—Tí ch'ín i chóna ch'án tí ch'ín Beelzebú, mé ch'ín Tsochren, mé tí nkexro t'etuenhen kaín tí nchakuen tí jínahya ntá xikaha tjacha ch'án takitsje ch'án nchakuen tí jínahya a —ichro sín.

23 Ntá ch'ín Jesús k'uíyehé ch'án tí sín ntá kjuíncheyóexin ch'án ntáchro ch'án kixin:

—¿Nkexrí kixin jnkokón ch'ín Tsochren chrókuakitsje asén?

24 A ntá tí sín t'etoan ijnko nación tjanjonko kichó la tsjachahya ts'etoan.

25 La ko kjaxin tí sín jnkokoá ntøe jnkokoáhya tjenkayáxin sín ntá xitjahya ts'ejóko kichó sín.

26 A ntá tí chaxín ch'ín Tsochren jnkokónhya tjenkayáxin tjanjonko kichó la ntá ts'itjayan kjuachaxin kuènte.

27 'Ninkexró tsjacha ts'ixenhen ntøe ijnko chojni jiehe kixin ts'axrjehe tí nkehe chóna ch'án. Náhí. T'ichjánxin saxín sinchenteto ch'án tí ch'ín jiehe kixin jína tseéhe ch'án nkehe chóna tí ch'ín a.

28 'Ijnko nkehe chaxín tsotjonkará kixin tió tsoxraxinkaon ijnko chojni tí jie chóna la ko tsochronóehé Dios la ntá tsjakjinhin ch'án kaín tí jie la ko kaín tí nkehe jínahya tsintáchro sín.

29 A ntá tí nkexro ts'ántaxínhin tí Nchakuen Dios na mé xitjahya tsjin tí jie na mé jnkochrín tsochóna sín tí jie a —ichro ch'án.

30 Mé xikaha ichro ch'án kixin tí sín a tsintáchro sín kixin ijnko nchakuen tí jínahya mé chóna tí jehe ch'án.

Tí iné la ko kichó ch'ín Jesús (Mt. 12.46-50; Lc. 8.19-21)

31 A ntá kui iné ch'ín Jesús la ko kichó ch'án tjejó sín ntója ó na ntá k'uetuenhen sín ijnko chojni tsjik'íyehé ch'án.

32 A ntá tí sín tjejótjaxin tí tjen ch'ín Jesús ntiha chénka sín ch'án kixin:

—Iná la ko kichuá tjejó sín ntója xritjeyá sín ti jaha. —ichro sín.

33 Ntá ntáchro ch'án kixin:

—¿Xá nkexro tí nana la ko nkexro tí kichiná? —ichro ch'án.

34 Ntá komá ch'án tí chojni tjejótjaxin tí tjen ch'án ntá ntáchro ch'án kixin:

—Jahará mé nana la ko kichiná.

35 Kaín tí sín nchexiteyá tí nkehe tjinkaon Dios na mé tí sín a mé kichiná la ko nana —ichro ch'án.

4

Kjuíncheyóexin ch'án éxi ijnko chojni t'enka nonte (Mt. 13.1-9; Lc. 8.4-8)

1 Ch'ín Jesús mé kjuankixin ch'án kjuakoxin ch'án chrínta ntayaon inaá. A ntá ntiha mé kójnkotsé nchónhya chojni tí tjen ch'án. Ntá ijnko ntabarco

tjenkátaón ntá k'uit'ótjen ch'án, a ntá ntaha kjuák'e ch'án kjuakoxin ch'án. Ntá kaín tí sín tsíkójnkotsé mé kuítóhe sín chrínta ntayaon k'uéjókinhin sín.

² Nchónhya nkehe kjuako ch'án kjuíncheyóexin ch'án. Ntá ntáchro ch'án kixin:

³ —Tinhínrá tíhi: Ijnko chojni sákjuík'enka nontee.

⁴ Mé xikaha sákjuík'enka ch'án iso tí noatrigo a. Ntá iso noa la tsík'ánotjen ntia ntá kui koxroxé k'uínka va tí noa.

⁵ A ntá iso noa na mé k'uitji chrík'á xro tí kohya itsjé nche ntá tjoka k'uayan kixin tjínhya chóna nche.

⁶ A ntá tió kjuiton yaon la ntá tí ka la chján; la ko chónahya nuèe a ntá xamá.

⁷ A ntá í so noa kjuítsínkak'á tí sín kach'í la ntá tí kach'í k'uánkí la ntá tí noa í k'ónahya kixin sítja tí kach'í.

⁸ A ntá iso tí noa k'uitji nche jína la ntá k'uayan la ko k'uánkí nteto la ko k'óna jína. A ntá ijnko noa la mé k'óna treinta neno noa. A ntá í jnko la mé k'óna sesenta neno noa, a ntá í jnko la k'óna ijnko ciento neno noa —ichro ch'án.

⁹ Ntá ntáchro ch'án kixin:

—Tí nkexro tjinkaon chrókuinhin la chrókuinhin —ichro ch'án.

Ch'ín Jesús chronkaxín nkexrí t'axrjexín tí nkehe ntáchro ch'án

(Mt. 13.10-17; Lc. 8.9-10)

¹⁰ A ntá chr'éxin, tió kuítóhe ch'ín Jesús jehó ch'án, a ntá tí sín tjejó chjinaxón tí tjen ch'án la ko tí teyó sín k'uájiko ch'án mé kjuanchankíhi sín ch'án kixin nkexrí t'axrjexín tí nkehe kjuíncheyóexin ch'án.

¹¹ Ntá ntáchro ch'án kixin:

—A ntá jahará la Dios mé sintanohará tí nkehe tienxínhya chojni kuènte tí kjuachaxin kuènte Dios, a ntá tí sín titekakonhya la ó kjuintayóaxuán kaín nkehe kuínhin sín.

¹² Kixin kjónté ts'ikon sín la éxí k'uíkonhya sín, la ko kjónté tsinhin sín la tsienxínhya sín kixin ntá chrók'uixitoxínhya tí tjenkayáxin sín a la ko chrókjuínhya tí ijje sín* —ichro ch'án.

Ch'ín Jesús chrónkaxín nkexrí t'axrjexín tí nkexro sákjuík'enka

(Mt. 13.18-23; Lc. 8.11-15)

¹³ Ntá ntáche ch'án sín kixin:

—¿Á kiénxinhyará jahará nkexrí t'axrjexín tí nkehe kjuintayóaxian ní? ¿A ntá nkexrí chrókiénxinrá tí í so nkehe naxa sintayóaxian?

¹⁴ A ntá tí nkexro sákjuík'enka tí tje a mé yóhe ijnko nkexro sákjuíkjakó itén Dios.

¹⁵ A ntá iso chojni la éxí tí tje kjuítsínka ntia; kixin kuínhin sín itén Dios, ntá chr'éxin ó kui ch'ín Tsochren kjuínchek'itjayan ch'án tí tan jína kuínhin sín.

¹⁶ A ntá í so chojni la éxí yóhe tí tje kjuítsínkak'á xro: mé kuínhin sín itén Dios ntá tjoka kóxrjínhin sín kuítekaon sín.

¹⁷ Kjánchó njnkahya chóna nuèe, a ntá séhya kuítóhe; a ntá itsi tí kjuaxróxinhya tsonhen sín, o tsochónkíhi sín chojni kixin tí itén Dios kuítekaon sín ntá tsítóhe sín tí tinkáchónki sín Dios.

¹⁸ A ntá í so chojni la éxí yóhe tí tje k'uínka chrík'á kach'í na mé kuínhin sín itén Dios

¹⁹ Kjánchó tóxakonhen sín tí nkehe síin chjasintajni la ko tí nkehe tjete tóxrjínhin sín la ko tjinkaon sín tsochóna sín kaín xín nkehe. Kaín tíha mé t'inkákonhen tí itén Dios kuínhin sín a, la tí chojni xikaha la xitjahya sich'ehe sín xra Dios.

²⁰ A ntá í so chojni kuínhin tí itén Dios na kuinkáchónki sín la ntá xikaha jína ch'ehe sín Dios xra. La iso sín la éxí yóhe tí tje k'uínka tí nonte jína k'óna treinta

* 4:12 Isaías 6.9-10

nenno noa la ko iso sín la yóhe tí tje k'óna sesenta neno noa la ko iso sín la yóhe tí tje k'óna ciento neno noa —mé xíkaha ichro ch'ín Jesús.

*Ch'ín Jesús mé kjuíncheyóexin éxí ijnko xrohi tjeche
(Lc. 8.16-18)*

²¹ Kjaxin ntáchro ch'ín Jesús kixin:

—¿Á chrókuikaonni xrohi tjeche chrókjuak'emá chrínki ntacajón o chrínki cama? Kjá náhi. Tí xrohi la noi chrókjuak'e ts'inkaséyanxín.

²² Mé xíkaha kaín tí nkehe tjejóma jie tsonoxín chr'éxin la ko kaín tí nkehe ninkexró noehya jie la tsonoxín chr'éxin.

²³ A ntá tí nkexro tjinkaon chrókuinhin la chrókuinhin tíhi —ichro ch'án.

²⁴ Kjaxin ntáchro ch'án kixin:

—Chrókjuenkayáxinrá jína tí nkehe tjejótinhinrá. Tí nkehe tjáchoayará jahará la Dios la kjaxin tíha tsjáchoayá ch'án tí nkehe ts'ayéhérá jahará, a ntá antsí má ts'ayéhérá tí jahará tjejontinhinrá.

²⁵ A ntá tí nkexro chóna nkehe la antsí má ts'áyéhe sín. A ntá tí nkexro chónahya la kjónté tí ntsí chóna la ts'axrjehe —ichro ch'án.

Ch'ín Jesús mé kjuíncheyóexin ch'án éxí ijnko tje ts'ayan ts'ánki

²⁶ Kjaxin ntáchro ch'ín Jesús kixin:

—Tí kjuachaxin t'etōan Dios tóyóhe ijnko chojni sátsjik'enka nonte.

²⁷ Ntá sákjuík'ajua ch'án tí tie la ko k'uàya ch'án tí nchítjen. A ntá xíkaha k'uátsínka iso yaon la ko iso tie, a ntá tí tje la k'uayan la k'uánki. A ntá tí nkexro k'uenka la noehya ch'án nkexrí kónhen tíha.

²⁸ A ntá tí nche mé kjuích'e xra jehó. Senó k'uayan tí chaon tí ka, a ntá kjuintaa, a ntá chr'éxin icha tí noa tsjinjin;

²⁹ a ntá tió tsícha tí noa, a ntá tsakjinjin sín tí noa kixin ó kjuixraká tí yaon tsotjá sín.

*Ch'ín Jesús kjuíncheyóexin ch'án éxí ijnko tje it'in mostaza
(Mt. 13.31-32; Lc. 13.18-19)*

³⁰ Kjaxin ntáchro ch'ín Jesús kixin:

—¿Nkehe chrókóyóhe tí kjuachaxin t'etōan Dios, nkehe chrókóyóexin tíha?

³¹ Mé éxí yóhe tí tje it'in mostaza tsík'inka nonte. Tíha mé ijnko tje imá ntsí, a ntá tí í so tje síin chjasintajni la kénhyó.

³² A ntá jnkonaá tsík'inka tí tje la tsík'ayan tsík'ánki imá ihyé, a ntá tí í so nta la kánhyó. A ntá kjaxin tí chaon tí nta tsík'ánki imá ihyé, a ntá kjónté koxroxé xritjaka la jína ts'ók'éhe va chrínki tí ts'van chaon tí nta.

*Nkehe tí xra kjuích'e tí nkehe kjuíncheyóexin ch'ín Jesús
(Mt. 13.34-35)*

³³ Mé xíkaha ch'ín Jesús kjuakohe ch'án tí jehe sín, kjuíncheyóexin ch'án nchónhya nkehe éxí tí nkehe a kixin chrókjuacha chrókienxín sín tíha.

³⁴ Kaínxín nkehe kjuakohe ch'án tí jehe sín la kjuíncheyóexin ch'án. A ntá jehó tí sín k'uájiko ch'án la chrónka ch'án nkexrí t'axrjexín kaín tí nkehe kjuíncheyóexin ch'án.

*Ch'ín Jesús k'uetuenhen ch'án tí xrinto la ko tí ntá síchrica kixin ts'ixita
(Mt. 8.23-27; Lc. 8.22-25)*

³⁵ A ntá tí yaon a la ntá ó kóntó ntá ntáche ch'ín Jesús tí sín k'uájiko ch'án a kixin:

—Sátsjini tóhe tí ntayaon —ichro ch'án.

³⁶ Ntá kuitohe sín kaín tí chojni a ntá sákjuíko sín tí ch'ín Jesús naxa tjenkáya ch'án tí ntabárcō la ko kjaxin í so ntabárcō sákjuí koí.

³⁷ Ntá xrínahya tjiān chjéhe xr̄ntō la ntá síchrica ntā t'ixenhen tí ntabárcō, ó mero tsokaón ntā tí ntabárcō.

³⁸ A ntá ch'ín Jesús na mé tjejua ch'án tí tjar'i nóton tí tjejó sín nkaxenhen tí ntabárcō a tjejkón ch'án ijnko ka. Na ntá kjuínchekjàya sín ch'án ntáchro sín kixin:

—¡Maestro! ¿Á ntosán kixin ts'itjáyanni, ts'aniánkíni ntā ní? —ichro sín.

³⁹ A ntá ch'ín Jesús k'uàya ch'án, k'uētuenhen ch'án tí xr̄ntō la ko tí ntā kixin ts'ixita, ntáchro ch'án kixin:

—Tániá, tjak'eta —ichro ch'án.

Na ntá tí xr̄ntō la ko tí ntā k'uíxratá.

⁴⁰ Ntá kjuanchankíhi ch'án tí sín k'uájiko ch'án ntáchro ch'án kixin:

—¿Nkekuènté kixin imá chrakonrá? ¿Á naxa tinkachónkihyará Dios? —ichro ch'án.

⁴¹ Ntá imá chrakon sín ntá kjo sín kichó sín kixin:

—¿Xá nkexro tíhi? Kjónté xr̄ntō la ko ntayaon la mé kjuínchexiteyéhe ch'án —ichro sín.

5

Ijnko chojni chóna nchónhya nchakuen tí jínahya nonte Gadara (Mt. 8.28-34; Lc. 8.26-39)

¹ Ntá tió k'uátòye sín tí ntayaon, a ntá kjuíji sín tí nonte Gadara.

² Ntá k'uínkajinxin ch'ín Jesús tí ntabárcō a. Ntá xrínahya xeta ch'án ijnko ch'ín kuixin nó tsíkji_xravá chojni mé chóna ch'án ijnko nchakuen tí jínahya.

³ Tí ch'ín a mé kjuák'e ch'án tí tsíkji_xravá chojni. Ninkexró tjachahya sinchenteto ch'án kjónté cadena tjachahya.

⁴ Nchónhya veces kjuínchentetoxín sín ch'án cadena toté ch'án la ko itja ch'án, la kjónté kóchr̄ton ch'án kjuínchekuen ch'án tí cadena. Kohya ninkexro tjacha ts'etuenhen tí jehe ch'án.

⁵ K'uék'aji ch'án nchakotjin la ko tie t'íyato ch'án nó jnā la ko tí tsíkji_xravá chojni la ko chjéhe asén ch'án xro.

⁶ Na ntá k'uíkon ch'án kixin kui ch'ín Jesús kjónté ikjín la kuinká ch'án kjuíji ch'án kjuák'exín toch'in ch'án nkayakon ch'ín Jesús a

⁷ k'óyako ch'án ntáchro ch'án kixin:

—¿Nkekuènté tjiaté jaha tí jeheni, jaha Jesús Xjeen Dios tjen nkaya nkajni? Dios nchenoheni kixin xrjanóaha nchekjasótehyani —ichro ch'án.

⁸ Mé xikaha ichro ch'án kixin tsíntáchro ch'ín Jesús kixin:

—Jaha nchakuen tí jínahya, t̄tohé tí ch'ín i —ichro ch'án.

⁹ Ntá ch'ín Jesús mé kjuanchankíhi ch'án tí ch'ín a kixin:

—¿Nkexrí it'ian? —ichro ch'án.

Ntá kjuátehe ch'án ntáchro ch'án kixin:

—Legión mé it'inni kixin nchónhyani —ichro ch'án.

¹⁰ Ntá imá chrónóehē ch'án tí ch'ín Jesús kixin tsochr'ánhya ch'án ókjé tí nchakuen tí jínahya.

¹¹ Na ntá siín nchónhya cochíno xrine va chjinaxón tí jnā ntiha.

¹² A ntá chrónòā tí nchakuen tí jínahya ntáchro kixin:

—Tétuenhenni sátsjini tí siín tí cochíno, t̄tohé ts'ixenhenni tí jehe va —ichro tí nchakuen tí jínahya a.

¹³ Ntá ch'ín Jesús mé kjuanjon ch'án kjuachaxin. Ntá kaín xín tí nchakuen tí jínahya a mé k'uaxrjexín tí ch'ín a sákjuí kjuík'ixenhen tí cochíno a. Na ntá kaín xín tí ko a mé chjina iyó mil va siín va xrine va. Na mé kaín xín va k'uínkajinxin va ntiha kjuítsínkayá va tsaka ntá kjuítsínkankí va ntayaon ntá kjuínhin va ntā.

14 Na ntá tí chojni t'ayakonhen tí cochíno a na mé kuinká sín kixin chrakon sín na ntá sákjuí chrónka sín chjasén sín la ko nontee chojni. Na ntá itsjé chojni mé kuitsjehe sín nkehe tí tsikónhen ntiha.

15 Ntá kjuíji sín tí tjen ch'ín Jesús a na k'uíkon sín kixin itjen tí ch'ín k'uéchóna tí nchónhya nchakuen tí jínahya senó la ó jína tjen ch'án tjetjaxin ch'án tjenkáya ch'án iké ch'án, na ntá chrakon sín.

16 A ntá tí sín tsík'ikon mé chrónka sín nkexrí k'uék'aji tí ch'ín k'uéchóna tí nchakuen tí jínahya la ko nkexrí kónhen tí cochíno a.

17 Ntá kjuankixin sín chrónóehē sín tí ch'ín Jesús a kixin sáchrókjuixin ch'án ntiha.

18 A ntá ó ts'it'ótjen ch'ín Jesús tí ntabárcō na ntá tí ch'ín k'uéchóna nchakuen tí jínahya na mé chrónōa ch'án kixin kjaxin ch'án sáchrókjuiko sín ch'án, ichro ch'án.

19 Ntá ch'ín Jesús kjuanjonhya ch'án kjuachaxin sátsjiko sín ch'án. Náhi. K'ueṭoan ch'án kixin:

—Sátjia nṭoṭa t́jichenka tí sín naxa kjéhya tí jaha kixin nkexrí kaín tí kjuaxroan jié kjuasin Dios kjuínchekitoḥa jína kuíkonóḥa ch'án tí jaha —ichro ch'án.

20 Na ntá tí ch'ín a sákjuí ch'án kjuankixin chrónka ch'án kaín tí chjasin kuente Decápolis kixin nkexrí kaín tí nkehe kjuích'e ch'ín Jesús kjuínchekitoḥe ch'án jína. A ntá kaín tí sín kuínhin na chrakon sín.

*Tí xjeen ch'ín Jairo la ko tí tjan kuákóxin iké ch'ín Jesús
(Mt. 9.18-26; Lc. 8.40-56)*

21 Ntá tió xíkjanqao ch'ín Jesús tí ntabárcō tóhe tí ntayaon inaá ntá kóchjina nchónhya chojni ntá ntahó chrínta nṭa kuítóhe ch'án inaá.

22 Na ntá ikui ijnko ch'ín t'ṭoan kuente nṅnko mé it'in ch'án Jairo. A ntá tió k'uíkon ch'án kixin itjen ch'ín Jesús ntá kjuák'exín toch'in ch'án chrínkí toté ch'ín Jesús a

23 imá chrónóehē ch'án kixin:

—Tí ijnko xjanna chjin ó tjet'en xjan. Xrjanóḥa chrókjuini chrókjuak'étja itjá chrítaón kja xjan ntá chrókuitoḥe xjan jína —ichro ch'án.

24 Ntá ch'ín Jesús sákjuíko tí ch'ín a. Na nchónhya chojni chréhe sín tinkák'ixitja sín ch'án inaá.

25 A ntá kjaxin tjenkákjan sín ijnko chojni chjin níhi tjan, ó chóna teyó nánó sítji tjan jni.

26 Imá tjote tjan kixin nchónhya chojni kjuanjon xroan kónhen tjan na ó kjuixin kjuèhe tjan kaín xín nkehe k'uéchóna tjan. Ó jehí titóehya tjan jína la íchá ntsí tinkákótao tjan.

27 A ntá tió kuínhin tjan chrónka chojni nkehe tí kjuaxroan kjuasin ch'ín Jesús ntá kui tjan kjuák'enkákjan tí chojni kóchjina nóton ch'ín Jesús ntá kuákóxin tjan tí ké ch'án,

28 ntáchro tjan kixin kjónté iké ch'án ó chrókuakóxin tjan na ó tíhó mé chrókuitoḥe tjan jína, ichro tjan.

29 Ntá tuénxín tí jni na mé ó kjuixié tjan la ko kónohe tjan kixin ó kjuixin kuítóhe tjan jína ti chin k'uéchóna tjan.

30 Ntá ch'ín Jesús na ó kónohe ch'án kixin kjuachaxién ch'án mé kuítóexín ijnko chojni jína ntá kuínkátjía ch'án kjuanchankíhi ch'án tí chojni síin a kixin:

—¿Nkexro kuákóxin tí kaná? —ichro ch'án.

31 Ntá kjuátehe tí sín k'uajiko ch'án a ntáchro sín kixin:

—Ó noha kixin nchónhya chojni sítja, ¿ntá nkekuènté kixin naxa tjanchankiá kixin nkexro tí kuákóxian? —ichro sín.

³² Ntá kuinkátjía ch'án tsjehe ch'án nkuíxín kixin tsonohe ch'án nkexro tí kuákóxin tí ké ch'án.

³³ Ntá tí tjan a na mé chrakon tjan síxrànkà tjan ó nohe tjan kixin ó kuítóhe tjan jína ntá xrakoa tjan kjuák'exín toch'in tjan nkayakon ch'in Jesús ntá ntoá chrónka tjan kaín nkehe kónhen tjan.

³⁴ Ntá ntáchro ch'in Jesús kixin:

—Xjeenni, kaín asán kuinkachónkia tí janhan ntá kuítóha jína. Ijie la kjuaxróxin sátsjia ntoa la ó kuítóha jína a —ichro ch'án.

³⁵ Na ntá naxà tjenixja ch'án ntá ó kui chojni kuixín sín ntøe tí ch'in t'etøan tí nínko. Ntá chénka sín ch'án kixin:

—Xjaan na ó kjuixin k'uén. ¿Nkekuénté naxà chjehé xrà tí Maestro a? —ichro sín.

³⁶ Ntá ch'in Jesús na ántosén ch'án tí chrónka sín ntá nixjehe ch'án tí ch'in t'etøan tí nínko ntáchro ch'án kixin:

—Chrakonhya jaha, jehó tsinkachónke tí janhan —ichro ch'án.

³⁷ Ntá kjuanjonhya ch'án kjuachaxin kixin sátsji kaín sín, na ó jehó ch'in Pedro la ko ch'in Jacobo la ko ch'in Juan mé kichó ch'in Jacobo, sátsji sín.

³⁸ Na ntá tió kjuíji sín tí ntøe tí ch'in t'etøan tí nínko na k'uíkon sín kixin imá sítjité sín tsjánkàma sín tí xjan a.

³⁹ Ntá k'uíxenhén ch'in Jesús nchia kjuanchankí ch'án kixin:

—¿Nkekuénté ánta tjasitérá tsjánkàmará tí xjan a? Tí xjan na tsík'enhya xjan na tjejua xjan —ichro ch'án.

⁴⁰ A ntá kjuanoá sín ch'án. Ntá k'uetoan ch'án kixin kaín sín sátsji sín ntója. Ntá kjuíko ch'án tí it'é la ko tí ìné xjan la ko tí iy'á sín xriko ch'án ntá k'uíxenko sín ch'án tí tjen tí xjan a.

⁴¹ Itsé ch'án tja xjan ntá nkívee xjan mé nixjeexín ch'án ntáchro ch'án kixin:

—Talita, cumi —mé t'axrjexín kixin: Lonchí, tétuånhan kixin t'aya.

⁴² A ntá tí xjan a ó chónka tjan teyó nánó na mé tuénxín k'uínkatjen tjan ó jína tji tjan. Ntá kaín tí chojni siín ntiha la chrakon sín k'uíkon sín xíkaha.

⁴³ Ntá fuerte k'uetoan ch'in Jesús kixin chróchenkahya sín ninkexró. La kjaxin k'uetoan ch'án kixin tsjanjon sín nkehe sine tjan.

6

Ch'in Jesús kjuák'e ch'án chjasin Nazaret

(Mt. 13.53-58; Lc. 4.16-30)

¹ A ntá chr'éxín k'uaxrjexín ch'án chjasin ntiha. Ntá jehe ch'án la ko tí sín k'uájiko ch'án na mé sákjuí sín Nazaret tí chjasin tsík'ánkíxin ch'án.

² Na ntá tió kui tí yaon t'ok'éhe sín ntá kjuankíxin ch'án kjuakoxín ch'án tí nínko ntiha. Na ntá nchónhya chojni kuínhin sín ntá chrakon sín ntáchro sín kixin:

—¿Nketí tsíxrakohe tí ch'in i kaín tíhi? ¿Nketí kuixín tí kjuaxrexinkaon chónka ch'án la ko tí kjuaxroan tjasin ch'án?

³ ¿Á jehya ch'án tí ch'in ch'éna nta na mé xjeen tí tjan María, la tí kichó ch'án a na mé ch'in Jacobo, la ch'in José, la ch'in Judas, la ch'in Simón? ¿A kjaxinhya ntihi tjejókoni tí kichó ch'án chjin? —ichro sín.

Méxra tahya sín kuentá nkerí ch'e ch'án.

⁴ Na ntá ntáchro ch'in Jesús kixin:

—Kaín chojni tjikosáyehe sín ijnko nkexro chrónka iten Dios. Ntá tí chjasén ch'án la ko kaín tí sín kjéhya ch'án la ko tí sín ntøe ch'án na mé tjikosáyehya sín ch'án —ichro ch'án.

⁵ Méxra ninkehó kjuaxroan xitjahya kjuasin ch'án ntiha, la jehó kjuak'etja tja ch'án chrítaón ikja iso chojni níhi kjuínchekitøhe ch'án sín jína.

⁶ Ntá chrakon ch'án kixin xikaha kuítekakuenhya sín ch'án. Na ntá k'uáji ch'án tí chjasin ntsíntsí chjinaxón ntiha kjuako ch'án.

Ch'ín Jesús mé ichr'án tí teyó sín kixin sátsji sín tsjikjako sín itén Dios
(Mt. 10.5-15; Lc. 9.1-6)

⁷ Na ntá k'uíyehē ch'ín Jesús tí teyó sín k'uajiko ch'án a. Ntá kjuankíxin k'uetuēnhen ch'án kixin yóyó yóyó sín sátsji sín la ko kjaxin kjuanjon ch'án kjuachaxin kixin tsakitsje sín nchakuen tí jínahya chóna chojni.

⁸ La ko k'uetōan ch'án kixin ninkehó tsjikohya sín kuēnte ntia. Jehó tí nta tjixín sín mé tsjiko sín. Na mé tsjikohya sín kabolsa la ko tsjikohya sín nkehe sine sín la ko tsjikohya sín chichaon.

⁹ Na ko tokate ó tsjanka sín la ko tsjiko sín jehó tí ka tjejóya sín ó.

¹⁰ Kjaxin ntáchro ch'án kixin:

—A ntá tí ts'ixenhénrá ijnko nchia a ntá ntaha tsjanjon sín kjuachaxin na ntahó chókuitōhará. A ntá tsjixinjian tí xra ntá sátsjixinrá ntiha.

¹¹ Na ntá tí tsjasánrá ijnko chjasin ntá tsochrohya sín tsjanjon sín kjuachaxin ts'ejókoará sín ntiha na ko tsotjinkakonhya sín tsinhin sín tí nkehe chrókjuákohérá sín na ntá t'axrjéxinrá tí chjasin a ntá ts'oxènjnra tí nche chóna totárá kixin xikaha tsjákoxinrá kixin ntoáhya kjuích'e tí jehe sín. A ntá chaxín ntáxrjan kixin tí yaon tsitōexín ijie chojni ntá antsí má tsjasóte tí chojni tí chjasin a, a ntá tí sín chjasin Sodoma la ko Gomorra la kánhyó tsjasóte sín.

¹² Na ntá sákjuí sín kuinkákjakohe sín tí chojni a kixin mé chrókjuítóxinhin sín ntie sín.

¹³ La ko kjaxin kuakitsje sín itsjé tí nchakuen tí jínahya chóna chojni. Na ko aceite mé kuikite sín itsjé chojni níhi a la ntá kuítōhe sín jína.

Ik'uén ch'ín Juan Bautista
(Mt. 14.1-12; Lc. 9.7-9)

¹⁴ Na ntá tí ch'ín rey Herodes mé kuínhin ch'án nkehe tí kjuaxroan kjuasin ch'ín Jesús. Na ntáchro ch'ín Herodes kixin:

—Kjá tí ch'ín Juan Bautista mé ó tsíxechón ch'án inaá kixin xikaha tí kjuachaxin chóna tí ch'ín a —ichro ch'ín Herodes a.

¹⁵ A ntá iso sín ntáchro sín kixin:

—Kjá ch'ín Elías k'uéchrónka itén Dios —ichro sín.

A ntá í so sín mé ntáchro sín kixin:

—Kjá ijnko nkexro yóhe tí sín k'uékjako itén Dios ósé —ichro sín.

¹⁶ Ntá kuínhin ch'ín Herodes tíha ntá ntáchro ch'án kixin:

—Kjá ó jehe tí ch'ín Juan tí kuétōan chrínjin kja ch'án, mé ó tsíxechón ch'án jie —ichro ch'án.

¹⁷ Méxra tí ch'ín Herodes mé tsík'etōan ch'án kixin tsontetoxín tí ch'ín Juan cadena tsjak'echjina ch'án kixin xikaha tsíkjanhia tí tjan Herodías. A ntá tí tjan Herodías k'uéchjién tí ch'ín Felipe. A ntá tí savé ch'án Herodes mé kuákja tí tjan a kixin ts'óna ichjién ch'án.

¹⁸ A ntá tí ch'ín Juan tsíntáche ch'án tí ch'ín Herodes kixin:

—Kohya kjuachaxin tsochonta tí ichjién tí kichuá —ichro ch'án.

¹⁹ Mé xikaha tí tjan Herodías mé imá kóninkakonhen tjan tí ch'ín Juan ntá chrók'óyán tjan ch'án, kjánchó xitjahya

²⁰ kixin tí ch'ín Herodes mé chrakonhen ch'án tí ch'ín Juan kixin ó nohe ch'án kixin tí ch'ín a mé ijnko nkexro jína la ko tjóá asén la méxra kuítōehya ch'án kixin jehe tjan chrók'óyán tjan ch'án. A ntá kénhyó kienxín ch'án la kjónté kóxrjinhin ch'án tí nkehe kuínhin ch'án kjuako ch'ín Juan.

21 **A** ntá tí tjan Herodías mé kjuacha tjan tí yaon kia tsíkjitoxinhin nánó tí ch'ín Herodes a kixin tsík'íyehē ch'án tí síxreé la ko tí sín k'uetuēnhen tí sín soldado la ko tí sín t'etōan estado Galilea kixin itsi sín ntōe ch'án kixin siín kia.

22 **A** ntá tí xjeen tí tjan Herodías mé k'uixenhen tí tjejó sín, a ntá ité tjan, la kóxrjinhin ch'ín Herodes la ko kaín tí sín tjejóneko ch'án ntiha. Na ntá tí ch'ín rey ntáche ch'án tí tjan tjarisoá a kixin:

—Tjanchana tí nkehe tjinkávan na tsotjahá —ichro ch'án.

23 Ntá kjuínchenohe ch'án Dios ntáchro ch'án kixin tsjanjon ch'án tí nkehe tsjanchia tjan kjónté jnkōsiné tí chjasin t'etōan ch'án.

24 Ntá jehe tjan na mé kuínhin tjan ntá sákjuí tjan chénka tjan ìné tjan kixin tsintáchro ch'ín Herodes kixin tí ichrén nkehe chrókjuanchia tjan chrókjuanjon ch'án. Ntá kjuanchankí tjan kixin:

—¿Nkehe tí chrókjuanchiani? —ichro tjan.

Ntá tí ìné tjan mé ntáchro kixin:

—Ijie la itjia tjanchia tí kja tí ch'ín Juan Bautista, ichrua —ichro tjan.

25 **A** ntá tí tjarisoá ikjan tjan tjoka k'uixenhen tjan tí tjen tí ch'ín rey, ntá ntáchro tjan kixin:

—**A** ntá ijie tjinkaonni ijnko plato tsjak'enkáya ikja ch'ín Juan Bautista tsochjehéni —ichro tjan.

26 Na ntá tí ch'ín rey la mé imá k'uává ch'án kixin xikaha kjuanchia tjan kjánchó tsikjinchenohe ch'án Dios la ko tsíkinhin kaín tí sín tsík'íyehē ch'án, la ntá xitjahya tsontáchro ch'án “Náhí” tí nkehe kjuanchia tjan.

27 Na ntá tuénxín k'uetuēnhen ch'án ijnko ch'ín soldado kixin tsjikao ch'án tí kja ch'ín Juan a.

28 Ntá tí ch'ín soldado mé sákjuí ntōechiso, ntá kóchrínjin ch'án ikja tí ch'ín Juan a. Ntá ijnko plato kjuikoyá ch'án tí kja ch'án a ntá chjéhe ch'án tí tjan tjarisoá a. Ntá jehe tjan sákjuíkénhen tjan ìné tjan.

29 Na ntá kuínhin kaín tí sín k'uék'ajiko ch'ín Juan kixin xikaha tsíkónhen. Na ntá sákjuíkakja sín tí cuérpōe ch'án ntá kjuikao sín ntá sákjuíkjává sín.

Ch'ín Jesús mé kjuanjon nkehe kjóne in'ó mil chojni

(Mt. 14.13-21; Lc. 9.10-17; Jn. 6.1-14)

30 **A** ntá chr'éxin tí sín k'uájiko ch'ín Jesús a na mé ó kjan sín tí tjen ch'án inaá, chrónka sín nkexrí tí xra kjuíche sín na ko nkexrí kjuako sín.

31 **A** ntá ntáchro ch'ín Jesús kixin:

—Ts'axrjentani sátsjini nteje tí kohya chojni ntá ts'ok'áhará ntsí —ichro ch'án.

Mé xikaha ntáchro ch'án kixin sásítji la ko síti nchónhya chojni na ntá xrankahya ts'ejó sín sine sín.

32 Na ntá ch'ín Jesús la ko tí sín k'uájiko ch'án jehó sín k'uit'ótjen sín ijnko ntabárcō sákjuí sín ijnko nonte jehó tjan.

33 Na ntá itsjé chojni k'uíkon sín kixin sákjuí sín la ko kjuátsōan sín kixin ch'ín Jesús. Ntá xrákuaxin sín chjasén sín kuinká sín na ntá senó kjuíji sín tí chrínta ntayaon tí tsjiji ch'ín Jesús.

34 Ntá k'uínkajinxin ch'án tí ntabárcō, a ntá k'uíkon ch'án kixin nchónhya chojni siín ntiha ntá kuíkonōehē ch'án tí jehe sín na mé éxí yóhē kolélo tjejó sín chóntahya va nkexro ts'ayakonhen va. Ntá kjuankíxin ch'án kjuakohe ch'án sín nchónhya nkehe a.

35 Na ntá ó kóntó na ntá tí sín k'uájiko ch'ín Jesús a mé kóchjina sín tí tjen ch'án ntáchro sín kixin:

—Ntá ó kóntó la kohya ninkexró tjejó ntihi

³⁶ na ntá jaha chrókujtohé sín kixin sátsji sín tí chjasin chjinaxón a tsjik'ena sín nkehe kixin chóntahya sín nkehe sine sín —ichro sín.

³⁷ A ntá ch'ín Jesús kjuátehe ch'án ntáchro ch'án kixin:

—Chjehé sín nkehe sine sín —ichro ch'án.

Ntá kjuátehe sín ntáchro sín kixin:

—¿Á tsjik'enani iyó ciento denario niotja tsochjéheni sin sine sín ní? —ichro sín.

³⁸ Ntá ch'ín Jesús mé kjuanchankíhi ch'án sín kixin:

—¿Nkekjaín niotja chontará? Sátjítsehérá —ichro ch'án.

Ntá sákjuítsehe sín na ntá chrónka sín kixin:

—In'ó niotja la ko yaá koche mé siín —ichro sín.

³⁹ Na ntá k'uetōan ch'án kixin kaín xín sín chrók'uixitjāxīn sín tí chrítaón tí ka yoa a.

⁴⁰ Na ntá xikaha kójnkojié sín ciento sín la ko cincuenta sín k'uixitjāxīn sín.

⁴¹ Na ntá ch'ín Jesús kuákja ch'án tí in'ó niotja na ko tí yaá koche ntá konta ch'án nkajní ntá kjuanchia ch'án kjuasáyé Dios. Na ntá kóchrít'ō ch'án tot'ō tí niotja a ntá chjéhe ch'án tí sín k'uájiko ch'án kixin ts'óxikayēhe sín sine tí sín siín a la ko kjaxin kóchrít'ō ch'án tí yaá koche ntá k'óxikayēhe sín kixin sine sín kaín sín.

⁴² Ntá kaín xín sín kjóne sín kókjehe sín.

⁴³ A ntá kjuixin kjóne sín ntá tí sín k'uájiko ch'ín Jesús na mé kjuínchekaón sín teyó ntaxra tot'ō tí niotja la ko tí koche tsíxehe.

⁴⁴ A ntá tí sín kjóne na mé in'ó mil chojni ntoa.

Ch'ín Jesús mé tjitaón ntayaon

(Mt. 14.22-27; Jn. 6.16-21)

⁴⁵ A ntá tuénxín k'uetuēhen ch'ín Jesús tí sín k'uájiko ch'án kixin ts'it'ótjen sín tí ntabárcō a ts'atòye sín ntayaon sátsji sín nó chjasin Betsaida, ichro ch'án. Na ntá jehe ch'án na mé naxa kuitohe ch'án nixjehe ch'án kaín tí sín siín a.

⁴⁶ Kjuixin nixjehe ch'án sín na ntá jehe ch'án chriin ch'án ijnko jnā tsonixjeexín ch'án Dios.

⁴⁷ A ntá tió k'uixin tie ntá tí ntabárcō na mé ó kjuíji jnkōsiné ntayaon, a ntá jehe ch'án jehó ch'án kjuíji ch'án chrínta ntayaon.

⁴⁸ Ntá kotohe ch'án k'uíkon ch'án kixin imá xra tjiko sín tí ntabárcō a kixin tí xríntō imá chjéhe. Nantóye a mé sákjuíchréhe ch'án sín. Totó ch'án mé sákjuítónxin ch'án tí ntayaon na ntá kóchjinehe ch'án tí tjejó sín chrók'uátsínké ch'án sáchrókjui ch'án.

⁴⁹ A ntá tí k'uíkon sín kjuítaón ch'án nta, ntá kjuenkayáxin sín kixin kjuacha sín, ichro sín, ntá k'óyako sín

⁵⁰ kixin kaín sín k'uíkon sín ch'án la chrakon sín. Na ntá jehe ch'án mé tuénxín nixja ch'án ntáchro ch'án kixin:

—Chrakonhyará. Janhan tíhi —ichro ch'án.

⁵¹ Ntá k'uit'ótjen ch'án tí ntabárcō tí tjejó sín, a ntá tí xríntō la ó k'uíxratá. Ntá imá chrakon sín kixin xikaha kónhen

⁵² kixin kienxínhya sín tí kjuaxroan kjuích'e ch'án kuènte tí niotja kixin naxa kénhya asén sín kuinkáchónki sín ch'án.

Ch'ín Jesús mé kjuínchekitōhe jína tí chojni níhi tí nonte Genesaret

(Mt. 14.34-36)

⁵³ Ntá tió k'uátòye sín tí ntayaon ntá kjuíji sín tí nonte Genesaret ntá kjuak'echroē sín tí ntabárcō a tí chrínta nta.

⁵⁴ Na ntá tió k'uínkajinxīn sín tí ntabárcō, a ntá tí sín siín ntiha tjoka kjuátsōan sín tí ch'ín Jesús.

⁵⁵ Ntá sákjuí sín nkuíxín chjinaxón ntiha kjuankíxin sín kuikao sín tí sinníhi tinkátsénki sín kuikao sín tí tjen ch'ín Jesús.

⁵⁶ La ko kaín nketí kjuíji ch'án, á chjasin ntsí, á chjasin hyé, á nontee sín ó kjuíjiko sín tí sinníhi a chrínta ntja. Na ntá chrónóehe sín tí ch'ín Jesús kixin kjónté chrínta iké ch'án ó chrókuákóxin sín, ichro sín. Na kaín xín tí sín kuákóxin iké ch'án mé kuítóhe sín jína.

7

Tí nkehe nchekjita asén chojni (Mt. 15.1-20)

¹ A ntá iso sín fariseo la ko iso tí sín tjako tí ley kuixín sín chjasin Jerusalén ntá kóchjinehe sín tí ch'ín Jesús.

² Tí sín a, tió k'uikon sín kixin iso tí sín k'uájiko ch'ín Jesús mé k'óntihya sín tja sín na kjónté ine sín mé t'axrjexín kixin kjuínchexiteyáhya sín tí ley, ntá kjonta tí sín a.

³ (Mé xikaha kjuích'e sín kixin tí sín fariseo la ko kaín tí sín judío mé kuinkáchónki sín éxi k'uékjich'e tí sín táda ósé kixin ná t'óntó itja sín ntá sine sín.

⁴ Na ko tí tsokjanxin sín ntsin ná t'ónti sín ntá sine sín. Na ko kjaxin itsjé í so nkehe tinkáchónki sín, éxi tjonemá sín tí vaso t'iyá sín nkehe la ko tí nchésen la ko tí chī chjányan nkehe ne sín la ko tí kámé sín nchetjóá sín.)

⁵ Méxra tí sín fariseo la ko tí sín maestro tjako tí ley a na mé kjuanchankíhi sín tí ch'ín Jesús kixin:

—¿Nkekuènté kixin tí sín xrikoa la nchexiteyáhya sín tí nkehe k'uékinkáchónki tí sín táda k'uéjé ósé? Na mé tí sín xrikoa t'óntihya sín tja sín ntá kjónté ine sín —ichro sín.

⁶ Kjuátehe ch'ín Jesús ntáchro ch'án kixin:

—Ntoá tsíchrónka ch'ín Isaías ósé k'uéchrónka iten Dios tsíntáchro ch'án kixin ntoáhya tsjenkayáxinrá tí jahará kixin xikihi tsíkjin ch'án ntáchro ch'án kixin: Tí chojni tí chjasin i ir'va ó xraxinkakonxín sín tí janhan, a ntá tí asén sín ikjín kuítóhe sín tí janhan

⁷ Méxra ó chónkó tóchjina sín xraxinkaon sín tí janhan, kixin tí nkehe tjako sín la tí nkehe tsík'etoan chojni ó.*

Mé xikaha ichro itén Dios.

⁸ Ntá jahará kuítóhéra tí nkehe tsík'etoan Dios ntá chréhéra tí nkehe ch'e chojni, a la mé tjonemará nchésen, la ko tí vaso t'iará nkehe, la ko kjaxin í so nkehe yóhe tinkachónkirá —ichro ch'án.

⁹ Kjaxin ntáchro ch'án kixin:

—Jahará chréhéra tí nkehe k'uékjich'e chojni ntá xikaha títóhéra ntáha tí nkehe tsík'etoan Dios.

¹⁰ Tsíntáchro ch'ín Moisés kixin: “Tsochonteherá kjuasáyé it'ará la ko ìnará”, la ko “A ntá tí nkexro t'ántaxínhin it'é o ìné la chrók'óyán sín.”†

¹¹ A ntá jahará ntáchrora kixin ó nchoxon kixin ijnko nkexro tsochénka it'é la ko ìné kixin: “It'éni, Ìnéni, chrokjuahya tsjinkitsani tí jaha kixin kaín tí nkehe chóntani mé k'óna Corbán” (mé t'axrjexín kixin kaín tí chichaon k'uáyéhe Dios).

¹² A ntá xikaha jnkojín nkexro tsontáchro ch'án tíhi ntá jahará tsontáchrora kixin í t'ichjánxinhya tsjinkitsa ch'án tí it'é ch'án la ko tí ìné ch'án.

¹³ A ntá tí xikaha la títóhéra tí nkehe tsík'etoan Dios éxi sínkíhya, a ntá ókjé nkehe ich'erá, ntá tánkíhará chojni. Mé xikaha ich'erá nchónhya nkehe tóyóhe tíha —ichro ch'ín Jesús.

* 7:7 Isaías 29.13 † 7:10 Éxodo 20.12; 21.17

14 Na ntá k'uíyehē ch'ín Jesús tí chojni ínaá ntáchro ch'án kixin:

—Tinhínrá kaín rá tí nkehe ntáxrjan la ko tiénxinrá.

15 Tí nkehe ine chojni la jehya jiē tíha. Tí nkehe t'axrjeníxin asén chojni mé jiē tíha.

16 Tí tjinkáonrá chrókuinhínrá la chrókuinhínrá —ichro ch'án.

17 A ntá tió kuítóhe ch'án kaín tí sín tsíkóchjina a na ntá jehe ch'án la ko tí sín k'uájiko ch'án mé k'uíxenhen sín nchia. Na ntá kjuanchankíhi sín ch'án kixin nkexrí t'axrjexín tí nkehe kjuako ch'án a.

18 Na ntá ntáchro ch'ín Jesús kixin:

—¿Á kjaxinrá tiénxinhyará? ¿Á noahyará kixin tí nkehe ineni na jehya jiē

19 kixin jehya asénni sátsji? Tí nkehe ineni na sátsji nkaya tseeni na ko xik'axrje ínaá —ichro ch'án.

Mé t'axrjexín kixin tí nkehe sineni la jehya jiē.

20 Ntá ntáchro ch'ín Jesús kixin:

—A ntá tí nkehe t'axrjeníxin chojni na mé jiē táha.

21 Nkaya asánrá mé t'axrjeníxin tí jínahya tjenkayáxinrá, la ko tí tjachehe kíchuará, la ko tí tjinkáonrá tsochontará chojni chjin ókjé, la ko tí t'oyán kíchuará

22 la ko tí chrókuđerá, la ko tí tjaké asánrá tí nkehe chóna ókjé sín, la ko tí jínahya ch'ehérá kíchuará, la ko tí kjuach'ia xríkoará la ko tí jínahya tjenkayáxinrá, la ko tí chjinoxínhanrá, la ko tí ch'énará kjuach'ia, la ko tí kjuahnke chontará, na kó tí chontahyará kjuaxrexinkaon jína.

23 Kaín tí nkehe jínahya a mé t'axrjeníxin chojni, la mé tjasixín sín jiē.

*Ijnko tjan tsíkjixín kjín mé kuítekaon tjan tí ch'ín Jesús
(Mt. 15.21-28)*

24 Ntá ch'ín Jesús mé sákjuíxin ch'án ntiha ntá sákjuí ch'án nó chjasin Tiro la ko chjasin Sidón. Ntá k'uíxenhen ch'án injnko nchia kixin tjinkakonhya ch'án kixin chrókónohe chojni kixin ntaha tjen ch'án. Kjánchó xitjahya kjuák'emá ch'án ntiha.

25 Na ntá injnko ìné injnko tjan tjarisoá chóna injnko nchakuen tí jínahya mé kuínhin nkehe tí xra ch'e ch'ín Jesús kixin tjasin ch'án kjuaxroan, ntá tuénxín kui tjan kjuák'exín toch'in tjan chrínkí toté ch'ín Jesús.

26 Na mé jehe tjan tsíkjixín kjín, na mé tsíkjixín tjan nó nación Sirofenicia. Na ntá jehe tjan a mé kui tjan chrónóehē tjan tí ch'ín Jesús kixin chrókuakitsje ch'án tí nchakuen tí jínahya chóna xjeen tjan.

27 Ntá ntáchro ch'ín Jesús kjuátehe ch'án kixin:

—Títóhé senó chrókjóne tí xjan. Jehya tí jína chrókuakítsjaha xjan tí niotja ntá chrótjaha koniā chrókjóne va —ichro ch'án.

28 Ntá jehe tjan kjuátehe tjan ntáchro tjan kixin:

—Chaxín xikaha, Ìnchéni. Kjánchó kjónté tí koniā tjejoyánkí mesa ine tí tot'o niotja tóxènjín tí chánjan —ichro tjan.

29 Na ntá ntáchro ch'ín Jesús kixin:

—Táha la chaxín ntoá ntáchrúa. Sátjia kixin tí nchakuen tí jínahya ó k'uaxrjexín tí xjaan —ichro ch'án.

30 A ntá tió kjuíji tjan ntoe tjan, na ntá k'uíkon tjan kixin tí xjeen tjan na mé ó ntoá tjetsínkaták'á xjan tí cama kixin ó tsík'axrje tí nchakuen tí jínahya a.

Ch'ín Jesús mé kjuínchekitóhe jína injnko ch'ín tienhya la ko nixjahya

31 Ntá ch'ín Jesús mé ó k'uaxrjexín ch'án ínaá nó chjasin Tiro ntá k'uátsínka ch'án chjasin Sidón la ko k'uátsínka ch'án tí estado Decápolis ntá kjuíji ch'án nó ntayaon Galilea.

³² Ntá kuikao sín ijnko ch'ín tienhya na ko ntoáhya nixja ch'án. Ntá chrónóehē sín tí ch'ín Jesús a kixin tsjak'etja tja ch'án chrítaón kja tí ch'ín a kixin tsitohe ch'án jína.

³³ Na ntá ch'ín Jesús k'uaxrjentako ch'án tí ch'ín tienhya, k'uaxrjenta sín tí kohya chojni. Na ntá tí dedo tja ch'án mé chr'áxenhē ch'ín Jesús tatsjon tí ch'ín tienhya. La ko kjaxin tí dedo tja ch'án mé kuikite ch'án ntaté ch'án ntá kjuínchekákóxin ch'án nejen tí ch'ín nixjahya a.

³⁴ Ntá konta ch'án nkajní k'uáváxin ch'án na ntá nixjehē ch'án tí ch'ín tienhya a, ntáchro ch'án kixin:

—Efata —mé t'axrjexín nkívee sín kixin: ¡Tsoxitjehē!

³⁵ Na ntá tuénxín xítjehē tatsjon tí ch'ín tienhya ntá kuínhin ch'án la ko kuitohe jína tí nejen ch'án, ntá jína nixja ch'án.

³⁶ Ntá ch'ín Jesús k'uetōan ch'án kixin ninkexró tsochenkahya sín. Ntá kjónté imá k'uetōan ch'án ntá ántosén sín kjónté íchá xrichronka sín.

³⁷ Na mé imá chrakon sín ntá ntáchro sín kixin:

—Kaín nkehe ch'e ch'án la jína. Tí chojni tienhya la tinhin sín la ko tí chojni nixjahya la nixja sín —ichro sín.

8

Ch'ín Jesús mé kjuanjon nkehe kjóne noó mil chojni (Mt. 15.32-39)

¹ A ntá ijnko yaon nchónhya chojni k'uúxikóchjina ínaá. A ntá chóntahya sín nkehe sine sín. Na ntá ch'ín Jesús mé k'uíyehē ch'án tí sín k'uájiko ch'án, a ntá ntáchro ch'án kixin:

² —Imá tikonóahā kaín tí sín i kixin ó ní yaon tjékian sín ntihi ntá chóntahya sín nkehe sine sín.

³ Ntá chrókuétuanyhya sín sáchrókjui sín ntōe sín tí naxa nehya sín kixin ntia ó chrókótiexin sín kixin iso sín la imá kjín tsíkjaxin sín —ichro ch'ín Jesús.

⁴ Na ntá kjuátehe tí sín k'uájiko ch'án ntáchro sín kixin:

—¿Nkexrí chrókónoxín nchónhya niotja chrókjone kaín tí sín a kixin kohya nchia tí tjejóni? —ichro sín.

⁵ Na ntá ntáchro ch'ín Jesús kixin:

—¿Nkekjaín niotja chontará jahará? —ichro ch'án.

Ntá jehe sín kjuátehe sín ntáchro sín kixin:

—Yato niotja chóntani —ichro sín.

⁶ Na ntá ch'ín Jesús k'uetuēnhen ch'án kaín xín sín kixin ts'ixitjaxin sín nonte. Ntá kuákja ch'án tí yato niotja ntá kjuanchehe ch'án kjuasáyé Dios ntá kóchrít'ō ch'án tí niotja a. Ntá chjéhe ch'án tí sín k'uájiko ch'án kixin jehe sín ts'óxíkayehē sín tsakja kaín xín tí sín siín a.

⁷ Na ko iso koche ntsínsí chóna sín. Ntá ch'ín Jesús kjuanchia ch'án kjuasáya ntá k'uetōan ch'án ts'óxíkayehē sín kjaxin.

⁸ Na mé kaín xín sín kjóne sín na kókjehē sín. Ntá chr'éxin naxa kjuínchekaon sín yatontaxra tí tot'ō tí nkehe tsíxehē.

⁹ Na mé chjina noó mil chojni kjóne sín. Ntá ch'ín Jesús mé nixjehē ch'án sín sákjuí sín

¹⁰ ntá tuénxín jehe ch'án la ko tí sín k'uájiko ch'án na mé k'uit'ótjen sín tí ntabárcō a sákjuí sín nó tí nonte Dalmanuta.

Tí sín fariseo tjanchia sín ijnko kjuaxroan jié (Mt. 16.1-4; Lc. 12.54-56)

11 Na ntá kui iso sín fariseo kjuankíxin sín tjo sín tí ch'ín Jesús kjuanchehe sín ch'án kixin chrókjuakoxin ch'án ijnko kjuaxroan jié kuènte nkaya nkajní kixin tjinkaon sín chrókjuachaxin sín ch'án.

12 A ntá ch'ín Jesús na mé k'uáváxin ch'án ikjín kjanxin asén ch'án ntá ntáchro ch'án kixin:

—¿Nkekuènté kixin tí chojni i na mé tjanchia sín ijnko kjuaxroan jié? Ijie la ninkehó kjuaxroan tsjákoxinhya —ichro ch'án.

13 Na ntá kuítóhe ch'án tí sín a, ntá xík'it'ótjen ch'án tí ntabárcō ntá sákjuí ch'án í jnko tóhe ntayaon ínaá.

*Tí xroan nchek'ánkí tí niotjé tí sín fariseo
(Mt. 16.5-12)*

14 Ntá k'uitjáyenhen sín tsíkjikohya sín nkehe sine sín. Jehó jnkokoá niotja chóna sín nkaxenhen tí ntabárcō a.

15 Ntá ch'ín Jesús k'uetuēnhen ch'án tí jehe sín kixin:

—Chrókóxakonhanrá kixin tí xroan nchek'ánkí niotjé tí sín fariseo la ko niotjé tí ch'ín Herodes a —ichro ch'án.

16 Ntá tí sín xriko ch'án mé kjo sín kíchó sín kixin:

—Mé xíkaha ichro ch'án kixin tsíkjikohyani niotja.

17 Ntá kónohe ch'ín Jesús kixin nkehe tí kjo sín kíchó sín ntá ntáchro ch'án kixin:

—¿Nkekuènté tjórá kixin chontahyará niotja? ¿Á naxa tiénxinhyará la ko naxa noahyará? ¿Á kénhya asánrá tinkachónkirá Dios?

18 ¿Á t'ikonxinhyará ikonrá la ko á tiénxinhyará tátsjinrá? ¿Á xráxinkákonhyará?

19 Tió kóchrít'va tí n'ó niotja kjóne in'ó mil chojni na ¿nkekjaín ntaxra tí tot'o niotja naxa kjuenájjinrá? —ichro ch'án.

Ntá jehe sín kjuátehe sín ntáchro sín kixin:

—Teyó ntaxra tí nkehe kjuenájinni —ichro sín.

20 Xíntáchro ch'ín Jesús ínaá kixin:

—Na ko tí kóchrít'va tí yato niotja kjóne noó mil chojni na ¿nkekjaín ntaxra tí tot'o niotja kjuenájjinrá? —ichro ch'ín Jesús.

Ntá ntáchro sín kixin:

—Yato ntaxra —ichro sín.

21 Ntá ch'ín Jesús ntáchro ch'án kixin:

—Kjónté xíkaha la, ¿á naxa tiénxinhyará? —ichro ch'án.

Ch'ín Jesús mé kjuínchekitōhe jína ijnko ch'ín t'ikonhya tí chjasin Betsaida

22 A ntá chr'éxin kjuíji sín chjasin Betsaida, a ntá ikui iso sín kuikao ijnko ch'ín t'ikonhya. Ntá chrónóhehe sín tí ch'ín Jesús kixin chrókjuinchekitōhe ch'án jína tí ch'ín a.

23 Ntá ch'ín Jesús mé itsé ch'án tja tí ch'ín t'ikonhya a ntá k'uaxrjentako ch'án ikon tí chjasin a. Na ntá kuikitehe ch'án ntaté ch'án ikon tí ch'ín t'ikonhya a la ko kjuak'etja tja ch'án ntá kjuanchankíhi ch'án kixin:

—¿Á ó t'ikuan ntsí? —ichro ch'án.

24 Ntá ntáchro tí ch'ín t'ikonhya kixin:

—T'ikonni chojni, kjánchó éxí nta tsjehe itji —ichro ch'án.

25 Ntá ch'ín Jesús mé xíkjak'etja tja ch'án ínaá tí kon tí ch'ín t'ikonhya a. A ntá tí ch'ín k'uíkonhya kuítóhe ch'án jína la jína t'ikon ch'án kaín nkehe.

26 Na ntá ch'ín Jesús mé k'uetuēnhen ch'án tí ch'ín k'uék'ikonhya kixin sátsji ch'án ntōe ch'án ntáchro ch'án kixin:

—Chrók'uixenhya chjasin la ko ninkexró chróchenkahya ntiha —ichro ch'án.

*Ch'ín Pedro chrónka ch'án kixin ch'ín Jesús mé tí nkexro Cristo
(Mt. 16.13-20; Lc. 9.18-21)*

²⁷ A ntá tí ch'ín Jesús la ko tí sín k'uájiko ch'án sákjuí sín tí chjasin ntsí chjino Cesarea de Filipo. A ntá tí ntia mé kjuanchankíhi ch'ín Jesús tí sín k'uájiko ch'án kixin:

—¿Nkehe ntáchro chojni kixin nkexro tí janhan? —ichro ch'án.

²⁸ Ntá ntáchro sín kixin:

—Iso sín mé ntáchro sín kixin jaha mé ch'ín Juan Bautista, ichro sín. A ntá í so sín na mé ntáchro sín kixin jaha mé ch'ín Elías, ichro sín. A ntá í so sín mé ntáchro sín kixin jaha mé ijnko tí sín tsíchrónka itén Dios ósé —ichro sín.

²⁹ Ntá kjuanchankíhi ch'án sín inaá kixin:

—¿A ntá jahará nkechorá kixin nkexro tí janhan? —ichro ch'án.

Ntá kjuátehe ch'ín Pedro ntáchro ch'án kixin:

—Jaha mé tí Cristo, ichroni —mé chro ch'án.

³⁰ Ntá k'ueṭoan ch'ín Jesús kixin tsochenkahya sín ninkexró.

*Ch'ín Jesús chrónka ch'án kixin ts'en ch'án
(Mt. 16.21-28; Lc. 9.22-27)*

³¹ Na ntá kjuankixin kjuako ch'ín Jesús kixin tí Xjeen Dios K'óna Chojni mé t'ichjánxin kixin imá tsjasóte ch'án la ko tsoṭjinkakonhya kaín tí sín táda kuènte nínko la ko tí sín t'etṭoan kuènte tí sín nchaṭ'á la ko tí sín maestro tjako tí ley. A ntá tí sín a mé ts'óyán sín ch'án. Kjánchó tí nixin yaon na ó tsoxechón ch'án inaá.

³² Kaín tíha mé ntoá chrónka ch'án. A ntá ch'ín Pedro mé kuakitsjenta ch'án tí ch'ín Jesús chrókjuentuéhe ch'án.

³³ Na ntá kuinkátjía ch'ín Jesús komá ch'án kaín tí sín k'uájiko ch'án a. Ntá kjuentuéhe ch'án tí ch'ín Pedro a ntáchro ch'án kixin:

—¿Sátjia ntáha, Satanás! Jaha la tjenkayáxinhya éxí tjenkayáxin Dios. Náhi. Jaha tjenkayáxian éxí tjenkayáxin chojni ó —ichro ch'án.

³⁴ Ntá ch'ín Jesús mé k'uíyehē ch'án tí sín k'uájiko ch'án la ko tí sín tsíkóchjina a. Ntá ntáchro ch'án kixin:

—Tí jnkójínrá tjínkáonrá tsochréhérá tí janhan na t'ichjánxin tsitohérá kaín tí nkehe tjaké asanrá na ntá tsamará tí ntacruz kuèntará, a ntá tsochréhérá tí janhan.

³⁵ A ntá tí nkexro tjinkaon jehó sinchekaá asén mé ts'itjáyan. A ntá tí nkexro sinchek'itjáyanxín asén kixin tinkáchónki tí janhan la ko chrónkaxín tí tan tsjanjon kjuachón mé tsaá.

³⁶ ¿A ntá nkehe tsonhen tí chrókjuacha ijnko chojni chróchóna kaín nkehe síin chjasintajni, a ntá kjuachón chrókjuinchek'itjáyan?

³⁷ ¿Nkehe chrókjuenka chojni kixin chróchóna tí kjuachón?

³⁸ A ntá jnkójín nkexro tsosuèhē kixin tinkáchónki tí janhan la ko tí tan kuèntana nkayakon tí chojni jínahya chóna jie la kjaxin tí Xjeen Dios K'óna Chojni tsosuèhē ch'án tsonáchro ch'án kixin chóxin ch'án tí jehe sín tió tsokjan ch'án tsíkao ch'án tí kjuachaxin jie kuènte It'é la ko tsíkao tí sín ángel.

9

¹ Na ko kjaxin chrónka ch'ín Jesús kixin:

—Chaxín ntáxrjan kixin isorá tjejorá ntihi la naṭa ts'énhyará ts'ikonjjará itsi tí kjuachaxin ts'etṭoan Dios —ichro ch'án.

*Ch'ín Jesús mé k'uíxitoxin nkexrí tsjehe ch'án
(Mt. 17.1-13; Lc. 9.28-36)*

² Ntá k'uátsínka injon yaon ntá ch'ín Jesús mé sákjuiko ch'án ch'ín Pedro la ko ch'ín Jacobo la ko ch'ín Juan sákjui sín jehó sín ijnko jna noi. Ntá ntiha mé xríñahya k'uixitoxin ókjé nkexrí tsjehe ch'án k'uikon tí jehe sín.

³ A ntá iké ch'án tsík'óna imá tjákiní la ko imá tjóá éxí chrinta tsjehe, a ntá ntihi chjasintajni kohya ninkexró chrókjuen tí ka chrókuitohe imá tjóá xíkaha.

⁴ Na ntá titàya k'uikuèn sín ntiha itjen tí ch'ín Elías la ko tí ch'ín Moisés tjejóto sín tí ch'ín Jesús.

⁵ A ntá ch'ín Pedro mé ntáche ch'án tí ch'ín Jesús kixin:

—Maestro, jína kixin tjejóni ntihi. Chrókjuich'énani iní nchia la mé ijnko kuéntá la ko ijnko kuènte ch'ín Moisés la ko ijnko kuènte ch'ín Elías.

⁶ Mé xíkaha ichro ch'án kixin kaín sín la imá chrakon sín la tí ch'ín Pedro la mé í noehya ch'án nkehe tsixro ch'án.

⁷ Na ntá xríñahya ikui ijnko tjuí kjuák'etja chrítaón kaín sín tí tjejó sín. Na ntá chríkjan tí tjuí kuínhin sín itén ijnko nkexro nixja na mé ntáchro kixin:

—Tí nkexro í mé xjanna. Imá tjuahá ch'án. Chrókuinhírá tí nkehe tjako ch'án.

⁸ Na ntá tió tsjehe sín nkuixín tí tjejó sín la í kohya tí iyó sín a. Jehó tí ch'ín Jesús tjejóko sín.

⁹ A ntá tí ó k'uínkajinxin sín tí jna ntá k'uetóan ch'ín Jesús kixin tsochenkahya sín ninkexró tí nkehe k'uikon sín hasta tsoxechónjian tí Xjeen Dios K'óna Chojni.

¹⁰ Ntá ninkexró chenkahya sín tí nkehe k'uikon sín. Na ntá jehó sín mé tjejóto sín kixin nkehe t'axrjexín tí nkehe chrónka ch'án kixin tsoxechón ch'án inaá.

¹¹ Na ntá kjuanchankíhi sín tí ch'ín Jesús ntáchro sín kixin:

—¿Nkekuènte kixin ntáchro tí sín tjako tí ley kixin saoxín itsi tí ch'ín Elías la ntá chr'éxin itsi tí nkexro tsaáxinni? —ichro sín.

¹² Ntá ntáchro ch'ín Jesús kixin:

—Chaxín saoxín itsi ch'ín Elías la ntá tsjasiyóxin ch'án kaín sín nkehe. ¿A ntá nkehe ntáchro xroon itén Dios kixin nkehe tsonhen tí Xjeen Dios K'óna Chojni? Na mé ntáchro kixin t'ichjánxin tsjasóte la ko tsotjinkakonhya sín.

¹³ Kjánchó ó xrjanka kixin chaxín ó tsíki ch'ín Elías, ntá kjuínchekjasóte sín ch'án éxí kóxrjínhin sín éxí nixja tí xroon itén Dios kixin xíkaha tsonhen —mé xíkaha chrónka ch'ín Jesús.

Ch'ín Jesús mé kjuínchekitohe jína ijnko xjan chóna ijnko nchakuen tí jínahya (Mt. 17.14-21; Lc. 9.37-43)

¹⁴ A ntá tió ikjan sín tí kuítóhe tí í so sín k'uájiko ch'án ntá k'uikon sín kixin nchónhya chojni tsík'antatjen tí jehe sín. Kjaxin ntaha síin tí sín tjako tí ley ikjo tí jehe sín.

¹⁵ A ntá tuénxín tió k'uikon sín tí ch'ín Jesús na ntá kaín sín kóchéhe sín tinká sín sákjuíchréhe sín ch'án, tsonixjehe sín ch'án.

¹⁶ Ntá ch'ín Jesús kjuanchankíhi ch'án sín ntáchro ch'án kixin:

—¿Nkehe tí tjóra tí sín í? —ichro ch'án.

¹⁷ Ntá tjen ijnko ch'án tjenkákjan sín ntiha kjuátehe ch'án kixin:

—Maestro, ntihi kjuíkian ijnko xjanna chóna nchakuen tí jínahya na mé nchenixjahya xjan.

¹⁸ Kjónté nkerí tjen xjan la tí nchakuen tí jínahya mé tjáka xjan nonte, ntá ntáloxrjo sítxin ir'va xjan na netaón xjan neno xjan na méxra tjeheya xjan. Ntá xrjanóahá tí sín xrikoa kixin chrókuakitsje sín tí nchakuen tí jínahya a. Kjánchó kjuachahya sín —ichro ch'án.

¹⁹ Ntá ch'ín Jesús kjuátehe ch'án ntáchro ch'án kixin:

—Jahará chojni kénhya asánrá tinkachónkirá Dios. ¿Xá hasta nkesá tjinkáonrá naxa ts'ejóni? ¿Xá hasta nkesá tsjácha tsjak'é tsjákohará? Xrákōarā ntihi tí xjan méhe —ichro ch'án.

²⁰ Na ntá kóchjinako sín tí xjan a. Na ntá tí nchakuen tí jínahya mé k'uíkon tí ch'ín Jesús ntá kjuínchek'aniáte tí xjan a kjuítsínka xjan nonte la kjaminkítaón xjan nonte la sítji ntalóxrjo ir'va xjan.

²¹ Ntá ch'ín Jesús mé kjuanchankíhi tí it'é tí xjan a ntáchro ch'án kixin:

—¿Á ósé xikaha tónhen xjan? —ichro ch'án.

Ntá ntáchro tí it'é tí xjan kixin:

—Desde naxa xjanntsí xjan.

²² A ntá jnkoyaxón tí nchakuen tí jínahya a mé tjákáte xjan xrohi la ko tjákánkí xjan ìntā kixin tjinkaon chrók'óyán tí xjan a. A ntá jaha ¿á tsjácha tsjínkítsani? La tikonóehéni tsjínkítsani —ichro ch'án.

²³ Ntá ntáchro ch'ín Jesús kixin:

—¿Nkekuènté tjanchankina kixin á tsjácha? Tí tsitekávan la kaín nkehe la jína tsonhen, kixin tí nkexro tsitekaon Dios la jína tsonhen kaín nkehe —ichro ch'án.

²⁴ Ntá tuénxín itsen kjuátehe tí it'é xjan, ntáchro ch'án kixin:

—Ó titekaonni. Tsjínkítsani kixin antsí má tsitekaonni tí jaha —ichro ch'án.

²⁵ Ntá k'uíkon ch'ín Jesús kixin itsjé chojni kóchjina. Ntá nixjehe ch'án tí nchakuen tí jínahya chóna tí xjan a ntáchro ch'án kixin:

—Jaha la ijnko nchakuen tí jínahya nchenixjahya chojni la ko nchekiénhya chojni. Ijie la tétuanhan kixin t'axrjéxian tí xjan na ko tsitohé xjan la í tsokjanhya ínaá —ichro ch'án.

²⁶ Ntá tí nchakuen tí jínahya a na mé k'óyato la ko kjuínchek'aniáte tí xjan a ínaá, ntá k'uaxrjéxín ntiha. Na éxí tsík'en xjan xikaha tsjehe xjan. Ntá itsjé sín ntáchro sín kixin ó tsíkjixin tsík'en xjan, ichro sín.

²⁷ Na ntá ch'ín Jesús mé tséhe tja tí xjan kjuínchek'inkatjen ch'án xjan.

²⁸ Ntá ch'ín Jesús la ko tí sín k'uájiko ch'án k'uíxenhén sín ijnko nchia. Ntá jehe sín kjuanchankíhi sín ch'án kixin:

—¿Nkekuènté kixin kjuachahyani kuakitsjeni tí nchakuen tí jínahya a? —ichro sín.

²⁹ Ntá ntáchro ch'án kixin:

—Tíhi la t'ichjánxín kixin nchónhya tsochronóehérá T'aná la ko sintehyará —ichro ch'án.

Yóxin chrónka ch'ín Jesús kixin its'en ch'án

(Mt. 17.22-23; Lc. 9.43-45)

³⁰ A ntá tió sákjuíxin sín ntiha ntá k'uátsínka sín estado Galilea. A ntá ch'ín Jesús tjinkakonhya ch'án kixin ninkexró ntiha tsonohe sín

³¹ kixin tinkákjakohé ch'án tí sín k'uájiko ch'án a. Na mé chrónka ch'án ntáchro ch'án kixin:

—Tí Xjeen Dios K'óna Chojni mé tsotsé sín ch'án la ko tsjikaán sín ch'án na ko ts'óyán sín ch'án. Kjánchó tí yaon nixin na ó tsoxechón ch'án ínaá —ichro ch'án.

³² Ntá jehe sín mé kíenxínhya sín nkehe tí ntáchro ch'án la chrakon sín chrókjuanchankíhi sín ch'án nkexrí t'axrjéxín tíha.

¿Nkexro tí imá tjetooan?

(Mt. 18.1-5; Lc. 9.46-48)

³³ Ntá kjuíji sín chjasin Capernaum; a ntá tí tjejó sín tí nchia ntiha ntá ch'ín Jesús mé kjuanchankíhi ch'án sín ntáchro ch'án kixin:

—¿Nkehe tí tinkakjórá kíchuará tí kuini ntia? —ichro ch'án.

³⁴ Ntá jehe sín la táníkoá sín kixin tí ntja kui sín tinkákjo kichó sín kixin nkexro tí imá ts'etōan.

³⁵ Ntá ch'ín Jesús mé kjuák'etjāxīn ch'án ntá k'uíyēhē ch'án tí teyó sín k'uájiko ch'án, a ntá ntáche ch'án sín kixin:

—Tí jnkójínrá tjinkáonrá chrókuétōanrá má ntá t'ichjānxīn kixin tsjixixīn tsochréhérá kaín sín, ts'ítuanhanrá la ko tsjínkītsará kaín sín sín —ichro ch'án.

³⁶ Ntá tséhe ch'án tja ijnko chánjan kjuak'e ch'án jnkōsiné tí tjejó tí jehe sín a, ntá kjóa ch'án tí xjan a. Ntá ntáchro ch'án kixin:

³⁷ —Tí jnkójín nkexro chrók'uáyéhe ijnko chánjan kixin tinkáchónki sín tí janhan la mé xīkaha chrók'uáyéhe sín tí janhan la ko kjāxīn éxí chrók'uáyéhe sín tí nkexro ichr'ánna —ichro ch'án.

Tí nkexro nínkakuenhyani tí jeheni la tjinkītsa tí jeheni

(Lc. 9.49-50; Mt. 10.42)

³⁸ A ntá ch'ín Juan mé ntáchro ch'án kixin:

—Maestro, k'uíkōnni ijnko chojni na mé kjuachaxin ihniá mé takitsjexīn ch'án nchākuen tí jínahya chóna chojni. Ntá k'uetuēnhenni ch'án kixin xīkahya chrókjuich'e ch'án kixin xrikohyani ch'án —ichro ch'án.

³⁹ Ntá ntáchro ch'ín Jesús kixin:

—Nté tītōhé ch'án kixin ninkexró tjasixīn kjuaxroan kjuachaxin njina la tuénxīn chrókjuacha chrók'uántaxīna sín.

⁴⁰ Tí nkexro nínkakuenhyani la mé tjinkītsa tí jeheni.

⁴¹ A ntá jnkójín nkexro tsotjáhará kjónté ijnko vaso ìntā tsjanjonxīn sín njina kixin jahará la tinkáchónkirá Cristo, ntáxrjan kixin chaxīn ts'áyéhe sín nkehe.

Tí chojni tjasin jie mé tsjasóte sín

(Mt. 18.6-9; Lc. 17.1-2)

⁴² A ntá jnkójín nkexro chrókjuachroe ijnko xjan kixin chrókjuasin xjan jie tío tinkáchónki xjan tí janhan la íchá jína chrókjuincheteyá sín ch'án ijnko xro jie tsík'óna xrochre la chrókjuikákánkí sín ch'án ntāyaon.

⁴³ A ntá tí itjā tjasixián jie na mé íchá chrókójína chrókochrínjian kixin kjónté jnkokoá tjá mé tsochontaxián kjuachón. A ntá tí yóí tjá la tíha mé sáchrókjuíxian tí siín xrohi xitjahya ts'anka,

⁴⁴ tí siín kosīntō t'enhya la ko síche xrohi ts'ankahya.

⁴⁵ A ntá kjāxīn tí totá tjasixián jie na íchá jína chrókochrínjian kixin kjónté jnkokoá totá mé tsochontaxián kjuachón. A ntá tí yóí totá la tíha sáchrókjuíxian tí siín xrohi xitjahya ts'anka,

⁴⁶ tí siín kosīntō t'enhya la ko síche xrohi ts'ankahya.

⁴⁷ A ntá tí ikuan tjasixián jie na íchá jína chrókuakitsjenkiá tí kuan a kixin kjónté jnkokoá kuan mé sáchrókjuia tí tjen Dios t'etōan. A ntá tí yóí kuan la tíha mé sáchrókjuíxian tí síche xrohi

⁴⁸ tí siín kosīntō t'enhya la ko siín xrohi ts'ankahya.

⁴⁹ A ntá kaín nkexro t'ichjānxīn tsjasóte. A ntá kaín nkehe ts'áyéhe Dios chóna xjīnta.

⁵⁰ Tí xjīnta la jína. A ntá tí chrók'uankehe tí jní la ntá xitjahya chrókójní ínaá. Jahará mé chrókóyóhárá éxí xjīnta kixin kjuaxróxin chrók'uejokoárá kíchuárá —ichro ch'án.

10

Tjako ch'ín Jesús kixin chrókjuákēhya kichó sín

(Mt. 19.1-12; Lc. 16.18)

¹ Na ntá ch'ín Jesús mé k'uaxrjexín ch'án chjasin Capernaum sákjuí ch'án nó estado Judea la ko nó tóhe ntarío Jordán. Ntá nchónhya chojni kójnkotsé sín tí tjen ch'án ntiha. Ntá kjuakohē ch'án tí jehe sín kixin xikaha kuènnen ch'án.

² Ntá iso sín fariseo mé kóchjinehe sín ch'án kjuanchankíhi sín ch'án nkehe, chrókjuachaxín sín ch'án. Ntáchro sín kixin:

—¿Á siín kjuachaxin tsjákehē chojni ntoa ichjién? —ichro sín.

³ Ntá kjuátēhe ch'án ntáchro ch'án kixin:

—¿Nkehe tí k'uetuanhanrá tí ch'ín Moisés? —ichro ch'án.

⁴ Ntá ntáchro sín kixin:

—Ch'ín Moisés kjuanjon ch'án kjuachaxin kixin ts'óna ijnko xroon tsakja tí ichjién kixin ts'itjéxín kichó sín —ichro sín.

⁵ Ntá ch'ín Jesús ntáchro ch'án kixin:

—Ntá jahará icha asánrá titekákonhyará ntá k'uetōan ch'án ts'óna tí xroon a.

⁶ Kjánchó tí xrankixín tió kjuích'éna Dios kaín xín nkehe la kjuích'éna ch'án ijnko chojni ntoa la ko ijnko chojni chjin.*

⁷ Méxra tí chojni ntoa tsítóhe ch'án tí it'é ch'án la ko iné ch'án kixin tsakja ch'án ichjién ch'án

⁸ ntá yóí sín ts'óna sín éxí jnkokoá chojni. Méxra jehya yaá chojni. Náhí, jnkokoá.†

⁹ Na mé xikaha tí kjuachaxin kuènte Dios kójnkójiéxín sín ntá jehe sín chrók'uitjéhya kichó sín —ichro ch'án.

¹⁰ A ntá tjejó sín nchia ntá tí sín k'uájiko ch'án a mé kjuanchankíhi sín ch'án inaá kixin á xitjahya ts'itjíhi kichó sín.

¹¹ Na ntá ntáchro ch'ín Jesús kixin:

—Tí jnkojín nkexro tsjákehē ichjién ntá tsakja ch'án í jnko chjin na mé xikaha tsjachehē ch'án tí tjan tsíkótehe ch'án saoxín.

¹² La ko kjaxin tí chojni chjin tsíkjákehē xii tsakja tjan í jnko chojni ntoa na mé xikaha kjaxin tjan tjasin tjan jie —ichro ch'án.

Ch'ín Jesús kjuíncheyaon ch'án xjan

(Mt. 19.13-15; Lc. 18.15-17)

¹³ Ntá kjuíkao sín xjan kixin tjinkaon sín tsjak'etja tja ch'ín Jesús tí xjan a. Ntá tí sín k'uájiko ch'án mé kóninkakonhen sín tí sin kjuíkao xjan.

¹⁴ Ntá k'uíkon ch'ín Jesús ntá kónínkaon ch'án ntáchro ch'án kixin:

—Nté títóhérá tí xjan tsoxrakoa tí tjén janhan la t'inkakuènhyará xjan kixin tí sín kuènte kjuachaxin kuènte Dios la mé tóyóhe éxí tí xjan a.

¹⁵ Ntá chaxín ntáxrjan kixin tí nkexro ts'ónahya éxí ijnko chánjan xitjaha ts'ejó sín tí ts'etōan Dios tí kjuachaxin kuènte ch'án —ichro ch'án.

¹⁶ Ntá kjóa ch'án tí xjan a kjuak'etja tja ch'án xjan la kjuíncheyaon ch'án.

Ijnko ch'ín ntasoá rico nixjehē ch'án tí ch'ín Jesús

(Mt. 19.16-30; Lc. 18.18-30)

¹⁷ A ntá tió sákjuí ch'ín Jesús inaá ntá xrakoa ijnko ch'ín tinká ch'án kjuák'exín toch'in ch'án nkayakon tí ch'ín Jesús kjuanchankí ch'án kixin:

—Jaha, maestro jína. ¿Nkexrí chrókjuich'eni kixin chrók'uitjani kjuachón jnkochrín? —ichro ch'án.

¹⁸ Ntá ntáche ch'ín Jesús tí jehe ch'án kixin:

—¿Nkekuènté ntáchrúa kixin jína tí janhan? Jehó jnkokoá nkexro mé jína la tíha mé Dios.

* **10:6** Génesis 1.27; 5.2 † **10:8** Génesis 2.24

19 Ntá jaha ó noha kixin nkexrí k'uetōan Dios kixin: “Chrókjuacheéhya kichuá la chrók'oyánhya chojni la chrókueehya la chrókjóntahya kichuá la chrókuich'iahya la ko chróchontehé kjuasáya it'á la ko ìná”‡ —ichro ch'án.

20 A ntá jehe ch'án kjuátehe ch'án ntáchro ch'án kixin:

—Maestro, kaín tíha kjuínchexiteyáni desde ntasoáni —ichro ch'án.

21 Ntá ch'ín Jesús mé komá ch'án la ko tjuèhe ch'án tí ch'ín a. Ntá ntáchro ch'án kixin:

—Naxa t'itjáyan jnkokoá nkehe chrókuich'e. Sátjia nchekjia kaín tí nkehe chonta. A ntá tí chichaon sinchekjixián tí nkehe chonta la mé nchekitonhén tí chojni nò, a ntá tí nkehe tjete tsochonta nkaya nkajní. A ntá tió tsjixin tsjánjuan kaín ntá tsjihá tamá tí ntacruz kuènta la chréhé tí janhan —ichro ch'án.

22 Ntá tió kuínhin ch'án xikaha ntá k'uává ch'án sákjuí ch'án, kixin imá tsjé nkehe chóna ch'án.

23 Ntá ch'ín Jesús komá ch'án tí sín siín ntiha ntáche ch'án tí sín siín k'uájiko ch'án kixin:

—Imá xra ijnko chojni chóna imá tsjé nkehe ts'ixenhen sín tí tjen Dios t'etoan —ichro ch'án.

24 Ntá tóxakonhen tí sín k'uájiko ch'án kixin xikaha ntáchro ch'án. Ntá chrónka ch'án inaá kixin:

—Tí sín tjekonhen tí nkehe chóna sín na imá xra ts'ixenhen sín tí tjen Dios t'etoan.

25 Antsí xrahya chrók'uátsínka ijnko kocamello ijnko tjar'in ntachica tjexrja. A ntá antsí má xra ijnko ch'ín chóna itsjé nkehe chrók'uixenhen ch'án tí tjen Dios t'etoan —ichro ch'án.

26 Ntá jehe sín kuínhin sín xikaha ntá imá chrakon sín. Ntá tjanchankíhi kichó sín kixin:

—Tí xikaha la, ¿xá nkexro chrókjuacha chrókuaá? —ichro sín.

27 Ntá komá ch'ín Jesús tí jehe sín ntáchro ch'án kixin:

—A ntá chojni ó tsjachahya sich'e tíha, a ntá Dios jína sich'e kaín nkehe, kixin Dios la kohya nkehe tsjachahya sich'e —ichro ch'án.

28 Ntá ch'ín Pedro ntáchro ch'án kixin:

—Inchéni, kaín ni mé kuítóheni kaín nkehe chóntani ntá chréheni tí jaha —ichro ch'án.

29 Ntá kjuátehe ch'ín Jesús ntáchro ch'ín kixin:

—Chaxín ntáxrjan kixin jnkójín nkexro tsítóhe ntoe sín la o tí kichó nto a o tí kichó chjin la o it'é o ìné sín o ichjién sín o xjeen sín o nontee kixin tinkáchónki sín tí janhan la ko tjinkaon sín chrókjuako sín tí tan tsjanjon kjuachón

30 na mé ntihi chjasintajni tsochóna sín ciento veces nchónhya ntoe sín la ko éxí kichó sín la ko éxí ìné sín la ko éxí xjeen sín ts'ikon sín itsjé chojni kjé la ko éxí nontee sín xikaha ts'ikon sín itsjé nonte. Kjónté tsjasóte sín ntihi chjasintajni ntá chr'éxin tsochóna sín tí kjuachón jnkochrín.

31 A ntá itsjé tí sín t'etoan ijie mé tsjixixín tsochréhe sín. A ntá itsjé tí sín t'ítuenhen ijie, na mé tí sín a mé ts'etoan sín tí ntiha.

Nixin chronka ch'ín Jesús kixin its'en ch'án

(Mt. 20.17-19; Lc. 18.31-34)

32 Ntá tjejótti sín chrín sín tí ntia sátsji chjasin Jerusalén. Ntá ch'ín Jesús mé tjetaón ch'án ntia ntá tí sín k'uájiko ch'án mé tóxakonhen sín chrakon sín chréhe sín. Ntá k'uíyehe ch'án jehó tí teyó sín inaá ntá kjuankixin ch'án chénka ch'án sín nkexrí tí nkehe tsonhen ch'án.

33 Ntá ntáchro ch'án kixin:

‡ 10:19 Éxodo 20.12-16; Deuteronomío 5.16-20

—Ijie sátsjini Jerusalén. Na ntá tí Xjeen Dios K'óna Chojni mé tsotsé sín ch'án tsjikénhen sín tí sín nch'at'á t'etoan la ko tí sín tjako tí ley. Ntá ts'etoan sín kixin its'en ch'án. Ntá sinchek'áyéhe sín ch'án tí sín jehya judío.

³⁴ Ntá jehe sín la tsjanoá sín tí jehe ch'án la ko ntaté sín tsikite sín ch'án la ko tsjate sín ch'án ntá ts'óyán sín ch'án. Kjánchó tí yaon nixin mé tsoxechón ch'án inaá —mé xikaha ichro ch'ín Jesús.

*Ch'ín Jacobo la ko ch'ín Juan tjanchia sín nkehe
(Mt. 20.20-28)*

³⁵ A ntá tí ch'ín Jacobo la ko ch'ín Juan mé xjeen ch'ín Zebedeo mé kóchjinehe sín tí ch'ín Jesús ntá ntáchro sín kixin:

—Maestro, tjanchahani ijnko xra —ichro sín.

³⁶ Ntá kjuanchankí ch'ín Jesús ntáchro ch'án kixin:

—¿Nkehe tí xra tjinkáonrá chrókjuít'ahará? —ichro ch'án.

³⁷ Ntá ntáchro sín kixin:

—Tió tsétoanxián tí kjuachaxián jié na tjinkaonni kixin ijnkonni chrókjuak'eni itjá chjina a í jnkonni chrókjuak'eni itjá kjon —ichro sín.

³⁸ Ntá ntáche ch'ín Jesús tí jehe sín kixin:

—Jahará la noahyará nkehe tí tjanchanará. ¿Á chrókjuachará chrók'uirá tí nkehe itsjá its'ia janhan la ko á chrókjuachará chrókuikiterá éxí tsikite janhan? —ichro ch'án.

³⁹ Ntá jehe sín kjuátehe sín ntáchro sín kixin:

—Kja tsjachani —ichro sín.

Ntá ntáche ch'ín Jesús tí jehe sín kixin:

—Chaxín its'irá éxí tí nkehe tsjá its'ia la ko tsikiterá éxí tsikite janhan.

⁴⁰ Kjánchó janhan xitjahya tsjánjuan kjuachaxin kixin ijnkorá chrókjuak'erá tjaná chjina la í jnkorá chrókjuak'erá tjaná kjon kixin janhan na tónahya tocar tsjánjuan tíha kixin tí sín a la xráxín ó tsíkónoxín —ichro ch'án.

⁴¹ A ntá tió kuínhin tí ite sín xikaha tsintáchro tí sín a ntá kjuankixin kóninkakonhen sín tí ch'ín Jacobo la ko tí ch'ín Juan.

⁴² Ntá k'uíyehé ch'ín Jesús kaín tí jehe sín ntá ntáche ch'án sín kixin:

—Ó nohará kixin tí sín t'etoan chjasintajni la imá t'etuénhen sín kaín chojni la ko tí sín imá tjettoan mé imá nchehnkehe asén sín kixin ihyé sín ts'etoan sín.

⁴³ Kjánchó jahará la xikahya chrókjuich'erá. Náhi. Tí jnkójínrá tjinkáonrá chrókuétóanrá la chrókjuínkítsará tí í so sín.

⁴⁴ A ntá tió jnkójínrá antsí chrókuétóanrá mé t'ichjánxin senó chrókjuákoxínrá chrókjuich'eherá kichuárá xra.

⁴⁵ Kixin tí Xjeen Dios K'óna Chojni mé kuihya ch'án kixin chojni chrókjuich'ehe ch'án xra. Náhi. Ikui ch'án kixin sich'ehe ch'án sín xra la ko ts'enyákonhen nchónhya chojni kixin tsaáxin sín ch'án —ichro ch'án.

*Ch'ín Bartimeo k'uék'ikonhya ch'án ntá ch'ín Jesús kjuínchekitohe ch'án jina
(Mt. 20.29-34; Lc. 18.35-43)*

⁴⁶ Ntá kjuíji sín chjasin Jericó. Ntá ch'ín Jesús la ko tí sín k'uájiko ch'án la ko nchónhya chojni k'uaxrjexín sín tí chjasin ntiha. Ntá ntiha tjen ijnko ch'ín t'ikonhya mé it'in ch'án Bartimeo ntá it'é ch'án mé it'in Timeo. Tjetjaxin ch'án chrínta ntja tjanchak'á ch'án.

⁴⁷ Ntá kuínhin tí ch'ín t'ikonhya kixin ó kuichjina ch'ín Jesús, mé tí nkexro kjuixin chjasin Nazaret, ntá tí ch'ín t'ikonhya kjuankixin t'èya ch'án ntáchro ch'án kixin:

—Jaha Jesús, tsík'axrjeníxian ch'ín David tikonóehéni —ichro ch'án.

⁴⁸ Ntá nchónhya sín k'uetuénhen sín ch'án kixin tsotání ch'án. Ntá íchá antsí má tsen t'èya ch'án ntáchro ch'án kixin:

—Jaha, tsík'axrjeníxian ch'ín David tikonóehéni —ichro ch'án.

⁴⁹ Ntá ntahó kjuák'e ch'ín Jesús. Ntá k'uetōan ch'án kixin:

—T'iyehérá tí ch'ín a —ichro ch'án.

Ntá k'uíyehé sín tí ch'ín t'ikonhya ntá chénka sín ch'án kixin:

—Tócháha la t'inkatjen kixin tjet'iyaha ch'án. —ichro sín.

⁵⁰ Ntá kjuak'e ch'án tí ka titsáte ch'án ntá chrika k'uínkatjen ch'án kóchjinehe ch'án tí tjen ch'ín Jesús.

⁵¹ Ntá ch'ín Jesús kjuanchankíhi ch'án tí ch'ín a kixin:

—¿Xá nkehe tjinkávan chrókjuít'ahá? —ichro ch'án.

Ntá kjuátehe tí ch'ín t'ikonhya ntá chro ch'án kixin:

—Maestro, tjinkaonni kixin chrók'uikonni —ichro ch'án.

⁵² Ntá ntáche ch'ín Jesús tí ch'ín a kixin:

—Ijie la jína sátsjia. Ó kuítóha jína kixin kuítekávan tí janhan —ichro ch'án.

Ntá tuénxín tí ch'ín t'ikonhya la ó k'uíkon ch'án ntá chréhe ch'án tí ch'ín Jesús.

11

Ntá ch'ín Jesús k'uíxehen ch'án chjasin Jerusalén

(Mt. 21.1-11; Lc. 19.28-40; Jn. 12.12-19)

¹ Ntá tió kjuíji chjina sín chjasin Jerusalén chjinaxón tí chjasin Betfagé la ko chjasin Betania chok'èxin tí jna Olivo ntá k'uetuēhen ch'ín Jesús iyó tí sín k'uájiko ch'án,

² ntá chro ch'án kixin:

—Sátjirá tí chjasin ntsí chok'èxin ntiha. Ntá ikon chjasin ts'ikonrá kixin ntaha tjechroé ijnko kolócho naxa ninkexró tjiták'áhya va. Ntá tjasintankehéra va ntá tsjikoanará va ntihi.

³ A ntá tí jnkójin chojni tsjanchankíhará sín kixin nkekuèté xíkaha ch'erá ntá tsontáchrórá kixin: “Tí Maestro mé t'ichjánxinhin va ntá tió tsoxéhe va la tsjikaáni va”, ichrorá —ichro ch'án.

⁴ Ntá jehe sín mé sákjuí sín k'uitja sín tí kolócho tjechroé va chjinaxón ntója nchia ntá kjuasintankehe sín va.

⁵ Ntá iso tí chojni tjejó ntiha kjuanchankí sín kixin:

—¿Nkekuèté xíkaha ch'erá tjasintankehéra tí kolócho a? —mé chro sín.

⁶ Ntá kjuáteexín sín éxí k'uetōan ch'ín Jesús. Ntá kjuanjon sín kjuachaxin sátsjiko sín va.

⁷ Ntá tí kolócho mé kjuikohe sín ch'ín Jesús. Na ntá iké sín kjuínchekamá sín va, ntá kjuák'ekjen ch'ín Jesús.

⁸ Ntá itsjé chojni kuakitsje sín iké sín la kjuentoá sín tinkák'ikjínxin sín ka tí ntja ts'atsínkaxín ch'án. Ntá iso sín la mé tóchrínjin sín chaon nta itsá kayoa ntá xrákaó sín tinkát'itjí sín ntja.

⁹ A ntá tí sín tsítaón ntja la ko tí sín chréhe iton kjuankíxin sín itsje sín chéhe sín ntá chro sín kixin:

—Tsjancheheni kjuasáyé Dios. Jína tí nkexro kuixín kjuachaxin ihnjé Ìnchéni.

¹⁰ Jína tí kjuachaxién Dios itsi mé ts'etuēhen tí nkexro k'uaxrjeníxin it'éni David. Ntá tsjancheheni kjuasáyé Dios tjen nkaya nkajní —ichro sín.

¹¹ Ntá k'uíxehen ch'ín Jesús chjasin Jerusalén la ko kjaxin k'uíxehen ch'án tí njnko jié tsjehe ch'án nkuíxín tí nkaxenhen. Ntá ó kóntó ntá ch'ín Jesús sákjuíko ch'án tí teyó sín k'uájiko ch'án sákjuí sín chjasin Betania.

Ch'ín Jesús kónínkakonhen ch'án ijnko nta t'óna to higo tsík'ónahya to
(Mt. 21.18-19)

¹² **A** ntá tí kóyaon ntá kjanxin sín chjasin Betania ntá ch'ín Jesús mé k'uén ch'án kjinta.

¹³ Ntá k'uikon ch'án kjín kixin itjen ijnko nta t'óna to higo itsá kayoa. Ntá sákuítsjehe ch'án tí nta kixin ákué tsahya to. Ntá k'uikon ch'án kixin jehó ka itsa tí nta a kixin jehya tí yaon ts'óna to.

¹⁴ Ntá nixjehe ch'ín Jesús tí nta t'óna to higo k'uetuēnhen ch'án tí nta kixin: —Í ninkexró sinehya tí to ts'óna tí jaha inaá —ichro ch'án.

A ntá tí sín k'uájiko ch'án mé kuínhin sín xikaha.

Ch'ín Jesús kjuínchetjóá ch'án ninko
(Mt. 21.12-17; Lc. 19.45-48; Jn. 2.13-22)

¹⁵ Ntá kjuíji sín chjasin Jerusalén. Ntá k'uixenhen ch'ín Jesús nkaxenhen ninko a. Ntá kjuankixin ch'án k'uinkité ch'án tí sín nchekjixin nkehe ntiha la ko tí sín t'ena nkehe ntiha. **A** ntá kótéka ch'án tí mesa tjinkítóxixin sín chichaon la ko tí silla tjejókjen tí sín nchekji kontóá

¹⁶ la ko kjuanjonhya ch'án kjuachaxin kixin tsamá sín nkehe ts'ajixenhen sín ninko.

¹⁷ Ntá kjuakohe ch'án sín ntáchro ch'án kixin:

—Ntáchro xroon itén Dios kixin: “Tí ntóna i mé it'in nchia tsonixjanaxín chojni nkuíxín nación”, a ntá jahará tsíkijich'énará itjueé xíchee* —ichro ch'án.

¹⁸ Ntá tí sín nchat'á t'etoan la ko tí sín maestro tjako tí ley na mé kuínhin sín tíha, ntá kjueyá sín nkexrí chrók'óyán sín ch'án, kjánchó chrakon sín kixin kóxrjínhin tí chojni tí nkehe kjuako ch'án.

¹⁹ Kjánchó ntá ó kóntó ntá k'uaxrjexín ch'án tí chjasin a sákuí ch'án.

Ó tsíxámá tí nta t'óna to higo
(Mt. 21.20-22)

²⁰ **A** ntá tí nchítjen k'uátsínka sín tí tjen tí nta t'óna to higo ntá k'uikon sín kixin ó tsíxámáxin nuèe tí nta.

²¹ **A** ntá ch'ín Pedro xráxinkaon ch'án ntáche ch'án tí ch'ín Jesús kixin:

—Maestro, tsjehé tí nta t'óna to higo kónínkakohén jna na ó tsíxámá nta —ichro ch'án.

²² Ntá kjuátehe ch'ín Jesús ntáchro ch'án kixin:

—Tinkachónkirá Dios.

²³ Chaxín ntáxrjan kixin jnkojínrá chróntácherá tí jna i kixin: “Sátjixián ntihi tjíkjiánkiá ntayaon”, a ntá tí kaín asánrá chrókuinkachónkirá Dios kixin chróxiteyá tí nkehe tsonáchrórá, ntá xikaha chaxín tsonhen.

²⁴ Mé xikaha ntáxrjan kixin kaín tí nkehe tsjanchehérá Dios tí tsítekáonrá kixin chaxín ts'ayéhérá ntá xikaha tsonhen tsoxiteyá.

²⁵ **A** ntá tió tjejonixjehérá Dios ntá jnkojín nkexro naxa ninkákonhénrá, la chrók'uitjáyahanrá tíha kixin It'ará tjen nkaya nkajní kjaxin chrókjuinçek'itjáyahan ch'án tí jie chontará.

²⁶ **A** ntá tí sinçek'itjáyahanhyará tí ijíe chojni ntá It'ará tjen nkaya nkajní la kjaxin sinçek'itjáyahanhya ch'án tí jie chontará.

Tjanchankíhi sín tí ch'ín Jesús nkehe tí kjuachaxin chóna ch'án
(Mt. 21.23-27; Lc. 20.1-8)

²⁷ Ntá xíkjan sín chjasin Jerusalén inaá. Ntá xritjak'e ch'án nkaxenhen ninko ntá kóchjina tí sín nchat'á t'etoan la ko tí sín tjako tí ley la ko tí sín táda t'etoan ninko

²⁸ kjuanchankíhi sín ch'án kixin:

* 11:17 Isaías 56.7; Jeremías 7.11

—¿Nkehe tí kjuachaxin chonta jaha kixin xikaha ch'e? ¿Nkexro tjáha tí kjuachaxin kixin xikaha kjuich'e? —ichro sín.

²⁹ Ntá kjuátehe ch'ín Jesús ntáchro ch'án kixin:

—Ntá kjaxin janhan tsjánhánkíhára ijnko nkehe, siná á chrókjuáteherá, ntá tsotjonkará nkehe tí kjuachaxin chonta janhan kixin xikaha it'a.

³⁰ ¿A ntá nkexro k'uetuēhen ch'ín Juan kixin tsikite ch'án chojni? ¿Á Dios ní o á chojni ó? A ntá jie la tjáteherá —ichro ch'án.

³¹ Ntá kjuankixin jehó sín tjo sín kichó sín kixin:

—Tí tsontáchroni kixin Dios tsík'etuēhen tí ch'ín Juan ntá tsjanchankí tí ch'ín a kixin nkekuèté kuítekakuenhyani ch'án.

³² ¿Á chróntáchroni kixin chojni ó tsík'etuēhen ch'án? —ichro sín.

Kjánchó chrakonhen sín tí chojni chjasin kixin kaín sín kuítekaon sín kixin ch'ín Juan mé k'uénixja ch'án itén Dios.

³³ Ntá ntáche sín tí ch'ín Jesús kixin:

—Noehyani —ichro sín.

Ntá ntáchro ch'ín Jesús kixin:

—La ko kjaxin janhan tsoxrjankahya nkexro kjuanjon kjuachaxin kixin xikaha t'a —ichro ch'án.

12

Ch'ín Jesús mé kjuíncheyóexin ch'án éxi chojni ch'ehya xra jina
(Mt. 21.33-46; Lc. 20.9-19)

¹ Ntá ch'ín Jesús kjuíncheyóexin ch'án inaá ntáchro ch'án kixin:

—Itjen ijnko ch'ín k'uēnkaxin ch'án itsjé ntanà t'óna to uva nontee ch'án la ko kjuich'éna ch'án corral la ko kjuich'éna ch'án ijnko tòye ts'énya sín to uva. A ntá kjuich'éna ch'án ijnko tjat'o noi kixin ts'it'ótjen ch'án tsokotohe ch'án.

'A ntá kjuínchekjen ch'án tí nonte iso chojni ch'e xra. Ntá sákjuí ch'án kjín.

² Ntá tí kjuixraká tí yaon ts'óna to ntá k'uetuēhen ch'án ijnko tí nkexro ch'ehe ch'án xra kixin sátsjikjanchehe ch'án tí sín ch'e xra jnkosiné tí to tsakja ch'án.

³ Ntá tí sín ch'e xra mé tsé sín tí ch'ín a, kjuate sín ch'án ntá ninkehó chjéhya sín ch'án ntá sákjuí ch'án.

⁴ A ntá tí ìnché tí nonte mé xíchr'án ch'án tí í jnko nkexro ch'ehe ch'án xra. Ntá kjuíji ch'án ntiha ntá chjéhe sín ch'án xro kjuíncheníhi sín kja ch'án la ko k'uántaxínhin sín ch'án.

⁵ Ntá tí ìnché tí nonte a xíchr'án ch'án í jnko chojni sákjuitsjehe ntiha. Ntá kjuíji ch'án ntiha ntá k'óyán sín ch'án. Ntá chr'éxin tí ìnché mé xíchr'án ch'án í so nkexro ch'ehe ch'án xra sákjuitsjehe sín, kjánchó iso sín k'uékon sín la í so sín la k'óyán sín.

⁶ Ntá jehe ch'án chóna ch'án jnkokoáxón xjeen ch'án na imá tjuèhe ch'án tí xjan a. Ntá kjuixixín chr'án ch'án tí xjan sákjuí xjan kixin kjuenkayáxin ch'án kixin: “Tsochóntehe sín kjuasáyé tí xjanna”, ichro ch'án.

⁷ A ntá tí sín ch'e xra a tjo sín kichó sín kixin: “Tí ch'ín i mé ts'áyéhe kaín nkehe síin ntihi. A ntá jie ts'óyánni ch'án, a ntá jeheni ts'áyéheni kaín tí nkehe a”, ichro sín.

⁸ Ntá xikaha itsé sín ch'án k'óyán sín ch'án ntá kuakitsjexín sín ntøe ch'án tí nontee ch'án.

⁹ A ntá kjuanchankí ch'ín Jesús ntáchro ch'án kixin:

—¿A ntá nkehe chrókjuich'e tí ìnché tí nonte a? Chrókui ch'án chrók'óyán ch'án tí sín ch'e xra, a ntá chróchjéhe ch'án ókjé chojni.*

* 12:9 Isaías 5.1-7

10 '¿Á kjuinchekuáxinhyará jahará tí xroon itén Dios? Ntáchro xikihí:
Tí xro náxrjónhya kuítóenta tí sín ch'éna tjat'o,
mé jie k'óna tí xro tjetoon.

11 Mé xikaha kjuích'é Ìnchéni Dios,
na ntá tíha mé ijnko nkehe kjuachrakon k'uíkonní† —ichro ch'ín Jesús.

12 Ntá chrótsé sín tí ch'ín Jesús chrókjuak'echjina sín ch'án kixin kíenxín sín
kixin kaín tí ntáchro ch'án la jehe ch'án k'uántaxínhin tí jehe sín. Kjánchó
chrakon sín kixin nchónhya chojni kóchjina ntá kuítóhe sín ch'án ntá sákjuí sín.

¿Á jína chrókjuenkehe sín gobierno?

(Mt. 22.15-22; Lc. 20.20-26)

13 A ntá ichr'án sín iso tí sín fariseo la ko iso tí sín kuènte ch'ín Herodes kixin
tsjanchankíhi sín ch'án iso nkehe kixin tí ntoáhya chrókjuatehe ch'án ntá jína
chrók'ueka sín ch'án jie.

14 Ntá kjuíji sín tí tjen ch'ín Jesús ntáchro sín kixin:

—Maestro, ó noheni kixin tí nkehe chrónka la chaxín tíha la ko jehya nkexrí
tsjehe chojni tjenkayáxixián kixin á jína sín, la ko ntoá tjákua ntie Dios. ¿Á jína
chrókjuenkeheni tí gobierno tí chichaon tjanchia? ¿Á chrókjuenkeheni sín ní
o náhí? —ichro sín.

15 Ntá ch'ín Jesús kjuátsoan ch'án kixin jehya jína tjenkayáxin sín ntáchro
ch'án kixin:

—Jehya jína kixin tjáchaxinráni. Xrákoraá ijnko tí chichaon tjanchia sín
tsotsjáha —ichro ch'án.

16 Ntá xrákaó sín ijnko tí chichaon tsotsjehe ch'án. A ntá kjuanchankí ch'án
kixin:

—¿Nkexro tí tsík'axrjexín tjenkáni tí chichaon i la ko nkexro ihnié chóna?
—ichro ch'án.

Ntá jehe sín kjuátehe sín kixin:

—Tí ch'ín t'etōan mé tjenkáni ch'án —ichro sín.

17 Ntá kjuátehe ch'ín Jesús ntáchro ch'án kixin:

—Chróchjehérá tí ch'ín gobierno t'etōan tí nkehe kuènte ch'án; a ntá tí nkehe
kuènte Dios la chróchjehérá Dios —ichro ch'án.

Ntá chrakon sín kixin xikaha kjuátehe ch'án.

Kjuanchankí sín kixin á chaxín tsoxechón chojni

(Mt. 22.23-33; Lc. 20.27-40)

18 A ntá iso sín saduceo kuitsjehe sín tí ch'ín Jesús. A ntá tí sín saduceo mé
ntáchro sín kixin chaxínhya tsoxechón chojni tsík'en mé xikaha chrókjuachaxin
sín tí ch'ín Jesús ntáchro sín kixin:

19 —Maestro, ch'ín Moisés mé tsíkjin ch'án xroon ntáchro kixin tí ts'en ijnko
savé chojni la ko naxa tjen tí ichjién ch'án na ko tsíkjich'énahya sín xjeen sín
ntá tí kichó tí nkexro tsík'en mé chrókuakja tí tjan k'án a ntá tí xjeen sín mé
ts'óna éxí xjeen tí nkexro tsík'en.‡

20 Kjánchó k'uéjō yato sín jnkokoá kichó sín. Ntá tí ch'ín saó mé kuákja ch'án
ichjién ch'án. Ntá ik'uén ch'án, kjánchó ninkehó xjan tsíkjich'énahya sín.

21 Ntá tí ch'ín tsoyo yóxin kuákja ch'án tí tjan k'án ntá k'uén ch'án koí ch'án.
Ntá kjaxin tsíkjich'énahya sín xjan. A ntá tí ch'ín níxin kuákja ch'án tí jehe tjan
ntá xikaha kónhen inaá.

22 Ntá kayatoé sín k'uéchóna sín tjan la ko kaín sín ik'uén sín la ko ninkehó
xjan kjuích'énahya sín kaín sín. Ntá kjuixixín ntá k'uén tjan kjaxin tjan.

† 12:11 Salmo 118.22-23 ‡ 12:19 Deuteronomio 25.5

23 Ntá tió tsoxechón kaín xín chojni la, ¿Ntá nkexro ts'óna xii tjan kixin kayatoé sín tsíkótehe tjan? —ichro sín.

24 Ntá kjuátehe ch'ín Jesús ntáchro ch'án kixin:

—Ntoáhya tjenkayáxinrá kixin tiénxinhyará nkehe ntáchro tí xroon itén Dios la ko chonhyará tí kjuachaxién Dios.

25 A ntá tió tsoxechón tí chojni tsík'en la tsoteehya sín la ko tsjanjonhya sín xjeen sín kixin tsotehe sín kixin tí sín tsík'en la éxí sín ángel ts'ejó sín nkaya nkajní.

26 A ntá tí tsoxechón tí sín tsík'en, ¿á kjuinchekuáxinhyará tí xroon tsíkjin ch'ín Moisés chrónka nkexrí k'uénixjeexín Dios ijnko nta yoa tjeche ntáchro ch'án xikihí: “Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob”?§

27 Méxra tí Dios i la jehya tinkáchónki tí sín tsík'en. Náhi. Jehé ch'án mé Dios tinkáchónki tí sín tjejóchón. Ntá jahará la imá tiénxinhyará kixin xikaha ichrorá tjanchankírá —ichro ch'án.

Tí nkehe antsí imá tjetoan tsík'etoan Dios

(Mt. 22.34-40)

28 Ntá kui ijnko ch'ín tjako tí ley kjuák'ekinhin ch'án nkexrí kjuachaxin sín ch'ín Jesús. Ntá kuínhin ch'án kixin imá jína kjuátehe ch'ín Jesús. Ntá kjuanchankí ch'án ntáchro ch'án kixin:

—¿Nkehe tí antsí tjetoan tsík'etoan Dios? —ichro ch'án.

29 Ntá kjuátehe ch'ín Jesús ntáchro ch'án kixin:

—Tí nkehe antsí tjetoan tsík'etoan Dios mé tíhi: “Tinhínrá kaín rá chojni Israel kixin Ìnchéni Dios la mé jnkokoá la kohya í jnko nkexro.

30 Ntá kaín asánrá la ko kaín kjuaxrexinkaon kuéntará la ko kaín fuerza kuéntará chrótjuèxínrá.”* Mé xikaha tí nkehe antsí tjetoan tsík'etoan Dios.

31 A ntá tí nkehe yóxin tsík'etoan Dios la mé tóyóhe na mé ntáchro xikihí: “Chrótjuèhérá kíchuará éxí tjuèxínrá asánrá,”† la kohya í jnko nkehe antsí má tjetoan tsík'etoan ch'án —ichro ch'ín Jesús.

32 A ntá kjuátehe tí ch'ín tjako njnko a ntáchro ch'án kixin:

—Ntoá ntáchrua tíha, Maestro kixin chaxín itjen jnkokoáxón Dios la ko kohya í jnko Dios.‡

33 Noheni kixin kaín asénni la ko kaín kjuaxrexinkaon kuénténi la ko kaín fuerza kuénténi chrótjuèxínni Dios la ko chrótjuèheni kíchó ni éxí tjuèxínni asénni.§ Tíha mé antsí má sínkí. A ntá kaín tí ko chrók'óyánni chrókjuanjónni chróchjánxin chrítaón altar la kánhyó tjetoan tíha —ichro ch'án.

34 A ntá tió k'uíkon ch'ín Jesús kixin jína kjuenkayáxin ch'án kjuátehe ch'án ntá ntáchro ch'án kixin:

—Jaha la kjinhya tjen tí kjuachaxin kuènte Dios —ichro ch'án.

Ntá kóxakonhen sín ntá ninkexró kjuanchankíehya sín ch'án í so nkehe.

¿Xá nkexro It'é tí Cristo?

(Mt. 22.41-46; Lc. 20.41-44)

35 Ntá ch'ín Jesús kjuák'ekjako ch'án tí njnko jíé. Ntá kjuanchankí ch'án ntáchro ch'án kixin:

—¿Nkexrí kixin tí sín tjako tí ley mé ntáchro sín kixin tí Cristo mé ts'axrjeníxin tí ch'ín David?

36 A ntá tí Nchakuen Dios mé kjuínkítsa tí ch'ín David ntáchro ch'án kixin:

Ìnchéni Dios ntáche tí Ìnchéni kixin:
“Tjak'e tjaná chjina ntihó tsétoan,

§ 12:26 Éxodo 3.6 * 12:30 Deuteronomio 6.4-5 † 12:31 Levítico 19.18 ‡ 12:32 Deuteronomio 4.35 § 12:33 Oseas 6.6

tsjixinjian kaín xín tí sín nínkakonhan la tsjachahya sín ts'et̄oan sín kixin jahvá mé tsétoan”*

³⁷ ¿Xá nkexrí kixin Cristo chrók'óna xjeen ch'ín David kixin jehe ch'ín David ntáchro ch'án kixin Ìnché ch'án tí Cristo a? —ichro ch'án.

Ntá itsjé chojni k'uéjókínhin sín kóxrjínhin sín tí nkehe kjuako ch'án.

Ch'ín Jesús chrónka nkexrí ch'e tí sín tjako tí ley

(Mt. 23.1-36; Lc. 11.37-54; 20.45-47)

³⁸ Ntá ch'ín Jesús kjuako ch'án ntáchro ch'án kixin:

—Tankíehyará tí sín tjako tí ley. Jehe sín mé tóxrjínhin sín chrók'uinkáya sín ka kijnjin la ko tjinkaon sín kixin kaín tí chojni tsoxeta sín nt̄ia mé tsjikosáyehe sín.

³⁹ Jehe sín xritjeyá sín tí nta ant̄sí náxrjón ts'ejóyá sín tí nkaxenhen n̄inko. La ko kjaxin tió sátsji sín tí sine sín xritjeyá sín tí nta ant̄sí náxrjón ts'ejókjen sín sine sín.

⁴⁰ La ko takitsje sín nt̄e chojni k'án. La ko ch'iyexín sín chojni kixin isé nixjehe sín Dios kixin chrókuinhin chojni chróntáchro sín kixin imá jina tí jehe sín. Tí sín a mé ant̄sí má tsjasóte sín —ichro ch'án.

Tí ofrenda kjuanjon ijnko tjan k'án

(Lc. 21.1-4)

⁴¹ A ntá jnkonaá mé ch'ín Jesús tjetjaxin ch'án nkaxenhen n̄inko chók'èxin tjen tí ntacajón tjetóxroyéya ofrenda. Ntá tjetsjehe ch'án kixin nchónhya chojni tinkáki sín chr'áxenhen sín chichaon tí ntacajón. La ko kjaxin nchónhya tí sín rico chr'áxenhen sín nchónhya chichaon tí ntacajón a.

⁴² Ntá kjaxin ntiha mé kjuí ijnko tjan k'án nòa tjan ntá chr'áxenhen tjan tí ntacajón yaá chichaon kánhyó tje te sínkí.

⁴³ Ntá ch'ín Jesús k'uíyehē ch'án tí sín k'uájiko ch'án ntáchro ch'án kixin:

—Chaxín ntáxrjan kixin tí tjan k'án nòa tjan ant̄sí tje te k'uikon Dios tí chichaon chr'áxenhen tjan tí ntacajón, a ntá tí sín í so la kánhyó

⁴⁴ kixin kaín sín la ó chichaon xéhe sín kjuanjon sín. Ntá jehe tjan la kjónté nòa tjan la kjuanjon tjan kaín tí chichaon k'uéchónta tjan chrók'uíte nkehe chrókjóné tjan —ichro ch'án.

13

Ch'ín Jesús chrónka kixin tsoxíka n̄inko

(Mt. 24.1-2; Lc. 21.5-6)

¹ A ntá tió k'uaxrjexín ch'ín Jesús tí n̄inko jié ntá ijnko tí sín k'uájiko ch'án ntáchro ch'án kixin:

—Maestro, kjuánchí náxrjón tí xro la ko tí nchia tsík'óna —ichro ch'án.

² Ntá kjuátehe ch'ín Jesús ntáchro ch'án kixin:

—¿Á tsjehé jaha tí nchia jié tsík'óna ní? Tsjixraká tí yaon la í ninkehó xro ts'ejókjenhya kichó, la kaín tíha la tsoxika —ichro ch'án.

Tí nkehe tsonhen chjina tí tsjixixín

(Mt. 24.3-28; Lc. 21.7-24; 17.22-24)

³ A ntá sákjuí sín chrítaón tí jna Olivo chók'èxin tjen tí n̄inko a. Ntiha kjuák'etjaxin ch'ín Jesús. Ntá ntiha ch'ín Pedro, la ko ch'ín Jacobo, la ko ch'ín Juan, la ko ch'ín Andrés kjuanchankíhi sín ch'án nkehe, ntáchro sín kixin:

⁴ —Tjinkaonni tsochronka nkesá tsonhen tíha la ko nkexrí tsonoexínni nkesá tsoxiteyá kaín tíha —ichro sín.

⁵ Ntá ch'ín Jesús kjuátehe ch'án ntáchro ch'án kixin:

* 12:36 Salmo 110.1

—Tóxakonhanrá t̄itoéhyará ḱixin ninkexró chrókjuít'ayahyará.

⁶ Nchónhya chojni tsi tsontáchro sín ḱixin jehe sín mé Cristo. Ntá x̄ikaha sich'iyehé sín nchónhya chojni.

⁷ 'A ntá tió tsinhínrá ḱixin tjanjonko ḱichó sín la t'óyán ḱichó sín la chrakonhyará tóxakuanhyará ó jehí tsonhen tíha. Kjónté x̄ikaha nax̄a tsjejehya chjasintajni.

⁸ Ijnko nación tsjanjonko í jnko nación. La ntiha la ntaha la tsinkí nonte la ko itsjé chjasin na tsokjinta la ko ts'ixité sín tsonínkaon sín. Tíha na ntá xrankíxixón tí kjuatjoté.

⁹ 'Tóxakonhanrá jahará ḱixin mé tsjikaánrá sín nkayakon tí sín t'etōan ntá tí nkaxenhen n̄jnko ntiha mé tsjatiaxínrá sín. Jahará t'ichjánx̄in tsochjinará tí tjejó tí sín gobernador la ko tí sín rey ḱixin tinkachónkirá tí janhan; ntá tsjachará tsochronkará nkexrí tinkachónkirá tí janhan nkayakon tí jehe sín.

¹⁰ Tí nax̄a ts'itjáyanhya chjasintajni la mé t'ichjánx̄in tsinhin chojni kaín xín nación tí tan jína tsaáxin sín.

¹¹ Tió sátsjikoará sín tsjikaánrá sín tí tjejó tí sín t'etōan, la tóxakuanhyará nkehe tsjateherá la ko nkehe tsjenkayáxinrá. Náhí. Chronkará tí nkehe kjuanjon Dios tsontáchrorá tí hora a, ḱixin jahyará tsonixjará. Náhí. Nchakuen Dios mé tsonixja.

¹² Iso chojni kjónté nax̄a kjéhya sín tsjikaán tí ḱichó sín ḱixin its'en. La ko kjaxin x̄ikaha iso chojni tsjikaán tí xjeen sín la ko kjaxin iso sín tsonínkakonhen sín tí it'é la ko ìné la tsjikaán sín ḱixin its'en.

¹³ Kaínxín chojni chjasintajni tsonínkakonhanrá sín ḱixin tinkachónkirá tí janhan. A ntá tí sín tsitōehya tinkáchónki sín tí janhan hasta tsjixixín ná mé tsaá sín.

¹⁴ 'Tsjixraká ijnko yaon ts'ikonrá tsjak'e tí nkehe jínahya tí chrókjuak'ehya éxí tsintáchro profeta Daniel* —ntá tí chojni sinchekuáxin tí xroon i mé chrókuienxín sín tíha—, a ntá tí chojni tjejó estado Judea ts'ikon sín x̄ikaha la sátsji sín tsochr̄in sín jn̄a tsjík'ejómá sín.

¹⁵ A ntá tí sín tjejó chrítaón nchia la í chrók'uínkajinhya sín, chrók'uixenhya sín nkaxenhen nchia chrókuakitsje sín ichrén nkehe chóna sín.

¹⁶ Ntá tí sín tjejó nontee sín la í chrókjanhya sín nax̄a chrókjuikakja sín iké sín.

¹⁷ Ntá nòa tí chojni chjin ts'ejóyá tí yaon a la ko tí sín tjejónchekakí xjeen.

¹⁸ Chrókjuancheherá Dios ḱixin jehya nchakuen kin chrókónhen tíha.

¹⁹ A ntá tí yaon a mé imá kjuaxróxinhya ts'ejó chojni ḱixin ninkehó yaon kuènhya x̄ikaha desde ti kjuankíxixín Dios kjuích'éna ch'án chjasintajni la ko kjá x̄ikahya tsonhen chr'éx̄in inaá.

²⁰ A ntá tí chrókjuanjon Ìnchéni Dios kjuachaxin ḱixin isé chrókónhen tíha, ntá ninkexró chrókjuacha chrókuaá. A ntá náhi la kuikonóehé ch'án tí sín tsíkjejá ch'án ntá k'uetōan ch'án ḱixin tjoka ts'atsínka tí kjuachrakon a.

²¹ 'A ntá jnkojín nkexro tsontáchro ḱixin: “Tsjehé, ntihi itjen tí Cristo”, o tsontáchro sín ḱixin: “Tsjehé, ntiha tjen ch'án”, la títekákuènhyará sín.

²² Na mé itsi iso sín tsontáchro sín ḱixin Cristo tí jehe sín la ko kjaxin itsi iso sín ntoáhya tsjako sín la ko tsjasin sín kjuaxroan jié tjinkaon sín chrókjuich'iyexín sín chojni, kjónté tí sín tsíkjejá Dios.

²³ A ntá jahará chroxákonhanrá kaín tíha. Tjétjonkará senó ḱixin tsonohará ḱixin x̄ikaha tsonhen.

Itsi tí Xjeen Dios K'óna Chojni
(Mt. 24.29-35, 42-44; Lc. 21.25-36)

* 13:14 Daniel 9.27; 11.31; 12.11

24 'Ntá ts'atsínka tí kjuachrakon la ntá tí yaon la ts'inkaséyanhya, a ntá tí nitjó la tsjanjonhya xrohi.

25 A ntá tí konotsé la ts'anótjenxin nkajní la ko tí kjuachaxin siín nkaya nkajní la kjaxin tsinkí.

26 Ntá ts'ikon sín tí Xjeen Dios K'óna Chojni itsi chríkjan tjuj tsikao tí kjuachaxin jié.

27 Ntá tsochr'án ch'án tí sín ángel sátsji sín kuenté chjasintajni tsjikjenájín sín kaín chojni tsíkjejá ch'án.

28 'Chrókiénxinrá tí nkehe sintayóaxian. Éxí yóhe tí nta t'óna to higo tió sít'ayan kahnte ntá nohará kixin ts'ixenhen nchakuen sóa

29 mé xikaha tió ts'ikonrá xikaha tsonhen kaín tíha ntá tsonoaxínrá kixin ó kuichjina tí tsjeje chjasintajni.

30 Chaxín ntáxrjan kixin kaín tíha tsonhen tí naxa t'enhya tí chojni siín chjasintajni.

31 A ntá tí nkajní la ko tí chjasintajni mé ts'itjáyan. A ntá tí nkehe ntáxrjan la ts'itjáyanhya, tsoxiteyá tíha.

32 'A ntá tí yaon la tí hora tsoxiteyá tíha la ninkeexo noehya. Kjaxin noehya tí sín ángel tjejó nkaya nkajní la ko kjaxin tí Xjeen Dios K'óna Chojni la noehya. Ó jehó It'eni mé nohe.

33 'Méxra chrók'uejotsjehérá, chrók'uejochonhénrá chrónixjehérá Dios kixin noahyará nkesá la ko nkehora tsonhen tíha.

34 Éxí yóhe ijnko chojni sátsji kjín, a ntá tí naxa sátxínhya ch'án ntöe ch'án la senó tsochjéhe ch'án xra tí sín ch'ehe ch'án xra ts'ayakonhen sín ntöe ch'án, la jnkojnko sín ts'áyéhe sín jnkojnko xra kuente sín. La ko ts'etuenhen ch'án ijnko ch'ín tsjak'e ts'ayakonhen ch'án tí ntója nchia.

35 Méxra jahará chrók'uejotsjehérá kixin noahyará nkesá tsokjan tí ìnché tí nchia a, á ijnko tsontanonte o á ijnko k'áxrótjen o á ijnko tjetee tsje cochíká o á ijnko ts'inkaséyan.

36 Ntá xrínahya tsi ch'án ts'itjaxín ch'án kixin tjejochrinrá.

37 Mé xikaha tjonkará la ko xikaha ntátjan kaín chojni kixin chrók'uejotsjehe sín —ichro ch'án.

14

*Tjoyá sín kixin nkexrí tsotsé sín tí ch'ín Jesús
(Mt. 26.1-5; Lc. 22.1-2; Jn. 11.45-53)*

1 Naxa t'itjáyan iyó yaon ntá tsjasin sín tí kia pascua, la ko sine sín tí niotja tsíkjikohya tí xroan nchek'ánki niotja.

Ntá tí sín nchat'á t'etöan la ko tí sín maestro tjako tí ley mé kjueyá sín kixin nkexrí sich'iyehé sín tí ch'ín Jesús kixin tsotsé sín ch'án a ntá ts'óyán sín ch'án.

2 Ntá ntáchro sín kixin:

—Kjánchó jehya yaon kia chrókónhen tíha kixin chrók'uixitéhya chojni chrókónínkaon sín —ichro sín.

*Ijnko tjan kuikitexín aceite náxrjón xraxé ikja ch'ín Jesús
(Mt. 26.6-13; Jn. 12.1-8)*

3 A ntá ch'ín Jesús kjuák'e ch'án chjasin Betania ntöe ch'ín Simón, tí ch'ín k'uéchóna chinlepra. A ntá tí tjene ch'ín Jesús ntá xrínahya ikui ijnko tjan kuikao tjan ijnko xro mé tjía tí aceite xraxé itsjo nardo, imá tjete tsík'ite. Ntá tí tjan a mé kuakitjehe tjan tí xro a ntá kuikite tjan kja ch'ín Jesús tí aceite a.

4 A ntá iso tí sín tjejó ntiha kónínkakonhen sín tjan ntáchro sín kixin:

—¿Nkekuènte kjuínchexénhen tjan tí aceite náxrjón xraxé?

⁵ Íchá jína chrókóxi_xin iní ciento chichaon denario tí aceite a ntá tí chichaon a mé chrókui_tonhen tí chojni nòa —mé xikaha ichro sín k'uántaxín_hin sín tjan.

⁶ Ntá ntáchro ch'ín Jesús kixin:

—Nté t_itoherá tjan; ¿nkekuènte t'antaxín_hinrá tjan? Ó nchoxon tí nkehe kjuích'ena tjan.

⁷ A ntá tí chojni nòa la ó xráxín ts'ejókoará sín la jína tsjínk_itsará sín jnkójín yaon. Ntá janhan la jnkochr_ixínhya ts'ejóni.

⁸ Ntá jehe tjan kjuích'e tjan kaín nkehe tjinkaon tjan tsjanjon tjan. Ó senó kjuíncheka tjan xroan cuerpo kuèntana kixin tsoxravána.

⁹ Chaxín ntáxrjan kixin tí tsjako sín tí tan jína tsaáxin chojni nkuíxín ch-jasintajni ntá tsochronka sín kixin xikaha kjuích'e tí jehe tjan, a ntá xikaha tsoxraxinkakonxín sín tjan kixin xikaha kjuích'e tjan —ichro ch'án.

Ch'ín Judas kjuínchekji ch'án tí ch'ín Jesús

(Mt. 26.14-16; Lc. 22.3-6)

¹⁰ A ntá ch'ín Judas Iscariote mé ijnko teyóxin sín k'uájiko ch'ín Jesús a mé sákjuítsjehe ch'án tí sín nch_at'á t'et_oan kixin tsochrónka ch'án nkexrí tsotsé sín tí ch'ín Jesús.

¹¹ A ntá jehe sín la chéhe sín kuínhin sín ntá ntáchro sín kixin chaxín tsjanjon sín chichaon ts'áyéhe tí ch'ín Judas. Ntá kjuankíxin ch'án kjueyá ch'án nkexrí tsochrónka ch'án kixin tsotsé sín tí ch'ín Jesús.

Kjóneko sín tí ch'ín Jesús

(Mt. 26.17-29; Lc. 22.7-23; Jn. 13.2-30; 1 Co. 11.23-26)

¹² A ntá kui tí yaon xrankíxixín kia sine sín niotja tsík_jkohya tí xroan nchek'ánkí nio tió ts'óyán sín tí kolélo kuènte kia pascua. A ntá tí sín k'uájiko ch'ín Jesús mé kjuanchankíhi sín ch'án kixin:

—¿Nketí tjinkávan sátsjini sincheyaxíxinni kixin sineni kuènte tí kia pascua? —ichro sín.

¹³ Ntá k'uetu_enhen ch'án iyó tí sín k'uájiko ch'án ntáchro ch'án kixin:

—Sátjirá chjasin Jerusalén ntá ntiha tsoxetará ijnko ch'ín yámá tóa tjiá ntá. Tí ch'ín a tsochréh_er_a.

¹⁴ A ntá tí nchia ts'ixenhen ch'án la tsjan_hankíhírá tí ìnché nchia, tsontáchr_or_a kixin: “K'uet_oan tí Maestro kixin: ¿Nketí tjen tí cuarto sinexínko ch'án tí sín xriko ch'án tí kia pascua a?”, xikaha mé tsixrorá.

¹⁵ Ntá tsjako_hará ch'án ijnko cuarto jíé, yóxin piso mé chón_ta kaín nkehe t'ichj_anxin. Mé ntaha mé sincheyaxíxinrá tí nkehe sineni —ichro ch'án.

¹⁶ Ntá jehe sín la sákjuí sín chjasin Jerusalén na ntá éxí chrónka ch'ín Jesús mé xikaha k'uitja sín. Ntá tí cuarto a mé kjuíncheyaxíxin sín tí nkehe sine sín kuènte tí kia pascua.

¹⁷ A ntá ó kóntó ntá ó kjuíji ch'ín Jesús la ko tí teyó sín k'uájiko ch'án tí nchia ntiha.

¹⁸ Ntá k'uéjó sín, a ntá tió tjejóne sín ntá ntáchro ch'ín Jesús kixin:

—Chaxín ntáxrjan kixin ijnko tí jahará tjejóne jnkokoá ntihi mé sinchekjiráni —ichro ch'án.

¹⁹ Ntá jehe sín mé kjuankíxin k'uává sín. Ntá kjuankíxin sín jnkojnko kjuanchankíhi sín tí jehe ch'án kixin:

—¿Á janhan ní? —ichro sín.

²⁰ Ntá kjuátehe ch'ín Jesús ntáchro ch'án kixin:

—Jehe ch'án mé ijnko tí teyóxinrá, mé tí nkexro tjenekian jnkokoá plato ntihi.

21 Chaxín tí Xjeen Dios K'óna Chojni mé tsonhen éxí nixja xroon itén Dios. Kjánchó nòà tí ch'ín sinchekji ch'án. Íchá jína tí ch'ín a la chrókokjéhya ch'án —mé xikaha ichro ch'án.

22 A ntá nachrohe tjejóne sín na ch'ín Jesús kuákja ch'án ijnko niotja, ntá kjuanchia ch'án kjuasáyé Dios. Ntá kjuixin ntá kóchrít'o ch'án tí niotja ntá kjuanjon ch'án k'uáyéhe sín. Ntá ntáchro ch'án kixin:

—Interá, tíhi mé cuerpo kuèntana —ichro ch'án.

23 Na ntá kjaxin kuákja ch'án ijnko vaso na ntá kjuanchia ch'án kjuasáyé Dios ntá chjéhe ch'án sín ik'uí sín kaín sín tí nkehe tjiá.

24 Ntá ntáchro ch'án kixin:

—Tíhi mé jnina mé chrónkaxín kixin chaxín tsoxiteyá tí nkehe nixin tsonhen na mé ts'itji kixin tsaáxin nchónhya chojni.

25 Chaxín ntáxrjan kixin ts'íhya janhan tí ìnté to uva ínaá tí naxa tsjixrakáhya tí yaon itsi kjuachaxin kuènte Dios, a ntá ti yaon a xik'ía ìnté to uva nixin —mé xikaha ichro ch'ín Jesús.

Ntá ch'ín Jesús chrónka ch'án kixin ch'ín Pedro sinchemá ch'án kixin chónhya tí jehe ch'án

(Mt. 26.30-35; Lc. 22.31-34; Jn. 13.36-38)

26 Ntá kjuixin itsje sín ijnko himno kuènte Dios ntá sákjuí sín tí jna Olivo.

27 Ntá ch'ín Jesús ntáchro ch'án kixin:

—Ijie tie kaín rá tsochrakonrá ntá tsitonará. Ntá tsoxiteyá éxí ntáchro xroon iten Dios kixin: “Ts'óyan sín tí nkexro t'ayakonhen tí kolélo ntá tsokohya nkexro ts'ayakonhen va, a ntá tsjichroe va.”*

28 A ntá tió tsoxechónna ntá sátsjia estado Galilea ntá ntiha tsoxetani —ichro ch'án.

29 Ntá ntáchro ch'ín Pedro kixin:

—Kjonté kaín sín tsítóha sín ntá janhan la náhi —ichro ch'án.

30 Ntá ntáchro ch'ín Jesús kixin:

—Chaxín ntáxrjan kixin ijie tie tí naxa tsjehya kochíntoa yáya, la jaha mé sinchemána níya kixin chonhyana, tsixrua —ichro ch'án.

31 Ntá itsen kjuátehe ch'ín Pedro ntáchro ch'án kixin:

—Kjonté koína its'én la sintamáhya tí jaha —ichro ch'án.

La ko xikaha ntáchro sín kaín sín.

Ch'ín Jesús nixjeexín ch'án Dios tí Huerto Getsemaní

(Mt. 26.36-46; Lc. 22.39-46)

32 Ntá kjuíji sín ijnko nonte mé it'in Getsemaní. Ntá k'uètuènen ch'ín Jesús tí sín k'uájiko ch'án kixin:

—Tjejorá ntihyó nachrohe janhan tsonixjahá Dios —ichro ch'án.

33 Ntá sákjuíko ch'án tí ch'ín Pedro la ko tí ch'ín Jacobo la ko tí ch'ín Juan. Ntá kjuankixin imá k'uává asén ch'án kóxakonhen ch'án.

34 Ntá ntáche ch'án sín kixin:

—Imá t'ává asenná éxí chrók'uén xikaha. Ijie la ntihyó titohará tjejot-sjehérá —ichro ch'án.

35 Ntá sákjuí ch'án ijnko kjínhya ntá kjuák'exín toch'in ch'án. Ntá kjuankixin chrónóhehe ch'án Dios kixin chrókjuanjon ch'án kjuachaxin kixin chrókjuasótehya ch'án tí nkehe chrókónhen ch'án tí yaon a.

36 A ntá ntáchro ch'án kixin:

—It'eni jaha. Jaha mé chonta kaín xín kjuachaxin na ntá chrónóghani tsjakjínhíni kaín tí jínahya tsonhenni tsjasóteni jie. Jehya kixin chrókónhen éxí tjinkaonni jeheni. Náhi. Éxí tjinkávan jaha —ichro ch'án.

* 14:27 Zacarías 13.7

³⁷ Ntá kjan ch'án ntá k'uitjaxín ch'án tí sín kuítóhe la tjejójua sín. Ntá ntáche ch'án tí ch'ín Pedro kixin:

—Simón, tjechrian jaha. ¿Xá xitjahya chrókjuak'etsjehé ijnko hora?

³⁸ Ijie la tjejotsjehérá la ko chronóehérá Dios kixin títoehya ch'án tí Jínahya chrókjuichroerá. Tí asánrá ntácho kixin chrókjuinchexiteyará tí jína kjánchó tí cuépporá la tsjachahya —ichro ch'án.

³⁹ Ntá sákjuí ch'án inaá chrónóehé ch'án Dios. Ntá ó jehe xikahó xínixja ch'án.

⁴⁰ Ntá ikjan ch'án la ó tjejójua sín inaá kixin kuihí sín kotáchrin. Ntá í noehya sín nkexrí chrókjuatehe sín.

⁴¹ Ntá nixin sákíjki ch'án ntá kjan ch'án ntá ntácho ch'án kixin:

—A ntá jie tjejochrinrá t'ok'áhará. Ntá ó tjen. A ntá jie kjuixraká tí hora kixin tí Xjeen Dios K'óna Chojni ts'áyéhe tí sín chóna jie sinchekjasóte sín ch'án.

⁴² Ntá t'àyará sátsjini kixin ó kjuí tí nkexro sinchekjina.

*Sákjuíko sín tí ch'ín Jesús tsjak'echjina ch'án
(Mt. 26.47-56; Lc. 22.47-53; Jn. 18.2-11)*

⁴³ Naxa tjenixja ch'ín Jesús ntá xrínahya kjuíji ch'ín Judas, mé ijnko tí teyóxin sín k'uájiko ch'ín Jesús. Nchónhya chojni kjuíkao ch'án kjuíjiko sín chica espada la ko inta. Na mé kjuachaxién tí sín nchat'á t'etoan la ko tí sín maestro tjako tí ley la ko tí sín táda t'etoan nínko mé kjuixín sín.

⁴⁴ A ntá tí ch'ín Judas mé tí ch'ín sinchekji tsintácho ch'án kixin:

—Tí ch'ín sinekian kochíto mé jehe tíha la itserá ch'án sátsjikoará ch'án —ichro ch'án.

⁴⁵ Ntá kjuí sín ntá tuénxín kóchjinehe ch'ín Judas tí ch'ín Jesús ntá ntácho ch'án kixin:

—Maestro, Maestro —ichro ch'án.

Na ntá kjóneko ch'án kochíto.

⁴⁶ A ntá tí sín kjuíji mé tsé sín tí ch'ín Jesús, sákjuíko sín ch'án.

⁴⁷ A ntá ijnko ch'ín tjentaxín ntiha mé kuakitsje ch'án chica espada kóchrínjin ch'án tatsjon tí ch'ín ch'ehe tí nchat'á t'etoan xra.

⁴⁸ Ntá ch'ín Jesús mé ntáche ch'án tí sín a kixin:

—¿Nkekuènté kixin éxí chrótserá xíchee mé xikaha k'uinkakoará chica espada la ko inta kixin tsotseráni?

⁴⁹ Kaín yaon kjuak'é nkaxenhen nínko kjuákoahará, ¿ntá nkekuènté tsehvaráni? Kjánchó t'ichjánxin xikaha tsonhen kixin tsoxiteyá tí nkehe nixja xroon itén Dios —ichro ch'án.

⁵⁰ Ntá kaín tí sín k'uájiko ch'án na mé kuítóhe sín ch'án jehó ch'án ntá sákjuí sín.

Ijnko ch'ín ntasoá sákjuixín ch'án ntiha

⁵¹ A ntá ijnko ch'ín ntasoá mé kjaxin tinkáchréhe ch'án ntiha, a ntá jehó ijnko kamantá tjetsáte ch'án, ntá kjaxin itsé sín ch'án.

⁵² Kjánchó tí ké ch'án ó tsísé sín ntá kjónté tjóchin ch'án sákjuí ch'án.

*Ch'ín Jesús kóchjina ch'án tí tjejó tí sín t'etoan
(Mt. 26.57-68; Lc. 22.54-55, 63-71; Jn. 18.12-14, 19-24)*

⁵³ Ntá sákjuíko sín tí ch'ín Jesús tí ntóe tí nchat'á imá t'etoan. Ntaha mé tsíkójnkotsé kaín tí sín nchat'á t'etoan la ko tí sín táda t'etoan nínko la ko tí sín maestro tjako tí ley.

⁵⁴ Ntá ch'ín Pedro la ikjín tjechréhe ch'án ntá kjuíji ch'án tí ntasin ntóe tí nchat'á imá t'etoan a. Ntaha síche xrohi. A ntá ntiha tjejótjaxín tí sín policía tjejóchjixrohe sín, ntá kjaxin ch'án ntahó kuítóhe ch'án tjechjixrohe ch'án.

⁵⁵ Ntá tí sín t'etuenhen tí sín ncha't'á la ko kaín tí sín t'etōan kjueyá sín chojni kíxin tsochrónka sín nkehe tí jiē chón'ta ch'ín Jesús kíxin jína chrók'óyán sín ch'án. Kjánchó ninkexró k'uitjahya sín tsjinkítsa tsochrónka.

⁵⁶ Kjánchó itsjé sín ntáchro sín kjuach'ia ó t'eka sín ch'án jiē kíxin jnkokónhya tí nkehe ntáchro sín.

⁵⁷ Ntá k'uínkatjen iso sín ntá chaxínhya tí jiē kjuanchia sín. Ntá ntáchro sín kíxin:

⁵⁸ —Jeheni ó kuínhinni kíxin ntáchro ch'án kíxin ts'óxíka ch'án tí nínko tsíkjich'éanaxín chojni tja ntá iní yaon koá la ó tsjak'e ch'án í jnko nínko jehya chojni sich'éna† —ichro sín.

⁵⁹ Kjóté xíkaha la jnkokónhya tí nkehe chrónka sín.

⁶⁰ Ntá tí ch'ín t'etuenhen tí sín ncha't'á k'uínkatjen ch'án tí tjejó kaín sín ntá kjuanchankíhi ch'án tí ch'ín Jesús kíxin:

—¿Á ninkehó t'ateehya jaha? ¿Á chaxín tí jiē t'eka sín tí jaha? —ichro ch'án.

⁶¹ Ntá ch'ín Jesús tání ch'án la ninkehó t'ateehya ch'án. Ntá xíkjanchankí tí ncha't'á t'etōan ntáchro ch'án kíxin:

—¿Á jaha tí Cristo Xjeen Dios imá t'jóá? —ichro ch'án.

⁶² Ntá ntáchro ch'ín Jesús kíxin:

—Chaxín janhan tíha. Ntá chr'éxin ts'ikonrá kíxin tí Xjeen Dios K'óna Chojni mé tsjak'etjaxín ch'án tí tja chjina kjuachaxin kuènte Dios la ko itjuí mé ts'inkajinxín ch'án nkaya nkajní —ichro ch'án.

⁶³ A ntá tí ncha't'á t'etōan kótséchje ch'án tí iké ch'án kjuakoxín ch'án kíxin imá nínkaon ch'án ntáchro ch'án kíxin:

—T'ichjánxínhya í so chojni tsochrónka nkehe.

⁶⁴ Jahará ó kuínhínra kíxin k'uántaxínhin ch'án Dios. ¿Ntá nkehe tsixrorá? —ichro ch'án.

Ntá kaín sín kjuátehe sín kíxin chrók'uen ch'án.

⁶⁵ Ntá ikjé sín la kjuankíxin sín kuíkíte sín ch'án ntáte sín. Na iso sín na k'uíkjehe sín ikon ch'án na ntá kjuate sín ch'án na ko kjuanchankíhi sín ch'án kíxin:

—Tónoha kíxin nkexro kjuatia —ichro sín.

A ntá tí sín policía kuènte nínko chjéhe sín nkayakon ch'án.

*Ch'ín Pedro kjuínchemá ch'án kíxin chónhya ch'án tí ch'ín Jesús
(Mt. 26.69-75; Lc. 22.56-62; Jn. 18.15-18, 25-27)*

⁶⁶ Ntá tí ntásin nonte itjen ch'ín Pedro. Ntá ikui ijnko tjan ch'ehe tjan xra tí ncha't'á t'etōan.

⁶⁷ Ntá k'uíkon tjan kíxin tjechjírōhe ch'ín Pedro. Ntá komá tjan ch'án ntá ntáchro tjan kíxin:

—Jaha la kjaxin xrikoa tí ch'ín Jesús kjuixín chjasin Nazaret —ichro tjan.

⁶⁸ Ntá ch'ín Pedro kjuínchemá ch'án ntáchro ch'án kíxin:

—Chonhya ch'án la ko nonahya tí nkehe ntáchrúa —ichro ch'án.

Ntá k'uaxrjexín ch'án ntiha sákjui ch'án ntója. Ntá xrínahya itsje ijnko kochíntōa.

⁶⁹ Ntá tí tjan a mé k'uíkon tjan tí jehe ch'án ntá chénka tí sín síntaxín ntaha kíxin:

—A ntá tí ch'ín i mé jnkojín tí sín a —ichro tjan.

⁷⁰ Kjánchó kjuínchemá ch'án inaá. Ntá antsí chr'éxin tí sín k'uéjontaxín ntáche sín tí ch'ín Pedro kíxin:

—Chaxín kjaxian jaha tsíkjixian estado Galilea kíxin tjatsoanxínni kíxin nixja jaha éxí nixja tí jehe sín —ichro sín.

† 14:58 Juan 2.19

⁷¹ Ntá ch'ín Pedro kjuankíxin ch'án kjuínchenohe ch'án Dios ntáchro ch'án k'ín:

—Chonhya tí ch'ín ntáchrórá jahará —ichro ch'án.

⁷² Ntá yóxin itsje kochíntoá. Ntá ch'ín Pedro mé xraxinkaon ch'án k'ín nkexrí ó chrónka ch'ín Jesús k'ín: “Naxá tsotsjehya kochíntoá yáya mé ó tsjixin s'inchemána níya k'ín chonhyana.”[‡] Ntá xraxinkaon ch'án tíha la ntá kjuankíxin ch'án tsjánka ch'án k'ín ntoáhya kjuích'e ch'án kjuínchemá ch'án tí ch'ín Jesús.

15

Ch'ín Jesús nkayakon tí ch'ín Pilato

(Mt. 27.1-2, 11-14; Lc. 23.1-5; Jn. 18.28-38)

¹ A ntá ó k'uínkaséyan ntá tí sín nch'at'á t'etoan kójnkotséko sín tí sín táda la ko tí sín tjako tí ley la ko kaín tí sín t'etoan kuènte n'inko mé kójnkotsé sín ikjo kichó sín. Ntá kjuixín ntá kjuínchenteto sín tí ch'ín Jesús ntá kjuíkaán sín ch'án tí t'jen tí ch'ín Pilato.

² Ntá tí ch'ín Pilato mé kjuanchankí ch'án ntáchro ch'án k'ín:

—¿Á jaha tí Rey kuènte tí sín judío? —ichro ch'án.

Ntá kjuátehe ch'ín Jesús ntáchro ch'án k'ín:

—Kjaxian jaha ntáchrúa —ichro ch'án.

³ A ntá tí sín nch'at'á t'etoan mé k'ueka sín ch'án nchónhya j'ie.

⁴ Ntá ch'ín Pilato x'ikjanchankí ch'án inaá ntáchro ch'án k'ín:

—¿Jaha, nkekuènté t'jateehya ninkehó? Tsjehé k'ín nchónhya j'ie t'eka sín tí jaha —ichro ch'án.

⁵ A ntá ch'ín Jesús la ninkehó kjuáteehya ch'án. Ntá ch'ín Pilato la í noehya ch'án nkehe tsjenkayáxin ch'án.

K'uáyéhe ch'ín Jesús k'ín s'inchekjasóte sín ch'án ntá its'en ch'án

(Mt. 27.15-31; Lc. 23.13-25; Jn. 18.38—19.16)

⁶ A ntá ch'ín Pilato mé kuènnen ch'án k'ín tí kia a tsjanjon ch'án kjuachaxín k'ín sátsji ijnko chojni t'jehjina, éxí tjinkaon tsjanchia tí sín tsíkójnkotsé tí kia a.

⁷ A ntá ntiha t'jehjina ijnko ch'ín mé it'in Barrabás, la ko í so sín kuítékakuenhya sín tí síxreé ntá k'óyán sín chojni.

⁸ Ntá kui nchónhya chojni kjuankíxin sín kjuanchehe sín tí ch'ín Pilato k'ín chrókjuich'e ch'án éxí kaín nánó x'ikaha.

⁹ Ntá kjuátehe ch'ín Pilato k'ín:

—¿Á tjinkáonrá ts'itohá sátsji tí ch'ín Rey t'etuenhen tí sín judío? —ichro ch'án.

¹⁰ Mé x'ikaha ichro ch'án k'ín jehe ch'án la ó nohe ch'án k'ín kjuachj'inoxínhin xriko tí sín nch'at'á t'etoan, a ntá tsé sín tí ch'ín Jesús kjuíkénhen sín ch'án.

¹¹ A ntá tí sín nch'at'á t'etoan a mé kjuínchekóninkaon sín kaín tí chojni síin, ntáche sín k'ín íchá j'ina chrókjuanchia sín k'ín chrók'uatjánta ch'án tí ch'ín Barrabás.

¹² Ntá ch'ín Pilato kjuanchankí ch'án ntáchro ch'án k'ín:

—A ntá tí ch'ín t'ik'itexínrá k'ín ch'ín Rey t'etuenhen tí sín judío la ¿nkehe tjinkáonrá s'it'ahá ch'án? —ichro ch'án.

¹³ Ntá jehe sín kjuátehe sín k'óyako sín kjuanchia sín k'ín:

—¡Tjakénk'ania ch'án ntacruz!

¹⁴ Ntá ch'ín Pilato mé kjuanchankíhi ch'án tí jehe sín k'ín:

[‡] 14:72 Marcos 14.30

—¿Xá nkehe tí jínahya kjuích'e ch'án? —ichro ch'án.

Kjánchó antsí má itsen k'óyako sín kjuanchia sín kixin:

—¡Tjakénkani ch'án ntacruz! —ichro sín.

¹⁵ Ntá ch'ín Pilato mé tjinkaon ch'án sinchexiteyá ch'án tí nkehe kjuanchia tí sín k'uixité ntá kuítóhe ch'án kixin sátsji tí ch'ín Barrabás. Ntá k'uetōan ch'án kixin tsjate sín tí ch'ín Jesús. Ntá kjuixin ntá kjuanjon ch'án kjuachaxin kixin tí sín soldado sátsjiko sín ch'án tsjak'enkani sín ch'án ntacruz.

¹⁶ Ntá tí sín soldado a mé sákjuíko sín ch'án tí ntasin tí palacio. Ntaha kójnkotséxin kaín tí sín soldado.

¹⁷ Ntá ntiha kuakitsje sín iké ch'án ntá kjuínchek'inkáya sín ch'án ijnko ka kjátse tié la ko kjuak'enkaya sín kja ch'án ijnko corona tsík'óna ntach'í.

¹⁸ Ntá kjuankixin k'uixité sín ntáchro sín kixin:

—Jnkochrín tsjak'e tsétuēnhén tí sín judío —ichro sín.

¹⁹ Na ntá ntavara chjéhe sín ikja ch'án na ko ntaté sín kuikite sín ch'án. K'uéjoxin toch'in sín nkayakon ch'án kjuích'eyáxixín sín éxí imá chrókjuikosáyehe sín ch'án.

²⁰ Ntá tió kjuixin xikaha kjuích'ehe sín ch'án kjuanoá sín ch'án ntá kuakit-sjehe sín ch'án tí ka kjátse tié tsíkjinchek'inkáya sín ch'án ntá kjuínchek'inkáya sín ch'án iké ch'án xráxín inaá. Ntá kuakitsjexín sín ch'án ntiha sákjuíko sín ch'án kixin ntá tsjak'enkani sín ch'án ntacruz.

*Ntá kjuak'enkani sín ch'ín Jesús ntacruz
(Mt. 27.32-44; Lc. 23.26-43; Jn. 19.17-27)*

²¹ A ntá ijnko ch'ín tsíkjin chjasin Cirene, mé it'in ch'án Simón, mé xjeen ch'án mé tí ch'ín Alejandro la ko tí ch'ín Rufo, mé tsíkjin ch'án nontee ch'án, ntá k'uátsínka ch'án ntiha. Ntá tí sín soldado a mé k'uetuēhen sín ch'án kixin tsochréhe ch'án tsamá ch'án tí ntacruz tsjak'enkáni ch'ín Jesús.

²² A ntá sákjuíko sín tí ch'ín Jesús ijnko tjo it'in Gólgota, na mé nkívee sín t'axrjexín kixin Tjo Calavera.

²³ Ntá ntiha chjéhe sín ch'án xranvino tsík'ixinkíkanxín xroan mirra chrók'ui ch'án, kjánchó k'uíhya ch'án.

²⁴ Ntá tí sín soldado kjuak'enkani sín ch'án tí ntacruz a. Kjuixin ntá kjuích'exín sín suerte tí ké ch'án kixin tsonohe sín nkexéhe tí ka sátsjiko sín jnkojnko sín.

²⁵ A ntá ó las nueve nchítjen tí kjuak'enkani sín ch'án tí ntacruz a.

²⁶ Ntá ikja tí ntacruz kjuak'enkani sín ijnko ntachiso ntsí tsíkjin sín nixja nkekuēnte kjuínchekjasóte sín ch'án na mé ntáchro kixin: “Jehe ch'án mé Rey kuēnte tí sín judío”.

²⁷ Na ko kjaxin k'uéjónyáni sín ntacruz yaá tí síchee la ijnko la nánko chjina la í jnko la nó kjon tí tjen ch'ín Jesús.

²⁸ Na mé xikaha xiteyá éxí nixja xroon itén Dios ntáchro kixin: “Éxí yóhe ijnko chojni kjuasin jje mé k'uíkon sín ch'án”^{*}.

²⁹ Ntá tí sín k'uátsínka ntiha mé kjuanoá sín ch'án la ko k'uántaxínhin sín ch'án tinkátjía kja sín ntáchro sín kixin:

—Kjá na ntáchrúa kixin chrók'oxíka tí nínko, a ntá iní yaon koá la ó chrókjuixin chrókjuích'éna inaá,[†] ichrua.

³⁰ Nchekaá asán jahvá tjasinkajinxián tí ntacruz méhe —ichro sín.

³¹ Ntá tí sín nchat'á t'etōan la ko tí sín tjako tí ley mé kjuanoá sín ch'án ikjo sín kichó sín kixin:

^{*} **15:28** Isaías 58.12 [†] **15:29** Marcos 14.58; Juan 2.19

—Ó kjuínchekaá ch'án chojni ókjé ntá jehe ch'án mé xitjahya sinchekaá ch'án asén ch'án.

³² A ntá chaxín jehe ch'án tí Cristo tí Rey kuènte tí nación Israel ntá chrók'ui konni kixin jehó ch'án chrókjuinkajinxin ch'án asén ch'án tí ntacruz ntá kjaxin chrókuitekaonni ch'án —ichro sín.

Kjonté tí yaá sín kjaxin tjejóyáni ntacruz mé k'uántaxínhin sín ch'án.

Ntá k'uén ch'ín Jesús

(Mt. 27.45-56; Lc. 23.44-49; Jn. 19.28-30)

³³ A ntá tió kui chonkixin mé k'uixin tie kuenté chjasintajni, kóxrjenhen tí sítié hasta las tres kónjin

³⁴ ntá tí hora a mé itsen k'uèya ch'ín Jesús ntáchro ch'án kixin:

—Eloi, Eloi, ¿lama sabactani? —tí nkívee sín mé t'axrjexín kixin: It'èni, It'èni, ¿nkekuènté kuìtohéni?‡ mé xikaha ichro ch'án.

³⁵ Ntá iso sín siín ntiha kuínhin sín, ntá ntáchro sín kixin:

—Tinhínrá kixin t'íyehé ch'án tí ch'ín Elías tí ch'ín k'uéchrónka itén Dios ósé —ichro sín.

³⁶ Ntá ijnko tí jehe sín siín ntiha kuinká ch'án kuákja ch'án ijnko ka ntá kjuínchekjataxín ch'án vino náxrjónhya ntá kjuak'ekjen ch'án ijnko nta kjínjin ntá kjuínchechjina ch'án tí tjen ir'va ch'ín Jesús chrók'ui ch'án tí vino náxrjónhya. Ntáchro tí ch'ín a kixin:

—Tsítóheni tsotsjeheni á chaxín tsi tí ch'ín Elías tsjinkajin tí jehe ch'án —ichro ch'án.

³⁷ Ntá ch'ín Jesús itsen k'uíyato ch'án ntá kjuixin k'uén ch'án.

³⁸ A ntá tí ka tjenkakuènxín nkaxenhen nínko mé yaá k'óna k'uichje kjuankíxixín noi la hasta nonte k'uichje.

³⁹ Ntá tí ch'ín capitán romano mé tjen ch'án chok'èxin tí tjen ch'ín Jesús ntá k'uíkon ch'án kixin xikaha ó kjuixin k'uén ch'án ntá ntáchro ch'án kixin:

—Chaxín tí nkexro i la Xjeen Dios —ichro ch'án.

⁴⁰ Kjaxin ntiha k'uejó iso chojni chjin, ikjín k'uejó sín tsjehe sín. Tjejóko sín tjan María Magdalena la ko í jnko tjan María na mé ijnko xjeen tjan it'in Jacobo na mé tí ch'ín tsoyo, ichro sín, la ko í jnko mé it'in José. La ko kjaxin ntaha kjuák'e tí tjan Salomé.

⁴¹ A ntá tí chojni chjin i mé kuinkáchréhe sín tí ch'ín Jesús ntá kjuikao sín ch'án kixin k'uékjinkitsa sín ch'án tí k'uékjak'e ch'án estado Galilea la ko kjaxin í so chojni chjin inaá chréhe sín ch'án sákjuíko sín ch'án chjasin Jerusalén.

Ntá xrává ch'ín Jesús

(Mt. 27.57-61; Lc. 23.50-56; Jn. 19.38-42)

⁴² A ntá ó kóntó tí yaon a mé tí yaon t'óyaxínhin sín kixin tí xrankíxixín tí yaon t'ok'éhe sín,

⁴³ mé kui ijnko ch'ín it'in José chjasén ch'án mé Arimatea. Jehe ch'án mé koí ch'án t'etoan ch'án tí xra kuènte tí síxreé. Kjaxin jehe ch'án tjechónhen ch'án itsi tí kjuachaxin kuènte Dios. Chrakonhya ch'án sákjuí ch'án ntøe ch'ín Pilato kjuíkjanhia ch'án tí cuerpo kuènte ch'ín Jesús.

⁴⁴ Ntá ch'ín Pilato chrakon ch'án kixin ó tsíkjixin tsík'en ch'ín Jesús, ntá k'uíyehé ch'án tí ch'ín capitán a kjuanchankíhi ch'án kixin á chaxín xikaha kónhen.

⁴⁵ Ntá chrónka tí ch'ín capitán kixin chaxín ó kjuixin k'uén ch'án. Ntá kuínhin ch'ín Pilato xikaha ntá kjuanjon ch'án kjuachaxin kixin tsjikakja ch'ín José tí cuerpo kuènte ch'ín Jesús.

‡ 15:34 Salmo 22.1

⁴⁶ Ntá ch'ín José mé k'uena ch'án ijnko ka sávana náxrjón. Ntá kjuinkajin ch'án tí cuerpo kuènte ch'ín Jesús, a ntá jehe tí ka a mé kjuínchek'isímá ch'án tí cuerpo kuènte ch'án. Ntá kjuak'enkaya ch'án ijnko tòye tsíxrayá itjo. Ntá ijnko xro jíé mé k'uíkjàxin ch'án tí ntója tí tòye.

⁴⁷ A ntá tí tjan María Magdalena la ko tí tjan María ìné ch'ín José mé k'uíkon sín nketí xrává ch'án.

16

Ó xechón ch'ín Jesús

(Mt. 28.1-10; Lc. 24.1-12; Jn. 20.1-10)

¹ A ntá tió k'uátsínka tí yaon t'ok'éhe sín ntá tí tjan María Magdalena la ko tí tjan María ìné ch'ín Jacobo la ko tí tjan Salomé mé k'uena sín xroan xraxé sátsjiko sín sincheka sín tí cuerpo kuènte ch'ín Jesús.

² Ntá imá nchítjen tí yaon xrankíxín tí semana mé kjuíji sín tí tòye tsíxravá ch'án, na mé ó kjuítjon yaon.

³ A ntá jehe sín mé tinkákjo kíchó sín kixin:

—¿Xá nkexro tí chrókuakjìnhinni tí xro tjejkèxin tí tòye? —ichro sín.

⁴ A ntá xrínahya k'uíkon sín kixin ó tsíkixin tsíkjin tí xro jíé tjejkèxin tí tòye kixin í tjenhya éxí k'uékjak'e senó.

⁵ Ntá kjuíji sín ikon tí tòye ntá k'uíkon sín kixin tjetjāxin ijnko ch'ín ntasoá tí tja sín chjina tjenkáya ch'án ka kjinjin tjóá ntá imá chrakon sín k'uíkon sín.

⁶ Ntá ntáchro ch'án kixin:

—Chrakonhyará. Ó nòna kixin xritjéyará jahará tí ch'ín Jesús tsíkjin chjasin Nazaret kjuák'enkáni ch'án ntacruz. Ntá ó tsíxechón ch'án í kohya ch'án ntihi. Tsjehérá tí tsíkjak'e sín ch'án.

⁷ Ntá sájtirá tjíchenkará tí sín k'uék'ajiko ch'án la ko tí ch'ín Pedro kixin tí ch'ín Jesús senó sátsji ch'án estado Galilea ntá ntaha tsoxetará ch'án éxí tsíchrónka ch'án —mé xíkaha chrónka tí ntasoá a.

⁸ Ntá tí chojni chjin a mé sákjuíxin sín tí tsíxravá tí ch'ín Jesús imá síxrànkā sín chrakon sín. Ntá naxā chenkahya sín ninkexró kixin chrakon sín.

Ch'ín Jesús titàya xeta tí tjan María Magdalena

(Jn. 20.11-18)

⁹ Tió tsíkixin tsíxechón ch'ín Jesús nchítjen tí yaon xrankíxín semana ntá titàya xeta ch'án saoxín tí tjan María Magdalena na mé jehe tjan tsíkakitsjexín ch'án yato nchakuen tí jínahya.

¹⁰ Ntá sákjuíchenka tjan tí sín k'uék'ajiko tí jehe ch'án t'ává sín tsjánka sín.

¹¹ A ntá tió kuínhin sín kixin tjechón tí ch'ín Jesús kixin xíkaha tsík'ikon tjan la kjónté kuítekakonhya sín.

Iyó sín k'uék'ajiko ch'ín Jesús titàya k'uíkuèn sín tí jehe ch'án

(Lc. 24.13-35)

¹² A ntá chr'éxin ntá iyó tí sín a titàya k'uíkuèn sín tí ch'ín Jesús, ókjé nkexrí tsjehe ch'án. Tí sín a mé tjejótji sín ntia sátsji sín ijnko nonte.

¹³ A ntá jehe sín sákjuíchenka sín tí sín í so a; la kjónté xíkaha la kuítekakonhya sín.*

Ch'ín Jesús k'uetuenhen ch'án tí sín k'uék'ajiko ch'án tí xra sich'e sín

(Mt. 28.16-20; Lc. 24.36-49; Jn. 20.19-23)

¹⁴ A ntá tió kjuixín la titàya k'uíkon tí tejnko sín tí jehe ch'án tí tjejóne sín. Ntá nixjehe ch'án sín kixin nkekuènté icha asén sín tsíkitekakuenhya sín tí sín tsík'ikon kixin tsíxechón ch'án.

* 16:13 Lucas 24.13-35

¹⁵ Ntá ntáche ch'án sín kixin:

—Sátjirá kuenté chjasintajni tjácohérá kaín xín chojni tí tan jína tsaáxin sín.

¹⁶ Tí nkexro tsitekaon la tsikite la mé tsaá. A ntá tí nkexro tsitekakonhya na mé tsjasóte.

¹⁷ Ntá tí sín tsinkáchónki tí janhan mé tsjasin sín kjuaxroan kixin kjuachaxin nina tsakitsjexín sín tí nchakuen tí jínahya chóna chojni la ko tsonixja sín ókjé nkíva.

¹⁸ Kjónté konche chrótsé sín la kohya nkehe tsonhen sín la ko kjónté chrók'ui sín ijnko ntá chóna veneno la kohya nkehe tsonhen sín. Kjaxin ts'ejotja tja sín chojni níhi la tsitohe sín jína.

Ch'ín Jesús chrìn ch'án nkaya nkajní

(Lc. 24.50-53)

¹⁹ Ntá ó kjuixin nixjehé Ìnchéni Jesús tí jehe sín ntá sákjuí ch'án nkaya nkajní. A ntá ntiha kjuák'etjaxin ch'án tí tja chjina Dios.

²⁰ A ntá jehe sín sákjuí sín nkuíxín sákjuíkako sín tí tan jína tsaáxin chojni. A ntá jehe Ìnchéni mé kjuínkítsa ch'án tí sín a la ko kjuachaxiэн ch'án mé kjuasixín sín kjuaxroan kixin tíha mé tsonoexín tí sín tjejótinhin kixin chaxín nkehe kuènte Dios kjuako sín. Amén.

Tí tan jína chrónka ch'ín Lucas

Tíhi mé xrankíxixín tí xroon i

¹ Nchónhya chojni tjinkaon chrókjin sín ntoá kaín xín nkehe nkexrí kónhen k'uátsínka Ìnchéni tí k'uéjóni.

² Éxí kjuakoheni tí sín tsík'ikonxín kon sín tí xrankíxixín nkehe k'uátsínka ch'án la ntá k'uáyéhe sín tí xra sákjuíchronka sín tí tan jína

³ a ntá janhan kjaxian kjuánchánkiá jína kaín nkehe k'uátsínka tí xrankíxixín. Ntá nòna jína ikjian kaín tíha éxí tsíkónhen ntá tsochr'anhan jaha Teófilo kixin imá tjuaha

⁴ kixin ntá jaha tsonoha jína tí nkehe chaxín tsíkjakoha sín.

Ijnko ángel mé chrónka kixin tsokjíhi Juan Bautista

⁵ A ntá tí ch'ín rey Herodes k'uetōan ch'án tí estado Judea la ko ntiha kjuák'e ijnko nchat'á mé it'in Zacarías. Jehe ch'án mé kuènte tí sín tsík'axrjeníxin tí ch'ín Abías.* A ntá ichjién ch'án mé it'in Elisabet. Jehe tjan mé tsík'axrjeníxin tjan tí nchat'á Aarón.

⁶ Yóí sín na mé jína sín kixin éxí tjinkaon Dios la mé kjuínchexiteyéhe sín kaín nkehe k'uetōan ch'án. Méxra ninkexró chrók'uekahya jie tí jehe sín.

⁷ A ntá jehe sín chóntahya sín xjeen sín kixin ó jehí tsíkitoenhya tjan Elisabet kixin sich'éna tjan xjan la ko ntá jie la ó táda ch'án la ko ó nána tjan.

⁸ A ntá ijnko yaon tónhen tocar ch'ín Zacarías la ko tí í so sín tjejóko ch'án sich'e sín xra nchat'á kuènte Dios.

⁹ A ntá xikaha kuènhen tí sín nchat'á a ntá jie ch'ín Zacarías mé kónhen tocar ts'ixenhen ch'án tí cuarto tjoá kuènte nínko tsjak'e ch'án chjincō chrítaón tí altar kuènte Dios.

¹⁰ Ntá kjuák'e ch'án ntiha kjuak'e ch'án tí chjincō la nachrohe kaín tí chojni k'uéjóni sín ntója nixjehe sín Dios.

¹¹ Ntá xrinahya k'uíkon ch'ín Zacarías ijnko ángel kuènte Dios tjejín toté ch'án nánko chjina tí altar tjak'exin sín chjincō.

¹² A ntá tí k'uíkon ch'ín Zacarías tí ángel la imá kóxakonhen ch'án la ko imá chrakon ch'án.

¹³ A ntá ntáchro tí ch'ín ángel kixin:

—Zacarías, chrakonhya jaha. Ó kuínhin Dios tí nkehe tjanchehé ch'án la ntá ichjián Elisabet sich'éna tjan ijnko xjan ntoa na mé sijnchek'ian xjan Juan.

¹⁴ Jaha la tsocháha má la ko itsjé chojni tsochéhe sín kixin tsokjíhi xjan

¹⁵ kixin imá tjetōan tsjak'e tí xjaan éxí tóxrjínhin Dios. Ninkehó xran vino la ko ninkehó í jnko xran ts'ihya ch'án. Tsochóna ch'án kjuachaxin kuènte Nchakuen Dios kjónté naxa tokjéhya ch'án.

¹⁶ Jehe ch'án mé tsjakohé ch'án tí chojni nación Israel a ntá itsjé sín tsokjan sín tsinkáchónki sín Ìnché sín Dios.

¹⁷ Jehe ch'ín Juan tsítaón ch'án ntia tsixin Ìnchéni. Éxí k'uékjako ch'ín Elías ósé mé tsjako ch'án la ko tsochóna ch'án kjuachaxin éxí k'uéchóna ch'ín Elías kixin tí sín it'é xjan la mé jína ts'ejóko xjeen sín la ko kjaxin tí sín titekakonhya mé tsitekaon sín. Mé xikaha tsonixjehe ch'án chojni kixin ó itsi Ìnchéni la chrókuinkáchónki sín tí jehe ch'án.

¹⁸ A ntá tí ch'ín Zacarías kjuanchankíhi ch'án tí ch'ín ángel ntáchro ch'án kixin:

* 1:5 1 Crónicas 24.10

—¿Nkexrí chrókónòna kixin chaxín chrókónhen tíhi? Janhan la ó tádana la ko tí chjin chonta la kjaxin ó nána tjan —ichro ch'án.

¹⁹ Ntá kjuátehe tí ch'ín ángel ntáchro ch'án kixin:

—Janhan mé Gabriel la mé t'ahá xra Dios. A ntá jehe ch'án mé k'uetuanna k'uinka tsonixjaha tsoxrjanka tí nkehe jína tsonhen.

²⁰ A ntá jie kuítekákónhya tí nkehe xrjanka a ntá tsonósian jaha xitjahya tsonixja jaha tsoxitjajia tí yaon tsokjíhi tí xjaan. Mé xikaha tsoxiteyá kaín tíha —ichro ch'án.

²¹ A ntá tí í so sín ntiha k'uejóchónhen sín ntója ninko kixin ts'axrje ch'ín Zacarías, ntá kóxakonhen sín kixin imá sé kóxrjenhen ch'án nkaxenhen ninko.

²² Ntá tió k'uaxrjexín ch'ín Zacarías tí nkaxenhen ninko la í xitjahya nixja ch'án. Ntá kónohe sín kixin ichrén kjuaxroan kuènte Dios tsík'ikon ch'án tí nkaxenhen ninko. Ntá itja ch'án ó tjakoxin ch'án tí nkehe chróntáchro ch'án kixin í xitjahya nixja ch'án.

²³ A ntá tió kjuixin tí yaon kjuích'e ch'ín Zacarías xra ninko ntá sákjuí ch'án ntoe ch'án.

²⁴ A ntá chr'éxin ntá kjuák'eyá tí ichjién ch'án Elisabet. Ntá ntoe tjan ó kuítóhe tjan in'ó nitjó kjuenkayáxin tjan kixin:

²⁵ “Mé xikaha ijnko kjuaxroan kjuanjon Ìnchéni kixin chrók'uántaxíenhyani chojni kixin ó tsochóntani xjeenni jie chrókjuikosáyeheni sín”, ichro tjan.

Ijnko ángel chrónka kixin tsokjíhi Jesús

²⁶ A ntá k'uatásínka injon nitjó ntá Dios k'uetuénhen tí ch'ín ángel Gabriel kixin sátsji ch'án injnko chjasin estado Galilea mé it'in Nazaret,

²⁷ sátsji nixjehe ch'án injnko tjan tjarisoá naxa kuákjahya tjan chojni ntoa mé it'in tjan María. Jehe tjan mé tsíkatehe tjan kixin tsotehe tjan injnko ch'ín mé it'in José, mé tsík'axrjeníxin ch'án tí ch'ín rey David.

²⁸ A ntá tí ch'ín ángel k'uixenhen tí tjan tjan ntá ntáchro ch'án kixin:

—K'uinka nixjaha jaha kixin Dios kjuínkítsa tí jaha. Ìnchéni Dios tjekoa tí jaha. A ntá jaha imá kjuíntayavan ch'án ntá tí í so chojni chjin la kénhyó —ichro ch'án.

²⁹ Kjánchó tió k'uíkon tjan tí ch'ín ángel na mé kóxakonhen tjan kjuenkayáxin tjan kixin nkekuènte xikaha nixjehe ch'án, ichro tjan.

³⁰ A ntá ntáchro tí ch'ín ángel kixin:

—Chrakonhya, María. Dios la imá tjetjinkítsa tí jaha.

³¹ A ntá jie la tsjak'èyá jaha, tsochonta injnko xjan ntoa la ko sinchek'ian xjan Jesús.

³² Imá ts'etoan ch'án la ko its'in ch'án Xjeen Dios nkaya nkajní. Ìnchéni Dios mé tsjanjon ch'án kjuachaxin ts'etoan ch'án éxí injnko rey éxí k'uetoan ch'ín David, tí nkexro ts'axrjeníxin ch'án.

³³ Jnkochrín tsjak'e ch'án ts'etuénhen ch'án tí sín nación Israel, la mé tsjejehya tí kjuachaxin ts'etoan ch'án —ichro tí ch'ín ángel.

³⁴ Ntá kjuanchankíhi tjan María tí ch'ín ángel kixin:

—¿Nkekuènte kixin xikaha chrókónhen kixin janhan la naxa chontahya chojni ntoa? —ichro tjan.

³⁵ Ntá kjuatehe tí ch'ín ángel, ntáchro ch'án kixin:

—Tí Nchakuen Dios mé ts'inkajin éxí injnko tjuí la ko tí kjuachaxin kuènte Dios mé tsjak'etja tí jaha, a ntá ts'óna tí xjan. Mé xikaha tí xjan tsokjíhi la mé tjóá xjan la mé its'in xjan Xjeen Dios.

³⁶ La ko kjaxin tjan Elisabet kjéhya jaha kjónté ó nána tjan la mé tjeyá tjan. Senó la k'uéchóntahya tjan xjan, a ntá jie la ó injon nitjó tjeyá tjan.

³⁷ Kíxin tí kjuachaxién Dios la tsjacha tsonhen kaín xín nkehe —ichro tí ch'ín ángel.

³⁸ Ntá ntáchro tjan María kixin:

—Janhan mé t'ahá Ìnchéni Dios xra. Ó nchoxon tí nkehe k'uetōan ch'án sintaxiteyáha ch'án éxí chronka jaha —ichro tjan.

À ntá kjuixin chrónka tí ch'ín ángel ntá sákjuí ch'án.

Tjan María sákjuitsjehe tí tjan Elisabet

³⁹ À ntá ijnko yaon tí tjan María tjiān sákjuí tjan ijnko chjasin tjen tí jna estado Judea.

⁴⁰ Ntá kjuíji tjan tí chjasin ntiha ntá k'uíxehen tjan ntōe ch'ín Zacarías la ntá nixjehe tjan tí tjan Elisabet.

⁴¹ À ntá tió kuínhin tjan Elisabet nixja tjan María ntá chrika tí xjan nkaya tsee tí tjan Elisabet. Ntá antsí k'uáyéhe tjan kjuachaxién Nchakuen Dios

⁴² ntá itsen nixja tjan ntáchro tjan kixin:

—Dios imá kjuíntayavan la ntá tí í so chojni chjin la kénhyó la ko kjaxin kjuíncheyaon ch'án tí xjaan.

⁴³ ¿Xá nkexro tí janhan kixin kjuínixjana ìné Ìnchéni?

⁴⁴ Tió kuínhan nixjana ntá tí xjan la chrika xjan nkaya tsena kixin chéhe xjan kjuiha.

⁴⁵ Ntá jaha la cháha kixin kuítekávan kixin Ìnchéni Dios sinchexiteyá tí nkehe ntáchro ch'án —ichro tjan.

⁴⁶ Ntá ntáchro tjan María kixin:

Asenná imá tjikosáyehe Ìnchéni Dios

⁴⁷ la ko chéhe asenná kixin Dios sinchekaáni ch'án.

⁴⁸ Kíxin Dios ikuá kuentá ijnko tí chojni chjin nòé ch'exón xra kuènte ch'án.

À ntá ijie la ko jnkochrín tsontáchro chojni kixin náxrjón tjèn janhan, tsixro sín.

⁴⁹ Kíxin Dios chóna kaín kjuachaxin ntá janhan mé kjuasixínna ch'án ijnko kjuaxroan jíe;

imá tjóá tí ihnié ch'án.

⁵⁰ Jnkochrín tsikonóehe ch'án kaín tí sín tjikosáyehe sín ch'án.

⁵¹ Tsíkjasin ch'án itsjé kjuaxroan jíe;

kuakitsjehe ch'án tí kjuachaxin chóna tí sín nchehnke.

⁵² Kuakitsjehe ch'án tí kjuachaxin chóna tí sín t'etōan,

À ntá tí sín nòa k'uék'etuñhaya senó la mé jie chjéhe ch'án kjuachaxin ts'etōan sín.

⁵³ À ntá tí sín t'enxín kjinta la kjuanjon ch'án kaín nkehe tsicháxinhin sín, a ntá tí sín rico xráxín jehó tja sín sákjuí sín.

⁵⁴ Kjuínkítsa ch'án tí sín nación Israel kixin tjejóch'ehe sín ch'án xra;

k'uitjáyenhya ch'án tí jehe sín kuikonóehe ch'án sín,

⁵⁵ éxí k'uéchenka ch'án tí sín k'uaxrjeníxinni k'uéjó sín ósé,

na mé tí ch'ín Abraham la ko kaín tí sín naxa ts'axrjeníxin ch'án —mé xíkaha ichro tjan María.

⁵⁶ À ntá tjan María kuítóeko tjan tí tjan Elisabet iní nitjó la ntá chr'éxin xíkjan tjan ntōe tjan.

Kokjíhi ch'ín Juan Bautista

⁵⁷ Ntá xétja tí yaon sinchekokjíhi tjan Elisabet tí xjeen tjan, a ntá kjuínchekokjíhi tjan ijnko xjan ntoa.

⁵⁸ À ntá tí sín chjinaxón ntōe la ko tí sín kjéhya tjan mé kjuíjitsjehe sín kixin tsochéheko sín tjan kixin kuínhin sín kixin Dios imá tsíkikonóehe tí jehe tjan.

⁵⁹ Ntá tí yaon jnixin ikui sín sincheka sín xjan tí xroye kuènte tí sín judío. Ntá chrókjuinchek'in sín xjan Zacarías éxí it'in it'é.

⁶⁰ Kjánchó ntáchro ìné xjan kixin:

—Náhi. T'ichjánxin its'in xjan Juan —ichro tjan.

⁶¹ Ntá ntáchro sín kixin:

—¿Nkekuènte kixin xikaha chrók'uin xjan? Kohya nkexro naxa kjéhya xikaha it'in —ichro sín.

⁶² A ntá kaín tí sín kjéhya kjuakoxin sín tja sín kjuanchankíhi sín tí it'é xjan kixin nkexrí tjinkaon ch'án chrók'uin tí xjan.

⁶³ A ntá tí it'é xjan mé kjuanchia ch'án ijnko ntachiso ntsí tsokjin ch'án ntá kjin ch'án kixin: “Ihnié xjan mé Juan.” A ntá kaín tí sín tjejó sín ntiha la chakon sín kuínhin sín xikaha kónhen.

⁶⁴ A ntá xringhya ch'ín Zacarías kjuankixin ch'án nixja ch'án inaá kjuanchehe ch'án Dios kjuasáya.

⁶⁵ A ntá kaín tí sín chjinaxón ntoe sín mé chakon sín. La ntá nkuíxín tí jna kuènte estado Judea mé kjo sín kichó sín chrónka sín kixin xikaha tsíkónhen.

⁶⁶ A ntá kaín tí sín kuínhin mé kjuenkayáxin sín kjuanchankíhi sín kichó sín kixin:

—¿Xá nkehe tí xra tsíkítonhen tí xjan i? —ichro sín.

Kixin chaxín Ìnchéni Dios tsíkjincheyaon ch'án tí xjan.

Tí ch'ín Zacarías itsje ch'án

⁶⁷ A ntá it'é tí xjan mé ch'ín Zacarías, mé antsí k'uáyéhe ch'án kjuachaxin kuènte Nchakuen Dios ntá xikaha nixja ch'án itén Dios ntáchro ch'án kixin:

⁶⁸ Imá jína Ìnchéni, na mé tí Dios kuènte tí nación Israel, kixin ikui ch'án tí tjejóni kjuínchekaá ch'án nación kuénténi.

⁶⁹ La ko kjuanjon ch'án ijnko nkexro t'etōan sinchekaáni ch'án na mé ijnko nkexro k'uaxrjenixin tí ch'ín David, tí nkexro k'uékjich'ehe Dios xra.

⁷⁰ Éxí k'uéchronkaxín tí sín kjueyá Dios k'uéchronka itén Dios ósé,

⁷¹ k'uéchronka Dios kixin sinchekaáni ch'án kixin ntá tsjachahya kaín tí sín nínkakhenni,

⁷² tsíkonóehē ch'án tí sín k'uaxrjeníxinni ósé,

ts'itjáyenhya ch'án tí nkehe tsíchronka ch'án tsoxiteyá.

⁷³ Tíhi mé tsíkjo Dios tí ch'ín Abraham ósé kixin nkehe chaxín tsoxiteyá chr'éxin

⁷⁴ kixin sinchekaáni ch'án kixin kohya nkehe sich'ehe ni tí sín nínkakhenni kixin jína sich'ehe ni ch'án xra tsochrakonhyani,

⁷⁵ la ntá jína ts'ejóni sinchetjóáni ch'án kaín yaon tí naxa tjejóchónni.

⁷⁶ A ntá jaha xjeenni mé tsontáchro Dios kixin jaha ijnko nkexro tsochrónka itén Dios tjen nkaya nkajní.

Jaha tsítōnxian ntja tsixin Ìnchéni la ko jaha tsjásiyóxian ntja tsixin ch'án.

⁷⁷ Jaha tsjákohé tí chojni chjasintajni nkexrí tsjin tí jie chóna sín, ntá tsaá sín.

⁷⁸ A ntá Dios mé tjuèheni ch'án la ko kuikonóehēni ch'án, kixin nkajní kuixin ijnko xrohi nixin ts'inkaséyanxín tí yaon nixin.

⁷⁹ Tíha mé tsíkjo tí xrohi ts'inkaséyanxín tí sín tjejó sítié la ko tí sín chrók'uitjáyan, la ko ts'ikonxínni tí ntja tsjanjon kjuaxróxin.

Na mé kaín tíhi chrónka tí ch'ín Zacarías.

⁸⁰ A ntá tinkák'ánkí tí xjan a la ko Dios kjuínchek'ánkí tí kjuaxrexinkaon kuènte xjan kixin antsí tsonohe xjan nkexrí tjen Dios. A ntá kjuák'e xjan nteje k'uánkí xjan kjuixrakájia tí yaon kjuankixin kjuakohe ch'án tí chojni nación Israel.

2

*Kokjîhi ch'în Jesús
(Mt.1.18-25)*

¹ A ntá tí yaon a na mé tí ch'în imá t'etōan mé it'in Augusto César na mé k'uētōan ch'án kixin ts'ínixín ihnié kaín xín chojni síin tí chjasin t'etōan ch'án kixin tsonohe ch'án nkekjaín chojni síin.

² Tí xrankíxixín k'uínixín ihnié sín tió Cirenio mé k'uégobrador k'uētōan estado Siria.

³ Kaínxín chojni t'ichjánxín sátsji sín chjasén sín kixin ntaha ts'ínixín ihnié sín.

⁴ Mé xikaha ch'în José kjaxin k'uaxrjexín ch'án tí chjasin Nazaret estado Galilea ntá sákjuí ch'án tí estado Judea na mé sákjuí ch'án chjasin Belén tí tsíkójíexín tí ch'în rey David kixin jehe ch'în José mé tsík'axrjeníxin ch'án tí ch'în David.

⁵ Sákjuí ch'án chjasin Belén sákjuíko ch'án tí tjan María kixin ntiha ts'ínixínko ihnié ch'án tjan kixin jehe tjan tsíkjatehe kixin tsotehe ch'án. A ntá jehe tjan na mé ó tjejá tjan.

⁶ A ntá xikaha kónhen nachrohe k'uéjó sín chjasin Belén, ntá kjuixraká tí yaon tsokjîhi xjeen tjan María.

⁷ A ntá ntiha kokjéxín tí xjeen tjan sao. Ntá kjuínchek'ísímá tjan xjan ka, a ntá kjuak'enkaya tjan ijnko nta neyá iko kixin jehe sín la k'uitjahya sín nchia xranka ts'ók'èxín sín mé kjónté ntiha k'uéjó sín.

Tí sín ángel la ko tí sín k'uáyakonhen kolélo

⁸ Kjaxin chjinaxón tí chjasin Belén tjejó iso chojni nteje ó la ntá ntahó titohe sín tí tie a kixin t'ayakonhen sín kolélo.

⁹ A ntá titàya k'uíkuèn sín ijnko ángel kuènte Dios la ko nkuíxín tí tjejó sín la k'uínkaséyan kixin tí kjuachaxin jié kuènte Dios kuíkao ch'án. Ntá jehe sín la imá chrakon sín.

¹⁰ A ntá tí ch'în ángel ntáchro kixin:

—Chrakonhyará jahará. Ijie k'uinka tsotjonkará nkehe jína nixín kixin tsochéhe kaín xín chojni

¹¹ kixin ijie tí chjasén ch'în David kokjéxín tí nkexro tsaáxinrá jahará na mé Ìnchéni Cristo tíha.

¹² Ntá tsonoaxínrá jahará kixin tí xjan a kixin ika tjechr'ísímá xjan la ko ijnko nta neyá iko mé tjetsínkayá xjan —mé xikaha chrónka tí ch'în ángel.

¹³ A ntá titàya k'uíkuèn sín kixin nchónhya sín ángel kuíxín nkaya nkajní tjejóko tí ch'în ángel tjejótsje sín tjanchehe sín Dios kjuasáya, ntáchro sín kixin:

¹⁴ Kjuasáyé Dios tjen nkaya nkajní kixin imá chóna

ch'án kjuachaxin. Ntá chjasintajni ts'ixin kjuaxróxin tí tjejó tí sín sinchexiteyéhe ch'án.

Mé xikaha ichro sín.

¹⁵ A ntá tí sín ángel xíkjan sín nkaya nkajní, a ntá tí sín t'ayakonhen kolélo ikjo sín kíchó sín ntáchro sín kixin:

—Ìntá sátsjini tí chjasin Belén tsjitsjeheni tí nkehe tsíkónhen kixin Ìnchéni k'uētōan kui tí nkexro kjuínchenoheni —ichro sín.

¹⁶ Ntá tjiān sákjuí sín ntiha la k'uitja sín tí tjan María la ko tí ch'în José la ko tí xjan a tjetsínkayá nta neyá iko.

¹⁷ A ntá tió k'uíkon sín xikaha ntá chrónka sín tí nkehe tsíchrónka tí ángel kixin nkexrí tjen tí xjan a.

¹⁸ Ntá chrakon kaín tí sín kuínhin kixin xikaha chrónka tí sín k'uáyakonhen kolélo.

19 Kjánchó tí tjan María la asén tjan ó xraxinkakonxín tjan kaín tíha.

20 A ntá tí sín k'uáyakonhen kolélo la sákjuí sín ntja kuinkákjanchehe sín Dios kjuasáya kixin kaín tí nkehe tsíkinhin sín la ko k'uíkon sín kixin ó xiteyá kaín nkehe éxí tsíchrónka tí ángel.

Sákjuíko sín tí xjan Jesús tí nínko Jerusalén

21 A ntá tió xétja tí ijní yaon ntá kjuíncheke sín xjan xroye kuènte tí sín israelita ntá kjuínchek'in sín xjan Jesús éxí tsíntáchró tí ch'ín ángel chénka tí tjan María tí naxa kjuák'eyáhya tjan.

22 A ntá tió kuítóhe tjan María jína éxí chrónka ley kuènte Moisés * ntá sákjuíko sín tí xjan tí chjasin Jerusalén kixin tsochjéhe sín Dios kjuasáya.

23 Éxí ntáchró tí xroon ley kuènté Ìnchéni Dios kixin: “A ntá kaín xjan ntoa tsokjíhi saxín la mé tsochjéhe sín Dios tí xjan a sich'ehe xjan xra Dios.”†

24 Ntá xikaha sákjuí sín kixin ntaha tsjanjon sín iko ts'énxín ntiha tsochjéxín sín Dios kjuasáyé éxí t'etoan tí ley kuènte ch'án na mé yaá kontóá najni o yaá kontóá nteje chrókjuanjón sín.

25 A ntá tí yaon a kjuák'e chjasin Jerusalén ijnko ch'án ó táda ch'án mé it'in ch'án Simeón. Jehe ch'án ijnko chojni jína la ko jnkochrín xraxinkaon ch'án Dios la ko kjuák'echónhen ch'án kixin itsi tí nkexro tsaáxin tí nación Israel. Tí Nchakuen Dios tjeko tí ch'ín Simeón

26 tsíkjinchenohe ch'án kixin naxa ts'enhya ch'án ts'ikonjia ch'án tí nkexro Cristo, na mé tí nkexro tsochr'án Ìnchéni Dios.

27 A ntá tí Nchakuen Dios kjuínchexraxinkaon tí ch'ín a kixin sátsji ch'án nínko. A ntá tió kui tí ìné la ko it'é xjan Jesús k'uíxenko sín xjan nkaxenhen nínko kixin sinchexiteyéhe sín tí nkehe t'etoan tí ley

28 ntá ch'ín Simeón kuakja ch'án tí xjan a kjóa ch'án ntá kjuanchehe ch'án Dios kjuasáya ntáchró ch'án kixin:

29 Ijie jaha Ìnchéni Dios, tsjánjuan kjuachaxin kixin kjuaxróxin its'én janhan kixin jaha ó kjuínchexiteyá tí nkehe tsíntáchrúa

30 kixin ó k'uíkonxin kuan tí nkexro tsaáxinni,

31 mé xikaha kjuích'e kixin ts'ikon kaín xín chojni.

32 Jehe ch'án mé tí xrohi ts'inkaséyanxín ntje tí sín jehya kuènte Israel, la ko jehe ch'án tsjikosáyehe ch'án tí chjasin kuéntá Israel, mé ichro ch'ín Simeón.

33 Ntá ch'ín José la ko tí ìné ch'ín Jesús la chrakon sín kixin xikaha kuínhin sín ntáchró ch'ín Simeón kixin nkexrí tjen tí xjan.

34 Ntá ch'ín Simeón kjuíncheyaon ch'án sín ntá chénka ch'án tí tjan María mé tí ìné xjan Jesús kixin:

—Tí xjan i tsíkikao itsjé xra la itsjé tí sín Israel tsitekakuenhya sín xjan la tsítóhe sín la ko itsjé sín tsitekaon sín antsí tsonohe sín la ko nchónhya chojni tsotjinkakonhya tsinhin sín tí nkehe tsjako ch'án.

35 Mé xikaha tsonoxín nkexrí tjenkayáxin jnkojnko asén chojni. Kjánchó kaín tíha tsoyóhe éxí ijnko chica espada chróchr'áte asán na mé tsoxakonhan la ko ts'avá má —ichro ch'án nixjéhe ch'án tí tjan María.

36 Kjaxin ntaha kjuák'e ijnko tjan chrónka itén Dios mé it'in tjan Ana, it'é mé it'in Fanuel, la mé tsík'axrjeníxin ch'án tí ch'ín Aser. Jehe tjan la ó nána tjan. Tí naxa k'uétjarisoá tjan la kótehe tjan. Ntá yatokoá nánó kjuák'eko tí xli tjan

37 ntá jie ochenta y cuatro nánó tsíkók'án tjan. Kuítóehya tjan tí xra kuènte nínko la mé ntahó tjen tjan ch'ehe tjan Ìnchéni Dios xra nchakotjin la ko tie la jnkoyaxón nehya tjan kixin jína tsonixjéhe tjan Dios.

* 2:22 Levítico 12.1-8 † 2:23 Éxodo 13.2,12

³⁸ Ntá kóchjina tí tjan Ana tí yaon, a ntá kjuixin kjuanchehe tjan kjuasáyé Dios ntá kjuankíxin chrónka tjan nkexrí tjen tí xjan Jesús nixjehe tjan kaín tí sín tjejóchónhen kíxin itsi nkexro sinchekaá tí chjasin Jerusalén.

Ntá kjan sín chjasin Nazaret

³⁹ Na ntá tió kjuixin kjuínchexiteyá sín kaín nkehe t'etōan tí ley kuènte Dios ntá kjan sín estado Galilea na mé chjasén sín chaxín Nazaret.

⁴⁰ A ntá tí xjan a mé k'uánkí xjan la ko tsankā xjan la ko imá kónohe xjan kíxin Dios imá tjinkĩtsa tjencheyaon xjan.

Tí xjan Jesús kjuák'e xjan tí nĩnko Jerusalén

⁴¹ Tí it'é la ko ìné tí xjan Jesús xráxín k'uékji sín kaín nánó tí chjasin Jerusalén kíxin tí kia pascua.

⁴² A ntá tió xetjehe ch'ín Jesús tí teyó nánó, ntá sákjuí sín kaín sín tí chjasin Jerusalén kíxin xikaha kuènnen sín kíxin tí kia a.

⁴³ A ntá kjanxin sín ntiha sáchrókjuí sín chjasén sín tió k'uátsínka kia la tí xjan Jesús ó tsíkitohe xjan Jerusalén ntahó, kjánchó ìné xjan la ko ch'ín José xraxinkakonhya sín kíxin kohya tí xjan.

⁴⁴ Jehe sín mé kjuenkayáxin sín kíxin ách'e tí sín kuichréhe mé kuikao sín xjan la ntá xikaha chjina ijnko yaon ó tjejóyá sín ntia tsíkji sín. A ntá kjueyá sín xjan tí tjejó tí sín kjéhya la ko tí sín chóxin sín

⁴⁵ kjánchó k'uitjahya sín xjan. Ntá kjan sín tí chjasin Jerusalén kíxin tsjeyá sín xjan ntiha.

⁴⁶ Ntá k'uátsínka iní yaon ntá k'uitja sín xjan la mé nkaxenhen nĩnko ntiha tjetjaxin xjan jnkosiné tí tjejó tí sín maestro tjako tí ley la tjetinhin xjan tí nkehe ntáchro sín la ko tjetjanchankíhi xjan tí jehe sín.

⁴⁷ Ntá kaín tí sín tjejóntaxín tjejótinjin sín mé chrakon sín kíxin xikaha imá nohe xjan la ko xikaha tjatehe xjan kaín nkehe tjanchankíhi sín xjan.

⁴⁸ Ntá tió k'uíkōn ìné la ko it'é la chrakon sín. Ntá ntáchro ìné kíxin:
—Xjeenni, ¿nkekuènte xikaha kjuich'e? It'á la ko janhan imá kóxakonhenni kjueyáni tí jaha —ichro tjan.

⁴⁹ Ntá ntáchro ch'ín Jesús kíxin:
—¿Nkekuènte tjejá tí jeheni? ¿Á noahya jaha kíxin tóxakonhenni kíxin tí xra kuènte It'éni? —ichro ch'án.

⁵⁰ Kjánchó kíenxínhya sín nkexrí t'axrjexín tí nkehe ntáchro ch'án.

⁵¹ Ntá kjan sín chjasin Nazaret. A ntá ntiha naxā kuítekakōnhen xjan tí jehe sín. A ntá tí ìné la ntá asén tjan xráxín ó nohe kíxin xikaha kónhen.

⁵² La ko naxā k'uánkí xjan kónteto xjan la ko k'uánkí tí kjuaxrexinkaon kuènte xjan la ko Dios kóxrjínhin nkexrí kjuínchexiteyá xjan la ko kjaxin kaín chojni kóxrjínhin sín kíxin jína tjen xjan.

3

*Ch'ín Juan Bautista kjuák'e nteje kjuako itén Dios
(Mt. 3.1-12; Mr. 1.1-8; Jn. 1.19-28)*

¹ A ntá quince nánó k'uék'etōan ch'ín Tiberio tí xra gobierno, la ko tí ch'ín Poncio Pilato k'uégobrador tí estado Judea, la ko tí ch'ín Herodes k'uégobrador tí estado Galilea, la ko tí kíchó ch'án Felipe mé k'uégobrador estado Iturea la ko estado Traconite, la ko ch'ín Lisánias k'uégobrador tí estado Abilinia.

² A ntá ch'ín Anás la ko ch'ín Caifás k'uéchónka sín xra nchat'á t'etōan. A ntá Dios mé kjuanjon kjuachaxin k'uáyéhe ch'ín Juan itjen ch'án nteje tsochrónka ch'án itén Dios. Ntá jehe ch'án it'é ch'án Zacarías.

³ Ch'ín Juan k'uátsínka ch'án kaín tí chjasin chjino tí ntarío Jordán kjuakohe ch'án chojni ntiha kixin chrókuikite sín tí nkehe tjenkayáxin sín chrókuítóhe sín tí ijié sín ntá chrókuikite sín kixin xikaha mé chrókuin ijié sín.

⁴ Mé xikaha kónhen éxi k'uéchronka la ko tsíkjin ch'ín Isaías, mé tí nkexro k'uéchronka itén Dios ósé kixin:

Tsinhin sín itén ijnko nkexro tsjak'e nteje ts'èya tsontáchro kixin:

“Tóxakonhanrá ncheyóxinrá ntia tsixin Inchéni

Takítjehérá ijnko ntia ntoí.

⁵ Kaínín tsaka mé tsoyóxin,

la ko kaín xín jna la ko kaín xín itjo tsitöhe yóxin,

la ko tí ntia tsíxrèya mé tsoxrentoá,

la ko kaín tí ntia yóxinhya la mé tsoyóxin;

⁶ Xikaha mé kaín xín chojni chjasintajni mé ts'ikon sín kixin Dios mé chrókuaáxin sín.”*

Mé xikaha ichro itén Dios.

⁷ A ntá tió kjuíji chojni ntiha kixin ch'ín Juan chrókuikite ch'án sín ntá ntáche ch'án tí jehe sín kixin:

—Jahará tsík'axrjeníxinrá konche. ¿Xá nkexro kjuíntanohará kixin chrókuinkeherá tí kjuanínkaon kuente Dios ó tsi?

⁸ T'ichjánxin kixin chrók'uejorá jnkojína chrókjuákoxinrá kixin chaxín kjuitoxinhínrá tí nkehe tjenkayáxinrá. Jahará nchehnkerá ntáchorá kixin k'uaxrjeníxinrá ch'ín Abraham. Janhan ntáxrjan kixin kjónté tí xro i la Dios tsjacha chrókjuich'éna ch'án chojni k'uaxrjeníxin ch'ín Abraham.

⁹ Kixin tí chica hacha ó tjechónhen tsochrínjinxín tí nta. A ntá kaín xín nta t'ónahya to jína mé tsochrínjin kixin tsoche —ichro ch'án.

¹⁰ A ntá tí chojni mé kjuanchankíhi sín ch'án kixin:

—A ntá tí xikaha, ¿a ntá jeheni nkehe tí chrókjuich'eni? —ichro sín.

¹¹ Ntá kjuátehe ch'ín Juan kixin:

—Tí nkexro chóna yaá camisa la chrókjuinchejitonhen tí nkexro chóntahya. La ko tí nkexro chóna nkehe sine chróchjéhe sín tí nkexro chóntahya nkehe sine —ichro ch'án.

¹² Kjaxin ikui iso tí sín nchekjènkí kixin chrókuikite sín. Ntá kjuanchankíhi sín tí ch'ín Juan kixin:

—Maestro, ¿nkehe chrókjuich'eni jeheni? —ichro sín.

¹³ Ntá ntáchro ch'ín Juan kixin:

—Jehó éxi tí tsík'ítuanhanrá chrókjuinchekjènkirá —ichro ch'án.

¹⁴ Kjaxin iso sín soldado kjuanchankíhi sín ch'án kixin:

—¿Kjaxin jeheni nkehe chrókjuich'eni? —ichro sín.

Ntá kjuátehe ch'án kixin:

—Teéhyará ninkexró tí chichakoén sín la ko ninkexró sich'énéhyará kjuach'ia la ko kjónté tí chichaon tjachará ó la kjuaxróxin chrók'uejorá —ichro ch'án.

¹⁵ Kaín tí chojni chjasin k'uéjóchónhen sín tóxakonhen asén sín tjinkaon sín tsonohe sín kixin á tí ch'ín Juan mé tí Cristo.

¹⁶ Kjánchó chénka ch'ín Juan kaín tí sín tjejó a kixin:

—Janhan mé inta tíkitexián chojni. A ntá tí nkexro itsi chr'éxin mé tsíkítexinrá tí Nchakuen Dios la ko xrohi. Antsí t'etōan ch'án a ntá janhan la kánhyó. Méxra chrókósuàna chrókjuasintankaha ch'án tí correa tí tokaté ch'án.

¹⁷ Jehe ch'án la ó tjexraá ch'án pala sinchetjuáxin ch'án noatrigo kixin tí ntáchjiji trigo la ókjé tsjejo ch'án a ntá tí noatrigo la tsjenájín ch'án la

* 3:6 3.4-6 Isaías 40.3-5

ts'enkachjina ch'án. A ntá tí ntachjiji trigo la tsjakaxín ch'án ijnko xrohi ts'ankahya jnkochrín —mé xikaha ichro ch'ín Juan.

¹⁸ Mé xikaha chronkaxín ch'án la ko itsjé í so nkehe kjuínchexraxinkaon ch'án chojni mé xikaha kjuakoexín ch'án sín tí tan jína.

¹⁹ Kjaxin kjuentuéhe ch'án tí ch'ín Herodes kixin chóna ch'án tí tjan Herodías, mé tí ichjién kichó ch'án Felipe, la ko kjuentuéhe ch'án tí ch'ín Herodes kixin tí í so nkehe jínahya tsíkjach'e ch'án.

²⁰ Kjánchó ch'ín Herodes ántosén ch'án kjónté kuínhin ch'án la kjuínchek'ánkí ch'án tí ijíe ch'án inaá kixin kjuak'echjina ch'án tí ch'ín Juan tí ntöechiso.

Kuíkite ch'ín Jesús

(Mt. 3.13-17; Mr. 1.9-11)

²¹ A ntá naxa kuènhya tíha naxa kjuák'e ch'ín Juan kuíkite ch'án chojni ntá kjaxin ch'ín Jesús mé kuíkite ch'án. A ntá tjenixjehe ch'án Dios ntá xitjehe nkajní

²² ntá k'uínkajin Nchakuen Dios éxí ijnko kontóá tsjehe la kjuák'e chrítaón kja ch'án. Ntá xrinahya kuínhin sín itén nkexro nkaya nkajní ntáchro kixin:

—Jaha mé xjanna la tjuaha tí jaha. Imá chàna kixin nchexiteyána tí jaha.

Tí sín tsík'axrjeníxin ch'ín Jesucristo

(Mt. 1.1-17)

²³ Ch'ín Jesús k'uéchóna ch'án chjino treinta nánó tió kjuankíxin kjuako ch'án. Ntá kjuenkayáxin sín kixin it'é la mé ch'ín José. Ntá it'é tí ch'ín José la mé ch'ín Elí.

²⁴ A ntá it'é tí ch'ín Elí la mé ch'ín Matat; a ntá it'é tí ch'ín Matat la mé ch'ín Leví, a ntá it'é tí ch'ín Leví la mé ch'ín Melqui; a ntá it'é tí ch'ín Melqui la mé ch'ín Jana; a ntá it'é tí ch'ín Jana la mé ch'ín José.

²⁵ A ntá it'é tí ch'ín José la mé ch'ín Matatías, a ntá it'é tí ch'ín Matatías la mé ch'ín Amós, a ntá it'é tí ch'ín Amós la mé ch'ín Nahum, a ntá it'é tí ch'ín Nahum la mé ch'ín Esli; a ntá it'é ch'ín Esli la mé ch'ín Nagai,

²⁶ a ntá it'é tí ch'ín Nagai la mé ch'ín Maat, a ntá it'é tí ch'ín Maat la mé ch'ín Matatías, a ntá it'é tí ch'ín Matatías la mé ch'ín Semei, a ntá it'é tí ch'ín Semei na mé ch'ín José, a ntá it'é tí ch'ín José na mé ch'ín Judá,

²⁷ a ntá it'é tí ch'ín Judá na mé ch'ín Joana, a ntá it'é tí ch'ín Joana la mé ch'ín Resa, a ntá it'é tí ch'ín Resa na mé ch'ín Zorobabel, a ntá it'é tí ch'ín Zorobabel na mé ch'ín Salatiel, a ntá it'é tí ch'ín Salatiel na mé ch'ín Neri,

²⁸ a ntá it'é tí ch'ín Neri na mé ch'ín Melqui, a ntá it'é tí ch'ín Melqui na mé ch'ín Adi, a ntá it'é tí ch'ín Adi na mé ch'ín Cosam, a ntá it'é tí ch'ín Cosam na mé ch'ín Elmodam, a ntá it'é tí ch'ín Elmodam na mé ch'ín Er,

²⁹ a ntá it'é tí ch'ín Er na mé ch'ín Josué, a ntá it'é tí ch'ín Josué na mé ch'ín Eliezer, a ntá it'é tí ch'ín Eliezer na mé ch'ín Jorim, a ntá it'é tí ch'ín Jorim na mé ch'ín Matat,

³⁰ a ntá it'é tí ch'ín Matat la mé ch'ín Leví, a ntá it'é tí ch'ín Leví na mé ch'ín Simeón, a ntá it'é tí ch'ín Simeón na mé ch'ín Judá, a ntá it'é tí ch'ín Judá na mé ch'ín José, a ntá it'é tí ch'ín José na mé ch'ín Jonán, a ntá it'é tí ch'ín Jonán na mé ch'ín Eliaquim,

³¹ a ntá it'é tí ch'ín Eliaquim na mé ch'ín Melea, a ntá it'é tí ch'ín Melea na mé ch'ín Mainán, a ntá it'é tí ch'ín Mainán na mé ch'ín Matata, a ntá it'é tí ch'ín Matata na mé ch'ín Natán,

³² a ntá it'é tí ch'ín Natán na mé ch'ín David, a ntá it'é tí ch'ín David na mé ch'ín Isaí, a ntá it'é tí ch'ín Isaí na mé ch'ín Obed, a ntá it'é tí ch'ín Obed na mé ch'ín Booz, a ntá it'é tí ch'ín Booz na mé ch'ín Salmón, a ntá it'é tí ch'ín Salmón na mé ch'ín Naasón,

³³ a ntá it'é tí ch'ín Naasón na mé ch'ín Aminadab, a ntá it'é tí ch'ín Aminadab na mé ch'ín Aram, a ntá it'é tí ch'ín Aram na mé ch'ín Esrom, a ntá it'é tí ch'ín Esrom na mé ch'ín Fares, a ntá it'é tí ch'ín Fares na mé ch'ín Judá,

³⁴ a ntá it'é tí ch'ín Judá na mé ch'ín Jacob, a ntá it'é tí ch'ín Jacob na mé ch'ín Isaac, a ntá it'é tí ch'ín Isaac na mé ch'ín Abraham, a ntá it'é tí ch'ín Abraham ná mé ch'ín Taré, a ntá it'é tí ch'ín Taré na mé ch'ín Nacor,

³⁵ a ntá it'é tí ch'ín Nacor na mé ch'ín Serug, a ntá it'é tí ch'ín Serug na mé ch'ín Ragau, a ntá it'é tí ch'ín Ragau na mé ch'ín Peleg, a ntá it'é tí ch'ín Peleg na mé ch'ín Heber, a ntá it'é tí ch'ín Heber na mé ch'ín Sala,

³⁶ a ntá it'é tí ch'ín Sala na mé ch'ín Cainán, a ntá it'é tí ch'ín Cainán na mé ch'ín Arfaxad, a ntá it'e tí ch'ín Arfaxad na mé ch'ín Sem, a ntá it'é tí ch'ín Sem na mé ch'ín Noé, a ntá it'é tí ch'ín Noé na mé ch'ín Lamec,

³⁷ a ntá it'é tí ch'ín Lamec na mé ch'ín Matusalén, a ntá it'é tí ch'ín Matusalén na mé ch'ín Enoc, a ntá it'é tí ch'ín Enoc na mé ch'ín Jared, a ntá it'é tí ch'ín Jared na mé ch'ín Mahalaleel, a ntá it'é tí ch'ín Mahalaleel na mé ch'ín Cainán,

³⁸ a ntá it'é tí ch'ín Cainán na mé ch'ín Enós, a ntá it'é tí ch'ín Enós na mé ch'ín Set, a ntá it'é tí ch'ín Set na mé ch'ín Adán, a ntá Dios mé xjeen ch'ín Adán.

4

Ch'ín Tsochren chrókjuachroe tí ch'ín Jesús

(Mt. 4.1-11; Mr. 1.12-13)

¹ A ntá ch'ín Jesús imá chóna ch'án kjuachaxién Nchakuen Dios ntá kjanxin ch'án tí ntarío Jordán. Ntá tí Nchakuen Dios sákjuiko ch'án nteje.

² Ntaha kjuák'e ch'án cuarenta yaon na ntá tí ch'ín Tsochren tjinkaon chrókjuachroe tí jehe ch'án. Kjónehya ch'án ninkehó tí cuarenta yaon a, a ntá chr'éxin ntá xrínahya ik'uén ch'án kjinta.

³ Ntá ntáchro tí ch'ín Tsochren kixin:

—Tí chaxín jaha Xjeen Dios la ntáche tí xro i kixin chrók'óna niotja.

⁴ A ntá kjuátehe ch'ín Jesús ntáchro ch'án kixin:

—Náhi. Ntáchro xroon itén Dios kixin: “Jehya niotja ó chrók'uejóchónxin chojni. Náhi. Kaín tí tan nixja Dios tjejóchónxin chojni”* —ichro ch'án.

⁵ Ntá sákjuiko ch'ín Tsochren tí ch'ín Jesús ijnko jna imá noi ntá kjuako tí Jínahya kaín tí nación siín chjasintajni.

⁶ Ntá ntáchro tí ch'ín Tsochren kixin:

—Janhan tsotjaha kaín tí kjuachaxin la ko kaín tí nkehe tjete chóna kaín tí nación a. Janhan na k'uayáha kaín tíha la ntá jie tsotjaha tí nkexro tjínkavan tsotjaha.

⁷ Tí tsjak'éxian tóch'ian tsjikosáyana tí janhan ntá kaín tí nkehe la ts'óna kuéntá —ichro ch'án.

⁸ Ntá kjuátehe ch'ín Jesús ntáchro ch'án kixin:

—Sátjia Satanás, kixin xroon itén Dios ntáchro kixin “Chrókjuíkosáyehé Ìnchéni Dios la jehó ch'án chrókjuich'ehé xra”† —ichro ch'án.

⁹ A ntá ch'ín Tsochren mé sákjuiko ch'ín Jesús tí chjasin Jerusalén la sákjuiko ch'án tí chrítaón tí kja ninko, a ntá ntáchro ch'án kixin:

—Tí chaxín Xjeen Dios jaha la titohé t'anótjenxian tí noi ntíhi

¹⁰ kixin ntáchro xroon itén Dios kixin:

Dios mé ts'etuñhen tí sín ángel kuénte ch'án kixin ts'ayakonhan sín.‡

¹¹ Tsotsé sín itjá

kixin tsotéhya totá ts'itja xro tí ts'anótjen§

* 4:4 Deuteronomio 8.8 † 4:8 Deuteronomio 6.13 ‡ 4:10 Salmo 91.11 § 4:11 Salmo 91.12

—mé xikaha ichro ch'ín Tsochren.

¹² Ntá kjuátehe ch'ín Jesús ntáchro ch'án kixin:

—Náhí. Kjaxin ntáchro xroon itén Dios kixin: “Chjíníhya chrókjuásixián kjuaxroan kjuachaxin kuènte Ìnchéni Dios”^{*} —ichro ch'ín Jesús.

¹³ Mé xikaha tió kjuachahya tí ch'ín Tsochren kaín nkehe chrók'uetuēhen tí ch'ín Jesús ntá k'uaxrjenta ch'án iso yaon.

Ch'ín Jesús kjuankixin ch'án tí xra kuènte ch'án estado Galilea

(Mt. 4.12-17; Mr. 1.14-15)

¹⁴ Ntá ch'ín Jesús xíkjan ch'án estado Galilea inaá na imá chóna ch'án kjuachaxin kuènte Nchakuen Dios. Ntá tjejóto sín nkuíxín ntiha kixin nkexro tí jehe ch'án.

¹⁵ Kjuakoxin ch'án tí ninkoe sín kaín chjasin la ko kaín xín chojni kjuanchia sín kjuasáya kixin kóxrjínhin sín tí kjuako ch'án.

Ch'ín Jesús kjuák'e ch'án chjasin Nazaret

(Mt. 13.53-58; Mr. 6.1-6)

¹⁶ Ntá ch'ín Jesús sákjuí ch'án chjasin Nazaret na mé tí chjasin tsík'ánkixin ch'án. Ntá tí yaon t'ok'éhe sín mé k'uixenhen ch'án ijnko ninko Israel kixin xikaha kuēhen ch'án. Ntá kjuák'exín toté ch'án kixin sinchekuáxin ch'án tí xroon itén Dios.

¹⁷ Chjéhe sín ch'án tí xroon kuènte tí profeta Isaías. Ntá kuakitjehe ch'án tí xroon ntá k'uitja ch'án nketí nixja xikihí:

¹⁸ Tí Nchakuen It'eni Dios tjetjinkitsana má,

kixin kjueyána ch'án kixin tsoxrjanka tí tan jína kuènte Dios tsjakohá tí sín nòa. K'uetuanna ch'án kixin sintakitohá jína tí sín t'ává asén kixin chónahya sín

nkerí tsaáxin sín,

la ko tsjakohá tí sín tjejóchjina kixin nkexrí tsaá sín,

la ko sintak'ikuan tí sín t'ikonhya,

la ko sintakaá kaín tí sín tjejótojasóte kohya nkehe tsaáxin sín,

¹⁹ la ko tsoxrjanka kixin ó kjuixraká tí yaon kixin tí nkexro tsitekaon la tsaá sín.[†]

²⁰ A ntá ch'ín Jesús kjuixin kjuínchekuáxin ch'án tí xroon, a ntá chjéhe ch'án tí ch'ín tjinkitsa tí xra ninko ntá kjuák'etjaxin ch'án. Ntá kaín tí sín tsíkójnkotsé ntiha ninko naxa tjejókomá sín tí jehe ch'án.

²¹ Ntá kjuankixin chronkaxín ch'án ntáchro ch'án kixin:

—Ntá ijie la ó xiteyá tí nkehe kjuintakuáxian tí xroon itén Dios kuínhínra —ichro ch'án.

²² Ntá kaín sín kóxrjínhin sín tí kjuako ch'ín Jesús la ko chrakon sín kixin náxrjón tí nkehe nixja ch'án. Ntá kjuanchankíhi sín kichó sín ntáchro sín kixin:

—¿A jehya xjeen ch'ín José tíhi? —ichro sín.

²³ Ntá kjuátehe ch'ín Jesús ntáchro ch'án kixin:

—Kjá tsontáchorá kixin janhan ijnko chojni ch'e xroan chrókjuintakitohá jína asenná senó, la ko tsontáchorá kixin tí nkehe kuínhínra kjuít'a tí chjasin Capernaum xikaha chrókjuít'a ntihi chjasenná, tsixrorá —ichro ch'án.

²⁴ Naxa tjenixja ch'án ntáchro ch'án kixin:

—Ijnko nkehe chaxín tsotjonkará kixin tí sín chjasén ijnko nkexro chrónka itén Dios la mé xráxín chóntehya sín kjuasáyé tí nkexro a.

²⁵ Chaxín ntáxrjan kixin k'uéjé itsjé chojni chjin tsíkók'án tí nación Israel tió kjuák'e ch'ín Elías tí nkexro k'uéchrónka itén Dios la ntá í k'uániáhya chrin iní nánó ko t'ò la ko imá kókjinta nkuíxín chjasin ntiha.

* 4:12 Deuteronomio 6.16 † 4:19 4.18-19 Isaías 61.1-2

26 Kjánchó Dios la k'uetuēnhya ch'ín Elías sáchrókjuitsjehe ch'án nijnko chojni chjin tsíkók'án tí nación Israel. Náhi. Dios k'uetuēnhen ch'án kixin sátsjitsjehe ch'án ijnko chojni chjin tsíkók'án itjen chjasin Sarepta chjino chjasin Sidón.‡

27 Kjaxin nación Israel k'uéjé nchónhya chojni chóna chinlepra tió kjuák'e ch'ín Eliseo chrónka ch'án itén Dios, kjánchó nijnko sín kuítóehya sín jína la mé jehó ch'ín Naamán kjuixin ch'án nación Siria mé kuítóhe ch'án jína§ —mé xikaha ichro ch'án.

28 A ntá tió kuínhin sín xikaha ntáchro ch'ín Jesús la ntá kaín tí chojni k'uéjóxehen ninko la mé imá kónínkaon sín.

29 K'uínkatjen sín itsé sín ch'án sákjuíko sín ch'án tí ikon chjasin la sákjuíko sín ch'án chrítaón tí tjo tí tjen tí chjasin a chrókjuinçek'anótjēnxin sín ch'án tí tjo a.

30 A ntá ch'ín Jesús k'uátsínka jnkosiné tí síin tí jehe sín la sákjuí ch'án.

Ijnko chojni chóna ijnko nchakuen tí jínahya
(Mr. 1.21-28)

31 A ntá ch'ín Jesús sákjuí ch'án tí chjasin Capernaum na mé ijnko chjasin estado Galilea, na ntá ntaha kjuankixin ch'án kjuakohe ch'án chojni tí yaon t'ok'éhe sín.

32 Chrakon sín kixin nkexrí kjuako ch'án kixin kjuakoxin ch'án kixin chóna ch'án kjuachaxin.

33 A ntá nkaxenhen ninko kjuák'e ijnko ch'ín chóna ijnko nchakuen tí jínahya k'óyakoxín itén tí ch'ín a, ntáchro kixin:

34 —Títóhēni; ¿nkekuēnte tjiaté tí jeheni kaín ni, jaha Jesús kjuíxian chjasin Nazaret? ¿Á k'uinka kixin sinček'itjáyanni? Ó tjátsōan tí jaha la ko nōna kixin jaha mé tí nkexro tjóá kuēnte Dios —ichro tí nchakuen tí jínahya.

35 Ntá ch'ín Jesús jiehe k'uetuēnhen tí nchakuen tí jínahya ntáchro ch'án kixin:

—Táníá. T'axrjéxian tí ch'ín a —ichro ch'án.

A ntá tí nchakuen tí jínahya kjuáka tí ch'ín a kjuítsínka ch'án nonte jnkosiné tí síin sín la k'uaxrje tí nchakuen tí jínahya la kohya ninkehó kónhen tí ch'ín kjuítsínka.

36 A ntá kaín sín chrakon sín itjo sín kichó sín kixin:

—¿Xá nkexrí kixin xikaha nixja tí ch'ín i? Jehe ch'án chóna kjuachaxin kixin k'uetuēnhen ch'án tí nchakuen tí jínahya k'uaxrjéxín tí nkexro i —ichro sín.

37 A ntá nkuíxín ntiha ikjo sín kichó sín kixin nkerí kjuaxroan kjuích'e ch'ín Jesús.

Ch'ín Jesús kjuínčekitohe jína tí tjan ich'ee ch'ín Simón Pedro
(Mt. 8.14-15; Mr. 1.29-31)

38 Ntá ch'ín Jesús k'uaxrjéxín ch'án tí ninko la ntá k'uixenhen ch'án ntōe ch'ín Simón. A ntá tí tjan ich'ee ch'ín Simón mé níhi tjan chóna tjan ijnko sóa jié ntá chronóehē sín ch'án kixin chrókjuinčekitohe ch'án tjan jína.

39 Ntá k'uísén ch'ín Jesús tí tjen tjan ntá k'uetuēnhen ch'án tí sóa a ntá kjuuin. Ntá tuénxín k'uàya tjan la ntá kjuanjon tjan nkehe sine sín.

Ch'ín Jesús kjuínčekitohe ch'án jína itsjé chojni níhi
(Mt. 8.16-17; Mr. 1.32-34)

40 A ntá kuétaón yaon ntá kaín tí sín chóna sín sinníhi chóna sín nchónhya clase chin mé kuikao sín tí tjen ch'ín Jesús. Ntá kjuak'etja tja ch'án jnkoinko tí jehe sín a ntá xikaha kuítóhe sín jína.

‡ 4:26 4.25,26 1 Reyes 17.9;18.1 § 4:27 2 Reyes 5.1-14

41 La ko nchónhya chojni níhi chóna nchakuen tí jínahya la mé k'uaxrje tí nchakuen tí jínahya la k'óyako la ko ntáchro kixin:

—Jaha mé Xjeen Dios —mé ichro tí nchakuen tí jínahya.

Kjánchó ch'ín Jesús k'uetuēnhen ch'án tí nchakuen tí jínahya la kjuanjonhya ch'án kjuachaxin kixin tsonixja kixin ó nohe tí nchakuen tí jínahya kixin jehe ch'án na mé tí nkexro Cristo.

Ch'ín Jesús kjuako ch'án tí estado Galilea

(Mr. 1.35-39)

42 A ntá tí kóyaon k'uínkaséyan ntá ch'ín Jesús k'uaxrjenta ch'án chjasin sákjuí ch'án nteje. A ntá kaín tí chojni kjuíkjejá sín ch'án la k'uitja sín tí tjen ch'án. Tjinkaon sín chrókjuinchexrjenhen sín ch'án kixin sáchrókjuihya ch'án ókjé.

43 Kjánchó kjuátehe ch'ín Jesús ntáchro ch'án kixin:

—T'ichjánxin kixin sátsja kaín chjasin ókjé tsoxrjanka tí tan jína kuēnte Dios kixin nkexrí tí kjuachaxin t'etoan Dios, kixin xra ó mé k'uinka —ichro ch'án.

44 A ntá xikaha k'uájkjako ch'ín Jesús kaín tí ninko Israel tí estado Galilea.

5

Kjuaxroan itsé sín koche

(Mt. 4.18-22; Mr. 1.16-20)

1 Ntá ijnko yaon kjuák'e ch'ín Jesús chrínta ntayaon Genesaret ntá kóchjina nchónhya chojni na mé k'uíxitja kichó sín kixin tjinkaon sín chrókuinhin sín itén Dios.

2 Ntá k'uíkon ch'ín Jesús kixin tjejó iyó ntabárcō jehó chjino chrínta ntayaon. A ntá tí sín itsé koche mé tsík'axrjexín sín ntiha la k'uéjó sín tjentoá sín la ko tjejójtjemá sín tí nchísén tséya sín koche.

3 Ntá ch'ín Jesús k'uit'ótjen ch'án ijnko tí ntabárcō ntiha na mé ntabárcō kuēnte ch'ín Simón na ntá chronóehē ch'án tí ch'ín Simón kixin sátsjiko ch'án ntabárcō ijnko chrínta ntá kjinhya. Ntá ntahó kjuák'enkáya ch'ín Jesús tí nta kjuák'etjāxin ch'án kjuákohe ch'án nchónhya chojni síin chrínta ntá.

4 A ntá tió kjuixin nixja ch'án ntá ntáche ch'án tí ch'ín Simón kixin:

—Tjiko ntabárcō tí tjiá ntá ninka ntá itérá tí nchísén tseyará koche —ichro ch'án.

5 Ntá kjuátehe ch'ín Simón ntáchro ch'án kixin:

—Maestro, kjuích'eni xra kuenté tie la tséhyani ninkehó koche. Kjánchó tí jaha xikaha kuétuēnhēni la mé tsochr'ánni tí nchísén ínaá —ichro ch'án.

6 Na ntá xikaha kjuích'e sín la ntá nchónhya koche tsísé tí nchísén la ntá tí nchísén kjuankixin tinkák'ichje.

7 Ntá k'uèyaxin sín tja sín kixin chróxrakoa tí sín ch'eko sín xra tjejóxēnhen tí íjnko ntabárcō kixin tsjinkitsa sín. Ntá xrákao sín ntabárcō kuēnte sín ntá kjuínchekaón sín yóí tí ntabárcō ntá chrókjuachahya tí ntabárcō na tjinkaon chrók'uániánkí ntá.

8 Ntá xikaha k'uíkon ch'ín Simón Pedro ntá kjuák'exín toch'in ch'án nkayakon ch'ín Jesús ntá ntáchro ch'án kixin:

—Tītōhēni Inchēni kixin jeheni ijnko chojni chóna jje —ichro ch'án.

9 Mé xikaha ichro ch'ín Simón kixin chrakon ch'án la ko kjaxin chrakon tí íso sín tjejóko ch'án kixin xikaha kónhen xrenájín nchónhya koche.

10 La ko ch'ín Jacobo la ko ch'ín Juan, xjeen ch'ín Zebedeo, na mé jnkokoá ch'eko sín xra ch'ín Simón, la kjaxin chrakon sín. Kjánchó ntáche ch'ín Jesús tí ch'ín Simón kixin:

—Chrakonhya. Senó la koche k'uétse la nta jie la náhi la mé chojni tsjéyá —ichro ch'án.

¹¹ Ntá tió kjuíjiko sín tí ntabárc̄o tí chrínta nt̄a la kuítóhe sín kaín nkehe kuènte sín ntá chréhe sín sákjuíko sín tí ch'ín Jesús.

Ch'ín Jesús kjuínchekitohe ch'án jína ijnko chojni chóna chinlepra (Mt. 8.1-4; Mr. 1.40-45)

¹² Kjuák'e ch'ín Jesús ijnko tí chjasin, ntá kui ijnko chojni níhi chóna chinlepra. A ntá tió k'uíkon ch'án tí ch'ín Jesús ntá kjuák'exín toch'in ch'án chronóhe ch'án jnkójina ntáchro ch'án kixin:

—Ínchéni, tí tjinkávan jaha la jína chrókjuínchekitohéni jína —ichro ch'án.

¹³ Ntá ch'ín Jesús kjuéntoá tja ch'án ntá kjuak'etja tja ch'án chrítaón tí sinníhi ntáchro ch'án kixin:

—Méxra xikaha tjínkavan. Ntá jie sintakitoha jína —ichro ch'án.

Ntá xikaha ichro ch'án ntá tí chinlepra tuénxín kjuínhin tí sinníhi.

¹⁴ A ntá k'uétuēhen ch'ín Jesús tí ch'ín a kixin chróchenkahya ch'án ninkexró. Ntáchro ch'án kixin:

—Sátjia tjítsjehé tí nchat'á la tsjánjuan tí nkehe tsík'etoan ch'ín Moisés ts'áyéhe Dios* kixin ntá tsonoexín kaín xín chojni kixin ó kuítóha jína —ichro ch'án.

¹⁵ Kjánchó antsí k'uíxikónohe sín nkexrí tí kjuaxroan kjuasin ch'ín Jesús, ntá nchónhya chojni k'uíxikóchjinehe sín ch'án kixin tsinhin sín nkehe tsjako ch'án, la ko tsitoxín sín jína tí chin chóna sín.

¹⁶ Kjánchó ch'ín Jesús la k'uaxrjenta ch'án tí kohya chojni la ntaha nixjeexín ch'án Dios.

Ch'ín Jesús kjuínchekitohe ch'án jína ijnko ch'ín tsík'en tote (Mt. 9.1-8; Mr. 2.1-12)

¹⁷ A ntá ijnko yaon kjuák'ekjako ch'ín Jesús na ntá ntiha k'uéjótjaxin iso sín fariseo la ko iso tí sín tjako tí ley, tsíkjixin sín kaín tí chjasin ntsí estado Galilea la ko kaín tí chjasin ntsí estado Judea la ko tí chjasin Jerusalén. Ntá tí kjuachaxin kuènte Dios kjuakoxin ch'án kixin sinchekitohe ch'án chojni jína.

¹⁸ Ntá kui iso chojni tinkátsénki sín ijnko ch'ín tsík'en tote tjenkáya ijnko kania. Ntá tjinkaon sín chrók'uixenko sín ch'án tí nchia kixin chrókjuak'e ch'án tí tjen ch'ín Jesús tjetjako ch'án.

¹⁹ Kjánchó xitjahya ts'ixenhen sín kixin nchónhya chojni síxenhen nchia. Ntá k'uit'ótjen sín tí chrítaón nchia, ntá kjuakjin sín iso teja la ko tí nta sít'ó ntá ntiha kjuinkajinxin sín tí ch'ín níhi tjenkáya kania ntoí tí tjen ch'ín Jesús.

²⁰ Na ntá tió k'uíkon ch'ín Jesús kixin imá tinkáchónki sín ch'án ntá nixjehe ch'án tí ch'ín níhi, ntáchro ch'án kixin:

—Jaha, ó kjuixin kjuínhan tí jie chonta —ichro ch'án.

²¹ A ntá tí sín maestro tjako tí ley la ko tí sín fariseo kjuankixin sín kjo sín asén sín kixin: “¿Xá nkexro tíhi ch'ia ch'án ncheyóhe ch'án asén ch'án Dios? Ninkexró xitjahya tsjakjin ijie kixin jehó Dios mé chóna kjuachaxin tsjatsen ijie chojni”, mé xikaha kjuenkayáxin sín.

²² Ntá ch'ín Jesús la ó nohe ch'án tí nkehe tjenkayáxin sín ntá ntáchro ch'án kixin:

—¿Nkekuènte kixin xikaha tjenkayáxinrá?

²³ ¿Nkehe antsí xrahya chróntátjan ch'án? ¿Á antsí xrahya chróntátjan ch'án kixin ó kjuixin kjuínhin ch'án tí ijie yámá ch'án, o á antsí xrahya chróntátjan ch'án kixin chrók'uínkatjen ch'án sáchrókjuí ch'án?

* 5:14 Levítico 14.4-8

24 Méxra ijie tsjákoxian kixin tí Xjeen Dios K'óna Chojni mé chóna kjuachaxin ntihi chjasintajni tsjakjinhin ijie chojni —ichro ch'án.

Ntá k'uetuēnhen ch'án tí ch'ín tsík'en tote ntáchro ch'án kixin:

—Jaha tétuanhan t'inkatjen tjatsíyan kaniāa la sátjia ntōa —ichro ch'án.

25 Ntá tuénxín k'uínkatjen tí ch'ín tsík'en tote nkayakon kaín tí sín siín a la kuákja ch'án kaniēe ch'án k'uékjak'eták'á ch'án ntá sákjuí ch'án ntōe ch'án la kjuanchehe ch'án Dios kjuasáya.

26 Ntá kaín sín imá chrakon sín la kjuanchehe sín Dios kjuasáya kjónté chrakon sín la ntáchro sín kixin:

—Ijie mé k'uíkonní antsí má kjuaxroan jie —ichro sín.

Ch'ín Jesús k'uíyēhe ch'án tí ch'ín Leví

(Mt. 9.9-13; Mr. 2.13-17)

27 Ntá chr'éxin ntá ch'ín Jesús k'uaxrjexín ch'án nchia ntá k'uíkon ch'án ijnko ch'ín nchekjènkí mé it'in ch'án Leví tjetjāxin ch'án tjech'e ch'án xra nkaxenhen tí nchia ntsí tí xenkaxín chichaon a. Ntá ntáchro ch'án kixin:

—Chr'éhé tí janhan —ichro ch'án.

28 Ntá ch'ín Leví mé tuénxín k'uínkatjen ch'án la ntá kuítóhe ch'án kaín xín nkehe ntá chr'éhe ch'án tí ch'ín Jesús.

29 Ntá chr'éxin ch'ín Leví chóna ch'án ijnko kia jie ntōe ch'án kjuikosáyehe ch'án tí ch'ín Jesús. Kjāxin k'uéjótjē jí tí sín nchekjènkí la ko itsjé í so chojni chóna jie k'uéjótjāxinko sín tí ch'ín Jesús chjino tí mesa a.

30 A ntá tí sín fariseo la ko tí sín maestro tjako tí ley la mé kjuankíxin sín tjonta sín tí sín k'uájiko ch'ín Jesús ntáchro sín kixin:

—¿Nkekuēnte ntekoará la ko t'ikoará tí sín nchekjènkí la ko tí sín chóna jie? —ichro sín.

31 A ntá kjuátehe ch'ín Jesús ntáchro ch'án kixin:

—Tí chojni níehya t'ichjānxienhya sín nkexro sich'e xroan. Náhí. Jehó tí sín níhi mé t'ichjānxinhin sín nkexro sich'ehe sín xroan.

32 Janhan la k'uinkahya ntihi kixin chrók'uíyāha tí sín jína tjejó. Náhí. Janhan k'uinka kixin ts'iyāha tí sín chóna jie kixin chrókuítóhe sín tí ijie sín ntá chrókjuinkí sín tí tjenkayāxin sín —ichro ch'án.

Tjančankíhi sín tí ch'ín Jesús kixin á chrókjónēhya sín tió tsonixjēhe sín Dios

(Mt. 9.14-17; Mr. 2.18-22)

33 A ntá kjuanchankíhi sín tí ch'ín Jesús kixin:

—¿Nkekuēnte kixin tí sín k'uék'ajiko ch'ín Juan jnkoyaxón nehya sín na nixjēhe sín Dios, la ko kjāxin xikaha ch'e tí sín xriko tí sín fariseo, a ntá tí sín xrikoa la ine sín la ko it'í sín? —ichro sín.

34 Ntá kjuátehe ch'ín Jesús kixin:

—¿Xá chrókjuachará chrókuétuēnhenrá kaín tí sín tsík'íyēhe sín tsíkóchjina tí tjejó tí sín tsíkótehe kixin chrókjónēhya sín tí naxa tjejóko sín tí ch'ín tsíkótehe?

35 Kjānchó tsjixraká tí yaon itsi chojni tsotsé sín tí ch'ín tsíkótehe sátsjiko sín ch'án. Ntá tí sín tsíkóchjina la ts'ává sín la í sinehya sín —ichro ch'án.

36 Kjāxin kjuíncheyóexin ch'án ntáchro ch'án kixin:

—Ninkexró chrókuaté ijnko camisa nixin ntá chrókjuak'eniēhe ijnko camisa ntāxin kixin xikaha chrókjuich'e sín ntá chrók'uitjāyan tí camisa nixin la ko kjāxin tí t'ō ka k'uaxrjexín tí camisa nixin tsoyóehya tí camisa ntāxin.

37 Kjāxin chrókuíkiahyará xranvino nixin ijnko tjuaxran ntāxin kixin tí xikaha chrókjuich'erá la chrók'uichje tí tjuaxran ntāxin ntá chrók'uitjāyan tí xran la ko chrók'uitjāyan tí tjuaxran.

38 A ntá tí xranvino nixin chrókuikia ijnko tjuaxran nixin kixin yóí la chrók'uitjāyanhya.

³⁹ La ko kjaxin ninkexró tió tsík'i tí xran ntaxin naxa chrókóxrjínhín chrók'ui xran nixin. Náhi. Tsontáchro ch'án kixin íchá jína tí xran ntaxin, tsixro ch'án —mé xikaha ichro ch'ín Jesús.

6

Tí sín k'uájiko ch'ín Jesús mé k'uín sín iso noatrigo ijnko yaon t'ok'éhe tí sín israelita

(Mt. 12.1-8; Mr. 2.23-28)

¹ Ijnko yaon t'ok'éhe sín la ch'ín Jesús k'uátsínka ch'án iso nonte t'óna noatrigo. Na ntá tí sín k'uájiko ch'án mé ik'uín sín iso noatrigo la kjuankixin sín nkaya tja sín ó k'óntajinyá sín tí noa ntá kjóne sín.

² Ntá iso tí sín fariseo kjuanchankí sín kixin:
—¿Nkekuènte kixin tjejoch'erá xra jie? La mé kohya kjuachaxin tsonhen xra tí yaon t'ok'éheni —ichro sín.

³ Ntá kjuátehe ch'ín Jesús kixin:
—¿Jahará á kjuínchekuáxinhyará tí xroon chrónka nkehe kjuích'e ch'ín David la ko tí sín k'uájiko ch'án tió k'uén sín kjinta?

⁴ Na mé jehe ch'án mé k'uixenhen ch'án ntøe Dios la kjóne ch'án tí niotja tsíkóyaon, la ko kjaxin chjéhe ch'án tí niotja tí sín k'uájiko ch'án kjónté jehó siín kjuachaxin sine tí sín nchat'á* —ichro ch'ín Jesús.

⁵ Kjaxin ntáchro ch'án kixin:
—A ntá tí Xjeen Dios K'óna Chojni mé chóna kjuachaxin ts'etøan nkexrí tsonhen tí yaon t'ok'éheni —ichro ch'án.

Ch'ín Jesús kjuínchekitohe jína ijnko ch'ín tsíxámá tja

(Mt. 12.9-14; Mr. 3.1-6)

⁶ A ntá í jnko yaon t'ok'éhe chojni ntá k'uixenhen ch'ín Jesús ijnko nínko Israel la ntá kjuankixin kjuako ch'án. A ntá ntaha kjuák'e ijnko ch'ín tsíxámá tja ch'án chjina.

⁷ Na ntá tí sín tjako tí ley la ko tí sín fariseo tjejó sín tsáyehe sín tí ch'ín Jesús chrók'uiikon sín á sinchekitohe ch'án chojni jína tí yaon t'ok'éhe sín kixin ntá chrók'ueka sín ch'án jie.

⁸ Kjánchó jehe ch'án ó nohe ch'án nkehe tjenkayáxin asén sín ntá nixjehe ch'án tí ch'ín tsíxámá tja ntáchro ch'án kixin:

—T'ínkatjen, tjak'e jnkosiné ntihi —ichro ch'án.

Ntá k'uínkatjen tí ch'ín a kjuák'exín tote ch'án.

⁹ Ntá nixjehe ch'ín Jesús tí í so sín ntáchro ch'án kixin:
—Tsjánchánkíhára ijnko xra. Tí yaon t'ok'éheni la, ¿á jína chrókjuich'eni ijnko nkehe jína ní o á chrókjuich'eni ijnko nkehe jínahya? ¿Á chrókjuinchekitohe chojni jína ní o á chrók'óyánni chojni? —ichro ch'án.

¹⁰ Ntá ch'ín Jesús komá ch'án kaín tí chojni siín ntiha ntá nixjehe ch'án tí ch'ín níhi ntáchro ch'án kixin:

—Tjéntoá tjá —ichro ch'án.

A ntá tí ch'ín a xikaha kjuích'e ch'án ntá kuitøhe tja ch'án jína.

¹¹ Kjánchó tí sín fariseo tjejó mé kónínkaon sín mé ntá kjo sín kichó sín kixin tjinkaon sín chrók'óyán sín tí ch'ín Jesús.

Ch'ín Jesús kjueyá ch'án tí teyó sín ts'ajiko ch'án

(Mt. 10.1-4; Mr. 3.13-19)

¹² A ntá ijnko yaon ch'ín Jesús sákjui ch'án ijnko jna kixin ntaha tsonixjeexín ch'án Dios la ntá ntahó kjuák'e ch'án kuenté tie tjenixjehe ch'án Dios.

* 6:4 6.3-4 1 Samuel 21.6; Levítico 24.5-9

¹³ A ntá tí k'uínkaséyan a na mé k'uíyehé ch'án tí sín chréhe sín ch'án ntá kjueyá ch'án teyó sín kixin ts'óna sín apóstol ts'ajiko sín ch'án.

¹⁴ A ntá tí sín í mé xikihi it'in sín. Na mé ch'ín Simón la ntá ch'ín Jesús kjuínchek'in ihnié ch'án Pedro kjaxin; la ko kichó ch'án ch'ín Andrés; la ko ch'ín Jacobo la ko ch'ín Juan, la ko ch'ín Felipe, la ko ch'ín Bartolomé,

¹⁵ la ko ch'ín Mateo, la ko ch'ín Tomás, la ko ch'ín Jacobo la mé it'é mé it'in Alfeo; la ko í jnko ch'ín Simón na mé tí ch'ín a mé k'uék'aji tí partido cananista;

¹⁶ la ko ch'ín Judas la kichó ch'án mé it'in Jacobo; la ko ch'ín Judas Iscariote tí ch'ín kjuínchekji tí ch'ín Jesús.

Ch'ín Jesús kjuakohé ch'an nchónhya chojni

(Mt. 4.23-25)

¹⁷ Ntá ch'ín Jesús la ko tí jehe sín k'uínkajinxin sín tí jna ntá k'uéjó sín nonte yóxin jehe ch'án la ko tí sín kjueyá ch'án. Kjaxin k'uixikóchjina nchónhya chojni kjuixin nkuixín estado Judea la ko chjasin Jerusalén la ko tí chrínta ntayaon tí sín tí chjasin Tiro la ko tí chjasin Sidón. Ó kjui sín kixin tsinhin sín tí nkehe tsjako ch'ín Jesús la ko tsitohé sín jína.

¹⁸ A ntá tí sín kjuaxróxinhya k'uéjó k'uéchóna sín nchakuen jínahya na mé kuitohé sín jína kjaxin.

¹⁹ Kaín chojni tjinkaon chrókuákóxin sín tí ch'ín Jesús kixin kjuínchekitohé ch'án jína kaín xín chojni kixin jehe ch'án chóna ch'án kjuachaxin jié.

Tí kjuachéhe la ko tí kjuaxróxinhya

(Mt. 5.1-12)

²⁰ Ntá komá ch'ín Jesús tí sín k'uájiko ch'án ntá ntáchro ch'án kixin:

—Náxrjón tjejorá jahará nõará kixin chontará kjuachaxién Dios.

²¹ 'Náxrjón tjejorá jahará t'énxinrá kjinta ijie kixin chr'éxin sinterá jína.

'Náxrjón tjejorá jahará tsjankará ijie kixin chr'éxin tsjanorá.

²² 'Náxrjón tjejorá jahará nínkakonhanrá chojni la ko ts'inkítíará sín sátsjirá ókjé, la ko t'ántaxínhanrá sín la ko t'ákjenxin sín ihniárá éxí ijnko nkehe jínahya kixin tinkachónkirá tí Xjeen Dios K'óna Chojni.

²³ Tsocháhará má la ko imá tsochontará kjuachéhe tí yaon a kixin ts'ayéhérá nkehe kuente nkaya nkajni. A ntá xikaha tí t'áchríi tí sín jínahya ch'e la mé ósé kjuate sín tí sín k'uéchronka itén Dios.

²⁴ 'A ntá jahará rícorá kjuaxróxinhya ts'ejorá chr'éxin kixin ó kjuixin k'uayéhérá kaín nkehe.

²⁵ 'A ntá jahará kjónterá jína, kjuaxróxinhya ts'ejorá chr'éxin kixin ts'énxinrá kjinta.

'A ntá jahará tjanorá jie, kjuaxróxinhya ts'ejorá chr'éxin kixin ts'avará la ko tsotsjankará.

²⁶ 'Kjuaxróxinhya ts'ejorá tió kaín chojni tsjikosáyahará sín kixin xikaha tí t'áchríi sín kjuikosáyehe tí sín ntoáhya k'uéchronka itén Dios ósé.

Tsotjuèheni tí sín nínkakhenni

(Mt. 5.38-48; 7.12)

²⁷ 'A ntá jahará tjejotinhínra mé tjéxrjanka kixin chrótjuèhérá tí sín nínkakonhanrá la ko jína chrókjuínkĩtsará tí sín tjinkakonhya tí jahará.

²⁸ Jína nixjehérá tí sín t'ántaxínhanrá la ko tjanchehéra Dios kixin tsjinkĩtsa ch'án tí sín chónkíhará sín.

²⁹ Tí chjéhe ijnko nkexro ijnko tuaanrá chrókjóka tí í jnko nánko kixin chróchjéhe sín tíha kjaxin. La ko tí sín ijnko nkexro tjinkaon sín tsakitsjaha sín tí chamara tjín t'inkayate na mé títohé kixin kjaxin sátsjiko sín camisá kjaxin.

30 Tí jnkojín nkexro tjanchaha nkehe chonta la chjehé sín. A ntá tí tsakja sín nkehe kuéntá la tjanchehya sín kixin naxa ts'ókjanhan sín.

31 Méxra chrókjuikosáyehérá kichuárá éxí yóhe nkexrí tjinkáonrá chrókjuikosáyahará tí jehe sín kjaxin.

32 'Tí jehó tjuèhérá tí nkexro tjuàhará la tí xikaha la kohya ninkehó tsjachahyará. Kjónté tí sín jínahya tjasin jie la xikaha ch'e sín.

33 A ntá tí tjikosáyehérá jehó tí sín tjikosáyahará la kohya ninkehó tsjachahyará xikaha. Kjónté tí sín jínahya tjasin jie mé kjaxin xikaha ch'e sín.

34 La ko tí nchekjenrá chichaon jehó tí sín tjenkayáxinrá kixin ts'ókjanhanrá sín tí chichaon, la tí xikaha kohya ninkehó tsjachahyará. Kjónté tí sín jínahya tjasin jie xikaha ch'e sín nchekjen kichó sín chichaon la ko chónhen sín kixin tsokjan tí chichakoen sín inaá.

35 Kjánchó jahará chrótjuèhérá tí sín nínkakonhanrá la ko jína chrókjuich'eherá sín xra la ko chrókjuinchejenrá sín chichaon la chróchoénhyará kixin chrókjan tí chichakoenrá inaá. Mé xikaha chrókjuich'erá la imá tsjachará la ko ts'ónará xjeen Dios nkaya nkajní kixin jehe ch'án ch'ehe ch'án jína tí sín chóntehya ch'án kjuasáya la ko tí sín jínahya.

36 Chrókukonóehérá kichuárá éxí yóhe It'ará nkaya nkajní tikonóehé ch'án chojni.

*Chrók'uantaxíenhyani kichó ni
(Mt. 7.1-5)*

37 'Chrókuékahyará jie ókjé chojni kixin ntá Dios chrókjuanchahya ch'án jie tí jahará. Chrókuétuanhyará kixin chrókjuasóte í jnko chojni kixin Dios kjaxin chrókjuinchejasótiahýará ch'án tí jahará. Chrók'uitjáyahanrá ichrén jie kjuasinhánrá í jnko chojni kixin ntá Dios chrókjuinchek'itjáyahanrá ch'án tí jie kjuásinrá.

38 Chjehérá í so sín tí nkehe ts'áyéhe sín kixin ntá Dios tsotjáhará ch'án nkehe jína kjaxin, tjetóxin ijnko medida jína chrókjuanjon ch'án, icha tsík'enka ch'án kixin tsík'ótsjéyehe ch'án tí nkehe tsíkjachroayá ch'án tjetóxin tsjanjon ch'án. Dios tsotjáhará xikaha yóhe éxí tsíchjehérá í so chojni.

39 Ntá kjuíncheyóexin ch'ín Jesús ntáchro ch'án kixin:

—¿Xá á chrókójína ijnko chojni t'ikonhya chrókjuiko í jnko chojni t'ikonhya? Tí xikaha la yóí sín chrók'uanótjenyá sín ichrén tòye.

40 Ijnko nkexro xrakohé la noehya éxí tí nkexro tjako. Kjánchó tió tsjixin tsoxrakohé ch'án ntá tsonohé ch'án éxí nohe tí nkexro kjuakohé ch'án.

41 '¿A ntá nkekuénté tsjehé tí chjinínó ntsí tjenkánkí ikon tí kichuá, tí naxa ántosán tí nta jie tjenkánkí ikuan?

42 ¿Mé xikaha nkexrí kixin chróntáche kichuá kixin chrókuítóhe ch'án kixin chrókuakitsjenkíhí ch'án tí chjinínó ntsí tjenkánkí ikon ch'án tí naxa ántosán tí nta jie tjenkánkí ikuan? Jaha la ntoáhya tjenkayáxian ch'ia jaha. Senó chrókuakitsjenkiá tí nta jie tjenkánkí ikuan kixin ntá chrók'uikuan chrókuakitsjenkiá chjinínó ntsí tjenkánkí ikon tí kichuá.

*Tí nta mé tjatsoanxínni tí to tsík'óna
(Mt. 7.17-20; 12.34-35)*

43 'Kohya nta jína chrók'óna to jínahya, la ko kjaxin kohya nta jínahya chrók'óna to jína.

44 Jnkojnko tí nta mé tjatsoanxínni tí to t'óna. Tí ntach'í xitjahya tsjakjinjinni to higo la ko xitjahya ts'inni to uva.

⁴⁵ Ijnko chojni jína la jína nixja ch'án kixin jína asén ch'án. A ntá injko chojni jínahya la mé nixja tí nkehe jínahya kixin jínahya asén ch'án. Kixin éxi tjenkayáxin asén mé xikaha nixja ir'va.

Ch'ín Jesús kjuíncheyóexin éxi yaá nkexro kjuích'éna nchia
(Mt. 7.24-27)

⁴⁶ ¿Nkekuènte ntáchrórá kixin janhan Ìnchárá, la ntá tahyará kuenté tí nkehe tétuanhanrá?

⁴⁷ Méxra kaín tí nkexro tóchjina tinhin tí nkehe ntáxrjan la ko titekaon sín la mé tsontáxrjan nkexro tí tóyóhe sín.

⁴⁸ Na mé jehe sín tóyóhe injko nkexro kjuích'éna nchia la senó k'óxraya ch'án tòye ninka kixin ntá sich'éna ch'án nchia chrítaón tí tjo a. A ntá tió k'uánkí tí ntarío la ikui tí ntá k'uíntate tí nchia, kjónté xikaha la k'uátjoákohya la ní kuínkíhya tí nchia a kixin jína tsík'óna chrítaón tjo tjekjen.

⁴⁹ A ntá tí nkexro tinhin tí nkehe ntáxrjan la ntá tahya sín kuenté la mé tóyóhe injko nkexro kjuích'éna nchia chrítaón nche la kohya tjo chrínkí. A ntá tió k'uánkí tí ntarío la ikui tí ntá k'uíntate tí nchia la ntá k'uátjoáko ntá tí nchia la ntá kuenté tí nchia la k'uítjáyan —mé ichro ch'ín Jesús.

7

Ch'ín Jesús kjuínchekitohe jína injko ch'ín ch'ehe injko soldado romano xra
(Mt. 8.5-13)

¹ Ntá ch'ín Jesús kjuixin nixjehe ch'án tí chojni a ntá sákjuí ch'án chjasin Capernaum.

² Ntaha kjuák'e injko capitán romano la mé chóna ch'án injko nkexro ch'ehe ch'án xra imá tjuèhe ch'án la ntá jie níhi tí ch'ín a tjet'en ch'án.

³ A ntá tió kuínhin tí ch'ín capitán itjo sín nkexrí tjen ch'ín Jesús ntá ichr'án ch'án iso sín táda judío tsjijitsjehe sín tí ch'ín Jesús tsochronóehé sín ch'án kixin chrókjuiji ch'án chrókjuínchekitohe ch'án jína tí ch'ín ch'ehe ch'án xra.

⁴ Ntá kjuíji sín kóchjinehe sín tí ch'ín Jesús kjuankíxin chrónóehé sín ch'án ntáchro sín kixin:

—Imá jína tí ch'ín capitán la mé tjinkaon ch'án chrókjuinkítsa ch'án

⁵ kixin tjuèhe ch'án tí nació kuènteni la ko jehe ch'án kjuínkítsa ch'án la ko k'uetoan kixin ts'óna injko ninko kuènteni —ichro sín.

⁶ Ntá ch'ín Jesús sákjuiko sín ch'án. Ntá ó kjuíjichjina sín chjino tí nchia la mé tí ch'ín capitán k'uetuèhen ch'án iso chojni chóxin ch'án tsontáche sín tí ch'ín Jesús kixin:

—Tadá. Tjinkakonhya ch'án chrótjáha ch'án xra kixin jehe ch'án la jehya chojni jína la ko chrókósuèhe kixin chrók'uixenhén ntoe ch'án.

⁷ Mé xikaha chrókósuèhe ch'án chrókjuiji ch'án chrókjueyá ch'án tí jaha. Méxra tí kjuachaxin chrónixja ó chrókuitoexín jína tí ch'ín ch'ehe ch'án xra.

⁸ Kixin jehe ch'án kjaxin t'ítuèhen ch'án la ko kjaxin chóna ch'án soldado t'etuèhen ch'án inaá. Tió t'etuèhen ch'án injko sín kixin sátsji la mé sátsji la ko tió t'etuèhen ch'án injko sín kixin xrákoa la mé xrákoa la ko tió t'etuèhen ch'án injko sín kixin sich'e injko xra la mé nchexiteyá ch'án —mé xikaha ichro tí sín kui.

⁹ Ntá ó kuínhin ch'ín Jesús xikaha ntá chrakon ch'án kixin xikaha tjenkayáxin tí ch'ín a, a ntá nkátjía ch'án komá ch'án tí chojni chréhe ntáchro ch'án kixin:

—Ntáxrjan kixin naxa k'uítjahya nijnko nkexro israelita xikaha tinkáchónki éxi tí ch'ín i —ichro ch'án.

¹⁰ A ntá ó kjan nchia tí sín tsík'ítuenhen la ó k'uíkon sín kixin ó tsíkitohe jína tí ch'ín níhi.

Ch'ín Jesús kjuínchexechón tí xjeen ijnko tjan k'án chjasin Naín

¹¹ Ntá chr'éxin ntá sákjui ch'ín Jesús ijnko chjasin it'in Naín la ko sákjuíko ch'án tí sín k'uájiko ch'án la ko nchónhya í so chojni.

¹² Tió kjuíjichjina sín tí chjasin a la k'uíkon sín nchónhya chojni sákjuíkjava sín ijnko chojni tsík'en na mé tí jnkokoá xjeen ijnko tjan k'án. Itsjé chojni chjasin ntiha sákjuíkotoxin sín tjan.

¹³ Ntá tió k'uíkon Ìnchéni tí tjan a ntá kuíkonóehē ch'án tjan ntáchro ch'án kixin:

—Tsjankahya —ichro ch'án.

¹⁴ Ntá ch'ín Jesús kóchjinehe ch'án tí sín tinkátsénki tí nkexro tsík'en la kjuak'etja tja ch'án tí nkehe tinkátsénkia sín tí ch'ín tsík'en. A ntá tí sín kuámá nta k'uéjóchónhen sín. Ntá ch'ín Jesús nixjehe ch'án tí ch'ín tsík'en ntáchro ch'án kixin:

—Ntásoá. Tétuānhan t'àya —ichro ch'án.

¹⁵ Ntá tí ch'ín tsík'en tuénxín kjuák'etjāxin ch'án la ko kjuankíxin nixja ch'án. Ntá ch'ín Jesús kjuínchek'áyéhe ch'án ìné tí ch'ín ntasoá la sákjuíko.

¹⁶ A ntá tió k'uíkon sín xíkaha kónhen la kaín sín imá chrakon sín la ko kjuankíxin kjuanchehe sín Dios kjuasáya ntáchro sín kixin:

—Dios mé ichr'án ijnko chojni imá t'etōan chrónka itén Dios ts'ejókoni —ichro sín.

Kjāxin ntáchro sín kixin:

—Ó kui Dios tsjinkitsa ch'án chjasén ch'án —ichro sín.

¹⁷ A ntá nkuíxín estado Judea la ko kaín tí chjasin chjinaxón mé kuínhin sín kixin nkehe tí kjuaxroan kjuích'e ch'ín Jesús.

*Tí sín ichr'án ch'ín Juan Bautista
(Mt. 11.2-19)*

¹⁸ A ntá tí sín k'uájiko ch'ín Juan mé chénka sín ch'án kaín tí nkehe tsíkónhen. Ntá k'uíyehē ch'án iyó tí sín k'uájiko ch'án

¹⁹ k'uetuēnhen ch'án sín sátsjitsjehe sín tí ch'ín Jesús tsjikjanchankíhi sín ch'án kixin á jehe ch'án tí nkexro tsi o á tsochónhen sín í jnko nkexro, tsixro sín.

²⁰ A ntá tí sín ichr'án ch'ín Juan mé kóchjina sín tí tjan ch'ín Jesús ntáchro sín kixin:

—Ch'ín Juan Bautista k'uetōan ch'án kuini tsikjanchankíhani kixin á jaha tí nkexro tsi ní o á tsochónhenni í jnko nkexro —ichro sín.

²¹ A ntá tí yaon kjuíji sín na mé ch'ín Jesús kjuínchekitohe ch'án itsjé chojni jína la mé kjuātsen ch'án kaín tí chin chóna sín la ko kuakitsje ch'án tí nchakuen jínahya chóna sín la ko kjuínchek'ikon ch'án itsjé chojni t'ikonhya.

²² A ntá kjuátehe ch'ín Jesús ntáchro ch'án kixin:

—Sátjirá tjíchenkará tí ch'ín Juan kaín nkehe k'uíkonrá la ko kaín nkehe kuínhínrá kixin tí sín k'uíkonhya la ó t'ikon sín jie, la ko tí sín k'uékjihya la ó tji sín jie, la ko tí sín k'uéchóna chinlepra la ó kuítohe sín jína, la ko tí sín kíenhya la ntá jie la ó tinhin sín, la ko tí chojni tsík'en la ó síxechón sín jie, la ko tí sín nòa síxrakehē sín tí tan jína tsaáxin sín.

²³ Ntá náxrjón tjan tí nkexro kohya nkehe t'inkákonhen tí tinkáchónki sín tí janhan —mé ichro ch'án.

²⁴ Tió sátsíkji tí sín ichr'án ch'ín Juan ntá kjuankíxin nixjehe ch'ín Jesús tí sín k'uéjò ntiha kixin nkexrí tjan ch'ín Juan ntáchro ch'án kixin:

—Tió sákjuítsjehérá ch'ín Juan nteje, ¿nkexrí k'uíkonrá tí jehe ch'án? ¿Á k'uíkonrá ch'án éxí ijnko tji nchexrayehe xrjnto?

²⁵ Tí náhí, ¿la ntá nkehe k'uíkonrá? ¿Á k'uíkonrá ch'án éxí ijnko nkexro tsík'itsa jína? Jahará ó nohará kixin chojni tsík'itsa jína la ko chóna kaín nkehe náxrjón la mé ntøe rey tjejó sín.

²⁶ ¿A ntá nkexrí k'uíkonrá ch'án? ¿Á k'uíkonrá ch'án éxí ijnko nkexro chrónka itén Dios? Na mé xrjanka kixin chaxín xikaha jehe ch'án na mé antsí t'etoan ch'án la ntá tí sín k'uéchrónka itén Dios ósé la kánhyó.

²⁷ Ch'ín Juan mé tí nkexro kui éxí chrónka tí xroon itén Dios ósé ntáchro kixin: Janhan mé tsochr'an ijnko nkexro tsochrónka itan kuèntana tsitónxin ntja, kixin tsjasiyóxin ch'án ntja kuèntá.*

Mé xikaha chrónka tí xroon itén Dios.

²⁸ Ntá ijnko nkehe chaxín tsotjonkará kixin kaín tí nkexro k'uéjó senó k'uéchrónka itén Dios la kánhyó tjetooan sín la antsí tjetooan tí ch'ín Juan Bautista. Kjánchó ijnko nkexro kjónté tjetuanhya la tí ts'áyéhe sín tí kjuachaxién Dios nkaya nkajní la antsí tjetooan sín a ntá jehe ch'ín Juan la kánhyó —ichro ch'ín Jesús.

²⁹ A ntá tió kuínhin sín tíhi la ntá kaín tí chojni la ko tí sín nchekjènkj tsíkikite ch'ín Juan la ó kjuátsøan sín kixin Dios la jína ch'án.

³⁰ Kjánchó tí sín fariseo la ko tí maestro tjako tí ley tsíkikitehya ch'ín Juan la mé tjinkakonhya sín tí nkehe tjinkaon Dios chrókjuinkitsa tí jehe sín.

³¹ Ntá ntáchro Inchéni kixin:

—¿Nkexrí chrókjuintayóaxian tí chojni tjejó jie? ¿Nkehe chrókóyóhe sín?

³² Tóyóhe sín tí chánjan tjejótxaxin sín tí ntasin tsítán sín la t'íyehé kichó sín ntáchro sín kixin: “Kjuínchentáchroni flauta la tēhyará la ko tsjeni isón kuènte chojni tsík'en la tsjankahyará.”

³³ Kixin ó kui ch'ín Juan Bautista la kjónehya ch'án niotja la ko k'uíhya ch'án vino la ntá jahará ntáchrórá kixin ijnko nchakuen tí jínahya chóna ch'án.

³⁴ A ntá kjaxin ikui tí Xjeen Dios K'óna Chojni la kjóne ch'án la ko ik'ui ch'án la ntáchrórá kixin imá kjóne ch'án la ko imá ik'ui ch'án vino la ko t'ito ch'án tí sín tjasin jie la ko tí sín nchekjènkj.

³⁵ A ntá tí xjeen Dios mé tjakoxin sín kaín tí nkehe tjinkaon Dios.

Ch'ín Jesús mé kjuák'e ch'án ntøe ijnko ch'ín fariseo it'in Simón

³⁶ Ijnko ch'ín fariseo mé chronóhehe ch'án tí ch'ín Jesús kixin tsjiji ch'án ntøe ch'án sineko sín ch'án. Ntá sákjui ch'án ntøe tí ch'ín a, a ntá ntiha kjuák'etjaxin ch'án tí tjen mesa.

³⁷ A ntá itjen ijnko tjan nchónhya jie chóna tjan. Itjen tjan tí chjasin ntiha la ntá kónohe tjan kixin tsíkijji ch'ín Jesús ntøe tí ch'ín fariseo la ko ntaha sineko sín ch'án. Ntá kui tjan ntiha kuikao tjan ijnko xro tje te tsíkaón aceite xraxé náxrjón.

³⁸ Ntá tsjanka tjan kóchjina tjan toté ch'ín Jesús ntá ntakon tjan kjuátanxín toté ch'án la ko kaxihi tjan kjuínchexámáxin tjan toté ch'án la ko kjóneko kochító toté ch'án la ko kjuíncheka tjan toté ch'án tí aceite xraxé náxrjón.

³⁹ A ntá tió k'uíkon tí ch'ín fariseo tsík'íyehé tí ch'ín Jesús ntá kjo ch'án asén ch'án kixin: “Tí chrókóchaxín tí nkexro i ijnko ch'ín chrónka itén Dios ntá chrókónohe ch'án kixin nkexrí xéhe tí tjan tjetákoxin ch'án kixin ijnko tjan jínahya tíha”, ichro ch'án.

⁴⁰ Ntá ch'ín Jesús ntáche ch'án tí ch'ín fariseo kixin:

—Simón, janhan chonta ijnko nkehe tsonixjaha —ichro ch'án.

* 7:27 Malaquías 3.1

Ntá kjuátehe tí ch'ín fariseo ntáchro ch'án kixin:

—Chronka, Maestro —ichro ch'án.

⁴¹ Ntá ntáchro ch'ín Jesús kixin:

—K'uéjó yaá chojni ntoa síkéhe sín chichaon ijnko ch'ín nchekjen chojni chichaon. Ijnko la síká ch'án quinientos denario. A ntá tí í jnko a la síká ch'án cincuenta denario.

⁴² A ntá kjuachahya sín k'ókjenhen sín tí chichaon tí ch'ín síkéhe sín ntá kuikonóehē ch'án sín ntá k'óxíka ch'án tí cuenta síká yóí sín. A ntá jie chronka jaha kixin nkexro tí yóí sín antsí chrótjuēhe tí nkexro kuikonóehē ch'án —ichro ch'ín Jesús.

⁴³ Ntá kjuátehe tí ch'ín Simón ntáchro ch'án kixin:

—Janhan ntáxrjan tí nkexro kuikonóehē má —ichro ch'án.

Ntá ntáchro ch'ín Jesús kixin:

—Ntoá tjenkayáxian —ichro ch'án.

⁴⁴ Ntá ch'ín Jesús komá ch'án tí tjan a ntá ntáche ch'án tí ch'ín Simón kixin:

—¿Á t'ikuan tí tjan a ní? Janhan na mé k'uixanhan ntoa la ntá jaha la kjuánjonhya ntá chrók'ontia totená. Kjánchó jehe tjan ti ntakon tjan kjuínchek'ontixín tjan totená la ko kaxihi tjan kjuínchexámáxin tjan.

⁴⁵ A ntá jaha la k'jontekoahyana kochíto. Kjánchó jehe tjan naxa kuítóehya tjan neko kochíto totená.

⁴⁶ Jaha la kuíkítexinhya aceite kja. A ntá jehe tjan kuíkíte tjan aceite xraxé náxrjón totená.

⁴⁷ Mé xikaha ntáxrjan kixin imá tjuana tjan kixin kaín tí nchónhya jie kjuasin tjan la mé kjuìnhin tjan. A ntá ijnko nkexro kjuìnhin intsíkoá jie la mé xikaha intsíkoá tjáqoxin kixin tjuana sín —ichro ch'án.

⁴⁸ Ntá nixjehe ch'án tí tjan a ntáchro ch'án kixin:

—Ó kjuìnhan tí jie chonta —ichro ch'án.

⁴⁹ A ntá kaín tí sín tsíkóchjina sín k'uéjótjāxín sín tí tjen ch'án mé kjuankixin kjo sín kichó sín ntáchro sín kixin:

—¿Xá nkexro tíhi kixin tjakjìnhin ch'án ijie chojni?

⁵⁰ A ntá ch'ín Jesús ntáche ch'án tí tjan a kixin:

—Ó kuaá jaha kixin kuítekávan tí janhan. A ntá jie kjuaxróxin sátsjia ntoa —ichro ch'án.

8

Iso chojni chjin kjuínkítsa tí xra kjuích'e ch'ín Jesús

¹ A ntá chr'éxin ntá ch'ín Jesús k'uáji ch'án itsjé chjasin hyé la ko chjasin ntsíntsí kjuako ch'án la ko chrónka ch'án tí tan jina kixin nkexrí tí kjuachaxin t'etoan Dios. A ntá tí teyó sín mé k'uájiko ch'án.

² Kjaxin chréhe iso chojni chjin tsíkjinchekitohe ch'án jina tsíkakitsje ch'án tí nchakuen tí jínahya k'uéchónta sín la ko tsíkjatsen ch'án tí chin k'uéchónta sín. Ijnko tjan mé it'in María la ko kjaxin tikitexín tjan Magdalena na mé tsík'axrje yato nchakuen tí jínahya k'uéchónta tjan,

³ la ko í jnko tjan it'in tjan Juana ne mé xì mé it'in ch'án Chuza. Jehe ch'án mé ch'ehe ch'án xra tí ch'ín Herodes t'etoan ch'án, la ko í jnko tjan mé it'in tjan Susana, la ko itsjé í so sín k'uéjó sín. A ntá kaín sín kjuanjon sín tí nkehe k'uéchónta sín kjuínkítsa sín tí ch'ín Jesús la ko tí sín k'uájiko ch'án.

*Ch'ín Jesús kjuíncheyóexin ch'án éxí ijnko ch'ín k'uenka nonte
(Mt. 13.1-9; Mr. 4.1-9)*

4 Ntá nchónhya chojni kójnkotsé sín kjuítsjehe sín tí ch'ín Jesús, k'uaxrjexín sín kaín tí chjasin ntiha. A ntá ch'ín Jesús kjuíncheyóexin ch'án ntáchro ch'án kixin:

5 —Éxí ijnko ch'ín sákjuík'enka noatrigo nontee ch'án. Mé xikaha sákjuí ch'án ik'ue ch'án tí noatrigo a. Ntá iso noa la k'uanótjen chrínta ntia ntá nkaxénjin chojni tí noa a la ko kjaxin tí koxroxé k'uínka va.

6 A ntá í so la k'uitji chrík'á xro ntá k'uayan la xámá kixin kánhyó siín tjo.

7 A ntá í so la kjuítsínkák'á kach'i ntá k'uánkí kach'i la ntá í xitjahya k'uánkí tí no a kixin tsíkjate tí kach'i.

8 A ntá í so la mé tsík'itjí nche jína. A ntá tió k'uánkí la k'óna jína la mé jnkojnko noatje k'óna ciento neno noa —mé xikaha ichro ch'án.

Na ntá kjuixin kjuako ch'ín Jesús kaín tíha ntá itsen ntáchro ch'án kixin:

—Tí tjinkáonrá chrókuinhínrá la tinhínrá —ichro ch'án.

Ch'ín Jesús chronkaxín nkekuènte kjuíncheyóexin ch'án

(Mt. 13.10-17; Mr. 4.10-12)

9 Ntá tí sín k'uájiko ch'án kjuanchankíhi sín ch'án kixin nkexrí t'axrjexín tí nkehe kjuíncheyóexin ch'án.

10 Ntá ntáchro ch'án kixin:

—Dios mé tsjinkítsa kixin tsonohará tí nkehe noehya í so chojni nkexrí t'etoan Dios. Kjánchó tí í so sín tjákoḥa sín kjuíntayóaxoán kixin ntá k'uíkon sín la kjónté tsjatsqanhya sín la ko kuínhin sín na kjónté naxa tienxínhya sín.

Ch'ín Jesús chronkaxín nkexrí t'axrjexín tí ch'ín k'uénka nonte

(Mt. 13.18-23; Mr. 4.13-20)

11 'Ntá tsqxrjanka nkexrí t'axrjexín tí nkehe kjuíntayóaxoán. Tí noatje mé tí itén Dios.

12 A ntá tí noa k'uanótjen chrínta ntia la mé tóyóḥe tí sín kuínhin tí tan a. A ntá ó kui ch'ín Tsochren ntá kjuínchek'itjáyan ch'án kaín tí itén Dios kuínhin sín chrókuaáxin sín kixin ntá chrókuitekakonhya sín tí nkehe chrókuaáxin sín.

13 A ntá tí noa kjuítsínkák'á xro la éxí yóḥe tí chojni kuínhin itén Dios la tjoka kóxrjínhin sín kuínkáchónki sín. Na ntá itsi tí kjuaxróxinhya, a ntá tsítḥe sín tí itén Dios kuínhin sín kixin naxa nínkahya chónṭa nuèe.

14 A ntá tí noa kjuítsínkák'á kach'i na mé éxí yóḥe ijnko chojni kuínhin tí tan jína kjánchó tjitoxienhya ntie sín kixin tóxakonhen sín tí xra chónṭa sín la ko tjinkaon sín tsochónṭa sín itsjé nkehe la ko kaín tí nkehe tóxrjínhin sín mé t'ínkákonhen kixin xikaha la xitjahya sich'ehe sín xra Dios.

15 A ntá tí noa k'uínka nonte jína na mé éxí yóḥe tí chojni kuínhin tí itén Dios a ntá kaín asén sín kuítekaon sín la ntá kuítóehya sín tí tan, a ntá xikaha la jína ch'ehe sín Dios xra.

Ch'ín Jesús mé kjuíncheyóexin éxí ijnko xrohi tjeche

(Mr. 4.21-25)

16 'Nijnko nkexro chrókjuínchek'ákjen xrohi chrókjuak'emā nkaxenhen chí o chrókjuak'emā chrínkí cama. Náhi. Noi chrókjuak'e xrohi kixin ntá tí sín ts'ixenhen nchia ts'ikonxín sín tí t'inkaséyan.

17 Kohya nkehe chrók'uejómá a ntá chr'éxin chrókónoxínhya; la ko kohya nkehe mó chrókónoehyani chr'éxin kixin kaín nkehe la tsonoxín ti xrohi a.

18 A ntá chrókuinhínrá jína kixin tí tjen ijnko nkexro chónṭa nkehe la mé ts'áyéḥe ch'án má. A ntá tí nkexro chónṭahya nkehe la mé ts'axrjehe ch'án kjónté tí nkehe ntsí tónhen ch'án kixin chónṭa ch'án.

Tí iné la ko tí kichó ch'ín Jesús

(Mt. 12.46-50; Mr. 3.31-35)

¹⁹ **A** ntá kjuúji ìné la ko kichó ch'ín Jesús tí tjen ch'án. Ntá xitjahya tsöchjinehe sín ch'án kixin nchónhya chojni síin.

²⁰ **A** ntá ijnko sín ntiha tsíkjichenka ch'ín Jesús kixin:

— Ìná la ko kichuá tjejó sín ntója la tjinkaon sín chrók'uikon sín tí jaha —ichro sín.

²¹ Kjánchó kjuátehe ch'án ntáchro ch'án kixin:

— Tí sín tinhin itén Dios la ko titekaon sín na mé t'íkuan tí jehe sín éxí naná la ko kichiná —ichro ch'án.

*Ch'ín Jesús k'uetuēnhen tí xr̄into la ko tí nt̄a kixin ts'ixita
(Mt. 8.23-27; Mr. 4.35-41)*

²² Ntá ijnko yaon k'uixenhen ch'ín Jesús ijnko ntabárc̄o la koí tí sín k'uájiko ch'án. Ntá ntáchro ch'án kixin:

— Satsjini tóhe ntayaon —ichro ch'án.

Ntá sákjuí sín.

²³ Ntá nachrohe tjejó'tatòye sín a ntá ch'ín Jesús mé kjuák'ejua ch'án. **A** ntá xrínahya tjian chjéhe xr̄into chrítaón nt̄a ntá xrankixin sítikia nt̄a tí ntabárc̄o ntá chrakon sín kixin ts'aniankí nt̄a tí ntabárc̄o.

²⁴ Ntá kjuínchekjayehe sín tí ch'ín Jesús, ntáchro sín kixin:

— Maestro, Maestro. Tjejó'taniankíni nt̄a —ichro sín.

Ntá ch'ín Jesús k'uàya ch'án ntá k'uetuēnhen ch'án tí xr̄into la ko tí nt̄a kixin ts'ixita, a ntá náxrjón k'uixita tí nt̄a la ko tí xr̄into.

²⁵ Ntá ntáche ch'án tí sín k'uájiko ch'án kixin:

— ¿Á nax̄a tinkachónkihyará Dios? —ichro ch'án.

Kjánchó jehe sín mé chrakon sín itjo sín kichó sín kixin:

— ¿Xá nkexro tíhi kixin t'etuēnhen ch'án xr̄into la ko tí nt̄a la titekakonhen ch'án?

*Ijnko ch'ín nonte Gadara chón̄ta nch̄akuen tí jínahya
(Mt. 8.28-34; Mr. 5.1-20)*

²⁶ Ntá kjuúji sín tí nonte Gadara, na mé tóhe ntayaon ntoí chók'èxin estado Galilea.

²⁷ Ntá k'uínkajinxin ch'ín Jesús tí ntabárc̄o ntá kóchjina ijnko ch'ín chjasin ntiha. Ntá ó má sé chón̄ta ch'án nch̄akuen tí jínahya. Na ntá ni ké ch'án t'inkáyahya ch'án, la ko jehya nt̄e ch'án k'uékjak'e ch'án na mé tjen ch'án tí panteón.

²⁸ Tió k'uikon ch'án tí ch'ín Jesús ntá kjuák'exín toch'in ch'án nkayakon tí ch'ín Jesús, ntá k'óyako ch'án ntáchro ch'án kixin:

— ¿Nkekuēnte tjiaté tí jeheni, jaha Jesús Xjeen Dios itjen nkaya nkajní? Chronóghani nchekjasótehyani —ichro ch'án.

²⁹ Xikaha ntáchro ch'án kixin ch'ín Jesús tsík'etuēnhen tí nch̄akuen tí jínahya kixin ts'axrjexín tí jehe ch'án. Nchónhya veces tí nch̄akuen tí jínahya k'uék'etuēnhen tí jehe ch'án; a ntá tí chojni k'uétsé sín ch'án k'uékjinchenteto sín tja ch'án la ko toté ch'án la mé cadena tsíkóntetoxín ch'án kixin tjinkaon sín chrókjuak'e ch'án. Kjánchó k'uékóchrínjin ch'án tí nkehe tsíkóntetoxín ch'án kixin nch̄akuen tí jínahya tjinkaon sáchrókjuiko ch'án nteje.

³⁰ Ntá ch'ín Jesús kjuanchankíhi ch'án tí ch'ín a kixin:

— ¿Nkexrí it'ian? —ichro ch'án.

Ntá kjuátehe ch'án ntáchro ch'án kixin:

— Legión mé it'inni —ichro ch'án.

Ntáchro ch'án xikaha kixin nchónhya nch̄akuen tí jínahya chón̄ta ch'án.

³¹ **A** ntá kaín tí nch̄akuen tí jínahya chronóeh̄e tí ch'ín Jesús kixin chrók'uetoanhya ch'án kixin chrókjuitsínkayá tí tòye ninka.

32 **A** ntá ntiha tí jnā siín nchónhya cochíno xrine va. **A** ntá tí nchakuen tí jínahya chronóehē tí ch'ín Jesús kixin chrókjuanjon ch'án kjuachaxin chrók'uixenhen tí cochíno a. **A** ntá kjuanjon ch'án kjuachaxin.

33 **A** ntá tí nchakuen tí jínahya k'uaxrjexín tí ch'ín a, a ntá k'uixenhen tí cochíno a. **A** ntá kaín tí cochíno kuinká va sákjuí va nó nkaya tsaka k'uánótjenkí va ntā kjuínhin va ntā.

34 **A** ntá tí sín sít'ayakonhen tí cochíno k'uíkon sín kixin xikaha kónhen ntá chrakon sín kuinká sín sákjuíchronka sín tí chjasén sín la ko tí rancho.

35 **A** ntá tí chojni k'uaxrjexín sín chjasin sákjuitsjehe sín nkehe tí tsíkónhen. **A** ntá kjuíji sín ntiha tí tjen ch'ín Jesús ntá k'uíkon sín kixin ntaha tjen tí ch'ín tsík'axrjexín tí nchakuen tí jínahya. Ntaha tjetjaxin ch'án chrínkí toté tí ch'ín Jesús, ó tsík'inkáya ch'án iké ch'án kixin ó jína tjen ch'án, a ntá chrakon sín tí k'uíkon sín xikaha.

36 **A** ntá tí jehe sín tsík'ikon sín kixin xikaha kónhen la chrónka sín kixin nkexrí kuitohe jína tí ch'ín k'uéchóna tí nchakuen tí jínahya.

37 **A** ntá kaín tí chojni chjasin Gadara kjuankíxin chronóehē sín tí ch'ín Jesús kixin sáchrókjuixin ch'án ntiha kixin imá chrakon sín. **A** ntá tí ch'ín Jesús k'uit'ótjen ch'án tí ntabarco sákjuíxin ch'án ntiha.

38 **A** ntá tí ch'ín tsík'axrjexín tí nchakuen tí jínahya chronóehē ch'án tí ch'ín Jesús kixin á chrókjuanjonhya ch'án kjuachaxin sáchrókjuí ch'án koí ch'án. Kjánchó ch'ín Jesús k'uētuenhen ch'án kixin tsitohe ch'án ntáchro ch'án kixin:

39 —Titoḥa satjia ntōa la ko chronka nkexrí ti kjuachaxin jié kuènte Dios kuitoaxián jína jaha —ichro ch'án.

A ntá sákjuí tí ch'ín a chrónka ch'án nkuíxín tí chjasén ch'án kixin ijnko kjuaxroan jié kjuích'e ch'ín Jesús kjuínchekitohe ch'án jína.

*Tí xjeen ch'ín Jairo la ko tí tjan kuákóxin iké ch'ín Jesús
(Mt. 9.18-26; Mr. 5.21-43)*

40 Tió ch'ín Jesús kjan ch'án tí í jnko chrínta ntā ntá nchónhya chojni siín ntiha la chéhe sín kjuíji ch'án ntiha, kixin kaín sín tjejóchónhen sín ch'án.

41 Ntá kui ijnko ch'ín it'in Jairo na mé ijnko ch'ín t'etoan kuènte nínko. **A** ntá kjuák'exín toch'in ch'án tote tí ch'ín Jesús chronóehē ch'án kixin sáchrókjuí ch'ín Jesús ntōe ch'án

42 kixin chóna ch'án jnkokoáxon xjeen ch'án chjin chóna teyó nánó la ó mero tjet'en tjan. **A** ntá sákjuí ch'ín Jesús la ntá nchónhya chojni chréhe k'uíxitja kichó sín.

43 Ntá siín sín ntiha. Na mé ntiha tjenkákjan ijnko chojni chjin níhi tjan sítji tjan jni na mé chóna tjan teyó nánó titōehya tjan jína. **A** ntá kaín nkehe k'uéchóna tjan kjuenkehe tjan tí sín ch'e xroan la ko nijnko sín kjuachahya sín kjuínchekitohe sín tjan jína.

44 **A** ntá jehe tjan kóchjina tjan nóton tí ch'ín Jesús na ntá kuákóxin tjan tí iké ch'án, a ntá tuénxín tí jni la í kjuíhya tjan.

45 Ntá kjuanchankí ch'ín Jesús kixin:

—¿Nkexro tí kuákóxinna? —ichro ch'án.

A ntá kaín sín ntáchro sín kixin ninkexró, ichro sín. **A** ntá ch'ín Pedro la ko tí sín k'uéjoko ch'án ntáchro sín kixin:

—Maestro, nchónhya chojni siín la ko tótéka sín la ntáhi ntáha, ¿ntá nkekuènte kixin naxa tjanchankiá kixin nkexro tí kuákóxian? —ichro sín.

46 Kjánchó ntáchro ch'ín Jesús kixin:

—Jnkojín nkexro kuákóxinna kixin kónona kixin kjuachaxin kuèntāná kuitoexín ijnko chojni jína —ichro ch'án.

⁴⁷ **A** ntá tió k'uíkon tjan kixin ó kónoxín ntá kóchjina tjan chrakon tjan kjuák'exín tjan toch'in tjan chrínki toté tí ch'ín Jesús. Ntá chrónka tjan nkayakon kaín xín chojni kixin nkekuènte kuákóxin tjan iké ch'án la ko nkexrí kuítóexín tjan jína xikaha.

⁴⁸ Ntá ntáchro ch'án kixin:

—Jaha, xjeenni, ó kuitoḥa jína kixin kuítekávan tí janhan. Kjuaxróxin sátjia —ichro ch'án.

⁴⁹ Naxa tjejóto sín ntiha ntá xrínahya ikui ijnko nkexro kjuixín ntōe tí ch'ín t'etōan kuènte nínko, a ntá chénka ch'án tí ch'ín t'etōan kixin:

—Xjaan na mé ó kjuixin k'uén. Áxri í chjeéhya xra tí maestro —ichro ch'án.

⁵⁰ **A** ntá tió kuínhin ch'ín Jesús la kjuátehe ch'án ntáchro ch'án kixin:

—Chrakonhya. Títekávan tí janhan la tsitōhe xjaan jína —ichro ch'án. **A** ntá sákjuí sín.

⁵¹ **A** ntá tí kjuíjk'ixenhen sín nchia ntá kuítóehya ch'ín Jesús kixin ókjé nkexro chrók'uixenko ch'án nchia. Jehó ch'ín Pedro la ko ch'ín Jacobo la ko ch'ín Juan la ko tí it'é la ko tí iné tí xjachjin chrók'uixenhen sín tí tjen tí xjan a.

⁵² Kaín tí sín tjejó ntaha tsjánkama sín tí xjan a. Kjánchó jehe ch'án ntáchro ch'án kixin:

—Tsjankahyará. Tí xjan la tsík'enhya la tjejua xjan —ichro ch'án.

⁵³ Ntá tjanoá sín ch'án kixin jehe sín la ó nohe sín kixin tsík'en xjan.

⁵⁴ **A** ntá jehe ch'án itsé ch'án tja xjan ntá itsen k'uíyehē ch'án tí xjan ntáchro ch'án kixin:

—Tjarisoá, t'áya —ichro ch'án.

⁵⁵ Ntá kjan asén tjan ntá tuénxín k'uínkatjen tjan. Ntá k'uetoan ch'ín Jesús kixin tsjanjon sín nkehe sine tjan.

⁵⁶ Ntá it'é la ko iné xjan la chrakon sín. **A** ntá ch'ín Jesús k'uetuēnhen ch'án sín kixin ninkexró chróchenkahya sín kixin xikaha kónhen.

9

Ch'ín Jesús ichr'án ch'án tí teyó sín

(Mt. 10.5-15; Mr. 6.7-13)

¹ Ntá ch'ín Jesús k'uetoan kixin tsochjina tí teyó sín k'uájiko ch'án. Ntá chjéhe ch'án sín kjuachaxin tsakitsje sín kaín tí nchakuen tí jínahya chónṭa chojni la ko sinchekitohe sín chojni jína.

² Ntá k'uetoan ch'án kixin sátsjikjako sín nkexrí tí kjuachaxin t'etōan Dios la ko sinchekitohe sín chojni jína.

³ La ko k'uetoan ch'án kixin:

—Ninkehó nkehe sátsjikohyará ntjia sátsjirá, ni tí nta tjíxinrá la náhí, ni bolsa la náhí, ni niotja, ni chichaon, la ko tsjikoará jehó tí ka tjejóyará ó.

⁴ **A** ntá tí tsjasánrá ijnko nchia tsjanjon sín kjuachaxin la ntahó tsitōhará la tsjixín tí xra ntá sátsjixinrá ntiha.

⁵ **A** ntá tí tsjasánrá ijnko chjasin la ntá tsjanjonhya sín kjuachaxin tsjākorá ntá t'axrjéxinrá tí chjasén sín ntiha tsotsénkará tí nche chónṭa totará tsjāqoxínrá xikaha kixin Dios sinchekjasóte tí jehe sín —ichro ch'án.

⁶ Ntá sákjuí sín kaín tí chjasin ntsínsí sákjuíchronka sín tí tan jína tsaáxin chojni la ko kjuínchekitohe sín chojni jína kaín chjasin.

Ik'uén ch'ín Juan Bautista

(Mt. 14.1-12; Mr. 6.14-29)

⁷ **A** ntá tí ch'ín Herodes t'etōan kuínhin ch'án kaín tí xra tjech'e ch'ín Jesús la tóxakonhen ch'án kixin iso sín ntáchro sín kixin ch'ín Juan Bautista la ó tsíxechón ch'án, ichro sín.

⁸ A ntá iso sín ntáchro sín kixin ch'ín Elías tsíxechón ch'án mé tí nkexro k'uéchronka itén Dios ósé. A ntá í so sín la ntáchro sín kixin jnkojín tí sín k'uéchronka itén Dios ósé la mé ó tsíxechón, ichro sín.

⁹ Kjánchó ntáchro ch'ín Herodes kixin:

—Janhan mé kuétōan kóchrínjin sín kja ch'ín Juan. ¿Á chrókóchaxín jehe ch'án kixin nchónhya kjuaxroan kuinhān tí tjech'e ch'án? —ichro ch'án. A ntá kjaxin jehe ch'án tóxakonhen ch'án sáchrókjuitsjehe ch'án tí ch'ín Jesús.

Ch'ín Jesús kjuanjon nkehe kjóne in'ó mil chojni
(Mt. 14.13-21; Mr. 6.30-44; Jn. 6.1-14)

¹⁰ A ntá tió kjan tí sín k'uájiko ch'ín Jesús ntá chénka sín tí jehe ch'án kaín tí xra kjuích'e sín. Ntá k'uaxrjentako sín ch'án tí kohya ninkexró chjinaxón chjasin Betsaida.

¹¹ Ntá tió k'uixikónohe chojni kixin ntaha tjen ch'ín Jesús ntá sákuíchréhe sín ch'án. A ntá kjuanjon ch'án kjuachaxin ts'ejó sín. Ntá kjuankixin chrónka ch'án nkexrí tjen tí kjuachaxin t'etōan Dios la ko kjuínchekitohe ch'án chojni jina.

¹² A ntá ó ntá kóntó ntá tí teyó sín k'uájiko ch'ín Jesús kóchjinehe sín ch'án ntáchro sín kixin:

—Nixjehé tí chojni kixin sátsji sín tí chjasin ntsí la ko tí ichrén nchia chjinaxón sátsjik'ok'éhe sín la ko sátsjikjeyá sín nkehe sine sín kixin jaha la ó noha kixin nteje tjejóni la kohya nkehe tsochjéheni sín —ichro sín.

¹³ Kjánchó ch'ín Jesús ntáche ch'án sín kixin:

—Chjehérá sín nkehe sine sín —ichro ch'án.

Ntá kjuátehe sín ntáchro sín kixin:

—Chóntahyani itsjé nkehe; jehó in'ó niotja la ko yaá koche chóntani. ¿Á tjinkávan sátsjik'enani nkehe sine kaín tí chojni siín? —ichro sín.

¹⁴ Kixin siín chjina in'ó mil chojni ntoa. A ntá ch'ín Jesús ntáche ch'án tí sín xriko ch'án kixin:

—Ntácherá sín tsojnkojié sín ts'ixitjaxin sín jnkojnko cincuenta sín —ichro ch'án.

¹⁵ A ntá xikaha kjuích'e sín k'uētōan sín, a ntá k'uixitjaxin sín kaín sín.

¹⁶ A ntá ch'ín Jesús kuákja ch'án tí n'ó niotja la ko tí yaá koche. Ntá konta ch'án nkajní kjuanchehe ch'án kjuasáyé Dios kixin kjuanjon tí nkehe sine sín. Ntá kóchrít'o ch'án tí niotja la ko tí koche la chjéhe ch'án tí sín xriko ch'án. A ntá jehe sín k'óxikayehe sín chjéhe sín kaín tí chojni siín.

¹⁷ A ntá kaín sín kjóne sín la kókjehe sín. A ntá chr'éxin kjuenájín sín kaín tí nkehe síxehé mé teyó ntaxra kjuínchekaón sín.

Ch'ín Pedro mé chrónka kixin ch'ín Jesús mé tí Cristo
(Mt. 16.13-19; Mr. 8.27-29)

¹⁸ Ntá ijnko yaon ch'ín Jesús k'uaxrjenta ch'án tjenixjehe ch'án Dios. Ntá tjejóko ch'án tí sín xriko ch'án ntá kjuanchankíhi ch'án tí jehe sín kixin:

—¿Nkehe ichro tí chojni kixin nkexro tí janhan? —ichro ch'án.

¹⁹ A ntá jehe sín kjuátehe sín ntáchro sín kixin:

—Iso sín ntáchro sín kixin jaha tí Juan Bautista. A ntá í so sín ntáchro sín kixin jaha la tí ch'ín Elías. A ntá í so sín ntáchro sín kixin jaha ijnko nkexro k'uéchronka itén Dios ósé mé ó tsíxechón —ichro sín.

²⁰ A ntá kjuanchankíhi ch'ín Jesús tí jehe sín kixin:

—A ntá jahará, ¿nkechorá, nkexro tí janhan? —ichro ch'án.

Ntá ntáchro ch'ín Pedro kixin:

—Jaha tí Cristo ichr'án Dios —ichro ch'án.

Ch'ín Jesús chrónka k'ixin its'en ch'án
(Mt. 16.20-28; Mr. 8.30—9.1)

²¹ Ntá ch'ín Jesús k'uetuēnhen ch'án sín k'ixin ninkexró tsochenkahya sín k'ixin nkexro tí jehe ch'án.

²² Ntá chénka ch'án sín k'ixin:

—Tí Xjeen Dios K'óna Chojni t'ichjánxin tsjasóte nchónhya nkehe tsonhen la ko tsitekakuenhya tí sín t'etōan kuēnte ninko la ko tí sín t'etōan kuēnte tí sín nchat'á la ko tí sín maestro tjako tí ley. Ts'óyán sín tí jehe ch'án, kjánchó tí n'ixin yaon na ó tsoxechón ch'án inaá —ichro ch'án.

²³ Ntá chr'éxin chénka ch'án kaín sín k'ixin:

—Tí chaxín tsochréhérá tí janhan na t'ichjánxin tsjtohérá kaín tí nkehe tjaké asánrá, ntá tsamará tí ntacruz kuéntará jnkojnko yaon, a ntá tsochréhérá tí janhan.

²⁴ Tí nkexro tjinkaon jehó sinchekaá asén mé ts'itjáyan. A ntá tí nkexro sinchek'itjáyaxín asén k'ixin tinkáchónki tí janhan la tsaá.

²⁵ ¿A ntá nkehe tsonhen tí chrókjuacha ijnko chojni chróchónka kaín nkehe síin chjasintajni a ntá kjuachón chrókjuinchek'itjáyan ch'án?

²⁶ A ntá jnkojín chojni chrókósuēhe k'ixin tinkáchónki tí janhan la ko tí nkehe tjakua, a ntá kjaxin tí Xjeen Dios K'óna Chojni mé tsosuehe chróntáchro ch'án k'ixin chóxin ch'án tí jehe sín tió tsi ch'án éxí ijnko rey tsikao ch'án tí kjuachaxin kuēnte It'é ch'án la ko tí sín ángel jína.

²⁷ Tíhi mé ntoá xrjanka k'ixin iso chojni tjejó ntihi tjejótinhin sín naxa ts'enhya sín ts'ikon sín k'ixin Dios ts'etōan tí kjuachaxin kuēnte ch'án.

K'uixitóxin nkexrí tsjehe ch'ín Jesús
(Mt. 17.1-8; Mr. 9.2-8)

²⁸ A ntá k'uátsínka ijní yaon tí tsíchronka ch'án tíhi ntá sákjuiko ch'án ch'ín Pedro la ko ch'ín Juan la ko ch'ín Jacobo la chr'in sín ijnko jna k'ixin tsonixjehe ch'án Dios.

²⁹ Ntá ch'ín Jesús tjenixjehe ch'án Dios ntá k'uixitóxin nkexrí tsjehe ch'án la ko tí iké ch'án la tjóá la ko tjákini tsjehe.

³⁰ Ntá xrínahya k'uikon sín yaá chojni tjejótjo sín tí jehe ch'án na mé jehe sín la tí ch'ín Moisés la ko tí ch'ín Elías.

³¹ Imá t'inkáséyan jnkontatjen tí tjejó sín tjejótjo sín tí ch'ín Jesús k'ixin nkexrí its'en ch'án la ko nkexrí tsjasótexín ch'án tí chjasin Jerusalén.

³² A ntá ch'ín Pedro la ko tí sín tjejóko ch'án la imá kuihi sín kotáchrin; kjónté la k'uéjótjehe sín k'uikon sín tí kjuachaxin kuēnte ch'ín Jesús la ko k'uikon sín tí yóí chojni ntoa tjejóko sín ch'án.

³³ A ntá tió sátsji tí yóí sín tjejóko ch'ín Jesús ntá ch'ín Pedro ntáche ch'án tí ch'ín Jesús k'ixin:

—Maestro, jína k'ixin tjejóni ntihi. Chrókjuich'énani iní nchia la mé ijnko kuéntá la ijnko kuēnte ch'ín Moisés la ko ijnko kuēnte ch'ín Elías —ichro ch'án.

Kjánchó ch'ín Pedro í noehya ch'án nkehe chróntáchro ch'án k'ixin chrakon ch'án.

³⁴ A ntá naxa tjenixja ch'án ikui ijnko tjuj kjuák'etja tí jna tjejó sín. Ntá chrakon sín tjejó sín chrínki tí tjuj.

³⁵ Ntá xrínahya kuínhin sín chríkjan tí tjuj itén nkexro ntáchro k'ixin:

—Tíhi mé Xjanna, imá tjuahá ch'án. Tinhínrá tí nkehe tsochronka ch'án la ko tí nkehe tjako ch'án.

³⁶ A ntá tió kjuixin kuínhin sín tí tan nixja ntá k'uikon sín k'ixin jehó ch'ín Jesús tjen. A ntá tí jehe sín la tání sín k'ixin xikaha k'uikon sín tí yaon a la ninkexró chenkahya sín tí nkehe k'uikon sín.

Ch'ín Jesús kjuínchekitohe jína ijnko chánjan chóna nchakuen tí jínahya
(Mt. 17.14-21; Mr. 9.14-29)

³⁷ A ntá tí yaon chr'éxin k'uínkajinxin sín jna la ntá nchónhya chojni sákjuixinhin sín ntia ch'ín Jesús.

³⁸ A ntá ijnko chojni tjenkákjan ch'án tí chojni kjuíji ntá itsen nixja ch'án ntáchro ch'án kixin:

—Maestro, chronóahani kixin chrótsjehé tí xjeenni kixin jnkokoaxón ó chóntani a ntá níhi xjan.

³⁹ Chóna xjan nchakuen tí jínahya la ntá nchek'íyato xjan la ko nchek'aniáte xjan nchexrànka xjan kixin tjotéhe xjan la ko ntalóxrjo sítjixin ir'va xjan la ko ncheníhi xjan, na mé chrohya tsjinhin xjan.

⁴⁰ A ntá chronóeheni tí sín xrikoa chrókuakitsje sín tí nchakuen tí jínahya, kjánchó kjuachahya sín —ichro ch'án.

⁴¹ Ntá kjuátehe ch'ín Jesús ntáchro ch'án kixin:

—Jahará chaxínhya chojni tinkáchónki tí janhan. Jehya jína tjenkayáxinrá. ¿Xá hasta nkesá tjinkáonrá ts'ejóni tsjákohará kixin nunca t'itjáhyará? Xrákoa tí xjan ntihi —ichro ch'án.

⁴² A ntá kóchjina tí chánjan. A ntá tí nchakuen tí jínahya kjuáka xjan nonte la ko kjuínchek'aniáte xjan inaá. Kjánchó ch'ín Jesús jiehe k'uetuēhen tí nchakuen tí jínahya kixin ts'axrjexín xjan. Ntá k'uaxrje tí nchakuen tí jínahya ntá kuítóhe xjan jína. A ntá ch'ín Jesús kjuínchek'áyéhe tí it'é xjan.

⁴³ A ntá kaín sín chrakon sín kixin k'uíkon sín tí kjuachaxin jié kuēnte Dios.

Ch'ín Jesús chrónka ch'án inaá kixin its'en ch'án
(Mt. 17.22-23; Mr. 9.30-32)

Naxa chrakon sín kaín sín kixin tí kjuaxroan kjuích'e ch'ín Jesús la ntá ntáche ch'án tí sín xriko ch'án kixin:

⁴⁴ —Tinhínrá jína tíhi la ko t'itjáyanhyará. Tsotsé sín tí Xjeen Dios K'óna Chojni la ko tsjikaán sín ch'án tí tjejó tí sín t'etoan —ichro ch'án.

⁴⁵ Kjánchó jehe sín kienxínhya sín tí nkehe ntáchro ch'án kixin naxa kjuanjonhya Dios kjuachaxin kixin chrókuiēnxín sín, ntá chrakon sín na kjuanchankíehya sín ch'án kixin nkexrí t'axrjexín tí nkehe ntáchro ch'án.

Nkexro tí imá tjetoan ts'etoan
(Mt. 18.1-5; Mr. 9.33-37)

⁴⁶ A ntá tí sín k'uájiko ch'ín Jesús kjuankixin sín itjo sín kichó sín kixin nkexro tí jehe sín antsí má tjetoan ts'etoan.

⁴⁷ Kjánchó ch'ín Jesús kónohe ch'án nkehe tjenkayáxin asén sín. Ntá kuákja ch'án ijnko chánjan ntá kjuak'e ch'án tí tjen ch'án

⁴⁸ ntá ntáche ch'án sín kixin:

—Tí jnkojín nkexro chrók'uáyéhe tí xjan i kixin tinkáchónki sín tí janhan mé xikaha chrók'uáyéhe sín tí janhan. A ntá jnkojín nkexro chrók'uáyéhe tí janhan mé xikaha chrók'uáyéhe tí nkexro chr'ánna k'uinka. A ntá tí jnkojín nkexro antsí chrókjuinchehnkehya la mé antsí chrók'uáyéhe kjuachaxin chrók'uetōan.

Tí nkexro nínkakuenhya tí jeheni la mé tóxrjinhin ch'án tí xra ch'eni
(Mr. 9.38-40)

⁴⁹ Ntá ntáchro ch'ín Juan kixin:

—Maestro, k'uíkonni ijnko nkexro kjuachaxin ihniá kuakitsjexín ch'án nchakuen tí jínahya chóna chojni. A ntá chénkani ch'án kixin xikahya chrókjuich'e ch'án kixin xrikohyani ch'án.

⁵⁰ Kjánchó ch'ín Jesús ntáchro ch'án kixin:

—Xikahya chróntáche ch'án kixin tí nkexro nínkakuenhya tí jeheni la kjá tóxrjínhin tí xra ch'eni —ichro ch'án.

Ch'ín Jesús kjuentuéhe ch'án tí ch'ín Jacobo la ko tí ch'ín Juan

⁵¹ A ntá ó kóchjina tí yaon sátsji ch'ín Jesús nkaya nkajní, na ntá táhó kjuenkayáxin ch'án sátsji ch'án chjasin Jerusalén.

⁵² Ich'án ch'án chojni kuitónxin ntja a ntá jehe sín sákjuí sín ijnko chjasin ntsí estado Samaria sákjuikjeyá sín nchia ts'ok'èxin sín.

⁵³ Kjánchó tí sín samaritano kjuanjonhya sín kjuachaxin chrók'uejó sín kixin k'uíkon sín kixin ó xra ó sátsji ch'án chjasin Jerusalén.

⁵⁴ A ntá tió k'uíkon tí sín k'uájiko ch'án la mé ch'ín Jacobo la ko ch'ín Juan la ntáchro sín kixin:

—Inchéni, zá tjinkávan kixin chrókjuanchiani xrohi chrók'uinkajinxin nkaya nkajní chrókjuinçek'itjáyan tí jehe sín éxí kjuanchia tí ch'ín Elías?*

⁵⁵ Ntá ch'ín Jesús kuinkátjá ch'án komá ch'án tí jehe sín ntá kjuentuéhe ch'án sín ntáchro ch'án kixin:

—Jahará la kjá noahyará nkexro nchakuen chontará.

⁵⁶ Kixin tí Xjeen Dios K'óna Chojni kuihya ch'án kixin chrókjuinçek'itjáyan ch'án chojni. Náhí. Xra ó ikui ch'án sincheakaá ch'án chojni —ichro ch'án.

Ntá sákjuí sín í jnko chjasin ntsí.

Tí sín tjinkaon chróchréhe sín tí ch'ín Jesús

(Mt. 8.19-22)

⁵⁷ A ntá jehe sín sákjuí sín ntja inaá. Ntá xeta sín ijnko nkexro ntáche ch'án tí ch'ín Jesús kixin:

—Inchéni, tjinkaonni chróchréheni tí jaha nketí tjinkávan sátsjia —ichro ch'án.

⁵⁸ Ntá ch'ín Jesús kjuátehe ch'án ntáchro ch'án kixin:

—Tí koxróntá chóna va itjueé va la ko tí koxroxé chóna va kaké va. A ntá tí Xjeen Dios K'óna Chojni chónahya nketí ts'ok'èxin ch'án —ichro ch'án.

⁵⁹ A ntá ntáche ch'án í jnko nkexro:

—Chréhé tí janhan —ichro ch'án.

Kjánchó kjuátehe ch'án kixin:

—Inchéni, titoheeni senó sátsjikjaváni it'èni —ichro ch'án.

⁶⁰ Ntá kjuátehe ch'ín Jesús ntáchro ch'án kixin:

—Titohé kixin tí chojni tsík'en la jnkokón sín tsík'en tsjavá kichó sín. A ntá jaha la sátsjikjàkua nkexrí tjen tí kjuachaxin t'etjan Dios —ichro ch'án.

⁶¹ Ntá ntáchro í jnko nkexro kixin:

—Inchéni, tjinkaonni tsochréheni tí jaha. Jehí titohé tsjinixjeheni tí sín siín ntoeni —ichro ch'án.

⁶² Kjánchó ntáchro ch'ín Jesús kixin:

—Tí nkexro kjuankixin tsotsé ch'án arado ntá chrókjan chrókotónhen nóton mé xikaha xitjahya sich'ehe ch'án Dios xra.

10

Ch'ín Jesús k'uetuenhen setenta chojni sátsjikjako sín

¹ Ntá chr'éxin Inchéni kjueyá ch'án í jnko setenta chojni ntá k'uetuenhen ch'án sín sátsji sín yóyó sín sátsji sín tsitónxin sín ntja tí kaín chjasin na ko nkúixín tjinkaon ch'án sáchrókjuí ch'án.

² Ntá ntáchro ch'án kixin:

* 9:54 1 Reyes 18.30-40

—Chaxín ntáxrjan kixin imá tsík'óna, a ntá tí chojni ch'e xra mé tsjéhya. Chrókjuancheherá tí Ìnché nonte kixin chróchr'án ch'án itsjé chojni chrókjuich'e xra.

³ Sátjirá jahará. Xráxinkáonrá kixin tétuñhanrá sátsjirá éxí kolélo ts'ejóyakjanrá chríkjan tí kolobo.

⁴ Tsíjkoahyará kabólsa la ko tjoa t'inka chichaon la ko tokate tjíkoahyará la ko tí nixjehérah chojni tí ntia titoéhyará kixin chrókjuintaxrjanhanrá sín.

⁵ A ntá tió ts'ixenhenrá jnkojín nchia la senó nixjehérah sín ntáchrórá kixin ts'áyéhe sín kjuaxróxin, tsixrorá.

⁶ A ntá tí tjejó sín kjuaxróxin ntiha la nixjehérah sín la ts'áyéhe sín kjuaxróxin. A ntá tí la náhi, a ntá tí kjuaxróxin chrók'uáyéhe sín na sátsjikoará inaá.

⁷ A ntá tí nchia ntiha chrókjuanjón sín kjuachaxin chrókuithohará, ntaha mé tsjanjón sín nkehe chóna sín sinterá la ko its'irá, kixin tí nkexro ch'e xra la síin kjuachaxin tsoxenkehe. Tsíjhyará í jnko nchia la ko í jnko nchia.

⁸ A ntá tsjasánrá ijnko chjasin tsjanjón sín kjuachaxin ts'ejorá ntiha ntá interá tí nkehe tsjanjón sín.

⁹ Nchekithohérah chojni níhi jína. Ntá chenkará sín kixin tí kjuachaxin t'etoan Dios la kijnhya tjen tí tjejó sín, ichrorá.

¹⁰ A ntá tió tsjasánrá ijnko chjasin a ntá tsjanjónhya sín kjuachaxin la ntá t'axrjéxinrá ntóe sín sátjirá tí ntia chjasin ntiha ntá ntáchrórá kixin

¹¹ kjónté tí nche tsík'ixitja totará tsotsénkará kixin tsjákoxinrá kixin tí kjuaxróxinhya ts'áyéhe sín chr'éxin. Kjánchó chrókónohe sín kixin tí kjuachaxin t'etoan Dios la kijnhya tjen tí tjejó sín, ichrorá.

¹² Ntáxrjan kixin tí yaon tsjejéxin chjasintajni la kjuaxróxinhya ts'atsínka tí chjasin a. Antsí náxrjónhya tí nkehe ts'atsínka sín, a ntá tí nkehe ts'atsínka chjasin Sodoma* la kénhyó —ichro ch'án.

Iso chjasin titekakonhya

(Mt. 11.20-24)

¹³ 'Nòará jahará chjasin Corazín. Nòará jahará chjasin Betsaida. Tí chrók'uíxin tí kjuaxroan tí chjasin Tiro la ko chjasin Sidón éxí k'uikonrá jahará, ntá chrókójehe sín la tjoka chrókjuithóxinhin ntie sín, tjoka chrók'uinkáya sín ka tié la ko chrókjuikjanjin sín ikja sín nteso, kixin chrókjuakoxin sín kixin t'ává sín.

¹⁴ A ntá tí yaon tsitoxén ijie chojni a ntá jahará antsí tsjasótiará, a ntá tí sín kuente chjasin Tiro la ko chjasin Sidón la kénhyó tsjasóte sín.

¹⁵ A ntá jahará chjasin Capernaum, tjenkayáxinrá kixin imá nohará a ntá sátsjirá nkaya nkajní, ichrorá. Chaxínhya. Jahará la tsjasinkajinrá sátsjirá tí tsjasótéxin tí sín tsík'en.

¹⁶ Tí nkexro tinhin tí nkehe ntáchrórá la mé xikaha tinhin tí nkehe ntáxrjan la ko tí sín titekakonhya sín tí jahará na mé xikaha titekakonnahya sín tí janhan. A ntá tí nkexro titekakonnahya sín tí janhan xikaha titekakonhya sín tí nkexro chr'ánna k'uinka.

Ó kjan tí sín setenta sátsíkji

¹⁷ A ntá ó kjan tí sín setenta sátsíkji la imá chéhe sín ntáchró sín kixin:

—Ìnchéni, kjónté tí nchakuen tí jínahya titekakonhenni tió t'ákjénxinni ihniá —ichro sín.

¹⁸ Ntá ntáchró ch'ín Jesús kixin:

—Kja chaxín k'uikuán kixin ch'ín Tsochren k'uánótjénxin nkajní éxí ijnko kjónkixin xikaha kónhen.†

* 10:12 Génesis 19.24-28 † 10:18 Isaías 14.12

19 Ó tjahará kjuachaxin kixin kjónté konche la ko konchija tsinkátjará la ko tsjachahya ninkehó tí kjuachaxin kuènte tí ch'ín Tsochren kixin ninkehó tsoanhyará.

20 Kjánchó jehya tíha chrókóchàxínrá kixin tí nchakuen tí jínahya kuitekakonhanrá. Náhí. Chrókóchàxínrá kixin ihniárá ó ts'ínixín nkaya nkajní —ichro ch'án.

Tí Xjeen Dios nixjehe It'é ch'án
(Mt. 11.25-27; 13.16-17)

21 A ntá tuénxín tí Nchakuen Dios kjuínchechéhe tí ch'ín Jesús ntá ntáchro ch'án kixin:

—Tjáncháha kjuasáya It'éni Ìnché nkaya nkajní la ko chjasintajni kixin kjuánjonhya kjuachaxin chrók'uitja tí sín imá nohe, a ntá kjuánjuan kjuachaxin kixin ts'itja tí sín noehya. Mé xikaha It'éni, jaha kóxrjínhan kixin xikaha tsonhen.

22 T'aná mé chjìna kaín xín nkehe. Ninkexró noehya nkexro tí Xjeen ch'án. Na mé jehó It'é ch'án mé nohe. La ko ninkexró noehya nkexro tí It'é ch'án. Na mé jehó tí Xjeen ch'án mé nohe ch'án la ko tí sín tsíkjejá ch'án kixin tjinkaon ch'án tsonohe sín nkexro It'é ch'án —ichro ch'án.

23 Ntá komá ch'án tí sín k'uájiko ch'án ntá ntáche ch'án tí jehó sín kixin:

—Chéhe tí sín k'uíkonxín kon sín éxí k'uíkonrá.

24 Ntáxrjan kixin nchónhya tí sín k'uéchronka itén Dios ósé la ko nchonhya tí sín rey k'uétjinkaon sín chrók'uikon sín éxí t'ikonrá, kjánchó k'uíkonhya sín, la ko k'uétjinkaon sín chrókuinhin sín tí nkehe tjejotinhínrá jie, kjánchó í kíenhya sín —ichro ch'án.

Ch'ín Jesús kjuíncheyóexin éxí ijnko samaritano jina

25 Ntá ijnko maestro tjako tí ley k'uínkatjen ch'án nixjehe ch'án tí ch'ín Jesús tjinkaon ch'án tsonoexín ch'án á chaxín nohe ch'án tsjatehe ch'án ntá kjuanchankí ch'án kixin:

—Maestro, ¿nkexrí chrókjuich'eni chrók'uitjani tí kjuachón jnkochrín? —ichro ch'án.

26 Ntá kjuátehe ch'ín Jesús ntáchro ch'án kixin:

—¿Nkexrí nixja tí ley? ¿Nkexrí tiénxian? —ichro ch'án.

27 A ntá tí maestro tjako tí ley mé kjuátehe ch'án ntáchro ch'án kixin:

—Chrótjuèheni Ìnchéni Dios kaín asénni la ko kaín fuerza chóntani la ko kaín kjuaxrexinkaon kuénténi la ko chrótjuèheni kichó ni éxí tjuèxinni asénni‡ —ichro ch'án.

28 Ntá ntáchro ch'ín Jesús kixin:

—Jina kjuátehe. A ntá tí jaha xikaha sich'e la tsochonta kjuachón —ichro ch'án.

29 Ntá tí maestro tjako tí ley mé tjinkaon chrókjuachaxin ch'án tí ch'ín Jesús ntá kjuanchankí ch'án inaá kixin:

—¿Xá nkexro tí kichó ni chrótjuèheni, ichrua? —ichro ch'án.

30 Ntá ch'ín Jesús kjuátehe ch'án ntáchro ch'án kixin:

—Ijnko chojni k'uínkajinxin nó ntia kjuixin chjasin Jerusalén sátsji ch'án chjasin Jericó, ntá kuátóhe ntia iso síchee kueéhe sín ch'án kaín nkehe sáchrókjuiko ch'án, la ko iké ch'án tsíkakitsjehe sín ch'án, la tsíkate sín ch'án, la ntá sátsíkji sín tsíkitohe sín ch'án la ó mero tjet'en ch'án.

31 Ntá xrínahya k'uátsínka ijnko nchaf'á tí ntia ntiha ntá k'uíkon ch'án xikaha ntá ántosén ch'án k'uátsínké ch'án.

‡ 10:27 Deuteronomio 6.5; Levítico 19.18

³² **A** ntá kjaxin ijnko ch'ín levita k'uátsínka chjinaxón ntiha. Ntá k'uíkon ch'án xikaha ntá ántosén ch'án k'uátsínké ch'án kjaxin.

³³ **A** ntá ijnko ch'ín kjuixin estado Samaria k'uátsínka tí ntia ntiha ntá k'uíkon ch'án xikaha tjetsínka tí nkexro ntá kuikonóehé ch'án.

³⁴ Ntá kóchjinehe ch'án tí nkexro tsíkóníhi ntá kjuích'ehe ch'án xroan tí síchrit'o chjéhe ch'án aceite la ko vino la ko kjuínchentetoxín ch'án ka. Ntá kjuixin ntá kjuínchekiták'á ch'án tí kolóchoe ch'án. Ntá sákjuíko ch'án ijnko nchia t'ok'èxín chojni ntiha la k'uáyakonhen ch'án.

³⁵ Ntá tí kóyaon ntá sátsji tí ch'ín samaritano kuakitsje ch'án iyó tí chichaon la chjéhe ch'án tí inché tí nchia ntáchro ch'án kixin: “T'ayakonhén tí nkexro i, a ntá antsí má ts'ichjánxinhin ch'án la tió tsokjan ntá tsjénkaha ts'ókjanhan kaín tíha,” ichro ch'án.

³⁶ **A** ntá tí iní nkexro k'uátsínka ntia la, ¿nkexro tjuèhe tí nkexro kjuíncheníhi tí síchee? —mé kjuanchankí ch'ín Jesús.

³⁷ **A** ntá kjuátehe tí maestro tjako tí ley kixin:

—Tí nkexro kuikonóehé tí jehe ch'án —ichro ch'án.

Ntá ntáchro ch'ín Jesús kixin:

—Sátjia jaha la xikaha chrókjuích'e —ichro ch'án.

Ch'ín Jesús sákjuí ch'án ntøe tjan Marta la ko tjan María

³⁸ Naxa tjetji ch'ín Jesús kjuíji ch'án ijnko chjasin ntsí. **A** ntá ntiha itjen ijnko tjan it'in Marta, a ntá kjuanjon tjan kjuachaxin kuítóhe ch'án ntøe tjan ntiha.

³⁹ **A** ntá tjan Marta chóna tjan ijnko kichó tjan it'in María. **A** ntá jehe tjan kjuák'etjaxin tjan chrínkí toté tí ch'ín Jesús tjetinhin tjan nkehe tí tjechro ch'án.

⁴⁰ **A** ntá tjan Marta tóxakonhen tjan kixin nchónhya xra chóna tjan, ntá kóchjinehe tjan tí ch'ín Jesús ntáchro tjan kixin:

—Inchéni, ¿á tóxakuanhya kixin tí tjan kichó ni kuítóheni tjan, a ntá jehóni tjech'eni kaín xra? Ntáche tjan kixin tsjinkitsani tjan —ichro tjan.

⁴¹ Kjánchó ch'ín Jesús kjuátehe ch'án ntáchro ch'án kixin:

—Marta, Marta, jaha imá tóxakonhan kixin t'inkákonhen nchónhya xra chonta.

⁴² Kjánchó jnkokoá nkehe t'ichjánxín. **A** ntá tjan María kjueyá tjan tí nkehe antsí jína la ko ninkexró tsakitsjehya tjan tíha —ichro ch'án.

11

Ch'ín Jesús tjako ch'án nkexrí tsonixjeheni Dios

(Mt. 6.9-15; 7.7-11)

¹ **A** ntá jnkonaá ch'ín Jesús tjenixjehe ch'án Dios ijnko lugar tjen. Ntá kjuixin la ijnko tí sín xriko ch'án ntáchro kixin:

—Inchéni, tjácohéni nkexrí tsonixjeheni Dios kixin xikaha ch'ín Juan kjuakohe ch'án tí sín k'uájiko ch'án.

² Ntá ch'ín Jesús ntáchro ch'án kixin:

—Tió nixjehérá Dios ntáchrórá kixin:

It'éni tjen nkaya nkajní, jaha imá tjóá.

Chrókui ti kjuachaxin kuéntá.

Chrókjuích'e tí nkehe tóxrjínhan jaha ntihi chjasintajni éxí tjech'e nkaya nkajní.

³ Ijie tsjánjuan tí niotja t'ichjánxinhinni jnkojnko yaon.

⁴ T'óxíka tí nkehe jínahya kjuích'eni kixin kjaxin jeheni ts'itjáyenheni tí nkehe kjuích'eheni chojni.

Titoéhyani jeheni xrahya chrókjuasinni jie. Nchekaáni kaín tí nkehe jínahya chrókónhenni

—mé xikaha ichro ch'ín Jesús.

⁵ Kjaxin ntáchro ch'án kixin:

—A ntá jnkojínrá chróchontará ijnko chojni choxian, a ntá sáchrókjuia ntøe ch'án k'áxrótjen chróntáche ch'án kixin: “Amigo, nchekjenni iy'á niotja

⁶ kixin nantá ó kui ijnko chojni chóxinni kuixin ch'án kjín kjuíji ch'án ntøeni ntá chóntahyani ninkehó tsochjeheni ch'án.”

⁷ A ntá tí chrókjuatehe tí nkexro choxian tjen nkaxenhen chróntáchro kixin: “Chjeéhyani xra. Tí ntója ntøeni méhe t'ikjéhe. A ntá xjeenni tjejót'ok'èkoni xjan. Ntá xitjahya ts'àyani tsotjáhani nkehe”, ichro ch'án.

⁸ Ntáxrjan kixin kjónté chrók'uayahya ch'án chrótjáhya ch'án nkehe kjónté chóxian ch'án, kjá ts'àya ch'án tsotjáha ch'án kaín nkehe t'ichjánxinhan kixin tjinkakonhya ch'án kixin naxa chrókjuak'é chrók'uèya jaha.

⁹ Mé xikaha ntáxrjan kixin: Tjanchiará nkehe la Dios tsotjáhará; tjéyará nkehe la ts'itjará; t'inkará puerta la tsoxitjehe.

¹⁰ A ntá tí nkexro tjanchia nkehe la ts'áyéhe tí nkehe; la ko tí nkexro tjejá nkehe la ts'itja; la ko tí nkexro t'ínka puerta la tsoxitjehe.

¹¹ '¿Xá jnkojínrá chontará xjaanrá chrókjuanchahará xjan niotja la ¿á chrókjuánjonrá ijnko xro? O chrókjuanchahará xjan koche la ¿a chróchjehérá ijnko konche?

¹² O chrókjuanchahará xjan koja la ¿á chrókjuánjonrá ijnko konchia?

¹³ A ntá jahará kjónté jínahyará la ó nohará nkehe jína tsochjehérá xjaanrá, la mé antsí chrókónohará kixin It'éni tjen nkaya nkajní tsotjáhará Nchakuen ch'án tí jnkojínrá chrókjuanchehérá ch'án —ichro ch'ín Jesús.

Tjanchia sín jie kixin ch'ín Jesús chóna kjuachaxin tí Jínahya (Mt. 12.22-30; Mr. 3.19-27)

¹⁴ Ntá ch'ín Jesús kuakitsje ch'án ijnko nchakuen tí jínahya tsíkjinchenósín ijnko chojni. A ntá tió tsík'axrje tí nchakuen tí jínahya a ntá tí ch'ín xitjahya nixja la jína nixja ch'án. Ntá kaín chojni chrakon sín kixin xikaha tsíkjich'e ch'án.

¹⁵ A ntá jnkojín tí jehe sín ntáchro sín kixin:

—Tí ch'ín a mé takitsje ch'án nchakuen tí jínahya kixin chóna ch'án kjuachaxién tí ch'ín Beelzebú mé tí ch'ín Tsochren, na mé jehe ch'án mé t'etuenhen kaín tí nchakuen tí jínahya —ichro sín.

¹⁶ A ntá iso sín tjinkaon sín chrókjuachaxin sín tí ch'ín Jesús ntá kjuanchehe sín ch'án ijnko kjuaxroan náxrjón kuènte nkaya nkajní.

¹⁷ Kjánchó jehe ch'án ó nohe ch'án nkehe tjenkayáxin sín la ntáchro ch'án kixin:

—Jnkojín gobierno jnkokónhya tjenkayáxin sín ntá tjanjonko kichó sín na mé ts'itjayan tí kjuachaxin ts'etøanxín sín, la ko tí sín jnkokoá nchia jnkokónhya tjenkayáxin sín xitjahya ts'ejóko kichó sín jnkokoá.

¹⁸ A ntá kjaxin tí ch'ín Tsochren chrókjuánjonko kichó ch'án, ¿la nkexrí chróchóna ch'án kjuachaxin naxa chrók'uøtoan ch'án tí chrók'uaxrje tí jínahya? A ntá jahará ntáchrórá kixin janhan takítsjé nchakuen tí jínahya kixin tí kjuachaxién ch'ín Tsochren chonta janhan, ichrorá.

¹⁹ A ntá tí xikaha la, ¿ntá nkexro chjéhe kjuachaxin tí sín chréhe tí jahará kixin tsjacha sín tsakitsje sín nchakuen tí jínahya? Jehe sín mé tjakoxin sín kixin jahará ntoáhya tjenkayáxinrá.

²⁰ A ntá tí kjuachaxién Dios mé takítsjéxian tí nchakuen tí jínahya na mé chrókónoaxínrá kixin tí kjuachaxién Dios t'etøan ch'án mé ó kui tí tjejorá.

21 'A ntá ijnko chojni jiehe yamá ch'án t'ayakonhen ch'án ntøe ch'án kíxin tí nkehe chóna ch'án ts'itjáyanhya.

22 A ntá itsi ijnko nkexro antsí má tsehe, a ntá tsjanjonko ch'án tí ìnché nchia, a ntá tsjacha tsakitsjehe tí ìnché nchia kaín tí ch'án yamá ch'án kíxin imá jieexín ch'án. A ntá tí ch'ín antsí tsehe mé tsakja ch'án kaín nkehe siín ntiha.

23 Tí nkexro titekakonhya tí janhan mé nínkakonna ch'án. A ntá tí nkexro tjinkisahya tí janhan mé t'inkákonhen tí xrá t'a —ichro ch'án.

Ijnko tí nchakuen tí jínahya mé tsokjan inaá
(Mt. 12.43-45)

24 'A ntá ijnko nchakuen tí jínahya tsík'axrjexín ijnko chojni na mé ixri tí nonte xámá xritjeyá nketí náxrjón ts'ok'éhe. A ntá tí k'uitjahya ntá tjenkayáxin kíxin: “Áxri tsokjan ntøna k'uaxrjéxian.”

25 A ntá tió kjan la éxi ijnko chojni tsík'ánjón ntøe la náxrjón tsjehe tí nkaxenhen nchia. A ntá k'uíkon tí jínahya xíkaha tjen nchia

26 a ntá sákjuikakjín yato nchakuen tí jínahya antsí má jínahya. A ntá antsí má jínahya kónhen tí ch'ín a, a ntá tí senó la kénhyó. Mé xíkaha tsonhen ijnko chojni kénhya asén tinkáchónki Dios —ichro ch'án.

Tí kjuachéhe chaxín

27 Ntá ch'ín Jesús tjenixja ch'án chrónka ch'án kaín tíha ntá ijnko chojni chjin tjenkákjan tí jehe sín a itsen nixja tjan ntáchro tjan kíxin:

—Chéhe tí nkexro k'uaxrjeníxin tí jaha kjuíntak'ánkiá —ichro tjan.

28 Ntá jehe ch'án kjuátehe ch'án ntáchro ch'án kíxin:

—Antsí chéhe tí nkexro tinhin tí itén Dios la ko titekaon sín —ichro ch'án.

Tí sín jínahya mé tjanchia sín ijnko kjuaxroan náxrjón
(Mt. 12.38-42; Mr. 8.12)

29 Ntá nchónhya chojni sítójnkotsé sín tí tjen ch'ín Jesús ntá jehe ch'án kjuankíxin nixja ch'án ntáchro ch'án kíxin:

—A ntá tí chojni siín jie la jínahya sín, a ntá tjanchia sín kíxin chrókjuásian ijnko kjuaxroan náxrjón. Kjánchó tsjákoxinhya í jnko kjuaxroan la jehó tí nkehe tsíkónhen ch'ín Jonás.

30 Ntá éxi yóhe kónhen ch'ín Jonás kónoexín tí sín chjasin Nínive mé xíkaha tsonhen tí Xjeen Dios K'óna Chojni la ts'ikon tí chojni siín jie.

31 A ntá tí yaon tsitøexín ijié chojni tjejó jie la mé tí tjan reina k'uøtoan kjuixín nó Sur mé ts'inkatjen tjan tsjanchia tjan jie kíxin tí sín tjejó jie. Kíxin jehe tjan imá kjín kjuixín tjan tsinhin tjan nkexrí imá k'uénohe ch'ín Salomón.* A ntá jie itjèn janhan antsí chonta kjuachaxin, a ntá ch'ín Salomón la kénhyó.

32 La ko tí sin chjasin Nínive kjaxin ts'inkatjen sín tió tsitøexín ijié chojni la tsjanchia sín jie kíxin tí sín tjejó jie la ko tsontáchro sín kíxin chrókjuasóte tí chojni tjejó jie kíxin tió kuínhin tí sín Nínive chrónka ch'ín Jonás itén Dios la kjuítóxinhin sín ntje sín. A ntá jie itjèn janhan antsí má chonta kjuachaxin, a ntá ch'ín Jonás la kénhyó.

Xrohi t'inkaséyanxín cuerpo kuènte chojni
(Mt. 5.15; 6.22-23)

33 'Nijnko chojni chrokjuinчек'ákjen ijnko xrohi chrókjuak'emá ch'án la ko chrókjuak'ehya ch'án chrínki ijnko ntacajón. Náhi. Noi chrókjuak'e xrohi chrókjuak'enkáya candelero kíxin ts'ikonxín chojni tí t'inkaséyan.†

* 11:31 1 Reyes 10.1-10 † 11:33 Lucas 8.16

³⁴ Tí ikonrá mé éxí yóhe ijnko xrohi t'inkaséyanxín tí cuerpo kuèntará. A ntá tí chontará ikonrá jína la ntá kuenté cuerpo kuèntará chóna xrohi. A ntá tí chontará ikonrá jínahya la ntá kuenté cuerpo kuèntará la sítié tjen.

³⁵ Chrókóxakonhanrá kixin chrók'uayakonhénrá tí xrohi chontará kixin chrók'uankahya kixin chrók'uixitiéhya tí tjejorá.

³⁶ A ntá tí kuenté tí cuerpo kuèntará chróchóna xrohi la ko nit'ò chrók'uixitiéhya la ntá kuenté la chrók'uikonrá jína la éxí ijnko lámpara kuenté ch'e xrá jína.

Ch'in Jesús chrónka kixin ntoáhya tjako tí sín fariseo la ko tí sín tjako ley (Mt. 23.1-36; Mr. 12.38-40; Lc. 20.45-47)

³⁷ A ntá tió kjuixin nixja ch'in Jesús ntá ijnko ch'in fariseo chrónóehé ch'án tí ch'in Jesús kixin sátsjiko ch'án ntòe ch'án sineko ch'án. Ntá tió kjuíji sín ntiha la k'uixenhen sín nchia ntá kjuák'etjaxin ch'in Jesús chjino tjen tí mesa a.

³⁸ A ntá tí ch'in fariseo chrakon ch'án k'uikon ch'án kixin ch'in Jesús k'óntihya ch'án tja ch'án senó tí sine ch'án éxí tinkáchónki tí jehe sín.

³⁹ Kjánchó Ìnchéni ntáchro ch'án kixin:

—Jahará fariseorá nchetjóará tí ntója tí vaso la ko tí plato. A ntá nkaxenhen la tsíkaón kjuaché la ko kjuachjinoxínhin.

⁴⁰ Jahará lontirá. ¿A noahyará kixin tí nkexro kjuích'éna tí ntója la koí tí nkaxenhen kjuích'éna ch'án?

⁴¹ Tí chrókjuinchekitonhénrá chojni nòa kaín asánrá tí nkehe chontará la ntá chrókóxakuanhyará tí chrók'ónti chojni o náhi.

⁴² 'Nòará jahará fariseorá. Jahará chjehérá Dios ijnko ite parte kaín kaxroan tsjiko tí nkehe sineni. A ntá tahyará kuentá tí nkehe ntoá la ko nkexrí chrótjuèhérá Dios la ko nkexrí chrótjuèhérá kíchuará. Jína chróchjehérá Dios nkehe la ko chrók'uitjáyanyará tí chrókjuínkítsará kíchuará.

⁴³ 'Nòará jahará fariseorá. Tjinkáonrá ts'ejokjenrá tí silla náxrjón nkaxenhen njnko la ko tjinkáonrá kixin jnkojína tsonixjahará sín tió tsoxétará sín ntain.

⁴⁴ 'Nòará jahará maestro tjàkorá tí ley la ko jahará fariseorá. Ntoáhya tjenkayáxinrá ch'iará. Jahará éxí yóhe tòye tsíxravá chojni tsík'en t'ikonhya chojni la t'atsínka sín nátaón la noehya sín kixin tsíxravá chojni ntiha.

⁴⁵ A ntá kjuátehe ijnko tí maestro tjako tí ley ntáchro ch'án kixin:

—Maestro, xikaha ntáchrua la, ¿á kjaxinhya jeheni kaín ni t'ántaxínhíni ní? —ichro sín.

⁴⁶ A ntá ntáchro ch'in Jesús kixin:

—Kjaxin nòará tí jahará tjàkorá tí ley. Tétuènhénrá chojni tsamá sín ijnko nkehe imá ye chrókjuachahya chojni chrókuamá. A ntá jahará njnko dedo tjará chrókjuínkítsará tí nkehe imá ye yámá sín.

⁴⁷ 'Nòará tí jahará. Ch'énará tjàt'òe tí sín k'uéchrónka itén Dios ósé tsík'óyán tí sín k'uaxrjeníxinrá.

⁴⁸ Xikaha jahará tjákoxinrá kixin ó nchoxon tí nkehe kjuích'e tí sín k'uaxrjeníxinrá ósé kixin jehe sín k'óyán sín tí nkexro k'uéchrónka itén Dios ósé. A ntá jahará ch'énará tjàt'òe tí tsíxravá sín.

⁴⁹ 'Mé xikaha Dios chóna kjuaxrexinkaon imá jína ntá ntáchro ch'án kixin tsochr'án ch'án chojni tsochrónka itén ch'án la ko tsochr'án ch'án chojni tsjikjako itén ch'án. A ntá chojni ts'óyán jnkojín tí jehe sín la ko tsochónkíhi tí í so sín, ichro ch'án.

⁵⁰ A ntá Dios mé tsjanchia jie tí chojni siín jie kixin k'úitji ijnié kaín tí sín k'uéchrónka itén ch'án ósé desde tí xrankixin k'óna chjasintajni

⁵¹ la mé xrankíxixín k'úitji ijnié ch'ín Abel la mé kjuixixín k'óyán sín ch'ín Zacarías k'óyánxin sín ch'án jnkosiné tí tjen tí altar la ko tí nínko. Ntá Dios sinchekjasóte ch'án tí sín síin jie kíxin xíkaha ik'uén kaín tí sín a.

⁵² Nòará jahará maestro tjàkorá tí ley. Jahará tjinkákonhyará kíxin í so chojni tsonohe sín tí nkehe chaxín la ni jahará tjinkákonhyará sinchexiteyará la ko titoéhyará kíxin í so chojni chrókjuinchexiteyá sín —ichro ch'án.

⁵³ A ntá kjuixin nixja ch'ín Jesús kaín tíha ntá tí sín maestro tjako tí ley la ko tí sín fariseo imá kónínkakohen sín ch'án ntá kjuankíxin sín kjuanchankíhi sín ch'án nchónhya nkehe

⁵⁴ chrókjuachaxín sín ch'án kíxin ách'e ntoáhya chrókjuatehe ch'án ntá chrókjuanchia sín jie tí jehe ch'án.

12

Ch'ín Jesús chrónka kíxin ntoáhya ch'e tí sín fariseo

¹ A ntá nchónhya mil chojni kójnkotsé sín ntá tinkák'íntate kíchó sín. Ntá ch'ín Jesús saoxín kjuankíxin chénka ch'án tí sín k'uájiko ch'án ntáchro ch'án kíxin:

—Chrókuítekákonyará tí nkehe ntoáhya tjenkayáxin tí sín fariseo ch'ia sín, na mé éxí yóhe tí xroan nchek'ánkí niotja tí nkehe tjako sín.

² Kohya nkehe mó jie chrókónoxínhya chr'éxin la ko kohya nkehe tjemá jie chrókónoahya chojni chr'éxin.

³ A ntá kaín nkehe ntáchrorá tí sítié la chr'éxin tsinhin chojni tí nchakotjin; la ko kaín nkehe mó ntáchrorá k'uikjéhérá nchia la chr'éxin ts'èya sín chrítaón nchia tsinhin kaín xín chojni.

Nkexro tí chróchrakönhenni

(Mt. 10.26-31)

⁴ Jahará chojni chóxin kíchó ni mé tjonkará kíxin chróchrakuenhyará tí chojni t'óyán tí cuerpo, a ntá chr'éxin la kohya nkehe tsjacha sín chrókjuich'e sín.

⁵ Kjánchó tjonkará kíxin nkexro chróchrakönhénrá. Chróchrakönhénrá Dios mé tí nkexro tsakitsje kjuachón ntá chóna kjuachaxin tsochr'án chojni tí síin xrohi tsjasótexín sín. Tí nkexro a mé chróchrakönhénrá ch'án má.

⁶ ¿Á chrókóxixínhya in'ó koxroxé yaá chichaon ntsíntí? Kjánchó Dios la ts'itjáyenhya ch'án nijnko tí jehe va.

⁷ Kjónté tí kaxihí chóna ikjára la nohe ch'án nkekjaín ka chontará. Méxra chrakonhyará tí jahará kíxin antsí má tjete sínkí tí jahará. A ntá kjónté nchónhya koxroxé la kánhyó sínkí tíha.

Chróchrónkani kíxin tinkáchónkini Inchéni Jesucristo nkayakon chojni

(Mt. 10.32-33; 12.32; 10.19-20)

⁸ Ntáxrjan kaín tíhi kíxin tí nkexro tsochrónka kíxin tinkáchónkina sín nkayakon chojni la kjaxin tí Xjeen Dios K'óna Chojni tsochrónka kíxin chóxin ch'án tí jehe sín nkayakon tí sín ángel kuénte Dios.

⁹ A ntá tí sín sinchemá sín kíxin chónhyana sín nkayakon chojni la ntá kjaxian janhan sintamá kíxin chonhya tí jehe sín nkayakon tí sín ángel kuénte Dios.

¹⁰ A ntá jnkójín nkexro ts'ántaxínhin sín tí Xjeen Dios K'óna Chojni naxa jína ts'itjáyan tí jie k'uántaxínhin sín. A ntá tí nkexro ts'ántaxínhin tí Nchakuen Dios la xitjahya tsjin tí jie tí xíkaha tsixro sín.

¹¹ Tió tsjikoará sín nkaxenhen nínko Israel la ko tí tjejó tí sín t'etoan la ko tí tjejó tí síxreé la tóxakuanhyará nkehe tsjateherá la ko tóxakuanhyará nkehe tsixrorá

12 kixin tió tsonixjará la tí Nchakuen Dios sinchexraxinkaonrá nkehe tsixrorá —ichro ch'án.

Tí kjuaxikaon tsochónta chojni itsjé nkehe

13 Ijnko nkexro tjenkákjan tí sin tsíkójn kotsé ntáche ch'án tí ch'ín Jesús kixin: —Maestro, ntáche tí kichó ni a kixin tsjanjon ch'án tí nkehe tónhenni tocar tsíkitohe it'eni tsakjani —ichro ch'án.

14 Ntá kjuátehe ch'ín Jesús ntáchro ch'án kixin: —Lontia jaha. ¿Nkekuènte chrókjuich'énará juez tí janhan chrók'oxikayaha tí nkehe chrókuakjará jahará? —ichro ch'án.

15 Kjaxin ntáchro ch'án kixin: —Tóxakonhanrá tí chróchontará itsjé nkehe. Jehya tí nchónhya nkehe chróchontará ntá náxrjón chrók'uejorá —ichro ch'án.

16 Ntá kjuíncheyóexin ch'án ntáchro ch'án kixin: —Kjuák'e ijnko chojni rico, a ntá tí nontee ch'án na mé imá k'óna.

17 A ntá tí ch'ín rico kjuenkayáxin ch'án ntáchro ch'án kixin: “¿Nkexrí chrókjuít'a jie kixin chontahya nketí ts'ínkachjina tí noa k'ónana?” ichro ch'án.

18 Ntá kjuenkayáxin ch'án ntáchro ch'án kixin: “Ó nòna nkehe sít'a jie. Ts'oxíka tí t'ínkachjinayá noa chonta ntá sít'ána ijnko antsí jié ts'ínkachjinayá kaín nkehe k'ónana jie chonta.

19 Ntá tsontátjan asenná kixin: Asénni, nchónhya nkehe chonta jaha tsíchjina tsjacha nchónhya nánó. Ntá jie t'ók'áha la inte la its'ia la tócháha,” ichro ch'án.

20 Kjánchó ntáche Dios tí jehe ch'án kixin: “Lontia xikaha ichrúa la, kixin ijie tie itsi nkexro tsjanchia asán. A ntá tí nkehe kjuásichjina la, ¿xá nkexro kuènte tíha?” ichro ch'án.

21 Mé xikaha tsonhen tí nkexro chóna nchónhya nkehe chjasintajni ntihi, a ntá naxa kjueyáhya ch'án nkehe kuènte nkaya nkajní —mé ichro ch'ín Jesús.

Dios mé t'ayakonhen tí xjeen ch'án
(Mt. 6.25-34)

22 Ntá chr'éxin ntáche ch'ín Jesús tí sín k'uájiko ch'án kixin: —Tjonkará kixin chrókóxakuanhyará tí nkehe chrókjónterá la ko tí ka chrók'uítsará.

23 Antsí sínkí tí kjuachón, a ntá tí nkehe chrókjónterá la kánhyó sínkí. La ko antsí sínkí tí cuerpo kuéntará, a ntá kánhyó sínkí tí ka chrók'uítsará.

24 Xráxinkáonrá nkexrí siín tí kontálo. T'enkahya va la ko tjáhya va la ko chóntahya va nketí ts'ínkachjinayá va tí noa. Kjánchó Dios la tjanjon nkehe sine va. A ntá jahará la antsí tjetóan, a ntá tí ko xritjaka la kénhyó.

25 ¿Á tjejó jnkójínrá tjenkayáxinrá kixin tí chrókóxakonhanrá má ntá naxa chrók'uankírá it'o metro ntetoxinrá inaá?

26 A ntá xitjahya chrókjuich'erá tíha kjónté ijnko nkehe ntsí, ¿a ntá nkehe tsonhen tóxakonhanrá í so nkehe siín?

27 Xráxinkáonrá nkexrí sít'ánkí tí catsjo lirio ch'ehya xra la ko tjonhya. Ntá kjónté ntáxrjan kixin tí ch'ín rey Salomón kaín ka náxrjón k'uék'ínkáya ch'án naxa kjuíncheyóehya ch'án kixin antsí náxrjón tí tsjo a.

28 A ntá xikaha Dios mé nchek'itsa ch'án kaín kayoa kjónté ijie síchón la ntóye tsoche, la mé xikaha tsjanjon ch'án tí nkehe chrok'uítsará jahará. ¿Ntá nkekuènte kixin naxa titekákonhyará ch'án?

29 ¿Ntá nkekuènte ixrírá tóxakonhanrá xritjeyará nkehe sinterá la ko nkehe its'irá?

30 A ntá tí chojni chjasintajni xritjeyá sín kaín tí nkehe a. Kjánchó It'ará ó nohe ch'án kixin t'ichjánxinhanrá kaín tí nkehe a.

³¹ Senó chrókjuéyará tí kjuachaxin kuènte Dios, a ntá jehe ch'án mé tsjanjon ch'án kaín nkehe t'ichjánxinhanrá.

*Tí nkehe tjete síin nkaya nkajní
(Mt. 6.19-21)*

³² Chrakonhyará jahará kolélo kuèntana. Kjónté tsjéhyará la It'ará tóxrjínhin ch'án tsotjáhará ch'án tí kjuachaxin kuènte ch'án.

³³ Nchekjirá kaín nkehe chontará la ntá chjeherá tí chichaon tí sín chóntahya. A ntá xíkaha sích'erá la tí tjoa t'inka chichakoanrá tsontaxinhya kixin tí nkehe tjete síin nkaya nkajní tsjejehya la ko ntaha kohya xíchee la ko ts'ínhya kué la ko ts'itjáyanhya.

³⁴ A ntá tí nkaya nkajní tsochontará nkehe tjete la ntá tí nkehe tjenkayáxinrá la kjaxin ntaha tjen.

T'ichjánxin listo chrók'uejóchónhenni

³⁵ T'ichjánxin listo ts'ejochónhénra la ko tsjak'ekoará xrohi tjeche.

³⁶ Listo chrók'uejorá éxi chojni ch'e xra tjejóchónhen sín tsokjanxin tí lámoe sín tí tsíkótehe chojni kixin tió tsi ch'án la ts'èya ch'án, la ntá tsakitjehe sín tí puerta tjoka.

³⁷ Náxrjón tí nkexro ch'e xra tió chrókjan tí lámoe sín chrók'uikon ch'án kixin naxa tjejótsjehe sín. Ntá chaxín ntáxrjan kixin tí ch'ín lamo ts'etoan ch'án kixin ts'ejótjaxin sín tí tjen mesa ntiha ntá tsjanjon ch'án nkehe sine sín.

³⁸ Kjónté chrókui ch'án k'áxrótjen o chrókui ch'án nantóye mé xíkaha chrók'uikon ch'án kixin tjejótsjehe sín la náxrjón tí sín ch'ehe ch'án xra.

³⁹ Chrókónohará tíhi kixin tí chrókónohe tí ìché nchia nke hora chrókui tí xíchee ntá chrókjuak'etsjehe ch'án chrókuítóehya ch'án chrók'uixenhen xíchee tí ntøe ch'án chrókueé.

⁴⁰ Ntá jahará kjaxinrá xíkaha chrók'uejotsjehérá kixin titàya tsi tí Xjeen Dios K'óna Chojni.

*Tí nkexro jína ch'e xra la ko tí ch'ín ch'ehya xra jína
(Mt. 24.45-51)*

⁴¹ A ntá ch'ín Pedro kjuanchankí ch'án kixin:

— Ìnchéni, ¿á jehóni kaín ni kjuíncheyóéxian nkehe ntáchrúa o kaín chojni? —ichro ch'án.

⁴² Ntá ntáchrú Ìnchéni kixin:

— ¿Nkexro tí t'etoan tí xra jína, a ntá tí lámoe ts'etuñhen kixin ts'ayakonhen ch'án tí chojni síin tí nchia ntiha kixin tsjanjon ch'án nkehe sine sín xintii tí hora a?

⁴³ Náxrjón tjen tí nkexro a tió tsi tí lámoe ts'ikon ch'án kixin naxa tjech'e tí xra.

⁴⁴ Tíhi mé chaxín tsontáxrjan kixin tí ch'ín lamo tsochjéhe ch'án kaín xra chóna ch'án ts'etoan tí ch'ín a.

⁴⁵ A ntá tí ch'ín t'etoan sítónhen xra tsjenkayáxin kixin tjokahya tsokjan tí lámoe ch'án, a ntá tsjankíxin ch'án tsónínakonhen ch'án tsjanjonko ch'án tí í so chojni ch'é xra, tí chojni ntoa la ko tí chojni chjin, a ntá jehe ch'án sine ch'án la its'i ch'án la tsokoaan ch'án.

⁴⁶ A ntá tí lamo tsokjan tí yaon tjenkayáxinhya tí ch'ín ch'e xra, na mé ijnko hora noehya ch'án. A ntá imá sinchekjasóte ch'án tí ch'ín kuítóhehe xra la ntá tsjasóteko ch'án tí sín titekakonhya.

⁴⁷ 'A ntá tí nkexro nohe ch'án nkehe tí xra tjinkaon tí lámoe ch'án la tóxakuenhya ch'án la titekakonhya ch'án la mé tí ch'ín a imá tsjasóte ch'án ts'ekon ch'án.

⁴⁸ A ntá tí nkexro noehya nkehe tí xra tjinkaon tí lámoe ch'án ntá ch'e ch'án nkehe chrókjuasótéxín ch'án la kjónté kánhyó tsjasóte ch'án ts'ekon ch'án. A ntá tí nkexro k'uáyéhe nchónhya nkehe la antsí tsjé xra ts'áyéhe ch'án sich'e ch'án; la ko antsí tsjé xra tsoxranchehe tí nkexro k'uáyéhe itsjé nkehe.

*Jnkokoáhya tsjenkayáxin chojni kixin ó kui Ìnchéni Jesús
(Mt. 10.34-36)*

⁴⁹ Janhan k'uinka kixin sintak'ákjen xrohi chjasintajni. Ách'e ntáxrjan kixin ó tjechr'ákjen tí xrohi a ntá naxa náhi.

⁵⁰ T'ichjánxin nchónhya tsona tsjasótena. Tóxakonna tsoxiteyáxia kaín tíha.

⁵¹ ¿Á tjenkayáxinrá kixin k'uinkakian kjuaxróxin tí chjasintajni ní? Méxra ntáxrjan náhi. Jnkokoáhya tsjenkayáxin chojni xikaha.

⁵² Kixin ijie xrankíxixín in'ó chojni naxa kjéhya jnkokoáhya tsjenkayáxin sín. Tí iní tsonínkakohen tí yaá. Tí yaá tsonínkakohen tí iní.

⁵³ A ntá tí it'é tsonínkakohen tí xjeen ntoa, la ko tí xjeen ntoa tsonínkakohen tí it'é. A ntá tí ìné tsonínkakohen tí xjeen chjin, la ko tí xjeen chjin tsonínkakohen tí ìné. Tí ich'ee tsonínkakohen tí tíkíntee la ko tí tíkíntee tsonínkakohen tí ich'ee tjan.

*Tí nkehe chronkaxín nkehe tsonhen
(Mt. 16.1-4; Mr. 8.11-13)*

⁵⁴ Ch'ín Jesús kjaxín ntáche ch'án tí chojni siín kixin:

—A ntá ts'ikonrá ts'àya tjuí tí tjiatóxin yaon, a ntá ntáchrórá kixin ts'aniá chrin, a ntá xikaha chaxín tsonhen ts'aniá chrin.

⁵⁵ A ntá tí chjéhe xrinto nó sur ntá ntáchrórá kixin tsosóa, a ntá xikaha chaxín tsosóa.

⁵⁶ Jahará ntoáhya tjenkayáxinrá. Ó nohará tjenkayáxinrá nkexrí tsonhen nkajni la ko chjasintajni. ¿Ntá nkexrí naxa tiénxinyará nkehe sítónhen tí tjejorá jie?

*Chrókóxakohenni kjuaxróxin chrók'uejókoni tí sín nínkakohenni
(Mt. 5.25-26)*

⁵⁷ ¿Nkekuènte tjéyáhyará jahará nkehe tí jína?

⁵⁸ Tí jnkójín nkexro tsjanchia jie sátjikoará ch'án nkayakon tí sín t'etoan na tí ntia ó chrónkakjórá ch'án kixin tsoyóxin ts'ixinhya kjuanínkaon kixin sátsjikoahyará nkayakon tí ch'ín juez, kixin tí ch'ín juez chrók'uetóan ch'án kixin sátsjikoará tí sín comandante. A ntá tí ch'ín comandante chróchr'áxanhanrá ch'án ntóechiso.

⁵⁹ Ntáxrjan kjá ni chrók'uaxrjéxinyará ntiha tsjenkajiará kaín xín chichaon chonta.

13

T'ichjánxin chrókjuinkí chojni tí nkehe tjenkayáxin sín

¹ A ntá tí yaon k'uejó iso sín chénka sín tí ch'ín Jesús kixin nkexrí kjuích'e ch'ín Pilato k'uetóan its'en iso chojni tsíkjixín estado Galilea k'uítji ijnié sín kójnkójeiko tí ijnié tí ko k'óyán sín kjuanchexín sín kjuasáyé Dios.

² A ntá kjuátehe ch'ín Jesús ntáchro ch'án kixin:

—¿Á tjenkayáxinrá kixin xikaha kónhen tí sín tsíkjixín estado Galilea kixin antsí jie jie chóna sín, a ntá tí í so sín chjasén sín la á náhi ní?

³ Ntáxrjan tíhi kjá náhi. A ntá jahará tí tjínkíhyará tí tjenkayáxinrá la kaín rá xikaha its'enrá kjaxin.

⁴ ¿Á tjenkayáxinrá kixin antsí má k'uéchóna jie tí dieciocho chojni ik'uén xrátja sín tí torre Siloé, a ntá tí í so sín chjasin Jerusalén la á náhi ní?

⁵ Ntáxrjan tíhi kjá náhí. A ntá jahará tí tjínkíhyará tí tjenkayáxinrá la kaín rá xíkaha ts'itjáyanrá kjaxin.

Ch'ín Jesús kjuíncheyóexin ch'án éxí ijnko nta to higo t'ónahya to

⁶ A ntá ch'ín Jesús kjuíncheyóexin ch'án ntáchro ch'án kixin:

—Ijnko chojni chóna ijnko nta to higo nóntee ch'án. Ntá sákjuítsjehe ch'án á k'óna to. A ntá náhí k'uitjahya ch'án ninkehó to.

⁷ Ntá ntáche ch'án tí nkexro t'ayakonhen tí nonte a kixin: “Ó ní nánó t'inkatsjahá tí nta la k'uitjáhya ninkehó to higo. T'ochrínjian tí nta kixin tsoxéhe tí nonte a.”

⁸ A ntá tí ch'ín t'ayakonhen nonte kjuátehe ch'án ntáchro ch'án kixin: “Áxri, tjtóhé ijie nánó kixin sñtantá nche la ko tsjiko nchekajjehe.

⁹ A ntá tí xíkaha ách'e ts'óna to. A ntá tí náhí na ntá ts'ochrínjian chr'éxin.”

Ch'ín Jesús kjuínchekitohe jína ijnko tjan níhi tí yaon t'ok'éhe chojni

¹⁰ Ch'ín Jesús kjuák'e ch'án ijnko nñnko kjuakoxin ch'án ijnko yaon t'ok'éhe chojni.

¹¹ Ntiha tjen ijnko chojni chjin chóna dieciocho nánó chonta tjan ijnko nchakuen tí jínahya kjuíncheníhi tjan tjesékoá tjan xitjahya xrentoá tjan.

¹² A ntá ch'ín Jesús k'uikon ch'án kixin xíkaha tjen tjan ntá k'uíyehé ch'án tjan ntáchro ch'án kixin:

—Naná, ó kjuìnhan tí chin chonta —ichro ch'án.

¹³ A ntá jehe ch'án kjuak'etja tja ch'an chrítaón tí jehe tjan a ntá tuénxín xrentoá tjan ntá chjéhe tjan kjuasáyé Dios.

¹⁴ A ntá tí ch'ín t'etōan kuènte nñnko kónínkaon ch'án kixin ch'ín Jesús kjuínchekitohe jína ijnko chojni ijnko yaon t'ok'éhe sín, ntá ntáche ch'án tí chojni a kixin:

—Siín injon yaon mé chrókónhen xra chrók'uinkará chrókuitōhará jína na jehya tí yaon t'ok'éheni chrókónhen tíha —ichro ch'án.

¹⁵ A ntá Ìnchéni kjuátehe ch'án ntáchro ch'án kixin:

—Ntoáhya tjenkayáxinrá jahará. ¿Á chrókjuasintankeehyará tí koxintaará la o tí kolóchōará chrókjuíkoará va nta tí yaon t'ok'éheni ní?

¹⁶ A ntá tí tjan mé tsík'axrjeníxin tí ch'ín Abraham na mé ó chóna dieciocho nánó tsíkjinchenteto ch'ín Tsochren tí jehe tjan, ¿á jehya jína kjaxin chrókjuasintanká tí nkehe tsíkóntetoxín tjan tí yaon t'ok'éheni? —ichro ch'án.

¹⁷ Ntá xíkaha ichro ch'ín Jesús la ntá kaín tí sín kónínkakonhen ch'án la kósuèhe sín. A ntá kaín tí chojni siín ntaha chéhe sín k'uikon sín kaín tí kjuaxroan jié kjuakoxin tí jehe ch'án.

Kjuíncheyóexin ch'ín Jesús éxí ijnko tje ntsí kuènte nta mostaza

(Mt. 13.31-32; Mr. 4.30-32)

¹⁸ Ntá ntáchro ch'ín Jesús kixin:

—¿Nkehe tóyóexin tí t'etōan Dios tí kjuachaxin kuènte ch'án la ko nkehe jína chrókjuíntayóaxian?

¹⁹ Éxí yóhe ijnko tje kuènte nta mostaza k'uēnká ijnko chojni nōntee ch'án. A ntá tíó k'uánkí kóyóhe éxí ijnko nta jié. A ntá tí koxroxé xritjaká mé kui va kjuích'éna va kaké va chrík'á tí chaon tí nta.

Ch'ín Jesús kjuíncheyóexin éxí tí xroan t'ánkíxin niotja

(Mt. 13.33)

²⁰ Ntá ntáchro ch'ín Jesús ínaá kixin:

—¿Nkehe chrokjuíntayóaxian tí t'etōan Dios tí kjuachaxin kuènte ch'án?

21 Éxí yóhe tí xroan nchek'ánkí niotja kjuinkíkjanxin ijnko chojni chjin iní medida harina. A ntá tí ch'o la k'uánkí.

Tí puerta tekahya
(Mt. 7.13-14, 21-23)

22 K'uátsínka ch'ín Jesús kaín chjasin hyé la ko kaín chjasin ntsíntsi nkákjako ch'án tí tan jína kixin jehe ch'án ó sátsji ch'án chjasin Jerusalén.

23 A ntá ijnko nkexro kjuanchankí ch'án kixin:

— Ìnchéni, ¿á tsjéhya tí sín tsaá? — ichro ch'án.

A ntá jehe ch'án kjuátehe ch'án ntáchro ch'án kixin:

24 — Tóxakonhanrá t'ixeenxínrá tí puerta tekahya kixin nchónhya sín tjinkaon sín chrók'uixenhen sín, kjánchó tjachahya sín.

25 A ntá tí ìnché nchia ts'ikjéhe ch'án tí puerta. A ntá chr'éxin jahará ts'ejorá ntója ts'èyará ts'inkará tí puerta tsontáchrórá kixin: “Tadá, takítjehé nchia”, tsixrorá. Kjánchó jehe ch'án tsjatehe ch'án tsontáchró ch'án kixin: “Nonahya nketí k'uinkaxínrá jahará”, tsixro ch'án.

26 A ntá tsjankíxinrá tsontáchrórá kixin: “Kjóneni la ko k'uíni jnkokoá la ko jaha kjuákoxian tí ntáxinni”, tsixrorá.

27 A ntá jehe ch'án tsjatehe ch'án tsontáchró ch'án kixin: “Ó ntáxrjan janhan kixin chonhya tí jahará. Tjtohérá tí janhan sájtirá ókjé kaín tí jahará jínahya kjuich'erá.”

28 Ntaha tsotsjankará la ko sintetaónrá nénorá tió ts'ikonrá kixin ch'ín Abraham la ko ch'ín Isaac la ko ch'ín Jacob la ko kaín tí sín k'uéchronkaxín itén Dios mé tjejó sín tí tjen Dios t'etōan ch'án, a ntá jahará la ts'axrjéxinrá ntója ntiha.

29 Tsjixin chojni nó tjitoxin yaon la ko nó tjiátóxin yaon la ko nó norte la ko nó sur ntá ts'ejótjāxin sín tí tjen Dios t'etōan ch'án la sine sín.

30 A ntá iso tí sín k'uituenhen senó la mé ts'etōan sín, la ko iso tí sín k'uék'etōan senó la mé ts'ítuenhen sín.

T'ává ch'ín Jesús
(Mt. 23.37-39)

31 A ntá tí yaon a ikui iso sín fariseo ntáche sín tí ch'ín Jesús kixin:

— Sátjixian ntihi kixin ch'ín Herodes tjinkaon chrók'óyan ch'án tí jaha — ichro sín.

32 A ntá jehe ch'án kjuátehe ch'án ntáchro ch'án kixin:

— Sátjirá chenkará tí ch'ín jínahya ch'ia kixin: “Ijie la ko ntóye tsakítsje nchakuen tí jínahya la ko sintakitōha chojni níhi jína la ntá tí nixin yaon a ntá tsjixinna tí xra kuéntana,” tsixrorá.

33 Kjánchó t'ichjánxin kixin naxa sájtjya tí jie yaon la ko ntóye la ko tí yaon chr'éxin kixin t'ichjánxin kixin ijnko nkexro chrónka itén Dios chrók'uenxín ch'án chjasin Jerusalén.

34 'Jerusalén, Jerusalén. Jahará t'oyánrá tí sín tjako itén Dios la chjehérá xro tí sín ichr'án ch'án ikui chrókjuínkítsará. Imá itsjé veces tjínkavan chrókójnkotsérá la chrók'uáyakonhanrá éxí ijnko cochíká mé t'ayakonhen xjeen va chrínkí kanenee va mé xikaha tjínkavan chrók'uáyakonhanrá tí jahará. Kjánchó jahará la tjinkákonhyará xikaha.

35 Chrókónohará kixin Dios la tsítóhe ch'án tí jahará la ts'ikonhyará tí janhan tsjixrakájia tí yaon tsontáchrórá kixin: “Jína tí nkexro kjuixin kjuachaxin ihnié Ìnchéni Dios.”

14

Ch'ín Jesús kjuínchekitōhe jína ijnko nkexro tsík'atjoyé kuenté

¹ A ntá tí yaon t'ok'éhe sín sákjuí ch'ín Jesús ntoe ijnko ch'ín fariseo t'etoan kixin ntaha sineko sín ch'án. A ntá tí í so sín fariseo tinkáchréhe sín tsotsjehe sín nkehe sich'e ch'án.

² A ntá ntiha ntoí chók'èxin tí tjen ch'án itjen ijnko chojni tsík'atjoyé kuenté.

³ A ntá ch'ín Jesús kjuanchankíhi ch'án tí sín maestro tjako tí ley la ko tí sín fariseo kixin:

—¿A sín kjuachaxin sinchekitohe ni jína ijnko chojni níhi tí yaon t'ok'éheni o náhi? —ichro ch'án.

⁴ A ntá jehe sín la tání sín. A ntá ch'ín Jesús sákjuíko ch'án tí ch'ín níhi la kjuínchekitohe ch'án jína la k'uetuēnhen ch'án kixin sátsji ch'án.

⁵ A ntá ntáche ch'án tí sín fariseo kixin:

—Jnkojín tí jahará chontará kolóchoará o koxintaará chrókjuítsínkáya va tòye ¿á senóhya chrókuakítsjetaónrá va tòye kjónté yaon t'ok'éheni ní? —ichro ch'án.

⁶ A ntá jehe sín ninkehó kjuátēhya sín kixin xikaha ichro ch'án.

Tí sín tsík'iyēhe sín sátsji sín kia tsíkótehe chojni

⁷ Ntá k'uíkon ch'ín Jesús kixin tí sín tsíkóchjina tí kia a kjueyá sín silla náxrxón ts'ejóya sín tí tjen mesa ntá kjuíncheyóexin ch'án ntáchro ch'án kixin:

⁸ —Tió jnkojín nkexro ts'iyaha sín kixin tsjasán ijnko kia tsotehe chojni la tjéyáhya tí nta silla kuēnte tí sín t'etoan kixin ách'e tsi jnkojín nkexro antsí t'etoan

⁹ a ntá tí nkexro k'uíyáhará yóirá itsi ch'án tsjanchará ch'án kixin t'inkátjenxian tí tjen jaha méhe kixin ntaha tsjak'e í jnko nkexro, tsixro ch'án. Ntá tsosuaaha sátsjia tsjak'etjaxian tí silla kjuixixín.

¹⁰ Íchá jína tió t'iyaha sín chrókjuak'etjaxian tí silla tjetuanhya, kixin ntá chrókui tí ch'ín tsík'iyaha tsontáchro ch'án kixin: “Jína tjoní la t'atsínka tjak'etjaxian tí silla antsí náxrxón”, kixin ntaha tsjikosáyaha sín nkayakon kaín tí sín ts'ejótjaxinkoa sín ntiha.

¹¹ Kixin tí nkexro sinchehnkehe asén kixin imá chrók'uetōan ch'án la mé chr'éxin Dios tsjanjonhya kjuachaxin kixin ts'etoan ch'án. A ntá tí nkexro k'uék'etōanhya la mé chr'éxin Dios tsjanjon kjuachaxin kixin antsí ts'etoan ch'án.

¹² Kjaxin ntáche ch'án tí nkexro tsík'iyēhe ch'án kixin:

—Tió tsjásian kia it'o yaon la o tsonjin la t'iyēéhya tí sín choxian la ko tí sín kichuá la ko tí sín naxa kjéhya la ko tí sín rico chjino ntoa, kixin jehe sín la chr'éxin ts'iyaha sín ínaá la xikahó la ó kjuixin kjan tí k'uíyēhé sín.

¹³ Íchá jína chrók'uíyēhé tí sín nòla la ko tí sín tsixénká toté sín la ko tí sín xitjahya tji la ko tí sín t'ikonhya.

¹⁴ Ntá chrókócháha jaha kixin jehe sín xitjahya ts'iyaha sín tsjasin sín kia. A ntá tió tsoxechónjian tí sín jína la mé Dios mé tsjenkaha kixin kjuínkítsa tí jehe sín.

Ch'ín Jesús kjuíncheyóexin ch'án éxí ijnko kia jié

¹⁵ A ntá kuínhin ijnko tí sín tjejótjaxin sín chjino tí mesa, a ntá ntáche ch'án tí ch'ín Jesús kixin:

—Náxrxón tí sín sine niotja tí tjen Dios t'etoan ch'án —ichro ch'án.

¹⁶ Ntá ntáchro ch'ín Jesús kixin:

—Ijnko chojni kjuasin ijnko kia jié ijnko kónjín la k'uíyēhe ch'án nchónhya chojni tsi sín tí kia a.

¹⁷ A ntá ó kuichjina tí hora sine sín ntá k'uetuēnhen ch'án ijnko chojni ch'ehe ch'án xra tsjichenka ch'án kaín tí sín ó tsík'iyēhe ch'án kixin chrókóchjina sín kixin ó tjejóchónhen kaín nkehe sine sín.

18 Ntá kaín sín kjuankíxin sín chrónòà sín kíxin xitjahya tsjiji sín sine sín. A ntá tí ch'ín saoxín kjuítsjehe ch'án ntáchro ch'án kíxin: “Na ntá k'uenani ijnko nonteeni la t'ichjánxin tsjitsjeheni la xitjahya tsjijini tí t'iyeheni ch'án, ntá chénka ch'án kíxin chrókónínkakuenhyani ch'án”, ichro ch'án.

19 A ntá í jnko ch'ín ntáchro ch'án kíxin: “Na ntá k'uenani in'ó yunta koxinta, a ntá t'ichjánxin tsotsjeheni á jína ch'e va xra, ntá chénka ch'án kíxin chrókónínkakuenhyani ch'án”, ichro ch'án.

20 A ntá í jnko ch'ín ntáchro kíxin: “Na ntá kóteheni, méxra xitjahya tsjijini”, ichro ch'án.

21 Ntá ó kjan tí ch'ín ch'e xra chénka ch'án tí ch'ín lámo kaín tí nkehe tsintáchro sín. A ntá tí ch'ín lámo kuínhin ch'án xikaha la ntá kónínkaon ch'án ntá ntáche ch'án tí ch'ín ch'ehe ch'án xra kíxin: “Tjoka sátjia kaín ntia chjasin i la tsjiko ntihi tí sín nòà la ko tí sín tsixénká toté sín la ko tí sín xitjahya tji la ko tí sín t'ikonhya”, ichro ch'án.

22 A ntá chr'éxin ntá kjan tí ch'ín ch'e xra chénka ch'án tí lámo kíxin: “Ó kjuínchexiteyáni xikaha kuétuènhenni la kjónté naxa xranka chrókui chojni”, ichro ch'án.

23 A ntá tí ch'ín lámo ntáche ch'án tí ch'ín ch'ehe ch'án xra kíxin: “Sátjia kaín ntia jié la ko kaín ntia ntsí la tétuèhén chojni síin chrókui sín chrók'uiixixenhen nchia ntona naxa xranka.

24 Kíxin ntáxrjan kíxin nijnko tí sín k'uíyahá senó chrókui sín chrókjone sín tí nkehe chrótjahá sín”, ichro ch'án.

Ixra tsochréheni Cristo

25 Nchónhya chojni nkáchréhe sín tí ch'ín Jesús, ntá jehe ch'án kuinkátjía ch'án kotónhen ch'án ton ch'án ntáchro ch'án kíxin:

26 —A ntá jnkojín chojni tsotjinkaon tsochréhe tí janhan la antsí má tjetoan chrótuana sín la kjónté kénhyó chrótuèhe it'é sín la ko ìné sín la ko ichjién sín la ko xjeen sín la ko kichó sín ntoa la ko kichó sín chjin la ko kjónté kénhyó chrótuèhe asén sín. A ntá náhi la xitjahya ts'óna discípulo kuèntana jehe sín.

27 Tí nkexro tsamáhya tí ntacruz kuènte sín tsochréhya sín tí janhan la xitjahya ts'óna discípulo kuèntana.

28 A ntá jnkojín tí jahará chrókjuich'énará ijnko tjat'o nteto, zá senóhya chrókjuenkayáxinrá kíxin nkekjaín chichaon ts'ichjánxin ts'ixenhen chrótsjehérá á nchoxon chrókjuixixín chrók'ónaxín tí tjat'o a?

29 A ntá tió tsjankíxinrá sich'énará tí tjat'o ntá chr'éxin xitjahya tsjixin sich'énará, ntá kaín chojni ts'ikon sín tsjanoará sín

30 tsontáchro sín kíxin jaha kjuankíxian kjuich'éna, a ntá jie xitjahya sinchekjixian ts'óna, tsixro sín.

31 A ntá jnkojín tí ch'ín rey t'etoan tsjanjonko í jnko rey t'etoan kjaxin násenó chrókjuenkayáxin ch'án kíxin ite mil soldado chóna ch'án, á chrókjuacha ch'án chrókjuachaxín ch'án tí kán mil soldado chóna tí í jnko ch'ín t'etoan.

32 A ntá ti chrókjuachahya ch'án chrókjuanjonko ch'án tí í jnko ch'ín rey, ntá naxa ikjín tjen ch'án la íchá jína chróchr'án ch'án ijnko nkexro tsochronóehé ch'án kíxin chrók'uiixinhya kjuanínkaon.

33 Mé xikaha jnkojín tí jahará tí tsitóéhyará kaín nkehe ntoáhya tjenkayáxinrá xitjahya ts'óna discípulo kuèntana.

Tí xijnta tsík'ánkéhé tí jní

(Mt. 5.13; Mr. 9.50)

34 A ntá jína tí xijnta, kjánchó tí chrók'uánkéhé tí jní la ntá xitjahya chrókójní inaá.

³⁵ Ntá tí xikaha la ni tí nche xitjahya tsjiko la chrók'ónahya nkehe la chrok'uitjini ntója. Tí nkexro tjinkaon chrókuinhin la chrókuinhin kaín tíhi —ichro ch'in Jesús.

15

Kjuíncheyóexin ch'in Jesús éxi ijnko kolélo tsik'itjáyan (Mt. 18.10-14)

¹ Kaín tí sín nchekjènkj la ko tí sín chóna nchónhya jië kóchjinehe sín tí ch'in Jesús kixin tjinkaon sín chrókuinhin sín tí nkehe tjechronka ch'án.

² A ntá tí sín fariseo la ko tí sín maestro tjako tí ley kjuankíxin sín tjonta sín ch'án ntáchro sín kixin:

—Tí ch'in i la kjónté tí sín chóna nchónhya jië la t'ito ch'án la ko neko ch'án —ichro sín.

³ Ntá ch'in Jesús kjuíncheyóexin ch'án ntáchro ch'án kixin:

⁴ —A ntá jnkojín tí jahará, tí chontará ijnko ciento kolélo ntá chrók'uitjáyan ijnko va, ¿á chrókuítóéhyará tí noventa y nueve va tí nteje ó, a ntá á chrókuíkjéyáhyará tí ko tsík'itjáyan hasta chrók'uitjájará va ní?

⁵ A ntá tí ts'itjárá va ntá tsamárá va tsocháhará.

⁶ Ntá tió tsokjanrá ntóará ntá ts'iyehérá kaín tí sín choxinrá tjóra jína la ko tí sín chjinaxón ntóará ntá tsontácherá sín kixin: “Tsochéheni ts'ejóni jie kixin ó k'uitjá tí kolélo tsík'itjáyan.”

⁷ Na mé kjaxin xikaha tsotjonkará kixin antsí tsochéhe kaín tí sín siín nkaya nkajni tió ijnko chojni tsítóhe kaín tí jië tsíkjenkayáxin ch'án. Ntá kánhyó tsochéxin tí sín nkaya nkajni kixin tí noventa y nueve chojni jína t'ichjánxienhya chrókuinkí sín tí nkehe tjenkayáxin sín.

Kjuíncheyóexin ch'án éxi chichaon k'uitjáyan

⁸ 'A ntá ijnko chojni chjin chóna ite chichaon, a ntá tí chrókjuinçek'itjáyan tjan ijnko tí chichaon a la, ¿á chrókjuinçek'ákjenhya tjan xrohi kixin chrókjueyáxin tjan la ko chrok'uánjón tjan tí nchia kixin chrótsjehe tjan jína hasta chrók'uitjajia tjan?

⁹ A ntá tió chrók'uitja tjan la ts'iyehé tjan kaín tí chojni chjin jína tjo tjan la ko tí sín chjinaxón ntóe tjan la ntá tsontáche tjan sín kixin: “Tsochéheni ts'ejóni kixin ó k'uitjani tí chichaon kjuínçek'itjáyan.”

¹⁰ Ntá kjaxin xikaha tsotjonkará kixin imá tsochéhe kaín tí sín ángel kuente Dios tió ijnko chojni tsítóhe kaín tí jië tsíkjenkayáxin ch'án.

Ch'in Jesús kjuíncheyóexin ch'án éxi ijnko ch'in kuicháxinhin chichaon

¹¹ Kjaxin ntáchro ch'in Jesús kixin:

—Ijnko nkexro chóna yaá xjeen ch'án.

¹² A ntá tí ch'in tsoyo ntáche ch'án tí it'é ch'án kixin: “It'éni, chjehéni kaín nkehe chróchjehéni.” A ntá tí it'é sín k'óchrít'óhe ch'án tí nkehe chóna ch'án. A ntá tí ch'in tsoyo k'uáyéhe tí nkehe kuente ch'án.

¹³ A ntá kánhyó tsjé yaon chr'éxin tí xjeen ch'án tsoyo kjuínçekji ch'án kaín nkehe tsík'áyéhe ch'án, ntá sákjuíko ch'án tí chichaon sákjuí ch'án ókjé chjasin kjín. A ntá ntiha kjuínchexénhen ch'án kaín chichaon chóna ch'án kixin jehya tí jína kjuích'e ch'án.

¹⁴ A ntá tió kjuixin kjuèhe ch'án tí chichaon kuicháxinhin ch'án ntá xrínahya kókjinta tí chjasin ntiha ntá kohya nkehe sine kaín sín. A ntá jehe ch'án kjuankíxin ch'án t'enxín ch'án kjinta.

¹⁵ Ntá jehe ch'án sákjuíkjeyá ch'án xra sich'e ch'án. Ntá chjasin ntaha tjen ijnko ch'in kjuanchehe ch'án xra. Ntá tí ch'in a kjuanjón ch'án xra ntá

k'ueṭoan ch'án ḱixin sátsji ch'án nontee ch'án ḱixin ntiha ts'ayakonhen ch'án cochíno.

¹⁶ A ntá jehe ch'án t'enxín ch'án kjinta ntá tjinkaon ch'án chrókjóne ch'án tí nkehe ine tí cochíno ḱixin ninkexró tí ntiha chrohya tsjanjon nkehe sine ch'án.

¹⁷ Ntá jehe ch'án kjuák'e ch'án kjuenkayáxin ch'án ḱixin: “Nchónhya chojni síin ntoe t'aná ch'e sín xra la chóna sín nkehe sine sín. Ntá janhan tjet'énxian kjinta ntihi.

¹⁸ Ntá jie tsokjan tí tjen t'aná la ntá tsontáxrjan ḱixin: It'éni, kjuasinni jie kuítékakuenhya It'éni nkaya nkajní la ko kjuasinhanni jie kuítékakuanhyani tí jaha.

¹⁹ Tósuèheni tsontáchrúa ḱixin xjaan tí jeheni. Ch'énani éxí ijnko chojni t'aha xra”, mé xikaha kjuenkayáxin ch'án tsontáchrú ch'án.

²⁰ Ntá kuákja ch'án ntja xrakoa ch'án tí ntqe it'é ch'án.

'A ntá kjónté naxa kjín kui ch'án a ntá tí it'é ch'án la ó tsík'ikon ntá kuíkonóehé ch'án tí xjeen ch'án. Ntá kuinká ch'án la kjuíxinhin ch'án ntja la kjóa ch'án la ko kjóneko ch'án kochíto.

²¹ Na ntá ntáchrú tí xjeen ḱixin: “It'éni kjuasinni jie kuítékakuanhyani Dios la ko kjuasinhanni jie kuítékakuanhyani tí jaha. Tósuèheni tsontáchrúa ḱixin xjaan tí jeheni”, ichro ch'án.

²² A ntá tí it'é ch'án k'uíyehé ch'án tí sín ch'ehe ch'án xra ntáchrú ch'án ḱixin: “Xrákoará tí ka antsí jína nchek'inkáyará ch'án la ko chr'axenhenrá dedo tja ch'án ijnko koch'aninko la ko nchekjankará ch'án totjoa.

²³ La ko tjicakjínra koxintáxrjan tsanka la t'oyánra va ḱixin sinekoni ch'án tsjasinhinni ch'án kia.

²⁴ Ḱixin tí xjanna i la éxí ó tsík'en ch'án xikaha ntá jie la éxí ó xechón ch'án la tsík'itjáyan ch'án la ntá jie la ó kónoxín ch'án inaá”, ichro ch'án. Ntá kjuanḱixin sín kjuasin sín kia.

²⁵ 'A ntá tí xjeen ch'án saó la nonte tjech'e ch'án xra. A ntá tió kjan ch'án kui ch'án chjinaxón nchia ntá kuínhin ch'án síin són la ko ité sín.

²⁶ Ntá k'uíyehé ch'án ijnko ch'ín ch'e xra ntá kjuanchankíhi ch'án ḱixin nkekuènte xikaha sítónhen.

²⁷ A ntá tí ch'ín a ntáchrú ch'án ḱixin: “Kíchuá la ó tsíkjan. A ntá it'á la k'ueṭoan k'uén koxintáxrjan tsanka ḱixin jína xikjan ch'án”, ichro ch'án.

²⁸ A ntá tí ch'ín saó la kónínkaon ch'án chrohya ch'án ts'ixenhen ch'án nchia. A ntá tí it'é ch'án k'uaxrjexín nchia chronóehé ch'án ḱixin chrók'uixenhen nchia.

²⁹ Kjánchó jehe ch'án kjuátehe ch'án ntáche ch'án it'é ch'án ḱixin: “Nchónhya nánó t'ahani xra, la xráxín kuítékakonhanni kaín nkehe kuétoan la kjuánjonhya nijnko kotentso chrókjónekoni tí sín chóxinni.

³⁰ A ntá jie ikui tí xjaan i kjuínchek'itjáyan ch'án kaín nkehe chjehé ch'án kjuínchek'itjáyanxín ch'án chojni chjin. A ntá jie ikjan ch'án la naxa t'oyán koxintáxrjan tsanka”, ichro ch'án.

³¹ A ntá ntáchrú tí it'é ch'án ḱixin: “Xjeenni jaha, xráxín tjejóko kichó ni ntihi. Kaínxín nkehe kuéntana la kuénta jaha kjaxín. ¿Nkekuènte ninkávan?

³² A ntá jie la t'ichjánxin tsjasinhinni kíchuá kia tsochéheni ḱixin éxí tsík'en ch'án la ntá jie la ó tsíxechón, la tsík'itjáyan ch'án xikaha la ntá jie la kónoxín ch'án inaá.”

16

Ch'ín Jesús kjuíncheyóexin ch'án éxí tí ch'ín k'uáyehé xra la ntá kjuích'ehya xra jína

1 Kjaxin ntáche ch'ín Jesús tí sín k'uájiko ch'án kixin:

—Kjuák'e ijnko ch'ín lamó ricó chóna ch'án ijnko nkexro chjéhe ch'án kjuachaxin kixin ts'etōan tsonhen xra. Ntá kui ijnko nkexro chénka tí lamó kixin: “Tí nkexro t'etōan nchexénhen ch'án tí nkehe chonta”, ichro ch'án.

2 A ntá tí ch'ín lamó k'uíyehē ch'án tí ch'ín ch'ehe ch'án xra ntáche ch'án kixin: “¿Á chaxín xikaha ch'e kixin xikaha ichro sín? A ntá jie tsjánjuan jaha kuentá tí xra kjuich'e kixin ijie í sich'ehea xra tsétōan ntihi”, ichro ch'án.

3 A ntá tí ch'ín t'etōan tónhen xra kjuenkayáxin ch'án kixin: “¿Nkehe chrókjuít'a jie kixin tí lamó la í tsjanjonhya ch'án xra sít'a? La ko janhan la chontahya fuérza sít'a xra nontēe chojni la ko tósuàna kixin chrók'uájia chrókjuánchák'á nkehe.

4 Ó nòna nkehe sít'a kixin ntá tsochonta nkexro tsjanjon kjuachaxin tsjak'é ntōe sín tí í tsochontahya xra sít'a”, ichro tí ch'ín t'etōan.

5 Ntá k'uíyehē ch'án jnkojnko jnkojnko tí sín síkéhe tí lámōe ch'án. A ntá tí ch'ín saō kui ntá tí ch'ín t'etōan mé kjuanchankíhi ch'án kixin: “¿Nkekjaín tjasikéhe lámōéni?” ichro ch'án.

6 A ntá jehe ch'án kjuátēhe ch'án ntáchro ch'án kixin: “Síkani ijnko ciento ntabarril aceite”, ichro ch'án. A ntá tí ch'ín t'etōan ntáchro ch'án kixin: “Ntihi tjen xroon tsjénkaxian a. Tjak'e nonte tjoka la ch'éna í jnko xroon la í cincuenta ó ténixián”, ichro ch'án.

7 Ntá chr'éxin la kjuanchankíhi ch'án í jnko nkexro kixin: “A ntá jaha, ¿nkekjaín tjásiká?” ichro ch'án. Ntá ntáchro ch'án kixin: “Ijnko ciento medida noatrigó síkani”, ichro ch'án. A ntá ntáchro tí ch'ín t'etōan kixin: “Tí xikaha la ntihi tjen tí xroon tsjénkaxian. A ntá jie la ch'éna ochenta ó”, ichro ch'án.

8 A ntá tí ch'ín lamó kjuátsoan ch'án kixin kjónté jehya xra jína kjuich'e tí ch'ín t'etōan kjuich'ehe ch'án xra la kjánchó tí kjuich'ia ch'án la antsí nohe ch'án kjuich'ia ch'án. Méxra tí sín chjasintajni antsí nohe sín ch'iyehe kichó sín, a ntá tí sín ixri tí t'inkaséyan la xikahya chrókjuenkayáxin sín chrókjuich'ia sín, chrókjuenkayáxin sín tí jína.

9 Janhan la tétuanhanrá kixin chrókuicháxinhanrá tí chichaon siín chjasintajni kjónté tjuáhya kixin tsjínkítará chojni kixin ntá itsjórá sín jína. A ntá tíó tsjeje kaín chichaon ntá jehe sín ts'ejóchónhen sín nkaya nkajní ts'áyáhará sín jnkochrín.

10 “Tí nkexro k'uáyakonhen tí nkehe chóna kjónté tsjéhya la kjaxin chrókjuacha chrók'uáyakonhen itsjé nkehe chróchóna. A ntá tí nkexro kjuachahya k'uáyakonhen tí nkehe tsjéhya chóna la kjaxin chrókjuachahya chrók'uáyakonhen tí tsjé nkehe chróchóna ch'án.

11 Mé xikaha tí xitjahya t'ayakonhénrá tí chichaon kuènte chjasintajni ntiho la, ¿ntá nkexrí chrók'uayéhérá nkehe tjete chaxín kuènte nkaya nkajní?

12 Mé xikaha tí kjuachahyará k'uáyakonhénrá tí chichaon kuènte ókjé nkexro, ¿ntá nkexro chrótjáhará jahará tí nkehe chaxín tjete chrók'uáyakonhénrá?

13 Nijnko nkexro xitjahya sich'ehe yaá lamó xra kixin ijnko la tsonínkakonhen ch'án la ko tí í jnko tsotjuèhe ch'án, o ijnko la tsitekakonhen ch'án, la tí í jnko la tsitekakuenhya ch'án. Xitjahya chrókjuich'ehe chojni xra Dios tí tjinkaon sín tsochóna sín itsjé chichaon —ichro ch'án.

14 A ntá tí sín fariseo imá kóxrjínhin sín chichaon, ntá kuínhin sín kaín tíha nkerí ichro ch'ín Jesús, ntá kjuanoá sín ch'án.

15 Na ntá ch'ín Jesús ntáche ch'án sín kixin:

—A ntá jahará tjinkáonrá chrók'uejóxínrá jína nkayakon chojni. A ntá Dios la chóxin ch'án asánrá. A ntá tí nkehe imá tóxrjínhín ch'e chojni la Dios la tóxrjénhaya ch'án.

Tí ley la ko tí t'etoan Dios tí kjuachaxin kuènte ch'án

¹⁶ Naxá kjuakohya ch'ín Juan la k'uékjako sín tí ley kuènte ch'ín Moisés la ko tí nkehe k'uékjin tí sín k'uéchronka itén Dios ósé. A ntá kui ch'ín Juan la chrónka ch'án tí tan jína nkexrí ts'etoan Dios tí kjuachaxin kuènte ch'án ntá kaín chojni imá tjinkaon sín chrókjuacha sín chrók'uejó sín tí tjen Dios t'etoan ch'án.

¹⁷ 'Antsí xrahya chrók'uitjáyan tí nkehe síin nkajní la ko chjasintajni. A ntá xitjahya kixin chróxiteyáhya kjónté ijnko nkehe ntsí t'etoan tí ley.

*Ch'ín Jesús tjako ch'án kixin chrókjuákehya kichó chojni
(Mt. 19.1-12; Mr. 10.1-12)*

¹⁸ A ntá ijnko chojni tsjakehe ichjién la ntá tsakja ch'án í jnko chojni chjin la ijie tíha. A ntá tí ch'ín tsakja ijnko tjan tsíkítsínkehe la kjaxin ijie tíha.

Tí ch'ín rico la ko tí ch'ín Lázaro

¹⁹ Ntá kjuák'e ijnko ch'án imá rico ch'án la ko k'uítsá ch'án ka imá tjete náxrjón kjátse tié la ko kaín yaon kjuasin ch'án kia.

²⁰ A ntá ntója ntøe ch'án kjuák'etjaxin ijnko ch'ín nòa mé it'in ch'án Lázaro tjanchak'á ch'án la ko níhi ch'án tsíchrenka kuenté ntøe ch'án.

²¹ A ntá tí ch'ín nòa la imá kjuak'e asén ch'án chrókjóne ch'án la ko chrókókjexín ch'án tí nkehe tot'ø tsjixènjinkixin mesa kuènte tí ch'ín rico. A ntá tí konja la kjuamá va tí tosóa chóna ch'án.

²² A ntá ijnko yaon mé ik'uén tí ch'ín nòa. A ntá tí sín ángel mé sákjujko ch'án tí náxrjón tjen ch'ín Abraham. La ko kjaxin ik'uén tí ch'ín k'uéríko la sákjuíkjavá sín ch'án.

²³ Ntá tjen ch'án tí sátsji tí sín tsík'en tjetjasóte ch'án. Ntá konta ch'án k'uíkon ch'án kixin ikjín náxrjón tjen ch'ín Abraham tjeko ch'án tí ch'ín Lázaro.

²⁴ Ntá k'uèya tí ch'ín k'uéchóna tsjé nkehe ntáchro ch'án kixin: “It'eni Abraham, tikonóna tétuènhén tí ch'ín Lázaro kixin sinchekjataxín ch'án kóhe dedo tja ch'án intá ntá tsi ch'án tsjak'etak'á ch'án nejen kixin tsoxruehe kixin tjinhaya sóa tí xrohi síin ntihi”, ichro ch'án.

²⁵ Kjánchó ntáchro ch'ín Abraham kixin: “Xjeenni, xráxinkávan kixin tió kjuák'e chjasintajni na ó k'uayéhé itsjé nkehe náxrjón. A ntá ch'ín Lázaro mé k'uáyéhe ch'án nkehe náxrjónhaya. A ntá jie ntihi kjuaxróxin tjen ch'án, a ntá jaha tjetjasótia méhe.

²⁶ A ntá kjaxin jnkosiné tjen tsaka imá jie xitjahya ts'átøye tí sín síin ntihi tsjihya sín tí tjen jaha la ko kjaxin tí sín síin méhe xitjahya ts'átøye sín itsji sín ntihi”, mé ichro ch'ín Abraham.

²⁷ A ntá tí ch'ín k'uéríko mé ntáchro ch'án kixin: “Ntá xrjanónaha jaha It'eni Abraham kixin tétuènhén tí ch'ín Lázaro sátsji ch'án ntøe t'aná

²⁸ kixin ntaha kuítóhe in'ó tí sín kichiná, ntá chróchenka ch'án sín kixin chrókuihaya sín ntihi chrókjuasótehya sín kixin imá náxrjónhaya ntihi”, mé ichro ch'án.

²⁹ Kjánchó kjuátehe ch'ín Abraham ntáchro ch'án kixin: “Ó chóna sín tí nkehe tsíkjin ch'ín Moisés la ko tí sín k'uéchronka itén Dios ósé a. Chrókuinhin sín tí nkehe tsíntáchro tí sín a”, ichro ch'án.

³⁰ Ntá ntáchro tí ch'ín a inaá kixin: “Náhí, It'eni Abraham. Chrókójina sáchrókjuitsjehe ijnko chojni tsík'en ntá chrókuitekaon sín chrókuítóhe sín ijie sín”, ichro ch'án.

31 Ntá ntáchro ch'ín Abraham kixin: “Tí tsitekakonhya sín tí nkehe tsintáchro ch'ín Moisés la ko tí nkehe tsintáchro tí í so sín tsíchronka itén Dios ósé, ntá kjaxin tsitekakonhya sín kjónté chróxechón ijnko chojni tsík'en chrókjuichronka ínaá”, ichro ch'án.

17

Tí kjuaxikaon naxa tjasin chojni jie

(Mt. 18.6-7, 21-22; Mr. 9.42)

1 Ch'ín Jesús ntáche ch'án tí sín k'uájiko ch'án kixin:
—Xrácín síin nkehe tsjasixín chojni jie. Kjánchó nòà tí nkexro tjasin tí nkehe tsjasixín chojni jie.

2 Íchá jína chrókjuincheteyá sín ch'án ijnko xro tsík'óna xrochre chrókjuikákánkí sín ntayaon kixin tjasin ch'án tí nkehe tjasixín jie ijnko chánjan naxa noehya.

3 Tóxakonhanrá kixin xikahya chrókjuásinrá nkehe.

'A ntá tí kichuárá chrókjuasinhanrá ch'án ichrén jie chrónixjehérá ch'án chróchenkará ch'án kixin jehya jína tí xikaha kjuít'ahará ch'án. A ntá tí chrókuitekaon ch'án chrókjuitoxinhin ch'án tí tjenkayáxin ch'án, ntá chrók'uitjáyahanrá tí nkehe kjuít'ahará ch'án.

4 Kjónté chrókjuasinhanrá ch'án jie yato veces jnkokoá yaon la ko yato veces chróntáchro ch'án kixin í xikahya tsjasin ch'án jie ínaá, la t'ichjánxin ts'itjáyahanrá tí nkehe kjuít'ahará ch'án tí xikaha ntáchro ch'án.

Tí kjuachaxin chóntani kixin tinkáchónkini Cristo

5 Ijnko yaon tí sín k'uájiko Ìnchéni ntáche sín ch'án kixin:

—Tjínkítsani kixin antsí chrókuinkáchónkini tí jaha —ichro sín.

6 A ntá Ìnchéni ntáchro ch'án kixin:

—Kjónté intsi chrókuinkáchónkirá tí janhan éxí jiéxin ijnko tje ntsí kuènte nta mostaza la jína chrókuétuènhénrá tí nta sicómoro kixin chrók'uaxrjenkixin tí tjen ntihi sáchrókjui chróxenkaxín jnkosiné ntayaon ntiha, a ntá tí nta la chrókjuinchexiteyá tí xikaha chróntáchrorá.

Nkexrí chrókjuinchexiteyá tí nkexro ch'e xra

7 'Jnkojín tí jahará tí chróchontará ijnko nkexro t'ahará xra, a ntá tí chrókjanxin ch'án nontaará kjuínchenta ch'án nche o k'uáyakonhen ch'án tí ko kuèntará, ¿á chróntácherá ch'án kixin senó chrókjuak'e ch'án chrókjóné ch'án?

8 Kjá náhí. Kjá chrókuétuènhénrá ch'án kixin senó chrókjuinchechján ch'án tí nkehe sinte la ko chrókóyaxínhin ch'án kixin tsjanjon ch'án nkehe nachrohe chrókjonte la ko chrók'uíá. A ntá tsjixin sinte la ntá tsjak'e ch'án sine ch'án la ko its'i ch'án.

9 ¿Á chrókjuanchehérá ch'án kjuasáya kixin kjuínchexiteyá ch'án tí nkehe kuétuènhénrá ch'án? Kjá náhí.

10 Mé kjaxin xikaha tí jahará tió chrókjuixin kaín tí xra k'uetuanhanrá Dios chróntáchrohýará kixin jína kjuich'erá xra kixin ó jehó tí nkehe k'úítuanhanrá kjuinchexiteyárá, tsixrorá.

Ch'ín Jesús kjuínchekitohe ch'án jína ite chojni chóna chinlepra

11 Ntá sátsji ch'ín Jesús chjasin Jerusalén ntá k'uátsínka ch'án nó estado Samaria la ko estado Galilea.

12 Ntá kjuíji ch'án ijnko chjasin ntsí ntá xeta ch'án ite chojni ntoa níhi chóna sín chinlepra. Kjánchó ikjín tjejóchónhen sín

13 ntá itsen k'uíyehé sín ch'án ntáchro sín kixin:

—Jesús, Maestro, tikonóhéni kaín ni —ichro sín.

14 Ntá k'uikon ch'ín Jesús tí jehe sín ikjín tjejó sín ntáche ch'án sín kixin:
—Sátsjirá tjákohérá tí sín nchat'á kixin ó kuítóhará jína, ichrorá.

Nachrohe sákjuí sín tinkákitóhe sín jína.

15 Ntá ijnko tí jehe sín tió kónohe ch'án kixin kuítóhe ch'án jína ntá kjan ch'án chjéhe ch'án kjuasáya Dios la itsen nixja ch'án.

16 Kjuák'exín toch'ín ch'án chrínkí toté ch'ín Jesús k'uisén ch'án xrákjanyani ch'án nonte kixin kjuanchia ch'án kjuasáya. A ntá tí ch'ín a mé tsíkjixín ch'án estado Samaria.

17 A ntá ch'ín Jesús ntáchro ch'án kixin:

—¿Xá jehya ite chojni kuítóhe jína? ¿Xá kjá tí sín ina?

18 ¿Á jehó tí ch'ín i kjónté ikjín tsíkjixín ch'án ikjan ch'án kjuanchehe ch'án kjuasáyé Dios ní? —ichro ch'án.

19 A ntá ntáche ch'án tí ch'ín a kixin:

—T'ínkatjen sátjia. Kixin tí kuítekáván Dios la kuítóha jína —ichro ch'án.

Itsi tí kjuachaxién Dios

(Mt. 24.23-28, 36-41)

20 A ntá tí sín fariseo kjuanchankíhi sín tí ch'ín Jesús kixin nkesá tsi tí kjuachaxin kuènte Dios. A ntá jehe ch'án kjuátehe ch'án ntáchro ch'án kixin:

—A ntá tí tsi kjuachaxin kuènte Dios la me tíha ijnko nkehe xitjahya ts'ikon chojni.

21 Xitjahya tsontáchrórá kixin: “Ntihi tjen,” o “Ntiha tjen”; kixin tí kjuachaxin kuènte Dios itjen jnkosiné tí tjejórá —ichro ch'án.

22 Ntá ntáche ch'án tí sín k'uájiko ch'án kixin:

—A ntá itsi tí yaon tsotjinkáonrá jnkójín yaon chrók'uikonrá tí Xjeen Dios K'óna Chojni, ntá í ts'ikonhyará ch'án.

23 Tsontáchro sín kixin ntihi tjen ch'án, o ntiha tjen ch'án. Kjánchó sáchrókjuihyará la ko chróchréhyará sín.

24 Kixin éxí ts'ikonrá tsjonkixín ts'inkaséyanxín kuenté nkajní mé xikaha tsonhen tió itsi tí Xjeen Dios K'óna Chojni.

25 T'ichjánxín senó tsjasóte ch'án nchónhya la ko tí sín síin jie tsitekakuenhya sín ch'án.

26 Éxí kónhen tí yaon kjuák'e ch'ín Noé mé xikaha tsonhen tió tsokjan tí Xjeen Dios K'óna Chojni.

27 K'uékjine sín la ko k'uék'i sín la ko kótehe tí xjeen sín. A ntá xrínahya kui tí yaon k'uixenhen ch'ín Noé tí ntabárcō ntá k'uániá chrin, a ntá tí sín kuítóhe ntója la kaín sín k'uitjáyán sín.*

28 Mé kjaxin xikaha kónhen tí kjuák'e ch'ín Lot k'uékjine sín la ko k'uék'i sín la ko k'uék'ena sín nkehe la ko k'uékjinchekji sín nkehe la ko k'uék'enka sín nontee sín la ko k'uékjich'ena sín nchia.

29 A ntá tí yaon k'uaxrjexín ch'ín Lot tí chjasin Sodoma, na mé nkajní kuixín xrohi la ko azufre, na mé tíha k'uenxín kaín xín tí sín ntiha.†

30 Mé xikaha tsonhen tí yaon itsi tí Xjeen Dios K'óna Chojni.

31 A ntá tí yaon i tí tjejó jnkójín nkexro chrítaón nchia tjejó't'ok'éhe sín, a ntá ichrén nkehe chóna sín kuítóhe sín nkaxenhen nchia la í chrók'uinkajinhya sín chrókuakitsje sín tí nkehe chóna sín, tjoka sáchrókjuí sín ókjé. Kjaxin xikaha jnkójín chojni tjejó sín nontee sín la í chrókjanhya sín ntōe sín.

32 Xráxinkáonrá nkehe kónhen ichjién ch'ín Lot.‡

33 Tí nkexro tjinkaon kixin kohya nkehe chrókónhen na mé ts'itjáyán. A ntá tí nkexro chrókjuinchek'itjáyánxín asén kixin chróchronka itén Dios la mé tsaá.

* 17:27 17.26–27 Génesis 6.5–7.24 † 17:29 17.28–29 Génesis 18.20–19.25 ‡ 17:32 Génesis 19.26

³⁴ A ntá tsontáxrjan ḱixin tí tie a jnkokoá ts'ejójua yaá chojni la ijnko la sátsji la ko tí í jnko la tsitohe.

³⁵ Yaá chojni chjin its'o sín jnkokoá, la ijnko la sátsji la ko ijnko la tsitohe.

³⁶ Yaá chojni ts'ejóch'e sín xra nonte, la ijnko la sátsji a ntá ijnko la tsitohe —ichro ch'án.

³⁷ Ntá kuínhin sín tíha ntá kjuanchankíhi sín ch'án ḱixin:

—¿Xá nketí tsonhen tíha, Ìnchéni? —ichro sín.

A ntá jehe ch'án kjuátehe ch'án ntá chro ch'án ḱixin:

—Tí tjen tí cuerpo kuènte chojni tsík'en la mé ntiha tsojnkotsé tí kontexjuen —ichro ch'án.

18

Ch'ín Jesús kjuíncheyóexin ch'án éxí ijnko tjan k'án la ko ijnko ch'ín juez

¹ A ntá ch'ín Jesús kjuíncheyóexin ch'án kjuakoxin ch'án ḱixin jnkochŕixin chrónixjehe chojni Dios la ko chrókóxrjéhya sín.

² Ntá ntáche ch'án sín ḱixin:

—Ijnko chjasin kjuák'e ijnko ch'ín juez kjuikosáyehya ch'án Dios la ko k'uéchóntehya ch'án kjuasáyé ninkexró.

³ Kjaxin chjasin ntiha kjuák'e ijnko tjan k'án, jnkoyaxón sákjuítsjehe tjan tí ch'ín juez kjuanchia tjan jie ntá chro tjan ḱixin chrókuítóexín ḱixin ijnko chojni nínkakohen tjan ntiha.

⁴ Nchónhya veces tjitsjehe tjan tí ch'ín juez la chrohya ch'án chrókjuinchekítóexín ch'án. Ntá chr'éxin kjuenkayáxin ch'án ntá chro ch'án ḱixin: “Kjóté í tsjikosáyàhya Dios la ko ninkexró tsjikosáyàhya

⁵ a ntá tí tjan k'án jnkoyaxón tjan chia tjan jie, la tsjínkítsa tjan tsitoexín tí jie tjan chia tjan ḱixin í jnkoyaxónhya itsi tjan tsochronòa tjan ḱixin ó kjuixin kónínkavan jie”, ichro ch'án.

⁶ Ntá ntá chro Ìnchéni ḱixin:

—Mé xikaha ichro tí ch'ín juez jínahya.

⁷ ¿Xá chrókjuinkítsahya Dios tí sín kjueyá ch'án tí chróchronóehé sín ch'án nchakotjin la ko tie? ¿Á tjokahya chrókjuatehe chrókjuinkítsa sín ch'án?

⁸ Ntáxrjan ḱixin kjá tjoka chrókjuinkítsa sín ch'án. A ntá tió itsi tí Xjeen Dios K'óna Chojni, ¿á naxa chrók'uitja ch'án chojni tinkáchónki tí jehe ch'án ntihi chjasintajni? —mé chro ch'án.

Ch'ín Jesús kjuíncheyóexin ch'án éxí ijnko ch'ín fariseo la ko ijnko ch'ín nchekjènkí

⁹ Ntá ch'ín Jesús kjuíncheyóexin ch'án nixjehe ch'án iso chojni tjenkayáxin sín ḱixin imá jína sín a ntá tí í so sín la náhi, ichro sín. Ntá ntá chro ch'án ḱixin:

¹⁰ —Iyó sín ntoa sákjui nkaxenhen nínko ḱixin tsonixjehe sín Dios. Ijnko la fariseo la ko ijnko la ch'ín nchekjènkí.

¹¹ A ntá tí ch'ín fariseo tjexín ch'án toté ch'án nixjehe ch'án Dios ntá chro ch'án ḱixin: “It'eni Dios, kjuasáya tjahá ḱixin jeheni la chóntahyani jie éxí tí sín í so ḱixin teé sín la ko ch'iyehé kichó sín la ko ch'iyehé sín chojni chjin. Kjaxin jeheni la jehya éxí tí ch'ín nchekjènkí tjinhin.

¹² Jeheni la nehanyi iyó yaon jnkojnko semana la ko kjaxin tjanjonni tí chichaon tjachani tí diezmo kuéntá”, ichro ch'án.

¹³ A ntá tí ch'ín nchekjènkí la imá kjín kuítóhe ch'án kóxakonhen ch'án chrókonta ch'án nkajni la mé chjéhe ch'án ntakuin ch'án ntá chro ch'án ḱixin: “It'eni Dios tikonóehéni tí jeheni ḱixin nchónhya jie chóntani”, ichro ch'án.

¹⁴ Tjonkará ḱixin tí ch'ín nchekjènkí tió kjan ch'án ntoe ch'án la Dios kuikonóehé tí jehe ch'án la kjuínhin ch'án tí jie chóna ch'án, a ntá tí ch'ín

fariseo la náhi. Kíxin kaín chojni nchehnkehe asén kíxin imá jína tí jehe sín la mé imá tsontsí. A ntá tí chojni nchehnkehya asén la imá ts'ánkí tí kjuaxrexinkaon kuènte sín.

Ch'ín Jesús kjuíncheyaon ch'án chánjan

(Mt. 19.13-15; Mr. 10.13-16)

¹⁵ Kjaxin kjuikao sín chánjan ntsíntí tí tjen ch'ín Jesús kíxin chrókjuincheyaon ch'án xjan. Kjánchó tió k'uíkon tí sín k'uájiko ch'án la í kjuanjonha sín kjuachaxin kíxin tsochjinako sín xjan.

¹⁶ A ntá ch'ín Jesús k'uíyehé ch'án sín ntáchro ch'án kíxin:

—Títoherá chánjan méhe xrakoa tí tjen janhan la t'ínkakuènyará xjan kíxin tí sín kuènte kjuachaxin kuènte Dios la mé tóyóhe tí jehe xjan.

¹⁷ Ntá chaxín ntáxrjan kíxin tí nkexro ts'ónahya éxí ijnko chánjan xitjahya ts'ejó sín tí ts'etōan Dios tí kjuachaxin kuènte ch'án.

Ijnko ch'ín ntasoá ríco kjuínixjehé ch'án tí ch'ín Jesús

(Mt. 19.16-30; Mr. 10.17-31)

¹⁸ Ijnko ch'ín t'etōan kuènte njnko kjuanchankíhi ch'án tí ch'ín Jesús kíxin:

—Jaha la ijnko maestro jína la, ¿nkehe naxa t'itjayan chrókjuich'eni kíxin chróchóntani kjuachón jnkochrín? —ichro ch'án.

¹⁹ Ntá kjuátehe ch'ín Jesús ntáchro ch'án kíxin:

—¿Nkekuènte ntáchrúa kíxin jína tí janhan? Jnkokoá nkexro la mé jína la tíha mé Dios.

²⁰ Jaha la ó noha nkehe tí k'uetōan Dios kíxin chrókjuacheéhya kíchuará, la ko chrók'oyánhya chojni, la ko chrókueehya, la ko chróntáchrohya ninkehó nkehe chaxínhya kuènte ókjé chojni, la ko chrókjuíkosáyehé it'á la ko ìná —ichro ch'án.

²¹ A ntá jehe ch'án kjuátehe ch'án ntáchro ch'án kíxin:

—Kaín tíha kjuínchexiteyáni desde xjanntsíni —ichro ch'án.

²² A ntá kuínhin ch'ín Jesús kaín tíha ntá jehe ch'án ntáchro ch'án kíxin:

—A ntá jnkokoá nkehe naxa t'itjayan chrókjuich'e, chrókjuínchekjia kaín nkehe chonta la chróchjehé tí chichaon tí sín nòa. A ntá tí nkehe tjete la tsochonta nkaya nkajní. A ntá tió tsjixin sijnchekitonhén sín nkehe, a ntá tsjihá ntá chréhé tí janhan —ichro ch'án.

²³ A ntá tí ch'ín a kuínhin ch'án xikaha la kóxakonhen ch'án kíxin imá itsjé nkehe chóna ch'án.

²⁴ Tió k'uíkon ch'ín Jesús kíxin kóxakonhen tí ch'ín a la ntá ntáchro ch'án kíxin:

—Imá xra kíxin tí chojni chóna itsjé nkehe chrók'uixenhen sín tí tjen Dios t'etōan.

²⁵ Antsí xrahya chrók'uatsínka ijnko kocamello ijnko tjar'i ntachica tjexrja, a ntá antsí má xra kíxin ijnko chojni chóna itsjé nkehe chrókjuak'e tí t'etōan Dios —ichro ch'án.

²⁶ A ntá kuínhin sín kíxin xikaha ntáchro ch'án ntá ntáchro sín kíxin:

—¿Xá nkexro chrókjuacha chrókuaá? —ichro sín.

²⁷ Ntá ntáchro ch'ín Jesús kíxin:

—Tí nkehe tsjachahya chojni chrókjuínchexiteyá, la Dios la tsjacha ch'án sich'e ch'án kaín tíha —ichro ch'án.

²⁸ A ntá ch'ín Pedro ntáchro ch'án kíxin:

—Ínchéni, jeheni la ó kuítóheni kaín nkehe chóntani kíxin tsochréhéni tí jaha —ichro ch'án.

²⁹ Ntá kjuátehe ch'ín Jesús ntáchro ch'án kíxin:

—Ntá chaxín tsotjonkará kíxin jnkójnra chrókuitóherá ntoa, la o chrókuitóherá it'á la ko ìná, la o chrókuitóherá kíchuará, la o chrókuitóherá ichjiánra, la o chrókuitóherá xjaanra kíxin chrókjuich'era xra kuènte Dios

³⁰ la antsí nkehe ts'ayéhérá ntihi chjasintajni la ko tí chr'éxín la ts'ayéhérá kjuachón jnkochrín —ichro ch'án.

Ch'ín Jesús chrónka ch'án inaá kixin its'en ch'án
(Mt. 20.17-19; Mr. 10.32-34)

³¹ Ntá ch'ín Jesús k'uíyehé ch'án jehó tí teyó sín k'uájiko ch'án ntá chrónka ch'án kixin:

—Ije sátsjini Jerusalén. A ntá ntaha tsoxiteyá kaín tí nkehe tsíkjin tí sín tsíchronka itén Dios ósé nkexrí tsonhen tí Xjeen Dios K'óna Chojni.

³² Tsjikaán sín ch'án tí tjejó tí sín jehya judío la ko tsjanoá sín ch'án la ko ts'ántaxínhin sín ch'án la ko ntate sín tsíkite sín ch'án.

³³ Tsjate sín ch'án, a ntá chr'éxín la ts'óyán sín ch'án. A ntá nixin yaon tsoxechón ch'án —ichro ch'án.

³⁴ A ntá jehe sín la ninkehó kienxínhya sín tí nkehe nixja ch'án kixin tíha ijnko nkehe naxa tsjachahya sín chrókienxín sín.

Ch'ín Jesús kjuínchekitohe ch'án jina ijnko chojni t'ikonhya chjasin Jericó
(Mt. 20.29-34; Mr. 10.46-52)

³⁵ A ntá ch'ín Jesús tió chjina chrók'uixenhen ch'án chjasin Jericó ntá ntiha chrínta ntja tjetjaxín ijnko ch'ín t'ikonhya tjanchak'á ch'án.

³⁶ Ntá xrínahya kuínhin tí ch'ín t'ikonhya kixin sít'atsínka nchónhya chojni, ntá kjuanchankí ch'án kixin:

—¿Xa nkerí sítónhen? —ichro ch'án.

³⁷ Ntá chénka sín ch'án kixin ch'ín Jesús tsíkjin chjasin Nazaret ts'atsínka ch'án ntiha.

³⁸ Ntá k'uèya ch'án ntáchro ch'án kixin:

—Jaha Jesús tsík'axrjeníxian ch'ín David, tikonóehéni —ichro ch'án.

³⁹ A ntá tí sín tsítaón ntja la k'uètuénhen sín ch'án kixin tsotání ch'án. Kjánchó jehe ch'án antsí tsen k'uèya ch'án ntáchro ch'án kixin:

—Jaha tsík'axrjeníxian ch'ín David, tikonóehéni —ichro ch'án.

⁴⁰ A ntá ch'ín Jesús ntá ntahó kjuák'echónhen ch'án ntá k'uètoan ch'án kixin tsjikakjín sín tí ch'ín a. Ntá tió kuikao sín ch'án tí chjinaxón tjen ch'ín Jesús ntá kjuanchankí ch'ín Jesús kixin:

⁴¹ —¿Nkehe tjinkávan sít'aha? —ichro ch'án.

Ntá kjuátehe tí ch'ín t'ikonhya ntáchro ch'án kixin:

—Jaha Inchéni, tjinkaonni chrókjuínchek'ikuanni —ichro ch'án.

⁴² Ntá ntáchro ch'ín Jesús kixin:

—Ó ts'ikuan. Ó kuítóha jina kixin kuítekávan tí janhan —ichro ch'án.

⁴³ Ntá tuénxín k'uíkon tí ch'ín k'uék'ikonhya, a ntá jehe ch'án chréhe ch'án tí ch'ín Jesús la ko kjuanchehe ch'án kjuasáyé Dios. La ko kaín tí sín k'uíkon kixin xíkaha kónhen kjuanchehe sín kjuasáyé Dios.

19

Ch'ín Jesús la ko ch'ín Zaqueo

¹ A ntá ch'ín Jesús k'uixenhen ch'án chjasin Jericó la ntá k'uátsínka ch'án tí chjasin a.

² A ntá ntiha tjen ijnko chojni ríco it'in ch'án Zaqueo, t'etuénhen ch'án tí sín nchekjèki.

³ Tjinkaon ch'án chrókjuatsoan ch'án nkexro tí ch'ín Jesús, kjánchó nchónhya chojni siín la xitjahya t'ikon ch'án kixin intsí ch'án.

⁴ Ntá kuinká ch'án kuítaón ch'án ntja kixin tjinkaon ch'án chrók'uikon ch'án. Ntá kuátsé ch'án ijnko nta sicómoro chjinaxón tí ts'atsínka ch'ín Jesús.

⁵ A ntá tió k'uatsínka ch'ín Jesús ntiha konta ch'án tí nta ntáchro ch'án kixin:

—Zaqueo, tjoka tjasinkajían kixin ntoa ntahó tsitona jie —ichro ch'án.

⁶ Ntá ch'ín Zaqueo la tjoka k'uínkajin ch'án kóchéhe ch'án.

⁷ Ntá kaín sín k'uíkon sín xikaha ntá kjuankíxin sín tjonta sín tí ch'ín Jesús, ntáchro sín kixin ntoe ijnko chojni chóna nchónhya jie tsitöhe ch'án.

⁸ Ntá ch'ín Zaqueo kjuák'exín toté ch'án ntáche ch'án Inchéni kixin:

—Jaha Inchéni, chrókónoha kixin tsjánjuan jnkosiné tí nkehe chonta sintakitonhan tí sín nòa. A ntá tí jnkojín nkexro kjuít'áyahā kuaáha la noó veces ts'okjanhan sín tí chichaon jie —ichro ch'án.

⁹ A ntá ntáchro ch'ín Jesús kixin:

—A ntá jie la tsaá chojni tí nchia i kixin tí ch'ín a mé k'uaxrjeníxin ch'ín Abraham.

¹⁰ A ntá tí Xjeen Dios K'óna Chojni mé kuikjeyá la ko sinchekaá tí chojni chóna jie.

Ch'ín Jesús kjuíncheyóexin ch'án éxí ite chichaon imá tjete sínkí

¹¹ A ntá tí chojni siín ntiha nachrohe tjejótinhin sín nkerí tjechro ch'ín Jesús, a ntá jehe ch'án kjuíncheyóexin ch'án nkehe kixin ó tjen ch'án chjinaxón chjasin Jerusalén, a ntá jehe sín kjuenkayáxin sín kixin tí kjuachaxin kuènte Dios la ách'e ó tuénxín tsi, ichro sín.

¹² A ntá ntáchro ch'án kixin:

—Itjen ijnko nkexro tsík'axrjeníxin ijnko nkexro imá k'uék'etoan. Ntá sákjuí ch'án ókjé nación kixin ts'áyéhe ch'án kjuachaxin ts'óna ch'án rey, a ntá chr'éxin la xíkjan ch'án inaá.

¹³ A ntá tió chjina sátsji ch'án ntá k'uíyehē ch'án ite tí sín ch'ehe ch'án xrā ntá chjéhe ch'án jnkojnko tí jehe sín jnkojnko chichaon imá tjete sínkí. Ntá k'uetōan ch'án kixin: “Tsjankíxinrá ch'ekoará xrā tí chichaon hasta tí tsokjanjian”, ichro ch'án.

¹⁴ A ntá tí sín chjasén ch'án ntiha imá kónínkakohen sín ch'án, ntá ichr'án sín iso chojni chréhe sín tí sákjuí ch'án tsochenka sín tí sín siín ntiha kixin tjinkakonhya sín tí nkexro a ts'óna rey ts'etuenhen sín.

¹⁵ Kjónté xikaha ichro tí sín a la k'uáyéhe ch'án kjuachaxin ts'óna ch'án rey. Ntá kjan ch'án chjasén ch'án. Ntá k'uetōan ch'án xrakoa tí sín ch'ehe ch'án xrā, na mé tí sín tsík'áyéhe tí chichaon, kixin tsonohe ch'án nkehe tí xrā kjuích'eko sín tí chichaon k'uáyéhe sín.

¹⁶ A ntá tí ch'ín xrankíxixín kóchjina la ntáchro ch'án kixin: “Tí chichakōan la kjuachani ite chichaon inaá”, ichro ch'án.

¹⁷ A ntá kjuátehe tí ch'ín rey kixin: “Ó nchoxon tí xikaha jaha la ijnko chojni jina ch'e xrā. Jina kjuích'e xrā kjónté jehya xrā jie ntá tsjánjuan kjuachaxin tsétōan ite chjasin”, ichro ch'án.

¹⁸ A ntá kóchjina tí ch'ín í jnko a inaá ntáchro ch'án kixin: “Tí chichakōan la kjuachani in'ó chichaon inaá”, ichro ch'án.

¹⁹ A ntá xikaha inaá kjuátehe tí ch'ín rey kixin: “Tsjánjuan kjuachaxin tsétōan in'ó chjasin”, ichro ch'án.

²⁰ A ntá kóchjina tí ch'ín níxin ntáchro ch'án kixin: “Tí chichakōan la tjinhin. K'uánkíntani panítóéni

²¹ kixin chrakonhanni kixin jaha la jiaha la tjinkávan tsákjá tí nkehe jehya jaha kjuaké la ko tsotjā tí nkehe jehya jaha kuènkaxian”, ichro ch'án.

²² A ntá tí rey ntáchro ch'án kixin: “Jehya chojni jina ch'e xrā jaha. Tí nkehe ntáchrúa tsjáncháxian jie. Jaha la ó noha kixin jiena janhan tsákjaá tí nkehe kjuakéhya, ichrúa, la ko tsotjā tí nkehe kuènkahya.

23 ¿Ntá nkekuènte kíxin chr'anhya tí chichaon ijnko banco chrókjuich'exín xra? A ntá tió kjan ntona la antsí tsjé chichaon chrók'uayáha tí chrókjuacha kíchó ch'ica", ichro ch'án.

24 A ntá ntáche ch'án tí sín siín ntiha kíxin: "Takítsjehérá ch'án tí chichaon tsík'áyéhe ch'án la ntá chjehérá tí ch'ín chóna ite chichaon", ichro ch'án.

25 A ntá jehe sín ntáchro sín kíxin: "¿Nkekuènte chrók'uáyéhe ch'án kíxin ó chóna ch'án ite chichaon?" ichro sín.

26 A ntá tí ch'ín rey kjuátehe ch'án ntáchro ch'án kíxin: "Kjónté jnkojín nkexro itsjé chóna la ts'áyéhe má. A ntá tí nkexro chónahya la kjónté tí ntsí chóna ch'án la ts'axrjehe ch'án.

27 A ntá tí sín nínkakonna sín tjinkakonhya sín kíxin ts'ónana rey la xrákoará sín ntihi ts'íkoxín kuān ts'ochrínjinrá kja sín."

Ch'ín Jesús k'uixenhen ch'án chjasin Jerusalén
(Mt. 21.1-11; Mr. 11.1-11; Jn. 12.12-19)

28 Tió kjuixin ntáchro ch'ín Jesús tíhi ntá chrìn ch'án sátsjì ch'án chjasin Jerusalén.

29 A ntá ó kjujì chjinaxón tí chjasin Betfagé la ko chjasin Betania chjinaxón tí jnā nchek'in sín Olivo, ntá k'uetuenhen ch'án iyó tí sín k'uájiko ch'án

30 ntáche ch'án sín kíxin:
—Sátjirá tí chjasin ntsí chok'èxin ntihi, a ntá tió tsjasánrá ntiha ts'itjará ijnko kolocho tjechroé va naxā ninkexró tjiták'áhya va. Tjasintankehérá va la tsjíkuanará va ntihi.

31 A ntá tí jnkojín nkexro tsjanchankíhará nkekuènte tjasintankehérá va la ntácherá sín kíxin: "Ìnchéni ts'ichjánxinhin va", tsixrorá.

32 A ntá tí sín k'uituenhen sákjuí sín k'uitja sín éxí ntáchro ch'án.

33 A ntá tió tjejójtjasintankehe sín va la ntá tí sín ìnché va kjuanchankíhi sín kíxin:

—¿Nkekuènte tjasintankehérá tí kolócho? —ichro sín.

34 A ntá jehe sín kjuátehe sín kíxin:
—Ìnchéni ts'ichjánxinhin va —ichro sín.

35 Ntá sákjuíkohe sín va tí ch'ín Jesús, la ntá tí iké sín kjuínchekamá sín va, ntá kjuíták'á ch'ín Jesús tí kolócho a.

36 A ntá tinkákjì tí kolócho tjejen ch'án la tinkák'ikjínxìn sín tí iké sín ntā kíxin nátaón tí ka ts'atsínka tí kolocho tjejen ch'án.

37 Ntá tió kjujíchjina sín tí chjinaxón tí t'inkajínxìn chojni tí jnā Olivo, a ntá kaín tí sín kuítekaon tí jehe ch'án chréhe sín kjuankíxin sín itsen nixja sín chéhe sín kjuanchehe sín kjuasáyé Dios kíxin kaín tí kjuaxroan k'uíkonxín kon sín.

38 Ntá ntáchro sín kíxin:
—Jína tí nkexro Rey kjuixìn kjuachaxin ihnié Dios. Tsjak'e kjuaxróxin nkaya nkajní la ko kjuasáyé Dios tjen nkaya nkajní —ichro sín.

39 A ntá iso tí sín fariseo tjejóyákjan sín í so chojni tjejónxexroan sín ntiha ntáchro sín kíxin:

—Maestro, tétuēnhén tí sín chréhe tí jaha kíxin tsotání sín —ichro sín.

40 A ntá ch'ín Jesús kjuátehe ch'án ntáche ch'án sín kíxin:
—A ntá tí sín í tsotání sín la ixrō tsotsje —ichro ch'án.

41 A ntá tió kjujíchjina ch'án chjasin Jerusalén ntá k'uíkon ch'án tí chjasin la ntá tsjánka ch'án kíxin kuítekakonhya sín

42 ntáchro ch'án kíxin:
—Chrókuiéxinrá la ko chrókónohará nkexrí chrók'uayèxinrá tí kjuaxróxin, kjánchó jahará kuítekakonhyará. A ntá ó kjuixin k'uátsínka tí kjuaxróxin chrók'uikonrá la xitjahya ts'ikonrá jie.

⁴³ A ntá tsi iso yaon jínahya itsi tí sín nínkakonhanrá la sich'éna sín ijnko tját'ò ts'ántatjen tí chjasin tjejorá ntihi ts'inkákonhen kixin xitjahya ts'axrjéxinrá chjasin ntihi kixin nkuíxín ts'ejó sín ts'inkákonhanrá sín

⁴⁴ ntá ts'óxíka sín kaín tí tját'ò síin ntihi la ko ts'óyán sín kaín tí chojni síin la ko tsítóehya sín kixin ninkehó xro naxa ts'ejókjen kichó, kixin jahará kjuátsoanhyará kixin kuitsjehe Dios tí chjasin tjejorá ntihi.

Ch'ín Jesús kjuínchetjóá ch'án nkaxenhen nínko
(Mt. 21.12-17; Mr. 11.15-19; Jn. 2.13-22)

⁴⁵ A ntá ch'ín Jesús k'uíxenhen ch'án tí nínko jíé, a ntá kjuankíxin ch'án kuakítsje ch'án tí sín nchekji nkehe la ko tí sín t'ena nkehe ntiha.

⁴⁶ Ntá ntáchro ch'án kixin:

—A ntá ntáchro xroon itén Dios chrónka kixin: “Tí ntóna i mé it'in nchia tsonixjanaxián chojni”,* ichro. A ntá jahará tí nchia i tsíkijich'énará itjueé xíchee —ichro ch'án.

⁴⁷ A ntá tí nínko ntiha kjuák'e ch'ín Jesús kjuako ch'án kaín yaon. A ntá tí sín nchat'á t'etoan la ko tí maestro tjako tí ley la ko kjaxin tí sín t'etoan tí chjasin ntiha kjueyá sín nkexrí chrók'óyán sín ch'án.

⁴⁸ Kjánchó k'uitjahya sín nkexrí chrók'óyán sín ch'án kixin kaín chojni tjejótinhin tí nkehe tjechronka ch'án.

20

Tí kjuachaxin chóna ch'ín Jesús
(Mt. 21.23-27; Mr. 11.27-33)

¹ A ntá ijnko yaon kjuák'e ch'ín Jesús tí nínko ntiha kjuakohe ch'án chojni tí tan jína tsaáxin sín. A ntá kjui tí sín nchat'á t'etoan la ko tí sín maestro tjako tí ley la ko kjaxin tí sín t'etoan kuénte nínko.

² Ntá kjuanchankíhi sín ch'án kixin:

—Chronka nkehe tí kjuachaxin chonta kixin xikaha ch'e. ¿Nkexro kjuanjon tí kjuachaxin a? —ichro sín.

³ Ntá kjuátehe ch'ín Jesús ntáchro ch'án kixin:

—Kjaxin janhan tsjánchánkíhará ijnko nkehe siná nkexrí tsjateherá.

⁴ ¿A ntá nkexro k'uetuenhen tí ch'ín Juan kixin tsíkíte ch'án chojni? ¿Á Dios ní o chojni ó? —ichro ch'án.

⁵ Ntá kjuankíxin sín tjo sín kichó sín ntáchro sín kixin:

—¿Nkehe chrókjuáteheni? A ntá tí tsontáchroni kixin Dios tsíchr'án tí ch'ín Juan la ntá tsjanhankí ch'án kixin nkekuénte kuítekakuenhyani ch'án.

⁶ A ntá tí tsontáchroni kixin chojni ó k'uetuenhen sín ch'án la ntá kaín chojni tsonínkaon sín la ixro ts'óyánxinni sín kixin tjenkayáxin sín kixin ch'ín Juan chaxín k'uékjako ch'án itén Dios —mé xikaha ikjo sín.

⁷ Ntá kjuátehe sín kixin noehya sín nkexro tsíchr'án tí ch'ín Juan.

⁸ Ntá ntáchro ch'ín Jesús kixin:

—Kjaxin janhan tsoxrjankahya nkexro kjuanjon kjuachaxin tjet'a tíhi —ichro ch'án.

Ch'ín Jesús kjuíncheyóexin ch'án éxí tí sín ch'ehya xra jína
(Mt. 21.33-44; Mr. 12.1-11)

⁹ Ntá tuénxín kjuankíxin ch'ín Jesús nixjehe ch'án chojni kjuíncheyóexin ch'án ntáchro ch'án kixin:

—Kjuák'e ijnko chojni k'uenkaxin ch'án nta to uva tí nontee ch'án, a ntá chr'éxin kjuínchekjen ch'án tí iso tí sín ch'e xra. A ntá kjuixin ntá sákjuí ch'án imá sé.

* 19:46 Isaías 56.7

¹⁰ A ntá kui tí yaon tsakjinjin sín to uva. Ntá k'uetuēnhen ch'án ijnko nkexro ch'ehe ch'án xra kixin tsjikjanchehe ch'án tí sín ch'e xra nontee ch'án kixin tsjanjon sín tí to tónhen ch'án tocar. A ntá jehe sín kjuate sín tí ch'ín a la ntá k'uinkité sín ch'án la ninkehó tsíchjéhya sín ch'án.

¹¹ A ntá tí ch'ín nontee ichr'án ch'án í jnko nkexro ch'ehe ch'án xra. A ntá kjaxin k'uántaxínhin sín ch'án la ko kjuate sín ch'án la ko kjaxin ninkehó tsíchjéhya sín ch'án inaá.

¹² A ntá tí ch'ín nontee ichr'án ch'án í jnko nkexro. A ntá tí sín ch'e xra kjaxin xikahó tsíkijch'ehe sín inaá, tsík'inkité sín ch'án.

¹³ Ntá tí ch'ín nontee ntáchro ch'án kixin: “¿Nkexrí chrókjuít'a jie? Tsochr'an tí xjanna imá tjuaha. Ách'e chrókuitekakonhen sín ch'án chróchóntehe sín ch'án kjuasáya”, ichro ch'án.

¹⁴ A ntá kjónté kui ch'án la k'uíkon tí sín ch'e xra ntá chénka sín kichó sín kixin: “Tí ch'ín i mé ts'áyéhe ch'án kaín nkehe kuente it'é ch'án. Ts'óyánni ch'án kixin jeheni tsitokoni kaín tí nkehe a,” ichro sín.

¹⁵ A ntá kuakitsjexín sín ch'án tí nonte ntiha la k'óyán sín ch'án.

A ntá kjuanchankí ch'ín Jesús kixin:

—A ntá tí ìnché nonte la, ¿nkehe chrókjuich'e ch'án kixin xikaha kónhen tí xjeen ch'án?

¹⁶ Chrókui ch'án chrókjuinçek'itjáyan ch'án tí sín ch'e xra kixin xikaha kjuích'e sín k'óyán sín tí xjeen ch'án, a ntá chróchjéhe ch'án í so nkexro chrókjuich'e xra tí nonte a —ichro ch'án.

A ntá tió kuínhin sín xikaha ntáchro sín kixin:

—Kjá Dios la xikahya tjinkaon ch'án —ichro sín.

¹⁷ A ntá ch'ín Jesús komá ch'án tí jehe sín ntáchro ch'án kixin:

—¿A ntá nkehe t'axrjexín tí nkehe ntáchro xroon itén Dios ntáchro xikihi?:

Tí xro náxrjónhya kuítóenta tí sín ch'éna tjat'o, a ntá mé jie k'óna tí xro tjetóan.*

¹⁸ A ntá jnkojín chojni tsjitsínka chrítaón tí xro i tsokuen ch'án. A ntá ts'ánótjen tí xro i tsokratja ijnko chojni la tsokuen, ts'óna nche.

Tí xra tsjenkehe sín gobierno

(Mt.21.45-46; 22.15-22; Mr.12.13-17)

¹⁹ A ntá tí nchat'á t'etóan la ko tí maestro tjako tí ley tjinkaon sín chrótsé sín tí ch'ín Jesús tuénxín tí hora a kixin ó kónohe sín kixin jehe sín kuakitsjexín tí nkehe nixja ch'án. Kjánchó xitjahya tsotsé sín ch'án kixin chrakonhen sín tí chojni siín.

²⁰ Ntá k'uetuēnhen sín chojni tsotsáyehe sín ch'án, éxí chojni chóna kjuasáyé ch'án chrókjo sín ch'án jnkojína kixin ách'e ichrén nkehe ntoáhya tsonixja ch'án. A ntá jína tsjanchaxín sín jie tsjikaán sín ch'án tí tjen tí ch'ín gobernador.

²¹ Mé xikaha kjuanchankíhi sín ch'án nkehe, a ntá ntáchro sín kixin:

—Maestro, ó noheni kixin kaín nkehe ntáchrua la ko kaín nkehe tjákua la chaxín ntoá la ko jehya nkexrí tsjehe chojni tjenkayáxixián kixin á jína sín, la ntá ntoá tjákua ntje Dios.

²² A ntá jie la chrónka, ¿á jína chrókjuenkehēni tí gobierno romano o náhi? —ichro sín.

²³ A ntá ch'ín Jesús la ó kónohe ch'án kixin ntoáhya tjenkayáxin sín ntá ntáchro ch'án kixin:

—¿Nkekuente chrokjuachaxinráni?

²⁴ Tjákonará ijnko tí chichaon méhe. ¿Nkexro tí tsík'axrjexín tjenkáni tí chichaon i la ko nkexro ihnié chóna méhe? —ichro ch'án.

* 20:17 Salmo 118.22

Ntá kjuátehe sín kixin:

—Tí ch'ín t'etoan mé tjenkáni ch'án —ichro sín.

²⁵ Ntá ntáchro ch'án kixin:

—Chróchjehérá tí ch'ín gobierno t'etoan tí nkehe kuènte ch'án; a ntá tí nkehe kuènte Dios chróchjehérá Dios —ichro ch'án.

²⁶ A ntá ninkehó kjuachahya sín kjuachaxin sín ch'án tí nkehe ntáchro ch'án nkayakon chojni chjasin ntiha. A ntá chrakon sín kuínhin sín kaín nkehe kjuátehe ch'án la ntá tí sín kjuanchankí la tání sín kohya nkehe ichro sín.

Kjuanchankí sín kixin á tsoxechón chojni

(Mt.22.23-33; Mr.12.18-27)

²⁷ A ntá chr'éxin iso tí sín saduceo sákjuítsjehe sín tí ch'ín Jesús. Kjánchó tí sín saduceo titekakonhya sín kixin tsoxechón chojni tsík'en. Xíkaha ntáche sín tí ch'ín Jesús kixin:

²⁸ —Maestro, ch'ín Moisés tsíkjin ch'án tí xroon ley ntáchro kixin tió ts'en ijnko chojni la ntá tsitohe ichjién, tí chóntahya sín xjeen, la t'ichjánxin kixin kichó tí ch'ín tsík'en tsotehe tí tjan k'án kixin tsochóna sín xjeen sín éxi xjeen tí ch'ín saó tsík'en ts'ikon sín.†

²⁹ A ntá k'uéjó sín yato sín jnkokoá kichó sín. A ntá tí ch'ín saó la kótehe ch'án. Ntá k'uén ch'án la chóntahya ch'án ninkehó xjeen ch'án.

³⁰ A ntá tí ch'ín yóxin kichó ch'án la kótehe tí tjan k'án. Kjaxin k'uén ch'án chóntahya sín xjeen sín.

³¹ A ntá tí ch'ín níxin xíkótehe jehe tjan inaá. Kjaxin xíkaha kayatoé sín. Kaín sín k'uén sín ninkehó xjeen sín chóntahya sín.

³² A ntá kjuixixín kjaxin jehe tjan ik'uén tjan.

³³ A ntá tió tsoxechón chojni tsík'en, ¿ntá nkexro tí jehe sin ts'óna ichjién tí jehe tjan kixin yato tí jehe sín kótehe tjan? —ichro sín.

³⁴ Ntá ch'ín Jesús kjuátehe ch'án ntáchro ch'án kixin:

—Ntihi chjasintajni tí chojni ntoa la ko ti chojni chjin tótehe sín takja kichó sín.

³⁵ A ntá tí sín kuítekaon sín tí janhan ntá tsjacha sín tsoxechón sín inaá la í tsoteehya sín la koí tsoteehya tí xjeen sín.

³⁶ Kixin tí sín a la xitjahya ts'en kixin éxi tí sín ángel ts'ejó sín kixin xjeen Dios tí jehe sín kixin Dios kjuínchexechón ch'án sín.

³⁷ Kjaxin ch'ín Moisés tió chrónka ch'án kuènte tí nta tjeche kjuínchenoheni ch'án kixin tí sín tsík'en tsoxechón sín. Ntáchro ch'án kixin Ìnchéni Dios na mé tí Dios tinkáchónki ch'ín Abraham la ko ch'ín Isaac la ko ch'ín Jacob.‡

³⁸ Tí Dios i la jehya tinkáchónki tí sín tsík'en. Náhí. Tí Dios i la tinkáchónki tí sín tjejóchón, la Dios la t'ikon ch'án kixin kaín chojni la síchón —ichro ch'án.

³⁹ A ntá iso tí sín tjako tí ley la ntáchro sín kixin:

—Jína kjuàkua la ko jína ntáchrúa, Maestro— ichro sín.

⁴⁰ A ntá chrakon sín la í ninkehó kjuanchankíehya sín ch'án.

¿Xá nkexro tí it'é tí Cristo?

(Mt. 22.41-46; Mr. 12.35-37)

⁴¹ Ntá ntáchro ch'ín Jesús kixin:

—¿Nkexrí kixin ntáchro sín kixin tí Cristo mé ts'axrjeníxin tí ch'ín David?

⁴² A ntá ch'ín David ikjin ch'án tí libro Salmos la ntáchro ch'án kixin:

Ìnchéni Dios ntáche tí Ìnchéni kixin:

“Tjak'e tjaná chjina ntiho tsétoan

† 20:28 Deuteronomio 25.5 ‡ 20:37 Éxodo 3.6

43 tsjixinjian kaín xín tí sín nínkakonhan la tsjachahya sin ts'et̄oan sín kixin jahvá mé tsét̄oan.”§

44 ¿xá nkexrí kixin Cristo chrók'óna it'é David, kixin jehe David kuik̄itexín ch'án Ìnché ch'án tí Cristo? —ichro ch'ín Jesús.

Ch'ín Jesús kjuanchia ch'án jie tí sín tjako tí ley
(Mt. 23.1-36; Mr. 12.38-40; Lc.11.37-54)

45 Kaín chojni tjejótinhin sín nixjehe ch'ín Jesús tí sín k'uájiko ch'án ntáchro ch'án kixin:

46 —Chrókóxakonhanrá chrókuankíehyará tí sín maestro tjako tí ley. Tóxrjínhin sín chrók'uinkáya sín ka kijnjin la ko tjinkaon sín kixin kaín chojni chrókjuikosáyehe sín tsoxeta sín ntsin la ko tjejá sín silla antsí náxrjón chrók'uejóyá sín nkaxenhen n̄nko la ko tjejá sín kixin jina chrók'uejó sín tí sátsji sín kia,

47 la ko kjaxin takitsjehe sín nt̄e tí chojni chjin k'án. A ntá kjuixin kjuích'iyehé sín chojni ntá náxrjón nixjehe sín Dios. A ntá jehe sín antsí má sinchekjasóte sín Dios kixin xikaha kjuích'ia sín.

21

Tí chichaon kjuanjon ijnko tjan k'án nòa
(Mr. 12.41-44)

1 A ntá tí nkaxenhen n̄nko ch'ín Jesús k'uíkon ch'án kixin tí sín ricó kjuik̄ao sín chichaon chr'áxenhen sín tí ntacajón tjetóxroyéya chichaon.

2 A ntá kjaxin k'uíkon ch'án ikjui ijnko tjan k'án nòa la ntá jehe tjan chr'áxenhen tjan yaá chichaon ntsínsí.

3 Ntá ntáchro ch'ín Jesús kixin:

—La chaxín ntáxrjan kixin tí tjan k'án i nòa tjan kjánchó antsí tjeje sínkí tí chichaon kjuanjon tjan kixin kaín asén tjan kjuanjon tjan, a ntá tí sín kjuanjon nchónhya la náhí.

4 Kixin kaín tí chichaon kjuanjon sín la chichaon síxèhe sín. A ntá jehe tjan kjónté nòa tjan na kjuanjon tjan kaín tí chichaon chrókuicháxinhin tjan —ichro ch'án.

Ch'ín Jesús ntáchro ch'án kixin tí n̄nko ts'itjáyán
(Mt. 24.1-2; Mr. 13.1-2)

5 Iso sín tjejójtjo sín kixin nkexrí tsjehe n̄nko tsík'óna xro náxrjón la ko í so nkehe tsíkjanjon chojni éxí ijnko nkehe chjéhe sín Dios. A ntá ch'ín Jesús ntáchro ch'án kixin:

6 —A ntá tsi ijnko yaon tí n̄nko tjejokomará ntihi la tsoxíka. A ntá tsokohya ninkehó xro ts'ejóksen kichó inaá —ichro ch'án.

Tí nkehe tsonhen tí naxa ts'itjáyánhya chjasintajni
(Mt. 24.3-28; Mr. 13.3-23)

7 Ntá kjuanchankíhi sín ch'án kixin:

—Maestro, ¿nkesá tsonhen tíha? ¿Nkexrí tsonhen tí tsonoexínni tí nkehe tsonhen? —ichro sín.

8 Ntá ntáchro ch'ín Jesús kixin:

—Chrókóxakonhanrá t̄it̄oéhyará sit'áyahará chojni. Nchónhya chojni tsi tsontáchro sín kixin jehe sín tí Cristo, tsixro sín, la ko tsontáchro sín kixin: “Ijie mé tsoxiteyá tsonhen.” Kjónté xikaha tsontáchro sín la chrókuítekákuenhyará tí jehe sín.

9 A ntá tió tsinhínra tsontácho chojni kixin ó siín kjuanínkaon tjanjonko kichó sín, kjónté xikaha naxa chróchrakonhyará kixin kaín tíha t'ichjánxin ts'atsínka senó tí naxa tsjixixínhya ts'itjáyán chjasintajni —ichro ch'án.

10 Naxa tjechrónka ch'án ntácho ch'án kixin:

—Ijnko nación la tsjanjonko í jnko nación la ko ijnko chjasin tsjanjonko í jnko chjasin.

11 Kjaxin imá tjian tsínkí nonte la ko tsokjinta la ko tsoníhi chojni nchónhya chjasin, a ntá nkajní nchónhya kjuachrakon jié ts'ixin ts'ikon chojni.

12 Naxa ts'atsínkahya tíha la tsonínkakonhanrá sín tsotsérá sín sátsjikoará sín tí nínko tsjanchia sín jié la ko sátsjikoará sín ts'ikjahará la ko sátsjikoará nkayakon tí sín rey la ko tí sín gobernador kixin tinkachónkirá nina.

13 A ntá tí yaon xikaha tsonhen la ts'ixin kjuachaxin kixin tsochronkará nkexro tinkachónkirá.

14 Tóxakuanhyará senó nkexrí tsjateherá tí nkehe tsjanchankíhará sín

15 kixin janhan la tsjánjuan kjuaxrexinkaon jína tsonixjará kixin nijnko tí sín nínkakonhanrá xitjahya tsontácho sín kixin ntoáhya tí nkehe tsjateherá.

16 Kixin kjónté it'ará la ko kichuárá la ko tí sín kjéhyará la ko tí sín tjórá jína mé sintakjirá sín. Jehe sín ts'óyán sín jnkójínra.

17 Kaín chojni chjasintajni tsonínkakonhanrá sín kixin tinkachónkirá nina.

18 Kjánchó xikaha la nijnko kaxihí chóna kjará ts'itjáyánhya.

19 Tí tsitóehyará tinkachónkirá tí janhan la tsochontará kjuachón jnkochrín.

20 A ntá tió ts'ikonrá kixin kuenté chjasin Jerusalén tsík'ántatjen sín soldado ntá tsonoaxínra kixin í séhya ts'itjáyán tí chjasin a.

21 A ntá tí sín tjejó sín Judea la t'ichjánxin sátsjixín sín ntiha sátsji sín jna. A ntá tí sín siín chjasin Jerusalén kjaxin t'ichjánxin sátsjixín sín ntiha la ko tí sín tjejó sín nontee sín la í xitjahya tsokjan sín chjasin.

22 Kixin tí yaon ts'ixin tsjasóte chojni tsoxiteyá tsonhen kaín nkehe nixja xroon itén Dios.

23 Nòa tí chojni chjin tjejóyá tí yaon a la ko tí sín chóna xjanhnté naxa nchekakí sín. Kixin tí yaon a la ts'ixin kjuatjoté tí chjasin la Dios tsjanjon kjuachaxin kixin imá tsjasóte chojni ntiha.

24 Jnkójínra ts'énxinrá tí siín kjuanínkaon ntiha la ko jnkójínra tsotsérá sín sátsjikoará sín sinchekjasótiará kaín tí í so nación. A ntá tí sín jehya judío tsjixín ókjé nación tsinkátja sín chjasin Jerusalén kixin Dios mé tsjanjon kjuachaxin iso yaon xikaha tsonhen. A ntá chr'éxin tsontácho ch'án kixin: “La í kohya nkehe tsonhen.”

A ntá tió itsi ti Xjeen Dios K'óna Chojni

(Mt. 24.29-35, 42-44; Mr. 13.24-37)

25 A ntá tsonoaxínra nkexrí tsonhen tí yaon la ko nkexrí tsonhen nitjó la ko nkexrí tsonhen konotsé. A ntá chjasintajni tsokohya kjuaxróxin kaín nación la ko tsochrakon chojni kixin imá tsojna ntayaon.

26 A ntá chojni la tsoínhin sín kixin tsochrakon sín tsjenkayáxin sín nkehe tsonhen chjasintajni kixin kaín tí nkehe sínkáni nkajní la tsínkí.

27 Ntá xikaha ts'ikon chojni kixin itsi tí Xjeen Dios K'óna Chojni itsi ch'án chríkjan ijnko tjuj tsikao ch'án tí kjuachaxin jié kuente nkaya nkajní.

28 A ntá tió tsoxrankíxin tsonhen kaín tíha chrókócháhará chrókjuaya kjará ntá chróntáchorá kixin kjínhya tjen tí nkexro tsaáxinra —ichro ch'án.

29 Kjaxin kjuíncheyóexin ch'án í jnko nkehe ntácho ch'án kixin:

—Tjenkayáxinra nkexrí siín tí nta t'óna to higo la ko kaín tí í so nta.

³⁰ Tió ts'ikonrá kixin tinkák'ayan kahnte tí nta, ntá tsonoaxínrá kixin í séhya ts'ixenhen nchakuen chrin.

³¹ Mé kjaxin xikaha tió ts'ikonrá kixin kaín tí nkehe sítónhen, ntá tsonoaxínrá kixin tí kjuachaxin kuènte Dios la ó chjino tjen.

³² 'Mé chaxín ntáxrjan kixin kaín tíhi tsonhen senó naxa t'enhya chojni tjejó jie.

³³ A ntá tí nkajni la ko tí chjasintajni mé ts'itjáyan. A ntá tí nkehe ntáxrjan la ts'itjáyanhya, tsoxiteyá tíha.

³⁴ 'Chrókóxakonhanrá chrókuiñoéhyará kixin chrókjuichròderá kixin tí imá chrókjónterá la ko tí chrókókoanrá. Kixin tí xikaha la ntá titàya tsi tí yaon la chrók'uejochoénhyará.

³⁵ Na mé éxi ijnko trampa xrínahya ts'ikjehe mé xikaha itsi tí yaon a, la ko xikaha tsonhen kaín chojni sín chjasintajni tí ts'ejóchoénhya sín.

³⁶ Méxra listo chrók'uejorá la ko chrónixjehérá Dios kaín yaon chronóehérá ch'án kixin tió tsi kaín tí kjuaxikaon xikaha la ntá tsjinkitsará ch'án tsaárá kixin ntá tsjachará tsochjineherá tí tjen tí Xjeen Dios K'óna Chojni —ichro ch'án.

³⁷ Ch'ín Jesús kjuák'ekjakoxin ch'án tí nínko ntiha jnkojnko yaon, a ntá tie la sákjuí ch'án tí nja nchek'in sín Olivo, la ntaha kuítohe ch'án.

³⁸ A ntá kaín chojni kóchjina sín tí nínko jnkojnko nchítjen kixin tsinhin sín tí nkehe tsochronka ch'án.

22

*Imó kjuenkayáxin sín nkexrí tsotsé sín tí ch'ín Jesús
(Mt. 26.1-5,14-16; Mr. 14.1-2, 10-11; Jn. 11.45-53)*

¹ Ntá kuichjina tí yaon kia sine sín tí niotja tjikohya tí xroan t'ánkixin niotja na mé tí kia nchek'in sín pascua.

² Ntá tí nchat'á t'etoan la ko tí sín maestro tjako tí ley kjuenkayáxin sín nkexrí chrók'óyán sín tí ch'ín Jesús kixin chrakonhen sín tí chojni chjasin ntiha.

³ A ntá ch'ín Tsochren k'uixenhen asén ch'ín Judas, mé kjaxin it'in ch'án Iscariote, mé jehe ch'án ijnko tí teyó tí sín k'uájiko ch'ín Jesús.

⁴ Tí ch'ín a mé sákjuítsjehe tí sín nchat'á t'etoan la ko tí sín t'etoan kuènte nínko, ikjo kichó sín kixin nkexrí tsjikaán sín tí ch'ín Jesús.

⁵ Ntá jehe sín kóchéhe sín la ko ntáchro sín kixin tsjenkehe sín tí ch'ín Judas.

⁶ Ntá kjuátehe ch'án sinchexiteyá ch'án ntá kjueyá ch'án nkexrí tsotsé sín tí ch'ín Jesús tí kohya chojni.

*Kjuixixín kjoneko sín tí ch'ín Jesús
(Mt. 26.17-29; Mr. 14.12-25; Jn. 13.21-30; 1 Co. 11.23-26)*

⁷ Ntá ó kui yaon kia sine sín niotja tjikohya tí xroan t'ánkixin niotja, a ntá t'ichjánxin ts'óyán sín tí kolélo sine sín kuènte tí kia pascua.

⁸ A ntá ch'ín Jesús k'uetuénhen ch'án tí ch'ín Pedro la ko tí ch'ín Juan kixin sátsji sín sincheyaxín sín tí nkehe sine sín kuènte tí kia pascua.

⁹ Ntá jehe sín kjuanchankíhi sín ch'án kixin:

—¿Nketí tjinkávan sincheyaxíxinni? —ichro sín.

¹⁰ Ntá kjuátehe ch'án kixin:

—Tió ts'ixenhenrá chjasin Jerusalén tsoxetará ijnko chojni ntoa yámá ijnko toa tjiá nta. Chréhérá ch'án sátsjirá tí nchia ts'ixenhen ch'án.

¹¹ Tsontácherá tí ìnché tí nchia kixin: “Ntáchro Maestro kixin: ¿Nketí tjen tí cuarto tsjánjuan kjuachaxin tsoyaxíxin sineko ch'án tí sín teyó xriko ch'án tí yaon pascua?” tsixrorá.

¹² A ntá jehe ch'án tsjakohará ch'án ijnko cuarto jié tí yóxin piso la ntiha siín nkehe t'ichjánxin, la ntaha sincheyaxíxinrá tí sineni tsonjín —ichro ch'án.

¹³ A ntá jehe sín sákjuí sín k'uitja sín kaín nkehe éxí tsíchronka ch'ín Jesús. Ntá ntiha kjuíncheyaxíxin sín sine sín kuènte pascua.

¹⁴ A ntá kui tí hora, a ntá ch'ín Jesús la ko tí sín k'uájiko ch'án kjuíji sín ntiha k'uéjótjixin sín tí tjen tí mesa.

¹⁵ Ntá ntáchro ch'ín Jesús kíxin:

—Imá tjínkavan kíxin tsjasinni kia sinekianrá tí yaon pascua naxa ts'énhya janhan.

¹⁶ Ntáxrjan kíxin sinehya janhan xikaha inaá tí naxa tsoxiteyáhya tíha tió tsi kjuachaxin kuènte Dios —ichro ch'án.

¹⁷ Ntá kuákja ch'án tí nkehe tjía ìnté to uva ntá chjéhe ch'án kjuasáya Dios ntá ntáchro ch'án kíxin:

—Tákjára tíhi la its'irá kaín rá

¹⁸ kíxin ntáxrjan kíxin xík'ikianhyará tí ìnté to uva tí naxa tihya tí kjuachaxin kuènte Dios —ichro ch'án.

¹⁹ A ntá kjuixin ntá kuákja ch'án tí niotja ntá kjuanchehe ch'án kjuasáyé Dios, ntá kóchrít'ó ch'án chjéhe ch'án tí jehe sín ntáchro ch'án kíxin:

—Tíhi mé cuerpo kuéntana kíxin ts'ényákonhanrá. Mé xikaha tsoxráxinkákonxínrá tí janhan —ichro ch'án.

²⁰ Kjaxin xikaha kjuanjon ch'án tí nkehe tjía ìnté to uva tió kjuixin kjóne sín la ntáchro ch'án kíxin:

—Tí nkehe tjía tí vaso chronkaxín tí nkehe nixin tsonhen tsoxiteyá kíxin tí jnina ts'itjí tsotjuáxin tí ijiára.

²¹ Tí nkexro sinchekjina mé tjekian tí tjen mesa ntihi.

²² Méxra tí Xjeen Dios K'óna Chojni its'en éxí k'uítuenhen; kjánchó nòà tí ch'ín sinchekji ch'án kíxin tsjasóte ch'án —ichro ch'án.

²³ A ntá jehe sín kjuankíxin sín tjanchankíhi kíchó sín:

—¿Xá nkexro sinchekji ch'án? —ichro sín.

Ikjo sín kíxin nkexro tí imá ts'etoan

²⁴ A ntá jehe sín mé tjo sín kíxin nkexro antsí ts'etoan.

²⁵ A ntá ntáchro ch'ín Jesús kíxin:

—Tí sín reyes kuènte tí naciones imá t'etoan sín. A ntá tí chojni mé ntáchro sín kíxin tí sín t'etoan la mé chojni ch'e xra jína.

²⁶ A ntá jahará xikahya chrókjuich'era. Íchá jína tí nkexro imá t'etoan chrók'óna éxí tí nkexro antsí ntasoá chróchóxin chrók'uítuenhen, na mé tí nkexro t'etoan chrók'óna éxí ijnko nkexro ch'exón xra.

²⁷ ¿A ntá nkexro tí antsí t'etoan, á tí nkexro lámō tjetjixin tí tjen mesa ntá sine ch'án, o á antsí t'etoan tí nkexro kuikao tí nkehe sine ch'án? Náhí. Tí nkexro tjetjixin tí tjen mesa mé antsí t'etoan ch'án. Mé xikaha janhan tjénkākjánrá éxí ijnko nkexro ch'exón xra tí janhan.

²⁸ Jahará xráxin k'uéjótaxínrá k'uíkonrá kaín nkehe náxrjónhya kónna.

²⁹ Méxra janhan tsjánjuan kjuachaxin tsétoanrá éxí chjina T'aná tí tétōan janhan

³⁰ kíxin sinterá la ko its'irá tí tsjak'e mesa kuéntana tí tsétoan janhan nkaya nkajní la ko tsétoanrá sinchekitoexínrá tí ijié kaín tí sín k'uaxrjeníxin tí teyó xjeen ch'ín Israel.

Ch'ín Jesús chrónka ch'án kíxin ch'ín Pedro sinchemá kíxin chónhya tí jehe ch'án, tsixro ch'án

(Mt. 26.31-35; Mr. 14.27-31; Jn. 13.36-38)

³¹ Ntá ntáchro Ìnchéni kíxin:

—Simón, Simón, chrókónoha jaha kixin ch'ín Tsochren kjuanchia ch'án tí jahará chrók'ótsjéyehe ch'án tí jahará éxí noatrigó.

³² Kjánchó janhan xrjanóaha T'aná kixin jaha chrókuítóéhya tí tinkachónkia tí janhan. A ntá jaha kjónté tsjásian jie, a ntá tsokjan ínaá ts'itjányanhya tinkachónkia tí janhan ntá sìnchechéhé kíchuará —ichro ch'án.

³³ A ntá ntáchro ch'ín Simón kixin:

—Ìnchéni, listo tjenni sátsjini ts'ikjéhekoani la jehya ts'ikjéheni ó la kjaxin ts'enkoani —ichro ch'án.

³⁴ A ntá kjuátehe ch'ín Jesús ntáchro ch'án kixin:

—Pedro, ntáxrjan kixin ijie jaí naxa tsjehya kochíntoa sìnchemána iníya kixin chonhya tí janhan, tsixrua —ichro ch'án.

Ntá ó kuichjina tí hora xikaha tsonhen ch'án

³⁵ Ntá ch'ín Jesús kjuanchankíhi ch'án tí jehe sín kixin:

—Tió kuétuanhanrá sákjuirá kjuikoahyará kabolsa la ko kjuikoahyará tí nkehe t'inka chichaon la ko kjuikoahyará tokate na, ¿á naxa t'itjányan ichrén nkehe ní? —ichro ch'án.

Ntá kjuátehe tí jehe sín ntáchro sín kixin:

—Náhi. Ninkehó nkehe t'itjányanhya —ichro sín.

³⁶ Ntá ntáchro ch'án kixin:

—A ntá jie tí nkexro chóna kabolsa la tsakja sátsjiko la ko kjaxin tí nkehe t'inka chichaon. A ntá tí nkexro chónahya chica espada chrókjuinçekji ch'án tí ka t'inkáya ch'án kixin chrók'uénaxín ch'án ijnko chica.

³⁷ Ntáxrjan kixin t'ichjánxin tsoxiteyá tsona éxí nixja xroon itén Dios ntáchro kixin: “Éxí yóhe ijnko chojni kjuasin jie mé xikaha ts'ikon sín ch'án.”* Mé xikaha kaín nkehe chrónka xroon itén Dios kixin tsona mé t'ichjánxin tsoxiteyá —ichro ch'án.

³⁸ A ntá jehe sín ntáchro sín kixin:

—Ìnchéni, ntihi tjejó yaá chica espada —ichro sín.

Ntá kjuátehe ch'án kixin:

—Kjónté ó táhó la ó nchoxon —ichro ch'án.

Ch'ín Jesús nixjeexín ch'án Dios tí Huerto Getsemaní

(Mt. 26.36-46; Mr. 14.32-42)

³⁹ Ntá ch'ín Jesús sákjuixin ch'án chjasin Jerusalén sákjuí ch'án ijna Olivo kixin xikaha kuènen ch'án k'uékjich'e ch'án la koí tí sín k'uájiko ch'án tinkáchréhe sín.

⁴⁰ Ntá kjuíji sín ntiha ntá ntáchro ch'án kixin:

—Nixjehérá Dios kixin tsjinkítsa ch'án tí jahará kixin tsjásinhyará jie —ichro ch'án.

⁴¹ Ntá ch'ín Jesús k'uaxrjenta ch'án tí jehe sín sákjuí ch'án ijnko kjínxin éxí chrók'ue chojni xro. Ntá kjuák'exín toch'in ch'án kixin tsonixjehe ch'án Dios.

⁴² Ntá ntáchro ch'án kixin:

—It'eni, tí tjinkávan chrókjuinçekakaáni kaín nkehe náxrjónhya chrók'uatínkani. Kjánchó jehya éxí tjinkaonni jeheni chrókónhenni. Náhi. Éxí tjinkávan jaha —ichro ch'án.

⁴³ Ntá xrínahya k'uíkon ch'án itjen ijnko ángel tsíkixín nkaya nkajní kixin tsjinkítsa ch'án.

⁴⁴ A ntá imá tóxakonhen ch'án, a ntá antsí fuerte nixjehe ch'án Dios, ntá k'uíxin ch'án ntachjin éxí yóhe jni xikaha k'uitji k'uánótjen nonte.

* 22:37 Isaías 53.12

⁴⁵ Ntá tió kjuixin nixjehe ch'án Dios ntá k'uínkatjen ch'án ntá sákjuí ch'án tí tjejó tí sín k'uájiko ch'án, ntá k'uitjaxín ch'án kixin tjejójua tí jehe sín kixin kjuachahya sín imá t'ává sín.

⁴⁶ A ntá ntáchro ch'án kixin:

—¿Nkekuènte tjejochrinrá? T'àyará. Nixjehérá Dios kixin tsjinkĩtsará ch'án kixin tsjachroehyará ch'ín Tsochren —ichro ch'án.

Itsé sín tí ch'ín Jesús

(Mt. 26.47-56; Mr. 14.43-50; Jn. 18.2-11)

⁴⁷ A ntá ch'ín Jesús naxa tjenixja ch'án ntá xrínahya kui nchónhya chojni yámá chica. Tí ch'ín it'ín Judas, ijnko tí teyo sín k'uájiko ch'ín Jesús, kuítaón ch'án ntĩa, ntá kóchjinehe ch'án tí ch'ín Jesús kixin sineko ch'án kochíto.

⁴⁸ A ntá ntáchro ch'ín Jesús kixin:

—Judas, ¿á ijnko kochíto ó sinchekjixian tí Xjeen Dios K'óna Chojni? —ichro ch'án.

⁴⁹ A ntá tí sín tjejóko ch'ín Jesús tió k'uíkon sín kixin xikaha kónhen ntá kjuanchankíhi sín ch'án kixin:

—Ìnchéni, ¿á chrókuatéxinni sín chica espada? —ichro sín.

⁵⁰ A ntá ijnko tí jehe sín kjuíncheníhi ch'án ijnko ch'ín ch'ehe xra nchat'á t'etoan, kóchrínjin ch'án ntatsjon ch'án chjina.

⁵¹ A ntá ntáchro ch'ín Jesús kixin:

—Táhó, títòhé, ó tjen —ichro ch'án.

Ntá ch'ín Jesús itsé ch'án tí ntatsjon tí ch'ín ch'e xra a, ntá kjuínchekitohe ch'án jina.

⁵² Ntá tuénxín ch'ín Jesús ntáche ch'án tí sín nchat'á t'etoan la ko tí sín t'etoan kuènte nínko la ko tí sín táda t'etoan mé tí sín tsíki sátsjiko sín ch'án ntáchro ch'án kixin:

—¿Nkekuènte k'uinkakoará chica espada la ko inta éxí chrótserá ijnko xíchee?

⁵³ A ntá kaín yaon kjuak'é janhan k'uejóni kjuákoáxinrá tí nínko ntiha la ninkehó tsehyará tí janhan. A ntá jie mé tí hora kuèntará ntá kjuacha tí kjuachaxin kuènte sítié —ichro ch'án.

Ch'ín Pedro kjuínchemá ch'án kixin chónhya ch'án tí ch'ín Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Ntá itsé sín tí ch'ín Jesús kjuínchenteto sín ch'án sákjuíko sín ch'án ntøe nchat'á t'etoan. A ntá ch'ín Pedro ikjín tinkáchréhe ch'án.

⁵⁵ A ntá tí ntasin ntiha kjuaka sín xrohi síxrohe sín. A ntá ch'ín Pedro kjaxin kjuák'entaxín ch'án tí tjejó sín ntiha.

⁵⁶ A ntá ijnko tjachjin ch'e xra tió k'uíkon tjan kixin koí ch'ín Pedro tjechjixrohe ch'án ntiha ntá komá tjan tí jehe ch'án ntá ntáchro tjan kixin:

—Kjaxin tí ch'ín i xriko tí ch'ín Jesús —ichro tjan.

⁵⁷ Ntá ch'ín Pedro kjuínchemá ch'án ntáchro ch'án kixin:

—¿Nkekuènte xikaha ichrua jaha? Ni chonhya tí nkexro a —ichro ch'án.

⁵⁸ A ntá antsíkoá chr'éxin ikui í jnko chojni k'uíkon tí jehe ch'án ntá ntáchro kixin:

—Kjaxin jaha xríkoa tí nkexro a —ichro.

Ntá ch'ín Pedro ntáchro ch'án kixin:

—Náhí, janhya —ichro ch'án.

⁵⁹ Ntá éxí ijnko hora chr'éxin ntá nixja í jnko ch'ín chénka tí í so sín kixin:

—Tí ch'ín i chaxín xriko tí ch'ín Jesús kixin kjaxin tsíkijxin ch'án estado Galilea —ichro ch'án.

⁶⁰ Ntá ntáchro ch'ín Pedro kixin:

—Nonahya janhan nkehe tí ntáchrua —ichro ch'án.
Ntá tuénxín naxa tjenixja ch'án ntá xrínahya ó tsje kochíntoa.

⁶¹ Ntá Ìnchéni kuinkátjía ch'án komá ch'án tí ch'ín Pedro. Ntá ch'ín Pedro xraxinkaon ch'án kixin xikaha tsíchronka Ìnchéni kixin: “Naxa tsotsjehya kochíntoa sinchemána iníya.”†

⁶² Ntá ch'ín Pedro sákjuí ch'án ntója, tsjánka ch'án xraxinkaon ch'án tí jie kjuasin ch'án.

Kjuanoá sín tí ch'ín Jesús
(Mt. 26.67-68; Mr. 14.65)

⁶³ Tí sín sákjuíko ch'ín Jesús kjuanoá sín ch'án la ko kjuate sín ch'án.

⁶⁴ K'uikjéhe sín ka kon ch'án ntá kjuate sín ch'án ntá kjuanchankíhi sín ch'án kixin:

—Ijie la tónoha nkexro kjuatia —ichro sín.

⁶⁵ La ko í so nkehe ntáchro sín k'uántaxínhín sín ch'án.

Ntá sákjuíko sín tí ch'ín Jesús nkayakon tí sín t'etoan
(Mt. 26.59-66; Mr. 14.55-64; Jn. 18.19-24)

⁶⁶ A ntá kóyaon nchakotjin la kójnkotsé kaín tí sín táda t'etuēhen tí sín judío, la ko tí nchat'á t'etoan, la ko tí sín maestro tjako tí ley la sákjuíko sín tí ch'ín Jesús nkayakon tí sín imá t'etoan. Ntá ntiha kjuanchankíexín sín ch'án kixin:

⁶⁷ —Ijie la chronka, ¿á jaha tí Cristo? —ichro sín.

Ntá jehe ch'án kjuátehe ch'án kixin:

—Tí tsontáxrjan kixin chaxín janhan na tsitekákonhyará.

⁶⁸ A ntá tí chrókjuánchánkíhará ichrén nkehe la chrókjuáteehyará la ko chrók'uatjántahyarána.

⁶⁹ A ntá jie tí Xjeen Dios K'óna Chojni mé tsjak'etjaxín tí tja chjina kuente Dios chóna kaín xín kjuachaxin —ichro ch'án.

⁷⁰ A ntá tuénxín kaín sín kjuanchankíhi sín ch'án kixin:

—¿Á chaxín jaha tí Xjeen Dios? —ichro sín.

A ntá kjuátehe ch'ín Jesús ntáchro ch'án kixin:

—Chaxín janhan xikaha ntáchrora tí jahará —ichro ch'án.

⁷¹ Ntá kjo sín kichó sín kixin:

—¿Nkehe tsonhen naxa chróchrónka í so chojni? Jeheni kaín ni kuínhinni nkehe k'uaxrjexín ir'va ch'án —ichro sín.

23

Sákjuíko sín tí ch'ín Jesús nkayakon tí ch'ín Pilato
(Mt. 27.1-2, 11-14; Mr. 15.1-5; Jn. 18.28-38)

¹ Ntá kaín sín k'uínkatjen sín ntá sákjuíko sín tí ch'ín Jesús nkayakon tí ch'ín Pilato.

² A ntá ntiha kjuankíxin sín t'eka sín jie tí jehe ch'án ntáchro sín kixin:

—K'uitjani tí nkexro i tjachroe ch'án chojni nación kuénténi ntáchro ch'án kixin chrókjuēnkēhyani tí gobierno romano, la ko kjaxin ntáchro ch'án kixin jehe ch'án mé Cristo ch'án, na mé ijnko rey tíha —ichro sín.

³ A ntá ch'ín Pilato kjuanchankíhi ch'án tí ch'ín Jesús ntáchro ch'án kixin:

—¿Á jaha tí Rey t'etuēhen tí sín judío a ní? —ichro ch'án.

Ntá ch'ín Jesús kjuátehe ch'án ntáchro ch'án kixin:

—Chaxín xikaha ntáchrua jaha —ichro ch'án.

⁴ A ntá ch'ín Pilato ntáche ch'an tí sín nchat'á t'etoan la ko tí chojni tsíkikao sín kixin:

† 22:61 Lucas 22.34

—T'itjáhya nijnko jię chóna tí nkexro i —ichro ch'án.

⁵ A ntá jehe sín antsí itsen nixja sín ntáchro sín kixin:

—Tjachroe ch'án kaín xín chojni estado Judea kixin tí nkehe tjako ch'án. Kjuankixin ch'án kjuako ch'án estado Galilea, a ntá jie ó kui ch'án ntihi la xikaha tjako ch'án —ichro sín.

Sákuiko sín tí ch'ín Jesús nkayakon tí ch'ín Herodes

⁶ A ntá kuínhin ch'ín Pilato xikaha ntáchro sín ntá kjuanchankí ch'án á tí ch'ín i la á Galilea tsíkixín ch'án.

⁷ A ntá kjuátehe sín kixin ntaha tsíkixín ch'án, ntá k'uetōan ch'ín Pilato kixin sátsjiko sín ch'án tí tjen ch'ín Herodes kixin jehe ch'án mé gobernador tí estado Galilea kixin kjaxin ch'án tjen ch'án chjasin Jerusalén tí yaon a.

⁸ A ntá ch'ín Herodes k'uikon ch'án kjuíji tí ch'ín Jesús ntá imá kóchéhe ch'án kixin isé tjinkaon ch'án chrók'uikon ch'án tí ch'ín Jesús kixin tsíkinhin ch'án chrónka chojni nkexrí tjako ch'án, ntá tjinkaon ch'án chrók'uikon ch'án ijnko kjuaxroan chrókjuakoxín ch'ín Jesús.

⁹ Nchónhya nkehe kjuanchankíhi ch'án tí ch'ín Jesús, kjánchó ch'ín Jesús ninkehó kjuáteehya ch'án.

¹⁰ Kjaxin ntiha k'uejó tí sín nchat'á t'etōan la ko tí sín maestro tjako tí ley la ntá nchónhya jię k'ueka sín ch'án kixin nínkakonhen sín ch'án.

¹¹ A ntá ch'ín Herodes la ko tí sín soldado kuente ch'án kjuankixin sín kjuikosáyehya sín ch'án la ko kjuanoá sín ch'án kjuínchek'inkáya sín ch'án ka tjele náxrjón éxi t'inkáya tí sín rey. A ntá tuénxín ch'ín Herodes k'uetōan ch'án kixin sátsji ch'án inaá tí tjen ch'ín Pilato.

¹² A ntá tí yaon a ch'ín Pilato la ko ch'ín Herodes kjuankixin sín tjuéhe kichó sín kixin tí senó la k'uénínkakonhen kichó sín.

K'uetōan sín kixin its'en ch'ín Jesús

(Mt. 27.15-26; Mr. 15.6-15; Jn. 18.39—19.16)

¹³ A ntá ch'ín Pilato k'uíyehē ch'án tí nchat'á t'etōan la ko tí sín gobernador la ko kaín chojni chjasin ntiha kixin tsojnkotsé sín

¹⁴ ntá ntáche ch'án sín kixin:

—Jahará kjuikuánará tí nkexro i ntáchrórá kixin ntoáhya tjakohe ch'án chojni kixin chrókónínkakonhen sín tí gobierno. Kjánchó janhan kjuánchánkíhā ch'án itsjé nkehe kuínhínrá ntá k'uikonrá kixin k'uitjahya ninkehó tí jię tékará ch'án.

¹⁵ La ko kjaxin ch'ín Herodes k'uitjahya ch'án tí jię tékará tí ch'ín Jesús ntá chr'án ch'án inaá ntihi. Ó k'uikonrá kixin ninkehó jię chóntahya ch'án chrók'uenxín ch'án.

¹⁶ Sintakjasóte ch'án ntá chr'éxin tsjánjuan kjuachaxin sátsji ch'án —ichro ch'án.

¹⁷ A ntá tí yaon kia a la t'ichjánxin kixin ch'ín Pilato tsjanjon kjuachaxin sátsji ijnko chojni tjechjina kixin xikaha kuènhen sín ósé.

¹⁸ Ntá kaín sín kjuankixin sín k'óyako sín ntáchro sín kixin:

—¡Tí nkexro la náhi! ¡Ch'ín Barrabás mé t'atjánta! —ichro sín.

¹⁹ A ntá ch'ín Barrabás tsík'ikjéhe sín ch'án kixin jehe ch'án la ko í so chojni kónínkakonhen sín tí chjasin ntiha la ko tsík'óyán ch'án chojni.

²⁰ A ntá ch'ín Pilato tjinkaon ch'án chrókjuanjon ch'án kjuachaxin sáchrókjui ch'ín Jesús. A ntá xíkjanchankíhi ch'án tí chojni siín ntiha inaá.

²¹ Kjánchó jehe sín antsí má tsen k'óyako sín ntáchro sín kixin:

—¡Tjakékanirá ch'án ntacruz! ¡Tjakénkanirá ch'án ntacruz! —ichro sín.

²² Níxin xíkjanchankí ch'ín Pilato ntáchro ch'án kixin:

—¿Xá nkehe ntoáhya kjuích'e ch'án? Janhan la k'uitjahya ninkehó jie chóna ch'án chrók'uenxín ch'án. Sintakjasóte ch'án la ntá chr'éxin tsjánjuan kjuachaxin sátsji ch'án —ichro ch'án.

²³ Kjánchó jehe sín antsí tsen kjuanchia sín ntáchro sín kixin chrókjuak'enkáni ch'án ntacruz. A ntá k'óyako sín la ko k'óyako tí sín nchat'á t'etoan ntá kjuacha sín kjuanchia sín tí nkehe tsonhen.

²⁴ A ntá ch'ín Pilato kjuanjon ch'án kjuachaxin xikaha tsonhen tí nkehe kjuanchia sín.

²⁵ A ntá kjuanjon ch'ín Pilato kjuachaxin sátsji tí ch'ín Barrabás éxí kjuanchia sín, na mé tí ch'ín k'uikjéhe sín kixin k'uékje ch'án kjuanínkaon la ko k'uék'óyán ch'án chojni. A ntá ch'ín Pilato kjuanjon ch'án kjuachaxin kixin sátsjiko sín tí ch'ín Jesús sinchekjasóte sín ch'án éxí tjinkaon sín.

*Kjuak'enkáni sín ch'án ijnko ntacruz its'en ch'án
(Mt. 27.32-44; Mr. 15.21-32; Jn. 19.17-27)*

²⁶ A ntá tió sákjuíko sín ch'ín Jesús tsjak'enkáni sín ch'án ntacruz, ntá itsé sín ijnko ch'ín tsíkjin chjasin Cirene it'in ch'án Simón, mé kjuixin ch'án nontee ch'án, ntá kjuínchekamá sín ch'án tí ntacruz tsjak'enkáni ch'ín Jesús la tinkáchréhe ch'án.

²⁷ Kjaxin chréhe nchónhya chojni ntoa la ko nchónhya chojni chjin chréhe sín tsjánkama sin ch'án.

²⁸ Kjánchó ch'ín Jesús nkátjía ch'án komá ch'án tí jehe sín kixin tsjánka sín ntáchro ch'án kixin:

—Jahará chojni chjin chjasin Jerusalén, chrótsjankamañaré tí janhan. Chrótsjankará kixin tí nkehe tsonhanrá jahará la ko xjaaná.

²⁹ Kixin itsi yaon tsontáchrórá kixin náxrjón tí sín chóntahya xjan la ko tí sín kjuínchekokjéheya xjan la ko tí sín kjuínchekakíhya ninkehó xjan.

³⁰ Ntá tsjánkixin chojni tsontáche sín tí jna kixin tsoxrátja sín la ko tsontáche sín tjo kixin tsjavá sín.

³¹ Kjonté tí nta yoa la ó sítónhen kaín tíhi la íchá tió chróxamá tí nta la ¿nkehe tí kaá chrókónhen tí nta tsíxamá? —ichro ch'án.

³² Kjaxin sákjuíko sín iyó sín tsíkjasin jie kixin ts'óyángo sín ch'ín Jesús.

³³ Ntá tió kjuíji sín tí jna tikítexín sín tí jna Nta Hueso Kja Chojni, na mé ntiha kjuak'enkáni sín ch'ín Jesús tí ntacruz la ko kjaxin tí iyó sín chóna jie, la ijnko la tja ch'án chjina la í jnko la tja ch'án kjon tjejóyáni sín ntacruz kjaxin.

³⁴ Ntá tió kjuixin kjuak'enkáni sín tí ch'ín Jesús tí ntacruz ntá nixjéhe ch'án tí It'é ch'án Dios ntáchro ch'án kixin:

—It'eni, tónínkákuenhya sín kixin tí nkehe kjuích'ehe ni sín kixin noehya sín nkehe tí kjuích'e sín —ichro ch'án.

A ntá tí sín soldado k'óxikayéhe sín iké ch'án ch'exín sín suerte kixin tsonoexín sín nkexro tsakja tí ka a.

³⁵ Kaín chojni chjasin ntiha tjejótsjehe sín kixin xikaha sítónhen la ko kjaxin tí sín t'etoan tjanoá sín tí jehe ch'án ntáchro sín kixin:

—Kjuínchekaá ch'án ókjé chojni, a ntá jie jehe ch'án chrókjuínchekaá ch'án asén ch'án tí chaxín jehe ch'án tí Cristo tí nkexro tsíkjejá Dios —ichro sín.

³⁶ La ko kjaxin tí sín soldado kjuanoá sín ch'án kóchjinehe sín ch'án kuikao sín xranvino náxrjónhya chjéhe sín ch'án chrók'ui ch'án,

³⁷ ntáche sín ch'án kixin:

—Tí jaha chaxín rey kuénte tí sín judío ntá jahvá chrókjuínchekaá asán —ichro sín.

³⁸ Kjaxin ntiha ikja tí ntacruz kjuak'enkáni sín ijnko ntachiso ntsí tsíkjin sín nkiva griego la ko nkiva latín la ko nkiva hebreo ntáchro kixin: “Tíha mé Rey kuénte tí sín judío”, ichro.

³⁹ Ijnko tí sín chón̄ta jiē t̄jenkání ntacruz k'uántaxín̄hin ch'án tí ch'ín Jesús ntáchro ch'án ḱixin:

—Tí jaha chaxín Cristo, jahvá chrókjuínkajian asán, ntá tsjixin ntá chrókjuínkajian tí jeheni —ichro ch'án.

⁴⁰ A ntá tí ch'ín jnko a k'uētuenhen tí íjnko ch'ín a ḱixin tsotání ch'án, ntáchro ch'án ḱixin:

—Ntáchrohya x̄ikaha. ¿Á chrakuenhya Dios ḱixin x̄ikaha ichrua ḱixin k̄jixin jeheni na ó t̄jéjót̄jasóteni?

⁴¹ Yóini na nchoxon t̄jéjót̄jasóteni t̄jéjót̄jenkani tí jiē k̄juasinni. A ntá tí nkexro i ninkehó nkehe jínahya k̄juích'e ch'án, la ntá koí ch'án t̄jéjót̄jasóte ch'án —ichro tí ch'ín a.

⁴² Ntá ntáchro ch'án ḱixin:

—Jesús, xráxinkávan tí janhan tió ts'ayéhé k̄juachaxin tsét̄oan jaha —ichro ch'án.

⁴³ Ntá k̄juát̄ehe ch'ín Jesús ntáchro ch'án ḱixin:

—Chaxín ntáxr̄jan ḱixin ijie jaí ts'ejóko ḱíchó ni nkaya nkajní —ichro ch'án.

Ntá ó k'uén ch'ín Jesús

(Mt. 27.45-56; Mr. 15.33-41; Jn. 19.28-30)

⁴⁴ Ntá ó chjina chonḱixin. A ntá k'uíxin tie kuénté chjasintajni hasta las tres kónjín.

⁴⁵ Ik'uén yaon, la ko tí ka t'inkákuènxín nkaxenhen n̄jnko k'uichje jnk̄osiné.

⁴⁶ Ntá ch'ín Jesús k'uèya ch'án itsen ntáchro ch'án ḱixin:

—It'éni t̄jen nkaya nkajní, jaha ts'ayéhé asénni —ichro ch'án.

X̄ikaha ichro ch'án ntá k'uén ch'án.

⁴⁷ A ntá k'uíkon tí ch'ín capitán romano kaín x̄ikaha kónhen ntá k̄juanchehe ch'án k̄juasáyé Dios ntáchro ch'án ḱixin:

—Chaxín tí nkexro la jína la ninkehó jiē chón̄tahya —ichro ch'án.

⁴⁸ A ntá kaín tí chojni tsíkójnkotsé ntiha k'uíkon sín x̄ikaha kónhen ntá sákjuíxin sín ntiha chrakon sín t̄jate sín ntakuin sín ḱixin x̄ikaha kónhen.

⁴⁹ A ntá kaín tí sín chóxin ch'ín Jesús la ko k̄jixin tí chojni chjin k'uékinkáchónki sín ch'án tsík̄jix̄in sín estado Galilea ikjín t̄jéjó sín t̄jéjót̄sjehe sín nkerí sítónhen.

Sákjuíkjavá sín tí ch'ín Jesús

(Mt. 27.57-61; Mr. 15.42-47; Jn. 19.38-42)

⁵⁰ A ntá ntiha t̄jen ijnko ch'ín it'in José, chjasén ch'án mé Arimatea estado Judea. K̄jixin jehe ch'án ijnko tí sín imá t'et̄oan kuènte tí sín judío, jehe ch'án mé ijnko nkexro jína.

⁵¹ Jehe ch'án k̄juák'echónhen ch'án itsi tí k̄juachaxin kuènte Dios. Méxra kóxr̄jienhya ch'án nkexrí k̄juích'e tí sín í so t'et̄oan.

⁵² Méxra sákjuítsjehe ch'án tí ch'ín Pilato k̄juík̄janchia ch'án tí cuerpo kuènte ch'ín Jesús. A ntá ch'ín Pilato k̄juanjon ch'án k̄juachaxin.

⁵³ Ntá sákjuí sín tsjinkaj̄inx̄in sín ch'án ntacruz. Ntá k̄juixin k̄juinkajin sín ch'án ntá k̄juínchek'ísímá sín ch'án ijnko ka jié, ntá sákjuíko sín tsoxravá ch'án ijnko tòyē xráxín tsík̄jich'éna ch'ín José jehó t̄jō la ko naxa ninkexró tsíxraváhya ntiha.

⁵⁴ Kaín tíha kónhen tí yaon viernes kónjín. Tí yaon mé t̄jéjót̄yaxín̄hin sín ḱixin í séhya tsoxranḱixin tí yaon t'ok'éhe sín sábado ḱixin kohya k̄juachaxin sich'e sín ninkehó xr̄a.

⁵⁵ A ntá tí chojni chjin nkáchréhe k̄juíkoxín ch'ín Jesús estado Galilea k̄jixin sákjuíko sín sákjuítsjehe sín tí tòyē tsoxravá ch'án la ko k'uíkon sín jína nkexrí k̄juak'e sín tí cuerpo kuènte ch'án.

⁵⁶ A ntá tió kjan sín tí nchia tjejó sín k'óyaxínhin sín kjueya sín xroan xraxé náxrjón itsa ntóe ch'án kixin xikaha k'uékinkáchónki tí sín judío. A ntá k'ok'éhe sín tí yaon sábadó éxí t'etoan tí ley.

24

Ó xechón ch'ín Jesús

(Mt. 28.1-10; Mr. 16.1-8; Jn. 20.1-10)

¹ Tí yaon domingo, mé tí yaon xrankíxixín semana tí chojni chjin na xíkjan sín inaá tí tsíxravá ch'ín Jesús sákjuíko sín xroan xraxé tsík'ena sín. La ko í so chojni chjin sákjuíkotoxin sín.

² Ntá ó kjuíji sín ntiha k'uíkon sín tí xro tsíkjèxín tí tòye la í xikahya tjen tí sákjuí sín.

³ Ntá k'uíxenhén sín tòye ntá k'uitjahya sín cuerpo kuènte Ìnchéni Jesús.

⁴ Ntá chrakon sín ntá noehya sín nkehe sich'e sín. Ntá xrínahya k'uíkon sín iyó chojni ntoa tjejóxin toté chjinaxón tí tjejó sín, la iké sín la tjákini tsjehe.

⁵ A ntá tí chojni chjin kjuínchek'isén kja sín tjejótsjehe sín nonte kixin imá chrakon sín, a ntá tí chojni ntoa ntáchro sín kixin:

—¿Nkekuènte xritjéyará tí nkexro tjechón tí síin tí sín tsík'en?

⁶ Tjenhya ch'án ntihi la ó xechón ch'án. Xráxinkáonrá nkehe ntáchro ch'án tí kjuák'e ch'án estado Galilea

⁷ ntáchro ch'án kixin jehe ch'án tí Xjeen Dios K'óna Chojni t'ichjánxin tsotsé tí sín chóna jie tsjak'enkani sín ch'án ntacruz la ko tí nixin yaon tsoxechón ch'án inaá —ichro sín.

⁸ A ntá tí síchjin xráxinkaon sín kixin nkexrí tsíchronka ch'ín Jesús,

⁹ a ntá tió kjanxin sín tí tsíxravá ch'án ntá chénka sín tí tejnko tí sín k'uék'ajiko ch'án la ko kaín tí í so sín.

¹⁰ A ntá tí sín sákjuíchenka tí sín apóstol la mé tjan María Magdalena la ko tjan Juana la ko tjan María ìné ch'ín Jacobo la ko tí í so chojni chjin.

¹¹ A ntá tí sín apóstol kuínhin sín éxí ijnko nkehe chaxínhya tí nkehe chrónka tí jehe sín ntá kuítেকakonhya sín.

¹² Kjánchó ch'ín Pedro k'uaxrjexín ch'án nchia tinká ch'án sákjuítsjehe ch'án tí tsíkjixravá ch'ín Jesús. Ntá kjuíji ch'án k'uíkon ch'án tí nkaxenhén tòye k'uíkon ch'án kixin jehó tí ka tsík'ísímá ch'án ntaha tjen. Ntá kjan ch'án tí nchia tjen ch'án chrakon ch'án kixin xikaha tsíkónhen.

Tí ntia Emaús sákjuí sín la kjuíjichréhe Ìnchéni

(Mr. 16.12-13)

¹³ A ntá tí yaon a iyó sín sákjuí sín ijnko chjasin ntsí it'in Emaús, mé kjínxin tejnko kilómetro tí chjasin Jerusalén.

¹⁴ Tinkákjo sín kíchó sín kixin kaín tí nkehe tsíkónhen tí chjasin Jerusalén.

¹⁵ A ntá nachrohe nixja sín tinkákjo sín, a ntá ch'ín Jesús kóchjinehe ch'án tí jehe sín sákjuíko sín ch'án.

¹⁶ Kjónté k'uíkon sín ch'án la kjuanjonhya Dios kjuachaxin kixin chrókjuatsoan sín tí jehe ch'án.

¹⁷ A ntá ch'ín Jesús kjuanchankíhi ch'án sín ntáchro ch'án kixin:

—¿Nkehe tí tinkakjóra tí k'uinkará ntia? ¿Nkekuènte kixin t'avará? —ichro ch'án.

¹⁸ A ntá ijnko tí jehe sín mé it'in Cleofas, mé kjuátehe ch'án kixin:

—Kaín chojni ó nohe sín nkehe tí tsíkónhen chjasin Jerusalén. A ntá jaha kjaxin kjuák'e ntiha la ¿á jahvá noahya nkehe tí tsíkónhen tí yaon a ní? —ichro ch'án.

¹⁹ A ntá jehe ch'án kjuanchankíhi ch'án tí jehe sín kixin:

—¿Xá nkehe tsíkónhen? —ichro ch'án.

Ntá chénka sín ch'án kixin:

—Tí nkehe tsíkónhen ch'ín Jesús tsíkjin ch'án chjasin Nazaret. Jehe ch'án na ijnko nkexro k'uéchronka itén Dios, na mé kjuakoxin ch'án kjuachaxin kuènte nkaya nkajní kaín tí nkehe k'uékjich'e ch'án la ko kaín nkehe k'uéntáchro ch'án mé xikaha k'uíkon Dios la ko k'uíkon tí chojni.

²⁰ A ntá tí nchat'á t'etoan la ko tí sín gobierno kjuínchek'áyéhe sín ch'án kixin its'en ch'án la tsjak'enkani sín ch'án ntacruz.

²¹ A ntá jeheni k'uejóchónhenni kixin jehe ch'án chrókjuinchekaá ch'án tí sín Israel. A ntá jie ó chóna iní yaon xikaha kónhen.

²² A ntá iso chojni chjin kjaxin k'uékinkáchónki sín ch'án kjuínchechrakon sín tí jeheni kixin jehe sín tsíkjsjehe sín tí tsíxravá ch'án imá nchítjén

²³ la mé tsík'itjahya sín tí cuerpo kuènte ch'án, ntá kjan sín chrónka sín kixin tsík'ikon sín iyó sín ángel chrónka sín kixin ch'ín Jesús la tjechón ch'án, ichro sín.

²⁴ Ntá tuénxín iyó tí sín k'uájikoni kjaxin sákjujsjehe sín tí tsíxravá ch'án la kuik'itja sín éxí chrónka tí chojni chjin, kjánchó ch'ín Jesús la k'uíkonhya sín —ichro tí yaá sín a.

²⁵ Ntá kjuátehe ch'ín Jesús ntáchro ch'án kixin:

—Lontirá jahará la tjokahya kuítekáonrá tí nkehe k'uéchronka tí sín profeta k'uéjó ósé.

²⁶ ¿Xá t'ichjánxinhya chrókjuasóte Cristo senó ntá chrók'uáyéhe ch'án tí kjuachaxin chrók'uetōan ch'án? —ichro ch'án.

²⁷ Ntá kjuankixin ch'án chronkaxín ch'án nkexrí t'axrjexín kaín tí nkehe nixja xroon itén Dios kixin nkehe tsonhen tí jehe ch'án la mé kjuankixixín ch'án chronkaxín ch'án tí nkehe tsíkjin ch'ín Moisés la ko kjuintaxín chronkaxín ch'án tí nkehe tsíkjin tí í so sín profeta.

²⁸ Ntá kjuíji sín tí chjasin ntsí a, a ntá ch'ín Jesús tsjehe ch'án éxí naxa sáchrókjui ch'án kjín.

²⁹ A ntá jehe sín mé chronóhe sín ch'án kixin ntahó chrókuitohe ch'án, ntáchro sín kixin:

—Titoḥa ts'ejóni ntihi kixin ntá ó kóntó la ó ts'ixitie —ichro sín.

Ntá ch'ín Jesús la k'uíxenhén ch'án nchia kixin tsitōeko sín ch'án.

³⁰ A ntá tjejótxaxínko sín ch'án tí tjen tí ntamesa, ntá ntiha xranjon nkehe sine sín, ntá kuákja ch'án tí niotja la kjuanchehe ch'án kjuasáyé Dios la kóchrít'ō ch'án kuákja tí jehe sín.

³¹ Ntá tuénxín xraxinkaon sín ntá kjuátsoan sín tí jehe ch'án. Ntá tuénxín k'uitjáyankoá ch'án.

³² Ntá jehe sín itjo sín kichó sín ntáchro sín kixin:

—¿Á chaxínhya chéhe asénni tí kuíkaoni ch'án ntia kixin chronkaxín ch'án nkexrí t'axrjexín tí itén Dios tsíkjin sín ósé? —ichro sín.

³³ Ntá tuénxín k'uínkatjen sín kjan sín chjasin Jerusalén. A ntá ntaha k'uitja sín tí tejnko sín jnkokoá tjejó sín la ko tí í so sín.

³⁴ A ntá tí sín ntiha chrónka sín kixin:

—Chaxín tjechón Ìnchéni la mé ch'ín Simón tsík'ikon ch'án tí jehe ch'án —ichro sín.

³⁵ Ntá jehe sín kjaxin chrónka sín nkehe tsíkónhen tí ntia sákjuí sín kixin nkexrí kjuátsoanxín sín tí ch'ín Jesús tí kóchrít'ō ch'án niotja kjuanjon ch'án.

*Titàya k'uíkuèn sín ikui ch'ín Jesús
(Mt. 28.16-20; Mr. 16.14-18; Jn. 20.19-23)*

³⁶ A ntá jehe sín naxa tjejóto sín kaín tí nkehe tsíkónhen, a ntá xrínahya ch'ín Jesús kjuák'e jnkosiné tí tjejó sín, nixjehe ch'án tí jehe sín ntáchro ch'án kixin:

—¿Á kjuaxróxin tjejorá? —ichro ch'án.

³⁷ A ntá jehe sín la imá chrakon sín kjuenkayáxin sín kixin k'uíkon sín ijnko xrintoe chojni.

—Ách'e kjuachani —ichro sín.

³⁸ A ntá ntáche ch'ín Jesús tí jehe sín kixin:

—¿Nkekuènte chrakonrá? ¿Nkekuènte xikaha tjenkayáxin asánrá?

³⁹ Tsjehérá tjaná la ko totená kixin chaxín janhan. Itserána la ko komárána, kixin ijnko xrintoe chojni chóntahya nto la ko chóntahya hueso éxí t'ikonrá kixin chonta janhan —ichro ch'án.

⁴⁰ A ntá xikaha ichro ch'án ntá kjuako ch'án itja ch'án la ko toté ch'án.

⁴¹ Ntá kjónté xikaha k'uíkon sín la naxa kuítekakonhya sín kixin chéhe sín la ko chrakon sín. A ntá ch'ín Jesús ntáchro ch'án kixin:

—¿Á chontará ichrén nkehe sineni ntihi ní? —ichro ch'án.

⁴² Ntá chjéhe sín ch'án it'o koche tsíchjántaón xrohi la ko ijnko t'o katjé kotsjenta tjiá tsjen.

⁴³ A ntá jehe ch'án kuákja ch'án kjóne ch'án k'uíkonxín kon sín.

⁴⁴ Na ntá ntáchro ch'án kixin:

—Kaín tí nkehe k'uátsínka tí janhan mé k'uéntáxrjan tí naxa k'uék'ejóni senó; kixin t'ichjánxin tsoxiteyá kaín tí nkehe chrónka tí ley tsíkjin ch'ín Moisés la ko tí nkehe tsíkjin tí sín profeta la ko tí nkehe ntáchro tí salmo kixin nkexrí tsona janhan —ichro ch'án.

⁴⁵ Ntá kjuanjon ch'án kjuachaxin kixin tsienxín sín tí xroon itén Dios tsíkjin sín ósé.

⁴⁶ Ntá chénka ch'án sín kixin:

—Mé xikaha nixja tí xroon itén Dios kixin tí Cristo la t'ichjánxin ts'en, la nixin yaon t'ichjánxin tsoxechón ch'án.

⁴⁷ A ntá t'ichjánxin tsjakoxin sín ihnié ch'án tsjankíxixín sín chjasin Jerusalén la ko chrókuinhin chojni kuenté chjasintajni kixin chrókuítóhe sín ijíé sín chrókuitekaon sín tí jehe ch'án kixin jehe ch'án mé chrókjuincheyaon tí ijíé sín.

⁴⁸ A ntá jahará mé tsochronkaxínrá kixin xikaha k'uíkonrá kaín tíha.

⁴⁹ Ntá tsochr'an janhan tí Nchakuen T'aná éxí tsíntáchro ch'án. Kjánchó chjasin Jerusalén ntahó titohará tsoxiteyájia ts'ayéhérá kjuachaxin tsixin nkaya nkajní.

Ch'ín Jesús sákjuí ch'án nkaya nkajní

(Mr. 16.19-20)

⁵⁰ A ntá ch'ín Jesús sákjuíko sín ch'án k'uaxrjexín sín chjasin Jerusalén sákjuí sín chjasin Betania. Ntá kjuàya ch'án tja ch'án kjuíncheyaon ch'án tí jehe sín.

⁵¹ A ntá kjuixin kjuíncheyaon ch'án sín ntá k'uaxrjenta ch'án tí jehe sín ntá sákjuí ch'án nkaya nkajní.

⁵² A ntá jehe sín k'uíkon sín xikaha, a ntá xraxinkaon sín ch'án, ntá kjan sín chjasin Jerusalén chéhe sín.

⁵³ A ntá kaín yaon tjejó sín nkaxenhen nínko tjanchehe sín Dios kjuasáya. Amén.

Tí tan jína chrónka ch'ín Juan

Tí nkexro chrónkaxín nkexrí tjen Dios mé k'óna ijnko chojni chjasintajni

¹ 12A ntá tí xrankíxixín naxa k'ónahya tí chjasintajni a na mé xráxín tjen tí nkexro chrónkaxín nkexrí tjen Dios, na mé Cristo tíha, na mé kjuák'eko Dios na mé kjaxin Dios tíha.

² Tí xrankíxixín na mé tí nkexro xráxín kjuák'eko Dios

³ la ko kjuachaxin kuènte ch'án na mé k'ónaxín kaín xín nkehe síin jie. A ntá kohya ninkehó nkehe k'ónakoá, na mé kaín xín nkehe síin na mé k'ónaxín tí kjuachaxin kuènte ch'án.

⁴ Jehé ch'án na mé kjuanjon kjuachaxin kaín nkehe síchón síin chjasintajni la ko jehe ch'án mé xrohi t'inkaséyanxínhin jnkojnko ntje chojni chjasintajni.

⁵ Tí xrohi a mé t'inkaséyanxín tí sítié a. A ntá tí sítié a mé tjinkaon chrók'ók'anka tí xrohi a, kjánchó kjuachahya k'ók'anka.

⁶ Ntá kjuák'e ijnko chojni k'uetuēnhen Dios kui mé it'in ch'án Juan.

⁷ Ikui ch'án kjuák'echrónka ch'án nkexrínchi tjen tí xrohi t'inkaséyanxín chjasintajni kixin kaín xín chojni chrókuitekaon sín tí tjechrónka ch'án a.

⁸ A ntá tí ch'ín Juan la jehya tí xrohi a. Ó k'uítuēnhón ch'án kui ch'án kixin tsochrónka ch'án nkerí kuènte tí xrohi a.

⁹ A ntá tí xrohi chaxín t'inkaséyanxínhin kaín xín chojni na ó tsíki ch'án chjasintajni jie.

¹⁰ Kjuák'e ch'án chjasintajni na mé Dios tsíkjich'éanaxín ch'án chjasintajni tí kjuachaxin kuènte tí nkexro a na kjónté kjuák'e ch'án chjasintajni na naxa kjuátsoanhya sín ch'án.

¹¹ Ikui ch'án tí tjejó tí sín judío k'uaxrjeníxin ch'án, kjánchó kuítekakuenhya sín ch'án.

¹² A ntá tí sín kuítekaon sín ch'án mé k'uáyéhe sín kjuachaxin kixin ts'óna sín xjeen Dios.

¹³ Ntá yóehya ts'axrjeníxin sín it'é sín chjasintajni ntihyó la ko yóehya ijnko it'é chrókjuenkayáxin ch'án chrókjuich'éna ch'án ijnko xjan. Náhí. Dios mé kjueyá ch'án nkexro ts'óna xjeen ch'án.

¹⁴ A ntá tí nkexro chrónkaxín nkexrí tjen Dios na mé k'óna ijnko chojni chjasintajni kjuák'enkákjanni ch'án na mé imá k'uétjuèhé ch'án chojni chjasintajni la ko imá ntoá chrónka ch'án. Kuayeni k'uíkonní kixin imá t'etōan ch'án kixin jehe ch'án mé tí jnkokoáxón Xjeen It'éni tjen nkaya nkajní na mé xíkaha imá t'etōan ch'án.

¹⁵ Ch'ín Juan mé chrónka ch'án nkexrí tjen tí nkexro a. Ntáchro ch'án kixin:

—Senó k'uékjákohará kixin chr'éxin tsi tí nkexro a, na mé antsí má t'etōan ch'án, a ntá janhan la náhí kixin tí janhan naxa kohyana la tí jehe ch'án la ó xráxín tjen ch'án —mé xíkaha chrónka ch'ín Juan.

¹⁶ Kaínni ó k'uáyéheni tí kjuachaxin jie tjetjanjon ch'án la ko antsí má tjencheyaonni ch'án la ko tjencheyaonni ch'án.

¹⁷ Dios mé tsík'etuēnhen ch'ín Moisés kixin tsokjin ch'án tí ley. A ntá Ìnchéni Jesucristo mé kjuakoxin ch'án kixin nkexrí imá tjuèhé Dios tí chojni chjasintajni. A ntá kaín nkehe chrónka ch'án mé antsí ntoá.

¹⁸ Kohya ninkexró chjasintajni k'uíkon sín Dios a. A ntá tí jnkokoáxón Xjeen ch'án na mé xráxín jnkokoá tjenkayáxinko It'é ch'án la mé jehe ch'án mé ó kjuínchekónoheni ch'án nkexrí tjen It'é ch'án nkaya nkajní.

*Ch'ín Juan mé chrónka ch'án nkexrínchi tjen ch'ín Jesús
(Mt. 3.11-12; Mr. 1.7-8; Lc. 3.15-17)*

¹⁹ Iso tí sín judío k'uéjó sín chjasin Jerusalén na ntá ichr'án sín iso chojni nchat'á la ko iso tí sín levita, ikui sín kuinixjehe sín tí ch'in Juan kjuanchankíhi sín ch'án kixin:

—¿Nkexro tí jaha? —ichro sín.

²⁰ Ntá kjuínchemáhya ch'án, ntáchro ch'án kixin:

—Náhí. Jehya janhan tí Cristo —ichro ch'án.

²¹ Ntá xíkjanckankíhi sín ch'án inaá, ntáchro sín kixin:

—¿Xá nkexro tí jaha? ¿Á jaha tí profeta Elías? —ichro sín.

Ntá ch'ín Juan la xíkatehe ch'án ntáchro ch'án kixin:

—Náhí. Jehya janhan Elías —ichro ch'án.

Ntá xíkjanckankíhi sín ch'án inaá kixin:

—¿Á jaha tí nkexro tjejóchónhenni itsi tsochrónka itén Dios? —ichro sín.

Na ntá ntáchro ch'ín Juan inaá kixin:

—Náhí. Janhya —ichro ch'án.

²² Ntá kjuanchankíhi sín ch'án inaá kixin:

—¿Ntá nkexro jaha? T'ichjánxin tsonoheni tsochénkani tí sín ichr'ánni ikuini. ¿Nkehe tsochrónka kixin nkexro tí jaha? —ichro sín.

²³ Ntá kjuátehe ch'ín Juan ntáchro ch'án kixin:

—Janhan mé tí nkexro tsjak'e nteje ts'èya tsoxrjanka kixin: “Takitjehérá ijnko ntia ntoí tsixin Ìnchéni” —mé xíkaha ichro ch'án kjuátexín ch'án itén ch'ín Isaías k'uéchrónka xroon itén Dios ósé.*

²⁴ A ntá tí sín fariseo mé tsíchr'án tí jehe sín kuikjanckankíhi sín tí ch'ín Juan.

²⁵ A ntá kjuanchankíhi sín ch'án kixin:

—Ó ntáchrua kixin jahya tí Cristo tí nkexro tsaáxin chojni la ko jahya tí Elías, la ko jahya nijnko tí nkexro k'uéchrónka itén Dios ósé. ¿A ntá nkekuénté tikite chojni tí xíkaha? —mé ichro sín.

²⁶ Ntá ntáchro ch'ín Juan kixin:

—Janhan na mé ìnta ó tikitexián chojni. Ó ntihi tjenkákjan ijnko nkexro naxa tjátsoanhyará.

²⁷ Jehe ch'án mé tsi ch'án nóton tí janhan. A ntá antsí má t'etoan ch'án, a ntá janhan na kénhyó. A ntá tósuàna chrókjuasíntanka tí correa tokaté ch'án —ichro ch'án.

²⁸ Kaín tíha mé tsíkónhen tí chjasin it'in Betábara tí nó tjitoxin yaon tóhe tí ntario Jordán tí kjuák'e ch'ín Juan kuikite chojni.

Ch'ín Jesús na mé éxí yóhe ijnko kolélo kuénte Dios

²⁹ A ntá tí yaon chr'éxin mé k'uíkon ch'ín Juan kixin ó tje kui ch'ín Jesús. Ntá nixjehe ch'án tí sín tsíkóchjina ntáchro ch'án kixin:

—Tsjehérá tí nkexro tje kui mé tí Kolélo kuénte Dios jehe ch'án. Tíha mé tsjìinxín ijie chojni chjasintajni.

³⁰ Janhan mé k'uéxrjanka kixin tí iton tí janhan mé tsichréhe ijnko nkexro antsí t'etoan, a ntá janhan la kénhyó tétōan kixin naxa kohyana na jehe ch'án la ó xráxín tjen ch'án.

³¹ Kjaxin janhan naxa chonhya nkexro tíha. A ntá xra ó k'uinka kjuak'é kuikitexián chojni ìnta kixin tí chojni nación Israel mé chrókjuátsoanxín sín ch'án —ichro ch'ín Juan

³² Kjuintaxín ntáchro ch'ín Juan kixin:

* 1:23 Isaías 40.3

—Ó k'uíquuan kixin tí Nchakuen Dios mé k'uínkajinxin nkaya nkajni na éxi yóhe ijnko kontóá k'uínkajin la ko kjuák'e va ntoí tí tjen ch'án.

³³ A ntá janhan kjaxin naxa chonhya nkexro tíha. A ntá tí nkexro k'uetuanna kixin tsjak'é tsíkítexián chojni ìnta mé tsíchronka ch'án kixin tí Nchakuen Dios mé ts'inkajin tsjak'e ntoí tí tjen ijnko chojni na mé ts-jatsqanxián janhan kixin tí nkexro a mé tsíkítexín ch'án Nchakuen Dios chojni.

³⁴ A ntá janhan jie mé ó k'uíkonxín kuan kixin xikaha kónhen tí jehe ch'án, a ntá xrjanxaxián kixin táha mé Xjeen Dios tíha —mé xikaha chrónka ch'án.

Tí sín sqoxín kjueyá ch'ín Jesús

³⁵ Tí yaon chr'éxin kjuák'e ch'ín Juan la ko iyó tí sín k'uájiko ch'án,

³⁶ a ntá xrinahya k'uíkon ch'án k'uátsínka ch'ín Jesús. Ntá ntáchro ch'ín Juan kixin:

—Tsjeherá tí nkexro i mé tí Kolélo kuente Dios —ichro ch'án.

³⁷ Ntá kuínhin tí yóí sín k'uájiko ch'ín Juan na ntá sákjuíchréhe sín tí ch'ín Jesús.

³⁸ Ntá kuinkátjía ch'ín Jesús k'uíkon ch'án kixin tinkáchréhe sín ntá kjuan-chankíhi ch'án sín kixin:

—¿Xá nkehe xritjéyará? —ichro ch'án.

Ntá ntáchro sín kixin:

—Maestro, ¿xá nketí nchia itjen? —ichro sín.

³⁹ Ntá kjuátehe ch'án ntáchro ch'án kixin:

—Ínta sátsjini ts'ikonrá nketí —ichro ch'án.

Ntá kuinkáchréhe sín ch'án k'uíkon sín nketí nchia kjuák'e ch'án ntá k'uéjoko sín ch'án kuenté tí kónjín kixin kjuíji sín ntiha como las cuatro kónjín.

⁴⁰ A ntá yóí sín tsíkinhin sín tí chrónka ch'ín Juan ntá sákjuíchréhe sín tí ch'ín Jesús na mé ijnko mé it'in Andrés. Jehe ch'án chóna ch'án ijnko savé mé it'in Simón Pedro.

⁴¹ Na ntá tuénxín tí ch'ín Andrés sákjuíkjeýa ch'án tí savé ch'án Simón. Ntá chénka ch'án tí savé ch'án kixin:

—Ó k'uitjani tí nkexro Mesías —ichro ch'án. Tíha mé t'axrjexín kixin Cristo.

⁴² A ntá ch'ín Andrés mé kuikao ch'án tí savé ch'án Simón tí tjen ch'ín Jesús. Ntá ch'ín Jesús mé komá ch'án tí ch'ín Simón ntáchro ch'án kixin:

—Jaha mé Simón, it'á mé it'in Jonás. Ntá jie sintak'ian Cefas —ichro ch'án.

A ntá tí palabra Cefas la ko tí palabra Pedro na mé yóí mé t'axrjexín kixin ixro tíha.

Ch'ín Jesús mé kjueyá ch'án tí ch'ín Felipe la ko tí ch'ín Natanael

⁴³ A ntá tí yaon chr'éxin mé sáchrókjui ch'ín Jesús tí estado Galilea. Ntá k'uitja ch'án tí ch'ín Felipe, na ntá ntáche ch'án kixin:

—Chr'éhé tí janhan —ichro ch'án.

⁴⁴ A ntá tí ch'ín Felipe mé chjasén ch'án mé it'in Betsaida tí chjasén ch'ín Andrés la ko ch'ín Pedro.

⁴⁵ Ntá tí ch'ín Felipe mé sákjuíkjeýa ch'án tí ch'ín Natanael na ntá chénka ch'án kixin:

—Ó k'uitjani tí nkexro tsi éxi k'uéchrónka tí ch'ín Moisés tí tsíkjin ch'án tí xroon chrónka tí nkehe k'uetqan Dios. Kjaxin tí sín k'uéchrónka tí itén Dios chr'éxin mé k'uéchrónka sín kixin itsi tí nkexro a. Na ntá ó k'uitjani ch'án na mé jehe ch'án mé it'in Jesús, la it'é mé it'in José, la mé chjasén ch'án mé Nazaret —ichro ch'ín Felipe.

⁴⁶ A ntá ntáchro ch'ín Natanael kixin:

—¿Xá kjuánchí má chrókójina tí nkehe chrók'uaxrjexín tí chjasin Nazaret a? —ichro ch'án.

Ntá kjuátehe ch'ín Felipe ntáchro ch'án kixin:

—Xrákiá ts'ikuan —ichro ch'án.

⁴⁷ Na ntá k'uíkon ch'ín Jesús kixin ó kui tinkákóchjina ch'ín Natanael, na ntáchro ch'án kixin:

—Ó kui ijnko ch'ín chaxín israelita la kohya nijnko kjuach'ia xriko ch'án —ichro ch'án.

⁴⁸ Na ntá ntáchro ch'ín Natanael kjuanchankíhi ch'án tí ch'ín Jesús kixin:

—¿Nkexrí kixin tjátsoanna? —ichro ch'án.

Ntá kjuátehe ch'ín Jesús ntáchro ch'án kixin:

—Naxa nixjaahya tí ch'ín Felipe mé k'uíkuan tí jaha tjenkankiá tí nta t'óna to higo —ichro ch'án.

⁴⁹ Na ntá ntáchro ch'ín Natanael kixin:

—Maestro, jaha la chaxín tí Xjeen Dios tjen nkaya nkajní tsétuénhén tí nación Israel —ichro ch'án.

⁵⁰ Ntá kjuátehe ch'ín Jesús ntáchro ch'án kixin:

—Jehya tí nkehe ntáxrjan k'uíkuan tjenkankiá nta t'óna to higo, jehya táhó tsítékákonxian. Náhi. Chr'éxin xiki í jnko kjuaxroan antsí má jié ts'ikuan, a ntá tíhi la kénhyó —ichro ch'án.

⁵¹ Kjaxin ntáchro ch'ín Jesús kixin:

—Ijnko nkehe ntoá tsoxrjanka kixin tsoxitjehe tí nkajní ts'ikonrá itsi itsjé tí sín ángel kuente Dios mé ts'it'ótjen la ko ts'inkajin tí tjeñ janhan mé tí Xjeen Dios K'óna Chojni —ichro ch'án.

2

Chjasin Caná estado Galilea kótehe ijnko chojni

¹ A ntá iní yaon chr'éxin ntá kótehe ijnko ch'ín chjasin Caná estado Galilea. Mé koí tí ñé ch'ín Jesús tsík'íyehé sín tjan la ntiha tjen tjan koí.

² Kjaxin tsík'íyehé sín tí ch'ín Jesús la ko tí sín k'uájiko ch'án kixin sátsji sín tí tsíkótehe sín ntiha.

³ Ntá ó tsík'ankehé sín tí xranvino ik'uí sín na ntá tí ñé ch'ín Jesús mé ntáche tjan tí jehe ch'án kixin:

—Ó tsík'ànka xranvino its'i sín —ichro tjan.

⁴ Ntá ntáchro ch'ín Jesús kixin:

—Naná, ¿nkehe tsonhen chronka? Naxa kjuixrakáhya tí yaon tsjásian kjuaxroan —ichro ch'án.

⁵ A ntá tí ñé ch'án na mé ntáche tjan tí sín ch'e xra kixin:

—Tí chrén nkehe chrók'uetuñhanrá ch'án chrókjuínchexiteyará —ichro tjan.

⁶ A ntá siín ntiha injon chī tsík'óna xro na mé tíha tjiá nta t'ònti sín kixin xikaha mé ts'axrjehe tí jié chóna sín koí, mé xikaha kuinkáchónki tí sín judío. Na mé jnkojnko chī mé tjacha tikia ochenta litro la o ciento litro nta.

⁷ Ntá k'uetuñhen ch'ín Jesús tí sín ch'e xra kixin:

—Tíkjará nta kaín tí chī a tsokaón —ichro ch'án.

Ntá kjuínchexiteyá sín kjuínchekaón sín nta jnkojnko tí chī a.

⁸ A ntá ntáche ch'ín Jesús tí jehe sín inaá kixin:

—Tákjá intsí nta tjiá chī tjikuehé tí ch'ín t'etoan tí kia a —ichro ch'án.

Ntá xikaha kjuích'e sín kjuínchexiteyá sín.

⁹ A ntá tí ch'ín t'etoan tí kia a mé tsjexín ch'án tí nta tsík'óna xranvino kjónté noehya ch'án nketí kuixin tí xran a. Jehó tí sín ch'e xra kuikao sín mé nohe

sín kixin jehe sín mé tsíkakitsje sín ntá. Ntá tí ch'ín t'etōan mé k'uíyēhe ch'án tí ch'ín tsíkótehe.

¹⁰ Ntáche ch'án kixin:

—Xrácín tí sín tjasin kia la senó tí xranvino náxrjón tjanjon sín na tió chrók'uihya tí sín tsíkóchjina na ntá tjanjon sín tí xranvino náxrjónhya. A ntá jaha la náhi. Senó kjuakéchjina tí xranvino antsí má náxrjón, a ntá tí jie tjetjánjuan jaha —ichro ch'án.

¹¹ Tí kjuaxroan a kjuích'e ch'ín Jesús chjasin Caná estado Galilea mé tí kjuaxroan saoxín kjuasin ch'án mé kjuakoxin ch'án nkexrí imá jié tí kjuachaxin kuènte ch'án, a ntá tí sín k'uájiko ch'án mé kuítekaon sín tí jehe ch'án.

¹² Ntá ó k'uátsínka kia, a ntá sákjuí ch'án chjasin Capernaum, sákjuíko ch'án iné ch'án la ko kichó ch'án la ko tí sín k'uájiko ch'án, kóxrjenhen sín ntiha iso yaon.

Ch'ín Jesús mé kjuínchetjóá ch'án tí nínko jié

(Mt. 21.12-13; Mr. 11.15-18; Lc. 19.45-46)

¹³ A ntá ó kuichjina tí yaon kia kuènte pascua kuènte tí sín judío. Ntá ch'ín Jesús sákjuí ch'án chjasin Jerusalén.

¹⁴ Ntá nkaxenhen tí nínko jié ntiha k'uíkon ch'án tí sín nchekjixin koxinta la ko kolélo la ko kontóá. La ko ntiha kjaxin tjejótjaxin tí sín tjinkíxixín chichaon.

¹⁵ Ntá ch'ín Jesús mé kuákja ch'án ihno tsíxehe sín ntiha, kjuích'éna ch'án ijnko chikoté, ntá kuakitsjexín ch'án sín nkaxenhen nínko kaín xín sín la ko tí kolélo la ko tí koxinta. Na ntá tí ntamesa tjinkítóxixín sín tí chichaon mé kótéka ch'án tsíkjaminkí xènjín tí chichaon a.

¹⁶ Ntá k'uētuenhen ch'án tí sín nchekji tí kontóá a kixin:

—Takítsjerá kaín tí nkehe a. Ch'énahyará ijnko ntsin tí ntōe T'aná ntihi —ichro ch'án.

¹⁷ Ntá xrácinkaon tí sín k'uájiko ch'án ti nkehe tsíkjin sín ósé kixin: “Éxí xrohi k'uákjen asenná nínkavan kixin tí ntōa tjikosáyehya sín.” *

¹⁸ Ntá tí sín judío mé kjuanchankíhi sín ch'án kixin:

—¿Xá nkerí kjuaxroan tsjásixián tsjākoxian nketí kjuachaxin chonta kixin xikaha kjuích'e tíhi? —ichro sín.

¹⁹ Ntá kjuátehe ch'ín Jesús kixin:

—Tí ts'oxikará tí nínko i ntá iníkoá yaon la ó sít'ána nixin tsjak'e inaá —ichro ch'án.

²⁰ Na ntá ntáchro tí sín judío a kixin:

—Cuarenta y seis nánó k'uéjé sín kjuích'éna sín tí nínko i, a ntá jaha ntáchrua kixin iní yaon koá sích'éna inaá, ichrua —ichro sín.

²¹ Kjánchó kienxínhya sín kixin tí nínko ntáchro ch'ín Jesús la tí cuerpo kuènte ch'án.

²² Ntá tió kjuixin xechón ch'án ntá xrácinkaon tí sín k'uájiko ch'án kixin xikaha tsíchrónka ch'án, ntá kuítekaon sín tí xroon itén Dios tsíkjin sín ósé la ko tí nkehe tsíchrónka ch'án.

Ch'ín Jesús mé nohe nkehe tónhen asén kaín xín chojni

²³ Tió kjuák'e ch'ín Jesús chjasin Jerusalén tí kia pascua, a ntá itsjé chojni kuináchónki sín tí jehe ch'án kixin ó k'uíkon sín tí kjuaxroan kjuasin ch'án.

²⁴ Kjánchó ch'ín Jesús la kuítekakuenhya ch'án tí jehe sín kixin jehe ch'án la ó nohe ch'án jina nkexrí tónhen asén jnkojnko chojni

²⁵ a ntá t'ichjánxienhya ch'án kixin ninkexró chróchenka ch'án nkexrí tjenkayáxin chojni kixin ó kónohe ch'án kaín nkehe tónhen asén kaín xín chojni.

* 2:17 Salmo 69.9

3

Ch'ín Nicodemo kuinixjehe ch'án tí ch'ín Jesús

¹ Kjuák'e ijnko ch'án kuènte tí sín fariseo a mé it'in ch'án Nicodemo. Jehé ch'án mé ijnko nkexro imá tjetoan kuènte tí sín Israel.

² A ntá ijnko tie kjuíchréhe ch'án tí ch'ín Jesús a nixjehe ch'án ntáchro ch'án kixin:

—Maestro, kónoheni kixin It'éni tjen nkaya nkajní mé tsíchr'án k'uinka tsjákohéni kixin tí jehya Dios chrókjuak'ekoa la xitjahya chrókjuásian kjuaxroan jíé —ichro ch'án.

³ Ntá kjuátehe ch'ín Jesús ntáchro ch'án kixin:

—A ntá tsotjonka ijnko nkehe imá tjetoan. Tí nkexro tsokjéhya nixien mé xitjahya ts'ikon tí kjuachaxin ts'etoan Dios —ichro ch'án.

⁴ A ntá ch'ín Nicodemo kjuanchankí ch'án ntáchro ch'án kixin:

—Ó tádana, ¿nkexrí chrókókjína nixien? ¿Á chrók'uixanhan tsee naná inaá ntá chrókókjína nixien ní? —ichro ch'án.

⁵ Ntá kjuátehe ch'ín Jesús ntáchro kixin:

—Ntá tsotjonka ijnko nkehe imá tjetoan. Jehó tí sín tsíkokjéxín ntá la ko kjaxin tsíkokjéxín Nchakuen Dios mé ts'áyéhe sín tí kjuachaxin kuènte Dios.

⁶ Tió ijnko xjan ts'axrjenixin chojni na mé tí xjan mé chojni ó. A ntá tí Nchakuen Dios tsokjéxín nixien ijnko chojni na ntá ts'áyéhe sín tí Nchakuen Dios a.

⁷ Chrakonhya tí nkehe xrjanka kixin “Kaín chojni t'ichjánxin tsokjíhi nixien.”

⁸ Éxí yóhe tí tinhín tí chjéhe xrinto ntá noahya nketí kuixin tí xrinto la ko noahya nketí sátsji na mé kjaxin xikaha kónhen kaín tí nkexro tsíkokjéxín Nchakuen Dios —ichro ch'án.

⁹ Ntá xíkjanchankí ch'ín Nicodemo inaá kixin:

—¿Nkekuènté kixin xikaha chrókónhen? —ichro ch'án.

¹⁰ Ntá kjuátehe ch'ín Jesús ntáchro ch'án kixin:

—¿Jaha ijnko maestro imá t'etoan tí nación Israel ntá naxa tiénxinha tí nkehe ní?

¹¹ Chaxín tjétjonka tí nkehe nòna la ko tí nkehe k'uíkuan ntá títekákonahya jaha.

¹² Tí nkehe tjétjonka la kuènte chjasintajni ó ntá kjónté la títekákonahya jaha. ¿Ntá nkexrí chrókuítekáván tí chrótjonka nkehe kuènte nkaya nkajní?

¹³ Kohya í jnko nkexro k'uit'ótjen chjasin nkaya nkajní. Jehó tí Xjeen Dios K'óna Chojni mé kjuák'e chjasin nkaya nkajní la ko ntiha kuixin ch'án.

¹⁴ Éxí yóhe ch'ín Moisés tió k'uixin sín tí nteje, a ntá Dios mé k'ueoan kixin sinchekjanoya ch'án ijnko konche tsjak'enkani ch'án ijnko nta, ntá xikaha kjuích'e ch'án kjuak'enkani ch'án tí konche tí nta a komá sín tí konche ntá kuaá sín k'uénhya sín, * mé xikaha tsonhen tí Xjeen Dios K'óna Chojni mé t'ichjánxin kixin tsjak'enkani ch'án ijnko ntacruz

¹⁵ kixin mé xikaha kaín nkexro tsinkáchónki tí jehé ch'án mé tsaá sín tsochóna sín kjuachón jnkochríxín.

Dios imá tjuèhe ch'án tí chojni chjasintajni

¹⁶ 'Kixin Dios mé imá tjuèhe ch'án chojni chjasintajni ntá kjuanjon ch'án jnkoqóaxón Xjeen ch'án, kixin ntá jnkojnko chojni tsinkáchónki tí Xjeen ch'án mé ts'itjáyanhya sín tsochóna sín kjuachón jnkochríxín.

* 3:14 Números 21.9

17 Chr'ánhya Dios tí Xjeen ch'án chjasintajni kixin sinchekjasóte chojni kixin tí jie kjuasin sín. Náhí. Ó jehí ichr'án ch'án tí Xjeen ch'án chjasintajni kixin sinchekaá chojni.

18 'Na mé tí sín tsitekaon tí Xjeen Dios la tsjasótehya sín. A ntá tí sín titekakuenhya sín na mé ó kjuixin kjuínchekitoexín Dios tí ijíe sín tsjasóte sín kixin titekakuenhya sín tí jnkokoáxón Xjeen Dios.

19 Na mé xikaha Dios sinchekjasóte sín jnkochrín kixin ó kui tí nkexro t'inkaséyanxín chjasintajni na kjónté ntá antsí má tóxrjínhin sín tí sítié a. A ntá tí t'inkaséyan la náhí kixin naxa tóxrjínhin sín tí nkehe jínahya tjejóch'e sín.

20 Kaín tí sín tjejóch'e nkehe jínahya na mé tóxrjénhya sín t'inkaséyan chrókóchjinehya sín kixin tsonoxínhya tí nkehe jínahya tjejóch'e sín.

21 A ntá tí sín tjejóch'e sín tí jína a na mé chéhe sín tóchjinehe sín tí t'inkaséyan kuènte Dios kixin tsonoxín tí nkehe ch'e sín kixin ntá kaín xín chojni mé tsjatsqan sín kixin tjejóch'e sín tí nkehe tóxrjínhin Dios.

Ch'ín Juan Bautista chrónka inaá kuènte ch'ín Jesús

22 Na ntá chr'éxin ch'ín Jesús la ko tí sín k'uájiko ch'án na sákjuí sín estado Judea. Ntaha k'uéjoko sín ch'án kuíkite ch'án chojni.

23 Kjaxin ch'ín Juan kjuák'e ch'án chjasin Enón chjino tí chjasin Salim na mé ntiha kjuák'e kuíkite ch'án chojni kixin ntiha mé yeé ntá síín. Na ntá nkáki sín kuíkite sín.

24 Mé xikaha kónhen naxa kjuák'echjinahya ch'ín Juan.

25 Ntá tí sín k'uájiko ch'ín Juan la ko tí sín judío mé kjuachaxin kichó sín kixin nkexrí íchá jína chrókótjuáxin chojni, ichro sín.

26 A ntá tí sín k'uájiko ch'ín Juan sákjuítsjehe sín ch'án chénka sín ch'án kixin: —Maestro, tí ch'ín kjuák'ekoa tóhe ntario Jordán, na mé tí nkexro tsíchronka kuènte ch'án, la mé itjen ch'án tikite ch'án chojni la ko kaín xín chojni mé tjichréhe sín ch'án —ichro sín.

27 Na ntá ntáchro ch'ín Juan kixin:

—Tí chrókjuanjonhya Dios kjuachaxin ntá chrokjuahya chrók'uáyéhe chojni.

28 Ó kuínhínrá ntoá k'uéxrjanka senó kixin janhya tí Cristo. Náhí. Janhan ó kuítuannuá kuítónxián ntia tsóxrjanka kixin ó tsi ch'án.

29 Éxí yóhe ijnko ch'ín tsotehe na mé jehe ch'án mé ts'áyéhe ch'án tí ichjién ch'án. A ntá tí ch'ín chóxin ch'án mé chéhe asén ch'án tjetinhin ch'án tjenixja tí ch'ín ts'áyéhe ichjién a. Mé xikaha janhan imá chàna kixin xikaha sítónhen kixin itsjé chojni sítóchjinehe sín tí ch'ín Jesús tsinhin sín nkehe tí tjenixja ch'án.

30 A ntá jehe ch'án t'ichjánxin antsí ts'etqan ch'án. A ntá janhan la kénhyó —mé chro ch'ín Juan.

Tí nkexro kuixin nkaya nkajní

31 Tí nkexro kuixin nkaya nkajní mé kaín nkehe t'etuenhen ch'án. A ntá ijnko chojni kuènte chjasintajni ó mé chrónka kuènte chjasintajni ó. A ntá tí nkexro kuixin nkaya nkajní mé kaín nkehe t'etuenhen ch'án.

32 Jehe ch'án mé chrónka ch'án tí nkehe tsík'ikon ch'án la ko tí nkehe tsíkinhin ch'án. Kjánchó kohya chojni titekaon sín tí nkehe chrónka ch'án.

33 A ntá jnkójín nkexro titekaon sín tí nkehe chrónka ch'án na mé xikaha tjakoxin ch'án jie kixin chaxín ntoá chrónka Dios

34 kixin tí nkexro ichr'án Dios mé nixja itén Dios kixin jehya intsíkoá tí Nchakuen Dios k'uáyéhe ch'án. Náhí.

35 It'eni Dios mé tjuèhe ch'án tí Xjeen ch'án na mé xikaha ó tsíchjéhe ch'án kjuachaxin kixin kaín xín nkehe ts'etuenhen ch'án.

³⁶ A ntá tí nkexro tsitekaon tí Xjeen Dios mé xikaha tsochónta sín tí kjuachón jnkochrín. A ntá tí sín titekakuenhya sín tí Xjeen Dios mé tsochóntahya sín tí kjuachón jnkochrín xikaha. Tí sín a mé Dios sinchekjasóte sín jnkochrín.

4

Ch'ín Jesús ikjo ch'án ijnko tjan samaritana

¹ A ntá tí sín fariseo mé kónohe sín kixin antsí tsjé chojni chréhe sín tí ch'ín Jesús kuikite ch'án sín na ntá tí chojni chréhe sín tí ch'ín Juan la kánhyó tsjé sín.

² Kjánchó jehya ch'ín Jesús kuikite ch'án chojni. Méxra tí sín k'uájiko ch'án mé kuikite sín chojni.

³ A ntá tió kónohe ch'ín Jesús kixin xikaha tsíkinhin tí sín fariseo ntá k'uaxrjexín ch'án tí estado Judea xíkjan ch'án estado Galilea ínaá.

⁴ Ntá t'ichjánxin ts'átsínka ch'án estado Samaria.

⁵ A ntá kjuíji ch'án ijnko chjasin mé it'in Sicar kuènte estado Samaria, mé chjino tí nonte tsíkjinchekitonhen ch'ín Jacob tí xjeen ch'án José.

⁶ La ó chjino tjen tí tòye takitsje chojni ìnta mé it'in Ìnté Jacob. Na ntá ó chonkixin kjui sín ntiha. Méxra tí ch'ín Jesús la imá kóxrjé ch'án kixin imá kjín tí ntja kjuixín ch'án ntá kjuák'etjxin ch'án chrínta tí tòye takitsje sín ìnta.

⁷⁻⁸ Ntahó kuítóhe ch'án. A ntá tí sín k'uájiko ch'án sákjuí sín tí chjasin chjinaxón sákjuík'ena sín nkehe sineko sín ch'án. Ntá séhyó ikui ijnko tjan kuènte estado Samaria ikui tjan tsakitsje tjan ìnta. Ntá ntáchro tí ch'ín Jesús kixin:

—Chjina intsí ntá its'ia —ichro ch'án.

⁹ A ntá tí tjan samaritana mé kjuanchankíhi tjan tí ch'ín Jesús kixin:

—¿Nkekuènté kixin jaha ijnko chojni judío mé chrókjuanchana ntá kixin janhan ijnko chojni samaritana? —mé chro tí tjan a.

(Mé xikaha kjuanchankí tjan kixin tí sín judío mé ninkehó t'ikonhya tí sín samaritano.)

¹⁰ Na ntá ntáchro ch'ín Jesús kixin:

—Chrókónoha tí nkehe tjanjon Dios la ko chrókjuatsoan jaha nkexro tí tjetjanchaha ntá ntá chrókjuanchana ntá, ntá chrótjaha tí ntá tjechón chaxín —ichro ch'ín Jesús.

¹¹ Na ntá ntáchro tí tjan a kixin:

—¿Ntá nkexrí kixin xraahya jaha ninkehó nkehe tsakítsjeyá ntá kixin tí tòye i la imá ninka? ¿Ntá nkexrí tsochjina tí ntá tjechón tjimé?

¹² Tí nkexro k'uaxrjeníxinni mé Jacob mé kuítóeheni tí tòye tjiá ntá ntihi la ko kjaxin ik'uí ch'án tí ntá la ko kjaxin ik'uí tí xjeen ch'án la ko tí iko kuènte ch'án. ¿A ntá xá jaha la xá antsí má tjetjoan jaha, a ntá jehe ch'án la kénhyó ní? —mé kjuanchankíhi tjan tí ch'ín Jesús.

¹³ Na ntá kjuátehe ch'ín Jesús ntáchro ch'án kixin:

—Tí sín it'i sín tí ntá ntihi tí tòye i nántaxón its'en sín ntá ínaá.

¹⁴ A ntá tí sín its'i sín tí ntá sintakitonhan sín mé í ts'enhya sín ntá ínaá. Tí ntá sintakitonhan sín mé ts'óna éxi yóhe ijnko ntá ts'axrje nkaya asén sín mé tsinkákjanjon tí kjuachón tsochónta sín jnkochrín —ichro ch'án.

¹⁵ Ntá ntáchro tí tjan a ínaá kixin:

—Chjina tí ntá, a ntá ts'énhya ntá ínaá la ko ts'inkahya ntihi tsakítsje ntá —ichro tjan.

¹⁶ Ntá k'uetoan ch'ín Jesús kixin:

—Sátjia tjík'iyehé xiá ntá ts'inkará ntihi ínaá —ichro ch'án.

¹⁷ Ntá ntáchro tjan kixin:

—Chontahya xìná —ichro tjan.

Ntá ntáchro ch'ín Jesús kixin:

—Chaxín ntáchrua kixin chontahya jaha xiá.

¹⁸ K'uéchonta jaha in'ó xiá, a ntá tí ch'ín chonta jie jehya xiá. Na mé chaxín tí nkehe ntáchrua kixin chontahya xiá chaxín —ichro ch'án.

¹⁹ Na ntá kuínhin tjan tíha ntá ntáchro tjan kixin:

—T'íkuan kixin jaha ijnko nkexro chrónka itén Dios.

²⁰ A ntá tí sín k'uaxrjeníxinni k'uúxin ósé mé k'uéxraxinkakonxín sín Dios tí jna ntihi. Kjánchó jahará chojni judío mé ntáchrorá kixin tí nínko jié chjasin Jerusalén kaín ni chróxraxinkakonxínni Dios —ichro tjan.

²¹ Ntá ch'ín Jesús ntáche ch'án tjan kixin:

—Títekáván kixin tjetsi tí hora a tsoxráxinkákonxínhyará It'eni Dios tí jna ntihi la ko tsoxráxinkákonxínhyará ch'án chjasin Jerusalén kjaxin.

²² Jahará chojni samaritano chonhyará tí nkexro xráxinkáonrá. Ntá kaín ni chojnini judío mé chóxinni tí nkexro xráxinkaonni. Méxra tí nkexro tsjakjlinhin chojni tí jie yámá sín mé ts'axrjeníxin tí sín judío.

²³ Ntá tjetsi tí hora a na mé tí jie ó kui tí hora a na tí sín chaxín tjinkaon sín chróxraxinkaon sín It'eni la mé asén sín ó tsoxraxinkakonxín sín It'eni Dios. Dios mé tóxrjínhin ch'án kixin chojni xikaha chrókjuich'e sín chróxraxinkakonxín sín ch'án.

²⁴ Jehé Dios na mé nchakuen ó, a ntá tí sín chróxraxinkaon sín ch'án na mé t'ichjánxin kixin asén sín ó tsoxraxinkakonxín sín ch'án —mé xikaha chrónka ch'ín Jesús.

²⁵ A ntá ntáchro tí tjan a kixin:

—Ó nòna kixin itsi tí nkexro Mesías, tí nkexro a mé Cristo. Tió tsi ch'án ntá tsjakoheni ch'án kaín xín nkehe —ichro tjan.

²⁶ Ntá ntáchro ch'ín Jesús kixin:

—Tí nkexro a la mé janhan tjétjuá jie —ichro ch'án.

²⁷ Na ntá tí sín k'uájiko ch'án mé kjanxin sín tí chjasin a, ntá chrakon sín k'uúkon sín kixin tjenixjehe ch'án ijnko chojni chjin. Kjánchó nijnko sín kjuanchankíehya sín ch'án kixin nkehe tjinkaon ch'án na nkekuèté nixjehe ch'án tí tjan a.

²⁸ A ntá tí tjan mé kjuak'e tjan tí tóa nonte ntá sákjuí tjan tí chjasin ntaha ntáche tjan tí sín ntaha kixin:

²⁹ —Íntará sátsjtsjeheni ijnko ch'ín chrónka ch'án kaín xín nkehe kujit'a tí senó a. ¿Xá chrókójehya tí nkexro i Cristo? —ichro tjan.

³⁰ Na ntá tí chojni a mé xrákuaxin sín tí chjasin a ntá kuitsjehe sín tí ch'ín Jesús.

³¹ Naxa tihya sín nachrohe tí sín k'uájiko ch'án mé chrónóehé sín ch'án ntáchro sín kixin:

—Maestro, kjaxian chrókjónte nkehe —ichro sín.

³² Kjánchó ntáchro ch'án kixin:

—Ó chonta janhan nkehe siné. Jahará la kjá naxa noahyará —ichro ch'án.

³³ A ntá tí sín k'uájiko ch'án mé kjuanchankíhi sín kichó sín kixin:

—¿Xá jnkójín sín tsíkikao sín nkehe kjóne ch'án? —ichro sín.

³⁴ Kjánchó ntáchro ch'ín Jesús kixin:

—Éxí yóhe chrókjoné nkehe mé tí sit'a tí xra la ko tsjixinna tí xra kuènte tí nkexro chr'ánna k'uinka.

³⁵ Ntáchrorá kixin: “Noó nitjó naxa t'itjáyan tsochónhenni ntá tsotjáni noa-trigo”, ichrorá. Kjánchó ntáxrjan kixin chrótsjehérá tí no a kixin ó tsícha la ko ó tinkáxámá kixin ó jína chrótjáni.

³⁶ Tí sín ch'e xra tjá sín mé tsoxenkehe sín. A ntá tí nkehe tjá sín mé ts'áyéhe kjuachón jnkochríxín. Ntá tí sín k'u'enka sín nonte la ko tí sín tjá sín jnkokón tsochéhe sín.

³⁷ Mé xikaha tsoxiteyá tí nkehe ntá chro sín kixin: “Ijnko nkexro mé t'enka noa, a ntá ókjé sín tsotjá sín tí noa a”, ichro sín.

³⁸ A ntá janhan ichr'an tí jahará tsotjará ijnko nonte tsík'énkahyará. Na mé ókjé sín kjuích'e sín xra ntá jahará tsjachará tí xra kjuích'e tí sín a —ichro ch'án.

³⁹ A ntá itsjé tí sín samaritano kuènte tí chjasin ntiha mé kjuankíxin kuinkáchónki sín tí jehe ch'án kixin xikaha chrónka tjan kixin jehe ch'án ó chrónka ch'án kaín xín nkehe kjuích'e tjan tí senó a.

⁴⁰ A ntá tió kuínhin sín tí nkehe chrónka tjan ntá kui sín tí tjen ch'ín Jesús ntá chrónóehé sín ch'án kixin tsitohé ch'án ntiha. Ntá kuítóhe ch'án ntiha iyó yaon.

⁴¹ Ntá itsjé sín kjaxin kuinkáchónki sín ch'án kixin tí nkehe kuínhin sín nixja ch'án.

⁴² Ntá ntáche sín tí tjan a kixin:

—Ntá jie jehya jehó tí nkehe chrónka kuítekaonni. Náhí. Tí jie ó kuínhinni nixja ch'án ntá kónoheni kixin jehe ch'án chaxín tí nkexro Cristo sinchekaá tí chojni chjasintajni —ichro sín.

Ch'ín Jesús kjuínchekitohé jína ijnko xjeen ijnko ch'ín ch'ehe xra gobierno

⁴³ A ntá k'uátsínka iyó yaon ntá ch'ín Jesús k'uaxrjexín ch'án estado Samaria ntá sákjuí ch'án nó estado Galilea.

⁴⁴ A ntá jehe ch'án tsintá chro ch'án kixin tí nkexro chrónka itén Dios la tí chjasén sín mé tjikosáyehya sín ch'án.

⁴⁵ Kjánchó tió kjuíji ch'án tí estado Galilea na mé k'uáyéhe sín ch'án la ko kjuikosáyehé sín ch'án jína kixin kjaxin sín sátsíkji sín tí kia pascua chjasin Jerusalén tsík'ikon sín kaín tí kjuaxroan kjuasixín ch'án tí kia ntiha.

⁴⁶ Ntá xíkjan ch'ín Jesús inaá chjasin Caná, estado Galilea, na mé ntiha tsíkjinchekjaminca ch'án tí ntá tí xranvino a. Ntaha mé kjuák'e ijnko ch'ín ch'ehe xra gobierno. A ntá níhi tí xjeen ch'án ntoa itjen chjasin Capernaum.

⁴⁷ Ntá kuínhin tí ch'ín ch'ehe xra gobierno kixin itjen ch'ín Jesús tí estado Galilea tsíkixín ch'án estado Judea ntá sákjuíchréhe ch'án chrónóehé ch'án tí ch'ín Jesús kixin sáchrókjui ch'ín Jesús ntóe ch'án sinchekitohé jína tí xjeen ch'án ó tjet'en xjan.

⁴⁸ Ntá ntá chro ch'ín Jesús kixin:

—Kja tí jahará tí chrók'uikonhyará kjuaxroan chrókjuásian la chrókuinkachónkihyará tí janhan —ichro ch'án.

⁴⁹ Ntá chrónòe tí ch'ín ch'ehe xra gobierno ntá chro ch'án kixin:

—¿Á chrókójínahya sáchrókjui ntona jaí kixin xjanna ó tjet'en? —ichro tí ch'ín a.

⁵⁰ Ntá kjuátehe ch'ín Jesús ntá chro ch'án kixin:

—Ikjan sá tjia ntóe kixin tí xjaan na ó jína tjen jie —ichro ch'án.

Ntá kuítekaon ch'án nkerí ichro ch'ín Jesús ntá sákjuí ch'án.

⁵¹ A ntá kjuíji ch'án chjino ntóe ch'án ntá xrínahya tí sín ch'ehe sín ch'án xra kjuíxinhin sín ntja chrónka sín kixin:

—Xjaan la ó jína tjen —ichro sín.

⁵² Ntá kjuanchankíhi ch'án sín kixin nkehora kjuankíxin kuítóhe xjan jína, na ntá chrónka sín kixin:

—Ijna la una kónjín mé kjuín tí sóa —ichro sín.

⁵³ Ntá kónohe tí it'é xjan kixin xikaha tí hora tsintáchro ch'ín Jesús kixin tí xjeen ch'án na ó jína tjen. A ntá jehe ch'án la ko kaín tí sín siín ntøe ch'án mé kuinkáchónki sín tí ch'ín Jesús.

⁵⁴ Tíha mé tí yóxin kjuaxroan kjuasin ch'ín Jesús tió kuixin ch'án estado Judea ikjan ch'án estado Galilea.

5

Ch'ín Jesús kjuínchekitohe jína ijnko ch'ín tsík'en tote chjasin Betesda

¹ Ntá chr'éxin tí sín judío mé kjuasin sín ijnko kia na ntá ch'ín Jesús xikjan ch'án chjasin Jerusalén inaá.

² A ntá ntaha chjino tí ntója t'ixenxín kolélo chjasin mé tjen ijnko pila tóxroyéya ntá mé nkiva hebreo tí ntá mé it'in Betesda. A ntá chrínta tí pila siín in'ó cuarto ntsintí.

³ Ntaha tjejótsínka nchónhya chojni níhi, iso sín t'ikonhya la ko iso sín xitjahya tji la ko iso sín tsík'en toté. Tjejóchónhen sín kixin nkehora tsinkí ntá

⁴ kixin nántaxón k'uínkajin ijnko ángel kjuiánkí ntá kjuínchekinkí ntá. A ntá tí nkexro senó tsjiánkí ntá mé tsitøhe jína kjónté cualquiera chin chóna.

⁵ A ntá ntaha kjuák'e ijnko ch'ín na mé chóna ch'án treinta y ocho nánó níhi ch'án.

⁶ A ntá tió k'uíkon ch'ín Jesús kixin tjetsínka tí ch'ín a la ko kónohe ch'án kixin ósé níhi ch'án, ntá kjuanchankí ch'án kixin:

—¿Á tjinkávan tsitøha jína? —ichro ch'án.

⁷ Ntá ntáchro tí sinníhi kixin:

—Chóntahyani ninkexró tsjinkitsani tsjiánkíni ntá. A ntá tí tjinkaonni chrókjuiánkíni ntá la ntá ókjé nkexro tjítaón ntia tjiánkí ntá senó —mé chro tí sinníhi.

⁸ A ntá k'uetøan ch'ín Jesús kixin:

—Ijie la t'inkatjen, tjatsíyan kaniáa, itjia —ichro ch'án.

⁹ Ntá tuénxín kuítóhe ch'án jína, ntá kjuatsen ch'án kaniëe ch'án kjuankíxin itji ch'án. Kjánchó yaon sábadó tíha mé tí yaon t'ok'éhe sín.

¹⁰ Mé xikaha tí sín judío ntáche sín tí ch'ín kuítóhe jína kixin:

—Ijie tí yaon t'ok'éheni ntá kohya kjuachaxin tsamá kaniáa —ichro sín.

¹¹ A ntá ntáchro tí ch'ín a kixin:

—Tí nkexro kjuínchekitøna jína mé k'uetuanna kixin tsjatsíyan kaniána la ko sátsjia —ichro ch'án.

¹² Ntá kjuanchankíhi sín ch'án kixin:

—¿Nkexéhe tí nkexro k'uetuñhan kixin tsjatsíyan kaniáa la ko sátsjia? —ichro sín.

¹³ A ntá tí ch'ín tsíkitohe jína na í kjuátsoanhya ch'án tí nkexro kjuínchekitohe ch'án jína kixin ntaha la siín nchónhya chojni, a ntá ntahó k'uitjáyanxín ch'ín Jesús.

¹⁴ A ntá chr'éxin ch'ín Jesús xeta ch'án tí ch'ín a nkaxenhen tí njnko jié ntá ntáchro ch'án kixin:

—Tsjehé kixin ijie la ó jína tjen jaha la í tjásinhya jie inaá. A ntá tí tsjásian jie inaá a ntá antsí má jínahya tsonhan —ichro ch'án.

¹⁵ A ntá sákjuí tí ch'ín a ntá chénka ch'án tí sín judío kixin jehe ch'ín Jesús mé kjuínchekitohe ch'án jína.

¹⁶ Mé xikaha tí sín judío kjuankíxin sín chónkíhi sín tí ch'ín Jesús la ko chrók'óyán sín ch'án kixin kjuínchekitohe ch'án chojni jína tí yaon t'ok'éhe sín.

¹⁷ Kjánchó ch'ín Jesús ntáche ch'án tí jehe sín kixin:

—Méxra T'aná naxa tjech'e ch'án xra. A ntá janhan kjaxin tjét'a xra —ichro ch'án.

18 Méxra xikaha tí sín judío antsí tjinkaon sín chrók'óyán sín ch'án kixin kuitekakuenhya ch'án tí ley kuènte tí yaon t'ok'éhe sín la ko kjaxin ntáchro ch'án kixin tí It'é ch'án la mé Dios, mé xikaha ncheyóhe ch'án asén ch'án Dios.

Tí kjuachaxin chóna tí Xjeen Dios

19 Ntá ntáche ch'ín Jesús tí jehe sín kixin:

—Ijnko nkehe tjetoan tsotjonkará kixin tí Xjeen Dios nkaya nkajní tí jehó kjuachaxin kuènte ó la mé xitjahya sich'e xra. Jehó tí xra t'ikon ch'án tjech'e It'é ch'án mé kjaxin ch'án xikaha ch'e ch'án.

20 A ntá tí It'é mé tjuèhe tí Xjeen ch'án, la ko tjakohe ch'án kaín xín xra ch'e ch'án, la ko antsí tjetoan tí xra naxa tsjakohe ch'án kixin ntá tsochrakonrá kixin ts'ikonrá tí xra sich'e ch'án.

21 Tí It'é mé chóna kjuachaxin nchexechón tí sín tsík'en la ko chjéhe ch'án sín kjuachón. A ntá tí Xjeen kjaxin chóna kjuachaxin tsochjéhe kjuachón tí nkexro tjinkaon tsochjéhe ch'án.

22 A ntá It'é la í sinchekitoexínhya ch'án ijíé ninkexró. Kaín tí kjuachaxin kuènte ch'án chjéhe ch'án tí Xjeen kixin sinchekitoexín ch'án ijíé chojni chjasintajni

23 kixin ntá kaín chojni tsjikosáyehe sín tí Xjeen éxí yóhe tjikosáyehe sín tí It'é ch'án. Tí sín tjikosáyehya tí Xjeen xikaha kjaxin tjikosáyehya sín tí It'é kixin jehe ch'án mé tsíchr'án tí Xjeen.

24 'Ijnko nkehe tjetoan tsotjonkará kixin tí jnkojínra tjejotinhínra tí nkehe tjakua la ko tinkachónkirá tí T'aná, mé tí nkexro ichr'ánna, na mé xikaha ó chontará tí kjuachón la ko tsjasótiahyará, na mé kuítóhéra tí ntja chrók'uénxínra, la ntá jie kjuankíxinra tsochontará tí kjuachón jnkochrín.

25 Ijnko nkehe tjetoan tsotjonkará kixin ó tsi tí yaon, na mé jie tíha, mé xikaha tsonhen kixin tí sín tsík'en tsinhin sín tsonixja tí Xjeen Dios. A ntá tí sín tsitekaon sín na mé ts'ejóchón sín.

26 Tí It'é mé chóna ch'án kjuachaxin tsjanjon ch'án tí kjuachón la ko jehe ch'án mé chjéhe ch'án kjuachaxin tí Xjeen kixin kjaxin tí Xjeen tsjanjon tí kjuachón

27 la ko kjaxin chjéhe ch'án kjuachaxin tí Xjeen ch'án sinchekitoexín tí ijíé chojni chjasintajni kixin jehe mé tí Xjeen Dios K'óna Chojni.

28 Chrakonhyará tjétjonkará xikaha. Na mé ó tsi tí yaon kixin kaín tí sín tsík'en mé tsinhin sín tsonixja ch'án.

29 A ntá ts'axrjexín sín tí tòye la tí sín kjuích'e sín xra jína mé tsoxechón sín ntá tsochóna sín tí kjuachón. A ntá tí sín kjuích'e sín xra jínahya na mé kjaxin tsoxechón sín ntá sátsji sín tsjasóte sín.

Tí kjuachaxin chóna ch'ín Jesús

30 'Tí jehó kjuachaxin kuèntana xitjahya sít'a ninkehó xra. A ntá jie ntakitoaxián tí ijíé éxí k'uetuanna T'aná. A ntá tí nkehe ntakitoaxián la jína ntoá kixin tjínkakhonhya sít'a éxí tjínkavan. Náhi. Éxí tjinkaon T'aná, tí nkexro ichr'ánna, mé xikaha tjét'a.

31 A ntá tí chróxrjanka kixin nkexrí imá jína janhan la tíha la ninkehó kjuachaxin chróchóntahya.

32 Itjen í jnko nkexro tjechrónka nkexrí tjén janhan a ntá ó nóna kixin tí nkehe chrónka ch'án la sínkí.

33 Jahará tsíkétuénhénra chojni kjuíkjanchankíhi sín tí ch'ín Juan kixin nkexrínchi tjén janhan. A ntá tí nkehe tsíkjatéhe ch'án la chaxín ntoá tíha.

34 Kjánchó chontiaxínhya tí nkehe tsochrónka nijnko chojni chjasintajni nkexrínchi tjén janhan. Jehí ntáxrjan tíha kixin jahará jína chrókuaára.

³⁵ Tí ch'ín Juan kjuák'e éxí yóhe ijnko xrohi kjuák'eche k'uínkaséyanxín la ko jahará kócháhará xíkaha, kjánchó séhya kóxrjínhanrá tí xrohi a.

³⁶ Kjánchó siín nkehe antsí tjetóan tjakoxin nkexrí tjén janhan, a ntá kánhyó tjetóan tí nkehe tsíchrónka tí ch'ín Juan. Tí xra tjet'a, mé tí xra kjuanjon T'aná sít'a tsjixinna tí xra, na mé tíha mé tjakoxin kixin chaxín T'aná tsíchr'an k'uinka.

³⁷ Kjaxin jehe T'aná, tí nkexro ichr'ánna, mé chrónkaxín ch'án nkexrí tjén janhan. A ntá jahará naxa kiénhyará tí nkehe nixja ch'án la ko k'uíkonhyará ch'án

³⁸ la ko kjaxin itén ch'án kuitóehya nkaya kjará kixin tjinkákonhyará tsítékáonrá tí Xjeen Dios tsíchr'an tsíki.

³⁹ Jahará nchekuáxinrá jína tí xroon tsíkjin tí sín tsíchrónka itén Dios ósé kixin ntáchrórá kixin ntaha ts'itjaxínrá tí kjuachón tsochontará jnkochrín. A ntá tí nkehe tsíkjin sín ósé mé chrónka kuente janhan.

⁴⁰ Kjánchó jahará tjinkákonhyará tsochjinará tí tjén janhan kixin chrók'uayéhérá tí kjuachón a.

⁴¹ Janhan na tjéyáhya kixin chojni chrókjuikosáyana sín.

⁴² A ntá janhan ó nóna kixin jahará la tjuèhyará Dios.

⁴³ Mé k'uinkaxian janhan tí kjuachaxin kuente T'aná. Kjánchó jahará la títekáonnahyará. A ntá tí chrókui í jnko nkexro kjuachaxin chrókuakitsjenín asén ó, a ntá tíha mé tjinkáonrá chrókuítekákonhénrá.

⁴⁴ ¿Nkexrí chrókuítekáonrá jahará kixin tjéyará kixin tí chojni chjasintajni chrókjuikosáyahará sín, a ntá tjéyáhyará tí kjuachaxin chrókjuanjon jnkokoá Dios?

⁴⁵ Tsontáchróhyará kixin janhan tsjánchiá jie tí jahará nkayakon T'aná. Náhi. Ch'ín Moisés mé tsjanchia ch'án jie tí jahará kixin tsontáchrórá kixin jehe ch'án kuinkachónkirá.

⁴⁶ Kja tí jahará chrókuítekáonrá nkehe tsíntáchró ch'ín Moisés ntá chrókuítekáonrá tí janhan kixin tí xroon tsíkjin ch'án mé chrónka kuente tí janhan.

⁴⁷ A ntá tí títekákonhyará tí nkehe tsíkjin ch'án, ¿ntá nkexrí chrókuítekáonnará nkehe ntáxrjan janhan? —ichro ch'án.

6

Ch'ín Jesús kjuanjon ch'án nkehe kjóne in'ó mil chojni

(Mt. 14.13-21; Mr. 6.30-44; Lc. 9.10-17)

¹ A ntá chr'éxin ntá sákjuí ch'ín Jesús k'uátòye ch'án tí ntayaon Galilea na mé tí ntayaon Tiberias tíha.

² A ntá nchónhya chojni tinkáchréhe sín kixin k'uíkon sín tí kjuaxroan jie kjuasin ch'án kjuínchekitóhe ch'án jína tí sinníhi.

³ A ntá jehe tí ch'ín Jesús chrìn ch'án ijnko jna na ntá ntaha kjuák'etjaxin ch'án la koí tí sín k'uájiko ch'án a.

⁴ A ntá í séhya ts'ixin tí kia pascua a mé kié tí sín judío a.

⁵ A ntá tí ch'ín Jesús k'uíkon ch'án kixin nchónhya chojni chrìn sín kjuichréhe sín ch'án ntá kjuanchankíhi ch'án tí ch'ín Felipe kixin:

—¿Nketí chrók'uénani nkehe sine kaín tí chojni a? —ichro ch'án.

⁶ Mé xíkaha ntáchró ch'án kixin siná nkehe tsixro ch'ín Felipe. A ntá tí ch'ín Jesús la ó nohe ch'án nkehe tí kjuaxroan tsjasin ch'án.

⁷ Ntá kjuátehe ch'ín Felipe ntáchró ch'án kixin:

—Kjonté doscientos chichaon denario chróchóntani chrók'uínáxin tí niotja la naxa chrókjuachahya chrók'uáyéhe jnkojnko sín tot'o tí niotja a —ichro ch'án.

⁸ A ntá ch'ín Andrés, ijnko tí sín k'uájiko ch'ín Jesús la savé mé ch'ín Simón Pedro mé ntáchro ch'án kixin:

⁹ —Ntihi tjen ijnko xjan ntoá chóna in'ó niotja tsík'óna noa cebada la ko chóna ch'án yaá koche. ¿Xá chrókjuacha tíhó kixin nchónhya chojni siín? —ichro ch'án.

¹⁰ A ntá ntáchro ch'ín Jesús kixin:

—Tétuénhén tí sín siín a kixin ts'ixitjaxin sín —ichro ch'án.

A ntá nchónhya ika yoa siín na ntá ntaha k'uixitjaxin sín na mé éxi in'ó mil chojni k'uixin sín.

¹¹ A ntá ch'ín Jesús kuákja ch'án tí niotja ntá kjuanchehe ch'án Dios kjuasáya ntá chjéhe ch'án tí sín k'uájiko ch'án. A ntá jehe sín k'ókikayehé sín chjéhe sín kaín tí sín sítjaxin a. Xikaha kjaxin k'ókikayehé sín tí koche. A ntá kaín sín kjóne sín éxi tjinkaon sín.

¹² Kjuixin kjóne sín ntá k'uetuénhen ch'ín Jesús tí sín k'uájiko ch'án ntáchro ch'án kixin:

—Tjénájínra tí nkehe tot'ó síxèhe sín kixin ts'itjáyanhya ninkehó —ichro ch'án.

¹³ Ntá xikaha jehe sín kjuenájín sín kjuínchekaón sín teyó ntaxra tí tot'ó tí in'ó niotja tsík'óna noa cebada síxèhe sín tí kjuixin tsíkine sín.

¹⁴ A ntá tí sín kjóne tí niotja k'uíkon sín tí kjuaxroan jié kjuasin ch'ín Jesús ntáchro sín kixin:

—Jehe ch'án mé chaxín tí nkexro tsíchr'án Dios kixin itsi tí chjasintajni tsjakoheni ch'án —ichro sín.

¹⁵ Kjánchó ch'ín Jesús mé kónohe ch'án kixin tjinkaon sín sáchrókjuiko sín ch'án chróchr'áxenhén sín ch'án tí xra rey kixin chrók'uetóan ch'án. A ntá jehe ch'án tjinkakonhya ch'án tíha ntá jehó ch'án sáxíkji ch'án nteje inaá kjuák'e ch'án ntiha.

*Éxi ijnko ntia xikaha kjuítaón ch'ín Jesús tí ntayaon
(Mt. 14.22-27; Mr. 6.45-52)*

¹⁶ A ntá ó kóntó ntá tí sín k'uájiko ch'ín Jesús k'uínkajinxin sín jna sákjuí sín chrínta ntayaon

¹⁷ k'uit'ótjen sín ijnko ntabarco kjuankixin sín ts'atòye sín ntayaon sátsji sín chjasin Capernaum. Na ó k'uixin tie na naxa kjanhya ch'ín Jesús.

¹⁸ Ntá kjuankixin chjéhe xrinto tsanka ntá kjuankixin tinkákjaminkí nta.

¹⁹ A ntá tió kjuacha sín á in'ó o injon kilómetro ntá xrínahya k'uíkon sín tí ch'ín Jesús tinkákóchjinehe ch'án tí ntabarco, éxi ijnko ntia tjetjitaón ch'án tí nta, ntá k'uíkon sín ntá imá chrakon sín.

²⁰ Kjánchó ntáchro ch'án kixin:

—Janhan tíha. Chrakonhyará —ichro ch'án.

²¹ Ntá imá chéhe sín k'uit'ótjen ch'án tí ntabarco. Ntá ó tuénxín kjuíji sín tí chjasin sátsji sín.

Tí chojni xritjeyá sín tí ch'ín Jesús

²² A ntá tí yaon chr'éxin na mé tí sín kuítóhe tóhe ntayaon na mé ó nohe sín kixin jnkokoáxon ntabarco k'uékjak'e ntiha la ko ó nohe sín kixin ch'ín Jesús kjá ni sátsíkjikohya sín ch'án na mé k'uíkon sín kixin jehó tí sín k'uájiko ch'án sátsíkji sín.

²³ Kjánchó siín ntabarco tijin chjasin Tiberias tinkákóchjinehe tí nó kjónexin sín tí niotja kjuanchaxín ch'ín Jesús kjuasáyé Dios.

²⁴ A ntá tió k'uíkon sín kixin kohya ch'ín Jesús la ko kjaxin kohya tí sín k'uájiko ch'án, ntá jehe sín mé k'uit'ótjen sín iso ntabarco ntá sákjuí sín chjasin Capernaum sákjuíkjeyá sín tí ch'ín Jesús.

Ìnchéni Jesús mé éxí niotja tjanjon kjuachón

²⁵ A ntá tóhe ntayaon xéta sín tí ch'ín Jesús ntá kjuanchankíhi sín ch'án kixin:
—Maestro, ¿nkesá k'uinka ntihi? —ichro sín.

²⁶ Ntá kjuátehe ch'ín Jesús ntáchro ch'án kixin:

—Ó nòna kixin jahará tjéyará tí janhan kixin kjónterá niotja kókjahará, la jehya kixin kiéxinrá tí kjuaxroan kjuásian.

²⁷ Chrókjuich'ehyará tí xra chrók'uite tí nkehe chrókjónterá tjoka tsjeje ó. Náhi. Chrókjuéyará tí nkehe chrókjuejehya chrókjónterá chrók'uayéxinrá tí kjuachón jnkochrín. Tí nkehe tjanjon tí Xjeen Dios K'óna Chojni mé chrókjónterá kixin It'é ch'án mé tjáqoxin ch'án kixin tí Xjeen ch'án mé chóna kjuachaxién tí jehe ch'án —ichro ch'ín Jesús.

²⁸ A ntá kjuanchankíhi sín ch'án kixin:

—¿Nkexrí chrókjuich'eni chrokjuinchexiteyáni nkexrí tjinkaon Dios? —ichro sín.

²⁹ A ntá kjuátehe ch'ín Jesús ntáchro ch'án kixin:

—Dios mé tjinkaon ch'án kixin chrókuinkachónkirá tí nkexro tsíchr'án ch'án —ichro ch'án.

³⁰ Ntá kjuanchankíhi sín ch'án kixin:

—¿Nkehe tí kjuaxroan chrókjuákoéxianni chrók'uikonni kixin ntá chrókuitekaonni tí jaha? ¿Nkehe tí xra ch'e jaha?

³¹ Tí sín tsík'axrjeníxinni k'uéjó sín ósé mé kjóne sín maná k'óna niotja tió k'uixin sín nteje mé xikaha tí xroon kuénte Dios tsíkjin ijnko nkexro ósé ntáchro kixin: “Kjuanjon ch'án tí nkehe kjóne sín mé niotja tsíkixin nkaya nkajní”^{*} —ichro sín.

³² A ntá kjuátehe ch'ín Jesús ntáchro ch'án kixin:

—Ijnko nkehe tjetoan tjonkará kixin jehya ch'ín Moisés kjuanjon tí maná k'óna niotja k'uínkajinxin nkaya nkajní. Náhi. T'aná mé tjetjanjon tí niotja chaxín jna k'uínkajinxin nkaya nkajní.

³³ Tí niotja tjanjon Dios mé tí nkexro k'uínkajinxin nkaya nkajní tjejóchónxin chojni chjasintajni —ichro ch'án.

³⁴ Na ntá kjuanchia sín kixin:

—Jaha Ìnchéni, jnkochrín chjehéni tí niotja a —ichro sín.

³⁵ A ntá ntáchro ch'ín Jesús kixin:

—Janhan mé tí niotja tjanjon kjuachón. Tí sín tóchjina sín tí janhan í ts'enhya sín kjinta, la ko tí sín tsitekaon sín tí janhan í ts'enhya sín ntá.

³⁶ Kjánchó éxí k'uétjonkará senó na ó k'uíkonrá tí janhan na kjónté naxa títekákonhyará.

³⁷ A ntá kaín tí sín chjina T'aná la tsochjina sín tí janhan. A ntá kaín tí sín tjejótóchjinehe sín tí janhan la tsétuanhya sín kixin sátsji sín.

³⁸ Janhan k'uinkaxian nkaya nkajní jehya tí xra tóxrjina chrókjuít'a. Náhi. K'uinka kixin chrókjuít'a tí xra tóxrjinhin tí nkexro tsíchr'ánna.

³⁹ A ntá T'aná mé tí nkexro tsíchr'ánna mé tjinkaon ch'án kixin sintak'itjáyanhya ninkexró tí sín chjina ch'án na mé tjinkaon ch'án kixin janhan mé sintaxechón kaín sín tí yaon tsjixixín.

⁴⁰ Mé xikaha tjinkaon tí nkexro tsíchr'ánna kixin kaín tí sín ts'ikon sín tí janhan mé tí Xjeen Dios la ko tsitekaon sín tí janhan chrók'uáyéhe sín kjuachón jnkochrín. A ntá janhan sintaxechón sín tí yaon tsjixixín —ichro ch'án.

⁴¹ A ntá tí sín judío kjuankíxin sín kjonta sín tí ch'ín Jesús kixin tsíntáchro ch'án kixin jehe ch'án mé tí niotja k'uínkajinxin nkaya nkajní.

* 6:31 Salmo 78.24

42 Mé ntáchro sín kixin:

—¿Á Jehya tí Jesús, it'é mé it'ín José, na mé chóxinni tí it'é la ko tí ìné ch'án? ¿Ntá nkekuènté ntáchro ch'án kixin nkajní k'uínkajinxin ch'án? —ichro sín.

43 Ntá kjuátehe ch'ín Jesús ntáchro ch'án kixin:

—Tìtoherá tjontahyará tí janhan.

44 Kohya nkexro chrókóchjina tí tjén janhan tí chrókjuínkítsahya T'aná. A ntá tí sín tóchjina na mé sintaxechón sín tí yaon tsjixixín.

45 Na mé tí sín k'uéchrónka itén Dios ósé mé tsíkjin sín xroon ntáchro kixin: “Dios mé tsjakohe ch'án kaín chojni.”† A ntá kaín tí sín tsíkinhin tí nixja T'aná la ko kjuakohe ch'án sín mé sítóchjina sín tí tjén janhan.

46 Jehya kixin itjen ijnko chojni tsík'ikon T'aná. Náhí. Jehó tí nkexro kujxin tí tjen Dios mé tsík'ikon ch'án Dios.

47 Chaxín tí nkehe tjéxrjanka kixin tí sín titekaon sín tí janhan mé ó tsochónta sín kjuachón jnkochrixin.

48 Janhan na mé tí niotja tjanjon kjuachón.

49 Tí sín k'uaxrjenixinrá k'uéjó ósé kjóne sín tí maná k'óna niotja tió k'uéjó sín nteje, a ntá kjónté ik'uén sín k'uítjayan sín.

50 Tí nkehe xrjanka mé tí niotja k'uínkajinxin nkaya nkajní, a ntá tí sín sine tí niotja a mé ts'enhya sín.

51 Janhan mé tí niotja tjechón k'uínkajinxin nkaya nkajní. A ntá tí sín sine tí niotja a mé ts'ejóchón sín jnkochrixin. Tí niotja tsjánjuan ts'ejóchónxin chojni chjasintajni mé ntóna tíha —ichro ch'ín Jesús.

52 A ntá tí sín judío mé sítjité sín itjo sín kichó sín ntáchro sín kixin:

—¿Nkexrí chrókjuanjon ch'án ntoe ch'án chrókjóneni? —ichro sín.

53 A ntá kjuátehe ch'ín Jesús ntáchro ch'án kixin:

—Ntá tsojtjonkará kixin tí sintehyará ntoe tí Xjeen Dios K'óna Chojni, la ko tí ts'ihyará ijnié ch'án, ntá tsochontahyará kjuachón jahará.

54 Tí sinterá ntóna la ko it'irá jnina ntá tsochontará kjuachón jnkochrixin la ko janhan mé sintaxechónrá tí yaon tsjixixín.

55 Kixin ntóna na mé chaxín nkehe ine chojni la ko jnina na mé chaxín nkehe it'i chojni.

56 Tí sín ine ntóna la ko it'i sín jnina mé jnkokoá tjenkayáxinkian sín la ko janhan mé xríkian sín.

57 T'aná tsíchr'án ch'án tí janhan mé chóna kjuachaxin, a ntá janhan mé tjechónxian tí jehe ch'án. Ntá tí sín sine tí ntóna mé ts'ejóchónxin sín tí janhan.

58 A ntá tjénixja kuènte tí niotja k'uínkajinxin nkaya nkajní na mé yóehya tí maná tsík'óna niotja kjóne tí sín tsík'axrjenixinrá ósé kixin jehe sín na kjóne sín na kjónté k'uén sín. A ntá tí sinterá tí niotja k'uínkajinxin nkaya nkajní ntá ts'ejochónrá jnkochrixin —mé chro ch'ín Jesús.

59 Kaín tíha mé kjuakohe ch'án tí sín tsíkójnkotséxin tí njnko Israel chjasin Capernaum.

Tí nkehe chrónka ch'ín Jesús mé tjanjon kjuachón jnkochrixin

60 A ntá tió kuínhin sín tí nkehe kjuako ch'ín Jesús ntá itsjé tí sín k'uájiko ch'án ntáchro sín kixin:

—Imá xra tí nkehe chrónka ch'án. ¿Xá nkexro chrókuinhin tíha? —ichro sín.

61 A ntá kónohe ch'ín Jesús kixin xíkaha tóxakonhen sín kíenxínhya sín tí nkehe tsíntáchro ch'án ntá kjuanchankíhi ch'án sín kixin:

—¿Á kjaxinrá tjinkákonhyará tsinhínrá tíhi?

62 ¿Ntá nkexrí tsonhen chrók'uikonrá kixin tí Xjeen Dios K'óna Chojni mé sátsji ch'án ínaa tí nó tsíkixin ch'án tí tsíkjak'e ch'án ósé?

† 6:45 Isaías 54.13

⁶³ Tí Nchakuen Dios mé tjanjon tí kjuachón, a ntá tí nto la ninkehó sínkíhya. Na ntá tí nkehe tjetjonkará na mé kuènte tí Nchakuen Dios na mé tjejóchónxin chojni.

⁶⁴ Kjánchó isorá naxa titekákonnahyará —ichro ch'án.

Mé xikaha ichro ch'án kixin tí xrankíxixín ó kónohe ch'án kixin nkexro tí sín tsitekakuenhya sín ch'án la ko kónohe ch'án kixin nkexro sinchekji ch'án.

⁶⁵ A ntá ntáchro ch'án kixin:

—Méxra xikaha k'uétjonkará kixin ninkexró tsochjina tí tjen janhan tí tsjinkitsahya T'aná —ichro ch'án.

⁶⁶ A ntá kjuixin tíha ntá nchónhya tí sín k'uék'ajiko ch'ín Jesús ntá xrinahya kuítóhe sín, í chrèhya sín ch'án.

⁶⁷ Ntá kjuanchankíhi ch'án tí teyó sín k'uájiko ch'án ntáchro ch'án kixin:

—¿Á kjaxinrá tjinkáonrá xikaha sáchrókjuirá? —ichro ch'án.

⁶⁸ Ntá kjuátehe ch'ín Simón Pedro kixin:

—Jaha Ìnchéni, ¿nkekuènté tjanchankíhíni á sáchrókjuini ókjé? Jaha tí tan chrónka a mé tsochóntaxínni kjuachón jnkochrín

⁶⁹ ntá kuítekaonni ntá ó noheni chaxín kixin jaha tí Cristo mé Xjeen Dios tjechón —ichro ch'án.

⁷⁰ Ntá kjuátehe ch'ín Jesús ntáchro ch'án kixin:

—Janhan kjuéyá tí kaín rá teyórá la ko jnkójnra ntihi mé ts'ónará ijnko jínahya —ichro ch'án.

⁷¹ Tíha mé t'axrjexín tí ntáchro ch'ín Jesús chrónka ch'án kixin ch'ín Judas Iscariote, tíha it'é mé it'in Simón, mé ijnko tí teyó sín tsíkjeýá ch'án ntá kjónté sinchekji ch'án tí ch'ín Jesús.

7

Tí sín jnkokoá kichó ch'ín Jesús mé kuítekakuenhya sín ch'án

¹ Ntá kjuixin tíha ntá k'uáji ch'ín Jesús tí estado Galilea. Chrók'uajihya ch'án tí estado Judea kixin tí sín judío tjinkaon sín chrók'óyán sín ch'án.

² Kjánchó ó kuichjina tí yaon kia ntá tí sín judío sich'éna sín itsjé its'van tsjasixín sín kia.*

³ A ntá tí sín kichó ch'ín Jesús ntáche sín ch'án kixin:

—Chrókuitohahya ntihi. Sáchrókjuia estado Judea kixin ntá kjaxin tí sín chréhe tí jaha tjejó ntiha chrók'uikon sín tí kjuaxroan tsjásian.

⁴ Kixin tió tjinkaon ijnko nkexro kixin chojni tsochóxin sín ch'án ntá móhya chrókjuich'e ch'án xra. A ntá tí chaxín tjetjásian kjuaxroan la jehya mó chrókjuásian kjuaxroan. Náhi. Chrók'uikon kaín xín chojni siín chjasintajni —mé chro sín.

⁵ Xikaha ntáchro tí sín kichó ch'án kixin kjaxin jehe sín titekakuenhya sín tí jehe ch'án.

⁶ A ntá kjuátehe ch'ín Jesús ntáchro ch'án kixin:

—Naxa kjuixrakáhya tí hora kuèntana tsjásian kjuaxroan. Ntá jahará la cualquier hora tjinkáonrá jina chrók'uikonrá kjuaxroan.

⁷ Tí sín chjasintajni xitjahya tsonínkakonhanrá sín tí jahará. Ntá janhan na imá nínkakonna sín kixin ntátjan sín kixin jehya jina tí nkehe tjejóch'e sín.

⁸ Jahará la sátjirá tí kia a. A ntá janhan la tjíhya kixin naxa kjuixrakáhya tí hora kuèntana —ichro ch'án.

⁹ Mé xikaha ntáchro ch'án ntá kuítóhe ch'án estado Galilea.

Itjen ch'ín Jesús tí kia a

* 7:2 Levítico 23.34

¹⁰ A ntá ó kjuixin sátsíkji tí sín jnkokoá kichó ch'ín Jesús ntá jehe ch'án la kjaxin sákjui ch'án tí kia a kjánchó noxínhya xritjak'e ch'án.

¹¹ A ntá tí sín judío mé xriteyá sín ch'án tí kia a la ntáchro sín kixin:

—¿Xá nketí tjen tí ch'ín a? —ichro sín.

¹² A ntá itsjé sín ntiha mé kjo sín kichó sín kixin nkexrí tjen ch'án. Iso sín ntáchro sín kixin: “Jína ch'án”; kjánchó í so sín ntáchro sín kixin: “Jehya chojni jína ch'án, méxra imá ch'iyeye ch'án chojni”, ichro sín.

¹³ Kjánchó noxínhya kjo sín xikaha kixin chrakonhen sín tí sín judío a.

¹⁴ A ntá ó kjuíji jnkosiné tí kia a ntá k'uixenhen ch'ín Jesús tí ninko jié ntá kjuankixin ch'án kjuako ch'án.

¹⁵ A ntá tí sín judío chrakon sín komá sín ch'án ntáchro sín kixin:

—¿Xá nkexrí nohe tí ch'ín i nchónhya tí nkehe kixin tsíxrakohya ch'án? —ichro sín.

¹⁶ Ntá kjuátehe ch'ín Jesús ntáchro ch'án kixin:

—Tí nkehe tjákua la jehya kuèntana na mé tí xra kuènte tí nkexro tsíchr'ánna k'uinka.

¹⁷ Tí jnkoinrá tjinkáonrá chrókjuinche xiteyéhérá éxí tóxrjinhin Dios la tsonohará á chaxín kuènte Dios tí nkehe tjákua o á kuèntana tíha.

¹⁸ A ntá tí nkexro tjako tí nkehe t'axrjenixin kja sín ó mé xikaha ch'e kixin tjinkaon sín kixin tí chojni ó mé chróchónthehe sín ch'án kjuasáya. A ntá tí nkexro tjinkaon kixin tí chojni a mé chrókjuikosáyehe sín tí nkexro tsíchr'án ch'án na mé jehe ch'án mé tjako ch'án tí nkehe chaxín ntoá la ko ninkehó ch'iyahya tí jehe ch'án.

¹⁹ '¿Á jehya ch'ín Moisés tjáhará tí itén Dios chrókuítekáonrá? Kjánchó nijnkorá kuítekáuenhyará tí nkehe tsíkjin ch'án. ¿Méxra nkekuènté tjinkáonrá chrók'oyánrá tí janhan? —ichro ch'án.

²⁰ Ntá kjuátehe tí sín a ntáchro sín kixin:

—Jaha chonta ijnko nchakuen tí jínahya. ¿Xá nkexro chrók'oyán tí jaha? —ichro sín.

²¹ Ntá kjuátehe ch'ín Jesús ntáchro ch'án kixin:

—Jnkokoá kjuaxroan kjuásian tí yaon t'ok'éheni ntá chrakonrá.†

²² A ntá ch'ín Moisés tsík'etoan kixin xjaanrá ntoá itsa xjan xroye, (kjánchó jehya ch'ín Moisés kjuankixin ch'án kjuako ch'án tíha, na mé tí sín tsík'axrjenixinrá kjuankixin sín kjuako sín tíha). Mé xikaha nchekará xjan tí xroye a kjónté yaon t'ok'éheni.

²³ A ntá xikaha nchekará xjan xroye tí yaon t'ok'éheni kixin xikaha chrókjuinche k'itjáyankíhyará ninkehó tí nkehe k'uetoan ch'ín Moisés, ¿ntá nkekuènté kixin ninkákonará tí janhan kixin kjuintakitoḥa jína ijnko chojni tí yaon t'ok'éheni?

²⁴ Chrókjuanchahyará jie kixin tí nkehe t'ikonxínrá ikonrá ó. Chrókjuenkayáxinrá tí nkehe jína tóxrjinhin Dios —mé chro ch'ín Jesús.

Ch'ín Jesús chrónka kixin nketí k'uaxrjenixin ch'án

²⁵ A ntá iso sín chjasin Jerusalén kjuankixin sín kjo sín kichó sín kjuanchankí sín kixin:

—¿Á jehya tí ch'ín a xritjeyá sín chrók'oyán sín?

²⁶ Ntá jie noxín tjen ch'án nixja ch'án kohya ninkexró nínkakohen ch'án. Kjá tí síxreé titekaon sín kixin tí nkexro a chaxín Cristo tíha.

²⁷ Kjánchó ó noheni nketí tsíkjin ch'án. A ntá tió tsi tí nkexro Cristo ntá ninkexró tsonohya nketí tsixin ch'án —ichro sín.

† 7:21 Juan 5.2-9

28 **A** ntá ch'ín Jesús kjuák'ekjako ch'án tí nínko jié ntá kuínhin ch'án kixin xikaha kjo sín, ntá itsen nixja ch'án ntáchro ch'án kixin:

—Chaxín choxinrá tí janhan la ko nohará nketí chjasin tsíkjixian. Kjánchó jehya kixin k'uinka sintaxiteyá tí nkehe ntáchro asenná ó. Ó k'uinka kixin ichr'ánna tí nkexro chaxín tjechón tjen nkaya nkajní. Jahará naxa chonhyará tí nkexro a.

29 Janhan la choxian ch'án kixin ntaha tsík'inkaxian na mé jehe ch'án mé tsíchr'ánna ch'án —ichro ch'ín Jesús.

30 Ntá chrótsé sín ch'án chrókjuak'echjina sín ch'án ntá kjónté ninkexró tséhya sín ch'án kixin naxa kjuanjonhya Dios kjuachaxin chrótsé sín ch'án.

31 Kjánchó itsjé chojni kuítekaon sín tí jehe ch'án. **A** ntá ntáchro sín kixin:

—**A** ntá tió chrókui tí Cristo la, ¿á má jié kjuaxroan chrókjuasin ch'án, a ntá tí ch'ín i la kénhyó ní? —ichro sín.

Tí sín fariseo ichr'án sín chojni policia tsotsé sín tí ch'ín Jesús tsjak'echjina sín ch'án

32 **A** ntá tí sín fariseo kuínhin sín nkehe tí ntáchro chojni kixin nkexrí tjen ch'ín Jesús, ntá jehe sín la ko tí sín nchat'á t'etoan k'uetuñhen sín iso sín policia kuènte nínko tsotsé sín ch'án tsjak'echjina sín ch'án.

33 **A** ntá ntáchro ch'ín Jesús kixin:

—Kjaxin í séhya tsjak'é ntihi ts'ejóni ntá sáxikjiya tí tjen tí nkexro ichr'ánna.

34 **A** ntá jahará tsjéyará tí janhan na ts'itjahyará kixin xitjahya tsjasánrá tí tsjak'é janhan —ichro ch'án.

35 **A** ntá tí sín judío kjuankixin sín kjuanchankíhi sín kichó sín kixin:

—¿Ntá nketí nó sátsji ch'án kixin tsjachahyani ts'itjani ch'án? ¿Xá sátsjichréhe ch'án tí sín judío tjejóyákjan tí sín nixja nkiva griego kixin ntá tsjakohé ch'án tí sín griego?

36 ¿Nkexrí t'axrjexín tí nkehe ntáchro ch'án kixin tsjeyáni ch'án na kjónté ts'itjahyani ch'án la tsjachahyani tsjichréhēni ch'án tí tsjak'e ch'án? —ichro sín.

Ntarío tjechón

37 **A** ntá tí yaon tsjixixín tí kia a mé tí yaon jié mé k'uínkatjen ch'ín Jesús, a ntá itsen nixja ch'án ntáchro ch'án kixin:

—Kja tí jnkojínra ik'uénra ntá xrákirá its'irá ntá.

38 **A** ntá éxí ntáchro xroon Itén Dios kixin tí sín titekaon sín tí janhan na mé nkaya asén sín ts'óna ijnko río ts'axrje ñntá tjechón —ichro ch'án.

39 Mé xikaha chrónkaxín ch'ín Jesús nkexrí tjen tí Nchakuen Dios ts'áyéhe tí sín tsitekaon sín tí jehe ch'án. Kjánchó naxa tihya tí Nchakuen Dios kixin ch'ín Jesús naxa sátsjihya ch'án nkaya nkajní.

Jnkokoáhya kjuenkayáxin tí chojni

40 **A** ntá iso sín tió kuínhin sín tí nkehe ntáchro ch'ín Jesús ntá ntáchro sín kixin: —Kja chaxín tí ch'ín i mé tí profeta ó tsíkji —ichro sín.

41 Ikjé sín ntáchro sín kixin:

—Jehe ch'án mé tí nkexro Cristo —ichro sín.

A ntá í so sín ntáchro sín kixin:

—¿Xá nkekuèté chrókjuixín Galilea tí nkexro Cristo?

42 Tí xroon tsíkjin sín ósé mé chrónka kixin tí nkexro Cristo mé ts'axrjeníxin tí sín k'uaxrjeníxin tí ch'ín rey David la ko tsjixín ch'án chjasin Belén mé tí chjasin k'uékjak'e ch'ín David —ichro sín.

43 Mé xikaha jnkokoáhya kjuenkayáxin sín kaín sín kixin nkexro tí ch'ín Jesús.

⁴⁴ Iso sín tjinkaon sín sáchrókjuiko sín ch'án chrókjuikjehe sín ch'án kjánchó ninkexró kjuích'ehya xíkaha.

Tí síxreé kuítekakonhya sín tí ch'ín Jesús

⁴⁵ A ntá tí sín policía kuènte nínko mé kjan sín tí tjejó tí sín fariseo la ko tí sín nchat'á t'etōan. Ntá tí sín a mé kjuanchankíhi sín tí sín policía kíxin:

—¿Nkekuènté kjuíkoahyará ch'án? —ichro sín.

⁴⁶ Ntá kjuátehe tí sín policía kíxin:

—Kohya ninkexró nixja éxí xíkaha nixja tí ch'ín a —ichro sín.

⁴⁷ Ntá ntáche tí sín fariseo tí sín policía kíxin:

—¿Á kjaxinrá kuítóhéra kjuít'ayahará ch'án?

⁴⁸ ¿Á kuítekaon tí jehe ch'án jnkojín tí sín t'etōan kuènténi o tí sín fariseo?

⁴⁹ A ntá tí sín a mé chónhya sín tí ley na mé tsjasóte sín —ichro sín.

⁵⁰ A ntá tí ch'ín Nicodemo, tí ch'ín kjuítsjehe tí ch'ín Jesús ijnko tie senó na mé jehe ch'án fariseo ch'án na ntá ntáche ch'án sín kíxin:

⁵¹ —Tí ley kuènténi la kohya kjuachaxin sinchekjasóteni ijnko chojni tí naxa kíenhyani nkehe nixja ch'án la ko kíenhyani tí jie kjuasin ch'án —ichro ch'án.

⁵² Ntá kjuátehe sín ntácho sín kíxin:

—¿Á kjaxian jaha kjuíxian estado Galilea ní? Nchekuáxian tí xroon itén Dios ntá tsonoha kíxin nijnko tí sín k'uéchronka itén Dios tsíkixinhya sín tí estado Galilea —ichro sín.

Ijnko tjan kjuasin jie chóna ókjé chojni nto

⁵³ Ntá jnkojnko tí sín xíka sín sákjuí sín ntōe sín.

8

¹ Ntá ch'ín Jesús mé sákjuí ch'án tí jnā Olivo.

² Ntá tí kóyaon nchítjen ikjan ch'án k'uíxenhén ch'án tí nínko jie a la ko kaín xín tí chojni mé kóchjinehe sín ch'án. Ntá kjuák'etjaxin ch'án kjuankíxin ch'án kjuako ch'án.

³ Ntá tí sín tjako tí ley la ko tí sín fariseo mé kjuíkao sín ijnko tjachjin kónoxíxin kíxin chóna tjan ókjé chojni nto. Ntá kjuák'e sín tjan jnkosiné tí sín tjejó ntiha.

⁴ Ntá ntáche sín tí ch'ín Jesús kíxin:

—Maestro, tí tjan i kónoxíxin kíxin kjuasin tjan jie chóna tjan ókjé chojni nto.

⁵ A ntá tí ley tsíkjin ch'ín Moisés mé t'etōan kíxin ixro chrók'óyánxinni tí chojni chjin xíkaha ch'e. ¿A ntá jaha, nkechrua? —ichro sín.

⁶ Mé xíkaha ichro sín kíxin tjinkaon sín kíxin ách'e ntoáhya chrókjuatehe ch'ín Jesús ntá chrókjuanchia sín jie. Ntá ch'ín Jesús mé k'uísén ch'án kjinxin ch'án dedo tja ch'án nonte a.

⁷ Ntá naxa tinkákjanchankíhi sín ch'án. Ntá k'uínkatjen ch'án k'uetōan ch'án kíxin:

—Xá nkexro tí tjejorá ntihi chóntahya ninkehó jie mé saoxín chróchjéhe sín tjan xro —ichro ch'án.

⁸ Ntá xík'isén ch'án inaá ikjin ch'án tí nche inaá.

⁹ Ntá tí sín a mé kuínhin sín tí nkehe k'uetōan ch'ín Jesús ntá kósuèhe sín kíxin koí sín chóna sín jie, ntá jnkojnko jnkojnko sín, sásítji sín na mé saoxín tí ch'ín antsí má tada ch'án sákjuí ch'án, ntá kaín tí sín í so a sákjuí sín kjaxin sín.

Ntá jehó tí ch'ín Jesús la ko tí tjan a kuítóhe sín ntiha.

¹⁰ Ntá xrentoá ch'án la kjuanchankíhi ch'án tjan kíxin:

—¿Nkekjá tí sín kjuanchia jie? ¿Á kohya ninkexró kjuínchekjasótiahya ní? —ichro ch'án.

¹¹ Ntá ntáchro tjan kixin:

—Náhí, Ìnchéni, ninkexró —ichro tjan.

Ntá ntáchro ch'ín Jesús kixin:

—Kjāxin janhan s̄intakjasótiahya. Sátjia la í tjásinhya jiē inaá —ichro ch'án.

Ch'ín Jesús mé xrohi t'inkaséyanxín chjasintajni

¹² Ntá ch'ín Jesús xínixjehe ch'án tí sín tsíkóchjina inaá ntáchro ch'án kixin:

—Janhan mé xrohi t'inkaséyanxín chjasintajni. Tí tsochréhérá tí janhan ntá ts'ajirá tí t'inkaséyan tsochontaxínrá tí kjuachón a la ko í ts'ajihyará tí sítié a —ichro ch'án.

¹³ Ntá tí sín fariseo ntáchro sín kixin:

—Jahvá tjechronka nkexrí tjen jaha na mé chaxínhya tíha kixin jahvá tjechronka —ichro sín.

¹⁴ Ntá kjuátehe ch'ín Jesús ntáchro ch'án kixin:

—Janhván tjetjonkará nkexrí tjen na kjónté chaxín xrjanka kixin ó nòna nketí nó k'uinkaxian la ko nòna nketí sátsjiyá. A ntá jahará noahyará nketí k'uinkaxian la ko noahyará nketí sátsjiyá.

¹⁵ Jahará la éxí chojni chjasintajni ó tékará jiē. A ntá janhan la tékahya jie ninkexró.

¹⁶ Kjánchó ntoá chrókjūintakitoaxián ijié chojni kixin jehya janhván t'a tíha, T'aná tjékian, na mé tí nkexro k'ueṭuanna k'uinka ntihi na mé jehe ch'án mé tjékian ch'án ntihi ntakitoaxínkian ijié chojni.

¹⁷ A ntá tí ley tsíkjin ch'ín Moisés mé ntáchro kixin tí tsonoxín iyó sín tsochrónka á chaxín xikaha tsíkónhen ntá chrókuitekaon chojni.

¹⁸ Ntá janhan na mé tjéxrjanka nkexrí tjen janhan la ko kjāxin T'aná mé tí nkexro k'ueṭuanna k'uinka mé jehe ch'án kjāxin chrónka ch'án nkexrí tjen janhan —ichro ch'án.

¹⁹ Ntá kjuanchankíhi sín ch'án kixin:

—¿Nketí tjen It'á? —ichro sín.

Ntá kjuátehe ch'ín Jesús ntáchro ch'án kixin:

—Jahará la chonhyará tí janhan la ko kjāxin chonhyará T'aná. Tí chrókóchoxinrá tí janhan ntá kjāxin chrókóchoxinrá tí T'aná —ichro ch'án.

²⁰ Mé xikaha chro ch'ín Jesús tí kjuák'ekjāxoxin ch'án tí ninko jié chjino ntacajón tjetóxroyéya chichaon tjanjon sín. Kjánchó ninkexró tséhya sín ch'án kixin naxa kjuixrakáhya tí hora tsotsé sín ch'án.

“Xitjahya tsjasánrá tí nó sátsjiyá janhan”

²¹ Ntá ch'ín Jesús ntáche ch'án sín inaá kixin:

—Ntá sátsjiyá janhan. Ntá jahará tsjéyará tí janhan, ntá tió ts'énrá naxa yamará ijiará. Xitjahya tsjasánrá tí nó sátsjiyá janhan —ichro ch'án.

²² Ntá ntáchro tí sín judío ikjo sín kichó sín kixin:

—¿Á ts'óyán ch'án asén ch'án kixin xikaha ntáchro ch'án kixin xitjahya tsjijini tí nó sátsji ch'án? —ichro sín.

²³ Ntá ntáche ch'ín Jesús tí jehe sín kixin:

—Jahará la nonte ntihi k'uaxrjénixínrá. A ntá janhan la nkaya nkajní k'uaxrjénixiān. Jahará la kuente chjasintajni ntihi. A ntá janhan la janhya kuente chjasintajni.

²⁴ Mé xikaha tjonkará kixin tió ts'énrá naxa tsochontará ijiará kixin tí tsítékákonhyará tí janhan, mé tí nkexro xráxín tjen,* ntá kjónté ts'énrá naxa tsochontará tí ijiará —ichro ch'án.

²⁵ Ntá kjuanchankí sín ntáchro sín kixin:

* 8:24 Éxodo 3.14

—¿Nkexro tí jaha? —ichro sín.

Ntá kjuátehe ch'ín Jesús ntáchro ch'án kixin:

—Tí xrankíxín kjuankíxian tjonkará kixin nkexro tí janhan.

²⁶ Itsjé nkehe chonta chróntáxrjan kixin chrókjuíntakitoaxián tí jie chontará. Kjánchó tí nkexro k'uetuanna k'uinka na mé tí nkehe chrónka ch'án la chaxín. A ntá jehó tí nkehe kuínhan chrónka ch'án mé tjákoḥa tí sín chjasintajni —ichro ch'án.

²⁷ Kjánchó jehe sín mé kíenxínhya sín kixin nixja ch'án kuènte It'é ch'án tjen nkaya nkajní.

²⁸ A ntá ntáchro ch'án kixin:

—Tió sinchek'it'ótjenrá noi tí Xjeen Dios K'óna Chojni, ntá tsonohará kixin janhan mé tí nkexro xráxín tjen.† Ntá tsonohará kixin jehya janhan tétōan tí xra tjét'a. Náhi. Jehó tí nkehe kjuakona T'aná mé tjétjåku.

²⁹ Tjékian tí nkexro k'uetuanna k'uinka kixin jehí xráxín T'aná la kuítonahya janhván kixin xráxín ntaxiteyáḥa tí nkehe tóxrjínḥin ch'án —ichro ch'án.

³⁰ Mé xikaha ntáchro ch'án ntá nchónhya chojni kuítekaon sín tí jehe ch'án.

Nkexrí tjejó tí sín xjeen Dios la ko nkexrí tjejó tí sín chrokjuahya tsítóhe sín ijíé sín

³¹ Ntá nixjeḥe ch'ín Jesús tí sín judío kuinkáchónki sín ch'án ntáchro ch'án kixin:

—Tí tsítóéhyará tí tan kjuákohará ntá jahará chaxín discípulo kuéntana

³² la ko tsjátsoanrá tí nkehe chaxín, la ko tí nkehe chaxín mé tsotjáhará kjuachaxin tsaáxinrá, a ntá tsokohya nkehe ts'inkákonḥen —ichro ch'án.

³³ Ntá kjuátehe sín ntáchro sín kixin:

—Jeheni mé tsík'axrjeníxinni ch'ín Abraham na í xráxín kohya nkexro k'uena tí jeheni. ¿Nkekuèté ntáchrúa jaha kixin ts'áyéḥeni kjuachaxin tsaáxinni? —ichro sín.

³⁴ Ntá ntáchro ch'ín Jesús kixin:

—Tjetoan tí nkehe tjétjonkará kixin tí sín tjasin jie mé éxí chojni k'uíná chrokjuahya tsítóhe sín ijíé sín.

³⁵ A ntá ijnko chojni k'uíná la jnkochríxínhya tsjak'e ch'án tí ntōe tí nkexro a. A ntá tí xjeen tí nkexro na mé jnkochríxín tsítóhe ntiha.

³⁶ Ntá tí tsaáxinrá tí Xjeen Dios ntá chaxín tsochontará kjuachaxin, a ntá tsokohya nkehe ts'inkákonḥen.

³⁷ Ó nòna kixin jahará tsík'axrjeníxinrá ch'ín Abraham. Kjánchó tjinkáonrá chrók'oyánrá tí janhan kixin títekákonhyará tí nkehe tjéxrjanka.

³⁸ Janhan xrjanka tí nkehe k'uíkuān kixin nkexrí tjen T'aná. A ntá jahará tjejonchexiteyéhérá tí nkehe kuínhínrá chrónka it'ará —ichro ch'án.

³⁹ A ntá jehe sín kjuátehe sín ntáchro sín kixin:

—It'eni mé ch'ín Abraham —ichro sín.

Kjánchó ntáchro ch'ín Jesús kixin:

—A ntá tí jahará chrókóchaxín xjeen ch'ín Abraham ntá chrókjuich'erá éxí kjuích'e ch'án.

⁴⁰ A ntá tjétjonkará tí tan chaxín kuínhan chrónka Dios na kjónté chrók'oyánrá tí janhan. A ntá ch'ín Abraham xikahya kjuích'e ch'án.

⁴¹ Jahará tjejoch'erá éxí kjuích'e it'ará —ichro ch'án.

Ntá ntáchro sín kixin:

—Jehya k'ónamá tí jeheni. Náhi. Chóntani jnkokoá It'eni mé Dios —ichro sín.

⁴² Ntá ntáche ch'ín Jesús tí jehe sín kixin:

† 8:28 Éxodo 3.14

—Tí chrókóchaxín kixin Dios mé It'ará la ntá chrótjuanará kixin janhan kjaxin k'uaxrjeníxinna Dios k'uinkaxian tí tjen ch'án. Jehya kixin janhván k'uinka. Náhí. Dios mé ichr'ánna k'uinka.

⁴³ ¿Nkekuènté kixin tiénxinhýará tí nkehe tjonkará? Jehí tjinkákonhyará chrókuinhínrá tí nkehe xrjanka.

⁴⁴ Jahará mé xjeen Tsochren la ko jahará tsík'axrjeníxinrá ch'án la ko tjinkáonrá sinchexiteyará tí nkehe tjinkaon ch'án. Tsochren mé xrankíxixín kjuaya ch'án. Nunca k'uénixja ch'án ntoá. Xráxín ch'ia ch'án kixin xikahó tjenkayáxin ch'án. Jehé ch'án mé it'é kaín tí kjuach'ia.

⁴⁵ A ntá janhan tjétjonkará nkehe ntoá ntá títekákonnahýará.

⁴⁶ ¿Á tjejorá jnkojínrá nohará nkerí jie kjuásian janhan? A ntá tí ntáxrjan tí nkehe ntoá, ¿ntá nkekuènté títekákonnahýará?

⁴⁷ Tí sín tinkáchónki Dios mé tjinkaon sín chrókuinhin sín itén Dios. A ntá jahará la tinkáchónkihyará Dios ntá tjinkákonhyará chrókuinhínrá itén ch'án —ichro ch'ín Jesús.

Cristo la ó xráxín tjen ntá chr'éxin kjuák'e ch'ín Abraham

⁴⁸ A ntá tí sín judío ntáche sín tí ch'ín Jesús kixin:

—Chaxín ntoá ntáchroni kixin jaha mé ijnko chojni samaritano la ko chonta ijnko nchakuen tí jínahya —ichro sín.

⁴⁹ Ntá kjuátehe ch'ín Jesús ntáchro ch'án kixin:

—Janhan chontahya ninkehó nchakuen tí jínahya. Tí xra t'a mé tjikosáyaha T'aná. Ntá jahará mé chontahýará kjuasáyé tí janhan.

⁵⁰ Janhan na tjéyáhya nkexro tsjikosáyana. Kjánchó itjen ijnko nkexro tjinkaon ch'án chrókjuikosáyana chojni, a ntá jehe ch'án mé tsjanchia jie tí sín kuítekakonhya.

⁵¹ Imá tjetoan tí nkehe tjétjonkará kixin tí tsítekáonrá tí nkehe tjákua la í ts'énhyará —ichro ch'án.

⁵² Ntá kjuátehe tí sín judío ntáchro sín kixin:

—Ntá ó noheni kixin chaxín chonta ijnko nchakuen tí jínahya. Ch'ín Abraham la ko kaín tí sín k'uéchrónka itén Dios ósé la mé ik'uén sín. Ntá jaha ntáchrua kixin tí tsitekaonni tí nkehe tjákua jaha ntá í ts'enhyani, ichrua.

⁵³ ¿Xá imá tétōan jaha la ntá kánhyó t'etōan it'éni Abraham? Jehé ch'án la ik'uén ch'án la ko kjaxin ik'uén tí sín k'uéchrónka itén Dios ósé. ¿Xá nkexro tí jaha, ichrua? —mé chro sín.

⁵⁴ Ntá kjuátehe ch'ín Jesús ntáchro ch'án kixin:

—Tí chrókjuikosáyaha asenná na mé sínkíhya tíha. A ntá T'aná mé tjikosáyana ch'án na ntá jahará ntáchorá kixin jehe ch'án mé Dios kuèntará.

⁵⁵ Kjánchó chonhyará ch'án. A ntá janhan choxian ch'án. Tí chróntáxrjan kixin janhan chonhya ch'án ntá chrókóyona tí jahará chrókjuit'ayahará. Kjánchó janhan na choxian ch'án la ko ntaxiteyáha tí nkehe t'etōan ch'án.

⁵⁶ Ch'ín Abraham tí nkexro tsík'axrjeníxinrá la imá kóchéhe ch'án kixin ts'ikon ch'án tí yaon ts'inka janhan. Ntá ó kjuixin k'uíkon ch'án ntá kóchéhe ch'án —ichro ch'án.

⁵⁷ A ntá tí sín judío ntáche sín tí ch'ín Jesús kixin:

—Jaha naxa chontahya cincuenta nánó, ¿na ntá nkekuènté ntáchrua kixin ó k'uíkuan tí ch'ín Abraham? —ichro sín.

⁵⁸ Ntá kjuátehe ch'ín Jesús ntáchro ch'án kixin:

—Imá tjetoan tí nkehe tjétjonkará kixin naxa kohya ch'ín Abraham mé xráxín itjén janhan —ichro ch'án.

⁵⁹ Ntá kuákja sín xro chróchjéhe sín tí ch'ín Jesús. Kjánchó kjuák'emá ch'án ninko ntá chr'éxín k'uaxrjexín ch'án ntiha. K'uátsínka ch'án jnkosiné tí tjejó sín sákjuí ch'án.

9

Ch'ín Jesús kjuínchekitohe jína ijnko ch'ín tsíkokjéxín t'ikonhya ch'án

¹ K'uátsínka sín ijnko ntá ntá k'uíkon ch'ín Jesús ntiha tjen ijnko ch'ín tsíkokjéxín t'ikonhya ch'án.

² Ntá tí sín k'uájiko ch'ín Jesús kjuanchankíhi sín ch'án kixin:

—Maestro, ¿Nkekuènté tsíkokjéxín ch'án t'ikonhya ch'án? ¿Á ijíé it'é o ìné ch'án o á ijíé ch'án? —ichro sín.

³ Ntá kjuátehe ch'ín Jesús ntáchro ch'án kixin:

—Jehya ijíé ch'án la ko jehya ijíé it'é la ko ìné ch'an. Náhí. Jehí xíkaha tsíkonhen ch'án kixin tí kjuachaxién Dios tsjakoxín kixin tsitoexín ch'án jína.

⁴ Naxa nchakotjin t'ichjánxín sít'a tí xra tjinkaon tí nkexro tsíchr'ánna. Ntá ts'ixin tie ntá kohya ninkexró tsjacha sich'e xra.

⁵ Naxa itjén janhan mé ntihi chjasintajni na mé janhan xrohi t'inkaséyanxín tí chjasintajni —ichro ch'án.

⁶ Ntá ó kjuixin ntáchro ch'án tíha ntá kuíkíte ch'án ntaten ch'án intsí nche k'óna nchet'o ntá kuátematóxin ch'án ikon tí ch'ín t'ikonhya.

⁷ Ntá k'uetuènen ch'án tí ch'ín t'ikonhya kixin:

—Sátjia tí pila tjiá ntá it'in Siloé t'ontia kuan —ichro ch'án. (A ntá tí ihnié Siloé mé t'axrjexín nkívee sín kixin K'uítuènen.)

Ntá sákjuí tí ch'ín t'ikonhya k'ónti ch'án ikon ch'án ntá kjan ch'án k'uíkon ch'án.

⁸ Ntá tí sín ntøe chjinaxón ntøe ch'án la ko tí sín k'uék'ikon sín kixin t'ikonhya ch'án mé ntáchro sín kixin:

—¿Á jehya tí ch'ín i k'uékjak'etjaxín ch'án k'uékjanhak'á ch'án? —ichro sín.

⁹ Iso sín ntáchro sín kixin:

—Kjá chaxín jehe ch'án —ichro sín.

Ikjé sín ntáchro sín kixin:

—Náhí, jehya jehe ch'án. Tóyóhó ch'án tí ch'ín a —ichro sín.

Kjánchó jehe ch'án kjuátehe ch'án kixin:

—Chaxín janhan —ichro ch'án.

¹⁰ Ntá kjuanchankíhi sín ch'án kixin:

—¿Nkexrí kixin jaí t'ikuan jaha? —ichro sín.

¹¹ Ntá kjuátehe ch'án ntáchro ch'án kixin:

—Ijnko ch'ín mé it'in Jesús mé kjuích'éna ch'án nchet'o kuátematóxin ch'án kuan la ntá k'uetuanna ch'án kixin satsjia tí pila tjiá ntá nchek'in sín Siloé ts'ontia kuan, ichro ch'án. Ntá sákjuia k'ontia, ntá xrínahya ó k'uíkuan —ichro ch'án.

¹² Ntá kjuanchankíhi sín ch'án ntáchro sín kixin:

—¿Nketí tjen tí ch'ín a? —ichro sín.

Ntá kjuátehe ch'an ntachro ch'an kixin:

—Nonahya janhan —ichro ch'an.

Tí sín fariseo tjanchankíhi sín tí ch'ín k'uék'ikonhya kuítóhe jína

¹³ Ntá tí sín a sákjuíko sín tí ch'ín k'uék'ikonhya sákjuíchréhe sín tí sín fariseo a.

¹⁴ A ntá tí yaon t'ok'éhe sín mé tsíkjich'éna ch'ín Jesús tí nchet'o kjuínchekitoexín jína tí ch'ín k'uék'ikonhya.

¹⁵ A ntá tí sín fariseo xíkjanchankíhi sín ch'án ínaá kixin nkexrí kuítóhe ch'án jína t'íkon ch'án jie. Ntá kjuátehe ch'án ntáchro ch'án kixin:

—Kuátematóxin ch'án nchet'õ kuån, ntá k'ontia kuån ntá jie t'íkuån —ichro ch'án.

¹⁶ Ntá iso tí sín fariseo ntáchro sín kixin:

—Tí chojni a jehya kuènte Dios kixin chóntahya ch'án kjuasáyé tí yaon t'ok'éheni —ichro sín.

Kjánchó ikjé sín ntáchro sín kixin:

—¿Xá nkexrí chrókjuasin ch'án kjuaxroan jie tí chóna ch'án jie? —ichro sín.

Mé xíkaha jnkokónhya kjuenkayáxin tí jehe sín.

¹⁷ Ntá xíkjanchankíhi sín tí ch'ín k'uék'íkonhya ínaá kixin:

—¿Ntá jaha nkechrúa nkexro tíha tí nkexro kjuíntak'íkuan? —ichro sín.

Ntá kjuátehe ch'án ntáchro ch'án kixin:

—Janhan ntáxrjan kixin jehe ch'án mé ijnko nkexro chrónka itén Dios —ichro ch'án.

¹⁸ Kjánchó tí sín judío kuítekakonhya sín kixin chaxín k'uék'íkonhya ch'án ntá jie t'íkon ch'án. Ntá k'uíyehé sín tí it'é la ko tí ìné tí ch'ín tsíkítóhe jína.

¹⁹ Kjuanchankíhi sín ntáchro sín kixin:

—¿Á xjaan tíhi tí ntáchrora kixin tí tsíkokjéxin ch'án t'íkonhya ch'án? ¿Ntá nkexrí jie t'íkon ch'án? —ichro sín.

²⁰ Ntá kjuátehe tí it'é la ko tí ìné ch'án ntáchro sín kixin:

—Ó noheni kixin xjeenni ch'án la ko noheni kixin tí kokjéxin ch'án t'íkonhya ch'án.

²¹ Kjánchó noehyani nkexrí kixin t'íkon ch'án jie la ko noehyani nkexro kjuínchekítóhe ch'án jína. Tjanchankíhírá ch'án, ó nteto ch'án, ntá jehe ch'án tsochrónka ch'án kixin nkexrí kuítóhe ch'án jína —ichro sín.

²² Mé xíkaha kjuátehe tí it'é la ko tí ìné ch'án kixin chrakonhen sín tí sín judío kixin ó kjuixin chrónka tí sín judío kixin tsjanjonhya sín kjuachaxin ts'ixenhen nínko tí sín titekaon kixin ch'ín Jesús mé tí nkexro Cristo.

²³ Mé xíkaha ntáchro tí it'é la ko tí ìné ch'án kixin chrókjuanchankíhi sín ch'án, ó nteto ch'án, ichro sín.

²⁴ Ntá yóxin xík'íyehé tí sín judío tí ch'ín k'uék'íkonhya ntá k'uetuēhen sín ch'án kixin:

—Tjetsjehe Dios ntá ntoá chrónka kixin ó noheni kixin tí ch'ín a na chóna ch'an jie —ichro sín.

²⁵ Ntá tí ch'ín k'uék'íkonhya kjuátehe ch'án kixin:

—Nonahya á chóna ch'án jie õ á chóntahya ch'án jie. Jnkokóá nkehe nóna kixin senó k'uék'íkonhya ntá jie t'íkuån —ichro ch'án.

²⁶ Ntá xíkjanchankíhi sín ch'án ínaá kixin:

—¿Nkexrí kjuích'e ch'án kixin kjuíntak'íkuan ch'án? —ichro sín.

²⁷ Ntá kjuátehe ch'án ntáchro ch'án kixin:

—Ó kjuixin tjonkará kjánchó títekákonhyará. ¿Nkekuènté tjinkáonrá kixin tsotjonkará ínaá? ¿Á kjaxinrá tjinkáonrá tsochréhérá ch'án? —ichro ch'án.

²⁸ Ntá kónínkakonhen sín ch'án la k'uántaxínhin sín ch'án la ko kjuátehe sín kixin:

—Jaha la chréhé tí chojni a. A ntá jeheni na chréhéni tí nkehe k'uetõan ch'ín Moisés.

²⁹ Ó noheni kixin Dios k'uénixjehé ch'ín Moisés. A ntá tí ch'ín a la noehyani nketí tsíkjixin ch'án —ichro sín.

³⁰ Ntá kjuátehe tí ch'ín ntáchro kixin:

—Imá ókjé tíha. Tí ch'ín a mé kjuínchek'íkonna. A ntá jahará ntáchrora kixin noahyará nketí tsíkjixin ch'án.

³¹ Ó noheni kixin tienhya Dios tí nkehe tjanchia tí chojni chóna jie. Jehó tinhin ch'án tí nkehe tjanchia tí sín titekaon Dios la ko nchexiteyéhe sín tí nkehe tjinkaon ch'án.

³² Nunca kienhyéni kixin ijnko nkexro chrókjuinçek'ikon ijnko chojni tsíkokjéxín t'ikonhya.

³³ A ntá tí nkexro a tí chrókjuixinhya ch'án tí tjen Dios la kjá ninkehó nkehe xitjahya chrókjuich'e ch'án —ichro ch'án.

³⁴ Ntá kjuátehe tí sín fariseo ntáchro sín kixin:

—Jaha la nchónhya jie chonta tió kokjíha. A ntá jie ¿á tjinkávan kixin jaha chrókjuákohéni ní? —ichro sín.

Ntá kótéka sín tí ch'ín a kixin ts'axrjexín ch'án tí nínko a sátsji ch'án.

Ntakótán nchakuen sín

³⁵ Ntá kuínhin ch'ín Jesús kixin xíkaha k'uetuēnen tí sín judío kixin ts'axrjexín nínko tí ch'ín k'uék'ikonhya. Ntá xeta ch'ín Jesús tí ch'ín a ntá kjuanchankí ch'án kixin:

—¿Á tinkachónkia tí Xjeen Dios K'óna Chojni? —ichro ch'án.

³⁶ Ntá kjuátehe tí ch'ín a ntáchro ch'án kixin:

—Tjákohéni nkexro tíha kixin ntá tsinkáchónkini ch'án.

³⁷ Ntá kjuátehe ch'ín Jesús ntáchro ch'án kixin:

—Ó k'uíkuan jaha. Janhan mé tí nkexro tjetjuá jaha —ichro ch'án.

³⁸ Ntá kjuák'exín toch'in ch'án toté ch'ín Jesús ntáchro ch'án kixin:

—Ijie kuítekavan tí jaha Inchéni —ichro ch'án.

³⁹ Ntá ntáchro ch'ín Jesús kixin:

—K'uinka ntihi chjasintajni kixin sintakitoaxián ijie chojni kixin ntá tí sín t'ikonhya la mé ts'ikon sín, a ntá tí sín t'ikon jie la í ts'ikonhya sín —ichro ch'án.

⁴⁰ A ntá iso tí sín fariseo k'uéjontaxín kuínhin sín kixin xíkaha ntáchro ch'ín Jesús, ntá kjuanchankíhi sín ch'án kixin:

—¿Xá kjaxin jeheni ntakótáni? —ichro sín.

⁴¹ Ntá kjuátehe ch'ín Jesús ntáchro ch'án kixin:

—A ntá tí jahará tí chaxín chrók'uikonhyará ntá chróchontahará jie. Kjánchó ntáchrórá kixin t'ikonrá. Méxra chontará jie —ichro ch'án.

10

Ch'ín Jesús ncheyóexín tí t'inkachjina kolélo

¹ Ntá ntáchro ch'ín Jesús kixin:

—Imá tjettoan tí nkehe tjetjonkará kixin tí ts'ixenhen ijnko chojni tí t'inkachjina kolélo ntá jehya puerta tí corral t'ixenxín ch'án na mé ókjé chrok'uixenxín ch'án na mé xíchee tíha la tjinkaon chrókueé.

² A ntá tí nkexro t'ixenxín tí puerta na mé nkexro t'ayakonhen tí kolélo a.

³ La ko tí ch'ín tjet'ayakonhen tí puerta a mé tsakitjehe ch'án tí puerta a kixin ts'ixenhen tí nkexro chaxín t'ayakonhen tí kolélo a. A ntá tí kolélo a mé tsjatsqan va itén ch'án. Ntá t'iyexín ch'án jnkojnko ihnjé jnkojnko tí kolélo kuénte ch'án ntá ts'axrjexín va ntq̄e va.

⁴ Ntá t'ikon ch'án kixin k'uaxrje kaín va ntá kuítōnhen ch'án va nt̄ia ntá tinkáchréhe va kixin tjatsqan va itén ch'án.

⁵ Chrohya va tjichréhe va ijnko chojni ókjé na mé tsinkéhe va tí chojni a kixin tjatsqanhya va itén ókjé chojni —ichro ch'án.

⁶ Mé xíkaha ntáchro ch'ín Jesús kjuíncheyóexin ch'án. Kjánchó tienxínhya sín nkexrí t'axrjexín tíha.

Ch'ín Jesús mé tí pastor jína

7 Ntá chrónka ch'ín Jesús ínaá ntáchro ch'án kixin:

—Ijnko nkehe tjetóan tsotjonkará kixin janhan la éxí tí puerta t'ixenxín tí kolélo tí t'inkachjina va.

8 Kaín tí sín kuitónxin ntja kui senó mé xíchēe la ko chrókueé. La ntá tí kolélo la ántosén va tí nkehe ntáchro tí jehe sín.

9 Janhan mé tí puerta a mé t'ixenxínrá tí janhan mé tsaará la mé tsoyóhará tí kolélo siín kjuachaxin ts'axrjexín va tí kòrré va sátsjikjine va la ko siín kjuachaxin ts'ixenhen va tí ts'inkachjina va ínaá.

10 'A ntá xíchēe mé jehó chrókueé la ko tjinkaon chrók'óyán la ko chrókjuinçek'itjáyan kaín nkehe. A ntá janhan k'uinka kixin tsochontaxinrá kjuachón na mé kjuachón jnkochrín.

11 Janhan mé ijnko pastor jína a ntá tí pastor jína mé ts'enyákonhen tí kolélo a.

12 A ntá tí nkexro ch'e xra tjinkaon chrókjuacha ó na mé ts'ikon ch'án itsi ijnko kolobo tsítóhe ch'án tí kolélo sátsji ch'án kixin jehe ch'án la jehya tí nkexro t'ayakonhen tí kolélo la ko jehya kolélo kuènte ch'án. Ntá tí kolobo mé tsotsé va tí kolélo ntá tsinká va la sátsjichroe va.

13 Mé xikaha tí chojni tjinkaon chrókjuacha tí xra chrókjuich'e ó la mé sátsji. A ntá tí kolélo la ántosén ch'án kuáhya ch'án kuenté tí jehe va.

14-15 'A ntá janhan mé ijnko pastor jína. Mé xikaha T'aná chóxin ch'án tí janhan la ko kjaxin janhan choxian tí jehe ch'án mé xikaha choxian janhan tí sín éxí kolélo kuèntana la ko jehe sín mé chóxin sín tí janhan. Ntá ts'ényákonhan tí sín éxí kolélo kuèntana.

16 Kjaxin chonta kolélo naxa jehya kòrré va ntihi mé kjaxin t'ichjánxin sátsjícakjián va. A ntá tí tsitekakonna va ntá ts'óna jnkokoá kòrré va la ko jnkokoá nkexro ts'ayakonhen va.

17 'Tjuana T'aná kixin kjónté its'én la tsoxechónna ínaá.

18 Kohya nkexro tsakitsjena tí kjuachón chonta janhan tí chrókjuánjonhya kjuachaxin. Chonta janhan kjuachaxin its'én la ko chonta janhan kjuachaxin tsoxechónna ínaá. Tíhi mé k'uetuanna T'aná —ichro ch'ín Jesús.

19 Tió kuínhin tí sín judío tí nkehe ntáchro ch'ín Jesús ntá kjuankixin jnkokoáhya kjuenkayáxin sín.

20 Nchónhya tí jehe sín ntáchro sín kixin:

—¿Nkekuènté tinhínrá tí nkehe ntáchro ch'án? Jehe ch'án mé chóna ch'án nchakuen tí jínahya la ko lóco ch'án —ichro sín.

21 Ntá ikjé sín ntáchro sín kixin:

—Xikahya chrónixja ijnko chojni chóna nchakuen tí jínahya. ¿Á ijnko nchakuen tí jínahya la á jína chrókjuinçek'ikon ijnko chojni t'ikonhya? —ichro sín.

Tí sín judío kuítakakuenhya sín tí ch'ín Jesús

22 A ntá tí nchakuen kin tí chjasin Jerusalén k'uixin kia xraxinkakonxín sín tí yaon tsíkjixin tsík'óna nínko.

23 Ntá ch'ín Jesús itjen ch'án tí nínko tí ntasin kuènte Salomón.

24 Ntá tí sín judío k'uántatjen sín tí ch'ín Jesús kjuanchankíhi sín ch'án kixin:

—¿Hasta nkesá ts'ejóchónhenni tsinhinni jína? A ntá jie chrónka ntoá kixin á chaxín jaha tí Cristo —ichro sín.

25 Ntá kjuátehe ch'ín Jesús kixin:

—Ó tjonkará ntá naxa títekákonhyará. Kaín tí xra tjet'a janhan tí kjuachaxin kuènte T'aná mé tjakoxin nkexro tí janhan.

26 Kjánchó jahará títekákonhyará kixin jahará la jehya kolélo kuèntana éxí tjonkará senó.

²⁷ Tí kolélo kuèntana mé tjatsoan va tí tanná la ko kjaxin janhan tjátsoan tí jehe va la ko jehe va mé chréhe va tí janhan.

²⁸ Janhan mé tjahā va tí kjuachón jnkochrín la í ts'itjáyanhya va la ko ninkexró tsjachahya tsakitsjexín va tjaná.

²⁹ Ó kjuanjon T'aná, mé tí nkexro tjetóxin t'etōan, na ninkexró tsjacha tsakitsjexín va tí tja ch'án.

³⁰ Janhan la ko T'aná na mé jnkokoá nkexro tíha —ichro ch'án.

³¹ Ntá tí sín judío kuákja sín xro chróchjéhe sín ch'án inaá.

³² Ntá kjuátehe ch'ín Jesús ntáchro ch'án kixin:

—Nchónhya nkehe jína k'uikonrá kjuákoxiān kjuachaxin kuènte T'aná. ¿Ntá nkekuènté chróchjínará xro? —mé chro ch'án.

³³ Ntá kjuátehe tí sín judío kixin:

—Jehya tí kjuaxroan jína tjásian chrótjiáxiānni xro. Náhí. Jaha ijnko chojni ó ntá kjuíncheyóhé asán Dios na mé tsotjiáxiānni xro —ichro sín.

³⁴ Ntá ntáchro ch'ín Jesús kixin:

—Ntá ntáchro xroon itén Dios tsíkjin sín ósé kixin ntáchro Dios kixin: “Kjaxinrá éxí Dios tí jahará.”*

³⁵ Ntá ó noheni nkehe ntáchro xroon itén Dios na ntá xitjahya tsitekakonhyani tíha. Mé xikaha ntáchro Dios kixin éxí Dios jnkojnko nkexro k'uáyéhe itén ch'án.

³⁶ A ntá kjueyána Dios ichr'ánna ch'án chjasintajni, ¿ntá nkekuènté ntáchrorá kixin k'uántaxínhan Dios kixin janhan ntáxrjan kixin Xjeen Dios tí janhan?

³⁷ Kja tí chrókjuit'ahya tí xra ich'e T'aná la chrókuítekákonhyará.

³⁸ A ntá kjónté tjét'a tí xra a kjónté títekákonhyará tí janhan na mé chrókuítekáonrá tí xra tjét'a chrókónoaxínrá chrókiénxinrá kixin T'aná la ko janhan mé jnkokoá tjékian ch'án —ichro ch'án.

³⁹ Mé xikaha chrótsé sín tí ch'ín Jesús inaá chrók'uikjéhe ch'án ntá kjuachahya sín ntá sákjuí ch'án.

⁴⁰ Ntá ch'ín Jesús xíkjan ch'án tí í jnko lado ntario Jordán inaá tí k'uékjak'e ch'ín Juan k'uékikítexín ch'án chojni senó.

⁴¹ Ntá nchónhya chojni sákjuíchréhe sín ch'án ts'ikon sín ch'án ntáchro sín kixin:

—Chaxín ch'ín Juan kjuasinhya ch'án kjuaxroan jié la kjónté ntoá tí nkehe chrónka ch'án kuènte tí ch'ín i —ichro sín.

⁴² Ntá nchónhya sín kuítekaon sín tí ch'ín Jesús tí kjuíji sín ntiha.

11

Ik'uén ch'ín Lázaro

¹ Itjen ijnko ch'ín níhi mé it'in ch'án Lázaro, chjasén ch'án na mé Betania, mé tí chjasén tí tjan María la ko tí kjavé tjan Marta.

² Tí tjan María mé jnkokoá kichó tí ch'ín Lázaro mé tí ch'ín níhi na mé jehe tjan mé tí tjan kuíkítexín aceite xraxé toté Inchéni la ko kjuínchexámáxin tjan kaxihi tjan toté ch'án.*

³ A ntá yóí tí kichó ch'án chjin ichr'án sín ijnko nkexro tsochénta tí ch'ín Jesús kixin:

—Inchéni jaha, tí nkexro choxian tjuéhé la níhi ch'án —ichro ch'án.

⁴ Ntá kuínhin ch'ín Jesús ntá ntáchro ch'án kixin:

—Tí chin chóntha ch'án jehya kixin ónaá chrók'uitjáyanxón ch'án tí ts'en ch'án. Náhí. Tíha mé tsjakoxin tí kjuachaxin jié kuènte tí Xjeen Dios —ichro ch'án.

* 10:34 Salmo 82.6 * 11:2 Juan 12.3

⁵ A ntá tí ch'ín Jesús la imá tjuèhé ch'án tí tjan Marta la ko tí tjan kichó tjan la ko tí ch'ín Lázaro.

⁶ Na ntá tió kuínhin ch'án kixin níhi ch'ín Lázaro na kjónté kuítóhe ch'án iyó yaon ínaá tí nó kjuák'e ch'án.

⁷ A ntá chr'éxin ntáche ch'án tí sín k'uájiko ch'án kixin:

—Sátsjini estado Judea ínaá —ichro ch'án.

⁸ Ntá kjuátehe tí sín k'uájiko ch'án kixin:

—Maestro, naxa séhya tí sín judío ntiha chrótjáha sín xro tjinkaon sín chrók'óyánxian sín xro. ¿Á tjinkávan sátsjia ntiha ínaá? —ichro sín.

⁹ Ntá ntáchro ch'ín Jesús kixin:

—Jnkojnko yaon mé chóna teyó hora. Tió ixri chojni nchakotjin tsóténkixinhya sín ninkehó kixin t'inkaséyanxín xrohi chjasintajni a.

¹⁰ Tí sín ixri tie mé tsóténkixín sín nkehe kixin chónahya sín xrohi —ichro ch'án.

¹¹ Ntá chr'éxin ntáche ch'ín Jesús tí sín k'uájiko ch'án kixin:

—Ó k'uájua tí nkexro chóxinni mé ch'ín Lázaro. Ntá sátsjia sintakjayaḥa ch'án —ichro ch'án.

¹² Ntá ntáchro tí sín k'uájiko ch'án kixin:

—Inchéni, tí k'uájua ch'án la mé chrókuítóhe ch'án jina —ichro sín.

¹³ Kjánchó tí nkehe ntáchro ch'ín Jesús mé t'axrjexín kixin ó tsíkjixin tsík'en tí ch'ín Lázaro. Ntá tí sín k'uájiko ch'án kjuenkayáxin sín kixin ó jehí tjeju ch'ín Lázaro.

¹⁴ Ntá ntoá chrónka ch'ín Jesús kixin:

—Ó tsík'en ch'ín Lázaro.

¹⁵ Ntá chána kixin kohyana ntiha kixin mé xikaha tsítekákoxínrá. A ntá jie întará sátsjitsjeheni ch'án —ichro ch'án.

¹⁶ Ntá ch'ín Tomás, kjaxin tikítexín sín ch'án ch'ín Nóhé, mé ntáche ch'án tí í so sín kixin:

—Sátsjini koíni kaín ni ts'enkaoni Inchéni —ichro ch'án.

Ch'ín Jesús ntáchro ch'án kixin sinchexechón ch'án chojni ínaá

¹⁷ Ntá kjuíji ch'ín Jesús kuínhin ch'án kixin ch'ín Lázaro la ó chóna noó yaon tsíkjiḥravá ch'án.

¹⁸ A ntá tí chjasin Betania mé chjinaxón tí chjasin Jerusalén, chóna iyó kilómetro ko t'ó kjínxin.

¹⁹ A ntá itsjé tí sín judío sátsíkjitsjehe sín tí tjan Marta la ko tí tjan María tjejónixjehe sín kixin kánhyó ts'ává sín kixin tsík'én tí kichó sín a.

²⁰ Ntá kuínhin tjan Marta kixin ó kui ch'ín Jesús ntá k'uaxrjexín tjan nchia tsjixinhin ntja. A ntá tí tjan María kuítóhe tjan nchia.

²¹ Ntá tí tjan Marta ntáche tí ch'ín Jesús kixin:

—Inchéni jaha. Chrókuak'e ntihi ntá chrók'uenhya kichó ni.

²² Kjánchó ó nòna kixin Dios tsotjáha kaín nkehe tsjanchehé ch'án —ichro tjan.

²³ Ntá ntáchro ch'ín Jesús kixin:

—Tsoxechón kíchuá ínaá —ichro ch'án.

²⁴ Ntá ntáchro tjan Marta kixin:

—Ó nòna kixin tsoxechón ch'án tió tsoxechón kaín tí sín tsík'en, tí yaon tsjixixín —ichro tjan.

²⁵ Ntá ntáchro ch'ín Jesús kixin:

—Janhan mé ntaxechón chojni la ko tsochóna sín kjuachón. Tí nkexro tsitekaon sín tí janhan na kjónté ó tsík'en sín la naxa sintaxechón sín ínaá.

²⁶ La ko kaín xín tí sín naxa tjejóchón sín la tsitekaon sín tí janhan na ts'enhya sín. ¿Á titekávan xikaha ní? —ichro ch'án.

²⁷ Ntá ntáchro tjan kixin:

—Chaxín Ìnchéni titekávan kixin jaha mé Cristo, mé Xjeen Dios, mé tí nkexro kui chjasintajni —ichro tjan.

Tsjánka ch'ín Jesús tí tsíkjixravá nkexro Lázaro

²⁸ Ó kjuixin ntáchro tjan Marta xikaha ntá sákjuík'íyehē tjan kichó tjan María ntá imó chénka tjan kixin:

—Ntiha tjen Maestro t'iyahá ch'án —ichro tjan.

²⁹ Ntá kuínhin tjan María ntá tuénxín k'uínkatjen tjan sákjuítsjehe tjan tí ch'ín Jesús.

³⁰ Naxa tsík'ixenhya ch'án chjasin naxa tjen ch'án tí xéta ch'án tjan Marta.

³¹ Ntá tí sín judío tjejónixjehe tjan María kixin kánhyó ts'ává tjan, mé k'uíkon sín kixin tjoka k'uaxrjexín tjan nchia, ntá kjuíchréhe sín tjan kjuenkayáxin sín kixin sátsji tjan tí tsíkjixravá kichó tjan, ntaha tsjitsjánkama tjan ch'án, ichro sín.

³² Ntá tí tjan María mé kjuíji tjan tí tjen ch'ín Jesús ntá kjuák'exín toch'in tjan toté ch'án ntáchro tjan kixin:

—Ìnchéni jaha, chrókjuak'e jaha ntihi ntá chrók'uenhya kichiná —ichro tjan.

³³ Ntá k'uíkon ch'ín Jesús kixin tsjánka tí tjan María la ko tí sín judío kjuikotoxin tjan ntá imá k'uává ch'án kóxakonhen asén ch'án.

³⁴ Ntá kjuanchankí ch'án kixin:

—¿Nketí kjuavará ch'án? —ichro ch'án.

Ntá ntáchro sín kixin:

—Ìnchéni, ¿á sátsjtsjehé? —ichro sín.

³⁵ Ntá tsjánka ch'ín Jesús.

³⁶ Ntá ntáchro tí sín judío kixin:

—Tsjeherá kixin imá tjuèhe ch'án tí ch'ín tsík'en —ichro sín.

³⁷ Kjánchó í so sín ntáchro sín kixin:

—Jehe ch'án mé kjuínchek'ikon tí ch'ín t'ikonhya. ¿Á xitjahya chrókjuanjon ch'án intsí kjuachaxin chrók'uenhya tí ch'ín Lázaro ní? —ichro sín.

Ó xechón ch'ín Lázaro

³⁸ Ntá imá t'ává asén ch'ín Jesús kóchjinehe ch'án tí tòye. Tí tòye mé ijnko tjo, a ntá tí ntója tí tjo mé tsík'ikjèxin ijnko xro.

³⁹ Ntá k'uetōan ch'ín Jesús kixin:

—Tjakjían tí xro a —ichro ch'án.

A ntá tí tjan Marta mé kichó tí nkexro k'uén mé ntáchro tjan kixin:

—Ìnchéni, kjá noha kixin kjá imá xra kixin ó chóna noó yaon tsík'en ch'án —ichro tjan.

⁴⁰ Ntá kjuátehe ch'ín Jesús ntáchro ch'án kixin:

—Ó tjonka kixin tsitekávan ntá ts'ikuan tí kjuachaxin jie kuente Dios —ichro ch'án.

⁴¹ Ntá kjuakjìn sín tí xro a. Ntá ch'ín Jesús konta ch'án nkajní ntáchro ch'án kixin:

—Ít'eni, tjáncháha kjuasáya kixin ó kuínhín tí nkehe ntáxrjan.

⁴² Janhan na ó nòna kixin xráxín tjetinhín tí nkehe ntáxrjan ntá xikaha ntáxrjan jie kixin tsinhin tí sín tjejóntaxín ntihi ntá tsitekaon sín kixin jaha mé kuétōan k'uinka —mé ichro ch'ín Jesús.

⁴³ Ntá kjuixin nixja ch'án tíha ntá itsen k'uèya ch'án kixin:

—¡Lázaro, t'axrjéxian méhe! —ichro ch'án.

44 Ntá tí ch'ín tsík'en k'uaxrjexín ch'án tòye, na tí tja ch'án la ko tí toté ch'án naxa tjejóchróntetoxín ka la ko tí nkayakon ch'án tjejkèxin ijnko ka. Ntá k'uetōan ch'ín Jesús kixin:

—Tjasintankará tí ka chróntetoxín ch'án kixin jína tsji ch'án —ichro ch'án.

*Imó kjuenkayáxin sín kixin nkexrí ts'óyán sín tí ch'ín Jesús
(Mt. 26.1-5; Mr. 14.1-2; Lc. 22.1-2)*

45 Ntá itsjé tí sín judío sákjuíktotoxin sín tí tjan María mé k'uíkon sín tí kjuaxroan kjuasin ch'ín Jesús ntá kuítekaon sín tí jehe ch'án.

46 Kjánchó iso tí jehe sín sákjuítsjehe sín tí sín fariseo kjuíchénga sín tí kjuaxroan tsíkjasin ch'ín Jesús.

47 Ntá tí sín fariseo la ko tí sín nchát'á t'etōan jnkokoá kójnkotséko sín tí sín antsí t'etōan, la ntáchro sín kixin:

—¿Xá nkexrí chrókjuich'ehe ni tí ch'ín a kixin jehe ch'án mé tjasin ch'án kjuaxroan jié?

48 A ntá tí chrókuítóheni ch'án xikahó ntá kaín xín chojni chrókuítekaon sín tí jehe ch'án, ntá tsi tí sín romano t'etōan sinchek'itjáyan sín tí nínkoéni la ko tí xra chóntani la ko tí nación kuénténi —ichro sín.

49 Ntá ch'ín Caifás mé tí nkexro t'etūenhen tí sín nchát'á tí nánó a ntáche ch'án tí jehe sín kixin:

—Jahará la noahyará ninkehó tíha

50 la ko kjá ní tjenkayáxinhyará kixin íchá jína kixin jnkokoá chojni chrók'uenyákonhen chjaséni kixin ntá chrók'uitjáyanhya kuenté tí nación kuénténi —ichro ch'án.

51 Kjánchó ch'ín Caifás la jehya jehó ch'án chrókjuenkayáxin ch'án tíha. Náhí. Jehe ch'án mé k'uetūenhen tí sín nchát'á tí nánó, a ntá tí Nchakuen Dios kjuínchekónohe ch'án kixin ch'ín Jesús mé ts'enyákonhen tí nación judía.

52 A ntá jehya tí nación kuénte sín ó chrók'uenyákonhen ch'án. Náhí. Kjaxin kixin sinchekaá ch'án kaín tí sín ts'óna xjeen Dios tjejó sín kuenté chjasintajni.

53 A ntá tí yaon a tí sín t'etūenhen tí sín judío mé kjuankixin sín kjuenkayáxin sín kixin chrók'óyán sín tí ch'ín Jesús.

54 A ntá ch'ín Jesús la í noxínhya k'uáji tí k'uéjé tí sín judío, na mé k'uaxrjexín ch'án tí estado Judea, sákjuí ch'án chjinaxón nteje, tí tjen ijnko chjasin it'in Efraín. Ntaha kuitōeko ch'án tí sín k'uájiko ch'án.

55 Ntá í séhya ntá ts'ixin tí kia pascua mé ijnko kié tí sín judío. Ntá itsjé chojni k'uaxrjexín sín chjasén sín sákjuí sín chjasin Jerusalén kixin ntaha tsoyaxínhin sín kixin tsotjóá sín kjónté naxa xrankíxinhya ts'ixin tí kia pascua.

56 Ntaha k'uájikjeyá sín tí ch'ín Jesús k'uéjōxenhen sín tí nínko jié ntá kjuanchankíhi sín kíchó sín kixin:

—¿Jahará nkechorá? ¿Á chrókjuí ch'án tí kia ní o náhí? —ichro sín.

57 A ntá tí sín fariseo la ko tí sín t'etūenhen tí sín nchát'á na ó k'uetōan sín kixin tí siín ijnko nkexro nohe nketí tjen ch'ín Jesús chróchrónka sín kixin ntá jína chrókjuítsé sín ch'án chrókjuinchenteto sín ch'án la ko chrókjuak'echjina sín ch'án.

12

*Ijnko tjan kjuíncheká tjan aceite xraxé náxrjón toté tí ch'ín Jesús
(Mt. 26.6-13; Mr. 14.3-9)*

¹ Naxa t'itjáyan injon yaon ntá ts'ixin tí kia pascua. A ntá ch'ín Jesús sákjuí ch'án chjasin Betania tí tjen ch'ín Lázaro. Tí ch'ín Jesús mé tsíkjinchexechón ch'án.

² Ntá ntiha kjóne sín ijnko kónjín kjuikosáyehe sín tí ch'ín Jesús. A ntá tí tjan Marta mé kjuíncheyaxín tjan. A ntá tí ch'ín Lázaro la ko í so sín k'uéjós sín kjóneko sín tí ch'ín Jesús.

³ Ntá tjan María kuikao tjan it'o litro aceite tsík'óna xroan nardo imá tjete tsík'enaxín tjan ntá kjuíncheka tjan toté ch'ín Jesús ntá kaxihi tjan kjuínchexámáxin tjan tí toté ch'án. Na mé kuenté nkaxenhen nchia kókaxraxé tí xroan.

⁴ Ntá ch'ín Judas Iscariote, it'é ch'án mé it'in Simón, jehe ch'án mé ijnko tí sín k'uájiko ch'ín Jesús, na mé tí ch'ín sinchekji tí ch'ín Jesús chr'éxin, mé ntáchro ch'án kixin:

⁵ —¿Nkekuènté kóxiha tí xroan xraxé, chrókóxiin iní ciento chichaon denario kixin chrókjuinkitsa tí sín nòà? —ichro ch'án.

⁶ Kjánchó ch'ín Judas la jehya ntáchro ch'án xikaha kixin chrókjuikonóehe ch'án tí sín nòà. Náhí. Ntáchro ch'án tíhi kixin xráxin chee ch'án kixin jehe ch'án t'ayakonhen ch'án tí nkehe tjinká chichaon ntá xráxin teé ch'án tí chichaon tsixrenájín ntiha.

⁷ Ntá ntáchro ch'ín Jesús kixin:

—Nté tìtoherá tjan. Tsíkjak'echjina tjan tí xroan a kixin tí yaon tsoxrávana.

⁸ Tí sín nòà jnkochrín ts'ejokoará sín. A ntá janhan jnkochrínnya ts'ejóni —ichro ch'án.

Tí sín judío itjo sín nkexrí chrók'óyán sín tí ch'ín Lázaro

⁹ A ntá itsjé tí sín judío k'uixikónohe sín kixin ch'ín Jesús kjuák'e ch'án tí chjasin Betania, a ntá sákjuí sín ntiha. Jehya kixin chrókjuitsjehe sín tí ch'ín Jesús ó. Náhí. Kjaxin tjinkaon sín chrókjuitsjehe sín tí ch'ín Lázaro mé tí ch'ín tsíkjinchexchón ch'ín Jesús.

¹⁰ Ntá tí sín nchat'á t'etoan mé kójnkotsé sín kjuenkayáxin sín chrók'óyán sín tí ch'ín Lázaro kjaxin

¹¹ kixin itsjé tí sín judío kuítekaon sín tí ch'ín Jesús kixin xikaha kjuínchexchón ch'án tí ch'ín Lázaro ntá k'uaxrjekjanxín sín tí sín nchat'á.

K'uixenhen ch'ín Jesús chjasin Jerusalén

(Mt. 21.1-11; Mr. 11.1-11; Lc. 19.28-40)

¹² Nchónhya chojni sátsíkji sín chjasin Jerusalén kixin tí kia pascua. A ntá tí yaon chr'éxin k'uixikónohe sín kixin tsjiji ch'ín Jesús tí chjasin ntiha.

¹³ Ntá kóchrínjin sín chaan ntakajni kjuíxinhin sín ntia itsji ch'ín Jesús, itsje sín, ntáchro sín kixin:

—Tjancheheni Dios kjuasáya. Imá jína tí nkexro kuixin tí kjuachaxién It'eni tjen nkaya nkajni. Imá jína tí ch'ín Rey ts'etuhenhen tí nación Israel —ichro sín itsje sín.

¹⁴ Ntá tsík'itja ch'ín Jesús ijnko kolócho la ntá kjuák'ekjen ch'án, éxí nixja itén Dios kixin:

¹⁵ Chrakonhyará jahará tjejorá chjasin Jerusalén, tsjehérá ó tje kui tí ch'ín Rey kuéntará, tje kjen ch'án ijnko kolócho.*

¹⁶ A ntá tió kónhen tíha kíenxínnya tí sín k'uájiko ch'ín Jesús kixin nkekuènté xikaha kónhen. A ntá chr'éxin tió kjuixin sákjujia ch'án nkaya nkajni ntá xraxinkaon sín kixin xikaha tsíkjin tí sín k'uéchrónka itén Dios ósé nkexrí tsonhen ch'án, na ntá xikaha chaxín xiteyá tí chrónka sín senó kixin xikaha tsonhen ch'án.

* 12:15 Zacarías 9.9

17 Mé xikaha kaín tí sín tsíkójnkotsé tí kjuák'e ch'ín Jesús tió k'uíyehé ch'án tí ch'ín Lázaro kixin ts'axrjexín ch'án tí tòye tsíkji_xravá ch'án ntá xechón ch'án mé tí sín a mé chrónka sín tí nkehe k'uikon sín.

18 Mé xikaha sákjuíxinhin sín tí ntia tsjixín ch'ín Jesús, k'uíxikónohe sín kixin xikaha tsíkjasin ch'ín Jesús tí kjuaxroan jíé.

19 Mé xikaha ntáchro tí sín fariseo itjo sín kichó sín kixin:

—Tsjuhérá kaín rá, ninkehó tsjachahyani sich'eni kixin kaín xín chojni sákjuíchréhe tí jehe ch'án —ichro sín.

Iso sín nkivee griego tjejá sín tí ch'ín Jesús

20 Iso sín nixja griego k'uéjójákjan tí sín sákjuí sín tí kia chjasin Jerusalén tsoxraxinkakonxín sín Dios.

21 Ntá kóchjinehe sín tí ch'ín Felipe, chjasén ch'án mé Betsaida, estado Galilea, chrónóehé sín ch'án kixin:

—Tjinkaonni chrók'uikonni tí ch'ín Jesús —ichro sín.

22 Ntá ch'ín Felipe sákjuíchenka ch'án tí ch'ín Andrés. Na ntá yóí sín sákjuíchenka sín tí ch'ín Jesús.

23 Ntá ntáchro ch'ín Jesús kixin:

—Ó kjuixraká tí yaon, a ntá tí Xjeen Dios K'óna Chojni mé sátsji ch'án ts'áyéhe ch'án tí kjuachaxin kuènte It'é.

24 A ntá tsotjonkará ijnko nkehe chaxín kixin tí chrókjuítsínkahya ijnko noatrigó tí nche chrók'uenhya tí noa a, ntá jnkokoá noa chrókjuak'e. A ntá tí chrók'uen tí noa a ntá chrók'óna nchónhya noa kixin chrótjá sín.

25 A ntá tí nkexro imá tjuèhe asén kixin kohya nkehe chrók'uatínka na mé tsochóntahya ch'án kjuachón jnkochrín. A ntá tí nkexro tjejuènhya asén kjónté chrók'uénxin ntihi chjasintajni tí chrónka ch'án itén Dios na mé chr'éxin tsochónta ch'án kjuachón jnkochrín.

26 A ntá tí jnkójín nkexro tjinkaon chrókjuich'ena sín xra t'ichjánxin tsochréhe sín tí janhan. A ntá tí tjén janhan na mé kjaxin tjejó tí sín ch'ena sín xra. A ntá jnkójín sín sich'ena sín xra xikaha na mé T'aná mé tsjikosáyehe tí jehe sín.

Ch'ín Jesús chrónka ch'án kixin its'en ch'án

27 Ntá jie imá tóxakonhen asenná. ¿Nkehe chróntáxrjan? ¿Á chrókjuáncháha T'aná kixin sinchekaána ch'án tí nkehe tsona jie o náhí? Kjánchó xra ó k'uinka xikaha tsona.

28 Jaha It'eni, tjáko_xian tí kjuachaxin kuènte ihníá —ichro ch'án.

Ntá kuínhin sín nixja ijnko nkexro nkajní ntáchro kixin:

—Ó kjuixin kjuáko_xian tí kjuachaxin la ko xikaha xikjáko_xian inaá.

29 A ntá tí sín tjejóntaxín tsíkinhin sín mé ntáchro sín kixin kjónta, la ko í so sín ntáchro sín kixin:

—Ijnko ch'ín ángel nixjehe ch'án —ichro sín.

30 Kjánchó ntáchro ch'ín Jesús kixin:

—Náhí. Jehya kixin janhan tí jie chróku_inhan tí nixja ch'án. Náhí. Nixja ch'án kixin tsinhínrá jahará.

31 Ntá jie tsitoexín tí ijíé chojni chjasintajni na mé tí nkexro t'etoan chjasintajni mé ts'axrjehe ch'án tí xra t'etoan ch'án.

32 A ntá tió tsjak'énkania ijnko ntacruz ntá nchónhya sín ts'ikon sín ntá tsitekaon sín tí janhan —ichro ch'án.

33 Mé xikaha chrónkaxín ch'án kixin nkexrí ts'enxín ch'án.

34 A ntá kjuátehe tí sín ntiha ntáchro sín kixin:

—Kuínhinni nchekuáxin sín tí xroon tsíkjin sín ósé chrónka kixin Cristo la jnkochrín tsjak'e ch'án. ¿Ntá nkekuènté ntáchrúa kixin tí Xjeen Dios K'óna

Chojni t'ichjánxin tsjak'enkáni ch'án ijnko ntacruz? ¿Xá nkexéhe tí Xjeen Dios K'óna Chojni? —ichro sín.

³⁵ Ntá ntáchro ch'ín Jesús kixin:

—Naxa tjen tí xrohi tjejókoará, kjánchó í séhya tsjak'e. Chrók'uajirá tí naxa tjen ti xrohi t'inkaséyanxín ntia. A ntá náhí la ó ts'ixin tie. A ntá tí sín ixri tí sítié a mé noehya sín nketí sátsji sín.

³⁶ Títekáonrá tí xrohi tí naxa tjen t'inkaséyan kixin mé ts'ónará chojni kuente t'inkaséyan —ichro ch'án.

Ntá kjuixin chrónka ch'ín Jesús tíha ntá sákjuí ch'án kjuák'eméhe ch'án tí jehe sín.

Tí sín judío kuítekakonhya sín tí ch'ín Jesús

³⁷ K'uékjasin ch'ín Jesús nchónhya kjuaxroan jié k'uíkonxín kon sín ntá kjónté kuítekakuenhya sín ch'án

³⁸ kixin mé xíkaha tsoxiteyá tí nkehe tsintáchro ch'ín Isaías tsíkjin ch'án ósé kixin:

Ìnchéni, kohya nkexro kuítekaon tí nkehe chrónkani.

Kohya nkexro kjuínchenohe Dios tí kjuachaxin jié kuente ch'án.†

³⁹ Méxra kuítekakuenhya sín tí ch'ín Jesús éxí tsíkjin ch'ín Isaías kjaxin kixin:

⁴⁰ Dios kjuínchek'ikonhya ch'án sín la ko kjuínchecha ch'án asén sín,

kixin ntá chrók'uikonhya sín,

la ko chrókiénxínhya sín,

kixin ntá chrókóchjinehya sín tí janhan kixin chrókjuíntakitoha sín jína.‡

⁴¹ Xíkaha k'uéchrónka ch'ín Isaías imá ósé kixin k'uék'ikon ch'án tí kjuachaxin jié kuente Jesús ntá k'uéchrónka ch'án nkexrí tsjak'e tí ch'ín Jesús.

⁴² Kjánchó itsjé tí sín judío t'etoan kuítekaon sín tí ch'ín Jesús kjánchó noxínhya chrónka sín. Chrakonhen sín tí sín fariseo kixin chrókónínkaon sín la í chrókjuanjonhya sín kjuachaxin chrók'uixenhen sín tí ninkoe sín judío.

⁴³ Mé xíkaha imá kóxrjínhin sín kixin chojni chjasintajni chrókjuikosáyehe sín ntá kánhyó kjueyá sín kixin chrókjuikosáyehe sín Dios.

Tí nkehe ntáchro ch'ín Jesús mé tsitoexixin ijié chojni

⁴⁴ Ntá itsen nixja ch'ín Jesús ntáchro ch'án kixin:

—Tí títekáonrá tí janhan na mé jehya janhván títekáonrá na mé kjaxin títekáonrá T'aná, mé tí nkexro k'uetuanna k'uinka.

⁴⁵ Éxí tí t'ikonrá tí janhan mé xíkaha t'ikonrá tí nkexro k'uetuanna k'uinka.

⁴⁶ A ntá janhan mé xrohi k'uinka chjasintajni kixin tí sín títekaon sín tí janhan ts'ejóhya sín tí sítié a.

⁴⁷ A ntá tí jnkojínrá tinhínrá tí nkehe xrjanka ntá títekákonnahyará la jehya janhan sintakjasótiará kixin jehya kixin k'uinka sintakjasóte chojni chjasintajni. Náhí. K'uinka kixin sintakaá chojni.

⁴⁸ A ntá tí títekákonnahyará tí janhan la ko títekákonnahyará tí tan kuéntana la ó siín nkexrí tsitoexixin ijiará, na mé éxí tí tan xrjanka mé Dios sinchekitoxin ijiará tí yaon tsjixixín chjasintajni.

⁴⁹ Jehya tí nkehe kuéntana tjéxrjanka. Náhí. T'aná na mé tí nkexro k'uetuanna k'uinka mé k'uetuanna nkehe tsoxrjanka la ko nkehe tsjækua.

⁵⁰ A ntá nòna kixin tí nkehe k'uetuanna T'aná mé xranjonxín tí kjuachón jnkochríxín. Mé xíkaha tí nkehe ntáxrjan mé tjéxrjanka kixin T'aná mé k'uetuanna.

† 12:38 Isaías 53.1 ‡ 12:40 Isaías 6.10

13

Ch'ín Jesús kjuínchek'ònti ch'án toté tí sín k'uájiko ch'án

¹ A ntá tí yaon xika tí ntóye tsjasin sín tí kia pascua. A ntá ch'ín Jesús ó nohe ch'án kixin ó kjuixraká tí hora tsítóhe ch'án chjasintajni sátsjichréhe ch'án It'é ch'án. Xráxín tjuèhé ch'án tí sín kuènte ch'án chjasintajni, a ntá jie tsjakoxin ch'án kixin imá tjuèhe ch'án tí jehe sín.

² A ntá tí ch'ín Tsochren tsík'etuenhen asén ch'ín Judas Iscariote, it'é mé it'in Simón, kixin sinchekji ch'án tí ch'ín Jesús.

³ Ntá ch'ín Jesús la ó nohe ch'án kixin tsíkixin ch'án tí tjen Dios la ko xikjan ch'án sátsjichréhe ch'án Dios ínaá. La ko ó nohe ch'án kixin It'é ch'án tsíkjanjon kjuachaxin ts'etuenhen ch'án kaín xín nkehe.

⁴ Ntá naxa tjejóne sín ntá k'uínkatjen ch'ín Jesús kuakitsje ch'án tí ka titsáte ch'án la kuákja ch'án ijnko ka xámáxin chojni t'ónti k'uínkat'óxin ch'án.

⁵ Ntá kuikja ch'án ijnko nkehe ntá, ntá kjuankixin ch'án kjuínchek'ònti ch'án toté jnkojnko tí sín k'uájiko ch'án la ko kjuínchexámáxin ch'án tí ka k'uínkat'óxin ch'án.

⁶ Na ntá tió kjuíjixraká tí tjen ch'ín Pedro, a ntá ntáchro ch'ín Pedro kixin:

—Jaha Ìnchéni la, ¿nkekuènté chrókjuínchek'óntia toténi? —ichro ch'án.

⁷ Ntá kjuátehe ch'ín Jesús ntáchro ch'án kixin:

—Jaha la naxa tiénxinhya tí nkehe tjét'a janhan. Chr'éxin ntá tsiénxian nkekuènté tjét'a tíha —ichro ch'án.

⁸ Ntá ntáchro ch'ín Pedro kixin:

—Jaha la sinchek'óntihya toténi —ichro ch'án.

Ntá ntáchro ch'ín Jesús kixin:

—Tí sintak'óntihya tí jaha la kjá ninkehó tsochontahya tí janhan —ichro ch'án.

⁹ Ntá kjuátehe ch'ín Simón Pedro ntáchro ch'án kixin:

—Náhi, Ìnchéni. Jehya tí toténi ó chrókjuínchek'óntia. Kjaxin itjani la ko ikjani chrókjuínchek'óntia —ichro ch'án.

¹⁰ Ntá ntáchro ch'ín Jesús ínaá kixin:

—Tí sín tsíkixin tsík'ónti la t'ichjánxinhya kuenté sín ts'ónti sín ínaá. Náhi. Jehó toté sín ó mé t'ichjánxin naxa ts'ónti kixin kuenté la ó tjóá. A ntá jahará la ó tjóará, kjónté kénhyará —ichro ch'án.

¹¹ Mé xikaha ntáchro ch'ín Jesús kixin kénhya sín tjóá sín kixin ó nohe ch'án nkexro sinchekji ch'án.

¹² Ntá tió kjuixin kjuínchek'ónti ch'án toté sín kaín sín ntá xík'inkáya ch'án ínaá tí ka kuítsáte ch'án ntá kjuák'etjaxin ch'án tí k'uínkatjenxin ch'án. Ntá ntáchro ch'án kixin:

—¿Á kiénxinrá tí nkehe kjuít'a?

¹³ Jahará la ntáchrorá kixin janhan Maestro kuéntará la ko Ìnchárá. Chaxín ntoá ntáchrorá kixin janhan tíha.

¹⁴ Janhan tí Maestro kuéntará la ko ìnchárá kjuíntak'óntia totará. A ntá jahará kjaxin xikaha chrókjuínchek'óntirá toté kíchuára.

¹⁵ Janhan mé kjuákoxian kixin xikaha chrókjuich'erá éxí kjuít'a janhan.

¹⁶ Ijnko nkehe chaxín tsotjonkará kixin tí sín ch'exón xra mé t'etoanhya sín éxí t'etoan tí lámoe sín, la ko tí sín k'uáyéhe sín ijnko xra t'etoanhya sín éxí t'etoan tí sín kjuanjon tí xra a.

¹⁷ Tí chrókiénxinrá nkehe tíha la ko chrókjuínchexiteyará la chrókócháhará má.

18 'Jehya kaín rá xíkaha ntáxrjan. Ó nòna kixin nkexro kjuéyá janhan. Kjánchó t'ichjánxin tsoxiteyá tí nkehe tsíkjin sín ósé ntáchro kixin: "Ijnko nkexro tjénekan mé tsjanjonkian."*

19 Mé xíkaha tjétjonkará senó kixin tió ts'atsínka tíha ntá tsítekáonrá kixin janhan mé tí nkexro xráxin tjen.

20 Ijnko nkehe tjetoan tjétjonkará kixin tí tsjánjonrá kjuachaxin tsitohe tí chojni ichr'an janhan, mé éxí yóhe chrókjuánjonrá kjuachaxin chrókuitohe tí janhan, a ntá tí tsjánjonrá kjuachaxin tsitona janhan mé éxí yóhe chrókjuánjonrá kjuachaxin chrókuitohe tí nkexro k'uetuanna k'uinka —ichro ch'ín Jesús.

*Ch'ín Jesús chrónka kixin ch'ín Judas sinchekji ch'án
(Mt. 26.20-25; Mr. 14.17-21; Lc. 22.21-23)*

21 Ntá kjuixin chrónka ch'ín Jesús tíha, ntá kóxakonhen asén ch'án má ntá ntoá chrónka ch'án kixin:

—Ijnko nkehe tjetoan tsotjonkará kixin jnkojínrá tjejorá ntihi mé sinchekjiráni —ichro ch'án.

22 Ntá tí sín k'uájiko ch'án kjuanjixin komáxin la ko í komáxin kichó sín kixin noehya sín nkexro tí ntáchro ch'án.

23 A ntá ijnko ch'ín k'uájiko ch'ín Jesús imá tjuèhe ch'án itjen ch'án chjinaxón tí tjen ch'ín Jesús tjejóne sín.

24 Ntá ch'ín Simón Pedro kjuakoxín seña k'uetuñhen ch'án tí í jnko ch'ín a kixin:

—Tjanchankíhí ch'án nkexro tíha —ichro ch'án.

25 A ntá tí ch'ín a na mé antsí kóchjinehe ch'án tí ch'ín Jesús, ntá kjuanchankí ch'án ntáchro ch'án kixin:

—Inchéni, ¿nkexro tíha? —ichro ch'án.

26 A ntá kjuátehe ch'ín Jesús ntáche ch'án tí ch'ín a kixin:

—Sintakjata it'ò niotja, a ntá tí nkexro tsotjaha tí t'ò niotja a mé tí nkexro a —ichro ch'án.

A ntá mé xíkaha kjuínchekjata ch'ín Jesús it'ò niotja ntá chjéhe ch'án tí ch'ín Judas Iscariote, it'é ch'án mé it'in Simón.

27 Ntá k'uáyéhe ch'án tí niotja ntá tuénxín k'uixenhen asén ch'án tí ch'ín Tsochren. Ntá ntáche ch'ín Jesús tí jehe ch'án kixin:

—Tí xra tjinkávan sich'e la jaí tóxakonhan —ichro ch'án.

28 Kjánchó nijnko tí sín tjejóne ntiha kienxínhya sín nkekuènté xíkaha ntáchro ch'án.

29 Ch'ín Judas la t'ayakonhen ch'án tí nkehe tjinká chichaon ntá iso sín kjuenkayáxin sín kixin ách'e ch'ín Jesús mé k'uetuñhen ch'án tí ch'ín Judas kixin ichrén nkehe sátsjik'ena ch'án kuènte tí kia a, o ách'e ichrén nkehe sinchekitonhen ch'án tí sín nòna a.

30 Ntá k'uáyéhe ch'ín Judas tí niotja, a ntá k'uaxrjexín ch'án ntiha. A ntá ó k'uúxin tie.

Ijnko nkehe nixin k'uetuan ch'ín Jesús

31 A ntá ó kjuixin sátsíkji ch'ín Judas, ntá ntáchro ch'ín Jesús kixin:

—A ntá jie tsonoxín tí kjuachaxin jié kuènte tí Xjeen Dios K'óna Chojni la ko tsjakoxin ch'án tí kjuachaxin jié kuènte Dios.

32 Na mé xíkaha tí Xjeen Dios K'óna Chojni mé tsjakoxin tí kjuachaxin jié kuènte Dios. A ntá Dios mé tsjakoxin ch'án tí kjuachaxin kuènte Xjeen ch'án la tjoka tsoxiteyá.

* 13:18 Salmo 41.9

³³ Xjeenni, í séhya naxa tsjak'é janhan ts'ejókoará ntihi. Ntá jahará mé ts'ajikjéyará tí janhan. Ntá éxí yóhe k'uétjanka tí sín judío mé tjonkará kjaxinrá kixin: Ninkexró xitjahya tsjiji sín tí sátsjiyá janhan.†

³⁴ Ijnko nkehe nixin tétuanhanrá ijie kixin chrótjuèhérá kichuára éxí yóhe tjuahará mé xikaha chrótjuèhérá kichuára.

³⁵ Tí tsotjuèhérá kichuára ntá tsonoexín kaín xín chojni siín chjasintajni kixin tinkachónkirá tí janhan —ichro ch'án.

Chrónka ch'ín Jesús kixin ch'ín Pedro sinchemá ch'án kixin chónhya ch'án tí jehe ch'án

(Mt. 26.31-35; Mr. 14.27-31; Lc. 22.31-34)

³⁶ Ntá kjuanchankíhi ch'ín Simón Pedro tí ch'ín Jesús kixin:

—Ìnchéni, ¿nketí sátsjia? —ichro ch'án.

Ntá kjuátehe ch'ín Jesús ntáchro ch'án kixin:

—Tí nó sátsjiyá xitjahya tsochréhérá jaí. Ntá chr'éxin tsjasánchréhérá ntiha —ichro ch'án.

³⁷ A ntá ntáchro ch'ín Pedro kixin:

—¿Nkekuènté xitjahya tsochráha tí jaha jaí? Kjónté chrók'uényákonhán —ichro ch'án.

³⁸ Ntá kjuátehe ch'ín Jesús ntáchro ch'án kixin:

—¿Á chaxín ts'enyákonna jaha? Ijnko nkehe chaxín tsotjonka kixin naxa tsotsjehya tí kochíntoa la ó tsjixin sinchemána níya kixin chonhyana, tsixrua.

14

Jesús mé ntia sátsjixinni tí tjen It'éni tjen nkaya nkajni

¹ Tóxakuanhyará jahará. Títekáonrá Dios la ko kjaxin títekáonrá tí janhan.

² Ntoe T'aná nchónhya nchia siín ts'ejóni. A ntá tí xikahya chrók'uixin la xikahya chrótjonkará. Méxra sátsjiyá sintayóxian tí chrók'uejóni.

³ A ntá tí sátsjiyá sintayóxian, ntá tió tsjixin ntá ts'inka inaá, ntá sátsjini kixin jahará kjaxin chrók'uejorá ntiha tí tsjak'é janhan.

⁴ Jahará la ó nohará nketí sátsjiyá la ko ó nohará tí ntia a —ichro ch'án.

⁵ Ntá kjuátehe ch'ín Tomás ntáchro ch'án kixin:

—Ìnchéni, noehyani nketí sátsjia jaha. ¿A ntá nkexrí chrókónoheni tí ntia a? —ichro ch'án.

⁶ Ntá kjuátehe ch'ín Jesús ntáchro ch'án kixin:

—Janhan mé tí ntia la ko janhan mé tí tan chaxín la ko janhan mé tsjánjuan tí kjuachón. Jehó tí nkexro tsitekaon tí janhan mé jina tsjiji tí tjen T'aná.

⁷ Tí chrókjuátsoanrá tí janhan ntá xikaha chrókjuátsoanrá T'aná kjaxin. Na ntá ó choxínra ch'án jie la ko ó tjejókomará ch'án —ichro ch'án.

⁸ Ntá ntáchro ch'ín Felipe kixin:

—Ìnchéni, títóhéni kixin tsochóxinni It'á. Táho mé tjinkaonni —ichro ch'án.

⁹ Ntá kjuátehe ch'ín Jesús ntáchro ch'án kixin:

—Felipe, ósé tjejóni, ¿a ntá naxa tjátsoanhya tí janhan ní? A ntá xikaha tí t'ikonrá tí janhan na mé xikaha chrók'uikonrá T'aná. ¿Nkekuènté tjanchàna kixin chrókuitoha chrók'uikonrá tí T'aná?

¹⁰ ¿Á títekákonhya jaha kixin janhan jnkokoá tjékian T'aná, la ko T'aná tjen tí tjeñ janhan? Tí nkehe níjja janhan la jehya kuèntana. Náhí. T'aná tjékian janhan mé tjech'e ch'án tí xra kuènte ch'án.

¹¹ Títekáonrá kixin jnkokoá tjékian T'aná, a ntá T'aná itjen tí tjeñ janhan. Kjónté kuítekákonhyará xikaha la chrókuítekáonrá kixin tí kjuaxroan jie kjuákoxian k'uikonrá.

† 13:33 Juan 7.33

12 Ijnko nkehe chaxín tjonkará kixin tí chaxín tsitekáonrá tí janhan ntá kjaxinrá tsjachará sich'erá xra yóhe tjet'a la ko kjaxin ixra antsí jié tsjachará sich'erá kixin janhan la ó sátsjiyá tí tjen T'aná.

13 Kaín nkehe tsjanchatóxixínrá tí nina na mé tsjánjuan kixin xikaha tsjákoxián tí kjuachaxin kuente T'aná.

14 Tí chrén nkehe tsjanchatóxixínrá nina la janhan la tsjánjuan.

Ch'ín Jesús chrónka ch'án kixin chaxín tsochr'án ch'án tí Nchakuen Dios

15 Tí chaxín tjuèhérá tí janhan ntá chrókjuinchexiteyéhérá tí nkehe kuétuanhanrá.

16 Ntá tsoxrjannóaha T'aná kixin tsochr'án ch'án Nchakuen ch'án kixin tsjinkitsa tí jahará la ko sinchechéhe asánrá la mé ts'ejokoará jnkochrín.

17 Jehe ch'án mé Nchakuen chaxín. Tí sín chjasintajni xitjahya ts'áyéhe sín ch'án kixin t'ikonhya sín ch'án la ko chónhya sín ch'án. Kjánchó jahará ó choxínrá ch'án kixin tjejokoará ch'án la ko ts'ejokoará ch'án jnkochrín.

18 Janhan na tsitoáhyará nèrá jahóra, na mé tsokjan ínaá kixin ts'ejóni.

19 A ntá séhya ntá tí sín chjasintajni ts'ikonhya sín tí janhan ínaá. Kjánchó jahará mé ts'ikonrá tí janhan. Ntá kjaxinrá ts'ejochónrá kixin janhan na tjechuán.

20 A ntá tí yaon a chrókónohará kixin T'aná la ko janhan jnkokoá tjejian la ko kjaxin jahará la ko janhan jnkokoá tjejóni.

21 Tí nkexro nohe tí nkehe tétóan la ko sinchexiteyéhe sín mé xikaha tsjákoxián sín kixin chaxín tjuèhe sín tí janhan. A ntá tí tjuèhe sín tí janhan ntá T'aná mé tsotjuèhe tí jehe sín la ko kjaxin janhan tsotjuaha sín la ko tsjákoxián nkexrí tjeñ janhan —ichro ch'ín Jesús.

22 A ntá tí ch'ín Judas, jehya tí ch'ín Iscariote tíha, na mé kjuanchankí ch'án kixin:

—Ínchéni, ¿nkekuènté jehóni tjákoxián, a ntá tjákoéxinhya tí chojni chjasintajni? —ichro ch'án.

23 Ntá kjuátehe ch'ín Jesús ntáchro ch'án kixin:

—Tí nkexro tjuèhe tí janhan mé sinchexiteyéhe tí nkehe tétóan. La ko T'aná mé tsotjuèhe tí jehe sín la ntá T'aná la ko janhan ts'ejókoni sín.

24 A ntá tí sín tjuèhya tí janhan la mé nchexiteyéhya sín tí nkehe tjákua. A ntá tí nkehe tjákua tjejotinhínrá la jehya kuèntana. Náhi. Kuente T'aná tí nkexro k'uetuanna k'uinka.

25 Naxa tjejóni la tjetjonkará kaín tíhi.

26 A ntá Nchakuen T'aná tsochr'án ch'án kjuachaxin nina mé tsjinkitsa tí jahará la ko sinchechéhe asánrá la ko tsjákoahará kaín nkehe la ko sinchexraxinkaonrá kaín nkehe xrjanka.

27 Kjuaxróxin tsitohá la ko kjuaxróxin kuèntana tsotjahará. Jehya éxi tí kjuaxróxin chrókjuanjon tí sín chjasintajni. Náhi. Chrókóxakuenhya asánrá la ko chróchrakonhyará.

28 Ó kuínhínrá ntáxrjan kixin sátsjiyá la ko tsokjan janhan ts'ejóni ínaá. Tí chaxín tjuèhérá tí janhan ntá chrókócháhará tí kuínhínrá kixin sátsjiyá tí tjen T'aná kixin antsí t'etóan ch'án la kánhyó tétóan janhan.

29 Senó tjetjonkará tíhi kixin tió tsonhen tíha la ts'ikonrá ntá tsitekáonrá jahará.

30 Ntá jie la í séhya tsonixjahará kixin tí jie itsi tí ch'ín Tsochren, mé tí nkexro t'etuennen tí sín chjasintajni. A ntá jehe ch'án la ninkehó t'etuannahya tí janhan.

31 Kjánchó t'ichjánxin kixin xikaha tsonhen ntá tí sín chjasintajni mé tsonohe sín kixin tjuahá T'aná la ko nchexiteyáha tí nkehe k'uetuanna ch'án. Ntá jie t'inkatjenrá sátsjixínni ntihi.

15

Tí nta t'óna to uva la ko tí chaan nta

1 Janhan mé éxí yóhe ijnko ntanò tjechón itsa to uva la ko T'aná mé éxí yóhe tí nkexro t'ayakonhen tí nta a.

2 Tsochrínjin ch'án tí chaan nta t'ónahya to. A ntá tí chaan nta t'óna to mé nchetjuák'á ch'án kixin ntá ts'óna antsí má tsjé to.

3 A ntá jahará la kótjuáxinrá tí tanná k'uetjonkará senó.

4 Tí tsitoéhyará tí janhan ntá kjaxin janhan tsitoahya tí jahará. Mé xikaha ijnko chaan nta ts'axrjentehe tsjachahya jehó ts'óna to, la ko xikaha jahóra tsjachahyará sich'erá tí xra kuéntana tí tsitohérá tí janhan.

5 Janhan na mé yóhe tí ntanò, a ntá jahará la tí chaan tí ntanò tsík'ayanta. Tí nkexro jnkokoá tjenkayáxinkian mé tsjacha ts'óna nchónhya to. A ntá tí tsinkáchónkihya sín tí janhan la ninkehó xra tsjachahya sín sich'e sín.

6 A ntá tí nkexro jnkokoáhya tjenkayáxinkian na mé éxí yóhe tí nta ch'ehya xra tsíkóchrínjin sín tsík'itjí sín chrínta tí nonte a tsoxámá ntá tsoxrejo ntá tsoche.

7 Ntá tí chaxín tsitoéhyará tsinkachónkirá tí janhan la ko ts'itjányanhyará tí nkehe kjuákohará ntá tsjanchiará ichrén nkehe tjinkáonrá la ts'ayéhérá.

8 A ntá T'aná la tsochéhe ch'án tí ts'ónará itsjé to. Mé xikaha tsjákoxinrá kixin tinkachónkirá tí janhan.

9 Janhan tjuahará tí jahará éxí tjuana T'aná. Chrókónohará kixin tjuahará.

10 Tí tsítekáonrá tí nkehe kuétuñhanrá ntá tsonohará kixin tjuahará éxí yóhe kjaxin janhan ntaxiteyá tí nkehe k'uetuanna T'aná ntá kónòna janhan kixin tjuana ch'án.

11 Mé xikaha tjonkará kaín tíha kixin ntá éxí chàna mé xikaha tsjintaxín tsochéhe asánrá.

12 Tí nkehe kuétuñhanrá la mé tíhi kixin chrótjuèhérá kíchuará éxí tjuahará xikaha.

13 Ninkexró chrókóyóhe éxí tí nkexro imá tjuèhe tí sín chóxin ch'án ntá ts'enyákonhen ch'án tí jehe sín.

14 Jahará la chojni choxian tí tsítekáonrá tí nkehe tétuñhanrá.

15 Ntáxrjanhya janhan kixin jahará chojni ch'exón xra kixin tí chojni xikaha ch'exón xra mé noehya sín nkehe tí xra ch'e tí lámoe sín a. Náhí. A ntá jahará la chojni choxian kixin kaín xín nkehe kjuákona T'aná mé kjuákohará.

16 Jehya kixin jahará kjuéyará tí janhan. Náhí. Janhan mé kjuéyá tí jahará kixin tsotjahará xra, a ntá éxí yóhe to xé mé chrók'uaxrje jína tí xra sich'enará kixin chrók'uitjányahya. A ntá T'aná mé tsotjahará ch'án kaín xín nkehe tsjanchexínrá nina.

17 Mé xikaha tétuñhanrá kixin tsotjuèhérá kíchuará.

Tí sín chjasintajni nínkakonhen sín tí ch'ín Jesús la ko tí sín tinkáchónki ch'án

18 Tí tsonínkakonhanrá tí chojni chjasintajni ntá chrókónohará kixin senó janhan nínkakonna sín.

19 Tí chrókókuéntará chjasintajni ntá tí sín chjasintajni chrótjuahará sín kixin naxa kjéhyará sín. Kjánchó janhan kjuéyá tí jahará kixin chrók'uaxrjéjxanxínrá tí sín síin chjasintajni. A ntá tí sín chjasintajni nínkakonhanrá sín kixin jahará jahyará kuéntará chjasintajni.

20 Xŕaxinkáonrá tí nkehe tsítjonkará ḱixin tí sín ch'ehe lámøe sín xŕa tjetóxinhya ts'etøan sín.* Éxí yóhø chónkina sín mé xikaha tsochónkíhi sín tí jahará. A ntá tí kuítekaon sín tí nkehe kjuákøhø sín ntá kjaxin tsitekaon sín tí nkehe naxø tsjákohérá sín.

21 Mé xikaha sit'ahará sín ḱixin jahará tinkachónkirá tí janhan la ko jehe sín chónhya sín tí nkexro ichr'ánna k'uinka ntihi.

22 Tí chrók'uinkahya janhan ntihi chrónixjahya sín ntá chrókuamáhya sín jie. Ntá jie kohya nkerí tsaáxin sín ḱixin tí jie tinkákjasin sín.

23 Tí sín nínkakonna mé xikaha nínkakonhen sín T'aná.

24 Chróchóntahya sín jie tí chrók'uejókianhya sín ntihi chrókuásinhya janhan kjuaxroan jie éxí tsíkjasinhya ninkexró senó. Ntá jie ó k'uíkon sín kaín tí kjuaxroan, ø ntá kjónté nínkakonna sín tí janhan la ko nínkakonhen sín T'aná kjaxin.

25 Mé xikaha tsonhen kaín tíha ḱixin ntá tsoxiteyá tí nkehe ntáchro tí ley kuènte sín ḱixin: "Kohya jie kjuásian janhan ntá kjónté kónínkakonna sín."†

26 A ntá tsi tí nkexro tsjinkítsa la ko sinchechéhe asánrá. Tíha mé tí Nchakuen Dios chaxín. Janhan mé tsochr'an ch'án ḱixin tí kjuachaxin kuènte T'aná. A ntá jehe ch'án mé tsochrónka nkexrí tjén janhan

27 la ko jahará kjaxinrá tsochrønkará nkexrí tjén janhan ḱixin tí xrankíxixín la k'uéjóni jnkokøá.

16

1 Kaín tíhi tjetjonkará ḱixin chrókuiøéhyará tí nkehe kjuákøhárá.

2 Tí sín judío tsjanjonhya sín kjuachaxin ts'ixenhenrá ninkøé sín la ko tsjixraká tí yøon ḱixin tí sín ts'óyán sín tí jahará tsontáchro sín ḱixin xikaha mé tjejóh'e sín xŕa kuènte Dios, tsixro sín.

3 Mé xikaha sich'e sín ḱixin chónhya sín T'aná la ko chónhyana sín.

4 A ntá tjonkará kaín tíhi ḱixin tió tsjixraká tí yøon xikaha tsonhen ntá tsoxráxinkáonrá ḱixin ó k'uéjónkará senó a.

Tí xŕa ch'e Nchakuen Dios

Tí xrankíxixín k'uéjónkahyará tíhi ḱixin jnkokøá k'uék'ejóni.

5 Ntá jie sátsjiyá tí tjen tí nkexro ichr'ánna k'uinka. Kjánchø nijnkorá tjanchankíhyará nketí sátsjiyá.

6 Ntá kjuixin tjonkará tíha ntá imá t'avará ḱixin kuínhínrá xikaha xrjanka.

7 A ntá chaxín tí nkehe tjetjonkará ḱixin íchá jína sátsjiyá ḱixin jahará jína chrók'uejorá. A ntá tí sáchrókjuíhya ntá chrókuihya tí nkexro tsjinkítsará. A ntá tí sátsjiyá janhan ntá tsétoan ḱixin itsi ch'án ntihi.

8 A ntá tió tsi ch'án mé sinchexraxinkaon ch'án tí chojni chjasintajni ḱixin jehe sín mé tjasin sín jie, la ko itjen ijnko ntia ntoá chrókuakja sín la ko Dios mé sinchekitoexín tí jie kjuasin sín.

9 Xikaha chóna sín jie ḱixin tinkáchónkihya sín tí janhan.

10 A ntá tsonøhe sín ḱixin itjen tí ntia ntoá ḱixin sátsjiyá tí tjen T'aná ntá ts'ikonhyará tí janhan ínaá,

11 la ko tsonøhe sín ḱixin Dios sinchekitoexín ijie ḱixin ó kjuixin kuítóexín ijie tí nkexro t'etøan chjasintajni ḱixin tsjasóte.

12 Naxø chonta janhan itsje nkehe chrótjonkará, kjánchø chrókuachahyará chrókiénxinrá jie.

13 A ntá tió tsi tí Nchakuen Dios chaxín ntoá ntá jehe tí Nchakuen Dios mé tsjákohará ch'án kaín xín nkehe ntoá. Méxrø jehya tí nkehe kuènte ch'án

* 15:20 Juan 13.16 † 15:25 Salmo 35.19; 69.4

tsochrónka ch'án na mé tí nkehe tsinhin ch'án mé tsochrónka ch'án tsjakohará ch'án tí nkehe tsonhen chr'éxin.

¹⁴ Jehe ch'án mé tsjikosàyana ch'án kixin ts'áyéhe ch'án tí nkehe kuèntana ntá tsjakohará ch'án nkehe tíha.

¹⁵ Kaínxin nkehe chóna T'aná na mé kuèntana. Mé xikaha ntáxrjan kixin tí Nchakuen Dios chaxín ntoá mé ts'áyéhe ch'án tí nkehe kuèntana ntá tsjakohará ch'án nkehe tíha.

Senó ts'ává sín ntá chr'éxin tsochéhe sín

¹⁶ 'Ntá í séhya la í ts'ikonhyará tí janhan. La ko kjaxin séhya xik'ikonrá tí janhan ínaá kixin sátsjiyá tí tjen T'aná —ichro ch'án.

¹⁷ Ntá iso tí sín k'uájiko ch'án mé kjuanchankíhi sín kichó sín kixin:

—¿Nkexrí t'axrjexín tí nkehe ntáchro ch'án kixin í séhya ts'ikonhyani ch'án la ko kjaxin séhya ntá xik'ikonni ch'án ínaá kixin sátsji ch'án tí tjen It'é ch'án?

¹⁸ ¿Nkexrí t'axrjexín tí ntáchro ch'án kixin “í séhya”? Méxra tienxínhya nkehe tí ntáchro ch'án —ichro sín.

¹⁹ Ntá kónohe ch'ín Jesús tí nkehe chrókjuanchankíhi sín ch'án ntá ntáche ch'án sín kixin:

—Xikaha tjonkará kixin í séhya ts'ikonhyará tí janhan la ko kjaxin séhya xik'ikonrá tí janhan ínaá. ¿Á tíha mé tjetjanchankíhírá kichuára ní?

²⁰ Tjéjtjonkará ijnko nkehe chaxín kixin imá tsotsjankará la ko ts'avará. A ntá tí chojni chjasintajni la tsochéhe sín. A ntá jahará ts'avará la ko sintaníhará kjónté chr'éxin tsocháhará má.

²¹ Éxí yóhe ijnko tjan sinchekokjíhi tjan xjeen tjan mé imá tóxakonhen tjan kixin ó kjuixraká tsjoté tjan. A ntá tsjixin tsokjíhi xjan ntá í xraxinkakonhya tjan nkexrí kjoté tjan kixin chéhe tjan kokjíhi ijnko xjan ntihi chjasintajni.

²² Mé xikaha jahará ijie t'avará. Ntá xik'ikuán tí jahará ínaá ntá imá tsochéhe asánrá la ko tsokohya ninkexró tsakitsajahará tí kjuachéhe tsochontará.

²³ 'Tió tsi tí yaon a ntá tsjanchankínahyará ninkehó. Chaxín tí nkehe tjéjtjonkará kixin T'aná tsotjáhará ch'án kaín nkehe tsjanchatóxixínrá nina.

²⁴ Naxa kjuánchatóxixínhyará ninkehó tí nina. Ntá jie tjanchará la ts'ayéhé, a ntá tsjintaxín tsocháhará.

Ìnchéni Jesucristo mé kjuacha ch'án k'uetōan ch'án, ntá chjasintajni la náhi

²⁵ 'Tí nkehe tjéjtjonkará mé kjuintayóaxián ó. Ntá tsjixraká tí yaon la í ninkehó sintayóaxián na mé ntoá tsotjjonkará nkexrí tjen T'aná.

²⁶ A ntá tí yaon a mé tsjanchaxínrá nkehe nina. Ntá ntáxrjanhya tíhi kixin tsonixjayákonhanrá tí tjen T'aná

²⁷ kixin jehe T'aná mé tjuahará jahará. Na mé tjuahará ch'án kixin jahará tjuanará tí janhan la ko kixin kuítekáonrá kixin janhan k'uinkaxian tí tjen Dios.

²⁸ K'uaxrjéxian tí tjen T'aná k'uinka chjasintajni. Ntá jie la ó tsitōha chjasintajni ntá sátsjiyá ínaá tí tjen T'aná —ichro ch'án.

²⁹ Ntá ntáchro tí sín k'uájiko ch'án a kixin:

—Ntá jie ntoá tjéchronka ninkehó ncheyoéxinhya.

³⁰ Ntá jie tienxínni kixin jaha mé noha kaín xín nkehe la ko t'ichjánxinhya kixin jnkójín nkexro chrókjuanchankíha sín ichrén nkehe. Méxra xikaha titekaonni kixin jaha mé k'uinkaxian tí tjen Dios —ichro sín.

³¹ Ntá kjuátehe ch'ín Jesús ntáchro ch'án kixin:

—¿Á jie kuítekáonrá ní?

³² Ntá tsi tí yaon na mé jie tíha na ntá tsochakonrá jnkojnkorá tsoxíkará sátsjirá ntá tsitonará janhván tsjak'é. Kjánchó jehya janhván tjén. T'aná mé tjékian.

³³ Tjéjtjonkará kaín tíhi kixin ntá kjuaxróxin ts'ejó asánrá tinkachónkirá tí janhan. A ntá ntihi chjasintajni kjónté kjuaxróxinhya tjejorá tjejtjasóterá kjánchó chakonhyará kixin janhan mé ó kjuixin kjuacha tsétoan. A ntá tí chjasintajni la kjuachahya ts'etōan —ichro ch'án.

17

Ch'ín Jesús chrónóghē ch'án It'é ch'án kixin chrók'uayakonhen tí sín k'uájiko ch'án

¹ Ntá ó kjuixin chrónka ch'ín Jesús kaín tíha ntá konta ch'án nkajni ntáchro ch'án kixin:

—Jaha It'éni, ó kjuixraká tí yaon a. A ntá jie chróchjehé tí Xjaan antsí má kjuachaxin kixin kjaxin tí Xjaan chrókjuikosáyehe tí jaha.

² Jaha tsíchjehé kjuachaxin tí Xjaan kixin ts'etuēnhen ch'án kaín xín chojni na ntá jehe ch'án tsochjéhe kjuachón jnkochrínín kaín tí sín tsíchjehé ch'án.

³ Tí kjuachón jnkochrínín mé t'axrjexín kixin tsochóxian sín tí jaha tí jnkokoá Dios chaxín tjechón la ko kjaxin tsochóxin sín Jesucristo la mé jaha kuétuēnhén ch'án kui ch'án ntihi chjasintajni.

⁴ Ó kjuixin kjuíkosáyaha tí jaha ntihi chjasintajni kjuixinna tí xra chjina sít'a.

⁵ A ntá jie It'éni, chjina jaha tí kjuachaxin jie k'uéchonta janhan tí k'uéjóni jnkokoá naxa k'ónahya chjasintajni.

⁶ Ó kjuixin kjuákohā tí sín chjina chjasintajni kixin nkexro tí jaha. Jaha mé k'uékuèntá sín tí ósé ntá jie chjina tí janhan la ó kjuákohā sín itán la ntá ijie la ó kuítekaon sín.

⁷ Ntá jie ó kjuátsōan sín kixin kaín tí kjuachaxin chonta janhan la jaha tsíkjánjuan.

⁸ Kixin ó kjuixin kjuákohā sín tí tán chjina jaha, ntá kuítekaon sín, ntá kuíenxín sín kixin mé chaxín tsík'inkaxian tí tjen jaha, na mé kuítekaon sín kixin jaha kuétuanna k'uinka.

⁹ Janhan mé xrjanóaha kixin chrók'uayakonhén tí jehe sín. Jehya kixin xrjannóaha kixin chrók'uayakonhén kaín tí chojni siín chjasintajni. Náhi. Jehó xrjanóaha kixin chrók'uayakonhén tí sín chjina kixin kuèntá sín.

¹⁰ A ntá kaín tí nkehe chonta janhan na mé kuèntá jaha la ko kaín tí nkehe kuèntá la mé kuèntana kjaxin. A ntá tí kjuachaxin jie kuèntana mé ts'inkaséyanxín tí jehe sín.

¹¹ A ntá jie tsitonahya janhan ntihi chjasintajni. Kjánchó jehe sín naxa tsitohe sín chjasintajni. A ntá jie tsjasán tí tjen jaha. Jaha It'éni imá jina jaha, t'ayakuenxián sín tí kjuachaxin tí ihniá kixin ntá jnkokoá chrókjuenkayáxin sín éxi tí jaha la ko janhan jnkokoá tjenkayáxinni.

¹² A ntá tí naxa k'uéjókian tí jehe sín ntihi chjasintajni la k'uàyakuànxián sín tí kjuachaxin tí ihniá chjina. Nijnko tí jehe sín k'uitjáyanyha sín. A ntá jnkokoá nkexro mé k'uitjáyan mé tí ch'ín xráxín ts'itjáyan kixin xikaha tsoxiteyá éxi nixja tí xroon tsíkjin sín.

¹³ Ntá jie ó tsjasán tí tjen jaha. A ntá naxa itjén janhan chjasintajni mé ntáxrjan tíhi kixin ntá tsochéhe sín éxi yóhe imá chàna.

¹⁴ Janhan mé kjuákohā sín itán jaha, a ntá jie tí sín chjasintajni mé nínkakohen tí jehe sín kixin jehe sín la jehya kuènte chjasintajni éxi kjaxin janhan na janhya kuèntana chjasintajni.

¹⁵ Tjáncháhya kixin chrókuakítsjehé sín chjasintajni. Náhí. Tjáncháhá kixin chrók'uayakonhén sín kixin chrókjuich'iyehya sín tí Jínahya.

¹⁶ Jehé sín la jehya kuènte chjasintajni éxí yóhë janhan kjaxin janhya kuènte chjasintajni.

¹⁷ Nchetjuáxian sín tí kjuachaxin kuéntá kixin itán jaha mé tí tan chaxín ntoá.

¹⁸ Éxí yóhë jaha kuétuanna k'uinka chjasintajni mé xikaha janhan tétuannhan sín kixin chrók'uejóyákjan sín tí sín chjasintajni.

¹⁹ Jehó tí xra kuéntá chrókjuít'a kixin chrókjuínkítsa tí jehé sín, a ntá jehé sín kjaxin chrókjuich'e sín tí xra kuéntá kixin kuínhin sín itán chaxín ntoá.

²⁰ 'Kjánchó jehya kixin xrjanóaha kixin chrókjuínkítsa tí jehó sín. Náhí. Kjaxin xrjanóaha kixin chrókjuínkítsa kaín tí sín tsitekaon sín chr'éxin tsinhin sín tí nkehe tsochrónka tí sín a.

²¹ Mé xikaha xrjanóaha kixin kaín tí jehé sín jnkokoá chrókjuenkayáxin sín éxí jaha It'éni la ko janhan jnkokoá tjenkayáxinni mé xikaha xrjanóaha kixin kaín tí jehé sín la ko jaha la ko janhan jnkokoá chrókjuenkayáxinni. A ntá tí sín chjasintajni chrókuitekaon sín kixin jaha tsíkétuanna k'uinka ntihi.

²² A ntá tí kjuachaxin jié chjina na mé tjaha tí jehé sín kixin ntá kaín sín jnkokoá chrókjuenkayáxin sín éxí yóhë jaha la ko janhan jnkokoá tjenkayáxinni.

²³ Janhan la ko jehé sín jnkokoá chrókjuenkayáxinni éxí jaha la ko janhan jnkokoá tjenkayáxinni. Mé xikaha tí sín chjasintajni chrókónohe sín kixin jaha kuétuanna k'uinka la ko kjaxin chrókónohe sín kixin jaha tjuéhé tí jehé sín éxí yóhë tjuana tí jaha.

²⁴ Jaha It'éni, tí sín kjuánjuan la tjínkavan kixin tí jehé sín chrók'uejókian sín tí tsjak'é janhan kixin chrók'uikon sín tí kjuachaxin jié chjina; kixin xráxín naxa k'ónahya chjasintajni k'uétjuana jaha.

²⁵ It'éni jaha, imá jina jaha. Kjónté tí sín chjasintajni naxa chónhya sín tí jaha, ntá janhan na ó xráxín choxian tí jaha la ko kaín tí sín i kjaxin ó nohe sín kixin jaha kuétuanna k'uinka.

²⁶ Ó kjuákoḥa sín kixin nkexro tí jaha la ko xikaha naxa tsjákoḥa sín, kixin éxí tjuana jaha mé xikaha chrótjuèhe sín kichó sín la ko janhan chrók'uejókian tí jehé sín —mé xikaha chrónóehë ch'ín Jesús tí It'é ch'án.

18

*Ch'ín Jesús sákjuiko sín ch'án tsjak'echjina ch'án
(Mt. 26.47-56; Mr. 14.43-50; Lc. 22.47-53)*

¹ Ó kjuixin ntáchro ch'ín Jesús kaín tíha ntá jehé ch'án la ko tí sín k'uájiko ch'án k'uaxrjexín sín ntiha k'uatòye sín tí tsaka Cedrón. Ntaha tjen ijnko nonte síin nchónhya nta k'uixenhen ch'ín Jesús la ko tí sín k'uájiko ch'án.

² Kjaxin ch'ín Judas tí ch'ín sinchekji tí ch'ín Jesús mé nohe ch'án kixin ntaha tjen tí huerto a kixin ntaha jnkoyaxón kójnkotséko ch'ín Jesús tí sín k'uájiko ch'án a.

³ A ntá ch'ín Judas ó kjuikao ch'án nchónhya sín soldado la ko iso sín policía kuènte nínko tsík'etuenhen tí sín nchat'á t'etoan la ko tí sín fariseo. Ntá kjuí sín kaín sín xraá sín chica la ko kjuikao sín xrohi t'inkaséyanxín tí kjuixin sín.

⁴ A ntá ch'ín Jesús ó nohe ch'án kaín xín nkehe ts'atsínka ch'án, ntá sákjuí ch'án kjuanchankíhi ch'án sín ntáchro ch'án kixin:

—¿Nkexro xritjéyará? —ichro ch'án.

⁵ Ntá kjuátehe sín ntáchro sín kixin:

—Tjeyáni tí ch'ín Jesús tsíkjixin chjasin Nazaret —ichro sín.

Ntá kjuátehe ch'ín Jesús ntáchro ch'án kixin:

—Janhan tíha —ichro ch'án.

A ntá ch'ín Judas tí ch'ín tsíkjinchekji tí ch'ín Jesús mé koí tjenkákjan ch'án tí jehe sín ntiha.

⁶ A ntá tió kjuátehe ch'ín Jesús kixin jehe ch'án tíha, ntá jehe sín xráchonka sín kjuítsínka sín nonte.

⁷ Ntá xíkjanchankí ch'ín Jesús ínaá ntáchro ch'án kixin:

—¿Nkexro xritjéyará? —ichro ch'án.

Ntá xíntáchro sín kixin:

—Tjeyáni tí ch'ín Jesús tsíkjin chjasin Nazaret —ichro sín.

⁸ Ntá ntáchro ch'ín Jesús kixin:

—Ó kjuixin tjonkará kixin janhan tíha. Tí xritjéyará tí janhan ntá titoherá sátsji tí í so sín xríkian —ichro ch'án.

⁹ Mé xíkaha ntáchro ch'ín Jesús kixin ntá tsoxiteyá tí nkehe tsíntáchro ch'án kixin: “Tí sín kjuanjon T'aná la ninkexró kjuíntak'itjáyanhya.”*

¹⁰ Ntá ch'ín Simón Pedro kuakitsje ch'án tí chica espada chrinkatoxin ch'án kóchrínjin ch'án tãtsjon chjina ijnko ch'ín it'in Malco, mé ijnko ch'ín ch'ehe nchat'á t'etoan xra.

¹¹ Kjánchó ch'ín Jesús ntáche ch'án tí ch'ín Pedro kixin:

—Chr'axenhén tjoé chica espada méhe. Kjá ntáchrúa kixin tsjasótehyana, kjá ichrúa. Kjánchó T'aná kjuanjon kjuachaxin kixin nchónhya tsjasótena —ichro ch'án.

Ch'ín Jesús kjuák'e nkayakon tí ch'ín t'etuñhen tí sín nchat'á

(Mt. 26.57-58; Mr. 14.53-54; Lc. 22.54)

¹² A ntá tí sín soldado la ko tí ch'ín comandante t'etuñhen sín la ko tí sín policía judío kuente nínko mé itsé sín tí ch'ín Jesús kjuínchenteto sín ch'án.

¹³ A ntá sákjuíko sín ch'án ntóe ch'ín Anás ich'ee tí ch'ín Caifás mé tí nkexro tsík'áyéhe xra nchat'á t'etoan tí nánó a.

¹⁴ A ntá tí ch'ín Caifás, jehe ch'án na mé tí nkexro tsíntáche tí sín judío kixin íchá jína kixin jnkokoá chojni chrók'uenyákonhen kaín tí sín chjasén ch'án.†

Ch'ín Pedro kjuínchemá ch'án kixin chóxin ch'án tí ch'ín Jesús

(Mt. 26.69-70; Mr. 14.66-68; Lc. 22.55-57)

¹⁵ Ch'ín Simón Pedro la ko í jnko ch'ín k'uék'ajiko ch'ín Jesús mé kuinkáchréhe sín ch'án. Tí ch'ín ijnko a mé chóxin ch'án tí nchat'á t'etoan. Ntá k'uíxenko ch'án tí ch'ín Jesús tí ntasin ntóe tí nchat'á t'etoan.

¹⁶ Kjánchó ch'ín Pedro kuítóhe ch'án ntója ntasin ó. Ntá tí ch'ín ijnko a chóxin tí nchat'á t'etoan mé k'uaxrje ch'án ntasin nixjehe ch'án tí tjan t'ayakonhen tí ntója ntasin chrónóehe ch'án tjan ntá xranjon kjuachaxin ntá k'uíxenhén ch'ín Pedro kjaxin.

¹⁷ Na ntá tí tjan t'ayakonhen tí ntója ntasin kjuanchankíhi tjan tí ch'ín Pedro kixin:

—¿Á jahya kjaxin xríkoa tí ch'ín a? —ichro tjan.

Ntá kjuátehe ch'ín Pedro kixin:

—Náhí, janhya —ichro ch'án.

¹⁸ Ntá imá kin ntá tí sín ch'exón xra la ko tí sín policía kjuaka sín xrohi ntaha tjejóxin toté sín tjejóchjixrohe sín. La ko koí ch'ín Pedro tjechjixrohe ch'án ntiha.

Tí nchat'á t'etoan mé kjuanchankíhi ch'án tí ch'ín Jesús

(Mt. 26.59-66; Mr. 14.55-64; Lc. 22.66-71)

* 18:9 Juan 17.12 † 18:14 Juan 11.49-50

19 Ntá tí nchat'á t'etoan kjuankíxin kjuanchankíhi ch'án tí ch'ín Jesús kixin nkexro tí sín k'uájiko ch'án la ko nkehe tí kjuákohe ch'án sín.

20 Ntá kjuátehe ch'ín Jesús ntáchro ch'án kixin:

—Noxín kjuak'é kjuákua, la ntá kaín xín chojni kuínhin sín. Xrácín k'uékjako_{xian} kaín xín tí nínko ntsí la ko tí nínko jíé tójnkotséxin kaín xín sín judío. Ninkehó nkehe kjuákohya imó.

21 ¿Nkekuènté tjanchankína tí janhan xíkaha? Chrókjuanchankíhí tí sín kuínhin kixin nkexrí kjuáko_{ha} sín. Jehe sín mé nohe sín nkehe kjuáko_{ha} sín —ichro ch'án.

22 Kjuixin ntáchro ch'ín Jesús tíhi ntá ijnko ch'ín policia kuènte nínko mé tjentaxín ch'án ntiha chjéhe ch'án nkayakon tí ch'ín Jesús ntáchro ch'án kixin:

—¿Á xíkaha jiehe tsjátehé tí nchat'á t'etoan ní? —ichro ch'án.

23 Ntá kjuátehe ch'ín Jesús ntáchro ch'án kixin:

—Tí ntoáhya tí nkehe xrjanka ntá chronka nkehe tí ntoáhya. A ntá tí ntoá tí nkehe xrjanka, ¿ntá nkekuènté kixin tjatena? —ichro ch'án.

24 Ntá k'ue_{toan} ch'ín Anás kixin tjechróntetoxinhín ch'ín Jesús sátsji ch'án tí tjen ch'ín Caifás tí nchat'á t'etoan.

*Ch'ín Pedro xíkjinchemá ch'án inaá kixin chóxin ch'án tí ch'ín Jesús
(Mt. 26.71-75; Mr. 14.69-72; Lc. 22.58-62)*

25 Ntá ch'ín Simón Pedro mé naxa tjexín toté ch'án tjechjixrohe ch'án. Ntá kjuanchankíhi sín ch'án kixin:

—¿Á kjaxinhya jaha xríkoa tí nkexro i ní? —ichro sín.

Ntá ch'ín Pedro kjuínchemá ch'án inaá ntáchro ch'án kixin:

—Náhí, janhya —ichro ch'án.

26 A ntá ijnko ch'ín ch'ehe tí nchat'á t'etoan xra, na mé tí ch'ín a mé naxa kjéhya ch'án tí ch'ín tsíkóchrínjin ch'ín Pedro ntatsjon, na mé kjuanchankí ch'án kixin:

—¿Á jehya jaha tí k'uíku_{an} tjekoa ch'án tí huerto ní? —ichro ch'án.

27 Ntá ch'ín Pedro xíkjinchemá ch'án inaá kixin jehya ch'án, ichro ch'án. Ntá xrí_{nahya} tuénxín itsje ijnko kochíntoa.

*Ch'ín Jesús kjuák'e nkayakon tí ch'ín Pilato
(Mt. 27.1-2, 11-14; Mr. 15.1-5; Lc. 23.1-5)*

28 Ntá k'uaxrjexín sín ntøe ch'ín Caifás, sákjuíko sín ch'ín Jesús tí palacio t'etoanxín tí ch'ín gobernador. Ntá ó kjuankíxin k'uínkaséyan kjuíji sín ntiha. A ntá tí sín judío la mé í k'uíxenhya sín tí palacio kixin tí xíkaha chrók'uixenhen sín tí nchia a la chrókuamá sín tí jie síin ntiha la í xitjahya sine sín tí kia pascua, ichro sín.

29 A ntá ch'ín Pilato k'uaxrjexín ch'án tí nchia t'etoanxín ch'án kjuanchankíhi ch'án sín kixin:

—¿Nkehe tí jie chón_{ta} tí nkexro i? —ichro ch'án.

30 Ntá kjuátehe sín ntáchro sín kixin:

—Tí chróchóntahya ch'án jie jíé la chrókjuíko_{ahyani} ch'án —ichro sín.

31 Ntá k'ue_{toan} ch'ín Pilato kixin:

—Sátjikoará ch'án nchekito_{exín}rá nkerí jie chón_{ta} ch'án kixin éxí ntáchro tí ley kuéntará —ichro ch'án.

Ntá kjuátehe tí sín judío ntáchro sín kixin:

—Jeheni chojni judíoni la chón_{tahyani} kjuachaxin ts'óyánni ninkexró —ichro sín.

32 Mé xíkaha tsoxiteyá tí nkehe tsíntachro ch'ín Jesús kixin nkexrí ts'enxín ch'án.

³³ Ntá ch'ín Pilato xík'ixenhen ch'án tí nchia t'etōanxín ch'án ntá k'uíyēhe ch'án tí ch'ín Jesús kjuanchankíhi ch'án kixin:

—¿Á jaha tí nkexro Rey t'etuenhen tí sín judío ní? —ichro ch'án.

³⁴ Ntá ntáchro ch'ín Jesús kjuanchankí ch'án kixin:

—Tí nkehe tjanchankíná, ¿á jahyá kjuenkayáxian xíkaha, o á í jnko nkexro kjuanchia jie kixin tí janhan? —ichro ch'án.

³⁵ Ntá kjuátehe ch'ín Pilato ntáchro ch'án kixin:

—¿Á kjanhya janhan tí judío kixin? Tí sín chjasán la ko tí sín nchat'á t'etōan mé kjuikaán sín tí jaha. ¿Xá nkehe kjuich'e kixin? —ichro ch'án.

³⁶ Ntá kjuátehe ch'ín Jesús ntáchro ch'án kixin:

—Tí kjuachaxin chonta janhan jehya kixin chjasintajni chrókuétōan. Náhí. Tí chrókuétōan chjasintajni ntá tí sín xríkian chrókjuanjonko sín tí sín judío kixin chrótséhyana sín la chrókjuikánhyana sín ntihi. Kjánchó tí kjuachaxin chonta janhan jehya kixin chjasintajni chrókuétōan —ichro ch'án.

³⁷ Ntá ntáchro ch'ín Pilato kixin:

—¿Á jaha chaxín ijnko rey? —ichro ch'án.

Ntá kjuátehe ch'ín Jesús ntáchro ch'án kixin:

—Janhan tí rey éxí ntáchrúa jaha. Tí xra ó kokjina la ko tí xra ó k'uinka chjasintajni kixin tsoxrjanka nkehe tí chaxín ntoá. Kaín tí sín titekaon tí nkehe chaxín ntoá mé tjejótinhin sín tí nkehe tjákua —ichro ch'án.

³⁸ Ntá ntáchro ch'ín Pilato kixin:

—¿Xá nkehe tí nkehe chaxín ntoá, ichrúa? —ichro ch'án.

Ch'ín Pilato kjuanjon kjuachaxin kixin its'en ch'ín Jesús

(Mt. 27.15-31; Mr. 15.6-20; Lc. 23.13-25)

Ntá kjuixin kjuanchankí ch'ín Pilato tíha ntá k'uaxrjexín ch'án ntiha ntá sákjuí ch'án tí tjejó tí sín judío nixjehe ch'án sín ntáchro ch'án kixin:

—K'uíjtáhya ninkehó jie chóna tí nkexro i.

³⁹ Kjánchó jahará la ó kuánhanrá kixin tí kia pascua tsjánjuan kjuachaxin kixin ts'atjánta ijnko nkexro tjechjina. ¿Á tjínkáonrá kixin ts'atjánta tí ch'ín Rey t'etuenhen tí sín judío? —ichro ch'án.

⁴⁰ Ntá kaín sín k'óyako sín kjuanchia sín kixin:

—Tí ch'ín a la náhí. T'atjánta tí ch'ín Barrabás —ichro sín.

Kjánchó tí ch'ín Barrabás mé ijnko chojni chee tíha.

19

¹ Ntá ch'ín Pilato mé k'uetōan ch'án kixin tsjate sín tí ch'ín Jesús.

² Ntá tí sín soldado kjuích'éna sín ntach'i ijnko corona ntá kjuak'enkaya sín ikja tí ch'ín Jesús. La ko kjuínchek'inkáya sín ch'án ijnko ka kjátse tié kixin jehe sín tsjikosáyehe sín ch'án éxí ijnko rey, kjánchó chaxínhya tíha.

³ Ntá kóchjinehe sín tí tjen ch'án ntáchro sín kixin:

—Isé tsjak'e tsétuenhén tí sín judío —ichro sín.

Kjánchó chaxínhya tíha kjuanoá sín ch'án. La ntá tuénxín itja sín kjuatexín sín nkayakon ch'án.

⁴ Ntá ch'ín Pilato k'uaxrjexín ch'án tí nchia t'etōanxín ch'án inaá nixjehe ch'án tí sín tsíkójnkotsé ntáchro ch'án kixin:

—Tsjeherá tsakítsjexián ch'án ntihi kixin tsonohará kixin k'uíjtáhya janhan ninkehó jie chóna ch'án —ichro ch'ín Pilato.

⁵ Ntá k'uaxrjexín ch'ín Jesús ntiha tjenkáya kja ch'án tí corona tsík'óna ntach'i la ko tjenkáya ch'án tí ka kjátse tié. Ntá ntáchro ch'ín Pilato kixin:

—Tsjeherá, ntihi tjen ch'án —ichro ch'án.

⁶ A ntá tió k'uikon tí sín nchat'á t'etōan la ko tí sín policia kuente ninko ntá kjuankixin sín t'óyako sín ntáchro sín kixin:

—¡Tjakénkanirá ch'án ntacruz! ¡Tjakénkanirá ch'an ntacruz! —ichro sín.

Ntá ntáchro ch'ín Pilato kixin:

—Jahará tjíkoará ch'án tjaké nkanirá ch'án ntacruz kixin janhan k'uitjáhya ninkehó jie chóna tí jehe ch'án —ichro ch'án.

⁷ Ntá kjuátehe tí sín judío kixin:

—Jeheni chojni judío mé chónani ijnko ley t'etōan kixin chrók'uen ch'án kixin ncheyóhe ch'án asén ch'án kixin Xjeen Dios tí jehe ch'án —ichro sín.

⁸ Ntá tió kuínhin ch'ín Pilato tíha ntá antsí chrakon ch'án

⁹ ntá xík'ixenhen ch'án tí nchia t'etōanxín ch'án inaá kjuanchankíhi ch'án tí ch'ín Jesús kixin:

—¿Nketí k'uinkaxian jaha? —ichro ch'án.

Ntá ch'ín Jesús ninkehó kjuáteehya ch'án.

¹⁰ Ntá ntáchro ch'ín Pilato kixin:

—¿Jaha nkekuenté tjátēehya nkehe tjánchánkíha? ¿Á noahya jaha kixin chonta janhan kjuachaxin tsétōan tsjak'enkania ntacruz la ko kjaxin chonta janhan kjuachaxin tsontáxrjan kixin sátsjia kohya nkehe tsonhan? —ichro ch'án.

¹¹ Ntá kjuátehe ch'ín Jesús ntáchro ch'án kixin:

—Ninkehó kjuachaxin chróchontahya jaha chrókuétōan chrók'uén o sáchrókjuia tí Dios chrótjáhya tí kjuachaxin. A ntá tí chojni kjuikaána tí tjen jaha la antsí jie jie chóna sín, a ntá jaha la kánhyó —ichro ch'án.

¹² Ntá kuínhin ch'ín Pilato tíhi ntá kjuankixin ch'án kjueyá ch'án nkexrí chrók'uetōan ch'án kixin sáchrókjui ch'ín Jesús kohya nkehe chrókónhen ch'án. Kjánchó tí sín judío k'óyako sín ntáchro sín kixin:

—Kja tí tsitōhé sátsji ch'án kohya nkehe tsonhen ch'án ntá jaha jnkokoáhya tjenkayáxinkoa tí ch'ín t'etuenhen tí nación kuenténi. Tí nkexro ch'éna asén ch'án éxi ijnko rey mé nínkakonhen ch'án tí ch'ín t'etuenhenni —ichro sín.

¹³ Ntá kuínhin ch'ín Pilato tíhi ntá k'uetōan ch'án kixin tsakitsje sín tí ch'ín Jesús ntója ntá ch'ín Pilato kjuák'etjaxin ch'án tí silla nchekitōexín ch'án jie, mé nkiva hebreo mé it'in Gabata, mé t'axrjexín kixin tjat'ō noi jehó xro tsík'óna.

¹⁴ Na mé ó chjina chonkixin ntá tí tsonjín la mé ó tsjasin sín tí kia pascua. Ntá ch'ín Pilato ntáche ch'án tí sín judío kixin:

—Ntíhi itjen tí ch'ín rey kuentará —ichro ch'án.

¹⁵ Kjánchó jehe sín k'óyako sín ntáchro sín kixin:

—¡ts'en ch'án! ¡ts'en ch'án! ¡Tsjak'enkáni ch'án ntacruz! —ichro sín.

Ntá ntáchro ch'ín Pilato kixin:

—¿Á tjinkáonrá kixin janhan chrókjuakénkania ijnko ntacruz tí ch'ín rey kuentará ní? —ichro ch'án.

Kjánchó tí sín nchat'á t'etōan mé kjuátehe sín kixin:

—Náhí. Chóntahyani í jnko rey, jehó tí ch'ín César —ichro sín.

¹⁶ Ntá ch'ín Pilato kjuanjon ch'án kjuachaxin sátsjiko sín tí ch'ín Jesús tsjak'enkáni sín ch'án ntacruz. Ntá sákjuiko sín ch'án.

Kjuák'enkáni ch'ín Jesús ntacruz

(Mt. 27.32-44; Mr. 15.21-32; Lc. 23.26-43)

¹⁷ Ntá sákjuiko sín tí ch'ín Jesús kuámá ch'án tí ntacruz tsjak'enkáni ch'án. Ntá kjuíjiko sín ch'án ijnko tjo tikítexín sín Hueso Kja Chojni. A ntá nkiva hebreo mé tikítexín sín Gólgota.

¹⁸ Ntaha mé kjuák'enkáni sín ch'án tí ntacruz. Ntá kjaxin yaá sín nánánko k'uéjó jnkojnko sín ntá jnkosiné kjuák'e ch'ín Jesús.

19 Ntá k'uetōan ch'ín Pilato kixin tsokjin sín ijnko ntachiso tsjak'enkani sín ikja tí ntacruz ntáchro kixin: “Ch'ín Jesús kjuixín ch'án chjasin Nazaret, mé tí ch'ín Rey kuènte tí sín judío”, tsixro.

20 A ntá itsjé tí sín judío mé kjuínchekuáxin sín tí letra tsík'óna kixin chjino tí chjasin Jerusalén tsíkjak'enkani sín ch'ín Jesús ntacruz la ko iní nkiva tsíkjin sín, na mé ijnko nkiva la hebreo, la ijnko nkiva la griego, la ijnko nkiva la latín.

21 Ntá tí sín nchat'á t'etōan kuènte tí sín judío mé ntáche sín tí ch'ín Pilato kixin:

—Chrókjinhya jaha xikaha kixin jehe ch'án mé tí “Ch'ín Rey kuènte tí sín judío.” Náhí. Íchá jína chrókjin jaha kixin “Jehe ch'án ntáchro ch'án kixin jehe ch'án mé tí ch'ín Rey kuènte tí sín judío” —ichro sín.

22 Kjánchó kjuátehe ch'ín Pilato kixin:

—Tí letra kuétoan k'óna la ó k'óna, kjónté xikahó tsitōhe —ichro ch'án.

23 Ntá tí sín soldado tió tsíkjin tsíkjak'enkani sín tí ch'ín Jesús tí ntacruz ntá kuákja sín tí ké ch'án la k'óxikeyehe sín jnkojnko ka kuákja sín kanoé sín. La ko kjaxin kuákja sín tí ka kjínjin k'uék'inkáya ch'án. Tí ka mé tsíxronhya ka la me jnkokoá ka tíha.

24 Ntá tí sín soldado kjo sín kichó sín ntáchro sín kixin:

—Tsótséchjehyani tí ké ch'án. Íchá jína sich'exinni suerte ntá tsotsjeheni siná nkexro ts'áyéhe tí ka.

Mé xikaha xiteyá éxí ntáchro xroon itén Dios tsíkjin sín ósé ntáchro kixin: “Kjuích'exín sín suerte ntá k'óxikeyehe sín kaná.”* Mé xikaha kjuích'e tí sín soldado.

25 A ntá chjino tí ntacruz kjuák'enkani ch'ín Jesús mé kjuák'e tí ìné ch'án la ko tí tjan kichó tjan mé tjan María ichjién ch'ín Cleofas, la ko tí tjan María Magdalena.

26 A ntá tió k'uikon ch'ín Jesús kixin itjen tí ìné ch'án la ko chjino tjen tí ch'ín antsí tjuèhé ch'án k'uék'ajiko ch'án, ntá nixjehé ch'án tí ìné ch'án, ntáchro ch'án kixin:

—Naná, tsjehé kixin ntaha tjen xjaan —ichro ch'án.

27 Ntá nixjehé ch'ín Jesús tí ch'ín a ntáchro ch'án kixin:

—Tsjehé kixin ntaha itjen ìná —ichro ch'án.

A ntá tí ch'ín a mé k'uáyéhe ch'án tí tjan a sákjuiko ch'án tjan ntōe ch'án k'óna éxí ìné ch'án xikaha.

Ik'uén ch'ín Jesús

(Mt. 27.45-56; Mr. 15.33-41; Lc. 23.44-49)

28 Ntá ó nohe ch'ín Jesús kixin kaín xra ó kjuixin xiteyá ntá tjinkaon ch'án kixin tsoxiteyá kaín nkehe ntáchro tí xroon tsíkjin sín ósé ntá xikaha ntáchro ch'án kixin:

—Ik'uén nta.

29 Ntá ntihá tjen ijnko nchésen tsíkaón xranvino sán ntá kjuínchekjataxín sín ijnko ka tí xranvino, a ntá tí ka a kjuak'ekjen sín ijnko nta kjínjin, ntá kjuínchechrìn sín tí tjen ir'va ch'án.

30 Ntá ik'uí ch'ín Jesús tí xranvino sán ntá ntáchro ch'án kixin:

—Ó kjuixin xiteyá kaín xín nkehe —ichro ch'án.

Ntá k'uísén kja ch'án ntá ó kjuixin k'uén ch'án.

Ijnko soldado chr'áte ch'án chica yo tí chjia ch'ín Jesús

31 A ntá xikaha yaon ntóye mé tí yaon kia pascua ntá tí sín judío tjinkakonhya sín kixin tí cuerpo kuènte tí sín tsík'en naxa ts'ejóyáni tí ntacruz tí yaon t'ok'éhe sín kixin tí yaon pascua mé ijnko yaon imá jíé, ichro sín. Mé xikaha

* 19:24 Salmo 22.18

kjuanchehe sín tí ch'ín Pilato kixin ts'et'oan ch'án kixin tsochjenjin toté tí sín tjejóyáni tí ntacruz la ko ts'inkajin tí cuerpo kuènte tí sín tsík'en.

³² Ntá tí sín soldado sákjuí sín k'óchjenjin sín tí toté tí ch'ín saoxín tjen la ko k'óchjenjin sín tí toté tí ch'ín tjen nánko a tjejóyáni sín tí ntacruz tí tjen ch'ín Jesús.

³³ Ntá kjuíji sín tí tjen ch'ín Jesús ntá k'uíkon sín kixin ó tsíkjin tsík'en ch'án, ntá í k'óchjenjinhya sín toté ch'án.

³⁴ A ntá ijnko ch'ín soldado mé chr'áte ch'án chica yo tí chjia tí ch'ín Jesús ntá tuénxín k'uaxrje jñi la ko ìnta.

³⁵ A ntá janhan mé tjékjian tí xroon i mé kjuak'é ntiha k'uíkuan kixin xikaha kónhen ntá ntoá tjéxrjanka kixin jahará kjaxinrá chrókuítekáonrá.

³⁶ Mé xikaha kónhen tíha kixin tsoxiteyá tí nkehe ntáchro xroon itén Dios tsíkjin sín ntáchro kixin: “K'óchjenjinhya sín ninkehó huésœ ch'án.”†

³⁷ Kjaxin itjen í jnko nketí nixja tí xroon itén Dios tsíkjin sín ósé ntáchro kixin: “Tsokomá sín tí nkexro tsíchr'áte sín chica.”‡

Xravá ch'ín Jesús

(Mt. 27.57-61; Mr. 15.42-47; Lc. 23.50-56)

³⁸ Ntá ó kjuixin kónhen kaín tíha ntá ch'ín José, mé ijnko ch'ín kjuixin chjasin Arimatea, mé kjuanchehe ch'án tí ch'ín Pilato kjuachaxin kixin tsjinkajinxin ch'án tí ntacruz tí cuerpo kuènte ch'ín Jesús sátsjiko ch'án tsjavá ch'án. Jehe ch'án imó kuinkáchónki ch'án tí ch'ín Jesús kixin chrakonhen ch'án tí sín judío. Ntá ch'ín Pilato mé kjuanjon ch'án kjuachaxin ntá sákjuíko ch'ín José tí cuerpo kuènte ch'ín Jesús.

³⁹ Kjaxin ch'ín Nicodemo, tí ch'ín kjuínixjehe tí ch'ín Jesús ijnko tie a mé kjuí ch'án kjuíkao ch'án treinta kilo xroan xraxé tjiko xroan mirra la ko xroan áloes.

⁴⁰ Mé xikaha ch'ín José la ko ch'ín Nicodemo k'uáyéhe sín tí cuerpo kuènte ch'ín Jesús kjuínchek'ísímá sín ijnko ka kjínjin tsíka tí xroan xraxé a kixin xikaha k'uékinkáchónki tí sín judío k'uékjavá sín chojni tsík'en.

⁴¹ Tí kjuák'enkani ch'ín Jesús ntacruz ntá chjinaxón ntiha tjen ijnko huerto itjen ijnko tòye nixin naxa ninkexró tsíxráváhya ntiha.

⁴² Ntaha kjuavá sín tí ch'ín Jesús kixin chjinaxón tjen tí tòye a la ko í séhya tsoxrankixin tí yaon t'ok'éhe tí sín judío.

20

La ntá ó tsíxechón ch'ín Jesús

(Mt. 28.1-10; Mr. 16.1-8; Lc. 24.1-12)

¹ A ntá tí yaon xrankíxixín semana ntá tí tjan María Magdalena naxa sítié sákjuí tjan tí tjen tí tòye, ntá k'uíkon tjan kixin ó tsíkjin tí xro tsík'ikjèxin tí tòye a.

² Ntá kuinká tjan sákjuí tjan tí tjen tí ch'ín Simón Pedro la ko tí ch'ín í jnko, mé tí nkexro imá k'uétjuèhe ch'ín Jesús, ntá ntáchro tjan kixin:

—Ó tsíkakitsjexín sín tòye tí cuerpo kuènte Ìnchéni ntá noehyani nketí tsíkjak'e sín —ichro tjan.

³ Ntá ch'ín Pedro la ko tí ch'ín í jnko mé kuínhin sín xikaha ntá sákjuí sín tí tjen tí tòye a.

⁴ Ntá yóí sín kuinká sín sákjuíko kichó sín. Kjánchó tí ch'ín í jnko antsí tjan kuinká ch'án ntá kánhyó tjan kuinká ch'ín Pedro, ntá tí ch'ín í jnko senó ch'án kjuíji ch'án tí tjen tí tòye a.

† 19:36 Salmo 34.20 ‡ 19:37 Zacarías 12.10

⁵ K'uísén ch'án tsjehe ch'án nkaxenhen tí tòyè a. A tí ka tsík'isímá ch'ín Jesús mé naxá tjejó k'uíkon ch'án, kjánchó jehe ch'án k'uíxenhya ch'án tí tòyè a.

⁶ Ntá kjónté chr'éxín kjuíji ch'ín Simón Pedro ntá k'uíxenhén ch'án tí tòyè a. Ntá kjaxin k'uíkon ch'án kixin tjejó tí ka tsík'isímá ch'ín Jesús

⁷ la ko k'uíkon ch'án tí ka tsík'isímá ikja ch'án na mé tí ka tsíxrèya ka la ókjé tjen ka, a ntá tí í so ka na mé ókjé tjejó ka kjaxin.

⁸ Na ntá tí ch'ín í jnko k'uék'ajiko ch'ín Jesús, mé tí ch'ín tsíkji senó na kjaxin k'uíxenhén ch'án tí tòyè ntá k'uíkon ch'án tí nkehe tsíkónhen ntá kuítekaon ch'án.

⁹ Kixin naxá k'uékiénxínhya sín tí nkehe k'uéchrónka xroon itén Dios kixin t'ichjánxín tsoxechón tí ch'ín Jesús.

¹⁰ A ntá tí sín sátsíkjitsjehe tòyè la xíkjan sín ntòe sín.

*Titàya k'uíkuèn tjan María Magdalena tí ch'ín Jesús
(Mt. 16.9-11)*

¹¹ Ntá tjan María mé ntaho kuítóhe tjan ntója tí tòyè tsjánka tjan. Naxá tsjánka tjan k'uísén tjan tsjehe tjan nkaxenhen tí tòyè

¹² ntá xrínahya k'uíkon tjan yaá sín ángel tjejóyá sín ka tjóá tjejótjaxin sín tí tsíkjak'e tí cuerpo kuènte ch'ín Jesús na mé jnko ch'ín ángel na mé tjen ch'án tí tsíkjak'e ikja ch'ín Jesús la ko tí í jnko a itjen ch'án tí tsík'ejó toté ch'án.

¹³ A ntá tí sín ángel mé kjuanchankí sín kixin:

—Naná, ¿kuènte tsjánka? —ichro sín.

Ntá kjuátehe tjan ntáchro tjan kixin:

—Sátsíkjiko sín Ìnchéni, ntá nonahya nketí tsíkjak'e sín ch'án —ichro tjan.

¹⁴ Kjuixin ntáchro tjan tíha ntá kuinkátjía tjan ntá k'uíkon tjan kixin itjen ch'ín Jesús, kjánchó kjuátsoanhya tjan kixin jehe ch'án.

¹⁵ Ntá ch'ín Jesús kjuanchankíhi ch'án tjan ntáchro ch'án kixin:

—Naná, ¿nkekuènté tsjánka? ¿Nkexro tjéyá? —ichro ch'án.

A ntá jehe tjan kjuenkayáxin tjan kixin jehe ch'án mé t'ayakonhen ch'án tí huerto, a ntá ntáchro tjan kixin:

—Kja tí jaha sákjuíkoa ch'án ntá jie chrónka nketí sákjuíkoa ch'án kixin janhan sátsjikian ch'án jie —ichro tjan.

¹⁶ Ntá ch'ín Jesús mé nixjehe ch'án tjan ntáchro ch'án kixin:

—¡María! —ichro ch'án.

Ntá kuinkátjía tjan ntá nixjaxin tjan nkiva hebreo ntáchro tjan kixin:

—¡Raboni! —ichro tjan. Tíha mé t'axrjexín kixin Maestro.

¹⁷ Ntá ntáchro ch'ín Jesús kixin:

—Tatjántana kixin naxá sátjía janhan tí tjen T'aná. Sátjia tjítsjehé tí sín kichiná chénka sín kixin sátsjiyá tí tjen T'aná na mé kjaxin It'ará tí jahará na mé Dios kuèntana la ko kjaxin Dios kuèntará —ichro ch'án.

¹⁸ Ntá tí tjan María Magdalena sákjuíchénka tjan tí sín k'uék'ajiko ch'ín Jesús chrónka tjan kixin xíkaha tsík'ikon tjan Ìnchéni. La ko kjaxin chrónka tjan kixin xíkaha tsíntáchro ch'án.

*Tí sín k'uék'ajiko ch'ín Jesús titàya k'uíkuèn sín ch'án
(Mt. 28.16-20; Mr. 16.14-18; Lc. 24.36-49)*

¹⁹ A ntá ó kónjín tí yaon a mé tí yaon xrankixín semana, a ntá tí sín k'uék'ajiko ch'ín Jesús jnkokoá kójnkotsé sín nkaxenhen nchia tsík'ikjehe sín ntója nchia jína kixin chrakonhen sín tí sín judío. Ntá xrínahya titàya kónohe sín k'uíkon sín kixin jnkosiné tí tjejó sín itjen ch'ín Jesús, ntá nixjehe ch'án kjuajna tí sín k'uék'ajiko ch'án ntáchro ch'án kixin:

—Jína tjejorá —ichro ch'án.

²⁰ Ntá kjuixin ntáchro ch'án tíhi ntá kjuako ch'án itja ch'án la ko chjia ch'án. Ntá kóchéhe tí sín k'uék'ajiko ch'án kixin k'uikon sín Ìnchéni.

²¹ Ntá ntáchro ch'ín Jesús inaá kixin:

—Kjuaxróxin ts'ejorá. Yóhe T'aná k'uētuanna k'uinka, a ntá jie la janhan tétuanhan tí jahará —ichro ch'án.

²² Ntá k'uánote ch'án tí jehe sín ntáchro ch'án kixin:

—T'ayéhérá Nchakuen Dios.

²³ Tí ts'itjayanhanrá tí jie kjuasin jnkójín chojni ntá xíkaha tsjìn tí ijíé sín. Ntá tí ts'itjayanhyará tí jie kjuasin jnkójín chojni ntá naxa kjuinhya tí ijíé sín —ichro ch'án.

Ch'ín Tomás k'uikon ch'án kixin tsíxechón Ìnchéni

²⁴ A ntá tí ch'ín Tomás, ijnko tí teyóxin sín k'uék'ajiko ch'ín Jesús mé kjaxin tikitexín sín ch'ín Nóhé mé kohya ch'án tí kui ch'ín Jesús.

²⁵ Ntá chr'éxin tí í so sín k'uék'ajiko ch'ín Jesús ntáche sín ch'án kixin:

—Ó k'uikonni Ìnchéni —ichro sín.

Kjánchó ntáchro ch'ín Tomás kixin:

—Tí ts'íkõhya janhan tí tsíkjiatexín chica clavo itja ch'án la ko tsochr'ánxianhya dedo tjaná ntiha la ko tí tsochr'ánxianhya tjaná tí chjia ch'án, ¿na mé nkexrí chrókuítekavan? —ichro ch'án.

²⁶ A ntá tí k'uátsínka ijnko semana ntá jnkokoá kójnkotsé sín nkaxenhen nchia la ko kjaxin kjuák'eko sín ch'ín Tomás. Tsík'ikjehe sín ntója nchia jína ntá xrínahya titàya kónohe sín k'uikon sín kixin jnkosiné tí tjejó sín itjen ch'ín Jesús, ntá nixjehe ch'án tí jehe sín k'uék'ajiko ch'án ntáchro ch'án kixin:

—Kjuaxróxin ts'ejorá —ichro ch'án.

²⁷ Ntá ntáche ch'án tí ch'ín Tomás kixin:

—Chr'axénhén dedo tjá tí tsíkjiatexín chica clavo tjaná la ko xrákoa tjá chr'axénhén chjiana. Chróntáchrohya kixin chaxínhya. Tsítekávan kixin chaxín —ichro ch'án.

²⁸ Ntá kjuátehe ch'ín Tomás ntáchro ch'án kixin:

—Ìnchéni jaha la ko Dios kuéntana! —ichro ch'án.

²⁹ Ntá ntáche ch'ín Jesús tí ch'ín Tomás kixin:

—Jaha Tomás k'uikonjian ntá kuítekávan. Ntá antsí náxrjón tjejó tí sín kjónté k'uikonhya la titekaon sín —ichro ch'án.

Tíhi mé chrónka nkekuènte tsíkjin ch'ín Juan tí xroon i

³⁰ Ch'ín Jesús kjuasin ch'án itsjé í so kjuaxroan náxrjón k'uikon tí sín k'uájiko ch'án kjónté chrónkahya tí xroon i kixin xíkaha kónhen.

³¹ Tí nkehe chrónka tí xroon i ikjian janhan kixin chrókuítekáonrá jahará kixin Jesús mé tí Cristo, mé tí Xjeen Dios kixin ntá kaín ni chróchóntani kjuachón jnkochrín kixin chrókuítekaonni ch'án.

21

Yato tí sín k'uék'ajiko ch'ín Jesús xrínahya titàya k'uikon sín ch'án

¹ A ntá chr'éxin tí sín k'uék'ajiko ch'ín Jesús titàya xík'ikon sín tí jehe ch'án inaá chrínta ntayaon Tiberias. Mé xíkaha kónhen

² kixin jnkokoá k'uéjé sín ch'ín Simón Pedro la ko ch'ín Tomás, me tí ch'ín tikitexín sín ch'ín Nóhé, la ko ch'ín Natanael kuixin ch'án chjasin Caná estado Galilea, la ko tí yaá xjeen ch'ín Zebedeo la ko tí yaá sín inaá k'uék'ajiko ch'ín Jesús.

³ Ntá ntáchro ch'ín Simón Pedro kixin:

—Sátsjitse koche —ichro ch'án.

Ntá kjuátehe sín kixin:

—Koíni sátsjikoani —ichro sín.

Ntá sákjuí sín k'uit'ótjen sín ijnko ntabárc̣o. Kjánchó ninkehó koche tséhya sín kuenté tie.

⁴ A ntá ó chjina ts'inkaséyan ntá xrínahya titàya k'uikon sín itjen ch'ín Jesús chrínta ntayaon, kjánchó kjuátṣoanhya tí sín k'uék'ajiko ch'án kixin jehe ch'án.

⁵ Ntá kjuanchankíhi ch'án sín kixin:

—Jahará ntasoá, ¿á naxa ninkehó koche tsehyará? —ichro ch'án.

Ntá kjuátehe sín ntáchro sín kixin:

—Naxa ninkehó ko tséhyani —ichro sín.

⁶ Ntá ch'ín Jesús ntáche ch'án sín kixin:

—Itérá tí nchísén tí nánko chjia chjina tí ntabárc̣o la tsotserá va —ichro ch'án.

Ntá xikaha kjuích'e sín k'ue sín nchísén ntá í tjachahya sín tsakitsjenkixin sín ntá tí nchísén kixin nchónhya koche tjinká.

⁷ A ntá tí ch'ín antsí tjuèhe ch'ín Jesús mé ntáche ch'án tí ch'ín Pedro kixin:

—¡Inchéni tí méhe! —ichro ch'án.

Ntá kuínhin ch'ín Simón Pedro kixin Inchéni tíha ntá k'uinkáya ch'án iké ch'án inaá (kixin tsíkakitsje ch'án iké ch'án) ntá kjuiánkí ch'án ntá.

⁸ Tí í so sín k'uék'ajiko ch'ín Jesús mé kjuíji sín tí chrínta ntayaon kjuikao sín tí ntabárc̣o tinkánkákjentóxin tí nchísén tjinká koche chrítaón ntá kixin ijnko ciento metro kjínxin tí chrínta ntá k'uéjó sín.

⁹ Ntá kjuíji sín chrínta ntá ntá k'uínkajínxin sín tí ntabárc̣o ntá k'uikon sín tjeche xrohi sixènkí xrinta ntá chrítaón tí xrinta tjejen ijnko koche la ko nánko siín niotja.

¹⁰ Ntá kjuanchia ch'ín Jesús ntáchro ch'an kixin:

—Xrákoará iso koche tsítserá nantá —ichro ch'án.

¹¹ Ntá ch'ín Simón Pedro k'uit'ótjen ch'án tí ntabárc̣o kuákja ch'án tí nchísén kuinkánkákjen ch'án xrákao ch'án tí nchísén tjinká koche iye na mé ijnko ciento cincuenta y tres va. Ntá kjónté nchónhya va la k'uichjehya tí nchísén a.

¹² Ntá ntáchro ch'ín Jesús kixin:

—Xrákirá, interá —ichro ch'án.

A ntá nijnko tí sín k'uék'ajiko ch'án chrókjuanchankíhi sín ch'án kixin nkexro tí jehe ch'án kixin ó kjuátṣoan sín kixin Inchéni tíha.

¹³ Ntá kóchjina ch'ín Jesús kuákja ch'án tí niotja chjéhe ch'án tí jehe sín la ko xikaha xíkjanjon ch'án tí koche.

¹⁴ Tíhi mé nixin k'uikon tí sín k'uék'ajiko ch'ín Jesús kixin tsíxechón ch'án.*

Ch'ín Jesús itjo ch'án tí ch'ín Simón Pedro

¹⁵ Kjuixin kjóne sín ntá kjuanchankíhi ch'ín Jesús tí ch'ín Simón Pedro kixin: —Jaha Simón, xjeen Jonás, ¿á antsí tjuana jaha, a ntá tí í so la kánhyó? —ichro ch'án.

Ntá kjuátehe ch'ín Pedro ntáchro ch'án kixin:

—Jeén, Inchéni, ó noha kixin tjínkavan tí jaha —ichro ch'án.

Ntá ntáchro ch'ín Jesús kixin:

—Ntá xikaha la t'ayakonhén tí kolélo kuèntana —ichro ch'án.

¹⁶ Ntá yóxin kjuanchankí ch'ín Jesús inaá kixin:

—Jaha Simón, xjeen Jonás, ¿á tjuana jaha? —ichro ch'án.

Ntá kjuátehe ch'ín Pedro ntáchro ch'án kixin:

—Jeén, Inchéni, ó noha kixin tjínkavan tí jaha —ichro ch'án.

Ntá ntáchro ch'ín Jesús kixin:

* **21:14** Juan 20.19,26

—Ntá xíkaha la t'ayakonhén tí kolélo kuèntàna —ichro ch'án.

¹⁷ Ntá níxin kjuanchankí ch'ín Jesús kixin:

—Jaha Simón, xjeen Jonás, ¿á tjinkávan tí janhan? —ichro ch'án.

A ntá k'uává ch'ín Pedro kixin níxin kjuanchankí ch'ín Jesús kixin á tjinkaon ch'án tí jehe ch'án ntá ntáchro ch'án kixin:

—Jaha Ìnchéni, ó noha kaín xín nkehe. Ó noha kixin tjínkavan tí jaha —ichro ch'án.

Ntá ntáchro ch'ín Jesús kixin:

—Ntá xíkaha t'ayakonhén tí kolélo kuèntàna.

¹⁸ Ntá ijnko nkehe chaxín tjétjonka kixin tí naxa k'uéntasoyá jaha k'uék'inkaya ká jahvá la ko k'uékjia tí k'uékóxrjínhan jaha. A ntá tíó tsotáda jaha ntá tsjéntoá tjá ntá í jnko nkexro sintak'inkáya ka la ko sátsjikoá sín tí tóxrjánhya sáchrókjuia —ichro ch'án.

¹⁹ A ntá tíhi mé chrónkaxín ch'ín Jesús kixin nkexrí ts'enxín ch'ín Pedro na mé t'axrjexín nkexrí tsochjéhe ch'án Dios kjuasáya. Ntá kjuixin ntáchro ch'ín Jesús kixin:

—Chréhé tí janhan —ichro ch'án.

Nkehe tsonhen tí ch'ín antsí tjuèhe ch'ín Jesús

²⁰ Ntá kuinkátjía ch'ín Pedro ntá k'uíkon ch'án kixin tinkáchréhe tí ch'ín antsí tjuèhe ch'ín Jesús, na mé tí nkexro kjuák'e chjinaxón tí kjuák'e ch'ín Jesús tí kjóne sín tsíkjanchankíhi ch'án tí ch'ín Jesús kixin nkexro sinchekji ch'án.†

²¹ Ntá ch'ín Pedro k'uíkon ch'án kixin tinkáchréhe tí ch'ín a ntá kjuanchankíhi ch'án tí ch'ín Jesús kixin:

—Ìnchéni, ¿a ntá tí ch'ín i la nkehe tsonhen ch'án a? —ichro ch'án.

²² Ntá kjuátehe ch'ín Jesús kixin:

—Tí tjínkavan naxa chrókjuak'echón ch'án tí chrókjan la jaha la chrókjuiatéhya tíha. Ntá jaha la chréhé tí janhan —ichro ch'án.

²³ Ntá kjuankixin kjo tí sín k'uék'ajiko ch'ín Jesús kixin ts'enhya tí ch'ín a. Ntá jehya kixin ntáchro ch'ín Jesús kixin chrók'uenhya tí ch'ín a. Náhí. Ó jehí ntáchro ch'án kixin tí tjinkaon ch'án naxa chrókjuak'echón tí ch'ín a tí chrókjan ch'án chrókui ch'án chrókjuiatéhya tí ch'ín Pedro chrókjuanchankí ch'án nkehe tsonhen í jnko chojni.

²⁴ A ntá tí nkexro a mé tí nkexro chrónka kixin chaxín kónhen kaín tíha la ko ikjin ch'án tí xroon i. Ntá ó noheni kixin tí nkehe tsíkjin ch'án la chaxín ntoá tíha.

²⁵ Naxa siín nchónhya nkehe kjuakoxin ch'ín Jesús kjinhya janhan. Tí chrók'óna jnkojnko jnkojnko tíha ntáxrjan kixin kjá chrókjuachahya tí chjasin-tajni chrók'uinka kaín tí xroon chrók'óna xíkaha. Amén. Ó tjen.

† 21:20 Juan 13.25

Tí xrā kjuích'e tí sín kjueyá ch'ín Jesús

Itsi Nchakuen Dios

¹ Tjuahā jaha Teófilo na tí libro saoxín mé kjian̄ kaín nkehe kjuako ch'ín Jesús la ko tí xrā kjuích'e ch'án tí xrankíxixín

² hasta tí yaon̄ sákjuí ch'án nkaya nkajní. Ā ntá tī naxā sákjuíh̄ya ch'án nkajní la kjueyá ch'an̄ tí sín sich'ehe ch'án xrā la ntá tí Nchakuen Dios mé kjuínkítsa ch'án ntá nixjehē ch'án sín la k'uetuēnhen ch'án sín kixin̄ tsonohē sín nkehē tí xrā chrókjuich'e sín.

³ Tió kjuixin̄ k'uén ch'án ntá kónoxín kixin̄ tjechón ch'án, k'uíkon tí jehē sín la ko cuarenta yaon̄ mé k'uíkon sín ch'án jnkoyaxón. Itsjé nkehē kjuakoxin̄ ch'án kixin̄ tsonoxin̄ sín kixin̄ chaxín tjechón ch'án la ko kjuako ch'án nkexrí tí kjuachaxin̄ kuentē Dios.

⁴ Tī naxā kójnkotséko ch'án tí sín k'uájiko ch'án la jehē ch'án mé k'uetuēnhen ch'án sín kixin̄ naxā sátsjixin̄hya sín tí chjasin̄ Jerusalén. Chrónka ch'án kixin̄:

—Chróchónhérrá ntihō chrók'uayéhérá tí nkehē tsjanjon̄ T'aná, mē tí nkehē kuinhínrá xrjankā janhan̄.

⁵ Ā ntá chaxín ch'ín Juan̄ intá ó kuíkítexín ch'án chojni. Ā ntá ijiē kánhyó itsjé yaon̄ ntá jahará la Nchakuen Dios la tsikitiaxínrá.

Sákjuí ch'ín Jesús nkaya nkajní

⁶ Ntá tī naxā kójnkotséko sín ch'ín Jesús, kjuanchankíhi sín ch'án kixin̄:

—Jahā Ìnchéni, ¿á tsjánjonhyā kjuachaxin̄ jaí ts'etōannī chjasénnī Israel̄ inaá? —ichrō sín.

⁷ Ntá kjuátēhē ch'ín Jesús kixin̄:

—Náhi. Chontahyará kjuachaxin̄ tsonohará nkesá tsonhen̄ tíha. Jehó T'aná chóna kjuachaxin̄ ts'etōan̄ tíha.

⁸ Ntá itsī tí Nchakuen Dios ntá ts'ayéhérá kjuachaxin̄ sátsjichron̄kará nkehē tí xrā kjuít'a, mé sátsjirá tsjákohérá kaín sín chjasin̄ Jerusalén, la ko estadō Judea, la ko estadō Samaria, la ko kuenté chjasintajnī.

⁹ Ntá kjuixin̄ nixja ch'ín Jesús ntá xrínahyā tinkák'ít'ótjen ch'án sákjuí ch'án la tjejótsjehē sín. Sákjuí ch'án hasta kjuák'enkákjan̄ ch'án ijnkō tjuí. Ntá í t'íkonhyā sín nkerí kjuíji ch'án.

¹⁰ Ntá naxā tjejókontā sín tí sákjuí ch'ín Jesús nkajní, ā ntá xrínahyā titàyā k'uíkuèn̄ sín yaá chojnī ntoā tjejóyá sín kā tjóá tjejó sín chjínaxón̄ tí tjejó tí jehē sín.

¹¹ Ntá tí sín ā mé ntáchrō sín kixin̄:

—Jahará chojnī kjuíxin̄rá estadō Galilea, ¿nkehē tsonhen̄ naxā kontará nkajní? Xíkahā tjejokontará sákjuí Jesús la ko mé xíkahā xikī ch'án inaá —ichrō sín.

Xreyá ch'ín Matías tsjiatēhē lùké ch'ín Judas

¹² Nā ntá kjanxin̄ sín tí jnā it'in̄ Olivo nā ikjan̄ sín chjasin̄ Jerusalén. Tíha ā mé kjin̄hyó̄ tjen̄ kixin̄ ó xíkahō k'uetōan̄ tí leȳ sátsjī sín tí yaon̄ t'ok'éhē sín.

¹³ Nā ntá kjuíjī sín tí chjasin̄ ntihā ntá k'uit'ótjen̄ sín tí yóxin̄ pisō tí nchiā tsíkjen̄ sín k'uék'ejó̄ sín. Mé ntihā tjen̄ ch'ín Pedro, la ko ch'ín Jacobo, la ko ch'ín Juan, la ko ch'ín Andrés, la ko ch'ín Felipe, la ko ch'ín Tomás, la ko ch'ín Bartolomé, la ko ch'ín Mateo. La kjaxin̄ ch'ín Jacobo, mé it'é̄ ch'án it'in̄ Alfeo, la ko ch'ín Simón, mé tí ch'ín ā mé kuentē tí partidō cananista, la ko kjaxin̄ ch'ín Judas, savé̄ ch'án mé it'in̄ Jacobo.

¹⁴ Kaín sín kójnkotsé sín ntiha tsonixjehé sín Dios la ko k'uéjoko sín tí kichó tí ch'ín Jesús la ko tí tjan María, ìné ch'án, la ko iso chojni chjin.

¹⁵ Ntá tí yaon a tí ch'ín Pedro k'uínkatjen ch'án kjuák'exín toté ch'án jnkosiné tí tjejó tí sín tinkáchónki Ìnchéni mé ijnko ciento ikán chojni mé tsikójnkotsé ntiha. Ntá ntáchro ch'án kixin:

¹⁶ —Kíchóni, t'ichjánxin tsoxiteyá éxí nixja xroon itén Dios éxí tsínixja ch'ín David tsíchrónka Nchakuen Dios nkehe sich'e ch'ín Judas. Tí ch'ín Judas mé kjuikao ch'án tí sín tsotsé ch'ín Jesús.

¹⁷ Jehé ch'án mé kjaxin k'uék'ajikoni la jnkokón xra k'uáyèkoni ch'án.

¹⁸ A ntá jehe ch'án mé sákjuík'enaxín ch'án ijnko nonte tí chichaon kjuacha ch'án kixin tí jie kjuasin ch'án. Ntá k'uánótjen ch'án la ikja ch'án k'uitja nonte la xitjehé tsee ch'án k'uaxrje kaín sjntandè ch'án.

¹⁹ Ntá xikaha kónohe kaín tí sín chjasin Jerusalén ntá tí nonte kjuínchek'in sín nkívee sín Acéldama mé t'axrjexín kixin ijnko nonte siín ijni.

²⁰ Tí xroon Salmo mé nixja xikihí:

Tsitöhe ntóé ch'án a,
la kohya nkexro ts'ejó ntiha.

La ko kjaxin ntáchro kixin:

Í jnko nkexro ts'áyéhe tí xra kuènte ch'án.*

Mé xikaha tsíkjin ch'ín David.

²¹ Tí tjejóni ntihi la siín chojni ó k'uájikoni xráxín tí k'uék'ajikoni Ìnchéni Jesús

²² desde k'uíkonní nkexrí kuikite ch'ín Juan tí jehe ch'án la ko hasta k'uíkonní sákjuí ch'án nkaya nkajní. Ntá ijie t'ichjánxin tsoxreyá jnkojín tí sín a tsojnkotsékoni sín kixin kjaxin tsochrónka sín kixin chaxín xechón Ìnchéni Jesús —mé xikaha chrónka ch'ín Pedro.

²³ Ntá kjuenkayáxin sín tsonoxín yaá chojni mé tí ch'ín José, t'ikón ch'án Barsabás la ko Justo, la ko kjaxin í jnko ch'án it'in Matías.

²⁴ Ntá nixjehé sín Dios la ntáchro sín kixin:

—Ìnchéni jaha mé choxian asén kaín chojni. Tjákohéni nkexro tsonhen tocar xra tí yaá tí nkexro í kónoxín

²⁵ tsjiatéhe xra apóstol kuènte ch'ín Judas. A ntá tí ch'ín Judas mé kuítóhe ch'án tí xra kixin kjuasin ch'án ijie la ntá ijie sákjuí ch'án tjetjasóte ch'án —ichro sín.

²⁶ Ntá kjuích'e sín suerte ntá xrínahya kónhen tocar tí ch'ín Matías, ntá tuénxín tí hora a kuákja ch'án xra k'uéjoko ch'án tí tejnko tí sín kjueyá Ìnchéni.

2

Ó kui Nchakuen Dios

¹ Ntá ó kui tí yaon kia Pentecostés ntá kaín tí sín tinkáchónki Jesús mé kójnkotsé sín jnkokóá tjejó sín.

² Xrínahya kuínhin sín ijnko tóvéntó kuixín nkajní. Tí tóvéntó mé éxí ijnko xrinto fuerte chjéhe. Kuenté tí nchia tjejóxenhen sín mé kóvéntó kjaxin.

³ Ntá xrínahya k'uíkon sín nkehe éxí xrohi nene tsjehe. Ntá tíha xikayehé la k'uéjókjen jnkojnko kja tí jehe sín.

⁴ Na ntá kaín sín k'uáyéhe sín tí Nchakuen Dios ntá kjuankixin sín nixja sín í jnko nkíva kixin Nchakuen Dios kjuínkítsa sín nixja sín.

* 1:20 Salmos 69.25; 109.8

⁵ A nta tí yaon a la tí chjasin Jerusalén k'uéj^o chojni judío tjinkaon sín sinchexiteyéhe sín tí nkehe tinkáchónki sín, mé tsíkji^{xin} sín nkuíxín chjasin-tajni.

⁶ A ntá jehe sín mé tsíkinhin sín tí tóvéntó ntá tsíkóchjina nchónhya chojni. Ntá í noehya sín nkehe chrókjuenkayáxin sín kíxin jnkojnko tí jehe sín mé kuínhin sín kíxin nixja tí sín a jnkojnko nkívee sín.

⁷ Ntá síxrànka sín, chrakon sín ntá jehe sín mé tjo sín kíchó sín kíxin:

—¿Á jehya kaín tí sín tjeónixja mé tsíkji^{xin} sín estado Galilea?

⁸ La ¿nkekuènté tjeótinhinni kíxin nixja sín jnkojnko nkíveeni?

⁹ Kíxin ntihi mé siín chojni tsíkji^{xin} chjasin Partia, la ko Media, la ko Elam, la ko Mesopotamia, la ko Judea, la ko Capadocia, la ko Ponto, la ko Asia,

¹⁰ la ko Frigia, la ko Panfilia, la ko Egipto la ko nkuíxín Africa antsí nó ntaha Cirene. La ko kjaxin chojni romano tjejó ntihi. Iso tí sín a mé chaxín tsíkokjiéxín judío, la í so la tinkáchónki sín Dios éxí tí sín judío xíkaha.

¹¹ La kjaxin siín chojni tsíkji^{xin} Creta, la ko Arabia. Mé xíkaha kaín ni tsíkji^{xin}ni tí chjasin a mé tsíkinhinni tjeónixja tí sín a tí kjuaxroan kuènte Dios jnkojnko nkíveeni —mé xíkaha ichro sín.

¹² Ntá tóxakonhen kaín sín la chrakon sín ntá kjuanchankíhi kíchó sín kíxin:

—¿Nkehe t'axrjexín kaín tíha? —ichro sín.

¹³ A ntá iso sín kjuanoá sín ntáchro sín kíxin:

—Tsékoan tí sín a —ichro sín.

A ntá ch'ín Pedro chénka tí sín siín

¹⁴ Ntá jehe ch'ín Pedro mé k'uínkatjen ch'án, kjuák'exín toté ch'án la ko tí tejnko sín apóstol mé k'uínkatjen sín la ntá ch'ín Pedro mé itsen nixja ch'án. Ntáchro ch'án kíxin:

—Jahará chojni judío la ko jahará tjejorá chjasin Jerusalén. Kaínrá tjejorá tinhínrá tí nkehe tsoxrjanka.

¹⁵ Tí sín tjejó ntihi la jehya tsékoan sín éxí ntáchrorá, kíxin na ntá las nueve nchítjen la kohya nkexro tsékoan.

¹⁶ Tíhi mé tsíchrónka ch'ín profeta Joel:

¹⁷ Ntáchro Dios kíxin: Itsi ijnko yaon tsjixixín ntá tsochr'an Nchakuenná ntá ts'áyéhe chojni.

Ntá tí xjaanrá ntoa la ko tí xjaanrá chjin mé tsonixja tan kuèntana.

La ko tí sín ntasoá mé titàya ts'íkuèn sín tí nkehe tsjákoḥa sín.

La ko tí sín ó táda la kotáchrién sín ts'íkonxín sín kíxin nkexrí tjinkaon Dios.

¹⁸ Tí yaon tsonhen kaín tíha la tsochr'an tí Nchakuenná ts'áyéhe kaín tí sínntoa ch'ena xra la ko tí síchjin kjaxin

la tsochrónka sín tanná.

¹⁹ Ntá janhan mé tsjáko^{xian} ijnko kjuachrakon nkajní.

A ntá chjasintajni tsjáko^{xian} kjuaxroan:

mé ts'ixín ijni la ko xrohi la ko itjuí tsík'óna ihnchi.

²⁰ Mé tí yaon la ts'inkaséyanxínhya, ts'óna ts'ixín tie.

A ntá tí nitjó mé ts'óna ijni.

Xíkaha senó tsonhen ntá itsi Ìnchéni.

Tíhi mé ijnko yaon imá jié la imá náxrjón.

²¹ A ntá kaín tí nkexro tsjanchehe ihnié Ìnchéni kíxin tsjinkítsa sín mé tsaá sín.*

Mé xíkaha tsíchrónka ch'ín Joel.

²² Jahará chojni israelita tinhínrá tí nkehe tsoxrjanka. Tí ch'ín Jesús tsíkji^{xin} chjasin Nazaret mé Dios kjuako^{xin} ch'án kíxin tsíchr'an ch'án kíxin kjuasin ch'án itsjé kjuaxroan jié k'uíkonrá la ko kjuako ch'án kíxin Dios

* 2:21 2.17-21 Joel 2.28-32

tsíchjéhe ch'án kjuachaxin kixin tjinkaon ch'án chrók'uikonrá. Jahará ó jína nohará kaín tíha.

²³ Kjónté xikaha k'uíkonrá la jahará itserá ch'án éxí tsíkjenkayáxin Dios ósé. A ntá jahará kjuínchek'ayéhérá ch'án tí sín jínahya, a ntá tí sín jínahya mé k'óyán sín ch'án, kjuak'enkani sín ch'án ijnko ntacruz.

²⁴ Kjánchó Dios la kjuínchexechón ch'án inaá la kjuatsen ch'án tí kjuatjoté kuènte kjuach'én kixin ntá ti kjuach'én xitjahya ts'etuenhen tí jehe ch'án.

²⁵ A ntá ósé tí ch'ín rey David tsíchronka ch'án kuènte Jesús ntáchro ch'án kixin:

Jaha Ìnchéni t'íkuan kixin jnkochrín tjétaón ntia tí xritjak'é janhan.

Jaha mé itjen tjaná chjina kixin chrókohya jie chrókjuásian.

²⁶ Méxra imá chéhe asenná. Ir'va tsjexian tí nkehe náxrjón.

Ó nòna kixin kohya nkehe ts'atsínka kjónté its'én.

²⁷ Ó nòna kixin tí jaha tsítóehya asenná chríkjan tí síin chojni tsík'en.

Tsjánjonhya kjuachaxin kixin tsoxíka ntóna kixin janhan mé ijnko nkexro t'aha xra jína tjuèhe.

²⁸ Jaha mé kjuákona tí ntia tsjanjon kjuachón. Jaha mé nchechàna kixin t'ayakonna.†

Mé xikaha tsíkjin ch'ín David.

²⁹ 'Kíchóni títóhéra tsontáxrjan kixin ch'ín David, tí nkexro k'uaxrjeníxinni mé tsík'én ch'án la ko tsíkji xravá ch'án. Ntá naxa noheni nketí tsíxravá ch'án.

³⁰ A ntá ch'ín David mé ijnko nkexro tsíchronka itén Dios la ó nohe ch'án kixin chaxín Dios chrónka kixin ijnko nkexro ts'axrjeníxin ch'án mé ts'óna rey mé ts'etóan éxí jehe ch'án k'uetóan ch'án.

³¹ Mé xikaha ch'ín David la ósé ó nohe ch'án nkehe tsonhen la mé chrónka ch'án kixin tsoxechón Cristo la ko ntáchro ch'án kixin tí asén ch'án tsítóehya tí síin tí sín tsík'en la ts'itjáyanhya tí cuerpo kuènte ch'án.

³² Méxra Dios kjuínchexechón tí ch'ín Jesús, mé k'uíkoni kaín ni la mé chrónkani kixin chaxín tíha.

³³ Ntá ijie Jesús mé sákjuiko ch'án Dios la nàngo itja chjina Dios mé tjen ch'án. Ntá tsintáchro It'é ch'án Dios kixin tsochr'án ch'án tí Nchakuen ch'án. Ntá jie ó kui la ó k'uíkonrá la ko kuínhínra nkehe kónhen.

³⁴ Tí ch'ín David la jehya jehe ch'án sákjuí nkaya nkajní, kixin jehe David ntáchro ch'án kixin:

Ìnchéni Dios mé ntáche tí Ìnchéni kixin:

“Tjak'e tjaná chjina ntihó tsétoan,

³⁵ tsjixinjian kaín xín tí sín nínkakonhan la tsjachahya sín ts'etóan sín kixin jahvá mé tsétoan.”‡

Mé xikaha tsíkjin ch'ín David.

³⁶ 'Ntá kaín rá chojni israelita chrókónohará chaxín kixin jehe tí ch'ín Jesús ó kjuakénkanirá tí ntacruz la Dios mé kjuíchéna Ìnchára ijie, mé tí Cristo —mé xikaha chrónka ch'ín Pedro.

³⁷ Ntá ti kuínhin sín tíha ntá imá kóxakonhen asén sín. La ntá kjuanchankíhi sín ch'ín Pedro la ko tí í so sín kjueyá ch'ín Jesús. Ntáchro sín kixin:

—Kíchóni, a ntá jie la ¿nkexrí chrókjuich'eni?

³⁸ Ntá kjuátehe ch'ín Pedro ntáchro ch'án kixin:

—Chrókuitóhéra tí ijiára la chróxráxinkáonrá Dios. Ntá chrókuikitaxínra ihnié Jesucristo ntá Dios mé tsjakjihinhanrá tí ijiára ntá jehe ch'án tsjanjon ch'án Nchakuen ch'án ts'ayéhérá.

† 2:28 2.25–28 Salmo 16.8–11 ‡ 2:35 2.34–35 Salmo 110.1

³⁹ Dios mé sinchekitonhanrá ch'án tí Nchakuen ch'án ts'ayéhérá jahará la ko xjaanrá la ko kjaxin tsochjéhe ch'án Nchakuen ch'án kaín xín tí sín tjejó ikjín. Mé jehe ch'án tsochjéhe ch'án Nchakuen ch'án jnkojnko tí nkexro tsjeyá ch'án.

⁴⁰ Mé xikaha ntáchro ch'ín Pedro la ko í so nkehe ntáchro ch'án. Nta nixjehé ch'án sín inaá, ntáchro ch'án kixin:

—Chrókujtohérá tí jínahya tjenkayáxin tí chojni síin chjasintajni kixin jahará me jína chrókuaará.

⁴¹ Ntá kaín tí sín kuítekaon tí nkehe chrónka ch'án la ntá kuíkite sín la tí yaon a kóchjina iní mil chojni kjuankixin tinkáchónki Ìnchéni Jesús la k'uíto tí sín ó xráxin síin.

⁴² Ntá kaín sín mé jína k'uék'ejó sín mé kuítekaon sín tí nkehe kjuako tí sín kjueyá Jesús la kjuínkítsa sín kjuanjon sín tí nkehe chrókjóne tí í so sín la ko chjéhe sín Dios kjuasáya la ko kójnkotsé sín kixin sine sín niotja xraxinkakonxín sín kixin ik'uén Ìnchéni.

Mé xikaha k'uéjéjó tí sín xrankixixín tinkáchónki Ìnchéni

⁴³ La ntá kaín tí í so sín mé chrakon sín kixin tí sín tsíkjeyá Jesús kjuasin sín itsjé kjuaxroan.

⁴⁴ La kaín tí sín tinkáchónki Jesús mé jnkokoá k'uéjéjó sín la jnkokoá chónka sín tí nkehe sine sín.

⁴⁵ Kjuínchekji sín tí nkehe chónka sín ntá k'óxikayehé sín tí chichaon la chjéhe sín tí sín chóntahya.

⁴⁶ Jnkojnko yaon kójnkotsé sín tí njnko la ntá jnkojnko ntóe sín kjóneko kichó sín. La ko kjóne sín niotja kixin xraxinkakonxín sín kixin ik'uén Ìnchéni la ko kjuaxróxin k'uéjéjó sín la kohya nkexro kjuínchehnke.

⁴⁷ Kjuanchehe sín kjuasáyé Dios. Ntá kaín chojni k'uéchónthehe sín kjuasáya. A ntá jnkojnko yaon Ìnchéni mé kjueyá iso chojni kixin tsotsjéjé tí sín tsaá.

3

Kuítóhe jína ijnko nkexro xitjahya tji

¹ Ijnko yaon tí ch'ín Pedro la ko ch'ín Juan mé chrin sín sákjuj sín tí tjen tí njnko. Mé kjuíji sín las tres kónjín, tí hora mé nixjehé sín Dios.

² Kaín yaon kjuák'e ntiha ijnko ch'ín tsíkokjéxín xitjahya tji. Satsíkjiko sín ch'án tí njnko la tsíkjak'etjaxín sín ch'án tí ntója puerta mé it'in Ntója Náxrjón. Ntaha tjetjanhak'éhe ch'án chichaon tí sín sít'ixenhen ntiha.

³ Ntá xrínahya k'uíkon tí ch'ín xitjahya tji kjuíji tí ch'ín Pedro la ko ch'ín Juan ts'ixenhen sín njnko, a ntá kjuanchak'éhe ch'án sín chichaon.

⁴ Na ntá ch'ín Pedro la ko ch'ín Juan mé komá sín tí ch'ín a la ntá ntáchro ch'ín Pedro kixin:

—Tsjehé ntihi.

⁵ A ntá tí ch'ín a tjetsjehe ch'án jína kixin ách'e ichrén nkehe tsjanjon tí sín a, ichro ch'án.

⁶ A ntá ch'ín Pedro ntáchro kixin:

—Na chontahya plata ni oro kjánchó tí nkehe chonta la tsotjahá. Mé kjuachaxin ihnié Jesucristo, tí nkexro tsíkjixín chjasin Nazaret, la t'inkatjen itjia —mé xikaha ichro ch'ín Pedro.

⁷ Ntá ch'ín Pedro mé itsé ch'án tí tja chjina tí ch'ín xitjahya tji ntá k'uíkatjen ch'án. Ntá xrínahya ó kósóji tí nta ntoá toté ch'án.

⁸ Ntá tí ch'ín xitjahya tji la chrika ch'án la kjuák'exín toté ch'án ntá kjuankixin ch'án itji ch'án. Ntá k'uixenko sín ch'án nkaxenhen njnko. Tjetji ch'án la ko chrika ch'án la chjéhe ch'án kjuasáya Dios.

⁹ Na ntá kaín tí chojni síin tí chjasin ntiha la k'uíkon sín kixin ó tji ch'án la ko chjéhe ch'án kjuasáya Dios.

¹⁰ Ntá chrakon sín kixin xikaha tsíkónhen kixin tsíkjatsōan sín kixin jehe tí nkexro kjuák'etjāxīn kjuanchak'á ch'án chichaon ntója nīnko it'in Ntója Náxrjón.

Nixjēhe ch'ín Pedro tí chojni síin tí ntāsin Salomón

¹¹ Na tí ch'ín xitjahya tji la mé títōehya ch'án tí ch'ín Pedro la ko ch'ín Juan. Ntá kaín xín tí sín síin ntiha chrakon sín kuinká sín sákjuítsjehe sín tí ntāsin kuēnte nīnko it'in ntāsin Salomón kixin ntaha tjejó tí sín a.

¹² Ntá tí k'uíkon ch'ín Pedro xikaha la ntáche ch'án sín kixin:

—Jahará chojni israelita, ¿nkekuēnte chrakonrá jahará la ko nkekuēnte komáráni? ¿Á tjenkayáxinrá kixin jehóni kjuínchekitōheni jína tí ch'ín i kixin jehóni chóntani kjuachaxin la ko kixin imá tinkáchónkini Dios?

¹³ Náhí. Tí Dios k'uékinkáchónki ch'ín Abraham, la ko Isaac, la ko Jacob mé imá chjéhe ch'án kjuachaxin tí Xjeen ch'án Jesús. Kjánchó jahará tsíkikēnhenrá ch'án tí sín t'etōan. Ntá tí ch'ín Pilato mé tjinkaon ch'án chrók'uátjánta ch'án tí ch'ín Jesús kjánchó jahará la tjinkákonhyará xikaha.

¹⁴ A ntá jahará chrókjuanchiará chrókuítōhe sáchrókjui tí nkexro tjóá jína asén. A ntá náhí. A ntá jahará mé tjinkáonrá sátsji ijnko chojni chóna nchónhya jie.

¹⁵ A ntá jahará tsík'oyánrá tí nkexro tjanjon kjuachón. A ntá Dios mé kjuínchexechón tí jehe ch'án la mé xikaha k'uíkonni la chrónkani.

¹⁶ Tí kjuachaxiēn ihnié Jesús mé tinkáchónkini la ntá tíha mé kuítōexín jína tí nkexro k'uíkonrá la ko choxinrá. Tí ch'ín a mé kuítekaon ch'án ntá kuítōhe ch'án jína. Mé xikaha ó k'uíkonrá kaín rá.

¹⁷ Kíchóni ó nōna kixin tió jahará la ko tí sín t'etōan k'oyánrá Jesús la ni kónoahyará nkehe kjuich'erá.

¹⁸ Ntá ó xiteyá tí nkehe tsíntáchro Dios tsínixjāxīn tí sín tsíchrónka itén ch'án kixin tí Cristo t'ichjānxīn tsjasóte ch'án.

¹⁹ Méxra tsitōhérá ijíará ntá xráxinkáonrá Dios ntá jehe ch'án mé ts'óxíka ijíará ntá Ìnchéni mé sinchekitōhará ch'án jína.

²⁰ Ntá jehe ch'án mé tsochr'án Jesucristo ínaá la xra ó tsi kixin tsaáxinrá.

²¹ Na ntá ijie la Jesucristo la nkaya nkajní ntahó tsitōhe ch'án hasta tsjasiyóxinjian Dios kaín nkehe éxí tsíntáchro ch'án tsínixjāxīn ch'án tí sín tsíchrónka itén ch'án ósé.

²² A ntá senó tí ch'ín Moisés tsíchénka tí sín tsík'axrjeníxinni kixin: “Ìnchéni Dios mé tsochr'án ijnko nkexro ts'axrjeníxinrá tsochrónka itén ch'án éxí tsíchr'án ch'án tí janhan. T'ichjānxīn tinhínrá kaín tí nkehe tsontáchro ch'án.

²³ A ntá tí chojni titekakonhya tí nixja tí nkexro a la ts'itjāyan sín la tsítōhe sín tí nación Israel,”* mé xikaha tsíchrónka ch'ín Moisés.

²⁴ Kaínxín tí sín tsíchrónka itén Dios kjuankíxixín ch'ín Samuel la ko kaín tí sín kui chr'éxīn mé chrónka sín kixin kaín tíha tsonhen xikaha tí yaon i.

²⁵ Mé tí nkehe tsíntáchro Dios tsínixjāxīn ch'án tí sín tsíchrónka itén ch'án kixin xikaha chrók'uayéhérá jahará tí nkehe chrókjuanjon ch'án kixin chrók'uejorá jína. Dios tsíkjich'éna ch'án ijnko pacto mé nixjēhe ch'án tí sín tsík'axrjeníxinrá mé tsíntáche ch'án tí ch'ín Abraham kixin: “Kaínxín chojni chjasintajni mé tsoyaonxín sín kixin ijnko nkexro ts'axrjeníxin tí jaha.”†

* 3:23 3.22–23 Deuteronomio 18.15,19 † 3:25 Génesis 22.18

²⁶ Dios kjuínchexechón ch'án tí Xjeen ch'án la saoxín ichr'án ch'án tí tje-jorá jahará israelitará kixin chrókjuintayaonrá ch'án kixin jnkojnko tí jahará chrókuítóhéra tí nkehe jínahya ich'erá —ichro tí ch'ín Pedro.

4

Tí ch'ín Pedro la ko ch'ín Juan nkayakon tí sín t'etoan

¹ Ch'ín Pedro la ko ch'ín Juan la naxa tjejonixjehe sín tí sín tsíkójnksé ntá xrínahya ikui tí sín nchat'á la ko tí ch'ín t'etuennen tí sín soldado kuènte tí ninko la ko tí sín saduceo.

² Imá kóninkaon sín kixin ch'ín Pedro la ko ch'ín Juan kjuakohē sín tí sín tsíkójnksé nkexrí tsoxechón chojni tsík'en kixin xikaha xechón ch'ín Jesús.

³ Ntá kuínhin sín xikaha ntá itsé sín tí sín a ntá sákjuíko sín, chr'áxehen sín ntóechiso. Ntahó k'uéjó sín hasta kóyaon kixin ó ntá kóntó.

⁴ A ntá nchónhya tí sín tsíkinhin tí tan a la kuítekaon sín. Ntá kjuixraká tí número tí chojni ntoa mé in'ó mil chojni ntoa ó.

⁵ A ntá tí yaon chr'éxin kójnksé tí chjasin Jerusalén tí sín t'etoan kuènte tí sín judío la ko tí sín tjako tí ley.

⁶ Mé kjaxin ntaha tjen ch'ín Anás, mé jehe ch'an mé tí nchat'á imá t'etoan, la ko ch'ín Caifás, la ko kjaxin ch'ín Juan, la ko ch'ín Alejandro, la ko kaín tí chojni kjéhya tí nchat'á t'etoan.

⁷ Ntá k'uetoan sín kixin síxrakoa ch'ín Pedro la ko ch'ín Juan. Ntá k'uéjó sín jnkosiné la ntá kjuanchankíhi sín ntáchro sín kixin:

—¿Nkexro kjuanjon kjuachaxin o nkexro kjuachaxin ihnié kixin xikaha ich'erá tí nkehe?

⁸ Ntá ch'ín Pedro imá chóna ch'án kjuachaxin kuènte Nchakuen Dios ntá kjuátehe ch'án ntáchro ch'án kixin:

—Jahará chojni t'etoan kuènte chjasin la ko jahará sín táda kuènte chjasin Israel,

⁹ jahará mé tjanchankirá kixin nkexrí kuítóhe ijnko chojni níhi jína kixin tjinkáonrá tsonohará.

¹⁰ Ntá tinhírrá jína tí nkehe tsochrónkaxínni kixin kaín rá chojni chjasin Israel tsonohará kixin tí ch'ín i itjen ntihi mé kuítóhe ch'án jína kjuachaxién ihnié Jesucristo, tí nkexro tsíkixín chjasin Nazaret. A ntá jahará mé tsíkjakénkanirá ch'án tí ntacruz la ntá Dios kjuínchexechón ch'án ínaá.

¹¹ Tí ch'ín Jesús i mé tí xro náxrjónhya kuítóéntará tió kjuich'énará tjat'o ntá mé jie k'óna tí xro tjetooan.*

¹² Kohya í jnko nkexro chóna kjuachaxin chrókuaáxinni kixin kohya í jnko ihnié chojni ntihi chjasintajni chrókuinkáchónkini chrókuaáni —mé xikaha ichro ch'ín Pedro.

¹³ Tí síxreé mé k'uíkon sín kixin ch'ín Pedro la ko ch'ín Juan mé nixja sín kaín asén sín la ntá kónohe sín kixin tí sín a mé noehya sín xroon la tjetuanhya sín. Ntá chrakon tí sín t'etoan ntá kjuátsoan sín kixin tí sín a mé tsík'ajiko ch'ín Jesús.

¹⁴ A ntá tí ch'ín tsíkítóhe jína mé ntiha tjejóko sín ch'án. Méxra xitjahya tsjanchia sín jie tsjasóte tí sín a.

¹⁵ Ntá tí síxreé a mé k'uetoan sín kixin tí sín a ts'axrje sín ntója ntá jehó sín k'uéjoxehen sín nchia ikjo sín kichó sín.

¹⁶ Ntá ntáchro sín kixin:

—¿Nkehe chrókjuich'ehe ni tí sín a? Kaínxín tí chojni ntihi chjasin Jerusalén mé ó k'uíkon sín kixin kjuínkítsa Dios tí sín a ntá kjuasin sín ijnko kjuaxroan jie ntá xitjahya tsontáchroni kixin chaxínhya tíha.

* 4:11 Salmo 118.22

17 Í tjinkakonhyani kixin naxa tsochrónka sín tíha kixin naxa tsinhin chojni. Méxra ts'etoanni kixin í tsochénkahya sín ninkexró tí ihnié Jesús.

18 Na ntá k'uíyehē sín tí sín a ínaá ntá k'uetuēnhen sín kixin ninkehó chrónixja sín la ko chrókjuako sín ihnié Jesús, ichro sín.

19 A ntá ch'ín Pedro la ko ch'ín Juan kjuátēhe sín ntáchro sín kixin:

—Tjenkayáxinrá jahará, ¿á chrókóxrjínhín Dios chrókjuintaxiteyáharáni jahará o chrókjuinchexiteyéheni tí jehe ch'an?

20 A ntá jeheni la xitjahya tsítóheni tsochrónkani tí nkehe ó k'uíkoni la ko tí nkehe kuínhinni —ichro sín.

21 A ntá kjónté xikaha kuínhin tí síxreé la jiehe k'uetōan sín ntá kjuanjon sín kjuachaxin kixin sátsji tí sín a kixin k'uitjahya sín nkexrí sinchekjasóte sín tí sín a kixin kaín tí sín chjasin ntiha chjéhe sín Dios kjuasáya kixin tí kjuaxroan kjuích'e sín.

22 Na mé tí ch'ín kuítóhe jína kixin tí kjuaxroan mé chjina k'uaxitjehe ch'án cuarenta nánó a.

Tí sín tinkáchónki Jesús tjanchia sín kixin tsochrakonhya sín

23 Ntá tí ch'ín Pedro la ko ch'ín Juan tsíxranjon kjuachaxin sátsji sín na ntá sákjuí sín tí tsíkójnkotsé iso tí sín chóxin sín. Ntá chrónka sín kaín nkehe k'uetōan tí sín nchat'á t'etōan la ko tí sín táda.

24 Ntá kjuixin kuínhin tí sín tsíkójnkotsé na ntá kaín sín nixjehe sín Dios la ntáchro sín kixin:

—Ínchéni, jaha mé kjuích'éna nkajní la ko chjasintajni la ko tí ntayaon la ko kaín sín tí nkehe siín.

25 Jaha mé kjuachaxián Nchakuan nixjaxian ch'ín David tí nkexro kjuít'aha xra. Ntáchro ch'án kixin:

¿Nkekuènte kixin kónínkaon kaín tí chojni nación ókjé?

A ntá tí chojni israelita mé tjenkayáxin nkehe ninkehó sínkíhya.

26 Tí sín rey siín chjasintajni la ko kaín tí sín tí chjasin kójnkotsé sín

nínkakohen sín Ínchéni la ko Cristo.†

Mé xikaha tsíkjin ch'ín David ósé.

27 'Mé xikaha chaxín ch'ín Herodes, la ko ch'ín Poncio Pilato, la ko kjaxin tí chojni tsíkjin ókjé, la ko tí sín israelita mé tsíkójnkotsé sín tí chjasin ntihi kixin kónínkakohen sín tí Xjaan Jesús chóntahya jie, mé tí nkexro tsíkjéyá jaha sit'aha xra.

28 Mé xikaha kjuínchexiteyá sín tí nkehe ósé tsíkjenkayáxian kixin t'ichjánxin xikaha tsonhen.

29 A ntá Ínchéni, tsjehé kixin imá jiehe k'uetōan tí sín a. La ntá jaha tsjínkítsa tí sín sit'aha xra tsochrakonhya sín tsochrónka sín itán.

30 La ko tí kjuachaxián sinchekitoexín jína tí chojni níhi la ko tsjákoxian kjuaxroan kjuachaxián ihnié tí nkexro Jesús t'aha xra —mé xikaha nixjehe sín Dios nkaya nkajní.

31 A ntá tí kjuixin nixjehe sín Dios a ntá tí tjejó sín mé kuínkí nonte. La ntá kaín sín antsí k'uáyéhe sín Nchakuen Dios ntá kaín asén sín kjuankixin sín chrónka sín itén Dios.

Tí kaín nkehe siín la kaín sín mé kuènte sín

32 La kaín tí sín kuínkáchónki sín Jesús mé jnkokoá kjuenkayáxin sín. Kohya nkexro ntáchro kixin jehó kuènte tí nkehe siín. Náhí. Kaín sín mé kuènte sín.

33 Tí sín tsíkjéyá Jesús mé kaín asén sín chrónkaxín sín kixin nkexrí xechón Ínchéni Jesús. Ntá Dios antsí kjuíncheyaon kaín sín.

† 4:26 4.25–26 Salmo 2.1–2

³⁴ Kohya ninkexró nóaxinhya tjejó ntiha kíxin kaín tí sín chón̄ta nont̄ee sín o n̄toe sín kjuínchekji sín. Na ntá tsíkjikao sín tí chichaon

³⁵ chjéhe sín tí sín kjueyá Jesús. A ntá tí sín k'óxikeyehe sín tí chichaon, kuákja tí sín n̄ōa.

³⁶ Mé xikaha kjuích'e ijnko ch'ín levita it'in José. Jehe ch'án la tsíkjin ch'án nonte Chipre jnkosiné ntayaon. Tí sín kjueyá Jesús mé kjuínchek'in sín ch'án Bernabé, mé t'axrjexín kíxin tí ch'ín nchechéhe asén chojni.

³⁷ Jehe ch'án a mé kjuínchekji ch'án ijnko nont̄ee ch'án ntá kjuíkao ch'án tí chichaon kjuínchek'áyéhe ch'án tí sín kjueyá Jesús.

5

Ijje kjuasin ch'ín Ananías la ko tjan Safira

¹ A ntá í jnko ch'án mé it'in Ananías, a ntá ichjién ch'án mé it'in Safira, mé jehe sín mé kjuínchekji sín ijnko nont̄ee sín.

² A ntá tí ch'ín a kjuenkayáxinko ichjién ch'án ntá kuakitsjentehe sín iso tí chichaon. Ntá í so mé sákjuíko ch'án la chjéhe ch'án tí sín kjueyá Jesús la kjuanjon ch'án éxi kaín.

³ Ntá ntáchro ch'ín Pedro kíxin:

—Ananías, ¿kuènté chjehé kjuachaxin tí Tsohren kíxin k'uetuenhen asán? Ntá kjuích'iyehé tí Nchakuen Dios kíxin kjuínchemá iso chichaon kjuínchekjixián nont̄aa.

⁴ ¿Á jehya nont̄aa tíha? Ntá tió kjuínchekjia la, tí chichaon la, ¿á jehya kuèntá? ¿Kuènte kjuenkayáxian sich'e tíha? Kjuích'iyehé Dios, jehya chojni kjuích'iyehé.

⁵ Na ntá kuínhin tí ch'ín Ananías ntá kjuítsínka ch'án ntá ik'uén ch'án. La ko kaín xín tí sín ntiha kónohe sín nkehe kónhen tí ch'ín a la imá chrakon sín.

⁶ Na ntá ikjui iso sín ntasoá la ntá kjuínchek'ísímá sín ika tí cuerpo kuènte ch'án la ntá sákjuíko sín, sákjuíkjavá sín.

⁷ Ntá k'uátsínka iní hora ntá kjuíji ichjién ch'ín Ananías k'uíxenhen tjan tí nchia ntaha a. La noehya tjan nkehe tsíkónhen tí ntiha.

⁸ Ntá ch'ín Pedro mé kjuanchankíhi tí tjan a, ntáchro ch'án kíxin:

—Chronka, ¿á chaxín xikahó kóxiñín tí nonte ó kjuínchekjirá? —ichro ch'án.

Ntá kjuátehe tjan kíxin:

—Chaxín xikahó kóxiñín.

⁹ Ntá ntáchro ch'ín Pedro kíxin:

—¿Nkekuènte jnkokoá kjuenkayáxinrá kjuích'iyehé Nchakuen Ìnchéni? Kjá ntáchrora kohya nkehe chrókónhanrá. Ntihi ó kui tí sín ntasoá sákjuíkjavá sín xia na ntá jaí sátsjiko sín tí jaha —mé xikaha ichro ch'ín Pedro.

¹⁰ Ntá tuénxín kjuítsínka tjan Safira toté tí itjen ch'ín Pedro ntá ik'uén tjan. Ntá k'uíxenhen tí sín ntasoá tí nchia a ntá k'uíkon sín kíxin tsíkjin tsík'en tjan. La ntá sákjuíko sín tí cuerpo kuènte tjan la kjuavá sín tjan tí chjinaxón tsíxrává tí xii tjan.

¹¹ Na kaín tí sín kuènte n̄nko la ko tí í so sín kuínhin tí xikaha tsíkónhen, mé imá chrakon sín.

Itsje kjuaxroan kjuakoxin sín

¹² A ntá tí sín kjueyá Jesús mé kjuakoxin sín nchónhya kjuaxroan tí siín chojni ntiha la ko kaín sín mé kójnkotsé sín tí ntasin it'in Salomón.

¹³ Chrakon iso sín k'uítóhya tí jehe sín la kjónté la kaín chojni tjikosáyehe tí jehe sín.

14 La ntá xrínahya nchónhya chojni ntoa la ko chojni chjin kjuankíxin tinkáchónki sín Ìnchéni.

15 Ntá itsjé chojni mé kuakitsje sín tí chojni níhi k'uejo sín ntía. Tjejóták'á sín chrítaón cama la ko kania kixin ts'atsínka ch'ín Pedro ntá kjónté its'ueen ch'án ó ts'atsínka tí tjejó sín mé chrókuitoexín sín jína.

16 Kjaxin tí chjasin chjino mé kjuixín nchónhya chojni ikjui sín chjasin Jerusalén la kjuikao sín tí chojni níhi la ko tí chojni chóna nchakuen tí jínahya. La kaín sín a mé kuítóhe sín jína.

Ch'ín Pedro la ko ch'ín Juan mé chónkíhi sín

17 Na ntá tí sín nchat'á t'etoan la ko tí sín kuènte tí sín saduceo mé imá kóchjinoxínhin sín.

18 Na ntá itsé sín tí sín kjueyá Jesús la chr'áxehen sín ntóechiso.

19 A ntá ijnko ángel kuènte Ìnchéni ikui tí tie a kuakitjehe ch'án ntója ntóechiso ntá kuakitsje ch'án tí sín a. La ntá k'uetuènen ch'án sín kixin:

20 —Sátjirá nínko la tsjákohérá kaín tí sín ntiha tí tan nixin tsjanjon kjuachón.

21 Kjuixin kuínhin sín ntá sákjuí sín ntá tí k'uínkaséyan k'uixehen sín tí nínko kjuako sín.

A ntá tí nchat'á t'etoan la ko tí sín k'uejóko ch'án mé k'uíyehé sín tsojnkotsé kaín tí síxreé, mé tí sín t'etoan kuènte Israel. Na ntá k'uetuènen sín kixin tsoxrakoa tí sín tjejóchjina tsíkjeýá Ìnchéni.

22 A ntá kjuíji tí sín policia tí ntóechiso a ntá k'uitjahya sín tí sín a. La ntá ikjan sín la

23 ntáchro sín kixin:

—Kjuíjini ntiha la k'uíkoni tsíkjehe jína ntóechiso a la k'uejó tí sín soldado a ntója. Ntá kuakitjehe ni ntóechiso la k'uitjahyani ninkexró tí nkaxehen —ichro sín.

24 Ntá kaín tí nchat'á t'etoan la ko tí ch'ín k'uetuènen tí policia kuènte nínko la ko i so tí sín nchat'á t'etoan mé kuínhin sín ntá ntáchro sín kixin xá nkexrí chrókónhen chrók'uitjayan tí xra kuènte tí sín a.

25 Na ntá tuénxín kjuíji ijnko nkexro ntáchro kixin:

—Tí sín k'uejochjinará jahará mé ó nkaxehen nínko ntaha tjejó sín tjejótkohe sín chojni —ichro ch'án.

26 La ntá tí ch'ín k'uetuènen tí sín policia mé sákjuíko ch'án tí sín policia la kjuikakjín tí sín tjako. Nínkehó kjuích'ehya tí sín policia tí sín tjako kixin chrakon sín kixin ách'e tí sín síin ntiha mé tsjak'e sín xro, ichro sín.

27 Na ntá tió kjuikao sín tí sín a la k'uejó sín nkayakon tí sín t'etoan ntá tí nchat'á t'etoan ntáchro ch'án kixin:

28 —Jeheni kjuanjonhyani kjuachaxin kixin tsjákorá ihnié tí nkexro a. ¿A ntá nkehe kjuích'erá jahará? Kuenté chjasin Jerusalén tsíkjákorá. La tjinkáonrá tsékaráni jie kixin jeheni tsík'óyánni tí ch'ín a —ichro ch'án.

29 A ntá ch'ín Pedro la ko tí iso sín kjueyá Jesús ntáchro sín kixin:

—A ntá jeheni t'ichjánxin sinchexiteyeheni Dios senó. A ntá chr'éxin sinchexiteyeheni chojni.

30 Tí Dios tsíkinkáchónki tí sín tsík'axjeníxinni ósé mé kjuínchexechón Jesús, tí nkexro a mé kjuakénkanirá tí ntacruz tsík'oyánrá.

31 Ntá ijie tjeko ch'án Dios nkaya nkajní la nánko itja chjina Dios mé tjen ch'án la Dios kjuích'éna ch'án ijnko nkexro t'etoan kixin sinchekaá ch'án chojni kixin tí nación Israel chrókjan chrókuinkáchónki sín Dios ntá chrók'uitjayan tí jie chóna sín.

³² La ko kjaxin jeheni chrónkani kaín tí nkehe k'uíkoni kjuachaxiën Nchakuen Dios. Tí Nchakuen ch'án mé chjéhe Dios kaín tí nkexro chaxín sinchexiteyéhe tí jehe ch'án.

³³ La ntá tí sín t'etoan a mé kuínhin sín tíha ntá kónínkaon sín la ko tjinkaon sín chrók'óyán sín tí sín a.

³⁴ Na ntá tjen ijnko chojni fariseo mé ijnko síxreé it'in ch'án Gamaliel. Jehe ch'án mé ijnko maestro kjuako tí ley la kaín chojni chjasin ntiha chónthe ch'án kjuasáya. Mé k'uínkatjen ch'án kjuák'exín toté ch'án la nixja ch'án k'uetōan ch'án kixin tí sín tsíkjeýá Ìnchéni mé ts'axrje sín ntója intsí, ichro ch'án.

³⁵ Na ntá nixjehe ch'án kaín tí síxreé ntáchro ch'án kixin:

—Jahará chojni israelita, tóxakonhanrá kixin kohya nkehe chrókjuich'eherá tí sín a.

³⁶ Xráxinkáonrá kixin senó kjuák'e ijnko ch'ín it'in Teudas la tónhen asén ch'án kixin imá t'etoan ch'án. Ntá itsjé sín mé noó ciento chojni kjuíchréhe ch'án. Na ntá ókjé chojni k'óyán sín tí ch'ín a la ntá kaín tí sín kuinkáchréhe tí jehe ch'án mé xíka sín sákjuí sín ntá ntahó kjuèxín tí xra k'uékjich'e sín.

³⁷ Ntá chr'éxín tió xrenájín kaín ihnié chojni k'uéjó na ntá ikjui í jnko ch'ín mé it'in ch'án Judas la kjuixín ch'án estado Galilea. Ntá itsjé chojni kjuíchréhe ch'án. La ntá kjaxin k'óyán sín ch'án la ntá kaín xín tí sín kjuíchréhe ch'án xíka sín sákjuí sín inaá.

³⁸ Méxra tjtōhérá tjiatéhyará tí jehe sín a. A ntá tí tjejóch'e sín xra kuènte chojni ó la kjaxin ts'itjayan.

³⁹ A ntá tí chaxín tjako sín kjuachaxiën Dios ntá tsjachahyará sinchek'itjayanrá tíha. Méxra tjtōhérá sín kixin tsjánjonkohyará Dios.

⁴⁰ Na ntá kaín tí síxreé mé kuítekaon sín la ntá k'uíyehé sín tí sín kjueýá Jesús. La ntá kjuate sín la xík'etuēnhen sín kixin í tsonixjahya sín ihnié Jesús la ntá kjuanjon sín kjuachaxin kixin sátsji sín.

⁴¹ Ntá tí sín kjueýá Jesús mé k'uaxrjexín sín tí tjejó tí sín t'etoan kjónté xíkaha kónhen sín la chéhe sín kixin Dios kjuanjon kjuachaxin kjuasóte sín kixin tí kjuako sín ihnié Jesús.

⁴² Kuítóehya sín tsjako sín kuènte Jesucristo kaín yaon tí nkaxenhen njnko la ko tí jnkojnko ntōe chojni.

6

Kjueýá sín yato chojni tsjinkitsa

¹ Na ntá tí yaon a tjoka sítinkákótsjé tí sín tinkáchónki Ìnchéni. A ntá tí sín nixja nkíva griego mé kónínkakonhen sín tí sín nixja nkíva hebreo. Ntáchro sín kixin tí sín chjin k'án kuènte sín la kánhyó jína k'uáyéhe tí nkehe síxikayehé sine sín jnkojnko yaon, ichro sín.

² Na ntá tí teýó tí sín tsíkjeýá Jesús mé k'uíyehé sín kaín tí sín tinkáchónki Ìnchéni. Ntá nixjehe sín, ntáchro sín kixin:

—Jeheni la jehya jína tsítōheni tí xra tjakoni itén Dios, kixin ntá sit'aharáni xra ts'óxíkayeheni tí nkehe sine tí sín k'án.

³ Méxra jahará kichó ni tsjéýará yato chojni ntoa tí tjejórá, tí chojni jína choxinrá la ko nohe sín la ko antsí chóna sín Nchakuen Dios mé tí sín a sinchek'áyeheni tí xra a.

⁴ A ntá jeheni la tsonixjeheni Dios la ko tsinkákjakoni itén ch'án —mé xíkaha ichro sín.

⁵ La ntá kaín sín mé kuínhin sín xíkaha ntá jnkokoá kjuenkayáxin sín. La ntá kjueýá sín ch'ín Esteban, mé ijnko nkexro imá tinkáchónki Ìnchéni la ko antsí chóna ch'án tí Nchakuen Dios. La kjaxin kjueýá sín ch'ín Felipe, la ko

ch'ín Prócoro, la ko ch'ín Nicanor, la ko ch'ín Timón, la ko ch'ín Parmenas la ko ch'ín Nicolás. Jehe ch'án mé tsíkji_{xin} ch'án chjasin Antioquía la ósé mé tsíkinkáchónki ch'án ti nkehe tinkáchónki tí sín judío.

⁶ Ntá kjuixin kjueyá sín tí sín a ntá kjuikao sín ti tjejó tí sín tsíkjejá Ìnchéni. La ntá tí sín a mé nixjehe sín Dios la ko k'uejotja tja sín chrítaón tí ikja tí sín tsíkónoxín.

⁷ Tí itén Dios sítinkákji la tinkákótsjé tí sín tinkáchónki Ìnchéni chjasin Jerusalén. Kjaxin itsjé tí sín nchat'á judío kjuankíxin sín tinkáchónki sín Ìnchéni.

A ntá itsé sín ch'ín Esteban

⁸ Tí ch'ín Esteban mé ijnko nkexro k'uéchóna kjuachaxin kixin Dios tsíkjincheyaon ch'án la nchónhya kjuaxroan kjuakoxin ch'án tí síin chojni.

⁹ A ntá iso sín tsíkji_{xin} tí nínko judío kuènte tí sín senó k'uejó esclavo sín tsíkji_{xin} sín chjasin Cirene, la ko Alejandría, la ko Cilicia, la ko estado Asia, mé kjuankíxin sín ikjo sín ch'ín Esteban.

¹⁰ Kjonté xikaha la kjuachahya sín kixin Nchakuen Dios mé kjuínkítsa tí ch'ín Esteban nixja ch'án.

¹¹ Na ntá jehe sín mé kjuenkehe sín ókjé chojni kixin tsochrónka sín kixin kuínhin sín k'uántaxínhin ch'án ch'ín Moisés la ko Dios, ichro sín.

¹² Mé xikaha k'uixité kaín chojni la ko tí sín t'etōan kuènte nínko la ko tí sín tjako tí ley. La ntá itsé sín tí ch'ín Esteban la tinkánkákjen sín ch'án sákjuiko sín ch'án tí síin tí síxreé a.

¹³ Kjaxin kjueyá sín chojni tsochrónka kixin ntoáhya kjuako ch'ín Esteban la ntáchro tí sín a kixin:

—Tí ch'ín a mé titōehya ch'án t'ántaxínhin ch'án tí nínko kuènténi la ko tí ley.

¹⁴ Ó kuínhinni kixin chrónka ch'án kixin tí ch'ín Jesús, tí ch'ín tsíkji_{xin} chjasin Nazaret, mé sinchek'itjáyan ch'án tí nínkōeni ntihi la ko tsjitóxinhin ch'án tí nkehe tinkáchónkini mé tí nkehe tsík'etōan ch'ín Moisés —mé xikaha ichro sín.

¹⁵ Ntá tí síxreé la ko kaín tí sín sítjaxin ntiha la komá sín tí ch'ín Esteban la mé k'uíkon sín kixin tí kàré ch'án mé éxí ijnko ángel mé xikaha tsjehe tí jehe ch'án.

7

Tí nkehe kjuátēhe ch'ín Esteban

¹ A ntá tí sín nchat'á t'etōan kjuanchankíhi sín tí ch'ín Esteban kixin:

—¿Á chaxín kaín tíhi tsíntáchrúa?

² Na ntá jehe ch'án kjuátēhe ch'án ntáchro ch'án kixin:

—Kaínrá kichó ni Israel la ko sín táda tinhínrá tí nkehe tsontáxrjan. Dios kuènteni chóna kjuachaxin mé kjuakōhe ch'ín Abraham tí nkexro k'uaxrjeníxinni tió kjuák'e ch'án nación Mesopotamia tí naxa sátjihya ch'án tsjak'e ch'án nonte Harán.

³ Dios tsíntáchro kixin: “Tītōhé chjasán la ko kaín tí nkexro kjéhya. Na ntá sátjia tí nonte tsjákohá jaha.”*

⁴ Na ntá ch'ín Abraham k'uaxrjexín ch'án tí nonte Caldea. Ntá sákjuí ch'án kjuák'e ch'án tí nonte Harán. Na ntá kjuixin ik'uén it'é ch'án na ntá Dios kjuikao tí jehe ch'án tí nonte tjejorá ijie.

⁵ Kjánchó ch'ín Abraham la kuákjahya ch'án nít'ō nonte hasta ni tí tsjak'e toté ch'án la chóntahya ch'án. A ntá chrónka Dios kixin chaxín chr'éxin tió tsjixin ts'en ch'ín Abraham la tí sín ts'axrjeníxin ch'án mé ts'áyēhe sín tíha. Kjonté naxa kohya nijnko xjeen ch'án la mé xikaha ntáchro Ìnchéni.

* 7:3 Génesis 12.1

⁶ Kjaxin tsintáchro Dios kixin tí sín ts'axrjeníxin ch'ín Abraham la ts'ejó sín ókjé nonte, la ko sich'exón sín xra la ko náxrjónhya ts'ejó sín noó ciento nánó.

⁷ La kjaxin xintáchro Dios inaá kixin: “Ntá chr'éxin janhan sintakjasóte tí sín kjuínchekjasóte xjaan. La ntá tí xjaan mé tsokjan sín ntihi ntá tsoxraxinkakonxín sín tí janhan,” mé xikaha ichro Dios.

⁸ Na ntá Dios mé tsíkjo ch'ín Abraham kixin kaín tí chojni ntoa ts'axrjeníxin ch'án mé itsa sín xroye. Na ntá xikaha tió kokjíhi xjeen ch'an Isaac ntá ch'ín Abraham mé chjéhe ch'án xjan xroye tió xétjehe xjan ijní yaon. Ntá kjaxin xikaha kjuích'e ch'ín Isaac tió chóna ch'án xjeen ch'án Jacob, la ntá ch'ín Jacob la xikaha kjuích'e ch'án inaá. Ntá tí sín a mé k'óna it'é tí teyó tribu tsík'axrjeníxin tí sín Israel.

⁹ 'Tí xjeen ch'ín Jacob mé tí sín k'uaxrjeníxinni ósé la jehe sín k'uéchjinoxínhin sín tí kichó sín José ntá kjuínchekji sín ch'án la tí sín k'uena la sákjuíko sín ch'án nó nación Egipto, kjánchó Dios mé kjuínkítsa tí jehe ch'án.

¹⁰ Dios mé kjuínchekaá ch'án tí náxrjónhya k'uékjak'e ch'án. La ko Dios kjuanjon kjuachaxin kixin imá tsonohe ch'án. Na ntá k'uíkon ch'ín Faraón tí rey kuènte nación Egipto a xikaha tí xra jina kjuích'e ch'ín José ntá kjuanjon ch'án kjuachaxin kixin ts'etōan ch'ín José tí nación Egipto la ko tí ntōe ch'án.

¹¹ 'Na ntá kókjinta xrínahya la náxrjónhya k'uejó tí sín nación Egipto la ko nonte Canaán la tí sín tsík'axrjeníxinni la k'uitjahya sín nkehe sine sín.

¹² A ntá tsíkinhin ch'ín Jacob kixin tí nación Egipto mé sítóxi noa trigo ntá k'uetuenhen ch'án tí sín xjeen ch'án kixin sátsji sín ntiha tsjik'ena sín noa, la jehe tí sín a mé tí sín tsík'axrjeníxinni. Tíha mé tí saoxín sákjuí sín.

¹³ Ntá tí yóxin sákjuí sín ntiha ntá ch'ín José kjuínchenohe ch'án sín kixin tí sín a la savé ch'án. La ntá kjuakōhe ch'án tí ch'ín Faraón tí sín naxa kjéhya ch'án.

¹⁴ La ntá k'uetōan tí ch'ín José kixin sátsjikakjín sín it'é ch'án Jacob la ko kaín tí sín kjéhya ch'án, mé ijnko setenta y cinco chojni kjéhya ch'án.

¹⁵ Mé xikaha kónhen la tí ch'ín Jacob mé sákjuí ch'án la kjuák'e ch'án nación Egipto ntá chr'éxin ntiha mé k'uénxin ch'án. La ntá chr'éxin kjaxin tí sín tsík'axrjeníxinni k'uénxin sín ntiha.

¹⁶ Ntá chr'éxin kuakitsjexín sín tòye tí huésóé tí ch'ín Jacob la sákjuíko sín tí nonte Siquem, la ntá ntiha mé kjuavá sín tí nonte tsík'ena ch'ín Abraham mé tsík'enehe ch'án tí xjeen ch'ín Hamor chjasin Siquem.

¹⁷ 'La ntá ó kuichjina tsoxiteyá tí nkehe tsintáchro Dios tsíkjo ch'ín Abraham ntá tí sín Israel imá kótsjé sín nación Egipto.

¹⁸ A ntá xrínahya í jnko ch'ín rey kjuankíxin k'uetōan nación Egipto la k'uéchónhya ch'án tí ch'ín José.

¹⁹ La ntá tí ch'ín rey kjuích'iyehé ch'án tí sín naxa kjéhyani la ko kjuínchekjasóte ch'án sín. La tsík'etōan ch'án kixin tí xjan ntoa na ntá kokjíhi mé tsjik'itjí sín xjan kixin its'en xjan.

²⁰ Na ntá tí yaon a tsíkokjíhi ch'ín Moisés ntá imá kóxrjínhin Dios tí xjan a. It'é la ko iné xjan mé k'uéchóna sín xjan iní nitjó koá ntōe sín.

²¹ Ntá chrokjuahya tsjak'emā sín xjan la ntá kjuíkjáka sín xjan. La ntá xjeen tí ch'ín rey kuènte Egipto mé kjuíakja tjan xjan la sákjuíko tjan ntōe tjan la kjuínchek'ánkí tjan xjan éxí xjeen tjan xikaha.

²² La ntá tí ch'ín Moisés mé k'uitja ch'án kaín nkehe nohe tí sín Egipto a la imá tjetoan tí nkehe k'uéntáchro ch'án la ko tí nkehe k'uékjich'e ch'án.

²³ 'La ntá tió chóna tí ch'ín Moisés cuarenta nánó ntá tjinkaon ch'án tsjtsjehe ch'án tí sín israelita naxa kjéhya ch'án.

24 Ntaha mé k'uíkon ch'án kixin ijnko chojni Egipto kjuate ijnko chojni naxa kjéhya tí jehe ch'án. Ntá chrókuinkitsa ch'án tí sín naxa kjéhya ch'án ntá k'óyán ch'án tí ch'ín Egipto a.

25 Kjuenkayáxin ch'án kixin tí sín naxa kjéhya ch'án, mé tí sín israelita, mé tsonoxín sín kixin Dios mé tsíchr'án tí jehe ch'án sinchekaa sín ch'án. Kjánchó tí sín a kjuátsoanhya sín.

26 La ntá í jnko yaon tí ch'ín Moisés k'uíkon ch'án kixin yaá sín israelita tjanjonko kichó sín. La ntá tjinkaon ch'án chrókuít'oxin ch'án kixin chrokjuanjonhya sín. La ntáchro ch'án kixin: “Jahará jnkokoá kichuára la, ¿nkekuènté tjánjonrá?”

27 A ntá tí nkexro chóna tí jie mé kónínkaon ch'án la kótéka ch'án tí ch'ín Moisés. Ntá ntáchro ch'án kixin: “¿Nkexro kjuanjon kjuachaxin kixin jaha k'óna juez kuènténi?”

28 ¿Á tjinkávan ts'oyánni kjaxinni éxí k'oyán tí ch'ín Egipto ijna ní?”

29 A ntá kuínhin tí ch'ín Moisés tíha ntá tjoka sákjuí ch'án. Sákjuí ch'án tí nación Madián ntá ntiha kjuák'e ch'án éxí ijnko chojni tsíkjin ókjé. Ntá ntaha tsíkótehe ch'án la ko kjuích'éna ch'án yaá xjan ntoa.

30 'Na ntá k'uátsínka cuarenta nánó ntá tí nteje chjino jna it'in Sinaí mé xrínahya k'uíkon ch'án ijnko ángel tjenkákjan tí xrohi chríkjan tí ntayoa tjeche.

31 Ntá tí ch'ín Moisés la chrakon ch'án kixin xikaha k'uíkon ch'án la ntá kóchjinehe ch'án kixin chrótsjehe ch'án la ntá kuínhin ch'án itén Ìnchéni ntáchro kixin:

32 “Janhan mé Dios tinkáchónki tí sín tsík'axrjeníxian mé Abraham, la ko Isaac, la ko Jacob,” mé xikaha ichro Dios. Ntá tí ch'ín Moisés la kjuankixin chrakon ch'án la síxránkə ch'án ntá í tjinkakonhya ch'án tsotsjehe ch'án.

33 Na ntá ntáchro Ìnchéni kixin: “Takítsje tokatá kixin tí nonte tinkatja la nonte tjóá chóntahya jie.

34 Ó k'uíquən kixin tí sín kuèntəna mé imá tjeotjasóte sín nación Egipto. La ó kuínhan kixin t'èya sín. La ntá ijie ó k'uinka kixin tsjínkitsa sín. Méxra xrákía jaha tsétuanhan jaha sátsjia nación Egipto,”† ichro Dios.

35 'Tí sín israelita mé kjuanoá sín tí ch'ín Moisés. Tsíntáchro sín kixin: “¿Nkexro kjuanjon kjuachaxin kixin jaha k'óna juez?” ichro sín. Kjánchó Dios ichr'án ch'án tí ch'ín Moisés kixin ts'etoan ch'án la ko sinchekaa ch'án tí sín israelita kjuachaxin tí ángel k'uíkon ch'án chríkjan tí nta.

36 Ntá tí ch'ín Moisés kuakitsjéxin ch'án Egipto tí sín tsík'axrjeníxinni ósé. La imá itsjé kjuaxroan kjuasin ch'án la itsjé kjuakoxin ch'án tí nación Egipto, la ko tí Ntayaon Kjátse, la ko tí nteje k'uáji sín cuarenta nánó.

37 Jehe tí ch'ín Moisés a mé chénka tí sín israelita kixin: “Dios mé tsochr'án ijnko chojni tsoníxja itén Dios ts'axrjeníxin tí sín kichuára éxí ichr'án ch'án tí janhan. Títekákonhénra tí jehe ch'án.”‡

38 Tí ch'ín Moisés mé kjuák'eko ch'án tí chojni tí k'uéjé sín tí nteje. Nta ijnko ángel mé nixjehe ch'án tí jna Sinaí la ko tí sín k'uaxrjeníxinni mé k'uáyéhe sín tí tan tjanjon kjuachón, ntá tí tan mé k'uátsínka tí jeheni ijie.

39 A ntá tí sín k'uaxrjeníxinni ósé mé tjinkakonhya sín kixin chrókuitekaon sín la kjuanoá sín tí ch'ín Moisés la ko tjinkaon inaá chrókjan sín nación Egipto.

40 A ntá ntáche sín ch'ín Aarón kixin: “Tjinkaonni síh'éna ijnko dios kixin tsinkáchónkini kixin í noehyani nkehe kónhen tí ch'ín Moisés, tí nkexro kjuínkitsa k'uaxrjéxinni nación Egipto.”§

† 7:34 7.30-34 Éxodo 3.1-10 ‡ 7:37 Deuteronomio 18.15,18 § 7:40 Éxodo 32.1

⁴¹ Ntá kjuínchekjanoya sín ijnko koxintáxjan la ntá k'óyán sín iko kjokehe tí nkehe tsíkjanoya a la imá kóchéhe sín k'uíkon sín tí nkehe tsík'ónaxín tja chojni.

⁴² A ntá Dios mé kuitohe tí jehe sín kixin tsinkáchónki sín tí konotsé síin nkajní. Tíhi mé tsíkjin ijnko nkexro k'uéchrónka itén Dios ntáchro xikihi:

Jahará chojni Israel, ¿á k'oyánrá tí iko kjókanará tí janhan tí cuarenta nánó k'uejorá nteje ní?

⁴³ Kja náhi, jehó tí nkehe kjuich'énará mé kjókehérá tí ko a. Kjuikoará tí ninkoe tí dios Moloc

la ko kjaxin kjuikoará tí konotsé kuente dios Renfán.

A ntá tí nkehe tsíkjich'énará jahará mé xráxinkákonxínrá éxí Dios kuèntará.

Méxra janhan tsakítsjexínrá tí tjejorá la tsétuanhánrá sátsjirá chjasin Babilonia.*

Mé xikaha ntáchro Dios ósé.

⁴⁴ 'Naxa k'uéjó tí sín k'uaxrjeníxinni tí nteje la chóna sín ijnko ninko kamantá chóna tí ley tsík'etoan Dios. Tíhi kjuich'éna sín éxí tsík'etuñhen Dios tí ch'ín Moisés kixin sich'éna ch'án kaín nkehe k'uíkon ch'án.

⁴⁵ Ntá tí sín tsík'axrjeníxinni mé k'uáyéhe sín tí ninko kuitonhen sín. Ntá tí sín kjuikao ch'ín Josué mé kjuikao sín tí ninko tió kjuacha sín k'uáyéhe sín í jnko nonte kuente í so chojni kuakitsje Dios, kixin ts'áyéhe tí jehe sín. Mé xikaha kónhen hasta tí yaon kjuankixin k'uetoan ch'ín David.

⁴⁶ Imá kjuíncheyaon Dios tí ch'ín rey David la ntá tí ch'ín David mé tjinkaon ch'án sich'éna ch'án ijnko ninko kuente Dios mé tí Dios k'uékinkáchónki ch'ín Jacob.

⁴⁷ Kjánchó jehe ch'án kjuich'énahya ch'án tí ninko a. Tí ch'ín Salomón mé kjuich'éna.

⁴⁸ Kjánchó Dios nkaya nkajni chrohya tsjak'exenhen ijnko nchia tsíkjich'énaxín chojni itja. Ntáchro ijnko ch'ín nixja itén Dios kixin:

⁴⁹ Janhan Dios nkaya nkajni itjén tétōanxián ntá chjasintajni tjekjen totená.

¿Xá nkexéhe tí nchia chrókjuich'énará?

¿Xá nketí chrókjuak'é chrók'ok'ánaxián?

⁵⁰ ¿Xá jehya tjaná kjuít'ánaxián kaín tí nkehe ní?†

Mé xikaha ichro Dios.

⁵¹ 'A ntá jahará la icha asánrá xráxín títekákonhyará. Jahará tinhínrá kjánchó ich'erá éxí chojni chónhya Dios. Xráxín tjánjonkoará Nchakuen Dios. Jahará mé tóyohará tí sín tsík'axrjeníxínrá ósé.

⁵² Tí sín tsík'axrjeníxínrá kjuínchekjasóte kaín tí sín tsíchrónka itén Dios. K'óyán sín tí sín k'uéchrónka kixin itsi tí nkexro chónthya jie. A ntá ó kui tí nkexro a ntá jahará kjuínchekjirá ch'án ntá k'óyán sín ch'án.

⁵³ Jahará k'uayéhérá tí nkehe k'uetoan Dios senó, mé tí nkehe chrónka tí ángel, la kjónté xikaha kuítékákonhyará —ichro ch'ín Esteban.

Ik'uén ch'ín Esteban

⁵⁴ Ntá tí kuínhin tí jehe sín tí nkehe ntáchro tí ch'ín Esteban ntá imá kónínkaon sín la netaón neno sín kixin nínkakohen sín ch'án.

⁵⁵ A ntá ch'ín Esteban antsí chóna ch'án Nchakuen Dios la konta ch'án nkajni k'uíkon ch'án kjuachaxién Dios la ko k'uíkon ch'án kixin ch'ín Jesús tjexín toté ch'án nánko tja chjina Dios.

⁵⁶ Ntá ntáchro ch'ín Esteban kixin:

—Tsjuhérá kixin k'uikuñ kixin xitjehe nkajni la ntaha itjen tí Xjeen Dios K'óna Chojni nánko tja chjina Dios.

* 7:43 7.42–43 Amós 5.25–27 † 7:50 7.49–50 Isaías 66.1–2

⁵⁷ A ntá jehe sín la k'uikjehe sín ntatsjon sín la itsen k'uíxité sín ntá sákjuí sín k'uíxitja sín ch'án

⁵⁸ sákjuíko sín ch'án ikon chjasin ntá ixro chjéhe sín ch'án. La tí sín tjanchia jie mé kuakitsje sín iké sín la k'uejo sín toté ijnko ch'ín ntasoá it'in Saulo kixin ts'ayakonhen ch'án tí ka a.

⁵⁹ La it'e sín xro ntá ch'ín Esteban mé chrónóhehe ch'án Ìnchéni la ntáchro ch'án kixin:

—Ìnchéni Jesús takjá nchakuenná.

⁶⁰ Ntá tuénxín kjuák'exín toch'in ch'án la k'uèya ch'án itsen ntáchro ch'án kixin:

—Ìnchéni jaha mé tahya kuentá tí jie kjuasin sín.

Mé xikaha ichro ch'án ntá ik'uén ch'án.

8

Ch'ín Saulo chrók'óyán ch'án tí sín tinkáchónki Jesús

¹ La tí ch'ín Saulo mé jnkokón kjuenkayáxinko ch'án tí sín k'óyán tí ch'ín Esteban.

A ntá tí yaon a na mé kjuankíxin sín ts'óyán sín tí sín tinkáchónki Jesús chjasin Jerusalén. La kaín xín tí sín na ntá kjuankíxin tinkáchónki Cristo mé xíkayehé sín sákjuí sín nkuíxín estado Judea la ko estado Samaria. A ntá jehó tí sín tsíkjoyá Jesús mé kuítóhe sín ntiha.

² Na iso sín imá tinkáchónki Dios mé kjuavá sín ch'ín Esteban la ko tsjánkàma sín ch'án la ko t'avéhe sín ch'án.

³ A ntá tí ch'ín Saulo la kjuankíxin kónínkakonhen ch'án tí sín tinkáchónki Cristo. K'uíxenhen ch'án jnkojnko jnkojnko ntoe sín la itsé ch'án tí sín ntoa la ko tí chojni chjin. La ntá kuinkánkákjen ch'án sín sákjuíko ch'án sín kixin ts'ejóchjina sín.

Kjuako sín itan jína tí estado Samaria

⁴ A ntá tí sín sákjuíxin chjasin Jerusalén mé xritjako sín nkexrí tí tan tsaáxinni nkuíxín tí sákjuí sín.

⁵ La ijnko ch'ín it'in Felipe mé sákjuí ch'án ijnko chjasin estado Samaria la kjuankíxin ch'án chrónka ch'án itan kuènte Cristo.

⁶ Na ntá nchónhya chojni kójnkotsé ntiha la kaín sín kuínhin sín jína tí nkehe ntáchro ch'ín Felipe kixin ó k'uíkon sín tí kjuaxroan kjuakoxin ch'án.

⁷ Itsjé chojni chóna nchakuen tí jínahya mé kuítóhe sín jína la tí nchakuen tí jínahya k'óyako k'uaxrjexín tí jehe sín. La nchónhya tí sín chóna chin xitjahya itji la ko tí sín síxénká toté mé kuítóhe sín jína.

⁸ A ntá imá kóchéhe kaín tí sín síin chjasin ntiha.

⁹ Tí chjasin a mé kjuák'e ijnko ch'ín it'in Simón mé ijnko ch'ín ósé mé k'uékjinchexroan ch'án. K'uékjich'iyehé ch'án tí sín estado Samaria ntáchro ch'án kixin ijnko chojni imá tjetoan tí jehe ch'án.

¹⁰ La kaín tí sín ntiha k'uejó sín kuínhin sín jína, mé tí chánjan ntsínsí hasta tí chojni imá táda la k'uéntáchro sín kixin:

—Tí ch'ín i imá chóna ch'án tí kjuachaxin kuènte Dios —ichro sín.

¹¹ K'uékitekakonhen sín ch'án kixin k'uékjinchexroan ch'án k'uékjich'iyexín ch'án sín itsjé nánó.

¹² Ntá tió kuítekaon sín tí tan jína kjuako ch'ín Felipe kuènte tí kjuachaxin kuènte Dios la ko Jesucristo la ntá chojni ntoa la ko chojni chjin mé kuíkite sín.

¹³ A ntá kjaxin tí ch'ín Simón, mé kuítekaon ch'án la kuíkite ch'án, koí ch'án. Ntá kjuankíxin k'uájiko ch'án tí ch'ín Felipe la imá chrakon ch'án kíxin k'uíkon ch'án tí kjuaxroan jié kjuasin tí ch'ín Felipe.

¹⁴ A ntá tí sín apóstol, mé tí sín tsíkitohe chjasin Jerusalén, kuínhin sín kíxin itsjé tí sín estado Samaria ó kuítekaon sín itén Dios. Ntá k'uetuēnhen sín ch'ín Pedro la ko ch'ín Juan sátsji sín ntiha.

¹⁵ Ntá tió kjuíji sín ntá kjuanchehe sín Dios kíxin tí sín ntiha tinkáchónki Cristo chrók'uáyéhe sín Nchakuen Dios

¹⁶ kíxin nijnko tí jehe sín ntiha naxa tsík'áyèhya sín Nchakuen Dios. Jehó tsíkikitexín sín ihnié Ìnchéni Jesús.

¹⁷ Ntá tí ch'ín Pedro la ko tí ch'ín Juan mé k'uejotja itja sín chrítaón kja tí sín a la ntá ó k'uáyéhe sín Nchakuen Dios.

¹⁸ Na ntá tí ch'ín Simón mé k'uíkon ch'án kíxin tí sín apóstol k'uejotja itja sín chrítaón kja tí sín a ntá k'uáyéhe tí sín a Nchakuen Dios. La ntá xróxin ch'án chichaon

¹⁹ la ntáchro ch'án kíxin:

—Chjehéni jeheni tí kjuachaxin kíxin kjaxin jeheni chrókjuak'etja itjani chrítaón ikja jnkojín chojni ntá chrók'uáyéhe sín Nchakuen Dios —ichro ch'án.

²⁰ Ntá ntáchro ch'ín Pedro kíxin:

—Jaha la ko tí chichakoán ts'itjáyankoa kíxin tjenkayáxian kíxin chrók'uèna tí kjuachaxin kuènte Dios.

²¹ Jaha chontahya kjuachaxin ts'ixēnhén tí xra a kíxin ó nohe Dios kíxin jaha la tjuáhya asán.

²² Méxra tsitohé tí ijiá la chrónóehé Dios kíxin ách'e tsjakjìnhan ch'án tí jie tjenkayáxian.

²³ Ó t'íkuān kíxin imá chjinoxínhin asán la ko nchónhya jie chonta —ichro ch'ín Pedro.

²⁴ La ntá ch'ín Simón kjuátehe ch'án ntáchro ch'án kíxin:

—Nixjehérá Ìnchéni kíxin tí janhan kíxin chrókónnahya tí janhan éxí tí ntáchrorá —ichro ch'án.

²⁵ Ntá kjuixin chrónka tí sín apóstol tí tan kuènte Dios ntiha ntá sákjuí sín kjuako sín tí tan tsjanjon kjuachón nchónhya tí chjasin ntsíntsí estado Samaria. Ntá ikjan sín chjasin Jerusalén.

Tí ch'ín Felipe la ko tí ch'ín tsíkijxin nación Etiopía

²⁶ A ntá kjuixin tíha ntá ijnko ángel kuènte Ìnchéni mé ntáche tí ch'ín Felipe kíxin:

—T'ínkatjen sátsjia nó sur tsoxeta tí ntia t'inkajinxin chjasin Jerusalén hasta chjasin Gaza —ichro tí ch'ín ángel.

Na ntá tí ntia a mé ijnko ntia t'atsínka nó nteje.

²⁷ Na ntá tí ch'ín Felipe k'uínkatjen sákjuí tí ntia. La ntiha xrínahya xeta ch'án ijnko chojni tsíkijxin nó nación Etiopía. Jehe ch'án mé ijnko chojni eunuco mé tja ch'án siín chichakoen tí tjan reina Candace t'etuēnhen tí nación Etiopía. Jehe ch'án sátsíkji ch'án chjasin Jerusalén xraxinkakonxín ch'án Dios.

²⁸ A ntá tí ch'ín a la xíkjan ch'án inaá chjasén ch'án. Kjuák'exenhen ch'án ijnko carro la tjenchekuáxin ch'án ijnko xroon tsíkjin ch'ín Isaías, ijnko nkexro k'uéchrónka itén Dios.

²⁹ La ntá tí Nchakuen Dios mé k'uetuēnhen tí ch'ín Felipe ntáchro kíxin:

—Sátsjia tóchjina antsí tí tjen tí carro.

³⁰ Ntá kóchjinehe tí ch'ín Felipe tí tjen tí carro a, la ntá kuínhin ch'án kíxin tjenchekuáxin tí ch'ín a tí xroon tsíkjin ch'ín Isaías. La ntá kjuanchankíhi ch'án kíxin:

—¿Á tiénxian tí nkehe tjenchekuáxian méhe?

³¹ La ntá kjuátehe tí ch'ín a ntáchro ch'án kixin:

—¿Nkexrí chrókuiānxian kixin kohya nkexro tsjinkĩtsana tsochrónkaxin nkexrí t'axrjexín tíha? —ichro ch'án.

Ntá kjuanchia ch'án kixin tí ch'ín Felipe ts'it'ótjen la tsjak'etjāxin chjinaxón ti tjen ch'án.

³² Na tí xroon itén Dios tjenchekuáxin ch'án mé tíhi:

Jehe ch'án mé sákjuiko sín éxí ijnko kolélo kjuiko sín ts'óyán sín.

La éxí ijnko kolélo tsjānkahya tió kjínhin sín kaxree va mé xikaha jehe ch'án ninkehó xitjeehya ir'va ch'án.

³³ K'uikon sín ch'án éxí ijnko chojni chóna jje la ntoáhya kjuínchekjasóte sín ch'án.

Kohya nkexro tsjacha tsochrónka kuènte tí sín chrók'uaxrjenixin ch'án kixin jehe ch'án la k'uenxín ch'án chjasintajni.*

Mé xikaha chrónka tí xroon itén Dios.

³⁴ A ntá tí ch'ín eunuco mé kjuanchankíhi ch'án tí ch'ín Felipe ntáchro ch'án kixin:

—Tsotsenkávan chrónka nkexro tsonhen tíha. ¿Á jehe ch'án tsonhen tíha o á ókjé nkexro ní? —mé xikaha kjuanchankí ch'án.

³⁵ La ntá tí ch'ín Felipe kjuankixin chrónka ch'án kuènte tí nkehe tjenchekuáxin tí ch'ín a la chrónka ch'án tí tan jína kuènte Jesús.

³⁶ A ntá xrínahya kjuíji sín tí tjiá ntá, ntá ntáchro tí ch'ín eunuco kixin:

—Tsjehe tjiá ntá. ¿Á xitjahya chrókuĩkĩtena? —ichro ch'án.

³⁷ Na ntá ntáchro tí ch'ín Felipe kixin:

—Ti kuítekávan kaín asán la kjá jína tsikitia.

La ntá kjuátehe tí ch'ín a, ntáchro ch'án kixin:

—Títekávan kixin tí Jesucristo la Xjeen Dios —ichro ch'án.

³⁸ La ntá tí ch'ín tsíkjin Etiopía a k'uetōan ch'án tsochónhen tí carro a la ntá yóí sín mé tí ch'ín Felipe la ko tí ch'ín tsíkjin Etiopía mé k'uínkajin sín ntá kjuiánkí sín ntá la tí ch'ín Felipe kuĩkite ch'án tí ch'ín a.

³⁹ La ntá kjuixin k'uaxrjenkí sín ntá la ntá tí Nchakuen Ìnchéni sátsíkjiko tí ch'ín Felipe ókjé. A ntá k'uíkonhya kichó sín inaá. Ntá kjónté xikaha la tí ch'ín eunuco sákjuí ch'án la antsí chéhe asén ch'án.

⁴⁰ A ntá tí ch'ín Felipe xrínahya kjuíji chjasin Azoto. Ntá nkák'atsínka ch'án la chjasin la í chjasin la chrónka ch'án itén Ìnchéni kixin nkexrí tsaáxin sín hasta kjuíji ch'án chjasin Cesarea a.

9

Tí nkehe kónhen ch'ín Saulo (Hch. 22.6-16; 26.12-18)

¹ A ntá tí ch'ín Saulo la imá tjinkaon ch'án chrók'óyán ch'án tí sín tinkáchónki Ìnchéni Jesús. Méxra sákjuítsjehe ch'án tí ch'ín nchat'á t'etōan.

² Ntá kjuanchia ch'án ijnko xroon kixin ts'áyéhe ch'án kjuachaxin kixin sátsji ch'án tí nínko chjasin Damasco tsjeyá ch'án tí sín kuákja ntā nixin mé tí sín ntoa la ko tí síchjin la tsotsé ch'án sín la ntá sátsjiko ch'án sín chjasin Jerusalén.

³ La ntá kjuíji ch'án chjinaxón chjasin Damasco, a ntá xrínahya titàya ikui ijnko xrohi t'inkaséyan kuixin nkaya nkajní k'uantatjen ch'án a.

⁴ A ntá ch'ín Saulo mé kjuítsínka ch'án nonte, a ntá kuínhin ch'án nixja ijnko nkexro kixin:

—Saulo, Saulo, ¿nkekuènte ninkákonna xritjéyá tí janhan?

* 8:33 8.32-33 Isaías 53.7-8

⁵ **A** ntá ch'ín Saulo kjuanchankí ch'án kixin:

—¿Xá nkexro jaha?

Ntá tí tan mé kjuátehe, ntáchro kixin:

—Janhan mé Jesús, mé tí nkexro xritjéyá jaha.

⁶ T'àya sátjia. T'ixenhén tí chjasin Damasco, ntá ntiha mé tsinhín nkehe sich'e —ichro tí ch'ín Jesús a.

⁷ La ntá tí sín k'uájiko ch'ín Saulo la imá chrakon sín. Kuínhin sín tí itén tí nkexro kjánchó k'uíkonhya sín ninkexró.

⁸ La ntá tuénxín k'uàya ch'ín Saulo ntá kuakitjenkí ch'án ikon ch'án kjánchó t'ikonhya ch'án. **A** ntá tí sín xriko ch'án tinkátséhe sín itja ch'án sákjuíko sín ch'án chjasin Damasco.

⁹ **A** ntá ntiha kjuák'e ch'án la iní yaon k'uíkonhya ch'án la ko kjaxin kjónehya ch'án la ko ninkehó k'uíhya ch'án.

¹⁰ **A** ntá chjasin Damasco mé kjuák'e ijnko ch'ín tinkáchónki Ìnchéni it'in Ananías. La ntá titàya k'uíkuèn ch'án Ìnchéni ntáchro kixin:

—Ananías.

A ntá ch'ín Ananías mé kjuátehe ch'án kixin:

—Ntihi tjenni, Ìnchéni.

¹¹ Ntá ntáchro Ìnchéni kixin:

—T'inkatjen sátjia tí ntja it'in Ntja Ntoí. Ntá tíó tsjasán ntoe ch'ín Judas tjanchankíhí sín á ntahya itjen ijnko ch'ín tsíkjixin chjasin Tarso me it'in ch'án Saulo. Jehe ch'án mé tjechrónóana ch'án.

¹² **A** ntá titàya k'uíkuèn ch'án kixin tsjiji ijnko ch'ín it'in Ananías ts'ixenhen ch'án tsjak'etja tja ch'án chrítaón kja tí jehe ch'án kixin xik'ikon ch'án inaá —ichro Ìnchéni.

¹³ Ntá kuínhin ch'ín Ananías tíha ntá ntáchro ch'án kixin:

—Ìnchéni náhí, tsjihyani kixin ó kuínhinni chrónka nchónhya chojni kixin nkexrí xéhe tí ch'ín a. Imá tsjé nkehe jehya jina kjuích'ehe ch'án tí sín kuítekaon tí jaha chjasin Jerusalén.

¹⁴ **A** ntá jie la ó kjui ch'án ntihi kixin tsík'áyéhe ch'án kjuachaxin kuènte nchat'á t'etqan kixin tsotsé ch'án kaín tí sín tinkáchónki ihníá.

¹⁵ Kjánchó Ìnchéni ntáchro kixin:

—Sátjia. Janhan kjuéyá tí ch'ín a kixin tsjako ch'án tanná. Tsjakohe ch'án tí sín ókjé nación la ko tí sín rey la ko kjaxin tí sín israelita.

¹⁶ Janhan tsjakohe ch'án kixin nchónhya tsjasóte ch'án kixin tsinkáchónkina ch'án.

¹⁷ **A** ntá ch'ín Ananías sákjuí ch'án tí nchia itjen ch'ín Saulo la ntá k'uixenhen ch'án. La ntá kjuak'etja tja ch'án chrítaón ikja tí ch'ín Saulo la ntáchro ch'án kixin:

—Kíchóni Saulo, Ìnchéni Jesús, tí nkexro k'uíkuan tí ntja k'uinkaxian, mé k'uetuanna kjuiha kixin sintak'ikuan inaá la ko ts'ayéhé Nchakuen ch'án —ichro tí ch'ín Ananías a.

¹⁸ Ntá tuénxín k'uanotjexin ikon ch'ín Saulo ijnko nkehe éxí kjoé koche xikaha. Ntá xik'ikon ch'án inaá. La ntá k'uínkatjen ch'án la ko kuíkite ch'án.

¹⁹ La ntá chr'éxin ntá kjóne ch'án la ntá ikjan asén ch'án inaá. Ntá kuítqhe ch'án iso yaon k'uéjoko ch'án tí sín tinkáchónki Ìnchéni chjasin Damasco.

Kjuako ch'ín Saulo chjasin Damasco

²⁰ Na ntá kjuankixin ch'ín Saulo kjuakoxin ch'án iso njnko Israel kixin Jesús mé Xjeen Dios.

²¹ La kaín tí sín tjejótinhin imá chrakon sín la ntáchro sín kixin:

—¿Á jehya tí ch'ín i tjinkaon sinchek'itjáyan ch'án kaín tí chojni tinkáchónki Jesús chjasin Jerusalén? ¿Á jehya tí xra a kjuixin ch'án ntihi kixin tsotsé ch'án sín la sátsjiko ch'án sín tí tjejó tí sín nchat'á t'etqan? —ichro sín.

²² Kjánchó antsí má fuerte kjuako ch'ín Saulo kixin chaxín tí ch'ín Jesús mé tí Cristo. La tí sín judío k'uéjó chjasin Damasco kjuachahya kjuachaxin sín ch'án.

Kjuachahya tí sín judío chrótsé sín tí ch'ín Saulo

²³ Na ntá ó k'uátsínka nchónhya yaon ntá tí sín judío kjuenkayáxin sín nkexri chrók'óyán sín tí ch'ín Saulo.

²⁴ A ntá ó kuínhin ch'án nkehe kjuenkayáxin sín. A ntá nchakotjin la ko tie tjejóchónhen tí sín chrók'óyán tí jehe ch'án tí ntója ts'axrjexín ch'án chjasin.

²⁵ A ntá tí sín tinkáchónki Ìnchéni mé kjuak'enkaya sín tí ch'ín Saulo ijnko ntaxra jié ijnko tie. Ntá kjuinkajinxin sín tí ntaxra tjenkaya tí ch'ín Saulo nóton tí tjat'o tsík'antatjen tí chjasin a. Ntá kuaá ch'án.

Ch'ín Saulo sákjuí chjasin Jerusalén

²⁶ Ntá tí kjuíji ch'ín Saulo chjasin Jerusalén ntá tjinkaon ch'án chrókójnkotséko ch'án tí sín tinkáchónki Ìnchéni. Kjánchó kaín sín chrakonhen sín ch'án kixin kuítekakonhya sín kixin á chrókóchaxín kjaxin ch'án tinkáchónki ch'án Ìnchéni.

²⁷ A ntá ch'ín Bernabé mé sákjuíko ch'án tí ch'ín Saulo ti tjejó tí sín apóstol la ntá chrónka ch'án kixin ch'ín Saulo mé tsík'ikon ch'án Ìnchéni tí ntia sákjuí ch'án ntá Ìnchéni mé nixjehe ch'án. Méxra chjasin Damasco k'uékjako ch'án ihnié Ìnchéni la chrakonhya ch'án.

²⁸ Méxra ch'ín Saulo kuítóhe ch'án chjasin Jerusalén la ko k'uájiko ch'án tí sín a. La chrakonhya ch'án kjuako ch'án kjuachaxién ihnié Ìnchéni Jesús.

²⁹ La ikjo ch'án tí sín judío nixja nkiva griego. A ntá jehe sín la tjinkaon sín chrók'óyán sín tí jehe ch'án.

³⁰ A ntá tí sín kichó ni tinkáchónki Cristo mé tsíkinhin sín nkehe chrókónhen ch'án la ntá sákjuíko sín ch'án tí chjasin Cesarea la k'uetuēnhen sín ch'án sátsji ch'án chjasin Tarso.

³¹ Na ntá tí sín tinkáchónki Ìnchéni kuenté estado Judea, la ko estado Galilea, la ko estado Samaria la kjuaxróxin k'uéjó sín la antsí má tinkáchónki sín Ìnchéni. K'uéchonta sín kjuasáyé Ìnchéni la ko tí Nchakuen Dios kjuínkítsa sín la ntá antsí má sítinkákótsjé sín.

Ch'ín Eneas kuítóhe ch'án jína

³² Na ntá tí ch'ín Pedro xritsjehe ch'án kaín tí sín tinkáchónki Ìnchéni. Kjaxin sákjuítsjehe ch'án tí sín kichó ni tjejó chjasin Lida.

³³ Ntiha mé k'uitja ch'án ijnko ch'ín it'in Eneas. Ijní nánó tjetsínkaták'á ch'án cama kixin tsík'en toté ch'án.

³⁴ Na ntá ntáchro ch'ín Pedro kixin:

—Eneas, Jesucristo mé sintakitoha jína ijie. T'inkatjen tjatsìyan camá —ichro ch'án.

Na ntá ch'ín Eneas tuénxín k'uínkatjen ch'án.

³⁵ La kaín tí sín siín chjasin Lida la ko chjasin Sarón k'uikon sín kixin kuítóhe ch'án jína la ntá kjaxin sín kuinkáchónki sín Ìnchéni.

Ó xechón tjan Dorcas

³⁶ A ntá tí yaon a mé kjuák'e ijnko tjan chjasin Jope tinkáchónki tjan Ìnchéni mé it'in tjan Tabita. Ntá nkìva griego la mé t'axrjexín kixin Dorcas. A ntá tí tjan a mé jína kjuích'e tjan tí k'uékjak'e tjan la kjuínkítsa tjan tí chojni nòa.

³⁷ Ntá ijnko yaon imá kóníhi tjan ntá ik'uén tjan. La ntá kjuínchek'ónti sín cuérpóe tjan la ntá tí yóxin piso noi kjuak'e sín tjan.

³⁸ Tí chjasin Jope mé chjino tí chjasin Lida la mé ntiha kjuák'e ch'ín Pedro. A ntá tí sín tinkáchónki Ìnchéni mé nohe sín kixin ntiha tjen ch'án. Ntá ichr'án sín iyó chojni tsontáche sín ch'án kixin tjoka itsji ch'án í sinchexrjenhya ch'án, tsixro sín.

³⁹ Na ntá sákjuíko sín ch'ín Pedro. Ntá kjuíji sín ntiha ntá tuénxín sákjuíko sín ch'án tí tjen tí cuérpóe tí tjan tsík'en. La ntaha tjejó kaín chojni chjin k'án imá tsjánka sín. La kjuako sín tí iké sín tsíkjon tí tjan Dorcas tí naxa kjuák'e tjan.

⁴⁰ A ntá k'uetōan ch'ín Pedro kixin kaín sín ts'axrje sín ntója. Na ntá kjuák'exín toch'in ch'án nixjehe ch'án Dios. Ntá komá ch'án tí tjan tsík'en ntá ntáchro ch'án kixin:

—Tabita, t'aya.

Ntá kuakitjenki tjan ikon tjan ntá k'uíxon tjan kixin ntaha itjen ch'ín Pedro ntá k'uàya tjan, kjuák'etjaxin tjan.

⁴¹ A ntá itsé ch'án itja tjan la k'uínkatjen tjan. La ntá k'uíyehē ch'án kaín tí sín tinkáchónki Ìnchéni la ko kjaxin kaín chojni chjin k'án kixin ntá ts'ikon sín kixin ó xíxechón tjan.

⁴² Na ntá kaín sín siín chjasin Jope mé kónohe sín tí kjuaxroan kjuích'e ch'ín Pedro ntá itsjé sín kuinkáchónki Ìnchéni.

⁴³ A ntá ch'ín Pedro kuítóhe ch'án itsjé yaon tí chjasin a la kjuák'e ch'án ntōe ch'ín Simón, ijnko ch'ín nchentá tjoé iko.

10

Ch'ín Pedro la ko ch'ín Cornelio

¹ Chjasin Cesarea kjuák'e ijnko ch'ín it'in ch'án Cornelio. Jehe ch'án mé capitán k'uetuenhen tí sín soldado italiano.

² Tí ch'ín a la imá jína ch'án la kaín tí sín kjéhya ch'án mé imá xraxinkaon sín Dios. Kjaxin kjuanjon ch'án nchónhya chichaon kixin tjinkaon ch'án tsjinkítsa tí sín judío la ko xráxín nixjehe ch'án Dios.

³ La ntá ijnko yaon las tres kónjín titàya k'uíkuèn ch'án ijnko ángel kuènte Dios k'uíxehen tí tjen ch'án ntáchro kixin:

—Cornelio.

⁴ A ntá tí ch'ín Cornelio komá ch'án tí ángel la chrakon ch'án kjuanchankíhi ch'án kixin:

—¿Nkehe tjinkávan jaha? —ichro ch'án.

Ntá ntáchro tí ángel kixin:

—Dios kóxrjínhín kixin tí nixjehé ch'án la ko tí jína ch'e tjínkítsa tí sín nòa.

⁵ Ntá jaha tétuenhén jnkojín chojni sátsji chjasin Jope kixin tsjikakjín sín ch'ín Simón kjaxin it'in ch'án Pedro.

⁶ Itjen ch'án ntōe ijnko ch'ín kjaxin it'in Simón. Tí ch'ín a mé nchentá tjoé iko. Mé tjen ntōe ch'án chjinaxón tí ntayaon a.

⁷ Ntá tió sákjuí tí ángel nixjehe ch'ín Cornelio la ntá jehe ch'an k'uíyehē ch'án yaá sín ch'ehe ch'án xra la ko ijnko ch'ín soldado kjaxin xraxinkaon Dios, la chónthehe sín kjuasáya kichó sín.

⁸ Ntá kjuixin chénka ch'án kaín sín tí nkehe k'uíkon ch'án ntá k'uetuenhen ch'án sín sátsji sín chjasin Jope.

⁹ Í jnko yaon chr'éxín chjina chonkíxín tjejóyá sín ntia chjino chjasin Jope ntá ch'ín Pedro mé k'uit'ótjen ch'án chrítaón nchia kíxín ntaha nixjeexín ch'án Dios.

¹⁰ Ntá imá k'uén ch'án kjinta la tjinkaon ch'án chrókjóne ch'án. Nachrohe tsochján tí nkehe sine ch'án la ntá titàya k'uíkuèn ch'án nkehe

¹¹ mé k'uíkon ch'án kíxín xitjehe nkaya nkajní ntá ntiha k'uínkajinxín ijnko ka jie. Kanoé punté tí ka tjejóte.

¹² Tí nkaxenhen tí ka a tjinká ko noó toté la ko konche la ko kaín ko xritjaká.

¹³ Ntá kuínhin ch'án nixja ijnko nkexro ntáchro ch'án kíxín:

—Pedro, t'aya, t'oyán tí ko a ntá inte.

¹⁴ Ntá ch'ín Pedro kjuátehe ch'án kíxín:

—Náhí, Ìnchéni. Nunca nehyani tí nkehe tjuáhya.

¹⁵ Ntá kjuátehe tí tan inaá ntáchro kíxín:

—Tí nkehe ó kjuínchetjóá Dios. La ntáchrohya kíxín tjuáhya —ichro ch'án.

¹⁶ Xikaha kónhen iní veces ntá tuénxín sákjuí tí ka nkaya nkajní.

¹⁷ Ntá ch'ín Pedro naxa tjenkayáxín ch'án nkehe t'axrjexín tí k'uíkon ch'án la xrínahya ó kui tí sín ichr'án ch'ín Cornelio ntója nchia. Ó tsíkjanchankí sín nketí tjen ntøe ch'ín Simón.

¹⁸ Ntá kjuanchankí sín itsen kíxín:

—¿Á ntihi tjen ch'ín Simón kjaxin it'in ch'án Pedro?

¹⁹ Naxa tjenkayáxín tí ch'ín Pedro tí nkehe k'uíkon ch'án ntá Nchakuen Dios chrónka kíxín:

—Tsjehé ó kui iní sín xritjeyá tí jaha.

²⁰ T'aya t'inkajían sátjikoa tí sín a. Tóxakuanhya jaha, janhan mé kuétuanhan sín ikui sín —ichro Nchakuen Dios.

²¹ Ntá k'uínkajin tí ch'ín Pedro tí tjejó tí sín a ntá ntáchro ch'án kíxín:

—Janhan tí nkexro xritjeyará. ¿Nkehe tí tsonhen tjinkáonrá?

²² Ntá kjuátehe sín ntáchro sín kíxín:

—K'uetooan tí ch'ín capitán Cornelio ikuini ntihi. Jehe ch'án me ijnko chojni imá jína la ko xraxinkaon ch'án Dios. Kaín tí sín judío tjikosáyehe ch'án la ko tjuèhe sín ch'án. Ijnko ángel kuente Dios mé nixjehe ch'án chénka ch'án kíxín chrók'uíyehé ch'án tí jaha kíxín chrókjuia ntøe ch'án la ntá chrókuinhin ch'án tí nkehe tsontáchrua —mé xikaha chrónka sín.

²³ Na ntá tí ch'ín Pedro kjuanjon kjuachaxin kíxín ntahó chrók'ok'éhe sín ti tie a. Ntá kóyaon ntá sákjuíko ch'án sín. Kjaxin iso sín tinkáchónki Ìnchéni tjejó chjasin Jope mé sákjuíkotoxín sín.

²⁴ Na ntá í jnko yaon a kjuíji sín chjasin Cesarea. Ntiha chónhen tí ch'ín Cornelio la ko kjaxin kaín sín kjéhya ch'án la ko tí sín chóxin ch'án. K'uíyehé ch'án tí jehe sín kíxín tsinhin sín.

²⁵ Ntá tió kjuíji tí ch'ín Pedro ntøe tí ch'ín Cornelio ntá k'uaxrjexín ch'án nchia nixjehe kichó sín. Ntá kjuák'exín toch'in tí ch'ín Cornelio nkayakon tí ch'ín Pedro la kjuikosáyehe ch'án.

²⁶ A ntá tí ch'ín Pedro kjuínchek'inkatjen ch'án tí ch'ín a la ntáchro ch'án kíxín:

—T'inkatjen. Tjak'exián totá. Janhan mé ijnko chojni éxi tí jaha.

²⁷ A ntá kjuixin ikjo sín la ntá k'uixenhen sín ntøe ch'án la ntá k'uíkon tí ch'ín Pedro kíxín nchónhya chojni tsíkójnkotsé ntiha.

²⁸ Ntá ntáchro ch'án kíxín:

—Jahará nohará kíxín tí jeheni judíoni chóntahyani kjuachaxin tsojnkotsékoni chojni ókjé la ko chóntahyani kjuachaxin ts'ixenhenni ntøe chojni ókjé. Kjánchó Dios kjuakona kíxín xitjahya tsontáxrjan kíxín tjuáhya nijnko chojni.

29 Méxra tió k'uíyanará la tjoka k'uinka. Tjínkavan chrókónona kixin nkekuènte k'uíyanará.

30 Ntá kjuátehe ch'ín Cornelio ntáchro ch'án kixin:

—K'uátsínka tí noó yaon ntá tí hora kjuák'eni ntihi ntøeni kjónehvani la nixjeheni Dios. Ntá xrínahya k'uíkoni ijnko chojni chóna iké tjákini.

31 La ntáchro ch'án kixin: “Cornelio, ó kuínhin Dios tí nkehe nixjehé ch'án la ó nohe ch'án kixin imá tjinkitsa jaha tí chojni nò.

32 Méxra tétuènhén chojni sátsji chjasin Jope kixin tsjikakjín sín tí ch'ín Simón mé kjaxin it'in ch'án Pedro. Itjen ch'án ntøe ijnko ch'ín mé kjaxin it'in Simón nchentá ch'án tjoé iko. Chjino tí ntayaon a itjen ntøe ch'án,” ichro tí ángel.

33 Méxra xikaha tjoka ichr'ánni sín tsíkjeyá sín tí jaha. Jína k'uinka ntøeni. Ntá ijie ó nohe Dios kixin kaín ni tjinkaonni tsinhinni nkehe tí k'uetuanhan Ìnchéni tsochronka tsinhinni.

Ch'ín Pedro kjuakøhe ch'ín Cornelio ntøe ch'án

34 Ntá ntáchro ch'ín Pedro kixin:

—Ijie ó t'íkuan kixin jnkokón t'íkon Dios kaín xín chojni.

35 Tí nkexro kaín nación titekaon la chónthehe kjuasáyé Dios la mé tóxrjínhin ch'án.

36 Dios mé nixjehé ch'án tí sín k'uaxrjenixin tí sín Israel la kuínhin sín tí tan tjanjon kjuaxróxin chrónka Ìnchéni Jesucristo. Jehe ch'án mé Ìnché ch'án kaín nkehe.

37 Jahará ó nohará jína kaín tí nkehe tsíkónhen nkuíxín tí tjejó tí sín judío mé kjuankixin estado Galilea tió kjuixin kjuako ch'ín Juan kixin t'ichjánxin tsikite chojni.

38 Jahará ó nohará kixin Dios kjuanjon kjuachaxièn ch'án la ko Nchakuen ch'án k'uáyéhe tí ch'ín Jesús tí nkexro tsíkjixin chjasin Nazaret. Ó nohará kixin tí ch'ín Jesús mé k'uáji ch'án ntiha la tí nkehe jína kjuích'e ch'án kixin kjuínchekitohe ch'án jína kaín chojni tjasótexín kaín tí kjuachaxièn tí jínahya. Mé xikaha jína kjuích'e ch'án kixin Dios tjeko tí jehe ch'án.

39 A ntá jeheni mé chaxín k'uíkoni kaín tí nkehe kjuích'e tí ch'ín Jesús tí estado Judea la ko tí chjasin Jerusalén. A ntá chr'éxin kjuak'enkani sín ch'án ijnko ntacruz la k'óyán sín ch'án.

40 A ntá Dios kjuínchexechón ch'án tí níxin yaon la kjuanjon ch'án kjuachaxin kixin k'uíkoni ch'án inaá.

41 Jehya kixin kaín chojni chrók'uikon sín ch'án. Náhi. Jehó tí sín tsíkjeyá Dios kixin ts'íkon chaxín xechón ch'án. Jeheni kjónekoni ch'án la ko k'uíkoni ch'án tió xíxechón ch'án inaá.

42 K'uetøan ch'án kixin jeheni tsjakøheni chojni la tsochronkani kixin jehe ch'án mé tí nkexro juez sinchekitoexín ijie tí sín tjejóchón la ko tí sín ó tsík'en.

43 Kaín tí sín k'uéchronka itén Dios mé chrónka sín kixin jnkojnko tí sín tinkáchónki Jesús mé ts'óxíka ch'án ijie sín —ichro ch'ín Pedro.

Tí sín jehya judío k'uáyéhe sín Nchakuen Dios

44 Naxa tjenixja ch'ín Pedro ntá kaín tí sín tjejótinhin tí nkehe kjuako ch'án k'uáyéhe sín tí Nchakuen Dios.

45 Ntá tí sín judío kjuikotoxin ch'ín Pedro la chrakon sín kixin Dios mé kjuanjon Nchakuen ch'án, kjaxin k'uáyéhe tí sín jehya judío.

46 Méxra kuínhin sín nixja sín jnkojnko nkiva ókjé la ko kuínhin sín tjanchehe sín Dios kjuasáya.

47 Ntá ntáchro ch'ín Pedro kixin:

—Jehe sín ó k'uáyéhe sín tí Nchakuen Dios xikaha jeheni. Ntá chrókjuanjonni kjuachaxin kixin tsikite sín —ichro ch'án.

⁴⁸ La ntá k'ueṭoan ch'ín Pedro kixin tsikite kaín sín kjuachaxién ihníé Jesucristo. Ntá tí sín kuíkite mé kjuanchia sín kixin chrókuitohe tí ch'ín Pedro ntiha iso yaon.

11

Nixjehe ch'ín Pedro tí sín tinkáchónki Cristo chjasin Jerusalén

¹ Na ntá tí sín tsíkjeýá Ìnchéni la ko kaín tí sín tinkáchónki Ìnchéni k'uejó estado Judea mé kuínhin sín kixin tí sín jehya judío ó tinkáchónki sín itén Dios.

² Na ntá ch'ín Pedro ikjan ch'án chjasin Jerusalén. La ntá iso tí sín judío tinkáchónki sín Ìnchéni tjonta sín ch'án.

³ Kjuanchankíhi sín ch'án ntáchro sín kixin:

—¿Nkekuènté kjuítsjehé tí sín jehya judío, la ko kjóntekoa tí jehe sín? —mé xíkaha kjuanchankí sín.

⁴ Ntá tí ch'ín Pedro kjuankixin ch'án chrónka ch'án desde tí xrankixixin kaín nkehe tsíkónhen ch'án. Ntáchro ch'án kixin:

⁵ —Janhan mé kjuak'é chjasin Jope kjuak'énixjahá Dios. La ntá titàya k'uíkuèn ijnko ka jíé k'uínkajinxin nkaya nkajní. Kanoé punté tí ka tjejóte la kjuák'e chjino tí tjén.

⁶ Ntá tsjahá jína tí nkehe la k'uíkuən kixin tí nkaxenhen tí ka tjinká ko noó toté la ko iko nteje la ko konche la ko iko xritjaká.

⁷ La kjaxin kuínhan itén ijnko nkexro nixjana ntáchro ch'án kixin: “Pedro, t'àyá t'oyán tí ko a ntá inte.”

⁸ A ntá kjuátahá kixin: “Náhí, Ìnchéni. Nunca nehyani tí nkehe tjuáhya.”

⁹ A ntá kjuátehe tí tan kuixin nkaya nkajní a inaá chrónka kixin: “Tí nkehe a mé ó kjuínchetjóá Dios. La ntáchrohya kixin tjuáhya,” ichro ch'án.

¹⁰ Xíkaha kónhen iní veces. Ntá sákjuí kaín tí nkehe a nkaya nkajní inaá.

¹¹ Ntá xrínahya tuénxín kjuíji iní chojni ntoá tí nchia tjejóni. Tsíkjixin sín chjasin Cesarea xritjeýá sín tí janhan.

¹² Tí Nchakuen Dios mé k'ueṭoan kixin sáchrókjuikian sín la chrókóxakonahya. Kjaxin sákjuikian injon tí sín kichó ni tjejó i. Kaínni k'uíxenhenni ntøe tí ch'ín a.

¹³ A ntá tí ch'ín ntøe ntiha mé chrónka ch'án kixin k'uíkon ch'án ijnko ángel tjexin toté la nixja ntáchro kixin: “Tétuénhén chojni sátsji chjasin Jope kixin tsjikakjín sín ijnko ch'ín it'in Simón la ko kjaxin it'in ch'án Pedro.

¹⁴ Jehe ch'án mé tsonixjahá ch'án tsochrónka ch'án nkexrí tsaá jaha la ko kaín tí sín kjéhya.”

¹⁵ Ntá kjuankixian nixjahá sín na ntá ó kui tí Nchakuen Dios k'uáyéhe sín éxí k'uáyéheni tí senó a.

¹⁶ Na ntá xraxinkaonni tí nkehe k'uénixja Ìnchéni. K'uéntáchro ch'án kixin: “A ntá chaxín ch'ín Juan ìntá ó kuíkítexín ch'án chojni, a ntá ijie jahará tsikitiaxínrá tí Nchakuen Dios.”

¹⁷ Éxí xíkaha jeheni tió kjuankixin kuinkáchónkini Ìnchéni Jesucristo ntá kjuanjon Dios Nchakuen ch'án k'uáyéheni mé xíkaha ijie la kjuanjon Dios tí Nchakuen ch'án k'uáyéhe tí jehe sín kjaxin. ¿Xá nkexro tí janhan kixin chrókjuánjonkian Dios? —ichro ch'ín Pedro.

¹⁸ A ntá tí sín kichó ni tjejó chjasin Jerusalén kuínhin tí nkehe tsíkónhen ntá tání sín ntá kjuanchehe sín kjuasáyé Dios. Ntáchro sín kixin:

—Kjuanjon Dios kjuachaxin kjaxin kixin tí sín jehya judío ts'áyéhe sín kjuachaxin kixin tsinkáchónki sín Dios la ko tsakja sín kjuachón jnkochrín —mé xíkaha ichro sín.

Tí ninko chjasin Antioquía

19 Ti kjuixin k'uen ch'ín Esteban ntá kjuankíxin sín chónkíhi sín tí sín tinkáchónki Ìnchéni. Ntá iso sín sákjuí sín estado Fenicia la ko Chipre jnkosiné ntayaon la ko sákjuí sín chjasin Antioquía. Kjuakohé sín tí sín judío nkexrí tjen tí tan jína. A ntá tí sín jehya judío la nání.

20 A ntá í so sín tinkáchónki Ìnchéni tsíkjiixin chjasin Chipre la ko tsíkjiixin sín Cirene sákjuí sín chjasin Antioquía. Tió kjuíji sín ntiha mé kjuakohé sín tí sín jehya judío nkexrí tjen tí tan jína kuènte Ìnchéni Jesucristo.

21 Tí kjuachaxin kuènte Ìnchéni mé chóna tí jehe sín; méxra nchónhya tí sín ntiha mé kuítóhe sín tí nkehe k'uékinkáchónki sín ntá kuítekaon sín Ìnchéni Jesús.

22 Tí sín tinkáchónki Ìnchéni chjasin Jerusalén mé kuínhin sín nkehe tsíkónhen chjasin Antioquía. Ntá ichr'án sín ch'ín Bernabé sákjuí ch'án ntiha.

23 Ntá tió kjuíji ch'án ntiha ntá k'uíkon ch'án kíxin Dios imá kjuínkítsa tí sín ntiha kjaxin. Ntá imá kóchéhe asén ch'án. Ntá nixjehé ch'án sín kíxin kaín asén sín ts'ejó sín tsinkáchónki sín Ìnchéni.

24 Ch'ín Bernabé la ijnko chojni imá jína asén la antsí chóna ch'án Nchakuen Dios la jína tinkáchónki ch'án; méxra kóchjina nchónhya sín kuinkáchónki sín Ìnchéni.

25 Kjuixin tíha a ntá ch'ín Bernabé sákjuí ch'án chjasin Tarso sákjuíkjayá ch'an tí ch'ín Saulo.

26 Ntá tió k'uitja ch'án ntá sákjuíko ch'án chjasin Antioquía. Ntá k'uejóko sín tí sín tinkáchónki Ìnchéni ntiha kuenté ijnko nánó la kjuakohé sín itsjé chojni. Ntiha chjasin Antioquía kjuankíxin sín kuíkítexín sín tí sín tinkáchónki Cristo mé ihnié cristiano.

27 A ntá iso sín chrónka itén Dios sákjuíxin sín chjasin Jerusalén la kjuíji sín chjasin Antioquía.

28 Ijnko ch'ín it'in Agabo k'uínkatjen ch'án kjuák'exín toté ch'an tí tsíkójnkotsé tí sín tinkáchónki Jesús la kjuachaxién Nchakuen Dios chrónka ch'án kíxin tsokjinta nkuíxin ntiha. Tí nkehe chrónka ch'án mé chaxín kónhen tió kjuák'e ch'ín Claudio k'uetōan ch'án.

29 A ntá tí sín tinkáchónki Ìnchéni chjasin Antioquía kjuenkayáxin sín kíxin jehe sín tsjinkítsa sín tí sín kíchó sín tinkáchónki Ìnchéni estado Judea. La jnkójnko sín kjuanjon sín tí nkehe chóna sín.

30 Mé xíkaha kjuenájín sín chichaon sákjuíko ch'ín Bernabé la ko ch'ín Saulo chjéhe sín tí sín t'ayakonhen nínko estado Judea.

12

Ik'uén ch'ín Jacobo la ko kjuák'echjina ch'ín Pedro

1 A ntá tí yaon a tí ch'ín rey Herodes mé ntá kjuankíxin ch'án kónínkakonhen ch'án tí sín tinkáchónki Jesús.

2 La k'uetōan ch'án kíxin tí ch'ín Jacobo ts'enxín ijnko chica espada tjate. Jehe ch'án mé kíchó ch'án tí ch'ín Juan a.

3 Ntá k'uíkon ch'ín Herodes kíxin imá kóchéhe tí sín judío kíxin xíkaha kónhen la ntá kjaxin itsé ch'án tí ch'ín Pedro. Tíha mé kónhen tí yaon kia pascua tió kjóne sín niotja chónahya tí xroan nchek'ánkí niotja.

4 Kjuixin itsé ch'ín Herodes tí ch'ín Pedro ntá chr'áxnen ch'án ntōechiso. Ntá ntiha mé tjejóna noó grupo soldado la mé noó soldado jnkójnko grupo. Kjuenkayáxin ch'ín Herodes kíxin tsjixin ts'átsínka tí kia pascua ntá sátsjiko ch'án tí ch'ín Pedro tí síin tí sín israelita kíxin ts'ikon kuenté chjasin ntiha kíxin nkexrí its'en ch'án.

⁵ Méxra ch'ín Pedro naxa tjechjina ch'án la ntaha sínta sín ch'án, la ntá kaín tí sín tinkáchónki Ìnchéni la tjejónixjehe sín Dios kaín asén sín kixin tsjinkitsa Dios tí ch'ín Pedro.

Dios kjuínkitsa ch'ín Pedro k'uaxrjexín ch'án ntøechiso

⁶ Tí tie a mé kjuenkayáxin ch'ín Herodes kixin tsoyaon ntá tsakitsje ch'án ch'ín Pedro sátsjiko ch'án tí siín tí sín chjasin. A ntá ch'ín Pedro tjejua ch'án la nánánko tí jehe ch'án tjejó yaá soldado la chróntetoxín tja ch'án yaá chica cadena. Ntá í so sín soldado a tjejónta sín ntója ntøechiso.

⁷ A ntá xríñahya tuénxín ikui ijnko ángel kuènte Ìnchéni, a ntá tí nkaxenhen ntøechiso imá k'uínkaséyan ijnkoyé ntiha. Kjuak'etja itja tí ángel tí chjia ch'ín Pedro kjuínchekjayehe ch'án. Ntá k'uetoan tí ángel ntáchro kixin:

—Tjoka t'àya.

La ntá tí chica cadena tjejóchróntetoxín itja ch'ín Pedro mé k'uánótjen.

⁸ Ntá xík'etoan tí ángel ntáchro kixin:

—T'inkaya iká la tjanka tokatá.

Ntá kuítekaon ch'ín Pedro la kjaṭee xík'etoan tí ángel ntáchro kixin:

—T'ítsate iká ntá chréhe sátsjini —ichro ch'án.

⁹ Ntá ch'ín Pedro chréhe ch'án iton tí ángel a ntá noehya ch'án á chaxín xíkaha kónhen tí nkehe kjuích'e tí ángel o náhí. Ntáchro ch'án kixin ách'e ijnko nkehe k'uíkonxón ch'án.

¹⁰ Ntá kjuixin k'uátsínka sín tí tjejó tí soldado saoxín la kjuixin xík'atsínka sín tí tjejó tí soldado a yóxin. La ntá kjuíji sín ijnko puerta chica ijié chjinaxón ntja. La ntá tí puerta chica la jehó xitjehe. Ntá k'uaxrje sín tjejótji sín ijnko ntja la ntá xríñahya tí ángel ó sákjuí la ntá jehó ch'ín Pedro kuítóhe ch'án.

¹¹ A ntá tí ch'ín Pedro kónohe ch'án kixin chaxín kónhen tíha. Ntá ntáchro ch'án kixin:

—Ntá ó noheni kixin chaxín Ìnchéni tsíchr'án tí ángel kuènte ch'án kixin sinchekaáni kixin ts'óyánhyani ch'ín Herodes la ko tsoenhyani kaín tí nkehe tjinkaon tí sín judío —ichro ch'án.

¹² Ntá ó nohe ch'án kaín nkehe kónhen ch'án ntá sákjuí ch'án ntøe ijnko tjan María, ìné ch'ín Juan kjaxin tikítexín sín Marcos. Ntaha tsíkójnkotsé itsjé sín tinkáchónki Ìnchéni tjejónixjehe sín Dios.

¹³ La ntá t'ínka ch'án tí puerta chjinaxón ntja la nixja ch'án. La ntá ijnko tjan it'in Rode k'uaxrje tjan kjuitsjehe tjan kixin nkexro tíha.

¹⁴ A ntá tió kjuátsøan tjan itén ch'ín Pedro ntá k'uitjáyenhen tjan kuak-itjeehya tjan tí ntója a kixin imá kóchéhe tjan. Kuinká tjan sákjuíchrónka tjan kixin ntója puerta ntiha itjen ch'ín Pedro.

¹⁵ Ntá ntáchro sín kixin:

—Lontia.

La naxa chrónka tjan kixin chaxín jehe ch'án ntá xíntáchro sín kixin:

—Jehya jehe ch'án. Kjá tí xríntøe ch'án.

¹⁶ A ntá ch'ín Pedro naxa t'ínka ch'án tí ntója puerta la ntá tió kuakitjehe sín la k'uíkon sín ch'án ntá chrakon sín.

¹⁷ A ntá kjuakoxín ch'ín Pedro itja ch'án kixin tsotání sín ntá chrónka ch'án kixin Ìnchéni mé kuakitsjexín ch'án ntøechiso. Ntá k'uetoan ch'án ntáchro ch'án kixin:

—Chenkará ch'ín Jacobo la ko kaín kichó ni nkehe k'uátsínka janhan —ichro ch'án ntá sákjuí ch'án ókjé.

¹⁸ Ntá tí kóyaon a imá kóxakonhen tí sín soldado a kixin noehya sín nketí sátsíkji ch'ín Pedro.

19 La ntá k'uetōan ch'ín Herodes kixin sátsjikjeyá sín ch'án, kjánchó k'uitjahya sín ch'án. A ntá tí sín soldado kuamá sín tíha ntá k'uetōan ch'ín Herodes kixin its'en sín. Na ntá kjuixin tíha ntá ch'ín Herodes k'uaxrjexín ch'án estado Judea ntá sákjuí ch'án chjasin Cesarea la ntiha kjuák'e ch'án.

Ik'uén ch'ín Herodes

20 A ntá ch'ín Herodes mé nínkakonhen ch'án tí sín chjasin Tiro la ko chjasin Sidón. Ntá jehe sín jnkokoá kjuenkayáxin sín kixin sátsjitsjehe sín ch'án. Ntaha itjen ijnko ch'ín it'in Blasto k'uáyakonhen ch'án ntōe ch'ín Herodes ntá kjuanchehe sín ch'án kixin tsonixjayákonhen sín ch'án tí ch'ín t'etōan. Kjuanchia sín kixin chrókónínkakuenhya sín ch'ín Herodes kixin naxa tsochr'án ch'án tí nkehe sine sín kixin chjasén ch'án sítixín tí nkehe ine sín.

21 Ntá ch'ín Herodes k'uíyehē ch'án sín kixin tsojnkotsé sín ijnko yaon. Ntá jehe ch'án k'uítsá ch'án ka náxrxón kuente chojni t'etōan la kjuák'enkáya ch'án ijnko silla kuente chojni t'etōan. La ntá kjuankixin ch'án nixjehē ch'án tí sín tsíkójnksé.

22 A ntá tí sín a kjuankixin k'uèya sín, ntáchro sín kixin:

—Jehya chojni tjenixja. Dios tjenixja —ichro sín.

23 A ntá tuénxín ijnko ángel kuente Ìnchéni kjuíncheníhi ch'ín Herodes kixin kjuíncheyóhē ch'án asén ch'án Dios. La ntá kosinto kjóne nkaya tsee ch'án ntá k'uén ch'án.

24 La ntá itsjé chojni tinkáki nhin itén Dios la nkuíxín tinkákótsjé tí sín tinkáchónki Ìnchéni.

25 La ntá tí ch'ín Bernabé la ko tí ch'ín Saulo ó kjuixinhin sín ixra kuente sín chjasin Jerusalén la ntá sákíjki sín chjasin Antioquía la sákjuíko sín ch'ín Juan mé kjaxin tikítexín sín ch'án Marcos.

13

Ch'ín Saulo la ko ch'ín Bernabé sákjuíjako sín

1 A ntá tí nínko chjasin Antioquía la síin iso sín nixja sín itén Dios la kjuakohe sín chojni. Tí sín tjako mé ch'ín Bernabé la ko ch'ín Simón, kjaxin it'in ch'án Negro, la ko ch'ín Lucio, chjasen ch'án mé Cirene, la ko ch'ín Manaén, ijnko ch'ín tsík'ánkíko ch'ín Herodes tí ch'ín t'etōan estado Galilea, la ko ch'ín Saulo.

2 Ijnko yaon la tzejótójnksé sín xraxinkaon sín Dios la kjónehya sín. Ntá Nchakuen Dios mé ntáche ch'án sín kixin:

—Tsakitsjekjan ch'ín Bernabé la ko ch'ín Saulo kixin ó kjuéyá sín tsjánjuan ijnko xra sich'e sín.

3 Ntá nixjehē sín Dios la kjónehya sín la ntá kjuixin ntá k'uejotja tja sín chrítaón ikja tí sín a la nixja sín jnkojnko sín kixin ó sátsji sín.

Ch'ín Pablo la ko ch'ín Bernabé tjako sín nonte Chipre

4 A ntá tí Nchakuen Dios ichr'án ch'ín Bernabé la ko ch'ín Saulo sákjuí sín chjasin Seleucia. Ntá ntaha k'uíxenhen sín ijnko ntabarco sákjuí sín ijnko nonte it'in Chipre.

5 Ntá kjuíji sín ijnko puerto it'in Salamina. Ntaha kjuakoxín sín itén Dios tí nínko kuente tí sín judío. Kjaxin kjuíjiko sín ch'ín Juan kixin tsjinkítsa ch'án.

6 La ntá sákjuí sín nkuíxín nonte Chipre hasta kjuíji sín chjasin Pafos. Ntaha xéta sín ijnko ch'ín nchexroan me ijnko ch'ín judío it'in Barjesús. Jehe ch'án kjuích'ia ch'án ntáchro ch'án kixin kjaxin ch'án nixja ch'án itén Dios.

7 A ntá tí ch'ín nchexroan a mé kjuák'eko ch'án tí ch'ín gobernador Sergio Paulo. A ntá tí ch'ín gobernador mé imá jína kjuenkayáxin ch'án. K'uíyehē ch'án tí ch'ín Bernabé la ko tí ch'ín Saulo kixin jehe ch'án tjinkaon ch'án tsinhin ch'án itén Dios.

⁸ A ntá tí ch'ín nchexroan, nkìva griego mé tikítexín sín ch'án Elimas, mé nínkakohen ch'án tí sín tjako a kixin tjinkakonhya ch'án kixin tí ch'ín t'etoan chrókuitekaon ch'án Ìnchéni.

⁹ A ntá tí ch'ín Saulo, kjaxin tikítexín sín ch'án Pablo, imá chóna ch'án Nchakuen Dios. La ntá komá ch'án tí ch'ín nchexroan.

¹⁰ Ntáchro ch'án kixin:

—Jaha mé chojni ch'ia, jínahya, xjeen Diablo la nínkakohen káin nkehe jina. ¿Nkekuente kixin ch'éna jínahya tí ntia ntoá kuente Ìnchéni?

¹¹ A ntá ijie la Ìnchéni sintakjasótia. Tsitoha ntakótán iso yaon la ts'ikonhya tí xrohi kuente yaon —ichro ch'ín Pablo.

Ntá tuénxín tí ch'ín Elimas la k'uixitie tjen ch'án. La ntá kjueyá ch'án ijnko nkexro tsinkátséhe tja ch'án sátsjiko ch'án kixin t'ikonhya ch'án.

¹² A ntá xikaha mé k'uikon tí ch'ín gobernador nkehe kónhen la ntá kjuankixin tinkáchónki ch'án Ìnchéni kixin k'uikon ch'án tí kjuachaxin kuente Ìnchéni.

Ch'ín Pablo la ko ch'ín Bernabé tjejó chjasin Antioquía estado Pisidia

¹³ Ntá tí ch'ín Pablo la ko tí sín xriko ch'án sákjuixin sín chjasin Pafos. K'uixenhen sín ntabarco sákjuí sín kjuíji sín chjasin Perge estado Panfilia. Ntá ntaha ch'ín Juan* kuitóhe tí jehe sín ntá kjan ch'án chjasin Jerusalén.

¹⁴ Ntá sákjuixin ch'ín Pablo la ko ch'ín Bernabé chjasin Perge kjuíji sín chjasin Antioquía chjinaxón Pisidia. A ntá tí yaon t'ok'éhe sín ntá k'uixenhen sín tí nínko Israel na ntaha k'uéjótjaxin sín.

¹⁵ Ntá kjuixin kjuínchekuáxin sín tí xroon kuente ley la ko tí nkehe tsíkjin tí sín k'uéchronka itén Dios ntá tí sín t'etoan kuente nínko mé k'uíyehé sín tí sín a ntá ntáchro sín kixin:

—Kichóni tí chonta nkehe tsochronka kixin antsí má tsochéheni la chronka jie tsinhinni —ichro sín.

¹⁶ Ntá ch'ín Pablo k'uínkatjen ntá kjuakoxin itja ch'án kixin tsotání sín. Ntá ntáchro ch'án kixin:

—Chrókuinhínra jahará chojni israelita la ko kjaxin chrókuinhínra jahará tsíkjinínra chjasin ókjé tí chaxín tjinkáonra nchexiteyéhéra Dios.

¹⁷ Tí Dios tinkáchónki tí sín chjasin Israel mé kjueyá ch'án tí sín tsík'axrjeníxinni. Ntá chr'éxin Dios kjuanjon kjuachaxin kixin chrókótsjé tí jehe sín tí naxa k'uéjé sín chjasin Egipto. Éxi chojni tsíkjinín ókjé k'uéjé sín a ntá chr'éxin ntá kjuachaxién Dios kjuínkítsa sín k'uaxrjexín sín tí nonte ntiha inaá.

¹⁸ Dios kjuínkítsa sín tí cuarenta nánó k'uéjé sín tí nteje.

¹⁹ Ntá chr'éxin kjuínchek'itjáyan ch'án yato nación k'uék'ejó nonte Canaán, kixin tí sín tsík'axrjeníxinni chrók'uáyéhe tí nonte a.

²⁰ Ntá káin sín k'uéjé sín ntiha ijnko cuatrocientos cincuenta nánó. K'uék'etoan tí sín juez hasta ikjui tí ch'ín Samuel ijnko ch'ín k'uéchronka itén Dios.

²¹ Ntá kjuanchia tí sín israelita ijnko ch'ín rey ts'etuenhen sín. Ntá kjueyá Dios tí ch'ín Saúl la k'uetoan ch'án cuarenta nánó. Jehe ch'án it'é ch'án mé ch'ín Cis la k'uaxrjeníxin ch'án ch'ín Benjamín.

²² Ntá chr'éxin Dios kuakitsjehe ch'ín Saul tí xra kjuák'e ch'án ntá k'uáyéhe ch'ín David tí xra rey. Ntá ntáchro Dios kixin: “Ó k'uitjá ch'ín David, it'é ch'án mé Isaí. Jehe ch'án mé ijnko chojni nchexàna mé sinchexiteyàna ch'án káin nkehe tjínkavan”.

* 13:13 Hechos 12.25

²³ Ijnko tí chojni k'uaxrjeníxin tí ch'ín David mé Jesús. Tíha la Dios tsíchr'án ch'án kixin sinchekaá tí sín israelita. Mé xíkaha tsíntáchro ch'án.

²⁴ Naxa tjakohya ch'ín Jesús ntá ch'ín Juan kjuako ch'án tí tan kuínhin tí sín israelita la ntáchro ch'án kixin chrókjan sín chrórxaxinkaon sín Dios ntá chrokuikite sín.

²⁵ Ntá chjina its'en ch'ín Juan ntá ntáchro ch'án kixin: “Janhan na jehya tí nkexro tjenkayáxinrá. Náhi. Chr'éxin na itsi í jnko nkexro la chrókósuána chrókjuasintanká tí correa tokaté ch'án kixin antsí mé t'etōan tí jehe ch'án la kánhyó t'etōan tí janhan,” mé xíkaha tsíntáchro ch'ín Juan.

²⁶ Jahará kichó ni tsík'axrjeníxinrá ch'ín Abraham tinhínrá la ko kaín rá chojni tsíkjin ikjín nchexiteyéhérá Dios, tinhínrá tí tán tsaáxinrá.

²⁷ Méxra tí sín k'uék'ejó sín chjasin Jerusalén la ko tí sín t'etōan ntiha mé kónoehya sín nkexro tí ch'ín Jesús la ko kuienxínhya sín tí nkehe tsíkjin tí sín k'uéchrónka itén Dios senó tió kjuínchekuáxin sín tí xroon tí nkaxenhen nínko jnkojnko tí yaon t'ok'éhe sín. Mé xíkaha jehe sín tió kjuínchekjasóte sín tí ch'ín Jesús la kjuínchexiteyá sín éxi nixja tí xroon a.

²⁸ Ntá k'uitjahya sín ninkehó jie kixin chrók'uen ch'án ntá kjónté kjuanchehe sín tí ch'ín Pilato kixin ts'etōan ch'án kixin its'en ch'án.

²⁹ A ntá ó xiteyá tí nkehe tsíkjin tí sín ósé kuènte ch'án. Ntá kjuixin k'uén ch'án ntá kjuinkajinxin sín tí cuerpo kuènte ch'án tí ntacruz ntá kjuavá sín ch'án.

³⁰ A ntá Dios kjuínchexechón tí jehe ch'án inaá.

³¹ A ntá nchónhya yaon k'uíkon sín ch'ín Jesús tí sín k'uék'ajiko ch'án tió sákjuixin sín estado Galilea la sákjuí sín chjasin Jerusalén. A ntá ijie tí sín a mé tjeónixja sín nkexrí kjuako ch'ín Jesús, tjakohe sín kaín chojni.

³² A ntá jie jeheni tjakoni tí tan jína, mé tí nkehe tsíkjanjon Dios tsík'áyéhe tí sín tsík'axrjeníxinni ósé.

³³ Mé xíkaha xiteyá k'uáyéheni tí jeheni tsík'axrjeníxinni tí sín a. A ntá Dios kuènte tí sín a mé kjuínchexechón tí ch'ín Jesús éxi nixja tí xroon yóxin Salmo, ntáchro kixin: “Jaha mé xjanna. Janhan mé tjahá kjuachón jie.”†

³⁴ Ntá tsíntáchro Dios kixin sinchexechón ch'án tí ch'ín Jesús kixin tsoxíkahya cuérpóe ch'án. Mé xíkaha chrónka tí xroon itén Dios. Ntáchro kixin: “Janhan mé sintaxiteyá tí nkehe chaxín tjanka ch'ín David.”‡

³⁵ La ko í jnko Salmo mé ntáchro xíkhi: “Jaha tsjánjonhya kjuachaxin kixin tsoxíka tí cuérpóe tí nkexro tjóá kjuít'aha xra.”§

³⁶ A ntá ch'ín David kjuínchexiteyá ch'án éxi tsík'etōan Dios tí kjuák'e ch'án ntá kjónté chr'éxin ik'uén ch'án ntá xravá ch'án xíkaha k'uéxravá tí sín tsík'axrjeníxinni la ntá kjónté la xíka ntoe ch'án.

³⁷ A ntá tí cuérpóe tí nkexro kjuínchexechón Dios la kótjehya.

³⁸ Méxra kichó ni t'ichjánxin tsonohará kixin nkexrí tsjin ijíará kixin Jesús mé k'uenyákonhánrá.

³⁹ A ntá kaín nkexro tinkáchónki Jesús mé ó kjuínchetjóá ch'án asén sín. A ntá tí ley k'uetoan ch'ín Moisés kjuachahya kótjuáxin ti jie.

⁴⁰ Chrókóxakonhanrá kixin chrókuànhyará xíkaha éxi tsíkjin tí sín ósé xíkhi:

⁴¹ Tsjehérá jahara chojni titekakonhya. Ijie la tsochrakonrá kixin nkehe tsonhen

kixin janhan Dios tsjákoxian injnko nkehe jie injnko yaon

kjánchó tsítekákonhyará kjónté ókjé nkexro chróchrónka.*

† 13:33 Salmo 2.7 ‡ 13:34 Isaías 55.3 § 13:35 Salmo 16.10 * 13:41 Habacuc 1.5

42 A ntá ch'ín Pablo la ko tí nkexro k'uájiko ch'án k'uaxrjexín sín nkaxenhen tí nínko, a ntá chrónòà tí sín jehya sín judío tsíkokjéxín, kjuanchia sín kixin í jnko semana tí yaon t'ok'éhe sín la ínaá tsochrónka ch'án éxí tí kjuako ch'án.

43 Ntá tí kjuixín xíkaxín sín tí kójnkotsé sín tí nínko ntá nchónhya tí sín judío, la ko tí sín jehya sín judío, mé tí sín na ntá kuinkáchónki sín éxí tí sín judío la xraxinkaon sín Dios, la mé imá kóxrjínhín sín tí nkehe kjuako ch'ín Pablo la ko ch'ín Bernabé la ntá sákjuíchréhe sín. A ntá jehe sín mé k'ueṭoan sín kixin antsí jína chrókuinkáchónki sín tí Dios tjuèhe kaín chojni.

44 A ntá í jnko semana kjuèxin, tí yaon t'ok'éhe sín la kójnkotsé kaín tí sín siín tí chjasin ntiha kixin tjinkaon sín tsinhin sín itén Dios.

45 A ntá k'uíkon tí sín judío a kixin nchónhya chojni tsíkokjéxín, ntá imá kóchjinoxínhín sín, ntá kjuankíxin sín k'uántaxínhín sín tí ch'ín Pablo.

46 A ntá ch'ín Pablo la ko ch'ín Bernabé la íchá antsí má chrakonhya sín nixja sín ntáchro sín kixin:

—T'ichjánxín senó jahará judíorá chrókuinhínrá itén Dios. Kjánchó tjinkákonhyará tsinhínrá tí nkehe jína tsjanjon kjuachón jnkochrín. A ntá ijie la tsjtohárá tí jahara judíorá la ntá jeheni la sátsjini tsjakoheni tí sín jehya judío

47 xíkaha tsík'etoan Ìnchéni. Ntáchro ch'án kixin:
Janhan ichr'an tí jahará éxí xrohi ts'inkaséyanxín kaín nación
kixin sátsjikoará tí tan tsjanjon kjuachón tsaáxin chojni hasta tí antsí má kjin kjuèxin chjasintajni.†

Mé xíkaha k'ueṭoan Dios.

48 A ntá kuínhin tí sín jehya sín judío tíha la kjuankíxin kóchéhe sín la ntáchro sín kixin tí tan kuènte Ìnchéni la nkehe jína, ichro sín.

La ntá kjuankíxin kuinkáchónki kaín tí sín tsíkitoenxín sín kixin tsochóna sín kjuachón jnkochrín.

49 Ntá xíkaha xrankíxin xrako tí itén Ìnchéni nkuíxín tí chjasin ntiha.

50 A ntá tí sín judío nixjehe sín iso chojni chjin jína tjetooan la ko tí chojni ntoa t'etoan tí chjasin ntiha la ntá kjuínchekónínkaon tí sín a la ntá kjuankíxin sín chrók'óyán sín tí ch'ín Pablo la ko tí ch'ín Bernabé ntá sákjuíxin sín chjasin ntiha.

51 A ntá jehe sín la kótsjénka sín tokaté sín kixin tsoxénjin tí nche chóna toté sín. Tíha mé kjuakoxín sín kixin ntoáhya kjuenkayáxin tí sín a. A ntá sákjuí tí jehe sín chjasin Iconio.

52 Ntá tí sín tinkáchónki Ìnchéni la imá chéhe sín kixin antsí chóna sín Nchakuen Dios.

14

Ch'ín Pablo la ko ch'ín Bernabé tjejó chjasin Iconio

1 Ntá kjuíji ch'ín Pablo la ko ch'ín Bernabé tí chjasin Iconio. Ntá k'uíxénhen sín nínkoe tí sín judío ntá jína kjuako sín. La ntá nchónhya tí sín judío la ko tí sín jehya judío mé kuítekaon sín tí nkehe kjuako sín.

2 A ntá iso tí sín judío kuítekakonhya la ntá kjuankíxin nchekónínkaon sín tí chojni jehya judío kixin tsonínkakonhen sín tí sín tjako.

3 A ntá tí sín tjako la isé kuítóhe sín ntiha la chrakonhya sín nixja sín la ko tinkáchónki sín Ìnchéni Jesús. La ntá Ìnchéni kjaxin kóxrjínhín ch'án tí nkehe nixja sín kixin nkexrí tjuèheni Dios la kjuanjon ch'án kjuachaxin tsjasin sín kjuaxroan.

4 A ntá tí sín tjejó chjasin ntiha la jnkokónhya kjuenkayáxin sín. Iso sín kuítekakonhen sín tí sín judío la í so sín kuítekakonhen sín tí sín tsíkjejá Ìnchéni.

† 13:47 Isaías 42.6; 49.6

⁵ A ntá tí sín judío la ko tí sín jehya judío mé kjuenkayáxinko sín tí sín t'etōan kixin sinchechraKon sín tí sín tsík'jeyá Ìnchéni la ko tsochjéhe sín xro.

⁶ La ntá tí ch'ín Pablo la ko tí ch'ín Bernabé kónohe sín nkehe kjuenkayáxin tí sín a ntá sákjuí sín chjasin Listra la ko chjasin Derbe estado Licaonia la nkuíxín ntiha.

⁷ La kjaxin ntaha kjuako sín tí tan jína kuènte Ìnchéni.

Chjéhe sín xro ch'ín Pablo chjasin Listra

⁸ Ntá tí chjasin Listra itjen ijnko ch'ín xitjahya tji. Nunca xitjahya k'uáji ch'án kixin tsíkokjéxín ch'án xitjahya itji ch'án.

⁹ Méxra ó tjetjaxinkoá ch'án ntá kuínhin ch'án nkehe tí tjako ch'ín Pablo. Ntá ch'ín Pablo komá ch'án tí ch'ín a ntá kónohe ch'án kixin tí ch'ín antsí tinkáchónki ch'án Ìnchéni kixin tsitōhe ch'án jína.

¹⁰ Ntá jehe ch'án itsen ntáche ch'án tí ch'ín a kixin:

—T'inkatjen, ntoá tjak'exián totá —ichro ch'án.

Ntá tuénxín k'uínkatjen ch'án, chrika ch'án, kjuák'exín ch'án toté ch'án ntá ó jína tji ch'án.

¹¹ Ntá kaín tí sín chjasin ntiha k'uíkon sín nkehe kjuích'e ch'ín Pablo, ntá kaín sín k'uíyexin sín nkívee sín Licaonia ntáchro sín kixin:

—Dios tsík'óna chojni mé tsíkixín nkajní tjejókoni ntihi —ichro sín.

¹² La ntá kjuínchek'in sín ch'ín Bernabé mé tí dios Júpiter a ntá ch'ín Pablo mé tí dios Mercurio kixin imá nixja ch'án.

¹³ Ntá tí ch'ín nchat'á kuènte tí dios Júpiter mé chóna ch'án nínko tí t'ixenxínni ikon chjasin ntá kjuíkao ch'án koxinta tjeteyá tsjo. A ntá jehe ch'án la ko kaín tí chojni la chréhe sín kixin tjinkaon sín chrókjuikosáyehé sín tí sín tjako la ko tjinkaon sín chrók'óyán sín tí koxinta chrók'uáyéhé tí sín a.

¹⁴ A ntá tí sín apóstol mé ch'ín Pablo la ko ch'ín Bernabé mé kónohe sín tíha ntá kjuankixin sín kótséchje sín iké sín la sákjuíkjiakjan sín tí chojni sínn ntiha la t'óyako sín ntáchro sín kixin:

¹⁵ —¿Kuènté kixin tjejoch'erá xikaha? Jeheni chojni éxí tí jahará. Tí xra ó kuini kixin tsochrónkani itén Dios kixin tsitōhéra kaín tí nkehe ninkehó sínkíhya la ntá chrókjanrá chrókuinkachónkirá Dios tjechón. Jehe ch'án mé kjuích'éna ch'án nkajní la ko chjasintajni la ko tí ntayaon la ko kaín tí nkehe sínn.

¹⁶ Ntá ósé mé kuítohe Dios chojni kixin jehó ts'aji sín ntje sín.

¹⁷ Kjónté la Dios tjakoxín ch'án kixin jehe ch'án t'etōan ch'án kixin kjuích'éna ch'án kaín nkehe. Jehe ch'án mé t'etōan kixin ts'aniá chrin ntá ts'enkani la jína ts'óneheni, la jehe ch'án tjanjon ch'án nkehe kixin jnkochrín ts'ixin nkehe sineni, la ko jehe ch'án mé nchechéheni ch'án —mé xikaha ichro ch'ín Pablo.

¹⁸ Kjónté xikaha ichro tí sín tjako la naxa tjinkaon tí chojni chrokjuikosáyehé sín chrók'óyán sín koxinta chrókjokéhé sín tí sín tjako.

¹⁹ A ntá ikui iso tí sín judío kjuixín sín chjasin Antioquía la ko chjasin Iconio. Nixjehé sín tí sín ntiha kixin tsitōhe sín tí nkehe jehya jína tjako tí sín a ntá kónínkaon sín ntá kjuankixin chjéhe sín xro tí ch'ín Pablo. La ntá ách'e ó kjuixin tsík'en ch'án ntá kuinkánkákjen sín ch'án sákjuíko sín ch'án ikon chjasin.

²⁰ Ntá tí sín tinkáchónki Ìnchéni mé kójnkotsé sín k'uantatjen sín tí ch'ín Pablo ntá k'uàya ch'án xíkjan ch'án tí chjasin ntiha ínaá. Ntá tí yaon chr'éxin ntá sákjuíko ch'án tí ch'ín Bernabé chjasin Derbe.

²¹ A ntá ó kjuixin chrónka sín tí tan jína la ko kjuacha sín itsjé chojni kuinkáchónki Ìnchéni ntiha ntá kjan sín chjasin Listra la ko chjasin Iconio la ko chjasin Antioquía.

22 Nkuíxín tí chjasin k'uátsínka sín mé kjuínchechéhe sín tí sín kuinkáchónki Ìnchéni. K'uetōan sín kixin naxa jína chrókuinkáchónki sín Ìnchéni la ntáchro sín kixin tí ts'ixenhenni tí kjuachaxin kuènte Dios t'ichjánxin tsjasóteni.

23 A ntá ntiha kjueyá sín chojni jnkojnko nínko kixin ts'etuenhen sín tí sín tinkáchónki Jesús kixin jína ts'ejó sín. Ntá nixjehe sín Dios tí naxa kjónehya sín la ntá ntáche sín Ìnchéni kixin ts'ayakonhen ch'án tí sín ó kuinkáchónki tí jehe ch'án.

Ch'ín Pablo la ko ch'ín Bernabé ikjan sín chjasin Antioquía estado Siria

24 Ntá chr'éxin k'uátsínka sín estado Pisidia la ntá kjuíji sín estado Panfilia.

25 Ntá chjasin Perge kjuako sín tí tan kuènte Ìnchéni la ntá kjuixin ntá sákjuí sín chjasin Atalia.

26 Ntá ntiha k'uíxénxín sín ntabárcō ntá sákjuí sín chjasin Antioquía tí chjasin k'uénixjehe chojni Dios k'uékjanchia sín kixin Dios tsjinkitsa tí sín a sich'e sín tí xra. La ntá ó kjuixin xiteyá.

27 Ntá tió kjuíji sín chjasin Antioquía ntá kójnkotsé kaín tí sín tinkáchónki Jesús. Ntá kjuankixin chrónka ch'ín Pablo nkexrí kjuínkitsa Dios tí jehe sín la ko nkexrí kjuanjon Dios kjuachaxin tsjakohe sín tí chojni jehya judío kixin kjaxin sín tsitekaon sín Ìnchéni.

28 A ntá tí ch'ín Pablo la ko tí ch'ín Bernabé itsjé yaon k'uéjoko sín tí sín tinkáchónki Ìnchéni ntiha.

15

Kójnkotsé sín chjasin Jerusalén

1 A ntá iso chojni tsíkixin sín estado Judea ntá kjuíji sín chjasin Antioquía. Ntá kjuankixin sín kjuakohe sín tí sín kichó ni kixin xitjahya tsaáxin sín tí chóntahya sín tí xroye tsík'etōan ch'ín Moisés.

2 Ntá tí ch'ín Pablo la ko tí ch'ín Bernabé la ko tí sín judío kjuankixin kjuanjonkoxín sín kichó sín. Ntá áxri ntá kónoxín kixin tí ch'ín Pablo la ko tí ch'ín Bernabé la ko í so chojni la sátsji sín chjasin Jerusalén. Ntaha tsonixjehe sín tí sín apóstol la ko tí sín t'etōan nínko kixin nkexrí tsonhen tí xroye tsík'etōan ch'ín Moisés.

3 Tí sín tinkáchónki Ìnchéni chjasin Antioquía mé ichr'án sín tí sín a ntá k'uátsínka sín estado Fenicia la ko estado Samaria la tinkáchrónka sín kixin nkexrí tí sín ókjé jehya sín judío kjuitoxinhin tí k'uékjenkayáxin sín ntá kuákja sín ntje Dios. Ntá kaín tí sín kichó ni imá kóchéhe sín tí kuínhin sín xikaha.

4 La ntá kjuíji ch'ín Pablo la ko ch'ín Bernabé chjasin Jerusalén ntá tí sín tinkáchónki Ìnchéni la ko tí sín apóstol la ko tí sín t'etōan kuènte nínko mé kjuanjon sín kjuachaxin ts'ejó tí sín a. Ntá chrónka sín kixin Dios imá kjuínkitsa tí jehe sín.

5 Ntá iso tí sín fariseo ó tsíkitekaon Ìnchéni mé k'uínkatjen sín ntá ntáchro sín kixin:

—T'ichjánxin itsa xroye tí sín jehya judío tinkáchónki Ìnchéni la ko t'ichjánxin ts'ítuenhen sín sinchexiteyēhe sín kaín tí ley —ichro sín.

6 Na ntá kaín tí sín apóstol la ko tí sín t'etōan nínko mé kójnkotsé sín kjuenkayáxin sín nkexrí tsonhen kixin xikaha ichro tí sín judío.

7 Ntá imá nixjehe kichó sín ntá k'uínkatjen ch'ín Pedro ntáchro ch'án kixin:

—Jahará kichó ni ó nohará nkexrí kixin senó Dios tsíkjejá tí jeheni kixin tsjakoheni kaín tí sín jehya judío kixin tsinhin sín tí tán jína kuènte Cristo kixin kjaxin jehe sín tsitekaon sín.

⁸ Dios mé ó nohe ch'án nkexéhe kaín asén chojni. Kjuakoxin ch'án kixin k'uáyéhe ch'án tí sín jehya judío kixin chjéhe ch'án sín Nchakuen ch'án éxí tí xikaha k'uáyéheni tí jeheni.

⁹ Dios la t'ikon kaín chojni jnkokón éxí tí jeheni. Ntá kjuínchetjóá ch'án asén sín kixin ó tinkáchónki sín Ìnchéni.

¹⁰ Méxra ¿nkekuènté titekákonhyará tí nkehe kjuích'e Dios la ntá tétuènhénra chojni sinchexiteyá sín kaín tí nkehe ixra tsitekaon sín? Ni jeheni la ko ni tí sín tsík'axrjeníxinni kjuachahya sín kjuínchexiteyá sín tíha.

¹¹ Náhí. Ó noheni kixin kjuasáyé Ìnchéni Jesús mé kuaáxinni la ko kjaxin xikaha kuaáxin tí jehe sín kuítekaon —mé xikaha ichro ch'ín Pedro.

¹² Ntá kaín tí sín tsíkójnkotsé tání sín kuínhin sín nkexrí chrónka tí ch'ín Bernabé la ko tí ch'ín Pablo kixin Dios kjuínkítsa sín kjuasin sín itsjé kjuaxroan k'uíkon tí sín jehya sín judío.

¹³ Kjuixin nixja ch'ín Pablo la ko ch'ín Bernabé ntá kjuankíxin nixja ch'ín Jacobo, ntáchro ch'án kixin:

—Kíchóni, tinhínra tí nkehe tsoxrjanka.

¹⁴ Ch'ín Simón Pedro chrónka nkexrí kjuakoxin Dios kixin tjuèhe ch'án tí chojni jehya judío la nkexrí kjueyá Dios iso tí sín kixin tsinkáchónki sín tí jehe ch'án.

¹⁵ Mé xikaha chaxín chrónka tí xroon tsíkjin tí sín k'uéchrónka itén Dios kixin:

¹⁶ Janhan mé tsokjan chr'éxin.

Tió ts'inka ntá sít'ána nixin tí nchia tsík'oya kuènte David la janhan la tsjínkítsa sín ts'etoan sín.

¹⁷ Kixin kjaxin kaín xín chojni mé tsjeyá sín Ìnchéni

la ko kjaxin kaín xín tí sín ókjé nación mé tí sín kótjuáxin nina mé tsinkáchónkina sín.

¹⁸ Ìnchéni mé kjuakoxin kaín tíha tí ósé la tsíkjanjon ch'án tí tan kuènte ch'án.* Mé xikaha ichro itén Dios

¹⁹ Méxra ntáxrjan kixin tí sín jehya judío la t'ichjánxinhya sinchexiteyá sín kuenté tí ley kixin ó kuítóhe sín tí nkehe kuinkáchónki sín senó kixin jina chrókjueyá sín Dios.

²⁰ Méxra tsochr'énhenni sín ijnko xroon la jehó ts'etuenhenni sín kixin chrókjónehya sín tí nto tsíkjokehe chojni tí nkehe tsíkjanoya la ko chróchóntahya sín chojni chjin ókjé la ko chrókjónehya sín tí nto kuènte ko tsíchrínjinhya ikja va la ko chrókjónehya sín ijnjé va.

²¹ A ntá jnkojnko chjasin siín nkexro chrónkaxín tí ley kuènte ch'ín Moisés nchekuáxin sín tí nkaxenhen ninko jnkojnko tí yaon t'ok'éhe sín —ichro ch'ín Jacobo.

²² Ntá kaín tí sín tsíkjeyá Ìnchéni la ko tí sín t'etoan kuènte ninko la ko kaín tí í so sín tinkáchónki Ìnchéni kjueyá sín iso chojni tsochr'án sín chjasin Antioquia, mé kjueyá sín ch'ín Judas, tikítexín sín ch'án Barsabás, la ko ch'ín Silas sátsjiko sín ch'ín Pablo la ko ch'ín Bernabé. Tí sín a mé sín tjetooan ntiha.

²³ Ntá ichr'án sín tí xroon sákjuíko tí sín a ntáchro kixin:

“Jeheni chojni tsíkjeyá Ìnchéni la ko chojni t'etoan kuènte ninko ntihi la nixjहारáni tí jahará, kichó ni jehya judío, tjejorá chjasin Antioquia la ko estado Siria la ko estado Cilicia.

²⁴ Ó noheni kixin iso chojni tsíkixin chjaséni kjónté k'uéchóntahya sín kjuachaxin la kjuínchexakonhanra sín kixin ntáchro sín kixin t'ichjánxin itsará tí xroye tsík'etoan ch'ín Moisés.

* 15:18 15.16-18 Amós 9.11-12

25 Ntá jnkokoá kjuenkayáxinni tsjeyáni nkexro tjejó ntihi kixin sáchrókjuitsjehe tí jahará la chrókjuijiko sín ch'ín Bernabé la ko ch'ín Pablo kixin imá tjuèheni sín.

26 Tí sín a mé ántosen sín kjónté chrók'uenxín sín kixin tí tinkáchónki sín Ìnchéni Jesucristo.

27 Méxra tsochr'ánni ch'ín Judas la ko ch'ín Silas tsjiji sín kixin jehe sín mé tsonixjahará sín tsochrónkaxín sín kaín tíha.

28 Jína kixin Nchakuen Dios mé kjuínkítsani kjuenkayáxinni kixin jehya chrók'uetuñhanránani ijnko nkehe imá xra. Náhí. Jehó tí nkehe kánhyó xra t'ichjánxin sinchexiteyará mé t'etoanni:

29 chrókjóntehyará tí iko tsíkjokehe chojni tí nkehe tsíkjanoya la ko kjaxin chrókjóntehyará ijnié tí ko a la ko chrókjóntehyará tí nto kuènte tí ko tsíchrínjinhya kja la ko kjaxin ninkexró chrókuakjahya í jnko chojni chjin ókjé. Ntá tí sinchexiteyará kaín tí nkehe t'etoanni la jína ts'ejorá." Mé xikaha nixja tí xroon.

30 Ntá kjuixin nixja sín ntá tí sín a sákjuí sín chjasin Antioquía. Ntá tió kjuíji sín ntiha ntá kójnkotsé tí sín tinkáchónki Jesús ntá kjuanjon sín tí xroon a.

31 Ntá tió kjuínchekuáxin tí sín kichó ni tí xroon a ntá imá kóchéhe sín kixin xikaha chrónka tí xroon a.

32 Ntá tí ch'ín Judas la ko tí ch'ín Silas kjaxin sín ó nohe sín tsochrónkaxín sín itén Dios la nixja sín jína la imá kjuínchechéhe sín tí sín kichó ni kixin tí nkehe nixja sín.

33 Ntá ntahó k'uéjé sín iso yaon, ntá tió sátsji sín ntá kaín tí sín tinkáchónki Ìnchéni nixjehe sín jína ntá ó xíkjan sín inaá tí tsíkjixin sín tí tjejó tí sín tsíchr'án sín.

34 Kjánchó ch'ín Silas kjuenkayáxin ch'án kixin ntahó chrókuitohe ch'án.

35 A ntá ch'ín Pablo la ko ch'ín Bernabé kuitohe sín chjasin Antioquía. Jehe sín la ko í so chojni mé kjuako sín la ko chrónkaxín sín itén Ìnchéni.

Ch'ín Pablo kjuankixin tí yóxin viaje

36 A ntá chr'éxin ch'ín Pablo nixjehe ch'án ch'ín Bernabé. Ntáchro ch'án kixin:

—Sátsjitsjeheni tí sín kichó ni kaín tí chjasin kjuakoxinni itén Ìnchéni ósé. Tsjitsjeheni nkexrí tjejó sín ntiha —ichro ch'án.

37 A ntá ch'ín Bernabé la tjinkaon ch'án kixin kjaxin sáchrókjuiko sín ch'ín Juan kjaxin tikítexín sín ch'án Marcos.

38 A ntá ch'ín Pablo kóxrjienhya sátsjiko sín tí ch'ín Marcos a kixin jehe ch'án kuitohe ch'án sín estado Panfilia la kjuínkítsahya ch'án kixin naxa tsonhen tí xra.†

39 Méxra jnkokoáhya kjuenkayáxin sín la ntá xikayehe sín la ókjé sákjuí sín. Ch'ín Bernabé sákjuíko ch'án tí ch'ín Marcos la k'uixenhen sín ijnko ntabarco sákjuí sín nonte Chipre.

40 A ntá tí ch'ín Pablo la jehó ch'án mé kjueyá ch'án tí ch'ín Silas ntá chr'éxin sákjuí sín. Tí sín kichó ni ntiha kjuanchehe sín Dios kixin jína ts'ayakonhen sín ch'án la ntá sákjuí sín.

41 Ntá k'uátsínka sín estado Siria la ko estado Cilicia la kjuínchechéhe sín asén tí sín tinkáchónki Ìnchéni ninko ntiha.

16

Ch'ín Timoteo sákjuíko ch'án ch'ín Pablo la ko ch'ín Silas

† 15:38 Hechos 13.13

¹ Ntá kjuíji ch'ín Pablo chjasin Derbe la ko chjasin Listra. Ntá ntaha itjen ijnko ch'ín tinkáchónki Jesús it'in ch'án Timoteo. Jehe ch'án mé xjeen ijnko tjan judía tinkáchónki Ìnchéni. A ntá it'é ch'án mé ijnko ch'ín griego.

² Ntá tí sín kíchó ni tjejó chjasin Listra la ko chjasin Iconio mé nixja sín kixin jína tí ch'ín Timoteo.

³ A ntá ch'ín Pablo mé tjinkaon ch'án sáchrókjuiko ch'án tí ch'ín Timoteo. Ntá senó k'uetōan ch'án chrókua tí ch'ín Timoteo a tí xroye kixin tsonínkakhya tí sín judío tí chjasin sátsji sín kixin ó nohe tí sín a kixin it'é ch'ín Timoteo la mé griego.

⁴ Ntá sákjuí sín la kaín tí chjasin k'uaátsínka sín la nixjehe sín tí sín kíchó ni la chrónkaxín sín tí nkehe tsík'etōan tí sín apóstol la ko tí sín t'etōan kuènte n̄inko chjasin Jerusalén.

⁵ Ntá tí chojni tinkáchónki Ìnchéni mé antsí má ntoá k'uejó sín la ko jnkojnko yaon sítinkákótsjé sín.

Xríñhya titàya k'uíkuèn ch'ín Pablo ijnko chojni estado Macedonia

⁶ Ntá Nchakuen Dios kjuanjonhya kjuachaxin kixin sátsjikjako sín itén Dios estado Asia ntá k'uaátsínka sín nó estado Frigia la ko estado Galacia.

⁷ Ntá tió kjuíji sín estado Misia ntá kjuenkayáxin sín sáchrókjui sín nó estado Bitinia. Ntá Nchakuen Jesús kjuanjonhya kjuachaxin kixin sátsji sín nó ntiha.

⁸ Méxra k'uaátsínka sín ikjín tí estado Misia la ntá kjuíji sín chjasin Troas chrínta ntayon.

⁹ Ntá ijnko tie xríñhya titàya k'uíkuèn ch'ín Pablo ijnko ch'ín estado Macedonia kjuák'exín toé ch'án chrónòda ch'án kixin: “T'átsínka Macedonia tsjínkĩtsani,” ichro ch'án.

¹⁰ Méxra tíha tsík'ikon ch'ín Pablo la ntá tuénxín kóyaxínhinni kixin sátsjini estado Macedonia kixin kónoexínni kixin Dios kjueyáni kixin ntiha tsjakoni tí tan jína tsaáxin chojni. [Janhan tí ch'ín Lucas ikjinni tí xroon i k'uejókotoxínni kíchó ni ntiha.]

Ch'ín Pablo la ko ch'ín Silas, k'uejó sín chjasin Filipos

¹¹ Ntá ntaha chjasin Troas k'uíxénxínni ijnko ntabáro ntá sákjuíni ntoí ijnko nonte ntsí tinkátaón ntá it'in Samotracia. Ntá tí yaon chr'éxin kjuíjini chjasin Neápolis.

¹² Ntá ntiha sákjuíxinni la kjuíjini chjasin Filipos. Tí chjasin a mé k'uechóna tí sín romano ósé ntá ijnko chjasin antsí má tjeōan tí it'ō tí estado Macedonia. Ntaha mé k'uejóni iso yaon.

¹³ Ntá tí yaon t'ok'éhe sín ntá k'uaxrjexínni tí chjasin Filipos ntá sákjuíni ijnko chrínta ntario mé ntiha kuènnen sín tsojnkotsé sín tsonixjehe sín Dios. Mé ntaha k'uejótjaxínni la kjuankíxinni kjuakoheni iso chojni chjin tsíkójnkotsé ntiha.

¹⁴ Ntá ijnko tí jehe sín mé ijnko tjan it'in tjan Lidia la tsíkjixín tjan chjasin Tiatira. Jehe tjan mé nchekji tjan ika náxrjón kjátse tié. Ntá jehe tjan xraxinkaon tjan Dios la jína tjetinhin tjan la Ìnchéni mé kjuínkĩtsa asén tjan kixin tsinhin tjan jína tí nkehe kjuako ch'ín Pablo.

¹⁵ Ntá jehe tjan la ko kaín tí sín tjejó ntōe tjan mé kuíkite sín. Ntá chrónóhe tjan tí ch'ín Pablo ntáchro tjan kixin:

—Tí chaxín tjátsōan kixin chaxín tinkáchónkini Ìnchéni la jína chrókuitōha ntōéni ntihi —ichro tjan.

Ntá kjónté kuítōheni ntiha.

16 Ntá ijnko yaon sákjuíni tí nó kuèhnen sín nixjeexín sín Dios ntá ó xétani ijnko tjan tjarisoá chóna nchakuen tí jínahya tónoexín tjan. Ó tsík'íná tjan la nchónhya chichaon tjacha tí inché tjan kixin xikaha tónohe tjan.

17 A ntá tí tjan tjarisoá a kjuankíxin tjan tinkáchréhe tjan tí ch'ín Pablo la ko tí jeheni ntá t'èya tjan ntáchro tjan kixin:

—Tí sín i ch'ehe sín xra Dios nkaya nkajni la tjako sín ijnko ntia jína tsaáxin chojni.

18 Mé xikaha kjuích'e tjan itsje yaon. Ntá kóchjinhin ch'ín Pablo la nkátjía ch'án nixjehe ch'án tí nchakuen tí jínahya chóna tí jehe tjan, ntáchro ch'án kixin:

—Kjuachaxiën ihnié Jesucristo tétuanhán kixin ts'axrjéxian tí jehe tjan —ichro ch'án.

Ntá tuénxín ó k'uaxrjexín tí nchakuen tí jínahya tí jehe tjan.

19 Na ntá tí inché tí tjan a mé k'uíkon sín nkehe kónhen tjan la ó nohe sín kixin í tsjachahya sín chichaon kuente tí xra ch'e tjan. Ntá kónínkaon sín ntá itsé sín tí ch'ín Pablo la ko ch'ín Silas la kuinkánkákjen sín sákjuíko sín tí tjejó tí síxreé nta sin tjejoan.

20 Ntá kjuíkaán sín ntaha ti tjejó tí sín juez la ntáchro sín kixin:

—Tí sín i mé sín judío la imá sítjité sín chjasénni.

21 Tjako sín tí nkehe kuènhyani tsonoheni la tóxrjienhyani sich'eni kixin jeheni mé chojni romanoni.

22 Kaín tí sín ntiha kónínkakonhen sín tí jehe sín. Ntá tí sín juez mé k'uetjoan ts'axrjehe sín iké sín ntá ts'ekonxín sín nta sé.

23 Ntá tió kjuixín k'uékon sín nchónhya ntá chr'áxehnen tí sín a ntöechiso ntá k'uetuèhnen sín tí ch'ín t'ayakonhen ntöechiso kixin jína chrók'uayakonhen sín tí sín a.

24 Ntá tí ch'ín t'ayakonhen ntöechiso mé k'uáyéhe ch'án kjuachaxin ntá chr'áxehnen ch'án tí sín a ijnko cuarto chríka ntöechiso kixin ts'axrjehya sín. Ntá chr'áxehnen ch'án toté sín tí nta tjejóxrja la ko chica ye.

25 A ntá tió k'áxrótjen la ch'ín Pablo la ko ch'ín Silas mé nixjehe sín Dios la ko itsje sín himno kuente Dios. La tí sín í so tjejóchjina mé tjejótinhin sín kixin xikaha tjejóch'e sín tjejótje sín.

26 Ntá xrinahya tjan kuínki nonte la kjuínchekinkí kuenté tí xrankíxixín ntöechiso ntá tuénxín kaín tí ntója puerta mé xítjehe la ko k'uánótjen tí chica cadena tsíchróntetoxín kaín tí sín tjejóchjina.

27 Ntá tí ch'ín t'ayakonhen ntöechiso mé k'uàya ch'án. Ntá k'uíkon ch'án kixin síxítjehe tí ntója puerta ntöechiso a. Ntá kuakitsje ch'án chica espada ntá chrók'óyán ch'án asén ch'án kixin kjuenkayáxin ch'án kixin ó kjuixín tsíkinká kaín tí sín síchjina, ichro ch'án.

28 Ntá ch'ín Pablo k'uèya ch'án itsen ntáchro ch'án kixin:

—Náhí kohya nkehe ch'ehé asán kixin kaín ni naxa tjejóni ntihyó —ichro ch'án.

29 Ntá tí ch'ín t'ayakonhen ntöechiso kjuanchia kixin ts'ákjen xrohi ntá k'uíxehnen ch'án kuínká ch'án la síxranka ch'án chrakon ch'án ntá kjuítsínka ch'án toté tí ch'ín Pablo la ko tí ch'ín Silas.

30 Ntá tuénxín kuakitsjexín ch'án sín ntiha ntá kjuanchankíhi ch'án sín kixin:

—¿Nkexrí chrókjuít'a kixin chrókuaána? —ichro ch'án.

31 Ntá kjuátehe sín ntáchro sín kixin:

—Títekáván Inchéni Jesucristo la tsaá jaha la ko tí sín tjejó ntöa.

32 Ntá kjuakohé sín tí jehe ch'án a la ko kaín tí sín tjejó ntöe ch'án ti tan kuente Inchéni.

³³ Na kjónté sítié la tí hora a sákjuíko ch'án sín kjuínchek'íjmá ch'án tí tsíchrít'ò sín. Ntá tuénxín jehe ch'án la ko kaín xín sín tjejó ntøe ch'án mé kuíkite sín.

³⁴ Na ntá chr'éxin tí jehe ch'án sákjuíko sín ntøe ch'án. Ntá ntiha kjuanjon ch'án nkehe sine sín. Imá chéhe ch'án la ko kaín tí sín ntøe ch'án kixin ó kuítekaon sín Dios.

³⁵ Ntá kóyaon nchítjen ntá tí sín juez k'uetuēnen sín tí sín policía sátsjitsjehe sín tí ch'ín t'ayakonhen ntøechiso kixin chrókjuanjon ch'án kjuachaxin ts'axrje ch'ín Pablo la ko ch'ín Silas.

³⁶ Ntá tí ch'ín t'ayakonhen ntøechiso mé chénka ch'án tí ch'ín Pablo tí nkehe chrónka sín ntáchro ch'án kixin:

—Tí sín juez a mé tsík'etøan sín kixin tsjánjuan kjuachaxin kixin sátsjirá. Méxra sátsjirá kjuaxróxin —mé xíkaha ichro tí ch'ín a.

³⁷ Ntá ch'ín Pablo ntáche ch'án tí sín policía kixin:

—A ntá jeheni kjónté chojni romanoni mé kjuateni sín nkayakon nchónhya chojni. Jehya kixin chrókjuanchia sín nke jie chóntani. Náhi. Kjónté la chr'áxenhenni sín ntøechiso. A ntá ijie la ¿á imó chrókuakitsjeni sín ní? Náhi. Tsjijia ti jehe sín tsakitsjeni sín —ichro ch'án.

³⁸ Ntá tí sín policía mé sákjuíchénka sín tí sín juez nkehe ntáchro tí sín tjejóchjina. Ntá imá chrakon sín kixin kuínhin sín kixin tí sín a mé chojni romano.

³⁹ A ntá sákjuí tí sín juez ntá chrónòehe sín tí ch'ín Pablo la ko ch'ín Silas kixin tsonínkakonhya sín kixin xíkaha kónhen sín ntá k'uaxrjexín sín ntiha ntá chrónòa tí sín a sátsjixin sín tí chjasin ntiha.

⁴⁰ Ntá ch'ín Pablo la ko ch'ín Silas tió k'uaxrjexín sín tí ntøechiso ntá kjuíji sín ntøe tí tjan Lidia. Ntá tió kjuixin sákjuítsjehe sín tí sín kíchó ni la kjuínchechéhe sín ntá sákjuíxin sín ntiha.

17

Kónínkaon tí chojni chjasin Tesalónica

¹ Ntá ch'ín Pablo la ko ch'ín Silas la k'uátsínka sín chjasin Anfípolis la ko chjasin Apolonia ntá kjuíji sín chjasin Tesalónica. Ntaha itjen ijnko nínko judío.

² A ntá ch'ín Pablo sákjuí ch'an nínko éxí kuènnen ch'án la jnkojnko yaon t'ok'éhe sín chjina iní semana ikjo ch'án tí jehe sín la chrónkaxín ch'án nkexrí ntáchro xroon itén Dios.

³ Kjuako ch'án kixin tí nkexro Cristo mé t'ichjánxin its'en la ko chr'éxin tsoxechón ch'án inaá. Ntáchro ch'án kixin:

—Tí ch'ín Jesús a mé jeheni chrónkaxínni kixin tsinhínrá jahará mé Cristo tíha.

⁴ A ntá iso tí sín judío kuítekaon sín ntá k'uíto sín tí ch'ín Pablo la ko tí ch'ín Silas. Ntá kjaxin kuítekaon itsjé tí sín griego xraxínkaon Dios a la ko kjaxin nchónhya chojni chjin tjetøan kuítekaon.

⁵ A ntá iso tí sín judío tinkáchónkihya Ìnchéni mé imá kóchjio sín ntá kójnkotséko sín iso chojni jínahya ch'e, ch'ehya sín xra, ixri ntja. Ntá kaín sín k'uíxité sín la kjuínchexakonhen sín tí sín síin chjasén sín. Ntá itsjé sín k'uíxēnen sín ntøe ijnko ch'ín it'in Jasón kjueyá sín ch'ín Pablo la ko ch'ín Silas kixin tjínkaon sín sáchrókjuíkohe sín tí sín a tí sín t'etøan.

⁶ A ntá k'uitjahya sín tí sín a ntá kjónté itsé sín tí ch'ín Jasón la ko í so tí sín tinkáchónki Ìnchéni ntá kuínkánkákjen sín sákjuíko sín tí síin tí síxreé tí chjasin ntiha. Ntaha nínkaon sín k'uèya sín ntáchro sín kixin:

—Tí sín i mé kjuínchexakonhen chojni kuenté chjasintajni. La ntá ó kjuí sín chjasénni ntihi kjaxin.

⁷ La ntá tí ch'ín Jasón a mé kjuanjon ch'án kjuachaxin kixin tí sín a mé ts'ejó sín ntøe ch'án. Kaín sín titekakonhya sín tí ley kuènte tí ch'ín romano t'etøan. Ntáchro sín kixin itjen í jnko nkexro antsí má t'etøan, ntá tíha mé Jesús —ichro sín.

⁸ Ntá tió kuínhin kaín tí sín tsíkójnkotsé la ko tí síxreé ntá k'uixité sín kónínkaon sín.

⁹ Ntá ch'ín Jasón la ko tí sín tjejóko ch'án kjuenkā sín ntá tí síxreé kuítóhe sákjuí sín.

Ch'ín Pablo la ko ch'ín Silas sákjuí sín chjasin Berea

¹⁰ Ntá tuénxín tí tie a tí sín kíchó ni mé ichr'án sín ch'ín Pablo la ko ch'ín Silas kixin sátsji sín chjasin Berea. Ntá tió kjuíji sín ntaha k'uixenhen sín tí nínkoé tí sín judío.

¹¹ A ntá tí sín judío ntiha la antsí má jína asén sín, ntá tí sín chjasin Tesalónica la náhi. Antsí má kóxrjínhin sín tsinhin sín tí itén Dios la jnkojnko yaon kjuínchekuáxin sín tí xroon chóna itén Dios kixin tsonhe sín á chaxín ntoá xíkaha tí ntáchro tí sín a.

¹² Méxra nchónhya tí jehe sín kuítekaon sín la ko kjaxin nchónhya tí chojni chjin griego tjetøan mé kuítekaon la ko kjaxin tí chojni ntoa.

¹³ A ntá tí sín judío chjasin Tesalónica kónohe sín kixin ch'ín Pablo mé kjuakoxin itén Dios chjasin Berea inaá. Ntá sákjuí sín ntiha a ntá kjuínchekóninkaon tí sín a.

¹⁴ A ntá tí sín kíchó ni tinkáchónki Ìnchéni ichr'án sín tí ch'ín Pablo sátsji nó chrínta ntayaon. A ntá ch'ín Silas la ko ch'ín Timoteo naxā kuítóhe sín tí chjasin Berea.

¹⁵ Ntá iso tí sín ntiha sákjuíko sín tí ch'ín Pablo la kjuíji sín tí chjasin Atenas. Ntá kjan sín chjasén sín kixin k'uetøan ch'ín Pablo kixin tsochrónka sín kixin tjoka chrókóxakonhen tí ch'ín Silas la ko tí ch'ín Timoteo tsjiji sín ntiha tsoxéta sín ch'án.

Ch'ín Pablo itjen chjasin Atenas

¹⁶ Ntá nachrohe kjuák'echónhen ch'ín Pablo kixin itsji tí ch'ín Silas la ko tí ch'ín Timoteo chjasin Atenas ntá imá k'uává asén ch'án kixin k'uíkon ch'án kixin tí chjasin ntiha síin nchónhya tí nkehe tsíkjanoya.

¹⁷ Ntá tí nínko ntiha kjuakohe ch'án iso sín judío la ko iso tí chojni xraxinkaon Dios. La kaín yaon ntasin kjuák'e ch'án kjuakøexin ch'án tí chojni síin ntiha.

¹⁸ La iso tí sín kjuínchekuáxin tí xroon kuènte tí chojni it'in epicúreo la ko iso tí sín kjuínchekuáxin tí xroon kuènte tí chojni it'in estoico kjuankíxin nixjehe sín tí ch'ín Pablo. Iso sín ntáchro sín kixin:

—¿Nkekuènté kixin ánta tjenixja tí nkexro a?

La í so sín ntáchro sín kixin:

—Méxra tjenixja ch'án kuènte í jnko dios.

Mé xíkaha ichro sín kixin kjuako ch'ín Pablo tí tán jína kuènte Jesús la ko kjuako ch'án kixin Jesús kjónté k'uén ntá xechón.

¹⁹ Ntá sákjuíko sín ch'ín Pablo ijnko tjo it'in Areópago. Ntiha mé kuènhen sín tójnkotsé sín kixin tjenkayáxixín sín. Ntá nixjehe sín tí ch'ín Pablo, ntáchro sín kixin:

—Tjinkaonni tsochrónka tí nkehe nixin kjuíkoa.

²⁰ Itsjé tí nkehe ókjé tjetjàkua la tjinkaonni tsonoheni nkehe t'axrjexín kaín tíha —ichro sín.

²¹ Ntá kaín tí sín chjasin Atenas la ko tí sín tsíkjixín ókjé tjejó ntiha mé tóxrjénhya sín í jnko xra, jehí tóxrjínhin sín chrókuinhin sín la ko chrónixja sín ijnko nkehe nixin.

²² Ntá ch'ín Pablo k'uínkatjen ch'án kjuák'exín toté ch'án tí siín tí jehe sín chrítaón tí Tjo Areópago. Ntá ntáchro ch'án kixin:

—Jahará tjejorá chjasin Atenas tinhínrá. Janhan ó k'uíquān kixin jahará la itsjé dios tinkachónkirá.

²³ Ntá tí kjuak'é ntiha k'uájia la k'uíquān itsjé tí nketí tjásixínrá culto ntá k'uitja ijnko altar ts'ínixín kixin: “Ntihi xraxinkakonxínni ijnko Dios naxá chónhyani”. Méxra tí Dios xráxinkáonrá kjónté naxá chonhyará mé tí Dios a mé tjákoHará.

²⁴ Tí Dios mé kjuích'éna ch'án chjasintajni la ko kaín nkehe siín chjasintajni. Jehe ch'án mé ìnché nkajní la ko chjasintajni. La tjexenhya ch'án ijnko nínko tsíkjich'énaxín chojni tja.

²⁵ La t'ichjánxienhya ch'án kixin chojni chrókjuinkitsa tí jehe ch'án kixin jehe ch'án mé chjéhe kjuachón kaín chojni la ko tjanjon ch'án xrinto la ko kaín nkehe siín.

²⁶ 'Kaín tí nación k'uaxrjeníxin jnkokoá chojni kixin chrók'uejó sín nkuíxín chjasintajni. Kjaxin chrónka Dios nkesá la ko nketí ts'ejó chojni.

²⁷ Méxra jeheni t'ichjánxín tsjeyáni Dios kixin ntá tsienxínni nkexrí ts'itjani ch'án. Jehya imá ikjín itjen ch'án, chjino tí tjejóni itjen ch'án.

²⁸ Jehe ch'án tjejóchónxinni ch'án la ko nchekinkíni ch'án la jehe ch'án t'ayakonhenni ch'án. Mé xíkaha tsintáchro jnko ch'ín chjasánrá ósé kixin: “Jeheni mé naxá kjéhya Dios.”

²⁹ Jeheni mé naxá kjéhyani Dios méxra xitjahya tsjenkayáxinni kixin sich'énani Dios chica oro o chica plata o xro kixin éxí tsíkjenkayáxin chojni kixin sich'éna sín dios kuènte sín.

³⁰ Senó Dios kónínkakonhya ch'án kixin ó nohe ch'án kixin naxá chónhya sín ch'án. Ntá ijie t'etuēhen Dios kaín xín chojni siín chjasintajni tsokjan sín la tsinkáchónki sín tí jehe ch'án.

³¹ Dios tsíkjeyá ijnko yaon sinchekitoexín ijje chojni chjasintajni. Tsíkjeyá ch'án ijnko chojni la kjuakoxín kaín kjuachaxin kixin tí nkexro kjónté tsík'en la xechón ínaá —ichro ch'ín Pablo.

³² Na ntá tió kuínhin sín kixin nkexrí tsoxechón chojni tsík'en ntá iso sín kjuanoá sín ch'án. Ntá í so sín ntáchro sín kixin:

—Chr'éxín tsinhinni ínaá tí nkehe ntáchrúa —ichro sín.

³³ Ntá ch'ín Pablo kuítqhe ch'án tí jehe sín.

³⁴ Na ntá iso sín kjuíchréhe sín ch'ín Pablo la kjuankíxin tinkáchónki sín Ìnchéni. Ijnko tí sín tinkáchónki a mé it'in ch'án Dionisio mé ijnko tí síxreé kjuínchekitoexín ijje chojni chrítaón tí Tjo Areópago la ko ijnko tjan tinkáchónki tjan mé it'in tjan Dámaris la ko í so sín kjaxin kjuankíxin sín tinkáchónki sín Ìnchéni.

18

Sákjuí ch'ín Pablo chjasin Corinto

¹ Ntá kjuixin tíha ntá ch'ín Pablo sákjuíxin ch'án chjasin Atenas la sákjuí ch'án chjasin Corinto.

² Ntiha mé xéta ch'án ijnko ch'ín judío it'in Aquila. Jehe ch'án mé tsíkjixín ch'án estado Ponto la séhya jehe ch'án la ko ichjién ch'án Priscila mé kjuixín sín nación Italia kixin t'ichjánxín ts'axrjexín sín ntiha kixin tí ch'ín t'etoan mé it'in Claudio k'uetoan ch'án kixin kaín tí sín judío mé ts'axrjexín sín tí chjasin Roma. Ntá ch'ín Pablo mé kjuínixjehe ch'án sín.

³ Jnkokón xra ch'e sín la ko jehe ch'án, ch'éna sín kamantá t'óna nchia. Méxra ntá ntahó kuítqeko kíchó sín kixin jnkokoá sich'e sín tí xra a.

⁴ Ntá jnkojnko tí yaon t'ok'éhe sín sákjuí ch'ín Pablo tí nínko nixjehe ch'án tí sín judío la ko tí sín jehya judío kixin tjinkaon ch'án kixin kaín tí chojni chrókuitekaon sín.

⁵ Ntá tió ch'ín Silas la ko ch'ín Timoteo kjuixín sín estado Macedonia ntá ch'ín Pablo kjuák'e xra ó kjuako ch'án itén Dios kixin tsonohe tí sín judío kixin Jesús mé tí nkexro Cristo.

⁶ Ntá tí sín judío mé kjuankíxin kónínkakohen sín tí ch'ín Pablo la imá k'uántaxínhin sín ch'án. Ntá jehe ch'án k'ótsjènka ch'án iké ch'án kixin kjuakoxín ch'án kixin xíkaha tsjasóte sín. Ntá ntáchro ch'án kixin:

—A ntá ijie la jahará kjuéyará tí jie ts'itjáyánxínrá. A ntá janhan la í chontahya jie kixin ó kjuákoḡhará tí tán jína, a ntá kuítékákonhyará. A ntá ijie la íchá jína sátsjia tsjákoḡa tí sín jehya judío —ichro ch'án.

⁷ Ntá k'uaxrjexín ch'án nínko ntá sákjuí ch'án ntoe ijnko chojni mé it'in Justo mé jehe ch'án xraxinkaon ch'án Dios. Ntoe ch'án mé chjinaxón nínko.

⁸ Ntá ch'ín Crispo, ijnko nkexro t'etōan kuènte nínko, la ko kaín tí sín tjejó ntoe ch'án, mé kjuankíxin sín kuítekaon sín Ìnchéni. Kjaxín itsjé tí sín tjejó chjasin Corinto mé kuínhin sín tí tan la ntá kjuankíxin sín kuítekaon sín Ìnchéni la kuíkite sín.

⁹ Ntá ijnko tie titàya k'uúkuèn ch'ín Pablo Ìnchéni nixjehe ch'án ntáchro kixin: —Chrakonhya tjákua itan kuèntana. Tìtoéhya tsochronka

¹⁰ kixin janhan tjejóko kíchó ni kixin ninkexró kohya nkehe sit'aha. Kixin janhan la chonta itsjé chojni tí chjasin ntihi tinkáchónki tí janhan.

¹¹ Méxra ch'ín Pablo mé kuítóhe ch'án ijnko nánó ko t'ō ntiha chjasin Corinto, kjuakoḡhe ch'án sín itén Dios.

¹² A ntá tí yaon k'uetōan ch'ín Galión estado Acaya, ntá itsjé tí sín judío kónínkakohen sín tí ch'ín Pablo. Ntá itsé sín ch'án sákjuíko sín ch'án tí tjejó tí sín t'etōan.

¹³ A ntá ntáche sín tí ch'ín t'etōan kixin:

—A ntá tí nkexro i ixri ch'án tjachroe ch'án chojni kixin ókjé nkexrí chrókuinkáchónki sín Dios la ko tsitekakonhya sín tí nkehe t'etōan tí ley.

¹⁴ Na ntá tjinkaon ch'ín Pablo chrónixja, ntá ch'ín Galión ntáche ch'án tí sín judío kixin:

—Tí chaxín ijnko jie jie kjuasin tí ch'ín i ntá kjónté chrókuínhan tí nkehe ntáchrórá jahará judíorá.

¹⁵ A ntá jehí tjanjonxínrá tí nkehe nixjará la ko ihnié chojni la ko tí ley tinkachónkirá. Méxra jahórá chrókuínchekitoexínrá tíha kixin janhan tjínkakonhya ts'óna juez sintakitoaxian kuènte tí nkehe a —ichro ch'án.

¹⁶ Ntá k'uetōan ch'án kixin sátsjixín sín ntiha.

¹⁷ Ntá tí sín griego la kónínkaon sín la itsé sín tí ch'ín Sóstenes tí ch'ín t'etōan kuènte tí nínko judío, la ntahó kjuatexín sín ch'án. Jehe ch'ín Galión a la mé kjónté k'uúkon ch'án la ántosén ch'án.

Ch'ín Pablo xíkjan ch'án chjasin Antioquia ntá sákjuí ch'án nixin viaje

¹⁸ A ntá ch'ín Pablo kuítóhe ch'án chjasin Corinto itsjé yaon ntá nixjehe ch'án tí sín kíchó ni ntiha ntá k'uúxénhen ch'án ntabárcō sákjuí ch'án nó estado Siria a sákjuíko ch'án tjan Priscila la ko ch'ín Aquila. Ntá kjuíji sín chjasin Cencrea la ntá naxa k'uúxénhya ch'án ntabárcō inaá la ikjín ch'án mòloé kixin xíkaha kjuakoxín ch'án kixin kjuínchexiteyá ch'án tí nkehe chrónka ch'án.

¹⁹ Ntá tió kjuíji sín tí chjasin Éfeso ntá kuítóhe ch'ín Pablo tí tjan Priscila a la ko tí ch'ín Aquila. Ntá sákjuí ch'án ijnko nínko la ikjo ch'án tí sín judío tsíkójnkotsé ntiha.

²⁰ Ntá jehe sín chrónòda sín kixin chrókuitohe ch'án isé ntiha, kjánchó jehe ch'án la chrohya ch'án.

²¹ Ntá tuénxín nixjehe ch'án sín ntáchro ch'án kixin:

—T'ichjánxin tsjak'é chjasin Jerusalén tí yaon kia itsi. Kjánchó tsokjan inaá tsotsjaha tí jahará tí naxa tjinkaon Dios —ichro ch'án.

Ntá kuítóhe ch'án sín ntá k'uixenhen ch'án ntabárcō sákjuixin ch'án chjasin Éfeso.

²² Ntá tió kjuíji ch'án chjasin Cesarea ntá sákjuí ch'án chjasin Jerusalén na ntá sákjuínixjehe ch'án tí sín tinkáchónki Ìnchéni ntiha. Ntá tuénxín xíkjan ch'án chjasin Antioquía.

²³ Ntá kuítóhe ch'án ntiha itsjé yaon ntá xíkji ch'án inaá ntá xík'atsínka ch'án itsjé chjasin estado Galacia la ko estado Frigia la kjuínchechéhe ch'án kaín tí sín tinkáchónki Ìnchéni.

Ch'ín Apolos kjuako ch'án chjasin Éfeso

²⁴ Ntá tí yaon a mé ijnko ch'ín judío it'in Apolos ikui chjasin Éfeso mé tsíkjin ch'án chjasin Alejandría. Jehe ch'án mé ijnko nkexro antsí nohe chrónka kixin chóxin ch'án xroon itén Dios.

²⁵ Jehe ch'án ó xrakohe ch'án ntje Ìnchéni ntá imá tóxrjínhin ch'án nixja ch'án la ko tsjako jina kuènte ch'ín Jesús. Kjánchó jehó nohe ch'án nkexrí kuíkite chojni ch'ín Juan.

²⁶ A ntá ch'ín Apolos kjuák'e ch'án kjuako ch'án tí nínko la chrakonhya ch'án. Ntá tió kuínhin tí tjan Priscila la ko tí ch'ín Aquila tí kjuako ch'án ntá k'uaxrjentako sín ch'án la kjuakohe sín ch'án tí nkehe naxa noehya ch'án kuènte ntje Dios.

²⁷ Ntá tjinkaon ch'ín Apolos sátsji ch'án estado Acaya. Ntá tí sín kichó ni kjuínkítsa sín ch'án la ikjin sín ijnko xroon chr'énnen sín tí sín tinkáchónki Ìnchéni tjejó ntiha kixin jina tsjanjon sín kjuachaxin tsjak'e ch'án. Ntá tió kjuíji ch'án estado Acaya ntá kjuínkítsa ch'án kjuakohe ch'án tí sín tsíkjin kítsa Dios tsíkitekaon sín ch'án.

²⁸ Ntá kjuakoxín ch'án kaín chojni kixin ntoáhya ch'e tí sín judío, la xitjahya tsontáchro sín náhi. Kjuakohe ch'án sín kixin tí xroon itén Dios chrónka kixin Jesús mé tí nkexro Cristo.

19

Kjuák'e ch'ín Pablo chjasin Éfeso

¹ Ntá naxa itjen ch'ín Apolos tí chjasin Corinto ntá ch'ín Pablo k'uatsínka ch'án nchónhya chjasin chrík'á jna la ntá kjuíji ch'án chjasin Éfeso la ntaha xéta ch'án nchónhya chojni tinkáchónki ntje Dios.

² Ntá kjuanchankíhi ch'án sín kixin:

—¿Á k'uayéhérá Nchakuen Dios tió kuinkachónkirá Ìnchéni? —ichro ch'án. Ntá kjuátehe sín kixin:

—Náhi, kíenhyani á tjen Nchakuen Dios —ichro sín.

³ Ntá kjuanchankí ch'ín Pablo kixin:

—¿Nkexro kjuachaxién kuíkitiará? —ichro ch'án.

Ntá kjuátehe sín kixin:

—Éxí kjuako ch'ín Juan kuíkiteni —ichro sín.

⁴ Ntá ntáchro ch'ín Pablo kixin:

—Ch'ín Juan mé kuíkite ch'án chojni kixin chrókjan sín chrókuinkáchónki sín Dios la ko kjuako ch'án kixin chrókuitekaon sín tí nkexro itsi chr'éxin. Tíha mé Jesús, tí Cristo —ichro ch'án.

⁵ Ntá kuínhin sín xikaha ntá kuíkite sín kjuachaxiэн ihnié Ìnchéni Jesús.

⁶ A ntá ch'ín Pablo kjuák'etja itja ch'án chrítaón ikja sín ntá ikui Nchakuen Dios k'uáyéhe sín ntá kjuankíxin sín nixja sín itsjé nkíva ókjé la ko kjuankíxin sín kjuako sín tí nkehe kjuanjon Dios.

⁷ Kaín tí sín ntoa tinkáchónki mé chjina teyó sín.

⁸ A ntá chjina iní nitjó, la ch'ín Pablo k'uékji ch'án nínko la kjuako ch'án kaín asén ch'án. Nixjehe ch'án chojni la chrónka ch'án nkexrí tjen tí kjuachaxin kuènte Dios.

⁹ A ntá iso sín la kjónté la imá icha asén sín tjinkakonhya sín tsinkáchónki Ìnchéni. Ntá imá t'ántaxínhin sín tí tan jína kuènte Ìnchéni nkayakon chojni. Ntá tí ch'ín Pablo k'uaxrjentako ch'án tí sín tinkáchónki Ìnchéni ntá ijnko escuela it'in Tiranno ntaha kjuakoxin ch'án kaín yaon.

¹⁰ Mé xikaha kjuák'e ch'án kjuako ch'án iyó nánó, ntá kaín tí sín k'uéjé ntiha estado Asia mé kuínhin sín itén Ìnchéni Jesús, mé tí sín judío la ko kjaxin tí sín jehya judío.

¹¹ Ntá Dios antsí má kjuakoxin kjuaxroan jié kixin tí nixja ch'ín Pablo.

¹² Ntá itsjé chojni kjuikao sín pañitoé sín la ko iké sín kuákóxin ch'ín Pablo ntá sákjuiko sín kjuínchekakóxin sín tí sín níhi ntá kuítóhe sín jína la ko kjaxin nchakuen tí jínahya k'uaxrjexín tí jehe sín.

¹³ A ntá iso tí sín judío ixri sín ntáchro sín tónohe sín tsakitsje sín nchakuen tí jínahya ch'iyehé sín chojni mé tjinkaon sín tí kjuachaxiэн ihnié Jesús. La ntá ntáche sín tí nchakuen tí jínahya kixin:

—Kjuachaxiэн ihnié tí Jesús tjako tí ch'ín Pablo t'etoanxínni kixin jaha nchakuen jínahya sátjixian ntihi —ichro sín.

¹⁴ Mé xikaha k'uékjich'e tí yato xjeen ijnko ch'ín judío it'in Esceva mé ijnko nchat'á t'etoan.

¹⁵ Ntá ijnko yaon nixjehe sín nchakuen tí jínahya. Ntá tí nchakuen tí jínahya kjuátehe ntáchro kixin:

—Chóxinni nkexro ch'ín Jesús la ko ó noheni nkexro ch'ín Pablo. A ntá jahará, ¿la nkexro tí jahará? —ichro tí nchakuen tí jínahya.

¹⁶ Ntá tí ch'ín chóna tí nchakuen tí jínahya kjaminkitaón ch'án tí jehe sín a la ntá imá tsehe ch'án kjuacha ch'án kjuíncheníhi ch'án kaín sín la imá kjoté sín. Ntá k'uaxrjexín sín ntøe sín tjóchin sín la ko síchrít'o cuérpoé sín.

¹⁷ Ntá kaín tí sín judío la ko tí sín jehya judío tjejó chjasin Éfeso mé kuínhin sín tí nkehe tsíkónhen la imá chrakon sín. Imá jié tí kjuachaxin ihnié Ìnchéni Jesús, ichro sín.

¹⁸ Kjaxin itsjé tí sín tinkáchónki Ìnchéni mé kjuíchrónka sín kixin tí ósé k'uékjich'e sín nchónhya nkehe jínahya.

¹⁹ Itsjé tí sín k'uékjich'e nkehe jínahya k'uékjinchexroan sín la kuikao sín libro k'uékjich'exín sín xra ntá kjuaka sín tí libro a la k'uíkon nchónhya chojni. Ntá kuákjaxin sín cuenta nkekjaín k'uíte tí libro a ntá kónohe sín cincuenta mil peso k'uíte tí libro a kjuaka sín.

²⁰ Ntá tí itén Ìnchéni sítinkák'ánkí la tjakoxin kixin chaxín chóna kjuachaxin.

²¹ Ntá kjuixin tíha ntá ch'ín Pablo mé kjuenkayáxin ch'án chrókjuitsjehe ch'án tí sín nó Macedonia la ko Acaya ntá ntaha sáchrókjuixin ch'án chjasin Jerusalén. Ntá kjaxin ntáchro ch'án kixin tsjixin sátsji ch'án chjasin Jerusalén ntá kjaxin t'ichjánxin sátsji ch'án chjasin Roma.

²² Ntá ichr'án ch'án iyó tí sín tjinkitsa ch'án sátsji sín estado Macedonia, mé ch'ín Timoteo la ko ch'ín Erasto, ntá nachrohe jehe ch'án naxa kuítóhe ch'án estado Asia iso yaon.

Kónínkaon k'uúixité chojni chjasin Éfeso

²³ Ntá itsjé chojni chjasin Éfeso kónínkaon sín la k'uúixité sín kixin kóxrjénhya sín tí itén Ìnchéni.

²⁴ Kixin ntiha mé itjen ijnko ch'ín it'in ch'án Demetrio. Kjuích'éna ch'án nkehe chica plata tsjehe éxí ninko kuènte tí dios Diana la nchónhya chichaon kjuacha ch'án la ko tí sín kjuích'eko ch'án xra.

²⁵ Ntá kójnkotséko sín í so sín jnkokón tí xra ch'e sín. Ntá ntáchro ch'án kixin: —Jahará nohará kixin tí xra ch'eni la tjachani jina la náxrjón tjejóni.

²⁶ Kjánchó ó k'uúikonrá la ko ó kuínhínrá tí nkehe xritjako ch'ín Pablo. Tjako ch'án kixin tí nkehe tsíkjanoya mé jehya Dios. Kjánchó jehya chjasin Éfeso ó. Náhí, nkuíxín estado Asia kuítekaon chojni.

²⁷ Imá tóxakonhenni kixin tí xra ch'eni ts'itjáyan la kjaxin tóxakonhenni tsontáchro sín kixin chónkó tí ninkoe tí dios Diana imá jié la ko ts'itjáyan tí kjuachaxin kuènte tjan. Ntá í tsitekakonhya sín tí kjuachaxin kuènte tjan nkuíxín estado Asia la ko kuenté chjasintajni —ichro ch'ín Demetrio.

²⁸ Ntá tí kuínhin sín xikaha la imá kónínkaon sín ntá k'uèya sín ntáchro sín kixin:

—Ts'itjáyanhya tí dios Diana kuènte sín Éfeso.

²⁹ Ntá imá tóxakonhen tí sín chjasin Éfeso la í noehya sín nkehe chrókjuich'e sín kixin kónínkakonhen sín tí ch'ín Gayo la ko tí ch'ín Aristarco mé iyó sín tsíkjin sín Macedonia. Ntá kuínkánkákjen sín kuikao sín tí nchia jié tójnkotséxin sín xráxín.

³⁰ Ntá ch'ín Pablo tjinkaon ch'án chrók'uixenhen ch'án tí nchia kixin tsonixjehe ch'án sín, a ntá tí sín tinkáchónki Ìnchéni mé chrohya sín kixin ts'ixenhen ch'án tí nchia a.

³¹ Kjaxin iso tí síxreé kuènte tí estado Asia mé chóxin sín ch'ín Pablo, ntá k'uetōan sín kixin tsochénka chojni tí ch'ín Pablo kixin chrókjuiatéhya ch'án tí siín sín ntiha.

³² A ntá iso tí sín tsíkójnkotsé ntáchro sín ijnko nkehe, la í so sín ntáchro sín ókjé nkehe kixin nínkaon sín. La itsjé sín la í noehya sín nkehe xra tsíkójnkotséxin sín kixin nínkaon sín.

³³ La iso sín judío chénka sín ijnko ch'ín it'in Alejandro nkerí xra kjuixín sín kixin tsonixja ch'án. Ntá kjuák'e ch'án jnkosiné ntá kjuakoxin ch'án itja ch'án kixin tsotání sín ntá tsonixjaxin ch'án tí sín judío tsinhin kaín chojni.

³⁴ Ntá tió kjuátsoan tí sín tsíkójnkotsé kixin kjaxin tí ch'ín a mé judío ch'án ntá kaín sín k'óyako sín chjina iyó hora ntáchro sín kixin:

—Ts'itjáyanhya tí dios Diana kuènte tí sín chjasin Éfeso —ichro sín.

³⁵ Ntá tí ch'ín secretario kuènte tí chjasin ntiha mé k'uetōan ch'án tsotání sín. Ntá ntáchro ch'án kixin:

—Chojni chjasén Éfeso tinhínrá. Kuenté chjasintajni nohe sín kixin tí sín chjasin ntihi mé t'ayakonhen sín tí ninko kuènte tí dios Diana. Tí retrato kuènte tjan mé tsíkixín nkaya nkajní.

³⁶ Kohya nkexro tsontáchro kixin chaxínhya tíha. Méxra tánirá. Tjenkayáxinrá jina nkehe chrókjuich'erá.

³⁷ Jahará kjuíkoará tí sín a ntihi la kjánchó k'uántaxíenhya sín tí ninkoeni la ko k'uántaxíenhya sín tí tjan santo kuénténi.

³⁸ Méxra ch'ín Demetrio la ko tí sín ch'eko ch'án xra la tí tjanchia sín jie jnkójín nkexro la siín juez sinchekitōexín. Méxra tsochrónka sín tí tjen tí ch'ín juez kixin jnkójnko sín la chrókuitōexín tí jie chóna sín.

³⁹ Ntá tí siín ijnko nkehe tsjanchiará ntá t'ichjánxin tsojnkotsérá la ntoá chrókuitōexín.

⁴⁰ Tóxakönhenni ḱixin kjá tí sín t'etōan ts'ekani sín jiē ḱixin jehya j́ina k'uíxiténi kónínkaonni. Noehyani nkehe tsjatehēni ḱixin tí tsjančankí sín nkekuēnte k'uíxiténi, tsixro sín.

⁴¹ La ntá k'uetōan ch'án ḱixin sátsji sín ḱixin ó kjuixin tí kójnkotsé sín.

20

Sátsji ch'ín Pablo estado Macedonia la ko estado Grecia

¹ Ntá tí kjuixin k'uíxité sín, a ntá ch'ín Pablo k'uíyēhē kaín tí sín tinkáchónki Ìnchéni ntiha ntá kjuako ch'án iso kjuaxrexinkaon j́ina, ntá nixjēhē ḱichó sín ntá sáxíkji ch'án nó estado Macedonia.

² Ntá nkuíxín k'uatsínka ch'án la kjuínchechéhē ch'án tí sín tinkáchónki Ìnchéni ḱixin tí nkehe nixja ch'án. Ntá chr'éxín kjuíji ch'án estado Grecia.

³ Ntiha kuítóhe ch'án iní nitjó ntá chrók'uixenhen ch'án ijnko ntabárcō ntá sáchrókjuí ch'án estado Siria. Ntá kónohe ch'án ḱixin iso sín judío nínkakonhen sín tí jehe ch'án a ntá kjuenkayáxin ch'án tsokjanxin ch'án toté ch'án inaá ts'atsínka ch'án Macedonia.

⁴ Ntá tí sín sákjuíko ch'ín Pablo mé tí ch'ín Sópater mé jehe ch'án tsíkjixin ch'án chjasin Berea, la ko kjaxin ch'ín Aristarco, la ko ch'ín Segundo. Jehe sín mé tsíkjixin sín chjasin Tesalónica, la ko ch'ín Gayo tsíkjixin ch'án chjasin Derbe, la ko kjaxin sákjuíko ch'án ch'ín Timoteo, la ko ch'ín Tíquico, la ko ch'ín Trófimo, mé tsíkjixin sín estado Asia.

⁵ Ntá tí sín ḱichó ni a mé kuítónxin sín ntia ntá tjejóchónhen sín tí jeheni chjasin Troas.

⁶ Kjuixin k'uátsínka tí kia tió kjóne sín niotja chóntahya tí xroan t'ánkixin niotja, ntá k'uixenhenni ijnko ntabárcō k'uaxrjexínni Filipos ntá k'uátsínka in'ó yaon ntá kjuíjini chjasin Troas ntá ntiha xétani tí sín kuítónxin sín ntia. A ntá ntiha kuítóheni yato yaon.

Ch'ín Pablo sákjuí chjasin Troas

⁷ Ntá tí yaon xrankíxín semana ntá kójnkotséni ḱixin tsochrít'ō niotja tsoxraxinkakonxínni Ìnchéni. Ntá ch'ín Pablo nixjēhē ch'án kaín tí sín tinkáchónki Ìnchéni la tjinkaon ch'án sátsjixin ch'án ntiha tí yaon chr'éxín, ntá antsí má sé tí nkehe chrónka ch'án la naxa tjenixja ch'án k'áxrótjen.

⁸ Tí tsíkójnkotsé sín a mé ijnko piso noi la ntiha mé síche nchónhya xrohi.

⁹ Ntá ntiha itjen ijnko ch'ín ntasoá it'in ch'án Eutico mé tjetjaxin ch'án chrítaón ventana. Ntá tí ch'ín Pablo imá sé nixja ch'án ntá tí ch'ín ntasoá mé tsíkihi ch'án kotáchrin. A ntá xrínahya tsík'ajua ch'án ntá tsík'anótjenxin ch'án tí ventana tí nixin piso ntiha ntá sákjuíkjatsen sín ch'án la ó tsíkjixin tsík'en ch'án.

¹⁰ Ntá ch'ín Pablo k'uínkajin ch'án ntá kjuítsínkaták'á ch'án chrítaón tí ch'ín tsík'anótjen a la kjóa ch'án. Ntá ntáche ch'án tí sín ḱichó ni ḱixin:

—Chrakonhyará tsík'enhya ch'án, tjechón ch'án —ichro ch'an.

¹¹ Ntá ch'ín Pablo k'uit'ótjen ch'án inaá tí k'uínkajinxin ch'án ḱixin ntiha ts'óxikayēhē ch'án niotja sine sín tsoxraxinkakonxín sín Ìnchéni. Ntá naxa tjenixja ch'án hasta k'uínkaséyan a ntá sákjuí ch'án.

¹² Ntá tí ch'ín ntasoá tsík'anótjen sákjuíko sín la tjechón ch'án kohya nkehe xēhe ch'án ntá kaín sín imá kóchéhē sín.

Sákjuíxin ch'ín Pablo chjasin Troas kjuíji ch'án chjasin Mileto

¹³ Jeheni mé kuítónxinni ntia saoxín la k'uixenhenni ijnko ntabárcō sákjuíni nó chjasin Asón ḱixin ntiha tsoxetani ch'ín Pablo éxí tsíntáchro ch'án ḱixin tjinkaon ch'án sátsjixin ch'án toté ch'án ntiha.

14 Ntá ó xetani tí jehe ch'án chjasin Asón ntá k'uixenhen ch'án tí ntabarco kjaxin ch'án ntá sákjuíkoni ch'án nó chjasin Mitilene.

15 Ntá tí sákjuixinni ntiha ntá tí yaon chr'éxin ntá k'uátsínkani estado Quío ntá tí yaon chr'éxin kjuíjini chjasin Samos. Ntá ínaá k'uixenhenni tí ntabarco ntá sákjuíni chjasin Trogilio ntá ntiha k'ok'éheni. Ntá xík'ixenhenni ntabarco ínaá ntá tí yaon chr'éxin kjuíjini chjasin Mileto.

16 Mé xíkaha kjuích'eni kixin ch'ín Pablo í tjinkakonhya ch'án chrókjuak'e ch'án isé estado Asia la í tjinkakonhya ch'án chrókjan chjasin Éfeso kixin tjinkaon ch'án tjoka chrókjuiji ch'án chjasin Jerusalén kixin ntiha chrókjuak'e ch'án tí yaon Pentecostés, ichro ch'án.

Nixjehę ch'ín Pablo tí sín t'etuenhen ninko chjasin Éfeso

17 Tí itjen ch'ín Pablo tí chjasin Mileto k'uíyehę ch'án tí sín t'etuenhen tí ninko chjasin Éfeso.

18 Ntá tió kui sín ntá ntáchro ch'án kixin:

—Tí jahará la ó nohará nkexrí kjuak'é la ko kjuákua desde tí yaon xrankíxín k'uinka estado Asia.

19 Ó nohará kixin kaín tí yaon k'uéjóni la kaín asenná kjuít'aha xra Ìnchéni la kjuíntahnkehya. Imá tsjanka kixin nchónhya kjuasótena kixin tjinkaon tí sín judío chrók'óyánna sín.

20 Janhan la kuitoahya kjuákua kaín tí nkehe jína t'ichjánxin tsonohará. Mé xíkaha kjuákua tió kójnkotsérá la ko xíkaha kjuíkjàkuaxian jnkojnko ntoará.

21 Kjuákoha kaín chojni judío la ko kaín chojni jehya judío kixin t'ichjánxin tsítóhe sín tí jie tjasin sín la ko tsitekaon sín Dios la ko Ìnchéni Jesucristo.

22 Ntá ijie sátsjiyá chjasin Jerusalén kixin Nchakuen Dios k'uetuanna la í nonahya nkehe tsonna ntiha.

23 Ntá jehó nòna kixin kaín chjasin ts'atsínka la chrónka Nchakuen Dios kixin tsjak'echjinana la ko tsjasótena.

24 Kaín tíha la tóxakonahya. Kjónté chrókjuasótexián la ninkehó sínkíhyana la janhan la chàna kixin tí xra chonta la chrókjuíntaxín la chrókjuíntaxiteyá tí xra chjina Ìnchéni Jesús kixin tsjækua tí tan jína nkexrí tjuèhe Dios chojni.

25 'Ntá jie ó nòna kixin tí jahará kjuákohará kjuachaxin kuènte Dios la nijnkorá ts'ikonhyará tí janhan ínaá.

26 Méxra tinhínrá ijie kixin í jehya jièna kixin jnkojínrá chrók'uitjýanrá.

27 Kixin ó kjuákua kaín tí nkehe tjinkaon Dios kixin tsonohará la í t'itjýanhya ninkehó.

28 Méxra xráxinkáonrá ts'ejorá jnkojína la ts'ayakonhénrá kaín tí sín tinkáchónki Ìnchéni kixin Nchakuen Dios mé tjáhará tí xra pastor kixin ts'ayakonhénrá tí sín kuènte tí ninkoe ch'án k'uenaxín ch'án tí ijnié ch'án.

29 Ó nòna tió sátsjia ntá itsji í so chojni éxí kolóbo jiehe tsotjinkaon sinchek'itjýan tí sín tinkáchónki Ìnchéni.

30 La ntá kjónté jahará la isorá tjejorá ntihi tsjankíxinrá tsjàkorá kjuach'ia chrínki chrókjuákohérá kíchuárá tí nkehe chaxín. A ntá tí sín tinkáchónki tsjichréhe sín tí nkehe ntoáhya.

31 Méxra chróxráxinkáonrá kixin chjina iní nánó kjuak'é kjuákohará nchakotjin la ko tie la kuitoahya kjuíntaxraxinkávan hasta kjuíncheníhi asenná nixjahará jnkojnko tí jahará.

32 'A nta jie la jahará kíchó ni tjetjáncháha Dios kixin t'ayakuanxínrá ch'án tí itén ch'án kixin tjuahará ch'án. Jehe ch'án imá chóna kjuachaxin tsjinkítsará ntá ts'ayéhérá kaín tí nkehe tjinkaon ch'án tsochjéhe ch'án kaín tí chojni tsíkótjóá.

³³ Janhan mé kjuakéhya asenná chichakoen chojni o iké jnkojín chojni.

³⁴ Náhi. Jahará ó nohará jína kixin janhan na mé tjaná kjuít'axián xra kjuácha k'uenaxín tí nkehe t'ichjánxinna la ko kjaxin tí nkehe t'ichjánxinhin tí chojni k'uejókian.

³⁵ Méxra kjuàkuaxínrá xikaha sich'erá xra kixin jína tsjínkĩtsará tí chojni chóntahya. Xráxinkáonrá kixin tsintáchro Ìnchéni Jesús kixin: “Antsí tsochéheni kixin tí nkehe chrókjuanjonni, a ntá kánhyó tsochéheni kixin tí nkehe chrók'uáyéheni.”

³⁶ Ntá kjuixin ntáchro ch'ín Pablo xikaha ntá jehe ch'an la ko kaín sin k'uéjoxin toch'in sín ntá nixjehe sín Dios.

³⁷ Ntá kaín sín tsjánka sín la ko kjóa sín ch'án la ko tséhe sín tja ch'an.

³⁸ Imá k'uává sín kixin chrónka ch'án kixin í ts'ikonhya sín ch'án inaá. Ntá sákjuíkotoxin sín ch'án nó tí tjen tí ntabárcø sátsjiko ch'án.

21

Sákjuí tí ch'ín Pablo nó chjasin Jerusalén

¹ A ntá tió kuítóheni tí sín kichó ni ntá k'uíxenhenni ntabárcø la ntá tuénxín sákjuíni estado Cos. Ntá tí yaon chr'éxin sákjuíni chjasin Rodas, ntá ntiha sákjuíni chjasin Pátara.

² Tí chjasin Pátara la mé ntiha k'uitjani ijnko ntabárcø sátsji nó estado Fenicia. Ntá k'uíxenhenni tí ntabárcø a ntá sákjuíni.

³ Ntá tió k'uátsínkani la k'uíkoni tí nonte Chipre itjani ikjon kuítóhe ntá k'uatsínkani estado Siria. Ntá tí ntabárcø la ts'atsínka tsítóhe tí nkehe tjínka tí puerto chjasin Tiro, la jeheni la nachrohe sákjuíni tí chjasin a.

⁴ Ntá ntiha k'uitjani tí sín tinkáchónki Ìnchéni a ntá ntiha kuítóhekoni sín yato yaon. A ntá jehe sín mé kjuínchenohe sín Nchakuen Dios chénka sín tí ch'ín Pablo kixin sáchrókjuihya ch'án chjasin Jerusalén.

⁵ Ntá kjuixin k'uátsínka tí yato yaon a ntá sákjuíxinni ntiha. La kaín tí sín tinkáchónki Ìnchéni la ko ichjién sín la ko xjeen sín sákjuíkotoxinni tí k'uaxrjentani ikon chjasin ntá sákjuíni chrínta ntayaon. K'uéjoxinni toch'inni nixjeheni Dios

⁶ ntá tuénxín nixjeheni sín jnkojína ntá tséhe tja kichó ni. Ntá k'uíxenhenni tí ntabárcø, a ntá jehe sín ikjan sín ntøe sín.

⁷ Ntahó chjasin Tiro kjuixixín tí k'uíxenhenni tí ntabárcø ntá kjuíjini chjasin Tolemaida. Ntiha kjuínixjeheni tí sín kichó ni tinkáchónki Ìnchéni. Ntá ntiha k'uéjókoni sín ijnko yaon.

⁸ Ntá tí yaon chr'éxin sákjuíxinni ntiha ntá kjuíjini chjasin Cesarea. Ntá ntiha sákjuíni ntøe ch'ín Felipe, ijnko ch'ín kjaxin tjako itén Ìnchéni. Jehe ch'án mé ijnko tí sín yatoxin tjinkĩtsa tí sín kjueyá Ìnchéni. A ntá jeheni mé kuítóheni ntiha.

⁹ Tí ch'ín Felipe a mé chónka ch'án noó xjeen ch'án chjin naxa tóteehya sín. Tí xjeen ch'án a mé chrónkaxín sín tí itén Dios.

¹⁰ Ntá ntaha k'uéjókoni sín itsjé yaon ntá ikjui ijnko ch'ín nixja itén Dios it'in Agabo, tsíkixín ch'án estado Judea.

¹¹ Ikjui ch'án kjuínixjehe ch'án tí jeheni la ntá kuákja ch'án tí tjoa t'ínkat'óxin ch'ín Pablo na ntá kjuínchentetoxín toté ch'án la ko itja ch'án ntá ntáchro ch'án kixin:

—Tí Nchakuen Dios mé ntáchro kixin mé xikaha chjasin Jerusalén tí sín judío sinchenteto sín ìnché tí tjoa sinchek'áyéhe sín ch'án tí sín jehya judío —ichro ch'án.

12 Ntá kjuixin kuínhinni tíha ntá jeheni la ko tí sín chjasin Cesarea chrónóeheni tí ch'ín Pablo kixin sáchrókjuihya ch'án tí chjasin Jerusalén.

13 Ntá kjuátehe ch'ín Pablo kixin:

—¿Nkekuènté tsjankará la ko nkekuènté nchek'áváráni? Janhan na chrakonhya kjónté jehya tí sinchentetona sín ó. Náhí. Kjónté kjaxin chrók'uénxian chjasin Jerusalén tí tinkáchónkia Ìnchéni —ichro ch'án.

14 Ntá kjuachahyani nixjeheni ch'án ntá kuítóhene ch'án. Ntáchroni kixin:

—Tí nkehe tjinkaon Ìnchéni mé tsonhen —ichroni.

15 Ntá kjuixin tíha ntá kóyaxínhinni ntá sákjuíni nó chjasin Jerusalén.

16 Ntá sákjuíkoni iso tí sín tinkáchónki Ìnchéni tsíkjixin chjasin Cesarea. Sákjuíkoni sín ntóe ijnko ch'ín tsíkjixin Chipre it'in ch'án Mnasón. Jehe ch'án mé ósé tinkáchónki ch'án Ìnchéni. Ntá kjuanjon ch'án nketí kuítóhene.

Ch'ín Pablo sákjuítsjehe tí ch'ín Jacobo

17 Tió kjuíjini chjasin Jerusalén ntá tí sín kíchó ni tinkáchónki Ìnchéni mé kjuanjon sín kjuachaxin k'uéjóni la chéhe sín.

18 Ntá tí yaon chr'éxin ch'ín Pablo sákjuíkoni ch'án kjuítsjeheni ch'ín Jacobo la ntaha tjejó kaín tí sín t'etóan kuènte nínko.

19 Ntá ch'ín Pablo kjuixin nixjehe ch'án sín ntá tuénxín chrónka ch'án kaín tí xra kjuích'e Dios tió kjuakohe ch'án tí sín jehya sín judío.

20 Tió kuínhin sín ntá kjuanchehe sín kjuasáyé Dios, a ntá ntáche sín ch'ín Pablo kixin:

—Kíchóni, jaha k'uíquuan kixin síin itsjé mil sín judío ó kuinkáchónki sín Jesús kjánchó kaín sín ntáchro sín kixin t'ichjánxin tsítóehyani tí ley.

21 Ntá tsikinhin sín kixin jaha mé tsíkjakohé tí sín judío tjejó chjasin ókjé kixin t'ichjánxienhya sinchexiteyéhe sín tí nkehe k'uetóan ch'ín Moisés. La kjaxin kuínhin sín kixin jaha tsíkjakohé sín kixin tí xjeen sín t'ichjánxienhya itsa sín tí xroye la ko t'ichjánxienhya tinkáchónki sín éxí k'uékinkáchónkini ósé.

22 ¿Ntá nkehe chrókjuich'eni? Kixin tió tsinhin sín kixin kjuihá la tsojnkotsé nchónhya sín.

23 Méxra íchá jína jaha sinchexiteyá tíhi. Ntihi tjejó noó sín t'ichjánxin sinchexiteyá sín tí nkehe chénka sín Dios.

24 Jaha sáchrókjuíkoa sín la chrókótjóá jaha la ko jehe sín. La ko kjaxin chrókjuènka tsokjín sín ntá tsonoexín tí sín judío kixin chaxínhya tí nkehe tsikinhin sín la ko tsonoexín sín kixin kjaxian jaha nchexiteyéhe tí ley.

25 A ntá tí sín jehya judío tsíkitekaoon Ìnchéni la ikjinni ijnko xroon ó chr'énhenni sín. K'uetuènhenni sín kixin sinehya sín tí nto tsíkjokehe chojni tí nkehe tsíkjanoya, la ko kjaxin sinehya sín jni, la ko sinehya sín tí nto tsíchrínjinhya isin va, la ko chróchóntahya sín í jnko chojni chjin ókjé —ichro sín.

Tséxin sín tí ch'ín Pablo tí nínko

26 Ntá ch'ín Pablo sákjuíko ch'án tí noó sín la ntá tí yaon chr'éxin kjuínchetjóá asén sín. Ntá kjuixin ntá k'uixenhen ch'án tí nínko kixin tsochrónka ch'án kixin ó kjuixin kjuínchexiteyá ch'an tí nkehe k'uítuenhen ch'án. Tíhi mé t'axrxjén kixin jnkoinko sín tsjikao sín nkehe tsjanjon sín.

27 Ó chjina chróxétja tí yato yaon ntá iso tí sín judío tsíkjixin estado Asia mé tsík'ikon sín ch'ín Pablo nkaxenhen tí nínko. Ntá kjuínchekóninkaon sín kaín chojni chjasin ntiha ntá itsé sín tí ch'ín Pablo.

28 Ntá k'uèya sín ntáchro sín kixin:

—Kaínrá chojni chjasin Israel tsjínkĩsaráni kixin tsotséni tí ch'ín i. Jehe ch'án mé ixri nkuíxín xritjakohē ch'án chojni nkehe jehya jína kuènte chjasénni, la ko titekakonhya ch'án tí ley kuènte Moisés, la ko titekakonhya ch'án ninkoeni. A ntá ijie la tsík'ixenko ch'án iso sín griego la kjuínchekjĩta sín nkaxenhen tí ninko tjóá —ichro sín.

²⁹ Mé xikaha ichro sín kixin tsík'ikon sín senó kixin chjasén sín mé xriko ch'ín Pablo tí ch'ín Trófimo tsíkjixín chjasín Éfeso. Kjuénkayáxin sín kixin ch'ín Pablo la kjá tsíkjiko ch'án tí ch'ín a nkaxenhen ninko.

³⁰ Ntá kuenté tí chjasin a kónínkaon sín la ntá kaín tí chojni kuinká sín ikui sín ntá itsé sín tí ch'ín Pablo. Ntá kuinkánkákjenzín sín ch'án nkaxenhen ninko la kuakitsje sín ch'án ntója ntá tuénxín k'uíkjehe sín tí puerta ninko.

³¹ Ntá tjinkaon sín chrók'óyán sín ch'án ntá ijnko ch'ín comandante k'uetuēnhen itsjé tí sín soldado romano kuínhin ch'án kixin kuenté tí chjasin Jerusalén k'uixité nínkaon sín.

³² Ntá tí ch'ín comandante sákjuíko ch'án iso sín soldado la ko tí sín k'uetuēnhen tí soldado a la kuinká sín sákjuí sín tí siín tí chojni. Ntá tió k'uíkon tí sín a kixin ó kjuíji tí ch'ín comandante la ko tí sín soldado a ntá kuítōhe sín, í kjuatehya sín ch'ín Pablo.

³³ Ntá tí ch'ín comandante kóchjina ch'án la itsé ch'án tí ch'ín Pablo. Ntá k'uetōan ch'án kixin tí sín soldado sinchentetoxín sín tí ch'ín Pablo yaá chica cadena. Ntá chr'éxin kjuanchankíhi ch'án sín kixin nkexro tí jehe ch'ín Pablo la ko nkehe tí kjuích'e ch'án.

³⁴ A ntá tí chojni tsíkójnkotsé la ijnko sín k'óyako ijnko nkehe la í so sín la ókjé nkehe. A ntá tí ch'ín comandante la tienxínhya ch'án nkekuènte xikaha kjuích'e sín kixin k'uixité sín. Ntá k'uetōan ch'án kixin tí sín soldado sátsjiko sín tí ch'ín Pablo tí cuartel siín tí sín soldado.

³⁵ La ntá tió kjuíjiko sín ch'án tí t'it'ótjenzín sín tí nchia a ntá t'ichjánxin kuámá sín tí ch'ín Pablo kixin tí chojni tjinkaon sín chrókjuate sín ch'án kixin nínkaon sín.

³⁶ Kaín tí chojni chréhe nóton t'èya sín ntáchro sín kixin:

—Chrók'uen ch'án —ichro sín.

Ch'ín Pablo chrónka nkayakon chojni kixin chóntahya ch'án jie

³⁷ Ntá tió sáchrókjuíko sín ch'ín Pablo tí nkaxenhen tí cuartel kuènte tí sín soldado a ntá kjuanchankíhi ch'ín Pablo tí ch'ín comandante ntáchro ch'án kixin:

—¿Á jína tsonixjahani jaha intsí? —ichro ch'án.

Ntá kjuátēhe tí ch'ín comandante ntáchro ch'án kixin:

—¿Jaha la á noha nixja griego?

³⁸ Méxra ¿á jehya jaha tí chojni tsíkjixín Egipto kjuínchenínkaon chojni la ko sákjuíko nteje tí noó mil chojni tsíkjàya? —ichro ch'án.

³⁹ Ntá kjuátēhe ch'ín Pablo ntáchro ch'án kixin:

—Náhí, janhan mé ijnko chojni judío. Tsíkokjínaxián chjasin Tarso, estado Cilicia. Janhan me ijnko chojni tsíkjixín ijnko chjasin imá tjetōan. A ntá ijie xrjannóaha kixin tsjánjuan kjuachaxín tsonixjahá tí chojni —ichro ch'án.

⁴⁰ Ntá tí ch'ín comandante kjuanjon kjuachaxín ntá ch'ín Pablo kjuák'exín toté ch'án tí tjen escalera ntá tja ch'án ó kjuakoxín ch'án kixin tsótání sín. Ntá tání sín ntá kjuankíxin nixjaxín ch'án nkiva hebreo. Ntáchro ch'án kixin:

22

¹ —Jahará kichó ni la ko chojni it'é xjan tinhínrá nkehe tí tsoxrjanka kixin chontahya jie —ichro ch'án.

² Ntá kuínhin sín kixin nixjaxin ch'án nkiva hebreo ntá antsí má tání sín. Ntá ntáchro ch'ín Pablo inaá kixin:

³ —Janhan mé ijnko chojni judío tsíkokjínaxián chjasin Tarso estado Cilicia. K'uankíxian ntihi chjasin Jerusalén la kjuintakuáxian tí nkehe kjuako tí ch'ín Gamaliel la títekanan tí ley tsíkinkáchónkí tí sín tsík'axrjeníxinni ósé. Tjínkavan chrókjuít'aha Dios xra kaín asenná éxí tjinkáonrá jahará ch'era tí yaon ijie.

⁴ Ti senó k'uénínkakonhan chrók'oyán tí sín tinkáchónki Ìnchéni kjuintanteto chojni ntoa la ko chojni chjin kixin chrók'uejóhina sín.

⁵ A ntá tí sín nchat'á t'etəan la ko kaín tí sín táda t'ayakonhen ninko la mé nohe sín kaín tíha kixin jehe sín mé kjuanjon sín xroon ts'áyéhe tí sín kichó ni judío tjejó chjasin Damasco. Ntá sákjuia nó ntiha kixin chrókjuíkjéyá tí sín tinkáchónki Ìnchéni kixin chrótse sín ntá chrókjuíkian sín ntihi Jerusalén chrokjuasóte sín.

Ch'ín Pablo chrónka nkexrí kjuankíxin tinkáchónkí ch'án Ìnchéni (Hch. 9.1—9; 26.12—18)

⁶ 'A ntá tió kjuasán chjina chjasin Damasco chjina chonkíxin ntá xrínahya k'uinkáséyan jnkontatjén tí tjén ijnko xrohi imá t'inkaséyan kuixin nkajni.

⁷ Ntá kjuachr'ítsinka nonte ntá tuénxín kuínhan itén ijnko nkexro nixjana ntáchro kixin: “Saulo, Saulo, ¿nkekuèté ninkákonna xritjéyá tí janhan?”

⁸ Ntá kjuánchánkiá kixin: “¿Xá nkexro jaha?” Ntá kjuátehe ch'án ntáchro ch'án kixin: “Janhan mé tí nkexro Jesús tsíkjixin chjasin Nazaret, mé tí nkexro xritjéyá.”

⁹ La ntá tí sín k'uájikian mé k'uíkon sín tí xrohi la chrakon sín kjánchó kuínhaya sín itén tí nkexro nixjana.

¹⁰ Ntá kjuánchánkiá kixin: “¿Xá nkehe tsonhen tjinkávan sit'aha jaha?” Ntá kjuátehe ch'án ntáchro kixin: “T'aya sátjia t'ixenhén chjasin Damasco ntá ntiha tsochrónka sín kaín nkehe sich'e.”

¹¹ Ntá tí xrohi a mé k'uixenka ikuan ntá í xitjahya t'íkuan. Ntá tí sín chríkjan mé kuinkátséna sín sákjuíkian sín chjasin Damasco.

¹² 'Ntá ntaha kjuák'e ijnko ch'ín it'in Ananías ijnko chojni jina kjuínchexiteyéhe ch'án tí ley kuènte ch'ín Moisés. Kaín tí sín judío siín chjasin Damasco tjikosáyehe sín tí jehe ch'án.

¹³ Ntá ch'ín Ananías mé kuitsjehe ch'án tí janhan ntá tió kui ch'án ntáchro ch'án kixin: “Kichóni Saulo, ijie la ts'ayéhé kjuachaxin ts'ikuan inaá.” Ntá ó jina t'íkuan.

¹⁴ Ntá tuénxín ntáchro ch'án inaá kixin: “Tí Dios kuinkáchónki tí sín tsík'axrjeníxinni la ó tsíkjeyá ch'án tí jaha kixin tsonoha nkehe tjinkaon ch'án la ko kixin ts'ikuan tí nkexro jina la ko tsinhín tan k'uaxrjexín ir'va ch'án.

¹⁵ Jaha mé tsochrónka tí nkehe k'uíkuan la ko tí nkehe kuínhín tsinhin kaín tí chojni chjasintajni.

¹⁶ A ntá jie la í choénhaya má. T'aya la tsikitiaxián ihnié Ìnchéni kixin mé ts'ímáxin ijia,” ichro ch'ín Ananías.

Pablo chrónka kixin Dios ichr'án ch'án tsjakohe tí sín jehya sín judío

¹⁷ 'Na ntá tió xíkjan chjasin Jerusalén ntá sákjuia ninko tsonixjaha Dios ntá titàya k'uíkuèn

¹⁸ Ìnchéni ntáchro ch'án kixin: “Tjoka ts'axrjéxian chjasin Jerusalén kixin tsitekakuenhaya sín tí nkehe tjákua mé tí tan kuéntana.”

¹⁹ Ntá janhan ntátjan ch'án kixin: “Ìnchéni, jehe sín ó nohe sín kixin senó k'uék'atsínka kaín tí ninko la k'uétse tí sín tinkáchónki tí jaha la sákjuíkian sín ntoechiso k'uékon sín.

20 Tió k'óyán sín tí ch'ín Esteban tí nkexro k'uékjit'aha xra, k'uénixja tí tan kuènta ntá janhan kjaxin tjéntaxián ntiha la janhan ntáxrjan kixin ó nchoxon its'en ch'án la k'uáyakonhan tí iké tí sín kjuàya.”

21 Ntá Ìnchéni xínixja inaá, ntáchro ch'án kixin: “Tétuanhan jaha kixin sátsjia chjasin kjín kixin tsjákohé tí chojni jehya judío.”

Ntá tí ch'ín comandante k'uáyéhe tí ch'ín Pablo kixin tsjasóte ch'án

22 Ntá tí sín tsíkójnkotsé mé kuínhin sín kaín tíha ntá kjuankixin k'uèya sín ntáchro sín kixin:

—Its'en ch'án, í tsjak'echónhya ch'án —ichro sín.

23 Naxa t'ixratáhya sín t'óyako sín ntá tótsjénka sín iké sín la ko kuákja sín nche it'e sín.

24 Ntá tí ch'ín comandante mé k'uētuenhen ch'án tí sín soldado a kixin sátsjiko sín ch'ín Pablo nkaxenhen tí cuartel kuènte sín. Ntá ntiha k'uētoan ch'án kixin tsjatexín sín ch'án chikoté ntá tsonoexín tí ch'ín comandante nkekuènte imá t'óyako sín nínkakohen sín tí jehe ch'án.

25 Ntá kjuixin kjuínchenteto sín ch'án kixin tsjate sín ch'án ntá nixjehe ch'ín Pablo ijnko ch'ín capitán itjen ntiha ntáchro ch'án kixin:

—¿Á chontará kjuachaxin tsjaterá ijnko chojni romano, kixin naxa kjuéyáhyará nkerí jie chonta? —ichro ch'án.

26 Tió kjuixin kuínhin tí ch'ín capitán ntá sákjuíchénta ch'án tí ch'ín comandante ntáchro ch'án kixin:

—¿Nkehe sich'e jaha kixin tí nkexro i mé ijnko chojni romano?

27 Ntá tí ch'ín comandante mé kóchjinehe ch'án tí ch'ín Pablo la kjuanchankí ch'án, ntáchro ch'án kixin:

—¿Á jaha chaxín chojni romano? —ichro ch'án.

Ntá kjuátehe ch'ín Pablo kixin chaxín jehe ch'án.

28 Ntá ntáchro tí ch'ín comandante kixin:

—¿A ntá nkexrí kixin janhan nchónhya chichaon kjuènká kixin ts'ónana chojni romano?

A ntá ntáchro ch'ín Pablo kixin:

—Janhan na chojni ntiha tsíkókjínaxián.

29 Na ntá tí sín soldado chrókjuate ch'ín Pablo mé kuínhin sín kixin ch'ín Pablo ijnko chojni romano ntá kuítóhe sín ch'án sákjuí sín ókjé. Ntá tí ch'ín comandante a mé kónohe ch'án kixin tí ch'ín Pablo a mé ijnko chojni romano ch'án chaxín. Ntá chrakon ch'án kixin tsíkjinchenteto ch'án.

Ch'ín Pablo nixjehe ch'án tí sín t'etoan kuènte tí sín judío

30 A ntá tí kóyāon ntá tí ch'ín comandante a mé tjinkaon ch'án tsonohe ch'án nkehe tí jie chrók'ueka tí sín judío tí ch'ín Pablo. Ntá kjuasintanká ch'án chica cadena tsíchróntetoxín tja tí ch'ín Pablo ntá k'uētoan ch'án kixin tsojnkotsé kaín tí nchat'á t'etoan la ko tí sín t'etoan kuènte sín judío, a ntá kuakitsje ch'án tí ch'ín Pablo la kjuak'e ch'án jnkosiné tí siín tí jehe sín.

23

1 Ntá ch'ín Pablo komá tí sín t'etoan kuènte sín judío ntá ntáchro ch'án kixin: —Kíchóni, tí k'uékjak'é hasta ijie la Dios tjetsjehe kixin ijnko kjuaxrexinkaon jina chonta —ichro ch'án.

2 Ntá tí ch'ín Ananías tí ch'ín nchat'á t'etoan mé k'uētuenhen ch'án tí sín chjino tjejó tí tjen ch'ín Pablo tsochjéhe sín ir'va ch'án.

3 Ntá kjuátehe ch'ín Pablo kixin:

—Dios mé sinchekjasóte ti jaha kixin ntoáhya kjuich'e. Tjetjaxian méhe kixin tsjéyá nkehe tí jie chonta éxí nixja tí ley. A ntá ¿nkekuènte kuítekákonhya tí ley, la kuétoan kixin ts'ékonna? —ichro ch'án.

⁴ A ntá tí sín síin ntiha ntáchro sín kixin:

—¿Á xikaha ts'antaxínhín tí nchat'á t'etōan kuènte Dios?

⁵ Ntá kjuátehe ch'ín Pablo ntáchro ch'án kixin:

—Kíchóni, kjuatsōanhya janhan kixin jehe ch'án mé tí nchat'á t'etōan. Ntáchro tí xroon itén Dios kixin: “Chrók'uantaxíenhya tí chojni t'etuenhen chjasán”^{*} —ichro ch'án.

⁶ Ntá ch'ín Pablo mé kónohe ch'án kixin iso chojni síin ntiha mé chojni kuènte partido saduceo, ntá í so sín a mé kuènte partido fariseo. Ntá itsen k'uèya ch'ín Pablo, ntáchro ch'án kixin:

—Kíchóni, janhan mé ijnko chojni fariseo la tí sín kjéhyana mé fariseo kjaxin. Jahará mé tjéyará nkehe tí jie chonta kixin janhan mé tinkachónkia kixin tsoxechón chojni tsík'en.

⁷ Ntá kjuixin ntáchro ch'án tíha ntá tí sín fariseo la ko tí sín saduceo mé kjuankixin sín ikjo kichó sín ntá xikaha jnkokónhya kjuenkayáxin tí sín tsíkójnkotsé ntiha.

⁸ Kixin tí sín saduceo a mé ntáchro sín kixin tsoxechónhya chojni tsík'en la ko kjaxin kohya sín ángel la ko kohya nchakuen. A ntá tí sín fariseo la titekaon sín káin tí nkehe a.

⁹ Ntá káin sín k'uèya sín la ntá iso tí sín maestro tjako ley kuènte sín fariseo mé k'uínkatjen sín ntáchro sín kixin:

—Tí ch'ín i, kohya ninkehó nkehe jínahya kjuich'e ch'án. Ách'e ijnko nchakuen chojni o ijnko ángel mé nixjehe ch'án —ichro tí sín fariseo.

¹⁰ Ntá imá sítjité sín nínkaon sín. Ntá tí ch'ín comandante a mé tóxakonhen ch'án kixin chrókjuinchekuen sín tí ch'ín Pablo ntá k'uetuenhen ch'án tí sín soldado a kixin sátsjikakjín sín ch'án la tsíkao sín ch'án inaá tí cuartel kuènte tí sín soldado.

¹¹ A ntá tí tie a na ntá xrínahya titàya k'uíkuèn ch'ín Pablo Ìnchéni nixja ch'án, ntáchro kixin:

—Chrakonhya Pablo kixin éxí chroonka tanná chjasin Jerusalén la mé xikaha tsochroonka chjasin Roma.

Kjuenkayáxin sín chrók'óyán sín tí ch'ín Pablo

¹² Ntá tí yaon chr'éxin a ntá iso tí sín judío a mé kjuenkayáxin sín kixin ts'óyán sín tí ch'ín Pablo. Ntá k'uákjexin sín ihnié Dios chaxín tsoxiteyá la sinehya sín la ko ts'ihya sín ninkehó tí naxa ts'óyánhya sín ch'án.

¹³ Chjina cuarenta sín kjuenkayáxin sín kixin xikaha sich'e sín.

¹⁴ Ntá sákjuíchenka sín tí sín nchat'á t'etōan la ko tí sín t'etuenhen kuènte tí sín judío la ntáche sín kixin:

—K'uákjexinni ihnié Dios kixin chaxín tsoxiteyá kixin í sinehyani ninkehó tí naxa ts'óyánhyani tí ch'ín Pablo.

¹⁵ Méxra ntá jahará la ko í so ti sín t'etuenhen tí sín judío tsontácherá tí ch'ín comandante a kixin tsjikao sín tí ch'ín Pablo ntihi tí tjejorá ntóye nchítjen kixin antsí má tsjanchankihirá ch'án nkehe siná á chaxín tí jie t'íká ch'án. A ntá jeheni senó ts'ejóchónhenni tí tsjixin ch'án ntá ts'óyanni ch'án kixin í tsjihya ch'án ntihi —ichro sín.

¹⁶ Ntá tí xjeen tí kjave tí ch'ín Pablo a mé tsíkinhin ch'án nkehe tí tjo tí sín a. Ntá sákjuí ch'án k'uixenhen ch'án cuartel kuènte tí sín soldado kixin tsochroonka ch'án nkehe tí tjo sín kuínhin ch'án.

* 23:5 Éxodo 22.28

17 La ntá ch'ín Pablo mé k'uíyehē ch'án ijnko tí sín capitán la ntáchro ch'án kixin:

—Sátsjikoa tí ch'ín ntasoá ti tjen tí ch'ín comandante kixin tjinkaon ch'án tsochrónka ch'án nkehe —ichro ch'án.

18 Ntá tí ch'ín capitán a mé sákjuíko ch'án ti tjen tí ch'ín comandante ntá ntáchro tí ch'ín capitán a kixin:

—A ntá tí ch'ín Pablo tjechjina mé k'uíyehēni ch'án kixin tsjikaoni tí ch'ín ntasoá ntihi kixin tjinkaon ch'án tsonixjaha jaha —ichro ch'án.

19 Ntá tí ch'ín comandante a mé tséhe ch'án itja tí ch'ín ntasoá a ntá k'uaxrjentako ch'án jehó ch'án ntá kjuanchankíhi ch'án kixin:

—¿Nkehe tí tjinkávan tsochrónka? —ichro ch'án.

20 Ntá ntáchro tí ch'ín ntasoá a kixin:

—Iso tí sín judío mé kjuenkayáxin sín kixin tsjanchaha sín kixin ntóye nchítjen sátsjikoa ch'ín Pablo tí tsojnkotsé tí sín judío t'etōan. Sit'ayaha sín tsontáchro sín kixin tjinkaon sín tsjanchankíhi sín ch'ín Pablo tí nkehe antsí má xra.

21 A ntá jaha la chrókuítekákonhya kixin chjina cuarenta chojni tjejóchónhen sín imó la k'uákjenxin sín ihnié Dios kixin sinehya sín la ko ts'ihya sín ninkehó tsjixinjian its'en ch'ín Pablo. Ntá ijie tjejóchónhen sín tsonhe sín nkehe tsixrua jaha —ichro ch'án.

22 A ntá tí ch'ín comandante a mé nixjehē ch'án tí tí ch'ín ntasoá la k'uētoan ch'án kixin:

—Tsochenkahya ninkexró kixin xíkaha kjuíchrónka —ichro ch'án.

Ichr'án sín tí ch'ín Pablo tí itjen tí ch'ín gobernador Félix

23 Ntá tí ch'ín comandante a mé k'uíyehē ch'án yaá tí sín capitán a ntá k'uētoan ch'án kixin tsoyaxínhin sín sátsjiko sín iyó ciento sín soldado sátsjixin toté la ko setenta tí sín tsjiták'á kokate la ko iyó ciento soldado sátsjiko chica lanza, ntá las nueve tie sátsji sín chjasin Cesarea, ichro ch'án.

24 La ko k'uítuenhen sín sinchekamá sín kokate tsjiták'á ch'ín Pablo la ts'ayakonhen sín ch'án jina kixin kohya nkehe tsonhen kixin tsjiji ch'án tí tjen ch'ín Félix, tí ch'ín gobernador.

25 Ntá tí ch'ín comandante ikjin ch'án ijnko xroon a, ntáchro kixin:

26 “Janhan mé tí ch'ín Claudio Lisias chr'anhan ijnko xroon kixin jaha ch'ín Félix ijnko gobernador jina, nixjaha.

27 Tí sín judío a mé itsé sín tí ch'ín i kixin chrók'óyán sín ch'án. Ntá tió kónona kixin ijnko chojni romano tí jehe ch'án la ntá sákjuíkian sín soldado kjuintakaá ch'án.

28 Tjínkavan tsonona nkekuente kixin nínkakohen sín ch'án. Ntá sákjuíkian ch'án tí tsíkójkotsé tí sín judío.

29 Ntá kónoxín kixin nínkakuenxín sín ch'án kixin tí ley kuente sín kjuínchexiteyáhya ch'án, ichro sín. Jehya jie jie tsíkjasin ch'án kixin chrók'óyán sín ch'án o chrókjuak'echjina sín ch'án.

30 Ntá ó kuñhan kixin tí sín judío a mé chrók'óyán sín ch'án. Ntá méxra jie ichr'an ch'án tí tjen jaha la ko kjaxin kjuáncháha tí sín a kixin chrókjuiji sín tí tjen jaha chrókjuá sín kixin nkekuente nínkakohen sín ch'án. Kjuasáyá. Ó tjen.”

31 Ntá tí sín soldado a mé kjuínchexiteyá sín éxí k'uítuenhen sín a ntá sákjuíko sín tí ch'ín Pablo tí tie a chjasin Antípatris.

32 Ntá tí yaon chr'éxin tí sín soldado xrixín toté ó a mé xíkjan sín tí cuartel kuente sín. Ntá tí sín k'uéjókjen kokate a mé naxa sákjuíko sín tí ch'ín Pablo.

³³ Ntá tió kjuíji sín tí chjasin Cesarea ntá tí sín soldado a mé kjuanjon sín tí xroon a chjéhe sín tí ch'ín gobernador la ko kjaxin kjuínchek'áyéhe sín ch'án tí ch'ín Pablo.

³⁴ Ntá kjuixin kjuínchekuáxin tí ch'ín gobernador a tí xroon ntá kjuanchankí ch'án nketí chjasén ch'ín Pablo. La ntá kónohe ch'án kixin estado Cilicia tsíkjiixin tí ch'ín a.

³⁵ Ntá ntáchro ch'án kixin:

—Ntá tsinhan nkehe tsixro tí sín itsji ts'eka jie.

Ntá k'uetuēnen ch'án tí sín soldado a kixin ts'áyakonhen sín tí ch'ín Pablo tí nchia kuēnte ch'ín Herodes.

24

Ch'ín Pablo nixjehe ch'án ch'ín Félix chrónka ch'án kixin kjuasinhya ch'án jie

¹ Ntá k'uátsínka in'ó yaon, ntá ch'ín Ananías, tí nchat'á imá t'etoan, kjuíji ch'án chjasin Cesarea. Kjaxin kuikao ch'án iso tí sín t'etoan kuēnte nínko a la ko ijnko ch'ín abogado it'in Tértulo. Tí ch'ín a mé tsonixjehe tí ch'ín gobernador kixin tsjanchia sín jie kuēnte ch'ín Pablo.

² Ntá tió kuikao tí sín soldado tí ch'ín Pablo ntiha ntá tí ch'ín Tértulo kjuankixin ch'án nixjehe ch'án tí ch'ín Félix ntáchro ch'án kixin:

—Kjuasáyá jaha gobernador kixin imá kjuínkítsa kixin kjuaxróxin tjejóni la kjuasáyá kixin imá noha kjuíncheyóxian tí nación kuēnteni.

³ Kjuasáyá jaha Félix. Imá jína jaha kixin k'uáyéheni kaín tíha.

⁴ Tjínkakhonhya sintak'itjáyahan nchónhya tiempo la xrjanóaha kixin chrókuak'é chrókuinhín intsikoá tí nkehe tsoxrjanka.

⁵ A ntá ijie ó k'uitjani kixin tí ch'ín i mé éxí ijnko chin t'óxíka kuenté chjasintajni kixin ch'iyehé ch'án tí sín judío ntá xíka sín. Jehé ch'án mé t'etoan ch'án tí sín tinkáchónki tí ch'ín tsíkjiixin chjasin Nazaret.

⁶ Jehé ch'án mé kjaxin chrókjuinchekjita ch'án tí nínko. A ntá itséni ch'án ntá chrókjuinchekitoxinni tí ijie ch'án éxí t'etoan tí ley kuēnteni.

⁷ A ntá tí ch'ín comandante Lisias kjuixrónkáxin ch'án kuikao ch'án nchónhya sín soldado la kuakítsje sín tí ch'ín Pablo.

⁸ Ntá k'uetōan ch'án kixin tí sín tjanchia jie chrókuitsjehe sín tí jaha kixin jaha chrókjuanchankíhí ch'án kixin chrókónoha jína nkexéhe tí jie chrókjuinchekjasótéxín sín ch'án —ichro tí ch'ín Tértulo.

⁹ Ntá ntáchro kaín tí sín judío siín ntiha kixin:

—Kaín tíha la chaxín —ichro sín.

¹⁰ Ntá tí ch'ín gobernador a mé kjuakoxin tja ch'án kixin tsonixja tí ch'ín Pablo a. Ntá ntáchro ch'ín Pablo kixin:

—Chéheni kixin tsonixjahani tsochrónkani kixin kohya jie kjuasinni kixin ó noheni kixin jaha la juez kuēnte tí nación ntihi la nchónhya nánó tētoan.

¹¹ Jaha la kjaxin ó chrókónoha kixin na ntá teyó yaon kjuíjini chjasin Jerusalén kixin ntaha tsoxráxinkakhonxinni Dios.

¹² Kónoxínhya kixin nijnko nkexro chrókjuachaxinni, la ko kjuínchexakuenhyani ninkexró nínko la ko ni tí nínko ntsí la ko ninketó chjasin.

¹³ Tí sín i la xitjahya tsontáchro sín kixin xikaha tí jie kjuasinni.

¹⁴ Janhan chaxín xrjanka kixin t'aha xra tí Dios k'uékinkáchónki tí sín tsík'axrjeníxinni mé yóhe tí ntia nixin. A ntá jehe sín ntáchro sín kixin ókjé nkehe tinkáchónkini. Kjánchó janhan mé tinkáchónkia kaín tí nkehe tsíkjin sín tí xroon kuēnte ley la ko tinkáchónkia kaín tí nkehe k'uénixja tí sín k'uéchrónka itén Dios.

¹⁵ Kjaxín tinkachónkia tí Dios tinkáchónki tí jehe sín kixin tjechõnhan kixin Dios sinchexechón kaín chojni jína la ko kaín chojni jínahya kjaxin.

¹⁶ Méxra tókakonna kixin tjóá chrókjuak'é kixin chrókjuanchahya Dios jie la ko kjaxin chojni chrókjuanchahya jie.

¹⁷ 'Nta kjuixin k'uatsínka iso nánó ixrini ókjé ntá kjuíjini chjasénni kixin tsjanjonni chichaon la ko kjaxin tsochjeheni Dios nkehe.

¹⁸ Méxra mé xikaha tjenni nkaxenhen nínko nta iso sín judío tsíkjixin estado Asia ó xetani ntiha. Ntá kjuínchetjóáni asénni la tsjehya chojni k'uikon la kohya chojni kjuánjonkoni.

¹⁹ A ntá tí sín a mé t'ichjánxin chrókui sín ntihi kixin chrókjuanchia sín jie tí nínkakonna sín.

²⁰ A ntá tí náhi la tí sín tjejó ntihi chróchrónka sín kixin nkehe tí jie k'uitjaxin sín tió kjuák'eni tí tjejó tí sín t'etõan kuènte tí sín judío.

²¹ Kjá tí tsontáchro sín kixin náxrjónhya ijnko nkehe itsen k'uèya ntáxrjan kixin: “Ijie sinchekitoexinrá jiëna kixin sinchekjasótenará kixin janhan tinkachónkia kixin tsoxechón chojni tsik'en” —ichro ch'án.

²² Ntá kjuixin kuínhin tí ch'ín Félix, la jehe ch'án jína kónohe ch'án kixin nkexrí tí ntia nixin. Ntá kjuínchekitoexínhya ch'án ijie ch'ín Pablo. Ntáchro ch'án kixin:

—Tsjijia tí ch'ín comandante Lisias ntá tsochrónka ch'án nkekuènte tí jie tjanchiará ntá tsonõna —ichro ch'án.

²³ Ntá k'uetuënen ch'án ijnko ch'ín capitán kixin ts'ayakonhen ch'án ch'ín Pablo kjánchó tsítóhe sín ch'án intsí la ko tsítóhe sín ts'ixenhen tí sín chóxin ch'án, tsjitsjehe sín ch'án.

²⁴ Ntá iso yaon chr'éxin ntá kjuíjiko ch'ín Félix tjan Drusila ichjién ch'án, mé ijnko tjan judía. Ntá k'uetõan ch'án kixin tsjik'íyehë sín tí ch'ín Pablo kixin tsochrónka ch'án nkexrí tinkáchónki chojni Jesucristo.

²⁵ A ntá ch'ín Pablo mé kjuako ch'án kixin nkexrí ts'ejó chojni jína la ko nkexrí ts'etuënen chojni asén sín kixin ch'ehya sín tí jínahya la ko nkexrí Dios sinchekitoexín ijie chojni tí tsjixixín. Ntá ch'ín Félix kuínhin ch'án xikaha ntá chrakon ch'án, ntáchro ch'án kixin:

—A ntá jie la sátjia. Ntá ts'iyaha tió chonta tiempo —ichro ch'án.

²⁶ A nta ch'ín Félix tjechónhen ch'án kixin kjá ch'ín Pablo tsjanjon ch'án chichaon ntá tsjanjon ch'án kjuachaxin sátsji ch'án. Ntá jnkoyaxón k'uíyehë ch'án tí ch'ín Pablo kixin tsonixjehë ch'án.

²⁷ Ntá xikahó kónhen hasta k'uátsínka iyó nánó ntá tí ch'ín Félix kuítóhe ch'án tí xra gobernador la ntá í jnko ch'ín it'in Porcio Festo mé k'uixenhen ch'án tí xra a inaá. A ntá ch'ín Félix mé kuítóhe ch'án tí ch'ín Pablo tjechjina ch'án kixin tjinkaon ch'án chrókjuinchexiteyá ch'án tí nkehe tjinkaon tí sín judío.

25

Ch'ín Pablo nkayakon tí ch'ín Festo

¹ Ntá tí ch'ín Festo kjuíji ch'án ntiha kixin ts'ixenhen ch'án tí xra gobernador. Ntá iní yaon chr'éxin ntá sákjuixin ch'án chjasin Cesarea la kjuíji ch'án chjasin Jerusalén.

² Ntiha tí sín nchat'á t'etõan la ko tí sín judío imá tjetoan mé kjuanchia sín kixin tsjasóte ch'ín Pablo.

³ Kjuanchia sín kixin xra ó chrók'uetõan ch'án kixin chrókjuí ch'ín Pablo ntiha chjasin Jerusalén. Kixin jehe sín ó tsíkjenkayáxin sín kixin tsochr'án sín iso chojni tsochónhen tí ntia ts'óyán sín tí ch'ín Pablo.

⁴ Kjánchó ch'ín Festo kjuátehe ch'an ntáchro ch'án kixin ó tsíkjenkayáxin ch'án kixin í séhya tsjak'e ch'án ntiha. Méxra tí ch'ín Pablo la tjechjina ch'án chjasin Cesarea la xitjahya ts'etōan ch'án kixin tsjixrakoa.

⁵ Ntá ntáchro ch'án kixin:

—Tí chojni tjetōan kuéntará sáchrókjuikian ntiha chjasin Cesarea. A ntá tí chaxín tsíkjasin ch'án jie ntá ntiha la jína tsjanchia sín jie —ichro tí ch'ín Festo.

⁶ Ntá ch'ín Festo kjuák'e ch'án chjasin Jerusalén chjina ijní o ite yaon ntá ikjan ch'án chjasin Cesarea ínaa. Ntá tí yaon chr'éxin a kjuák'etjaxin ch'án tí tjet'etōanxín ch'án ntá k'uetōan ch'án kixin tsjikakjín sín tí ch'ín Pablo.

⁷ Ntá tió k'uixenhen ch'ín Pablo ntiha ntá tí sín judío kuixin Jerusalén kóchjinehe sín ch'án ntá kjuanchia sín nchónhya jie imá hyé. Kjánchó ijnko nkehe chaxínhya t'eka sín ch'án jie.

⁸ A ntá tí ch'ín Pablo a chrónka ch'án kixin kjuasinhya ch'án jie. Ntáchro ch'án kixin:

—Ninkehó jie kjuasinhyani mé ninkexró kjuánjonkohyani la ko kjaxin jehya chrókuitekakonhyani tí ley kuènte tí sín judío la ko jehya chrókuitekakonhyani tí ninko la ko jehya chrókuitekakonhyani tí ch'ín gobernador romano.

⁹ A ntá ch'ín Festo tjinkaon ch'án kixin tsonínkakuenhya ch'án tí sín judío ntá kjuanchankíhi ch'án tí ch'ín Pablo ntáchro ch'án kixin:

—¿Á tjinkávan sátsjia chjasin Jerusalén kixin ntaha janhan chrókjuintakitōexián nkehe tí jie chonta jaha? —ichro ch'án.

¹⁰ Ntá kjuátehe ch'ín Pablo kixin:

—Náhí, jeheni ó ntihi tjenni tí t'etōanxín tí sín gobierno romano la jína chrókjuinchekitōexián ijiéni kixin jaha la ó noha kixin ninkehó ijie kjuích'ehyani tí sín judío.

¹¹ Kja tí chaxín kjuásian ichrén jie jie chrók'uénxian la chrakonhyana kjónté chrók'uén. A ntá tí chaxínhya xikaha t'ekana sín jie la ninkexró chóntahya kjuachaxin chrók'uetōan sáchrókjuikoni tí jehe sín. A ntá tjánchiá kixin jehe tí ch'ín imá t'etōan mé sinchekitōexín tí jie —ichro ch'án.

¹² Ntá ch'ín Festo mé kjuanchankíhi ch'án iso tí sín tjinkitsa ch'án ntá ntáchro ch'án kixin:

—Jaha mé tjanchia kixin tí ch'ín imá t'etōan sinchekitōexín ch'án ijiá. Méxra tétuñhan sátsjia tí tjen tí ch'ín a —ichro ch'án.

Ch'ín Pablo nkayakon tí ch'ín rey Agripa

¹³ Ntá k'uátsínka iso yaon ntá tí ch'ín rey Agripa la ko tjan Berenice kjuíji sín chjasin Cesarea kixin tsonixjehe sín tí ch'ín Festo.

¹⁴ Ntá ntiha mé kuítóhe sín itsjé yaon ntá ch'ín Festo a mé chénka ch'án tí ch'ín rey nkehe kuènte tí ch'ín Pablo. Ntáchro ch'án kixin:

—Ntihi itjen ijnko ch'ín tjechjina tsíkítóhe ch'ín Félix.

¹⁵ A ntá tió kjuak'é chjasin Jerusalén ntá tí sín nchat'á t'etōan la ko tí sín t'etuñhen tí sín judío a mé kjuíjitsjehe sín tí janhan ntá kjuanchia sín jie kuènte ch'ín Pablo. Kjuanchia sín kixin chrók'óyánni tí jehe ch'án.

¹⁶ Ntá janhan kjuátahá kixin: Jeheni chojni t'etōan kuènte sín romano mé kuènhyani ts'etōanni its'en ninkexró tí naxa tsochjinahya tí ch'ín kjuasin jie kixin tsontáchro ch'án á chaxín tí jie tjanchia sín o náhí.

¹⁷ Ntá tí sín judío kui ntihi ntá chuñhya má. Kjónté tí yaon chr'éxin kjuak'etjaxian tí ntakitōexián ijié chojni la kuétōan kixin síxrakoa tí ch'ín Pablo.

¹⁸ A ntá tí sín kóchjina kohya ninkehó ichro sín kuènte tí jehe ch'án éxi kjuenkayáxian janhan chróntáchro sín.

¹⁹ Jehó nínkakuenxín sín ch'án kixin tí nkehe tinkáchónki ch'án la ko nínkakuenxín sín ch'án kixin tí nkexro it'in Jesús mé ik'uén ch'án ntá jie ntáchro ch'ín Pablo kixin tjechón ch'án inaá.

²⁰ Janhan la nonahya nkexrí tsitoexín tí ijié ch'án ntá kjuánchánkíhā tí ch'ín Pablo á tjinkaon ch'án sátsji ch'án chjasin Jerusalén kixin ntaha tsitoexin tí jié ch'án.

²¹ A ntá jehe ch'án tsíkjanhia ch'án kixin tí ch'ín imá t'etōan mé chrókjuinchekitōexín ch'án ijié ch'án. Ntá kuétōan janhan kixin naxā ntihyó tsjak'echjina ch'án tsononajia janhan nkesá tsétuānhan ch'án sátsji ch'án ntiha —ichro ch'án.

²² A ntá ch'ín Agripa ntáche ch'an tí ch'ín Festo kixin:

—Kjāxian janhan tjínkavan tsinhan tí nkehe tsochrónka tí ch'ín a.

Ntá kjuátehe ch'ín Festo ntáchro ch'án kixin:

—Ntóye tsinhín nkehe tsochrónka ch'án.

²³ Ntá tí yaon chr'éxin tí ch'ín Agripa la ko tí tjan Berenice kjuíji sín la k'uixenhen sín la ko tí sín soldado t'etōan tsíkjikāo sín, la ko k'uixenko sín iso chojni tjetōan kuènte chjasin ntiha. Ntá k'uetōan ch'ín Festo kixin tsjixrakoa tí ch'ín Pablo.

²⁴ Ntá ntáchro ch'ín Festo kixin:

—Jaha ch'ín rey Agripa tinhín la ko tinhínrá kaín rá tsíkójnkotsérá ntihi. Tsjehérá tí ch'ín Pablo itjen ntihi. Kaín tí sín judío k'ueka sín ch'án jie tí chjasin Jerusalén la ko kjāxian chjasin Cesarea ntihi la kuítóehya sín, tjanchana sín kixin chrók'uen ch'án.

²⁵ A ntá tónhenni kixin kohya jie jié kjuasin ch'án kixin chrók'uen ch'án. Kjānchó jehe ch'án mé tsíkjanhia ch'án kixin tí ch'ín imá t'etōan chrókjuinchekitōexín ijié ch'án. Ntá kjuenkayāxian kixin tsétuānhan ch'án sátsji ch'án ntiha.

²⁶ Nonahya nkehe chaxín tsokjian ts'áyéhe tí ch'ín t'etōan. Ntá jie kuétōan kjuíkajín sín ch'án kjuíkāo sín ch'án tí tjejóni ntihi kixin tjetōan kixin jaha ch'ín Agripa la ko kaín rá tjejorá ntihi tsjanchankíhírá ch'án kixin mé tsonōna janhan nkehe tsokjian.

²⁷ Méxrā náxrjónhya chróchr'an ijnko tí chojni tjechjina naxā nonahya nkehe tí jie t'eka sín ch'án.

26

Ch'ín Pablo nkayakon tí ch'ín rey Agripa chrónka ch'án tí jie t'eka sín ch'án

¹ Ntá tí ch'ín rey Agripa a mé ntáche ch'án tí ch'ín Pablo kixin:

—Ó nchoxon jahvá tsochrónka —ichro ch'án.

Ntá tí ch'ín Pablo mé kjuayā tja ch'án ntá kjuankixin nixja ch'án, ntáchro ch'án xikihi:

² —Chàna kixin tsonixja nkayakuan tí jaha rey Agripa tsoxrjanka kaín tí jie t'ekana tí sín judío.

³ Ó noheni kixin jaha la ó noha jina kuènte tí ley la ko tí nkehe tinkáchónki tí sín judío, la ko jaha noha nkehe tí kjuachaxin sín kichó sín. Méxrā xrjannóaha kixin tjak'etinhín jina.

Chrónka ch'ín Pablo nkexrí kjuák'e ch'án tí ósé

⁴ Kaín tí sín judío la ó nohe sín nkexrí k'uekjak'é tí chjasená la ko chjasin Jerusalén tí naxa k'uéntasoána.

⁵ Kjāxian jehe sín la ó nohe sín la kjá jina chróchrónka sín kixin tí naxa k'uéntasoána la k'uéfariseona. A ntá tí sín fariseo a mé antsí má kjuínchexiteyéhe sín tí ley kuènte tí nkehe tinkáchónkini.

⁶ Ntá ijie sinchekitoexián jiena kixin nínkaon tí sín judío a kixin tjéçonhan kixin Dios mé sinchexechón chojni inaá xikaha tsíchénka ch'án tí sín tsík'axrjeníxinni.

⁷ Tí teyó tribu tsík'axrjeníxin ch'ín Israel mé tjejóçónhen sín kixin ts'ikon sín tsoxiteyá tí nkehe tsíçrónka Dios. Méxra xraxinkaon sín Dios nçakotjin la ko tie. Méxra mé xikaha tjéçonhan, jaha rey Agripa, la mé xikaha nínkakonna tí sín judío ijie.

⁸ ¿Á titekákonhyará jahará kixin Dios sinchexechón chojni tsík'en?

Ch'ín Pablo k'uénínkakonhen ch'án tí chojni tinkáchónki Ìnchéni

⁹ Janhan mé kjaxin k'uékjenkayáxian nchónhya nkehe k'uénínkakonhan tí sín tinkáchónki Jesús tí nkexro tsíkjixin chjasin Nazaret.

¹⁰ Mé xikaha kjaxin k'uékjit'a chjasin Jerusalén. Tí sín nçat'á t'etoan mé kjuanjón sín kjuachaxin kixin janhan tsochr'áxanhan ntøechiso nchónhya tí sín tinkáchónki Ìnchéni. Ntá tió k'óyán sín tí sín a mé janhan la ntáxrjan kixin ó nçoxon xikaha kónhen.

¹¹ Nchónhya veces kjuintakjasóte tí sín tinkáchónki Ìnchéni kixin chrókuítóhe sín tí nkehe tinkáchónki sín. Mé xikaha k'uékjit'a kaín xín nínko kixin imá k'uénínkakonhan tí jehe sín la xikaha k'uájichráha sín kjónté sátsíkji sín chjasin ókjé.

*Chrónka ch'ín Pablo nkexrí kuinkáchónki ch'án Ìnchéni
(Hch. 9.1—19; 22.6—16)*

¹² Méxra xra ó sákjuia janhan chjasin Damasco. Tí sín nçat'á t'etoan mé ó kjuanjón sín kjuachaxin kixin xikaha t'aha sín xra.

¹³ A ntá tí ntia a jaha rey chrókónoha kixin chonkixin k'uíkuan éxí ijnko xrohi t'inkaséyan kuixin nkaya nkajní antsí má fuerte la kánhyó fuerte tí xrohi kuènte yaon la tí t'inkaséyan mé k'uantatjen tí janhan la ko tí sín xrikian.

¹⁴ Ntá kaín ni kjuítsínkani nonte ntá xrinahya kuinhan nixja ijnko nkexro mé nkiva hebreo nixjaxin ch'án. Ntáçhro tí nkexro a kixin: “Saulo, Saulo, çnkekuènte nínkakonna xritjéyá tí janhan? Jahvá nçekjasóte asán kixin tjanjonkoa tí janhan. Éxí yóhe ijnko koxinta kónínkaon va tí chriáte sín va chica yo mé xikaha jaha.”

¹⁵ Ntá kjuánchánkiá kixin: “¿Xá nkexro jaha?” Ntá tí nkexro me kjuátèhe kixin: “Janhan mé Jesús mé tí nkexro chréhe jaha.

¹⁶ Ijie t'aya jaha, tjak'exián totá. Janhan kjuánjuan kjuachaxin kixin k'uíkuan tí janhan ijie kixin jaha sich'ena xra. Janhan kjuéyá tí jaha kixin tsochénta chojni kixin k'uíkuan tí janhan la ko tsoçhronka tí nkehe tsjákohá inaá tí xik'ikuan tí janhan inaá.

¹⁷ Janhan ts'ayakonhan kixin kohya nkehe sit'aha tí sín judío la ko tí sín jehya judío. A ntá jie tétøan satsjia.

¹⁸ Méxra tétøan satsjia tí tjejó tí jehe sín kixin takítjenkia ikon sín kixin í ts'ajihya sín ntia sítié la ts'aji sín ntia t'inkaséyan la ko tsoçhóntahya tí jínahya kjuachaxién ts'etuènenhén tí jehe sín. Jehe sín mé tsinkáchónki sín tí janhan. Ntá janhan ts'áyáha sín la tsjin ijie sín la ko tsitønhen sín tí nkehe ts'áyéhe kaín tí sín tsíkjinçhetjóá Dios,” ichro Ìnchéni.

Ch'ín Pablo kuítekaon ch'án tí nkehe tsík'ikon ch'án

¹⁹ Mé xikaha jaha rey Agripa kjuintaxiteyáha tí nkehe k'uíkuan kuixin nkaya nkajni.

²⁰ Saoxín kjuákoha tí sín siín chjasin Damasco, la ntá chr'éxin chjasin Jerusalén, la ko kuenté tí estado Judea ntá kjaxin kjuákoha tí sín jehya judío.

Kjuákoḥa sín kixin chrókuítóhe sín ijié sín, la chrókjan sín chrókuinkáchónki sín Dios, la ko chrókjuakoxin sín xra jina kixin chaxín ó kjuítóxinhin sín tí nkehe tinkáchónki sín.

²¹ Mé xikaha tí xra tséxinna tí sín judío a nkaxenhen ninko la tjinkaon sín chrók'óyánna sín.

²² Ntá kjuasáyé Dios kjuínkítsana la ntoá itjén ijie tjákoḥa kaín chojni ntsíntsi la ko chojni ihyé la ninkehó k'uantaxianhya kuente tí nkehe tsíchrónka tí sín tsíchrónka itén Dios la ko tí nkehe tsíchrónka ch'ín Moisés tsonhen,

²³ kixin t'ichjánxin its'en Cristo la ko tsoxechón ch'án inaá. Tí itén ch'án éxí ijnko xrohi ts'inkaséyanxín tí sín siín ntihi la ko tí sín siín í so nación kixin tsaáxin sín.

Ch'ín Pablo nixjehe ch'án ch'ín Agripa kixin chrókuinkáchónki ch'án Inchéni

²⁴ Mé xikaha ichro ch'ín Pablo kixin kohya jie kjuasin ch'án ntá tí ch'ín Festo mé itsen k'uèya ch'án kixin:

—Pablo jaha la kjá tsík'ixikján. Imá tsíkjinchekuáxian mé xikaha tsíkólókoxián —ichro ch'án.

²⁵ Ntá kjuátehe ch'ín Pablo kixin:

—Jehya tsík'ixikjánna. Jaha Festo imá tjuaha. A ntá tí nkehe ntáxrjan la ijnko nkehe jina la ijnko nkehe chaxín.

²⁶ Ntihi itjen tí ch'ín rey Agripa. Jehé ch'án mé jina nohe ch'án kaín tí nkehe a. Méxra tjenixjaha ch'án jnkojina kixin ó nõna kixin jehé ch'án ó nohe ch'an kaín nkehe kónhen kixin jehya ijnko nkehe imó kónhen tíha.

²⁷ Jaha, rey Agripa, ¿á titekávan tí nkehe tsíkjako tí sín tsíchrónka itén Dios ósé? Janhan la ó nõna kixin titekávan jaha.

²⁸ Ntá kjuátehe ch'ín Agripa ntáchro ch'án kixin:

—Ó antsíkoá chrokjuacha chrókjuachròena kixin chrók'ónana cristiano —ichro ch'án.

²⁹ Ntá ntáchro ch'ín Pablo kixin:

—Ntáxrjan kixin á isé tsoxrjanka o á séhya la Dios mé tjinkaon kixin jehya jahvá chrókuinkachónkia ch'an. Náhí. Kjaxin tjinkaon ch'án kixin kaín nkexro tjejótinhin chrók'óna sín éxí tí janhan kjánchó xikahya chróchóna sín cadena.

³⁰ Ntá kjuixin nixja ch'ín Pablo ntá k'uínkatjen tí ch'ín rey, la ko kjaxin tí ch'ín gobernador, la ko kjaxin tí tjan Berenice, la ko kaín xín tí chojni tjejótxixin ntiha.

³¹ Ntá kaín sín k'uaxrjenta sín la ikjo sín kíchó sín. Ntáchro sín kixin:

—Kohya jie tsíkjasin tí ch'ín a kixin chrók'uénxín ch'án la ko chrókjuak'echjinaxín ch'án ntqechiso.

³² Ntá tí ch'ín Agripa ntáche ch'án tí ch'ín Festo kixin:

—Ó nchoxon chrókjuánjuan kjuachaxin sáchrókjui tí ch'ín a tí jehé ch'án chrókjuanchahya ch'án kixin tí ch'ín imá t'etoan sinchekitoexín ijié ch'án —mé xikaha ichro tí ch'ín Agripa.

27

Ch'ín Pablo sákjuí ch'án chjasin Roma

¹ Ntá k'uetoan sín sátsjini nación Italia. Tí ch'ín Pablo la ko í so sín tjejóchjina a mé k'uáyéhe ijnko ch'ín capitán mé it'in Julio. Jehé ch'án me ijnko policía kuente tí ch'ín t'etoan Augusto César.

² Ntá k'uixenhenni ijnko ntabarco tsíkjinxín nó puerto Adramitio, la ó chjina sátsji tí puerto nó estado Asia. Kjaxin tjejókoni tí ch'ín Aristarco tsíkjinxín chjasin Tesalónica nó estado Macedonia.

³ A ntá tí yaon chr'éxin mé kjuíjini ti puerto chjasin Sidón. Ntá ch'ín Julio mé ikjo jnkójina ch'ín Pablo ntá chjéhe ch'án kjuachaxin kixin sátsjitsjehe ch'án tí chojni chóxin ch'án ntiha kixin tsjinkitsa sín ch'án.

⁴ Ntá chr'éxin sákjuíxinni chjasin Sidón. Ntá kjuíjini ijnko isla it'in Chipre la nó tja kjonni kuítóhe tíha la imá chjéhe xr̄into.

⁵ Ntá k'uatòyeni tí ntayaon chjinaxón chjasin Cilicia la ko Panfilia la ntá kjuíjini chjasin Mira estado Licia.

⁶ A ntá ntiha tí ch'ín capitán, tí ch'ín k'uetuēnhen tí sín soldado a, mé k'uitja ch'án íjnko ntabárc̄o tsíkjix̄in nó chjasin Alejandría sátsji nó nación Italia. Ntá ntáchro ch'án kixin tíha sátsjikoni kixin tsjijini ntiha.

⁷ Nchónhya yaon kjuíjix̄inni kixin imá iyó la imá xr̄a kjuíjini chjino chjasin Gnido. Ntá nax̄a chjéhe xr̄into tsank̄a ntá k'uátsínkani chjinaxón Salmón ntá kuinkátjíaix̄inni chjino tí isla Creta.

⁸ Ntá x̄ikahó imá xr̄a k'uátsínkani chjinó chr̄inta ntá kjuíjini ijnko chjasin it'in Puertos Jína chjino chjasin Lasea.

⁹ Ntá k'uitjáyannkí nchónhya yaon, ntá ó kjuixraká tí yaon xitjahya sátsjiko sín ntabárc̄o chr̄itaón ntayaon kixin ó kóchjina tí nchakuen kin. Méxr̄a ch'ín Pablo nixjehe tí sín a.

¹⁰ Ntáchro ch'án kixin:

—Tinhínr̄a tí nkehe ts̄oxr̄janka. T'íkuān kixin nchónhya kjuachrakon tsonhen. Sinchek'itjáyanni tí ntabárc̄o a la ko tí nkehe tjinká la kjaxin jeheni chrók'uitjáyanni —ichro ch'án.

¹¹ A ntá tí ch'ín capitán kuēnte tí sín soldado a mé antsí má tjinkaon ch'án chrókuihin tí nkehe chrónka tí ch'ín tjiko ntabárc̄o la ko tí nkehe chrónka tí ìnché tí ntabárc̄o a ntá tí nkehe ntáchro ch'ín Pablo la náhí.

¹² Jehya jína kixin tí puerto ntahó chrók'uejóni ntá chrók'uatsínkajia tí nchakuen kin, ichro sín. Kaín sín kjuenkayáxin sín kixin íchá jína sátsjix̄inni ntiha kixin ákué xitjahya chrókjuijini chjasin Fenice, ijnko puerto estado Creta nó chó'á noroeste la ko suroeste, la ntaha chrók'uejóni ntá chrók'uatsínkajia tí nchakuen kin.

Tí xr̄into chjéhe chr̄itaón ntayaon

¹³ Ntá kjuankixin chjehe xr̄into kjuix̄in nó sur kjánchó kánhyó fuerte ntá kjuenkayáxin sín kixin kjá jína sátsjini.

Ntá sákjuix̄inni ntiha kjánchó kjónté nax̄a sákjuíni chjinaxón tí chr̄inta ti isla Creta a.

¹⁴ A ntá chr'éxin ikjui ijnko xr̄into kjuix̄in noroeste k'uíntaté tí ntabárc̄o.

¹⁵ La kjuankixin xr̄into sákjuíko tí ntabárc̄o kixin tsjachahyani sátsjini tí sítjix̄in tí xr̄into a. Ntá t'ichjánx̄in kuítóheni sákjuíko xr̄into tí ntabárc̄o tjejóxenhenni.

¹⁶ Ntá k'uátsínkani chjino ijnko isla ntsí it'in Clauda kixin ntiha mé kánhyó tjian chjéhe xr̄into. Ntá imá xr̄a k'uitjianni tí ntabárc̄o ntsí t'etenix̄in nóton ntabárc̄o jié.

¹⁷ Ntá kjuixin kjuínchek'it'ótjen sín tí ntabárc̄o ntsí ntá imá chrakon sín ntá kjuínchenteto sín tí ntabárc̄o jié kixin kohya nkehe tsonhen. Kjaxin tóxakonhen sín chrakon sín tsíkjine nchesen tí ntabárc̄o tí tsjiji sín tí it'in Sirte. Ntá kuakjinjin sín tí ka chónta ntabárc̄o ntá kuítóhe sín sátsjiko xr̄into.

¹⁸ Ntá tí yaon chr'éxin ntá nax̄a imá tjian chjéhe xr̄into. Ntá ik'ue sín tí nkehe sítjinká tí ntabárc̄o a chr̄inta ntayaon kixin kánhyó tsoye.

¹⁹ A ntá tí yaon níxin a mé itjani ó kuakitsjex̄inni tí nkehe kuēnte tí ntabárc̄o.

²⁰ Isé k'uíkonhyani yaon la k'uíkonhyani konotsé kixin imá tjian chjéhe xr̄into la ko kjaxin ó k'uitjáyenhenni kaín tí tjenkayáx̄inni kixin nax̄a chrókuaáni.

21 Ntá ó k'uatší́nka itsjé yaon kjónehyani ntá k'uínkatjen ch'ín Pablo nixjehe ch'án kaín tí sín tjejóxehen ntabárc̄o a ntá chro ch'án kixin:

—Chrókuítekáonrá tí nkehe xrjanka kixin chrókuítóheni tí estado Creta ntá chrók'uitjáyenhyani tí nkehe tjinká tí ntabárc̄o a.

22 A ntá ijie la tóxakuanhyará kixin kohya nijnko tí jahará its'enrá kixin kjónté tí ntabárc̄o la ts'itjáyan.

23 Ntá tí tie a mé k'uíkuan ijnko ángel tsíchr'án Dios tinkachónkia la ko t'aha xra.

24 A ntá tí ángel mé chrónka kixin: “Chrakonhya jaha Pablo. T'ichjánxin tsjasán tí tjen tí ch'ín César t'etōan la kjaxin Dios la tsjinkítsa jaha la ko tí sín tjejókoa kixin ts'enhya sín.”

25 Méxra chróchrakonhyará jahará kixin tí Dios tinkachónkia la chaxín nchexiteyá tíha, éxí tsintá chro tí ángel.

26 Kjónté ó jehí t'ichjánxin sátsjikoni xrintō ijnko nonte jnkosiné ntayaon —ichro ch'án.

27 Kjuixin k'uatší́nka iyó semana ntá ijnko tie ntá kjujini ijnko ntayaon it'in Adria ntá sákjuiko tí ntabárc̄o ijnko lado la í jnko lado ti xrintō. Ntá chjino k'áxrótjen ntá tí sín tjiko ntabárc̄o mé ó kónohe sín kixin ó chjina kjuixraká sin ijnko nonte xámá.

28 Ntá kjuáchrōa sín tí nkekjaín ninkaxín tí ntá mé chóna treinta y seis metro ninkaxín. Ntá sákjuíni kjínhya la ó xíkjachrōa sín la veintisiete metro ó ninkaxín.

29 Imá chrakon sín kixin ts'itjaton tí ntabárc̄o itjo ntá kjuinkajin sín noó chica gancho tí nóton tí ntabárc̄o a kixin ntahó tsochónhen tí ntabárc̄o hasta chrók'uinkaséyan.

30 Ntá tí sín tjiko ntabárc̄o kjuenkayáxin sín sáchrókjui sín ntá kjuankíxin kjuinkajin sín tí ntabárc̄o ntsí chrítaón ntá éxí tjinkaon sín chrókjuinkajin sín tí gancho chóna tí kja ntabárc̄o.

31 A ntá ch'ín Pablo ntáche tí ch'ín capitán la ko kaín tí sín soldado kixin:

—A ntá tí tsitōehya tí sín i ntihi nkaxenhen ntabárc̄o ntá xitjahya tsaará —ichro ch'án.

32 Ntá tí sín soldado a mé kóchrínjint'ō sín tí hno kuente ntabárc̄o ntsí tsitōhe sín tsjiankí ntá.

33 Ntá chjina t'inkaséyan a ntá ch'ín Pablo nixjehe ch'án kaín tí sín siín ntiha ntá chro ch'an kixin chrókjóné sín ichrén nkehe. Ntá chro ch'án kixin:

—Ó k'uatší́nka iyó semana k'uejóchrinhyará la ko kjóntehyará.

34 Tinhínra t'ichjánxin chrókjónterá ichrén nkehe tí tjinkáonrá tsaará kixin ntihi la kohya nkexro ts'itjáyan la nijnko tí kaxihi chóna kjará ts'itjáyan.

35 Ntá xíkaha ichro ch'ín Pablo ntá kuákja ch'án ijnko niotja a la ntiha tí tjejó kaín sín ntá kjuanchia ch'án kjuasáyé Dios ntá kóchrít'ō ch'án ntá kjuankíxin kjóné ch'án.

36 Ntá kóchéhe sín kaín sín kjuankíxin kjóné sín kjaxin.

37 Kaínni tsík'ixenhenni ntabárc̄o mé iyó ciento setenta y seis chojni.

38 Ntá kjuixin kjóné sín la kókjehe sín ntá ik'ue sín tí noa trigo a tjinká tí ntabárc̄o a chrínkí tí ntayaon a kixin kánhyó tsoye tí ntabárc̄o a.

Tí ntabárc̄o kjuixin k'uániánkí ntá

39 A ntá ó k'uínkaséyan, a ntá tí sín tjiko ntabárc̄o la kjuátsoanhya sín tí nonte ntá k'uíkon sín ijnko chrínta ntá. Ntá chro sín kixin ákué tsjachahya sín sátsjiko sín tí ntabárc̄o ntiha.

40 Ntá kóchrínjint'ō sín tí hno síchroéxin tí gancho kixin ntahó tsitōhe chrínkí ntayaon. Ntá kjuínchenta sín tí nkehe tjikoxín sín tí ntabárc̄o a.

Ntá kjuínchek'it'ótjen sín tí ka tjiko nkayakon tí ntabárc̄o. A ntá tí ntabárc̄o kjuankíxin sákjuí chrínta ntá.

⁴¹ Xrínahya kjuíji ntabárc̄o tí iyó kójnkojiéxin ntayaon ntá ntiha kjuíkjiat'ó tí kja tí ntabárc̄o tí nchesen síin ntiha. Ntá í xitjahya nchekinkí ninkehó, a ntá nóton tí ntabárc̄o kjuankíxin síxíka kíxin imá sítji chjéhe ntá a.

⁴² Ntá tí sín soldado a mé tjinkaon sín chrók'óyán sín tí sín tjejóchjina kíxin tjinkakonhya sín kíxin ninkexró sáchrókjuí ókjé.

⁴³ A ntá tí ch'ín t'etuñhen tí sín soldado a mé tjinkakonhya ch'án kíxin its'en ch'ín Pablo ntá kjuanjonhya ch'án kjuachaxin. Íchá k'ueṭoan ch'án kíxin tí sín jína tjitaón ntá la senó sátsji sín kíxin tsjiji nonte xámá

⁴⁴ la ko tí sín noehya tsjitaón ntá a mé sátsjiko sín ti ntatabla o it'o tí ntabárc̄o. Ntá xíkaha kaín ni kjuíjini tí nonte xámá la ó kuaáni.

28

Itjen ch'ín Pablo tí isla Malta

¹ Ntá tió tjejóni kaín ni kuaáni ntá kónoheni kíxin tí isla la mé nchek'in sín Malta.

² A ntá tí sín chjasin ntiha mé imá jína kjuínkítsa sín kaín ni la kjuaka sín ijnko xrohi jié kíxin imá kin kíxin sít'aniá chrin. Ntá k'uèya sín kíxin tsochjinani kaín ni tsochjixroheni.

³ A ntá ch'ín Pablo mé sákjuíkakja ch'án í so njo tsíxámá ntá kjuasinkáte ch'án tí xrohi a. Ntá xrínahya k'uaxrjenkíxin ijnko konche tí xrohi a kíxin imá sóa ntá xrínahya k'uísímá itja ch'ín Pablo.

⁴ Ntá tí sín chjasin ntiha mé k'uíkon sín tí konche kjítjankítjen itja ch'án ntá ikjo sín kíchó sín. Ntáchro sín kíxin:

—Kjá tí ch'ín a la ijnko chojni tsíkjàya a kíxin kjónté kuaá ch'án k'uénxinhya ch'án ntayaon la Dios la í tjinkakonhya kíxin naxa tsjak'echón ch'án.

⁵ A ntá jehe ch'án kótsjénka ch'án itja ch'án chrítaón tí xrohi kíxin ntiha ts'anótjen tí konche, ntá jehe ch'an la kohya nkehe kónhen ch'án.

⁶ Ntá kaín sín tjejóchónhen sín kíxin ách'e ts'atjoyé itja ch'án o ách'e its'en ch'án. Ntá kjuixin k'uejóchónhen sín isé la k'uíkon sín kíxin kohya nkehe kónhen ch'án ntá kjuitóxin sín tí nkehe kjuenkayáxin sín la ntáchro sín kíxin jehe ch'án mé ijnko dios tíha, ichro sín.

⁷ Ntá chjino tí k'uejóni a mé itjen nontee ijnko ch'ín t'etoan kuente isla me it'in Publio. Mé jína kjuanjon ch'án kjuachaxin k'uejóni ntqe ch'án la kjuanjon ch'an nkehe kjóneni iní yaon.

⁸ Ntá it'é tí ch'ín Publio a mé tjetsínka ch'án kíxin níhi ch'án chóna ch'án sóa la ko chinjni. Ntá ch'ín Pablo sákjuítsjehe ch'án la kjuixin nixjehe ch'án Dios, ntá kjuák'etja itja ch'án tí ch'ín a ntá kuítóhe ch'án jína.

⁹ Mé xíkaha kjaxin kóchjina í so tí sín níhi síin tí isla ntá kaín sín kuítóhe sín jína.

¹⁰ Na ntá imá kjuikosáyehe sín ch'án. A ntá chr'éxin tió kjuixin k'uíxenhenni ntabárc̄o inaá ntá kjuanjon sín kaín nkehe t'ichjánxinhinni sátsjikoni.

Kjuíji ch'ín Pablo chjasin Roma

¹¹ Ntá k'uátsínka iní nitjó tjejóni tí isla ntá k'uíxenhenni ijnko ntabárc̄o mé ntahó tsíkitohe k'uátsinkajia tí nchakuen kin. Tí ntabárc̄o a mé tsíkjiñ chjasin Alejandría la ko mé chóna nkehe tsíkjanoya chóna ihnié dios Cástor la ko Pólux.

¹² Ntá sákjuíni ntá kjuíjini puerto chjasin Siracusa la ntaha kuítóheni iní yaon.

13 Ntá xík'ixenhenni tí ntabárc̄o la k'uatsínkani chjinaxón tjen ijnko nonte ntá kjuíjini chjasin Regio. Ntá tí yaon chr'éxin a ntá kjuankíxin chjéhe xrinto kjuixín nó sur, ntá yaon yóxin ntá kjuíjini chjasin Puteoli.

14 Ntá ntiha xetani iso kíchó ni, a ntá tjinkaon sín ts'ejókoni sín ntiha. Ntá k'uéjókoni sín ijnko semana ntá chr'éxin sákjuíni chjasin Roma.

15 Ntá tí sín kíchó ni chjasin Roma la ó nohe sín kíxin tsijini. Ntá iso sín la xetani sín ntia chjasin Foro Apio la ko í so sín xetani sín chjasin Tres Tabernas. Tió tí ch'ín Pablo k'uíkon tí jehe sín a kjuanchia ch'án kjuasáya Dios la imá kóchéhe ch'án.

16 Ntá tió kjuíji sín chjasin Roma ntá tí ch'ín capitán kjuikénhen tí sín tjejóchjina, k'uáyéhe tí ch'ín jefe ts'ayakonhen ch'án. A ntá ch'ín Pablo la kuitohe ch'án ókjé kjuák'e ch'an la ijnko soldado a k'uáyakonhen tí jehe ch'án.

Ch'ín Pablo kjuako chjasin Roma

17 Ntá k'uátsínka iní yaon ntá tí ch'ín Pablo a mé k'uíyehē ch'án kaín tí sín judío tjetooan kuente chjasin Roma. Ntá tió kjuixin kójnkotsé kaín sín ntá ntáchro ch'án kíxin:

—Kíchóni, kohya ninkehó jie kjuásian kíxin chrókónínkakonna tí sín judío la jehya kíxin ninkakonxian tí nkehe k'uékinkáchónki tí sín tsík'axrjeníxinni. A ntá kjónté itséna sín kjuak'echjina sín tí janhan chjasin Jerusalén la ko kjuínchekjasótena tí sín romano a.

18 Ntá k'uitjahya sín ninkehó jie chonta. Ntá tjinkaon sín chrók'uatjántana sín kíxin k'uitjahya sín ninkehó jie chrók'uénxian.

19 A ntá tí sín judío a mé imá kónínkaon sín tjanchia sín jie. Ntá t'ichjánxin tsjanchiani kíxin tí ch'ín César mé chrókjuinchekitoexín ch'án nkehe tí jie chóntani, kjónté chóntahyani ninkehó jie ts'eka tí sín tí nación kuénténi.

20 Méxra k'uíyahará kíxin tjinkaonni ts'íkuan tí jahará la ko tsonixjaharání kíxin tinkáchónkini tí nkexro tjejóchónhen kaín tí sín israelita mé xíkaha t'íkonrá kíxin tjechrontetoxíni cadena ntihi.

21 Ntá ntáchro sín kíxin:

—K'uáyèhyani ninkehó xroon chrókjuixin Judea kuente tí jaha la ko kuihya nijnko tí sín kíchó ni judío chróntáchro sín ichrén nkehe jínahya tsíkjich'e.

22 Tjinkaonni chrókuinhinni nkexrí tjenkayáxian kíxin ó noheni kíxin itsjé chjasin t'ántaxínhin sín tí nkehe nixin tjákua —mé xíkaha ichro sín.

23 Ntá chr'éxin kjueyá sín ijnko yaon tsinhin sín nkehe tsochrónka ch'ín Pablo. Ntá kójnkotsé nchónhya chojni tí nchia kjuák'e ch'án. Kuenté yaon chrónka ch'án nkexrí tí kjuachaxin kuente Dios. Nixjehē ch'án sín kíxin chrókuitekaon sín tí nkehe kjuako ch'ín Jesús, la chrónkaxín ch'án kíxin nkexrí nixja tí ley kuente ch'ín Moisés la ko tí tsíkjin tí sín profeta ósé.

24 Ntá iso tí sín mé kuítekaon sín tí nkehe ntáchro ch'ín Pablo. A ntá í so sín na kuítekakonhya sín.

25 Ntá jnkokoáhya kjuenkayáxin tí jehe sín la iso sín tjinkaon sín kíxin sáchrókjuí sín, ntá ch'ín Pablo mé ntáchro ch'án kíxin:

—Ntoá nixja tí nkehe chénka Nchakuen Dios tí sín tsík'axrjeníxinni ósé chrónkaxín ch'ín profeta Isaías ntáchro kíxin:

26 Sátjia nixjehé tí chojni a

kíxin jehe sín kjónté tjejótinhin sín la tienxínhya sín,
la kjónté tjejótsjehe sín la t'íkonhya sín.

27 A ntá asén tí chojni tí chjasin i la tsík'óna imá cha

la ntatsjon sín la tsík'ikjehe

la ikon sín la tsíchr'áto

kíxin t'íkonxínhya sín

kíxin tinhín sín la tjinkakonhya sín chrókuienxín sín,
la tjinkakonhya chrókuienxín asén sín.

Í tjinkakonhya sín chrókjan sín chrókuinkáchónki sín tí janhan kíxin ntá janhan
chrókjuintakitohá sín jína.*

Mé xikaha tsíkjin ch'ín Isaías.

²⁸ Méxra chrókónohará jahará kíxin ijie tí sín jehya judío me ts'áyéhe sín tí
nkehe tsjanjon Dios tsaáxin sín kíxin jehe sín mé tsinhin sín.

²⁹ Ntá xikaha ichro ch'ín Pablo ntá tí sín judío sákjuí sín la tinkákjo sín kíchó
sín.

³⁰ A ntá ch'ín Pablo kuítóhe ch'án tí nchia tsíkjen ch'án iyó nánó. La kjuanjon
ch'án kjuachaxin k'uéjó tí sín kjuíjitsjehe ch'án.

³¹ La kjuako ch'án tí kjuachaxin kuènte Dios la ko kjuako ch'án kuènte
Ìnchéni Jesucristo. La kohya ninkexró k'uínkákonhen tió kjuako ch'án. Ó tjen.

* 28:27 28.26-27 Isaías 6.9-10

Tí xroon ikjin ch'ín Pablo chr'énhen ch'án tí sín romanos

Ch'ín Pablo ikjin xroon k'uáyéhe tí nínko chjasin Roma

¹ Janhan Pablo mé t'ahá xrá Jesucristo mé kjian tí xroon i. Kjueyána Dios kixin sít'ahá ch'án xrá tsjàkua tí tan jína tsaáxinni.

² Tíha mé tsíntáchro Dios senó kixin tsoxiteyá éxí nixja tí xroon nixjaxin tí sín tsíchronka itén ch'án ósé.

³ Tí tan a mé chrónka nkexrí tjen Ìnchéni Jesucristo Xjeen Dios. Jehe ch'án mé tsík'óna ch'án chojni k'uaxrjeníxin ch'án tí sín tsík'axrjeníxin tí rey David.

⁴ Tí kjuachaxin jié mé kjuakoxin kixin jehe ch'án mé chaxín Xjeen Dios kixin ó xechón ch'án la chóna ch'án Nchakuen Dios imá tjetóan.

⁵ Kjuasáyé Jesucristo k'uáyéheni kjuachaxin kixin sich'eheni ch'án xrá sátsjichronkaxinni itén ch'án kixin kaín xín chojni chónhya ch'án kuenté chjasintajni chrókuitekaon sín ch'án la ko chrótjuèhe sín ch'án.

⁶ Jahará k'uék'ejorá éxí tjejó tí jehe sín, a ntá jie la kjueyará Dios kixin chrókuitekáonrá Jesucristo.

⁷ Janhan ikjian tí xroon chr'anhánrá kaín rá tjejórá chjasin Roma. Tjuàhará Dios la kjueyará ch'án kixin tjóá chrók'uejórá. Kjuasáyé It'éni Dios la ko Ìnchéni Jesucristo kixin kjuanjón ch'án kjuaxróxin k'uayéhérá.

Ch'ín Pablo tjinkaon chrókjuitsjehe ch'án chjasin Roma

⁸ Xrankíxín kjuachaxién Jesucristo tjánchàxian Dios kjuasáya kixin jahará ó kuitekáonrá ch'án la ko nkuíxín chjasintajni nixja sín nkexrí tinkáchónkirá ch'án.

⁹ Dios, tí nkexro t'ahá xrá kaín asenná xrjanka tí tan jína kuènte Xjeen ch'án, mé nohe ch'án kixin xráxín xráxinkavan tí jahará tíó nixjahá ch'án.

¹⁰ Xráxín tjáncháha Dios kixin tí chrókjuanjón ch'án kjuachaxin la chrókjuasántsahará.

¹¹ Kixin tjínkavan chrókjuasántsahará tí jahará kixin chrókjuínkítsa tí jahará kixin chrók'uitjará jína nkexrí chrók'uejórá ntoá.

¹² Me xikaha tsocháhará la ko tsochána kixin jnkokoá tinkáchónkini Ìnchéni, jahará la ko janhan.

¹³ Kíchóni, tjínkavan chrókónohará kixin nchónhya veces tjínkavan chrókjuásantsahará kjánchó naxa xitjahya tsjasán. Tjínkavan chrókjuasán kixin chrókjuít'a xrá kuènte Ìnchéni kixin chrókjuachani nchónhya chojni chrókuinkáchónki Dios éxí kjuít'a xrá í so chjasin naxa chónhya sín Dios.

¹⁴ T'ichjánxin tsjákoḥa kaín chojni, á chojni griego o á chojni jehya griego o á chojni nohe o á chojni noehya.

¹⁵ Mé xikaha xrá ó tjéchonhan chrókjuasán chrókjuákohará tí tan tsaáxinrá tí jahará tjejórá chjasin Roma.

Tí kjuachaxin kuènte tí tan jína

¹⁶ Tósuànahya xrjanka tí evangelio kixin táha ijnko tan jína kixin chóna kjuachaxin kuènte Dios chrókuaáxin kaín xín tí chojni chrókuitekaon, mé saoxín tí sín judío la ko kjaxin tí sín jehya judío.

¹⁷ Kixin tí tan jína kuènte Dios tjakuexin tí jeheni kixin chrókótjuáxin ijiéni kixin tinkáchónkini ch'án la jehó ch'án tinkáchónkini. Exí ntáchro xroon itén

Dios kixin: “Tí nkexro kótjóá kixin kuítekaon sín Dios mé táhó ts'ejóchónxin sín.”*

Tí jie tjasin chojni

¹⁸ Dios tjen nkaya nkajní mé tsonínkakohen ch'án tí sín jínahya tjasin jie, mé sinchekjasóte sín ch'án. Tí jie jínahya tjasin sín mé t'ínkákohen kixin chrókónohe sín tí nkehe jína chaxín.

¹⁹ Jehé sín ó nohe sín jína nkexrí tjen Dios kixin jehe ch'án kjuakuexín ch'án tí jehe sín.

²⁰ Tí kjuachaxin kuènte Dios kjónté t'ikonhyani la kjánchó noexínni kixin tí nkehe kjuích'éna ch'án. Kixin tí naxa k'ónahya chjasintajni kónoxín kixin jehó ch'án mé Dios t'etóan la ko chóna ch'án kjuachaxin jnkochrín. La ntá tí sín jínahya xitjahya tsontáchro sín kixin k'uénoehya sín.

²¹ Kjónté nohe sín kixin xikaha itjen Dios la tjikosáyehya sín ch'án la ko ni tjanchehya sín ch'án kjuasáya. Tjenkayáxin sín tí nkehe ninkehó sínkíhya kixin jínahya asén sín la tí sítié ó kuítóhe sín.

²² Kjónté ntáchro sín kixin imá nohe sín kjánchó imá lontj sín kixin antsí kjuasin sín jie.

²³ A ntá ó kjuixin kjuinkí sín tí nkehe tinkáchónki sín la ko kuítekakonhya sín tí kjuachaxién Dios itjen jnkochrín, t'enhya. A ntá ijie tinkáchónki sín tí nkehe tsíkjanoya tóyóhe chojni it'en. Kjaxin tinkáchónki sín koxroxé tsíkjanoya la ko konche la ko iko chóna noó toté.

²⁴ A ntá xikaha Dios kuítóhe ch'án tí jehe sín kixin chrókjuich'e sín tí nkehe jínahya tjenkayáxin sín ntá xikaha ch'e sín ijnko nkehe chrókósuèxin sín ch'ehe kíchó sín

²⁵ kixin kuítekakonhya sín tí nkehe chaxín kuènte Dios, a ntá tí nkehe jínahya mé kjueyá sín. Kjuích'éna sín dios kuènte sín tí nkehe tsíkjach'éna Dios. A ntá tí nkexro kjuích'éna tí nkehe la titekakonhya sín. Jehé ch'án mé chrókjuancheheni ch'án kjuasáya jnkochrín kixin jehe ch'án mé kaín tí nkehe sín mé kuènte ch'án. Amén.

²⁶ La ntá xikaha kjuích'e sín ntá Dios kuítóhe ch'án tí jehe sín kixin chrókjuich'e sín tí nkehe chrókósuèxin sín chrókjuich'e sín. Kjónté tí chojni chjin la kuítóhe sín tí ichjin sín la ntá kjuích'éna sín asén sín chojni ntoa.

²⁷ A ntá kjaxin xikaha tí chojni ntoa kuítóhe sín chróchóna sín chojni chjin la tjinkaon sín tí nkehe ntoáhya. La ntá ch'e sín nkehe chrókósuèxin sín ch'ehe kíchó sín jnkokón ntoa sín. Mé xikaha mé tí cuerpo kuènte sín mé tsjasótéxin sín tí jie kjuasin sín.

²⁸ Tjinkakonhya sín tsoxraxinkaon sín Dios ntá jehe ch'án mé kuítóhe ch'án tí jehe sín kixin xikaha tsjenkayáxin sín tí nkehe jínahya kixin sich'e sín tí nkehe chrókjuichehya sín.

²⁹ Nchónhya jie chóna sín mé tí nkehe ntoáhya ch'e sín, la tjinkaon sín chrókuakja sín í jnko chojni chjin ókjé, la ko tí nkehe jínahya ch'e sín, la ko tjinkaon sín jehó sín chróchóna sín itsjé nkehe, la ko imá tjasin sín jie, la ko jehe sín chjinóxínhin sín, la ko tjinkaon sín chrók'óyán sín kíchó sín, la ko itje sín kjuanínkaon, la ko ch'ia sín la ko jínahya sín xriko sín kjuach'ia.

³⁰ T'ántaxínhin sín kíchó sín la ko nínkakohen sín Dios, la ko jehó sín chrók'uetóan sín, la ko nchehnke sín, la ko jehó sín ch'éna sín nkehe jínahya tjasixín chojni jie, la ko tjikosáyehya sín it'é sín la ko ìné sín.

³¹ Tienxínhya sín la nchexiteyáhya sín nkehe nixja sín, la ko tjuèhya sín kíchó sín, la ko tjinkakonhya sín sinchek'itjáyenhen sín ichrén jie kjuasínhin kíchó sín, la ko tikonóehya kíchó sín.

* 1:17 Habacuc 2.4

³² Jehe sín ó nohe sín jína kixin nkexrí k'uetōan Dios la jehe sín ó nohe sín kixin tí jiē kjuasin sín chrók'uenxín sín, la kjónté xikaha ó nohe sín, la naxa tjasin sín jiē la kjaxin chéhe sín chrók'uikon sín ókjé nkexro chrókjuasin jiē xikaha.

2

Dios nchekitoexín ch'án tí jiē tjasin chojni

¹ Mé xikaha jahará xitjahya tson táchorá kixin chontahyará jiē a ntá tékará jiē tí í so sín tjasin jiē. A ntá tí xikaha ch'erá la jahará xritjéyará nkexrí chrókjuasótexínrá kjaxin kixin jahará jnkokón jiē tjásinrá.

² Ó noheni kixin ntoá sinchekitoexín Dios tí jiē kjuasin chojni kixin sinchekjasóte ch'án tí sín xikaha tjasin jiē.

³ A ntá jahará la tékará jiē í so chojni ntá jahará kjaxin la xikaha jnkokón jiē tjásinrá. ¿Á tjenkayáxinrá kixin tsjachará tsinkehéra tí sinchekjasótiará Dios ní?

⁴ ¿Á kjoniehéra tí kjuaxróxin tsjéjehya tjanjon Dios kixin tjechónhen ch'án naxa nínkakuanyhará ch'án? A ntá jahará la kuiénxinhyará kixin Dios tjuàhará kixin tjinkaon ch'án chrókuítóhéra tí nkehe jínahya tjenkayáxinrá.

⁵ Kjánchó jahará imá icha asánrá, tjinkákonhyará chrókuítóhéra tí nkehe jínahya tjenkayáxinrá, a ntá antsí má nchek'ánkírá tí nkehe jínahya tsjasótexínrá tí yaon tsjixixín tió tsonoxín kixin sinchekjasóte Dios chojni.

⁶ Jehe ch'án mé tsjenkehe ch'án jnkojnko chojni nkehe tí xra tsíkjich'e sín.

⁷ Tsjanjon ch'án kjuachón ts'áyéhe tí sín tjeyá sín tí nkehe náxrjón la ko tí kjuachaxin ts'itjáyanyha la ko xráxín kjuích'e xra jína.

⁸ A ntá tsonínkaon Dios sinchekjasóte ch'án kaín tí sín nchehnke la ko tí sín tjinkakonhya chrókjuich'e sín tí nkehe jína. A ntá náhí, la íchá má kóxrjínhín sín kjuích'e sín tí nkehe jínahya.

⁹ Mé xikaha tsjasóte sín la ko kjuaxróxinhya tsonhen kaín tí sín kjuích'e tí nkehe jínahya, mé senó tí sín judío la ko kjaxin tí sín jehya judío.

¹⁰ A ntá Dios mé tsjanjon kjuachaxin la ko tsjanjon ch'án kjuaxróxin la ko tsjikosáyehe ch'án kaín tí sín kjuínchexiteyéhe ch'án kjuích'e tí nkehe jína, mé senó tí sín judío la ko kjaxin tí sín jehya judío.

¹¹ Dios la t'ikon kixin kaín chojni la jnkokón sínkí.

¹² Kaín tí sín tjasin jiē kixin noehya sín tí ley tsíkjin ch'ín Moisés la kjónté chónhya sín tí ley la its'en sín. A ntá tí sín ó nohe tí ley tsíkjin ch'ín Moisés ntá tjasin sín jiē, la tí ley a mé tsjanchia jiē tsjasótexín sín.

¹³ Jehya tí sín ó chrókuinhón tí ley la ó chrókótjuáxin ijíé sín. Náhí. Tí sín sinchexiteyéhe sín tí nkehe k'uetōan Dios mé tsotjuáxin ijíé sín.

¹⁴ A ntá tí sín jehya judío chóntahya sín tí ley t'etuenhen sín la ntá tió jehó sín chrókjuinchexiteyéhe sín éxí nixja tí ley la jehí jehó sín t'etuenhen asén sín.

¹⁵ Kixin tí kjuínchexiteyá sín ch'e sín tí nkehe jína mé tjakoxin sín kixin asén sín xraxinkakonxín sín tí nkehe ntoá la ko asén sín tjanchankíhi sín á jína tjejó sín o náhí.

¹⁶ Itsi tí yaon la Dios mé sinchekitoexín kjuachaxin Inchéni Jesucristo kaín nkehe imó kjuích'e chojni éxí nixja tí tan jína tjákua janhan.

Tí sín judío la ko tí ley tsíkjin ch'ín Moisés

¹⁷ A ntá jahará ntáchorá kixin jahará judíorá la tinkachónkirá tí ley tsíkjin ch'ín Moisés la ko nchehnkerá kixin tinkachónkirá Dios.

¹⁸ Ó nohará tí nkehe tjinkaon Dios la ko tí ley ó kjuakohará kixin chrókjuéyará tí nkehe jína.

19 Iñkerá kixin nohará tsjákohérá tí sín t'ikonhya la ko jahará mé xrohi ts'inkáséyanxín tí sín ixri sítié, ichrorá.

20 Ntáchrórá kixin nohará tsjákohérá tí sín noehya la ko tsjínkĩtsará tí sín tiexínhya kixin jahará chontará tí ley chrónka kjuaxrexinkaon jína la ko tí nkehe chaxín, ichrorá.

21 Jahará tjákohérá í so chojni, a ntá jahará, ¿nkekuènté tjákoéhyará asánrá xikaha? Jahará tjákohérá chojni kixin chrókueéhya sín, a ntá jahará la, ¿nkekuènté teerá?

22 Ntáchrórá kixin xitjahya tsochónta chojni yaá chojni chjin, a ntá jahará la, ¿nkekuènté xikaha ch'era? Ntáchrórá kixin titekákonhyará tí nkehe tsíkjanoya, kjánchó jahará, ¿nkekuènté teerá tí nkehe tjete siín nkaxenhen ninko?

23 Nchehñkerá kixin chontará tí ley, a ntá jahará chontahyará kjuasáyé Dios kixin kjuinchexiteyéhya éxi k'uetōan tí ley.

24 Ntoá ntáchró tí xroon itén Dios kixin: “Tí sín jehya judío la t'ántaxínhñ sín Dios kixin tí ijjará.”

25 A ntá tí chaxín kjuinchexiteyará tí ley tsíkjin ch'ín Moisés la ntá jehya chónkó tsíkará xroye. A ntá tí kjuinchexiteyéhya tí ley la éxi tsíkahyará ninkehó xroye.

26 A ntá tí sín tsíkahya xroye kjánchó titekaon sín nkexrí t'etōan tí ley la tjejó sín éxi ó tsíka sín xroye kjónté chaxínhya chóna sín.

27 A ntá tí nkexro kuáhya xroye tí cuerpo chóna kjánchó nchexiteyéhe tí ley, mé jehe sín tsjanchia sín jie tí jahará kixin jahará kuitekákonhyará kjónté chontará tí xroon nixja tí ley la ko kjónté ó tsíkará xroye.

28 A ntá tí xikaha la chaxínhya judío jahará kixin ó ntója ó chontará xroye la chaxínhya tsíkará xroye kixin chrítaón cuérporá ó, chontará.

29 A ntá tí chojni chaxín judío la t'ichjánxñ chróchóna sín xroye nkaya asén sín. Jehya tí ley chrók'uetōan xikaha chrókonhen. Náhí. Táha la Nchakuen Dios. Jehya kixin chojni chrókoxrjínhñ kixin ó nchōxon. Náhí. Dios mé tsoxrjínhñ kixin nchōxon tíha.

3

1 ¿A ntá nkehe tsonhen kixin ntáchró sín kixin judío sín la ko nkehe tsonhen kixin tsíka sín xroye?

2 Chaxín xikaha jína kixin Dios kjuanjon tí itén ch'án saoxín k'uáyéhe tí sín judío kixin chrókjuinchexiteyá sín.

3 A ntá ¿nkehe tsonhen tí jnkójín tí jehe sín chrókjuinchexiteyáhya sín? Kjónté xikaha chrókjuich'e sín la, ¿á chrókuítóhe Dios chrókjuinchexiteyáhya ch'án tí nkehe tsíntáchró ch'an?

4 Kjá náhí. Dios la sinchexiteyá kaín nkehe tsíntáchró ch'án kjónté kaín chojni chrókjuich'ia. Ntáchró xroon itén Dios kixin: Tsontáchró chojni kixin ntoá tí nkehe ntáchróa.

Tíha mé tsjachaxian tí tsjanchia sín jie.*

5 Tí jie chóntani mé tjákoqxñ kixin Dios mé nohe nkexrí sinchekitoexín ch'án ijje chojni. ¿A ntá nkehe chróchroni? ¿A ntoáhya chrókjuich'e Dios kixin chrókjuinchekjasóteni ní? (A ntá janhan nixja éxi nixja chojni ó.)

6 Kjá náhí. A ntá tí jehya ijnko nkexro jína tí jehe ch'án, ¿ntá nkexrí chrókjuinchekitoexín ch'án ijje chojni chjasintajni?

7 A ntá tí chrókjuínkĩtsa tí kjuach'ia kuèntana kixin chrókónoaxínrá tí nkehe chaxín kuènte Dios, ¿a ntá nkekuènté ts'ékaráni jie kixin janhan mé ijnko chojni chóna jie?

* 3:4 Salmo 51.4

⁸ Tí xikaha la, ¿á chrókjuich'eni tí nkehe jínahya kixin ntá chrókui tí nkehe jína? Mé xikaha ichro iso chojni t'ekani jie kixin xikaha tjakoni, ichro sín. Tí sín a chrókjuasóte sín kixin xikaha ichro sín.

Kaínni chóntani jie

⁹ ¿Ntá nkexrí? Jeheni judíoni la, ¿á antsí má tjetooanni, a ntá tí sín í so la, á náhí? Kjá náhí. Kixin kaín ni chojni judíoni la ko tí sín jehya judío mé kaín ni kjuínchexiteyéheni tí jie kjuasinni.

¹⁰ Ntáchro tí xroon itén Dios kixin:
Kohya ninkexró chrókjuich'e tí nkehe jína, la kohya nijnko chojni.

¹¹ Kohya ninkexró tienxín,
Kohya ninkexró chrókjuéyá Dios.

¹² Kaín chojni k'ué'aji sín tí ntia jínahya la ko kaín chojni jnkokón k'uáji sín ntoáhya,

kohya ninkexró chrókjuich'e tí nkehe jína la kohya nijnko chojni.†

¹³ Tí isin chojni la éxí tòye tsíxrankehe tsíxravá chojni
kixin tí nejen chojni ch'iyaxín.

La tí veneno kuènte konche chóna ir'va chojni.‡

¹⁴ Tí ir'va chojni tsíkaón nkehe jínahya la ko kjuanínkaon.§

¹⁵ Xritinká sín kixin tjinkaon sín chrók'óyán sín chojni.

¹⁶ Tí ntia k'uáji sín tió xikaha kjuí'ch'e sín mé kjuínchek'itjáyan sín kaín
kjuaxróxin k'uéchóna ókjé chojni.

¹⁷ Chónhya sín tí ntia tjanjon kjuaxróxin*

¹⁸ kixin kjuenkayáxinhya sín chróchrakõnhen sín Dios.†

Mé xikaha ntáchro itén Dios.

¹⁹ Ó noheni kixin kaín tí nkehe nixja tí xroon chóna tí ley mé k'uetuènen
kaín tí sín tinkáchónki tí ley kixin ntá kaín chojni chjasintajni chrótání sín kixin
kaín chojni tsjasóte kixin Dios mé sinchekitoexín ijíé kaín chojni.

²⁰ Kixin ninkexró chrókjuacha chrókótjuáxin ijíé sín kixin
chrókjuinchesiteyéhe sín tí nkehe t'etõan tí ley. Tí ley la jehó ch'e xra
tsonoexínni kixin chóntani jie.

Tsaáxinni kixin tinkáchónkini Cristo

²¹ A ntá jehya tí ley chrókuaáxinni. La ntá ó kónoxín nkexrí Dios tsaáxinní la
kjaxin tí xroon chóna ley la ko tí nkehe nixja tí sín profeta la ó nixja xikaha.

²² Tsotjuáxin ijíéni kixin titekaonni Jesucristo kixin kaín chojni chrókuaáxin
tí tsitekaon sín tí jehe ch'án kixin t'ikon ch'án kixin jnkokón tsjehe kaín chojni.

²³ Kixin kaín xín chojni kjuasin jie la k'uáyèhya sín tí kjuachaxin chrókuaáxin
sín.

²⁴ A ntá kjuasáyé Dios kixin k'uenyákonhenni Cristo Jesús la kótjuáxin ijíéni.

²⁵ Dios mé ichr'án ch'án Cristo, kuámá ijíéni, k'uenyákonhenni ch'án kixin
chrókuinkáchónkini ch'án ntá chrókuaáxinni. Mé xikaha kjuí'ch'e Dios kixin
kjuakoxin ch'án kixin ntoá kjuenkayáxin ch'án kixin kónínkakonhya ch'án
kjónté nchónhya jie tsíkjasinni senó.

²⁶ Xikaha kónhen kjuakoxin Dios kixin jína ch'án ijie la naxa tjechónhen ch'án
sinchetjóá ch'án ijíé tí sín kuítekaon Jesús.

²⁷ A ntá ¿nkekuènté chrókjuinchehnkeni? Xitjahya sinchehnke chojni
nkayakon Dios kixin jehya kixin kjuínchexiteyéheni tí nkehe k'uetõan tí ley ntá
chrókuaáxinni. Náhí. Kixin Ìnchéni kuítekaonni ntá kuaáni.

† 3:12 3.10-12 Salmo 14.1-3, Salmo 53.1-3 ‡ 3:13 Salmi 5.9, 140.3 § 3:14 Salmo 10.7 * 3:17
Isaías 59.7-8 † 3:18 Salmo 36.1

28 Mé xikaha ó noheni kixin tsotjuáxin ijiéni tí tsitekaonni Dios kixin Dios tahya cuenta á kjuínchexiteyéheni tí nkehe k'uetqan tí ley.

29 ¿Xá Dios mé kuénte tí sín judío ó? ¿Á kjaxinhya Dios kuénte tí sín jehya judío? Kjá kjaxin Dios mé kuénte tí sín jehya judío.

30 Kixin kohya í jnko Dios la jehe ch'án sinchetjóá ch'án ijiéni kixin tinkáchónkini ch'an la tahya ch'an cuenta á chóntani xroye o náhí.

31 A ntá tí tinkáchónkini Inchéni, la ¿á í chrókjuinchexiteyáhyani tí ley? Kjá náhí. Íchá antsí má jína chrókjuinchexiteyéheni tí ley.

4

Tí kjuakoxin ch'ín Abraham

1 ¿Nkehe tsixroni kixin nkehe k'uitja ch'ín Abraham, tí nkexro k'uaxrjeníxinni ósé?

2 Ntá ch'ín Abraham tí chrókótjuáxin ijié ch'án kixin tí xra kjuích'e ch'án ntá chrókónke ch'án, kjónté jehya nkayakon Dios.

3 A ntá ntáchro xroon itén Dios kixin: “Ch'ín Abraham kuítekaon Dios ntá táhó kuaáxin ch'án la ko kótjuáxin ijié ch'án.”*

4 Jnkojín chojni kjuích'e xra la jehya k'uáyéhekoá ch'án tí chichaon. Náhí. Táha la tí xra kjuích'e ch'án mé kjuacha ch'án.

5 A ntá kjónté jnkojín chojni kjuích'e hya ninkehó xra ntá chrókuítekaon ch'án Dios a ntá Dios la sinchetjóá ch'án kjónté tí nkexro chóna jie, kixin tí kuítekaon ch'án Dios la táhó mé kuaáxin ch'án.

6 Mé kjaxin tsintáchro ch'ín David kixin náxrjón tí nkexro kótjóá kixin Dios kuáhya kuentá nkerí jie tsíkjasin ch'án.

7 Ntáchro ch'ín David kixin: Náxrjón tjejó tí nkexro kjuíncheyaon Dios kjónté jínahya kjuích'e sín la kjuakjin ch'án ijié sín.

8 Náxrjón tjejó tí nkexro kixin Inchéni kuáhya ch'án kuentá tí jie k'uéchóna sín.†

9 ¿Á jehó tí sín ikuá xroye la náxrjón tjejó sín o á kjaxin náxrjón tjejó tí sín chóntahya xroye? Ó chrónkani kixin Dios la kuikonóhe tí ch'ín Abraham kixin kuítekaon tí jehe ch'án la táhó mé kótjuáxin ijié ch'án.‡

10 ¿A ntá nkesá tsíkjincheyaon Dios tí ch'ín Abraham? ¿Á ó tsíka ch'án xroye o naxa náhí? Kjá naxa náhí. Senó tsíkjincheyaon Dios tí jehe ch'án.

11 Ntá chr'éxin ch'ín Abraham ikuá ch'án tí xroye éxí ijnko sello kjuakoxin Dios kixin ó kótjuáxin ch'án kixin kuinkáchónki ch'án Dios. Kixin ntá xikaha ts'óna ch'ín Abraham xjeen kaín chojni tinkáchónki Dios, kjónté chojni tsíkahya xroye. Ntá kjaxin jehe sín la Dios sinchetjóá ijié sín.

12 La ko jehe ch'ín Abraham mé ts'axrjeníxin ch'án kaín tí sín tsíka xroye kixin ntá chrókuinkáchónki sín éxí kuinkáchónki tí jehe ch'án kjónté naxa tsíkahya ch'án xroye.

Tí nkehe tsintáchro Dios la tsoxiteyá kixin tinkáchónki sín tí jehe ch'án

13 Dios tsintáche ch'ín Abraham kixin jehe ch'án la ko tí sín ts'axrjeníxin ch'án ts'áyéhe sín chjasintajni ts'ejó sín. A ntá tí nkehe ts'áyéhe ch'ín Abraham la jehya kixin kuítekaon ch'án tí ley. Náhí. Ts'áyéhe ch'án tíha kixin kuítekaon ch'án Dios la ntá Dios mé kjuínchetjóá ijié ch'án.

14 A ntá tí jehó tí sín tsíkjinchexiteyéhe tí ley ó chrók'uáyéhe sín tí nkehe chrókjuanjon Dios, a ntá tí nkehe tinkáchónkini la ó chrókóchónkó xikaha la ko tí nkehe tsintáchro Dios la kjá ninkehó sínkíhya tí xikaha.

* 4:3 Génesis 15.6 † 4:8 4.7-8 Salmo 32.1-2 ‡ 4:9 Génesis 15.6

¹⁵ Kíxin tí ley la t̄j̄k̄ao kíxin tsjasótexín chojni, a ntá tí chrókókohya ley la chrókókohya nkehe chrókjuanchia jiē.

¹⁶ Méxra tí nkehe tsíntácho Dios la kjuasáyé ch'án tsjanjon ch'án kíxin kuinkáchónki ch'ín Abraham tí jehe ch'án la ntá Dios sinchekitonhen tíha kaín tí sín tsík'axrjeníxin ch'án. Jehya jehó tí sín tinkáchónki tí ley chrók'uáyéhe sín tí nkehe tsjanjon Dios. Náhi. Kjaxin tí sín tsitekaon éxi kuítekaon ch'ín Abraham mé ts'áyéhe sín tíha. A ntá jehe ch'án mé k'óna ch'án it'é kaín ni.

¹⁷ Éxi nixja xroon itén Dios kíxin: “Janhan kjuánjuan kjuachaxin kíxin jaha ts'óna it'é nchónhya chojni chjasintajni.” § Mé x̄ikaha tjetsjehe Dios kíxin jína kuítekaon ch'ín Abraham tí jehe ch'án. Tí Dios a mé sinchexechón tí chojni tsík'en la ko t'et̄oan ch'án kíxin ts'óna tí nkehe nax̄a kohya.

¹⁸ Kjónté k'uéchóntahya ch'ín Abraham xjeen ch'án la kuítekaon ch'án la chónhen ch'án kíxin ts'óna ch'án it'é nchónhya chojni éxi tsíchronka Dios kíxin x̄ikaha nchónhya chojni ts'axrjeníxin ch'án.

¹⁹ Ch'ín Abraham k'uéchónta ch'án chjina ijnko ciento nánó la kjánchó k'uit̄jáyenhya ch'án tinkáchónki ch'án Dios, kjónté jehe ch'án la ko tjan Sara mero its'en sín la ko ó má táda nána sín kíxin nax̄a chróchónta sín xjeen sín.

²⁰ Ch'ín Abraham la kóxakuenhya ch'án la ko chrakonhya ch'án kíxin tí nkehe tsjanjon Dios. Náhi. Íchá antsí má kuinkáchónki ch'án Dios la ko kjuanchehe ch'án kjuasáyé Dios.

²¹ Ó nohe ch'ín Abraham kíxin Dios chóna kjuachaxin sinchexiteyá kaín nkehe tsíntácho ch'án.

²² Dios k'uíkon kíxin jehe ch'ín Abraham kuítekaon ch'án ntá Dios kjuínchetjóa ijié ch'án.

²³ La jehya kíxin tsík'óna tí xroon kíxin tí ch'ín Abraham ó.

²⁴ Náhi. Tsíkjin sín xroon kíxin kjaxin jeheni chrókótjuáxin ijiéni kíxin tsitekaonni Dios. Tíhi mé tí nkexro kjuínchexechón Ìnchéni Jesucristo.

²⁵ Jehe ch'án mé k'uenyákonhenni ch'án kíxin tí jiē chóntani. Ntá xechón ch'án inaá kíxin tsotjuáxin ijiéni kíxin ó kuítekaonni tí jehe ch'án.

5

Kótjuáxin tí jiē chóntani

¹ Kótjuáxin tí jiē chóntani kíxin tinkáchónkini Cristo la kjuaxróxin ts'ejókoni Dios kíxin k'uenyákonhenni Ìnchéni Jesucristo.

² Kjuasáyé Cristo kíxin jína tsochjineheni Dios kíxin tinkáchónkini ch'án ntá ts'áyéheni kjuachaxin kuènte ch'án. Ntá tí kjuachaxin la jína tsjinkitsa kíxin jína ts'ejóni la ko tsochéheni ts'ejóchónhenni kíxin ntá tsjintaxín ts'áyéheni tí kjuachaxin jié kuènte Dios.

³ Kjaxin jehya táhó. Náhi. Kjaxin tsochéheni kjónté nchónhya nkehe tsonhenni kíxin ó noheni kíxin x̄ikaha tsonhenni kíxin ntá ts'itjani tsonínakonhyani.

⁴ A ntá tí x̄ikaha jína chrók'uejóni ntá tsjachani kíxin jína ts'ejóchónhenni.

⁵ A ntá tí tjejóchónhenni la tósuèhyani kíxin Dios imá tjuèheni ch'án la tí Nchakuen ch'án kjuanjon ch'án mé nchechéhe asénni.

⁶ Tí jehóni xitjahya chrókuaáni. A ntá tió ikui Cristo la k'uenyákonhenni ch'án kíxin tí jiē chóntani.

⁷ Kjá ninkexró chróntácho chrók'uenyákonhen sín íjnko chojni kjónté ijnko chojni imá jína tjuèhe kíchó. Kohya nkexro x̄ikaha chrókjuich'e.

⁸ A ntá Dios mé kjuakoxin kixin imá tjuèheni ch'án kixin kjónté naxa chóntani jje la Cristo k'uenyákonhenni.

⁹ A ntá Dios mé kjuínchetjuáxin ch'án ijiéni kixin Cristo k'uenyákonhenni ch'án ntá ó noheni kixin jehe ch'án tsaáxinni ch'án kaín tí nkehe chrókjuasótexínni.

¹⁰ Kjónté naxa k'uénínkakhenni Dios la jehe ch'án mé kjuanjon ch'án kjuaxróxin kixin k'uenyákonhenni tí Xjeen ch'án. A ntá chaxín tsaáxinni ch'án kixin tjechón ch'án la ntá ijie kjuaxróxin tjejókoni ch'án.

¹¹ La jehya chrókótíhó. Kjaxin tsochéheni kixin tinkáchónkini Dios kixin kjuasáyé Ìnchéni Jesucristo kixin Cristo chóntaxínni kjuaxróxin tí tjen Dios.

Adán la ko Cristo

¹² Mé xikaha ó jnko nkexro kjuasin jje ntá k'uixin jje kuenté chjasintajni. Mé xikaha kjuankíxin k'uén chojni ntá kaín chojni kjuankíxin k'uén kixin kaín sín kjuasin sín jje.

¹³ Kixin ósé la k'uékohya ley ntá ó xráxín k'uixin jje chjasintajni kjánchó naxa kohya ley chrókjuanchia jje chrókjuasótexín sín.

¹⁴ Desde kjuák'e ch'ín Adán hasta kjuák'e ch'ín Moisés la k'uéchónta kjuachaxin tí kjuach'én kixin tí jje kjuasin sín mé k'uénxín sín. Kjánchó tí jje kjuasin sín la yóehya tí nkehe kjuích'e ch'ín Adán, kuítekakohya ch'án tí nkehe k'uetóan Dios. Ntá ch'ín Adán yóhe tsotsjehe éxí tí nkexro tsi chr'éxin.

¹⁵ Ntá tí jje kjuasin ch'ín Adán la xitjahya chrókóyóhe tí nkehe tsjanjon Dios kixin tí jje kjuasin jnkokoá chojni la ntá nchónhya chojni k'uénxín. A ntá tí tsaáxinni la kjuasáyé Dios ichr'án jnkokoá nkexro mé Jesucristo la antsí má jína tíha kixin tsaáxin nchónhya chojni.

¹⁶ A ntá tí jje kjuasin jnkokoá chojni la tóyóehya tí nkehe tsjanjon Dios tsaáxinni. Kixin tí jje kjuankíxin kjuasótexín chojni kixin kjuasin jnkokoá chojni jje. A ntá tí tsaáxinni la kjuasáyé Dios sinchekaáni ch'án la ko nchetjóá ch'án tí jje chóntani kjónté nchónhya jje kjuasin chojni.

¹⁷ Tí kjuach'én la k'uéchónta kjuachaxin kixin tí jje kjuankíxixín kjuasin jnkokoá chojni. A ntá kjuasáyé Dios kjuínchetjóá ch'án tí jje chóntani la ntá antsí tsochóntani kjuachaxin ts'ejóni jína kixin k'uenyákonhenni jnkokoá nkexro, mé Cristo tíha.

¹⁸ A ntá tí jje kjuasin ch'ín Adán la ntá kaín chojni kjuasin sín jje chrokjuasótexín sín. A ntá ijie la Cristo mé kóttjuáxin ijié kaín chojni kixin tí jína ch'án k'uenyákonhenni ch'án.

¹⁹ Mé xikaha kuítekakohya jnkokoá chojni, mé Adán tíha, ntá nchónhya chojni kjuasin jje. A ntá jnkokoá nkexro jína kuítekaon kjuakoxin, mé Cristo tíha, a ntá nchónhya chojni tsaáxin tí jehe ch'án kjónté k'uéchonta sín jje.

²⁰ Ikui tí ley kuínhin sín ntá kónoxín kixin íchá antsí kjuasin sín jje. A ntá antsí k'uixin jje la kjónté xikaha la antsí má kuikonóeheni Dios kixin jehe ch'án tsjinkitsani ch'án tsaáxinni.

²¹ Mé xikaha tí jje k'uixin k'uéchónta kjuachaxin kjuikao kjuach'én chrók'uénxínni. A ntá kjuasáyé Dios kjaxin antsí má chóntha ch'án kjuachaxin sinchetjóá ch'án tí ijiéni la ko tsjanjon ch'án kjuachón jnkochrín kixin Ìnchéni Jesucristo ikui ch'án k'uenyákonhenni ch'án, tsaáxinni.

6

Ó k'uén tí jje ntá Cristo kjuínchexechónni

¹ A ntá ijie ¿nkehe tsixroni? ¿A naxa chrókjuasinni jje kixin ntá Dios naxa chrókjuakoxin ch'án kixin chrókuikonóeheni ch'án?

² Kjá náhí. A ntá jeheni la éxí chojni tsík'en chrokjuahya tsjasin jie. ¿A ntá nkekuènte naxa chrókjuasinni jie ínaá?

³ ¿A noahyará jahará kixin tí kuíkiteni kixin tinkáchónkini Cristo la yóhe k'uénkoni ch'án?

⁴ Tí kuíkiteni la éxí yóhe xravákoni Cristo la ko tsík'enkoni ch'án kixin ntá ó xechónni ntá chrók'uajini ijnko ntia nixin mé xikaha Cristo xechónxin ch'án tí kjuachaxin jie chóna tí It'é ch'án.

⁵ Kixin tí chaxín k'uexínni éxí ik'uén tí jehe ch'án la ntá kjaxin tsoxechónni éxí xechón tí jehe ch'án.

⁶ Ó noheni kixin nkexrí k'uejóni senó mé táha mé k'uexín Cristo kjuák'enkánixín ch'án ntacruz kixin ntá chrók'uitjáyaxín kaín tí jie k'uékjasinni kixin ijie í chrókjuinchexiteyèhyani tí jie.

⁷ Tí nkexro ó k'uén la ntá ó kuítóhe tí jie.

⁸ A ntá jeheni tí k'uexínni Cristo la ó noheni kixin ts'ejókoni tí jehe ch'án.

⁹ Kixin ó noheni kixin Cristo jnkokoá vez xechón ch'án a ntá í ts'enhya ch'án ínaá kixin tí kjuach'én í chóntahya kjuachaxin kixin naxa ts'óyán tí jehe ch'án.

¹⁰ Tí ik'uén Cristo la ó naá ik'uén ch'án kixin k'uenyákonhenni ch'án kixin tí ijieni. Ntá xechón ch'án ijie kixin tsjak'eko ch'án Dios.

¹¹ A ntá kjaxin jahará chrókjuenkayáxinrá kixin ik'uénrá, xitjahya tsjásinrá jie kixin ntá ijie la xíxechonrá chrókjuich'eherá xra Dios kixin tinkachónkirá Cristo Jesús, mé Ìnchéni tíha.

¹² Méxra chrókuítóéhyará kixin chrókjan tí jie chrók'uetuèhen tí cuérporá ínaá kixin tí jie chrók'uetoan kixin chrókjuinchexiteyéherá tí nkehe tjenkayáxinrá.

¹³ Tjánjonhyará tí cuérporá kixin chrók'óna nkehe chrókjuásixínrá jie. A ntá íchá jina chróchjehérá asánrá Dios éxí ijnko chojni tsík'en ó xíxechón ínaá. Chjehérá Dios tí cuérporá ts'óna ijnko nkehe sich'exín ch'án xra jina.

¹⁴ Kixin tí jie la í chóntahya kjuachaxin ts'etuèhen tí jahará. Jehya tí ley ts'etoan ijie. Náhí, jehó kjuasáyé Dios.

Kjuíncheyóexin ch'ín Pablo nkexrí tí chojni ch'exón xra

¹⁵ A ntá ijie ¿nkexrí? ¿A chrókjuasinni jie kixin í t'etuèhyani tí ley? Kjá náhí. Kjuasáyé Dios tsaáxinni la kjá í chrókjuasinyani jie.

¹⁶ Jahará ó nohará jina kixin tí sich'ehe ni ijnko lámo xra la tsitekakonhenni ch'án la tí xikaha la t'ichjánxin ch'ehe ni xra tí lámo la t'ichjánxin sinchexiteyéhe ni ch'án. Mé xikaha tónhen tí naxa sinchexiteyéhe ni tí jie la táha mé ts'enxíni. A ntá tí tsitekaonni Dios la mé chrók'uejóni jnkójina.

¹⁷ Jahará la ósé k'uékjásinrá jie, a ntá ijie kjuasáyé Dios kuíkonóahará ch'án kixin kaín asánrá kuítekáonrá tí nkehe xrakohará.

¹⁸ A ntá ó kuítóhérá tí k'uékjinchexiteyéherá tí jie. A ntá ijie ó kjuánjonrá asánrá kixin sich'erá xra jina kuènte Ìnchéni.

¹⁹ A ntá jie nixja éxí ijnko chojni ó kixin jahará la tiénxinyará jina tí nkehe i. A ntá xikaha tí senó kjuinchexiteyéherá tí nkehe ntoáhya la ko jínahya kixin sich'erá tí nkehe jínahya. A ntá ijie la xikaha chrókjuánjonrá tí cuérpo kuéntará kixin chrókjuich'exínrá tí xra jina éxí tjinkaon Dios kixin ntá jehe ch'án chrókjuinchetjóará ch'án.

²⁰ A ntá tí jahará tió naxa kjuinchexiteyéherá tí jie la ntá xitjahya sich'erá tí xra jina ntoá.

²¹ ¿A ntá nkehe chrókjuachará kixin xikaha kjuich'erá tí nkehe chrókósuáxinrá ó? Ntá xikaha kjuéyará tí nkehe ts'énxinrá ó.

22 Na ntá ijie ó kjuin tí nkehe k'uék'etuñhanrá k'uékjásinxínrá jie. A ntá ijie ch'eherá xra Dios. Táha la tsjinkitsa kixin ts'ejoxinrá jína kixin ntá tsjixixín tsotjuáxinrá ts'ayéherá kjuachón jnkochrixín.

23 A ntá tí chrókjuasinni jie la chrókjuachani kixin éxi chrók'uenni ó. A ntá tí nkehe chrókjuinchekitonhenni Dios la kjuachón jnkochrixín kixin tinkáchónkini Ìnchéni Cristo Jesús.

7

Kjuíncheyóexin ch'ín Pablo kuènte tí sín tsíkótehe

1 Kíchóni, jahará ó choxinrá tí ley la ó nohará kixin tí ley chóna kjuachaxin ts'etuñhen tí chojni naxa tjejóchón ó.

2 Tíha mé ts'axrjexín éxi ijnko chojni chjin tsíkótehe la tí xii tjan chóna kjuachaxin ts'etuñhen tjan kixin naxa tjechón ch'án. A ntá tió tsík'en tí xii la ntá tí tjachjin la ó kuítóhe tí k'uék'etuñhen ch'án tjan.

3 A ntá tí jehe tjan chrókuakja í jnko chojni ntoá tí naxa tjechón xii tjan la ó chrókjuasin tjan jie. A ntá tió tsík'en xii tjan la jehe tjan la ó kuítóhe tí k'uék'etuñhen ch'án tjan la jína tsotehe tjan í jnko chojni ntoá la jehya jie tíha.

4 Mé xikaha jahará kichó ni mé k'uenyákonhenni Cristo la ntá jahará la éxi tsík'enrá kixin í t'etuñhyará tí ley la éxi chrókuákjára í jnko xiará la mé xikaha tinkáchónkirá Cristo. Cristo mé xechón ch'án inaá kixin ntá jína chrókjuich'ehe ni xra Dios.

5 Tió naxa k'uékjasinni jie a ntá tí ley chrókjuich'e xra kixin chrókjuasinhyani jie, a ntá íchá antsí má kjuasixinni jie tí cuerpo kuènténi, la táha mé kjuixín tí ts'énxinni.

6 A ntá ijie la éxi yóhe ik'uénni, a ntá tí ley chónahya kjuachaxin naxa ts'etuñhenni. A ntá ijie í kohya nkehe t'inkákonhen kixin jína sich'ehe ni xra Dios kixin k'ónani ijnko chojni nixin kixin tí Nchakuen Dios k'uáyéhe ni. A ntá í t'etuñhyani tí ley ntaxin tsík'óna.

Tí jie naxa chonta

7 A ntá tí xikaha la, ¿nkehe chróchroni? Kixin tí ley la, ¿á jie táha ní? Kja náhí. Kjánchó janhan chrókónonahya nkehe tí jie tí chrókohya tí ley chróchrónka. Chrókónonahya kixin tí nkehe ókjé chrókjuakéhya asenná tí chróchrónkahya tí ley kixin chrókjuakéhya asenná tí nkehe ókjé.

8 A ntá tió kónona tí ley a ntá tí jie antsí kjuacha k'uetōan. La ntá k'uixín kaín nkehe ntáchro asenná. A ntá tí chrókohya ley la chrókónoxínhya tí jie chrók'uénxiān.

9 A ntá tí ósé la nonahya nkehe tí ley. A ntá tió nóna nkehe tí ley, a ntá antsí kjuásian jie la ntá ó nóna kixin tí jie kjuásian me ts'énxiān.

10 Mé xikaha kónhen kixin tí ley chrókjuanjon kjuachón ntá kjuikao tí ts'énxinni.

11 Ntá tí jie mé kjuacha k'uetōan kixin sintaxiteyáhya tí ley. A ntá tí ley mé kjuanchia jie ts'énxiān.

12 Mé xikaha tí ley la chaxín jína la ko tí nkehe t'etōan Dios la kjaxin jína.

13 Mé xikaha tí nkehe jína la ¿á táha chrók'uénxiān? Kjá náhí. Tí jie kjuásian mé ts'énxiān. Mé xikaha kjuakoxin tí nkehe jie kixin tsonoxín tí jie kixin tí ley la jína. Mé xikaha kjuakoxin tí ley kixin tí jie tjasin chojni mé imá jínahya tíha.

14 Ó noheni kixin tí ley la kuènte Dios tíha. A ntá janhan la kjuintaxiteyáha tí ntáchro asenná kixin tí jie kjuacha k'uetōanna.

15 **A** ntá tí janhan la tí nkehe tjét'a la kjaxin naxa tianxínhya kixin janhan la t'ahya tí nkehe tjínkavan chrókjuít'a, a ntá ijie mé it'a tí nkehe tóxrjínahya chrókjuít'a.

16 **A** ntá tí nkehe tjínkakhonhya chrókjuít'a la tíha me it'a la mé xikaha tjátsoanxián kixin tí ley la jína.

17 **A** ntá jehya janhan it'a tíha. Náhí tí jie chonta mé ch'e tíha.

18 Kixin janhan ó nòna kixin tí ntáchro asenná la kohya nkehe jína chrókjuít'a. Tjínkavan chrókjuíntaxiteyá tí nkehe jína kjánchó tjachahya sit'a tíha.

19 T'ahya tí nkehe jína chrókjuít'a. Tí nkehe jínahya tjínkakhonhya chrókjuít'a mé it'a.

20 **A** ntá tí it'a tí nkehe jínahya tjínkakhonhya chrókjuít'a la ntá jehya janhan it'a tíha. Náhí. Tí jie chonta mé ich'e tíha.

21 Tónòna tíhi. Tí tjínkavan chrókjuít'a tí nkehe jína la mé íchá antsí it'a janhan tí nkehe jínahya.

22 Kjónté xikaha la tóxrjínna chrókjuíntaxiteyáha tí ley kuènte Dios.

23 T'íkuan kixin tí nkehe ntáchro asenná mé t'inkákonhen tí nkehe tjínkavan chrókjuít'a. **A** ntá tí jie chonta mé éxí tjéchinaxián tíha.

24 Nòna tí janhan. ¿Xá nkexro chrókjuatsen tí jie chóna tí cuerpo kuèntana chrók'uenxian?

25 Kjuasáya tjaha Dios kixin ikui Ìnchéni Jesucristo kuaáxinni. Mé xikaha tí janhan la it'ona tjenkayáxian kixin chrókjuíntaxiteyáha Dios a ntá tí t'ona mé ntáchro asenná chrókjuíntaxiteyáha tí nkehe kuènte tí jie.

8

Tjejóchónxinni Nchakuen Dios

1 **A** ntá ijie tí sín tinkáchónki Cristo Jesús la kohya jie chrókjuasótexín sín. Jehé sín í tjínkakhonhya nchexiteyá sín xikaha ntáchro asén sín. Jehó tjínkaon sín sinchexiteyéhe sín Nchakuen Dios.

2 Kixin tí nkehe t'etoan Nchakuen Dios mé tjanjon kjuachón kixin tinkáchónkini Cristo Jesús. Tíha mé kjuatsen tí nkehe kuènte jie chrók'uenxinni.

3 **A** ntá Dios kjuích'e tí nkehe kjuachahya kjuích'e tí ley kuènte ch'ín Moisés kixin jeheni kjuachahyani chrókjuinchexiteyéheni tíha. **A** ntá Dios mé ichr'án ch'án Xjeen ch'án k'óna éxí chojni. La xra ó kui ch'án k'uenyákonhen ch'án tí ijiéni kaín ni ntihi chjasintajni la kjuatsen ch'án tí jie chrók'uitjáyánxinni.

4 Mé xikaha kónhen kixin ntá jeheni jína chrókjuinchexiteyéheni tí nkehe t'etoan tí ley la chrókjuinchexiteyéheni tí nkehe ntáchro asénni ó. Náhí. Chrókjuinchexiteyéheni tí nkehe ntáchro Nchakuen Dios.

5 **A** ntá tí sín tjínkaon nchexiteyéhe tí nkehe ntáchro asén sín ntá táhó tjenkayáxian sín. **A** ntá tí sín tjínkaon nchexiteyéhe Nchakuen Dios la ntá xritjeyá sín tí nkehe kuènte Nchakuen Dios.

6 **A** ntá tí sín tóxakonhen tí nkehe ntáchro asén sín la táhó ts'enxín sín. **A** ntá tí sín tóxakonhen tí nkehe kuènte Nchakuen Dios la tsochóntaxín sín kjuachón la ko kjuaxróxin.

7 **A** ntá tí sín imá tóxrjínhin tí nkehe ntáchro asén sín ó la mé nínkakhonhen sín Dios kixin tjínkakhonhya sín la ko titekakhonhya sín tí ley.

8 Tí sín tóxrjínhin sín tí nkehe ntáchro asén sín ó la xitjahya sinchechéhe sín Dios.

9 **A** ntá jahará la nchexiteyéhará tí nkehe ntáchro asánrá. Náhí. Jahará nchexiteyéhéra Nchakuen Dios tí chaxín chontará Nchakuen Dios. **A** ntá tí nkexro chóntahya Nchakuen Cristo la í tinkáchónkihya sín Cristo.

10 A ntá tí Cristo tjejókoará tí jahará la tí asánrá la tjechón kixin Dios kuikonóahará, kjuínchetjóá ch'án tí ijjará, kjánchó tí cuerpo la éxí tsík'en kixin tí jie chontará.

11 A ntá jahará ó chontará Nchakuen Dios, tí nkexro kjuínchexechón Cristo Jesús. Tí Dios a mé kjuínchexechón Cristo la ntá kjaxin tsochjéhe ch'án kjuachón nixin tí cuerpo kuéntará kjónté chóna jie kixin tí Nchakuen Dios chontará jahará.

12 Mé xikaha kichó ni, ó chóntani nkehe sinchexiteyéheni, kjánchó í chrókjuenkayáxinhyani tí nkehe ntáchro asénni.

13 A ntá jahará tí chrók'uejorá éxí ntáchro asánrá la tíha la mé chrók'ueñxinrá. A ntá jahará ó chontará Nchakuen Dios ntá chrók'uen tí nkehe ntaxin kjuenkayáxinrá la ntá jehó Nchakuen Dios chrók'uejochonxinrá.

14 Kaín tí nkexro t'etuenhen Nchakuen Dios la mé ó k'óna xjeen Dios.

15 Ntá Nchakuen Dios ó k'uayéherá jahará la jehya tí nchakuen tí nkehe k'uék'etuanhanrá ósé kixin chróchrakonrá. Náhí. Ntá tí Nchakuen chóntani la k'ónaxínni xjeen Dios. A ntá tí Nchakuen ch'án nchexraxinkaonni tsonáchroni kixin: "It'éni Dios kuéntá tí jeheni."

16 Tí Nchakuen Dios tónoxín nchakuenni kixin k'ónani xjeen Dios.

17 A ntá ó k'ónani xjeen ch'án la kjaxin tsjanjon ch'án tí nkehe ts'áyéheni éxí tsíntáchro ch'án ósé. Mé ts'áyèkoni Cristo tí nkehe tsjanjon Dios. Tí chaxín tsjasóteni éxí Cristo kjuasóte ntá chr'éxin ts'ejókoni ch'án kjuaxróxin.

Tí kjuachaxin jie itsi chr'éxin

18 A ntá ijie la tóxakuenhyani kjónté nkehe ts'atsínkani tsjasótéxínni kixin tíha la ninkehó sínkíhya kixin tíha la xitjahya tóyóhe tí nkehe ts'áyéheni chr'éxin kixin antsí má jina náxrjón tíha.

19 Tí nkehe tsík'óna tjejóchónhen kixin ts'ikon tí sín tsík'óna xjeen Dios.

20 Kjónté kaín nkehe tsík'óna siín la ts'itjáyán tíha la jehya kixin xikaha tjinkaon tí nkehe tsík'óna. Náhí. Jehí xikaha tsík'etoan Dios. Ntá tjejóchónhen kaín nkehe tsík'jich'éna Dios

21 kixin chróchóna kjuachaxin chrók'uitjáyánhya. Ntá náxrjón ts'ixin kaín nkehe éxí náxrjón ts'ejó tí sín tsík'óna xjeen Dios.

22 Ó noheni kixin kaín tí nkehe kjuích'éna Dios la naxa tsjasóte éxí yóhe tjetéxin ijnko chojni nchekokjíhi xjeen.

23 A ntá jehya jehó tí nkehe tsík'óna t'ikon chojni chrókjoté. Náhí. Kjaxin jeheni tjasóteni kjónté chóntani Nchakuen Dios kixin tí Nchakuen Dios la mé tí nkehe xrankixixín kuákjani la naxa ts'áyéheni inaá tí nkehe naxa tsjanjon Dios. Tjejótjasóteni la ko tjejóchónhenni kixin tsjintaxín ts'ónani xjeen Dios la ko ts'áyéheni tí cuerpo chónhya ts'en.

24 Mé ó kuaáxinni la naxa tjejóchónhenni tí nkehe t'ikonhyani. Tí k'uíkonni tí nkehe tjejóchónhenni ntá t'ichjánxinhya chrók'uejóchónhenni. Tí nkehe ó t'ikonni la t'ichjánxinhya chrók'uejóchónhenni naxa chrók'uikonni inaá.

25 A ntá tí chónhenni tí nkehe naxa t'ikonhyani la ntá t'ichjánxin tsonínkakonhyani tsochónhenni.

26 Mé kjaxin xikaha tí Nchakuen Dios tjinkitsani tí noehyani nkexrí tsonixjeheni Dios kixin chaxín noehyani tsonixjeheni ch'án éxí chrónixjani. A ntá tí Nchakuen Dios tjinkitsa nixjaxin ch'án tí jeheni kjónté noehyani nkexrí tsochrónóaxinni éxí tjinkaon ch'án.

27 Dios mé nohe ch'án nkehe tónhen asénni la nohe ch'án nkehe ichro tí Nchakuen ch'án kixin tí Nchakuen ch'án mé chrónóaxin éxí tjinkaon Dios la nixjaxin ch'án tí sín tinkáchónki Dios.

28 Ó noheni kixin Dios la k'uetōan kaín nkehe chrók'uaxrje jína kixin tí sín tjuèhe ch'án kixin tsíkjejá ch'án sín kixin xíkaha tjinkaon ch'án.

29 Tí sín tsíkjejá Dios ósé la ntá tsík'íyehē ch'án kixin ts'óna sín éxí tí Xjeen ch'án kixin ntá tí Xjeen ch'án mé ts'etuenhen nchónhya tí sín kichó ch'án.

30 Mé xíkaha tí sín tsíkjejá Dios ósé mé kjaxin k'uíyehē ch'án sín la ko tí sín k'uíyehē ch'án la kjuínchetjóá ch'án ijíé sín la ntá tí sín kjuínchetjóá ch'án ijíé la kjuanjon ch'án kjuachaxin kuènte ch'án tsochóna sín.

31 ¿A ntá nkehe chróchroni tí xíkaha? Tí Dios tjuèhe tí jeheni, ¿a ntá nkexro chrókjuacha chrókónínkakohen tí jeheni?

32 Kixin Dios la kjiakuènhya tí Xjeen ch'án. Kjuanjon ch'án k'uenyákonhenni kaín ni, a ntá tí ó kjuanjon ch'án Xjeen ch'án la kjá kaín nkehe chrókjuanjon ch'án.

33 ¿Nkexro chrókjuacha chrókjuanchia jie chrókónínkakohen tí sín kjueyá Dios? Kixin Dios la ó kjuínchetjóá ijíé tí sín a.

34 ¿Nkexro chrókjuinchekjásóte tí jehe sín? Kixin Cristo la ó k'uenyákonhen sín la kjaxin xechón ch'án inaá la itjen ch'án tí tja chjina Dios tjen nkaya nkajní la tjechronōa ch'án kixin kaín tí jeheni.

35 ¿Xá nkexro chrókuakitsjeheni tí tjuèheni Cristo? Kjónté ichrén nkehe chrókónhenni la ko chrókónínkakohen chojni tí jeheni la ko kjónté chrók'uenxínni kjinta la ko chróchóntahyani ikéni o kjónté tí kjuaxikaon chrók'uenxínni la chrókuítōehya ch'án tí jeheni.

36 Éxí ntáchro xroon itén Dios kixin: Tí tinkáchónkini tí jaha la síin kjuaxikaon kaín yaon chrók'uenxínni. Chrók'óyánni sín éxí t'óyán sín kolélo tí matanza.*

37 Kaín tíha la antsí chrókjuachaxínni kixin kjuachaxién tí nkexro tjuèheni.

38 Ó noheni kixin ninkehó nkehe tsjachahya tsakitsjeheni tí tjuèheni Dios. Kjónté tí its'enni, o kjónté tí tjejóchónni, o kjónté tí sín ángel, o tí kjuachaxién tí jínahya, o kjónté tí nkehe sítónhen ijie, o tí nkehe tsonhen chr'éxin,

39 o kjónté tí nkehe síin nkaya nkajní, o tí nkehe imá nínka síin chjasintajni, o í jnko nkehe kjuích'éna Dios. Mé kohya nijnko tí nkehe a tsjacha tsakitsjeheni tí tjuèheni Dios kjuakoxin tí jehe ch'án kixin k'uenyákonhenni Ìnchéni Jesucristo.

9

Dios kjueyá tí sín Israel

1 Ntoá xrjanka kixin janhan ijnko chojni tinkáchónki Cristo la t'ayahya. Tí nkehe tjenkayáxian la Nchakuen Dios nchexraxinkaonna kixin chaxín.

2 Imá t'avá asenná la ko náxrjónhya tjèn

3 kixin tjínkavan kjónté chrók'uitjáyaxinna tí tinkáchónkia Cristo kixin ntá jína chrókuinkáchónki Cristo tí sín kichiná naxa kjéhyana.

4 Jehe sín mé tsík'axrjeníxin sín tí sín Israel la Dios k'uáyéhe sín éxí xjeen ch'án la ko Dios chónthehe tí jehe sín la kjuanjon kjuachaxién ch'án la kjaxin k'uáyéhe sín tí nkehe k'uetōan Dios la ko ti ley tsíkjin ch'ín Moisés la ko k'uáyéhe sín kjuachaxin ts'etōan sín kixin nkehe tí xra tsonhen nkaxenhen nínko la ko k'uáyéhe sín tí nkehe tsintáchro Dios.

5 Tsík'axrjeníxin sín tí sín tsík'axrjeníxinni ósé la kjaxin Cristo tsík'axrjeníxin tí sín israelita tió k'óna ch'án chojni. Jehe ch'án mé Dios kuènte kaín nkehe la tinkáchónkini ch'án jnkochrín. Amén.

6 A ntá tí nkehe chrókuakja tí sín Israel kjuanjon Dios la jehya kixin chróxiteyáhya tíha. Náhi. Kixin jehya kaín tí sín tsík'axrjeníxin tí sín israelita mé chrók'óna sín chojni chjasin Israel.

* 8:36 Salmo 44.22

⁷ Kíxin kénhya tí sín k'uaxrjeníxin ch'ín Abraham chrók'óna xjeen ch'án. Dios mé tsíntáche ch'ín Abraham kíxin: “Tí sín ts'óna kjéhya jaha mé ts'axrjeníxin sín ti ch'ín Isaac.”*

⁸ Tíhi mé tienxínni kíxin ninkexró xitjahya ts'óna xjeen Dios kíxin tí tsík'axrjeníxin sín chojni ó. Náhi. Jehó tí sín tinkáchónki tí nkehe tsíchenka Dios tí ch'ín Abraham mé jehe sín mé chaxín tsík'axrjeníxin sín ch'án.

⁹ Tí nkehe tsíchenka Dios tí ch'ín Abraham mé tíhi: “Itsi ijnko yaon mé tjan Sara sich'éna tjan ijnko xjan.”†

¹⁰ A ntá jehya táhó. Náhi. Kjaxin tí yaá chánjan tsíkjich'éna tjan Rebeca mé chóna jnkokoá it'é xjan mé it'in Isaac, mé tsík'axrjeníxinni ch'án.

¹¹ A ntá tí xjan la naxa kokjéhya xjan la ninkehó nkehe jína o jínahya kjuích'e xjan. Ntá kjuakoxin Dios kíxin chóna ch'án kjuachaxin éxi tsíkjenkayáxin ch'án tsjeyá ch'án nkexro ts'íyehé ch'án la tahya ch'án kuentá nkehe tí xra kjuích'e sín.

¹² Ntá kjónté la ntá chenka ch'án tí tjan Rebeca kíxin: “Tí ch'ín saon mé sich'ehe xra tí ch'ín tsoyo.”‡

¹³ Mé kjaxin xikaha ichro xroon itén Dios kíxin: “Tjuaha Jacob, a ntá Esaú la náhi.”§

¹⁴ ¿A ntá nkehe chróchroni? ¿Á ntoáhya tjenkayáxin Dios? Kjá náhi.

¹⁵ Kíxin tsíntáche Dios tí ch'ín Moisés kíxin: “Tsojtuaha tí nkexro tjinkavan tsojtuaha la ko tsikonóaha tí nkexro tjinkavan tsikonóaha.”*

¹⁶ Jehya éxi tjinkaon chojni o jehya kíxin tí nkehe ch'e chojni. Náhi. Ó jehí Dios tsíkonóehé ti jehe sín.

¹⁷ Tí ntáchro xroon itén Dios mé nixjehé Dios tí ch'ín rey Egipto kíxin: “Kjuánjuan kjuachaxin kíxin jaha k'óna rey kíxin tjinkavan chrókjuakoxian kjuachaxin kuéntana kíxin ntá kuenté chjasintajni chrókónohe la chrókuitekaon tí nina.”†

¹⁸ Mé xikaha tí tjinkaon Dios tsíkonóehé ch'án chojni la tsíkonóehé ch'án, a ntá tí nkexro tjinkakonhya ch'án tsíkonóehé ch'án la tsíkonóehya ch'án.

¹⁹ A ntá tsontáchorá kíxin: “A ntá tí xikaha la, ¿nkekuènté t'eka Dios chojni jie? ¿Nkexro chrókjuacha chrókjuanjonko tí nkehe t'etoan Dios?”

²⁰ ¿Xá nkexro tí jahará kíxin chróntácherá Dios xikaha? ¿Á ti chi tsík'óna nchetje chróntáche tí ìché chi kíxin: “¿Nkekuènté xikaha kjuích'éni?” chróchro.

²¹ A ntá kjaxin tí nkexro ch'éna chi mé chóna kjuachaxin tjinkaon sich'éna ch'án tí nkehe tóxrjínhi ch'án sich'éna ch'án, tí tjinkaon ch'án nchetje sich'éna ch'án nkehe imá náxrjón o tjinkaon ch'án sich'éna ch'án nkehe náxrjónhya.

²² Tjinkaon Dios chrókjuakoxin ch'án tí kjuachaxin kuènte ch'án chrókjuinçekjasóte ch'án chojni la kjónté xikaha kónhen la kjuacha ch'án kónínkakhya ch'án la kuíkonóehé ch'án tí sín chrókjuinçekjasóte ch'án kíxin chrókjuinçek'itjáyan ch'án sín.

²³ Mé xikaha kjuích'e ch'án kjuakoxin ch'án tí kjuachaxin imá jie chóna ch'án kíxin jehe ch'án kuíkonóeheni ch'án kíxin xikaha tsíkjenkayáxin ch'án óse kíxin náxrjón chrók'uejókoni tí jehe ch'án.

²⁴ Mé xikaha Dios tsíkjeyá ch'án iso tí sín judío la ko iso tí sín jehya judío.

²⁵ Mé xikaha ntáchro tí xroon tsíkjin ch'ín Oseas kíxin:

Tí sín jehya chjasenná la mé sintak'ian chjasenná.

La tí sín k'uétjuahya mé tsojtuaha sín ijie.‡

²⁶ Tí chjasin ntiha tsíntáchro ch'án kíxin: “Jahará jehya chjasenná”,

* 9:7 Génesis 21.12 † 9:9 Génesis 18.10 ‡ 9:12 Génesis 25.23 § 9:13 Malaquías 1.2-3 * 9:15 Éxodo 33.19 † 9:17 Éxodo 9.16 ‡ 9:25 Oseas 2.23

a ntá ijie sintak'ian xjeen Dios tjechón. §
Mé xikaha ichro itén Dios.

27 Kjaxin nixja ch'ín Isaías kuènte tí sín israelita tsintáchro ch'án kixin: “Nchónhya chojni ts'axrjenixin tí sín Israel éxí tí nchónhya nchesen siín ntayaon kjánchó tsjéhya tí jehe sín tsjacha sín tsaá sín.

28 Ntá tjoka tsonhen tí nkehe tsintáchro Ìnchéni sinchexiteyá ch'án.”*

29 Ntá kjaxin ch'ín Isaías tsintáchro ch'án ósé kixin:

Tí Ìnchéni chóna kaín kjuachaxin kuítóehya chrók'uitjayan kaín tí sín k'uaxrjenixin Israel éxí k'uitjayan tí sín chjasin Sodoma la ko Gomorra. †

Tí sín judío la ko tí tan jína

30 ¿Ntá nkehe tsixroni? Tí sín jehya judío kjueyáhya sín Dios sinchetjóá ijíé sín ntá kjónté la k'uitja sín kixin tsotjóá ijíé sín kixin tinkáchónki sín Cristo.

31 A ntá tí sín israelita chrókjuinchexiteyéhe sín ley kixin chrókótjuáxin ijíé sín kjánchó kjuachahya sín kjuínchexiteyéhe sín tíha.

32 ¿A ntá nkekuènté kixin xikaha k'uitjahya sín nkexrí chrókuinkáchónki sín Dios? Kixin kjueyáhya sín nkexrí chrókjuinchetjóá ch'án ijíé sín kixin tinkáchónki sín ch'án. Jehó tí xra kjuích'e sín chrókuaáxin sín, ichro sín. La méxra xikaha tjen tí xro kóténkixin sín.

33 Mé xikaha chronkaxín xroon itén Dios kixin: Mé xikaha kjuaké tí xro chjasin Jerusalén mé tí xro tsóténkixin sín la ko tí tjo ts'ánótjenxin sín.

A ntá tí sín chrókuitekaon tí jehe la chrókósuèhya sín. ‡

10

1 Kíchóni, kaín asenná níxjahá Dios kixin tjínkavan kixin tí sín israelita chrókuaá sín.

2 Janhan ntáxrjan kixin tí sín israelita imá tjínkaon sín chrókjuich'ehe sín xra Dios kjánchó chaxínhya kixin jehe sín la tienxínhya sín.

3 Kjaxin noehya sín kixin nkexrí chrókjuinchetjóá Dios tí ijíé sín. A ntá jehó sín xritjeyá sín nkexrí chrókótjóá sín la tjínkakónhya sín chrókjuinchexiteyéhe sín Dios.

4 A ntá Cristo mé kjuínchexiteyá kaín nixja tí ley. A ntá ijie kaín tí sín kuítekaon tí jehe ch'án mé sinchetjóá ch'án ijíé sín.

5 A ntá tí chrókótjóá ijíé sín kixin tí ley la ch'ín Moisés mé tsíkjin ch'án xikihi: “Tí nkexro chrókjuinchexiteyéhe kaín tí ley la táhó chrókuaáxin sín.”*

6 A ntá tí chrókjuínchetjóá Dios tí ijíéni kixin tí tinkáchónkini ch'án ó mé ntáchro xikihi: “Ntáchrohýará kixin, ¿Xá nkexro sáchrókjuí nkaya nkajní? (Tí xikaha la t'axrjexín kixin naxa chrókui Cristo.)

7 La ko ntáchrohýará kixin: ¿Xá nkexro chrók'uinkajin tí imá njínka?” (Mé t'axrjexín tíha kixin chrókjuíkajín sín Cristo chrók'uaxrjetaón ch'án kixin itjen ch'án tí siín tí sín tsík'en, ichro sín.)

8 ¿A ntá nkehe ichro? Ntáchro kixin: “Itén Dios la chjinaxón tjen tí tjejorá kixin ó nohará la ko xraxínkaon asánr.” † Tí tan a mé tí nkehe tinkáchónkini kjuakoni.

9 Tí ir'va tsontáchroxian kixin choxian Jesucristo mé Ìnchéni la ko tí asán tsitekaon kixin Dios kjuínchexechón ch'án ntá kjaxian tsaá.

10 A ntá tí asán tsitekaon la nta Dios sinchetjóá ch'án tí jaha la ko tí ir'va tsontáchroxian kixin choxian Jesucristo ntá sinchekaá ch'án tí jaha.

§ 9:26 Oseas 1.10 * 9:28 Isaías 10.22-23 † 9:29 Isaías 1.9 ‡ 9:33 Salmo 118.22 * 10:5 Levítico 18.5 † 10:8 Deuteronomio 30.12-14

11 Ntáchro xroon itén Dios kixin: “A ntá tí sín chrókuitekaon tí jehe ch'án la chrókósuèhya sín.”‡

12 Dios la t'ikon jnkokón tsjehe kaín chojni á tí sín judío o á tí sín jehya judío. Tí Ìnchéni la mé Ìnché kaín chojni la tsjanjon ch'án kaín nkehe t'ichjánxinhin kaín tí sín tjanchehe ch'án nkehe.

13 Mé xikaha ntáchro xroon itén Dios kixin: “Kaín tí sín tjanchaxín nkehe ihnié Ìnchéni la tsaá sín.”§

14 ¿A ntá nkexrí chrókjuanchehe sín ch'án kixin chrókjuinkitsa ch'án sín tí naxa kuítekakonyha sín ch'án? ¿A ntá nkexrí chrókuitekaon sín tí jehe ch'án tí naxa kuíenhya sín nkexro tí jehe ch'án? ¿A ntá nkexrí chrókuinhin sín tí kohya nkexro tsjakohé sín tí itan a?

15 ¿La nkexrí chrókjuichronka sín tí tan tí kohya nkexro ichr'án sín sátsji? Éxí ntáchro xroon chóna itén Dios kixin: “Náxrjón tí sín xrichronka itan jína.”*

16 Kjánchó kénhya sín titekaon sín tí itan tsaáxinni. Tsíntáchro ch'ín Isaías kixin: “Ìnchéni ¿xá nkexro ó kuítekaon tí tan xrichronkani?”†

17 Méxra t'ichjánxinhin tsinhin sín, a ntá chrókuitekaon sín, a ntá tí tan tsinhin sín mé itén Cristo.

18 A ntá tjánchánkía kixin: ¿Á kuíenhya sín tí tan? Kjá ó kuínhin sín. Ntáchro xroon itén Dios kixin:

A ntá tí nkehe kjuako sín la ó kuínhin chojni kuenté chjasintajni.

Tí nkehe nixja sín la ó kjuixraká hasta kjuèxin chjasintajni.”‡

19 Ntá tjánchánkía inaá: ¿Xá tí sín Israel la naxa kíenxínhya sín ní? Senó ntáchro ch'ín Moisés kixin:

Ijnko chjasin jehya chjasin kuèntana la tsoninkákonhénra sín

kixin injnko chjasin tjinkakonhya tsinhin la tsoninkákonhénra sín.§

20 Ntá ntáchro ch'ín Isaías kixin:

Tí sín xritjeyáhya tí janhan la mé tí sín a mé k'uitja sín tí janhan.

La ko kjuákuaxian tí sín kjuanchankíhya kixin nkexro tí janhan.*

21 La ko nixja ch'ín Isaías kuènte tí sín israelita kixin: “Kuenté yaon k'uíyaha injnko chjasin siín chojni titekakonhya sín la ko jiehe sín.”†

11

Tí sín Israel tsíkjeyá Dios

1 A ntá ijie tjánchánkiá kixin: ¿Dios la á kuítóhe ch'án tí sín Israel? Kjá náhí, kixin janhan kjaxian israelitana la t'ikiníxinna ch'ín Abraham la ko k'uaxrjeníxinna ch'ín Benjamín.

2 Kixin ósé tsíkjeyá Dios tí sín israelita kixin ts'óna sín chjasén ch'án. A ntá ijie la kjá sinchek'itjányanhya ch'án sín. ¿Á noahyará jahará nkexrí nixja xroon itén Dios tí chrónka ch'ín profeta Elías nkexrí nixjehe ch'án Dios tjanchia ch'án jie kuènte tí sín Israel? Mé ntáchro xikihi:

3 “Ìnchéni, jehe sín k'óyán sín tí sín chrónka itán la ko k'óxíka sín tí altar kuèntá ntá jehóni kuítóheni tjechónni la tjinkaon sín kjaxin chrók'óyán sín tí jeheni.”*

4 A ntá Dios kjuátehe ch'án kixin: “Naxa kuítóhe yato mil chojni kuítekaon sín tí janhan kjuíxienhya sín toch'in sín tí nkehe tsíkjanoya Baal.”†

5 Ntá kjaxin xikaha ijie naxa kuítóhe iso tí sín naxa tinkáchónki Dios. Kjuasáyé Dios kixin kuikonóhe ch'án tí sín la tsíkjeyá ch'án kixin tsaá iso ti jehe sín.

‡ 10:11 Isaías 28.16 § 10:13 Joel 2.32 * 10:15 Isaías 53.1 † 10:16 Isaías 53.1 ‡ 10:18 Salmo 19.4 § 10:19 Deuteronomio 32.21 * 10:20 Isaías 65.1 † 10:21 Isaías 65.2 * 11:3 1 Reyes 19.10, 14 † 11:4 1 Reyes 19.18

⁶ Mé xikaha kjuasáyé Dios sinchekaá ch'án tí jehe sín kixin jehya tí xra kjuích'e sín chrókuaáxin sín. Náhi. Kjuasáyé Dios mé sinchekaá sín ch'án. Kixin tí xra chrókjuich'e sín ntá chrókuaáxin sín la jehya kjuasáyé Dios tí xikaha.

⁷ A ntá tí xikaha la, ¿nkexrí? Tí sín israelita la k'uitjahya sín tí nkehe xritjeyá sín. A ntá tí sín kjueyá Dios la k'uitja sín. A ntá tí sín í so a la icha asén sín la kuítekakonhya sín.

⁸ Éxí ntáchro xroon itén Dios kixin: “Dios kjuanjonhya kjuachaxin chrókiénxín tí sín a la ko mé kjaxin xikaha naxa sítonhen tí yaon ijie. La kjuanjonhya ch'án kjuachaxin kixin chrók'uiikon sín la ko chrókiénxín sín.”[‡]

⁹ Kjaxin tsintáchro ch'ín David kixin:

Tí kia tjasin sín mé tjasixín sín jie,
tsjasótexín sín.

¹⁰ Tí ikon sín ts'ikonxínhya sín kixin ts'óna sín ntakótán
ntá tí jie kuènte sín mé jnkochrín yámá sín. §

Tsaá tí sín jehya sín judío

¹¹ A ntá ijie tjánchánkiá: Tí sín judío la tí kjuasin sín jie la ¿á ó naá kuítóexón Dios tí jehe sín? Kjá náhi. Tió kuítekakonhya tí sín judío a ntá tí sín jehya judío la mé kjuacha sín kuaá sín. A ntá tí sín israelita la kónínkaon sín kixin kjuachahya sín.

¹² A ntá tí jie kjuasin tí sín judío, a ntá kuítóhe Dios tí jehe sín, a ntá tí sín jehya judío antsí k'uitja sín nkexrí tsinkáchónki sín Dios. A ntá tí nkehe ntoáhya kjuích'e tí sín judío ntá tí sín jehya judío kjuacha sín kuaá sín. A ntá tí chrókan tí sín judío chrókuitekaon sín Cristo la antsí má náxrjón tíha.

¹³ Chonta iso nkehe chrókuinhínra jahará jehya judiorá kixin Dios mé chr'ánna kixin tsjakoha tí sín jehya judío la antsí tjetoon tí xra kuènte Ìnchéni chrókjuít'a.

¹⁴ Tjínkavan kixin tí sín chjasenná chrókóchjinoxínhin sín kixin jahará tinkachónkirá Dios kixin ntá chrókjuacha chrókuaá iso tí jehe sín.

¹⁵ Kuítóhe Dios tí sín judío, a ntá iso tí sín jehya judío k'uitja sín tí kjuaxróxin kuènte Dios. A ntá tí chrókuitekaon tí sín judío kjaxin la yóhe éxí chróxechón chojni tsík'en tí jehe sín.

¹⁶ Tí chrókjuinchetjóá Dios tí niotja xrankixín chrók'óna tí ich'o la ntá kuenté tí ch'o chrókjuinchetjóá ch'án. A ntá kjaxin tí chrókjuinchetjóá ch'án tí nuèé ijnko nta la kjaxin kaín tí chaon tí nta chrókjuinchetjóá ch'án.

¹⁷ Ntá isó tí sín judío la éxí iso chaon tí nta olivo mé xikaha tsíchrinjin la ntá jahará la éxí ijnko chaon nta olivo nteje tsík'óna injerto mé xikaha ts'ejóchónxin tí nta chaon tí tronco tí nta olivo jína xráxín tjechón.

¹⁸ Ntáchrohyará kixin tí chaon tí nta la antsí jína. Íchá jína tsontáchrora kixin jehya tí nta t'etuénhen ti nuèé nta. Náhi. Tí nuèé mé tsjinkítsa tí nta mé xikaha tí jahará.

¹⁹ Ntá jahará tsontáchrora kixin: “A ntá tí chaon tí nta la tsíchrinjin kixin ntá jeheni tsitoheni lüké tí nta chaon tsíchrinjin”.

²⁰ Tíha la chaxín. Kjánchó chrínjin kixin kuítekakonhya Dios. A ntá jahará la tjejora ntiha kixin tinkachónkirá Dios. A ntá chrokjuinchehnkehyará. Íchá jína chróchrakonrá.

²¹ Kixin Dios la kuikonóehya ch'án tí nta chaon kuènte tí nta tronco la ntá mé xikaha kjaxin tí jahará la tsikonóahyará ch'án.

‡ 11:8 Deuteronomio 29.4; Isaías 29.10 § 11:10 Salmo 69.22-23

22 Tsjehérá kixin Dios la imá jína kjánchó kjaxin sinchekjasóte ch'án tí sín titekakonhya. A ntá jína ch'án la kjuínkítsa ch'án tí jahará. Kjánchó chrók'uejorá jnkojína éxí tjinkaon tí jehe ch'án. A ntá tí náhí la chaxín jahará la tsítóhará ch'án.

23 A ntá tí sín judío tsítóhe sín tí nkehe ntoáhya k'uékjich'e sín ntá jehe ch'án kjónté senó kóchrínjin ch'án la ntá ijie sinchetséxin ch'án tí tronco ínaá kixin jehe ch'án la imá chóna ch'án kjuachaxin kixin xikaha sich'e ch'án.

24 A ntá jahará jehya judíora mé tsíkóchrínjinrá ch'án nta olivo nteje. A ntá antsí má xra tsotséxin tí nta olivo jína. A ntá tí sín judío la nta chaon kuènte tí tronco nta olivo jína la antsí xrahya tsjatsuenhen tsotséxin kichó ínaá kixin ó nta chaon kuènte.

Tí tsjixixín ntá tsaáxin tí sín Israel

25 Kichóni, tjínkavan tsonohará tí nkehe jehó Dios nohe kixin sinchehnkehyará jahóra kixin ó nohará. Mé tí sín Israel tsitekakonhya sín hasta ts'ixenjian kaín tí sín jehya judío tsitekaon.

26 Tió xikaha tsonhen ntá kaín tí sín Israel tsaá sín kixin tí xroon itén Dios ntáchro kixin:

Tí nkexro sinchekaáni mé tsixin ch'án chjasin Jerusalén la tsjatsen ch'án ti jie kuènte tí sín tsík'axrjeníxin ch'ín Jacob.

27 Tíhi mé kjuachaxin nixin kuèntana ts'áyéhe tí jehe sín kixin janhan mé kjuatsiyān ijie sín.*

28 Xikaha kixin tí tan nixin tsaáxinni ntá tí sín judío mé tsonínkakonhen sín Dios kixin ntá jahará ts'ayéhérá tí nkehe kuènte Dios. Kjánchó Dios naxa tjuèhe tí jehe sín judío kixin jehe ch'án tsík'jeyá ch'án tí sín tsík'axrjeníxin tí jehe sín.

29 Kixin tí kaín nkehe kjuanjon Dios la tsakitsjehya ch'án la ko tsítóehya ch'án tí sín tsík'íyehē ch'án.

30 Senó la jahará k'uékítekákonhyará Dios a ntá ijie la tí sín judío titekakonhya sín. A ntá jahará la kjónté la kuikonóahará Dios.

31 Mé xikaha jehe sín kuítekakonhya sín Dios la ntá kjónté xikaha la jehe ch'án tsikonóehē tí jehe sín éxí kuikonóahará ch'án.

32 Kixin Dios la kuítóhe ch'án kaín chojni kixin chrókjuasin sín jie kixin ntá tsjakoxin ch'án tí kjuachaxin kuènte ch'án kixin sinchetjóá ch'án kaín sín kjónté chojni chóna jie.

33 A ntá tí kjuachaxin kuènte Dios la imá jie la ko imá nohe ch'án. Ninkexró tsjachahya tsochronkaxín nkexrí tjenkayáxin ch'án la ko ninkexró tsjachahya tsienxín tí ntia kuènte ch'án.

34 Ntáchro xroon itén Dios kixin: “¿Xá nkexro chrókienxín nkexrí tjenkayáxin Ìnchéni la xá nkexro chrókjuinkítsa chrókjuakohē tí jehe ch'án?

35 ¿Xá nkexro kjuanjon nkehe senó k'uáyéhe Dios a ntá ijie tjinkaon chrók'uáyéhe ínaá?”†

36 Kixin kaín nkehe la tixin tí tjen Dios kixin kaín nkehe la kjuích'éna ch'án kixin jehe ch'án chóna ch'án. Mé xikaha tjancheheni kjuasáyé Dios jnkochrín. Amén.

12

Chjehérá cuépporá Dios kixin sinchetjóá ch'án

1 Mé xikaha kichó ni, xrjanóahará kixin Dios ó kuikonóahará ch'án ntá jahará chróchjehérá cuépporá Dios éxí ijnko nkehe tjechón kixin jehe ch'án ó

* 11:27 Salmo 14.7, Isaías 59.20 † 11:35 Isaías 40.13-14

kjuíntatjóará ch'án la mé xíkaha chrókóxrjínhïn ch'án. Tíhi mé ijnko nkehe ntoá t'ichjánxïn chróchjéheni ch'án.

² Chrokóxrjánhyará tí nkehe síin chjasintajni. Náhí. Chrókónixin tí nkehe tjenkayáxinrá kixin jína chrókjuenkayáxinrá. Xíkaha ntá chrókónohará kixin nkexrí tjinkaon Dios kixin ntoá chrók'uejorá éxí tóxrjínhïn ch'án.

³ Kjuasáyé Dios kjuanjon ch'án tí xra tjét'aha ch'án. Mé xíkaha nixjāhará kaín rá kixin chrókjuenkayáxinhyará kixin imá tjetoanrá. Náhí. Chrókjuenkayáxinrá jína éxí tí kjuachaxin tjāhará Dios éxí nkexrí tinkachónkirá ch'án.

⁴ Mé xíkaha ijnko cuerpo la nchónhya parte chóna. A ntá tí parte la jehya jnkokón xra chrókjuich'e.

⁵ Mé kjaxin xíkaha tí jeheni kjónté nchónhyani la ts'ónani jnkokoá cuerpo kuènte Cristo. Mé xíkaha jnkokoá chrókjuenkayáxinni kixin ó k'ónani jnkokoá cuerpo.

⁶ Dios kjuanjon nchónhya clase xra éxí tjinkaon ch'án chróchjéhe ch'án jnkojnko chojni tí xra. Ntá t'ichjánxïn jína sich'eni tí xra kjuanjon ch'án. A ntá tí kjuanjon ch'án kjuachaxin kixin tsochronkaxínni tí tan kuènte ch'án ntá t'ichjánxïn sich'eni tí xra éxí titekaonni ch'án.

⁷ A ntá tí kjuanjon ch'án xra tsjinkĩtsani í jnko nkexro ntá t'ichjánxïn jína sich'eni tí xra a. A ntá tí nkexro tsík'áyéhe kjuachaxin tsjako la t'ichjánxïn jehó tí xra a chrókjuako.

⁸ Tí nkexro tsík'áyéhe kjuachaxin nchexraxinkaon í jnko nkexro la kaín asén chrókjuich'e ch'án tí xra a. A ntá tí nkexro tsjanjon ichrén nkehe la chrókójiehya chrókjuanjon ch'án. A ntá tí nkexro t'etōan la jína chrókjuich'e ch'án xra la ko tí nkexro chrókjuinkĩtsa tí sín chóntahya la kjuaxróxin chrókjuinkĩtsa sín.

Tí nkehe chrókjuich'e tí sín tinkáchónki Cristo

⁹ Kaín asánrá chrótjuèherá kíchuará. Chrókujtohéra tí nkehe jínahya tjenkayáxinrá la chrókjuenkayáxinrá tí nkehe jína.

¹⁰ Chrótjuèherá kíchuará la ko chaxin chrókjuikosáyehérá kíchuará.

¹¹ Chrókósáhyará la chrókjuich'eherá Inchéni xra kaín asánrá.

¹² Chrókóchāhará kixin tjejóchonhénrá la chrókóninkákonhyará kjónté chrókjuasótiará. Chrókujtoéhyará chrónixjehérá Dios.

¹³ Chrókjuinkĩtsará tí sín tinkáchónki Inchéni tí chóntahya sín nkehe sine sín. Chjehérá kjuachaxin ts'ejó tí sín tsjijinixjāhará sín.

¹⁴ Nixjehérá Dios la tsjanchehérá ch'án kixin sincheyaon ch'án tí sín chonkíhará. Tjanchehérá Dios tsjinkĩtsa tí jehe sín la jehya kixin chrókóninkákonhénrá sín.

¹⁵ Tócháhaakoará tí sín tjejóchéhe sín la ko tí tjejótsjanka sín la koírá chrótsjankará.

¹⁶ Kjuaxróxin chrók'uejorá. Chrókjuinchehnkehyará. Náhí. Chrókóyóhará éxí tí sín nòa. Chrókjuinchehnkehyará kixin nohará.

¹⁷ Chrókjuich'ehyará jínahya tí sín kjuít'ahará ichrén nkehe jínahya. Náhí. Íchá jína chrókjuákoxinrá nkehe jína kixin chrók'uikon kaín chojni.

¹⁸ Chrókjuéyará jnkójina chrók'uejorá. Exí nkexrí chrókjuachará la kjuaxróxin chrók'uejorá kaín rá.

¹⁹ Tjuahará kíchó ni, la chrókjuinchekjásótehyará jahórá tí sín ichrén nkehe kjuít'ahará. Náhí. Tjtohéra kixin Dios sinchekjásóte tí sín a. Ntáchro xroon itén

Dios kixin: “Ixra kuèntana sintakitoaxián tíha. Janhan tsjénkahá tí sín a, ichro Ìnchéni.”*

²⁰ Kjaxin ntáchro xroon itén Dios kixin: “Tí sín nínkakonhan t'énxín sín kjinta la chróchjehé sín nkehe chrókjone sín la tí t'énxín sín ntá la kjaxin chróchjehé sín nkehe chrók'ui sín. Mé xikaha chrókjuich'e kixin chrókósuèhe sín kixin tí nkehe kjuich'e sín.”†

²¹ Chrókuítóehyará kixin chrókjuacha tí nkehe jínahya chrók'uetuanhanrá. Náhi. Chrókjuich'erá tí nkehe jína kixin chrókjuachahya tí nkehe jínahya chrók'uetóan.

13

¹ Kaín chojni t'ichjánxin sinchexiteyéhé sín tí gobierno kixin tí kjuachaxin chóna sín la Dios tsíkjanjon kixin kohya nijnko gobierno chrók'uejó tí jehya kjuachaxián Dios.

² Mé xikaha tí sín tjanjonko tí sín t'etóan la kjaxin nínkakonhen sín tí nkehe k'uetóan Dios. A ntá tí sín xikaha ch'e la mé jehe sín tjejá sín jie tsjasótexín sín.

³ A ntá tí sín gobierno t'etóan la sinchekjasótehya sín tí nkexro titekaon ch'e nkehe jína. Náhi. Tsonínkakonhen sín tí nkexro ch'e tí jínahya. Tí tjinkáonrá tsonínkakuanhyará sín la chrók'uejorá jnkojína. Chrókjuinchexiteyéhérá sín kixin chrókónínkakuanhyará sín.

⁴ Kixin Dios k'uetóan tí xra tjejóch'e sín kixin ntá jahará la jína chrók'uejorá. A ntá tí chrókjuich'erá nkehe jínahya la chróchrakonrá kixin jehya chónkó tjejó tí gobierno. Náhi. Chóna sín kjuachaxin sinchekjasótiará sín kixin jehe sín la Dios k'uetóan tjejó sín tí xra a kixin sinchekjasóte sín tí sín jínahya tjenkayáxin.

⁵ Mé xikaha t'ichjánxin sinchexiteyéhérá tí gobierno la jehya jehí kixin chrókjuinchekjasótiyahyará sín. Náhi. Ó jehí jahará chróxráxinkáonrá kixin t'ichjánxin sinchexiteyéhérá sín.

⁶ La kjaxin jehya táhó. Náhi. T'ichjánxin chrókjuenkehérá gobierno tí chichaon kuènte tí xra ch'erá tjanchia sín kixin tí gobierno la Dios k'uetóan tjejó sín t'etóan sín.

⁷ Kjaxin chrókjuenkehérá kaín chojni tjasikéhérá. Tí nkexro síká kuènte xra la chrókjuenká sín kuènte tí xra, la tí nkexro síká ichrén nkehe nchekji ntá tíha kjaxin chrókjuenká sín, la kjaxin chrókjuíkosáyehérá tí sín t'etóan.

⁸ Kjaxin chrókjuasikéhyará ninkexró. T'ichjánxin chrótjuèherá kichuárá kixin tí nkexro tjuèhe kichó la mé xikaha kjuínchexiteyá tí nkehe k'uetóan tí ley.

⁹ Kixin ntáchro tí mandamiento kixin: “Tjakéhya asánrá í jnko chojni chjin la ko t'oyánhyará kichuárá la ko teehyará la nixjahyará kjuach'ia kuènte í jnko chojni. La ko tjaké hya asánrá nkehe ókjé.”* Kaín tíha la ko í so nkehe t'etóan Dios mé tienxinni t'axrjexín kixin: “Chrótjuèheni kichó ni éxí tjuèxín asénni.”

¹⁰ Tí chojni tjuèhe kichó la ninkehó nkehe jínahya sich'ehe kichó. Mé xikaha chrótjuèhe kichuárá la mé xikaha mé chróxiteyá jína tí nkehe nixja tí ley.

¹¹ Kaín tíha chrókónoheni tí tjejóni kixin ó kui tí hora chrók'uejósjeheni chrók'uajuahyani. Tí nkexro tsaáxinni la í séhya itsi ch'án ijie, a ntá tí kjuankixinni kuítekaonni itén ch'án la ísé tsixín ch'án.

¹² A ntá tí tie la í séhya tsjak'e kixin ó tsi tí t'inkáséyan la chrókuítóheni tí nkehe ch'eni kuènte sítié la chróchóntani kjuachaxin kuènte Nchakuen Dios kixin tsjinkítsa ts'ajini tí t'inkáséyan, éxí ijnko soldado t'inkáyate ch'án ka tsík'óna chica kixin kohya nkehe tsonhen ch'án.

* 12:19 Deuteronomio 32.35 † 12:20 Proverbios 25.21-22

* 13:9 Éxodo 20.13-15, 17;

Deuteronomio 5.17-19, 21; Levítico 19.18

¹³ Chrók'uejóni jnkojína éxí nkexrí chrók'uajini chaxín ntoá tí t'inkáséyan a. Chrókjuasinhyani kia chrókjuanjónxin chojni la ko chrókókoanhyani la ko chrókjuenkayáxinhyani chróchóntani nchónhya chojni chjin la ko chrókjuenkayáxinhyani tí nkehe ntáchro asénni la ko chrókjueyáhyani kjuanínkaon la ko chrókóchjinoxíenhyani.

¹⁴ A ntá jahará tákjárá tí kjuachaxin kuènte Ìnchéni Jesucristo tsjinkitsará la tíha mé éxí chrók'uínkayárá nkehe tsík'óna chica kixin kohya nkehe chrókónhanrá. La ko chrókjuenkayáxinhyará tí nkehe ntoáhya tjenkayáxin chojni jínahya.

14

Tjontahyará kichuára

¹ A ntá kjónté ijnko chojni kánhyó tinkáchónki Ìnchéni la chrók'uejokoará ch'án la ko chrókjontahyará ch'án kjónté kánhyó nohe ch'án.

² A ntá iso sín chaxín nohe sín la tjinkaon sín chrókjóné sín kaín nkehe. A ntá tí sín kánhyó tinkáchónki sín Ìnchéni ntá tjinkaon sín chrókjónéhya sín nto, ntá kayoa ó chrókjóné sín.

³ Tí nkexro chrókjóné kaín nkehe chrókjónéhya tí nkexro tjinkaon chrókjónéhya nkehe. A ntá tí sín chrókjónéhya nkehe chrókjontahya sín tí sín chrókjóné sín kaín nkehe kixin kjónté xikaha la Dios tsakja tí jehe sín.

⁴ ¿Xá nkexro jaha kixin chrókjóné tí nkexro ch'ehe xra í jnko nkexro? Tíha la xra kuènte tí lámogé ch'án tsontáchro á jína kjuích'e ch'án xra o náhí. A ntá kjá tsjak'e ch'án jína kixin Ìnchéni chóné ch'án kjuachaxin tsjinkitsa ch'án tsjak'e tí ch'ín a jína.

⁵ Iso sín tjenkayáxin sín kixin imá tjetoan ijnko yaon a ntá í jnko yaon la náhí. La í so sín ntáchro sín kixin kaín yaon la ó jnkokón. Ntá jnkojnko sín la jehó sín chrókjuenkayáxin sín kixin nkehe tí chaxín titekaon sín.

⁶ Tí sín xraxinkaon tí yaon la tjikosáyehe sín Ìnchéni la kjaxin tí sín tinkáchónkihya sín xikaha la tjikosáyehe sín Ìnchéni kjónté xraxinkakonhya sín tí yaon. Kjaxin tí sín ine kaín nkehe la ine sín kixin xikaha tjikosáyehe sín Ìnchéni la kjaxin tjanchehe sín kjuasáyé Dios. A ntá kjaxin tí sín nehya kaín nkehe la xikaha mé tjikosáyehe sín Ìnchéni la kjaxin tjanchehe sín kjuasáyé Dios.

⁷ Nijnko tí jeheni tjejóni kixin jehóni chrók'uejtoanni la ko jehya jehí chrók'uenni.

⁸ Tí tjejóni la tjejóni kixin sich'ehe ni xra Ìnchéni la kjónté its'enni la kuènte ch'án tí jeheni. Méxra kjónté chrók'uejochónni o kjónté chrók'uenni la kuènte ch'án tí jeheni.

⁹ Méxra xikaha ntá Cristo la ik'uén ch'án la ko xechón ch'án inaá kixin k'óna ch'án Ìnché tí sín tsík'en la ko tí sín tjejochón.

¹⁰ A ntá jahará la, ¿nkekuènte tjóntará tí kichuára o nkekuènte chontehyará kaín sín kjuasáya? Kixin kaín ni tsochjinani tí tjen Dios kixin tsontáchro ch'án á jína xra kjuích'eni o náhí.

¹¹ Ntáchro xroon itén Dios kixin:
Méxra janhan takjénxian asenná, ichro Ìnchéni, kixin tí tjèn la ts'ejóxin toch'in kaín chojni

kixin kaín chojni la tsjanchia sín kjuasáya kixin janhan mé Dios kuènte sín.*

¹² Mé xikaha jnkojnkonni chrókónoheni kixin tsochenkani Dios nkexrí kjuích'eni.

* 14:11 Isaías 45.23

Tjachruehyará kichuára

¹³ Méxra chrókjontahyará kichuára. Íchá jína kixin ninkehó nkehe chrókjuich'ehyará kixin ntá tí sín kichó ni chrókjuasinxinhya sín jie kixin tí chrókjuasin sín jie ntá xikaha chrók'uitjáyaxín tí tinkáchónki sín Ìnchéni.

¹⁴ Janhan tinkachónkia Ìnchéni Jesús la ntá xikaha ó nòna kixin kohya ninkehó nkehe jehí tjuáhya. A ntá ijnko nkexro tjenkayáxin kixin jehya nkehe jína tíha ntá chaxín tjuáhya tí nkehe kixin xikaha tjenkayáxin ch'án.

¹⁵ Tí tjenkayáxin tí kichuá kixin tí nkehe inte la ntoáhya a ntá tí xikaha ch'e la tjuèhya tí kichuá. Kixin jehya tí nkehe chrókjonte ó chrókjuinchech'itjáyaxián tí kichuá kixin Cristo k'uenyákonhen ch'án kjaxin.

¹⁶ Chrókjuich'ehyará nkehe jínahya kixin ntá xikaha chrók'uántaxínhin sín tí nkehe jína tinkachónkirá.

¹⁷ Kixin tí kjuachaxién Dios la jehya tí nkehe chrokjóneni o tí nkehe chrok'uini. Náhi. Tí tjen tí kjuachaxién Dios la chrók'uejóni jnkojína la ko kjuaxróxin chrók'uejóni la ko chrókóchéheni kixin chóntani Nchakuen Dios.

¹⁸ Tí nkexro ch'ehe Cristo xra mé chrókjuinchechéhe Dios la ko chrókjuinchechéhe chojni.

¹⁹ Mé xikaha chrókjueyáni kaín tí nkehe tjikao kjuaxróxin kixin ntá tsjinkitsani tí sín kichó ni kixin ntá kjaxin sín antsí chrókuinkáchónki sín Ìnchéni.

²⁰ Chrókjuinchech'itjáyanyará tí xra kuènte Dios kixin tí nkehe chrókjónterá ó kixin kaín nkehe chrókjónterá la ó tsíkjinchetjóá Dios. Tí jínahya la tí chrókjóneni ókjé nkehe ntá xikaha la í so chojni chrók'uitjáyaxín tí nkehe tinkáchónki sín.

²¹ Ntá íchá jína chrókjontehyará into la ko chrók'uihyará vino la ko ninkehó nkehe chrókjuich'ehyará tí xikaha chrókjuasixín jie kichuára.

²² Tí nkehe tinkachónkirá la jahóra chrókónohará kixin Dios la tjetsjehe ch'án. A ntá jína tsjak'e tí nkexro tí chrókjuasixínnya ch'án jie tí nkehe tjenkayáxin ch'án.

²³ A ntá tí nkexro ine nkehe la tjenkayáxin sín kixin tsjasixín sín jie ntá chaxín xikaha yamá sín jie kixin kénhya asén sín kjóne sín tí nkehe. La tíó kénhya asén sín tjenkayáxin sín la ó kjuasin sín jie.

15

Nchechéhéra kichuára la jehya jahóra

¹ Tí antsí tinkáchónkini Ìnchéni ntá chrókjuinkitsani tí sín kánhyó tinkáchónki tí jehe ch'án la chrókjuich'ehyani tí nkehe chrókóchéxinni jehóni.

² Kjaxin kaín ni chrókjuinchechéheni kichó ni kixin chrók'uejó sín jína la ko kixin antsí chrókuinkáchónki sín Ìnchéni.

³ Kixin kjaxin Cristo kjuich'ehya ch'án tí nkehe chrókóchéxin ch'án jehó ch'án. Náhi. Kjuínchexiteyá ch'án éxí ntáchro xroon itén Dios kixin: "K'uinka kjuasótexinna kaín tí kjuanínkaon chóna tí sín nínkakonhen Dios."*

⁴ Kaín nkehe chrónka xroon itén Dios senó la tsíkjin sín ósé kixin chrókónoheni kixin ntá chrók'uejóchónhenni la chrókónínkakonhyani kixin tíha mé nchechéheni.

⁵ Dios, mé tí nkexro tjinkitsani la ko nchechéheni, la kjaxin tsjinkitsa ch'án tí jahará kixin ts'ejorá jnkojína la ko jnkokón tsjenkayáxinkoára kichuára kixin xikaha kjuakoxin Cristo Jesús.

⁶ Kixin kaín ni jnkokóá chrók'uákjenxinni Dios la chrókjuancheheni kjuasáyé ch'án mé jehe ch'án mé It'é Ìnchéni Jesucristo.

* 15:3 Salmo 69.9

Tí tan jína xrakohę tí sín jehya judío

⁷ Chrókjuánjonrá kjuachaxin ts'ejó í so chojni la chrótjuèherá sín kixin éxi Cristo tsík'áyéhe ch'án tí jahará mé xikaha tsjikosáyehérá Dios.

⁸ Janhan jína chróntáxrjan kixin Cristo ikui sich'ehe xra tí sín judío kixin tsoxiteyá tí nkehe tsíchenka Dios tí sín tsík'axrjenixinni ósé kixin xikaha tsjakoxin kixin Dios la jína ch'án la sinchexiteyá ch'án tí nkehe tsintáchro ch'án.

⁹ La kjaxin ikui ch'án kixin kjónté tí sín jehya sín judío la chrokjuanchehe sín kjuasáyé Dios kixin kuikonóehę ch'án sín éxi chrónka tí xroon itén Dios kixin: Janhan la ko tí sín tjejó ókjé nacióon mé tsjancheheni kjuasáyé Dios

la ko tsotsjeni himno kixin ts'ákjenxinni ihnié ch'án.†

¹⁰ Kjaxin ntáchro í jnko parte xroon itén Dios inaá kixin:

Tsocháhakoará kaín tí sín kuènté Dios.‡

¹¹ Kjaxin ntáchro xroon itén Dios inaá kixin:

Tjancheherá kjuasáyé inchéni Dios kaín rá kjónté jehya judíorá

mé kaín chojni chrókjuanchehe sín kjuasáyé Dios.§

¹² Kjaxin ch'ín Isaías tsíkjin kixin:

Ts'axrjenixin ch'ín Isaí ijnko nkexro

la ts'etuenhen ch'án kaín tí sín jehya judío,

a ntá tí sín a mé tsinkáchónki sín tí nkexro a.*

Mé xikaha ichro itén Dios.

¹³ Dios mé tjetjanjon ch'án kjuachaxin tjejóchónhenni la jehe ch'án nchechéheni ch'án la tjanjon ch'án kjuaxróxin ts'ejóni kixin titekaonni tí jehe ch'án kixin ntá ts'ánkí tí kjuachéhe tjejóchónhenni kjuachaxién Nchakuen ch'án.

¹⁴ Kíchóni, chaxín tónòna kixin jahará la jína tjejorá la kaín xín kjuaxrexinkaon jína tjenkayáxinrá la nohará tsjínkítasará chénkará kichuárá.

¹⁵ La kjónté xikaha la chrakonhya ikjian tí xroon i chr'anhánrá xrjanka kaín tí nkehe kixin chrók'uitjáyanhyará chróxráxinkáonrá kaín nkehe. Mé xikaha it'a tí xra kixin kjuasáyé Dios kjuanjon ch'án tí xra.

¹⁶ Kixin sit'aha Jesucristo xra tsotjanka tí sín jehya judío tí itén Dios. Tí xra mé tjákua tí tan jína tsaáxin chojni kixin ntá janhan tsjánjuan tí sín jehya judío ts'áyéhe Dios éxi ijnko nkehe tsóxrjínhin ch'án kixin Nchakuen ch'án kótjuáxin sín.

¹⁷ Janhan mé ijnko chojni tinkáchónki Cristo Jesús la mé xikaha siín kjuachaxin tsochána kixin t'ahę xra Dios.

¹⁸ Chrokjuahya tsohnke tsontáxrjan í jnko nkehe. Jehó tsóxrjanka nkexrí tí kjuachaxin kjuanjon Cristo chjina kixin tsotjanka tí sín jehya judío tí itén ch'án kixin tsitekaon sín Dios. Ntá xikaha kuítekaon sín kixin tí itan kjuákua la ko tí nkehe jína kjuít'a.

¹⁹ Kixin tí kjuachaxién Dios mé kjuákoxięn tí kjuásian kjuaxroan la ko kjuákoxięn tí kjuachaxin kuènte Nchakuen Dios. Mé xikaha kjuintaxiın kjuákua tí tan jína tsaáxin chojni Cristo xrankixiın chjasin Jerusalén la nkuixiın chjinaxón ntiha la hasta estado Ilírico.

²⁰ Mé xikaha tjínkavan tsjíkjàkua tí tan tsaáxinni tí chjasin naxa tienhyé sín ihnié Cristo kixin tí janhan tjínkakonhya tsjixrónkáxięn tí xra kuènte í jnko chojni xráxin tjech'e xra.

²¹ Íchá jína éxi ntáchro xroon itén Dios kixin:

Chrókuinhiın tí sín naxa kienhyé sín tí tan kuènte ti jehe ch'án.

La ko chrókienxín tí sín naxa kienhyé tí tan kuènte ch'án.†

† 15:9 2 Samuel 22.50; Salmo 18.49 ‡ 15:10 Deuteronomio 32.43 § 15:11 Salmo 117.1 * 15:12 Isaías 11.10 † 15:21 Isaías 52.15

Ch'ín Pablo tjenkayáxin ch'án sátsji ch'án chjasin Roma

²² Nchónhya veces tjínkavan chrókjuasántsjahá tí jahará kjánchó naxa xit-jahya kjuasán ntiha.

²³ Kjánchó ijie la ó kjuixinna tí xra nkuíxín tí tjèn ntihi. Ntá itsjé nánó tjínkavan chrókjuasántsjahá tí jahará

²⁴ a ntá ijie ts'atsínka tsonixjahará tí sátsjia nación España. Ntá tsochàna ts'íkuan tí jahará ntá tsjixin ntá chr'éxin tjínkavan kixin jahará tsjínkítsará tí sátsjia.

²⁵ A ntá ijie la sátsjiya chjasin Jerusalén, sátsjikian tí nkehe tsjinkítsa tí sín kíchó ni ntiha.

²⁶ Kixin tí sín estado Macedonia la ko estado Acaya kjuenkayáxin sín tsjejo sín chichaon kixin tsochr'énnen sín tí sín kíchó ni ntiha tsochjéhe tí sín nòa tjejó chjasin Jerusalén.

²⁷ Jehe sín kóxrjínhin sich'e sín xikaha kixin tí sín judío tinkáchónki Cristo kjuínkítsa tí jehe sín tsonohe sín itén Dios. Ntá ijie la jehe sín chrókjuinkítsa sín inaá chrókjuanjon sín iso tí nkehe chóna sín chrók'uáyéhe tí sín judío tinkáchónki Ìnchéni.

²⁸ A ntá tió tsjixin tí xra la ts'áyéhe sín tí chichaon la ntá janhan sátsjia España la ts'atsínkua tsonixjahará.

²⁹ Ó nòna kixin tió sátsjia la Cristo mé imá sincheyaon ch'án tí janhan la ko tí jahará.

³⁰ Kíchóni kjuasáyé Ìnchéni Jesucristo la ko tí Nchakuen ch'án tjanjon kjuachaxin tsojtjuèheni kíchó ni mé xrjannóahará kixin jnkokoá chrókjuenkayáxin kixin tí xra tjét'a la ko chrónixjehérá Dios kixin tí janhan.

³¹ Tjanchehérá Dios kixin tsjinkítsa ch'án tí janhan kixin kohya nkehe tsonna kixin kaín tí sín titekakonhya Dios síin chjasin Judea. La ko tjanchiará kixin jína sátsjikian tí nkehe tsjinkítsa tí sín kíchó ni tjejó chjasin Jerusalén kixin jína chrók'uáyéhe sín.

³² Ntá tí tjinkaon Dios la tsochàna tsjasán ti tjejorá jahará la ko kjuaxróxin tsjak'é tí tsjasántsjahará.

³³ Dios tjanjon kjuaxróxin ts'ejokoará kaín rá. Amén.

16

Ch'ín Pablo nixjehé ch'án tí sín chóxin ch'án

¹ Tétuanhanrá tsjínkítsará tí tjan kíchó ni Febe ch'e tjan xra nínko chjasin Cencrea

² mé tjanjonrá kjuachaxin tsjak'e tjan kjuachaxièn ihnié Ìnchéni éxí ch'eherá í so sín kíchó ni tinkáchónki Ìnchéni. Tsjínkítsará tjan ichrén nkehe t'ichjánxinhin tjan kixin jehe tjan kjaxin kjuínkítsa tjan nchónhya chojni la kjaxin kjuinkítsa tjan tí janhan.

³ Nixjehérá tjan Priscila la ko ch'ín Aquila. Jehe sín jnkokoá kjuích'ekoni xra kixin kjaxin sín mé ch'ehe sín Cristo xra.

⁴ Jehe sín chrók'uenxín sín kixin kjuínkítsana sín tí janhan mé xikaha tjaha sín kjuasáya la jehya janhván, kjaxin kaín sín kíchó ni nínkoé tí sín jehya judío.

⁵ Nixjehérá kjaxin kaín kíchó ni tóchjina ntòe tjan Priscila la ko ch'ín Aquila. Nixjehérá tí ch'ín choxian jína Epeneto mé jehe ch'án la saoxín kuítekaon ch'án Cristo estado Acaya.

⁶ Nixjehérá tjan María kixin kjaxin tjan kjuích'e tjan xra tí tjejorá ntiha.

⁷ Kjaxin nixjehérá tí sín tsíkixin chjasenná mé ch'ín Andrónico la ko ch'ín Junias. Tí k'uikjèna ntòechiso la kjaxin tí jehe sín k'uikjehe sín. Kjaxin kaín tí

í so sín apóstol la tjikosáyehé sín tí sín a. Jehe sín senó kuinkáchónki sín Cristo ntá chr'éxin janhan.

⁸ Nixjehérá ch'ín Amplias kixin jehe ch'án mé ijnko nkexro choxian la ko tjuahá tinkáchónki Ìnchéni.

⁹ Nixjehérá ch'ín Urbano kixin jnkokoá kjuít'akian ch'án xrá kuènte Jesucristo la ko nixjehérá tí ch'ín choxian Estaquis.

¹⁰ Nixjehérá ch'ín Apeles. Jehe ch'án la kjónté nchónhya nkehe kónhen ch'án kjuasóte ch'án kixin tinkáchónki ch'án Cristo. Kjaxin nixjehérá tí sín kjéhya ch'ín Aristóbulo.

¹¹ Kjaxin nixjehérá tí ch'ín kjéhyana Herodión la ko kjaxin nixjehérá kaín tí sín kjéhya ch'ín Narciso kixin kjaxin sín tinkáchónki sín Ìnchéni.

¹² Nixjehérá tjan Trifena la ko tjan Trifosa. Kjaxin jehe sín kjuích'e sín xrá kuènte Ìnchéni la ko nixjehérá kjaxin tí tjan kíchó ni Pérsida. Kjaxin kjuínkítsa tjan kjuích'e tjan xrá kuènte Ìnchéni.

¹³ Kjaxin nixjehérá ch'ín Rufo, ijnko chojni tsíkjoyá Ìnchéni la ko nixjehérá tí ìné ch'án kjaxin kixin kjaxin tjan kjuínkítsa tjan tí janhan la éxí naná k'uikuán tí jehe tjan.

¹⁴ Kjaxin nixjehérá ch'ín Asíncrito la ko ch'ín Flegonte la ko ch'ín Hermas la ko ch'ín Patrobas la ko ch'ín Hermes la ko tí í so sín kíchó ni tjejóko tí jehe sín ntiha.

¹⁵ Nixjehérá kjaxin ch'ín Filólogo la ko tjan Julia la ko ch'ín Nereo la ko tí tjan kíchó ch'án la ko ch'ín Olimpas la ko kaín tí sín kíchó ni tinkáchónki Ìnchéni tjejóko sín ntiha.

¹⁶ Kjaxin tsehérá tja kichuárá kjuachaxin ihnié Ìnchéni. Kaín tí sín ninko kuènte Cristo ntihi xraxinkaon sín tí jahará la nixjahará sín.

¹⁷ Kíchóni, xrjanóahará kixin chrótsjehérá nkexro tí sín tjixrónkáxin chrók'óxíka tí sín jnkokoá tinkáchónki Ìnchéni. Jehe sín titekakonhya sín tí itén Dios kjuákohará k'uitjará. Tí xíkaha ch'e sín la chrók'uaxrjekjanxínrá ntiha.

¹⁸ Tí nkexro xíkaha ch'e la jehya Ìnchéni Jesucristo ch'ehe xrá. Náhi. Jehí tjinkaon sín chrókjuixrónkáxin sín la nixja sín tí nkehe náxrjón ó la xíkaha ch'iyehé sín asén tí chojni naxá noehya.

¹⁹ Kaín chojni ó nohe kixin jahará la ó kuítekáonrá Ìnchéni. Mé xíkaha chàna tí janhan la tjínkavan chrókóxakonhanrá chrókjuich'erá xrá jína. Jehya kixin chrókjuich'erá nkehe jínahya.

²⁰ Tí Dios tjanjon kjuaxróxin mé tjoka tsinkátja Satanás, í ts'etuenhya. A ntá Ìnchéni Jesucristo mé sintayaonrá ch'án.

²¹ Ch'ín Timoteo nixjahará ch'án. Jehe ch'án jnkokón ch'ekoni xrá. La kjaxin ch'ín Lucio la ko ch'ín Jasón la ko ch'ín Sosípater, tí sín chjasenná, mé nixjahará sín.

²² Janhan Tercio ikjian tí xroon i k'uetōan ch'ín Pablo la kjaxin nixjahará kjuachaxién Ìnchéni.

²³ Ch'ín Gayo nixjahará ch'án. Jehe ch'án kjuanjon kjuachaxin kjuak'é janhan ntōe ch'án la ko kaín tí sín kuènte ninko tójnkotsé ntōe ch'án. La ko nixjahará ch'ín Erasto. Jehe ch'án mé tesorero kuènte chjasin la ko tí ch'ín kíchó ni Cuarto kjaxin nixjahará ch'án.

²⁴ Ìnchéni Jesucristo sincheyaon ch'án kaín tí jahará. Amén.

²⁵ Ntá ijie tsjancheheni kjuasáyé Dios kixin jehe ch'án tjinkítsa ch'án kixin jína chrók'uejorá éxí chrónka tí tan jína tsaáxinni la ko éxí kjuakoni kuènte Jesucristo. Tíha mé chaxín chrónka éxí Dios k'uetōan nchenoheni ch'án tí nkehe ninkexró k'uénoehya desde k'óna chjasintajni.

²⁶ A ntá ijie kaín ni t̄so_{no}exínni nkexrí nixja xroon ikjin tí s̄in profeta kíxin nkexrí k'u_etoan Dios itjen jnkochr̄ixín. Ntá kaín nkehe k'u_enoehya ninkexró a ntá tsochóxin kuenté chjasintajni kíxin tsinkáchónki s̄in la ko tsitekaon s̄in Dios.

²⁷ Itjen jnkokoá Dios la jehó ch'án imá nohe ch'án la jehó ch'án mé tjancheheni kjuasáya kíxin tinkáchónkini Ìnchéni Jesucristo jnkochr̄ixín. Amén. Ó tjen.

Tí xroon saoxín ikjin ch'ín Pablo chr'énhen ch'án tí sín tinkáchónki Cristo siín chjasin Corinto

Ch'ín Pablo mé ikjin ch'án xroon ichr'án ch'án tí nínko chjasin Corinto

¹ Janhan Pablo mé kjueyána Dios tjinkaon ch'án kixin kjuachaxin kuente Ìnchéni Jesucristo mé chrókjuít'aha ch'án xra. Janhan la ko kichó ni Sóstenes mé

² ikjinni tí xroon i chr'ánhanrání tí jahará tójnkotsérá nínko chjasin Corinto. Ó kjuínchetjóará Ìnchéni Jesucristo na mé kjueyára Dios tí jahará kixin chrók'uaxrjekjanxínrá tí sín tjasin jie kixin tjinkaon ch'án tí jahará kixin tjóá chrók'uejorá la ko xikaha kjueyá ch'án kaín xín tí sín tjanchehe sín ìnchéni Jesucristo kixin chrókjuinkítsa ch'án sín, tíha mé Ìnché sín la ko Ìnchéni.

³ Kjuasáyé It'eni Dios la ko Ìnchéni Jesucristo chrókjuintayaonrá ch'án la ko chrótjáhará ch'án kjuaxróxin.

Ìnchéni Cristo mé tjencheyaon tí sín ntiha

⁴ Jnkochrín tjáncháha Dios kjuasáya kixin sintayaonrá ch'án tí jahará kixin tinkachónkirá Ìnchéni Cristo Jesús.

⁵ Na mé Dios tjáhará kjuachaxin kuente ch'án ntá xikaha antsí jína nohará chrónkaxínrá kixin nkexrí tinkachónkirá Ìnchéni la ko kjaxin antsí jína tiéxínrá kaín nkehe chaxín ntoá.

⁶ Tí nkehe kuínhínrá kixin nkexrí tjen Cristo na ntá jie jahará tjákoxinrá.

⁷ Ntá jahará ó chontará kaín xín tí kjuachaxin kuente Nchakuen Dios, la í ninkehó t'itjáyankíhya tí kjuachaxin kuente ch'án k'uayéhérá nachrohe tjejochonhénrá tsokjan Ìnchéni Jesucristo.

⁸ Ntá Ìnchéni ts'ayakonhanrá ch'án kixin tsítóéhyará tí tinkachónkirá ch'án hasta tsjixraká tí yaon tsjixixín. Ntá ninkexró ts'ekahyará jie kixin ntoáhya tjejoch'erá, tsixro sín, tí yaon tsokjan ch'án.

⁹ Ó noheni kixin Dios chaxín sinchexiteyá ch'án tí nkehe ntáchro ch'án kixin jehe ch'án mé tsíkjeýará ch'án kixin chrókuinkachónkirá tí Xjeen ch'án Jesucristo, mé Ìnchéni tíha.

Jnkokoáhya kjuenkayáxin tí sín tinkáchónki Cristo ntiha chjasin Corinto

¹⁰ Kichóni, xrjanóaxínrá tí kjuachaxin ihnié Ìnchéni Jesucristo kixin jnkokoá chrókjuenkayáxinrá la ko chrók'uaxrjentahyará ókjé na mé jnkokoá chrókjuenkayáxinkoará kichuára.

¹¹ Kichóni, ó kuínhan tí nkehe chrónka tí sín kjéhya ch'ín Cloé kixin siín kjuanínkaon tí tjejorá tójnkotsérá ntiha.

¹² Na mé ntáxrjan kixin isorá ntáchrórá kixin jahará chréhérá tí janhan Pablo, la ko í sorá ntáchrórá kixin jahará chréhérá tí ch'ín Apolos, la ko í sorá ntáchrórá kixin jahará chréhérá tí ch'ín Pedro, la ko í sorá ntáchrórá kixin chréhérá Cristo.

¹³ ¿Xá nkekjaín Cristo siín kixin? ¿Á jehya jnkokoá Cristo tinkáchónkini? ¿Á janhan Pablo k'uényákonhanrá ní? ¿Á kuíkitexínrá tí njina ní?

¹⁴ Tjáncháha Dios kjuasáya kixin nijnko tí jahará kuíkitiahyará ntiha. Jehó ch'ín Crispo la ko ch'ín Gayo mé kuíkité janhan.

¹⁵ Na mé nijnkorá xitjahya tsontáchrórá kixin njina kuíkitexínrá.

¹⁶ Kjaxin jehó kuík̄ite tí ch'ín Estéfanas la ko tí sín kjéhya ch'án. Xráxink̄akonhya á kuík̄ite í so sín o náhí.

¹⁷ Kíxin tí xra chjina Cristo jehya kíxin chrókuík̄ite chojni. Náhí. Tí xra chjina Ìnchéni kíxin tsoxrjankaxián tí tan tsaáxinni. Tjínk̄akonhya kíxin chrókjuákoxian palabra náxrjón noi kíxin xikaha chrókjuàkua ntá chrókjuintamá tí kjuachaxin jié kónoxín tí k'uénxin Ìnchéni Jesús tí ntacruz, kjuák'enkani ch'án, k'uenyákonhenni ch'án.

Cristo mé tjakoxin tí kjuachaxiэн Dios la ko tjakoxin ch'án kíxin imá nohe Dios

¹⁸ Chronkaxínni kíxin k'uenyákonhenni Cristo tí ntacruz. A ntá tí tsinhin tí sín xráxín ts'itjáyan ntá ts'ikon sín tíha éxí nkehe chónkó. A ntá kaín ni chojni kuaáni mé t'ikonni kíxin kjuachaxin jié tíha.

¹⁹ Mé xikaha ntáchro xroon itén Dios tsíkjin sín ósé kíxin Dios mé sinchek'itjáyan tí nkehe tjenkayáxin tí sín imá nohe, la ko tsítenta ch'án tí nkehe ntáchro tí sín imá tienxín sín.*

²⁰ ¿Mé nkehe tsonhen ntáchro sín kíxin imá nohe sín la ko nkehe tsonhen tjako sín la ko nkehe tsonhen tí imá nohe sín nixja sín? Táha la nkehe siín chjasintajni ó. A ntá Dios mé t'ikon ch'án kíxin lontj sín kíxin xikaha ichro sín.

²¹ Kíxin Dios antsí nohe ntá xikaha kuítøehya ch'án kíxin kjuachaxin kuènte sín ó chrókjuacha sín chróchóxixín sín ch'án. Ntá kóxrjínhin Dios chrókjueyá ch'án chrókjuinchekaá ch'án tí sín kuítekaon tí tan tsaáxinni mé tí nkehe ó chónkó, ichro tí sín ókjé.

²² Tí sín judío mé tjinkaon sín chrók'uikon sín kjuaxroan jié, ichro sín. A ntá tí sín nkiva griego mé xritjeyá sín kíxin antsí chrókónohe sín, ichro sín.

²³ A ntá jeheni kaín ni tinkáchónkini Cristo la tjinkakonhyani chrókónoheni kaín tíha la mé jehó Cristo tjakoxinni. Chronkani kíxin ijnko ntacruz kjuák'enkani ch'án, k'uénxin ch'án. A ntá tí sín judío ntáchro sín kíxin ijnko nkehe chrókósuèhèni chrókuinkáchónkini tíha, ichro sín. A ntá tí sín jehya judío ntáchro sín kíxin chojni lontj tí jeheni kíxin xikaha tinkáchónkini, ichro sín.

²⁴ A ntá tí sín kjueyá Dios, kjónté judío sín na o griego sín, la kaín ni ntáchroni kíxin Cristo mé k'uenyákonhenni ch'án. Mé xikaha tjakoxin Dios tí kjuachaxin jié la ko tí kjuaxrexinkaon jina kuènte ch'án.

²⁵ Ntá jehe sín ntáchro sín kíxin éxí ijnko nkehe chónkó tí nkehe kjuenkayáxin Dios, na kjónté xikaha la antsí tjetóxin nohe Dios. A ntá tí sín imá nohe ntihi chjasintajni tsjachahya sín sincheyóhè sín ch'án. La ko kjaxin ntáchro sín kíxin jiéhya tí kjuachaxin chóna Dios. A ntá tí sín antsí má chóna kjuachaxin ntihi chjasintajni kjónté la tóyóehya sín Dios kíxin antsí chóna ch'án kjuachaxin t'etøan ch'án.

²⁶ Kíchóni, xráxinkáonrá nkexrí k'uéjorá ntá kjónté kjueyará Dios tí jahará. Na mé tsjéhyará imá kónohará éxí t'ikon tí sín chjasintajni la kjónté kjueyará Dios tí jahará. La ko tsjéhyará imá kuétøanrá la ko tsjéhyará k'uaxrjeníxinrá tí sín imá k'uék'etøan.

²⁷ Ntá kjónté Dios mé kjueyá iso tí sín noehya éxí t'ikon tí sín chjasintajni kíxin xikaha tjinkaon ch'án chrókjuinchesuèhè ch'án tí sín imá nohe ntihi chjasintajni. La ko kjaxin kjueyá Dios iso tí sín chónahya kjuachaxin éxí t'ikon tí sín chjasintajni kíxin xikaha tjinkaon ch'án chrókjuinchesuèhè ch'án tí sín imá chóna kjuachaxin ntihi chjasintajni.

²⁸ Dios mé kjueyá ch'án iso tí sín t'etøanhya la ko iso tí sín ninkehó sínkíhya tónhen sín ntihi chjasintajni kíxin jehe ch'án mé chrókjuinchek'itjáyan ch'án kjuachaxiэн tí sín jehó chrók'uètøan.

* 1:19 Isaías 29.14

29 Méxra xikaha ninkexró tsjachahya sinchehnke tí tjen Dios.

30 A ntá tí kjuachaxin kuènte Dios mé tinkachónkirá Cristo Jesús, a ntá chóntaxínni Cristo kjuaxrexinkaon jína, la ko tí kjuachaxin kuènte ch'án kóxíka tí jié kuènteni, la ko tí kjuachaxin kuènte ch'án sinchetjuáxinni ch'án, la ko tí ijnié ch'án k'uénaxínni ch'án.

31 Mé xikaha éxí chrónka tí xroon tsíkjin sín ósé ntáchro kixin: “Tí nkexro tjinkaon chrókjuinchehnke ch'án la chrókjuinchehnkehya ch'án la jehó chrókjuakoxin ch'án kixin imá t'etōan tí kjuachaxin kuènte Dios.”†

2

Ch'ín Pablo mé tjako ch'án kixin Jesucristo kjuák'enkáni ch'án ntacruz

1 Kíchóni, tió kjuasán ntiha chjasánrá níxjāhará chrókjuákoahará nkexrí tjen Dios la jehya ijnko tan tienxínhya chojni la ko jehya itan imá noi chrókjuákoáxinrá.

2 Kixin tió k'uéjóni jnkokoá ntiha kjuenkayáxinhya janhan kixin í so nkehe chrók'uitja chróxrjanka la jehó tjínkavan chróxrjanka kixin Jesucristo la kjuák'enkáni ch'án tí ntacruz.

3 K'uéjóni jnkokoá ntiha la ntá jahará ó nohará kixin janhan kjuak'é éxí chrókjuachahya kixin síxrankana, chrákonna.

4 Tí kjuankíxian níxjāhará la ko xrjankaxián tí tan tsaáxin chojni, la tjínkakhonhya chrókjuáchruàxinrá tí nkehe náxrjón níxja chojni tsíkónohe má. Náhi. Tió kjuákoahará kónoxín kixin tjékian Nchakuen Dios la ko kónoxín tí kjuachaxin jié kuènte ch'án,

5 kixin jehya kjuaxrexinkaon kuènte chojni tsíkónohe má chrókuinkachónkirá. Náhi. Tí kjuachaxin kuènte Dios mé chrókuinkachónkirá.

Nchakuen Dios mé tsochóxixínni ch'án

6 Kjánchó tió tjáqoha tí sín chaxín ó nohe sín tinkáchónki Inchéni mé xrjanka tí kjuaxrexinkaon antsí noi. Na mé jehya tí nkehe nohe tí sín chjasintajni, la ko jehya tí nkehe nohe tí sín t'etōan chjasintajni, na mé tí kjuachaxin kuènte sín la tjoka ts'itjáyan.

7 Jeheni mé antsí chrónkani tí nkehe jehó Dios nohe, na mé tí nkehe tsíkjenkayáxin ch'án naxa k'ónahya chjasintajni kixin nkexrí tsaáxinni.

8 Nijnko tí sín t'etōan chjasintajni kienxínhya sín tí nkehe tsíkjenkayáxin Dios. A ntá tí chrókienxín sín tíha la ntá chrókjuak'enkanihya sín Inchéni tjetoan tí ntacruz.

9 Éxí ntáchro xroon itén Dios tsíkjin sín ósé kixin:

Naxa k'uíkonhya chojni la ko naxa kienhya chojni,

la ko naxa kjuenkayáxinhya chojni

kixin nkexrí siín kaín xín nkehe kjuích'éna Dios ts'áyéhe tí sín tjuèhe ch'án.*

10 A ntá Dios mé nchenoexínni kaín tíha kixin chóntani Nchakuen ch'án. Na mé tí Nchakuen Dios mé tjetsjehe kixin nkexrí siín kaín xín nkehe la ko kjaxin nkexrí tjen tí nkehe tjenkayáxin Dios.

11 Na mé ninkexró mé noehya nkexrí tjenkayáxin asén chojni. Na mé jnkojnko chojni mé nohe kixin nkexrí tónhen asén. Méxra xikaha kjaxin kohya nkexro nohe nkexrí tjenkayáxin Dios la jehó tí Nchakuen ch'án mé nohe.

12 A ntá jehya tí nchakuen chojni chjasintajni k'uáyéheni. Náhi. Tí Nchakuen kujxin tí tjen Dios mé k'uáyéheni kixin ntá tsonoexínni kixin kaín xín nkehe kjuínchekitonhenni Dios.

† 1:31 Jeremías 9.23 * 2:9 Isaías 64.4

¹³ Kjaxin jeheni chrónkani tíhi, a ntá jehya chronkaxínni tí nkehe tsíkónohe chojni ó. Náhi. Tí Nchakuen Dios mé nchenoexínni nkexrí tsjakoexínni tí sín chóna Nchakuen ch'án.

¹⁴ Kjánchó tí sín naxa chónahya Nchakuen Dios mé xitjahya ts'áyéhe sín tí nkehe tjanjon Nchakuen Dios. Na mé éxí lóco t'ikon sín kaín tíha kixin jehó tí sín chóna Nchakuen Dios mé tsjacha sín tsienxín sín tíha.

¹⁵ A ntá tí nkexro chóna Nchakuen Dios mé chrókjuacha chrókónohe nkexrí siín kaín xín nkehe. Kjánchó tí nkexró chónahya Nchakuen Dios tsjachahya tsjanchia jie tí jehe ch'án.

¹⁶ Méxra ntáchro xroon itén Dios kixin: ¿Xá ninkexró chrókónohe kixin nkexrí tjenkayáxin Ìnchéni kixin chrókjuacha sín chrókjuakohe sín ch'án inaá?† Kjánchó jeheni la ó chónani tí kjuaxrexinkaon kuènte Cristo.

3

Tí sín jnkokoá kjuích'ehe sín Dios xra

¹ Mé xikaha, kichó ni, kjuachahya janhan chróníxjahará éxí chojni t'etuenhen asén sín Nchakuen Dios. Náhi. Éxí chojni naxa nchexiteyéhe sín tí nkehe ntáchro asén sín, na mé éxí xjan ntsíntsí na ntá kjuankixin kuinkáchónki Cristo mé xikaha tí jahará.

² Janhan na kjuákoáxinrá nkehe xrahya éxí yóhe ijnko xjanhnte tí jahará naxa nchekakí ìné tsjen kixin naxa xitjahya sine nkehe cha. Mé xikaha tí jahará naxa xitjahya sinterá nkehe cha

³ Kixin naxa éxí chojni ó nchexiteyéhérá tí nkehe ntáchro asánrá kixin tí naxa siín kjuachjinoxínhin la ko siín kjuanínkaon la ko jnkokoáhya tjenkayáxinrá, la mé tjejoch'erá éxí ch'e kaín xín chojni chjasintajni.

⁴ Isorá ntáchrorá kixin chréhérá tí janhan Pablo, la ko í sorá ntáchrorá kixin chréhérá tí ch'ín Apolos. Na mé éxí chojni chjasintajni ó tjenkayáxinrá.

⁵ ¿Xá nkexro tí Pablo la ko nkexro tí Apolos? A ntá jeheni ó jehí ijnko chojni kjuích'ehe Dios xra, a ntá jahará kuinkachónkirá Ìnchéni kixin janhan kjuákoahará. Jnkoinkoni kjuích'eni tí xra kjuanjon Ìnchéni.

⁶ Janhan kuènká, a ntá ch'ín Apolos ìntá kjuáka ch'án, a ntá Dios la mé kjuínchek'ánkí ch'án tí nkehe a.

⁷ Méxra tí nkexro k'uenkaxin la ko tí nkexro tjáka ntá la kánhyó tjetoan kixin Dios mé chóna kaín kjuachaxin la jehe ch'án nchek'ánkí kaín nkehe siín.

⁸ A ntá tí sín t'enka la ko tí sín tjáka ntá la ó jnkokón ch'e sín xra, a ntá Dios mé tsjenkehe sín jnkoinko tí xra kjuích'e sín.

⁹ Méxra jeheni mé jnkokoá ch'eheeni Dios xra, a ntá jahará mé éxí tí nontee Dios, ntaha ch'e ch'án xra, la ko kjaxin jahará mé tí nchia tjech'éna ch'án.

¹⁰ Janhan mé tí maestro ch'éna nchia kixin Dios kjuanjon kjuachaxin tsjaké tí xro xrankíxixín, a ntá í jnko nkexro sich'éna nchia chrítaón tí xro a. A ntá jnkoinko nkexro t'ichjánxin ntoá chrókjuich'éna sín nchia chrítaón tí xro a,

¹¹ kixin kohya ninkexró tsjacha tsjak'e í jnko xro xrankíxixín tí nchia a kixin táha la ó tsíkjixin tsík'óna, kixin Jesucristo tíha.

¹² A ntá chrítaón tíha mé tsjacha sich'éna chojni nchia tsík'óna chica oro, la ko chica plata, la ko xro náxrjón tjete, la ko inta tabla, la ko kaní, la kontaxro.

¹³ Na mé tsonoxín nkehe tí xra kjuích'e jnkoinko chojni tió tsi tí yaon tsjixixín. Kixin tí yaon a mé tsi xrohi. A ntá tí xrohi mé tsjakoxin nkexéhe tí xra tsoche la ko nkexéhe tí xra tsochehya.

† 2:16 Isaías 40.13

¹⁴ **A** ntá tí jnkojín chojni kjuích'éna ijnko nchia tsochehya la mé tsjacha ch'án tí xrā kjuích'e ch'án.

¹⁵ **A** ntá tí chróche tí nchia kjuích'éna ijnko chojni, ntá chrók'uitjáyán kuenté. **A** ntá tí nkexro kjuích'éna nchia la tsaá éxí yóhe chrókuinkéhe ch'án xrohi.

¹⁶ ¿**A** noahyará kixin jahará kaín rá na mé ijnko ninkoe Dios la ko Nchakuen Dios mé chóna asánrá?

¹⁷ **A** ntá jnkojín nkexro tjinkaon ts'óxíka tí ninkoe Dios na mé Dios mé sinchek'itjáyán tí nkexro xíkaha sich'e kixin tí ninkoe Dios la tjóá tíha. **A** ntá tí ninko a mé jahará tíha.

¹⁸ Ninkexró chrókjuenkayáxin kixin imá nohe. Tí jnkojínrá tónhen asánrá kixin imá nohará éxí nohe chojni chjasintajni ó, na ntá chrókjanrá chrók'ónará éxí chojni noehya kixin ntá chrók'uitjára chrók'ónará ijnko chojni chaxín nohe.

¹⁹ Tí nkehe nohe tí chojni chjasintajni la mé ijnko nkehe lonti t'ikon Dios. **A** ntá ntáchro tí xroon itén Dios tsíkjin sín ósé kixin: “Tí nkehe tsík'itjá sín ch'iyaxín sín la tíha mé tsokjan ts'enxín sín.”*

²⁰ La ko kjaxin ntáchro xroon itén Dios kixin: “**I**ñchéni la ó nohe ch'án kixin kaín nkehe tjenkayáxin tí sín ntáchro sín kixin imá nohe sín la mé ijnko kjuaxrexinkaon lonti tíha, ichro Dios.”†

²¹ Méxra chrókjuinchehnkehýará jahará kixin chréhérá ijnko chojni imá nohe, kixin kaín xín nkehe siín la kuéntará jahará,

²² mé janhan Pablo, la ko ch'ín Apolos, la ko ch'ín Pedro, la ko tí chjasintajni, la ko tí kjuachón, la ko tí kjuach'én, la ko tí nkehe sítónhen jie, la ko tí nkehe tsonhen chr'éxin, la kaín la kuéntará tí jahará.

²³ **A** ntá jahará la Cristo mé t'ayakonhanrá. Kixin Cristo la jehe ch'án la mé kuente Dios.

4

Tí xrā kjuích'e tí sín kjueyá Ìnchéni

¹ Jahará chrók'uikonrá tí jeheni éxí chojni ch'ehó Cristo xrā k'uáyéheni tí xrā tjakoni tí nkehe kuente Dios ninkexró k'uénoehya.

² **A** ntá ijnko chojni k'uáyéhe xrā ts'etōan chrókjuakoxin kixin jína ch'án la ko jína ch'e ch'án xrā.

³ **A** ntá janhan tóxakonnahya tí nkehe chróntáchrorá jahará chrókjuanchiará jie tí janhan kixin tí xrā t'ahā Dios, la ko kjaxin tóxakonnahya tí nkehe chróntáchro í so chojni chjasintajni, chrókjuanchia sín jie tí janhan. Kjaxin janhan la tékahya jie asenná.

⁴ Kjánchó janhan tjenkayáxinhya kixin chonta jie. Kjánchó jehya xíkaha tsontáxrjan kixin Dios t'ikon kixin chontahya jie janhan. Náhi. Jehe Ìnchéni mé tsotsjehe ch'án nkehe tí jie chonta janhan.

⁵ Méxra naxā kjuixrakáhya yaon chrókjuinchekitōexínrá ichrén jie. Chonhénrá tí tsi Ìnchéni kixin jehe ch'án mé sinchenoxín ch'án kaín tí nkehe síma ti sítié, la ko sinchenoxín ch'án kaín xín nkehe imó tjenkayáxixín asén chojni. **A** ntá Dios mé tsjanjon ch'án tí nkehe tsjacha jnkojnko chojni.

⁶ Kíchóni, nixjahará tí nkehe i kixin jína chrók'uejorá jahará ntá xíkaha kjuintayóaxian éxí ch'ín Apolos la ko éxí janhan kixin chrók'uitjará kixin chrókjuenkayáxinrá jehó tí nkehe tsíkjin sín ósé, kixin nijnko nkexro chrókjuinchehnkehya kixin chréhe sín ijnko chojni, a ntá tsochóntehya sín kjuasáyé tí i jnko chojni.

* 3:19 Job 5.13 † 3:20 Salmo 94.11

⁷ ¿Méxra nkexro ntáchro kixin jahará antsí tjetóanrá? ¿Xá nkehe chontará naxa kjuanjonhya Dios kixin? Tí kjuanjon Dios kaín nkehe chontará, ¿ntá nkekuente nchehnerá kixin jahórá tsíkjéyará tíha?

⁸ Jahará tónhanrá kixin imá rícorá. Na mé chaxín chontará kaín xín nkehe tjenkayáxinrá. Ntá jie tónhen asánrá éxí ijnko rey, la í t'ichjánxianhyará ninkehó tí jeheni kixin naxa chrókuinkitsani. Tí chrókóchaxín chrók'ónará ijnko rey chaxín ntá kjaxinni chróchóntani kjuachaxin chrók'uetóanni.

⁹ Ntá tónhen asenná kixin jeheni chojni kjueyá Ìnchéni mé kjuanjon Dios kixin jeheni chrókuixixín chrók'uejóni éxí chojni kuìtonhenni kixin noxín chrók'uenni ts'ikon kaín xín chojni chjasintajni la ko ts'ikon tí sín ángel kjaxin.

¹⁰ A ntá jeheni tinkáchónkini Cristo, a ntá xikaha t'ikon sín tí jeheni éxí chojni lontí. A ntá t'ikon sín tí jahará éxí imá nohará. Jeheni la éxí chóntahyani kjuachaxin, a ntá jahará la éxí imá chontará kjuachaxin. Jeheni la tjikosáyehyani sín. A ntá jahará la imá tjikosáyahará sín.

¹¹ A ntá kjónté naxa jie jeheni t'enxínni kjinta, la ko t'enxínni ntá, la ko chóntahyani ikéni, la ko nínkakohenni chojni, la ko chóntahyani nkerí ts'ejóni.

¹² La ko tóxrjéni kixin itjani ch'exínni xra. A ntá tió t'ántaxínhinni sín la tjancheheni Dios kixin sincheyaon ch'án tí jehe sín. La ko tió chónkíhi sín tí jeheni la tónínkakuenhyani sín.

¹³ Tió t'ántaxínhinni sín la jnkojína tjeteheni tí jehe sín. T'ikon sín tí jeheni éxí chjinínó ntihi chjasintajni, na mé éxí ijnko nkehe ninkehó sínkíhya la ko mé xikaha naxa sítónhen tí yaon jie.

¹⁴ Ikjian tíhi na jehya kixin chrókujintasuàhará. Náhí. Tjínkavan chrókujintaxráxinkáonrá kixin éxí xjanna t'íkuan tí jahará, tjuahará.

¹⁵ Kjónté chróchontará ite mil chojni chrókujakohará nkexrí tjen Cristo la chontahyará itsjé it'ará. Ntá janhan mé k'óna it'ará tí jahará tió kuítekáonrá Cristo Jesús kixin kjuákohará tí tan jína tsaáxinni.

¹⁶ Mé xikaha xrjanóahará kixin chrókujákoxinrá éxí tí janhan.

¹⁷ Méxra kuétuanhan tí ch'ín Timoteo kixin tsjiji ch'án ntiha. Na mé éxí xjanna t'íkuan tí jehe ch'án, tjuaha ch'án, kixin kjuákoħa ch'án ntá kuítekaon ch'án Ìnchéni ntá xráxín jína ch'e ch'án xra. Ntá tsjiji ch'án sintaxraxinkáonrá ch'án nkexrí tjákoħian tí ntje Cristo éxí xráxín tjákua kaín xín nínko t'atsínka tí janhan.

¹⁸ Ntá iso tí jahará imá ihnkerá kixin tjenkayáxinrá kixin chaxínhya chrókujasántsahará.

¹⁹ A ntá tjoka chrókujasántsahará tí chaxín xikaha tjinkaon Ìnchéni. A ntá jehya jehó tí nkehe nixja tí sín xriko kjuahnke mé chrókuinhān. Náhí. Na mé ts'íkuan á chaxín chóna sín kjuachaxin kixin xikaha nixja sín.

²⁰ A ntá tí kjuachaxién Dios la jehya tí nkehe tsonixjani ó. Náhí. Tí tjákoħinni la tí kjuachaxién Dios.

²¹ ¿Nkehe tjínkáonrá tí jahará, kixin á chrókujasán chrókujintakjasótiará? o ¿á tjínkáonrá kixin jnkojína chrókujasán?

5

Tsitóexín ijnko jie tjachehe kichó chojni

¹ ¿Á chaxín tsík'ikon sín kixin tí tjeorá ntiha la ijnkorá mé chontará nájoanrá éxí ichjiánrá? Tíha mé ijnko jie jié, la mé kjónté tí sín chónhya Dios la xikahya ch'e sín.

² A ntá kjónté xikaha tsíkónhen la imá ihnkerá. Íchá jína imá chrók'uavará. A ntá tí xikaha ch'e ijnko chojni ntá chrókuétuēnhénrá ch'án sáchrókjui ch'án, chrók'uejokoahyará ch'án ntiha.

³ A ntá ntáxrjan janhan kjónté tjenhya cuerpo kuèntana tí tjejorá ntiha la tí tjenkayáxian la ntaha tjèn éxí chrókjuak'é janhan, ntá t'akjénxian ihñié Ìnchéni Jesucristo la ntáxrjan kixin ó kjuixin kjuenkayáxian kixin nkexrí chrókjuasóte tí ch'ín xikaha tsíkijich'e.

⁴ Tió tsojnkotsérá kaín rá ntiha la éxí koyá tsjak'é ntiha la kjánchó nchakuennà ó la ko koí tí kjuachaxién Ìnchéni Jesús ts'ejókoará ntiha.

⁵ A ntá tí ch'ín a la nchek'ayéhérá tí ch'ín Tsochren kixin tsjasóte tí cuerpo kuènte ch'án. Ntá tió tsokjan Ìnchéni mé tsaá asén ch'án.

⁶ Jahará chrókjuinchehnkehýará kixin tí nkehe tsíkónhen ntiha. ¿Á noahýará nkehe ntáchro sín, kixin tí ch'o a mé tjiko intsíkoá tí xroan nchek'ánkí niotja, ntá kjónté la tsosán kaín tí ch'o?

⁷ Méxra chrókuakítsjerá ntója kaín tí xroan ntaxin nchek'ánkí niotja, kixin ntá jahará ts'ejorá éxí niotja tsík'óna ch'o nixin tsíkjikohya xroan nchek'ánkí niotja. Éxí niotja ine sín tí yaon pascua, mé jahará tíha. Kixin jehe Cristo, éxí ijnko kolélo t'óyán sín tí yaon pascua, mé k'uenyákonhenni ch'án.

⁸ A ntá chrókjuasinni tí kia a la kaín asénni chróxraxinkaonni, tíha la éxí tí niotja chóntahya xroan nchek'ánkíxín. La jehya kixin chrókjuasinni tí kia naxa chróchóntani kjuanínkaon kixin táha la yóhe tí xroan ntaxin nchek'ánkí tí niotja a.

⁹ A ntá íjnko xroon chr'anhánrá k'uéntáxrjan kixin ninkehó chrók'uítohyará tí sín tjasin jie chóna chojni chjin ókjé.

¹⁰ Ntá jehya kixin kuétuanhanrá kixin chrók'uítohyará tí sín chjasintajni tjasin jie chóna chojni chjin ókjé, la ko tí sín tjinkaon jehó sín tsochóna itsjé nkehe, la ko tí chojni teé, la ko tí sín tinkáchónki tí nkehe tsíkjanoya. Náhí. Tí xikaha chrókjuich'erá la t'ichjánxin chrók'uaxrjéxinrá tí chjasintajni.

¹¹ Méxra ó kuétuanhanrá kixin chrók'uítohyará ninkehó jnkojín chojni ntáchro sín kixin kichó ni tí jehe sín, ntá naxa tjasin sín tí jie chóna sín chojni chjin ókjé, la ko tjinkaon sin jehó sín tsochóna sin itsjé nkehe, la ko tí sín naxa tinkáchónki sín nkehe tsíkjanoya, la ko tí sín naxa tinkáchónki kjuach'ia, la ko tí sín tókoan, la ko tí sín teé chichaon, la mé tí chojni xikaha ch'e la chrókjóntekoahýará sín.

¹² Jehya xrana chrókjuintakitoaxián tí ijié tí sín jehya kuènte nínko ntiha. A ntá tí xra kuèntará jahará kixin chrókjuinchekitoxínrá tí ijié tí sín kichó ni tójnkotsé nínko ntiha.

¹³ A ntá Dios mé sinchekitoexín ch'án ijié tí sín jehya kuènte nínko. Méxra, takítsjekjanxinrá tí ch'ín jínahya kjuasin jie tí tjejorá ntiha.

6

Chrókjuikjanahya sín jie nkayakon tí ch'ín juez tinkáchónkihya Ìnchéni

¹ A ntá jnkojínrá chrókjuánjonkoará kichuára chrókjuikjanahýará jie nkayakon tí ch'ín juez tinkáchónkihya Ìnchéni. Íchá jína chrókjuírá chróchenkará tí sín tinkáchónki Dios.

² ¿Á noahýará kixin tí sín tinkáchónki Ìnchéni mé sinchekitoexín sín ijié kaín xín chojni chjasintajni? A ntá xikaha sinchekitoexínrá ijié kaín xín chojni chjasintajni, ¿ntá nkekuènte tsjachahýará sinchekitoexínrá kjónté ijnko jie ntsí?

³ ¿Á noahyará jahará kixin kjónté tí sín ángel tsotsjeheni nkehe tí xrā kjuích'e sín? A ntá ijnko nkehe intsí ntihyó, la ¿á xitjahya chrókjuásiyóxinrá?

⁴ A ntá xikaha chrókjuánjonkoará kichuárá, ¿ntá nkekuènte tjkjanchará jie nkayakon tí sín tikiníxinhya kuènte ninko?

⁵ Ntáxrjan xikaha kixin chrókjuíntasuàhará. ¿Xá kohya ninkexró kichó ni ntiha chóna kjuaxrexinkaon jína tsjacha sincheyóxinhin ijie kichó ni?

⁶ Jahará jnkokoá kichuárá ntá tjanjonrá, la ko kjaxin sátjkjanchará jie nkayakon tí ch'ín juez tinkáchónkihya Ìnchéni.

⁷ Kjónté ijnko jie ntsí ntá imá tjanjonkoáxinrá kichuárá; tíha mé t'óna ijnko jie jie. Íchá jína chrókóninkákonhyará kixin tí nkehe jínahya kjuít'ahará sín. Íchá jína chrókuítóhéra sín kjónté tsaáhará sín.

⁸ Kjánchó kjaxin jahará ntoáhya tjejoch'era kixin kjónté jnkokoá kichuárá la teeherá sín.

⁹ ¿Á noahyará kixin tí sín jínahya ch'e la ts'áyèhya sín kjuachaxin kuènte Dios? Chrókuítóéhyará chrókjuít'áyahará sín, chrókónohará kixin tí sín tjasinko jie tí chojni chjin ókjé, la ko tí sín tinkáchónki sín nkehe tsíkjanoya, la ko tí sín tjachehe kichó sín, la ko tí chojni t'ò chjin, t'ò ntoa, la ko tí sín jnkokón ntoa sín tóxrjínhin kichó sín,

¹⁰ la ko tí xichee, la ko tí sín tjinkaon sín jehó sín tsochóna sín itsjé nkehe, la ko tí sín tókoan, la ko tí sín ch'éna kjuach'ia, la ko tí sín ixri ch'ia sín kixin tsjacha sín chichaon, na mé ts'áyèhya sín kjuachaxin kuènte Dios.

¹¹ Xikaha k'uéjóra isorá senó. Ntá jie ó k'uíjmárá, kjuínchetjóará Dios, ntá ó xika ijíará kjuachaxin ihnié Ìnchéni Jesucristo la ko kjuachaxin kuènte Nchakuen Dios.

Tí cuerpo ó tsikótjóa

¹² Siín kjuachaxin kaín nkehe chrókjuít'a, kjánchó iso nkehe la ó chónkó. Siín kjuachaxin kaín nkehe chrókjuít'a, kjánchó chrókuítóahya ninkehó nkehe chrók'uetuanna.

¹³ Chaxín tí nkehe ntáchro sín kixin ó k'óna tí nkehe sineni kixin tseeni ó sátsji, la ko ó tsík'óna tseeni kixin ts'inka nkehe sineni. Kjánchó Dios mé sinchek'itjáyan yóí tíha. A ntá k'ónahya tí cuerpo kuènteni kixin chrókjuasixínni jie. Náhí. Tí cuerpo kuènteni mé k'óna kixin tsochjéxínni Ìnchéni kjuasáya, la ko jehe Ìnchéni mé ts'ayakonhen ch'án tí cuerpo kuènteni.

¹⁴ Méxrā Dios mé kjuínchexechón Ìnchéni, mé xikaha sinchexechónxinni ch'án tí kjuachaxin kuènte ch'án.

¹⁵ ¿Á noahyará kixin jnkojnko cuerpo kuéntará mé it'ò tí cuerpo kuènte Cristo? ¿Á chrókjuít'a janhan kixin it'ò tí cuerpo kuènte Cristo chrók'óna it'ò cuerpo kuènte ijnko chojni chjin ch'iyehé nchónhya chojni ntoa? Méxrā kjá nahí.

¹⁶ ¿Á noahyará kixin tió ijnko chojni ntoa chrókuakja ijnko chojni chjin chóna nchónhya chojni ntoa, ntá tí jehe sín yóí sín chrók'óna sín jnkokoá cuerpo? Kixin ntáchro xroon itén Dios kixin: “Yóí sín la ts'óna sín jnkokoá chojni.”*

¹⁷ A ntá tí jnkojín chojni tinkáchónki Ìnchéni, ntá jehe la ko Ìnchéni mé ts'óna jnkokoá.

¹⁸ Méxrā chrókuítóhéra chróchontahyará chojni chjin ókjé. Tí í so jie tjasin chojni na mé jehya tí cuerpo kuènte sín nchekjasóte sín. A ntá tí sín tjasinko jie chojni chjin ókjé la mé nchekjasóte sín tí cuerpo kuènte sín.

* 6:16 Génesis 2.24

¹⁹ ¿Á noahyará kixin jnkojnko cuerpo kuéntará mé éxí ijnko ninko itjen Nchakuen Dios kjuanjon ch'án k'uayéhérá, la ko chontará tí Nchakuen ch'án tjóá? Jahará la jehya ìché tí cuerpo kuéntará

²⁰ kixin jahará la tjete k'uenaxínrá Dios. Méxra chjeéxinrá kjuasáyé Dios tí cuerpo kuéntará la ko tí nchakónrá kixin yóí la kuènte Dios.

7

Chenka ch'án tí sín tsíkótehe kixin nkexrí chrók'uejó sín

¹ A ntá jie tsjataha tí nkehe tsíkjinrá kjuanchankinará, na mé ntáxrjan kixin chaxín chrókójina kixin tí chojni ntoa chrókuakjahya ichjién.

² Kjánchó tí xikaha imá tjinkaon sín tsochónta sín itsjé chojni chjin tsjasinko sín jie, la íchá jina jnkojnko chojni ntoa chróchónta jnkojnko ichjién kuènte la ko jnkojnko chojni chjin chróchónta jnkojnko xì kuènte.

³ Tí chojni ntoa la ko tí chojni chjin chrókjuinchexiteyéhe sín kíchó sín.

⁴ Tí chojni chjin jehya ìché tí cuerpo kuènte tjan, na mé kuènte xì tjan. Ntá kjaxin xikaha tí chojni ntoa la jehya ìché tí cuerpo kuènte ch'án, na mé kuènte ichjién ch'án.

⁵ Chrókjuincheniéhyará kichuárá, jehí jnkokoá chrókjuenkayáxinrá yóírá kixin tsochonteherá iso yaon kixin ntá kaín asánrá chrónixjehérá Dios. Ntá tsjixin ntá chrókóchjineherá kichuárá inaá kixin chrókuitoéhyará kixin ch'ín Tsochren chrókjuacha chrókjuachroerá ch'án chrókjuásinrá jie.

⁶ Kaín tíhi tjonkará kixin tsonohará kixin siín kjuachaxin xikaha na kjánchó jehya kixin xikaha tétuanhanrá.

⁷ A ntá janhan ntáxrjan kixin chrókójina kixin kaín rá chojni ntoará chrókóyóhará éxí tí janhan. Kjánchó Dios chjéhe kjuachaxin jnkojnko chojni, la iso la ijnko nkehe tjenkayáxin, la í so la í jnko nkehe tjenkayáxin.

⁸ A ntá tí sín naxa tóteehya la ko tí chojni tsíkók'án na ntátjan sín kixin chrókójina kixin xikahó chrók'uejó sín chrókóteehya sín éxí tí janhan xikaha.

⁹ Kjánchó tí chrókjuachahya sín tí tjak'e asén kíchó sín, naxa chrókjuasin sín jie, ntá íchá jina chrókótehe sín kixin jehya jina kixin jnkochrín chrókjuak'ó asén sín.

¹⁰ A ntá jahará ó tsíkjixin tsíkótahará, la tétuanhanrá tíhi: a ntá jehya kixin kjuachaxin kuéntana tétuanxínrá. Náhi. Kjuachaxin kuènte Ìnchéni mé tétuanxínrá kixin tí chojni chjin chrókjuákehya xì.

¹¹ A ntá tí chrókjuákehé ijnko chojni chjin tí xì, ntá xikahó chrókuitohe tjan jehó tjan la ko chrókójina chrókóyóxin, chrókjuinhin tí kjuanínkaon kixin tí kjuákehé kíchó sín. Kjaxin xikaha tí chojni ntoa la chrókjuákehya tí ichjién.

¹² A ntá tí nkehe tétuanhan tí í so sín jaí la kuéntana janhvàn, jehya kuènte Ìnchéni, kixin tí tjen ijnko ch'ín kíchó ni chóna ch'án ichjién ch'án tinkáchónkihya Ìnchéni, na kjónté naxa tjinkaon tjan chrókjuak'eko tjan tí jehe ch'án la chrókjuákehya ch'án tí jehe tjan.

¹³ La ko tí tjen ijnko tjan kíchó ni chóna xì tjan tinkáchónkihya Ìnchéni, ntá kjónté naxa tjinkaon ch'án chrókjuak'eko ch'án tí jehe tjan, ntá chrókjuákehya tjan tí jehe ch'án.

¹⁴ Kixin tí xì tjan tinkáchónkihya Ìnchéni ntá jie ó kótjóá ch'án kixin tí ichjién mé tinkáchónki Dios, la ko tí ijnko tjan tinkáchónkihya Ìnchéni ntá jie ó kótjóá tjan kixin tí xì tjan mé tinkáchónki Dios. A ntá tí xikahya, la tí xjeen sín chrókótuáhya, na ntá jie la mé ó kótjóá tí xjeen sín.

15 A ntá tí ch'ín ntoa o tí tjachjin tinkáchónkihya Ìnchéni tjinkaon chrókjuákehe kíchó sín, la ája nohe sín tjákehe kíchó sín, kixin Dios tjinkaon kixin kjuaxróxin chrók'uejorá.

16 Jahará chojni chjinrá, ¿nkexrí chrókónohará kixin nkexrí chrókuaá xiará? La ko jahará chojni ntoará, ¿nkexrí chrókónohará kixin nkexrí chrókuaá ichjiánrá?

17 A ntá jnkojnko chojni chrók'uejó sín éxí tsíkjanjon Ìnchéni kjuachaxin tsík'áyéhe sín, la ko éxí tí k'uejó sín tió k'uíyehé sín Dios, kjánchó chrókuítóehya sín tí jehe ch'án. Mé xikaha tétuanhan kaín tí nínko.

18 Tí chrók'uíyehé Dios ijnko ch'ín chóna xroye, ntá xikahó chrókuítóhe ch'án. A ntá tí chrók'uíyehé Dios ijnko ch'ín chóntahya tí xroye a, ntá kjónté chrókuahya ch'án tí xroye a.

19 Na mé tjetuanhya á chóna chojni tí xroye o á chóntahya chojni tí xroye. Na mé tí nkehe tjetuan kixin chrókjuinchexiteyéheni tí nkehe k'uetuan Dios.

20 Chrók'uejóni jnkojnkonni éxí k'uejóni tí k'uíyeheni Dios.

21 A ntá tió Dios k'uíyaha jaha, kjónté jaha ijnko chojni ch'exón xra, ntá chrókóxakuanhya kjónté xikahó tjech'e xra. Kjánchó tí chrók'uitjá tí tsaáxian la chrókuákjá tíha.

22 Kixin tí nkexro kjuích'exón xra tió k'uíyehé Ìnchéni kixin tsinkáchónki ch'án, la mé jie chóna ch'án tí kjuachaxin tjanjon Ìnchéni. Kjaxin tí nkexro k'uítuénhya tió k'uíyehé Ìnchéni la mé jie mé ch'ehe ch'án xra Cristo.

23 Dios imá tjete k'uenaxín ch'án tí jahará. Méxra chrókjuánjonhyará kjuachaxin kixin ókjé chojni chrók'óna ìnchárá.

24 Méxra kíchó ni, éxí k'uejorá tió k'uíyehará Dios kixin tsinkachónkirá ch'án, la xikahó naxa chrók'uejorá jie kixin chontará Ìnchéni tsjinkítsa.

25 A ntá tí chojni naxa tóteehya sin na mé janhan chontahya nkehe kuente Ìnchéni chrókuétuanhan sín. Kjánchó tsoxrjanka tí nkehe tjenkayáxian janhvàn, a ntá chrókuítekáonrá tí janhan kixin kuikonóana Ìnchéni.

26 Mé xikaha tónna kixin chrókójina kixin jnkojnko chojni chrókuítóhe sín éxí tjejó sín chrókótéehya sín, kixin ijie la kjuaxróxinhya tjejóni.

27 A ntá tí chontará ichjiánrá ntá chrókjuákeéhyará tjan. A ntá tí chontahyará ichjiánrá ntá íchá jina chrókjuéyáhyará.

28 Kjánchó tí chrókótahará la jehya jie tíha, la ko tí chrókótéhe ijnko tjan tjarisoá la kjaxin jehya jie. A ntá tí sín tsíkótehe la tsochóna sín kjuaxikaon, mé xikaha janhan chrókjuínkítsa sín kixin chróchóntahya sín kjuaxikaon.

29 Mé xikaha tjetjonkará kíchó ni kixin tsjéhya yaon naxa t'itjayan tsokjan Ìnchéni. Mé xikaha tí chojni ntoa chóna ichjién sín, la antsí tjetuan saoxín chróxaxinkaon sín Ìnchéni, la ntá chr'éxin chróttjuèhe sín ichjién sín.

30 A ntá tí sín tsjánka la chrók'uejó sín éxí chrótsjánkahya sín. La ko tí sín chéhe la chrók'uejó sín éxí chéhya sín. La ko tí sín t'ena nkehe la chrók'uejó sín éxí chóntahya sín tí nkehe tsík'ena sín.

31 La ko tí sín kjuacha nkehe siín chjasintajni la chrók'uejó sín éxí ninkehó chróchóntahya sín, kixin kaín nkehe t'ikonni chjasintajni ntihi mé tjoka tsjeje.

32 Tjínkakhonhya kixin jahará chrókóxakonhanrá. Tí ch'ín ntoa chóntahya ichjin antsí má tóxakonhen tí xra kuente Ìnchéni chrókjuinchexiteyéhe ch'án tí nkehe tóxrjínhin Ìnchéni.

33 A ntá tí ch'ín tsíkótehe antsí tóxakonhen tí nkehe siín chjasintajni kixin xikaha mé sinchechéhe ch'án ichjién ch'án.

³⁴ Ókjé tjenkayáxin tí tjan tsíkótehe la ko tí tjan tsíkóteehya kixin tí tjan tsíkóteehya la antsí má tóxakonhen tjan tí xra kuente Ìnchéni kixin tjinkaon tjan kixin Dios sinchetjóá tí cuerpo kuente tjan la ko tí asén tjan. A ntá tí tjan tsíkótehe mé tóxakonhen tjan tí nkehe síin chjasintajni kixin xikaha sinchechéhe tjan xii tjan.

³⁵ Tjéjtjonkará tíhi kixin tjínkavan kixin jína chrók'uejorá, jehya kixin xikaha chrókuétuñhanrá. Náhi. Tjínkavan kixin kjuasáya chrók'uejorá jnkojína la jehó Ìnchéni chrókjuich'eherá xra.

³⁶ A ntá jnkojínrá tjenkayáxinrá kixin chrókójína chrókótehe ijnko xjaanrá chjin kixin ó tsícha tjan, la ntá tí xikaha la ó nchoxon tsotehe tjan na mé jehya jie.

³⁷ A ntá jnkojínrá tjínkáonrá kaín asánrá kixin chrókóteehya xjaanrá chjin la kjaxin tjan xikaha tjenkayáxin tjan la antsí jína tíha.

³⁸ Mé xikaha tí tjtóherá xjaanrá chjin kixin tsotehe tjan la ó nchoxon. La ko kjaxin tí tjinkakonhya tjan kixin chrókótohe tjan na mé antsí jína tíha.

³⁹ Tí tjan tsíkótehe mé k'uituenxín tjan kjuachaxin tí ley kixin tsjak'eko tjan tí xii tí naxa tjechón ch'án. A ntá tí chrók'uen ch'án ntá tsochónta tjan kjuachaxin tsotehe tjan inaá tí nkexro tsoxrjínhin tjan, kjánchó jehó ijnko nkexro tinkáchónki Ìnchéni mé chrókótehe tjan.

⁴⁰ Kjánchó antsí chrókóchéhe tjan tí jehó tjan chrókuitohe tjan, tí í chrókóteehya tjan. Méxra xikaha tjenkayáxian janhan la ko kjaxin tónna janhan kixin chonta janhan tí kjuachaxin kuente Nchakuen Dios.

8

Tí nkehe ine sín tjokehe sín tí nkehe tsíkjanoya

¹ A ntá jie tsoxrjanka kuente ti ko its'en tjokehe sín tí nkehe tsíkjanoya. Na mé chaxín kaín ni noheni tíha. Ntá chrókóxakonhenni kixin tí chrók'uitjani má ntá chrókóhnkeni má. Antsí tjetotan chrótjuèheni kichó ni kixin xikaha antsí chrókuinkáchónkini Ìnchéni.

² Tí jnkojín nkexro ntáchro kixin nohe ch'án, na mé chaxínhya tíha la naxa t'itjáyan tí nkehe chrókónohe ch'án.

³ A ntá jnkojín nkexro tsotjuèhe Dios la Dios tsochóxin tí jehe ch'án.

⁴ A ntá tí chrókjóneni nto tsíkjokehe sín tí nkehe tsíkjanoya, la ó noheni jína kixin tí nkehe tsíkjanoya la t'etuñhya ninkehó ntíhi chjasintajni, la ko ó noheni kixin jnkokoá Dios tjan.

⁵ A ntá síin nkehe nchek'in sín díos nkaya nkajní la ko chjasintajni na, kjánchó tí xikaha la kjá chrók'uixin itsjé díos la ko itsjé ìnché sín.

⁶ A ntá jeheni chóntani jnkokoá Dios na mé It'eni tíha, la jehe ch'án mé kjuích'éna ch'án kaín xín nkehe la ko tjejóni kixin chrókjuinchexiteyéheni ch'án. La ko kjaxin itjen jnkokoá Ìnchéni Jesucristo, na mé kaín xín nkehe síin la kjuích'éna ch'án la ko kjaxin tí jeheni tsíkjich'éna ch'án.

⁷ Kjánchó kénhya chojni nohe sín tíhi. Na mé iso sín ó kuènen sín kuinkáchónki sín tí nkehe tsíkjanoya, a ntá jie tió ine sín tí nkehe tsíkjokehe chojni tí nkehe tsíkjanoya na mé tjenkayáxin sín kixin ó tsík'áyéhe ijnko díos, kixin naxa noehya sín má, ntá ntáchro sín kixin ó kuámá sín tí jie kuente tí nkehe tsíkjanoya.

⁸ Ó noheni chaxín kixin jehya kixin chrókóxrjínhin Dios tí jeheni kixin tí nkehe jína chrókjóneni. Náhi. Jehya kixin chrók'uejóxinni jína kixin tí nkehe chrókjóneni na ko tí nkehe chrókjónehyani.

⁹ Méxra t̄it̄oéhyará k̄ixin tí k̄juachaxin chontará sinterá kaín x̄ín nkehe mé x̄ikaha chrók̄juachroe ijnko chojni k̄íchó ni nax̄a noehya j̄ina tinkáchónki Ìnchéni ntá tíha chrók̄juasixín s̄ín j̄ie.

¹⁰ A ntá tí chrók̄'uikon s̄ín k̄ixin jahará ó nohará j̄ina ntá ts'ejorá sinterá nkehe nkaxenhen ijnko n̄inkoe nkehe tsíkjanoya, ntá tí chojni k̄íchó ni nax̄a noehya j̄ina ntá chrók̄'uikon s̄ín x̄ikaha ntá k̄jixin jehe s̄ín tsotjinkaon s̄ín sine s̄ín tí nkehe tsík̄jokehe chojni ijnko dios chaxínhya.

¹¹ A ntá jahará ó nohará j̄ina ntá x̄ikaha t̄ejoch'erá itsará s̄inchek'itjayanrá tí k̄íchó ni nax̄a noehya j̄ina tinkáchónki Ìnchéni k̄ixin Cristo k'uenyákonhen tí jehe ch'án k̄jixin.

¹² Méxra tí x̄ikaha chrók̄juich'erá la chrók̄juásinhínrá j̄ie tí s̄ín k̄íchó ni nax̄a tinkáchónkihya s̄ín Ìnchéni j̄ina, na mé x̄ikaha k̄jixin chrók̄juásinrá j̄ie chrók̄uitekákuenhyará Cristo.

¹³ Méxra tí x̄ikaha chrók̄juasixín j̄ie ijnko k̄íchó ni k̄ixin tí nkehe chrók̄jóneni, ntá íchá j̄ina chrók̄jónehyani nto ínaá k̄ixin x̄ikahya ntá chrók̄juichroexín tí s̄ín k̄íchó ni ntá chrók̄juasixín s̄ín j̄ie.

9

Tí k̄juachaxin chóna ijnko apóstol

¹ Chaxín janhan la kohya nkexro t'etuanna k̄ixin janhan la chonta k̄juachaxin k̄ixin ijnko apóstol tsík̄jeyá Ìnchéni k̄ixin janhan k'uikuān ch'án. Jahará mé t̄jākox̄inrá tí x̄ra k̄juít'a kuente Ìnchéni.

² Iso s̄ín ntáchro s̄ín k̄ixin t̄jats̄oanhyana s̄ín k̄ixin ijnko apóstol tsík̄jeyá Ìnchéni. Ntá jahará kaín rá mé chrók̄juáts̄oanrá tí janhan k̄ixin tí kuítekáonrá kuinkachónkirá Ìnchéni mé x̄ikaha t̄jākox̄inrá k̄ixin chaxín janhan tsík̄jeyána ch'án.

³ Méxra janhan j̄ina chrók̄juátaha tí s̄ín xritjontana, chróntáxrjan k̄ixin:

⁴ Janhan chonta kaín k̄juachaxin chrók̄'uayáha nkehe chrók̄jonè la ko chrók̄'uia.

⁵ K̄jixin chonta k̄juachaxin chróchonta ijnko chojni chjin tinkáchónki Ìnchéni chrók̄'uajikian éxí chóna tí í so s̄ín tsík̄jeyá Ìnchéni, la ko tí s̄ín k̄íchó Ìnchéni, la ko éxí chóna ch'ín Pedro.

⁶ ¿Á t̄jenkayáxinrá k̄ixin ch'ín Bernabé la ko janhan jehóni chóntahyani k̄juachaxin tsít̄oheni tí x̄ra sich'exínni t̄jani?

⁷ ¿Nkexro ch'e x̄ra soldado ntá ch̄ichakoen ch'án ó chrókuicháxinhin? Nkexro k'uenka nta to uva ntá k̄jónehya ch'án to? ¿La ko nkexro t'ayakonhen kolélo ntá k'uíhya tí tsjen t'énhen s̄ín va?

⁸ Ntáchrohyará k̄ixin janhvàn k̄juenkayáxian tíha k̄ixin k̄jixin xroon tsík̄jin ch'ín Moisés x̄ikaha nixja.

⁹ Méxra k̄jixin ntáchro tí xroon tsík̄jin ch'ín Moisés ósé k̄ixin: “Chrók̄juéjójáhyará kampoza ir'va koxinta tí tsinkátja va noatriga tió tsónkéhe s̄ín noa.”* Tíha mé t'axrjexín k̄ixin jehya koxinta ó tóxakonhen Dios.

¹⁰ Náhi. Tóxakonhen ch'án k̄ixin tí jeheni. Méxra x̄ikaha nixja tí xroon k̄ixin chrók̄'uejóxinni j̄ina. A ntá tí nkexro k̄juínchentá nche la ko tí nkexro tsónkéhe noa, yóí s̄ín la chróchónhen s̄ín chrók̄'uáyéhe s̄ín tí nkehe k'óna.

¹¹ A ntá tí k'uenkani tí itén Dios asánrá, la k̄já chróchóntani k̄juachaxin chrók̄juanchaharáni ichrén nkehe t'ichjānx̄inhinni.

¹² A ntá tí x̄ikaha í so s̄ín chóna s̄ín tí k̄juachaxin t̄janchia s̄ín nkehe ts'áyéhe s̄ín, ntá jeheni antsí má chóntani k̄juachaxin chrók̄'uáyéheni nkehe.

* 9:9 Deuteronomio 25.4

Kjónté chóntani kjuachaxin xikaha la kjuanchahyani nkehe, kjónté kánhyó náxrjón k'uéjóni kixin tjinkakonhyani chrókjuanchiani nkehe chrók'uichjánxinhinni kixin ách'e xikaha ntá chrók'uinkákonhen tí itén Cristo chrókjuakoni.

¹³ Jahará ó nohará kixin tí sín ch'e xra kùente ninko mé ntaha xránjon nkehe ine sín. La ko tí sín t'óyánxin sín ko tí altar tsochjéhe sín Dios kjaxin ine sín tí ntöe tí ko t'óyánxin sín ntiha.

¹⁴ Méxra xikaha kjaxin k'uetöan Inchéni kixin tí sín ch'e tí xra ó chrónka sín tí tan tsaáxinni na mé tí xra a chrók'uaxrjenixin tí nkehe chrókjóné sín.

¹⁵ Kjónté janhan síin kjuachaxin xikaha chrókjuít'a, la xikahya kjuít'a la ko kjaxin xikahya ikjian tí xroon i kixin jahará chróchjinará ichrén nkehe. Náhi. Kjónté chrók'uénxiā kjinta chrókjuáncháhyará nkehe kixin tjínkakonhya kixin ninkexró chrókuakitsjena tí kjuachéhe chonta.

¹⁶ Jehya kixin chrokjuíntahnke chrókjuákua tí tan tsaáxinni. Náhi. Janhan na ó jehí sít'a tí xra a. Nòà tí janhan tí chrókjuákohya tí tan jína chrókuaáxin chojni.

¹⁷ A ntá tí janhván tjínkavan chrókjuákua la xikahó chrókjuacha janhan. A ntá tí tjákua itén Dios kixin xikaha kuítuanna ntá xikahó ntaxiteyá tí xra chjina Dios.

¹⁸ ¿A ntá nkehe chrókjuacha janhan? Tíha mé chrókjuacha janhan kixin chrókóchàna má kixin chrókjuákua tí itan tsaáxinni la ninkehó chrókjuánchàhya chrókjuacha la ntá tí xikaha la chrókuákjaáhya tí kjuachaxin tí chrókjuákua.

¹⁹ Méxra kohya nkexro t'etuanna. Kjánchó ó jehí chrókjuít'ahā kaín xín chojni xra kixin xikaha antsí tsjé chojni chrókjuacha janhan kixin chrókuitekaon sín Cristo.

²⁰ Tí tjèn tí síin tí sín judío ntayóhā éxí jehe sín xikaha janhan kixin xikaha chrókjuacha jnkojín sín chrókuitekaon sín. Na mé t'axrjexín kixin tí chrókjuacha iso tí sín nchexiteyéhe tí ley k'uetöan ch'ín Moisés, la t'ichjánxin kixin kjaxin janhan chrókjuíntaxiteyá tí ley kjónté janhan la xikahya t'etuanna tí ley.

²¹ A ntá tí chrókjuacha jnkojín tí sín nchexiteyèhya tí nkehe k'uetöan ch'ín Moisés la ntayóhā éxí tí jehe sín xikaha janhan kjaxin, kjónté chaxín t'etuanna tí nkehe k'uetöan Dios méxra ntaxiteyá tí nkehe k'uetöan Cristo.

²² Tió tjèn tí síin tí sín tienxínhya jína, ntá kjaxin janhan t'óna éxí tí jehe sín kixin xikaha chrókjuacha jnkojín tí jehe sín chrókuitekaon sín. Méxra ntayóhā éxí kaín xín chojni xikaha janhan kixin xikaha chrókjuacha janhan kixin chrókuaá iso tí jehe sín.

²³ Mé xikaha kaín tíha tjét'a kixin chrókuinhin sín tí tan chrókuaáxin sín la ko kjaxinna antsí má chrókjuíntayaonna Dios.

²⁴ Jahará ó nohará kixin tió itsjé sín tsinkáko kichó sín la kjánchó ójnkó nkexro tsjacha tí tsitonhen nkehe. A ntá jahará xikaha chrókuinkará kixin chrók'uayéhérá tí nkehe chrókuítöhanrá.

²⁵ Tí sín tinkáko kichó sín na mé jína t'ayakonhen sín asén sín, títohe sín kaín xín nkehe chrókjuich'ehe sín daño kixin tjinkaon sín chrókjuacha sín, chrók'uáyéhe sín kjónté ijnko corona tsík'óna kayoa ó tjoka tsoxámá. Kjánchó jeheni ch'eni xra kuènte Inchéni kixin ntá ts'áyéheni ijnko nkehe chónhya tsoxámá.

²⁶ A ntá janhan jehya éxí ijnko chojni t'ikonhya chrókuinka. Jehya éxí xrintö ó chrókjuánjonkian.

²⁷ Náhi. Janhan tjánjonkian tí cuerpo kuèntana, tétuñhan kixin jína chrókjuinchexiteyàna kixin tóxakonna kixin chrókjuásian ichrén jie ntá janhan chrókjuachahya kjónté senó kjuákohā itsjé chojni.

10

Tí nkehe t'etoan ch'án kuènte tí nkehe tsíkjanoya

¹ Tjínkavan janhan kixin chrókónohará kichó ni kixin tí sín k'uaxrjeníxinni ósé, kaín sín k'uixinkánkí sín chrínkí tí tjuj, la ko kaín sín k'uátòyè sín Ntayaon Kjátse,

² la ko kaín sín k'uéchréhe sín ch'ín Moisés éxí yóhe chrókuikite sín kixin jnkokoá k'uéjó sín tí tjen tí tjuj la ko tí ntayaon la ko kjuínchexiteyéhe sín ch'án kixin jehe ch'án k'uék'etoan ch'án.

³ La ko kaín sín kjóne sín jnkokón nkehe kujxin nkaya nkajní

⁴ la ko kaín sín ik'ui sín jnkokón nkehe kjuanjon Dios kixin ik'ui sín ntá k'uaxrjexín ijnko tjo kjuíncheyaon Dios, na mé tí tjo a la mé t'axrjexín kixin Cristo tíha.

⁵ Kjánchó itsjé tí jehe sín kjuínchekhèhya sín Dios, méxra kónínkaon ch'án la tí nteje ó k'uénxin tí sín a.

⁶ Kaínxín tíha kónhen kixin chróxraxinkakonxínni jeheni, chróntáchrohya asénni chrókjuich'eni tí nkehe jínahya éxí kjuích'e tí jehe sín.

⁷ Méxra chrókuinkachónkihyará jahará nkehe tsíkjanoya éxí k'uékinkáchónki iso tí jehe sín, éxí ntáchro tí xroon itén Dios tsíkjin sín ósé kixin: “Kaín sín k'uéjótjaxin sín kjóne sín la ko ik'ui sín, ntá kjuixin la k'uínkatjen sín la ité sín”.*

⁸ Méxra chrókjuasinkohyani jje chojni chjin ókjé éxí kjuích'e iso jehe sín ntá ik'uén sín, ventitres mil sín, jnkokoá yaon.†

⁹ Kjaxin chrókjuincheóninkakonhyani Ìnehéni éxí kjuích'e sín ntá ik'uén sín kixin kjónehe sín konche,‡

¹⁰ la ko chrók'uántaxíenhyani Dios éxí k'uántaxínhin tí jehe sín ntá tí ángel kuènte kjuach'én mé kui k'óyán sín.§

¹¹ Kaín tíha kónhen tí sín k'uaxrjeníxinni ósé kixin chrókónoexínni la ko k'óna xroon chrónka xikaha kixin nchexraxinkaonni tí jeheni tjejóni jie kixin í séhya tsjixixín tsjeje chjasintajni.

¹² A ntá tí nkexro ntáchro kixin ntoá tjen na chrókóxakonhen kixin chrókjuichrohya.

¹³ Jahará naxa k'uatsínkahyará ninkehó nkehe tí chrókjuachahya chojni chrókónhen. Méxra jahará chróxráxinkáonrá Dios kixin jehe ch'án chrókuítóehya ch'án tí jahará kixin chrók'uatsínkará nkehe imá xra chrókjuachahyará. Méxra tí itsi ichrén nkehe tsonhanrá la Dios tsjinkitsará ch'án kixin chrókjuachará chrók'uatsínkará tí nkehe chrókónhanrá.

¹⁴ Méxra tjuahará jahará kichó ni, la ntá ntáxrjan kixin chrókuítóhéra tí nkehe tsíkjanoya.

¹⁵ Nixjahará jahará kixin jahará chojni ó tienxín. Méxra jahóra chrokjuenkayáxinrá kixin á jína tí nkehe ntáxrjan.

¹⁶ Tí tjanchiani kjuasáya kixin tí nkehe it'ini na mé kaín ni jnkokoá tjakoxinni tí ijnié Cristo ó k'úitji. La ko tió tóchrít'oni tí niotja ineni, na mé kaín ni jnkokoá tjakoxinni tí cuerpo kuènte Cristo.

¹⁷ Kjónté nchónhyani jeheni la kaín ni na jnkokoá niotja ineni kixin kaín ni jnkokoá k'ónani cuerpo kuènte Cristo.

¹⁸ Chrókónohará nkexrí ch'e tí sín chjasin Israel, na mé ine sín tí ko tsíkjokehe sín Dios ntá xikaha tjakoxin sín kixin xikaha tinkáchónki sín.

¹⁹ Ntáxrjanhya kixin tí nkehe tsíkjanoya la chóna kjuachaxin, la ko ntáxrjanhya kixin tí nto tsíkjokehe sín tí nkehe tsíkjanoya la antsí chóna kjuachaxin.

* 10:7 Éxodo 32.6 † 10:8 Números 25.6-9 ‡ 10:9 Números 21.5-6 § 10:10 Números 16.41-49

²⁰ Náhí. Ntáxrjan kixin tí nkehe tjanjon tí sín chónhya Dios na mé tjokehe sín tí nchakuen tí jínahya la jehya Dios tjokehe sín tíha. Méxra janhan tjínkakhya kixin xikaha chrókjuich'era jahará chróxráinkáonrá tí nchakuen tí jínahya.

²¹ Tí its'ini tí nkehe xraxinkakonxínni ijníé Ìnchéni ntá kjaxin tí chrók'uini tí nkehe xraxinkakonxín sín tí nchakuen tí jínahya la jehya jína tí xikaha chrókjuich'eni chrók'uini. Tí sineni tí nkehe xraxinkakonxínni tí cuerpo kuènte Ìnchéni ntá kjaxin tí chrókjóneni tí nkehe xraxinkakonxín sín tí nchakuen tí jínahya la jehya jína tí xikaha chrókjuich'eni chrókjóneni tí nkehe.

²² ¿A jína chrókjuinchekóninkaonni Ìnchéni ní? ¿Á jeheni antsí chóntani kjuachaxin la ntá jehe ch'án la náhi ní?

Chóntani kaín kjuachaxin kaín xín nkehe na kjónté antsí tjetoan tsotjuèheni kíchó ni

²³ Siín kjuachaxin ichrén nkehe chrókjuich'eni. Kjánchó jehya kixin kaín nkehe la jína. Siín kjuachaxin ichrén nkehe chrókjuich'eni na kjánchó kénhya nkehe chrókjuinkítsa chrókónoheni tí nkehe kuènte Dios.

²⁴ Chrókjuéyáhyará tí nkehe chrók'uejóxinrá jína jahóra. Náhí. Kjaxin chrókjuéyará tí nkehe chrók'uejóxin jína í so chojni.

²⁵ Chrókjónterá kaín nto sítóxin la chrókjuanchankíhyará ninkehó kixin tí xikaha ntá ntoáhya chrókjuenkayáxinrá,

²⁶ kixin kuenté chjasintajni la kaín xín nkehe siín la kuènte Ìnchéni.

²⁷ A ntá jnkojín chojni tinkáchónkihya Ìnchéni chrók'uíyahará sín kixin chrókjóntekoará sín la ko tjínkáonrá sáchrókjuirá ntaha la ntá ó nchoxon chrókjónterá tí nkehe tjáhará sín la chrókóxakuanhyará chrókjuanchankíhyará ninkehó.

²⁸ Kjánchó tí chróntáchro jnkojín sín kixin tí nto la ó tsíkjokehe sín ijnko nkehe tsíkjanoya, ichro sín, ntá tí xikaha la chrókjóntehyará jahará, chrókóxakonhanrá kixin ntoáhya chrókjuenkayáxin tí nkehe xro chrónka xikaha.

²⁹ Méxra ntáxrjan tíhi kixin tjínkakhya kixin ntoáhya chrókjuenkayáxin chojni ókjé, jehya kixin ntoáhya chrókjuenkayáxinrá jahará.

Kjánchó isorá tsjanchankinará kixin nkekuènte chrókóxakonhanrá nkehe chrókjuenkayáxin ókjé chojni kixin tí kjuachaxin chontará.

³⁰ Tí tjáncháha Dios kjuasáya kixin tí nkehe inè, ¿ntá nkekuènte kixin chrókjontana chojni kixin kuènte kjonè?

³¹ Tí chrókjónterá nkehe la ko chrók'uirá nkehe la ko ichrén xra chrókjuich'era la chrókjuákoxinrá kixin Dios kjuínkítsará.

³² Ch'ehyará ninkehó nkehe chrókjuichroexin í so chojni kjónté judío sín la kjónté jehya judío sín la o tí chojni njnko Dios.

³³ Janhan mé tjéyá kixin kaín xín xra tjét'a chrókóxrjínhin kaín xín chojni, na mé jehya kixin tjéyá kixin janhvàn chrókjuak'é jína. Náhí. Kjaxin tjínkavan kixin chrókuaáxin í so chojni.

11

¹ Chrókjuákoxinrá jahará éxi kjuákoxián janhan kixin janhan mé kjuákoxián éxi kjuákoxin Cristo.

Jína chrók'uejó tí chojni chjin tió tójnksé chojni

² Kíchóni, chàna kixin xráxín xráxinkáonrá tí janhan la ko nchexiteyéhérá tí nkehe kjuákohará.

³ A ntá tjínkavan kixin chrókiénxinrá kixin Cristo t'etuenhen jnkojnko chojni ntoá, la ko kjaxin xikaha jnkojnko chojni ntoá mé t'etuenhen tí ichjién, la ko kjaxin xikaha Dios mé t'etuenhen Cristo.

⁴ **A** ntá tí jnkojín chojni ntoa xrasixín kachjinke ch'án tí tjenixjehe ch'án Dios, o xrasixín ch'án kachjinke ch'án tí tjechronka ch'án iten Dios, mé xikaha tjakoxin ch'án kixin chóntehya ch'án kjuasáyé tí Ìnchéni t'etuenhen ch'án.

⁵ **A** ntá ijnko chojni chjin tjóchín kja tjan tí tjenixjehe tjan Dios la o tjóchín kja tjan tí tjechronka tjan iten Dios, mé xikaha tjakoxin tjan kixin chóntehya tjan kjuasáyé tí xì tjan. Mé tóyóhe éxí tsíkjín tjan xikaha.

⁶ **A** ntá tí chojni chjin tjinkakonhya kixin chrók'uiáxin kja tjan nkehe mé chrókjín tjan. Kjánchó tí chrókósuèhe tjan chrókjín tjan, ntá chrók'uiáxin kja tjan tóte tió tójnkotsérá.

⁷ Kixin tí chojni ntoa chrókjuasinhya ch'án kachjinke ch'án kixin jehe ch'án mé éxí retratoé Dios la ko t'inkaséyanxín ch'án tí kjuachaxin kuènte Dios. **A** ntá tí chojni chjin mé t'inkaséyanxín tjan tí kjuachaxin kuènte tí xì tjan.

⁸ Kixin tí chojni ntoa saoxín k'óna mé k'uaxrjeníxinhya ch'án chojni chjin. Náhí. Tí chojni chjin mé k'uaxrjeníxin tí chojni ntoa.

⁹ Chaxín k'ónahya tí chojni ntoa kixin jehó tsjak'e ch'án. Náhí. Tí chojni chjin mé k'óna kixin tsjak'ekotoxin ch'án.

¹⁰ Ntá t'ichjánxin kixin tí chojni chjin ts'íáxin kja sín tóte chrókjuakoxin sín kixin t'ítuenhen sín kixin xikaha ts'ikon tí sín ángel.

¹¹ Kjánchó kaín ni tinkáchónkini Cristo t'ichjánxin kixin tí chojni ntoa chrókjuinkitsa tí chojni chjin la ko tí chojni chjin chrókjuinkitsa tí chojni ntoa.

¹² Kixin chaxín tí chojni chjin na tí chojni ntoa k'uaxrjeníxin. **A** ntá jie tí chojni chjin na mé t'axrjeníxin tí chojni ntoa. **A** ntá kaín ni k'uaxrjeníxinni Dios.

¹³ Jahará nkechrórá, ¿á ó nchoxon kixin ijnko chojni chjin tjóchín kja tjan chrónixjehe tjan Dios?

¹⁴ Jahórá chrókónohará kixin chrókósuèhe tí chojni ntoa chóna kaxihi kjínjin.

¹⁵ **A** ntá tí chojni chjin chóna kaxihi kjínjin la mé ntoá tíha kixin ó kuituexin tjan kixin tsochóna tjan kaxihi tjan kjínjin kixin tsotjóchínhya kja tjan.

¹⁶ **A** ntá tí tjen jnkojín nkexro titekakonhya tíha xikaha ntá chrókónohará kixin jeheni la ko kaín xín tí sín ninkoe Dios la xikahó kuènhenni.

Ntoáhya kjóne sín tí niotja xraxinkakonxín sín Ìnchéni

¹⁷ Méxra tí nkehe tjékjian la mé ijnko nkehe tóxrjinnahya tjejoch'erá. Tió tójnkotsérá ntiha la ijnko nkehe jína chrókjuich'erá. **A** ntá náhi la ijnko nkehe jínahya tjejoch'erá.

¹⁸ Na mé saoxín na mé ntáchro sín kixin tió tójnkotsérá la jnkokoáhya tjenkayáxinrá. Ntáxrjan kixin ách'e chaxín xikaha tjejorá.

¹⁹ ¿Xá t'ichjánxin kixin chrók'uaxrjentará kixin chrókónoexínni kixin nkexro chaxín tinkáchónki Ìnchéni la ko nkexro tí náhi?

²⁰ Méxra tí xikaha jnkokoáhya tjenkayáxinrá ntá tió tójnkotsérá chrókjónterá niotja la chaxínhya xraxinkákonxínrá Ìnchéni tí xikaha.

²¹ Kixin tió sinterá la senó isorá tjejonterá tí nkehe tsíkjasánkoará, la isorá la kjónté naxa t'énxinrá kjinta, la í sorá la tsíkókoanrá.

²² ¿Á chontahyará nchia ntoará? Ntahó chrókjóntexínrá la ko chrók'uíxinrá nkehe. Mé xikaha chontahyará kjuasáyé tí ninkoe Dios la ko nchesuèhérá tí sín nòda chóntahya ninkehó. ¿Nkehe tsontáxrjan? ¿Á tsontáxrjan kixin jína tjejoch'erá? Kjá náhi. Jehya jína tjejoch'erá.

Jína chróxraxinkakonxínni Ìnchéni

(Mt. 26.26-29; Mr. 14.22-25; Lc. 22.14-20)

²³ Kíxin Ìnchéni mé chjìna ch'án tí nkehe kjuákochará: kíxin tí tie tsíkóxi ch'án na mé jehe ch'án kuákja ch'án tí niotja

²⁴ ntá kjuixin kjuanchia ch'án kjuasáya ntá kóchrít'ò ch'án tí niotja ntá ntáchro ch'án kíxin: “Tíhi mé ntona xránjon its'en kíxin jína ts'ejóxin tí jahará. Méxra xíkaha sich'erá kíxin tsoxraxinkákonxínrá tí janhan”, ichro ch'án.

²⁵ La ko kjaxin xíkaha tió kjuixin kjóne sín ntá kuákja ch'án tí vaso la ntáchro ch'án kíxin: “Tíhi mé tjakoxin kíxin chaxín tsoxiteyá ijnko nkehe nixin kuènte Dios kíxin ts'ítji jnina. Tió its'irá tíhi mé tsoxraxinkákonxínrá tí janhan”, mé chro ch'án.

²⁶ Kíxin tí interá tí niotja la it'irá tí ìnté to uva mé xíkaha tjeotjákoxinrá kíxin xíkaha k'uénxin Ìnchéni. Mé xíkaha tsjákoxinrá tsjixrakájia yaon tsokjan ch'án.

Ntoá chrókjóneni tí niotja kuènte Ìnchéni

²⁷ A ntá jnkojín nkexro chjini chrókjóne sín tí niotja la ko chrók'ui sín tí ìnté to uva xraxinkakonxinni Ìnchéni, mé xíkaha chrókjúasin sín jie chrókjúikosáyehya sín tí cuerpo la ko tí ijnié Ìnchéni.

²⁸ Méxra jnkojnkonni chrókjúenkayáxinni senó kíxin á chóntahyani jie na ntá chrókjóneni tí niotja la ko chrók'uini tí ìnté to uva.

²⁹ A ntá tí xíkaha chjini chrókjóneni la ko chjini chrók'uini la chaxínhya chróxraxinkakonxinni tí cuerpo kuènte Ìnchéni la mé tí xíkaha chrókjúich'eni la chrókjúasótexinni tíha.

³⁰ Mé xíkaha itsjérá níhará la ko itsjérá tsankahyará la ko jnkojínrá k'uénrá.

³¹ A ntá tí chrókjúatsòanni nkexrí tjen asénni jeheni ntá Ìnchéni t'ichjánxienhya chrókjúinchekjásóteni ch'án.

³² A ntá kjónté chrókjúinchekjásóteni Ìnchéni ntá chrók'uitjani chrókjúinchejiteyéheni ch'án, ntá chrókjúasótehyani éxí tsjasóte tí í so chojni chjasintajni.

³³ Méxra kichó ni, tió tójnksérá sinterá la chróchonhénrá chrókui tí í so sín ntá chrókjóntekoará sín jnkokoá.

³⁴ A ntá tí nkexro ik'uén kjinta la íchá jína senó chrókjónexín nkehe ntòe ó kíxin ntá chrókjúinchekjásótehyará Dios kíxin xíkaha ntoáhya tójnksérá. A ntá tí í so nkehe la tsjásiyóxián janhan tió tsjasántsahará.

12

Nchakuen Dios mé chjéhe kjuachaxin jnkojnko chojni

¹ Kichóni, tjínkavan kíxin tsonohará jína kíxin nkexrí siín tí kjuachaxin tjanjon Nchakuen Dios t'áyéhe jnkojnko chojni.

² Jahará ó nohará jína kíxin tió naxa kuinkachónkehyará Ìnchéni na mé kuinkachréhérá tí nkehe tsíkjanoya nixjahya.

³ Méxra chrókónohará kíxin nijnko nkexro nixjaxin kjuachaxin Nchakuen Dios tsjacha ts'ántaxínhin Jesús, la ko nijnko nkexro tsjacha tsonáchro sín kíxin Jesús mé Ìnché sín tí nixjaxínhya sín tí kjuachaxin Nchakuen Dios.

⁴ A ntá nchónhya xra kuènte kjuachaxin Nchakuen Dios siín la kjánchó jnkokoá Nchakuen Dios mé tjetjanjon.

⁵ La ko siín nchónhya nkexrí sich'ehe ni xra Ìnchéni, kjánchó Ìnchéni la ójnkó nkexro tíha.

⁶ La ko nchónhya nkehe t'axrjexín tí xra ch'e jnkojnko chojni la kjánchó jnkokoá Dios tjetjanjon tí kjuachaxin ch'exínni xra kaín ni.

⁷ Jnkojnko chojni mé kuitonhen kíxin chrókjúakoxin kjuachaxin kuènte Nchakuen Dios kíxin xíkaha chrókjúinkítsa kichó.

⁸ Iso chojni mé ts'áyéhe kjuachaxin tsonixja sín kjuaxrexinkaon jína kixin tjinkitsa Nchakuen Dios, la ko í so chojni ts'áyéhe kjuachaxin tsochrónka ijnko nkehe kuènte Dios noehya tí í so sín kixin Nchakuen Dios mé tjinkitsa sín tsonixja sín.

⁹ La ko í so chojni mé ts'áyéhe kjuachaxin antsí tsinkáchónki Dios kixin Nchakuen Dios mé tjinkitsa. La ko í so chojni mé ts'áyéhe kjuachaxin sinchekitohe chojni jína.

¹⁰ La ko í so chojni mé ts'áyéhe kjuachaxin tsjasin sín kjuaxroan, la ko í so chojni mé ts'áyéhe kjuachaxin kixin Dios sinchenohe sín ijnko nkehe tsochenka sín tí í so kichó ni, la ko í so chojni mé ts'áyéhe kjuachaxin tsjatsqanxín á kjuachaxin kuènte Nchakuen Dios o á kjuachaxin kuènte ijnko nchakuen jínahya chronkaxín ijnko chojni, la ko í so chojni mé ts'áyéhe kjuachaxin kixin ijnko nkiva ókjé naxa k'uitjahya sín tsonixjxin sín ijnko nkehe kuènte Dios, la ko í so chojni mé ts'áyéhe kjuachaxin tsochronkaxín nkexrí t'axrxjxín tí nkehe ókjé nkiva tsíchronka tí í jnko chojni.

¹¹ Kjánchó kaín tíha jnkokoá Nchakuen Dios mé tjinkitsa, na mé k'uáyéhe jnkojnko chojni jnkojnko kjuachaxin éxí tjinkaon tí Nchakuen Dios nkerí xra chrókjuich'e sín.

Kaínni k'ónani jnkokoá cuerpo kuènte Cristo

¹² Cristo la éxí yóhe ijnko cuerpo chóna nchónhya parte. A ntá ijnko cuerpo la jnkokoá kjánchó nchónhya parte chóna. Kjónté nchónhya parte chóna tí cuerpo la tí cuerpo la ójnkó. Mé xikaha Ìnchéni Cristo la ójnkó tí jehe ch'án.

¹³ Kaínni kjónté chojni judío la kjónté chojni jehya judío, la kjónté chojni ch'exón xra, la kjónté chojni t'ítuenhya, kaín ni na mé jnkokoáxón Nchakuen Dios kuíkitexínni, na kaín ni k'ónani jnkokoá cuerpo kuènte Cristo, na mé éxí jnkokoá nkehe ik'uíni kaín ni na mé k'uáyéheni tí jnkokoá Nchakuen Dios.

¹⁴ Kixin tí cuerpo kuènteni la jehya jnkokoá parte chóna. Náhi. Itsjé parte chóna tí cuerpo.

¹⁵ Tí chróntáchro tí toteni kixin: “Jehya itja tí jeheni na mé jehya jeheni kuènte tí cuerpo”, na mé chaxínhya tíha kixin ó jehe cuerpo kuènte.

¹⁶ Kjaxin tí chróntáchro ijnko ntatsjoni kixin: “Jehya ikon tí jeheni na mé jehya jeheni kuènte tí cuerpo a”, na mé chaxínhya tíha kixin ó jehe cuerpo kuènte.

¹⁷ Tí chaxín kuenté cuerpo kuènteni chrók'óna ikonni, ¿ntá nkexrí chrókuinhinni? A ntá tí chaxín kuenté cuerpo kuènteni chrók'óna ntatsjoni, ¿ntá nkexrí chrókókaxraxéheni?

¹⁸ A ntá Dios kjuanjon ch'án kjuachaxin nkexrí ch'e xra jnkojnko nkehe kuènte cuerpo kuènteni kixin jehe ch'án nkexrí tjinkaon ch'án kóxrjínhín ch'án.

¹⁹ A ntá tí chrók'óna jnkokoá nkehe tíha, ¿a ntá nkexrí chrókjuak'e tí cuerpo a?

²⁰ Kjánchó jie nchónhya parte chóna tí cuerpo kuènteni la ó jnkokoá tíha.

²¹ Tí ikonni la mé xitjahya tsontáche tí tjani kixin: “T'ichjánxienhyani tí jaha”, la ko kjaxin tí kjani xitjahya tsontáche tí toteni kixin: “T'ichjánxinnahya tí jaha.”

²² Náhi. Tí nkehe kuènte tí cuerpo tónhenni kixin tjetuanhya na mé kjónté antsí má t'ichjánxin

²³ la ko í so nkehe kuènte tí cuerpo la kánhyó chónteheni kjuasáya na kjánchó antsí nchek'ítsáni ka. La ko tí nkehe náxrjónhya la antsí tóxakonhenni kixin tsonoxínhya.

²⁴ A ntá tí nkehe náxrjón na mé t'ichjánxienhya ka ts'ítsá. Mé xíkaha Dios kjuíncheyóxin kaín tí nkehe kuènte tí cuerpo kuènteni la ko jehe ch'án antsí chjéhe ch'án kjuasáya tí nkehe chrókjuikosáyehyani jeheni

²⁵ kixin ninkehó xitjahya chrókjuikayehe tí cuerpo kixin kaín tí nkehe la jnkokón tjinkitsa kichó.

²⁶ Tió tsíkóníhi ijnko parte kuènte tí cuerpo la kaín tí í so parte la kjaxin tjtó; la ko tió tjikosáyehe sín ijnko parte la kuenté tsochéhe.

²⁷ A ntá jahará na mé kuènte tí cuerpo kuènte Cristo la ko jnkojnkorá mé ijnko parte kuènte tí cuerpo kuènte ch'án.

²⁸ Méxra Dios kjueyá ch'án chojni sich'ehe ch'án xra kuènte nínko, na mé saoxín kjueyá ch'án tí sín apóstol; la ko yóxin kjueyá ch'án iso chojni chjéhe ch'án kjuachaxin tsochrónka sín ijnko nkehe kjuínchenohe sín ch'án. La ko nixin kjueyá Dios iso chojni chjéhe ch'án kjuachaxin tsjako sín itén ch'án, la ko kjaxin kjueyá ch'án iso chojni chjéhe ch'án kjuachaxin tsjasin sín kjuaxroan, la ko kjaxin kjueyá ch'án í so chojni chjéhe ch'án kjuachaxin sinchekitohe chojni níhi jína, la ko kjaxin kjueyá ch'án í so chojni chjéhe ch'án kjuachaxin antsí tjinkitsa kichó, la ko kjaxin kjueyá ch'án í so chojni chjéhe ch'án kjuachaxin ts'etoan xra kuènte ch'án, la ko kjaxin kjueyá ch'án í so chojni chjéhe ch'án kjuachaxin tsonixjaxin sín í jnko nkiva.

²⁹ Kénhya chojni tsík'óna apóstol, la ko kénhya chojni chóna kjuachaxin sinchenohe sín Dios ijnko nkehe tsochrónka sín, la ko kénhya chojni chóna kjuachaxin tsjako sín itén Dios, la ko kénhya chojni chóna kjuachaxin tsjasin sín kjuaxroan,

³⁰ la ko kénhya chojni chóna kjuachaxin sinchekitohe sín chojni jína, la ko kénhya chojni chóna kjuachaxin tsonixjaxin sín ijnko nkiva ókjé, la ko kénhya chojni chóna kjuachaxin tsochronkaxin sín nkexrí t'axrjexin tí nkehe chrónka tí sín nixjaxin ijnko nkiva ókjé. Chaxín kjá náhi.

³¹ Méxra tjeyará tí kjuachaxin antsí jína chrótjáhara Dios. Ntá jie tsjákohará ijnko ntia antsí jína chrók'uejorá.

13

Chrótjuèheni kichó ni

¹ Tí chrónixja nkivee chojni ó la ko kjaxin chrónixja éxi nixja tí sín ángel, ntá naxa chrótjuahya kichó ni la ó chónkó tíha la mé éxi chrókóyóna chica tsjánka ó la ko éxi ijnko chica platillo nchevékjan sín ó, kixin ninkehó són chónahya.

² La ko tí chrónixja itén Dios, la ko tí chrókianxian kaín nkehe kuènte Dios naxa noehya chojni, la ko tí chrókónona kaín nkehe, la ko antsí chrókuinkachónkia Dios ntá chrókjuacha chróntátjan ijnko jna sáchrókjui ókjé, kjónté tí xíkaha ntá naxa chrótjuahya kichó ni, ntá ninkehó sínkíhya tí janhan.

³ Tí chrókjuintakitonhan tí sín nòa kaín nkehe chonta, la ko tí chrókjuánjuan kjuachaxin kixin chróchena kuenténa, kjónté tí xíkaha ntá naxa chrótjuahya kichó ni la ntá ninkehó sínkíhya tíha.

⁴ Tí tjuèheni kichó ni na ts'ejóchónhenni kichó ni, tsonínkakuenhyani kichó ni, la ko sinchejína asénni, la ko tsochjinoxíenhyani, la ko sinchehnkehyani, la ko tsohnkehyani,

⁵ la ko ch'ehyani ninkehó nkehe náxrjónhya, la ko tjejáhyani nkehe kuènteni ó, la ko tsonínkakonhyani tjoka, la ko tsochóntahyani kjuanínkaon isé,

⁶ la ko kjaxin tsochéhyani tió í jnko chojni tjasin jie. Náhi. Chrókóchéheni tió ijnko nkehe jína sítónhen.

⁷ Tí tjuèheni kichó ni la kjónté kaín nkehe chrókjuasótexínni la chrókuitekaonni kixin jína sín la ko naxa chrok'uejóchónhenni chrókónínkakonhyani.

⁸ Tí tjuèheni kichó ni la jnkochrín tsjak'e ts'itjáyanhya. A ntá itsi ijnko yaon í t'ichjánxinhya tsochrónka chojni itén Dios, la ko tsokohya kjuachaxin tsonixjaxin chojni ókjé nkìva, la ko tsokohya kjuachaxin tsonohe chojni má.

⁹ Naxa t'itjáyan tí nkehe chrókónoheni la ko naxa t'itjáyan tí nkehe chróchronkaxínni.

¹⁰ A ntá tió tsonoheni kaín xín nkehe ntá tí nkehe ntoáhya k'uénoheni la mé ts'itjáyan.

¹¹ Tió naxa chánjan janhan k'uéníxja éxí chánjan la ko k'uékjenkayáxian éxí chánjan. Ntá kóntetona ntá kuitoha tí nkehe kuènte chánjan.

¹² Méxra éxí ijnko xrosenta t'ikonxínhyani jína jie, ntá tsi ijnko yaon chr'éxin ntá ts'ikonxínni jína kaín nkehe. Ijie naxa t'itjáyan tí nkehe chrókónona; ntá tsi ijnko yaon tsonona jína kaín xín nkehe éxí xikaha kjaxin Dios chóxin ch'án tí janhan.

¹³ Méxra, iní nkehe tjejó jnkochrín, la mé ts'ejó chojni tsinkáchónki Dios, la ko ts'ejó chojni tsochónhen sín, la ko ts'ejó chojni tsotjuèhe kichó. A ntá iní nkehe síin, la kjánchó antsí má t'ichjánxín tsotjuèheni kichó ni.

14

Tí nixjaxin chojni ókjé nkìva

¹ Chrókóxakonhanrá kixin chrótjuèhéra kichuára la ko kjaxin chrókjuéyára kixin Nchakuen Dios chrótjáhará kjuachaxin. Kjánchó antsí chrótjinkáonrá tí kjuachaxin tsochronkará ijnko nkehe kuènte Dios.

² Méxra, tí nkexro nixjaxin ijnko nkìva ókjé mé nixjehe sín Dios ó la ntá chojni la náhi, kixin kohya ninkexró tienxín tí nkehe nixja sín la mé nchakuen sín ó mé chronkaxín sín ijnko nkehe kuènte Dios noehya tí í so sín.

³ A ntá tí nkexro chronkaxín ijnko nkìva tienxín tí í so sín ijnko nkehe kuènte Dios mé nixjehe chojni ntá xikaha tjinkítsa tí í so sín kixin antsí chrók'uitja sín nkehe kuènte Dios la ko chrókóchéhe sín.

⁴ A ntá tí nkexro nixjaxin ijnko nkìva ókjé la mé tjinkítsa jehó ch'án antsí tsonohe tí kjuachaxin kuènte Dios. A ntá tí nkexro chronkaxín ijnko nkehe kjuínchenohe Dios mé tsjinkítsa tí sín kuènte nínko kixin antsí chrók'uitja sín nkehe kuènte Dios.

⁵ Tjínkavan kixin kaín rá chróchontará kjuachaxin chrónixjaxínrá ijnko nkìva ókjé. Kjánchó antsí tjetooan chróchontará kjuachaxin chróchronkará ijnko nkehe kjuínchenohará Dios. A ntá kánhyó tjetooan chrónixjaxínrá ókjé nkìva tí noahyará tsochronkaxínrá nkexrí t'axrjexín tí nkehe chróchronkará kixin chrókuinhin kaín tí sín tinkáchónki Inchéni kixin antsí chrók'uitja sín nkehe kuènte Dios.

⁶ A ntá kichó ni, tí chrókjuasántsahará chrónixjaáxinrá ijnko nkìva ókjé la ó chónkó tíha. Íchá jína chrónixjaáxinrá ijnko nkìva tiénxinrá chróxrjankaxián ijnko nkehe kjuínchenóna Dios la chróxrjankaxián ijnko nkehe kuènte Dios naxa noahyará, la chróxrjankaxián ijnko nkehe tjinkaon Dios chrókónohará, la chrókuákoáxinrá ókjé nkehe nixin.

⁷ Kixin kjaxin tí ison flauta la ko tí isón arpa, tí jnkokónhya chróntáchro jnkojnko són, ntá chrókjuachahyani chrókjuatsoanni nkehe tí ntáchro tí són a.

⁸ La ko éxí yóhe tí síin guerra, tjanjonko kichó sín, la ntá ntoáhya chrók'uánoa sín tí chica trompeta, ntá kohya nkexro chrókóyaxínhin sín sáchrókjuikjanjonko kichó sín.

⁹ Kjaxin xikaha tí jahará tí nixjahyará ijnko tan tienxín sín, ¿ntá nkexrí chrókónohe sín nkehe tí ntáchorá? Mé xikaha tjejonixjará éxí chjéhe xrinto ó.

¹⁰ Chaxín síin itsjé nkìva chjasintajni la ko kaín nkìva la síin chojni tienxín síin.

¹¹ Kjánchó tí chrókianxinhya janhan tí nkehe tsontáchro ijnko nkexro, ntá tí nkexro a ts'ikon tí janhan éxí ijnko nkexro tsíkjin ókjé la ko kjaxin janhan ts'íkuan tí jehe ch'án éxí ijnko nkexro tsíkjin ókjé.

¹² Méxra jahará imá tjinkáonrá chrók'uayéhérá ijnko xra kuènte Nchakuen Dios, ntá chrókójina chrókjuéyará tí xra chrókjuinkitsa tí í so sín kuènte nínko kixin antsí chrók'uitja sín ijnko nkehe kuènte Dios.

¹³ Méxra tí nkexro nixjaxin ijnko nkìva ókjé la chrókjuanchehe Dios kixin chrókjuinkitsa chróchronkaxín ch'án nkexrí t'axrjexín tí tan a.

¹⁴ Kixin tí tsonixjaxian Dios ijnko nkìva ókjé, ntá tí nchakuenná ó mé tjenixjehe Dios, la ntá tí kjuaxrexinkaon kuèntana la ókjé tjen.

¹⁵ A ntá tí xikaha, ¿nkehe chrókjuít'a? Íchá jina chrónixjaxian Dios tí nchakuenná la chrókianxian janhan, la ko tió chrótsje janhan himno la chrótsjexian nchakuenná la ko chrókianxian janhan.

¹⁶ Kixin tí tsochjeéxinrá kjuasáya Dios nchakuanrá ó ntá tjejótinhin í so chojni, ¿ntá nkexrí kixin tí sín naxa kienxínhya sín tí nkehe nixjehérá Dios chróntáchro sín “Amén, ó nchoxon”?

¹⁷ Kjónté imá náxrjón tí chrókjuanchehérá Dios kjuasáya la ntá chrókiénxínhya tí sín tjejótinhin, ntá chrokuinkitsahya kixin chrók'uitja sín nkehe kuènte Dios.

¹⁸ Tjáncháha Dios kjuasáya kixin antsí chonta janhan kjuachaxin tsonixjaxian ókjé nkìva, la ntá jahará la kánhyó nixjará xikaha.

¹⁹ Kjánchó tió tójkotsé chojni kichó ni la mé ntáxrjan kixin antsí tjínkavan chrónixja janhan kjónté in'ó palabra ó tienxín sín kixin xikaha chrókjuákuaxian sín, la ntá kánhyó chrókójina kjónté ite mil palabra chrónixjaxian ijnko nkìva ókjé tienxínhya chojni.

²⁰ Kichóni, chrókjuenkayáxinhyará éxí chánjan. Kjánchó chrók'uejorá éxí chánjan naxa noehya nkehe jínahya. A ntá chrókjuenkayáxinrá éxí chojni nteto.

²¹ Tí xroon tsíkjin sín ósé nkexrí k'uetōan Dios mé ntáchro kixin: “Janhan tsonixjaxian ókjé nkìva la ko itén chojni ókjé kixin tsinhin tí nación Israel na kjónté tsitekakonhya sín, xikaha ichro Ìnchéni.”*

²² A ntá tí kjuachaxin tsonixjaxin chojni ókjé nkìva mé xránjon kixin chrókjuakoxin chojni chrókuinhin tí sín tinkáchónkihya Ìnchéni, jehya kixin t'ichjánxin chrókuinhin tí sín tinkáchónki Ìnchéni. A ntá tí kjuachaxin tsochronka chojni ijnko nkehe kjuínchenohe sín Dios mé xránjon kixin chrókjuakoxin chojni chrókuinhin tí sín tinkáchónki Ìnchéni, jehya kixin chrókuinhin tí sín tinkáchónkihya Ìnchéni.

²³ A ntá tió tójkotsérá kaín rá tinkáchónkirá Ìnchéni, a ntá kaín rá chrónixjaxinrá ókjé nkìva, ntá tí chrók'uixenhen nchia ijnko chojni naxa kuènhya sín xikaha, o chrók'uixenhen nchia ijnko chojni naxa tinkáchónkihya Ìnchéni ntá chrókuinhin sín xikaha la kjá tsontáchro sín kixin ó k'uixikjánrá.

²⁴ Kjánchó tí chróchronkará kaín rá ijnko nkehe kjuínchenohará Dios ntá chrók'uixenhen nchia ijnko nkexro tinkáchónkihya Ìnchéni, o chrók'uixenhen ijnko chojni naxa tienhyé, ntá chrókuinhin sín nkehe tjejonixjará kaín rá ntá chrórxaxinkaon sín tí jiē chóna sín ntá chrókuítóhe sín kaín jiē chóna sín.

²⁵ Ntá tsonoxín tí nkehe mó tjenkayáxin sín nkaya asén sín ntá ts'ejóxin toch'in sín tsoxrxaxinkaon sín Dios la ko tsontáchro sín kixin chaxín tjejókoará Dios.

* **14:21** Isaías 28.11-12

Ntoá chrókuich'eni kaín xín nkehe tió tójnkotséni

²⁶ A ntá kichó ni, ¿nkehe chrókónhen? Tió tójnkotséni na mé isorá chrótsjerá salmo, la ko isorá chrókuàkorá, la ko isorá chróchronkará ijnko nkehe kjuínchenohará Dios, la ko isorá chrónixjaxínrá ijnko nkíva ókjé, la ko isorá chróchronkaxínrá nkexrí t'axrjexín tí nkehe nixjaxín tí í so sín ókjé nkíva. Kjánchó kaín tíha tsonhen kixin tí sín kuènte nínko chrók'uitja sín nkehe kuènte Dios.

²⁷ A ntá tí chrónixjaxín sín ijnko nkíva ókjé na mé yaá o iy'á chojni chrónixja sín la ko chrók'uixinkí chojni tsonixja, la ko t'ichjánxin kixin jnkojín nkexro nohe tsochronkaxín nkexrí t'axrjexín tí nkehe nixja sín.

²⁸ A ntá tí kohya ninkexro tí nínko ntaha tsjacha tsochronkaxín nkexrí t'axrjexín tí nkehe chrónixja sín, ntá chrónixjaxínhya sín ókjé nkíva tí tjejótkotsé sín, na mé chrónixjehe sín asén sín ó la ko chrónixjehe sín Dios ó.

²⁹ Tjánjonrá kjuachaxin kixin tsonixja yaá o y'á chojni k'uáyéhe sín kjuachaxin tsochronka sín nkehe kjuínchenohe sín Dios. A ntá tí sín tjejótkin hin mé chrókuenkayáxin sín á ó nchoxon tí nkehe kuínhin sín.

³⁰ A ntá tí xríñahya chrókuinchenohe Dios ijnko nkehe ijnko nkexro tjetjaxín ntá chróchronka ch'án tíha. A ntá tí nkexro senó kjuankíxin chrónka nkehe la chrókónhen ch'án chrónixjahya ch'án.

³¹ Ó nchoxon jnkojkorá chróchronkará nkehe tjáhará Dios kixin xíkaha kaín rá chrók'uitjára la ko chrókócháhará.

³² A ntá tí nkexro k'uáyéhe kjuachaxin tsochronka nkehe kjuínchenohe Dios kjaxín t'ichjánxin chrókónhen tsochronkaxín í jnko nkexro.

³³ Kixin Dios tjanjon tí kjuaxróxin, a ntá tjinkakonhya ch'án kixin yóxinhya chrók'uejóni.

Tió tójnkotsé chojni kichó ni tinkáchónki Ìnchéni

³⁴ chrónixjahya tí chojni chjin jnkosiné servicio. Kohya kjuachaxin xíkaha, na mé chrókuinchexiteyéhe sín tí sín ntoa éxí t'etōan tí ley kuènte Dios.

³⁵ Tí tjinkaon sín tsonohe sín nkehe na mé chrókuanchankíhi sín xì sín tió tjiji sín ntōe sín. Náxrjónhya chrónixja ijnko chojni chjin nkehe jnkosiné servicio.

³⁶ Chrókónohará kixin tí itén Dios xrankíxixínhya tí tjejorá la ko jehya jahóra k'uayéhérá tíha.

³⁷ A ntá tí tjen jnkojín nkexro tjenkayáxin kixin nixja itén Dios o tjenkayáxin kixin tí Nchakuen Dios tjinkítsa tí jehe ch'án ntá chrókónohe ch'án kixin tí nkehe tjékjian mé ijnko nkehe tsík'etōan Ìnchéni.

³⁸ A ntá tí nkexro titekakonhya tíhi na ntá jahará chrókuitekákuénhyará ch'án kjaxin.

³⁹ Méxra kichó ni, chrókuéyará kixin chrók'uayéhérá kjuachaxin chróchronkará nkehe kjuínchenohará Dios la ko chrókuitohérá tsonixjaxín chojni ókjé nkíva.

⁴⁰ Kjánchó kaín xín nkehe la jnkojína la ko kjuasáya chrókónhen.

15

Tsíxechón Cristo

¹ A ntá jie kichó ni, tjínkavan chrórxaxinkáonrá nkehe tí tan kuaáxinrá kjuákohará. Tíha mé kuítekáonrá, la mé tíha mé tjejóxinrá jína.

² Kjaxin tí nkehe kjuákohará mé kuaáxinrá, tí titoéhyará tí nkehe kjuákohará; tí la náhi la chónkó kuinkachónkirá tí nkehe kjuákua.

³ Saoxín, kjuákohará tí nkehe k'uayáha kixin Cristo k'uenyákonhen ijiéni, na mé xíkaha kjuínchexiteyá ch'án tí nkehe ntáchro tí xroon itén Dios

⁴ la ko tsíkjavá sín ch'án la ko tsíxechón ch'án tí níxin yaon éxí ntáchro tí xroon itén Dios.

⁵ Ntá k'uíkon ch'ín Pedro tí jehe ch'án, ntá chr'éxin inaá tí teyó sín k'uék'ajiko ch'án k'uíkon sín tí jehe ch'án.

⁶ A ntá chr'éxin chjina quinientos chojni kíchó ni jnkokoá k'uéjé sín k'uíkon sín ch'án. A ntá jie itsjé tí sín a naxa tjejó sín, a ntá jnkojín sín na ó tsík'en sín.

⁷ Chr'éxin k'uíkon ch'ín Jacobo tí jehe ch'án, la ko k'uíkon kaín tí í so sín apóstol inaá.

⁸ A ntá kjuixixín janhan k'uíkuā Ìnchéni éxí ijnko xjan naxa xetjahya yaon chrókokjíhi.

⁹ Kjánchó janhan kánhyó tjetooan la mé tóyóehya tí í so sín tsík'eyá Ìnchéni la ko tósuāna chrók'óna ijnko nkexro ch'ehe xra Ìnchéni kixin janhan mé k'uéninkakonhan tí sín ninkoe Dios.

¹⁰ Kjonté jínahya kjuít'a la kjuasáyé Dios la ko kjuachaxin kuènte ch'án mé kjuitóxinhin tí kjuenkayáxian, na mé chónkóhya kuikonóana ch'án, kixin tjetóxin kjuít'a xra la kaín sín la kánhyó. Kjánchó jehya janhan kjuít'a xra. Náhí. Dios kjuínkítsana ch'án kjuít'a xra.

¹¹ Kjánchó tjetuanhya á janhan o á jehe sín kjuako sín, kixin xíkaha tí itan kjuakoni, a ntá kuítekáonrá.

Tsoxechón tí sín tsík'en

¹² A ntá tí tjakoni kixin Cristo la xechón, ¿ntá nkekuènte ntáchrórá jnkojínrá kixin tsoxechónhya chojni tsík'en?

¹³ Tí chrókóchaxín tí nkehe ntáchrórá kixin tsoxechónhya chojni tsík'en, ntá kjaxin chróxechónhya Cristo.

¹⁴ A ntá tí chaxínhya xechón Cristo, ntá chónkó tí nkehe tjakoni la ko ninkehó sínkíhya la ko chónkó tí nkehe kuítekáonrá.

¹⁵ A ntá tí chaxínhya xíkaha tsíkónhen, la jeheni la ijnko chojni ntoáhya chrónka kuènté Dios, kixin ó chrónkani kixin Dios kjuínchexechón Cristo. A ntá tí chrókóchaxínhya kixin chróxechón Cristo, ntá kjaxin chrókóchaxínhya kixin chróxechón chojni tsík'en

¹⁶ kixin tí chróxechónhya tí chojni tsík'en, ntá kjaxin Cristo chróxechónhya ch'án.

¹⁷ A ntá tí Cristo chróxechónhya ch'án ntá chrókóchónkó tí kuítekáonrá tí jehe ch'án kixin naxa chrókjuìnhyá tí ijíará.

¹⁸ La ko tí chrókóchaxín tíha ntá chrók'uitjáyan tí sín kuítekaon Cristo ik'uén sín.

¹⁹ Méxra tí chrókuinkáchónkini Cristo kixin chrókjuinkítsa ch'án tí jeheni chjasintajni ntihyó, ntá kohya chojni chrókóyóhē tí jeheni, imá chrókónóeni chrók'uejóni kaín ni.

²⁰ Kjánchó náhi, la chaxín ó xechón Cristo. Jehe ch'án éxí tí nkehe tsík'óna saoxín kixin jehe ch'án saoxín xechón ch'án.

²¹ Méxra jnkokoá chojni ntoa kjuankíxin kjuasin jie, ntá kjuankíxin k'uén kaín xín chojni chjasintajni, la ko kjaxin jnkokoá chojni ntoa xechón, ntá xíkaha tsoxechón kaín chojni tsík'en.

²² Kixin tí jie kjuasin ch'ín Adán ntá kaín xín chojni sít'enxín sín. A ntá Cristo la kaín ni tsochóntaxínni kjuachón.

²³ Jnkojnkonni éxí tsoñhenni tocar, na mé saoxín xechón Cristo, a ntá chr'éxin tió tsokjan ch'án ntá tsoxechónni kaín ni kuítekaonni tí jehe ch'án.

²⁴ A ntá ó tsi yaon tsjixixín ntá sinchek'itjáyan Cristo kaín xín nkehe t'etooan la ko kaín xín kjuachaxin ókjé, ntá tsjanjon ch'án tí xra t'etooan kixin ts'áyéhe It'é ch'án Dios.

25 Na mé t'ichjánxìn ts'et̄oan Cristo tsjixrakájia tí yaon tsjachahya tí sín nínkakohen ch'án.

26 A ntá tí nkehe tsjixixín ts'itjáyán la mé tí kjuach'én.

27 A ntá Dios kjuanjón kjuachaxin kixin kaín nkehe siín mé chrók'uetuēnhen Cristo.* Kjánchó tió xikaha ntáchro tí xroon itén Dios tsíkjin sín ósé kixin kaín xín nkehe mé ts'etuēnhen ch'án, ntá ó noheni jína kixin jehya kixin Dios la chrók'uituēnhen ch'án inaá. Náhí. Jehé ch'án mé chjéhe Xjeen ch'án kaín kjuachaxin ts'etuēnhen ch'án kaín xín nkehe.

28 A ntá tió tsjixin tsjacha Cristo ts'etuēnhen ch'án kaín xín nkehe, ntá Cristo, mé tí Xjeen Dios, la kjaxin sinchexiteyéhe ch'án It'é ch'án Dios kixin ntá Dios mé ts'etuēnhen ch'án kaín xín nkehe.

29 A ntá í jnko nkehe, la iso sín tikiteyákonhen tí sín tsík'en. ¿Nkekuènte xikaha ch'e sín tí titekakonhya sín kixin tí sín tsík'en tsoxechón sín inaá?

30 A ntá tí xikaha, ¿nkekuènte kixin kaín yaon kjuaxróxinhya tjejóni nínkakhenni chojni?

31 A ntá kichó ni, kaín yaon siín kjuachrakon chrók'uèn janhan. Chaxín tíhi, kjánchó chàna kixin jahará kjaxinrá tinkachónkirá Ìnchéni Jesucristo.

32 Kjónté kónínkakonna chojni chjasin Éfeso éxí iko jiehe la kjónté kjuak'é ntiha, ¿la ntá nkehe chrókjuacha tí janhan tí chrókóchaxínhya chróxechón chojni tsík'en? Tí xikaha la ó nchoxon tí nkehe ntáchro tí sín titekakonhya Ìnchéni kixin chrókjóné sín la ko chrók'ui sín kixin ijie la o ntóye chrók'uen sín.

33 Chrókuítóéhyará chrokjuit'áyahará sín. Éxí ntáchro sín kixin: “Tí chrók'uejókotoxinni chojni jínahya ntá chrók'uitjáyán tí nkehe jína tjenkayáxinni.”

34 Chrókjanrá ntia jína ntoá la chrókjuásinhyará jie. Méxra isorá naxa chonhyará Dios. Na mé ntáxrjan tíhi kixin chrókósuàhará.

Nkexrí tsoxechón tí sín tsík'en

35 Kjá jnkojínrá tsjanchankìnará kixin: “¿Nkexrí tsoxechón tí sín tsík'en la ko nkexrí tsotsjehe tí cuerpo tsochónta sín?”

36 Lontirá tjanchankìnará xikaha. Tí noatje t'enkanı nonte t'ichjánxìn its'en ts'itjáyán kixin tsjak'echón tí nkehe ts'ayan.

37 Tí nkehe t'enkanı la jehya tí ka a. Náhí. Tí nkehe t'enkanı la noatrigo o í jnko tje.

38 Kjánchó Dios kjuanjón kjuachaxin kixin jnkojnko nta ts'óna éxí tjinkaon ch'án, la ko jnkojnko nta tsochónta tje kuènte.

39 A ntá jehya kaín tí cuerpo la jnkokon. Náhí. Ijnko la cuerpo kuènte chojni, la ko í jnko la cuerpo kuènte ko, la ko í jnko la cuerpo kuènte koxroxe, la ko í jnko la cuerpo kuènte koche.

40 Na mé kjaxin xikaha siín cuerpo kuènte tí sín ángel tjejó nkaya nkajní la ko siín cuerpo kuènte chojni tjejó chjasintajni. A ntá tí cuerpo kuènte tí sín ángel la náxrjón tsjehe la ko kjaxin tí cuerpo kuènte tí chojni la náxrjón tsjehe, kjánchó ókjé nkexrí tsjehe.

41 Ókjé nkexrí t'inkaséyanxín tí yaon la ko ókjé nkexrí t'inkaséyanxín tí nitjó la ko kjaxin konotsé la ókjé nkexrí t'inkaséyanxín la ko kjónté itsjé konotsé la ókjé t'inkaséyanxín jnkojnko.

42 Kjaxin xikaha tsonhen tí chojni tsík'en tsoxechón sín. Tí nkehe tsoxravá la mé ijnko nkehe tsotje, a ntá tí nkehe tsoxechón la mé ijnko nkehe ts'itjáyánhya.

* 15:27 Salmo 8.6

⁴³ Tí nkehe tsoxravá la ijnko nkehe náxrjónhya tíha, la ntá tí nkehe tsoxechón la ijnko nkehe imá náxrjón. Tí nkehe tsoxravá la ijnko nkehe chóntahya kjuachaxin, la ntá tí nkehe tsoxechón la ijnko nkehe tsochónta kjuachaxin.

⁴⁴ Tí nkehe tsoxravá la mé cuerpo kuènte chojni chjasintajni ó. La ntá tí nkehe tsoxechón la mé cuerpo antsí tsochónta kjuachaxin kuènte Nchakuen Dios. A ntá tí chóntani cuerpo kuènte chojni chjasintajni ó na mé kjaxin tsochóntani cuerpo antsí tsochónta kjuachaxin kuènte Nchakuen Dios.

⁴⁵ A ntá éxí ntáchro tí xroon itén Dios kixin: “Tí chojni ntoa k'óna saoxín mé ch'ín Adán tíha mé k'uáyéhe ch'án kjuachón ó.”† A ntá tí ó kjuixixín ikui í jnko ch'ín éxí yóhe Adán, kjánchó jehe ch'án mé chónta ch'án nchakuen tjanjon kjuachón.

⁴⁶ Kjánchó jehya saoxín k'óna tí cuerpo antsí chóna kjuachaxin kuènte Nchakuen Dios. Náhi. Saoxín k'óna cuerpo kuènte chojni chjasintajni ó, la ntá chr'éxin k'óna cuerpo antsí chóna kjuachaxin kuènte Nchakuen Dios.

⁴⁷ Tí nkexro k'óna saoxín la k'óna nche na mé kjuák'e ch'án chjasintajni ó. A ntá tí nkexro k'óna yóxin na mé nkaya nkajni kujxin ch'án.

⁴⁸ Tí cuerpo siín chjasintajni mé yóhe tí cuerpo k'uéchónta tí nkexro tsík'óna nche. A ntá tí cuerpo siín nkaya nkajni mé yóhe tí cuerpo chóna tí nkexro kujxin nkaya nkajni.

⁴⁹ Éxí senó tóyóhēni tí nkexro k'óna nche, ntá xikaha chr'éxin tsoyóhēni tí nkexro kujxin nkaya nkajni.

⁵⁰ Ntá tsotjonkará nkehe, kichó ni. Tí cuerpo k'óna nto la ko hueso chóntani jie xitjahya sátsjikoni tí tjen Dios t'etoan ch'án. Na mé tí nkehe tsjeje xitjahya ts'áyéhe tí nkehe tsjejehya.

⁵¹ A ntá tsotjonkará ijnko nkehe ninkexró noehya, kixin kénhyani its'enni. Kjánchó kaín ni ts'ixitóxinhin tí cuerpo chóntani.

⁵² A ntá xrínahya titàya tjejóni ntá éxí chróchr'áton konni la ko chrókuakitjenkini konni xikaha tió tsjixixín tsinhinni tsonáchro trompeta, la ntá kaín chojni tsík'en tsoxechón, í ts'enhya sín, la ko kjaxin jeheni kaín ni ts'ixitóxinhin tí cuerpo chóntani.

⁵³ A ntá tí cuerpo chóntani la tsjeje, ntá t'ichjánxin ts'inkáya nkehe chónhya tsjeje. La ko tí cuerpo chóntani la ts'en ntá t'ichjánxin ts'inkáya nkehe chónhya ts'en.

⁵⁴ A ntá tió tí cuerpo chóntani la tsjeje, na mé t'ichjánxin ts'inkáya tí nkehe chónhya tsjeje, la ko tió tí cuerpo chóntani la ts'en, na mé t'ichjánxin ts'inkáya tí nkehe chónhya ts'en. Ntá tí xikaha na ntá tsoxiteyá éxí nixja tí xroon itén Dios ntáchro kixin: “Tsjachahya tí kjuach'én la mé tsjacha tí kjuachón.”‡

⁵⁵ “Jaha kjuach'én, ¿kjá tí kjuachaxin kuènta kixin chrókjuacha jaha? Jaha kjuach'én, ¿kjá tí kjuachaxin kuènta kixin chrók'oyánni?”§

⁵⁶ Tí jie tjasinni mé kujxin tí ts'enni. A ntá tí ley k'uetōan ósé antsí k'uixixín jie.

⁵⁷ A ntá tjancheheni Dios kjuasáya kixin ichr'án ch'án Ìnchéni Jesucristo kixin táha mé tsaáxinni.

⁵⁸ A ntá jahará kichó ni, imá tjuahará. Chrókuitoéhyará tinkachónkirá Ìnchéni. Jnkochrín chrókjuich'ehérá Ìnchéni xra antsí jína kixin ó nohará jahará kixin tí xra ch'eheheni Ìnchéni jehya chónkó tíha.

16

Tí ofrenda tjenájín sín tsochr'énnen sín tí sín tjejó chjasin Jerusalén

† 15:45 Génesis 2.7 ‡ 15:54 Isaías 25.8 § 15:55 Oseas 13.14

¹ **A** ntá tí chichaon tjenájínrá kixin tsjínkĩtsará tí sín kichó ni tinkáchónki Ìnchéni na mé chrókjuich'erá éxí kuétuānhan tí sín n̄inko estado Galacia.

² Jnkojnko domingo jnkojnkorá chrókuakitsjentehará nkerí síká chichaon kjuachará tí semana kjuich'erá xra kixin t'ichjánxinhya chrókjuasánjia janhan ntá chrókjuénájínrá chichaon.

³ **A** ntá tió tsjasán janhan tsétuānhan tí sín tsjéyará kixin sátsji sín chjasin Jerusalén, na ntá tsokjian xroon tsjikoxín sín tí chichaon tsíkjenájínrá tsjikaán tí sín kichó ni ntiha.

⁴ **A** ntá tí chrókójina kjaxin janhan sáchrókjuiyá, a ntá sáchrókjuíkian tí jehe sín kjaxin.

Tjenkayáxin ch'ín Pablo nkexrí sátsji ch'án

⁵ Tí sátsjia la t'ichjánxin ts'atsínka janhan estado Macedonia ntá chr'éxin tsjasán ntiha chjasin Corinto.

⁶ Ách'e ntahó chrókuitona chrók'uatsínkajia nchakuen kin. **A** ntá jahará chrókjuínkĩtsará tí janhan tió sátsjia ókjé chr'éxin.

⁷ Méxra tjínkakonhya chrók'uatsínkoá chrótsjahará ó. Náhí. Tjínkavan chrókuitona iso yaon tí tjejorá ntiha tí Ìnchéni chrókjuanjon kjuachaxin.

⁸ Kjánchó tsitona chjasin Éfeso tsjixrakájia yaon Pentecostés,

⁹ kixin ntihi antsí chonta kjuachaxin chrókjuít'a xra kuente Ìnchéni la ko jina chrókónhen tí xra kjónté nchónhya chojni nínkakonna.

¹⁰ **A** ntá tí tsjiji ch'ín Timoteo ntiha la antsí jina chrónixjehérá ch'án kixin kjuaxróxin chrók'uejokoará ch'án kixin jehe ch'án kjaxin ch'ehe Ìnchéni xra éxí janhan.

¹¹ Kaín tí jahará chróchontehará ch'án kjuasáya. Tjínkĩtsará ch'án kixin jina itsi ch'án ntihi tsitsjehe ch'án tí janhan kixin tjéchonhan chrókui ch'án la ko tí í so sín kichó ni.

¹² **A** ntá tí kichó ni Apolos la imá xrjanóaha ch'án kixin kjaxin chrókjuijiko ch'án tí í so kichó ni, kjánchó tjínkakonhya ch'án jie. Chr'éxin tsjiji ch'án tió ts'ixranka.

Kjuixixín nixja ch'ín Pablo

¹³ Chrókjuenkayáxinrá la ko chrók'uejotsjehérá. Chróchrakonhyará la ko chrókuitoéhyará tí tinkachónkirá Ìnchéni.

¹⁴ Kaín nkehe chrókjuich'erá la koí chrótjuèhérá kíchuára.

¹⁵ Na ntá kichó ni, ó nohará kixin tí sín kjéhya ch'ín Estéfanos saoxín kuinkáchónki sín tí tan tsaáxin chojni tí estado Acaya, la ko jehe sín kuákja sín xra a tjínkĩtsa sín tí sín kichó ni tinkáchónki Ìnchéni.

¹⁶ Tjínkavan kixin chrókjuinchexiteyéhérá tí sín tjínkĩtsa éxí tí jehe sín la ko kaín tí sín ch'e xra.

¹⁷ Chàna kixin ó kui ch'ín Estéfanos la ko ch'ín Fortunato la ko ch'ín Acaico, kixin jahará kjónté tjejohyará.

¹⁸ **A** ntá jehe sín kjuínchechéhe sín asenná éxí kjuínchecháhará sín. Chróchontehérá kjuasáyé chojni xikaha.

¹⁹ Tí sín tójnkotsé estado Asia xraxinkaon sín tí jahará. Kjaxin ch'ín Aquila la ko tjan Priscila la ko tí sín tójnkotsé ntqe sín ima xraxinkaon sín tí jahará kixin tinkachónkirá Ìnchéni.

²⁰ Kaín tí sín kichó ni ntihi xraxinkaon sín tí jahará. Nixjehérá kíchuára kaín rá tsehérá tja kíchuára jnkojina.

²¹ Janhan Pablo xraxinkavan tí jahará ikjian xroon chr'anhánrá la tjaná kjinxian tí letra i.

²² Tí nkexro tjuèhya Ìnchéni Jesucristo la tsjasóte. A ntá jeheni, la Ìnchéni xrákiá.

²³ A ntá kjuasáyé Ìnchéni Jesucristo mé sintayaonrá ch'án.

²⁴ Tjuahará káin rá kíxin káin ni tinkáchónkini Cristo Jesús. Amén. Ó tjen.

Tí xroon yóxin ikjin ch'ín Pablo chr'énnen ch'án tí ninko chjasin Corinto

¹ Janhan Pablo mé kjueyána Dios kixin sít'aha Ìnchéni Jesucristo xra, la ko kichó ni Timoteo ikjinni tí xroon i chr'ánhanráni tí jahará ninkoe Dios chjasin Corinto la ko kaín tí í so kichó ni tinkáchónki Ìnchéni tjejorá nkuíxín estado Acaya.

² Kjuasáyé It'eni Dios la ko Ìnchéni Jesucristo chrókjuintayaonrá ch'án la ko chrótjáhará ch'án kjuaxróxin.

Tí kjuasóte ch'ín Pablo

³ Tjancheheni kjuasáyé Dios It'é Ìnchéni Jesucristo. Jehe It'eni mé tikonóeheni ch'án la ko xráxín nchechéheni ch'án.

⁴ Jehe ch'án mé nchechéhe ch'án kaín tí jeheni tió tsi ijnko kjuaxróxinhya kixin ntá tsjachani sinchechéheni í so chojni kjuaxróxinhya ts'atsínka sín éxí yóhe jehe ch'án kjuínchechéhe ch'án tí jeheni.

⁵ Mé xíkaha tjejótjasóteni éxí yóhe kjuasóte Cristo ntá kjaxin jehe ch'án imá sinchechéheni ch'án kixin tinkáchónkini ch'án.

⁶ Tjejótjasóteni kixin tí jahará chrókóchàxínrá la ko chrókuaáxinrá. A ntá Dios nchechéhe tí jeheni kixin kjaxin jahará chrókócháhará kixin ntá chrókjuachará kjónté chrókjuasóterá éxí tjasóteni jeheni.

⁷ Na mé ó noheni kixin chaxín ntoá tinkachónkirá Ìnchéni kixin ó noheni kixin jnkokón tjejótjasóteni kaín ni ntá kjaxin jnkokón sinchechéhe Dios tí jeheni kaín ni.

⁸ Kíchóni, tjinkaonni kixin chrókónohará kixin nkexrí imá kjuasóteni tí k'uéjóni tí estado Asia. Imá náxrjónhya kjuasóteni la chrókjuachahyani, la k'uitjáyenhenni tí tjenkayáxinni kixin chrók'uaxrjexínni ntiha naxa chrók'uejóhónni.

⁹ Ó kónoheni kixin chrók'uenxínni ntiha. Mé xíkaha kónhenni kixin chrókónoexínni kixin tí jehóni la chrókjuachahyani tíha. Náhí. Chrókuinkáchónkini Dios, mé tí nkexro nchexechón chojni tsík'en.

¹⁰ Jehe Dios mé kjuínchekaáni ch'án la ko naxa sinchekaáni ch'án kixin tí nchónhya nkehe chrók'uenxínni. Méxra ó noheni kixin chaxín jehe ch'án sinchekaáni ch'án

¹¹ tí tjínkĩtsaráni tjancheherá Dios kixin tsjinkĩtsani ch'án. A ntá tí tsjé chojni chrókjuanchehe Dios kixin tsjinkĩtsani ch'án ntá chr'éxin itsjé chojni tsjanchehe sín ch'án kjuasáyé kixin xíkaha jehe ch'án kjuínkĩtsani ch'án.

Nkekuènte sákjuíhya ch'ín Pablo tí chjasin Corinto

¹² Chéheni kixin noheni kixin ntoá k'uéjóni ntihi chjasintajni kjuích'iyehyani chojni, mé xíkaha k'uéjókoaráni. Ntá jehya kjuachaxin kuènteni kjuachaxínni xíkaha. Náhí. Kjuachaxin kuènte Dios mé kjuínkĩtsani kixin xíkaha k'uéjóni.

¹³ Tió chr'ánhanráni xroon, kjinhyani nkehe chrókiénxinhyará. Náhí. Jehó tí nkehe chrókjuínchekuáxinrá chrókiénxinrá. Tjéchonhan kixin chrókiénxinrá jína.

¹⁴ A ntá ó tinkakiénxinrá ntsí kixin tió tsokjan Ìnchéni Jesús tsöcháhará kixin xíkaha kjuakoharáni jeheni la ko kjaxin tsöchéheni kixin jahará kuítekáonrá.

¹⁵ Mé xíkaha kjuenkayáxian kixin saoxín chrókjuasántsahará tí jahará kixin chrókócháhará kixin yáya chrókjuasántsahará.

¹⁶ Kjuenkayáxian janhan chrókjuasántsjahará saoxín tió sáchrókjuia estado Macedonia la ko chrókjuasántsjahará ínaá tió chrókjanxian ntiha. Mé xikaha chrókjuínkitsarána tió sáchrókjuiyá janhan estado Judea.

¹⁷ ¿Á tjenkayáxinrá kixin ntoáhya kjuenkayáxian chrókjuasán ntiha ní? ¿Á tjenkayáxinrá kixin iyó nkehe kjuenkayáxian kixin jnkokoá chróntáxrjan kixin chrókjuasán la ko chrókjuasánhya?

¹⁸ Méxra tjetsjehe Dios kixin xikahya kjuáteheni tí jahará kixin chrókjuijini la ko chrókjuijihyani.

¹⁹ Kixin Cristo Jesús mé Xjeen Dios, na mé tí nkexro kjuakoxin ch'ín Silvano la ko ch'ín Timoteo la ko kjuákoxian janhan tí k'uéjóni ntiha, mé xikahya k'uéchronka ch'án, kjuích'iyahya ch'án ninkehó. Náhí. Kaín nkehe tjakoni kuènte Cristo la chaxín tíha.

²⁰ Kixin kaín nkehe tsíchronka Dios la mé jehe Cristo kjuínchexiteyá ch'án. Mé xikaha tió tjancheheni Dios kjuasáya la mé ntáchroni “Amén, ó nchoxon” kixin tí kjuachaxin kuènte Cristo Jesús.

²¹ A ntá Dios mé kjuínkítsa ch'án tí jeheni la ko tí jahará kixin kaín ni ntoá chrókuínkáchónkini Cristo la ko jehe ch'án mé kjueyáni ch'án.

²² Kjaxin jehe ch'án tsíkjinchekani ch'án xroye, na mé kjuanjon ch'án Nchakuen ch'án tsochóna asénni senó kixin tsonoexínni kixin chaxín ts'áyéheni nkehe chr'éxin.

²³ A ntá tí naxa kjuasánhya janhan chjasánrá Corinto éxi kjuenkayáxian la tjetsjehe Dios kixin tjínkakonhya kixin chrókóxakonhanrá tí chrókjuéntuáhárá tí jahará ínaá.

²⁴ Jehya kixin chrókuétuanhánrá kixin nkexrí chrókuínkachónkirá Ìnchéni kixin ó nòna kixin ntoá tinkachónkirá ch'án. Ó jehí tjinkaonni chrókjuínkitsaráni kixin antsí má chrókócháhará.

2

¹ Mé xikaha kjuenkayáxian kixin chrókjuasánhya janhan ntiha ínaá tí naxa xrásinrá kjuanínkaon.

² A ntá tí naxa chrókjuíntak'ávárá, ¿a ntá nkexro chrókjuínchekhàna ínaá tí chrókjuínchekhànahyará jahará kixin janhan kjuíntak'ávárá?

³ Mé xikaha ikjian tí xroon chr'anhánrá senó kixin tjínkakonhya chrókjuasán chrókjuínchekóxakonnará ínaá. Náhí. Jahará chrókjuínchekhànará. Méxra ó nòna kixin tí chrókóchána janhan ntá chrókócháhará kaín rá.

⁴ Kjánchó tió ikjian tí xroon a chr'anhánrá senó la imá kóxakonhen asenná tsjanka kjaxin. Kjánchó jehya kixin ikjian tí xroon a chr'anhánrá kixin chrókjuíntak'ávárá. Náhí. Ikjian tí xroon chr'anhánrá kixin chrókónoaxínrá kixin imá tjuahará tí jahará.

Ch'ín Pablo chrókjuínchek'itjáyenhen ch'án tí jie kjuasin tí nkexro a

⁵ A ntá tí nkexro kjuínchexakonna la jehya janhvàn kóxakonna. Náhí. Kaínrá kóxakonhanrá. Kjánchó tjínkakonhya tjetóxin tsontáxrjan tíha.

⁶ Na mé itsjé tí jahará nixjehérá ch'án kóyakoterá ch'án kixin chrókjuasinhya ch'án jie xikaha la táhó la ó tjen.

⁷ Ntá jie chrók'uitjáyanhanrá tí jie kjuasin ch'án, chrókjuínkitsará ch'án, kixin tí náhí la ts'itjáyanxín ch'án tí kjuancheníhi.

⁸ Méxra xrjanóahará kixin chrókjuákoxinrá ínaá kixin chaxín tjuèhéra ch'án.

⁹ Mé xikaha senó ikjian xroon chr'anhánrá kuènte tí kjuanínkaon chontará kixin tsononaxian á chrókjuínchexiteyànará kaín nkehe chrókuétuanhánrá.

¹⁰ A ntá tí sinchek'itjáyenhenrá ijnko chojni ichrén jie kjuasin ch'án ntá janhan kjaxian sintak'itjáyanhan ch'án tí jie kjuasin ch'án. Méxra

tí chaxín k'ué ichrén jie chrókjuintak'itjáyanhan ijnko chojni la ó kjuixin kjuintak'itjáyanhan ch'án tí jie a kixin chrók'uejorá jnkojína. Kjaxin xikaha tjetsjehe Cristo,

¹¹ kixin ntá tí ch'ín Tsochren na tsjachahya ch'án tsjachroe ch'án tí jeheni, kixin ó noheni nkexrí ch'ia tí ch'ín Jínahya.

Kóxakonhen ch'ín Pablo tí kjuák'e ch'án chjasin Troas

¹² A ntá tío kjuasán tí chjasin Troas chrókjuàkua tí tan jína kuènte Cristo la antsí xránjon kjuachaxin kixin chrókónhen xra kuènte Ìnchéni.

¹³ Kjánchó náxrjónhya tjen asenná kixin k'uitjahya tí kichó ni Tito. Ntá tuénxín níxjaha tí jehe sín tjejó ntiha ntá sákjuia tí estado Macedonia.

Ntá ó tsjacha sín tsochónta sín kjuachaxin kuènte Cristo

¹⁴ Kjuasáyé Dios kixin xráxín jehe ch'án tjinkitsani ch'án ntá tjachani kixin chóntani tí kjuachaxin kuènte Cristo Jesús. Ntá kaín nketí sáchrókjuini mé tjakoxinni tí tan kuènte ch'án éxí ijnko nkehe xraxé náxrjón chrókóxrjínhin kaín xín chojni.

¹⁵ Kaínni la éxí yóhe tí xraxé náxrjón kuènte chjincó chrókjuanjon Cristo chrók'uáyéhe Dios kixin tíha mé chrókónoexín tí sín tsaá la ko kjaxin chrókónoexín tí sín ts'itjáyan.

¹⁶ Tí sín ts'itjáyan mé tókaxraxéhe sín éxí ts'enxín sín tí xraxé a. A ntá tí sín tsaá mé tóxrjínhin sín kixin ijnko nkehe tsjanjon kjuachón tíha. ¿Xá nkexro chrókjuacha chrókjuich'e tíha?

¹⁷ A ntá jeheni mé xrinchekjihyani nkexrí nixja itén Dios éxí ch'e nchónhya chojni chrókjuacha sín chichaon. Náhi. Kaín asénni tjakoni itén Dios kixin kjueyáni ch'án sich'eheeni Cristo xra, la ko tjetsjehe ch'án tí xra tjejóch'eni.

3

Tí pacto nixin

¹ A ntá xikaha ntáchroni, ¿á tjenkayáxinrá kixin kjuankíxinni tsochronkani inaá kixin jína tí jeheni, o á t'ichjánxin kixin chrókjuijikoni xroon kixin tsonoaxínrá kixin jína tjakoni? ¿Xá t'ichjánxin kixin chrókjuanchaharáni ijnko xroon tsochronka kixin jína tjakoni? ¿Xá t'ichjánxin kixin chrókjuanchaharáni ijnko xroon tsochronka kixin jína tí jeheni éxí ch'e í so sín?

² Náhi. T'ichjánxienhyani nijnko xroon kixin jahará mé éxí yóhe ijnko xroon tsíkjin xrikoni chróchóxin la ko chrókjuinchekuáxin kaín xín chojni tsonoexín sín kixin jeheni mé ch'eheeni Cristo xra.

³ T'ikon sín noxín kixin tí jahará mé éxí yóhe ijnko xroon tsíkjin Ìnchéni Cristo xrikoni nchekuáxin chojni. Kjánchó jehya ntahni tsíkjinxin ch'án. Náhi. Kjuanjon ch'án Nchakuen ch'án tjechón chontará la kjaxin jehya xrotabla tsíkjin ch'án. Náhi. Táha la asén chojni.

⁴ Ntá ó noheni chaxín tíhi kixin tinkáchónkini Dios kixin tjinkitsani Cristo.

⁵ Jehya kixin ó jehí chróchóntani kjuachaxin kixin chrókjuich'eni xra. Náhi. Kaín tí xra ch'eni na Dios tjetjanjon kjuachaxin.

⁶ Jehe ch'án mé kjuanjon ch'án kjuachaxin kixin chrókjuich'eheeni ch'án xra tsochenkani chojni tí tan nixin kui. Tíha jehya ijnko nkehe tsíkjin chojni chrókjuinchexiteyéheeni. Náhi. Tíha mé kjuachaxin kjuanjon Nchakuen Dios kixin sinchexiteyéheeni ch'án. Kixin tí ley ntáchro kixin its'en chojni. Kjánchó tí Nchakuen Dios la mé tjanjon kjuachón.

⁷ Tí ley tsík'óna letra xrotabla mé imá kuikao t'inkaséyan la mé kjuachahya tí sín israelita chrókomá sín ikon ch'ín Moisés kixin imá tjákini tsjehe ikon

ch'án.* Kjánchó tí t'inkaséyan kjuankíxin ó tinkák'anka. Méxra tí xíkaha tí ley tjanjon kjuach'én mé kuikao ijnko t'inkaséyan imá náxrjón.

⁸ ¿á chrókó Jehya kíxin antsí má t'inkaséyan kuikao tí tan nixin kuixin kjuachaxin Nchakuen Dios?

⁹ Méxra xíkaha tí ley k'uéchonta kjuachaxin jié kjónté ntá chro kíxin its'en chojni, a ntá antsí má jina tí tan chrónka Dios kíxin tsotjuáxin tí jié chóntani.

¹⁰ Méxra tí kjuachaxin k'uéchonta tí ley k'uék'etōan ósé la ninkehó tóyóehya tí kjuachaxin jié tjen jie.

¹¹ A ntá tí k'uéchonta kjuachaxin tí nkehe séhyó ntá tinkákjeje, a ntá antsí má chónka kjuachaxin tí nkehe tsjak'e jnkochrín.

¹² Mé xíkaha tí nkehe tsjejehya tjejóchónhenni ntá chrakonhyani chronkaxínni kaín tíha.

¹³ Ch'ehyani éxi kjuích'e ch'ín Moisés k'uikjèxin ch'án ka ikon ch'án kíxin tsonohya tí sín israelita kíxin ó tinkákjeje tí t'inkaséyan chónka ch'án.

¹⁴ Kjánchó jehe sín naxa kienxínhya sín la ko naxa xíkaha tjejó sín ijie tió nchekuáxin sín tí nkehe k'uítuenhen sín ósé kíxin tí ka naxa t'inkákonhen tí chrókiénxín sín kíxin naxa kjuínhya tí ka. A ntá tí chrókuinkáchónki sín Cristo la ntá jehe ch'án chrókjuatsen tí ka a.

¹⁵ A ntá kjónté jie tió nchekuáxin sín tí xroon tsíkjin ch'ín Moisés la tjejó sín éxi naxa t'inkákonhen tí ka a kíxin tienxínhya sín.

¹⁶ A ntá tió ijnko chojni tsjankíxin tsinkáchónki Ìnchéni ntá tí ka t'inkákonhen la tsjin.

¹⁷ A ntá Ìnchéni mé Nchakuen Dios tíha. A ntá tí tjen Nchakuen kuènte Ìnchéni Dios la ntiha kohya nkehe ts'inkákonhen.

¹⁸ A ntá jeheni kaín ni kohya nkehe t'inkákonhen ikonni la mé tjejóni éxi xrosenta tjákiní tí kjuachaxin kuènte Ìnchéni, na mé tinkák'ixitóxin tí kjuaxrexinkaon kuènténi kíxin antsí chrókóyóhēni éxi tí jehe ch'án kíxin antsí tsochóntani tí kjuachaxin kuènte ch'án, kíxin Ìnchéni, na tí Nchakuen a, mé xíkaha ch'e xra.

4

¹ Méxra xíkaha chrókóxrjéhyani chrókjuich'eni tí xra kjuanjon Dios kíxin jehe ch'án kuikonóeheni ch'án.

² Ó kuítōhēni kaín nkehe imó la ko kaín nkehe chrókósuèxinni, la ko ch'iyehyani kichó ni, la ko tjitoxienhyani itén Dios. Náhi. Jehí tí nkehe ntoá chrónkani. A ntá xíkaha chrókónoexín kaín xín chojni kíxin ntoá tjejóni éxi tjinkaon Dios.

³ A ntá jeheni mé tjakoni tí itan tsaáxinni, kjánchó iso sín kjónté xíkaha tinhin sín mé tienxínhya sín kíxin xráxin jehe sín la ts'itjáyán sín.

⁴ A ntá jehe sín kuítēkakonhya sín, a ntá tí dios kuènte chjasintajni mé kjuínchek'ikonhya sín kíxin chrókiénxínhya sín, kíxin ntá chrók'uikonhya sín tí t'inkaséyan kuènte tí tan kuènte Cristo, mé tí nkexro chónka kjuachaxin, a ntá jehe ch'án la mé yóhe éxi tsjehe Dios.

⁵ Tió tjakoni na mé jehya tjakoni kíxin jeheni chrókuitekáonrá. Náhi. Chronkaxínni kíxin chrókuitekáonrá Jesucristo mé Ìnchéni la ko chrónkani kíxin jeheni mé t'aharáni xra tsjinkitsani tí jahará kíxin tjuahará Jesús.

⁶ Na mé jehe Dios k'uetōan kíxin tí xrohi ts'inkaséyanxín tí sítié a na mé kjaxin jehe ch'án kjuanjon ch'án xrohi ts'inkaséyanxín nkaya asénni kíxin chrókjuachani chrókónohēni nkexrí tjen tí kjuachaxin jié kuènte Dios t'inkaséyanxín Ìnchéni Jesucristo.

* 3:7 Éxodo 34.29-35

Nkexrí chrók'uejóni kixin tinkáchónkini Ìnchéni

⁷ A ntá tí cuerpo kuènteni la yóhe ijnko chí tsík'óna nchetje tjinká nkehe tjete, mé xikaha ts'ikon sín kixin tí kjuachaxin jié chóntani la kuxin tí tjen Dios kixin jehya kuènteni tíha.

⁸ Chóntani nchónhya kjuaxikaon la kjónté tsjachahya tí kjuaxikaon a. Imá tóxakonhenni la kjónté títoehyani tinkáchónkini ch'án.

⁹ Kjónté chónkíhi sín tí jeheni kjánchó Dios la kuítóehya ch'án tí jeheni. Kjónté k'uékoni kjuítsínkani kjánchó kjuínchek'itjányani sín.

¹⁰ Kjónté nketí sáttjini xráxín chrók'uenxínni éxí k'uénxin Ìnchéni Jesús, kixin xikaha tjakoxinni tí kjuachón chóna ch'án.

¹¹ Méxra jeheni naxa tjejóhónni la xráxín síin kjuaxikaon kixin chrók'uenxínni kixin tinkáchónkini Jesús kixin kjaxin xikaha chrókjuakoxinni tí kjuachón chóna ch'án kjónté chrók'uen tí cuerpo chóntani.

¹² Kjónté xikaha chrók'uenxínni, a ntá jahará tsochontará kjuachón.

¹³ Éxí ntá chro tí xroon itén Dios tsíkjin sín ósé kixin: “Kuítékavan ntá xikaha xrjanka.”* A ntá kjaxin jeheni kuítékoonni ntá xikaha chrónkani.

¹⁴ A ntá ó noheni kixin Dios mé tí nkexro kjuínchexechón tí Ìnchéni Jesús kjaxin sinchexechón ch'án tí jeheni koíni. A ntá jehe ch'án tsjiko ch'án tí jeheni la ko tí jahará kjaxinrá tí tjen Dios.

¹⁵ Kaín tíha kónhen kixin jahará jína chrók'uejoxinrá. La ko kjaxin xikaha nchónhyará chrók'uayéhérá tí kjuasáyé Dios, ntá antsí tsjé chojni ts'ejóni tsjancheheni Dios kjuasáyé kixin tí kjuachaxin jié chóna ch'án.

¹⁶ Méxra chrókóxrjéhyani kjónté tinkákjeje tí cuerpo chóntani kixin ó noheni kixin jnkojnko yaon Ìnchéni mé tjenchek'ánki ch'án tí kjuaxrexinkaon kuènteni.

¹⁷ A ntá tí nkehe tjasótexínni tí tjejóni ntihi jie mé tíha la tjoka ts'atsínka la ts'áyèxinni ijnko nkehe imá jié la ko í tsjejehya tíha.

¹⁸ Ntá chrókomáhyani tí nkehe síin chjasintajni ntihyó. Náhi. Chrókjuéyáni tí nkehe naxa t'ikonhyéni kixin tí nkehe t'ikonxínni ikoni na mé nkehe chóxin tsjeje. A ntá tí nkehe t'ikonhyani mé nkehe tsjejehya.

5

¹ A ntá ó noheni kixin tió tsjeje tí cuerpo chóntani na mé yóhe éxí ijnko nchia tjoka tsjeje, a ntá Dios mé kjuích'éna jnkojnko nchia nixin ts'itjányahya jnkochríxín nkaya nkajní kixin jehya tja chojni kjuích'éanaxín tíha.

² Tí naxa chóntani cuerpoéni ntihi la náxrjónhya tjejóni tjinkaonni tí ókjé cuerpo tsochóntani nkaya nkajní

³ kixin táha ts'inkáyani éxí ijnko ka, ntá xitjahya chrókótjóchínni.

⁴ Tí naxa tjejóhónxinni tí cuerpo chóntani jie la náxrjónhya tjejóni tjasóteni. Tjinkakonhyani xikahó chrókuítóekoni tí cuerpoéni ntaxin, na mé tjinkaonni kixin tí cuerpoéni ntaxin chrókónixin ó. Ntá chrók'uitjányan tí chrók'uenxínni la ntá chrókuakjani tí kjuachón nixin.

⁵ Dios mé kjuenkayáxin ch'án kixin xikaha sinchekitonhenni ch'án ntá kjuínchekitonhenni ch'án tí Nchakuen ch'án kixin ntá chrókónoexínni kixin chaxín ts'áyéheni tí nkehe tsjanjon ch'án.

⁶ Mé xikaha xráxín ó noheni kixin tí naxa tjejóni ntihi naxa chóntani cuerpoéni ntá naxa tjejókohyani Ìnchéni.

⁷ A ntá jeheni tjejóni tinkáchónkini ch'án kjónté t'ikonhyani ch'án.

⁸ Kjánchó jeheni na imá chéheni tjinkaonni chrókuítóheni tí cuerpoéni chóntani jie kixin sáchrókjuini tí tjen Ìnchéni, chrók'uejókoni ch'án ntiha.

* 4:13 Salmo 116.10

9 Méxra xikaha tjinkaonni chrókjuinchechéheni Ìnchéni kjónté naxa chróchóntani cuerpoéni ntihi la o í chróchóntahyani, la naxa chrókuinkáchónkini ch'án.

10 Kíxin kaín ni t'ichjánxin tsochjineheni Cristo tí tjen ch'án t'etóan ch'án kíxin nkehe ts'áyéheni jnkojnkonni kíxin nkerí xra kjuích'eni á jína o náhi tí naxa k'uéchóntani cuerpoéni ntihi chjasintajni.

Tí tan tjanjon kjuaxróxin

11 Méxra xikaha noheni chróchrakonhenni tí kjuachaxin jie kuènte Ìnchéni ntá tóxakonhenni tjakoheni chojni kíxin chrókuinkáchónki sín ch'án. Ó nohe Dios kíxin nkexrí tjejóni la ko tjinkaonni kíxin kjaxinrá chrókónohará.

12 Jehya kíxin chrótjonkará inaá kíxin jína ch'eni xra. Náhi. Jehí ntáchroni kíxin siín nkehe chrókóchàxinrá kíxin tí jeheni ntoá chrónkani kíxin chrókónohará nkexrí chrókjuáteherá tí sín imá nchehnke sín kíxin imá náxrjón nixja sín a ntá xraxinkakonhya sín tí jie chóna asén sín.

13 A ntá tí lóconi na mé tíha kíxin tjinkaonni chrókjuich'eheheni Dios xra. A ntá tí jehya lóco tí jeheni la mé jehí tjinkaonni chrókjuinkitsani tí jahará.

14 Kíxin Cristo la imá tjuèhe kaín xín chojni ntá t'etuèhenni ch'án kíxin ó noheni jína kíxin jehó ch'án k'uenyákonhenni ch'án tí ijiéni kaín ni kíxin éxi kjaxinni ik'uénni kaín ni kíxin jehe ch'án k'uenyákonhenni ch'án.

15 Mé xikaha Cristo mé k'uenyákonhen ch'án kaín ni. Na ntá jeheni tjejóchónni mé tjejóchónxinni ch'án la jehya tí kjuaxrexinkaon kuènteni chrókjuinchexiteyéheni. Náhi. Chrókjuínchexiteyéheni ch'án kíxin k'uenyákonhenni ch'án la ko xechón ch'án inaá kíxin tsaáxinni ch'án.

16 A ntá jie jeheni tjenkayáxinhyani éxi tjenkayáxin chojni chjasintajni ó. Kjánchó senó k'uéchóxinni Cristo kíxin nkexrí kjuák'e ch'án chjasintajni ó, a ntá jie la xikahya t'ikonni ch'án.

17 Méxra tí nkexro tinkáchónki Cristo mé k'óna ijnko chojni nixin. A ntá kaín nkehe ntaxin la ó kjuixin k'uátsínka la ntá jie la kaín nkehe ó k'óna nixin.

18 Kaín tíha mé tí xra kjuích'e Dios. Jehe ch'án mé kjuanjón ch'án kjuaxróxin kíxin jína chrók'uejókoni ch'án kíxin k'uenyákonhenni Cristo. Ntá jie jeheni k'uáyéheni tí xra tsochénkani í so chojni kíxin kjuaxróxin chrók'uejóko sín ch'án.

19 A ntá ó noheni kíxin Dios ichr'án Cristo k'uenyákonhenni ch'án, ntá xikaha Dios tjinkaon kíxin kjuaxróxin chrók'uejóko ch'án tí sín chjasintajni, la ko jehe ch'án tahya ch'án kuentá kaín tí jie chóna chojni, a ntá jeheni k'uáyéheni tí xra tsjakoni itén ch'án.

20 Ntá jeheni kjuachaxin kuènte Cristo chronkaxínni kíxin Dios chrónóaxinrá ch'án tí jeheni. Mé xikaha tí kjuachaxin kuènte Cristo chrónóaxinráni kíxin kjuaxróxin chrók'uejokoará Dios.

21 A ntá Cristo la ninkehó jie kjuasinhya ch'án, ntá ijiéni k'uénxin ch'án. Kjánchó Dios k'uíkon kíxin éxi tí jehe Cristo chóna ch'án jie, kjuenkayákonhen ch'án kaín tí jie k'uéchóntani.

6

1 Ntá kaín ni jnkokoá ch'eheheni Dios xra, ntá chrónóaharáni kíxin chrókuitoéhyará tí kjuasáyé Dios kjuakuaxinrá ch'án.

2 Kíxin ntáchro xroon itén Dios kíxin: A ntá tí yaon kóxrjínhin Dios kuínhin ch'án tí nkehe chronòa chojni;

Tí yaon tsaáxin chojni mé kjuínkítsa ch'án tí jehe sín.*

A ntá jie ó kui tí yaon kjueyá Dios. A ntá jie ó kui tí yaon tsaáxin chojni.

* 6:2 Isaias 49.8

³ Ch'ehyani ninkehó nkehe jínahya ḱixin ntá chrók'uántaxính̄in śin tí xra tjejóch'eni.

⁴ Náhí. Kaín nkehe ch'eni tjakoxinni ḱixin ch'eheni Dios xra. Na mé tjachani tónínkakonhyani kjónté nchónhya nkehe tjasótexínni, la kjónté ichrén nkehe t'ichjánxinh̄inni, la kjónté ichrén kjuaxikaon síin.

⁵ Na mé k'uékonn̄i, la k'uéjóchjinani, la nchónhya k'uíxite chojni kóninkakonhenni śin, la ko tí xra kjuích'eni la imá xra. Kjaxin k'uájuaahyani la ko kjónehyani.

⁶ Tjakoxinni ḱixin tjóá tjenkayáxinni, la ko tjakoxinni ḱixin ó noheni tí nkehe chaxín, la ko tjakoxinni ḱixin tónínkakonhyani, la ko tjakoxinni ḱixin ch'eni tí jína. La ko chóntani Nchakuen Dios, la ko kaín asénni tjuèh̄eni ḱíchó ni,

⁷ la ko chrónkani tí tan ntoá kuènte Dios, la ko tjakoxinni ḱixin chóntani tí kjuachaxin kuènte ch'án. Ntoá tjejóni ntá xikaha tsjachani ntá kohya nkehe tsonhenni.

⁸ Iso śin náxrjón nixjehe śin tí jeheni la ko iso śin náxrjónhya nixjehe śin, la ko iso śin jína nixja śin nkexrí tjejóni la ko iso śin t'ántaxính̄inni śin. Iso śin t'íkon śin tí jeheni éxí chojni ch'ia la ko iso śin ntáchro śin ḱixin jeheni chojni ntoá chrónka.

⁹ Iso śin ntáchro śin ḱixin chónhya śin tí jeheni kjónté chóxinni śin. Iso śin tjinkaon chrók'óyánni śin la kjónté naxa tjejóchónni. Kjuateni śin na kjónté k'óyanhyani śin.

¹⁰ T'áváni la kjónté xraxinkaonni ḱixin Ìnchéni t'ayakonhenni la chéheni. Éxí ndani jeheni na kjónté chénkani itsjé chojni tí itén Dios tsaáxin śin éxí chróchjéheni śin ijnko nkehe imá tjeje xikaha. Éxí chóntahyani ninkehó nkehe la kjónté la kaín nkehe chóntani.

¹¹ Kíchóni tjejórá chjasin Corinto, ntoá chrónkani nixjaharáni la ninkehó t'ayaharáni la mé kaín asénni tjuahará.

¹² Jehya jeheni chrók'uitjáyan ḱixin chrótjuahará. Náhí. Jahórá t'itjáyan ḱixin chrótjuèhérá tí jeheni.

¹³ Janhan xrjanóahará éxí ijnko it'é xjan chrónóeh̄e tí xjeen ch'án ḱixin kjaxinrá kaín asánrá chrótjuèhérá tí jeheni éxí tjuèh̄eni tí jahará.

Jeheni mé éxí n̄inkoe Dios tjechón

¹⁴ Chrók'uitohyará tí śin tinkáchónkihya Ìnchéni ḱixin tíha mé éxí yóh̄e ijnko yunta, jnkokónhya koxinta. ¿La ko nkexrí chrók'óyóh̄e ijnko chojni ó kótjóá la ko ijnko chojni naxa náhí? ¿La ko nkexrí chrók'óyóh̄e tí t'inkáséyan la ko tí sítié?

¹⁵ Xitjahya chrók'uixin kjuaxróxin tí tjen Cristo la ko tí Tsochren. Xitjahya ts'ejóko ḱíchó ijnko chojni tinkáchónki Cristo la ko ijnko chojni tinkáchónkihya.

¹⁶ Xitjahya chrók'uito tí n̄inkoe Dios la ko tí nkehe tsíkjanoya. Ḱixin jeheni mé tí n̄inkoe Dios tjechón, ḱixin jehe ch'án tsíntáchro ch'án ḱixin:

Ntaha tsjak'é la ko xrítsjak'é tí tjejó tí jehe śin,

ḡ ntá janhan mé ts'óna Dios kuènte śin

la ko jehe śin mé ts'óna chjasin kuèntana.†

¹⁷ Méxra xikaha kjaxin ntáchro Ìnchéni ḱixin:

T'axrjekjanxínrá tí jehe śin na ókjé tjejórá;

tsehýará tí nkehe tjuáhya.

Ḃ ntá janhan mé ts'ayáha tí jahará.‡

¹⁸ Ntá janhan mé ts'óna It'ará,

ḡ ntá jahará ts'ónará xjanna ntoa la ko xjanna chjin,

ichro Ìnchéni Dios chóna kaín kjuachaxin.§

† 6:16 Levítico 26.12, Ezequiel 37.27 ‡ 6:17 Isaías 52.11 § 6:18 Oseas 1.10

7

¹ Mé xixaha kichó ni, tí nkehe i mé tsintáchro Dios tsjanjon ch'án. Méxra t'ichjánxìn kixin tjóá chrók'uejóni, chrókuítóhēni kaín nkehe chrókjuinchekjita tí cuérpóēni la ko tí asēnni. Ntá chrókóxakonhēni chróchrakonhēni Dios la t'ichjánxìn chrókjuancheheni ch'án chrókjuinchetjójáni ch'án kixin jehó ch'án chrókuinkáchónkini.

Tí sín Corinto kjuitoxinhin sín ntje sín

² Chrókjuánjonrá kjuachaxin kaín asánrá chrókuinhínrá tí nkehe chróchronkani. Ninkehó jie chóntehyani ninkexró, la ko kjuích'iyehyani ninkexró.

³ Jehya ntáchroni tíhi kixin chrókuékará jie. Náhí. Ó nohará kixin ósé chrónkani kixin kaín asēnni tjuēheni tí jahará kixin jnkokoá chrók'uejóni la ko jnkokoá chrók'uenni.

⁴ Janhan la imá tjikosáyahará tí jahará la ko imá chàna kixin jína tjejorá. Kjónté kaín nkexrí tjejótjasóteni na imá chàna.

⁵ A ntá tió kjuíjini estado Macedonia la xitjahya chrók'ok'éheni kixin nkuíxìn síin chojni nínkakonhēni la ko kóxakonhen asēnni.

⁶ Kjánchó Dios na mé tí nkexro nchechéhe asén kaín tí sín tsíkóxrjé mé kjuínchechéhe ch'án asēnni kixin ó kjuíji ch'ín Tito.

⁷ Ntá jehya kixin tí kjuíji ch'án ó chrókóchéxinni. Náhí. Chéheni kixin jahará kjuínchechéhérá ch'án. Chrónka ch'án kixin imá tjinkáonrá chrók'uíkonrá tí janhan la ko chrónka ch'án kixin tóxakonhanrá kixin tí jie kjuásinrá la ko kjaxin tóxakonhanrá chrókjuích'erá tí nkehe kuétuānhanrá. Mé kuīnhan kaín tíha ntá antsí má kóchàna.

⁸ Kjuíntak'ávárá kixin tí xroon kjian chr'anhánrá la kjónté la ntá jie í tóxakonnahya. Na mé senó kóxakonna ntá k'uíkuan kixin tí xroon kjuíntaxakonhanrá kjánchó kánhyó isé tíha.

⁹ Ntá jie chàna, kjánchó jehya kixin tí nkehe kjuíntak'ávárá. Náhí. Chàna kixin tí kjuat'ává a ntá ikjanrá kuinkachónkirá Dios. Kjuachará kjónté tí kjuat'ává ntá kjanrá kuinkachónkirá Dios la kóxrjínhin ch'án. Méxra xikaha jeheni la ninkehó nkehe jínahya kjuít'aharáni.

¹⁰ A ntá tí kjuat'ává kjuacha chojni ntá sinchechéhe sín Dios kixin kjuítóxinhin sín tí nkehe tjenkayáxin sín la ntá xikaha mé tsaáxin sín ntá í ts'áváhya sín chr'éxin. A ntá tí sín kuítóehya tí nkehe kuènte chjasintajni mé t'ává sín kixin táhó ts'enxín sín.

¹¹ A ntá jahará kjuachará k'uátsínkará tí kjuat'ává éxí kóxrjínhin Dios, a ntá jie kónohará kixin jína tjejorá, la ó ntoá tjenkayáxinrá, ntá jie chrónkaxínrá nkexrí k'uékjích'erá. Tí nkehe kuinhínrá ntá kjuinchekónínkaonrá la ko kjaxin kjuínchechrakonrá. Ntá chr'éxin ntá tjinkáonrá chrók'uíkonrá tí janhan. Ntá kjuínchekjasóterá tí nkexro kjuasin jie. Kaín tíha kjuákoxinrá kixin chontahyará ninkehó jie tí nkehe tsíkónhen.

¹² A ntá tí nkehe kjian la jehya kixin kjuenkayáxian janhan kuènte tí ch'ín kjuasin jie, la ko jehya kixin kjuenkayáxian janhan kuènte tí ch'ín k'uává ó. Náhí. Íchá jína kixin jahará chrókjuákoxinrá nkayakon Dios kixin imá tóxakonhanrá kixin jeheni xikaha k'uetōanni.

¹³ Mé xikaha kjuích'erá ntá kóchéheni.

Kjánchó antsí má kóchéheni kixin k'uíkonni kixin kóchéhe ch'ín Tito kixin jahará kaín rá kjuínkítsará kixin kjuaxróxin kjuák'e ch'án ntíha.

¹⁴ Janhan k'uétjanka tí ch'ín Tito kixin chàna kixin tí jahará la jehya kjuach'ia tíha la kósuànahya. Náhí. Kaín nkehe k'uétjonkará la chaxín la ko kjaxin kaín nkehe k'uéntátjan ch'ín Tito la chaxín kixin chéheni kixin kuítekáonrá.

¹⁵ A ntá jie antsí tjuahará ch'án kixin xráxinkaon ch'án kixin nkexrí jína kuítekáonrá la ko nkexrí imá kjuíkosáyehérá ch'án kjuánjonrá kjuachaxin kuítóhe ch'án ntiha.

¹⁶ Ntá imá chàna kixin ó nòna kixin jahará sìnchexiteyànará.

8

Antsí má chrókjuínkítsa sín kichó sín

¹ Ntá jie kichó ni, tjinkaonni chrókónohará kixin nkexrí tí sín tinkáchónki Ìnchéni tójnkotsé sín estado Macedonia kjuákoxin sín nkexrí tí kjuasáyé Dios.

² Kjónté nchónhya nkehe tsíkónhen sín la kjónté la kóchéhe sín; la ko kjónté nòna sín la antsí má kjuínkítsa sín tí sín í so éxí chojni chóna itsjé chichaon xíkaha kjuích'e sín.

³ Chaxín k'uíkuan kixin kjuanjon sín éxí tí nkehe chóna sín la ko antsí má xíkjanjon sín inaá kixin xíkaha kjuenkayáxin sín.

⁴ Nchónhya chrónóehé sín tí jeheni kixin chrókjuanjonni kjuachaxin kixin chrókjuínkítsa sín tí sín kichó ni tinkáchónki Dios.

⁵ Na mé antsí má kjuanjon sín la xíkaha kjuenkayáxinni kixin xíkaha chrókjuanjon sín, na mé senó kuinkáchónki sín Ìnchéni, ntá kjuixin ntá kjuínchexiteyéhe sín tí jeheni éxí tóxrjínhin Dios.

⁶ Méxra chrónóeheni tí ch'ín Tito kixin chrókjuenájín ch'án chichaon tí tójnkotsérá ntiha éxí kjuankixin ch'án senó.

⁷ A ntá jahará la tjákoxinrá jína kixin antsí tinkachónkirá Ìnchéni, la ko antsí k'uitjará chronkaxínrá itén Dios, la ko antsí k'uitjará nkehe kuènte Dios, la ko antsí chontará kjuachéhe, la ko antsí tjuèhéra tí jeheni. Méxra xíkaha antsí chrókjuákoxinrá tí xra jína chrókjuínkítsará tí sín kichó ni.

⁸ Jehya ntáxrjan tíhi kixin chrókuétuanhanrá xíkaha. Náhi. Jehí tjínkavan chrókónohará nkexrí jína kjuích'e tí í so sín kixin kjaxinrá chrókjuákoxinrá kixin tjuèhéra kichuára.

⁹ Kixin ó nohará nkexrí tí kjuasáyé Ìnchéni Jesucristo kixin k'uériko ch'án la ntá kónòna ch'án kixin imá tjuèhe ch'án tí jahará kixin tí kónóaxin ch'án mé jahará kórikóxinrá.

¹⁰ Méxra tsotjonkará tí nkehe tjenkayáxian janhan kuènte tí xra i kixin jahará tí nánó k'uátsínka kjuankixinrá kjuínkítsará kjuánjonrá nkehe, la mé jehya kixin ó jehí kjuínkítsará sín. Náhi. Kjaxin imá kócháhará kixin kjuínkítsará sín.

¹¹ A ntá jie chrókjuintaxín chrókjuánjonrá éxí tí chrókjuachará chrókjuánjonrá éxí xrankixín tsíkateherá tsjínkítsará tsjánjonrá nkehe.

¹² Mé xíkaha tí chaxín tjinkaon jnkójín chojni chrókjuanjon sín nkehe, ntá tsoxrjínhin Dios tí tjanjon sín tí nkehe chóna sín. Dios la tjanahya ch'án tí nkehe chóntahya chojni.

¹³ Jehya kixin xíkaha tí í so sín chrók'uejó sín jína kixin tí nkehe kjuínkítsará sín la ntá jahará chrók'uitjayan nkehe t'ichjánxinhanrá. Náhi.

¹⁴ Chrókójína chrókóyóhe chróchontará nkehe jnkokón. A ntá jie jahará chontará tí nkehe chóntahya tí í so sín. A ntá í jnko yaon jehe sín tsochóna sín tí nkehe tsochontahyará. Chrókjuínkítsará tí sín chóntahya kixin chróchontará nkehe jnkokón.

¹⁵ Éxí ntáchro xroon itén Dios kixin: “Tí sín kjuenájín sín nchónhya la mé xèhya sín ninkehó, la ko tí sín kjuenájín sín tsjéhya na mé kjónté tsjéhya la kjuacha tí nkehe kuicháxinhin kjuenájín sín.”*

* 8:15 Éxodo 16.18

Ch'ín Tito la ko tí sín k'uájiko ch'án

¹⁶ A ntá kjuasáyé Dios kixin kjuínchexraxinkaon ch'án tí ch'ín Tito ntá kóxakonhen ch'án éxí tóxakonna kixin tí jahará.

¹⁷ Ntá kóxrjínhìn ch'án tí nkehe k'uetuēnhenni ch'án, la ntá kjaxin jehe ch'án kóxakonhen ch'án kixin á jína tjejórá, ntá jehe ch'án tjinkaon ch'án chrókjuijitsjehe ch'án tí jahará.

¹⁸ Kjaxin k'uetoanni sátsjikotoxin tí ch'ín Tito í jnko kíchó ni, na mé kaín chjasin tí sín tinkáchónki Ìnchéni mé chóxin sín ch'án kixin tí xra jína tjech'e ch'án tjako ch'án tí tan tsaáxinni.

¹⁹ La ko kjaxin tí sín kaín tí ninko ntihi kjueyá sín tí nkexro kíchó ni kixin sátsjikotoxin ch'án tí jeheni tí xra sátsjikoni tí chichaon tsjikénhenni tí sín nòá. Na mé tí xra ch'eni kixin xikaha tsjikosáyeheni Ìnchéni la ko xikaha tjakoxinni kixin tjinkaonni chrókjuinkitsani sín.

²⁰ Tjinkaonni kixin tsokohya nkexro chrók'uántaxínhinni kixin tí chichaon xrenájín kjuíjikoni.

²¹ Méxra tjinkaonni chrókjuich'eni tí nkehe ntoá, jehya jehó tí nkehe chrókóxrjínhìn Ìnchéni. Náhí. Kjaxin tjinkaonni kixin chrók'uikon chojni kixin jína tjejóch'eni.

²² La ko kjaxin k'uetuēnhenni sín sátsjikotoxin sín í jnko kíchó ni, na mé ijnko nkexro nchónhya nkexrí kjuakoxin ch'án kixin chéhe ch'án chrókjuinkitsa ch'án kixin itsjé xra kjuích'e ch'án. A ntá jie antsí má chrókjuich'e ch'án xra kixin chóxin ch'án tí jahará.

²³ A ntá jnkójín sín tsjanchankí sín kixin nkehe tí xra ch'e ch'ín Tito la mé chenkará sín kixin jehe ch'án mé tjinkitsa ch'án tí janhan kixin xikaha tjinkitsa ch'án tí jahará. A ntá tí tsjanchankí sín kixin nkehe tí xra ch'e tí í so kíchó ni ntá chenkará sín kixin tí sín kaín ninko k'uetoan sín kixin sátsji sín ntiha kixin mé xikaha tsjikosáyehé sín Cristo.

²⁴ Méxra chrókjuáoxinrá kixin chaxín tjuèhérá kichuárá kixin tsonohe tí sín kíchó ni í so ninko la ko kjaxin tsonohe sín kixin chaxín chéheni kixin tí jahará.

9

Tí chichaon xrenájín tsjinkitsa tí sín kíchó ni

¹ A ntá tí xrenájín chichaon kixin tsjínkitsará tí sín kíchó ni tinkáchónki Ìnchéni, la t'ichjánxienhya tsokjian xroon tsochr'anhánrá

² kixin xráxín kónòna kixin jahará tjinkáonrá chrókjuinkitsará, na mé xikaha chàna la tjanka tí sín tjejó estado Macedonia kixin jahará chojni estado Acaya desde tí nánó k'uátsínka xráxín tjejórá tjinkáonrá chrókjuinkitsará. A ntá antsí tsjé sín estado Macedonia tjinkaon sín chrókjuinkitsa sín kixin jahará xikaha kjuáoxinrá nkexrí tjinkáonrá chrókjuinkitsará.

³ A ntá ichr'an tí sín kíchó ni kixin tjínkavan kixin tsontáchrohya sín kixin chaxínhya tí nkehe jína ntátjan sín senó. Mé xikaha jahará chrókóyaxínhanrá chrókjuinkitsará tí sín kíchó ni éxí ntátjan sín senó.

⁴ Kixin tí chrókjuasánkian iso tí sín Macedonia ntá tí chrókónoxín kixin naxa kohya nkehe tsjánjonrá ntá chrókósuèheni tí jeheni kixin imá chóxinni kíchó ni la ko kjá chrókósuàhará kjaxinrá.

⁵ Méxra xikaha tóna kixin t'ichjánxin tsontátjan tí sín kíchó ni kixin sátsji sín tsitónxin sín ntja tsjijitsjehe sín tí jahará senó tsjinkitsa sín kixin tsjenájínrá tí chichaon tsintáchorá senó kixin chrókjuánjonrá. A ntá chrókóyaxínhanrá kixin chrókjuánjonrá tí chichaon éxí ijnko nkehe chaxín tjinkáonrá chrókjuánjonrá la jehya éxí ijnko nkehe chrókjuanchaharáni afuerza.

⁶ Xŕaxinkáonrá ḱixin tí nkexro k'uenka tsjéhya na mé tsjéhya tsotjá. A ntá tí nkexro k'uenka itsjé mé tsotjá itsjé.

⁷ Méxra jnkojnko chojni chrókjuanjon tí nkehe kjuenkayáxixín sín asén sín. Na mé tjinkakonhya Dios ḱixin kénhya asénni chróchjéheni ch'án nkehe, ḱixin Dios mé tjuèhe ch'án tí nkexro chéhe tjanjon nkehe.

⁸ A ntá Dios chóna kaín kjuachaxin jié ntá tsotjáhará ch'án kaín nkehe t'ichjánxinhanrá ḱixin tsochontará nkehe tsochjehérá í so chojni chónahya ḱixin xikaha sich'erá kaín xra jína.

⁹ Éxí ntáchro tí xroon itén Dios ḱixin: Tí nkexro t'óxikayehe ch'án itsjé nkehe nchekitonhen ch'án tí sín nòa na mé nunca tsjejehya tí xra jína ch'e ch'án.*

¹⁰ Dios mé tjanjon noatje ḱixin ts'inka la ko jehe ch'án mé tjanjon nkehe sineni, la ntá kjaxin tsotjáhará ch'án kaín nkehe t'ichjánxinhanrá la ko jehe ch'án sinchek'ánkí ch'án tí nkehe ts'énkara la ko jehe ch'án sinchek'ánkí ch'án tí xra jína tjejoch'erá.

¹¹ A ntá tsochontará kaín nkehe tjete ḱixin ntá antsí tsjachará tsjínkitsará tí í so sín kíchó ni. A ntá xikaha tsjijikenhenni sín tí nkehe tsochjehérá tí sín kíchó ni ntá tsjanchehe sín Dios kjuasáya.

¹² Ḱixin xikaha chrókuínkitsará tí sín kíchó ni na jehya ḱixin chrók'uáyéhe sín tí nkehe t'ichjánxinhin sín ó, la mé kjaxin chróchjéhe sín Dios kjuasáya.

¹³ Mé xikaha tsjanchehe sín Dios kjuasáya ḱixin tí nkehe kjuánjonrá kjuáoxinrá ḱixin nchexiteyéhérá tí tan kuènte Cristo. Kjaxin tsjikosáyehe sín Dios ḱixin tí í so nkehe kjuánjonrá k'uáyéhe sín la ko tí nkehe k'uáyéhe í so chojni.

¹⁴ La ko jehe sín tsjanchehe sín Dios ḱixin tsjinkitsa ch'án tí jahará ḱixin jehe sín tjuahará sín ḱixin t'ikon sín ḱixin tjáoxinrá ḱixin tí kjuasáyé Dios chontará.

¹⁵ Tjancheheni Dios kjuasáya ḱixin kjuínchekitonheni ch'án ijnko nkehe imá jié tsaáxinni la tsjachahyani tsochronkaxinni kaín tíha.

10

Kjuachaxin chóna ch'ín Pablo ḱixin tsík'óna ch'án apóstol

¹ Janhan Pablo tió xrjanóahará nkehe la jnkojína xrjanóahará la mé tjáoxian éxí toxrjínhin Cristo. Ntáchrorá ḱixin tió tjèn tí tjejorá ntiha la tósuana, a ntá tí kjín tjèn la imá jiéna, ichrorá.

² Méxra xrjanóahará ḱixin tí tsjasántsjahará tjínkakonhya ḱixin chrókuínchekóninkáonráni ḱixin ntá tsonínkakonhánrá jnkojínrá ḱixin tsékaráni jié ḱixin ixria éxí chojni chjasintajni ó, tsixrorá. A ntá xra ó tsjasán tsjentuáha tí jehe sín.

³ Chaxín tjejóni éxí chojni ó, na kjánchó tió tjanjonni la tjanjonhyani éxí tjanjon chojni chjasintajni.

⁴ Ḱixin tí nkehe xraáni tjanjonxinni jehya nkehe kuènte chjasintajni. Náhi. Táha la kjuachaxin kuènte Dios la tíha mé tsjacha sinchek'itjáyan kaín kjuachaxin kuènte tí Jínahya.

⁵ Na mé tsjachani sinchek'itjáyaní tí nkehe ntoáhya tjenkayáxin chojni la ko kaín nkehe nchekín sín t'inkákonhen ḱixin chrókóchóxin chojni Dios. A ntá kjuachaxin kuènte Cristo tjákhéni kaín chojni ḱixin ntá tsítóhe sín kaín nkehe ntoáhya tjenkayáxin sín, a ntá chrókuitekakonhen sín tí jehe ch'án

⁶ la ko tjejóchónhenni sinchekjasóteni kaín tí sín ntiha naxa tjinkakonhya sín chrókuínchexiteyá sín tí tsjixin tsonoheni ḱixin á chaxín tsjachará sinchexiteyará jína.

* 9:9 Salmo 112.9

⁷ A ntá jahará tékaráni jie kixin tí nkehe t'ikonrá ó. A ntá tí nkexro tjenkayáxin kixin chaxín ch'ehe Cristo xra la mé kjaxin chrókjuátsoan kixin kjaxinni jeheni la ch'eheeni Cristo xra.

⁸ A ntá tí chrókjuintahnkena ntsí kixin tí kjuachaxin chonta janhan ntá chrókósuànahya kixin Ìnchéni kjuanjon tí kjuachaxin kixin chrókjuínkítsa tí jahará kixin antsí chrók'uitjará kuènte Dios, la mé jehya kixin chrókjuintak'itjayanrá.

⁹ Tjínkakonhya kixin chrókjuintachrakonxínrá tí xroon chr'anhánrá.

¹⁰ Kixin ntáchro sín kixin ixra la ko jiehe tí nkehe ikjian janhan, a ntá tí chrókjuak'é ntiha la jienahya la ko kánhyó chonta janhan kjuachaxin tí nixja janhan.

¹¹ Kjánchó tí nkexro xikaha ntáchro chrókónohe ch'án kixin jnkokón nixja janhan éxí nixja tí xroon tsíkjian kjónté ikjín tjèn la ko kjónté tí chrók'uejóni ntiha.

¹² Tjínkakonhyani chrókjuenkayáxinni kixin chrókóyóhèni tí í so sín ntáchro sín kixin jína tí jehe sín. Jehe sín mé lontí sín kixin ncheyóhè sín asén sín í so chojni.

¹³ A ntá jeheni la chrókjuinchehnkexínhyani ijnko xra jehya xra kuènteni. Dios mé kjuako nketí sich'eni xra la kjuanjon ch'án kjuachaxin kixin kjujini kjuích'eni xra tí tjejorá chjasin Corinto.

¹⁴ Jehya kixin chróchóntahyani kjuachaxin chrók'uetuñhanrání. Tí chaxín jehya jeheni saoxín kjujini tí tjejorá ntá xikaha chróchóntahyani kjuachaxin. Ntá náhí, kixin jeheni saoxín kjujini ntiha kjuakoharáni itan kuènte Cristo.

¹⁵ Chrókjuinchehnkexínhyani ijnko xra kjuích'e ókjé chojni éxí xra chrókjuích'eni jeheni. Náhí. Tjinkaonni kixin antsí chrók'uitjará tsinkachónkirá Ìnchéni ntá xikaha la antsí chrókjuinkítsani tí jahará kixin jehó tí xra k'uáyéhèni tjejóch'eni.

¹⁶ Kjaxin tjinkaonni chrókjuakoni tí itén Ìnchéni chrókuaáxin chojni í so chjasin sáchrójuini la ko kjaxin chrókjuinchehnkexínhyani tí xra chrókjuích'e ókjé chojni.

¹⁷ A ntá jnkojín sín tjinkaon sín chrókjuinchehnke sín ntá jehó chróntáchro sín kixin kjuachaxin Ìnchéni mé chóna sín.*

¹⁸ Kixin tóxrjienhya Dios ijnko nkexro jehó chróntáchro kixin jína ch'án. Náhí. Ìnchéni mé tsontáchro ch'án nkexro chaxín jína.

11

Ch'ín Pablo la ko tí sín chaxínhya apóstol

¹ Tjínkavan chrókuinhínrá ntsí tí lontina. ¿Á chrókjuachará chrókuinhínrá nkehe tsontáxrjan?

² Janhan tjínkakonhya kixin í jnko nkexro chrókuinkachónkirá. Kjaxin xikaha tjínkakonhya Dios. Ó ikjua Cristo kixin chrókuakja ch'án tí jahará. Tjínkavan chrókjuánjuan tí jahará chrókuakja tí jehe ch'án éxí yóhè ijnko tjan tjarisoá chrókótehe jnkokoá xì.

³ Tóxakonna kixin éxí tí konche tí kjuach'ia xriko ntá kjuích'iyehè tjan Eva, ntá xikaha kjaxinrá jahará tsitohérá sit'ayahará ókjé chojni ntá tsitohérá tí nkexrí kaín asánrá tinkachónkirá Cristo.

⁴ A ntá jahará cháhará tjánjonrá kjuachaxin tjiji ókjé chojni ntiha chronkaxín sín í jnko Jesús ókjé jehya éxí tí chronkaxinni jeheni, la ko kjaxin cháhará k'uayéhérá ókjé nchakuen jehya tí Nchakuen Dios k'uayéhérá sao, la

* 10:17 Jeremías 9.24

ko cháhará chrókuítekáonrá ijnko nkehe ókjé chrókuaáxinrá jehya éxí tí nkehe kuítekáonrá senó.

⁵ Ó nòna kixin chaxínhya ninkehó sínkíhyana janhan, a ntá antsí sínkí tí sín chréhérá jahará, ichrorá.

⁶ Kjónté kánhyó náxrjón níxja janhan la jehya kixin kánhyó chrókónòna chrókjuàkua. A ntá tjákoáxinrá jahará tíhi kixin káin nkehe t'a.

⁷ ¿Á ntoáhya kjuít'a janhan xrjankaxián tí tan tsaáxinni kixin ninkehó kjuáncháhya chrókjuacha la ko éxí ijnko chojni nòè kjuak'é janhan kixin tjínkavan chrókjuínkítsará chrók'uitjará?

⁸ Tí sín í so nínko kjuínkítsana sín kjuanjon sín chichaon k'uayáha kixin tsjak'é tsjákohará jahará.

⁹ Tí kjuak'é tí tjejorá jahará la kjónté t'itjayan nkehe la ninkexró kjuáncháhya nkehe. Jehó tí sín kichó ni kjuixín estado Macedonia kjuikao sín tí nkehe t'ichjánxinna. Méxra tjínkakhonhya kixin chrótjahará xra tí jahará la ko xikaha naxa jtét'a jie.

¹⁰ Xikaha chaxín choxian tí tan chaxín ntoá kuènte Cristo, a ntá kohya ninkexró nkuixín estado Acaya tsjacha tsakitsjena tí kjuachéhe chonta.

¹¹ ¿Nkekuènte xikaha ntáxrjan? ¿Á xikaha ntáxrjan kixin tjuahyará tí jahará ní? Náhi. Dios la ó nohe kixin imá tjuahará.

¹² Kjánchó ó jehí tsjintaxín xikaha sit'a kixin tjínkakhonhya tsjánjuan kjuachaxin kixin nchehnkexín tí sín ixri ntáchro kixin jnkokón kjuachaxin chóna tí nkehe tjákua la ko tí nkehe tjako sín.

¹³ Kjánchó jehe sín ijnko apóstol chaxínhya mé ch'ia sín ncheyóhó sín éxí chojni kjueyá Cristo.

¹⁴ Jehya ijnko kjuachrakon tíha kixin kjaxin ch'ín Tsochren kjaxin xikaha ncheyóhe ch'án éxí ijnko ángel kuènte tí t'inkaséyan.

¹⁵ Méxra xikaha kjaxin kuènten tí sín ch'ehe tí Jínahya xra mé ncheyóhe sín tí sín jína. Ntá tsjixixín mé tsjasótexín sín tí xra jínahya kjuích'e sín.

Kjuasóte ch'ín Pablo kixin apóstol tí jehe ch'án

¹⁶ Ntáxrjan inaá kixin nijnkorá chrókjuenkayáxinrá kixin lócona. Kjánchó tí xikaha tjenkayáxinrá la títóhéra tsonixja janhan éxí lócona kixin kjaxinna jína chrókjuíntahnke ntsí.

¹⁷ Tí xikaha ntahnkexián la jehya kjuachaxin kuènte Ìnchéni ntáxrjanxian tíha. Náhi. Jehí éxí ijnko chojni lóco níxja.

¹⁸ A ntá nchónhya chojni siín nchehnkexín sín tí nkehe nohe sín a ntá jie la kjaxin janhan sjintahnke.

¹⁹ Kixin jahará ntáchrora kixin imá nohará ntá cháhará tjejó tí sín lóco.

²⁰ Kixin tjánjonrá kjuachaxin t'etuánhanrá sín la nchexiteyéhérá sín la ko takitsjahará sín tí nkehe chontará la ko ch'éna asén sín éxí ìnché sín tí jahará, la ntá kjoniehýará sín la ko tjate sín nkaya ikonrá.

²¹ Kjónté chrókósuàna tsontáxrjan kixin jeheni la kánhyó jiehe k'uetuánhanráni.

Kjánchó tí nkehe nchehnkexín sín la janhan ntahnkexián kjaxinna, kjónté ntáxrjan tíhi éxí ijnko chojni lóco.

²² ¿Á chojni hebreo jehe sín? Kjaxin janhan. ¿Á chojni israelita jehe sín? Kjaxin janhan. ¿Á k'uaxrjeníxin sín ch'ín Abraham? Kjaxin janhan k'uaxrjeníxian ch'án.

²³ Ch'ehe sín Cristo xra kjánchó janhan la antsí má la jehe sín la kénhyó, kjónté ntáxrjan tíhi éxí ijnko chojni lóco. Janhan la antsí má kjuít'a xra a ntá jehe sín la kénhyó, la ko antsí má kjuak'échjina ntoechiso a ntá jehe sín la

kénhyó, la ko antsí má kjuatena chojni a ntá jehe sín la kénhyó, la ko nchónhya veces k'uúxin kjuaxikaon kixin chrók'uén.

²⁴ In'ó veces tí sín judío kjuatena sín la ko treinta y nueve tí kjuatjoté.

²⁵ Níya kjuatexínna sín inta la ko í jnko vez kjuak'e sín xro. Níya k'uániánkí ntabárcø ntá ntá ijnko yaon la ko ijnko tie tjénkataván ntayaon.

²⁶ K'uájia má, k'uúkuan kjuaxikaon chrók'uénxian tí ntario la ko chrók'óyánna tí xíchee la ko chrók'óyánna tí sín chjasenná la ko tí sín tsíkjiñin ókjé. K'uúkuan kjuaxikaon tí chjasin jié la ko tí nteje la ko tí ntayaon la ko chrók'óyánna tí sín chaxínhya tinkáchónki Ìnchéni.

²⁷ Kóxrjéna kixin tí xra kjuít'a la ko itsjé nkehe náxrjónhya konna. Itsjé tie kjuak'échrinhya jína la ko itsjé yaon ik'uén kjinta la ko ik'uén ntá la ko itsjé yaon kjónehya ninkehó la ko kókinna la ko chontahya kaná.

²⁸ Kjónté kaín tíha la ko í so nkehe konna la mé jnkojnko yaon imá tóxakonna kixin kaín tí sín tójnksé sín kaín tí njnko.

²⁹ ¿Á tjen jnkojínra níhará? A ntá tí xikaha la koína éxí nna. ¿Á tjen jnkojínra kjuásinra jié? A ntá tí xikaha la kjaxin tóxakonna.

³⁰ Tí chrókjuíntahnkexian nkehe la mé tjínkavan kixin jehó chrókjuákoxian kixin kánhyó jiéna.

³¹ Dios, It'é Ìnchéni Jesucristo, na mé tí nkexro chrórxaxinkaonni jnkochrín mé ó nohe ch'án kixin chaxín tí nkehe ntáxrjan.

³² Ntá tí kjuak'é chjasin Damasco la mé tí ch'ín gobernador kjuích'ehe ch'ín rey Aretas xra mé k'uetuñhen ch'án tí sín soldado kixin tsochónhen sín tí ntója tí chjasin kixin chrótséna sín chrókjuak'échjina.

³³ Kjánchó siín nkexro k'uínkajinxinna ijnko ntaxra ijnko ventana tí tjat'o k'uantatjen chjasin la mé xikaha kuaána, tséhyana sín.*

12

Tí nkehe k'uúkon ch'ín Pablo

¹ Ninkehó tsjachahya tí nkehe tsoxrjanka kuéntana ó. Íchá jína tsoxrjanka tí nkehe k'uúkuan la ko tí nkehe kjuínchenóna Ìnchéni.

² Choxian ijnko nkexro tinkáchónki Cristo. A ntá k'uátsínka catorce nánó sátsíkji ch'án tí níxin nkajní. Nonahya á sátsíkjiko ch'án cuerpo kuènte ch'án o asén ch'án ó. Jehó Dios mé nohe.

³ Méxra ó nóna kixin xikaha sátsíkji ch'án la ntá nonahya á koí cuerpo kuènte ch'án o asén ch'án ó. Jehó Dios mé nohe.

⁴ A ntá sátsíkji ch'án nkajní. La ntá tí palabra kuínhin ch'án la kohya kjuachaxin nijnko chojni tsochronka.

⁵ Jína chrókjuíntahnkexián kixin xikaha kónhen tí nkexro a. A ntá tí chrókjuíntahnkexián kixin kjuachaxin kuéntana la jehya jína tíha. Íchá jína chrókjuákoxian kixin janhvàn la chontahya kjuachaxin.

⁶ Tí chrókjuíntahnkexián tí nkehe konna la chrókólócohyana kixin chaxín tí nkehe chróxrjanka. Kjánchó xikahya t'a kixin tjínkakhonhya kixin xikaha chrókjuenkayáxin chojni kixin antsí jína janhan. Náhi. Tjínkavan kixin tí xra t'íkon sín la ko tí nkehe tinhin sín mé chrókjuenkayáxixín sín kixin á jína tí janhan, tsixro sín.

⁷ Méxra chrókjuíntahnkexinhya ntá xikaha xránjon kjuachaxin kixin chrók'uayáha ijnko kjuatjoté éxí ijnko ch'i kuikjiáte cuerpo kuéntana mé ijnko nkehe tsík'etuñhen ch'ín Tsochren ikui kjuínchekjoténa.

⁸ Iní veces xrjanóaha Ìnchéni kixin chrókjuatsen ch'án tí kjuatjoté chonta.

* 11:33 Hechos 9.23-25

⁹ Kjánchó ntáchro Ìnchéni kixin jehó tí kjuachaxién ch'án chrókjuachaxian janhan. Kixin tí kjuachaxién ch'án antsí tsjakoxín chojni fuértehya. Méxra ntá chàna kixin fuértehyana kixin ntá xikaha tsjakoxian tí kjuachaxin kuènte Cristo.

¹⁰ Méxra chàna kjónté fuértehyana la ko kjónté t'ántaxina sín la ko kjónté t'ichjánxinna nkehe la ko kjónté chónkina sín chrók'óyánna sín la ko kjónté siín kjuaxikaon chrókjuasótexinna kixin tí tinkachónkia Cristo. Chàna kixin fuértehyana na mé fuérte janhan kixin Cristo tinkachónkia.

Tóxakonhen ch'ín Pablo kixin tí sín tjejó ninko chjasin Corinto

¹¹ ¿Á lócona kixin xikaha xrjanka? Kjánchó jahará kuítekákonhyará ntá xikaha xrjanka. Jahará chróchronkará xikaha kixin jina janhan. Jehya kixin kánhyó sínkina la ntá tí sín chréhérá la antsí sínkí sín. Náhi. Kjónté janhan la chaxín ninkehó sínkíhyana.

¹² Kjuásian itsjé kjuaxroan jié la jina kjuak'é kónínkakonhya kjuákoxián kixin chaxín janhan ijnko nkexro tsíkjejá Ìnchéni.

¹³ ¿Xá k'uikuán tí jahará éxi kánhyó sínkírá a ntá tí í so ninko la antsí sínkí sín kixin tí kjuasán janhan la ninkehó xra tjaáhyará? A ntá tí xikaha ntoáhya kjuít'a la tónínkakonhyará.

¹⁴ A ntá ijie ó yaxinna tí nixin vez chrókjuasántsahará la ko tjaáhyará ninkehó xra. Janhan la tjéyáhya tí nkehe chontará. Tí nkehe tjéyá janhan la mé jahará kixin jahará éxi yóhe xjanna t'ikuán. Méxra tí sín it'é xjan chrókjuenájin sín chichaon chrók'uayakuénxín sín xjeen sín. Jehya xra kuènte tí xjan chrókjuenájin xjan chichaon chrók'uayakuénxín sín tí it'é xjan.

¹⁵ Tóxakonnahya kjónté chrókjuintakjeje kaín nkehe chonta janhan o kjónté chrók'ueñxian kixin tí jahará la jina chrók'uejorá. A ntá janhan imá tjuahará la kjánchó éxi tona janhan kixin jahará kánhyó tjuèherá tí janhan.

¹⁶ Méxra kjónté janhan tjaáhyará ninkehó xra la kjónté xikaha ntáchrora kixin kjuít'ayahará, ichrorá.

¹⁷ ¿Xá kjuít'ayahará kixin jnkojín sín ichr'an kjuíjitsjehe sín tí jahará?

¹⁸ Kjuáncháha tí ch'ín Tito kixin tsjijitsjehe ch'án tí jahará la ko kjaxin kuétuanhan tí í jnko kichó ni sátsjikotoxin ch'án. ¿Á kjuít'ayahará ch'ín Tito ní? ¿Á chaxínhya jina k'uejóni yóni ntiha kixin jnkokón Nchakuen Dios chóntani?

¹⁹ ¿Á tjenkayáxinrá kixin xikaha kjuáteheni kixin chóntani jie ní? Kjánchó xikahya. Dios tjetsjehe kixin nixjani éxi chojni tinkáchónki Cristo. Kíchóni tjuahará la kaín tíha ntáxrjan kixin tjínkavan kixin antsí chrókuinkachónkirá Ìnchéni.

²⁰ Tóxakonna kixin tió tsjasántsahará la tsqxrjinnahya nkexrí tjejorá la ko kjaxinrá tsqxrjánhyará tí nkehe tsontáxrjan. Tóxakonna kixin naxa ts'ixin kjuanínkaon la ko naxa ts'ixin kjuachjinoxínhin la ko tsonínkakhénrá kichuára la ko chrókuétoanrá jahorá la ko naxa tsinkachónkirá kjuach'ia la ko naxa ts'ántaxínhínrá kichuára la ko naxa chontará kjuahnke la ko jnkokoáhya tsjenkayáxinrá.

²¹ Tóxakonna kixin tió tsjasántsahará inaá la tí Dios kuèntana mé sinchesuàna tí tjejorá la ntá imá tsotsjanka kixin itsjérá tsíkjasinrá jie tí ósé la naxa titoéhyará tí nkehe tjuáhya ch'erá la ko naxa titoéhyará chontará chojni chjin ókjé tjásinkoará jie la ko titoéhyará kaín tí í so nkehe jínahya k'uekjich'erá ósé.

13

Nhexraxinkaon ch'án sín la ko tsjixixín nixja ch'án

¹ A ntá jie la níyaxín tsjasántsjahará. A ntá tí kaín nkehe tjinkáonrá tsonòna la mé chróchrónka yaá o iy'á chojni tsík'ikonxín kon sín tí nkehe tsíkónhen.

² Nixjahá tí sín tsíkjasin jie ósé, la ko nixjahará kaín rá kixin kjónté ikjín tjèn la ínaá nixjahará éxí nixjá tí kjuak'é k'uejóni tí iyó kjuasántsjahará kixin tió tsjasán ínaá la í tsíkonóghya tí sín kjuasin jie.

³ Jahará tjinkáonrá tsinhínra á chaxín níxjaxian kjuachaxin kuènte Cristo. Jehya kixin Cristo tsjachahya tsjakoxin ch'án tí kjuachaxièn ch'án tí tjejorá ntiha. Náhí. Chaxín tjakoxin ch'án tí kjuachaxin chóna ch'án tí tjejorá ntiha.

⁴ Chaxín tí k'uénxin ch'án tí ntacruz la mé éxí chóntahya ch'án kjuachaxin. Kjánchó ijie tjechónxin ch'án tí kjuachaxin kuènte Dios. Kjaxinni jeheni éxí kjuák'e ch'án k'uéchóntahyani kjuachaxin la ntá ijie tinkáchónkini tí jehe ch'án la tjejóhónxinni tí kjuachaxin kuènte Dios kixin jína tsjinkitsani tí jahará.

⁵ Jahará chrókjuenkayáxinrá á nchoxon tjejorá, á kaín asánra tinkáchónkirá Ìnchéni. ¿Á noahyará kixin tjejokoará Jesucristo? A ntá jahará tsonohará á chaxín tinkáchónkirá o náhí.

⁶ Kjaxin tjinkavan chrókónohará kixin jeheni la jehya chojni chaxínhya tinkáchónki Ìnchéni.

⁷ Nixjeheni Dios kixin chrókuítóehya ch'án tí jahará kixin ninkehó nkehe jínahya chrókuich'erá. Jehya kixin chrókuakoxinni kixin jína tí jeheni. Náhí. Jehí tjinkaonni kixin jahará chrókuich'erá nkehe jína. Ántosenni kjónté tsóntáchro sín kixin chóntani jie.

⁸ Ninkehó nkehe chrókuich'eni kixin chrókuinchek'itjáyanni tí nkehe chaxín. Kaín nkehe ch'eni la tjikosáyeheni tí nkehe chaxín.

⁹ Méxra chrókóchéheni tí t'ichjánxinhya imá chrók'ueñoanni, tí chaxín jína chrók'uejorá. Ntá naxa tsonixjeheni Dios kixin chrókuixraká chrók'uejorá ntoá.

¹⁰ Mé xikaha ikjian tíhi senó naxa tsjasántsjáhyará ntiha kixin ntá tió tsjasán la ts'ichjánxinhya naxa sìnchekóninkáonrána tsoníxjaxian tí kjuachaxin chonta janhan. Kixin Ìnchéni mé chjina tí kjuachaxin jehya kixin chrókuintak'itjáyánra. Náhí. Kjuanjon ch'án tíha kixin jahará antsí chrókuinkáchónkirá Ìnchéni.

¹¹ Na ntá kichó ni, chrókócháhará. Tjeyará kixin jína chrók'uejorá. Chrókuinchechéhéra kichuára la jnkokoá chrókjuenkayáxinrá la ko kjuaxróxin chrók'uejorá. Kixin Dios mé ts'ejokoará ch'án.

¹² Nixjehéra kichuára jnkójina la tsehéra tja kichuára.

¹³ A ntá kaín tí sín tinkáchónki Ìnchéni ntihi mé xraxinkaon sín tí jahará.

¹⁴ Kjuasáyé Ìnchéni Jesucristo la Dios tjuahará la ko tí Nchakuen Dios tjejókoará tjinkitsará kaín rá. Amén. Ó tjen.

Tí xroon ikjin ch'ín Pablo k'uáyéhe tí sín Galacia

Ch'ín Pablo ikjin xroon k'uáyéhe tí nínko chjasin Galacia

¹ Janhan Pablo mé tsíkjeýána Ìnchéni tsjàkua itén ch'án. Janhan la jehya chojni kjuéýána la ko jehya chojni ichr'ánna. Náhí. Kjuéýána Jesucristo la ko It'éni Dios, mé tí nkexro kjuínchexechón Jesús.

² Janhan la ko kaín tí sín kíchó ni tjejókoni ntihi ikjinni tí xroon ts'áyéhe tí nínko siín estado Galacia.

³ Tjancheheni It'éni Dios la ko Ìnchéni Jesucristo kjuasáyé ch'án chrókjuincheyaonrá ch'án la ko chrók'uayéhérá tí kjuaxróxin kuènte ch'án.

⁴ Jesucristo mé k'uenyákonhen ch'án ijíeni ntá kuaáxinni la mé ijie ts-jachahya tí nkehe jínahya siín chjasintajni tsjachroeni mé xíkaha tjinkaon It'éni Dios.

⁵ Tjánháha Dios kjuasáya jnkochrín mé xíkaha tsoxiteyá. Amén.

Kohya íjnko tan tsaáxinni

⁶ Janhan tóxakonna kixin jahará imá tjoka tinkakìtohérá Dios kjuéýará kjuasáyé Cristo. Jahará la tjoka ó kjuankíxinrá chréhérá ókjé tan chrókuaáxinrá.

⁷ A ntá chaxínhya xíkaha. Kohya íjnko tan tsaáxinni. Jehí iso chojni tjinkaon nchexakonhanrá la ko tjinkaon sín chrókjuítóxinhin sín tí tan chrókuaáxinni kuènte Cristo.

⁸ A ntá tí jnkojín nkexro chrókjuakohará ókjé tan chrókuaáxinrá yóehya tí nkehe ó kjuakoni la tí xíkaha la Dios mé sinchekjasóte tí sín kixin xíkaha sich'e sín, kjónté á janhan o ijnko ángel chrókuijín nkaya nkajní.

⁹ Senó xrjanka la ínaá tsoxrjanka kixin jnkojín nkexro chrókjuako ijnko tan ókjé tsaáxinrá yóehya tí tan ó kuítekáonrá la mé Dios sinchekjasóte tí jehe sín.

¹⁰ Janhan la tjéyáhya kixin chrókóxrjínhin chojni tí xrá t'a. Náhí. Tjínkavan kixin Dios mé chrókóxrjínhin tíha. Tí chrókótjínkavan chrókóxrjínhin chojni ó a ntá xíkaha la jehya ijnko nkexro ch'ehe xrá Cristo.

Ch'ín Pablo k'óna ijnko chojni tjako itén Dios

¹¹ Jahará kíchó ni chrókónohará kixin tí tan tjàkua tsaáxinni mé jehya ijnko nkehe kjuenkayáxin chojni ó.

¹² Jehya chojni chjina tí tan la jehya chojni kjuakona. Náhí. Jesucristo mé kjuakona.

¹³ Jahará la kjá ó kuinhínrá nkexrí k'uékjak'é tió naxa k'uéchráha tí sín judío. Ó nohará kixin k'uéchonkíha tí sín tinkáchónki Ìnchéni la ko tjínkavan chrókjuíntak'itjáyan sín.*

¹⁴ Tí naxa k'uék'ájikian tí sín judío la antsí má k'uénòna. A ntá kaín tí sín chjasenná jnkokón nánó k'uéchontakian sín la kánhyó k'uénohe sín. Antsí má k'uékítekavan tí nkehe k'uék'etòan tí sín tsík'axrjeníxinni.

¹⁵ Kjánchó Dios kjuéýána kjónté naxa tókjínahya la kjuasáyé ch'án kjuéýána ch'án kixin xíkaha kóxrjínhin ch'án.

¹⁶ Kjuínchenòna ch'án nkexrí tjen tí Xjeen ch'án kixin tsjákoha tí sín jehya judío tí tan tsaáxinni. Tió kjuéýána Dios la ninkexró kjuakonahya.

* 1:13 Hechos 8.3; 22.4-5; 26.9-11

¹⁷ La ko kjaxin kjuítsjàhya janhan tí sín tsík'óna apóstol síin chjasin Jerusalén. Náhí. Janhván tuénxín sákjuia chjasin Arabia, a ntá chr'éxín ikjan tí chjasin Damasco.

¹⁸ Á ntá iní nánó chr'éxín na ntá sákjuiyá chjasin Jerusalén kixin tsochoxian ch'ín Pedro la ntá ntiha mé kjuák'ekian ch'án quince yaon.

¹⁹ Kjánchó k'uíkõnhyá tí í so sín apóstol. Jehó k'uíkuan ch'ín Jacobo kichó Ìnchéni.

²⁰ Ó tjetsjehe Dios kixin tí nkehe ikjian la mé chaxín tíha.

²¹ A ntá chr'éxín ntá sákjuia nó estado Siria la ko Cilicia.

²² A ntá tí sín kichó ni tinkáchónki Cristo tjejó estado Judea la naxa tjatsoanhyana sín.

²³ A ntá ó kuínhón sín kixin tí nkexro k'uéchréhe sín chrók'óyán sín la ntá ijie mé tjako tí tan chrókjuinchek'itjáyán ch'án.

²⁴ A ntá ijie tjanchia sín kjuasáya kixin janhan ó tinkachónkia Ìnchéni.

2

Tí iso sín kjueyá Jesús k'uáyéhe sín ch'ín Pablo

¹ La ntá catorce nánó chr'éxín ntá sákjuiyá chjasin Jerusalén inaá la sákjuikian ch'ín Bernabé la ko kjaxin ch'ín Tito.

² Sákjuiyá ntiha kixin Dios kjuínchenóna kixin sáchrókjuiyá. Ntiha chjasin Jerusalén la kójnkotsékoni tí sín t'etõan nínko ntiha la ntá xrjankaxián nkexrí tí tan tsaáxinni tjákoḥa tí sín jehya judío. Mé xíkaha kjuít'a kixin janhan tjínkavan jnkokoá chrókjuenkayáxinni kixin ntá tí xra kjuít'a la jehya chrókóchónkó.

³ A ntá kjónté tí ch'ín Tito kjuák'ekian ch'án la jehe ch'án mé griego ch'án la k'uētuanhyá sín kixin chrókua ch'án xroye.

⁴ Á ntá iso tí sín kichó ni chaxínhyá tinkáchónki Ìnchéni k'uéjókoni sín la jehe sín imó tsík'ixenhen sín kixin tsáyeheni sín kixin tsotsjehe sín nkexrí kixin tí sín kuente Cristo chóna kjuachaxin. A ntá jehe sín tjinkaon sín kixin chrókjuinchexiteyeheni inaá tí nkehe k'uék'etõan tí ley.

⁵ A ntá tahyani kuenté nkehe tí tjejóchro sín kixin jehí tjinkaonni kixin tí tan tsaáxinni la ntoá chrókuinkachónkirá jahará.

⁶ A ntá tí sín kónoxín t'etõan kjuakõnahya sín ninkehó. A ntá jeheni la tahyani kuentá á chojni t'etõan o náhí kixin Dios la jnkokón t'íkon ch'án kaín chojni.

⁷ A ntá kjuátsoan sín kixin Dios ó chjina tí xra tjákoḥa tí sín jehya judío tí tan jina éxí yóhe tsíchjéhe Dios xra ch'ín Pedro tjákoḥe ch'án tí sín judío.

⁸ Tí Dios tsík'etuenhen ch'ín Pedro ts'óna apóstol tsjákoḥe ch'án tí sín judío la ko kjaxin tsík'etuanha ch'án ts'óna apóstol tsjákoḥa tí sín jehya judío.

⁹ Méxra ch'ín Jacobo la ko ch'ín Pedro la ko ch'ín Juan, mé tí sín t'etõan kuente nínko, mé kjuátsoan sín kixin Dios tsíkjanjon tí kjuachaxin. Ntá kóchéhe sín kixin jnkokón ch'eni xra la itsé sín tjani la ko itsé sín itja ch'ín Bernabé. Ntá kjuenkayáxinkoni sín kixin jeheni la tsjákoḥeni tí sín jehya judío la jehe sín nachrohe tsjákoḥe sín tí sín judío.

¹⁰ Jehó k'uētõan sín kixin tsoxraxinkaonni la ko tsotjuèheni tí sín nõa la xráxín tóxakonhenni sinchexiteyáni tíha.

Ch'ín Pablo kjuentuéhe ch'án tí ch'ín Pedro chjasin Antioquía

¹¹ A ntá tió kjuíji ch'ín Pedro chjasin Antioquía la kjuentuáha ch'án kixin ntoáhya kjuích'e ch'án.

12 Senó k'uékjineko ch'án iso chojni kjónté jehya sín judío. Ntá ikui iso sín kuixin tí tjen ch'ín Jacobo. A ntá kjuankixin k'uaxrjenta ch'án la kuítóhe kjónkohya ch'án tí sín jehya judío a. Xikaha kjuích'e ch'án kixin chrakonhen tí sín kui kixin tí sín neko ch'án naxa tsíkahya sín xroye.

13 Tí iso sín kichó ni judío kjaxin kuítekakohenen sín tí ch'ín Pedro kjónté ntoáhya kjuenkayáxin ch'án. Kjaxin ch'ín Bernabé la kjuacha kjuachroe sín ch'án kixin tí nkehe ntoáhya kjuích'e sín.

14 A ntá tió k'uíkuan kixin tí nkehe kjuakoxin sín la tóyóehya tí chrónka tí tan jina tsaáxinni tjako sín la ntá níxjaha tí ch'ín Pedro nkayakon kaín tí sín tsíkójnksé. Ntáxrjan kixin: “Jaha mé ijnko chojni judío la kjónté itjen éxí jehya ijnko chojni judío. ¿A ntá kuente tétuenhén tí sín jehya judío kixin chrók'uejó sín éxí chrókóyóhe tí sín judío?”

Tí sín judío la ko tí sín jehya judío la jnkokón tsaá sín kixin chóna sín fe

15 Jeheni la k'uaxrjeníxinni chojni judío desde tí kokjéxinni la jeheni na chónahyani jie éxí tí í so chojni chónhya Dios.

16 Kjónté xikaha la ó noheni kixin tsotjuáxinhya ijié chojni tí nkehe tsík'etōan ch'ín Moisés. Jehó tí sín tinkáchónki Jesucristo mé tsotjóá ijié sín. Méxra kjaxinni tinkáchónkini Jesucristo kixin tjinkaonni sinchetjóá ch'án ijiéni kixin titekaonni ch'án. Méxra ninkexró tsjachahya tsotjuáxin ijié sín kixin chrókjuinchexiteyéhe sín tí nkehe t'etōan tí ley.

17 Tí tjinkaonni tinkáchónkini Cristo kixin tsotjuáxin ijiéni, a ntá jeheni kjaxin xraxinkaonni kixin ó kjuasinni jie. A ntá í jehya Cristo k'uetōan kixin chrókjuasinni jie. Kjá chaxín náhí.

18 Tí kuítóheni tí ley la ntá naxa chrókjanni chrókuinkáchónkini tí ley inaá la tíha la ó jie kuénteni tíha.

19 A ntá tí ley la kjuanchia jie k'uénxian. A ntá ijie la tjéchuān kixin tinkachónkia Dios.

20 Janhan la ó tsík'en kixin ó k'uénkian Cristo. A ntá ijie la janhya tjéchuān. Cristo mé tjechónxin tí janhan. La ntá jie la tjéchonxian tí cuerpo chonta kixin tinkachónkia tí Xjeen Dios kixin jehe ch'án la tjuāna ch'án la k'uenyákonhenni ch'án.

21 Tjínkakhonhya tsjanoá tí kjuasáyé Dios. Tí chrókótjuáxin ijié chojni tí ley tsík'etōan ch'ín Moisés, a ntá ó chónkó ik'uén Cristo tí xikaha.

3

Tí ley o tí fe

1 Jahará kichó ni gálatas imá lontirá. ¿Nkexro kjuít'ayahará? Kixin tí nkehe kjuáakohará mé kuinhírrá kixin Cristo k'uénxín tí ntacruz k'uenyákonhenni ch'án.

2 Jnkokoá nkehe tjínkavan chrókjuateherá. ¿Á k'uayèxírrá Nchakuen Dios kixin kuítekáonrá tí nkehe tsík'etōan ch'ín Moisés o á k'uayèxírrá Nchakuen Dios kixin kuítekáonrá tí tan chrónkani kuinhírrá?

3 Imá lontirá jahará. Tí kjuankixixírrá la kuítekáonrá kjuachaxiēn Nchakuen Dios. A ntá jie la tjínkáonrá jahórá sinchekjintaxírrá tí xra.

4 ¿Á chónkó kaín tí nkehe tsík'atsínkará? Kjá chrókjuinkítsa chrókjuich'e xra tíha. Jehya chónkó tí nkehe kjuasótiaxírrá.

5 ¿Nkekuènté kjuanjon Dios tí Nchakuen ch'án la ko kjuasin ch'án kjuaxroan k'uíkonrá? Jehya k'uayèxírrá tíha kixin kuítekáonrá tí nkehe tsík'etōan tí ley. Náhí. K'uayèxírrá tí nkehe kixin kuinkachónkirá tí tan kuinhírrá.

6 Ch'ín Abraham kuítekaon tí nkehe k'uetōan Dios ntá Dios k'uíkon kixin jina ch'án.

⁷ Méxra chrókónohará jahará kixin tí sín chaxín tikinixin sín ch'ín Abraham a mé tí sín a chaxín tinkáchónki Dios.

⁸ Tí xroon itén Dios mé chrónka kixin tí sín jehya judío mé sinchetjóá Dios ijíé sín kixin tsinkáchónki sín ch'án. Mé xikaha Dios mé chénka ch'ín Abraham ósé tí tan jína, ntáchro ch'án kixin: “Ijnko nkexro ts'axrjenixin tí jaha mé tsoyaonxín kaín nación.”*

⁹ Mé xikaha kjaxin kaín sín tinkáchónki Dios mé tsoyaon sín jnkokón éxí kóyaon ch'ín Abraham kixin kuítekaon ch'án.

¹⁰ Kaín sín jehó tinkáchónki tí nkehe tsík'etōan ch'ín Moisés la tsjasóte sín kixin ntáchro xroon itén Dios kixin: “Tsjasóte kaín tí sín tsjachahya sinchexiteyéhe tí nkehe tsík'etōan tí xroon chóna ley.”†

¹¹ Ntá ó ntoá ntáchro kixin kohya nkexro tsotjuáxin ijíé sín tí tsitekaon sín tí ley. Xroon itén Dios ntáchro kixin: “Tí nkexro tsikótjóá la tjejóchónxin sín kixin tinkáchónki sín Dios.”‡

¹² Ntá tí chrókuinkáchónkini tí ley tsík'etōan ch'ín Moisés la chrókuinkáchónkiyhani Cristo. Ntáchro xroon itén Dios kixin: “Tí nkexro sinchexiteyá tí ley la táhó chrók'uejóchónxin sín.”§

¹³ A ntá Cristo kjuatsen ch'án kaín tí chrókjuasótexinni tí ley. Tí náhi la chrókjuasóteni kixin chrókjuachahyani sinchexiteyéheni tí ley. Jehé ch'án kjuenka ch'án tí ijíeni kixin k'uenyákonhenni ch'án. Ntáchro xroon itén Dios kixin: “Kaín tí chojni chóna jie ts'ejótjjan sín ijnko nta ntá its'en la mé xikaha k'uáyéhe sín tí kjuanínkaon kuènte Dios.”* Mé xikaha k'uikon sín tí ch'ín Jesús.

¹⁴ Mé xikaha kónhen kixin ntá tí nkehe chénka Dios tí ch'ín Abraham senó mé ts'áyéhe tí sín jehya judío kixin kjuachaxién Cristo Jesús. Ntá xikaha kaín ni ts'áyéheni tí Nchakuen Dios kixin tinkáchónkini ch'án mé xikaha tsíntáchro ch'án.

Tí ley la ko tí nkehe kjuanjon Dios

¹⁵ Kíchóni, tíhi mé sintayóaxian kuènte chojni ó. Tió ijnko chojni ch'éna ijnko xroon tsochóna firma kuènte sín la ntá xitjahya ts'óxíka í jnko nkexro la xitjahya í jnko nkexro sich'éna í so nkehe.

¹⁶ A ntá Dios mé tsíkjo ch'án tí ch'ín Abraham kixin tsjanjon ch'án nkehe ts'áyéhe tí nkexro ts'axrjenixin ch'án. Tí xroon itén Dios ntáchrohya kixin kaín nkexro ts'axrjenixin ch'ín Abraham chrók'uáyéhe tíha. Náhi. Ntáchro kixin ts'áyéhe jnkokoá nkexro ts'axrjenixin ch'án la mé Cristo tíha.†

¹⁷ Méxra xrjanka tíhi. Dios chénka tí ch'ín Abraham ijnko nkehe chaxín la tsoxiteyá tíha kixin éxí yóhe ijnko xroon chóna firma tíha. A ntá cuatrocientos treinta nánó chr'éxin la ntá ikui tí ley k'uechrónka ch'ín Moisés. La ntá kjónté xikaha la xitjahya tsoxíka tí nkehe tsíchrónka Dios o tsontáchro chojni kixin tjettoanhya tí nkehe tsíntáchro ch'án.‡

¹⁸ Tí chrókjuanjon Dios nkehe kixin chrókjuinchexiteyáni tí nkehe k'uetōan tí ley la ntá tí nkehe tsíntáchro Dios senó mé chróxiteyáhya. A ntá Dios mé tsíchénka ch'ín Abraham kixin sinchekitonhen ch'ín Abraham ti nkehe kjuasáyé ch'án.

¹⁹ ¿A ntá xikaha la nkehe tsonhen tí ley tsík'etōan ch'ín Moisés? Chr'éxin kjuanjon Dios tí ley kixin tsonoxinni nkehe tí jie tjasinni. K'uetōan Dios sinchexiteyéhe chojni tí nkehe tsík'etōan ch'ín Moisés tsijia tí nkexro ts'axrjenixin ch'ín Abraham, mé tí nkexro kjueyá Dios kixin xikaha tsoxiteyá tí nkehe chrónka ch'án. A ntá tí ley mé chrónka tí sín ángel ntá k'uáyéhe ch'ín Moisés la ó chrónkaxón ch'án.

* **3:8** Génesis 12.3 † **3:10** Deuteronomio 27.26 ‡ **3:11** Habacuc 2.4 § **3:12** Levítico 18.5 * **3:13** Deuteronomio 21.23 † **3:16** Génesis 12.7 ‡ **3:17** Éxodo 12.40

²⁰ A ntá tí nixjehe Dios tí ch'ín Abraham la jehó ch'án la ko jehó Dios la méxra t'ichjánxinhya í jnko nkexro.

Tí xra kuènte tí ley

²¹ ¿A ntá á chrók'uaxrjexín kixin tí ley tsík'etoan ch'ín Moisés chrókjuanjonko tí nkehe tsjanjon Dios? Kjá náhí. Tí chrók'uixin ijnko ley chrókjuanjon kjuachón la ntá chrókótjuáxin ijiéni tí chrókuitekaonni tí nkehe t'etoan tí ley.

²² A ntá tsintáchro xroon itén Dios kixin tí jie mé t'etuenhen kaín xín chojni kixin ntá tí sín chrókuinkáchónki Jesucristo ntá chrók'uáyéhe sín tí nkehe tsíchrónka Dios.

²³ A ntá tí naxa kuihya Cristo la ntá tí ley la k'uetuenhen kaín ni la k'uejóchónhenni kixin chrókónoxín tí nkehe chrókuinkáchónkini.

²⁴ Tí ley la éxí ijnko maestro kuènte chánjan k'uetōan. A ntá jie ikui Cristo la jehe ch'án mé kótjuáxinni ch'án kixin titekaonni ch'án.

²⁵ A ntá ijie ó titekaonni Cristo la í nchexiteyèhyani kaín tí nkehe t'etoan tí ley.

²⁶ A ntá jahará ó k'ónará xjeen Dios kixin ó tinkáchónkirá Jesucristo.

²⁷ Kaínrá kuíkitiaxínrá kjuachaxién Cristo mé xikaha jehe ch'án kótjuáxinrá ch'án.

²⁸ A ntá jehya tjetoan á chojni judío o á chojni jehya judío o á chojni ch'exón xra o á chojni t'etoan o á chojni ntoa o á chojni chjin. Kaínni la ó k'ónani jnkokoá kixin tinkáchónkini Cristo.

²⁹ A ntá tí tinkáchónkini Cristo chaxín la ntá tí xikaha ó chaxín tsík'axrjeníxinni ch'ín Abraham la ts'áyéheni tí nkehe tsíchrónka Dios.

4

¹ Mé xikaha ntáxrjan tíhi. A ntá ijnko chánjan tió chrók'uen tí it'é ntá chrókuitoeko tí nkehe kuènte tí it'é la jehe ch'án la tóyóhó ijnko nkexro ch'exón xra kixin tí jehe la xitjahya t'etoan xra kjónté chaxín kuènte ch'án kaín tí nkehe a.

² Siín nkexro t'ayakonhen ch'án la t'etoan tí xra kuènte ch'án tsjixrakájia tí yaon tsintáchro tí it'é.

³ Mé xikaha kónhen tí jeheni. Kixin tí naxa k'uéchánjanni la kuítekaonni kaín tí nkehe kuènte chjasintajni.

⁴ A ntá ó kjuixraká tí yaon ntá Dios ichr'án tí Xjeen ch'án ikui ch'án k'uaxrjeníxin ch'án ijnko chojni chjin. La kjuínchexiteyá ch'án kaín tí nkehe tsík'etoan tí ley kuènte Moisés.

⁵ Ikui ch'án xikaha kixin tsaáxinni ch'án kjónté senó k'uék'etuenhenni tí ley. A ntá jie la chrók'uáyéhe Dios tí jeheni éxí xjeen ch'án.

⁶ A ntá kjuakoxin Dios kixin jeheni mé xjeen ch'án mé ichr'án Dios tí Nchakuen Xjeen ch'án tsochónta asénni la tí Nchakuen ch'án mé t'èyaxín: "It'èni jaha mé kuéntá tí jeheni."

⁷ Méxra xikaha jahará la jehya ijnko nkexro ch'exón xra. Náhi. Jahará mé xjeen Dios. Jahará mé xjeen ch'án la jehe ch'án tjinkaon sinchekitonhanrá tí nkehe kuènte ch'án kixin tinkáchónkirá Cristo.

Ch'ín Pablo tóxakonhen ch'án kixin tí sín tinkáchónki Inchéni

⁸ Ósé la jahará k'uéchonhyará Dios la kjuínchexiteyéhérá tí dios chaxínhya.

⁹ A ntá ijie la ó choxínrá Dios, o íchá jína chróntáchroni kixin Dios la ó chóxin ch'án tí jahará. A ntá jehya jína kixin naxa chrókuinkáchónkirá ínaá tí nkehe chóntahya kjuachaxin la ko tí nkehe chónkó kixin tí xikaha naxa chrókjuínchexiteyéhérá tí nkehe tinkáchónki chojni.

¹⁰ A ntá jahará la tjásinrá kia ichrén tí yaon la ko tí nitjó la ko tí yaon kia tí nánó.

¹¹ Imá tóxakonna kixin á chónkó tí xrá kjuít'a kjuákohará.

¹² Kíchóni, xrjanóahará kixin chrókóyóhará éxí tí janhan kixin janhan mé tóyóhe éxí k'uejorá senó kixin t'etuenhyaní tí ley. Janhan la tékahyará ninkehó jie.

¹³ Ó nohará kixin tió saoxín kjuákohará tí tan tsaáxinni la k'uétsankahyana kixin k'uénina k'uéchonta ijnko chin k'uékjínchekjoténa.

¹⁴ Kjonté xikaha k'uénina la jahará kjuanoáhyará tí janhan la k'uéchontará kjuasáya tí janhan. A ntá jahará la jína kjuánjonrá kjuachaxin kjuak'é ntiha. Éxí chrók'uayéhérá ijnko ángel kuènte Dios o éxí chrók'uayéhérá jehe Ìnchéni Jesucristo mé xikaha kjuak'é jína ntiha.

¹⁵ ¿Nkehe kónhen tí kjuachéhe k'uéchontará? Kixin ntáxrjan kixin jína tí jahará kixin tjinkáonrá kjonté ikonrá chrókuakítsjerá chróchjinará tí janhan.

¹⁶ A ntá ijie la, ¿á ninkákònnará jehó kixin kuinhínrá tí nkehe ntoá xrjanka?

¹⁷ Tí sín í so a la imá tjinkaon sín tí jahará. Kjánchó ntoáhya tí nkehe tjenkayáxin sín kixin jehe sín tjinkaon sín kixin chrókuítóhérá tí jeheni kixin ntá tjinkaon sín kixin jahará chróchréhérá tí jehe sín.

¹⁸ Jína chrókótjinkáonrá tí í so sín kjánchó ntoá chrókjuenkayáxinrá kixin jehya tí chrókjuak'é tí tjejorá ó chrókuítekáonrá jína.

¹⁹ T'ikonni tí jahará éxí xjeenni. Ijie la imá kjuíncheníhi asenná kixin tóxakonna tí jahará. Éxí yóhe ijnko ìné xjan tsjoté tjan tió sinchekokjíhi tjan xjeen tjan mé xikaha janhan la naxa tsjasótena kixin tjínkavan kixin Cristo chrókjuinchetjóá tí jahará.

²⁰ Chrókójína ijie naxa chrókjuak'é ntiha ntá ókjé nkexrí chrónixjahará ntá ijie la nonahya nkehe tí tjenkayáxinrá.

Kjuíncheyóexín ch'ín Pablo tí tjan Agar la ko tí tjan Sara

²¹ A ntá jie chronkará nkehe. Jahará naxa tjinkáonrá chrókjuínchexiteyéhérá tí ley tsík'etoan ch'ín Moisés la ¿á kuiénhyará nkehe chro tí ley?

²² Ntáchro kixin ch'ín Abraham mé chóna ch'án yaá xjeen ch'án la ijnko mé xjeen tjan ch'exón xrá la tí í jnko mé xjeen ichjién ch'án mé ijnko tjan t'ítuenhya.*

²³ Tí xjeen tjan ch'exón xrá kokjíhi ch'án éxí tokjíhi chojni ó. A ntá tí xjeen tí tjan t'ítuenhya la mé ó kokjíhi ch'án kixin tsoxiteyá tí nkehe tsintáchro Dios.

²⁴ Tíhi mé ntayóaxián. Tí yaá chojni chjin mé tóyóexín tí yaá nkehe tsík'etoan Dios. Tí tjan Agar mé tóyóexín tí ley xránjonxín ijna Sinaí. La ntá tí sín titekaon tíha mé éxí chojni ch'exón xrá tí jehe sín kixin t'ítuenhén sín.

²⁵ Mé xikaha tí tjan Agar mé tóyóexín tí jna Sinaí nación Arabia la tíha tóyóexín tí chjasin Jerusalén kixin tí chjasin la ko tí sín tjejó ntiha la mé t'ítuenhén sín la ko káin xjeen sín.

²⁶ A ntá tí chjasin Jerusalén itjen nkaya nkajní la mé t'ítuenhya. Náhí. Mé jeheni la kuènteni tíha.

²⁷ Ntáchro xroon itén Dios kixin: Jaha chojni chjin chontahya chánjan kjonté chrokócháha. Jaha k'uíkonhya ninkehó kjuatjoté kixin kjuínchekokjéhya xjan la kjonté chrokócháha.

Tí tjan kuítsinkehe na mé nchónhya ìnté tjan ts'ikon tjan, a ntá tí tjan kjuak'eko xì tjan la kánhyó ts'ikon.†

* 4:22 Génesis 16.15; 21.2 † 4:27 Isaías 54.1

²⁸ Kíchóni jeheni la éxí yóhēni ch'ín Isaac kixin kaín ni la xjeen Dios kixin xikaha tsintáchro ch'án.

²⁹ A ntá éxí senó tí xjan kokjíhi éxí tokjíhi chojni ó la jehe ch'án k'uéchónkíhi ch'án tí xjan kokjíexín kjuachaxién Nchakuen Dios. Mé xikaha kjaxin sítónhen jie.

³⁰ A ntá ntáchro tí xroon itén Dios kixin: “Tétuēnhén tí tjan ch'exón xra sátsji tjan la ko tí xjeen tjan kixin tí xjeen tjan la ts'áyèhya ch'án tí nkehe tsitōnhen tí xjeen tí tjan t'ítuēnhya.”‡

³¹ Méxra kichó ni, kaín ni la jehya xjeen ijnko tjan ch'exón xra. Náhi. Jeheni mé xjeen tí tjan t'ítuēnhya.

5

Jína chrók'uejorá kixin kuaáxinrá

¹ Cristo mé kuaáxinni la ntá ó tí ley la t'etueñhiani. Méxra jína chrók'uayakonhénra tí nkehe kuaáxinrá la í chrókjanhyará chrók'ónará chojni t'ítuēnhen inaá.

² Tinhíra, janhan Pablo mé ntáxrjan kixin tí chrókuará tí xroye a ntá ó chónkó chrókuinkachónkirá Cristo.

³ Tjínkavan tsóxrjanka inaá kixin tí jnkojín nkexro ita tí xroye la jehe ch'án mé t'ichjánxin sinchexiteyéhe ch'án kaín tí ley tsíkjin ch'ín Moisés.

⁴ A nta jahará la xritjéyará tsotjuáxin ijjará kixin sinchexiteyéhéra tí ley la ntá ó kuítóhéra Cristo la ko ó kuítóhéra tí kjuasáyé Dios tjuahará.

⁵ A ntá jeheni la tinkáchónkini Cristo la chóntani Nchakuen Dios la ntá tjejóchónhenni kixin tsjintaxín tsotjóá ijjéni.

⁶ Jeheni mé tinkáchónkini Jesucristo la ntá kánhyó tjetōan tí xroye. Antsí tjetōan chrókuinkáchónkini Ìnchéni la ntá tí tinkáchónkini Ìnchéni la chrótjuèheni kichó ni.

⁷ Jahará la jína kjuankíxinrá tinkachónkirá Ìnchéni. ¿A ntá nkexro k'ueñoan kixin chrókuítóhéra tí nkehe chaxín?

⁸ Jehya nkehe kuente Dios tí tjejóch'era méhe. Méxra jehe ch'án la kjueyará ch'án.

⁹ Ntáchro sín kixin tí ch'o t'óna niotja tsjiko intsíkoá tí xroan nchek'ánki niotja, a ntá ts'ánki kaín tí ch'o.

¹⁰ A ntá janhan tinkachónkia Ìnchéni la ko ó nòna kixin jahará kjaxin tinkachónkirá ch'án la kjá í chrókjuenkayáxinhyará í jnko nkehe. A ntá Dios mé sinchekjasóte ch'án tí nkexro ixri tjixrónkáxin kixin Dios la chrakuenhya ch'án ninkexró.

¹¹ Kíchóni, tí naxa chrókuétoan chrókua chojni xroye la ntá tí sín judío chrókónínkakonnahya sín. Tí xikaha la chrók'uántaxiēnhya sín tí tan jína chrónka nkexrí k'uēnxín Cristo tí ntacruz.

¹² Méxra tí sín ntaxakonhanrá la t'etōan sín itsará xroye la íchá jína naá chrók'uátsínkó chrókóchrít'ō sín kaín.

¹³ Jahará kichó ni, la Dios mé kjueyáni kixin tsaáni kjánchó chóntahyani kjuachaxin ch'eni tí nkehe jínahya. Náhi. Chrókjuinkitsani kichó ni la ko chrótjuèheni kichó ni.

¹⁴ Mé xikaha tí ley mé t'axrjexín kixin: “Chrótjuéhéra kichuára éxí tjuèxinrá asánra.”*

¹⁵ A ntá tí chrókjóntehéra kichuára la ko chrókjónterá kichuára la ntá chrókóxakonhanrá kixin tí xikaha la chrókjuinchek'itjayanrá kichuára.

Tí jie chrókjuasin chojni la ko tí nkehe t'etōan Nchakuen Dios

‡ 4:30 Génesis 21.10 * 5:14 Levítico 19.18

16 **A** ntá ntáxrjan kixin chrók'uejorá éxí tjinkaon Nchakuen Dios, a ntá chrókjuéyáhyará tí nkehe jínahya chrókjuenkayáxinrá.

17 **A** ntá tí nkehe jínahya tjenkayáxinrá la tjanjonko Nchakuen Dios kixin Nchakuen Dios la tjanjonko tí nkehe jínahya la tí iyó nkehe tjenkayáxinrá la tjanjonko kichó. Méxra jahará la xitjahya ch'erá tí nkehe tjinkáonrá chrókjuich'erá.

18 **A** ntá tí Nchakuen Dios tjetjinkitsará, a ntá jehya tí ley t'etuñhanrá jie.

19 Xrahya ts'ikonna tí jie tjasin chojni jínahya tjenkayáxin. Mé tíha la tí sín tjasinko jie chojni chjin ókjé, la ko tí chojni ch'e tí nkehe jínahya, la ko tí chojni náxrjónhya tjenkayáxin,

20 la ko tí chojni tinkáchónki nkehe tsíkjanoya, la ko tí chojni nchexroan, la ko tí chojni nínkaon, la ko tí chojni itje kjuanínkaon, la ko tí chojni chjio, la ko tí chojni xrahya tónínkaon, la ko tí chojni tjinkaon jehó tsochónta itsjé nkehe, la ko tí chojni tjinkaon ts'axrjenta, la ko tí chojni t'óxika kichó,

21 la ko tí chojni chjinoxínhin, la ko tí chojni tjàya, la ko tí chojni tókoan, la ko tí chojni kóchjinka, la í so nkehe tóyóhe xikaha. Na mé éxí yóhe senó mé k'uétjonkará la ko ijie la xikaha tjetjonkará inaá kixin tí nkexro xikaha tinkákjasin jie mé xitjahya ts'áyéhe sín tí kjuachaxin kuènte Dios.

22 **A** ntá tió chóntani Nchakuen Dios ntá tsotjuèheni kichó ni, la ko tsochéheni, la ko kjuaxróxin ts'ejóni, la ko tsochónhenni tsonínkakonhyani, la ko jnkojína ts'ejókoni kichó ni, la ko nchexiteyáni jnkojína.

23 La ko tsohnkehyan, la ko ts'etuñhenni asénni kixin tsjasinhyani jie. Kohya nijnko ley chrókjuinchekjasóteni kixin tí jína chrók'uejóni xikaha.

24 Mé tí chojni tinkáchónki Jesucristo la kaín jie k'uéchónta sín la ko tí jínahya k'uékjenkayáxin sín la ó kjuenká Ìnchéni kjuák'enkáni ch'án ntacruz.

25 **A** ntá tí tjejókoni Nchakuen Dios t'ichjánxin tsítóheni kixin Nchakuen Dios ts'etuñhenni.

26 Méxra chrókjuinchehnkehyan la ko chrókjuachaxínhyani kichó ni la ko chrókóchjinoxíenhyani.

6

Tjinkitsará kichuárá

1 Kichóni, a ntá tí chrók'uíkonrá jnkojín nkexro kjuasin ichrén jie a ntá tí jahará tí chaxín chontará Nchakuen Dios la chrókjuéntuéhéra sín la chrókjuínkitsará sín. **A** ntá jnkojína chrónixjehéra sín, a ntá jahará la chrókóxakonhanrá kixin xikahya chrókónhanrá chrókjuásinrá jie kjaxin.

2 Tsjinkitsará kichuárá kixin jóhya tsamará tí nkehe ye. Kixin tí xikaha la ó chrókjuinchehiteyáni tí nkehe t'etoan Cristo.

3 Ntá jnkojín nkexro ntáchro kixin imá tjetoan tí jehe ch'án la chaxínhya tíha la jehó ch'iehe asén.

4 Jnkojnko chojni chróxaxinkaon á nchoxon tjenkayáxin la chrókónohe kixin ó nchoxon la jehya jehó chrókjuikosáyehe asén. Náhi. Chrókjuikosáyehe í so chojni.

5 Kixin jnkojnko chojni yamá tí jie kuènte.

6 Tí nkexro xrakóhe tí tan jína la chrókjuinkitsa sín chrókjuanjon sín nkehe chrók'uáyéhe tí nkexro tjako.

7 Sich'iyéhyará asánrá. Kohya ninkexró tsjacha tsjanoá Dios. Tí nkehe ts'enka chojni la mé xikahó tsotjá.

8 Tí t'enka chojni tí nkehe jínahya tjenkayáxin sín la tí nkehe jínahya tsjacha sín mé ts'enxín sín. **A** ntá tí nkexro ts'enka tí nkehe tjinkaon Nchakuen Dios la Nchakuen Dios mé tsjanjon tí kjuachón jnkochríxín ts'áyéhe sín.

⁹ Mé xikaha chrókóxrjéhyani chrókjuich'eni kaín nkehe jína kixin tí tsoxrjéhyani la ntá chaxín tsjixraká tí yaon tsjachani ts'áyéheni tí nkehe jína.

¹⁰ Méxra xikaha xráxín chrókjuich'eni nkehe jína la antsí t'ichjánxin chrókjuinkĩsani tí sín kichó ni tinkáchónki Ìnchéni.

Ch'ín Pablo nchexraxinkaon tí sín ntiha la ko kjuixixín nixja ch'án

¹¹ Tsjehérá kixin imá ihyé tí letra tjékjinxian tjaná.

¹² Tí sín tjinkaon ts'etuñhanrá kixin chrókuará xroye la jehí tjinkaon sín tsjikosáyehe sín chojni la tjinkakonhya sín kixin chrókjuasótexín sín tí ntacruz kuènte Cristo.

¹³ Kjónté tí sín tsíka xroye la nchexiteyáhya sín kaín tí nkehe t'etoan tí ley. A ntá tjinkaon sín kixin chrókuará xroye kixin ntá kjaxin sín tsohnke sín kixin tsontáchro sín kixin jahará kjaxinrá tjinkáonrá tsochontará xroye tí cuerpo kuèntará.

¹⁴ A ntá janhan mé tóxrjínahya sintahnke ninkehó. Íchá jína chróntáxrjan kixin Cristo k'uenyákonhenni. A ntá xikaha k'uenxín Cristo tí ntacruz la ntá tí nkehe k'uék'etoan kuènte chjasintajni la kjaxin k'uitjáyan la ko janhan kjaxin kujtoha tí nkehe kuènte chjasintajni.

¹⁵ La ntá ninkehó sínkíhya á tsíka chojni xroye o náhí. Tí nkehe sínkí la chrók'ónani ijnko chojni nixin.

¹⁶ A ntá tí sín ts'áyéhe kjuaxróxin kixin kuikonóehe Dios tí jehe sín la mé kaín tí sín kuítekaon tí nkehe t'etoan ch'án mé kaín tí sín chaxín tsík'óna xjeen ch'án.

¹⁷ A ntá ijie la tjínkakonhya kixin chrók'uekana jie ninkexró. Janhan mé chaxín chonta tí tsíkjatsoenxín tsíchrít'o cuerpo kuèntana kixin kjuasótexinna kixin kujit'aha xra Ìnchéni Jesús.

¹⁸ Kichóni tjáncháha Ìnchéni Jesucristo kixin kjuasáyé ch'án chrókjuincheyaon ch'án kaín rá. Mé xikaha tsoxiteyá. Amén. Ó tjen.

Tí xroon chr'énhen ch'ín Pablo tí sín tjejó chjasin Éfeso

Ch'in Pablo ikjin xroon k'uáyéhe tí nínko chjasin Éfeso

¹ Janhan Pablo tsíkjeýána Jesucristo kixin xikaha tjinkaon Dios tsjàkua itén ch'án. Janhan mé ikjian tí xroon chr'anhánrá tí jahará tjejorá chjasin Éfeso tinkachónkirá Dios la ko títekáonrá Cristo Jesús.

² Tjétjáncháha It'éni Dios la ko Ìnchéni Jesucristo kixin kjuasáyé ch'án chrókjuintayaonrá ch'án la ko chrótjáhará ch'án kjuaxróxin.

Ts'áyéheni tí nkehe jína kuènte Cristo

³ Chjéheni kjuasáya Dios mé It'é Ìnchéni Jesucristo. Jeheni mé tinkáchónkini Jesucristo la mé xikaha jehe ch'án mé kjuíncheyaonni ch'án kixin kaín nkehe jína tixin nkaya nkajní kjuanjon ch'án.

⁴ Dios mé kjueyá ch'án tí jeheni kixin chrókuinkáchónkini Cristo tí naxa t'ónahya chjasintajni. Tjinkaon ch'án kixin chrók'uejóni tí tjen ch'án ntá kjuínchetjóáni ch'án kixin kaín jie kjuatsenhenni ch'án.

⁵ Imá tjuèhe Dios tí jeheni ntá tsíkjeýáni ch'án kixin ts'ónani xjeen ch'án kixin kuinkáchónkini Jesucristo. Mé xikaha tsíkjenkayáxin ch'án kixin xikaha kóxrjínhin ch'án.

⁶ Méxra imá tjancheheni kjuasáya Dios kixin kjuíncheyaonni ch'án kixin ó tinkáchónkini tí Xjeen ch'án, imá tjuèhe ch'án.

⁷ Imá tjuèhe Dios tí jeheni la xikaha kuaáxinni ijnié tí Xjeen ch'án k'uitji la xikaha tsjixín kaín ijiéni.

⁸ Dios kjuakoxin ch'án kixin imá tjuèheni ch'án. Kjuanjon ch'án kaín kjuachaxin kixin chrókuienxínni jína la ko kjuanjon ch'án kjuaxrexinkaon jína.

⁹ Dios kjuínchenoheni tí nkehe jehó ch'án tjenkayáxin ch'án, mé tí nkehe tóxrjínhin ch'án tsoxiteyá.

¹⁰ Tí nkehe tsíkjenkayáxin ch'án la tsoxiteyá tí yaon tsíchrónka ch'án. La ntá jehe ch'án tsjanjon kjuachaxin kixin Jesucristo ts'etuèhenen ch'án kaín xín nkehe sínn nkaya nkajní la ko chjasintajni.

¹¹ Dios kjueyáni kixin chrókuinkáchónkini Cristo la ntá xikaha chrók'uáyéheni tí nkehe tsík'áyéhe ch'án. Kaín tíha la mé xikaha tsonhen éxí tóxrjínhin Dios.

¹² Mé xikaha kjuích'e ch'án kixin ntá jeheni kuítekaonni Cristo saxín chrók'uejóni chrókjuancheheni kjuasáya Dios kixin tí kjuachaxin jie chóna ch'án.

¹³ A ntá kjaxin jahará ó kuinhínrá tí tan jína ntoá chrónka nkexrí tsaáxinni, a ntá ó kuinkachónkirá Cristo. La ntá jnkokoá k'uáyéheni Nchakuen Dios k'ónani xjeen ch'án kixin tinkáchónkini ch'án. Mé xikaha ó xiteyá tí nkehe tsíntáchro ch'án.

¹⁴ Tí Nchakuen Dios kuitonhenni mé kjuínchenoexínni Dios kixin tsakjani kaín nkehe tsjanjon ch'án tió tsaáxin kaín ni tinkáchónkini ch'án. Ntá xikaha kaín ni tsjancheheni kjuasáyé ch'án kixin tí kjuachaxin jie chóna ch'án.

Ch'ín Pablo kjuanchehe Dios kixin antsí chrókónohe tí sín tinkáchónki Ìnchéni

¹⁵ Méxra ó kuínhan kixin imá tinkachónkirá Ìnchéni Jesús la ko imá tjuèhéra kaín tí í so sín tinkáchónki Dios.

16 Ntá janhan nunca t̄it̄ūahya nixj̄ah̄a Dios tjáncháh̄a kjuasáya kíxin ó tinkachónkirá ch'án.

17 Tjénixj̄ah̄a Dios, mé jehe ch'án mé ichr'án Ìnchéni Jesucristo, mé It'éni imá tjetōan la tjétjáncháh̄a ch'án kíxin tsotj̄ahará ch'án kjuaxrexinkaon jína kuènte Nchakuen ch'án kíxin ntá antsí chrókuiénxinrá jína tí nkehe kuènte ch'án kíxin ntá antsí má chróchoxínrá ch'án.

18 Kjaxin tjétjáncháh̄a Dios kíxin tsjinkĩtsa ch'án tsjanjon ch'án ijnko kjuaxrexinkaon jína kíxin ntá t̄sonohará ts'ejochonhénrá kíxin x̄ikaha kjueyará ch'án. La ko t̄sonohará kíxin imá tjetōan tí nkehe sinchek̄it̄onhenni ch'án kíxin jeheni mé tinkáchónkini ch'án.

19 La ko kjaxin tjétjáncháh̄a Dios tsjinkĩtsará ch'án t̄sonohará kíxin tí kjuachaxin kuènte ch'án mé ijnko nkehe imá jié noehyani nketí kjuèxín. Tí kjuachaxièn ch'án mé nchexraxinkaon tí sín tinkáchónki ch'án. Jnkokón tí kjuachaxin chóntani la ko tí kjuachaxin imá jié kjuakox̄in ch'án

20 tió kjuínchexechón ch'án Cristo. Ntá Cristo sákjuí kjuák'etjax̄in ch'án tja chjina tí It'é ch'án itjen nkaya nkajní.

21 Mé x̄ikaha kjuanjon Dios kjuachaxin kíxin Cristo ts'et̄uēnhen ch'án kaín xín gobierno la ko kaín tí sín t'et̄oan. Ijie tjet'et̄uēnhen ch'án kaín xín nkehe siín chjasintajni la ko chr'èx̄in ts'et̄oan ch'án kjaxin.

22 Cristo k'uáyéhe ch'án kjuachaxin ts'et̄uēnhen kaín xín nkehe siín. Jehe ch'án mé ts'et̄uēnhen kaín tí sín k'óna n̄inkoé ch'án.

23 Tí n̄inko mé éxí tí cuerpo kuènte ch'án la jehó ch'án mé t'et̄uēnhen ch'án. Jehó ch'án mé kuènte ch'án kaín xín nkehe siín.

2

Kuaáxinni kjuachaxièn Dios

1 La ntá ijie Dios mé kjuínchek̄it̄onhanrá tí kjuachón jnkochr̄ixín kíxin tinkachónkirá Cristo. Senó la jahará la éxí tsík'enrá kíxin tí jínahya k'uék̄jich'erá la ko tí jie k'uék̄jasinrá.

2 Mé x̄ikaha k'uéchréhérá éxí sítónhen chjasintajni. K'uék̄jinchexiteyéhérá éxí tóxrj̄nh̄in tí nchakuen jínahya t'et̄uēnhen tí xr̄into la ko t'et̄uēnhen kaín xín tí chojni titekakuenhya Dios.

3 Kaínni x̄ikaha k'uék'ejóni tí ósé a nax̄a kjuínchexiteyéheni tí nkehe ntáchro asénni la ko kjuínchexiteyáni tí kjuaxrexinkaon jínahya k'uéchóntani. A ntá tí nax̄a x̄ikahó chrókjuich'eni la Dios imá chrókjuinchekjasóteni éxí tsjasóte tí í so sín.

4 A ntá Dios mé imá kuikonóeheni ch'án la ko imá tjuèheni ch'án.

5 La ntá kjuanjon ch'án tí kjuachón éxí chónta Cristo. Jeheni la éxí chojni tsík'en k'uék'ejóni x̄ikaha kíxin tí jie k'uék̄jasinni. A ntá jie kjuasáyé Dios tsaáxinrá ch'án.

6 Dios mé kjuínchexechón Cristo Jesús la ko kjaxin jeheni tsoxechónni kíxin ts'ejókoni ch'án nkaya nkajní.

7 Mé x̄ikaha kjuích'e ch'án kjuakox̄in ch'án la nax̄a tjetj̄akox̄in ch'án kíxin tjuèheni ch'án la ko kjuínkĩtsani ch'án kíxin tinkáchónkini Cristo Jesús.

8 Kjuasáyé Dios kíxin kuaáxinrá ch'án kíxin tinkachónkirá ch'án kíxin táha la jehya jahórá k'uitjará tíha. Náhi. Táha la mé kjuasáyé Dios kíxin tjáhará ch'án.

9 Kíxin jehya ichrén nkehe jína kjuích'eni kíxin chrókjuinchehnkexínni.

10 Dios mé kjuích'éna tí jeheni ntá chr'èx̄in kjuínkĩtsa ch'án kíxin tsinkáchónkini Cristo Jesús, kíxin ntá chrókjuich'eni tí xr̄a jína kíxin x̄ikaha tsíkjenkayáxin ch'án tí senó a.

Kjuaxróxin tjejóni kíxin tinkáchónkini Cristo

¹¹ Méxra jahará la jehya chojni judíorá. Mé tí sín judío ntak'inrá sín chojni chóntahya tí xroye tí jahará. A ntá tí sín judío, mé tí sín itsa sín xroye cuerpo kuènte sín, mé nchek'in sín asén sín tí chojni chóna xroye.

¹² Xráxinkáonrá kixin tí senó la k'úechonhyará Cristo. Jahará la jehya kuènte tí nación Israel la xikaha k'úechonhyará tí nkehe tsík'etoan Dios la ko tí nkehe tsintáchro ch'án tsjanjon ch'án. Mé xikaha k'uék'ejorá la k'úechonhyará Dios la k'úechoénhyará kixin chrókuaará.

¹³ La ntá ijie la ó tinkachónkirá Cristo Jesús. Jahará tí ósé imá ikjín k'uék'ejorá. La ntá jie la ó kóchjineherá ch'án kixin k'uenyákonhánrá ch'án, k'úitji ijnié ch'án.

¹⁴ Jehe Cristo mé tjejóxinni kjuaxróxin. La ntá tí sín judío la tí sín jehya sín judío ntá jie jnkokoá chrókjuenkayáxin sín kixin k'óna éxí jnkokoá chjasin. Cristo k'óxíka ch'án tí kjuanínkaon éxí ijnko tjat'o k'uinkákonhen.

¹⁵ Jehe ch'án kjuasóte ch'án, la kjuatsen ch'án tí ley. Tí iyó chjasin k'uéjé kjuích'éna ch'án jnkokoá chjasin nixin kixin tinkáchónki sín ch'án. Mé xikaha kjuanjon ch'án kjuaxróxin.

¹⁶ Mé xikaha k'uenyákonhenni ch'án k'uénxín ch'án tí ntacruz la kjuakjìn ch'án tí kjuanínkaon k'uék'ixin tí iyó chjasin k'uékjanjon sín kixin ntá kjuaxróxin ts'ejóko sín Dios la kaín sín jnkokoá k'óna éxí jnkokoá cuerpo kuènte ch'án.

¹⁷ Cristo mé ikui la kjuakohe ch'án kaín chojni tí tan jína kixin kjuaxróxin ts'ejóni kaín ni, mé tí jahará kjónté k'uék'ejorá ikjín tí tjen Dios la ko kjaxin tí sín chjinaxón k'uéjé.

¹⁸ A ntá kjuachaxin kuènte Cristo la kaín ni kjónté jeheni o í so chojni mé tsochjineheni It'éni Dios kixin jnkokoá k'uáyéheni Nchakuen ch'án.

¹⁹ A ntá jahará la í tóyóahyará chojni tsíkjixin ókjé la ko jahará la jehya ókjé chjasin tjejorá. Kaínni la chóntani kjuachaxin kixin kaín ni la tinkáchónkini Dios la kaín ni la k'ónani chojni kjéhya ch'án.

²⁰ Jahará la mé tsík'ónará ijnko nchia tjat'o jie k'óna chrítaón tí xro k'uejo tí sín kjueyá Jesús la ko tí sín tsíchr'án Dios chrónka itén ch'án ósé. La ntá Jesucristo mé tí xro imá t'etoan kuènte tí tjat'o a.

²¹ Tí xrankíxixín mé Cristo la chrítaón k'óna kuénté nchia la tinkák'ánkí tí nchia kixin jína tsjak'e, ntá tsjixraká kixin ts'óna ijnko ninko tjóá kuènte Ìnchéni.

²² Mé xikaha jahará tinkachónkirá Cristo la tsojnkotsérá kaín rá ts'óna éxí ijnko nchia kuènte Dios la ntaha tsjak'exenhen tí Nchakuen ch'án.

3

Ch'ín Pablo k'uáyéhe ch'án tí xra tsjakohe ch'án tí sín jehya judío tí tan jína

¹ Mé xikaha janhan Pablo mé tjechjinaxián tí tjákua itén Cristo Jesús kixin jína ts'ejorá kjónté jehya chojni judío tí jahará.

² Chrókónohará kixin kjuasáyé Dios kjuanjon ch'án tí xra k'uayáha kixin tsjakoará.

³ Dios mé kjuakoxin tí nkehe tjenkayáxin ch'án ninkexró noehya mé kjuínchenóna tíha la ntá xikaha ikjian ijnko xroon kánhyó tsjé nixja k'uayéhérá.

⁴ Tió sìnchekuáxinrá tíha ntá tsonohará kixin ó nóna tí nkehe kuènte Cristo ninkexró k'uénoehya.

⁵ Tí nkehe la ninkexró k'uénoehya tí ósé a. A ntá jie kjuachaxin kuènte Nchakuen Dios la Dios kjuínchenoexín tí sín kjueyá Jesús ch'ehe ch'án xra la ko tí sín chrónka itén ch'án.

⁶ Tí nkehe ninkexró k'uénoehya la tíhi: Kuínhin tí sín jehya judío tí tan jína kixin nkexrí tsaáxin sín la ntá tí sín jehya judío la ó jnkokón ts'áyéhe sín nkehe jína éxí ts'áyéhe tí sín judío. La ntá jnkokoá ts'óna sín tí cuerpo kuènte Cristo la jnkokón ts'áyéhe sín kaín tí nkehe tsíchrónka Dios sinchexiteyá Cristo Jesús.

⁷ Janhan k'uékíteka_{kon}hya, a ntá jie kjuasáyé Dios kjuanjon ch'án tí xra i sít'a kixin tsjàkua tí itén ch'án kixin tí kjuachaxin kuènte ch'án.

⁸ Janhan mé kánhyó tjetooan kixin janhan la imá intsína la kaín tí í so sín tsíkjinchetjóá Dios la antsí tjetooan sín. Kjónté la Dios mé kjuínchekitonna tí xra imá tjetooan kixin tsotjanka tí sín jehya sín judío tí tan jína nkexrí imá tjetooan tí nkehe kuènte Cristo.

⁹ La k'uayáha tí xra tsotjanka kaín xín chojni nkexrí tsíkjenkayáxin Dios tí ósé kixin nijnko nkexro k'uénoehya tíha. Mé jehe ch'án mé kjuích'éna ch'án kaín xín nkehe.

¹⁰ Mé xikaha kónhen kixin ntá tí sín kuènte ninko tsjakuexin sín kaín xín tí sín t'etooan nkaya nkajní kixin tsonohe sín kixin xikaha kaín nkehe jína tsíkjenkayáxin Dios.

¹¹ Kaín tíha kjuích'e Dios éxí tsíkjenkayáxin ch'án ntá Ìnchéni Jesucristo la ó kjuínchexiteyá tíha.

¹² Kjuasáyé Cristo ntá ó chóntani kjuachaxin tsochjineheni Dios kixin tinkáchónkini ch'án.

¹³ Méxra xrjanóahará kixin chrókuitoéhyará chrókuinkachónkirá ch'án kjónté tjetjasótena kixin kaín tíha kónhen kixin jahará chrók'uejoxinrá jína.

Cristo imá tjuèheni

¹⁴ Méxra xikaha tjak'éxian tóch'ian nkayakon It'é Ìnchéni Jesucristo.

¹⁵ Mé tsík'áyéhe ihnié Dios kaín xín chojni tinkáchónki ch'án mé tí sín siín nkaya nkajní la ko tí sín siín chjasintajni.

¹⁶ Tjáncháha It'éni kixin tsjanjon kjuachaxin kuènte ch'án ts'ayéherá kjuachaxién Nchakuen ch'án

¹⁷ kixin Cristo chróchónka asánrá kixin tinkachónkirá ch'án la ntá ntoá chrók'uejorá éxí ijnko nta tsíkji nuèe ninka la chrótjuèherá kíchuará.

¹⁸ Ntá jahará la ko tí í so sín tinkáchónki Ìnchéni mé chrókuiénxinrá nkexrí tonxín la ko kjínxin la ko ninkaxín la ko ntetoxín kixin nkexrí tjuèheni Cristo.

¹⁹ Tjáncháha Dios kixin antsí chrókónohará nkexrí imá tjuèhe ch'án tí jeheni mé antsí má tjuèheni ch'án la tsjachahyani tienxínni kaín tíha. A ntá tí jehe ch'án chrókjuinkitsani ch'án la antsí chrókuiénxínni tí kjuachaxin kuènte ch'án.

²⁰ Ijie la chjéheni kjuasáya Dios kixin jehe ch'án chónka kjuachaxin tsjanjon ch'án antsí má tsjé nkehe que tí nkehe kjuanchiani o tí nkehe kjuenkayáxinni. Mé tsjanjon ch'án kaín tíhi kjuachaxin kuènte ch'án mé tsjinkitsa tí jeheni.

²¹ Kjuasáyé Dios itjen jnkochrín kixin Cristo Jesús kjuínchekaá ch'án tí ninko, mé xikaha ó xiteyá jnkochrín. Amén.

4

Jína chrók'uejókoni kíchó ni kixin chóntani Nchakuen Dios

¹ Janhan mé tjéchjinaxián tí xra kuènte Ìnchéni. Méxra xrjanóahará kixin jína chrók'uejorá kixin xikaha Dios tsíkjeýá tí jahará.

² Méxra chrókjuínchehnkehýará la ko chrókójiahyará la ko chrókójínará chrókóninkákonhyará la ko chrótjuèherá kíchuará.

³ Méxra jína chrók'uejokoará kíchuará kixin chrókjuinkitsa Nchakuen Dios kjuaxróxin chrók'uejorá la ko jnkokoá chrókjuenkayáxinrá.

⁴ Itjen jnkokoá cuerpo la ko itjen jnkokoá Nchakuen Dios la ko Dios k'uíyehé kaín ni kixin jnkokoá nkehe ts'ejóchónhenni.

⁵ Chóntani jnkokoá Ìnchéni la ko jnkokoá nkehe tinkáchónkini la ko ó jnkokoá vez kuíkiteni.

⁶ Itjen jnkokoá Dios la jehe mé It'é kaín chojni. Jehe ch'án mé t'ayakonhen ch'án kaín nkehe la ko t'etuenhen ch'án kaín nkehe.

⁷ Jnkojnkonni k'uáyéheni kjuachaxin sich'eheni Dios xra kixin xikaha kjuanjon Cristo.

⁸ Méxra xikaha nixja xroon itén Dios kixin:
“Jehe ch'án sákjuí ch'án nkaya nkajní la ko sákjuíko ch'án tí sín tjejóchjina, la ntá kjuínchekitonhen ch'án chojni jnkojnko kjuachaxin kuènte ch'án.”*

⁹ ¿Ntá nkexrí t'axrjexín kixin sákjuí ch'án? Tíhi mé t'axrjexín kixin jehe ch'án mé senó k'uínkajinxin ch'án nkaya nkajní la kjuák'e ch'án chjasintajni.

¹⁰ Jehe ch'án mé k'uínkajinxin ntiha mé ntá jie sáxíkji ch'án tí nkajní imá noi. La ntá tjet'etuenhen ch'án kaín xín nkehe.

¹¹ Jehe ch'án mé kjuínchekitonhen ch'án ijnko kjuachaxin jnkojnko chojni. Kjueyá ch'án iso chojni k'óna apóstol la ko í so sín tsochrónka sín tí nkehe kjuínchenohe sín Dios la ko í so sín tsochrónka sín tí tan tsaáxinni. La ko kjueyá ch'án í so sín ts'óna pastor la ko í so sín tsjako sín itén ch'án.

¹² Mé xikaha tí xra k'uáyéhe tí sín kjueyá ch'án kixin sich'ehe sín ch'án xra kixin ntá ts'ánkí tí sín k'óna tí cuerpo kuènte Cristo.

¹³ Ntá xikaha kaín ni jnkokoá tsinkáchónkini tí Xjeen Dios la ko tsochóxinni ch'án jina kixin ntá xikaha ts'ónani chojni ntoá nchexiteyá la ko chrókónoheni éxí nkexrí tjinkaon Cristo.

¹⁴ Méxra chrók'ónahyani éxí xjan ntsíntsí. Tí xjanntsí la xrahya tsjinkí kjuaxrexinkaon éxí ijnko nkehe sákjuíko xrinto xikaha kixin sich'iyehé sín chojni ijnko nkehe nixin la xrahya titekaon sín. Tí chojni ch'ia tjinkaon sín tsjachroeni sín í jnko ntia ntoáhya kixin chrok'uitjáyenheni Cristo ntá chrókjuasinni jie.

¹⁵ A ntá íchá jina chrónixjani tí nkehe chaxín ntoá la kaín asénni chrótjuèheni kichó ni ntá xikaha chrókónoheni kixin xikaha tjinkaon Cristo. Jehe ch'án mé tí kja t'etuenhen tí cuerpo kuènte ch'án.

¹⁶ A ntá kjuachaxién Cristo kuenté tí cuerpo, tí ch'e xra jnkokón la tjinkitsa kuenté. Ntá jnkojnkonni jina ch'eni xra la mé xikaha ts'ánkí tí xra kuènte ch'án la mé jina chrótjuèheni kichó ni.

Tí kjuachaxin nixin kuènte Cristo

¹⁷ Tíhi mé ntáxrjan la ko tétuanhanrá kjuachaxién ihnié Ìnchéni. Ijie la chrók'uejohyará éxí ch'e tí sín chónhya Dios. Kaín nkehe tjenkayáxin sín la ntoáhya tíha.

¹⁸ Tí nkehe tjenkayáxin sín la sítié la chónhya sín tí kjuachón tjanjon Dios kixin tienxínhya sín kixin chrohya tsitekaon sín Dios.

¹⁹ Ó tsíkjinchek'itjayan sín tí kjuaxrexinkaon kuènte sín la í tósuèhya sín chrókjuasin sín jie. Imá tóxrjínhin sín chrókjuich'e sín kaín nkehe jínahya.

²⁰ A ntá jahará xikahya xrakohará tí nkehe kjuako Cristo,

²¹ tí chaxín kuinhínrá kuènte ch'án la ko tsíxrakohará tí nkehe chaxín ntoá kuènte ch'án.

²² Méxra tìtohérá tí kjuaxrexinkaon ntaxin k'uékjenkayáxinrá ósé k'uék'ejorá mé ijnko nkehe jínahya naxa t'ayahará.

²³ Jahará t'ichjánxin kixin chrókónixin tí kjuaxrexinkaon kuéntará la ko tí nchakuanrá.

²⁴ Méxra chrókuákjára tí kjuaxrexinkaon nixin kjuích'éna Dios xikaha tjinkaon ch'án la ntá chrókjuákoxinrá ijnko ntia jina ntoá.

* 4:8 Salmo 68.18

25 Méxra chrókuiṭohérá tí kjuach'ia. Méxra jnkojnkora chrónixjehérá kichuárá ntoá kixin kaín ni tsík'ónani jnkokoá cuerpo.

26 Tí chrókóninkáonrá la chrókjuásinhyará jię la chrókóninkákonhyará kuente yaon.

27 Chrókuiṭohéhyará kixin Tsochren chrókjuít'ayahará.

28 Tí jnkójnra kuęerá la ṭiṭohérá kjuacheę. Íchá jína kixin itjára chrókjuich'exínra xra kixin tsochontará chichaon sinchekṭonhénra jnkójn nkexro t'ichjánxinhin.

29 Nixjahyará tí nkehe náxrjónhya. Nixjará ijnko tan jína kixin tsjinkṭsará ts'ánki kjuaxrexinkaon kuente kichuárá la xikaha tsjinkṭsará tí sín tjejótinhin.

30 Nchek'ávahyará tí Nchakuen Dios kixin tíha mé k'uayéxinra éxi ijnko xroye kixin tsonoaxínra kixin jahará mé tinkachónkirá Dios la ko tsochónhénra tí yaon itsi ch'án ntá tsjintaxín tsaárá.

31 Ṭiṭohérá tí kjuanínkaon chontará la ko ṭiṭohérá tí nkehe ntoáhya tjenkayáxinra la ko ṭiṭohérá tí kjuanṭon la ko kaín nkehe jínahya.

32 A ntá chrókójinará chrókuiṭonóhéhérá kichuárá. Sinchek'itjáyenhénra ijié kichuárá kixin Dios kjuatsen tí jię chontará kixin tinkachónkirá Cristo.

5

Jína chrók'uejó tí sín k'óna xjeen Dios

1 Jahará ó k'óna xjeen Dios la tjuahará ch'án. Méxra chrókóxakonhanrá chrókjuákoxinra éxi kjuakoxin tí jehe ch'án.

2 Chrótjuéhérá kichuárá éxi Cristo tjuèhe tí jeheni kixin jehe ch'án la k'uenyákonhenni ch'án, éxi yóhe ijnko kolélo xikaha kjokehe sín Dios la kóchéhe Dios k'uáyéhe ch'án tí xraxé náxrjón.

3 Ntá jahará mé tsík'ónará chojni kuente Dios la ntá chrónixjahyará kuente í jnko chojni chjin ókjé chrókjuásinkoará jię la ko chrókjuenkayáxinhyará ninkehó nkehe náxrjónhya la ko chrókjuakéhya asánra tí nchónhya nkehe chróchontará.

4 Chrónixjahyará ijnko nkehe náxrjónhya o ijnko nkehe chónkó o ijnko nkehe tjuáhya kixin jehya kuente Cristo tíha. Íchá jína antsí má chrókjuancheherá Dios kjuasáya.

5 Ó nohará kixin tí nkexro tjasinko jię í jnko chojni chjin ókjé la ko tí nkexro ch'e tí nkehe tjuáhya la ko tí nkexro tjak'e asén sín tí itsjé nkehe chróchóna sín la mé tíha ó yóhe tí nkexro tinkáchónki nkehe tsíkjanoya xikaha. Mé tí nkexro xikaha ch'e mé tsjachahya ts'ixenhen tí tjet'etqan Cristo la ko Dios.

6 Méxra tjánjonhyará kjuachaxin sit'ayahará ninkexró chrónka tí nkehe chónkó. Méxra xikaha ntá itsi tí kjuanínkaon kuente Dios la tsjasóte tí sín titekakuenhya sín tí jehe ch'án.

7 Méxra chrók'uitohyará tí sín xikaha ch'e.

8 Senó la k'uék'ájirá ntia sítié. A ntá ijie ó k'ónará chojni kuente Ìnchéni la ó xritjejorá tí ntia t'inkaséyan kuente ch'án. Méxra tjenkayáxinra jína éxi tí sín xritjejó tí ntia t'inkaséyan.

9 Tí t'inkaséyan t'axrjeníxin kaín nkehe jína la ko tí nkehe chaxín la ko tí nkehe ntoá.

10 Tóxakonhanrá chrókjuich'erá tí nkehe tóxrjínhin Ìnchéni.

11 Tankiéhyará tí sín ch'e xra náxrjónhya mé tí sín a ch'e xra tí sítié. Íchá jína tsjákoxinra tí xra tí itjen tí t'inkaséyan.

12 Chrókósuèhēni chrónixjani kuente tí nkehe imó ch'e tí sín jínahya.

13 Tí t'inkaséyan mé tsonoxíxin kaín xín nkehe la mé tí xrohi ts'ikonxínni jína kaín nkehe.

14 Mé xikaha ntáchro xikihi:
T'àya jaha tjéchrian t'inkatjenxian tí síin tí sín tsík'en.
Cristo mé tjetjoka xrohi.

15 Méxra imá chrókóxakonhanrá jnkójina chrók'uejorá. Jehya éxí tí sín noehya chrók'uejorá. Náhi. Chrók'uejorá éxí ijnko chojni nohe má.

16 Chrókóxakonhanrá chrókjuich'erá xra tí jie kixin itsi ijnko yaon jínahya xitjahya sich'erá xra.

17 Chrókólontihyará. Chrókóxakonhanrá chrókuiénxinrá tí nkehe tóxrjínhin Ìnchéni.

18 Chrókókoanhyará kixin tíha mé chrók'uitjáyanxínrá. Íchá jína chrókjuánjonrá kjuachaxin chrók'uetuanhanrá Nchakuen Dios.

19 Chrónixjexínrá kichuára tí salmo la ko tí himno la ko chrótsjerá la xikaha kaín asánrá chrókjuancheherá kjuasáyé Ìnchéni.

20 Jnkochrín chjehérá kjuasáya It'eni Dios kixin kaín nkehe kjuanjon ch'án la ko chrókjuanchaxínrá kjuasáya kjuachaxiэн ihnié Ìnchéni Jesucristo.

Jína chrók'uejókoni tí sín kjéhyaní kixin tinkáchónkini Ìnchéni

21 Títékákonhénrá kichuára kixin ó tinkáchónkirá Ìnchéni.

22 Tí chojni chjin chrókjuinchexiteyéhe xì sín éxí nchexiteyéhe sín Ìnchéni.

23 Tí chojni ntoa chóna kjuachaxin ts'etuenhen ichjién éxí Cristo mé ikja t'etuenhen tí nínko. Kjaxin jehe ch'án kjuínchekaá ch'án tí nínko, mé tí cuérpóé ch'án.

24 Méxra éxí tí nínko nchexiteyéhe Cristo mé xikaha kjaxin tí chojni chjin chrókjuinchexiteyéhe tí xì.

25 Tí chojni ntoa chrótjuèhe tí ichjién kixin éxí Cristo la tjuèhe tí nínko la k'uenyákonhen ch'án.

26 Mé xikaha kjuích'e Cristo kixin sinchetjóá ch'án tí nínko mé kjuínchetjuáxin ch'án tí nta kuíkitexín sín kjuachaxiэн itén ch'án.

27 Ntá tsjanjon ch'án tí jeheni éxí ijnko nínko imá jína chóntahya jie la ko chóntahya ninkehó nkehe náxrjónhaya, mé ijnko nínko tjóá la ko ntoá.

28 Mé xikaha tí chojni ntoa chrótjuèhe tí ichjién sín éxí tjuèxín ch'án cuérpóé ch'án. Tí nkexro tjuèhe ichjién mé kjaxin tjuèhe asén ch'án.

29 Kohya ninkexró nínkakonhen tí cuerpo kuènte. Kaín chojni la ine sín la t'ayakonhen sín cuérpóé sín la mé xikaha Cristo t'ayakonhen tí nínko.

30 Kaínni mé k'ónani cuerpo kuènte ch'án. Jeheni mé ntóe ch'án la ko huésóé ch'án.

31 Ntáchro kixin: “Méxra ijnko chojni ntoa mé tsítóhe it'é la ko ìné kixin tsakja ichjién la yóí sín mé ts'óna éxí jnkokoá chojni.”*

32 Tíhi mé ijnko nkehe imá jie tienxínhaya ninkexró. Mé janhan xrjanka kuènte Cristo la tíha mé nínkoé ch'án.

33 Méxra kjaxin tjéxrjanka kixin chojni ntoa t'ichjánxin tsotjuèhe ichjién sín éxí tjuèxín asén sín la tí chojni chjin chróchónthehe sín kjuasáya tí xì sín.

6

1 Jahará chánjanrá la t'ichjánxin sinchexiteyéherá it'ará la ko ìnará kixin tjuèherá Ìnchéni kixin tí xikaha mé jína.

2 Tí nkehe saoxín tsík'ítuenhenni kixin chrókuitekaonni ntá chrókjuanjon Dios nkehe mé tíhi: “Chrókjuíkosáyehé it'ará la ko ìnará

3 kixin mé náxrjón chrók'uejorá la isé chrók'uejorá ntihi chjasintajni.”*

* 5:31 Génesis 2.24 * 6:3 Éxodo 20.12; Deuteronomio 5.16

4 Jahará it'é xjan la chrókjuinchekónínkakonhyará tí xjaanrá. Íchá jína kixin sìnchek'ánkixinrá xjaanrá ijnko kjuaxrexinkaon jína kixin ts'ánkixin xjan tsinkáchónki xjan Ìnchéni.

5 Jahará chojni ch'e xra mé chrókuítekákonehénrá tí lámóará ntihi chjasintajni la chróchontehérá sín kjuasáya. Sích'eherá sín xra éxi ch'eherá xra Ìnchéni Cristo.

6 Chrókjuich'erá xra jína la jehya kixin tí tjejó sín tjejótsjehe sín kixin ntá xikahó ntá jína chrók'uejoxinrá. Náhi. Éxi ch'eherá xra Cristo kaín asánrá sích'erá xra kixin mé xikaha tóxrjínhin Dios.

7 Kaín asánrá chrókjuich'erá xra éxi ch'eherá xra Ìnchéni la jehya éxi chojni ó chrókjuich'eherá xra.

8 Ó nohará kixin jnkojnko nkexro kjónté ch'exón xra o kjónté chojni t'ítuenhya mé jnkojnko sín ts'áyéhe sín tí nkehe tsjanjon Ìnchéni kixin nkexrí tí xra jína kjuích'e sín.

9 Tí jahará chojni lamó mé jnkojína chrókuétuēnhénrá tí sín t'ahará xra la séchrókóninkákonehénrá sín. Xrácinkáonrá kixin jahará la ko jehe sín mé jnkokón chrókjuinchexiteyéhérá Ìnchéni itjen nkaya nkajni kixin kaín chojni la jnkokón t'íkon ch'án.

Tí nkehe tjinkitsa t'ayakonhen tí sín tinkáchónki Ìnchéni

10 A ntá jie kichó ni, nchefuerte asánrá kixin tjejókoni Ìnchéni la tjetóan tí kjuachaxin kuente ch'án.

11 Chrókuaáxinrá kaín tí kjuachaxin tsjanjon Dios kixin ntá xikaha jína chrók'uejorá la chrókjuít'ayahará Tsochren.

12 Jehya tjanjonkoni chojni tsík'óna into la ko hueso. Náhi. Jeheni tjanjonkoni kaín tí nchakuen tí jínahya siín chjasintajni. Tíha mé tjinkaon chrók'uejóan tí chjasintajni sítié.

13 Méxra chrókuákjára kaín tí kjuachaxin kjuanjon Dios kixin ntá chrókjuachará tí itsi tí yaon jínahya ntá tí xikaha chrókjuich'erá la chr'éxin la jína chrók'uejorá.

14 Nchefuerte asánrá. Jína chrók'uejorá. Chrókuítekáonrá tí itan chaxín kixin tí nkehe ntoá mé chrók'uyakonhanrá.

15 Méxra listo chrók'uejorá sátsjichronkara tí tan tjanjon kjuaxróxin.

16 La antsí tjetóan chrókuinkachónkirá Ìnchéni. Tíha mé chrok'uinkákonehén tí chica flecha tsochr'án Tsochren.

17 Tí chrókuaáxinrá la táha éxi yóhe ijnko chica casco t'ayakonhen ikja chojni la tí itén Dios la éxi yóhe ijnko chica espada mé tjanjon Nchakuen Dios.

18 La ko kjaxin chrókuítóéhyará chrónixjehérá Dios la jnkochrín chrókjuanchehérá ch'án kaín nkehe t'ichjánxinhanrá la chrokjuanchatóxixínrá Nchakuen ch'án. Chrók'uejotsjehérá la chrókjuanchiará kixin tsjinkitsa Dios kaín tí sín tinkáchónki ch'án.

19 Chrónóhéhérá ch'án kixin kjaxin janhan tsjinkitsana ch'án tsjanjon ch'án tí tan t'ichjánxin tsoníxja janhan kixin ntá janhan antsí jína chrónixja kixin ntá tsinhin sín tí nkehe ninkexró k'uénoehya kixin nkexrí tjen tí itén ch'án tsaáxin chojni.

20 Dios mé ichr'ánna tsoxrjanka tí itén ch'án, mé xikaha tjéchjinaxián ijie. Nixjehérá ch'án kixin jína tsoxrjankaxián tí itén ch'án la ko ninkexró tsochrakuanhya.

Kjuixixín nixja ch'ín Pablo

²¹ Kíchóni Tíquico, tí nkexro imá tjuèheni la ko xráxín ch'ehe xra Ìnchéni mé tsochenkará ch'án tí jahará nkexrí tjén la ko nkexrí tí xra tjét'a.

²² Mé xíkaha tétuanhan ch'án sátsjitsjehe ch'án tí jahará kixin tsochrónka ch'án nkexrí tjejóni la xíkaha chrókócháhará.

²³ Tjáncháha It'éni Dios la Ìnchéni Jesucristo kixin tsochjéhe ch'án kaín kichó ni kjuaxróxin kixin tsotjuèhe kichó sín la ko tsinkáchónki sín ch'án.

²⁴ La ko kjuasáyé tí jehe ch'án sincheyaon ch'án kaín tí sín chaxín tjuèhe Ìnchéni Jesucristo. Mé xíkaha tsoxiteyá. Amén. Ó tjen.

Tí xroon ikjin ch'ín Pablo chr'énhen ch'án tí sín síin chjasin Filipos

Ch'ín Pablo ikjin xroon k'uáyéhe tí nínko chjasin Filipos

¹ Janhan Pablo la ko Timoteo ch'ehe ni xra Jesucristo, mé ikjinni tí xroon i chr'anhánrá kaín tí jahará kichó ni tinkachónkirá Cristo Jesús tjejórá chjasin Filipos la ko tí sín t'etoan kuènte nínko ntiha.

² Tjanchiani kixin It'eni Dios la ko Ìnchéni Jesucristo kjuasáyé ch'án imá chrókjuincheyanonrá ch'án la ko chrók'uayéhérá kjuaxróxin.

Ch'ín Pablo tjechrónóhe ch'án Dios kixin tí sín tinkáchónki Jesús ntiha

³ A ntá tió xráxinkavan tí jahará la imá tjahá Dios kjuasáya

⁴ la ko níxjahá Dios la imá chàna tjáncháha ch'án kixin tsjinkitsa ch'án kaín tí jahará.

⁵ Jahará la kjuínkitsará tió kjuàkua tí tan jína tí saoxín kuinhínra itén Dios la naxa tjejtjinkitsará ijie.

⁶ Ó nòna chaxín kixin xikaha Dios ó kjuankixin ch'án ch'e ch'án xra jína kixin kuítékáonrá mé xikaha naxa tsjintaxín sich'e ch'án tsjixrakájia tí yaon tsokjan Jesucristo.

⁷ Jína kixin tjenkayáxian kuènte kaín tí jahará. Méxra xikaha imá tjuahará. Jahará la ko janhan la jnkokón kjuachaxin k'uáyéhe ni la kjónté janhan tjéhjina o itjén tí tjejó tí sín t'etoan tjéxrjanka kixin jína tí tan tsaáxinni.

⁸ Dios la ó nohe kixin imá tjínkavan chrók'uíkuan kaín tí jahará kixin éxi tjuàxinrá Cristo.

⁹ Tjáncháha Dios kixin tsjinkitsa ch'án tí jahará kixin antsí má chrótjuéhérá ch'án la ko chrók'uánkí tí kjuaxrexinkaon kuéntará kixin antsí chrókuiénxinrá kaín nkehe.

¹⁰ La ntá chrókónohará chrókuákjára tí nkehe jína. A ntá tí xikaha chrókjuich'erá la jína tjóá chrók'uejórá la ko kohya nkehe chrókjuanchia jie tió tsokjan Jesucristo.

¹¹ Méxra jahará chrókjuich'erá xra jína éxi ijnko nkehe jína chrók'óna kixin kjuasáyé Jesucristo la ntá xikaha la chrókjuikosáyehérá Dios.

A ntá janhan la tjéhonxian Cristo

¹² Kichóni tjínkavan tsonohará kixin tí nkehe kjuasótexinna la kjuínkitsa kixin kuínhin chojni tí itén Dios tsaáxinni.

¹³ Kaínxín tí chojni síin palacio la ko kaín tí í so sín mé nohe sín kixin tjéhjinaxián kixin tinkachónkia Jesucristo.

¹⁴ A ntá tí tjéhjina la itsjé tí sín kichó ni antsí má kóxrjínhin sín tjako sín itén Ìnchéni la í chrakonhya sín tinkáchónki sín ch'án.

¹⁵ A ntá chaxín iso sín níxja sín itén Cristo kjánchó chjinoxínhin sín kixin tjinkaon sín chrókjuachaxinna sín. A ntá í so sín tjako itén ch'án kixin tjinkaon sín jína chrókjuinkitsana sín.

¹⁶ Kjánchó iso sín tjinkaon sín chrókjuako sín kixin chrókjuacha sín la ntá kénhya asén sín tjako sín. Mé xikaha ch'e sín kixin tjinkaon sín chrók'uekana sín antsí má jie kixin naxa tjéhjina.

¹⁷ La í so sín níxja sín kuènte Cristo kixin tjuèhe sín ch'án la ko tjuana sín la ó nohe sín kixin ntihi tjén kixin tsqxrjanka tí itan tsaáxinni.

18 Kjánchó ántosenná kjónté á chaxín kaín asén sín tjako sín o náhí, la imá chàna kixin chrónka sín tí tan jína kuènte Cristo la antsí má chéhe asenná.

19 Ó nòna janhan kixin kjónté kaín nkehe tsonna la kjónté xikaha la tsaáxinna kixin kjuasáyará jahará tjejónixjehérá Dios la ko tí Nchakuen Jesucristo mé tjetjinkitsana.

20 Jína tjechõnhan kixin Dios la tsítóehya tí janhan kixin ichrén nkehe jínahya chrókóna. Tjínkavan tsochonta kjuachaxin kixin jína tsonixja kaín asenná nkayakon chojni. Ntá xikaha senó la xikaha ijie tió ts'ikon chojni tí janhan la tsonoexín sín kixin Cristo imá chõnta kjuachaxin kjónté á naxa tjechuã o á ó tsík'ena.

21 Kixin janhan na Cristo tjechõnxian la ntá kjónté ts'énxian xikaha la mé chrókjuácha.

22 A ntá tí naxa tsjak'é naxa tjechuã ntá naxa jína sit'aha Ìnchéni xra. Nonahya nkehe tí chrókuákjaá, á chrók'uén o á chrókjuak'échuã.

23 Imá xra chrókjuenkayáxian chrókuákjaá tí yaá nkehe. Janhan na tí chrók'uén la chrókjuak'ékian Cristo. A ntá janhan la ntáxrjan kixin íchá jína tíha.

24 Kjánchó t'ichjánxin naxa chrókjuak'é kixin naxa chrókjuínkítsa tí jahará.

25 Méxra ó nòna kixin naxa tsitõna tí tjejorá kixin chrókjuínkítsa tí jahará kixin ntá antsí chrókónohará la chrókócháhará kixin jína chrókuinkachónkirá Ìnchéni.

26 Ntá tió tsjasán janhan ts'ejóni inaá la imá tsocháhará la tsjanchehérá kjuasáyé Jesucristo.

27 A ntá jahará chrókjuákoxinrá chrók'uejorá jína éxí ntáchro tí tan kjuákoxin Ìnchéni Cristo. Mé xikaha tí tsjasántsjahará o náhí la tjínkavan chrókuínhan kixin naxa imá tinkachónkirá Cristo la ko jnkokoá tjenkayáxinrá la ko jnkokoá tjejoch'erá xra tjàkorá tí itan jína tsaáxinni.

28 Chrókuítóéhyará kixin tí sín nínkakõnhanrá chrókjuintachrakõnrá sín. Tí xikaha chróchrakonhyará la chrókónoexín sín kixin ts'itjáyan sín, a ntá chrókónoxín kixin jahará mé chaxín tsaará. Tíha mé Dios tsjinkitsará.

29 Ó kuítõnhanrá tí kjuachaxin kixin tsinkachónkirá Jesucristo la ko kjaxin kuítõnhanrá kjuachaxin tsjasótiaxínrá kixin jahará mé tinkachónkirá ch'án.

30 Jahará la ko janhan jnkokón ch'eni xra. Jahará ó k'uikonrá senó nkexrí kjuít'a xra la ó kuinhínrá ijie kixin naxa tjet'a xra kjónté nínkakõna sín.

2

Kuítóhe Jesús tí kjuachaxin chrók'uetõan ch'án ntá ijie imá tjetõan ch'án

1 Tí chaxín tí Cristo nchexraxinkaonrá la tí chaxín Cristo tjuàhará ch'án nchecháhará ch'án la tí chaxín tí Nchakuen ch'án xrikoará la tí chaxín nohará kixin tikonóahará ch'án

2 la nchechànará kixin jnkokoá chrók'uejokoará kichuárá la ko jnkokoá chrótjuèhéhá kichuárá la ko jnkokoá chrókjuenkayáxin nchakuanrá la ko jnkokoá xra chrókjuich'erá.

3 Chrókjuenkayáxinhyará chrókuétoanrá la ko chrókjuínchehnkehyará. Náhí. Chrók'ónará chojni t'etõanhya. Chrók'uikonrá éxí antsí tjetõan tí í so sín, a ntá kánhyó tjetõan tí jahará.

4 Ninkexró chrókjueyá tí nkehe kuènte jehó. Náhí. Chrókjuéyará tí nkehe chrókjuínkítsa tí í so chojni.

5 Jahará chrókjuenkayáxinrá éxí kjuenkayáxin Cristo Jesús.

6 Jehé ch'án chõnta ch'án kaín kjuachaxin kuènte Dios la kjónté xikaha la tjinkakonhya ch'án chrókjuíncheyóhé ch'án éxí Dios.

⁷ A ntá kuítóhe ch'án ntáha tí kjuachaxin k'uéchónta ch'án la k'óna ch'án ijnko chojni ntoa chjasintajni la ko kjuích'e ch'án xra.

⁸ La éxí ijnko chojni k'uetóanhya kjuák'e ch'án la kjuínchexiteyéhe ch'án Dios kaín asén ch'án kixin ik'uén ch'án, mé k'uénxin ch'án tí ntacruz.

⁹ Méxra Dios imá kjuikosáyehe tí jehe ch'án la ko kjuínchek'in ch'án ijnko ihnié imá tjetóan.

¹⁰ Kixin ntá tsinhin kaín chojni tí ihnié Jesús ntá ts'ejóxin toch'in sín, mé tí sín síin nkaya nkajni la ko ti sín síin chjasintajni la ko tí chojni síin chrínkí nche.

¹¹ La ko kaín xín chojni tsochrónka sín kixin Jesucristo mé Ìnché sín mé xikaha tsjikosáyehe sín It'éni Dios.

Tí sín tinkáchónki Cristo tóyóhe éxí xrohi t'inkaséyanxín chjasintajni

¹² Jahará kichó ni imá tjuahará la xráxín kjuínchexiteyànará tí k'uék'ejóni. A ntá ijie la chrókjuínchexiteyànará kjónté ikjín tjén. Chrókuítóéhyará tí nkehe tsjanjon kjuachón la chrók'uayakonhénra jnkojína

¹³ kixin Diosntaxraxinkaonrá sích'erá tí nkehe jína tjinkaon ch'án.

¹⁴ Kaín xra ch'erá la chrókóninkákuénhyará kichuára la ko chrókjóntahyará kichuára

¹⁵ kixin tsokohya ninkexró tsontáchro kixin jahará la chontará jie. Kixin jahará la mé tí xjeen Dios chróchontahyará jie, la tjejorá tí síin tí sín jínahya tjasin jie. Na ntá jahará chrók'uinkaséyanxín tí jehe sín éxí tí konotsé t'inkaséyanxín tí chjasintajni sítié.

¹⁶ Méxra jahará chrók'uayakonhénra jína tí tan tjanjon kjuachón. Tí xikaha chrókjuínchexiteyárá jnkojína ntá tió tsi Cristo tsochéhe asenná kixin xikaha xra tjejoch'erá kixin ntá tsonóna kixin jehya ó chónkó kjuak'ékjit'a xra.

¹⁷ Kjónté chrók'uénxián la éxí nkehe chrókjuanchatóxixínra Dios chrók'uikonra tí janhan. Mé xikaha chrókjuintaxín tí nkehe chróchjehérá ch'án kixin tinkáchónkirá ch'án, la ntá mé janhan mé tsochána la ko tjínkavan kixin kaín rá xikaha chrók'uayéhérá kjuachéhe.

¹⁸ Méxra chrókócháhará jahará kjaxin la chrók'uayéhérá éxí tí kjuachéhe chonta.

Ch'ín Timoteo la ko ch'ín Epafrodito

¹⁹ Chonhan kixin tí tsjanjon Ìnchéni Jesús kjuachaxin ntá tjoka tsochr'an ch'ín Timoteo tsjijitsjehe ch'án tí jahará kixin ntá tsochána tsinhan nkexrí tjejorá.

²⁰ Kohya í jnko nkexro chrókjuenkayáxin éxí tí janhan la ko chrókóxakonhen kixin jahará chrók'uejorá jína.

²¹ Kaín tí í so sín tjejá sín tí nkehe tóxrjínhin sín ó la jehya tí nkehe tóxrjínhin Jesucristo.

²² A ntá jahará ó nohará kixin ch'ín Timoteo ó kjuakoxin ch'án kixin jína asén ch'án kixin jehe ch'án kjuít'akian ch'án xra kjuakoni tí tan jína. Éxí ijnko xjanna xikaha kjuínkítsana ch'án.

²³ Mé xikaha tjínkavan tsochr'an ch'án tsjijitsjehe ch'án tí jahará tió tsonóna nkexrí tsji tí xra kuéntana.

²⁴ La ko kjaxin chonhan kixin Ìnchéni tsjinkítsana kixin tjoka tsjasán kjaxinna.

²⁵ A ntá kjaxin tónhen asenná kixin t'ichjánxin tsochr'an kichó ni Epafrodito tsjiji ch'án tí tjejorá. Jehe ch'án mé jnkokoá ch'ekoni ch'án xra kjónté nínkakhenni chojni. Jahará k'uéchr'anra ch'án ntihi kixin jehe ch'án tsjinkítsana ch'án kaín nkehe tjínkavan.

²⁶ Imá tóxakonhen ch'án tsjijitsjehe ch'án tí jahará kixin ó nohe ch'án kixin tsíkinhínra kixin k'uéníhi ch'án.

²⁷ Chaxín k'uéníhi ch'án ó mero chrók'uen ch'án, a ntá Dios kuikonóehe tí jehe ch'án kjánchó jehya jehó ch'án, kjaxin kuikonóna Dios tí janhan kixin kánhyó chrók'uavá.

²⁸ Méxra tjínkavan tsochr'an ch'án kixin ó nòna kixin tsocháhará ts'ikonrá ch'án inaá la ko xíkaha janhan í kánhyó chrók'uavá.

²⁹ Imá chrókócháhará chrókjuiji ch'án kixin jehe ch'án mé ijnko kichó ni tinkáchónki Ìnchéni la ko chrókjuikosáyehérá ch'án éxi chrókjuikosáyehérá kaín tí í so sín éxi jehe ch'án.

³⁰ Jehe ch'án ó mero chrók'uenxín ch'án tí ch'ehe ch'án xra Cristo. Mé siín kjuaxikaon chrók'uenxín ch'án kixin jehe ch'án kjuínkítsana ch'án kixin jahará xitjahya ts'inkará tsjínkítsará tí janhan.

3

Tí nkehe chaxín sínki

¹ A ntá ijie, kichó ni, chrókócháhará kixin jahará la kuènte Ìnchéni. A ntá tí janhan la xrahya tsokjatee tsokjian tí nkehe ó kjian kixin tíha la chrókjuinkítsa tí jahará.

² Chróchontará cuidado ti sín ch'e jínahya éxi koniá la tóchrít'o sín cuérpóé sín.

³ A ntá tí chojni chaxín chóna xroye la mé tí jeheni kixin jeheni chaxín xraxinkakonxínni Dios kjuachaxién Nchakuen ch'án la ko imá chéheni kixin tinkáchónkini Ìnchéni Jesucristo. Jehya kixin chrókuinkáchónkini kixin tí cuérpóeni chrókóchrínjinni.

⁴ A ntá janhan kjaxin jína chróntáxrjan kixin chrókóchrít'o tí cuérpóé chojni. Ninkexró antsí chróchóna kjuachaxin kixin chrókuitekaon tí nkehe a.

⁵ Janhan mé tsíkana xroye tí k'uéchonta ijní yaon la ko janhan mé tikiníxian tí sín israelita la tsík'axrjeníxinna tí sín tsík'axrjeníxin ch'ín Benjamín la kjaxin janhan mé hebreo la ko t'aná la naná la hebreo sín. La ko janhan mé tinkáchónkia tí ley éxi tinkáchónki tí sín fariseo.

⁶ A ntá imá k'uénínkakonhan k'uéchonkíha tí sín tinkáchónki Jesús la ko imá kjuíntaxiteyáha tí ley la kohya ninkexró tsontáchro kixin chaxínhya tíha.

⁷ Ntá kaín tíha la tí ósé k'uékjenkayáxian janhan kixin sínki tíha, a ntá ijie la tinkáchónkia Cristo la ntá tí nkehe k'uékóxrjinná k'uékjit'a la ntá jie la ninkehó sínkíhya.

⁸ La kjaxin kaín xín nkehe t'íkuan éxi chónkó tíha kixin antsí má tjetoan tsochoxián Ìnchéni Jesucristo. Kaín kjuaxrexinkaon jínahya k'uéchonta la kjuíntak'itjayan kixin ijie ó tinkáchónkia Cristo la kaín xín tí nkehe k'uéchonta la t'íkuan éxi chjíninó ó kixin ntá xíkaha jína chrókjuak'ékian Cristo.

⁹ Chrókóchána kixin jnkokoá chrók'uejókoni ch'án. Tjeyáhya kixin tí ley chrókjuínxín ijíeni tí chrókjuinchexiteyéhéni. Náhi. Tinkáchónkia Cristo la tsaáxinni kixin Dios la tsjakjin tí ijíeni kixin tinkáchónkini ch'án.

¹⁰ Tí nkehe tjínkavan na tsochoxián Cristo la ko tsochonta tí kjuachaxin kjuakoxin ch'án tió xechón ch'án la ko tjínkavan tsjasótexinna éxi kjuasóte ch'án la ko kjónté chrók'uénna éxi k'uénxin ch'án

¹¹ kixin ntá tjínkavan tsjácha tsoxechónna inaá.

Ch'ín Pablo tjínkaon chrókjuacha ch'án

¹² Ntáxrjanhya kixin kjuácha kaín tíha la ko ntáxrjanhya kixin imá ntoá tjén. Kjánchó janhan tjínkavan tsjácha kaín tíha kixin Cristo Jesús mé kjueyána ch'án senó xíkaha.

¹³ Kíchóni, ntáxrjanhya kixin janhván kjuácha tíha. Náhi. Janhan mé ts'itjáyanna kaín xín tí nkehe ó kuítóhe senó la t'ichjánxin kaín asenná tjichráha tí nkehe naxa t'itjáyan tsjácha.

¹⁴ Kíxin xikaha ntá chrókjuácha chrók'uayáha kaín tí nkehe jína tsjanjon Dios. Jehe ch'án la sinchexiteyá kaín tíha kixin tinkachónkia Jesucristo.

¹⁵ Kaínni tí tinkáchónkini Jesús kaín asenni la méxra xikaha chrókjuenkayáxinni. A ntá tí ókjé nkexrí tjenkayáxinrá la Dios mé nchexraxinkaonrá ch'án kixin ntoáhya tíha.

¹⁶ A ntá t'ichjánxin chrók'uejóni éxi tí nkehe ó kjuachani.

¹⁷ Kíchóni, chrók'uejorá éxi kjuak'é janhan la ko chrótsjehérá nkexrí tjejó tí í so chojni tjejóch'e éxi kjuakoni kixin xikaha kjuakoharáni tí jahará.

¹⁸ Nchónhya xrjankaxián senó la ntá xrjanka ínaá la imá tsjanka kixin siín nchónhya sín tjejó sín éxi nínkakonhen sín tí Cristo k'uénxin ntacruz.

¹⁹ Tí sín a mé ts'itjáyan sín. Tí dios kuènte sín la mé tí nkehe ntácho asén sín ó la ko tjinkaon sín chrókjuinchehnkexín sín tí nkehe chrókósuèxin sín. Jehó tjenkayáxin sín tí nkehe siín chjasintajni ó.

²⁰ A ntá jeheni kaín ni la mé chojni kuènte nkajní la tjejóchónhenni kixin ts'inkajinxin nkaya nkajní tí nkexro tsaáxinni, mé Ìnchéni Jesucristo.

²¹ Ntá jehe ch'án mé tsjinkí ch'án tí cuerpo náxrjónhya chóntani kixin ntá tí cuerpo chóntani tsoyóhe éxi tí cuerpo náxrjón chóna ch'án. Tíha mé tsoxiteyá kjuachaxién ch'án jíé kixin ó chóna ch'án kjuachaxin ts'etuenhen ch'án kaín xín nkehe.

4

Jnkochrín chrókócháhará kixin tinkachónkirá Ìnchéni

¹ Jahará kichó ni imá tjuahará la ko imá tjínkavan chrókjuasántsjahará tí jahará kixin jahará imá nchechànará kixin jahará mé éxi ijnko nkehe ó kjuácha. Méxra jína chrók'uejorá chrókuinkachónkirá Ìnchéni kixin tjuahará kichó ni.

² Xrjanóaha tjan Evodia la ko tjan Síntique kixin jnkokoá chrókjuenkayáxin sín kixin jehe sín la jnkokoá kichó sín kixin tinkáchónki sín Ìnchéni.

³ Jaha la jína k'uejóni kjuích'eni xra, méxra xrjanóaha tjínkítsa tí sín chjin kichó ni kixin jnkokoá chrókjuenkayáxin sín. Jehe sín kjaxin kjuích'e sín xra tíó kjuakoni tí tan jína tsaáxinni. Koí tí ch'ín Clemente la ko í so sín kjuích'ekoni xra. Tí ihnié sín la ó ts'ínixín ts'ínixín ihnié chojni tsaá.

⁴ Nchechéhéra asánrá jnkochrín kixin tjejókoará Ìnchéni. Ínaá kjatee xrjanka nchechéhéra asánrá.

⁵ Kaín chojni chrókónohe kixin jahará la chojni jínará. Chrórxáinkáonrá kixin í séhya tsokjan Ìnchéni.

⁶ Tóxakuanhyará ninkehó. Íchá jína chróchenkará Dios kaín xín nkehe la chrókjuancheherá ch'án kaín nkehe t'ichjánxinhanrá la kjaxin chrókjuancheherá ch'án kjuasáya.

⁷ A ntá jehe ch'án mé tsotjáhará kjuaxróxin. Jeheni tsjachahyani tienxínni tí kjuaxróxin kuènte ch'án kixin imá ijié tíha. Tí kjuaxróxin mé ts'ayakonhen asánrá la ko ts'ayakonhen tí kjuaxrexinkaon kuèntará kixin jnkokoá tinkáchónkirá Cristo Jesús.

Tjenkayáxinrá tí nkehe jína

⁸ Méxra tsjixixín tétuanhanrá kichó ni. Tjenkayáxinrá kaín tí nkehe chaxín, la ko kaín tí nkehe kjuasáya, la ko tí nkehe ntoá la ko tí nkehe jína. Mé xikaha tjenkayáxinrá kaín xín tí nkehe náxrjón la ko tí nkehe tóxrjínhin Dios.

⁹ Chrókjuich'erá kaín tí nkehe kjuákoHará la ko tí nkehe kuínhínrá xrjanka la ko tí nkehe kuétuanhánrá la ko tí nkehe k'uíkonrá kjuít'a, mé kaín tíha chrókjuinchexiteyará la ntá tí Dios tjanjon kjuaxróxin mé ts'ejókoará ch'án.

Tí ofrenda kjuanjon tí sín filipenses tsjinkítsa sín tí ch'ín Pablo

¹⁰ Ìnchéni imá nchechàna kixin jahará xráxinkáonrá tí janhan ínaá. Ntáxrjanhya kixin tsík'itjáyanhanrá tí janhan kixin jahará xitjahya k'uékjínkítsará tí janhan.

¹¹ Jehya kixin ntáxrjan tíha kixin imá t'ichjánxinna kixin janhan na ó kuàna kjuaxróxin tjén kjónté tí nkehe chonta ó.

¹² Janhan ó kuàna tjén kjónté nóana la ko kjaxin ó kuàna tsochonta itsjé nkehe. Kjónté ichrén nkehe ts'átsínka la ó tsjácha kjónté á kjoné jína o náhí la kjónté á chróchonta ichrén nkehe o á chróchontahya ninkehó la ántosénna.

¹³ Kaín xra tsjácha sít'a kixin Cristo tsjinkítsana.

¹⁴ Kjánchó jahará jína kjuich'erá kixin kjuínkítsará kjuánjonrá nkehe t'ichjánxinna.

¹⁵ Tió sákjuíxian estado Macedonia la kjuankíxian kjuàkua tí tan tsaáxinni ínaá la jahórá tí nínko chjasin Filipos ichr'anrá chichaon k'uayáha kixin cháhará kjuákoHárá itén Dios.

¹⁶ Kjaxin tió naxa kjuak'é chjasin Tesalónica la jahará ichr'anrá chichaon iso veces kixin kjuínkítsará tí nkehe k'uichjánxinna ntiha.

¹⁷ La jehya kixin tjínkavan kixin jehó nkehe chrók'uayáha. Náhí. Jehí tjínkavan kixin jahará ántsí má chrókjuich'erá tí nkehe tjínkaon Dios kixin ntá ántsí chrókjuachará.

¹⁸ Ó k'uayáha kaín nkehe tsíkjánjonrá la ántsí itsjé chonta. Ó k'uayáha tí nkehe tsíchr'anrá mé tí nkehe kúikao ch'ín Epafrodito, la kaín tíha la ó tsjácha. Tíha la éxí yóhe ijnko nkehe xraxé náxrjón chróchjehérá Dios mé éxí ijnko iko chrók'oyánrá imá chrókóxrjínhin ch'án.

¹⁹ Tí Dios kuèntana mé tsojtáhará kaín xín nkehe naxa t'itjáyan tsákjára kixin chóna ch'án kaín xín nkehe imá náxrjón tjete la tsjanjon ch'án kixin jahará la tinkachónkirá Cristo Jesús.

²⁰ Kjuasáyé It'éni Dios jnkochrín. Mé xíkaha tsoxiteyá. Amén.

Tsjixixín nixja ch'ín Pablo

²¹ Janhan tjínkavan tsonixjehérá kaín tí sín tinkáchónki Dios la ko Jesucristo ntiha. Tí sín kíchó ni tzejókoni ntihi nixjahará sín.

²² Kjaxin kaín tí sín tinkáchónki Dios la ko tí sín ch'ehe xra tí ch'ín t'etqan romano mé nixjahará sín.

²³ Tjáncháha kixin Ìnchéni Jesucristo mé chrókjuintayaonrá ch'án kaín rá. Amén. Ó tjen.

Tí xroon tsíkjin ch'ín Pablo chr'énnen ch'án tí sín chjasin Colosas

Ch'ín Pablo ikjin xroon k'uáyéhe tí nínko chjasin Colosas

¹ Janhan Pablo tsíkjeýana Jesucristo t'aha ch'án xra kixin xikaha tjinkaon Dios, la ko kichó ni Timoteo

² mé ikjinni tí xroon i tsochr'ánharáni tí jahará tsíkjinchetjóará Dios la ko kuítekáonrá Jesucristo tjejorá chjasin Colosas. Kjuasáyé It'eni Dios chrókuuintayaonrá kixin kjuaxróxin chrók'uejorá.

Ch'ín Pablo tjanchehe ch'án Dios kjuasáya kixin kaín tí sín tinkáchónki Cristo

³ Jnkochríxín tjancheheni kjuasáya Dios la ko tjanchiani kixin chrókuinkítsa ch'án tí jahará mé jehe ch'án It'é Ìnchéni Jesucristo.

⁴ Ó kuínhinni kixin jína tinkáchónkirá Ìnchéni Jesucristo la ko tjuèhéra kaín tí sín ó tsíkjinchetjóá Dios.

⁵ Mé xikaha tjejochonhénra kixin ts'ayéhéra tí nkehe chóna Dios tjen nkaya nkajni. Jahará la xikaha tjejochonhénra kixin tjejotinhínra tí tan chaxín kuente Dios tsaáxinni.

⁶ Tí tan i mé kuínhin chojni la itsjé sín tinkáki tekaon sín la tinkák'ánki tí kjuachaxin kuente Dios kuenté chjasintajni. Mé xikaha kónhen tió kuinhínra la ko kuítekáonrá kixin chaxín tjuahará Dios.

⁷ Tíhi mé kjuakohará kichó ni Epafra. Jehe ch'án la jnkokoá kjuích'ekoni ch'án xra kixin jehe ch'án la jína ch'ehe ch'án xra Cristo kixin xikaha tjinkítsa ch'án tí jahará.

⁸ Jehe ch'án mé kui ch'án ntihi chrónka ch'án nkexrí tjuèhéra kichuára kixin Nchakuen Dios tjinkítsa tí jahará.

⁹ Méxra xikaha tí yaon tió kuínhinni nkexrí tjejorá la títoehyani tjancheheni Dios kixin tsjinkítsa tí jahará kixin tsonohará jína nkexrí tóxrjínhin ch'án la ko tjanchiani kixin tsjanjon ch'án kjuachaxin kixin tsiénxinra kaín nkehe kuente ch'án.

¹⁰ Tjancheheni ch'án kixin jína chrók'uejorá kixin tinkáchónkirá Ìnchéni la ko chrókuítóehyará chrókjuích'erá éxí tóxrjínhin tí jehe ch'án. Ntá jína chrókjuachará chrókjuích'erá xra kuente ch'án la ntá chrókónohará jína nkexrí tjen Dios.

¹¹ Tjanchiani kixin jehe ch'án chrókuinkítsa kixin chrók'uejorá fuerte kixin tí kjuachaxin jié kuente ch'án kixin ntá chrókjuachará la kjónté ichrén nkehe chrókónhanra la chrókóninkákonhyará.

¹² La ko chrókócháhará chróchjehéra kjuasáya It'eni Dios kixin kjuanjon ch'án kjuachaxin kixin ts'áyéheni tí nkehe tí tjen tí t'inkaséyan mé tí nkehe ts'áyéhe kaín tí sín tsíkjinchetjóá tí jehe ch'án.

¹³ Jehe ch'án mé kuakitsjekjanxinni ch'án tí sítié la ntá kjuanjon ch'án kjuachaxin ts'ejóni tí t'etoan tí Xjeen ch'án, tjuèhe ch'án.

¹⁴ Jehe ch'án kjuínchekaáni ch'án kixin k'uenyákonhenni ch'án la tí ijnié ch'án mé kjuenká ch'án tí ijieni.

Kjuaxróxin ts'ejókoni Dios kixin k'uenyákonhenni Cristo

¹⁵ Éxí tsjehe Cristo mé xikaha tsjehe Dios kjónté xitjahya t'ikonni tí jehe ch'án. Cristo la ó xráxín tjen tí naxa t'ónahya ninkehó.

¹⁶ Kjuachaxién tí jehe ch'án kjuích'énaxín Dios kaín tí nkehe siín nkajní la ko chjasintajni la ko kaín tí nkehe naxa t'ikonhyani la ko tí nkehe ó t'ikonni. Kjaxin kaín tí sín ángel t'etōan la ko chóna kjuachaxin la mé jehe ch'án kjuích'ena ch'án kixin sich'ehe sín ch'án xra.

¹⁷ Cristo la ó xráxín tjen kjónté naxa t'ónahya ninkehó la jehe ch'án t'ayakonhen ch'án kaín nkehe siín kixin tí kjuachaxin kuènte ch'án.

¹⁸ La kjaxin jehe Cristo mé tí kja t'etuēhen tí cuerpo mé tíha mé tí ninko. Jehe ch'án senó xechón ch'án kixin jehe ch'án mé ts'etuēhen ch'án kaín nkehe siín.

¹⁹ Dios tjinkaon chróchjéhe ch'án tí Xjeen ch'án kjuachaxin éxí tí kjuachaxin chóna tí jehe ch'án.

²⁰ Kjaxin tjinkaon Dios kixin kjuachaxién Cristo chrók'uixin kjuaxróxin nkuíxín mé chjasintajni la ko nkaya nkajní. Mé xikaha tsjasin ch'án kjuaxróxin kixin jehe ch'án kjuák'enkáni ch'án ntacruz ik'uén ch'án.

²¹ Jahará la ósé ikjín k'uék'ejorá la k'uéninkákonhénrá Dios kixin tí nkehe jínahya k'uékjich'erá. A ntá jie la kjuaxróxin tjejokoará Dios

²² kixin k'uenyákonhánrá Cristo, kjuasóte tí cuérpóe ch'án. Mé xikaha kónhen ch'án kixin ntá tsjanjon ch'án tí jahará ts'áyéhe Dios kixin kjuíntatjóará ch'án, a ntá jie la chontahará ninkehó jie.

²³ Méxra xikaha chrókuítóéhyará chrókuinkachónkirá Ìnchéni la ko chrókuítóéhyará tí nkehe tjejochonhénrá kixin ó kuinhínrá tí tan tsaáxinni. Tí tan i mé ó chrónka chojni kuenté chjasintajni la ko janhan Pablo kjaxin tjínkítsa xrxanka xikaha.

Ch'ín Pablo ch'e ch'án xra kuènte ninko

²⁴ Méxra ijie la tjasótexinna kixin tí jahará la chána kixin xikaha mé tsjintaxín tjasóte janhan kixin tí nkehe t'itjayan tí naxa chrókjuasóte Cristo kixin jehe ch'án mé kjuasóteyákonhen ch'án tí ninko mé tí cuérpóe ch'án.

²⁵ Mé xikaha Dios kjueyána kixin sit'a xra kuènte ninko kixin xikaha tí xra k'uetuanna ch'án kixin ntá jína chrók'uejoxínrá tí jahará kixin chrókjuintaxín chróxrjankaxián tí itan kuènte Dios.

²⁶ Tí nkehe ninkexró k'uénoehya tjemá ósé nchónhya nánó a ntá ijie kjuínchenohe Dios kaín tí sín tinkáchónki tí jehe ch'án.

²⁷ Dios tjinkaon chrókjuinchenohe tí jehe sín tí nkehe tjemá náxrjón tjete ts'áyéhe tí sín jehya judío ijie. Tí nkehe k'uénoehya chojni la mé Cristo tjejókoará la jehe ch'án mé tjanjon kjuachaxin ts'ejochonhénrá ts'ayéhérá tí kjuachaxin jie kuènte ch'án.

²⁸ Jeheni mé chronkaxínni nkehe kuènte Cristo la nchexraxinkaonni kaín chojni la ko tjakoheni sín kixin chrókuiénxín sín jína. Ntá jnkojnko sín chrók'uánkí kjuaxrexinkaon kuènte sín kixin tinkáchónki sín ch'án.

²⁹ Méxra xikaha tí xra it'a la kaín asenná it'a xra tí kjuachaxién chjina Cristo.

2

¹ Tjínkavan chrókónohará kixin nchónhya xra kjuít'a kixin chrókjuínkítsa tí jahará la ko kjaxin tí sín tjejó chjasin Laodicea la ko kaín tí í so sín naxa t'ikonhya tí janhan.

² Tjínkavan kixin jehe sín chrókóchéhe asén sín la ko jnkokoá chrókjuenkayáxin sín chrótjuèhe sín kichó sín. Mé xikaha chrók'uánkí kjuaxrexinkaon kuènte sín chrókuiénxín sín jína kixin ntá chrókónohe sín tí nkehe ninkexró k'uénoehya kuènte It'eni Dios, mé Cristo tíha.

³ Jehe ch'án chóna kaín xín kjuaxrexinkaon kuènte Dios la jehe ch'án mé nohe ch'án kaín nkehe.

⁴ Kaín tíha xrjanka kixin ntá ninkexró chrókjuít'ayahyará tí jahará kixin tí náxrjón chrónixja sín ó.

⁵ Kjonté tjenhya tí cuerpo kuèntana tí tjejorá la ntá nchakuenná la mé tjen ntiha kixin xráxinkavan tí jahará la chàna kixin t'íkuan kixin jína tjejorá naxa tinkachónkirá Cristo.

⁶ Méxra xikaha kuinkachónkirá Inchéni Jesucristo la mé xikaha jnkokoá chrókjuenkayáxinkoará tí jehe ch'án.

⁷ Éxí ijnko nta tsíkji nuée njnka mé xikaha chrókuinkachónkirá tí jehe ch'án éxí kjuakohará ch'án la ko chrókjuancheherá Dios kjuasáya jnkochrín.

Cristo tjanjon jnko ntia nixin

⁸ Chrókuítóéhyará kixin ninkexró chrókjuít'ayahará kixin tí nkehe ntoáhya chrókjuakohará sín. A ntá jehe sín chrónkahya sín éxí tjinkaon Cristo. Náhi. Tjako sín tí nkehe tjenkayáxin chojni chjasintajni ó la ko tjako sín tí kjuachaxin kuènte tí nkehe jínahya síin chjasintajni.

⁹ Kaínxín kjuachaxin chóna Dios mé chóna Cristo kjonté k'óna ch'án chojni.

¹⁰ La jahará chontará kaín kjuachaxin kuènte Dios kixin ó tinkachónkirá Cristo. Jehe ch'án t'etuèhnen ch'án kaín nkehe síin la ko t'etuèhnen ch'án kaín nchakuen t'etoan.

¹¹ Kjaxin tió kjuankixinrá tinkachónkirá Cristo ntá jehe ch'án kjuanjon ch'án jnko xroye k'uayéhérá kjánchó jehya tí xroye kuènte tí cuerpo. Náhi. Kjuakjin ch'án tí jje k'uékóxrjínhanrá la kjuíntakaará ch'án, mé tíha mé tí xroye kjuanjon Cristo.

¹² Tí kuíkiterá jahará mé xikaha éxí xravákoará Cristo. Ntá ó xechón tí jehe ch'án la kjaxinrá xechónrá kixin ó kuítekáonrá tí kjuachaxin kuènte Dios kixin Cristo la ó xechón ch'án inaá.

¹³ Jahará ósé la éxí tsík'en asánrá k'uék'ejorá kixin tí jje k'uéchontará kixin k'uéchonhyará Dios la k'uéchontahyará xroye kuènte ch'án. A ntá ijje la éxí xechónrá kixin Cristo kjuatsen tí jje chontará.

¹⁴ Mé Dios kjuatsen ch'án kaín tí nkehe tsík'etoan ch'án ósé kjuachahyani nchexiteyáni la ko kjuatsen ch'án kaín tí jje k'uéchóntani kixin Cristo kjuák'enkáni ch'án tí ntacruz la xikaha kjuatsenxin ch'án tíha.

¹⁵ Cristo k'uenyákonhenni ch'án la ntá kjuachaxin kuènte Dios kjuacha la kjuachahya ninkehó tí kjuachaxin k'uéchónta tí nchakuen jínahya kixin jehe ch'án kjuínchesuèhe ch'án tí sín jínahya noxín kixin jehe ch'án mé kjuacha ch'án.

Tjeyará tí nkehe síin nkaya nkajní

¹⁶ Méxra ninkexró chrókjuontahyará kixin tí nkehe chrókjuónterá o tí nkehe chrók'uirá o á tjíkosáyehérá tí yaon kia o tí nitjó nixin o tí yaon t'ok'éheni.

¹⁷ Kaín tí nkehe a la ó tóyóhó tí nkehe itsi. A ntá tí nkehe chaxín la mé Cristo tíha.

¹⁸ Méxra chrókuítóéhyará kixin ninkexró chróntáchro sín kixin ts'itjayanrá kixin tinkachónkihyará tí sín ángel, tsixro sín. Tí sín a mé chrónkaxín sín tí nkehe éxí kotáchrién sín t'ikoxín sín la nchehnke sín kixin tí nkehe t'axrjeníxin kja sín ó.

¹⁹ A ntá jehe sín la chaxínhya tinkáchónki sín Cristo kixin jehe ch'án mé tí kja t'etuèhnen kaín ni la jehe ch'án mé ch'éna ch'án jnkokoá cuerpo kuènte ch'án kaín ni la nchek'ánkí ch'án tí cuerpo kixin jehe ch'án t'ayakonhenni ch'án kixin xikaha tjinkaon Dios.

²⁰ A ntá jahará la ó k'uénkoará Cristo la kuítóhéra tí nkehe k'uék'etoan kuènte chjasintajni ó. ¿A ntá nkekuènté naxa tjejorá éxí tí chojni síin chjasintajni chrókjuínchexiteyará tí nkehe t'etoan sín?

²¹ Mé xikaha t'etōan sín kixin jahará chrótsēhyará tíha la chrókjōntehyará tí nkehe la chrókuákjáhyará nkehe.

²² Kaín tí nkehe ntáchro sín mé nixja kuènte tí nkehe tsjeje la tíha mé t'axrjenixin ikja chojni ó.

²³ Chaxín kixin jehe sín ntáchro sín kixin jína xikaha sinchexiteyá sín kixin tinkáchónki sín tí sín ángel la nchehnkehya sín la ko itsjé nkehe ch'ehe sín cuérpōé sín, kjánchó kaín tí nkehe ch'e sín xikaha la chónkó kixin tjinkĩtsahya kixin chrókuítóhe sín tí nkehe ntoáhya tjenkayáxin sín.

3

¹ A ntá tí jahará la ó tsíxechónkoará Cristo. Méxra chrókjuéyará tí nkehe siín nkaya nkajní kixin Cristo la ntiha tjetjāxin ch'án tí tja chjina Dios.

² Chrókjuenkayáxinrá tí nkehe siín nkaya nkajní. Chrókjuenkayáxinhyará tí nkehe siín chjasintajni.

³ Kixin jahará la ó ik'uenrá la ntá ijie la Cristo la ko Dios chónthehe tí kjuachón kuéntará.

⁴ Jehe Cristo mé chontaxínrá kjuachón jahará la tió tsokjan tí jehe ch'án ntá kjāxinrá ts'ejókoará ch'án ntá ts'íkonrá tí kjuachāxin jié kuènte ch'án.

Tí ntia ntāxin la ko tí ntia nixin

⁵ A ntá chrókuítóhérá kaín tí jié tjenkayáxinrá chjasintajni. Ninkexró chrókjuasinko jié chojni chjin ókjé, la ninkexró chrókjuich'e nkehe jínahya, la ko ninkexró chrókjuich'e ninkehó tí nkehe ntáchro asén sín, la ko kjāxin chrókóxrjienhya sín chróchóna sín itsjé nkehe kixin tíha mé yóhe tí chróxraxinkaon sín tí nkehe tsíkjanoya.

⁶ Méxra tí nkexro titekakonhya tí nkehe t'etōan Dios la tsonínkakohen Dios tí jehe sín la sinchekjasóte sín ch'án.

⁷ Mé xikaha k'uékjich'erá jahará tí ósé.

⁸ Méxra ijie chrókuítóhérá kaín tí kjuanínkaon la ko tí nkehe tjak'e asánrá la ko tí nkehe jínahya la ko tí t'antaxínhínrá kíchuará la ko tí nkehe jínahya t'axrjexín ir'vará.

⁹ Chrókjuich'iyéhyará kíchuará kixin ósé xikaha k'uékjich'erá a ntá jie la ó chrókuítóhérá kaín tí nkehe ntāxin k'uékjich'erá.

¹⁰ A ntá jie la ó tsík'ónará ijnko chojni nixin. Dios tinkánchetjóará ch'án kixin ts'ónará éxí tí jehe ch'án kixin jehe ch'án kjuich'éna ch'án tí jahará. Mé xikaha chrókjuixraká chróchoxínrá tí jehe ch'án jína.

¹¹ Jehya tjetōan á chojni judío o náhí o á chojni tsíka xroye o náhí o á chojni tsíkjixin kjín o náhí o á chojni noehya o á chojni ch'exón xra o á chojni t'etōan. Tí nkehe tjetōan la tinkáchónkini Cristo la jehó ch'án t'etuenhen kaín nkehe.

¹² Dios la tjuèhe ch'án tí jahará la tsíkjeýará ch'án kixin tsinkachónkirá ch'án. A ntá jahará la ó k'ónará ijnko chojni nixin la chrókuikonóhérá kíchuará la jína chrók'uejorá la ko chrókjuinchehnkehýará la ko chrókójiahýará la ko chrókóninkákonhyará.

¹³ Chrókóninkákuénhyará kíchuará la chrók'uitjāyanhanrá ichrén jié kjuasinhánrá í jnko chojni kixin Cristo la k'uitjāyehen ch'án tí jié kjuásinrá la kjāxin jahará la xikaha chrókjuich'erá.

¹⁴ Mé xikaha chrójtjuèhérá kíchuará la jnkokoá chrókjuenkayáxinrá.

¹⁵ Tí kjuaxróxin kuènte Cristo mé chrók'uetuenhen asánrá kixin xikaha kjuenkayáxin Dios k'uíyahará ch'án kixin chrók'ónará jnkokoá cuerpo kuènte ch'án mé xikaha chrókjuancheherá ch'án kjuasáya.

¹⁶ Tí tan kuènte Cristo jnkochrínín chróchóna asánrá. Mé xikaha chrókjuákohérá kíchuará la chrókjuinchechéhérá kíchuará kaín

kjuaxrexinkaon jína. Chrótsjerá salmo la ko himno la ko canto kuènte Dios la chrókjuancheherá Dios kjuasáya kaín asánrá.

¹⁷ Kaín xra chrókjuiç'erá la ko tí nkehe chróntáchorá la kaín táha chrókjuanchaxínrá ihnié Ìnchéni Jesús la chrókjuancheherá kjuasáya It'éni Dios kjuachaxién Jesucristo.

Jnkojína chrók'uejóko kichó tí sín tinkáchónki Cristo

¹⁸ Jahará chojni chjin la chrókjuiçhexiteyéhérá tí xiyará kixin mé t'ichjánxin xikaha chrókjuiç'erá kixin tinkáchónkirá Ìnchéni.

¹⁹ Jahará chojni ntoa la chrótjuèhérrá tí ichjiánrá la chrókóninkákuénhyará tí jehe tjan.

²⁰ Jahará chánjanrá la chrókjuiçhexiteyéhérá it'ará la ko inará kaín nkehe chrók'ueñoan sín kixin xikaha mé tóxrjínhin Ìnchéni.

²¹ Jahará it'é xjan la chrókjuiçhekónínkakonhyará tí xjaanrá kixin tí xikaha la chrókjuiçhek'áváhyará tí jehe xjan.

²² Jahará chojni ch'exón xra chrókjuiçhexiteyéhérá tí lámóará ntihi ch-jasintajni. Jehya kixin tí tjejótsjehe sín ó chrókjuiç'erá xra kixin ntá jína chrók'uejoxínrá. Náhí. Kaín asánrá chrókjuiç'erá xra kixin ó nohará kixin xikaha ch'eherá Ìnchéni xra.

²³ Kaín nkehe chrókjuiç'erá la kaín asánrá chrókjuiç'erá xra éxí chrókjuiç'eherá xra Ìnchéni la jehya kixin éxí chojni ó chrókjuiç'eherá xra.

²⁴ Ó nohará kixin Ìnchéni la sintakitonhanrá tí nkehe chóna ch'án kixin jahará ch'eherá Cristo xra la jehe ch'án mé chaxín Ìnchéni.

²⁵ A ntá tí sín ch'e tí jínahya tsjacha sín tí nkehe jínahya kjuíç'e sín kixin Dios la tikonóehya ninkexró ch'e tí nkehe jínahya.

4

¹ Méxra jahará lámorá la jína chrónixjehérá tí sín t'ahará xra. Chróxráinkáonrá kixin kjaxinrá jahará chontará ijnko Dios tjan nkaya nkajni.

² Chrókuítóéhyará nixjehérá Dios la ko chrókjuancheherá ch'án kjuasáya.

³ Kjaxin tjancheherá ch'án tsjinkítsa tí jeheni kixin tsjanjon Ìnchéni kjuachaxin chrókuinhin chojni tsochrónkaxínni tí itén Cristo. Tí xra k'uénoehya ninkexró mé tjeçjinaxián jie.

⁴ Tsjancheherá Dios kixin tsjinkítsa ch'án tí janhan kixin chrókianxian jína chrókjuákua éxí tjinkaon Dios.

⁵ A ntá jahará la jína chrókjuákohérá itén Dios tí sín naxa tinkáchónkihya Ìnchéni kixin kánhyó tiempo siín kixin tsjåkorá.

⁶ Chrónixjehérá sín jnkojína kixin chrókóxrjínhin sín la chrókónohará chrókjuátèherá nkexrí tsixro jnkojnko chojni.

Kjuixin nixja ch'ín Pablo

⁷ Kichóni Tíquico, mé ijnko nkexro jína tjinkítsa tí janhan ch'ehe Ìnchéni xra, mé tsjiji ch'án tsochrónka ch'án nkexrí tjan janhan.

⁸ Méxra kuétuanhan ch'án tsjiji ch'án tí tjejorá kixin tsonohará kixin nkexrí tjejóni kixin chrókócháhará.

⁹ Jehe ch'án la ko kjaxin ch'ín Onésimo mé tjuèheni kichó ni la ko jehe ch'án mé kjaxin jína ch'e ch'án xra, la mé tsjijitsjehe sín tí jahará. Jehe ch'ín Onésimo mé sín chjasánrá. Jehe sín mé tsochrónka sín kixin nkehe sítónhen tí tjejóni ntihi.

¹⁰ Ch'ín Aristarco mé jnkokoá tjechjinakian ch'án ntøechiso mé nixjahará ch'án la ko kjaxin ch'ín Marcos mé tí ch'ín a mé naxa kjéhya ch'án ch'ín Bernabé. Ó nohará chrók'uayakonhénra tí ch'ín Marcos tí tsjijitsjehe ch'án tí jahará la chjehérah ch'án kjuachaxin tsjak'e ch'án jína.

¹¹ Kjaxin nixjahará ch'ín Jesús, kjaxin tikítexín sín ch'án Justo. Jehó tí sín a mé sín judío tinkáchónki Cristo, a ntá ijie tjinkítsa sín tí xra tjét'a la chrónkaxín sín nkehe kuènte tí kjuachaxin kuènte Dios. La tí sín a mé imá kjuínchechàna sín tí janhan.

¹² Ch'ín Epafras nixjahará ch'án. Mé jehe ch'án ch'ehe ch'án xra Cristo la jehe ch'án mé sín chjasánra. Jehe ch'án jnkochrínín chrónóehé ch'án Dios tjinkaon ch'án kixin kaín asánra chrókuinkachónkirá Dios éxí tjinkaon ch'án.

¹³ Ó nòna kixin ch'ín Epafras la tóxakonhen ch'án kixin tí jahará la ko tí sín tjejó tí chjasin Laodicea la ko Hierápolis.

¹⁴ Ch'ín Lucas, mé tí ch'ín ch'e xroan, la kjaxin nixjahará ch'án la ko kjaxin ch'ín Demas nixjahará ch'án.

¹⁵ Nixjehérah tí sín kichó ni tjejó chjasin Laodicea la kjaxin nixjehérah tjan Ninfas la ko tí sín tójkotsé ntøe tjan.

¹⁶ Tió tsjixin sinchekuáxinrá tí xroon tsíkjihi tí tjejorá ntiha la ichr'anra xroon sátsji sinchekuáxin tí sín tjejó ninko chjasin Laodicea la ko kjaxin sinchekuáxinrá tí xroon tsíkjihihi tí jehe sín tió tsjiji tí xroon tí tjejorá.

¹⁷ Kjaxin chenkará ch'ín Arquipo kixin chrókuinchexiteyá ch'án jína tí xra tsíkjanjon Inchéni sich'e ch'án.

¹⁸ Janhan Pablo tjaná kjinxian tí palabra nixjahará. Jahará chróxráxinkáonra kixin janhan la tjéchjina la Dios mé chrókjuintayaonra. Amén. Ó tjen.

Xroon saoxín ikjin ch'ín Pablo chr'énhen ch'án tí sín tinkáchónki Cristo chjasin Tesalónica

Ch'ín Pablo nixjehę ch'án tí sín Tesalónica

¹ Janhan Pablo la ko ch'ín Silvano la ko ch'ín Timoteo ikjinni tí xroon i chr'anhánrá kichó ni ninko chjasin Tesalónica kixin jnkokoá tinkáchónkini It'éni Dios la ko Ìnchéni Jesucristo. Kjuasáyé It'éni Dios la ko Ìchéni chrók'uejorá.

Tí sín ókjé chjasin mé kjuíncheyóhę sín tí sín Tesalónica

² Jnkoyaxón chjeheni Dios kjuasáya la ko t'ákjenxinni tí jahará kaín rá kixin jehe ch'án mé chrókjuinkítsa ch'án tí jahará.

³ Tió nixjeheni It'éni Dios xraxinkaonni kixin kaín asánrá kuítekáonrá Ìnchéni, a ntá tjejoch'erá xra la ko imá tjuèhéra kichuára ntá jnkokoá tjejochonhénra tsokjan Ìnchéni Jesucristo.

⁴ Kichóni jahará, imá tjuahará Dios la ó noheni kixin jehe ch'án tsíkjeýará ch'án tí jahará.

⁵ Na mé xikaha tió kjuíjini chjasánra kjuakoharáni tí tan jína nixin tsaáxinni chrónkani na jehya iténi ó. Náhí. Kjaxin kjuachaxién Nchakuen Dios kjuakoxinni la ko tí Nchakuen Dios mé kjuínchenoheni kixin tí itan kjuakoni la chaxín ntoá. Jahará la ó nohará jína kixin nkexrí k'uéjóni tí tjejorá kixin xikaha chrók'uejorá chrókjuákoxinra.

⁶ Mé xikaha kjuíncheyóhéra tí jeheni la ko kjuíncheyóhéra tí Ìnchéni Jesucristo. A ntá tió kuínhínra tí itén Dios ntá kaín asánrá kuinkachónkirá Ìnchéni la ko kócháhará kixin tí Nchakuen Dios mé t'etuenhen asánrá kjónté nchónhya nkehe k'uatsínkará.

⁷ Mé xikaha kjuákuexinra kaín tí sín tinkáchónki Ìnchéni ntiha estado Macedonia la ko tí sín estado Acaya.

⁸ Jahará kjuákoxinra tí itén Dios la jehya jehó estado Macedonia la ko tí estado Acaya kjuákoxinra. Náhí. Na mé kaín chjasin chjinaxón ntiha kuínhin sín kixin nkexrí tinkachónkirá Dios. A ntá jeheni na í t'ichjánxinhya í jnko nkehe naxa chróchronkani,

⁹ kixin ijie jehe sín mé tjejóchronka sín kixin nkexrí kjuíjini chjasánra a ntá kaín rá kjuánjonra kjuachaxin k'uéjóni la ko kuítekáonra tí itén Dios kjuakoharáni la ntá kuitohéra kaín tí nkehe tsíkjanoya kixin ntá kjuankíxinra kuinkachónkirá Dios tjechón chaxín.

¹⁰ La ko kjaxin tjejóchronka sín kixin jahará tjejochonhénra tsokjanxin nkaya nkajni tí Xjeen Dios na mé Jesús. Ó kjuínchexechón Dios tí Xjeen ch'án Jesús ntá jehe ch'án mé sinchekaáni kixin chrókjuasótexínhyani tí nkehe jínahya chrókjuasótexínni itsi.

2

Tí xra tsíkjih'e ch'ín Pablo tí chjasin Tesalónica

¹ Kónohará kaín rá kichó ni kixin jehya chónkó kjuíjini chjasánra.

² Ó kónohará kixin senó tí sín chjasin Filipos k'uékjinchekjasóteni sín la ko k'uék'ántaxínhinni sín. Kjánchó Dios mé kjuínkítsa ntá chrakonhyani kjuakoharáni tí tan tsaáxinni kuènte Dios kjónté imá k'uénínkakhenni sín.

³ Kónohará kixin jehya ntoáhya kjuakoharáni la ko jehya ijnko nkehe náxrxjónhya kjuakoni la ko kjuít'ayahyaráni ninkehó.

⁴ Náhí. Dios mé kjueyá ch'án tí jeheni kixin chrókjuakoni tí tan tsaáxinni, mé xikaha ntoá tjakoni. Jehya kixin chojni ó nchechéheni. Náhí. Nchechéheni Dios tí nkexro nohe nkehe tónhen asénni.

⁵ Ó nohará kixin kjuích'iyaxínhyani itan imá náxrxjón kixin xikaha chrókuakitsjexinni chichaon chrókjuachani. Náhí. Dios la ó nohe ch'án kixin xikahya kjuích'eni.

⁶ Tjeyáhyani kixin chojni chrókjuikosáyeheni sín la á jahará la o í so chojni. Náhí, xikahya ch'eni, kjónté chóntani kjuachaxin chrók'uetuanhanráni kixin chrókjuánjonrá nkehe chrók'uáyéheni kixin jeheni ch'ehe ni xra Cristo.

⁷ Jnkojína k'uénixjahaaráni k'uék'ejóni. Éxí yóhe ijnko iné xjan t'ayakonhen xjeen kixin ts'ánkí xjan mé xikaha jeheni k'uayakonhanráni tí jahará.

⁸ Imá tjuahará ntá jehya jehó tí itén Dios chrókjuakoharáni. Náhí. Kjónté chrók'uenxinni tí tjakoharáni kixin xikaha imá tjuahará.

⁹ Kíchóni, chrórxaxinkáonrá kixin tió k'uéjóni chjasánrá la mé nchónhya xra kjuích'eni nchakotjin la ko tie ntá kjuachani chichaon k'uénaxinni nkehe sineni kixin tjinkakonhyani kixin chrótjáharáni xra chrókjuánjonrá nkehe chrókjoneni nachrohe k'uejóni ntiha kjuakoharáni itén Dios.

¹⁰ Jahará la ó nohará la ko ó nohe Dios kixin chaxín jína k'uéjokoaráni jahará chojni tinkáchónki Ìnchéni. Nijnko nkexro ts'ekahyani jie kixin ichrén nkehe jínahya chrókjuich'eni.

¹¹ Jahará ó nohará kixin kjuakoharáni la ko kjuínchechéheni tí jahará jnkojnkora éxí ch'e ijnko it'é xjan tjuèhe xjeen ch'án.

¹² La ko k'uetuanhanráni kixin jína chrók'uejora éxí tjinkaon Dios chrók'uejó tí sín tinkáchónki ch'án kixin jehe ch'án ó k'uíyahará ch'án kixin chrók'uayéhérá tí kjuachaxin kuènte ch'án.

¹³ Méxra jnkochrín tjancheheni Dios kjuasáya kixin tió kuínhínrá tí tan jína kuènte ch'án kjuakoharáni na ntá kjuátsoanrá kixin chaxín tí tan jína kuènte Dios ntá jehya tan kuènte chojni a ntá kaín rá ó kuítekáonrá tí tan a ntá k'uíxitóxin ntíará.

¹⁴ Mé xikaha jahará kíchó ni kjuasótiará kónínkakonhanrá tí sín chjasánrá éxí yóhe kónhen tí sín kuènte Dios tinkáchónki Ìnchéni Cristo Jesús tí estado Judea kixin tió kjuankíxin kuinkáchónki sín Ìnchéni ntá tí sín judío chjasén sín mé kjuankíxin sín kónínkakonhen sín chrók'óyán sín.

¹⁵ A ntá tí sín judío a mé tsík'óyán sín Ìnchéni Jesús la ko tsík'óyán sín tí sín tsíchronka tí itén Dios ósé la xikaha kjaxin k'uinkíténi sín. A ntá xikaha kjuích'e sín la kónínkakonhen sín kaín chojni. A ntá Dios la kórxjénhya ch'án kixin xikaha kjuích'e sín.

¹⁶ A ntá tjinkaonni kixin chrókjuakoheni tí sín jehya judío tí tan jína chrókuaáxin sín a ntá tí sín judío tjinkakonhya sín chrókjuakoni. Na mé xikaha imá nchek'ánkí sín tí jie kuènte sín. A ntá xikaha kjuích'e sín ntá Dios sinchekjasóte ch'án tí jehe sín.

Ch'ín Pablo tjinkaon ch'án sáchrókjuitsjehe ch'án inaá tí sín chjasin Tesalónica

¹⁷ Kíchóni, tió kuítoheni tí jahará a ntá kjónté ókjé k'uéjóni la k'uéxraxinkaonni kaín asénni tí jahará la ko imá tjinkaonni chrókjuijitsjeheni tí jahará inaá.

¹⁸ Na mé xikaha janhan Pablo itsjé veces mé tjínkavan chrókjuasántsjaha tí jahará, a ntá tí ch'ín Tsochren mé k'uínkakonna ntá xitjahya tsjasán.

¹⁹ ¿Nkehe tsonhen tí xra tjejóch'eni tjejóchóenxinni la ko nkekuènte tjejóchéheni? Jahará mé tsochèxinni tió tsi Ìnchéni Jesucristo kixin kuítekáonrá ch'án.

²⁰ Méxra jahará mé kóchéxinni kixin kuítekáonrá.

3

¹ Ntá imá kóxakonhenni. Ntá kjuenkayáxinni kixin chrókójína jehóni chrókuítóheni chjasin Atenas

² Na ntá ichr'ánni tí kíchó ni Timoteo a tsjijitsjehe ch'án tí jahará kixin kjaxin ixra kuènte Dios tjech'e ch'án tjejókoni ch'án tjako ch'án tí tan kuènte Cristo tsaáxinni. Ntá ichr'ánni ch'án kixin syntaxraxinkaonrá ch'án tí itén Ìnchéni la ko sinchechéhe ch'án asánrá

³ kixin tsoxrxéhya asánrá má kixin tí kjuaxróxinhya tjejó'tatsínkará. Kixin xikaha ó nohará kixin t'ichjánxin tsjasótexinni tí xra kuènte Ìnchéni.

⁴ Naxa k'uéjóni jnkokoá ntiha la ó tjonkará kixin kaín ni kjuaxróxinhya tsonhenni tsjasóteni. A ntá jie la ó nohará kixin chaxín xikaha kónhen.

⁵ Méxra imá kóxakonna ntá ichr'an kíchó ni Timoteo kjujijitsjehe ch'án nkexrí tjejórá, á naxa tinkachónkirá Ìnchéni o ách'e ch'ín Tsochren chrókjuachroerá chrókuítóhérá tí ntje Ìnchéni a ntá chrókóchónkó kaín tí xra kjuich'eni kjuakoহারáni.

⁶ Na ntá ó kjanxin ch'ín Timoteo chjasánrá Tesalónica chrónka ch'án kixin jína tjejórá naxa tinkachónkirá Ìnchéni, la ko naxa tjejórá tjuèhérá kichuára la ko chrónka ch'án kixin xraxinkáonrá tí jeheni tjinkáonrá chrókjuijitsjeheni tí jahará. Kjaxin jeheni xikaha tjinkaonni chrók'uikonni tí jahará.

⁷ Mé xikaha kíchó ni tjejó'tatsínkani kjuaxróxinhya ntihi na ntá kjónté kóchéhe asénni kuínhinni kixin kaín asánrá naxa tinkachónkirá Ìnchéni.

⁸ A ntá kuínhinni xikaha kixin jína tjejórá naxa tinkachónkirá Ìnchéni Jesús a ntá antsí kóchéheni.

⁹ Ntá imá tsjancheheni Dios kjuasáya kixin xikaha imá chéhe asénni kixin tí jahará tinkachónkirá ch'án.

¹⁰ Tie la ko nchakotjin chronóeheni Dios kixin tsjanjon ch'án kjuachaxin tsjijitsjeheni tí jahará inaá kixin naxa t'itjayan iso nkehe chrókjuakoহারáni naxa chrók'uitjára nkexrí jína chrókuinkachónkirá Ìnchéni.

¹¹ Tjejó'tjancheheni T'eni Dios la ko Ìnchéni Jesucristo kixin chrókjuinkitsani ch'án chrókjuijitsjeheni tí jahará

¹² la ko tjancheheni Ìnchéni kixin chrókjuinkitsa ch'án tí jahará kixin antsí má chró'tjuèhérá kichuára la ko chró'tjuèhérá kaín xín chojni éxí yóhe tjuàhará.

¹³ Tjancheheni ch'án kixin syntaxraxinkaonrá ch'án kixin kaín asánrá chrókuítekáonrá ch'án kixin ntá tsochóntahya asánrá ninkehó jie nkayakon It'eni Dios tió tsokjan Ìnchéni Jesús tsikao ch'án kaín tí sín ó tsíkótjóá.

4

Nkexrí tóxrxínhin Dios chrók'uéjóni

¹ Jahará kíchó ni chronóaharáni la kontaxraxinkaonráni tí kjuachaxin ihnié Ìnchéni Jesús kixin jína chrók'uejórá tinkachónkirá Ìnchéni éxí tjejóch'era jíe kixin éxí kjuakoহারáni. Mé xikaha jína sinchechéhérá Dios.

² Ó nohará tí nkehe kjuakuaxinráni kjuachaxin kuènte Ìnchéni Jesús.

³ Tí nkehe tjinkaon Dios kixin jína tjóá chrók'uejórá la ko chrókjuásinkoahyará jie í jnko chojni chjin ókjé.

⁴ Jnkojnkorá chrókónohará chróchontará jnkojnko ichjiánrá la ko jína chrók'uejorá chrótjuèhéra kíchuára.

⁵ Jehya kixin chrókjuakérá asánrá tí nkehe jínahya chrókjuich'era éxi ch'e tí chojni chónhya Dios.

⁶ Nijnkorá chrókjuich'iyehérá ichjién kíchuára xikaha kixin Ìnchéni mé imá sinchekjasóte ch'án tí chojni xikaha sich'e mé xikaha kjuíntaxraxinkaonráni senó.

⁷ Dios mé k'uíyeheni ch'án kixin jína chrók'uejóni, jehya kixin naxa chrókjuasinni jie.

⁸ A ntá tí sín chóntehya kjuasáyé tí nkehe tjakoni na mé jehya kixin chóntehya sín kjuasáyé chojni. Náhi. Chóntehya sín kjuasáyé Dios, tí nkexro kjuanjón tí Nchakuen chóntani.

⁹ A ntá tí tjuèhéra kíchuára la í t'ichjánxinhya naxa chrókjinni tsochronkani kixin nkexrí chrótjuèhéra kíchuára kixin jehe Dios mé tjetjakohará ch'án nkexrí chrótjuèhéra kíchuára.

¹⁰ Xráxín xikaha tjejoch'era tjuèhéra kaín tí sín kichó ni tjejó estado Macedonia. Kjánchó chronóaharání kichó ni kixin antsí má chrótjuèhéra kíchuára.

¹¹ Tóxakonhanrá kixin kjuaxróxin chrók'uejorá. Jnkojnkorá nohará nketi xra chrókjuich'exínrá tjára éxi k'uetuanhanráni.

¹² Na mé xikaha chrók'uikon tí sín chónhya Dios ntá chróchóntahará sín kjuasáya la ko chrók'uitjányanhya ninkehó nkehe chrókuicháxinhanrá.

Itsi Ìnchéni Jesús

¹³ Kichóni, tjínkavan kixin chrókónohará nkehe tsonhen tí sín tsík'en. Na mé tjínkavan kixin kánhyó chrótsjankamará sín chrókóyóahyará tí sín tinkáchónkihya sín Ìnchéni naxa chóenhya sín kixin chróxechón sín inaá.

¹⁴ Kuítekaonni kixin ik'uén Ìnchéni Jesús la ko xechón ch'án inaá la ko kjaxin titekaonni kixin Dios kjuínchexechón Jesús la ko tió tsokjan Jesús ntá sinchexechón Dios kaín xín tí sín tsík'en kuítekaon sín tí jehe ch'án.

¹⁵ Méxra chénkani ti jahará tí nkehe kjuako Ìnchéni kixin tí naxa tjejóchónni tió tsi ch'án na kjónté naxa tsitónxinhyani ntia, naxa tsochónhenni tí sín tsík'en.

¹⁶ Jehe Ìnchéni mé ts'inkajinxin ch'án nkaya nkajní la ko itsen tsonixja ch'án kixin tí kjuachaxin jie kuente ch'án la ko ts'èya tí ángel t'etoan la ko tsontáχρο tí trompeta kuente Dios. A ntá kaín tí sín tsík'en kuítekaon sín Ìnchéni Cristo la senó tsoxechón sín.

¹⁷ A ntá chr'éxin kaín xinni tjejóchónni la ko kaín xín tí sín tsíxechón mé jnkokoá tsochrinni kixin tí kjuachaxin jie kuente Ìnchéni. A ntá xrikjan tjuí tsoxetani ch'án. Mé xikaha ts'ejókoni ch'án jnkochrín.

¹⁸ Méxra xikaha chrókjuinchechéxínrá kíchuára tí tan i kixin xikaha tsonhen tió tsokjan Ìnchéni.

5

¹ A ntá tí yaon tsonhen tíhi kichó ni t'ichjánxinhya naxa tsokjinni í jnko nkehe tsinhínra.

² Jahará ó nohará jína kixin titàya itsi tí yaon tsokjan Ìnchéni éxi yóhe chrókui ijnko xichee tí tie a.

³ Ts'ejó sín itsjo sín kixin ijie kjuaxróxin tjejó sín kaín sín la ko ninkehó nkehe tsonhen sín. Ntá xrínahya titàya itsi tí kjuaxikaon jie la ko kjuachakon mé ts'itjányanxín tí kjuachón chróchóna sín éxi yóhe ijnko tjan tjejá xrínahya titàya tsjankíxin ts'óntáki tjan kixin sinchekokjhi tjan xjeen tjan na mé jehe tjan

xitjahya tsontáchro tjan “Náhí”, mé xíkaha jehe sín chóntahya sín nkerí tsaáxin sín.

⁴ Ntá jahará kichó ni sítiéhya tjejórá ntá chróchrakonhyará tí yaon itsi Ìnchéni. Tí náhí chróchrakonrá éxí chrókui ijnko xíchee chrókjuintachrakonrá.

⁵ Ntá jie kaín rá mé tjejórá tí ntia t'inkáséyan. Jeheni la jehya tjejóni tí ntia sítié a.

⁶ Méxra xíkaha chrók'uejójuahyani éxí tjejójua tí sín í so na mé chrók'uejótjeheni chrókjuenkayáxinni jína.

⁷ A ntá tí sín t'ajua la tjejójua sín tí sítié ó la ko tí sín tókoan la tókoan sín tí sítié a.

⁸ A ntá jeheni na tjejóni tí ntia t'inkáséyan t'ichjánxin kixin jína chrók'uejóni chrókjuasinhanyi jie. Chrókuinkáchónkini Ìnchéni la ko chrótjuèheni ch'án. Ntá jeheni na Ìnchéni ts'ayakonhenni ch'án tsaáxinni ch'án éxí tí ch'ín soldado t'inkáya ka tsík'óna chica kixin kohya nkehe tsonhen ntakuin ch'án. La ko chrók'uejóchónhenni itsi Ìnchéni tsaáxinni ch'án na mé éxí tí ch'ín soldado a xrasín ch'án nkehe tsík'óna chica t'ayakonhen kja ch'án kixin kohya nkehe tsonhen kja ch'án.

⁹ Kjueyáhya Dios tí jeheni kixin chrókjuinchekjásóteni ch'án. Náhí. Kjueyá ch'án tí jeheni kixin chrókuaáxinni Ìnchéni Jesucristo.

¹⁰ Jehe Jesucristo mé k'uenyákonhenni ch'án kixin chrók'uejókoni ch'án jnkochrín kjónté naxa tjejóchónni o kjónté ó tsík'enni tió tsokjan ch'án.

¹¹ Méxra xíkaha chrókjuinchechéhérá kichuára la ko chrókjuínkĩtsará kichuára kixin jína chrók'uejó sín éxí xráxín tjejoch'erá.

Ch'ín Pablo mé nhexraxinkaon ch'án tí sín tinkáchónki Cristo

¹² Kichóni chronoàharáni kixin chróchontehérá kjuasáyé tí sín tjejóch'e sín xra kuènte Dios ntiha tjejótjitaón sín ntia chrónka sín itén Ìnchéni.

¹³ Na mé chróchontehérá sín kjuasáya la ko chrótjuèhérá sín má kixin tí xra tjejóch'e sín. A ntá jahará kaín rá jnkójina chrók'uejokoará kichuára.

¹⁴ Méxra tétuanhanráni kichó ni kixin chrókjuéntuéhérá tí sín tjinkakonhya sich'e sín xra la ko chrókjuinchechéhérá asén tí sín kóxrjé asén sín la ko chrókjuínkĩtsará tí sín naxa noehya sín jína la ko chrókóninkákuénhyará ninkexró.

¹⁵ Tóxakonhanrá kixin chrókjuich'ehyará jínahya tí sín jínahya kjuít'ahará. Íchá jína chrókjuákoxinrá nkehe jína chrókjuich'erá kixin ts'ikon kaín xín chojni chjasintajni kixin jína tjejotjenkayáxinrá.

¹⁶ Méxra nchechéhérá asánrá jnkochrín.

¹⁷ Chrókjuítóehyará chrónixjehérá Dios jnkochrín.

¹⁸ Kjónté ichrén nkehe chrókónhanrá la chróchjehérá Dios kjuasáya kixin xíkaha mé tjinkaon ch'án chrókjuákoxinrá kixin tinkachónkirá Ìnchéni Cristo Jesús.

¹⁹ T'ók'ankahyará tí xrohi t'inkáséyanxín Nchakuen Dios.

²⁰ Chontehérá kjuasáyé nkehe tjako tí sín kichó ni chronkaxín sín kjuachaxin kuènte Nchakuen Dios.

²¹ Chrótsjehérá jína tí nkehe tjejóch'e sín. A ntá tí jína na chrókuítekáonrá.

²² Chrókjuítóhérá kaín xín nkehe jínahya.

²³ Dios mé tjanjon kaín kjuaxróxin ntá tjancheheni ch'án kixin jehe ch'án sinchetjóará ch'án la ko ts'ayakonhen ch'án nchakuanrá la ko asánrá la ko cuerpo kuéntará kixin tsochóntahya ninkehó jie tió tsi Ìnchéni Jesucristo.

²⁴ Dios tí nkexro kjueyá tí jahará mé jína ch'án la ko kaín tí nkehe ntáchro ch'án la tsoxiteyá.

Ch'ín Pablo kjuixixín nixjehē ch'án sín la ko tjanchehe ch'án Dios kixin chrókjuincheyaon tí jehē sín

²⁵ Kíchóni chrónóehérá Dios kixin tsjinkitsani ch'án kaín ni.

²⁶ La ko nixjehérá kaín xín tí sín kíchó ni ntiha tsehérá tja sín.

²⁷ T'etoanxínni tí kjuachaxin kuènte Ìnchéni kixin nchekuáxinrá tí xroon chr'anhánrá tshinín kaín xín tí sín kíchó ni ntiha.

²⁸ Kjuasáyé Ìnchéni Jesucristo sintayaonrá ch'án. Amén. Ó tjen.

Xroon yóxin ikjin ch'ín Pablo chr'énhen ch'án tí sín tinkáchónki Cristo chjasin Tesalónica

Ch'ín Pablo nixjehe ch'án tí sín Tesalónica

¹ Janhan Pablo la ko ch'ín Silvano la ko ch'ín Timoteo ikjinni tí xroon i chr'anhánrá kichó ni nínko chjasin Tesalónica kixin jnkokoá tinkáchónkini It'éni Dios la ko Ìnchéni Jesucristo.

² Kjuasáyé It'éni Dios la ko Ìnchéni Jesucristo chrókjuintayaonrá ch'án kixin kjuaxróxin chrók'uejorá.

Dios sinchekitoexín ch'án tí ijie chojni tió tsokjan Ìnchéni Cristo

³ Kichóni chrókjuancheheni Dios kjuasáya jnkochrixin kixin tí jahará. Na mé jína xikaha chrókjuich'eni kixin tinkák'ánkí tí tinkáchónkirá Ìnchéni Jesús la ko tinkák'ánkí tí tjuèhéra kichuára tjejorá ntiha.

⁴ Ntá chéheni chenkaní tí sín kichó ni kaín tí nínkoe Dios kixin naxa tjákoxinrá kixin naxa tinkáchónkirá Ìnchéni kjónté siín chojni nínkakonhanrá la ko kjónté t'atsínkará itsjé kjuaxróxinhya.

⁵ Tíha mé tjákoxinrá kixin tjinkaon Dios tsotsjehe ch'án kixin á tsjachará ts'ikonrá tí kjuachaxin kuènte ch'án. Méxra xikaha tjejotjasótexínrá jie.

⁶ Méxra ó nchoxon kixin sinchekjasóte Dios tí sín tjejónchekjasótiará jie.

⁷ Ntá tsjanjon ch'án kjuachaxin kixin ts'ok'áhará kixin ó kjuasótiará la ko kjaxin jeheni ts'ok'éheni tí yaon itsi Ìnchéni Jesús ts'inkajinxin ch'án nkaya nkajní tsikao ch'án kaín tí sín ángel t'etoan kuènte ch'án na mé tsikao ch'án xrohi nene.

⁸ Mé xikaha itsi ch'án kixin sinchekjasóte ch'án tí sín kuítekakuenhya Dios la ko kuítekakonhya tí tan jína kuènte Ìnchéni Jesucristo chrókuaáxin sín.

⁹ A ntá tí sín kuítekakonhya mé tsjasóte sín jnkochrixin ts'ítuenhen sín ts'axrjenta sín tí kohya Ìnchéni, í ts'ikonhya sín tí kjuachaxin t'etoanxin ch'án.

¹⁰ Xikaha tsonhen tí yaon itsi Ìnchéni tsjikosáyehe ch'án kaín xín tí sín kjuínchetjóá ch'án la ko kaín tí sín kuinkáchónki sín ch'án la ts'ikon sín tí kjuachaxin jie kuènte ch'án. Mé xikaha kjaxinrá jahará kixin ó kuítekáonrá tí nkehe kjuakocharáni.

¹¹ Mé xikaha jnkochrixin tjancheheni Dios kixin jína chrók'uejorá éxi tjinkaon ch'án chrók'uéjó tí sín kjueyá ch'án, la ko tjancheheni Dios kixin chrótjáhará ch'án kjuachaxin kuènte ch'án kixin chrókjuinkitsará ch'án kixin chrókjuachará ch'erá kaín tí xra jína tjinkáonrá chrókjuich'erá kixin tinkáchónkirá ch'án.

¹² Mé xikaha kaín xínrá tsjikosáyehérá tí ihnié Ìnchéni Jesucristo la ko jehe ch'án mé kjaxin tsjikosáyahará ch'án kixin tinkáchónkirá ch'án. Mé xikaha kjuasáyé Dios la ko Ìnchéni Jesucristo kixin kuikonóeheni ch'án.

2

Tsonoxín ijnko ch'ín jínahya

¹ Kichóni, a ntá tí tsi Ìnchéni Jesucristo la ko tsojnkotséni tí tjen ch'án jehe ch'án, méxra xikaha chrónóaharáni

² kixin chrókjuítóxinhyará tjoka tí nkehe chrókjuenkayáxinrá, la ko ní chróchrakonhyará tí chróntáchro jnkójín nkexro tónohe sín kixin ó kjuixraká

tí yaon itsi Ìnchéni, la ko chróchrakonhyará xíkaha chrókuínhínrá chróchronka ijnko chojni tjako, la ko chróchrakonhyará tí tsochronka sín kixin ó k'uáyéhe sín ijnko xroon éxí jeheni tsíkjanjonni chrónka kixin xíkaha tsonhen.

³ Títóéhyará kixin jnkojín nkexro chrókjuít'ayahará xíkaha. Naxa tsihya tí yaon ntá senó itsjé chojni tsonínkakohen sín Dios, la ko tsonoxín ijnko ch'ín jínahya chóna jie, na ntá tíha mé tsjasóte jnkochrín.

⁴ Tsjak'e ch'án tsjanjonko ch'án kaín xín nkehe tinkáchónki chojni, mé tsjak'etjaxín ch'án nkaxenhen tí nínkoe Dios kixin jehe ch'án mé sich'éna asén ch'án éxí Dios tí jehe ch'án.

⁵ ¿Á xráinkákonhyará kixin xíkaha k'uéxrjanka senó tí naxa k'uéjóni jnkokoá?

⁶ Ntá jahará ó nohará nkehe tí kjuachaxin naxa chónthe kixin naxa tjexrakáhya tí yaon tsonoxín tí ch'ín jínahya.

⁷ Ntá jie imó ch'e xra tí kjuachaxin jínahya. Kjónté naxa t'itjayan kixin sáchrókjuí tí nkexro chónthe.

⁸ A ntá tí ch'ín jínahya tsonoxín ch'án. Ntá tió tsi Ìnchéni Jesús ntá tí itén ch'án ts'axrjexín ir'va ch'án ó mé ts'enxín tí jínahya a kixin mé xíkaha sinchek'itjayanxín ch'án tí jínahya tí kjuachaxin jié tsíkao ch'án.

⁹ Méxra tí ch'ín jínahya mé tsíkao ch'án tí kjuachaxin kuente ch'ín Tsochren la mé xíkaha tsochóna ch'án kjuachaxin jié tsjakoxín ch'án sich'iyaxín ch'án tsjasin ch'án kjuaxroan ntoáhya.

¹⁰ Mé xíkaha kaín nkehe jínahya sich'iyexín ch'án tí sín xráxín ts'itjayan sín kixin chrohya sín chrókuitekaon sín tí tan chaxín ntoá chrókuaáxin sín.

¹¹ Méxra tsítóhe Dios tí jehe sín kixin tsitekaon sín kaín nkehe chaxínhya

¹² kixin ntá tsjasóte kaín tí sín kuítekakonyha sín tí tan chaxín chrókuaáxin sín na mé antsí kóxrjínhin sín chrókjuasín sin jie tsjasótexín sín.

Dios mé kjueyá tí jehe sín kixin chrókuaá sín

¹³ Ntá jeheni chrókjuancheheni Dios kjuasáya jnkochrín kixin jahará kichó ni chojni tjuahará Ìnchéni kixin tí tsíkjeýa Dios tí jahará kixin senó chrókuaáxinrá tí Nchakuen ch'án tsotjuáxinrá la ko tí itén ch'án chaxín ntoá kuítekáonrá.

¹⁴ Méxra xíkaha k'uíyahará Dios kixin chrókuaáxinrá tí itén ch'án tjakoni kixin ntá tsjachará ts'ikonrá tí kjuachaxin jié kuente Ìnchéni Jesucristo.

¹⁵ Mé xíkaha kichó ni, jína chrók'uejorá chrók'uitjayanhyará tí nkehe kjuakoharáni tió k'uéjóni jnkokoá la ko tí nkehe chrónka tí xroon ikjinni k'uayéhérá.

¹⁶ Ntá Ìnchéni Jesucristo la ko It'éni Dios na mé tí nkexro kjuasáyé ch'án tjuèhe ch'án tí jeheni la ko nchechéhe ch'án asénni jnkochrín la ko kjuasáyé ch'án tjejóchónhenni itsi Ìnchéni

¹⁷ na mé sinchchéhe ch'án asánrá la ko tsjanjon ch'án kjuachaxin kixin ntoá chrók'uejorá ntá jína chrónixjará la ko kaín xra jína chrókjuich'erá.

3

Nixjehérá Dios kixin tsjinkítsa kaín ni

¹ Méxra kjuixixín chrónóaharáni kichó ni kixin chrókjuanchehérá Dios kixin chrókjuinkítsa ch'án tí jeheni kixin tjoka sáchrókjuikjakoni itén Ìnchéni nkuíxín kixin ntá tsinhin chojni la tsjikosáyehe sín ch'án éxí yóhe kuítekáonrá jahará.

² Kjaxin nixjehérá Dios kixin chrókjuinkitsani ch'án kixin kohya nkehe chrókónhenni tí síin chojni jínahya nínkakonhenni kixin kénhya sín tinkáchónki Ìnchéni.

³ Ntá Ìnchéni mé chaxín jína ch'án la jehe ch'án tsítóehya ch'án tí jahará naxa tsjinkitsará ch'án kixin jína ts'ejorá la ts'ayakonhanrá ch'án kixin kohya nkehe jínahya tsonhanrá.

⁴ Ó noheni kixin Ìnchéni la tsjinkitsa ch'án tí jahará kixin naxa sich'erá xra éxi k'uetuanhanráni.

⁵ Ìnchéni tsjinkitsará ch'án tsonohará kixin Dios la tjuahará ch'án la ko tsjinkitsará ch'án kixin chrókóninkákonhyará éxi kónínkakhya Cristo.

T'ichjánxin chrókjuich'eni xra

⁶ Kíchóni t'etoxínini tí kjuachaxin ihnié Ìnchéni Jesucristo kixin chrók'uaxrjekjanxínrá tí sín kíchó ni tjinkakhya sich'e xra la ko xrihya sín éxi kjuakoharáni.

⁷ Ó nohará kixin nkexrí chrók'uejorá chrókjuákoxinrá éxi k'uéjó tí jeheni kixin tí k'uéjókoaráni la jehya kixin kjuích'ehyani xra.

⁸ Jehya kixin kjóneni niotjé jnkójín nkexro ntá chrókjuenkahyani. Náhi. Kóxakonhenni nchakotjin la ko tie kjuích'eni xra kixin ninkehó chóntiaxinhyani tí jahará kixin chrókjuánjonrá tí nkehe chrókjóneni. Náhi.

⁹ Kjónté chóntani kjuachaxin chrókjuanchaharáni kixin chrókjuínkitsará tí jeheni kjánchó jeheni na kjuích'eni xra kjuákoxinini kixin xikaha jahará chrókjuich'erá xra.

¹⁰ Kíxin tí naxa k'uéjóni jnkokoá ntiha k'uetoxanni kixin: Tí nkexro tjinkakhya ch'e xra la kjaxin chrókjonehya.

¹¹ Ó kuínhinni kixin tjejorá jnkójínrá ninkehó xra ch'ehyará a ntá kjuach'ia ó xríkoará.

¹² A ntá tí kjuachaxién Ìnchéni Jesucristo t'etoxínini la ko chrónóexinni tí sín a kixin chrókóninkakhya sín chrókjuich'e sín xra kixin chrókjuacha sín chichaon chrók'uite tí nkehe chrókjone sín.

¹³ Ntá jahará kíchó ni, chrókóxrjehyará chrókjuich'erá tí nkehe jína.

¹⁴ A ntá tí tjen jnkójín nkexro titekakhya tí nkehe t'etoxínini tí xroon i la tsjehérá jína nkexro tíha la ntá chrók'uitoahyará ch'án la ntá chrókósuèhe ch'án.

¹⁵ Kjánchó jehya kixin chrókjuánjonkoará ch'án. Náhi. Chrókjuinchexrinxínkáonrá ch'án jnkójína éxi ijnko chojni kíchó ni.

Ó kjuixixín nixja ch'ín Pablo

¹⁶ Ìnchéni mé tjanjon tí kjuaxróxin la ko naxa tsotjáhará ch'án kjuaxróxin jnkochrín kjónté ichrén nkehe chrók'uatsínkará. Jehé ch'án mé t'ayakonhanrá ch'án kaín rá.

¹⁷ Janhan Pablo tjaná mé kjinxian tí nkehe nixjahará. Mé xikaha chrókjuátsoanxínrá tí letra kaín carta tsíkjan.

¹⁸ Ntá Ìnchéni Jesucristo mé kjuasáyé sintayaonrá ch'án kaín rá. Amén. Ó tjen.

Tí xroon saoxín ikjin ch'ín Pablo chr'énhen ch'án tí ch'ín Timoteo

Ch'ín Pablo nixjehe ch'án tí ch'ín Timoteo

¹ Janhan Pablo kjueyána Jesucristo la ko Dios mé tsík'etuanna mé jehe ch'án mé tí nkexro nchekaá chojni. La ko kjaxin k'uetuanna Ìnchéni Jesucristo tí nkexro tjejóchónhenni itsi.

² Ikjian tí xroon chr'anhan jaha Timoteo. T'íkuan éxí xjanna tí jaha kixin jaha tinkachónkia Cristo Jesús. Kjuasáyé It'éni Dios la ko Ìnchéni Jesucristo chrókjuintayavan ch'án la ko chrókuikonóaha ch'án kixin kjuaxróxin tsjak'e jaha.

Chrókjuinchehráxinkaon ch'án sín kixin chrókuitekakuenhya sín tí nkehe chaxínhya

³ Éxí xrjannóaha tió sákjuia estado Macedonia la mé jaha chrókuitoaha tí chjasin Éfeso la ntaha chrókuétuénhén iso tí sín ntiha kixin chrókjuakohya sín tí nkehe ntoáhya.

⁴ La ko chrókuétuénhén sín kixin chrókuahya sín kuenté tí cuento tsíchronka chojni tí ósé a. Tí tinhin sín tíha la imá tjachaxin kichó sín la ó chónkó tíha. Kaín tíha la í tsjinkitsahya kixin sinchexiteyéheni Dios kixin tinkáchónkini ch'án.

⁵ Tí nkehe tjinkaonni la chrótjuèheni kichó ni kaín ni kixin ó kótjóá asénni la ko ó noheni kixin jina tjenkayáxinni la ko kaín asénni tinkáchónkini Cristo.

⁶ Iso sín la kjuíchròe sín kixin itjo tí nkehe chónkó.

⁷ Tjinkaon sín chrók'óna sín maestro chrókjuako sín tí ley a ntá jehe sín tienxínhya sín tí nkehe tjako sín kjánchó ntáchro sín kixin ó ntoá tí nkehe tjako sín, ntá chaxínhya.

⁸ A ntá jeheni la ó noheni kixin tí ley la jina tí chrokjuakoni éxí tjinkaon Dios.

⁹ Ó noheni kixin tí sín tjasinhya jie t'ichjánxienhya sín tí ley tsík'etoan Moisés. Tíhi la t'ichjánxinhin tí sín titekakonhya la ko tí sín jiehe la ko tí sín jínahya tjasin jie la ko tí sín chóntahya kjuasáyé Dios la ko tí sín t'óyán it'é la ko iné sín la ko kaín tí sín tjàya.

¹⁰ La ko tí sín tjasinko jie ijnko chojni chjin ókjé la ko tí sín jnkokón ntoa sín takja kichó sín la ko tí sín teé chojni ntá nchekji, la ko tí sín ch'ia la ko tí sín nchenohe Dios ntá chaxínhya. Mé tí ley mé chrókuinhin kaín tí sín ch'e tí nkehe jínahya la nínkakonhen tí nkehe jina tjakoni.

¹¹ Tí nkehe tjakoni mé chaxín tí tan jina sinchekaá chojni la tí Dios tjetoan mé k'uetuanna kixin tsjàkua tíha.

Ch'ín Pablo kjuanchehe ch'án kjuasáyé Dios

¹² Tjáncháha kjuasáyé Ìnchéni Jesucristo kixin imá kjuínkitsana ch'án la ko k'uíkon ch'án kixin jina sít'aha ch'án xra ntá chjina ch'án tí xra i.

¹³ Mé xikaha kjueyána ch'án kjónté senó imá k'uék'ántaxínhan tí sín tinkáchónki ch'án la ko k'uéchonkíha sín la ko chrók'oyán sín. Kjónté la Dios imá kujkonóehe ch'án tí janhan kixin ó nohe ch'án kixin k'uékinkachónkihya janhan tí jehe ch'án la ko k'uénonahya nkehe tí xra k'uékjit'a.

¹⁴ Méxra Ìnchéni antsí má kjuíncheyaonna kixin ntá kjuanjon ch'án kjuachaxin kixin tsinkachónkia ch'án la ko tsotjuaha ch'án. Mé xikaha kaín ni chóntani tí kjuachaxin tinkáchónkini Cristo Jesús.

¹⁵ Tíhi mé chaxín la kaín ni chrókuitekaonni. Ikui Jesucristo chjasintajni kixin sinchekaá ch'án tí sín kjuasin jie. Ntá janhan mé antsí má kjuásian jie.

¹⁶ Kjónté xíkaha kjuít'a la Dios antsí má kuikonóana ch'án tí janhan kixin xíkaha kjuakoxin Jesucristo kixin kónínkakonhya ch'án. Mé xíkaha tsjákuaxian kaín nkexro tsitekaon tí jehe ch'án kixin tsochóna sín kjuachón jnkochrín.

¹⁷ Ntá jnkochrín tsochónteheni kjuasáyé tí Rey t'etoan. Jehe ch'án mé ijnko nkexro xráxín tjen la mé ijnko nkexro chónhya ts'en la xitjahya ts'ikonni ch'án. Jehó ch'án mé Dios la imá nohe ch'án. Amén.

¹⁸ Timoteo, éxí xjanna t'íkuan tí jaha, la kaín tí xra i tjaha kixin tsjanjonkoa tí jínahya la tsjacha kixin tinkachónkia jína Inchéni la ko tjenkayáxian tí nkehe jína. Mé xíkaha sinchexiteyá tí nkehe kuínhín senó kixin tí sín kíchó ni chrónkaxín ihnié Dios.

¹⁹ Í so sín la kjuenkayáxinhya sín tí jína ntá kjuíchròe sín kuitohe sín tí nkehe tinkáchónki sín.

²⁰ Mé xíkaha kónhen ch'ín Himeneo la ko ch'ín Alejandro. Janhan kjuánjuan kjuachaxín kixin ch'ín Tsochren mé sinchekjasóte sín kixin mé xíkaha ts'itja sín kixin í ts'ántaxíenhya sín Dios.

2

Nkexrí chrónixjeheni Dios

¹ A ntá saoxín la xrjanóaha kixin kaín chojni chrónixjehé sín Dios la chrókjuanchehe sín kjuasáyé ch'án kixin chrókjuinkitsa ch'án kaín xín chojni.

² Chrókjuanchia sín kixin Dios imá chrókjuinkitsa ch'án kaín tí sín t'etoan la ko tí sín gobierno kixin ntá kjuaxróxin ts'ejóni la ko sinchexiteyéhéni Dios la ko ntoá ts'ejóni.

³ Xíkaha mé imá jína la tóxrjínhin Dios, mé tí nkexro tsaáxinni.

⁴ Jehe ch'án mé imá tjinkaon ch'án kixin tsaá kaín xín chojni la ko tjinkaon ch'án kixin tsonohe chojni tí nkehe chaxín ntoá.

⁵ Mé itjen jnkokoáxón Dios la ko itjen jnkokoáxón nkexro nixjayákonhenni kixin tsochóxinni Dios. Tíha mé Jesucristo mé k'óna chojni ikui ch'án chjasin-tajni.

⁶ Jehe Jesucristo mé k'uenyákonhenni kaín xinni, kjuenkayákonhen ch'án ijieni kixin tsaáxinni ch'án. Táha mé xiteyá tí tsintáchro Dios ósé kixin xíkaha tsonhen ch'án.

⁷ Méxra tí xra mé kjueyána Dios kixin tsjékákoha tí sín jehya judío kixin tsinkáchónki sín Jesucristo la ko tsonohe sín tí nkehe chaxín. Janhan mé tinkachónkia Cristo la xrjanka tí nkehe chaxín mé t'ayahya.

⁸ Méxra tjínkavan kixin kaín tí sín ntoa mé chrónixjehé sín Dios la chrókjuaya sín tja sín la chrókótjóá asén sín la ko chrókónínkakonhya sín la ko chrókjuehya sín kjuanínkaon.

⁹ A ntá tí chojni chjin mé ntoá chrók'uitsa sín ka la chrókjuinchehnkehya sín la ko chrókjuasin chóntahya sín kaxihi sín nkehe tjete xroxrjò náxrjón la ko chrók'uitsahya sín ika imá tjete.

¹⁰ Íchá jína kixin tí chojni chjin chrókjuich'e sín tí xra jína éxí chrókjuich'e kaín tí sín tsíkjinchetjóá Dios.

¹¹ Tí chojni chjin t'ichjánxin chrókuinhin sín itén Dios la chrónixjahya sín la ko chrók'uetóanhya sín.

¹² A ntá janhan tjánjonhya kjuachaxín kixin chojni chjin chrókjuako tí nchónhya chojni siín la ko tjánjonhya kjuachaxín chrók'uetuñhen sín chojni ntoa. Jehe sín la tání sín chrók'uejé sín

¹³ kixin saoxín la Dios kjuích'éna ch'án tí ch'ín Adán la ntá chr'éxin kjuích'éna ch'án tjan Eva.

¹⁴ A ntá ch'ín Adán la ninkexró kjuích'iyehya ch'án. Náhí. Tí tjachjin mé tsíkitekakonhen tjan tí nkexro tsíkijich'iyehhe tjan ntá xíkaha xrankíxixín k'uíxin jie.

¹⁵ A ntá tí chojni chjin la kjónté xíkaha kjuích'e sín la Dios sinchekaá sín tí jína ts'ayakonhen sín xjeen sín la tí chaxín tinkáchónki sín Dios la ko tjuèhe sín ch'án la ko ntoá ts'ejó sín la ko jína tsjenkayáxin sín.

3

Jína chrók'uejó tí sín t'etuenhen tí nínko

¹ Ijnko nkehe chaxín tjonka. Tí nkexro tjinkaon sich'e xra kuènte nínko mé imá jína xra tjinkaon ch'án.

² Tí ch'ín chrók'uetōan mé ntoá chrókjuak'e ch'án kixin kohya nkexro chrók'ueka ch'án jie la ko kjaxin chróchónta ch'án jnkokoá ichjién ch'án ó la ko kjaxin chrókjuak'e ch'án jína la ko chrókjuenkayáxin ch'án jína la ko chróchónta ch'án kjuasáyé ch'án la ko kjaxin jína chrónixjehē ch'án tí nkexro tjiji ntōe la ko kjaxin chrókónohe ch'án tí nkehe chrókjuako ch'án.

³ La ko kjaxin chrókókoanhya ch'án la ko chrókjuehya ch'án kjuanínkaon la ko kjaxin chrókóxrjienhya ch'án kixin chrókjuacha ch'án nchónhya chichaon. A ntá chrókójiehya ch'án la ko kjuaxróxin chrókjuak'e ch'án la ko chrókóxrjienhya ch'án chróchónta ch'án itsjé chichaon.

⁴ Jehē ch'án mé kjaxin jína chrók'uetuenhen ch'án tí sín tjejó ntōe ch'án la ko chrókjuentuēhe ch'án xjeen ch'án kixin tsitekaon xjan la tsjikosáyehe xjan it'é xjan.

⁵ Tí tsjachahya ch'án ts'etuenhen ch'án tí sín tjejó ntōe ch'án la ¿ntá nkexrí chrók'uetōan ch'án tí nínko kuènte Dios?

⁶ Íchá jína kixin jehya ijnko nkexro na ntá k'uíxehen chrókjuako kixin tí nkexro na ntá k'uíxehen la imá chrókjuinchehnke ch'án la ntá chrókjuasin ch'án jie éxí kjuasin ch'ín Tsochren ijie senó.

⁷ Kjaxin t'ichjánxin kixin kaín xín tí sín naxa tinkáchónkihya Ìnchéni mé tsochónta sín kjuasáyé tí ch'ín t'etōan a. Tí náhí la ts'eka sín ch'án jie ntá tí xíkaha la ch'ín Tsochren tsjacha tsjachrōe tí ch'ín a ntá tsjasin ch'án jie.

Nkexrí chrók'uejó tí sín tsjinkítsa tí xra kuènte nínko

⁸ Kjaxin tí sín diácono ch'e xra kuènte nínko la kjaxin ntoá chrók'uejó sín kixin chróchóntehe sín kjuasáyé chojni. Kjaxin t'ichjánxin kixin chrókjuinchesteyá sín tí nkehe ntáchro sín la ko chrókókoanhya sín la ko kjaxin chróchóntiāxinhya sín itsjé chichaon chrókjuacha sín.

⁹ T'ichjánxin chrókónohe sín jína tí nkehe tinkáchónki sín kixin jehē sín chróxaxinkaon sín á nchoxon tí xra ch'e sín.

¹⁰ Saxín chrótsjehe kaín chojni á ninkehó jie chóntahya tí nkexro la ntá tí chaxín jína jehē ch'án la ninkehó jie chóntahya ch'án ntá jína ts'ixehen ch'án tí xra kuènte nínko.

¹¹ La ko kjaxin tí chojni chjin mé chrók'uejó sín jína kixin chróchónta sín kjuasáyé sín. Kjaxin chrókuinkáchónkihya sín kjuach'ia la ko jína chrók'uejó sín la ko chrókjuinchesteyá sín kaín nkehe.

¹² Tí sín diácono la mé chróchónta sín jnkokoá ichjién sín la jína chrók'uetuenhen sín xjeen sín la ko jína chrók'uetōan sín ntōe sín.

¹³ T'ichjánxin ijnko xra jína sich'e sín kixin ntá tsjacha sín ts'áyehē sín ijnko nkehe jína tsjanjon Ìnchéni la ko kjaxin tsoxuehya sín tsochrónka sín nkexrí tinkáchónki sín Cristo Jesús.

Dios mé kjuínchenoheni tí nkehe k'uékiexínhyani

¹⁴ Tjínkavan tjoka chrókjuasántsjaḡa tí jaha kjánchó senó tsokjian tí xroon i.

¹⁵ A ntá tí tsoxrjenna isé ntá kjónté tsonoha nkexrí chrók'uejó tí sín naxa kjéhya Dios mé tí sín t'óna nínkoe Dios tjechón. Jeheni kaín ni mé tjejó'tayakonhenni tí tan chaxín ntoá.

¹⁶ Ninkexró chróntáchrohya kixin chaxínhya tí nkehe tinkáchónkini mé ijnko nkehe imá jié tíha la ninkexró k'uénoehya tí senó a.

Dios mé ikui k'óna chojni;

ikui ch'án kjuakoxin ch'án kjuachaxién Nchakuen Dios chóna ch'án kixin jína tí jehe ch'án.

La ntá tí sín ángel mé k'uíkon sín ch'án

la kuenté chjasintajni mé ó kuínhin sín nkehe chrónka ch'án

ntá itsjé sín kuítekaon sín ch'án.

Ntá Dios k'uáyéhe tí jehe ch'án nkaya nkajní.

4

Tí sín kuítóhe tinkáchónkihya Cristo

¹ A ntá ntáchro Nchakuen Dios kixin tí chjina tsjeje chjasintajni mé iso sín mé tsítóhe sín í tsinkáchónkihya sín Ìnchéni la ntá tsitekaon sín nchakuen tí jínahya sich'iyehé sín la ko tsitekaon sín tí nkehe tjako tí sín demonio.

² Mé tsinhin sín tí nkehe tjako tí chojni tjuáhya la ch'ia sín. Kjónté imá tsjasin sín jié la í tsosuèhya sín kixin éxí tsíchján tí tjenkayáxixín sín la í tjenkayáxinhya sín jína.

³ Jehe sín mé tjinkakonhya sín kixin chrókótehe chojni la ko kjaxin tjinkakonhya sín kixin chrókjóneni nto. A ntá jeheni ó noheni kixin Dios mé kjuích'éna ch'án kaín xín nkehe ineni la tjinkaon ch'án kixin tí jeheni tinkáchónkini ch'án la ó noheni tí tan chaxín ntoá mé chrókjuancheheni ch'án kjuasáya ntá chrókjóneni.

⁴ Méxra kaín xín tí nkehe kjuích'éna Dios la jína la kohya nkehe chróntáchroni kixin jehya jína sineni. Chrókjuancheheni Dios kjuasáya la ntá jína chrókjóneni

⁵ kixin tió tsoxraxinkaonni itén Dios la tsonixjeheni ch'án la ntá sincheyaon ch'án tí nkehe sineni.

Ijnko chojni jína ch'ehe xra Jesucristo

⁶ Jaha tjácohé tí sín kichó ni kaín tí nkehe i la ntá xíkaha imá jína sich'ehé xra Jesucristo la ko antsí tsjinkitsa ch'án ts'ánkí kjuaxrexinkaon kuéntá tí tinkáchónkia tí tan kuénté ch'án la ko naxa tjákua tí nkehe jína ó xráqoha.

⁷ Jaha mé tahya kuenté tí cuento chónkó la ko tí nkehe ntoáhya tinkáchónki iso sín. A ntá jaha la chrókuítóéhya chrókuinkáchónkia Dios.

⁸ Tí chojni tsítán la jína tíha kjánchó antsí má tjetoan chrórxaxinkaonni Dios. Tíha la tsjinkitsa kixin jína xritjejóni ijie la ko kjaxin tsjinkitsa kixin ts'áyéheni kjuachón jnkochrínxín tió tsokjan Ìnchéni.

⁹ Kaín tíhi mé chaxín la kaín chojni chrókuítekaon.

¹⁰ Mé xíkaha kjónté t'ántaxínhinni chojni la jína ch'eni tí xra i kixin tinkáchónkini Dios tjechón. Jehe ch'án chaxín sinchekaá ch'án kaín tí chojni titekaon tí jehe ch'án.

¹¹ Kaín tíha mé t'ichjánxin tsétoan la ko tsjàkua.

¹² Jaha chrókuítóéhya kixin chrokjuanoá sín kjónté naxa ntasoyá. Chrókjuákoexián tí sín tinkáchónki Ìnchéni nkexrí chrónixja sín la ko nkexrí ntoá chrók'uejó sín la ko nkexrí chrótjuèhe sín Dios la ko nkexrí chrókuítekaon sín Ìnchéni la ko nkexrí tjóá chrók'uejó sín.

¹³ Nachrohe tsjasán la jaha sinchekuáxian tí xroon itén Dios kixin tsinhin kaín sín la ko sinhexraxinkávan kaín tí sín kichó ni la ko tjákohé sín.

¹⁴ Sincheck'itjáyanhya tí kjuachaxién Dios k'uayéhé tió tí sín t'etōan kuènte ninko kjuachaxién Dios k'uejotja tja sín chrítaón ikjá.

¹⁵ Chrókóxakonhan chrókjuinchesteyá kaín tíha kixin kaín chojni tsotsjehe sín kixin jína noha.

¹⁶ Chrókjuenkayáxian jína tí nkehe tjákua kixin jína chrókjuak'e jaha, chrókjuinchesteyá kaín nkehe la ntá tí xikaha sich'e la tsaá jaha la ko tí sín tjejótinhin tjákua la tsaá sín kjaxin sín.

5

Jína chrók'uejó tí sín tinkáchónki Cristo

¹ Jaha la chrókóninkákuenhya tí sín ó táda. Náhi íchá jína chrónixjehé sín jnkójina éxi chrónixjehé it'á. La kjaxin tí sín ntasoá chrónixjehé sín éxi chrónixjehé kichuá mero.

² A ntá tí sín ó nána la mé chrónixjehé sín éxi chrónixjehé iná xikaha. Kjaxin tí sín tjarisoá mé jnkójina chrónixjehé sín éxi chrónixjehé kichuá mero la kjaxin chróchóntehé sín kjuasáya.

³ La ko kjaxin chrókjuínkítsa tí síchjin tsíkók'án la ko nchekitonhén sín nkehe sine sín tí chaxín kohya nkexro tsjinkítsa sín.

⁴ A ntá tí chojni chjin tsíkók'án chóna xjeen o chóna ìnté, a ntá tí jehe sín mé chrók'uitja sín chrókjuínkítsa sín kixin sine tí sín kjéhya sín. Tíha mé chrókjuenkaxin sín tí it'é, iné sín kixin kjuínchek'ánkí sín, kixin xikaha mé jína tóxrjínhin Dios.

⁵ Tí tjan chaxín tsíkók'án na jehó tjan tjan tjan mé jehó Dios tinkáchónki tjan la imá chrónóehé tjan Dios tie la ko nchakotjin.

⁶ A ntá tí sín tsíkók'án ixri sín tjasin sín jie la kjónté tjejóchón sín la éxi tsík'en sín xikaha tjejó sín.

⁷ Tétuénhén tí sín kixin sinchesteyá sín kaín tíha kixin tsokohya nkexro tsjanchia jie.

⁸ A ntá tí nkexro tóxakuenhya kixin tí sín naxa kjéhya la ko kjaxin tóxakuenhya kixin tí sín tjejó ntōe ch'án mé xikahó tjákoxin kixin ninkehó tinkáchónkihya ch'án Dios. Mé xikaha antsí chóna ch'án jie a ntá tí sín tinkáchónkihya Ìnchéni la kényó.

⁹ Tí ts'ínixín ihnié tí sín tsíkók'án la chrók'uínixín jehó tí sín chóna sesenta nánó la ko tí sín k'uéchóna sín jnkokoá xii.

¹⁰ Kjaxin chrókjuákoxin tjan kixin jína ch'e tjan xra la ko chrókjuákoxin tjan kixin jína kjuínchek'ánkí xjeen tjan la ko kjaxin jína nixjehe tjan tí nkexro tjiji ntōe tjan la ko kjaxin k'uàyakonhen tjan tí sín tinkáchónki Cristo la nchehnkehya tjan la ko kjaxin kjuínkítsa tjan tí sín níhi la ko í so xra jína kjuích'e tjan.

¹¹ A ntá chrók'uénixínhya ihnié tí sín tsíkók'án naxa tsjéhya nánó chóna kixin tsontáchro asén sín kixin í jnko chojni ntoa tsotehe sín inaá la ntá tsítóhe sín ixra kuènte Cristo.

¹² Ntá xikaha tsjasin sín jie kixin sinchesteyáhya sín tí nkehe tsintáchro sín.

¹³ Kjaxin sátsji sín ijnko nchia la í jnko nchia la ntá tsoséhe sín la ntá kjaxin xriko sín kjuach'ia la ko ch'éna sín kjuach'ia la kaín nkehe nixja sín la jehya jína tí xikaha chrónixja sín.

¹⁴ Méxra tí sín tsíkók'án naxa tjarisoá sín la íchá jína chrókótehe sín chróchóna sín xjeen sín la ko chrók'uàyakonhen sín ntōe sín. A ntá tí xikaha la tí sín nínkakonhan la chrókjontahya sín tí jaha.

15 **A** ntá iso tí sín tsíkók'án ó kuítóhe sín tinkáchónki sín Ìnchéni kixin ch'ín Tsochren tsíkjachròe sín.

16 **A** ntá jnkojín chojni tinkáchónki Cristo ts'ikon sín kixin tsíkók'án tí síchjin kjéhya sín ntá t'ichjánxìn tsjinkĩtsa sín kixin sine tí sín a kixin tsochóntiahya sín tí nìnko tsjinkĩtsa. Méxra jehó tí sín chaxín tsíkók'án chóntahya ninkexró tsjinkĩtsa mé chrókuinkĩtsa tí nìnko.

17 Tí nkexro jína t'etoan xra kuènte nìnko la jehe sín chrókuacha sín la ko kjaxin antsí chrókuikosáyehe chojni tí sín chaxín xra ó tjejóchronkaxín sín la ko tjako sín.

18 Kixin xroon itén Dios mé ntáchro kixin: “Chrók'uéjóyáhyará kampoxa ir'va tí koxinta tjejóch'e xra”, la ko kjaxin ntáchro kixin: “Tí sín ch'e xra la síin kjuachaxin chrókuacha sín.”*

19 Chrókuahya kuenté jnkojín nkexro tsjikao kjuach'ia t'eka jie tí nkexro t'etoan xra kuènte nìnko. T'ichjánxìn tsonoxín yaá o iy'á sín tsochrónka kixin chaxín chóna jie tí nkexro a.

20 Chrókuéntuéhé tí sín tjasin jie nkayakon kaín sín kixin ntá tsinhin tí í so sín kixin tsochrakon sín, í tsjasinhya sín jie.

21 Tétuaxian kjuachaxién Dios la ko Ìnchéni Jesucristo la ko tí sín ángel kjueyá ch'án kixin jnkokón tsjéntuéhé kaín chojni la ko jnkokón tétuénhén sín kaín tí nkehe xrxanka.

22 Chrókuéyáhya chjini jnkojín sín kixin ts'etoan sín xra kuènté nìnko kixin tí chróchóna sín jie la kjaxin jaha chrókuamá tí jie. **A** ntá jaha chrókuítóhé kaín nkehe jínahya.

23 Jaha la jnkoyaxón tóniha tjtóe tsaa. Jehya ìnta ó chrók'uia. Kjaxin intsi xranvino chrók'uia ntá chrókuítóaxián jína.

24 Tí ijje jnkojín chojni la t'ikonni noxín tí naxa kuítóexínhya ijje sín. **A** ntá í so sín nóxinhya tjasin sín jie kjánchó tíó tsjixixín la tsonoxín tí jie tjasin sín.

25 Mé xikaha kjaxin ó t'ikonni kixin iso chojni imá ch'e sín tí xra jína. **A** ntá í so sín kjónté t'ikonhyani la xitjahya tsjak'emá sín tí nkehe jína ch'e sín.

6

1 Tí sín ch'exín xra mé t'ichjánxìn tsochóntehe sín kjuasáya tí lamo kuènte sín, kixin ntá tí í so sín la ts'ántaxiéhya sín ihnié Dios la ko ts'ántaxiéhya sín tí nkehe tjakoni.

2 **A** ntá tí sín ch'exín xra la chóna sín lámóe sín tinkáchónki Cristo la mé chrókuítóehya sín tsjikosáyehe sín tí lamo kixin jnkokoá kichó sín. La mé antsí jína chrókuinkĩtsa sín kixin ó nohe sín kixin tjinkĩtsa sín ijnko nkexro tinkáchónki Cristo la chrótjuèhe sín kichó sín. Jaha mé tjákehé sín kaín tíha.

Tí nkehe tinkáchónkini tsochèxinni

3 Iso sín tjako tí nkehe jehó sín tjenkayáxin sín la tóyóehya tí nkehe jína kjuako Ìnchéni Jesucristo la ko jehya tí nkehe tinkáchónkini.

4 Ó jehí nchehnke sín la nínkehó noehya sín. Tí ntoáhya nixja sín la tíha mé éxí ijnko chin chóna sín la tíha mé tjixín tí kjuachjinoxínhin la ko tjanjonko kichó sín la ko t'ántaxínhin sín kichó sín la ko chóntehya sín kichó sín kjuasáya.

5 Mé tí sín la náxrxónhya tjenkayáxin sín la jnkochrín tjanjonko kichó sín la noehya sín tí nkehe chaxín. Mé tjenkayáxin sín kixin tinkáchónki sín Ìnchéni kixin xikaha chrókuacha sín nchónhya chichaon, ichro sín. Jaha la chrókuítóhé tí sín xikaha ch'e.

* 5:18 Deuteronomio 25.4, Mateo 10.10; Lucas 10.7

⁶ Tí tinkáchónkini Ìnchéni la ijnko nkehe imá tjetōan la ko tjete tíha a ntá kjuaxróxin chrók'uejóni kjónté tí nkehe chóntani ó.

⁷ A ntá tí kokj́hini la ninkehó kuikohyani tí kuini chjasintajni la kjaxin tió ts'enni la ninkehó nkehe xitjahya sátsjikoni.

⁸ A ntá tí chóntani nkehe sineni la ko chóntani ikéni la kjónté táhó la chrókóchéni.

⁹ A ntá tí sín tjinkaon sín imá chrókóríko sín mé tí sín a mé tsjichròe sín la lontj sín kixin xikaha tjenkayáxin sín, la mé ts'itjáyanxín sín tíha.

¹⁰ Tí imá tjuèheni chichaon la tíha mé nuèé kaín nkehe jínahya. Jnkojín chojni imá tjinkaon sín tsochónta sín chichaon ntá tsjichròe sín tsítóhe sín tsinkáchónki Ìnchéni la tíha mé imá sinchekjasótexín sín asén sín.

Jína tí nkehe tinkáchónkini

¹¹ Jaha mé tinkachónké Dios la títóhé kaín tí nkehe i. Chrókjuak'e ntoá la ko kaín asán chróxráxinkávan Dios la ko chrókuinkachónkia ch'án la ko chrótjuéhé kichua la ko chrókónínkákonhya tjoka la ko chrókjuínchehnkehya asán.

¹² Tjanjonkoa kaín nkehe jehya tí jína la ko kaín asán tinkachónkia Ìnchéni kixin ntá chrókjuacha chrók'uayéhé tí kjuachón jnkochŕxín kixin mé xikaha k'uíyaha Dios tí jaha. Jaha la ó tsíchronka kixin tinkachónkia Ìnchéni la ó kuínhin la ko k'uíkon nchónhya chojni.

¹³ Nkayakon Dios, tí nkexro chjéhe kjuachón kaín xín tí nkehe síchón, la ko Jesucristo, tí nkexro tsíchronka jína nkayakon ch'ín Poncio Pilato, mé tétuanhan

¹⁴ kixin sinchexiteyá kaín tí nkehe t'etōan Dios kixin í chrókjuínkíhya tí nkehe chrókuinkachónkia la ntá tsokohya ninkexró ts'eka jie tió tsjixrakájia tí yaon tsokjan Ìnchéni Jesucristo.

¹⁵ Tsjixraká tí yaon kjueyá Dios ntá jehe ch'án mé tsjanjon ch'án kjuachaxin kixin itsi Jesucristo. Dios la jehó ch'án mé chónta ch'án kjuachaxin ts'etōan ch'án. Jehe ch'án mé tí Rey t'etuenhen kaín xín tí sín rey la ko jehe ch'án mé Ìnché kaín chojni.

¹⁶ Jehó Dios mé chónhya ts'en la tí tjen ch'án la imá t'inkaséyan la ko kohya nínkexró tsjacha tsochjina tí tjen ch'án. Nínkexró k'uíkonhya tí jehe ch'án la ko nínkexró xitjahya ts'ikon tí jehe ch'án. Tsjikosáyeheni ch'án kixin jehe ch'án chónta ch'án kjuachaxin ts'etōan jnkochŕxín. Amén.

¹⁷ Tí sín chónta itsjé nkehe chjasintajni mé tétuenhén sín kixin sinchehnkehya sín la ko tétuenhén sín kixin tsochóntiaxinhya sín tí nkehe chónta sín kixin jnkochŕxínhya tsochónta sín tíha. Íchá jína chrókuinkáchónki sín Dios tjechón kixin jehe ch'án tjanjon ch'án kaín xín nkehe kixin mé xikaha tjinkaon ch'án tsochéni.

¹⁸ Tétuenhén sín kixin chrókjuich'e sín tí nkehe jína kixin tí chaxín chrókóríko sín la chrókjuinkítsa sín kichó sín la chrók'óxikayéhe sín tí nkehe chónta sín.

¹⁹ Mé xikaha chrókjuacha sín tí nkehe tjete kixin chr'éxin la jína chrók'uejó sín kixin chrókjuacha chróchónta sín tí kjuachón jnkochŕxín.

Kjuixixín k'uítuenhen ch'ín Timoteo

²⁰ Jaha Timoteo t'ayakonhén tí xra la tiénhya tí nkehe ntoáhya nixja chojni. Ntáchro sín kixin imá nohe sín kjánchó chaxínhya tíha.

²¹ Iso sín ó xikaha ntáchro sín kixin imá nohe sín la ntá kjuíchròe sín í tinkáchónkihya sin Ìnchéni. Dios chrókjuintayavan tí jaha. Amén. Ó tjen.

Tí xroon yóxin ikjin ch'ín Pablo chr'énnen ch'án tí ch'ín Timoteo

Ch'ín Pablo nixjehe ch'án tí ch'ín Timoteo

¹ Janhan Pablo mé kjueyána Jesucristo t'aha ch'án xra kixin xikaha tjinkaon Dios kixin mé xikaha ó chrónka ch'án kixin tsjanjon ch'án kjuachaxin tsochóna chojni kjuachón jnkochrínín tí tsinkáchónki sín Jesucristo.

² Ikjian tí xroon i chr'anhan jaha kichó ni Timoteo. T'ikuán éxí xjanna tí jaha mé imá tjuaha. Kjuasáyé It'eni Dios la ko Ìnchéni Jesucristo chrókjuintayavan ch'án la ko chrókuikonòaha ch'án la ko chrótjáha ch'án kjuaxróxin.

Chróchronka ch'án kixin tinkáchónki ch'án Jesucristo

³ Xráxinkavan tí jaha tió níxjaha Dios nchakotjin la ko tie la ko tjétjáncháha kjuasáyé Dios kixin imá tinkáchónkia ch'án. Jehe ch'án mé t'aha xra kaín asenná éxí xikaha mé k'uékjich'e tí sín tsík'axrjeníxinna.

⁴ Xráxinkavan jnkochrínín nkexrí tsjanca la tjínkavan kixin chrótsjaha tí jaha ínaá kixin tsochéhe asenná.

⁵ Ó nòna kixin kaín asán tinkáchónkia Jesucristo. Kjaxin náchrja tjan Loida la ko ìná tjan Eunice mé saoxín kuinkáchónki sín Ìnchéni Jesús la ntá ó nòna kixin kjá kjaxin jaha xikaha tinkáchónkia ch'án.

⁶ A ntá ijie ntaxráxinkávan kixin chrók'uitjáyanhya tí kjuachaxién Dios kjuanjon ch'án k'uayéhé tió kjuaké tjaná chrítaón tí jaha.

⁷ Dios la kjuanjonhya Nchakuen ch'án kixin tsochrakonni. Náhi. Kjuanjon ch'án tí Nchakuen ch'án kixin tsochóntani kjuachaxin la ko jína tsotjuèheni ch'án la ko jína tsjenkayáxinni.

⁸ Chrókósuàhya chróchronka kixin tinkáchónkia Ìnchéni la ko kjaxin chrókósuàhya chróchronka kixin janhan tjéchinaxián tí xrjanca itén ch'án. Kjónté la íchá jína chrókjuasótexián tí tjákua tí tan tsaáxinni kixin tí kjuachaxin kuente Dios ó k'uayéhé.

⁹ Jehe Dios mé kuaáxinni la ko kjueyá ch'án tí jeheni kixin jína chrók'uejóni. La jehya tí xra jína kjuích'eni ntá chrókuaáxinni. Náhi. Kjuasáyé Dios kjueyá ch'án tí jeheni kixin tsinkáchónkini Jesucristo. Tí naxa xrankíxixínhya chjasintajni mé tsíkjenkayáxin ch'án tíha kixin jehe ch'án mé imá tjuèheni ch'án.

¹⁰ Ntá jie ó kjuakoxin Dios kixin tjuèheni ch'án kixin ó kui tí nkexro tsaáxinni mé Jesucristo. Kjuínchek'itjáyan ch'án tí kjuachaxin k'uéchóna tí kjuach'én kixin kjuacha ch'án xechón ch'án ínaá. Chronkaxín itén ch'án nkexrí tsaáxinni ntá ó kónoexínni kixin tí kjuachón kjuakoxin ch'án mé xitjahya ts'itjáyan.

¹¹ Dios mé k'uetuanna sátsjixrjanca itén ch'án la ko kjueyána ch'án tsjákoħa tí sín jehya sín judío tí tan jína.

¹² Mé xikaha tjétjasótexinna kaín tí nkehe i la kjónté tósuànahya kixin ó choxian jína tí nkexro tinkáchónkia. Mé ó nòna kixin chóna ch'án kjuachaxin ts'àyakonhenni ch'án tsjixrakájia tí yaon tsokjan ch'án. Méxra janhan tjaha ch'án asenná kixin ts'ayakonhen ch'án.

¹³ T'itjáyanhya tjákua kaín nkehe jína ó kjuákoħa. Naxa títekávan la ko tjuèhé kíchuará kixin tinkáchónkia Cristo Jesús.

¹⁴ Kjuachaxién tí Nchakuen Dios chóntani jnkoinkoni mé t'ayakonhén jína tí tan tjákua kjuíntakitonhan Dios k'uayéhé.

¹⁵ Jaha mé ó noha kixin kaín tí sín estado Asia mé jehe sín kuítõna sín la ko kjaxin tí ch'ín Figelo la ko ch'ín Hermógenes.

¹⁶ Tjáncháha Ìnchéni kixin imá tsikonóehē ch'án tí sín tjejó ntoe tí ch'ín Onesíforo kixin jehe ch'án mé imá kjuínkítsana ch'án la ko kósuèhya ch'án ikui ch'án kjónté tjechjina.

¹⁷ Tí nantá kjuíji ch'án chjasin Roma ntá kuítóehya ch'án kjueyána ch'án hasta k'uitjana.

¹⁸ Tjáncháha Ìnchéni kixin tí yaon itsi ch'án ntá chrókujikonóehē ch'án tí ch'ín a kixin jaha ó noha jina kixin nkexrí kjuínkítsa ch'án tí janhan tí chjasin Éfeso kjaxin.

2

Kjuíncheyóexin ch'ín Pablo kixin jeheni éxi yóhē ijnko soldado jina kuènte Jesucristo

¹ Jaha xjeenni tákjá tí kjuachaxin kjuasáyé Jesucristo kjuanjon ch'án kixin tsjinkítsa kixin tinkáchónkini ch'án.

² Tí nkehe kuínhín kjuàkua nkayakon nchónhya chojni mé xikaha chjehé tí xra tí sín jina choxian jina ch'e xra kixin ntá jehe sín mé xikaha chrókjuakohe sín í so chojni inaá.

³ Jaha la kjónté nchónhya nkehe kjuasótia la chrókjuacha kixin ijnko soldado jina kuènte Jesucristo.

⁴ Kohya nijnko soldado jina ch'e xra chrók'uixenhen ókjé xra kixin t'ichjánxin jnkójínxón xra sich'e ch'án kixin éxi tjinkaon tí nkexro t'etuenhen ch'án.

⁵ Mé xikaha éxi yóhē ijnko nkexro tsotsítán. Ntá tsjachahya ts'áyéhē ch'án nijnko nkehe tí sinchexiteyèhya ch'án tí sín t'etoan.

⁶ La éxi yóhē ijnko nkexro ch'e xra nonte ntá chóna ch'án kjuachaxin saxín tsakja ch'án tí nkehe ts'óna.

⁷ Chrórxaxinkávan jina kaín tí nkehe xrjanka la ìnchéni mé tsjinkítsa tsiénxian kaín nkehe.

⁸ Xráxinkávan kixin Jesucristo la ó xechón ch'án. Jehe ch'án mé k'uaxrjeníxin ch'án ch'ín rey David. Tíha mé tí tan jina tsaáxinni tjétjàkua.

⁹ Tí tan tjéxrjanka mé tjasótexinna. Tíha mé tjechrontetoxínna cadena éxi ijnko chojni tsíkjàya la kjónté tí itén Dios la jehya tjechrontetoxín cadena.

¹⁰ Méxra kjónté nchónhya t'atsínka tí janhan la ntaxiteyá kixin tí í so sín kjueyá Dios tsaáxin sín ch'án kixin tsochóna sín kjuachón jnkochrín kixin tinkáchónki sín Jesucristo.

¹¹ Tíhi mé chaxín:

Tí jehe ch'án k'uénxinni ch'án a ntá chr'éxin ts'ejókoni ch'án.

¹² La tí tsjasótéxinni tí jehe ch'án la ntá kjaxin ts'áyéhēni kjuachaxin kuènte ch'án ts'etoanni.

A ntá tí chrókjuinchemáni tí jehe ch'án na ntá kjaxin ch'án la xikaha sich'e ch'án.

¹³ Kjónté nchexiteyèhyani ch'án la jehe ch'án tjenchexiteyá ch'án kixin Dios la xitjahya sich'ia ch'án.

Chrókjuich'eni tí xra jina

¹⁴ Nchexraxinkávan sín kaín tí nkehe i. Dios tjetsjehe tétuenhén sín kixin chrókuítóhe sín tí nixja sín tjanjonxin sín kixin ó chónkó tíha la ninkehó sínkíhya. Tí xikaha ch'e sín la sinchek'itjáyán sín tí sín tjejótinhin.

¹⁵ Sích'e xra jina kixin tsóxrjínhin Dios tí xra tjech'e a. Ntoá chrókjuàkua tí tan jina chaxín kixin ntá chrók'uichjánxinhya chrókósuàha.

¹⁶ La títóhé tí nkehe náxrjónhya la ko chónkó nixja iso sín kixin tí sín nixja xikaha la antsí tsinkák'ánkí tí nkehe jínahya nixja sín.

17 Tí nkehe jehya jína tjako sín mé éxí yóhē ijnko iton sóa sítinkáchr'enka. Mé xíkaha tjako tí ch'ín Himeneo la ko ch'ín Fileto.

18 Jehé sín mé ó kjuixin kuítóhe sín tí ntia ntoá la ntáchró sín kixin ó kjuixin k'uátsínka tí tsoxechón chojni. Ntá xíkaha ch'iyehé sín tí í so sín la tsjitóxinhin sín tí nkehe tinkáchónki sín.

19 Kjánchó tí sín tinkáchónki Dios éxí yóhē tí xró xrankíxixín tjat'o xitjahya tsoxíka la chóna éxí ijnko sello tí itén Dios ntáchró kixin: “Ínchéni mé tjatsoan ch'án tí chojni kuénté ch'án”,* la kjaxin ntáchró kixin: “Kaín tí sín tinkáchónki Cristo mé t'ichjánxin chrókuítóhe sín kaín nkehe jínahya,” mé xíkaha ichro itén Dios.

20 Ijnko nchia jié kuénte tí sín rico la siín vaso tsík'óna chica oro la ko vaso tsík'óna chica plata. La kjaxin siín nkehe tsík'óna ntachiso la ko nkehe tsík'óna nchetje. Iso la xrá ó tsík'óna kuénte tí xrá tjetuan la í so la tsík'óna kuénte tí xrá tjetuanhya.

21 A ntá ijnko chojni chrókuítóhe kaín jie chrókóyóhē éxí ijnko vaso tjóá jína kixin chrókuicháxinhin Ínchéni. A ntá tí nkexro xíkaha chrókjuich'ehya tí nkehe jínahya kixin chrókuicháxinhin Ínchéni tí xrá jína.

22 Títóhé kaín tí nkehe jehya tí jína tóxrjínhin í so tí sín ntasoá a. Chrókjuak'e tí ntia ntoá la ko kaín asán chrókuinkachónkia Cristo la ko chrótjuéhé kaín chojni la ko kjuaxróxin chrók'uejokoa kaín sín. Mé xíkaha chrók'uejó kaín xín tí sín kótjóá asén mé kaín tí sín tinkáchónki Ínchéni.

23 Jaha chrókuahya kuénté tí sín lontj tjenkayáxinhya jína kixin jaha ó noha kixin xrahya chrókjuanjonko kichó sín.

24 A ntá ninkexro ch'ehé xrá Ínchéni chrókjuanjonko kichó sín kixin jína chrókjuinkítsa kichó sín. Chrókónohe sín kaín nkehe jína chrókjuako sín la ko chrókónínkakuenhya sín kichó sín.

25 Kaín asén sín jnkojína chrónixjehé sín tí sín titekakonhya kixin chróchónhen sín kixin Dios chrókjuinkítsa tí sín a chrók'uúxinkí tí ntoáhya tjenkayáxin sín kixin ntá chrókónohe sín tí nkehe chaxín ntoá chrókjuich'e sín

26 kixin t'ichjánxin chrókónohe sín nkexrí chrókuaáxin sín kixin ch'ín Tsochren tjinkaon chrókjuich'iyehé sín ntá chrókjuasin sín jie.

3

Nkexrí ts'ejó tí chojni chjasintajni tí yaon tsjixixín

1 T'ichjánxin chrókónoha kixin tí yaon tsjixixín ntá itsi tí yaon kjuaxróxinhya ts'ejó chojni.

2 Tí sín chjasintajni tsinkáchónkihya Ínchéni mé imá chrók'uetóan sín jehó la ko imá tsoxrjínhin sín chichaon la ko sinchehnke sín la ko imá ts'ántaxínhin sín Dios. Sinchexiteyèhya sín it'é sín la ko ìné sín la ko tsochóntahya sín kjuasáya la ko tsinkáchónkihya sín ninkehó dios.

3 Tsojtjuèhya sín kichó sín la ko tsikonóehya kichó sín la ko tsjonta sín kichó sín la ko ninkexró tsochrakuenhya sín la ántosén sín tsjasin sín jie, la ko imá tsojiejhe sín la ko imá tsonínkakohen sín kaín nkehe jína.

4 Jehé sín mé sinchekji kichó sín la ko tsjenkayáxinhya sín jína la ko sinchehnke sín. Tsojtjinkaon sín tsjeyá sín tí nkehe ntáchró asén sín ó a ntá tsjeyáhya sín Dios.

5 Jehé sín la éxí chojni tinkáchónki Dios xíkaha ts'ejó sín. Kjánchó chaxínhya. Tsinkáchónkihya sín tí kjuachaxin kuénte Dios chaxín ntoá.

Méxrá jaha la chrókuankíehya tí chojni ch'e xíkaha.

* 2:19 Números 16.5; Juan 10.14

⁶ Iso tí sín a mé ixri sín t'ixenhen ntøe ókjé chojni la ch'iyehé sín tí chojni chjin lontí tjasin jie la nchexiteyéhe sín kaín tí ntáchro asén sín.

⁷ La xráxín ó tinkák'itja sín kjánchó nunca kuíenxínhya sín tí nkehe chaxín ntoá.

⁸ A ntá éxí yóhe tí sín k'uékjinchexroan mé ch'ín Janes la ko ch'ín Jambres mé k'uénínkakonhen sín ch'in Moisés mé xikaha tí sín tjako ijie nínkakonhen sín tí nkehe chaxín ntoá. Imá jínahya tí kjuaxrexinkaon kuente sín la ko titekakonhya sín tí nkehe chaxín tinkáchónkini.

⁹ Kjánchó tsjachahya sín sich'ia sín isé kixin kaín chojni tsonohe kixin tí sín a mé lontí sín kixin éxí xikaha tsíkónhen tí yaá sín k'uékónínkakonhen ch'ín Moisés.

Tí nkehe kjuixixín k'uetuēnhen ch'ín Pablo tí ch'ín Timoteo

¹⁰ A ntá jaha mé ó kuítekáván tí nkehe kjuakua. Ó noha nkexrí kjuak'é janhan la ko ó noha tí xra kjuít'a janhan. Ó noha nkexrí tinkáchónkia Ìnchéni la ko noha kixin tjokahya kónínkavan la ko noha nkexrí tjuaha chojni. Ó noha kixin kjónté kónínkaon chojni la kuitoahya tí xra a

¹¹ kjónté chónkina sín la ko kjuasótena. Ó noha nkehe konna tí chjasin Antioquia la ko Iconio la ko Listra. Chrók'óyánna sín la kjuínchekjuasótena sín kjánchó Ìnchéni mé kjuínkítsana kjónté kaín tí nkehe chrókónna.

¹² Kaínxín tí sín tjinkaon tjóá chrók'u'ejó sín nchexiteyéhe Cristo Jesús la t'ichjánxin tsjasóte sín.

¹³ A ntá tí sín jínahya la ko tí sín ixri ch'ia sín mé ts'óna sín antsí jínahya. Jehé sín xrich'ia sín la ch'iaxín sín nkehe jínahya.

¹⁴ Jaha la jína chrókjuak'e la í chrókjuínkíhya tí nkehe k'úitjá la ko tí nkehe ó kuítekáván. Jaha la ó noha tí nkexro kjuakoha.

¹⁵ Jaha la desde xjanntsia k'úitjá nkexrí nixja xroon itén Dios la tíha mé tónoexínni kixin Cristo Jesús tsaáxinni kixin tinkáchónkini ch'án.

¹⁶ Ntá kuenté xroon Biblia kjuachaxiēn Nchakuen Dios kjuínkítsa tí nkexro ikjin la tíha mé jína tsoxrácuexinni tí nkehe chaxín la ko tíha mé jína tsjentuéheni la ko tsjinkítsani tsonoheni nkexrí chrók'uejóni ntoá

¹⁷ kixin tí nkexro tinkáchónki Dios chrókónohe jína la ko chrókjuacha sich'e kaín tí xra jína.

4

¹ Kjuachaxiēn Dios la ko Ìnchéni Jesucristo, tí nkexro itsi éxí ijnko rey la sinchekitoexín ijie kaín chojni tjejóchón la ko tí chojni tsík'en,

² mé tétuanhan chrókjuakua itén Dios kaín asán kjónté á chrókuinhin sín o náhí. Nixjehé sín jnkojína kixin tsitekaon sín la ko tjéntuéhé sín jnkojína. Chrókóninkákonhya chrókjuákohé sín.

³ Itsi ijnko yaon ntá tsotjinkakonhya sín tsinhin sín tí nkehe jína. A ntá sinchexiteyéhe sín tí nkehe ntáchro asén sín ó. Tsjeyá sín nchónhya maestro tsjakohe sín jehó tí nkehe tóxrjínhin sín chrókuinhin sín.

⁴ Méxra tsítóhe sín tí nkehe chaxín ntoá la ntá itsa sín kuenté kaín nkehe chaxínhya.

⁵ Méxra jaha jína chrókjuenkayáxian la chrókjuacha kjónté tsjasótia. Chrókjuintaxín chrókjuich'e xra chrókjuákohé chojni itén Dios tsaáxinni mé xikaha sinchexiteyá jína tí xra chonta.

⁶ Ntá janhan ó kjuixraká tí hora tsjasótena la ko ó kjuixraká tí hora its'en.

⁷ Ó kjuánjonkian jína kaín tí nkehe jínahya la ko ó kjuixinna tí xra kuéntana la ko kuitoahya jína kuinkáchónkia Ìnchéni.

⁸ **A** ntá ijie la tí nkehe tsitonna mé tjechónhen kixin jína kjuak'é ntihi. Tíha mé tsjanjon Ìnchéni tí yaon itsi ch'án. Jehe ch'án mé ijnko juez jína. Jehya kixin janhván tsákjaá tí nkehe tsjanjon ch'án. Náhi, kjaxin kaín tí nkexro kuítekaon sín ch'án la ko chéhe sín tjejóchónhen sín tió tsi ch'án.

Ch'ín Pablo k'uetōan tsjijtsjehe sín ch'án

⁹ Jaha chrókóxakonhan tjoka chrók'uinkatsjehé tí janhan

¹⁰ kixin ch'ín Demas la kuítóhe ch'án tí janhan kixin imá kóxrjínhin ch'án tí nkehe kuènte chjasintajni. Sátsíkji ch'án chjasin Tesalónica. Ch'ín Crescente mé sátsíkji ch'án chjasin Galacia a ntá ch'ín Tito sátsíkji ch'án chjasin Dalma-cia.

¹¹ Jehó ch'ín Lucas naxa tjékjan ch'án. Tjíkjéyá ch'ín Marcos la tsjúkuana ch'án ntihi kixin jehe ch'án mé jína tsjinkítsa ch'án tí xra chonta ntihi.

¹² **A** ntá ch'ín Tíquico mé kuétuñhan ch'án sátsji ch'án chjasin Éfeso.

¹³ Tió ts'inka ts'inkakuana tí ka t'ítsate kuítóha chjasin Troas ntoé ch'ín Carpo la ko kjaxin ts'inkakuana tí libro kuéntana la ko koí tí tjoé iko tsík'óna xroon.

¹⁴ Tí ch'ín Alejandro tí ch'ín ch'e xra chica mé nchónhya nkehe jínahya kjuích'ena ch'án. Kjánchó Ìnchéni mé tsjenkehe ch'án kaín nkehe kjuích'e ch'án.

¹⁵ Jaha mé tóxakonhan kixin tí jehe ch'án kixin imá nínkakonhen ch'án tí nkehe tjakoni.

¹⁶ **A** ntá tí saoxín k'uèya tí síxree tí kjuia tí tjejó sín la ninkexró kjuinkítsahyana. Kaín sín me kuítóna sín janhván. Kjónté xikaha la tjáncháha Dios kixin chrókuahya ch'án kuéntá kixin xikaha kjuích'e sín.

¹⁷ Kjánchó Ìnchéni mé chaxín kjuínkítsana ch'án la kjuanjon ch'án kjuachaxin kixin tsjachana naxa jína tsjàkua itén ch'án. Ntá kuínhin kaín tí sín jehya judío. **A** ntá Ìnchéni kjuínkítsana kixin kjónehyana koxra.

¹⁸ Ìnchéni mé tsjinkítsana kixin naxa tsonnahya kaín nkehe jínahya. Jehe ch'án mé ts'ayakonna ch'án ts'ixanhan tí tjet'etoan ch'án nkaya nkajni. Kjuasáyé ch'án kixin xikaha jnkochríxín tsoxiteyá. Amén.

Ch'ín Pablo kjuixixín nixja ch'án

¹⁹ Jaha nixjehé tí tjan Prisca la ko ch'ín Aquila la ko nixjehé tí sín siín ntōe ch'ín Onesíforo.

²⁰ Kuítóhe ch'ín Erasto chjasin Corinto. **A** ntá ch'ín Trófimo kuítóhe chjasin Mileto kixin kónihi ch'án.

²¹ Tóxakonhan chrók'uinka naxa t'ixenhya nchakuen kin. Tí ch'ín Eubulo la ko ch'ín Pudente la ko ch'ín Lino la ko tjan Claudia la ko kaín sín kichó ni ntihi nixjaha sín jnkojína.

²² Ìnchéni Jesucristo chrók'uajikoa ch'an la Dios chrókjuintayaonrá kaín rá mé xikaha tsoxiteyá. Amén. Ó tjen.

Tí xroon ikjin ch'ín Pablo chr'énhen ch'án tí ch'ín Tito

Ch'ín Pablo nixjehę tí ch'ín Tito

¹ Janhan Pablo mé t'ahą xřą Dios la ko tsíkjeýána Jesucristo kixin tsjakoħą tí í so sín tsíkjeýá Dios křaxin kixin ts'itja sín tsonohe sín kixin nkexrí chrókuinkáchónki sín tí nkehe chaxín.

² Ntá ts'ejóchónhen sín tsochónta sín kjuachón jnkochrixin. Dios la xitjahya sich'ia la kaín tí nkehe tsíchronka ch'án ósé tí naxą k'ónahya chjasintajni la mé xikaha tsonhen.

³ Ntá tí yaon tsintáchro Dios la mé jie ó xiteýá la ntá kónoxín tí tan kuente ch'án. A ntá Dios tí nkexro tsaáxinni mé k'ueřoan kixin řit'ahą ch'án xřą tsjaku itén ch'án.

⁴ Ikjian tí xroon i chr'anhan jaha Tito. T'ikuąn éxí chaxín xřanna tí jaha kixin yóini tinkáchónkini Jesús. Kjuasáyé It'eni Dios la ko Jesucristo tí nkexro tsaáxinni, chrókuintayavan la ko chrókuikonóħą ch'án la ko chrótjaha ch'án kjuaxróxin.

Tí xřą sich'e tí ch'ín Tito chjasin Creta

⁵ Kuitoħą jaha tí isla Creta kixin jaha chrókuétueñhén tí sín siín ntiha kixin nkexrí chrók'uejó sín la ko chrókónoxín nkexro ts'etöan kuente jnkojnko ninko jnkojnko chjasin éxí tí kuétuanhan jaha.

⁶ T'ichjánxin kixin tí nkexro ts'etöan xřą kuente ninko la jına chrókjuak'e kixin kohya nkexro chrók'ueka jie, la ko chróchónta jnkokoá ichjién la ko tí xjeen sín chrókuinkáchónki İnchéni kixin tsokohya nkexro chrókjuanchia jie kixin jehya tí jına tjejóch'e sín, la ko křaxin chrókójieħya sín.

⁷ Mé xikaha tí nkexro ts'áyehę tí xřą ts'etöan xřą kuente ninko mé ts'etöan nkexrí tsonhen xřą kuente Dios la ntá t'ichjánxin ijnko nkexro tsjenkayáxin jına, chrókjuasinhya jie. La chrókjuinchehnkehya la ko chrókóninkakonhya tjoka. La ko křaxin jehya ijnko nkexro tókoan la ko jehya ijnko nkexro tjeýá kjuanínkaon la ko chrókóxrjieħya sín chrókjuich'ia sín ntá chrókjuacha sín chichaon.

⁸ Křaxin jına chrókjuak'e ch'án kixin tí tsjiji ijnko nkexro ntoe ch'án chrókjuanjon ch'án kjuachaxin chrókjuak'e tí nkexro a. La ko jına chrókjuak'e ch'án la ko jına chrókjuenkayáxin ch'án kixin ijnko nkexro ó tsíkjinchetjóá Dios la ko chróchónta ch'án kjuasáyé ch'án.

⁹ Křaxin t'ichjánxin chrókuítöehya ch'án tí tan jına xřakoħę ch'án kixin ntá jına tsjakoħę ch'án í so chojni tí nkehe ntoá la kjónté nkexro tjinkakonhya tsinhin la jına chróchenka ch'án chrókuinhin.

¹⁰ Siín itsjé tí sín nínkaon mé tí sín a la mé tí sín judío la mé nixja sín éxí lontí sín mé xikaha ch'iyehę sín chojni.

¹¹ Tí sín a la chrók'uíkjehęni ir'va sín kixin tjachròe sín nchónhya chojni kixin tjako sín tí nkehe jehya jına kixin chrókjuich'ia sín chrókjuacha sín nchónhya chichaon.

¹² Ijnko ch'ín kuente chjasin Creta la mé tsíchronka ch'án nkexrí tjejó tí sín chjasén ch'án. Ntáchro ch'án kixin: “Kaín tí chojni chjasénni mé imá ch'ia sín la ko imá jieħę sín la ko imá kóchjinka sín la ko séħę sín”, mé xikaha chrónka ch'án.

¹³ Tí nkehé tsíchronka ch'án mé chaxín ntoá. Méxřą antsí fuerte chrókjuéntuéhé sín kixin ntá jına chrók'uejó sín chróxřaxinkaon sín Dios.

¹⁴ Nixjehé sín kixin chrókuahya sín kuenté kaín tí nkehe tsík'axrjeníxin kja tí sín judío tjako la ko chrókuitekakonhya sín tí nkehe t'etoan tí sín nínkakohenen tí nkehe chaxín.

¹⁵ Tí sín chaxín tjóá kjuaxrexinkaon kuènte sín ntá kaín nkehe ch'e sín la jína. A ntá tí nkexro titekakonhya la tjuáhya kjuaxrexinkaon kuènte la kohya ninkehó nkehe jína tí kjuaxrexinkaon kuènte sín la kaín nkehe tjenkayáxin sín mé tjuáhya.

¹⁶ Ntáchro sín kixin chóxin sín Dios a ntá tí t'ikonni nkexrí ch'e sín ó noexínni kixin chaxínhya tíha la ch'ia sín. Jehé sín mé ntoáhya tjenkayáxin sín la ko jiehe sín la ko titekakonhya sín. A ntá tí xikaha ch'e sín la, ¿nkexrí chrókjuich'e sín tí xra jína?

2

Chrókjuako ch'ín Tito tí tan chaxín

¹ A ntá jaha chrókjuákua éxí tí chrónka tí tan jína chaxín.

² Tjáhohé tí sín ó táda kixin chrókókoanhya sín la ko jína chrók'uejó sín la ko chróchónta sín kjuasáyé sín la ko chróchónta sín ijnko kjuaxrexinkaon jína la ko jína chrókuinkáchónki sín tí nkehe chaxín la ko chrótjuèhe sín kichó sín la ko chrókónínkakonhya sín kjónté tsjasóte sín.

³ A ntá kjaxin xikaha tí sín ó nána la kjaxin jína chrók'uejó sín la kjaxin chrókjuinchekuáxinhya sín chrókuinkáchónki sín kjuach'ia la ko kjaxin chrókókoanhya sín. Chrókjuakoxin sín ijnko kjuaxrexinkaon jína

⁴ kixin xikaha chrókjuakuexin sín tí chojni chjin tjarisoá a kixin chrótjuèhe sín xii sín la ko chrótjuèhe sín xjeen sín

⁵ la ko chrókjuich'e sín xra jína la ko ntoá chrókjuenkayáxin sín la ko jína chrók'uàyakohenen sín nchia ntoé sín la ko chrókójína sín la ko chrókuitekakonhenen sín xii sín. Tí xikaha chrókjuich'e sín chrókjuinchexiteyá sín la kohya nkexro chrók'uántaxínhín tí itén Dios tinkáchónkini.

⁶ Kjaxin xikaha chrókjuinchexraxinkávan tí sín ntasoá kixin jína chrók'uejó sín chróchónta sín kjuasáyé sín.

⁷ Jaha mé chrókjuákoéxian sín kaín nkehe jína la ko chrókjuákohé sín kixin ntoá chrók'uejó sín.

⁸ Jaha la chrónixja tí nkehe jína kixin kohya nkexró chrók'uántaxín la ntá xikaha chrókósuèhe tí sín nínkaon la ntá kohya nkehe jínahya chróntáchro sín kuènte tí jeheni.

⁹ Tétuenhén tí sín xrich'exón xra kixin chrókjuinchexiteyéhe sín tí lamo kuènte sín la ko chrókójína sín la ko chrónixjankjehya sín tí nkexro ch'ehe sín xra

¹⁰ la ko kjaxin chrókueéhya sín kixin jehya ijnko chojni chee tí jehé sín. Ntá kaín chojni chrók'uikon sín kixin tjakoxin sín kixin náxrjón tí itén Dios chrókuaáxinni.

¹¹ Kixin Dios mé kjuakoxin ch'án kixin nkexrí tjuèheni ch'án kixin jehé ch'án mé tsaáxin kaín chojni.

¹² Kjuasáyé Dios mé tjakoheni ch'án kixin chrókuítóheni kaín nkehe jie la ko kaín tí nkehe jínahya tjenkayáxinni. La ko jína chrók'uejóni chjasintajni la ko ntoá chrók'uejóni la ko chrókuinkáchónkini Dios.

¹³ Kjaxin chrók'uejóni jína kixin chrókóchéheni chrók'uejóchónhenni tí yaon kjuachaxién Dios jie itsi Dios la ko Jesucristo tí nkexro tsaáxinni.

¹⁴ A ntá jehé ch'án mé k'uenyákonhenni ch'án kixin tjinkaon ch'án tsaáxinni ch'án kixin tsotjuáxin kaín jie chóntani kixin ntá jeheni mé ts'ónani ijnko chojni sich'ehe ch'án xra la ko tsoxrjínhinni sich'eni kaín xra jína tjinkaon ch'án.

15 Tíhi mé chrókjuàkua la ko chrókjuinche xraxinkávan sín la ko chrókuétuēnhén sín kjuachaxién Dios. Chrókuitoéhya kíxin ninke xró chrókókjoniéhya tí nkehe tjàkua jaha.

3

Jína chrók'uejó tí sín tinkáchónki Cristo

¹ Chrókjuinche xraxinkávan sín kíxin sinchexiteyéhe sín tí gobierno la ko tsitekaon sín ichrén xra ts'etōan tí síxreé kíxin chrókjuich'e sín kaín xra jína ts'etōan tí sín a.

² La ko chrók'uántaxiēnhya sín ninke xró la ko kjuaxróxin chrók'uejó sín la ko chrók'lóna sín ijnko chojni jína la ko chrókjuakoxin sín kíxin jehya ijnko chojni nchehnke la chrókjuikosáyehe sín kaín chojni.

³ Jeheni kjaxin ósé k'uélontini la ko k'uékitekakonhyani Dios. Chjini k'uék'ajini la k'uékóxrjínhini kaín nkehe jínahya. La ko jehya jína k'uék'ejóni la ko k'uéchóntani kjuachjinoxínhin la ko k'uéchjinoxíēnhenni í so chojni.

⁴ A ntá tí Dios tsaáxinni mé kjuakuēxinni ch'án kixin jína ch'án la ko tjuèhe ch'án kaín chojni.

⁵ Jehé ch'án kuaáxinni ch'án la jehya kíxin ichrén xra jína chrókjuich'e heni ch'án. Náhi, ó jehí kuikonóeheni ch'án la ntá kjuínche kaáni ch'án la ko kjuínchetjóáni ch'án. Ntá kokjínini nixin kíxin tí Nchakuen ch'án la mé k'uáyēxinni kjuachón nixin.

⁶ Kjuasáyé Jesucristo tí nkexro tsaáxinni ntá kjuínche kitōnhenni Dios Nchakuen ch'án kíxin tsochóntani kjuachaxin kuènté ch'án.

⁷ A ntá xikaha kjuasáyé ch'án kjuínchetjóáni ch'án kíxin ntá tjejóchónhenni tí kjuachón jnkochríxín tsjanjon ch'án.

⁸ Kaín tíha mé chaxín. Tjínkavan kíxin jaha chrókuétōan kaín tíha kíxin ntá kaín tí sín tinkáchónki Dios mé chrókuitekaon sín chrókjuich'e sín kaín nkehe jína. Kaín tí nkehe la mé jína la ko tsjinkitsa kaín chojni.

⁹ A ntá jaha mé tītōhé tí sín tjachaxin kichó sín lontj sín la ko tītōhé tí nkehe tinkáchónki sín kuènte tí sín tsík'axrjeníxin sín la ko tītōhé tí sín tjanjonxin tí ley kuènte Moisés. Kaín tíha la ó chónkó la ninkehó kjuaxrexinkaon chóntahya.

¹⁰ Jnkójín nkexro tjinkaon tsjixrónkáxin tí tójnkotsé ninko ntiha la nixjehé ch'án jnkójína senó la ko yóxin ínaá ntá tí titekakonhya ch'án ntá tītōhé sátsji ch'án

¹¹ kíxin ó noha kíxin tí chojni xikaha a mé ntoáhya tjenkayáxin sín kíxin jehó sín nchek'ánki sín ijíé sín.

Tí nkehe k'uetōan ch'ín Pablo

¹² Tí tsétuanhan ch'ín Artemas la ko ch'ín Tíquico kíxin tsjiji sín tí tjen jaha la ntá tjoka chrók'uinkatsjehé tí janhan chjasin Nicópolis kíxin ntiha tsjak'é ts'atsínkajia tí nchakuen kin.

¹³ Jína chrókjuínkitsa jaha tí ch'ín Zenas tí ch'ín nixjayákonhen í jnko chojni la ko tí ch'ín Apolos la ko chróchjehé sín kaín tí nkehe t'ichjánxinhin sín tió sátsji sín kíxin ninkehó nkehe chrók'uitjáyanhya tí t'ichjánxinhin sín.

¹⁴ Ntá tí sín í so chrók'uitja sín nkexrí sich'e sín tí xra jína la ko chrókjuinkitsa sín kichó sín ichrén nkehe t'ichjánxinhin sín kíxin chrókjuakoxin sín kíxin jína tjejó sín.

Ó kjuixixín nixja ch'ín Pablo

¹⁵ Kaín tí nkexro tjékian janhan ntihi nixjahá sín jnkójína. Jaha mé nixjehé kaín tí sín tinkáchónki Inchéni ntiha mé kaín tí sín imá tjuèheni sín. Dios mé chrókjuinche yaonrá ch'án kaín rá. Amén. Ó tjen.

Tí xroon chr'énhen ch'ín Pablo tí ch'ín Filemón

Ch'ín Pablo nixjehe ch'ín Filemón

¹ Janhan Pablo tjéchinaxián tí xra kuènte Cristo Jesús tjékjian tí xroon i la ko kichó ni Timoteo kixin tí jaha Filemón ts'ayéhé. Jaha mé tjuaha kixin jnkokón tjejóch'eni xra kuènte Dios.

² Kjaxin chrókuinhin kaín tí sín tinkáchónki Ìnchéni tójkotsé ntoa la ko tí tjan kichó ni Apia la ko tí ch'ín kichó ni Arquipo, mé tí ch'ín ch'e xra éxi tí jeheni.

³ Kjuasáyé It'eni Dios la ko Ìnchéni Jesucristo chrókuintayaonrá ch'án kixin chrótjáhará ch'án kjuaxróxin.

Ch'ín Filemón tjuèhe ch'án chojni la ko tinkáchónki ch'án Jesús

⁴ Xráxín tjáncháha kjuasáyé Dios tí xráxinkavan tí jaha tí nixjahá Dios

⁵ kixin ó kuinhan kixin imá tinkáchónkia Ìnchéni Jesucristo la ko imá tjuèhé ch'án la ko kaín tí sín tinkáchónki Dios.

⁶ Tjáncháha Dios kixin tsjinkitsa ch'án tí sín kuítekaon tió kjuákohe sín kixin ntá tsienxín sín jína nkexrí kaín tí nkehe chóntani kixin kjuíncheyaonni Cristo Jesús.

⁷ Imá chàna kixin ó nòna kixin jaha kichó ni imá tjuèhé tí sín kichuá ntiha la ko imá kjuínchechéhé asén tí sín tinkáchónki Ìnchéni.

Ch'ín Pablo chrónóehé tí ch'ín Filemón kixin tsikonóehé ch'án tí ch'ín Onésimo

⁸ Janhan na kjueyána Jesucristo t'ahá ch'án xra méxra chonta kjuachaxin tsétuanhan jaha tí nkehe chrókjuich'e.

⁹ A ntá íchá jína jehó xrjannóaha tsítekavan kixin jaha tjuèhé tí janhan. Janhan Pablo mé ó tádana la ko tjéchinaxián tí xra kuènte Jesucristo.

¹⁰ Méxra xrjannóaha tsjinkitsa tí ch'ín Onésimo. Jehé ch'án mé t'íkuan éxi xjanna kixin kjuankixin ch'án tsinkáchónki ch'án Jesucristo tí tjéchinakian ch'án ntihi.

¹¹ A ntá tí ósé ch'ín Onésimo mé kjuít'ahya xra jína. A ntá ijie ó nòna kixin imá jína sit'aha ch'án xra tí jaha la ko jína sích'ena ch'án xra kjaxin.

¹² Ntá ijie tsétuanhan ch'án tsjiji ch'án tí tjen jaha inaá. Chrótjuèhé ch'án éxi chrótjuèhé tí janhan.

¹³ Janhan tjínkavan chrókuitonakian ch'án ntihi kixin chrókjuinkitsana ch'án chrínki tí chrókjuak'e jaha kixin tjéchinaxián tí itén Jesucristo.

¹⁴ Kjánchó tjínkakhonhya tsjáncháha xikaha tí tjínkakhonhya jaha. Jehya kixin jaha chrókjuínkitsani kixin chrókuétuanhan xikaha. Náhi. Jehí tjinkaonni éxi jaha tóxrjínhan chrókjuich'e.

¹⁵ Tí ch'ín Onésimo kuítóha ch'án iso yaon a ntá jie la tsochonta ch'án jnkochrín.

¹⁶ Ijie la jehya éxi ijnko chojni tsík'íná chrók'uikuan ch'án. Náhi. Ntá jie la éxi ijnko nkexro ch'e xra antsí jína mé éxi ijnko kichua chrótjuèhé ch'án. Janhan na tjuaha ch'án kjánchó tí jaha la antsí má chrótjuèhé ch'án. Jehya éxi chojni ó chrók'uikuan ch'án. Náhi. Chrók'uikuan ch'án éxi ijnko kichua kuènte Ìnchéni.

¹⁷ Méxra tí chaxín t'íkuan tí janhan éxi kichó ni jnkokoá tinkáchónkini Ìnchéni ntá chrók'uayéhé ch'án éxi chrók'uayéhé tí janhan.

¹⁸ A ntá tí ichrén nkehe kuaáha ch'án o ichrén nkehe síkáha ch'án la janhan tsjénkaha tíha.

¹⁹ Janhan Pablo mé tjaná kjinxian tí xroon i na mé janhan tsjénkaha tíha. A ntá janhan tjínkakhonhya chrókjuintaxraxinkávan tí jaha kixin kaín tí nkehe tjasikàna tí janhan kixin kjuákohá jaha.

²⁰ Méxra kichó ni tsotsenkávan sich'e tí nkehe tjáncháha chaxín tinkachónkia Ìnchéni. Mé xikaha sinchechéhé asenná kixin jaha mé kichó ni tinkachónki Cristo.

²¹ Méxra ikjian tí xroon i chr'anhan kixin ó nòna kixin jaha la sinchexiteyá tíha la ko ó nòna kixin jaha la sich'e antsí má que tí nkehe tjáncháha jaha.

²² Kjaxin tjáncháha kixin tjéyá ijnko nchia tsjak'é. Tjéchnhan kixin jahará la nixjehérá Dios la ntá Dios chrókjuanjon kjuachaxin kixin chrókjuasántsjahará.

Kjuixixín nixja ch'ín Pablo

²³ Kjaxin ch'ín Epafra mé nixjahará ch'án jnkójina. Jehe ch'án mé tjéchnakian ch'án jnkokoá tí ntóéchiso ntihi kixin kjaxin tinkáchónki ch'án Cristo Jesús.

²⁴ Ch'in Marcos la ko ch'ín Aristarco la ko ch'ín Demas la ko ch'ín Lucas mé kaín sín nixjaha sín jnkójina. Jehe sín mé tjinkitsana sín tí xra.

²⁵ Tjéjtáncháha Ìnchéni Jesucristo kixin sintayaonrá ch'án kaín rá. Amén. Ó tjen.

Tí xroon k'uáyéhe tí sín Hebreos

Dios nixjaxin ch'án tí Xjeen ch'án

¹ A ntá tí imá ósé Dios mé nixjehe tí sín tsík'axrjeníxinni nchónhya veces kixin nchónhya nkexrí chrókiénxín sín, nixjaxin ch'án tí sín k'uéchrónka tí itén ch'án.

² A ntá jie tió tsjixixín Dios nixjaxin ch'án tí Xjeen ch'án, na mé Dios kjuích'éna ch'án kaín xín nkehe siín kixin kjuachaxién tí Xjeen ch'án, mé tí nkexro k'uáyéhe kaín xín nkehe.

³ Jehe ch'án mé t'inkaséyanxín ch'án tí kjuachaxin kuènte Dios, la ko jehe ch'án mé kjaxin éxi tsjehe Dios xikaha tsjehe tí jehe ch'án. Jehe ch'án t'aykonhen ch'án kaín xín nkehe siín kixin tí kjuachaxin jie chóna tí tan nixja ch'án. A ntá kjuixin kjuínchetjóá ch'án tí jie chóntani, ntá sákjuí ch'án kjuák'etjaxin ch'án tí tja chjina It'é ch'án tí tjen ch'án t'etoan ch'án nkajní.

Tí Xjeen Dios imá t'etoan, a ntá tí sín ángel la kénhyó

⁴ Tí Xjeen Dios k'uáyéhe ch'án kjuachaxin ts'etuénhen tí sín ángel, kixin tsík'áyéhe ch'án tí kjuachaxin kuènte It'é ch'án, a ntá imá t'etoan ch'án, a ntá tí jehe sín la náhí.

⁵ Méxra Dios ntáchehya nijnko ángel kixin:

Jaha mé Xjanna,
janhan mé kjuít'ána tí jaha ijie.
la ko kjaxin ntáchrohya Dios kuènte nijnko ángel kixin:
Janhan mé chrók'óna It'é ch'án,
la ko jehe ch'án mé chrók'óna xjanna.*

⁶ A ntá tió kui tí jnkokoqá Xjeen Dios chjasintajni, ntá ntáchro Dios kixin:
Kaín tí sín ángel kuènte Dios chrókjuikosáyehe tí jehe ch'án.†

⁷ A ntá ntáchro Dios kuènte tí sín ángel kixin:
Tí sín ángel ch'éna ch'án éxi xrinto kixin nchakuen sín ó,
la ko tí sín ch'ehe ch'án xra la ch'éna ch'án éxi xrohinene.‡

⁸ A ntá ntáche ch'án tí Xjeen ch'án kixin:
Tí trono kuénta itjen jnkochrín, jaha Dios,
la mé jaha mé ijnko nkexro t'etoan jína.
⁹ Jaha tóxrjínhan tí nkehe jína, a ntá ninkákonhén tí nkehe jínahya.
Mé xikaha tí Dios tsíkjejá jaha, la Dios kuénta kjuíntacháha má,
a ntá tí í so sín k'uájikoa la kánhyó.§

¹⁰ Kjaxin ntáchro kixin:
Jaha Inchéni, tí xrankíxixín kjuích'éna chjasintajni,
la ko jaha kjuích'éna nkajní.

¹¹ Táha mé ts'itjáyan, a ntá jaha la tsjak'e jnkochrín.
Kaín tíha tsontaxín éxi iké chojni,

¹² éxi ijnko iké chojni xikaha tsoxrát'o,
ts'ixinkí éxi ijnko iké chojni.

A ntá jaha la ts'ixitóxinhya jnkochrín tsjak'e,
a ntá tí kjuachón chonta jaha la nunca tsjejehya.*

* 1:5 Salmo 2.7; 2 Samuel 7.14; 1 Crónicas 17.13 † 1:6 Deuteronomio 32.43 ‡ 1:7 Salmo 104.4
§ 1:9 1.8-9 Salmo 45.6-7 * 1:12 1.10-12 Salmo 102.25-27

¹³ Dios la ntáchehya nijnko tí sín ángel kuènte ch'án kixin chrók'uejó sín tja ch'án chjina ntahó chrók'ueṭoan sín, tsjixinjian kaín xín tí sín nínkakonhen sín la chrókjuachahya sín chrók'ueṭoan sín.†

¹⁴ Kaín tí sín ángel mé nchakuen sín ó mé ch'ehe Dios xra mé k'uituenhen sín tsjinkitsa tí sín ts'áyéhe kjuachaxin tsaá sín.

2

Chrókjoniehyani tí nkehe tsaáxinni

¹ Mé xikaha chrókjuenkayáxinni jína tí nkehe ó kuínhinni kixin chrókuíteohyani tí ntja ó kuákjani.

² A ntá tí tan tsíchronka tí sín ángel ósé la mé tsíkónoxín kixin chaxín tíha. A ntá tí sín kuítekakonyha sín tí tan jína kuínhin sín la kjuasin sín jie, na mé kjuasóte sín la táhó mé kjuacha sín.

³ ¿Xá nkexrí chrókuaáni tí chrókuaahyani kuentá tí nkehe jie chrókuaáxinni? Jehé Ìnchéni tsíchronka ch'án saoxín nkexrí chrókuaáxinni, a ntá chr'éxin tí sín tsíkinhin mé kjuakohé sín tí jeheni.

⁴ Méxra Dios kjuakoxin ch'án kjuaxroan jie la ko kjuachaxin jie kixin chaxín tíha, la ko noexínni kaín tí kjuachaxién Nchakuen ch'án tsík'áyéheni éxí tjinkaon ch'án tsjanjon ch'án.

Jesucristo k'óna ch'án chojni

⁵ Dios la tsíchjéhya tí sín ángel kjuachaxin kixin chrók'ueṭoan chjasintajni chr'éxin éxí tí jie tjejónixjani.

⁶ Náhi. Éxí nixja xroon itén Dios chronkaxín kixin:
¿Xá nkexéhe tí chojni a, jaha It'éni Dios, kixin imá xráxinkávan tí jehe ch'án?
¿Xá nkexro tíha kixin imá tóxakonhan kixin tí jehe ch'án?

⁷ Jaha tsíkjich'éna ch'án éxí ijnko chojni t'etuanhya kjánchó kánhyó isé, a ntá tí sín ángel antsí má k'uéchónta sín kjuachaxin, a ntá jie la imá kjuíkosáyehé ch'án;

⁸ la jaha tsíchjehé ch'án kjuachaxin kixin kaín nkehe ts'etuenhen ch'án.*
Mé xikaha ntáchro tíha kixin tsíchjéhe Dios tí chojni kjuachaxin kixin chrók'ueṭuenhen ch'án kaín xín nkehe, ntá Dios kuíteohya ninkehó nkehe chrókuitekakuenhya ch'án. Kjánchó naxa t'ikonhyani kixin á kaín nkehe titekakonhen ch'án.

⁹ Kjánchó ó noheni kixin Jesús la tsíkjich'éna Dios éxí chojni t'etuanhya kjánchó kánhyó isé, a ntá tí sín ángel antsí má k'uéchónta sín kjuachaxin. Dios mé tjuèhe kaín xín chojni ntá tjinkaon ch'án kixin ch'ín Jesús chrók'uenyákonhen kaín chojni. A ntá jie tsík'áyéhe ch'án kjuachaxin náxrjón la ko Dios tjikosáyehé tí jehe ch'án kixin tí kjuasóte ch'án, ik'uén ch'án.

¹⁰ Kaín nkehe siín la kuènte Dios la ko tjejó kixin tí kjuachaxin kuènte tí jehe ch'án. A ntá Dios tjinkaon ch'án kixin kaín xín tí xjeen ch'án chrók'uejó sín tí tjen ch'án tí t'inkaséyan. Méxra Dios kjuanjón Ìnchéni Jesucristo kixin tsjasóte ch'án kixin ntá jína kjuakoxin ch'án kixin ntá jehe ch'án tsaáxinni ch'án.

¹¹ Kaín tí sín tsíkótjóá la ko tí nkexro kjuínchetjóá na mé chóna jnkokoá It'é. Méxra tí Xjeen Dios tósuèhya ch'án tsontáchro ch'án kixin kichó ch'án tí jehe sín.

¹² Éxí ntáchro tí xroon itén Dios kixin:
Tsochénkani tí sín kichó ni kixin nkexro tí jaha,
tsjikosáyahani tsotsjeni himno tí tójnkotsékoni tí sín kichó ni.†

¹³ Kjaxin ntáchro kixin:
Janhan titekavan Dios.‡

† 1:13 Salmo 110.1 * 2:8 2.6–8 Salmo 8.4–6 † 2:12 Salmo 22.22 ‡ 2:13 Isaías 8.17,18

La ko kjaxin ntáchro ínaá kixin:

Ntihi tjékian tí xjeen Dios tsíkjanjon ch'án tsík'ayáha. §

¹⁴ A ntá tí xjeen chojni mé jnkokoá kichó la k'óna nto la ko ijni; la kjaxin ch'ín Jesús xikaha tsík'óna ch'án nto la ko ijni kixin jína its'en ch'án kixin jína sinchek'itjáyan ch'án tí nkexro chóna kjuachaxin t'óyan chojni, na mé t'axrjexín kixin diablo tíha,

¹⁵ mé xikaha chrókjuinchekaá ch'án kaín tí sín chrakonhen sín tí kjuach'en, tjejó sín éxí t'ítuenhen sín kaín yaon tjejó sín.

¹⁶ Kjaxin kuihya ch'án kixin chrókjuinkitsa ch'án tí sín ángel. Náhí. Ikui ch'án kixin tsjinkitsa ch'án tí sín tsík'axrjenixin ch'ín Abraham.

¹⁷ A ntá t'ichjánxin chrókóyóhe ch'án éxí tí sín kichó ch'án kixin jína chrók'óna ch'án nchat'á t'etoan kuènte Dios la chrókuiikonóeheni ch'án, ntá jína tsjatsen ch'án ijje kaín chojni kixin k'uenyákonhenni ch'án.

¹⁸ Kixin jehe ch'án kjuasóte ch'án la ko tí Jínahya tjinkaon chrókjuachroe ch'án la kjuachahya, a ntá jie la jína tsjinkitsa ch'án tí sín chrókjuachroe tí Jínahya kixin chrókjuasinhya sín jie.

3

Antsí tjetoan ch'ín Jesús, a ntá ch'ín Moisés la kánhyó

¹ A ntá kichó ni, jahará la tsíkótjóará, la mé Dios tsík'iyahará ch'án kixin ts'ónará xjeen ch'án, a ntá chróxraxinkáonrá jína Cristo Jesús na mé jehe ch'án mé tí apóstol la ko tí nchat'á t'etoan kuènte tí nkehe tinkáchónkini.

² Tí ch'ín Jesús jína kuítekakonhen ch'án Dios, mé tí nkexro tsíkjeýá ch'án sich'ehe ch'án xra, éxí kjaxin ch'ín Moisés jína kjuích'e ch'án xra k'uáyakonhen ch'án ntøe Dios.

³ Dios antsí kjuikosáyehe tí ch'ín Jesús, a ntá ch'ín Moisés la kénhyó, éxí antsí tjikosáyehe sín tí nkexro kjuích'èna ijnko nchia, a ntá tí nchia la kénhyó tjikosáyehe sín.

⁴ Jnkojnko nchia k'óna kixin síin nkexro kjuích'èna, kjánchó Dios mé kjuích'èna kaín nkehe síin.

⁵ Ch'ín Moisés jína kjuích'e ch'án xra k'uáyakonhen ch'án tí nchia kuènte Dios. Tí xra kjuích'e ch'án mé k'uénixja ch'án kuènte tí nkehe tsontáchro Dios chr'éxin.

⁶ A ntá Cristo la mé Xjeen Dios tí jehe ch'án, ntá kjuínchexiteýá ch'án jína la t'ayakonhen ch'án tí nchia kuènte Dios, la tíha mé jeheni, kixin tí tsítóehyani ch'án la naxa tsinkáchónkini ch'án ntá tsochéheni kixin tí nkehe tjejóchónhenni.

Ts'ok'éheni tí tjen Dios

⁷ Mé xikaha éxí ntáchro Nchakuen Dios nixja xroon itén Dios kixin:

A ntá jie tí chrókuinhínra tí nkehe ntáchro Dios,

⁸ chrókjuích'ehyará éxí kjuích'e tí sín ósé kuítekakonhya sín Dios tí yaon kjuích'ehe sín prueba Dios tí nteje.

⁹ A ntá ntaha tí sín tsík'axrjenixinrá ósé kjuích'èna sín prueba, kjónté cuarenta nánó k'uikon sín tí xra kjuít'a.

¹⁰ Méxra kónínkakonhan tí chojni a, ntáxrjan kixin: “Xrácín xrichoe asén sín, tjinkakonhya sín tsochóxin sín ntjaná.”

¹¹ Méxra kónínkakonhan tí jehe sín, ntátjan sín

kixin chaxín tsoxiteýá kixin ts'ixenhya sín ts'ok'éhe sín tí tjen janhan.*

¹² Kíchóni, chrókóxakonhanrá kixin chrókókohya nijnko tí jahará chróchontará asánrá jínahya chrókuítóhéra Dios tjechón chrókuítekákuenhyará tí jehe ch'án.

¹³ Chrókjuinchechéhéra kichuára jnkojnko yaon naxa tjen tiempo kixin nijnko tí jahará chrókjuenkayáxinrá kixin naxa chrókjuásinrá jie, í chróntáchrohya asánrá kixin naxa chrókójiáhará.

¹⁴ A ntá tí chrók'uejóni jnkojína hasta tsjixixín éxi kuinkáchónkini tí xrankixixín, ntá siín kjuachaxin ts'ejókoni Cristo.

¹⁵ Mé xikaha ntáchro kixin:

A ntá jie tí chrókuinhínrá jahará tí nkehe ntáchro Dios, chrókjuich'ehyará éxi kjuích'e tí sín ósé kuítekakonhya sín Dios.†

¹⁶ ¿A ntá nkexro tí sín kuínhin itén Dios, a ntá tí chr'éxin kuítekakonhya sín? ¿Á jehya kaín tí sín tsíkakitsjexín ch'ín Moisés tí nación Egipto?

¹⁷ ¿A ntá nkexro tí kónínkakonhen Dios tí cuarenta nánó? ¿Á jehya tí sín kjuasin jie k'uénxin nteje?

¹⁸ ¿A ntá nkexro ntáche Dios kixin chaxín tsoxiteyá kixin ts'ixenhya sín ts'ok'éhe sín tí tjen tí jehe ch'án? ¿Á jehya tí sín kuítekakonhya?

¹⁹ A ntá ó noheni kixin kjuachahya sín k'uixenhen sín kixin kuítekakonhya sín.

4

¹ Méxra, tsíntáchro Dios kixin tsjanjon ch'án kjuachaxin ts'ixenhenni ts'ok'éheni tí tjen ch'án, a ntá tóxakonhenni kixin ách'e jnkojín tí jahará chrókjuachahyará chrók'uixenhenrá ntiha.

² Kixin kjaxin jeheni kuínhinni itén ch'án tsaáxinni éxi kuínhin tí jehe sín, kjánchó tí jehe sín la ninkehó kjuínkítsahya sín tí tan jína kuínhin sín, kixin kjónté kuínhin sín tí tan na kuítekakonhya sín.

³ A ntá jeheni kuítekaonni, ntá ts'ixenhenni ts'ok'éheni ntaha, éxi tsíntáchro Dios kixin:

Méxra kóninkakonhan sín tí jehe sín ntátjan sín kixin chaxín tsoxiteyá kixin ts'ixenhya sín ts'ok'éhe sín tí tjén janhan.*

Kixin Dios la tió kjuixinhin ch'án xra kjuích'éna ch'án chjasintajni ntá kjuák'e ch'án k'ok'éhe ch'án.

⁴ Mé xikaha í jnko nketí nixja tí xroon itén Dios chrónka kuènte tí yaon yatoxin ntáchro kixin:

Kjuixinhin Dios kaín xra ntá kjuák'e ch'án k'ok'éhe ch'án tí yaon yatoxin.†

⁵ A ntá ínaá ntáchro tí xroon itén Dios kixin:

Ts'ixenhya sín ts'ok'éhe sín tí tjén janhan.‡

⁶ Kjánchó naxa t'itjáyan jnkojín chojni chrók'uixenhen sín chrók'ok'éhe sín. A ntá tí sín saoxín kuínhin tí tan chrókuaáxin sín la k'uixenhya sín kixin kuítekakonhya sín tí tan a.

⁷ Méxra Dios tsíkjeýá ch'án í jnko yaon, mé tí yaon jie, a ntá chr'éxin nixjaxin ch'án tí nkehe tsíchrónka ch'ín David éxi ntáchro tí xroon itén Dios kixin: A ntá jie tí tsinhínrá tí nkehe ntáchro Dios, chrókjuinchexiteyará.§

⁸ Kixin tí chrókjuanjon ch'ín Josué kjuachaxin kixin chrók'ok'éhe tí sín israelita,* ntá Dios la í chrónixjahya ch'án kuènte í jnko yaon.

⁹ A ntá naxa tjechónhen tí ts'ok'éhe tí sín tinkáchónki Dios;

¹⁰ kixin tí nkexro ts'ixenhen ts'ok'éhe tí tjen Dios tsíkjixinhin ch'án tí xra kuènte ch'án éxi yóhe kjaxin Dios kjuixinhin ch'án tí xra kuènte ch'án ntá kjuák'e ch'án k'ok'éhe ch'án.

† 3:15 Salmo 95.7-8 * 4:3 Salmo 95.11 † 4:4 Génesis 2.2 ‡ 4:5 Salmo 95.11 § 4:7 Salmo 95.7-8
* 4:8 Josué 22.4

11 T'ichjánxin kixin kaín asénni chrókjueyáni nkexrí chrók'uixenhenni chrók'ok'éheni, kixin chrókóyóehyani éxí tí sín kuítekakonhya.

12 Kixin tí itén Dios la mé tjechón la ko chóna kjuachaxin. Tíha la imá taté, a ntá kánhyó taté tí chica espada yánjín taté, la tíha mé t'ixenhen tí ninka asén chojni la ko nchakuen chojni hasta tí nkaya asén chojni. Tíha mé nchextraxinkaon chojni kaín nkehe tjenkayáxin sín la ko kaín nkehe ntáchro asén sín.

13 Kohya ninkehó nkehe tsíkjich'éna Dios tsjacha chrók'uejóméhe tí jehe ch'án kixin kaín nkehe la noxín siín t'ikon tí nkexro ts'áyéhe kuentá.

Jesús mé tí nchat'á imá tjetoan

14 Jesús tí Xjeen Dios mé tí nchat'á tjetoan kuénténi mé k'uixenhen tí tjen Dios la méxra chrókuítóehyani tí tinkáchónkini tí jehe ch'án.

15 Méxra jehe ch'án mé tí nchat'á tjetoan kuénténi mé tsjinkítsa ch'án tí jeheni kixin fuértehyani kixin kjaxin tí Jínahya chrókjuachroe tí jehe ch'án éxí sítónhen tí jeheni, kjánchó jehe ch'án la ninkehó jie kjuasinhya ch'án kjónté xíkaha kónhen ch'án.

16 Méxra kaín asénni chrókóchjineheni Dios tí tjen ch'án t'etoan ch'án kixin chrókuikonóeheni ch'án la ko chrókjuinkítsa ch'án tí jeheni tí nkehe chrók'uichjánxinhinni.

5

1 Kaín nchat'á t'etoan tsíkónoxín la chojni ó, tsík'áyéhe xra tsonixayákonhen chojni nkayakon Dios, la ko tsjanjon nkehe la ko iko its'en kixin ts'itjáyánxín tí jie kuènte chojni.

2 Kjaxin tí nchat'á a la fuértehya kixin chojni ó, a ntá chrókóninkakuenhya ch'án tí sín noehya la ko tí sín tsíkjichroe.

3 Kjaxin jehe ch'án, kixin fuértehya ch'án t'ichjánxin tsjanjon ch'án iko its'en kixin tí jie chóna ch'án jehe ch'án éxí tjanjon ch'án nkehe kuènte tí í so chojni chóna jie.

4 Ninkehró xitjahya jehó sich'éna asén nchat'á t'etoan. Náhí. Jehó tí sín tsíkjejá Dios tsík'áyéhe tí xra éxí tsík'áyéhe ch'ín Aarón.

5 Mé xíkaha Cristo, kjuích'énahya ch'án jehó ch'án asén ch'án nchat'á t'etoan. Náhí. Dios mé kjuikosáyehe ch'án mé tsíkjanjon tí xra éxí tsíntáchro kixin: Jaha mé xjanna;

Janhan mé kjuít'ána ijie.*

6 Kjaxin í jnko nketí nixja xroon itén Dios ntáchro kixin:

Jaha mé ijnko nchat'á tsjak'e jnkochríxín,

éxí yóhe k'uékjak'e ch'ín Melquisedec.†

7 Tió kjuák'e Cristo ntihi chjasintajni imá tsjánka ch'án la ko itsen chrónóehé ch'án Dios, kixin Dios chóna kjuachaxin chrókjuinchekaá ch'án kixin chrók'uenhya ch'án; la Dios la kuínhin kixin xíkaha kuítekaon ch'án.

8 Méxra Cristo, kjónté Xjeen Dios, la kuítekaon ch'án kjuínchexiteyá ch'án kjónté tí kjuasote ch'án.

9 Mé kjuínchexiteyá ch'án, ntá kjuacha ch'án k'óna ch'án tí nkexro sinchekaá jnkochríxín kaín tí chojni sinchexiteyéhe tí jehe ch'án.

10 A ntá Dios mé tsíkjich'éna ch'án nchat'á t'etoan éxí yóhe kjuák'e ch'ín Melquisedec.

Jehya jína chrókuítóheni tí tinkáchónkini Ìnchéni

* 5:5 Salmo 2.7 † 5:6 Salmo 110.4

¹¹ Chóntani nchónhya nkehe chróchrónkani kuènte tíha, kjánchó imá xra chróchrónkaxínni tíha kixin tiénxinhayará jahará.

¹² Ntá k'uátsínka nchónhya tiempo, a ntá ó jína chrók'ónará maestro, ntá náhí kixin naxa t'ichjánxinhánrá nkexro chrókjuakohará inaá tí nkehe xrahya kuènte itén Dios. Éxí xík'ónará lontirá, t'ichjánxín chrók'uirá tsjen inaá kixin xitjahya sinterá nkehe cha.

¹³ A ntá tí sín it'i tsjen ó, na mé yóhe chánjan takí tsjachahya sín tsjeyá sín nkexrí chrók'uejó sín jína.

¹⁴ Á ntá tí nkehe cha mé ine tí chojni nteto kixin ó nohe sín ti nkehe jína la ko tí nkehe jínahya.

6

¹ Naxa chrókjueyáni kixin jína chrókjuenkayáxinni éxí chojni nteto. Chróchenkahyani tí jahará ijie tí nkehe kánhyó xra tsíxrakohará tí xrankíxín kuènte Cristo. Náhí. T'ichjánxinhya naxa chrókjuakoharáni kixin chrókuítóhéra tí jie k'uékjásínra chrók'uénxínra, la ko nkexrí chrókuinkachónkirá Dios,

² la ko nkexrí chrókuikite chojni, la ko nkexrí ts'ejotja tjára chrítaón tí sín tinkáchónki Cristo, la ko nkexrí tsoxechón chojni tsík'en, la ko nkexrí chrókuítóexín ijie chojni.

³ A ntá tí Dios chrókjuanjon kjuachaxin la chrókjuakoni í so nkehe.

⁴ A ntá tí sín ó tsík'áyéhe sín tí xrohi, la ko ó tsjexín sín tí nkehe kjuanjon Dios, la ko tsík'áyéhe sín tí Nchakuen Dios,

⁵ la ko kóxrjínhin sín tí nkehe jína kuènte itén Dios, la ko kónohe sín nkexrí tí kjuachaxin tsochónta tí chjasintajni chr'éxin,

⁶ a ntá tí chrókuítóhe sín Dios, í chrókuinkáchónkihya sín, ntá xitjahya tsokjan sín inaá, kixin tí xíkaha la éxí chrókjuak'enkani sín ntacruz tí Xjeen Dios inaá la ko chrókjuanoá sín ch'án nkayakon nchónhya chojni.

⁷ Éxí nonte jnkoinko vez t'aniá chrin la tsjátan la ts'óna jína, a ntá kjuacha tí sín kjuích'e xra kixin Dios kjuíncheyaon ntiha.

⁸ A ntá tí t'óna ntach'í la ko kach'í la ninkehó sínkíhya la tsonínkakohen Dios, la tí tsjixixín mé tsoche.

Tí nkehe tjejóchónhenni mé tjinkítsa kixin jína ts'ejóni

⁹ Kjónté nixjani xíkaha, kichó ni, ó noheni kixin chaxín jína tjejorá k'uitjará tí ntia tsaáxinra.

¹⁰ Kixin Dios la jína, la ts'itjáyenhya ch'án tí xra jína tjejoch'era kixin tjuèherá kichuára, mé xíkaha kjuákoxinra kixin kjuínkítsará tí kichuára tinkáchónki Cristo la naxa tjejótjinkítsará sín xíkaha.

¹¹ Tjinkaonni kixin jnkoinkorá chrókjuákoxinra hasta tsjixixín kixin chontará kjuachéhe chrókjuínkítsará kichuára kixin chaxín ts'ayéhéra tí nkehe tjejochonhénra.

¹² Tjinkakonhyani kixin chrókjanra chrókósáhará. Náhí. Tjinkaonni kixin chrókjuákoxinra éxí tí sín chaxín tinkáchónki Ìnchéni tjejóchónhen sín ts'áyéhe sín tí nkehe tsintácho Dios kixin tsjanjon ch'án.

¹³ A ntá Dios, tió tsintácho ch'án kixin tsjanjon ch'án nkehe ts'áyéhe tí ch'ín Abraham la jehó Dios k'uákjenxin asén kixin kohya nkexro antsí tjetoan chrók'uákjenxin ch'án.

¹⁴ Ntácho ch'án kixin chaxín sincheyaon ch'án tí ch'ín Abraham la ko nchónhya chojni ts'axrjenixin tí jehe ch'án.*

* 6:14 Génesis 22.16-17

15 Ch'ín Abraham kjuák'echónhen ch'án isé kixin ts'áyéhe ch'án tí nkehe tsíntáchro Dios.

16 A ntá tió t'ákjenxin chojni ijnko nkexro la mé t'ákjenxin sín ijnko nkexro antsí tjetóan, a ntá jehó sín la náhi. A ntá ts'ákjenxin sín tí xikaha kixin ijnko nkehe tsoxiteyá, a ntá kohya nkexro tsontáchro ninkehó.

17 Méxra Dios k'uákjenxin ch'án asén ch'án tsíntáchro ch'án kixin chaxín tsoxiteyá, kixin tjinkaon ch'án chrókjuakoxin ch'án noxín kixin chrókónohe tí sín ts'áyéhe tí nkehe tsjanjon ch'án kixin sinchexiteyá ch'án tí nkehe tsíntáchro ch'án la í tsjitóxiénhya ch'án ninkehó tíha.

18 Mé xikaha siín yaá nkehe xitjahya ts'ixitóxin, kixin Dios la xitjahya sich'ia; kixin tíha Dios nchenoexínni kixin chaxín tsoxiteyá, la mé jeheni kjuancheheni ch'án kixin chrók'uayakonhenni ch'án la ko tjejóchónhenni tí nkehe tsjanjon ch'án.

19 Tí tjejóchónhenni xikaha la jína ts'ejó asénni éxi yóhe tí ntabárcó chóna gancho tjechruéxin kixin kohya nketí sátsji. Méxra xikaha kjaxin tí nkehe tjejóchónhenni la sátsíkji hasta nóton tí ka cortina tjen nkaxenhen nínko tjen nkaya nkajní,

20 tí senó k'uíxenhen Jesús kuakitjehé ch'án ijnko ntja ts'ixenxínni. Mé xikaha jehe ch'án k'lóna ch'án nchat'á t'etóan jnkochrín éxi yóhe kjuák'e tí ch'ín Melquisedec.

7

Ch'ín Jesús mé nchat'á éxi yóhe k'uéjyak'e ch'ín Melquisedec

1 Tí ch'ín Melquisedec mé k'ué rey kuènte chjasin Salem la ko nchat'á kuènte Dios tjen nkaya nkajní. A ntá tió ch'ín Abraham kjanxin ch'án tí tsíkjikjanjonko ch'án tí í so sín rey, kjuacha ch'án, ntá ch'ín Melquisedec kjuíxinhin ch'án ntja ikui ch'ín Abraham, ntá jehe ch'ín Melquisedec kjuíncheyaon ch'án tí ch'ín Abraham.

2 A ntá tí ch'ín Abraham chjéhe ch'án tí ch'ín Melquisedec diezmo kaín xín nkehe tsíkjacha ch'án tí tsíkjikjanjonko ch'án tí sín rey.* A ntá ihnié ch'ín Melquisedec mé t'axrjéxin saoxín kixin “ijnko rey jína”; a ntá jehe ch'án k'ué rey kuènte chjasin Salem, tíha mé t'axrjéxin kixin “kjuaxróxin”, la mé xikaha jehe ch'án mé “ijnko rey tjanjon kjuaxróxin”.

3 A ntá ch'ín Melquisedec la noehya sín nkexro it'é ch'án la ko nkexro ìné ch'án la ko nkexro tsík'axrjeníxin ch'án; la ko noehya sin nkesá tsíkókjíhi ch'án la ko nkesá tsík'en ch'án. Mé xikaha tóyóhe tí Xjeen Dios kixin jehe ch'án mé ijnko nchat'á jnkochrín.

4 A ntá jie, tsjehérá kixin imá t'etóan tí ch'ín Melquisedec kixin tí ch'ín Abraham k'uaxrjeníxinni, la tsíchjéhe ch'án tí ch'ín Melquisedec diezmo tí nkehe tsíkjacha ch'án tí tsíkjanjonko ch'an tí sín rey.

5 Éxi nixja ley tsík'etóan ch'ín Moisés, kixin tí sín nchat'á tsík'axrjeníxin tí ch'ín Leví chóna sín kjuachaxin tsjanchehe sín kaín xín chojni diezmo kjónté naxa kjéhya sín, tsík'axrjeníxin sín tí ch'ín Abraham éxi tí jehe sín.

6 A ntá ch'ín Melquisedec, kjónté tsík'axrjeníxinhya ch'án tí ch'ín Leví, na mé kjuích'ehé ch'án cobra tí ch'ín Abraham, mé tí ch'ín tsík'áyéhe tí nkehe tsíntáchro Dios. Mé xikaha tí ch'ín Melquisedec tsíkjincheyaon ch'án tí ch'ín Abraham.

7 Kohya nkexro tsontáchro kixin chaxínhya kixin tí nkexro ncheyaon la antsí má t'etóan, a ntá tí nkexro tsíkóyaon la t'etóanhya. Náhi.

* 7:2 7.1-2 Génesis 14.17-20

⁸ A ntá tí tjejóni, tí sín t'áyéhe tí diezmo la mé chojni ts'en ó. Kjánchó ntáchro tí xroon itén Dios kixin tí ch'ín Melquisedec mé ijnko chojni naxa tsík'enhya, la naxa tjechón.

⁹ Mé t'axrjexín kixin ch'ín Leví la ko káin xín tí sín nchat'á tsík'axrjeníxin ch'án, mé tí sín t'áyéhe sín diezmo jie, la mé kjaxin jehe sín tsíkjenkehe sin diezmo tí ch'ín Melquisedec tió tsíkjenka ch'ín Abraham,

¹⁰ kixin naxa tjiko cuerpo kuente ch'án tí sín ts'axrjeníxin ch'án, naxa kokjéhya sín tió xeta ch'án tí ch'ín Melquisedec.

¹¹ Tí sín nación Israel tsík'áyéhe sín tí ley kixin tí sín nchat'á levita, mé tsík'axrjeníxin sín tí ch'ín Aarón. A ntá jie tí chaxín chrókjuacha sín chrókjuentoá sín tí sín tinkáchónki tí ley, la í t'ichjánxinhya naxa chrókónoxín í jnko nchat'á í chrókóyóehya éxí tí ch'ín Aarón. A ntá kjuachahya sín xikaha ntá t'ichjánxín chrókónoxín ijnko nchat'á chrókóyóhe éxí tí ch'ín Melquisedec.

¹² A ntá tí chrók'uixinkí tí nchat'á la kjaxin chrók'uixinkí tí ley.

¹³ A ntá tí xroon itén Dios chrónka tíhi kuente Inchéni. A ntá jehe ch'án la tsík'axrjeníxin ch'án í jnko nkexro kuente Israel la kohya ninkexró tsík'óna nchat'á tsík'axrjeníxin tí sín a.

¹⁴ Kixin ó noxín kixin Inchéni tsík'axrjeníxin ch'án tí ch'ín Judá, a ntá ch'ín Moisés la chrónkahya ch'án ninkehó kuente tí sín ts'axrjeníxin tí ch'ín a tió nixja ch'án kuente tí sín nchat'á.

¹⁵ A ntá tíhi la antsí má kónoxín kixin tí nchat'á nixin la tóyóhe éxí ch'ín Melquisedec

¹⁶ kixin tió k'óna ch'án nchat'á la jehya kixin xikaha chrók'uetóan ijnko ley kixin nkexro chrók'uaxrjeníxin ch'án. Náhi. Ó jehí k'óna ch'án nchat'á kixin tí kjuachaxin chóna ch'án la xitjahya ts'itjayan.

¹⁷ Kixin nixja Dios kixin nkexrí tjen tí jehe ch'án, ntáchro kixin:

Jaha mé ijnko nchat'á tsjak'e jnkochrínín,
éxí yóhe k'uékjak'e ch'ín Melquisedec.†

¹⁸ Méxra tí nkehe k'uék'etóan senó mé ch'ehya xra jie kixin kánhyó kjuachaxin k'uéchóna la ko kjuachahya,

¹⁹ kixin tí nkehe k'uetóan ch'ín Moisés kjuachahya kjuínchetjóá ninkehó nkehe. A ntá jie chóntani ijnko nkehe antsí jína tjejóchónhenni kixin tíha mé antsí jína tsochjinexínni Dios.

²⁰ A ntá tió ntáchro Dios tíha la tsík'ákjenxín ch'án asén ch'án jehó ch'án.

²¹ La ntá tí í so nchat'á, tió tsíkónoxín sín, tsík'ákjenxínhya Dios asén ch'án. A ntá tió tsíkónoxín tí nchat'á i la Dios tsík'ákjenxín ch'án asén ch'án. A ntá ntáchro xroon itén Dios kixin:

Inchéni tsík'ákjenxín asén ch'án

a ntá ts'ixitóxinhya tí nkehe tsintáchro ch'án:

“Jaha mé ijnko nchat'á tsjak'e jnkochrínín

éxí yóhe k'uékjak'e ch'ín Melquisedec.”‡

²² Méxra ch'ín Jesús ntáchro kixin tí pacto t'etóan ch'án la antsí má jína, a ntá tí pacto senó la náhi.

²³ Ntá k'uixin nchónhya sín nchat'á, kjánchó nkák'en sín, ntá xitjahya naxa chrókjuich'e sín tí xra a.

²⁴ A ntá ch'ín Jesús la ts'enhya ch'án la t'ichjánxinhya kixin í jnko nkexro chrókuakja tí xra kuente ch'án chrók'óna nchat'á.

²⁵ Méxra jehe ch'án tsjacha sinchekaá ch'án jnkochrínín tí sín tsochjinehe Dios kixin tinkáchónki sín tí jehe ch'án kixin itjen ch'án jnkochrínín chrónóehé ch'án Dios kixin chrókjuinchekaáni ch'án.

† 7:17 Salmo 110.4 ‡ 7:21 Salmo 110.4

²⁶ Mé xikaha Jesús mé tí nchat'á t'etoan t'ichjánxinhinni; jehe ch'án mé ijnko nkexro tjoá, chóntahya ninkehó jie, la ko tjenkákjanhya ch'án tí sín tjasin jie, a ntá sákjuí ch'án nkaya nkajní.

²⁷ Ntá tóyóehya tí í so nchat'á t'etoan, kixin t'ichjánxin ts'óyán sín iko tsjanjon sín tsochjéhe sín Dios kaín yaon, saoxín kixin tí jie kuente sín, a ntá chr'éxin kixin tí jie chóna tí í so chojni. A ntá ch'ín Jesús jnkokoaxón vez kjuanjon asén ch'án ik'uén ch'án.

²⁸ Tí ley k'uék'etoan ch'ín Moisés t'etoan kixin chojni naxa chóna jie chrók'óna nchat'á, a ntá Dios tsík'ákjenxin asén ch'án tió kjuixin k'óna tí ley, ntáchro ch'án kixin tí Xjeen ch'án mé ts'óna nchat'á t'etoan kixin jína kjuínchexiteyá ch'án jnkochrixín.

8

Ch'ín Jesús nixjaxin ch'án ijnko pacto nixin

¹ Tí nkehe antsí má tjetjoan chrónkani la mé tíhi kixin tí nchat'á kuènteni mé t'etoan ch'án, la ko tjetjaxin ch'án nkaya nkajní, nó chjina tí trono t'etoanxín Dios,

² k'óna ch'án nchat'á tí ninko chaxín tsíkjich'éna Ìnchéni, la jehya chojni tsíkjich'éna tíha.

³ Kaín nchat'á t'etoan tsík'áyéhe xra kixin tsjanjon nkehe la ko iko its'en. Méxra Jesucristo t'ichjánxin kixin tsjanjon ch'án ichrén nkehe.

⁴ Tí chrókjuak'e ch'án chjasintajni, chrók'ónahya ch'án nchat'á kixin naxa siín nchat'á tjanjon nkehe k'uetoan tí ley tsík'áyéhe ch'ín Moisés.

⁵ A ntá tí sín nchat'á k'uékjanjon nkehe tóyóhó tí nkehe siín nkaya nkajní. Noheni kixin tóyóhó kixin tió ch'ín Moisés chrókjuich'éna ch'án ninko la ntáche Dios tí jehe ch'án kixin: “Tjenkayáxian jína, a ntá sich'éna jaha éxí tí nkehe kjuákuáxian chrítaón jna.”*

⁶ A ntá tí nchat'á t'etoan kuènteni tjech'e ch'án xra antsí jína kixin jehe ch'án mé tí nkexro nixjaxin tí pacto nixin tsintáchro Dios chrónka tí nkehe jína tsonhen chr'éxin.

⁷ A ntá tí pacto tsík'etoan saoxín la tí chróxiteyá jína, la t'ichjánxinhya chrók'óna yóxin pacto.

⁸ A ntá Dios k'uíkon kixin kjuínchexiteyáhya tí sín a, éxí ntáchro xroon itén Dios kixin:

Ntáchro Ìnchéni kixin: Itsi ijnko yaon

mé tsjánjuan ijnko pacto nixin tsochóna tí sín nación Israel la ko tí sín chjasin Judá.

⁹ Jehya xikaha tí pacto kuétuanhan tí sín tsík'axrjeníxinrá ósé, tí yaon kjuínkítsa sín k'uaxrjexín sín tí nación Egipto; kjánchó kjuínchexiteyáhya sín tí pacto kuétuanhan sín, méxra kuitohá sín, ichro Ìnchéni.

¹⁰ Tí pacto tsétuanhan tí sín chjasin Israel tió ts'atsínka tí yaon a, mé xikaha tíhi, ichro Ìnchéni:

Sintaxráxinkavan asén sín tí ley tsétoan,

a ntá tí kjuaxrexinkaon kuente sín tsokjian tí nkehe tsétuanhan sín.

A ntá janhan ts'óna Dios kuente sín,

a ntá jehe sín mé ts'óna chjasin kuéntana.

¹¹ Ts'ichjánxinhya naxa tsjakohé kichó sín

kixin chróchóxin sín Ìnchéni,

kixin kaín sín tsochóxinna sín,

* 8:5 Éxodo 25.40

kjónté chojni imá ntsíntsí la ko chojni imá hyé.

¹² S̄intak'itjáyan tí nkehe jínahya kjuích'e sín

la ko í tsoxráxinkakonhya inaá tí jie chón̄ta sín.†

¹³ X̄ikaha nixja Dios kuènte tí pacto n̄ixin ts'et̄oan ch'án k̄ixin tsíkóntaxin tí pacto saoxín k'uet̄oan ch'án, tíha mé tinkákóntaxin la ko tinkákjeje, na í séhya ts'itjáyan.

9

Tí n̄inko chjasintajni la ko tí n̄inko nkaya nkajní

¹ Ā ntá tí pacto saoxín t'et̄oan nkexrí chróxrañkaonni Dios, k̄ixin tí n̄inko ntihyó chjasintajni.

² Ā ntá tí n̄inko k'uékjak'e mé tí cuarto saoxín k'uekjinchek'in sín tí Cuarto Tjóa, tí kjuák'e tí candelero la ko tí mesa tjejókjen tí niot̄ja k'uéxrañkaxín sín Dios.

³ Nóton tí yóxin ka cortina kjuák'e tí cuarto k'uékjinchek'in sín tí Cuarto Āntsí Tjóa.

⁴ Ntiha k'uékjak'e tí altar tsík'óna chica oro k'uékjakaxín sín tí ch̄jinc̄o la ko k'uékjak'e tí ntacajón chr'ísimá chica oro tjenkáya tí pacto. Nkaxenhen tí ntacajón k'uékjak'e ijnko nchésen tsík'óna chica oro k'uék'inka maná k'óna niot̄ja, la ko k̄jaxin k'uékjak'e tí nta k'uékjin ch'ín Aarón kjuank̄ixin k'uayan nta ntahnte, la ko k̄jaxin ntiha kjuák'e tí x̄ro chón̄ta tí tan k'uet̄oan Dios.

⁵ Chrítaón tí ntacajón k'uék'ejó yaá ángel tsíkjan̄oya tsíkjentoá kan̄enee chrítaón tí kjuák'e tí kjuachaxin kuènte Dios; ntaha k'uékjin̄xin tí jie k'uéchón̄ta chojni. Ā ntá ijie la t'ichj̄ánxin̄hya nāxa tsonixjani kuènte tíha.

⁶ Ā ntá x̄ikaha k'uéjó tí nkehe a, ā ntá tí sín nchat'á jnkoyaxón t'ixenhen sín tí cuarto saoxín kuènte n̄inko k̄ixin tí x̄ra ch'e sín kuènte n̄inko.

⁷ Ā ntá tí yóxin cuarto jehó tí nchat'á t'et̄oan t'ixenhen ch'án jnkokoá vez jnkójnko nánó; ā ntá tí t'ixenhen ch'án t'ichj̄ánxin ts'ixenko ch'án ijnié iko tsochjéhe ch'án Dios tsot̄juáxin ijie ch'án la ko ijie tí i so chojni.

⁸ Ā ntá tí Nchakuen Dios nchenoexínni tíhi k̄ixin nachrohe k'uékjich'e x̄ra tí cuarto saoxín la nāxa tjexrankehya k̄ixin chrók'uixenhenni tí Cuarto Āntsí Tjóa.

⁹ Kaín tíha tjakoxin ijnko nkehe chrókónoheni jie, kjánchó tí nkehe chjéhe sín Dios la ko tí ko t'óyán sín xitjahya nchenoexín sín k̄ixin á chaxín kótjóa tí jie k'uéchón̄ta sín k̄ixin x̄ikaha k'uéxrañkaon sín Dios.

¹⁰ Ā ntá tíha jehó t'et̄oan kuènte tí nkehe chrókjón̄e sín la ko tí nkehe chrók'ui sín la ko tí chrók'ónti sín k̄ixin chrókótjuáxin ijie sín, kaín tíha mé k'uituenhen sín kuènte cuerpo ó la jehó k'uéchón̄ta kjuachaxin tí nāxa kjuink̄íhya Dios nkexrí chróxrañkaon sín ch'án.

¹¹ Ā ntá ó kui Cristo, jehe ch'án mé nchat'á t'et̄oan kuènte tí nkehe āntsí jína itsi. Ā ntá tí n̄inko ch'e ch'án x̄ra la āntsí jína la ko āntsí ntoá, la jehya chojni tsík̄jich'éna tíha k̄ixin jehya chjasintajni ntihi tjen.

¹² Tió k'uixenhen Cristo tí Cuarto Tjóa, la jehya k̄ixin chrókjuanjon ch'án ijnié kotèntso la ko ijnié koxintáxjan. Náhi. Ijnie ch'án kjuanjon ch'án; mé x̄ikaha k'uixenhen ch'án jnkokoá vez ntiha mé x̄ikaha kjuenka ch'án k̄ixin chrókuaáxinni jnkochr̄ixín.

¹³ Ā ntá tí ijnié koxinta la ko ijnié kotèntso la ko tí nteso kuènte tí koxintáxjan tsíchexín tí altar tikitexín tí sín tjuáhya la mé tíha chón̄ta kjuachaxin tsot̄juáxin tí chrítaón ó.

† 8:12 8.8-12 Jeremías 31.31-34

14 **A** ntá tí xikaha, la kjá antsí má chóna kjuachaxin tí ijnié Cristo. Kíxin tí kjuachaxin Nchakuen Dios tjen jnkochrín, la Cristo kjuanjon asén ch'án ik'uén ch'án k'uáyéhe Dios, la jehe ch'án la ninkehó jie chónahya ch'án. **A** ntá ijnié ch'án nchetjóá tí nkehe kjuích'eni senó chrók'uenxínni kíxin ntá jie la jína chrókjuich'ehe ni xra Dios tjechón.

15 Méxra Jesucristo nixjaxin ch'án tí pacto nixin k'uetōan Dios. Kíxin k'uenyákonhenni Cristo ntá tsotjuáxin tí jie kjuasinni kjuínchexiteyáhyani tí pacto k'uituenhenni senó; kíxin tí sín k'uíyēhe Dios la jína chrók'uáyéhe sín tí nkehe tsjejehya kíxin jehe ch'án xikaha tsintáchro ch'án tsjanjon ch'án.

16 **A** ntá tí siín ijnko nkehe tsintáchro ijnko chojni kjuák'e na ntá ik'uén la t'ichjánxin tsonoxín kíxin chaxín tsík'en tí nkexro tsíkjich'éna.

17 **A** ntá tí nkehe tsintáchro ch'án la sínkíhya tí naxa tjechón tí nkexro tsíkjich'éna; jehó tió chrók'uen ch'án mé sínkí.

18 Méxra tí pacto xrankíxín tsík'etōan Dios kjuankíxin kjuích'e xra kíxin k'uitji ijni.

19 Ch'ín Moisés tsíchrónka ch'án kaín nkehe tsík'etōan tí ley kuínhin kaín tí chojni; a ntá chr'éxin kuákja ch'án ichjóen kolélo kjátse la koí ntarama hisopo, ntá kjuínchekjatjaxín ch'án ijnié koxintáxjan la ko ijnié kotèntso tsíkjiko ìnta, ntá kuikjanjin ch'án tí libro chóna ley la ko kuikjanjin ch'án kaín tí chojni.

20 **A** ntá ntáchro ch'án kíxin: “Tí jni i tsoxiteyáxin tí pacto k'uetōan Dios chrókjuínchexiteyéhérá jahará.”*

21 Tí ch'ín Moisés kjaxin kuikjanjin ch'án jni tí ninko la ko kaín nkehe t'ichjánxin tí nkaxenhen ninko.

22 Kíxin xikaha ntáchro tí ley kíxin kaín nkehe la chrókótjuáxin tí jni; a ntá xitjahya chrókótjóá tí jie tí chrók'uixikjanjinhya jni.

Tí ik'uén Cristo mé tsjìnxín ijíeni

23 Méxra t'ichjánxin kíxin ik'uén iko kótjuáxin tí nkehe a, táha mé tóyóhó tí nkehe siín nkaya nkajni; a ntá tí nkehe chaxín kuènte nkaya nkajni t'ichjánxin ijnko nkehe antsí jína chrók'uen.

24 **A** ntá Cristo k'uíxenhya tí ninko tsíkjich'énoxín chojni tja, táha mé ijnko nkehe tóyóhó tí ninko chaxín. Náhi. Jehe ch'án mé k'uíxenh ch'án tí nkaya nkajni, a ntá jie mé tjen ch'án tí tjen Dios nixjaxin ch'án kaín ni.

25 **A** ntá jehe ch'án la jehya jnkoyaxón k'uíxenh ch'án ntiha k'uenyákonhenni ch'án. Náhi. **A** ntá tí nchat'á t'etōan t'ixenhen tí Cuarto Tjóá jnkojnko nánó kíxin tsjanjon ch'án ijnié ko ó.

26 **A** ntá tí xikaha chrókónhen Cristo la t'ichjánxin kíxin jnkoyaxón chrók'óyán sín ch'án desde tí k'óna tí chjasintajni. **A** ntá jie la ó chjina, tsjixraká tsjeje chjasintajni, a ntá kónoxín Cristo la ik'uén ch'án jnkokoá vez kíxin tsjìnxín ijíeni.

27 Mé xikaha kaín ni its'enni jnkokoá vez, a ntá chr'éxin tsitoexín ijíeni.

28 Mé xikaha kjaxin Cristo jnkokoá vez ik'uén ch'án kíxin tsjìnxín ijíeni nchónhya chojni. **A** ntá chr'éxin itsi ch'án inaá, jehya kíxin naxa tsjatsen ch'án ijíeni chojni. Náhi. Sinchekaá ch'án tí chojni ó tsíkótjóá tjejóchónhen itsi ch'án.

10

1 **A** ntá tí ley k'uetōanxín ch'ín Moisés la tóyóhó tí nkehe jína tsi la jehya tí nkehe chrókuaáxinni. Méxra tí ley kjuachahya kjuínchetjóá tí sín kóchjinehe Dios kjuanjon sín iko its'en jnkojnko nánó.

* 9:20 9.19–20 Éxodo 24.6–8

² **A** ntá tí chrókjuacha tí ley chrókjuinchetjóá ijíé sín, ntá chrókjuenkayáxinhya sín kixin naxa chróchóna sín jie, la chrókuítóhe sín, í chrókjuanjonha sín iko its'en.

³ **A** ntá xikaha ich'e sín t'óyán sín ko, la jnkojnko nánó xraxinkakonxín sín tí jie tsíkjasin sín

⁴ kixin ijnié koxinta la ko ijnié kotèntso xitjahya tsjìnxín ijíé chojni.

⁵ **A** ntá tió Cristo kui chjasintajni ntáche ch'án Dios kixin:

Tjinkákonhya jaha iko its'en la ko tjinkákonhya jaha ninkehó nkehe chrók'uayéhé. Náhí.

Jaha tsíkjach'éna ijnko cuerpo kixin tsochonta janhan.

⁶ Jaha tóxrjíanhya iko tsíchján la ko tí í so nkehe chrókjuanjonni chrókjuakjìnxian ijie.

⁷ **A** ntá ntátjan ch'án kixin: “**A** ntá ijie la ntihi tjén janhan kixin sintaxiteyá tí nkehe tóxrjínhan jaha Dios,

éxí nixja xroon chrónka nkexrí chrókjuít'a.”*

⁸ Senó ntáchro kixin Dios tjinkakonhya la ko tóxrjienhya ch'án iko its'en chrókjuanjonni la ko ninkehó nkehe chrókjuanjonni chrókjuìnxín ijíéni kjónté tí ley k'uetóan kixin xikaha chrókónhen.

⁹ **A** ntá chr'éxin tsintáchro kixin: “**A** ntá k'uinka janhan kixin sintaxiteyá tí nkehe tóxrjínhan jaha Dios,” ichro ch'án. Mé xikaha kjuatsen ch'án tí ko k'uék'óyán sín ósé, a ntá jehe ch'án kjuanjon ch'án ijnko nkehe nixin.

¹⁰ Dios kjuínchetjuáxinni kixin Jesucristo kjuínchexiteyá éxí tóxrjínhin Dios kixin tí cuerpo kuènte ch'án kjuanjon ch'án ik'uén ch'án jnkokoáxón vez para jnkochrín.

¹¹ **A** ntá kaín nchat'á judío tí xra ch'e sín jnkojnko yaon la jnkokón nkehe its'en tjanjon sín kjánchó tíha la xitjahya tsjìnxín ijíé chojni.

¹² **A** ntá Jesucristo mé jnkokoá vez k'uenyákonhenni ch'án kixin tsotjuáxin ijíéni la tíha mé sich'e xra jnkochrín. **A** ntá kjuixin ntá sákjuí ch'án kjuák'etjaxin ch'án nó tí tja chjina kuènte Dios.

¹³ **A** ntá ntiha tjechónhen ch'án tsjixinjian kaín tí sín nínkakonhen ch'án tsjachahya sín ts'etóan sín.

¹⁴ Mé xikaha jnkokoá nkehe kjuích'e ch'án chjéhe ch'án Dios, kixin jína ts'ejó tí sín ó tsíkótjóá.

¹⁵ **A** ntá tí Nchakuen Dios nchenoheni tíhi kixin senó tsintáchro kixin:

¹⁶ Tí pacto tsotjahá tí jehe sín tió ts'atsínka tí yaon a, ichro Ìnchéni;

Sintaxráxinkavan asén sín tí ley tsétoan,

a ntá tí kjuaxrexinkaon kuènte sín tsokjian tí nkehe tjínkavan.†

¹⁷ Kjaxin ntáchro kixin:

Í tsoxráxinkakonhya inaá tí ijíé sín la ko tí nkehe jínahya kjuích'e sín.‡

¹⁸ Mé xikaha tí ó kótjóá ijíéni la t'ichjánxinhya í so nkehe chrókjuanjonni chrókótjuáxin tí ijíéni.

Méxra t'ichjánxin tsochjineheni Dios

¹⁹ Kichóni, a ntá la í kohya kjuachrakon ts'ixenhenni tí Cuarto Antsí Tjóá tí tjen Dios kixin kjuachaxién ijnié Jesucristo,

²⁰ chréheni tí ntja nixin mé tí ntja tjechón kuakitjehé ch'án nóton tí ka cortina, tíha mé tí cuerpo kuènte ch'án.

²¹ Jesús mé tí nchat'á tjetóan kuènteni t'etóan tí ntóe Dios.

* **10:7** 10.5-7 Salmo 40.6-8 † **10:16** 10.16-17 Jeremías 31.33-34 ‡ **10:17** 10.16-17 Jeremías 31.33-34

22 Méxra xikaha chrókóchjineheni Dios kaín asénni chrókuinkáchónkini ch'án chaxín kixin jehe ch'án tsíkjinchetjóá ch'án asénni kixin chrókjuenkayáxinhanyi kixin naxa chóntani jie kixin tí cuerpo kuènteni kótjuáxin tí nta jehó. §

23 Chrókuítóehyani chrók'uejóchónhenni tí nkehe tinkáchónkini kixin Dios la chaxín sinchexiteyá ch'án tí nkehe tsíntáchro ch'án.

24 Chrókjueyáni nkexrí chrókjuinkitsani kichó ni kixin chrótjuèheni kichó ni la chrókjuich'eni tí nkehe jína.

25 Chrókuítóehyani chrókójnkotséni, chrókóyóehyani éxí tí sín í tójnkotséhya sín. Náhí. Chrókjuinchechéheni kichó ni antsí má jie kixin ó noheni kixin í séhya tsokjan Ìnchéni.

26 A ntá tí naxa chrókjuenkayáxinni chrókjuasinni jie tí ó noheni tí nkehe chaxín, la kohya í jnko nkexro chrók'uenyákonhenni chrókótjuáxin tí jie chóntani.

27 A ntá jehó itjen tí kjuachrakon jie tsitóexín jie la ko tí xrohi tjeche ts'itjáyanxín tí sín nínkakonhen Dios.

28 A ntá tí tjen jnkojín nkexro titekakonhya tí ley k'uetóanxín ch'ín Moisés, la tsonoxín yaá o y'á tí sín tsík'ikon tí jie tsíkjasin sín, tíha mé ts'enxín sín la kohya nkexro tsíkonóehé tí jehe sín.

29 ¿Á tjenkayáxinhyará kixin antsí má chrókjuasóte tí sín kuítekakuenhya tí Xjeen Dios la ko chóntehya sín kjuasáya tí ijnié ch'án la ko t'ántaxínhin sín tí Nchakuen Dios tjuèheni? Kixin tí jni chrónkaxín kixin ts'etóanxín tí pacto la ko tí jni k'uíjmáxinni.

30 Noheni kixin tsíntáchro Ìnchéni kixin: “Janhan mé tóna tocar sintakitoaxián ijie chojni la ko janhan tsjénkahá sín.”* Kjaxin tsíntáchro kixin: “Ìnchéni sinchekitóexín ijie tí sín tinkáchónki ch'án.”†

31 Méxra kjuachrakon jie chrók'uanótjenyáni tí tja Dios tjechón.

32 A ntá chróxráxinkáonrá jahará tí nkehe tsíkónhen ósé kixin tió jahará nantá tsík'ayéhérá tí nkehe t'inkaséyan, a ntá kjuachará kjónté tí nchónhya nkehe tsíkónhanrá.

33 A ntá jnkojín tí jahará k'uántaxínhanrá sín la ko kjuatiará sín nkayakon nchónhya chojni, a ntá í so sín la kjuínkítsa tí sín tsík'ekon.

34 A ntá jahará kuikonóehérá tí sín tjejóchjina ntoechiso, a ntá jahará kóninkákonhyará kjónté k'uaxrjahará kaín nkehe chontará, kixin ó nohará kixin nkaya nkajní chontará nkehe antsí jína chónhya tsjeje.

35 Chrókuítóéhyará tí nkehe tinkachónkirá kixin ó nohará kixin tíha mé ts'ayéxinrá nkehe chr'éxin.

36 Kjaxin jahará t'ichjánxin chrók'uejochonhénrá chrókóninkákonhyará kjónté ichrén nkehe chrókónhanrá, kixin s'ich'erá tí nkehe tjinkaon Dios, kixin xikaha chrók'uayéhérá tí nkehe tsíntáchro tí jehe ch'án.

37 Kixin xikaha ntáchro xroon itén Dios kixin:

Kánhyó sé

itsi tí nkexro tsi, í sinchexrjenhya.

38 Tí sín kótjóá asén mé tjejóchónxin sín kixin tinkáchónki sín Dios;

a ntá tí sín tsítóhe tí janhan la í tsochànahya tí xikaha ch'e sín. ‡

39 Kjánchó jeheni jehya xikaha chrókuítóeheni chrókuinkáchónkiyhanyi tí jehe ch'án kixin ntá chrókjuasinni jie chrók'uitjáyanxinni. Náhí. Tinkáchónkini ch'án la tíha chrókuaáxinni.

§ 10:22 Ezequiel 36.25 * 10:30 Deuteronomio 32.35-36 † 10:30 Deuteronomio 32.35-36 ‡ 10:38 10.37-38 Habacuc 2.3-4

11

Tí fe

¹ Tí fe chóntani la mé noexínni chaxín kixin tsoxiteyá ts'áyéheni tí nkehe tjejóchónhenni, la ko noexínni chaxín kixin kjónté ijnko nkehe t'ikonhyani la chaxín tjen.

² Tí sín tsík'axrjeníxinni ósé la kóxrjínhìn Dios kixin k'uéchónta sín fe.

³ Tí fe mé noexínni kixin Dios tsíkjich'éna kaín nkehe tí kjuachaxin tí nixja ch'án la ko noexínni kixin tí nkehe t'ikonni mé tsík'óna tí nkehe t'ikonhyani.

⁴ A ntá tí fe k'uéchónta ch'ín Abel mé k'óyán ch'án ijnko kolélo chjéhe ch'án Dios. Tíha ijnko nkehe antsí jína kjuanjon ch'án, a ntá tí nkehe tsíkjanjon ch'ín Caín la náhí. Méxra Dios kóxrjínhìn tí nkehe kjuanjon ch'ín Abel ntá ntáchro Dios kixin jína tí ch'ín a. Kjónté ó tsík'en ch'ín Abel la tí nkehe tsíkjich'e ch'án naxa tjakoxin kixin jína tí fe k'uéchónta ch'án.*

⁵ A ntá tí fe k'uéchónta ch'ín Enoc la Dios sátsíkjiko tí jehe ch'án la k'uénhya ch'án, a ntá k'uitjahya sín ch'án kixin Dios sátsíkjiko. Naxa sákjuihya ch'án la xráxín kóxrjínhìn Dios nkexrí k'uékjak'e ch'án.†

⁶ A ntá tí chróchóntahyani fe la xitjahya chrókjuinchechéheni Dios, kixin t'ichjánxìn kixin tí sín chrókóchjinehe sín Dios chrókuitekaon sín kixin chaxín itjen ch'án la ko jehe ch'án tsjenkehe ch'án tí sín xritjeyá sín tí jehe ch'án.

⁷ A ntá tí fe k'uéchónta ch'ín Noé tí Dios chénka tí jehe ch'án tí nkehe naxa k'uíkonhya ch'án tsonhen, la kuítekaon ch'án kjuích'éna ch'án ntabárcó kixin tsaáxin ch'án la ko tí sín naxa kjéhya ch'án. Tí fe k'uéchónta ch'án kjuakoxin kixin tí í so chojni chjasintajni la jínahya sín tsjasóte sín. A ntá kóxrjínhìn Dios tí jehe ch'án kixin kuítekaon ch'án la tí xra kjuích'e ch'án mé kuaáxin ch'án.‡

⁸ A ntá tí fe k'uéchónta ch'ín Abraham tí k'uíyehé Dios tí jehe ch'án la kuítekaon ch'án sákjui ch'án tí nonte tsjanjon Dios ts'áyéhe ch'án, ntá k'uaxrjexín ch'án chjasén ch'án kjónté noehya ch'án nketí nó sátsji ch'án.§

⁹ A ntá tí fe k'uéchónta ch'án k'uékjak'e ch'án tí nonte chrókjuanjon Dios, éxí jehya nontee ch'án tíha. Kjuák'e ch'án nchia tsík'óna ka, la ko kjaxin xikaha k'uéchónta ch'ín Isaac la ko ch'ín Jacob la ko kjaxin jehe sín tsík'áyéhe sín tí nkehe tsíntáchro Dios.*

¹⁰ A ntá ch'ín Abraham k'uékjak'echónhen ch'án tí chjasin tsíkjich'éna Dios ts'itjáyanhya.

¹¹ A ntá tí fe k'uéchónta tjan Sara kjónté ó nána tjan, k'uáyéhe tjan kjuachaxin sich'éna tjan ijnko xjan; a ntá kjuích'éna tjan ijnko xjan kixin kuítekaon tjan kixin Dios sinchexiteyá tí nkehe tsíntáchro ch'án.†

¹² Kjaxin xikaha ch'ín Abraham, kjónté ó mero chrók'uen ch'án kixin ó táda ch'án, la k'uaxrjeníxin ch'án nchónhya chojni éxí konotsé síin nkajní o éxí nchesen síin chrínta ntayaon, xitjahya ts'ekini.‡

¹³ A ntá kaín tí chojni a ik'uén sín k'uáyèhya sín tí nkehe tsíntáchro Dios kixin chrók'uáyéhe sín, a ntá k'uéchónta sín fe, la kjónté ikjín k'uíkon sín la ko kuítekaon sín kóchéhe sín. Mé xikaha k'uéchrónka sín kixin tí chjasintajni jehya chjasén sín.

¹⁴ Mé xikaha k'uénixja sín la tienxínni jína kixin naxa xritjeyá sín nketí chrók'óna chjasén sín.

¹⁵ A ntá tí chróxaxinkaon sín tí chjasin tsík'axrjexín sín ntá jína chrókjan sín ntiha ínaá.

* **11:4** Génesis 4.3–10 † **11:5** Génesis 5.21–24 ‡ **11:7** Génesis 6.13–22 § **11:8** Génesis 12.1–5 * **11:9** Génesis 35.27 † **11:11** Génesis 18.11–14; 21.2 ‡ **11:12** Génesis 22.17

16 Kjánchó tjinkaon sín ijnko chjasin antsí má jína, tíha mé chjasin nkaya nkajní. Méxra Dios la tósuèhya ch'án kixin chrókjuinçek'in sín ch'án tí Dios kuènte tí jehe sín, kixin ó tjechónhen tí chjasin ts'áyéhe tí jehe sín.

17 A ntá fe k'uéchónta ch'ín Abraham kixin Dios kjuích'e prueba tí jehe ch'án kjuanchia tí xjeen ch'án Isaac, a ntá kjuikao ch'án chrók'óyán ch'án, chrókjuanjon ch'án. Tjechónhen ch'án chrókjuanjon ch'án kjónté jnkokoáxon xjeen ch'án tsíkjanjon Dios § tsintáchro kixin:

18 “Tí ch'ín Isaac ts'axrjeníxin nchónhya xjan.”*

19 A ntá ch'ín Abraham kjuátsoan ch'án kixin Dios imá chóna kjuachaxin, la kjónté chojni tsík'en na nchexechón ch'án, la éxí yóhe chrók'uen tí xjeen ch'ín Abraham ntá chrók'uáyéhe ch'án inaá.

20 A ntá tí fe k'uéchónta ch'ín Isaac kjuíncheyaon ch'án tí xjeen ch'án ch'ín Jacob la ko Esaú, kixin jína ts'ejó sín. †

21 A ntá tí fe k'uéchónta ch'ín Jacob tió chjina its'en ch'án kjuíncheyaon ch'án jnkojnko tí xjeen ch'ín José, a ntá tí nta tjixin ch'án kjuisójixín ch'án nixjehe ch'án Dios. ‡

22 A ntá tí fe k'uéchónta ch'ín José tió chjina its'en ch'án tsintáchro ch'án kixin tí sín israelita la chr'éxin ts'axrjexín sín chjasin Egipto, tsík'etoan ch'án kixin tió sátsji sín la sátsjiko sín tí huesoé ch'án. §

23 A ntá tí fe k'uéchónta it'é la ko iné ch'ín Moisés tió kokjíhi ch'án kjuak'ema sín ch'án iní nitjó kixin tsík'ikon sín kixin ijnko xjan ntoa náxrjón tsjehe ch'án, la ko chrakuenhya sin tí nkehe tsík'etoan tí ch'ín rey kixin chrók'óyán sín xjan.*

24 A ntá tí fe k'uéchónta ch'ín Moisés tió kónteto ch'án la chrohya ch'án its'in ch'án xjeen tí tjan xjeen ch'ín rey Egipto. †

25 Náhí. Kjueyá ch'án kixin kjónté chrókjuasóteko ch'án tí sín tinkáchónki Dios, la kóxrjienhya ch'án kixin séhya náxrjón chrókjuak'e ch'án chrókjuasin ch'án jie. Náhí.

26 Kjuenkayáxin ch'án kixin antsí tjetoan chrókjuasótexín ch'án tí tinkáchónki ch'án tí Cristo itsi chr'éxin, a ntá kánhyó tjetoan chróchóna ch'án kaín nkehe tjete siín chjasin Egipto. Kjuenkayáxin ch'án kixin chrók'uáyéhe ch'án tí nkehe chrókjuanjon Dios.

27 A ntá tí fe k'uéchónta ch'ín Moisés sákjuixín sín tí chjasin Egipto, ‡ chrakonhya ch'án kjónté kónínkaon tí ch'ín rey, a ntá kuítóehya ch'án tí tinkáchónki ch'án Dios kixin éxí t'ikon ch'án tí Dios ninkexró t'ikonhya.

28 A ntá tí fe k'uéchónta ch'ín Moisés kjuasin ch'án tí kia pascua, k'uetóan ch'án kixin chrókuikjanjin sín jni tí puerta, kixin tí ángel t'óyán chojni chrókjuincheníehya nijnko tí xjan sao kuènte tí sín Israel. §

29 A ntá tí fe k'uéchónta tí sín israelita k'uátòye sín tí Ntayaon Kjátse kixin k'óna nche xámá, a ntá tió tí sín Egipto tjinkaon sín chróchréhe sín xikaha la kjánchó kjuínhin sín tí nta a.*

30 A ntá tí fe k'uéchónta tí sín israelita la xítjen tí tjat'o t'inkákuènxín tí chjasin Jericó, tió kjuixín k'uántatjen sín yato yaon tí chjasin a. †

31 A ntá tí fe k'uéchónta tí tjan Rahab, na mé ijnko tjan k'uéchónta nchónhya chojni ntoa, ntá k'uénkohya tjan kaín tí sín jiehe kuítekakonhya, kixin tsíkjanjon tjan kjuachaxin kixin kjuaxróxin tsíkitohe ntoe tjan tí sín israelita kjuíjitsàya sín tí chjasin Jericó. ‡

§ 11:17 Génesis 22.1-14 * 11:18 Génesis 21.12 † 11:20 Génesis 27.27-29,39-40 ‡ 11:21 Génesis 47.31-48.20 § 11:22 Génesis 50.24-25 * 11:23 Éxodo 1.2; 2.2 † 11:24 Éxodo 2.10-12 ‡ 11:27 Éxodo 2.15 § 11:28 Éxodo 12.21-30 * 11:29 Éxodo 14.21-31 † 11:30 Josué 6.12-21 ‡ 11:31 Josué 2.1-21

³² ¿Nkehe naxa chróntáxrjan? Sintak'itjáyan tiempo naxa chrónixja kuènte ch'ín Gedeón, la ko ch'ín Barac, la ko ch'ín Sansón, la ko ch'ín Jefté, la ko ch'ín David, la ko ch'ín Samuel, la ko tí sín profeta.

³³ Kíxin tí fe k'uéchóna tí jehe sín kjuacha sín k'uetōan sín jína ókjé chjasin, la ko jína kjuínchekitoexín sín ijje chojni, la ko k'uáyéhe sín tí nkehe tsintáchro Dios kíxin tsjanjon ch'án, la ko k'uikjehe sín ir'va koxra,

³⁴ la ko k'uanka tí xrohi chróchexín sín, la ko kjuachahya tí espada chrók'uenxín sín. A ntá tí sín chrakon la kófuerte sín, k'óna sín chojni tsehe kjuacha sín kjuánjonko sín tí sín soldado tsíkjixín ókjé.

³⁵ Kjaxin k'uék'ixín chojni chjin k'uáyéhe inaá tí chojni tsík'en kuènte sín tsíxechón inaá.

A ntá í so sín la kjuasote sín k'uénxín sín kíxin kjuínchemáhya sín kíxin kuínkáchónki sín Dios kíxin ó nohe sín kíxin tsoxechón sín antsí jína inaá.

³⁶ A ntá í so sín kjuasóte sín la nchónhya chojni kjuanoá tí jehe sín, la ko tsík'ekon sín la ko kjaxin cadena chróntetoxín sín k'uejóchjina sín.

³⁷ Í so sín la ixro k'uénxín sín, la í so sín cierra chrít'oxin sín, la í so sín la nchónhya nkehe kjuasótexín sín, la í so sín k'uénxín sín espada, la í so sín k'uék'aji sín tsík'inkáya sín tje kolélo la ko tje kotèntso, nòa sín, kjuasóte sín, kjuaxróxinhya la náxrjónhya k'uéjó sín.

³⁸ A ntá tí sín chjasin ntiha kjuikosáyehya tí sín a la ntá k'uínkíté sín, la tí sín a la chóntahya chjasén sín la sákjuí sín nteje, la ko jna, la ko tjo síxra la ko tōye.

³⁹ Kaín tí sín a kónhen sín prueba kíxin á chaxín chóna sín fe la kjónté xikaha k'uáyéhya sín tí nkehe tsintáchro Dios kíxin tsjanjon ch'án

⁴⁰ kíxin Dios kjuenkayáxin ch'án ijnko nkehe antsí jína kíxin jehó jnkokoá chrók'uáyèkoni sín tí nkehe tsjanjon ch'án.

12

Jehó Cristo chrókuinkáchónkini

¹ Méxra tí jeheni la tsík'antátjenni nchónhya chojni tsíkjakoxín sín tí fe k'uéchóna sín, la ntá chrókuítóheni ntáha kaín tí nkehe t'inkákonhen, la ko tí jie chrókjuachroeni, a ntá chrókjuich'eni jína tí xra chóntani la ntá chrókjuachani antsí má chrókónoheni.

² Jehó Jesús chrókuinkáchónkini kíxin jehe ch'án kjuanjón tí fe chóntani kíxin jína kjuakoxín ch'án kjuínchexiteyá ch'án, la kjuasótexín ch'án tí ntacruz, la kuáhya ch'án kuentá kósuèhya ch'án tí nkehe kónhen ch'án ik'uén ch'án, kíxin nohe ch'án kíxin tsjixin tsjasóte ch'án ntá náxrjón tsjak'e ch'án la ko tsochéhe ch'án kíxin tsjak'etjaxín ch'án tí tja chjina tí trono kuènte Dios.

³ Méxra chrókjuenkayáxinrá jahará nkexrí kjuakoxín ch'ín Jesús. Tí sín chóna jie imá kjuínchekjasóte tí jehe ch'án la kjónté jahará xikaha chrókjuasóterá la chrókóxrjéhyará chrókuinkachónkirá ch'án.

⁴ A ntá jahará naxa k'uénxinyará tí tjanjonkoará tí jie.

⁵ ¿Á k'uitjáyanhanrá tí jahará tí nkehe ntaxraxinkaonrá Dios kíxin éxí xjeen ch'án t'ikon ch'án tí jahará? Éxí ntáchro xroon itén Dios kíxin:

Xjeenni, tóninkákonhya tí nkehe tjentuáha Ìnchéni, chrók'uaváhya tí chrókjuentuáha ch'án.

⁶ Kíxin Ìnchéni mé tjentuéhe tí sín tjuèhe ch'án la ko nchekjasóte kaín tí sín ts'áyéhe ch'án ts'óna xjeen ch'án.*

⁷ Chrókuítekáonrá tí nkehe t'etoan Dios kíxin Dios t'ikon kíxin éxí xjeen ch'án tí jahará. ¿Á siín ijnko it'é xjan chrokjuentuéhya tí xjeen?

* 12:6 Job 5.17; Provérbios 3.11-12

8 **A** ntá tí chrókjuentuáhyará Dios tí jahará éxí tjentuéhe ch'án kaín tí xjeen ch'án, ntá jahará kjá jehya xjeen ch'án chaxín.

9 **A** ntá tí naxa k'uéchánjanni, na mé it'éni ntihi chjasintajni kjuentuéhe tí jeheni, la jeheni kjuikosáyeheni sín. **A** ntá xikaha antsí chrókjuinchexiteyéheni It'éni tjen nkaya nkajní kixin chróchóntaxínni kjuachón.

10 It'éni ntihi chjasintajni kjuentuéheni ch'án kjónté kánhyó sé éxí nkexrí kóxrjínhjn ch'án; **a** ntá It'éni Dios tjentuéheni ch'án kixin jnkojína chrók'uejóni, kixin chrók'ónani tjóá kixin jehe ch'án la tjóá ch'án.

11 Chaxín ninkehó xikaha chrókjuinchekjasóte Dios tí jeheni chrókóxrjínhjn tí nantá chrókónhenni kixin tí kjuatjoté. **A** ntá xikaha ts'itjaxínni tí kjuaxróxin éxí ijnko nkehe náxrjón kjuachani.

Tí sín tjanoá tí kjuasáyé Dios

12 Méxra tjisójirá tí tjára tsíkóxrjé la ko tóch'inrá chóntahya fuerza,

13 la ko chrókjuéyará tí ntia ntoá. **A** ntá tí totará níhi xitjahya tjixinrá chrókuitohe jína la ko chrókóniehya ínaá.

14 Chrókóxakonhanrá kixin kjuaxróxin chrók'uejorá kaín rá, jnkojína tjóá chrók'uejorá. **A** ntá tí tjuáhya chrók'uejorá la xitjahya ts'ikonrá Ìnchéni.

15 Chrókóxakonhanrá kixin nijnkorá chrókuítóéhyará tí kjuasáyé Dios la ko nijnkorá chrók'ónahyará éxí ijnko nuèe ka tsjá chóna veneno chrókóniéxín tí í so chojni.

16 Nijnko tí jahará chrókjuásinkoará jie ijnko chojni chjin ókjé, la ko chrókjoniéhyará tí nkehe tjóá éxí kjuích'e ch'ín Esáu, kixin jnkoqóá comida kjuínchekjixin ch'án tí nkehe chróchóna ch'án kixin xjan sao jehe ch'án.†

17 Jahará ó nohará kixin chr'éxin, tió tjinkaon ch'án kixin chrókjuincheyaon it'é ch'án tí jehe ch'án la í xitjahya tsoyaon ch'án kixin kohya nkexrí chrók'uixitóxin tí nkehe tsikjich'e ch'án kjónté imá chrótsjánka ch'án.‡

18 **A** ntá jahará la jehya kóchjinará éxí kóchjina tí sín israelita tí jna jína chrótsé sín tí síchr'ákjen xrohi, tí tjen tí sítié t'inkaséyanhya la ko tí chjéhe xrinto.

19 Na ni tsíkíenhyará tí tsíntáchro trompeta, la ko tí itén Dios nixja. **A** ntá tí sín tsíkinhin tí tan a na mé chronà sín kixin í chrónixjahya ch'án ínaá,§

20 mé xikaha ichro sín kixin tsjachahya sín sinchexiteyá sín tí nkehe k'ueqoan ch'án kixin “Tí nkexro tsinkátja tí jna mé its'en, la ixro la o chica lanza chrók'óyánxin sín, la kjónté ijnko ko tsinkátja va tí jna la chrók'uen.”*

21 Ijnko kjuachrakon jie tí nkehe k'uíkon sín la kjónté ch'ín Moisés tsíntáchro ch'án kixin: “Kjaxin síxrankana chrakonna.”†

22 **A** ntá jahará tsíkóchjineherá tí jna Sión, tí chjasén Dios tjechón, mé tí Jerusalén itjen nkaya nkajní, la ko nchónhya miles ángel

23 tsíkójnko sé sín kixin tsochjéhe sín kjuasáyá Dios, la ko tí sín tsíkójnko sé sín tsík'óna sín xjeen Dios saoxín ts'ínixín ihnié sín nkaya nkajní. Jahará tsíkóchjineherá Dios, jehe ch'án mé Juez sinchekitoxín ch'án ijie kaín chojni, la ko tsíkóchjineherá tí nchakuen chojni jína ó tsíkjinchetjóá Dios,

24 la ko tsíkóchjineherá ch'ín Jesús, jehe ch'án mé nixjaxín ch'án tí pacto nixin kixin tí ijnié ch'án k'uitji kjuínchetjuáxinni ch'án. **A** ntá antsí jína chrónkaxín tí ijnié ch'án, **a** ntá kánhyó tí ijnié ch'ín Abel.

25 Chrókóxakonhanrá chrókuítekákonehénrá tí nkexro tjenixja. Kixin tí sín kjuanoá Dios tió kjuínchexraxinkaon ch'án tí jehe sín ntihi chjasintajni ó la kuaáhya sín; **a** ntá antsí má xitjahya chrókuaáni tí chrókuitekakuenhyani tí nkexro nchexraxinkaonni kujxin nkaya nkajní.

† 12:16 Génesis 25.29–34 ‡ 12:17 Génesis 27.30–40 § 12:19 Éxodo 19.16–22, 20.18–21 * 12:20 Éxodo 19.12–13 † 12:21 Deuteronomio 9.19

²⁶ A ntá tí itén Dios tí yaon a kjuínchekinkí nonte. A ntá jie tsíntáchro ch'án kixin: “A ntá inaá jehya nonte ó sintakinkíá. Náhi. Kjaxin nkajni sintakinkíá”,‡

²⁷ A ntá tí tsíntáchro ch'án kixin “inaá” mé t'axrjexín kixin tsjakjlin ch'án tí nkehe jína tsinkí, a ntá tsítóhe ch'án tí nkehe xitjahya tsinkí.

²⁸ A ntá tí ts'áyéheni tí kjuachaxin kjuanjon Dios la xitjahya ts'ixinkí tíha. Méxra chróchjéheni Dios kjuasáya chrórxaxinkaonni ch'án chróchrakonhenni ch'án

²⁹ kixin tí Dios kuènteni mé éxí ijnko xrohi tsjacha sinchek'itjayan kaín nkehe.§

13

Nkexrí chrók'uejóni kixin chrókóchéhe Dios

¹ Méxra chrókuítóéhyará chrótjuèherá kichuára.

² Chrók'uitjayanhyará chrókjuánjonrá kjuachaxin chrókuítóhe ntoará tí sín tsíkjin kjin. Mé xikaha kjuich'e iso sín la kjónté ángel tsík'áyéhe sín la kónoehya sín.*

³ Xráxinkáonrá tí sín tjejóchjina éxí kjaxinrá chrók'uejochjinakoará tí jehe sín. Xráxinkáonrá tí sín tsík'ekon éxí kjaxin tí jahará xikaha chrókonhanrá kjaxin.

⁴ Kaínrá chróchonteherá kjuasáya tí kótehe chojni. A ntá jahará tsíkótahará la jína chrók'uejokoará kichuára chrótjuèherá kichuára. A ntá tí sín tjinkaon tsochónta chojni chjin ókjé la Dios sinchekjasóte sín kixin xikaha ich'e sín.

⁵ Kénhyó má chrókóxrjínhanrá itsjé chichaon. Chrókócháhará kjónté tí kánhyó tsjé chontará; kixin tsíntáchro Dios kixin: “Janhan na tsítóahya tí jahará la ko ts'itjáyannahya tí jahará.”†

⁶ Mé xikaha chrakonhyani tsontáchroni kixin:

Ínchéni mé tjinkitsani,

méxra chróchrakonhyani kjónté ichrén nkehe chrókjuich'eheni chojni.‡

⁷ Chrórxáxinkáonrá tí sín kjuínkítsa tí jahará kjuakohará sín itén Dios, chrókjuenkayáxinrá nkexrí k'uejó sín ntá xikaha chrókóyóhará sín éxí tí fe k'uéchónta sín.

⁸ Jesucristo mé itjen ch'án ijna la ko ijie la ko jnkochrín.

⁹ Chrókuítóéhyará chrókjuakohará chojni ijnko nkehe ókjé chrókuinkachónkirá. Íchá jína tí asánrá chrók'uáyéhe fuerza kixin Dios tjuahará la jehya tjetoan chrókjuehixiteyéheni tí nkehe t'etoan nkehe sineni. Mé xikaha tí sín kjuich'e xikaha kjuínchexiteyá tí nkehe k'uituenhen sín nkexrí chrókjóne sín la ninkehó kjuínkítsahya tíha.

¹⁰ A ntá jeheni chóntani í jnko altar kixin k'uenyákonhenni Cristo la ntiha kohya kjuachaxin chrókjónexín tí nchat'á kjuich'e xra nkaxenhen njnko ósé.

¹¹ A ntá tí nchat'á t'etoan judío kjuíko sín tí ijnié ko nkaxenhen tí Cuarto Antsí Tjóá kixin tí nkehe la tsjatsen tí ijie sín. A ntá tí cuérpoé tí ko kjuakaxín sín ikon tí chjasin k'uejó sín.

¹² Kjaxin Ínchéni Jesús kjuasóte ch'án k'uénxin ch'án ikon chjasin kixin tsojtuáxin kaín ijie chojni tí ijnié ch'án.

¹³ Tsochréheni Ínchéni Jesús éxí k'uénxin ch'án ikon chjasin kjónté tsjasóteni éxí kjuasóte tí jehe ch'án kjuikosáyehya sín tí jehe ch'án.

¹⁴ A ntá ntihi chjasintajni chóntahyani njnko chjasénni chrók'uitjayanhya; a ntá xritjeyáni tí chjasin itsi chr'éxin.

‡ 12:26 Hageo 2.6 § 12:29 Deuteronomio 4.24 * 13:2 Génesis 18.1-8, 19.1-3 † 13:5 Deuteronomio 31.6 ‡ 13:6 Salmo 118.6

¹⁵ Méxra chrókuítóehyani chrókjuikosáyeheni Dios kixin Jesucristo k'uenyákonhenni ch'án. Tí xraxinkaonni ch'án la yóhe tí ko tsík'en tsíchjéhe sín Dios. Yóhe xikaha chrókjuanjonni kixin ir'vani ó chrókjuikosáyexínni ch'án.

¹⁶ Chrók'uitjáyanhyará chrókjuich'erá xra jína la ko chrókjuínkítsará kíchuará. Tí xikaha chrókjuich'erá la imá tóxrjínhin Dios.

¹⁷ Chrókuítekákónhénrá tí sín tjakohará chrókjuínchexiteyéhérá tí jehe sín. Jehe sín mé t'ayakonhen sín asánrá kixin jehe sín la ó nohe sín kixin tsjanjon sín kuentá tí tjen Dios. Tsjínkítsará sín kixin tsochéhe sín sich'e sín xra la tsonínkakhya sín. A ntá tí chrókjuínchek'ávárá sín, ntá ninkehó tsjachahya sín tsjinkítsa sín tí jahará.

¹⁸ Nixjehérá Dios kixin tí jeheni kaín ni, kixin chaxín jína kjuenkayáxinni la ko tjinkaonni kixin jína chrók'uejóni.

¹⁹ Tjánchíá xra ó kixin chrónixjehérá Dios kixin chrókjuanjon ch'án kjuachaxin kixin tjoka chrókjan janhan chrók'uejóni.

Tjanchia ch'án kixin chrókóyaon sín

²⁰ Tí Dios tjanjon kjuaxróxin, mé tí nkexro kjuínchexechón Ìnchéni Jesucristo kjónté tsík'en ch'án, jehe Jesucristo mé tí Pastor tjetoan t'ayakonhen tí kolélo, la tí ijñié ch'án mé tsoxiteyáxin tí pacto sich'e xra jnkochrín,

²¹ jehe Dios mé tsjinkítsa tí jahará kixin jína chrók'uejorá la ko kaín xra jína chrókjuich'erá kixin xikaha tjinkaon ch'án; kixin jehe ch'án t'etuenhenni ch'án kaín nkehe nkexrí tjinkaon ch'án kixin tí kjuachaxin chóna Jesucristo. Mé xikaha chjéheni Cristo kjuasáya jnkochrín. Amén.

²² Kíchóni, xrjanóahará kixin tóninkákonhyará kixin tí palabra xrjanka sintaxraxinkáonrá. Méxra ikjian tí xroon kjónté kánhyó tsjé nixja ts'ayéhérá.

²³ Chrókónohará kixin kíchó ni Timoteo la í tjechjinahya ch'án jie. Tí tjoka tsi ch'án la tsjasánkian ch'án tí tsjasántsjahará tí jahará.

²⁴ Nixjehérá jnkójina kaín tí sín tjítaón ntja tjako la ko kaín tí sín kíchó ni tinkáchónki Dios. Tí sín tinkáchónki Ìnchéni tjejó Italia mé nixjahará sín.

²⁵ Dios sintayaonrá ch'án kaín rá. Amén. Ó tjen.

Tí xroon tsíkjin ch'ín Santiago

Tí ch'ín Santiago tsíkjin ch'án xroon ts'áyéhe kaín tí sín tsíxikayéhe

¹ Janhan Santiago mé t'ahá xrá Dios la ko Ìnchéni Jesucristo nixjahá kaín tí sín tsík'axrjeníxin tí teyó xjeen ch'ín Israel tsíxikayéhe sátsíkji kuenté chjasin-tajni.

Dios mé tsjanjon tí kjuaxrexinkaon jína

² Jahará kichó ni, chrókócháhará kjónté chrók'uats'ínkará ichrén nkehe náxrxónhya.

³ Ó nohará kixin tí ichrén nkehe chrókónhanrá kixin tinkachónkirá Ìnchéni la t'ichjánxin chrókjuachará la chrókóninkákonhyará.

⁴ Chrókónohará kixin tí chrókóninkákonhyará la tíha mé ijnko xrá jína chaxín kixin ntá jahará ijnko chojni chaxín kjuacha titekaon la í t'itjáyanhya ninkehó.

⁵ Tí jnkójín tí jahará t'itjáyan kjuaxrexinkaon la chrókjuancheherá Dios la Dios mé chrótjáhará ch'án tíha. Jehe ch'án mé xráxin tsjanjon ch'án kaín nkehe ts'áyéhe tí chojni tjanchia la tsonínkakonyha ch'án.

⁶ Tió chrókjuancheherá Dios nkehe la kénxín asánrá chrókjuanchiará la chrókjóhya asánrá ninkehó. A ntá tí chojni tjo asén la éxí ntayaon tjiko xrinto ijnko lado la í jnko lado.

⁷ A ntá tí xikaha itjo asén sín la chróntáchrohya sín kixin chrók'uáyéhe sín ichrén nkehe chrókjuanjon Ìnchéni.

⁸ A ntá tí nkexro xikaha tjenkayáxin ijnko nkehe ijie la í jnko nkehe ntóye la jnkokoáhya nkehe tjenkayáxin.

⁹ Tí kichó ni tinkáchónki Cristo la kjónté nòa chóntahya itsjé nkehe chjasintajni la kjónté xikaha chrókóchéhe kixin tí tinkáchónki ch'án Ìnchéni la antsí má sínkí tíha.

¹⁰ A ntá tí nkexro rico kjónté chrók'uitjáyan tí nkehe chóna la antsí chrókóchéhe kixin tinkáchónki ch'án Ìnchéni, kixin tí nkehe chóna ch'án la kánhyó sínkí la ts'itjáyan éxí itsjo tsík'óna ka.

¹¹ Tió tsjiton yaon la tsosóa imá la tí ka tsoxámá la ko tí tsjo la ts'ánótjen la tí náxrxón tsjehe la tsjeje. Mé xikaha tsonhen tí ch'ín rico, ts'itjáyan ntá tsítóhe ch'án tí xrá k'uéchóna.

Tí nkehe tsonhen chojni

¹² Náxrxón tí nkexro tsjacha ts'atsínka tí nkehe náxrxónhya tsonhen. A ntá tí tsjacha ch'án ts'atsínka kaín tí nkehe náxrxónhya tsonhen ntá ts'áyéhe ch'án tí corona kuènte kjuachón kixin Dios tsíntáchro ch'án kixin tíha mé tsochjéhe ch'án tí sín tjuèhe ch'án.

¹³ A ntá jnkójínrá tí chróntáchro asánrá chrókjuich'erá ichrén nkehe jínahya, la chróntáchrohyará kixin Dios tsíkjanjon kjuachaxín xikaha sich'erá kixin Dios la tjinkakonhya chrókjuich'e ch'án nkehe jínahya la ko tjinkakonhya ch'án chrók'uetóan ch'án kixin ninkexró chrókjuich'e ijnko nkehe jínahya.

¹⁴ A ntá jnkójín chojni tí ó jehó tjenkayáxin asén tí jínahya la mé xikaha tsjachroe, tsjasin sín jie.

¹⁵ Mé xikaha tí nkehe jínahya tjenkayáxin chojni mé tjixín tí jie. La mé xikaha ts'ánkí tí jie la ntá tíha ts'enxín chojni.

¹⁶ Kichóni, chrókjuich'iyéhyará asánrá.

17 Kaín nkehe jína ntoá t'áyéheni mé tixín nkajní tí tjen Dios tí nkexro kjuích'éna kaín tí xrohi kuènte nkajní. Jehe ch'án mé Dios jnkochrín la jehe ch'án mé xitjahya ts'ixitóxin.

18 Jehe ch'án kjuanjon ch'án kjuachón k'uáyéheni kixin tí tan ntoá nixja ch'án, kixin éxí tí nkehe senó tsík'óna, mé xikaha tjinkaon ch'án chrók'óna tí jeheni.

Tí nkehe chaxín chrókuinkáchónkini

19 Méxra chróxráxinkáonrá tíhi jahará kichó ni. Kaínrá chrók'uejorá chrókuinhínrá jína la tjokahya chrónixjará kixin tjokahya chrókóninkáonrá.

20 A ntá tí chojni tjoka tónínkaon la ch'ehya tí xra jína éxí tóxrjínhin Dios.

21 Méxra títóhérá tí nkehe tjuáhya la ko tí nkehe jínahya kjuachjinoxínhin siín nkuíxín la chrókuinchehnkehýará, chrók'uayéhérá tí itén Dios chrók'uinka nkaya asánrá. Tí tan a mé chóna kjuachaxin kixin chrókuaáxinrá.

22 Jehya kixin chrókuinhónrá; jahará chrókjuích'erá éxí tí nkehe tjako tí tan a. A ntá tí náhi la jahórá ch'iyehérá asánrá.

23 A ntá tí chojni tsinhón tí tan la ntá sinchexiteyáhya la éxí ijnko chojni tsjexín xrosenta tí kon ó.

24 A ntá tí k'uíkon tí kon la sátsji la tuénxín k'uitjáyenhen nkexrí tsjehe.

25 A ntá tí nkexro k'uitjáyenhya tí nkehe kuínhin la mé tsjehe ch'án jína tí ley chaxín ntoá, mé tí nkehe chaxín tsaáxinni la titekaon ch'án jína la ich'e ch'án nkehe t'etoan tíha la ntá náxrjón tsjak'e kixin kjuínchexiteyá ch'án.

26 A ntá jnkojín nkexro tjenkayáxin kixin imá tinkáchónki ch'án Dios kjánchó tí noehya tsochjéhe freno nejen la jehó ch'iyehé asén la ninkehó sínkíhya tí nkehe tinkáchónki ch'án.

27 A ntá tí nkexro tinkáchónki Dios chaxín jína la ko tjasinhya jie nkayakon It'éni Dios la mé tíhi: mé chrókjuinkítsa tí chojni nóé la ko tí chojni k'án chóntahya nkehe sine sín o níhi sín, la ko chrókjuasinhya tí jie jínahya siín chjasintajni.

2

Jnkokón chrókjuikosáyehé kichó ni

1 Kichóni, jahará tinkáchónkirá Inchéni Jesucristo imá tjetoan la t'ichjánxin chrókjuíkosáyehérá kaín chojni jnkokón.

2 Éxí ijnko chojni rico chrók'uixenhen tí tójnkotsérá la chóna koch'aninko oro la ko chóna iké náxrjón, a ntá ntiha kjaxin chrók'uixenhen ijnko chojni nóa chóna iké ntaxin.

3 A ntá tí chrókjuíkosáyehérá tí chojni t'itsa ka jína la tsontácherá ch'án kixin: “Ntíhi antsí jína tjak'e.” A ntá tí chojni nóa tsontácherá ch'án kixin: “Jaha la tjak'éxian totá ntiha o tjak'e nonte ó.”

4 Mé xikaha la jnkokónhya tjíkosáyehérá kíchuará la tí nkehe jínahya tjenkayáxinrá.

5 Kichóni tjuahará, tsinhínrá tíhi: Dios tsíkjeýá tí sín nóa ntihi chjasintajni kixin antsí má tsinkáchónki sín tí jehe ch'án kixin ts'áyéhe sín tí kjuachaxin kuènte ch'án éxí tsíntáchro ch'án tsochjéhe ch'án tí sín tjuèhe ch'án.

6 A ntá jahará mé tjíkosáyehýará tí sín nóa. A ntá tí sín rico mé tjíkosáyehérá. ¿Á jehya tí sín rico tjanchia sín jie sáttjiko sín tí jahará nkayakon tí sín t'etoan ní?

7 ¿La á jehya jehe sín t'ántaxínhin sín tí ihnié Cristo tjíkosáyeheni?

8 A ntá jahará la jína tjejoch'erá tí nchexiteyará éxí t'etoan tí ley éxí nixja tí xroon itén Dios kixin: “Chrótjuèherá kíchuará éxí tjuèxíná asánrá”.

⁹ A ntá tí jnkokónhya tjíkosáyehyará chojni la ntá xíkaha la tjásinrá jiē la nchexiteyéhya éxí tí nixja tí ley kuènte Dios.

¹⁰ A ntá ijnko nkexro titekaon kaín tí ley la ntá kjuínchexiteyáhya jnkokoá tí nkehe tjetōan la mé tí xíkaha la kjuínchexiteyéhya kaín tí nkehe t'etoan tí ley.

¹¹ Ntá Dios tsíntáchro kíxin: “Chrókuákjahyará í jnko chojni chjin ókjé”, la kjaxin tsíntáchro ch'án kíxin: “T'oyánhyará kíchuará.” A ntá tí nkexro kuákjahya í jnko chojni chjin ókjé kjánchó kjuàya la kjuínchexiteyéhya tí nkehe t'etoan tí ley.

¹² A ntá jahará chrónixjará la ko chrókjuínchexiteyará kíxin chrókjuanchiahya jiē tí ley sinchekaáni.

¹³ A ntá tí nkexro kujkonóehya í jnko chojni la kjaxin tsíkonóehya Dios tí jehe. A ntá tí nkexro kujkonóehē kíchó la mé xíkaha tsjacha tsaáxin ch'án tí yaon tsjixixín tsitōexín jiē.

Tí fe ch'ehya xra la tsík'en

¹⁴ Kíchóni, ¿nkehe tsonhen ntáchrórá kíxin chontará fe a ntá ninkehó nkehe jína tjákoxinhyará? ¿A ntáchrórá kíxin xíkahó chrokuaáxinrá?

¹⁵ Éxí ijnko kíchó ni ntoa o kíchó ni chjin chóntahya iké o chóntahya nkehe sine sín t'ichjánxinhin sín jnkójín yaon.

¹⁶ Ntá jnkójín tí jahará tsontácherá sín kíxin: “Sátjia jnkójína la ko ts'itsa ká la ko sinte jína.” A ntá tí kjuánjonhyará tí nkehe t'ichjánxinhin tí cuerpoé sín la sínkíhya tí nkehe ntáchrórá.

¹⁷ La mé xíkaha tónhen tí fe la tí tjákoxinhyará ninkehó nkehe jína kjuich'erá la éxí nkehe tsík'en tí ntáchrórá.

¹⁸ A ntá jnkójín chojni tsontáchro kíxin: “Jaha chonta fe a ntá janhan it'a tí xra jína.” Tí xíkaha la jaha tjákoxian tí fe kjónté kohya xra la janhan tsjákoxian tí fe la ko tí xra jína tjet'a.

¹⁹ Jaha títekávan kíxin jnkokoá Dios itjen la chaxín jína xíkaha, kjánchó kjaxin tí jínahya titekaon tíha la ko síxranka chrakon.

²⁰ T'ónahyará lontí. Jahará la nohará kíxin tí fe ch'ehya xra la chónkó tíha.

²¹ Dios kóxrjinhin tí nkehe chrókjuich'e ch'ín Abraham, tí nkexro k'uaxrjeníxinni ósé, tíó chrók'óyán ch'án tí xjeen ch'án Isaac la chrókjuanjon ch'án chrók'uáyéhe Dios.

²² Chrókónohará kíxin tí fe k'úechóna ch'ín Abraham la kjuakoxin ch'án tí xra kjuich'e ch'án la ntá xíkaha kjuakoxin ch'án kíxin antsí má kuinkáchónki ch'án Dios.

²³ Mé xíkaha xiteyá éxí ntáchro xroon itén Dios kíxin: “Abraham kuítekaon Dios la ntá Dios ntáchro kíxin jína ch'án”, la ntá Dios kjuínchek'in ch'án amigo kuènte ch'án.

²⁴ Chrókónohará jahará kíxin Dios la t'áyéhe ch'án chojni la nchetjóá ch'án kíxin tí xra jína ch'e sín la jehya kíxin jehó chrókuinkáchónki sín ch'án.

²⁵ Mé kjaxin xíkaha kónhen tí tjan Rahab, tí tjan k'uéchóna nchónhya chojni ntoa. Jehé tjan kjuanjon tjan kjuachaxin kuítóhe ntoe tjan tí sín kjuítsjehe chjasén tjan la ko kjuínkítsa tjan sákjuixin sín ókjé ntia, a ntá Dios la kóxrjinhin tí nkehe kjuich'e tjan.

²⁶ Éxí tí cuerpoé chojni chóntahya nchakuen la tsík'en la kjaxin xíkaha tí fe la tsík'en tí ninkehó tjákoxinhya tí nkehe jína chrókjuich'e sín.

3

Tí kjuachaxin chóna nejen chojni

¹ Kíchóni, chrók'ónahya tí jahará nchónhya maestro kíxin tí ntoáhya chrókjuàkorá la tíha mé chrókjuasótiaxínrá imá.

² Kaínni chónntani jie, a ntá tí nkexro ninkehó jie ntáchrohya la ijnko chojni jína tíha la ó tsjacha ch'án ts'etuñhen ch'án kuenté tí cuerpo kuènte ch'án.

³ Éxí tí kokate tsochónnta chica freno tí ir'va va kíxin tsitekaon va la sátsjiko tí ìnehé va la tsjacha ch'án ts'etuñhen kuenté tí cuerpo kuènte va.

⁴ Tjenkayáxinrá kjaxin nkexrí tjejó tí ntabárcō kjónté imá jié la tsjacha tí xrintō chjéhe tjian sátsjiko, la ntá tí ch'ín tjiko la kjónté ijnko nta ntsí la tsjacha ch'án sátsjikoxín ch'án tí tjinkaon ch'án sátsjiko ch'án.

⁵ Mé xikaha tí ir'va chojni. Kjónté ijnko nkehe imá ntsí kuènte tí cuerpo kjánchó nchónhya nkehe jínahya ntáchro éxí ijnko xrohi ntsí la tsjacha tsochéxin kuenté ijnko jnā jié.

⁶ Mé xikaha tí ir'vani la éxí ijnko xrohi kíxin nchónhya jie t'axrjexín la éxí ijnko veneno ncheníhi cuerpo mé xikaha mé tsjasixín kuenté cuerpoé chojni jie. La tí kjuachaxin kuènte ir'vani la mé tjixín tí infierno la tíha mé tjixín tí ts'itjáyanxínni.

⁷ Tí chojni la tsjacha sinchesáncho kaín ko jiehe la ko tí ko xritjaká la ko tí konche la ko tí ko sínkankí ntayaon la mé xikaha kjuacha sín nchesáncho sín va.

⁸ A ntá tí ir'va chojni la kohya nijnko chojni tsjacha sinchesáncho. Tíha mé jínahya la xitjahya tsosáncho. Tíha mé éxí ijnko nkehe chónnta nchónhya veneno ts'enxín chojni.

⁹ Tí ir'vani la kjaxin tjikosáyexinni It'éni Dios la tíha kjaxin t'ántaxíenxinni chojni tsíkijich'éna Dios éxí tsjehe tí jehe ch'án.

¹⁰ Kjaxin tí ir'vani t'axrjexín tí nkehe itsjeni kuènte Dios la kjaxin tíha t'ántaxínxinni. Kíchóni, xikahya chrókjuich'erá.

¹¹ Jnkokoá tòye xitjahya ts'axrje ntā xé la ko kjaxin ntā tsjá.

¹² Kíchóni, ¿á jína tí nta higuera chrók'óna to aceituna o tí nta to uva chrók'óna to higo? Kjaxin xitjahya ijnko tòye chrók'uaxrje ntā xíjnta la ko ntiha kjaxin chrók'uaxrje ntā xé.

Tí kjuaxrexinkaon jína

¹³ Tí tjen jnkojín nkexro tí tjejorá nohe jína la ko tienxín la chrókjuakoxín ch'án jnkojína la ko chrókjuinchehnkexínhya ch'án tí nkehe imá nohe ch'án.

¹⁴ A ntá tí jahará chónnta kjuachjinoxínhin asánrá la tjinkáonrá jahórá chrókuétoanrá. A ntá tí xikaha la chrókjuinchehnkexínhyará tí nkehe nohará kíxin tí xikaha la ch'iyará la tjinkákonhyará chróchronkará tí nkehe chaxín ntoá.

¹⁵ A ntá tí xikaha sinchehnkerá la jehya tí kjuaxrexinkaon kuixín tí tjen Dios. Tí xikaha la kjuachaxin kuènte chojni chjasintajni ó la ko kuènte ch'ín Tsochren.

¹⁶ A ntá tí xikaha síin kjuachjinoxínhin la ko tjinkaon chojni jehó chrók'ueñoan la ntá xitjahya tsonhen xra yóxin kíxin xikaha síin nkehe jínahya.

¹⁷ A ntá tí síin kjuaxrexinkaon jína tsíkixín tí tjen Dios la saoxín tjejó chojni jína la ko kjaxin kjuaxróxin tjejó sín la ko náxrjón tjejó sín la ko jnkojína nixjehe kíchó sín la ko kjaxin tikónóehe kíchó sín la ko tí xra jína tjejóch'e sín la tí nkehe ntoá nixja sín.

¹⁸ Tí nkexro tjejá tí kjuaxróxin xikaha chrók'ueñka sín kjuaxróxin la ko xikaha chrótjá sín tí nkehe jína.

4

Tí tjanjonxin chojni

¹ ¿Nketí tjixín tí guerra la ko tí kjuanínkaon tjanjonkoaxínrá kíchuará? Táha la mé jahórá t'axrjeníxinrá kaín tí kjuanínkaon a.

² Jahará tjinkáonrá tsochontará ichrén nkehe ntá chontahyará ntá tónínkáonrá t'oyánrá kichuárá. Tóchjinoxínhanrá kixin tsjachahyará sincheyóherá í so chojni ntá tónínkáonrá. Jahará ts'ayéhyará tí nkehe tjinkáonrá kixin tjanchehyará Dios.

³ La tí tjanchará la ts'ayéhyará kixin ntoáhya kjuanchiará kixin tjinkáonrá chrókuicháxinhanrá ó la chrókjuinchehnkexínrá.

⁴ Jahará chojni titekakonhya Dios. ¿Á noahyará tí jahará kixin tí imá tsotjuèhéra chjasintajni la ntá tsoninkákonhénra Dios? A ntá tí jnkójnra tjinkáonrá tsotjuèhéra chjasintajni la tsokjanrá tsoninkákonhénra Dios.

⁵ ¿Á tjenkayáxinrá kixin tí nkehe ntáchro xroon itén Dios la á chónkó? Ntáchro xikihi: “Tí Nchakuen Dios kjuanjón ch'án k'uayéhéra la tjuahará ch'án la tsonínkaon tí tsitohéra ch'án.” Mé xikaha ichro Dios.

⁶ Kixin Dios la imá tjinkítsani ch'án, méxra ntáchro xroon itén Dios kixin: “Dios la nínkakohen tí chojni nchehnke a ntá tjinkítsa ch'án tí chojni nchehnkehya.”*

⁷ Méxra chrókjuinchehnkehýará. Íchá jína chrókuítekáonrá Dios la chrókjuánjonhyará kjuachaxin tí jínahya chrók'uetuanhanrá ntá chrók'uikon tí jínahya kixin chrók'uetuanhya ntá sáchrókjuí.

⁸ Chrókóchjineherá Dios, la tí jehe ch'án kjaxin tsochjinahará ch'án. Jahará chojni chóna jie la chrókjonemará tjára. Chrókjuinchetjóára asánra kixin chrótjuèhéra Dios la kánhyó chrótjuèhéra chjasintajni.

⁹ Chrók'uavará la ko chrótsjankará. Chrókjuínkíra tí tjanorá la chrótsjankará la chrókjuínkí tí cháhará la chrók'uavará.

¹⁰ Chrókjuinchehnkehýará chróxráxinkáonrá Inchéni a ntá jehe ch'án chrókjuínkítsa ch'án antsí chrókónohará.

Chrók'uántaxíenhyani kichó ni

¹¹ Kichóni, chrók'uántaxíenhyará kichuárá. A ntá tí nkexro t'ántaxínhin ijnko kichó la ntá jehe ch'án t'ántaxínhin ch'án tí ley, la t'eka jie tí ley. A ntá tí t'eka ch'án jie tí ley la mé t'óna juez chrínkí chrókuitekaon tí ley.

¹² Kixin jnkokoá nkexro kjuanjón tí ley la tí nkexro a mé tí juez la jehe ch'án sinchekaá ch'án chojni la ko sinchekjasóte ch'án chojni. ¿A ntá nkexro tí jaha kixin chrókjuanchéhé jie tí kichuá?

Ínoehyani nkehe tsonhen ntóye

¹³ A ntá jie jahará chrókuinhínra tíhi kixin tsíntáchrora kixin: “Ijie o ntóye sáchrókjuini ijnko chjasin la ntiha chrók'uejóni ijnko nánó chrókjuinchejkjini nkehe chrókjuachani chichaon.”

¹⁴ A ntá jahará noahyará nkehe tsonhen ntóye kixin tí tjejóchónni la éxi ijnko tjuí nonte ts'ikonni a ntá tuénxín ts'itjáyan.

¹⁵ Íchá jína chróntáchrora kixin: “Tí tjinkaon Inchéni la naxa chrók'uejóchónni la chrókjuich'eni tíhi o tíha.”

¹⁶ A ntá jahará tí nixjará la imá ihnkerá la kaín tí kjuahnke la mé jínahya.

¹⁷ A ntá tí nkexro nohe chrókjuich'e tí nkehe jína la ntá ch'ehya xikaha la mé antsí tjasin jie.

5

Tí nkehe chrókuinhin tí sín rico

¹ Jahará rícorá chrókuinhínra tíhi. Chrótsjankará la ko chrók'uíyatorá kixin tí nkehe tsonhanrá tsjasótíará.

* 4:6 Proverbios 3.34

² Tí nkehe rícoxínrá la ó tsíkótje la ko tí ka chontará la ó tsík'in kué.

³ Tí oro la ko tí plata chontará ó tsíkóchjisen. Tíha mé tjakoxin kixin nkexrí tsonhen ntóará tsoche. ¿Nkehe tsonhen kjuásintonrá nkehe kixin ó tsi tí yaon tsjixixín?

⁴ A ntá tí nkehe chrókjuacha tí sín kjuít'ahará xra la kjuénkehyará sín la ntá tjanchia sín jie tí jahará la t'èya sín, ntá Ìnchéni imá t'etóan mé kuínhin kixin xikaha ichro tí sín kjuích'e xra.

⁵ A ntá ntihi chjasintajni la náxrjón tjejórá la kaín nkehe tóxrjínhanrá ch'erá la éxí iko imá jína ine la tsíkótsanká la ntá itsji yaon ntá its'en la mé xikaha tsonhanrá.

⁶ Kixin jahará la kjuínchekjasóterá la k'oyánrá chojni ninkehó jie chóntahya kjónté kohya nkehe kjuít'ahará sín.

Chrókónínkakonhyani chróchónhenni la chrónixjeheni Dios

⁷ Méxra kichó ni, chrókónínkakonhyará chróchonhénrá tsokjanjian Ìnchéni. Éxí tí ch'ín ch'e xra nontee chónhen xrakoa chrin senó la ko tí chrin tsjixixín ntá tsotjá ch'án tí nkehe náxrjón k'óna.

⁸ Mé xikaha jahará la kjaxin chrókónínkakonhyará chróchonhénrá chrókóxrjéhyará kixin tí yaon itsi Ìnchéni la ó chjina tsi.

⁹ Kichóni, chrókónínkakonhyará kichuárá kixin ntá chrókjuanchahya Dios jie tí jahará kixin Dios la mé tí juez la ó tjen ch'án tí ntója puerta.

¹⁰ Kichóni, chrókuankíhírá éxí tí sín k'uéchrónka itén Dios k'uéchrónkaxín sín kjuachaxin ihnié Ìnchéni. Jehe sín kjónté kjuasóte sín la kónínkakonhya sín.

¹¹ A ntá jeheni ntáchroni kixin kóchéhe tí sín a kjónté kjuasóte sín la kjuacha sín. Jahará la ó kuínhínrá kixin nkexrí kónhen ch'ín Job. Ó nohará kixin Ìnchéni kjuínkítsa ch'án hasta kjuixixín kixin Ìnchéni la imá jína ch'án la kuikonóhe ch'án tí ch'ín a.

¹² A ntá kichó ni, chrókuakjénxínhyará ihnié Dios tjen nkaya nkajni la ko ni chjasintajni la nijnko nkexro chrók'uakjénxínhyará. Tí chróntáchorá chaxín la chaxín la tí náhi la náhi kixin Dios la chrókjuínchekjasótiahýará.

¹³ A ntá jnkójín tí jahará náxrjónhya tjejórá la chrónixjehérá Dios, a ntá jnkójínrá náxrjón tjejórá la chrótsjerá kuènte Dios.

¹⁴ A ntá tí jnkójín nkexro níhi la chrók'uíyehé sín tí sín táda t'etóan kuènte njnko kixin ntá chrónixjehé sín Dios kixin tí sinníhi la ko chróchjéhe sín aceite tí sín a kjuachaxín ihnié Ìnchéni.

¹⁵ Chrónixjehérá Dios kaín asánrá kixin tí sinníhi chrókuítóhe jína la ntá Ìnchéni chrókjuinkítsa sín, a ntá ichrén jie kjuasin sín la jehe ch'án sinchek'itjáyan tíha.

¹⁶ Méxra chróchenkará kichuárá tí jie chontará la ko chrónixjehérá Dios kixin chrókuítóhará jína. Tí nixjehé Dios ijnko chojni jína tinkáchónki Ìnchéni la chóna nchónhya kjuachaxin tíha.

¹⁷ Tí ch'ín Elías, tí nkexro k'uéchrónka itén Dios, mé ijnko chojni éxí tí jeheni la jehe ch'án kjuanchehe ch'án Dios kaín asén ch'án kixin ts'aniáhya chrin la ntá k'uániáhya chrin chjasintajni iní nánó ko t'ó.

¹⁸ A ntá chr'éxin kjuanchehe ch'án Dios kixin ts'aniá chrin la ntá k'uániá chrin inaá chjasintajni la jína k'óna tí nkehe k'uenká sín.

¹⁹ Kichóni, tí jnkójín chojni chrókjuichroe chrókuítóhe tí nkehe ntoá la í jnko nkexro chrókjuinkítsa kixin chrókjan tí nkexro a

²⁰ la chrókónohará tí jahará kixin jnkójín chojni tjinkítsa ijnko nkexro chóna jie tsokjanxin tí ntia jínahya k'uék'aji ch'án la ntá ó kjuínkítsa kixin tsaáxin

asén tí ch'ín a k'ixin ts'itjáyanhya ch'án la ntá chrók'uitjáyan tí nchónhya jie
k'uéchónhta ch'án. Ó tjen.

Tí xroon saoxín tsíkjin ch'ín Pedro

Ch'ín Pedro ikjin ch'án xroon chr'énhen ch'án tí sín tinkáchonki Ìnchéni tjejó ókjé

¹ Janhan Pedro, mé kjueyána Jesucristo t'ahá ch'án xra mé ikjian tí xroon chr'anhánrá jahará sátsíkjirá ókjé chjasin tjejorá, mé tjejorá estado Ponto, la ko Galacia, la ko Capadocia, la ko Asia, la ko Bitinia.

² Kjueyará It'éni Dios kixin jehe ch'án tsíkjenkayáxin ch'án ósé xikaha. Kótjuáxinrá Nchakuen ch'án kixin chrókuítekáonrá ch'án la ko kótjuáxinrá ijnié Jesucristo. Kjuasáyé ch'án chrókjuintayaonrá ch'án kixin antsí chrókuákjára tí kjuaxróxin kuènte ch'án.

Tjejóchónhenni kixin jehe ch'án sinchekaáni ch'án

³ Tjancheheni kjuasáyé Dios mé It'é Ìnchéni Jesucristo kixin kjuasáyé jehe ch'án kuikonóhenni ch'án kixin éxí kokjéxínni nixin kixin xechón Jesucristo. Mé xikaha tjejóchónhenni sinchekaáni ch'án.

⁴ Mé xikaha ts'ayéhérá jahará tí nkehe tsjanjon Dios chóna ch'án nkaya nkajni mé ijnko nkehe chónhya ts'itjáyan, la ko chónhya tsokjita, la ko chónhya tsoxamá.

⁵ Dios mé t'ayakuanxínrá ch'án tí kjuachaxin kuènte ch'án kixin jahará tinkachónkirá ch'án kixin ntá tsjacha tsaará éxí tsíkjenkayáxin ch'án ósé mé tjinkaon ch'án kixin chrókuaará tí tsjixixín tsjeje chjasintajni.

⁶ Méxra xikaha chrókocháhará kjónté ichrén nkehe chrókónhanrá iso yaon kixin jehí t'ichjánxin xikaha itsjé nkehe chrókónhanrá.

⁷ Méxra tí tinkachónkirá Ìnchéni la t'ichjánxin tsjachará nchónhya nkehe chrókónhanrá éxí yóhe chica oro xikaha t'ichjánxin ts'atsínka tí siín xrohi tsotsjexín sín á chaxín jina kohya nkehe tsonhen. A ntá antsí má sínkí tí tinkachónkirá Ìnchéni a ntá tí chica oro la kénhyó sínkí kixin tí chica oro la chóxin tsjeje. Mé xikaha tí tinkachónkirá Ìnchéni t'ichjánxin xikaha tsonhanrá kixin tsontácho Dios kixin jina kjuachará ntá ts'ayéhérá kjuachaxin tió tsi Jesucristo.

⁸ Jahará tjuéhérá Jesucristo kjónté k'uíkonhyará ch'án. Ijie tinkachónkirá ch'án kjónté t'ikonhyará ch'án la ko tócháhará ijnko kjuachéhe imá jie kohya nkehe sincheyóhenni kixin imá náxrjón tíha.

⁹ Mé xikaha k'uitjará nkexrí tsaáxin asánrá. Tíha mé tí nkehe tjejochónhénrá tinkachónkirá.

¹⁰ Mé xikaha tí sín profeta tsíki ósé la kjueyá sín nkexrí chrókuaáxin chojni la ko k'uéchrónkaxín sín tí nkehe kjuasáyé Dios chrókjuanjon ch'án chrók'uayéhérá tí jahará.

¹¹ Nchakuen Cristo kjuínchenohe tí sín k'uéchrónka itén Dios kixin Cristo tsjasóte la ko chr'éxin ts'áyéhe ch'án tí kjuachaxin jie. A ntá tí sín k'uéchrónka mé tjinkaon chrókónohe sín nkexro tíha la ko nkesá tsonhen tí nkehe chrónkaxín Nchakuan Ìnchéni.

¹² Kjánchó Dios kjuínchenohe tí jehe sín kixin tí nkehe chrónka sín jehya kixin tjoka chróxiteyá tí k'uejó sín. Náhi. Hasta tí tjejóni jie mé ó xiteyá tíha. Tí nkehe chrónka sín la mé yóhe tí nkehe kuínhínrá, mé tí tan tsaáxinni k'uéchrónkaxín tí sín kjuakohará kixin tí kjuachaxin Nchakuen Dios kuixin nkaya nkajni mé kjuínkítsa tí jehe sín. Kjaxín tí sín ángel tjinkaon sín chrók'uinkon sín nkexrí tíha.

Dios k'uíyehé ch'án tí jeheni kixin tjóá chrók'uejóni

¹³ Méxra chrókjuenkayáxinrá jína nkehe chrókjuich'era kixin chrók'uejorá jnkójina. Kaín asánra chrók'uejochonhénra kixin tí nkehe sintakitonhanra Dios tió tsi Ìnchéni Jesucristo.

¹⁴ Éxi ijnko xjan titekaon mé xikaha jnkójina chrók'uejorá jahará, chrókjuenkayáxinhyará éxi k'uekjenkayáxinrá senó naxa k'uechonhyará Dios.

¹⁵ Náhi. Jnkójina tjóá chrók'uejorá kixin Dios k'uíyahará la mé jína ch'án la ko tjóá ch'án.

¹⁶ Kixin ntáchro xroon itén Dios kixin: “Jahará chrók'uejorá tjóá kixin janhan na mé ijnko nkexro tjóá.”*

¹⁷ Tí ntáchrorá jahará kixin It'ará mé Dios la ko ó nohará kixin jehe ch'án sinchekitoexín ch'án ijie jnkójnko chojni, kixin t'ikon kixin jnkokón sínkí jnkójnko chojni, a ntá jahará chróxráxinkáonra ch'án jnkochrín tí naxa tjejochónra ntihi chjasintajni.

¹⁸ Dios mé kjuíntakaára ch'án kixin chrók'uejohyará éxi k'uek'ejó tí sín tsík'axrjenínra. Jahará ó nohará jína kixin tí nkehe k'uínáxinra tsaáxinra jehya ijnko nkehe chrókjueje éxi chica oro o chica plata.

¹⁹ Náhi. Ná mé k'uínáxinra ijnie Jesucristo imá tjete. Jehe ch'án mé k'óyan sín la k'uáyéhe Dios éxi ijnko kolélo ninkehó xéhya va.

²⁰ Kixin Cristo mé ósé tsikónoxín ch'án tí naxa k'ónahya chjasintajni. Kjánchó jehya tuénxín kónhen tíha hasta tí chr'éxin ntá kónoxín ch'án kixin jína chrók'uejoxinra tí jahará.

²¹ Ntá xikaha kónhen Cristo a ntá jie jahará la kuítekáonra Dios, mé tí nkexro kjuínchexechón Cristo la ko kjuikosáyehe ch'án. Mé xikaha jahará tinkachónkirá Dios la ko tjejochonhénra sintakaára ch'án.

²² A ntá jie ó kuítekáonra tí tan chaxín ntoá kixin tjinkitsará Nchakuén Dios. Tíha mé kótjuáxin asánra kixin ntá tsojuehéra kichuára. Mé xikaha chrótjuehéra kichuára kaín asánra.

²³ Méxra jahará kokjihará nixin, jehya kixin naxa chrók'uaxrjenínra it'ará chjasintajni ntihó ts'itjayan. Náhi. Kokjáxinra itén Dios itjen jnkochrín.

²⁴ Kixin ntáchro xroon itén Dios kixin:
Kaín chojni chjasintajni tóyóhe kayoa ó,
a ntá tí kjuachaxin chóna la tóyóhe itsjo t'óna kayoa.
Tí ka la tsoxámá a ntá tí tsjo la ts'anótjen

²⁵ a ntá tí tan kuente Ìnchéni la tsjak'e jnkochrín.†
Tí tan í mé tsaáxinni la kuinhínra tí jahará.

2

¹ Méxra titohéra kaín nkehe jínahya, la ko kaín kjuach'ia, la ko tí ntoáhya tjenkayáxinra, la ko tí kjuachjinóxinhin, la ko tí xrikoará kaín xín kjuach'ia.

² Chrók'uejorá éxi chánjan na ntá tsikokjhi la itsjen ó chrók'ui, mé xikaha jahará chrókjuéyará itén Dios, tíha mé chrókónohará la chrók'uánkixin kjuaxrexinkaon kuéntará kixin chrókuaáxinra,

³ tí chaxín kjuátsqanra kixin Ìnchéni la jína.

Cristo mé tí xro tjechón

⁴ Chrókóchjineherá Ìnchéni, mé jehe ch'án me éxi tí xro tjechón. A ntá tí chojni la kuítekakonhya tí xro a, a ntá Dios la kjueyá ch'án tí xro a imá tjete sínkí.

⁵ Mé xikaha Dios kjuích'énará tí jahará éxi xro tjechón la Dios chrókjuich'éna ch'án tí jahará jnkokoá nínko kuente ch'án, la mé ts'ónará nchát'á tsikjinchetjóá

* 1:16 Levítico 11.44 † 1:25 1.24-25 Isaías 40.6-8

Dios, a ntá chróchjehérá ch'án tí nkehe tóxrjínhín ch'án kixin tinkachónkirá Jesucristo.

⁶ Mé xikaha kjaxin xroon itén Dios ntáchro kixin:

Tsjaké chjasin Jerusalén ijnko xro t'etōan ts'óna nchia, ijnko xro tsíkónoxín imá tjete sínkí

a ntá tí sín tsitekaon tí jehe ch'án mé tsosuèhya sín.*

⁷ A ntá jahará títekáonrá tí xro kixin imá tjete. A ntá tí sín kuítekakonhya, la mé tsoxiteyá éxí ntáchro xroon itén Dios kixin:

Tí xro náxrjónhya kuítóenta tí sín ch'éna tjat'ō,

mé ijie mé k'óna tí xro tjetōan.†

⁸ La ko kjaxin tsoxiteyá tí nkehe ntáchro xroon itén Dios kixin:

Tí xro mé tsóténkixín sín la mé tíha ijnko tjo tsjitsínkaxín sín.‡

Kjánchó jehe sín kóténkixín sín tí xro kixin kuítekakonhya sín tí itén Dios mé xráxín tsíkítōenxín sín xikaha tsonhen sín.

Tí sín tinkáchónki Dios

⁹ A ntá jahará tsík'axrjeníxinrá tí sín tsík'jeyá Dios la ko tsík'ónará nchat'á ch'eherá xra tí rey, la ko tsík'ónará ijnko nación tjóá, la ko tsík'ónará ijnko chjasin kuènte Dios kixin ntá tsochronkará tí xra náxrjón kuènte Dios. K'uíyahará ch'án kixin ts'axrjéxinrá tí sítié ntá ts'ixenhenrá tí síin xrohi náxrjón t'inkaséyan kuènte ch'án.

¹⁰ A ntá jahará tí ósé la jehya chjasén Dios, a ntá jie la tsík'ónará chjasén ch'án. Tí ósé la Dios k'uékikonóahyará. A ntá jie la kuikonóahará Dios.

Chrók'uejóni ch'ehe ni xra Dios

¹¹ Kíchóni, xrjanóahará tí jahará kixin éxí chojni tsík'jixín ókjé chrók'uejorá ntíhi chjasintajni chrók'juánjonhyará kjuachaxin chrók'óxrjínhín asánrá tí nkehe síin chjasintajni, mé tí nkehe tjanjonko asánrá.

¹² Jína chrók'uejorá tí síin tí sín chónhya Dios kixin kjónté t'ántaxínhanrá sín éxí chojni jínahya chóna jie tí jahará, ichro sín, la ntá tí chrók'uíkon sín kixin jína tjejoch'erá xra ntá tsjanchehe sín Dios kjuasáya tsjixraká tí yaon tsjanchia ch'án nkehe tí xra kjuich'erá.

¹³ Jahará tinkachónkirá Inchéni chrók'juínchexiteyéhérá kaín tí sín t'etōan kuènte chjasintajni, á tí ch'ín rey kixin imá t'etōan ch'án,

¹⁴ o á tí ch'ín gobernador ichr'án Dios kixin sinchekjasóte ch'án tí sín tjasin jie, a ntá tsjikosáyehe ch'án tí sín ch'e tí nkehe jína.

¹⁵ Dios tjinkaon kixin jína chrók'uejorá kixin tí sín noehya la ko tí sín lontí la kohya jie ts'ekará sín tí jahará.

¹⁶ Chrók'uejorá éxí chojni t'ítuenhya, a ntá tí kjuachaxin chontará jehya kixin chróchontaxínrá kjuachaxin kixin chrók'juich'erá tí jínahya. Náhi. Chrók'juákoxinrá éxí chojni ch'ehe Dios xra.

¹⁷ Chrók'juíkosáyehérá kaín chojni. Chrót'juèhérá tí sín kíchó ni, la ko chróchontehérá Dios kjuasáya, la ko chrók'juíkosáyehérá tí ch'ín gobierno t'etōan.

Tóyóexin éxí tí nkehe kjuasótéxín Cristo

¹⁸ Jahará chojni ch'exón xra, chrók'juínchexiteyéhérá tí lámoará, chróchontehérá kjuasáyé sín, kjónté tí sín jína la o tí sín jínahya.

¹⁹ Tíha mé ijnko nkehe jína chrók'juákoxinrá kjónté chrók'juasótiaxínrá ijnko nkehe jínahya kixin xikaha mé chrók'juínchexiteyéhérá Dios.

* 2:6 Isías 28.16 † 2:7 Salmo 118.22 ‡ 2:8 Isaías 8.14

²⁰ A ntá tí tjejoch'erá ichrén nkehe jínahya, ntá nchekjasótiaxínrá sín la ÷nkehe tsonhen kixin chrókóninkákonhyará? A ntá tí chrókjuasótiaxínrá ijnko nkehe jína la ntá chrókjuachará chrókóninkákonhyará, la tíha mé tóxrjínhin Dios.

²¹ Méxra xikaha k'uíyahará Dios kixin Cristo kjuasóteyákonhánrá. Tíha mé kjuakoxin ch'án kixin mé xikaha chrókjuich'erá.

²² Kixin Cristo la ninkehó jie kjuasinhya ch'án la ko ninkexró kjuích'iyehya ch'án,

²³ la ko ninkehó kjuáteehya ch'án tió k'uántaxínhin sín ch'án; a ntá tió kjuínchekjasóte sín ch'án la ninkehó k'ókjanxinhya ch'án. Náhí. Jehe ch'án kjuanchia ch'án kixin Dios ts'ayakonhen tí jehe ch'án kixin Dios mé ntoá nchekitoexín ijie chojni.

²⁴ Cristo mé kuamá ch'án tí ijieni kixin tí cuérpoé ch'án kjuák'enkani ntacruz kixin éxi tsík'enni k'uék'ejóni kixin tí jie k'uéchóntani, a ntá jie chrók'uejóni jnkojína. Kixin Cristo kjuasóte ch'án, chrít'o ch'án kixin jahará chrókuitoaxínrá jína.

²⁵ A ntá jahará k'uék'ejorá éxi kolélo tsíkjichroe. A ntá jie k'uitjará tí nkexro ts'ayakonhen asánrá.

3

Nkexrí chrók'uejó tí sín tsíkótehe

¹ Kjaxin jahará chojni chjin ó tsíkótahará chrókuítekákonhénrá tí xiyará, kixin kjaxin jnkojín tí sín titekakonhya itén Dios chrókuitekaon sín kixin jína tjen tí tjachjin, kjónté t'ichjánxinhya chróchrónka tjan kixin jína tjen tjan,

² kixin chrók'uikon sín xikaha kixin jína tjen tí tjachjin chóna kjuasáyé tjan.

³ Chrókjuínchehnkexinhýará nkehe náxrjón chróchontará la ko tí nkehe náxrjón chróchóna kaxihará la ko nkehe náxrjón tsík'óna chica oro la ko tí ikará imá náxrjón.

⁴ Náhí. Chrókjuínchejínará asánrá, kixin tí nkehe náxrjón chrók'uitjányanhya na mé tí asén chojni tójehya la ko náxrjón. Tíha mé imá sínkí nkayakon Dios.

⁵ A ntá tí ósé xikaha k'uékjenkayáxin tí chojni chjin jína. Jehe sín mé kuínkáchónki sín Dios la ko kjuínchexiteyéhe sín xì sín.

⁶ Mé xikaha kjuích'e tjan Sara kjuínchexiteyéhe tjan tí ch'ín Abraham, mé kjaxin ntáchro tjan kixin ìnché tjan tí jehe ch'án. A ntá tí jahará tí xjeen tí jehe tjan la chrókjuínchexiteyará jína la ko ninkehó kjuachrakon chróchontahýará.

⁷ Kjaxin jahará chojni ntoará tsíkótahará chróchontehérá ichjiánrá kjuasáya kixin ó nohará kixin kánhyó tsehe tjan la ko ó nohará kixin yóirá tjáhará Dios tí kjuachón. Xikaha chrókjuich'erá ntá tió chrónixjehérá Dios la kohya nkehe chrók'uinkákonhen.

Tí sín tjasótexín sín kixin jína kjuích'e sín

⁸ Méxra, jnkokoá chrókjuenkayáxinrá kaín rá chrókuiikonóehérá kichuára, chrótjuèhérá kichuára. Jnkojína chrónixjehérá kichuára la chrókjuínchehnkehýará asánrá.

⁹ Tí ichrén nkehe jínahya chrókjuít'ahará sín la jahará la xikahya chrókjuích'ehérá sín. Tí chrók'uántaxínhanrá sín la jahará chrók'uantaxíenhyará sín. Náhí. Íchá jína chrókjuancheherá Dios kixin chrókjuíncheyaon ch'án sín kixin Dios la k'uíyahará ch'án kixin chrók'uayéhérá kjuachaxin kuènte ch'án.

¹⁰ Kixin:

Tí nkexro tjinkaon tsotjuèhe asén kixin jína chrókjuak'e kaín yaon la chrónixjahya ch'án ninkehó nkehe jínahya la ko ninkehó kjuach'ia chrók'uaxrjexinhya ir'va ch'án.

11 Tí nkexro la chrókuítøhe tí nkehe jínahya la íchá jína chrókjuich'e tí nkehe jína,

la ko íchá jína chrókjueyá ch'án kjuaxróxin chrókjuak'e ch'án.

12 Kíxin Ìnchéni t'ayakonhen tí nkexro jína

la ko tinhin ch'án tí nixjehe sín ch'án,

a ntá tí sín ch'e tí jínahya la tjinkítsahya ch'án.*

13 ¿Xá nkexro chrókjuít'ahará nkehe jínahya tí jahará tjejoch'erá nkehe jína?

14 Kjónté chrókjuasótéxínrá tí nkehe jína tjejoch'erá kjónté la chrókócháhará chróchrakuenhyará ninkexró la ko chróchrakonhyará.

15 Náhi. Íchá jína chrókjuíkosáyehérá Cristo nkaya asánrá kíxin Ìnchárá. Chrók'uejorá listo chrókjuátèherá tí nkehe chrókjuanchankíhará kaín chojni kíxin nkexrí tinkachónkirá Ìnchéni, la chrókjuinchehnkehyará la kjuasáya chrókjuátèherá.

16 Chróchontará ijnko kjuaxrexinkaon jína kíxin ntá tí sín xrich'ia sín t'ántaxínhanrá sín kjónté jína tjejorá tinkachónkirá Cristo la mé chrókósuèhe sín kíxin tí nkehe ntácho sín la ntoáhya.

17 Íchá jína chrókjuasótíaxínrá kíxin tí jína tjejoch'erá tí xíkaha tjinkaon Dios, a ntá chrókósuàhará chrókjuasótíaxínrá tí ichrén jie chrókjuich'erá.

18 Kíxin Cristo kjuasóte ch'án la ko k'uénxin ch'án tí jie kuènteni, ónaá k'uén ch'án kixin para jnkochrín. Jehe ch'án la jína ch'án la kjuasóteyákonhenni ch'án kjónté jínahyani, kíxin ntá jína sáchrókjuíkoni ch'án tí tjen Dios. A ntá ik'uén ch'án éxí chojni, a ntá Nchakuen ch'án la k'uénhya mé xechón inaá,

19 kíxin tí Nchakuen ch'án sákjuíkjakøhe tí nchakuen tí sín tsík'en tjejóchjina.

20 Tí sín a mé kuítekakonhya sín tí ósé tíó kjuák'e ch'ín Noé na mé Dios la kónínkakonhya ch'án kjuák'echónhen ch'án nachrohe sít'óna tí arca, na mé ijníkoá chojni kuítekaon sín mé kuaá sín tí kuíte sín ntá.

21 Tí ntá a mé tóyøhe tí tikitexín chojni ijie kíxin tí xíkaha tsonhenni la tsaáxinni ijie. A ntá tí tikite chojni la jehya kíxin tsøtjuáxin tí cuerpo. Náhi. Tsjancheheni Dios kíxin sinchetjóá ch'án tí tjenkayáxinni. A ntá tí nkehe tsaáxinni la mé tí xechón Ìnchéni Jesucristo,

22 mé tí nkexro sátsíkji nkaya nkajní itjen ch'án itja chjina Dios. A ntá jehe ch'án la mé t'etuenhen tí sín ángel la ko tí sín t'etøan.

4

Chrókjuich'eheni Dios xra éxí tí kjuachaxin kjuanjon ch'án

1 Méxra éxí Cristo kjuasóte tí cuérpoé ch'án ntá kjaxínrá kjónté xíkaha chrókjuasóterá chrókóxakuanhyará kíxin tí nkexro kjuasóte tí cuérpoé la ó kuítøhe tí jie.

2 A ntá tí naxa chrók'uejochónrá intsí la chrók'uejorá éxí tóxrjínhin Dios. Jehya éxí k'uékóxrjínhanrá.

3 A ntá tí ósé nchónhya nkehe k'uékjich'erá éxí ch'e tí sín naxa chónhya Dios. K'uék'ejorá k'uékjenkayáxínrá tí nkehe jínahya la ko k'uékjásínrá jie k'uéchontará ókjé chojni chjin la ko k'uékókoanrá la k'uekjásínrá kia ntá ntiha kjuánjonxin chojni la ko k'uékinkachónkirá tí nkehe tsíkjanoya.

4 A ntá ijie la jahará t'itohyará tí sín a kíxin tí jínahya ch'e sín. Méxra xíkaha t'ántaxínhanrá sín.

5 A ntá tí jehe sín tsjanjon sín kuentá tsochénka sín tí nkexro tjechónhen sinchekítøexín ijie tí sín tjejóchón la ko tí sín tsík'en.

* 3:12 3.10–12 Salmo 34.12–16

⁶ Méxra kjónté tí sín tsík'en tsíxrákohe sín tí itén Dios kixin tí nchakuen sín chrók'uejó éxí tjinkaon Dios kjónté naxa k'uejó sín ntihi chjasintajni la kuítóexín tí ijíé sín éxí tsítóexín ijíé kaín chojni.

⁷ Ó kuichjina tsjeje chjasintajni a ntá xikaha chrók'uejorá jnkojína la ko chrók'uejotsjehérá chrónixjehérá Dios.

⁸ Tí nkehe imá tjetóan kixin antsí chrótjuèhérá kíchuará. A ntá tí tjuèhérá kíchuará la mé tíha chrók'uitjáyanxín tí nchónhya jie chonteherá kíchuará.

⁹ Chrókuánjonrá kjuachaxin chrókuítóhe jnkójin kíchuará ntóar chrókóninkákuénhyará nijnko tí jehe sín.

¹⁰ Jnkojnkórá nkehe tí xra tjáhará Dios k'uayéhérá chrókuínkítasará kíchuará. Xikaha jina chrókuákoxinrá tí kjuasáyé ch'án tjáhará ch'án kixin nchónhya xra k'uayéhérá.

¹¹ Tí jnkójinrá tjinkáonrá chrónixjará ichrén nkehe la chrónixjará éxí nixja itén Dios. Ti jnkójinrá tjinkáonrá chrókuínkítasará la chrókuákoxinrá tí kjuachaxin tjáhará Dios. Kaín tí xra chrókuich'erá chrókjuanchehérá Dios kjuasáya kixin kjuasáyé Jesucristo tinkachónkirá tí jehe ch'án. Kixin jehe ch'án la kaín tí kjuachaxin siín la kuènte ch'án jnkochrín. Mé xikaha chaxín. Amén.

Íchá jina chrókuasótéxínni kixin tí tinkáchónkini Cristo

¹² Kíchóni, chrókóxakuanhyará kjónté ichrén nkehe jínahya chrókónhanrá. Ó jehí t'ichjánxin xikaha tsonhanrá. Chróntáchrohyará kixin ókjé nkehe tjasótiaxinrá.

¹³ Náhi. Íchá jina chrókócháhará kixin xikaha chrókuasóterá éxí kjuasótéxín Cristo, kixin kjaxinrá tsocháhará imá tió ts'ikonrá tí kjuachaxin tsikao Inchéni tí itsi ch'án.

¹⁴ Chrókócháhará tí t'ántaxínhanrá sín kixin tinkachónkirá Cristo kixin tí Nchakuen Dios chóna kjuachaxin t'ayakonhanrá. Jehe sín t'ántaxínhin sín ch'an, a ntá jahará tjíkosáyehérá ch'án.

¹⁵ A ntá tí jnkójinrá tjeotjasóterá chrókókehya kixin ichrén nkehe chrókuich'erá chrókuàyará o chrókueerá o ichrén nkehe jínahya chrókuich'erá o chrókjiatérá kjuanínkaon kuènte ókjé chojni.

¹⁶ Náhi. A ntá jnkójinrá chrókuasótiaxinrá kixin tinkachónkirá Cristo la chrókósuáhyará. Náhi. Chrókjuanchehérá Dios kjuasáya kixin xikaha kónhanrá.

¹⁷ Ntá jie ó kui tí tsítóexín ijíé chojni mé xrankíxixín tí sín tsík'óna xjeen Dios. A ntá tí xikaha tsítóexín ijíé tí jeheni xrankíxixín, a ntá íchá tí ó tsjixixín tí sín titekakonhya tí itén Dios.

¹⁸ Íchá tí sín jina la ko xikaha tsonhen sín ntá tsaá sín a ntá íchá tí sín jínahya chóna jie kjá antsí tjasóte sín.*

¹⁹ A ntá tí nkexro tjasóte éxí tjinkaon Dios la kjónté xikaha la naxa chrókuich'e sín nkehe jina la ko chrókjuanjon sín asén sín chrók'uayakonhen Dios mé tí nkexro kjuích'éna sín la mé jehe ch'án xráxín jina ch'án.

5

Tí k'uítuenhen tí sín t'etóan kuènte nínko

¹ Tjínkavan tétuanhan tí chojni t'etóan kuènte tí nínko tjejorá ntiha kixin kjaxin janhan tétóan kuènte nínko éxí tí jehe sín, a ntá janhan mé k'uíkuan kixin nkexrí kjuasóte Cristo, la ko kjaxin janhan mé tsochonta kjuachaxin kuènte Dios éxí tsochóna tí jehe sín tió itsi Inchéni chr'éxin.

* 4:18 Proverbios 11.31

² Jahará chrók'uayakonhénrǎ tí kolélo kuènte Dios ntiha kíxin xikaha tí xra k'uayéhérǎ. Jnkójina chrókjuínkǐtsarǎ sín éxí tjinkaon Dios la jehya kíxin ijnko chojni chrók'uətuənhanrǎ chrókjuich'erǎ xra, la ko kjaxin jehya kíxin imǎ chrókóxrjínhanrǎ chichaon. Náhi. Kaín asánrǎ chrókjuich'erǎ xra jína.

³ Jehya jahará kuəntarǎ tí jehe sín kíxin chjini chrókuətuənhénrǎ sín. Náhi. Jnkójina chrókjuákoéxínrǎ tí jehe sín.

⁴ A ntǎ tío tsi tí Pastor chaxín t'ətoan ntǎ jahará ts'ayéhérǎ ijnko corona náxrjón tsjehəhya.

⁵ Kjaxin jahará ntasoárǎ chrókjuínchexiteyéhérǎ tí sín t'ətoan kuènte njnko. Kaínrǎ chrókjuínchexiteyéhérǎ kíchuárǎ chrókjuínchehnkehəyarǎ kíxin:

Dios la tsonínkakonhen tí sín nchehnke,

a ntǎ tí sín nchehnkehəya mé tsjinkǐtsa ch'án.*

⁶ Méxra chrókjuínchehnkehəyarǎ, chrókjuínchexiteyéhérǎ Dios kíxin jehe ch'án imǎ ts'ətoan ch'án kíxin tsjixrakǎ tí yaon mé jehe ch'án tsotjáharǎ ch'án kjuachaxin kíxin tsətoanrǎ.

⁷ Chróchjehérǎ Dios kaín tí kjuaxrexinkaon chontarǎ kíxin kjaxin jehe ch'án tóxakonhen ch'án tí jahará.

⁸ Chrókóxakonhanrǎ jína chrók'uejorǎ. A ntǎ ijie ixri tí nkexro nínkakonhanrǎ mé tí ch'ín Tsochren éxí ijnko koxra tsjánka va xritjeyǎ va nkehe sine va.

⁹ Tjánjonhyarǎ kjuachaxin kíxin jehe ch'án chrókjuacha ch'án chrókjuachroerǎ ch'án, kíxin ó noharǎ kíxin kaín tí sín kíchuárǎ nkuíxín chjasintajni xikaha tjejtjasóte sín kíxin tinkáchónki sín Ìnchéni.

¹⁰ Kjánchó kánhyó sé tsjasótiarǎ, a ntǎ Dios antsí tsjinkǐtsarǎ ch'án kíxin tsjacharǎ ts'ejorǎ jína. A ntǎ jehe Dios a mé tjuaharǎ ch'án la k'uíyaharǎ ch'án kíxin ts'ejokoarǎ ch'án jnkokoǎ tí tjen Jesucristo chóna kjuachaxin jnkochrǐxín.

¹¹ Jehe ch'án tsjancheheni ch'án kjuasáya kíxin chóna ch'án kjuachaxín ts'ətoan ch'án jnkochrǐxín. Amén.

Kjuixixín nixja ch'ín Pedro

¹² Ch'ín Silvano mé t'íkuən ijnko kíchó ni jína mé kjuínkǐtsa ikjinni tí xroon kjónté kánhyó tsjé nixja, la ntəxraxinkáonrǎ kíxin kjuíntayaonrǎ Dios ntǎ xikaha kjuakoxin ch'án kíxin chaxín tjuaharǎ ch'án. Méxra xikaha jína chrók'uejorǎ kíxin tjuaharǎ ch'án.

¹³ Tí njnko tjen Babilonia mé tsíkjeyǎ Dios éxí tsíkjeyǎ ch'án tí jahará nixjaharǎ sín la ko kjaxin nixjaharǎ ch'ín Marcos, mé éxí xjanna t'íkuən tí jehe ch'án.

¹⁴ Nixjehérǎ kíchuárǎ jnkójina. Kjuaxróxin chrók'uejorǎ tinkáchónkirǎ Jesucristo. Amén.

* 5:5 Proverbios 3.34

Xroon yóxin tsíkjin ch'ín Pedro

Ch'ín Pedro chr'énnen ch'án tí xroon tí sín tinkáchónki Cristo

¹ Janhan Simón Pedro, na mé t'ahá xrá Jesucristo. Ikjian tí xroon ts'ayéhérá jahará ó tinkachónkirá Ìnchéni éxí tinkáchónkini jeheni kixin Dios la ko Jesucristo tí nkexro sincheakaáni na mé jína ch'án.

² Sintayaonrá Dios la ko antsí ts'ayéhérá kjuaxróxin kixin ó nohará nkexrí tjen Dios la ko Ìnchéni Jesús.

Jína chrók'uejó tí sín tinkáchónki Jesús

³ Dios kjuanjon kjuachaxin tsochóntani kaín nkehe t'ichjánxinhinni kixin chrók'uejóni jína chrórxaxinkaonni tí jehe ch'án. Kixin ó noheni nkexrí tjen tí nkexro k'uíyeheni kixin tí kjuachaxin jié chóna ch'án la ko tí xrá imá jié kjuích'e ch'án.

⁴ Mé xíkaha kjuanjon ch'án kaín xín tí nkehe a, táha la mé imá jié la ko imá tjete sínkí. Mé xíkaha kjuakoxin ch'án kixin chrók'uayéhérá kjuachaxin chrók'uejorá éxí tjinkaon ch'án la ko chrókuítóhérá tí nkehe jínahya kixin chrók'uitjáyanxínhyará tí nkehe k'uékjenkayáxinrá síin chjasintajni.

⁵ A ntá jahará tinkachónkirá Ìnchéni la kjaxin chrókjuéyará kixin chrók'uejorá jnkojína; a ntá tí jína tjejorá ntá chrókjuachará antsí chrókónohará;

⁶ a ntá tí kónohará ntá chrókjuachará chrókjuenkayáxinrá jína; a ntá tí tjenkayáxinrá jína ntá chrókjuachará chrókóninkákonhyará tjoka; a ntá tí tóninkákonhyará ntá chrókjuachará chaxín xráxinkáonrá Dios;

⁷ a ntá tí chaxín xráxinkáonrá Dios ntá chrókjuachará chrótjuèhérá kichuárá; a ntá tí tjuèhérá kichuárá ntá chrókjuachará chrótjuèhérá kaín chojni.

⁸ A ntá xíkaha tjejoch'erá tinkák'ánkí tí kjuaxrexinkaon kuéntará, ntá jehya kixin chónkó kuinkachónkirá Ìnchéni Jesucristo.

⁹ A ntá tí nkexro ch'ehya xíkaha la mé éxí ijnko chojni t'ikonhya o ijnko chojni t'ikonhya jína, kixin ó k'uitjáyenhen kixin Ìnchéni ó kjuixin kjuínchetjóá tí jié k'uéchóna ósé.

¹⁰ Méxra xíkaha kichó ni jnkojína chrók'uejorá kixin ntá tsonohará jína kixin Dios tsíkjeýará tí jahará la ko tsík'íyáhará ch'án kixin xíkaha jína chrókjuenkayáxinrá, a ntá xitjahya chrókjuichroerá.

¹¹ A ntá xíkaha chrókuítekáonrá ntá tsotjáhará Dios kjuachaxin ts'ixenhenrá tí tjen Ìnchéni Jesucristo t'etōan ch'án jnkochríxín. Jehe ch'án mé tí nkexro kjuíncheakaáni.

¹² Méxra titoahya ntaxráxinkáonrá kaín tí nkehe i, kjónté ó nohará tí nkehe ntoá kjuákohará.

¹³ Ntáxrjan kixin jína tí naxa tjen chrókjuíntaxráxinkáonrá kaín tí nkehe a

¹⁴ kixin Ìnchéni Jesucristo kjuínchenona kixin í séhya its'én janhan.

¹⁵ Na mé kaín tíha tjét'a kixin tió its'én, ntá jahará tsoxráxinkáonrá jnkochríxín kaín tí nkehe kjuít'a.

Tí sín k'uíkon tí kjuachaxin kuènte Cristo

¹⁶ Tí nkehe kjuakoharáni kuènte tí kjuachaxin kuènte Ìnchéni Jesucristo la ko nkexrí itsi ch'án na mé jehya ijnko cuento kjuích'éna chojni chrókjuich'iyaxín. Náhí. Ikonni k'uíkonxínconi Ìnchéni la ko tí kjuachaxin kuènte ch'án.

17 K'uíkonni tíha tió It'eni Dios kjuikosáyehé ch'án tí Xjeen ch'án, la ntá kuínhinni nixja Dios tjen nkaya nkajní ntáchro ch'án kixin: “Tíhi mé xjanna tjuahá ch'án. Imá chàna kixin nchexiteyá ch'án éxí tjínkavan janhan,” ichro Dios.

18 Mé kuínhinni itén Dios kuixin nkaya nkajní kixin xikaha ntáchro tió k'uejókoni Ìnchéni chrítaón tí jnà tjóá.

19 Mé xikaha k'uechrónka tí sín tsíkjin itén Dios ósé ntá noexínni kixin chaxín tsoxiteyá. A ntá jahará chrók'uejorá chrókuinhínrá jína nkehe k'uentáchro sín kixin tí tan mé éxí ijnko xrohi t'inkaséyanxín tí sítié tsjixrakájia tí yaon ts'inkaséyan itsi tí konotsé t'inkaséyanxín tí nchítjen mé xikaha ts'inkaséyanxín nkaya asánrá.

20 A ntá tjetoan chrókónohará tíhi: kixin ninkehó xroon itén Dios tsík'óna jehó chojni chrókjuacha chrókienxín.

21 Náhi. Tí sín k'uechrónka itén Dios la nixjahya sín tí nkehe jehó sín chrókjuenkayáxin sín. Náhi. Tsíkjinchetjóá Dios tí jehe sín, a ntá Nchakuen Dios kjuínkítsa k'uénixja sín itén Dios.

2

Tí sín tjako kjuach'ia (Judas 4-13)

1 Kjaxin k'uék'ixin tí sín ntoáhya k'uechrónka itén Dios tí chjasin Israel, mé kjaxin xikaha tí jie ts'ixin maestro sit'ayahará. Jehe sín tsochr'ákjenhen sín iso nkehe ntoáhya ts'itjáyanxín tí nkehe chaxín tsaáxinni la xikaha sinchemá sín tí Ìnchéni chrókuaáxinni. Tíha mé tsjixin tsjasótexín tí jehe sín.

2 Nchónhya chojni tsochréhe sín tí nkehe jínahya ch'e sín. A ntá tí xikaha ch'e sín la ts'ántaxienxín chojni tí ntja ntoá kuènte Ìnchéni.

3 Tsoxrjínhin sín tsochóna sín nchónhya chichaon, ntá tsjanchiaxínrá sín chichaon tí nkehe ntoáhya tsjakohará sín. A ntá tí nkehe ts'itjáyanxín sín tjechónhen la kohya nkerí tsaáxin tí jehe sín kixin ósé tjechónhen xikaha tsonhen sín.

4 Dios la kjónté tí sín ángel kjuasin jie la kuikonóehya ch'án sín la k'uetoan ch'án kixin sátsji sín tsjasóte sín sátsjik'ikjehe sín tí sítié na tjejóchjina sín tsjixrakájia tí tsitoexín ijie sín.

5 La ko kjaxin kuikonóehya Dios tí sín k'uéjó chjasintajni ósé ntá ichr'án ch'án ntá kuíteé tí sín jínahya, a ntá Dios kjuínchekaá jehó tí ch'ín Noé, na mé tí nkexro kjuako tí tan jína la ko kjuínchekaá ch'án tí yato sín ó.*

6 Kjaxin Dios kjuínchek'itjáyan tí chjasin Sodoma la ko tí chjasin Gomorra iche hasta k'óna nteso, kixin chrókónohe chojni jínahya ts'ejó chr'éxin kixin xikaha tsonhen sín.†

7 Kjánchó Dios kjuínchekaá ch'án tí ch'ín Lot kixin ijnko chojni jína tí jehe ch'án la ko imá kóxakonhen ch'án tí k'uíkon ch'án tí jie kjuasin tí sín jínahya.

8 Tí ch'ín Lot mé jína asén ch'án mé k'uékjak'e ch'án tí síin tí sín jínahya ntá kaín yaon kóxakonhen asén ch'án k'uíkon ch'án la ko kuínhin ch'án tí nkehe jínahya k'uékjich'e sín.‡

9 A ntá Ìnchéni na sinchekaá ch'án tí sín kaín asén kuítekaon tí jehe ch'án kjónté nchónhya kónhen sín. A ntá tí sín jínahya la sinchekjasóte ch'án tí yaon tsitoexín ijie chojni.

* 2:5 Génesis 6.1-7.24; 8.18 † 2:6 Génesis 19.24 ‡ 2:8 2.7-8 Génesis 19.1-16, 29

¹⁰ Dios antsí sinchekjasóte ch'án tí sín nchexiteyéhe tí nkehe jínahya ntáchro asén sín a ntá nchexiteyéhya sín tí nkehe t'etōan Ìnchéni. Titekakonhya sín la ko chrakonhya sín chrók'uántaxínhin sín tí sín ángel chóna kjuachaxin.

¹¹ A ntá tí sín ángel imá tsehe sín la ko imá chóna sín kjuachaxin la kjónté tjinkakonhya ts'ántaxínhin tí sín a nkayakon Ìnchéni.

¹² A ntá tí chojni a la éxí yóhe iko tjenkayáxinhya ninkehó la nchexiteyéhe tí nkehe ntáchro asén, la kokjíhi kixin ts'óyán kichó ó. T'ántaxínhin sín tí nkehe tienxínhya sín, mé xikaha its'en sín éxí its'en tí ko a.

¹³ Tíha mé tsjasótexín sín kixin jehe sín kjuínchekjasóte í so chojni. Xrácín tóxrjínhin sín ich'e sín tí nkehe ntáchro asén sín. Ijnko kjuatósuehe kixin tjejótaxín sín ntekoará sín tí kia chontará la kjónté tí xikaha la naxa tjasin sín jie.

¹⁴ Kohya nijnko chojni chjin chrokjuasinkohya sín jie. Tóxrjéhya sín tjasin sín jie tsjasótexín sín.

¹⁵ Kuitohe sín tí ntia ntoá ntá chréhe sín ntia kuènte ch'ín Balaam xjeen ch'ín Beor, kixin kóxrjínhin ch'án chrókjuacha ch'án nchónhya chichaon tí nkehe jínahya chrókjuich'e ch'án.

¹⁶ A ntá t'ichjánxin tsjasóte ch'án kixin tí jie kjuasin ch'án. A ntá ijnko kolócho chjin xitjahya nixja la xrínahya nixja itén chojni la kjuentuéhe tí ch'ín Balaam kixin tí jie chóna ch'án ntá kuitohe ch'án tí nkehe jínahya chrókjuich'e ch'án. §

¹⁷ Tí chojni tjako mé éxí yóhe tōye tjiáhya nta la ko éxí tjuj tjakáko xrinto ó; ó kjuixin k'uituenhen sín sátsji sín tí imá sítie tsjasóte sín jnkochrín.

¹⁸ Kaín nkehe jínahya nixja sín, a ntá tí jie tjasin sín tóxrjínhin sín chojni chjin ókjé ntá tjachroexín sín tí sín na ntá tjinkaon chrókuítóhe sín tí jie.

¹⁹ Chrónka sín kixin kaín nkehe jínahya la jína, kixin jehe sín nchexiteyéhe sín tí nkehe jínahya ntoáhya; kixin jnkojnko chojni mé nchexiteyéhe tí nkehe kjuacha k'uetuenhen sín.

²⁰ A ntá tí nkexro ó chóxin Ìnchéni Jesucristo tsaáxinni mé kuitohe sín tí nkehe chrók'uitjáyanxín sín kuènte chjasintajni. A ntá chr'éxin tí chrókuakja sín ntia jínahya ínaá tí chrókjuacha tí jínahya chrókjuachroe sín, a ntá antsí má jínahya chrókónhen tí jehe sín.

²¹ Íchá jína chrókónoehya sín tí ntia jína. A ntá jehya jína tí ó nohe sín ntá tsítóhe sín tí nkehe k'uetōan Dios kuínhin sín.

²² A ntá tí jehe sín kjuínchexiteyá sín éxí ntáchro tí proverbio kixin: “Tí konia t'ókjan ntá xíkjan xíkjine ínaá,* la ko tí cochíno na ntá tsík'ónti tjóá ntá xíkjan kjíankí tí nchet'ō kjita.”

3

Tió tsi Ìnchéni

¹ Kichóni tjuahará tíhi la xroon yóxin ikjian ts'ayéherá. Yóí tí xroon a ntaxráxinkáonrá kixin jína chrókjuenkayáxinrá.

² Chróxráxinkáonrá tí nkehe tsíchrónka tí sín k'uéchrónka itén Dios ósé la ko tí nkehe k'uetōan Ìnchéni, mé tí nkexro tsaáxinni, kjuakohará tí sín kjueyá ch'án.

³ Tjetoan chrókónohará tíhi kixin tí yaon tsjixín la itsi chojni tsjanoá tí tan jína kuènte Ìnchéni, la sinchexiteyéhe sín kaín nkehe jínahya ntáchro asén sín.

⁴ Tsjanchankí sín nkehe kónhen tí nkehe tsintáchro Cristo kixin tsokjan ch'án, kixin desde ik'uén tí sín tsík'axrjeníxinni k'uéjó ósé la xikahó naxa sítónhen éxí tíó k'óna chjasintajni.

⁵ Tí sín a titekakonhya sín kixin ósé k'uénixja Dios ntá k'óna nkajní la ko chjasintajni na mé kjuìn tí ntá ntá kuítóhe nonte xamá.

⁶ A ntá tí ntá k'uitjáyanxín chjasintajni inaá.

⁷ A ntá tí nkajní la ko tí chjasintajni naxa tjejó jie tjejóchónhen tsoche kixin xikaha k'uetōan Dios kixin xrohi tsochexín tí yaon tsjixixín tsitoexín ijje chojni la ko kaín tí sín jínahya tsjasóte sín.

⁸ A ntá kichó ni, chrók'uitjáyanhyará kixin Ìnchéni tí ijnko yaon t'ikon ch'án éxi mil nánó la ko mil nánó t'ikon ch'án éxi ijnko yaon ó.*

⁹ Ntá Ìnchéni í séhya sinchexiteyá ch'án tí nkehe tsintácho ch'án la jehya éxi tjenkayáxin í so chojni kixin ó má sé tjejóchónhen sín. Náhí. Jehí tjechónhen ch'án kixin ninkexró chrók'uitjáyanhya kixin tjinkaon ch'án kixin kaín chojni chrókjan sín chrókuinkáchónki sín Dios.

¹⁰ A ntá tí yaon tsokjan Ìnchéni mé tsí éxi xíchee itsi tí tie. A ntá tí nkajní ts'itjáyan, la mé nchónhya kjuachrakon ts'ixikónhen ts'ixikóvékjan. A ntá kaín nkehe sínkáni nkajní na mé ts'itjáyan tsoche, la ko tí chjasintajni tsoche la ko kaín nkehe síin.

¹¹ A ntá tí xikaha kaín nkehe ts'itjáyan, a ntá jahará la jína chrók'uejorá chróxráxinkáonrá Dios.

¹² Chrók'uejochonhénrá tí yaon itsi Dios chrókóxakonhanrá chrókjuich'erá xra kixin ntá tjoka chrókui Ìnchéni. A ntá tí yaon tsjixixín mé ts'itjáyan nkajní tsoche, la ko kaín nkehe tsoxíka ts'itjáyan kixin imá tsosóa.

¹³ A ntá jeheni tjejóchónhenni nkajní nixin la ko chjasintajni nixin éxi tsintácho Dios kixin tsjanjon ch'án. A ntá ntiha la mé imá náxrjón la ko kjuaxróxin ts'ixin tí chojni jína.

¹⁴ Méxra xikaha kichó ni, nachrohe tjejochonhénrá kixin itsi tí yaon tsonhen xikaha la kaín asánrá chrókjuéyará jnkojína chrók'uejorá kixin ts'ikon Dios kixin kjuaxróxin tjejorá chontahyará jie.

¹⁵ Chrókónohará kixin naxa tjechónhen Ìnchéni, tjokahya itsi ch'án kixin í so chojni naxa chrókuitekaon sín ch'án. Kjaxin xikaha tsíkjin tí kichó ni Pablo tí xroon chr'ánhanrá ch'án éxi tí kjuachaxién Dios tsík'áyéhe ch'án chrónka xikaha.

¹⁶ Jnkojnko tí xroon tsíkjin ch'án nixja xikaha la imá xra chrókienxín chojni. A ntá tí sín noehya la ko tí sín kánhyó tinkáchónki Ìnchéni ntá tienxínhya sín la ntá ntoáhya tjako sín nkexrí t'axrjexín tí nixja tí xroon tsíkjin ch'án la ko kjaxin ntoáhya tjako sín í so nkehe nixja xroon itén Dios. Ntá xikaha jehó sín tjejá sín nkehe ts'itjáyanxín sín.

¹⁷ Méxra kichó ni, ó nohará tí nkehe senó, ntá chrókóxakonhanrá kixin chrókjuachruèhyará tí kjuach'ia xriko tí sín jínahya ntá chrókuitohérá tí nkehe jína ntoá tinkachónkirá.

¹⁸ Ìchá jína antsí má chróchoxínrá Ìnchéni Jesucristo, mé tí nkexro sinchekaáni la ko antsí chrók'uánkí tí kjuachaxién ch'án chróchontará. Méxra tsjikosáyeheni ch'án ijie la ko jnkochrín. Amén. Ó tjen.

* 3:8 Salmo 90.4

Tí xroon saoxín tsíkjin ch'ín Juan

Tí tan tjanjon kjuachón

¹ Ikjinni tí xroon i ts'ayéherá kixin tsonohará kuènte tí nkexro xráxin kjuák'e tí naxa t'ónahya chjasintajni, mé tí nkexro kuínhinni nixja la ko tí nkexro k'uíkonxin konni. Kixin tí nkexro mé k'uíkonni la ko tí nkexro kuákóxin tjani, mé tí nkexro nixja tí tan tsjanjon kjuachón.

² Kjuakoxin ch'án nkexrí kjuák'e ch'án, a ntá kaín tí jeheni k'uíkonni ch'án, mé xikaha chrónkaxinni nkexrí kjuák'e ch'án; a ntá tjakuxinni tí jahará nkexrí tjen tí kjuachón jnkochrín, la mé jehe ch'án k'uékjak'eko ch'án It'é ch'án Dios, a ntá ikui ch'án ntihi chjasintajni.

³ Chrónkaxinni tí nkehe k'uíkonni la ko tí nkehe kuínhinni, kixin kjaxinrá jnkokoá chrókuinkachónkirá éxi tinkáchónkini tí jeheni, éxi tí jeheni jnkokoá tinkáchónkini It'éni Dios la ko tí Xjeen ch'án Jesucristo.

⁴ Mé xikaha ikjinni tí nkehe i, kixin chrókjuintaxín chrókócháhará la ko chrókóchéni.

Dios mé tí xrohi

⁵ Tí tan i mé Inchéni Jesucristo kjuakohe tí jeheni, a ntá jie tjakoharáni tí jahará, kixin Dios mé tí xrohi, a ntá kohya ninkehó sítié tí tjen tí jehe ch'án.

⁶ A ntá tí tsontáchroni kixin tinkáchónkini tí jehe ch'án, a ntá naxa ixrini tí ntia sítié, na mé xikaha ch'iani kixin ch'ehyani tí nkehe ntáchroni.

⁷ A ntá tí xritjejóni tí t'inkaséyan kixin tí Dios mé jehe ch'án tí t'inkaséyan, na mé xikaha jnkokoá tinkáchónkini ch'án, a ntá tí ijnié Xjeen ch'án Jesucristo mé ts'íjmaxin kaín jie chóntani.

⁸ Tí chróntáchroni kixin ninkehó jie chóntahyani, mé xikaha la jehóni ch'iyeheni asénni, a ntá tí nkehe chaxín la chóntahyani.

⁹ A ntá tí tsontáchroni kixin chóntani jie, a ntá tsonoheni chaxín kixin itjen ijnko Dios la jína ch'án la ts'itjáyenhen ch'án kaín jie chóntani la ko sinchetjóani ch'án kixin kaín tí nkehe jínahya kjuích'eni.

¹⁰ A ntá tí tsontáchroni kixin kjuasinhyani ninkehó jie, la éxi chróntáchroni kixin Dios la ch'ia ch'án, a ntá tí xikaha tsixroni la chaxínhya tsík'áyéheni tí tan kuènte ch'án.

2

Cristo mé tsonixjayákonhenni ch'án

¹ Kíchóni, éxi xjanna t'íkuan tí jahará, a ntá tjékjian tí xroon ts'ayéherá tsochrónka kixin chrókjuásinhýará jie. A ntá tí jnkójnra chrókjuásinra jie la chóntani ijnko nkexro tsonixjayákonhenni nkayakon It'éni Dios, tíha mé Jesucristo, la jehe ch'án mé ijnko nkexro jína.

² Jesucristo mé k'uenyákonhenni ch'án kixin tí jie chóntani; a ntá jehya ijiéni ó. Náhí. Ijié kaín chojni siín chjasintajni.

³ Tí tsitekaonni tí nkehe k'uetōan Dios ntá tsonoexinni chaxín kixin chóxinni ch'án.

⁴ A ntá jnkójn nkexro ntáchro kixin chóxin Dios, a ntá titekakonhya tí nkehe tsík'etōan Dios, la mé ch'ia la noehya tí nkehe chaxín.

⁵ A ntá tí nkexro titekaon tí nkehe tsík'etōan Dios la chaxín tjuèhe Dios; mé xikaha noheni kixin chaxín jnkokoá tjejókoni ch'án.

⁶ Tí nkexro ntáchro kixin chaxín tinkáchónki Dios chrókjuak'e éxi kjuák'e Jesucristo.

Tí mandamiento nixin

⁷ Kíchóni, méxra tí nkehe tjékjian jehya ijnko nkehe nixin tsík'etoan Dios. Náhi. Tíha mé tí nkehe k'uayéhérá tí xrankíxixín, mé tí mandamiento ósé tjen, mé tí nkehe ó tsíkinhínrá.

⁸ Kjánchó tí nkehe ikjian mé yóhe ijnko nkehe nixin, éxí kjuakoxin Cristo mé xíkaha tjakoxinni, kixin tí sítié la tinkák'itjáyan kixin ijie la ó t'inkaséyanxín tí xrohi chaxín.

⁹ A ntá tí nkexro tsonáchro kixin ixri tí t'inkaséyan, a ntá naxa nínkakonhen kíchó, na mé tí xíkaha naxa itjen tí sítié a.

¹⁰ A ntá tí nkexro tjuèhe kíchó mé tjen tí t'inkaséyan, a ntá xíkaha jína tjen, chóntahya jie la chrókjuachruèhya ch'án ninkexró kixin chrókjuasin sín jie ínaá.

¹¹ A ntá tí nkexro nínkakonhen kíchó mé tjejó sín la ko ixri sín tí sítié a la ko noehya sín nketí nó sátsji sín kixin tí sítié la kjuích'éna ntakótán sín.

¹² Éxí xjanna t'íkuan tí jahará, la méxra tjékjian tí xroon ts'ayéhérá kixin tsonohará kixin kjuachaxin ihnié Dios kjuínchetjuáxinrá tí ijjárá kixin k'uenyákonhenni Ìnchéni Jesucristo.

¹³ Jahará it'é xjan, ikjian tí xroon ts'ayéhérá jahará kixin choxínrá tí nkexro tjen tí xrankíxixín. A ntá jahará ntasoírá kjaxin ikjian tí xroon ts'ayéhérá jahará kixin kjuachará kixin kjuachahya tí Jínahya chrók'uetuanhanrá.

Ikjian tí xroon ts'ayéhérá jahará chánjanrá, kixin choxínrá It'eni.

¹⁴ A ntá jahará it'é xjan ikjian tí xroon ts'ayéhérá kixin ó choxínrá tí nkexro itjen tí xrankíxixín tí naxa t'ónahya chjasintajni. Ikjian tí xroon ts'ayéhérá jahará ntasoírá, kixin naxa fuérterá, la ko k'uayéhérá tí itén Dios, la ko kjuachará kixin kjuachahya Tsochren chrók'uetuanhanrá.

¹⁵ Chrótjuèhyará tí chjasintajni la ko ni tí nkehe síin chjasintajni. A ntá tí chojni tjuèhe tí chjasintajni, na mé chaxínhya tjuèhe sín It'eni Dios.

¹⁶ Kixin ninkehó tí nkehe chrókjuanjon chjasintajni chrókuixín tí tjen It'eni Dios. Tí nkehe tjinkaon tsjanjon chjasintajni na mé tíhi, mé tí nkehe jínahya chrókjuich'eni, la ko tí chrókjuak'e asénni tí nkehe ts'ikonni, la ko tí kjuahnke xrikoni kixin itsjé nkehe chróchóntani.

¹⁷ A ntá tí chjasintajni sítinkákjeje la ko tí nkehe jínahya tjenkayáxin chojni; a ntá tí nkexro nchexiteyá tí nkehe tóxrjínhin Dios mé ts'ejó sín jnkochrín.

Tí nkehe chaxín la ko tí nkehe kjuach'ia

¹⁸ Éxí xjanna t'íkuan tí jahará, la chrókónohará kixin ó kuichjina tí yaon tsjixixín. Jahará ó kuínhínrá kixin ó tsi tí nkexro nínkakonhen Cristo. A ntá ijie tinkákónoxín nchónhya tí sín a, mé noexínni kixin ó kuichjina tí yaon tsjixixín.

¹⁹ Jehé sín tsík'axrjekjanxín sín tí tjejóni; kjánchó chaxínhya kuinkáchónki sín éxí tinkáchónkini. Náhi. Tí chaxín chrókuinkáchónki sín éxí tinkáchónkini la chrók'uaxrjekjanxínhya sín tí tjejóni, naxa chrók'uejókoni sín jnkokoá. A ntá xíkaha kónhen k'uaxrjekjan sín kixin tsonoxín kixin kuinkáchónkihya sín éxí tinkáchónkini.

²⁰ A ntá jahará la Cristo tsíkjanjon Nchakuen ch'án tsík'ayéhérá kaín rá, ntá jie tiénxinrá intsí kuente ch'án.

²¹ Ikjian tí xroon ts'ayéhérá kixin ó nohará tí nkehe chaxín, jehya kixin chrókónoahyará; jahará la ó nohará kixin nijnko kjuach'ia tixínhya tí nkehe chaxín.

²² ¿Xá nkexro tí ch'ia? Mé tí nkexro ntáchro kixin Jesús la jehya tí Cristo. Tí nkexro a mé nínkakonhen Cristo, mé titekakonhya It'eni Dios la ko tí Xjeen ch'án.

²³ A ntá tí nkexro titekakonhya tí Xjeen Dios la kjaxin chóntahya sín tí It'é ch'án, a ntá tí nkexro chrónka kixin chóxin tí Xjeen Dios mé kjaxin chóxin sín tí It'é ch'án.

²⁴ Méxra tí nkehe tsíkinhínra tí xrankíxín la chróxráxinkáonra jnkochrín. A ntá xikaha tí chróxráxinkáonra jnkochrín tí nkehe tsíkinhínra tí xrankíxín, la kjaxin xikaha jnkokoá chrókuinkachónkirá tí Xjeen Dios la ko tí It'é ch'án.

²⁵ Kixin Jesucristo tsintácho ch'án kixin tsjanjon ch'án tí kjuachón jnkochrín.

²⁶ Méxra xikaha tjékjian tí xroon i ts'ayéherá kixin chrókónohará kuente tí sín tjinkaon chrókjuit'ayahará.

²⁷ Kjánchó jahará la ó chontará Nchakuen Dios tsítjehará Jesucristo, a ntá xikaha la í t'ichjánxinhya kixin ókjé nkexro chrókuakohará, kixin tí Nchakuen Dios mé tjakohará kaín xín nkehe, mé tjako tí nkehe jína la jehya kjuach'ia tíha. A ntá chaxín chrókuinkachónkirá Cristo éxí kjuako tí Nchakuen ch'án.

²⁸ A ntá jie éxí xjanna t'íkuan tí jahará, chrókuitoéhyará chrókuinkachónkirá Cristo, kixin tió tsi ch'án la antsí chróchoxínra ch'án la ko chrókósuàhyará chrókóchjinará tió tsi ch'án,

²⁹ kixin ó nohará kixin Jesucristo la jína ch'án. A ntá chrókónohará kixin kaín nkexro jína la xjeen Dios tíha.

3

Tí sín xjeen Dios

¹ Chrókónohará kixin It'éni Dios, imá tjuèhe tí jeheni kixin nchek'in ch'án xjeen ch'án tí jeheni, la mé chaxín jeheni tíha. Mé xikaha tí sín chjasintajni chónhya sín tí jeheni kixin jehe sin la xráxín chónhya sín Dios.

² Mé xikaha kichó ni, ó tsík'ónani xjeen Dios, a ntá naxa tjakoxinhya ch'án nkehe tsonhenni tí tsjixín. Kjánchó ó noheni kixin tió itsi Ìnchéni Jesucristo la ts'ónani éxí tí jehe ch'án, kixin ts'ikonni kixin nkexrí tjen tí jehe ch'án.

³ A ntá kaín nkexro tjejóchónhen tí tsi ch'án la chrókuítóhe sín ijé sín kixin tsotjóá sín kixin jehe ch'án la tjóá ch'án.

⁴ Kixin kain tí nkexro tjasin jie mé jínahya ch'e sín, kixin tió tjasin chojni jie la mé xikaha kuítékakonhya sín tí ley a.

⁵ Jahará ó nohará kixin Jesucristo kui chjasintajni kixin tsjatsen ch'án tí ijéni, a ntá jehe ch'án la ninkehó jie chóntahya ch'án.

⁶ Mé xikaha kaín tí sín chaxín tinkáchónki tí jehe ch'án la mé tjasinhya sín jie; a ntá kain tí sín tinkákjasin jie la tsík'ikonhya sín ch'án la ko xráxín chónhya sín ch'án.

⁷ Éxí xjanna t'íkuan tí jahará; méxra chrókuitoéhyará kixin ninkexró chrókjuit'ayahará; a ntá tí nkexro ch'e nkehe jína la jína ch'án, kixin Ìnchéni la jína ch'án.

⁸ A ntá tí nkexro xritjasin jie la mé kuente tí Jínahya; kixin tí Jínahya mé kjuankíxín kjuasin jie desde tí xrankíxín k'óna chjasintajni. Méxra tí Xjeen Dios mé kui chjasintajni kixin sinchek'itjáyan ch'án kaín tí xra kjuích'e tí Jínahya.

⁹ Nijnko tí chojni tsík'axrjeníxín Dios naxa chrónkákjasin jie, kixin ó chóna tí kjuachón kjuanjon Dios; la í xitjahya naxa chrókjuasin jie kixin ó tsík'óna xjeen Dios.

¹⁰ Mé xikaha tónoxín kixin nkexro tí xjeen Dios la ko nkexro tí xjeen tí Jínahya, kixin tí nkexro ch'ehya tí jína la ko tjuèhya kichó mé jehya xjeen Dios tíha.

Chrótjuèheni kíchó ni

¹¹ Méxra tí tan tsíkinhínra tí xrankíxixín mé tíhi, kixin chrótjuèheni kíchó ni.

¹² Chrókjuich'ehyani éxí kjuích'e ch'ín Caín, kixin jehe ch'án mé kuènte tí Jínahya, kixin k'óyán ch'án tí kíchó ch'án. ¿Nkekuènte kixin k'óyán ch'án? Kixin tí ch'ín Caín la tí nkehe jínahya kjuích'e ch'án, a ntá tí kíchó ch'án la kjuích'e ch'án tí nkehe jína.

¹³ Kíchóni, chróchrakonhyará tí nínkakonhanrá tí sín siín chjasintajni.

¹⁴ A ntá noheni kixin k'uatsínkani tí kjuach'én, a ntá kjuachón, mé noexínni tíhi kixin tjuèheni kíchó ni. Tí nkexro tjuèhya kíchó la éxí tsík'en sín xíkaha xritjejó sín.

¹⁵ Kaín tí nkexro imá nínkakonhen kíchó na mé chojni tjàya tíha, la ko ó nohará kixin ijnko chojni tjàya la xitjahya tsochónta kjuachón jnkochrín.

¹⁶ Ó noheni kixin nkexro tí tjuèheni, kixin Ìnchéni Jesucristo mé k'uenyákonhenni ch'án; kjaxin jeheni kjónté chrók'uenyákonhenni tí sín kíchó ni.

¹⁷ A ntá tí tjen ijnko nkexro rico t'íkon kixin ijnko tí kíchó ch'án t'ichjánxinhin nkehe, a ntá tí tsjinkítsahya tí kíchó, ¿a ntá nkexrí chrótjuèhe ch'án Dios kaín asén ch'án?

¹⁸ Éxí xjanna t'íkuan tí jahará, méxra chrótjuèxínhyani tí kíchó ni tí tan náxrjón chrónixjani ó. Náhi. Chrókjuakoxinni tí nkehe jína chrókjuich'eni.

Jína tsochjineheni tí tjen Dios

¹⁹ Tíha mé noexínni kixin chaxín ntoá tjejóni, a ntá chrókónoheni kixin chaxín tjejóni éxí tjinkaon Dios.

²⁰ A ntá tí tjoni asénni kixin chóntani ichrén jie, a ntá Dios la imá nohe ch'án la nohe ch'án kaín nkehe tónhen asénni.

²¹ Mé xíkaha kíchó ni, tí tjohya asénni kixin naxa ichrén nkehe jínahya tjenkayáxinni, a ntá antsí jína tsochjineheni tí tjen Dios,

²² a ntá jehe ch'án tsjanjon ch'án kaín nkehe tsjancheheni ch'án, kixin nchexiteyéheni tí nkehe k'uetōan ch'án la ko ch'eni tí nkehe tóxrjínhin ch'án.

²³ Tí nkehe tsík'etōan ch'án la mé tíhi kixin chrókuitekaonni tí Xjeen ch'án Jesucristo, la ko chrótjuèheni kíchó ni éxí k'uetōan ch'án.

²⁴ Tí nkexro nchexiteyéhe tí nkehe k'uetōan ch'án mé tjejóko tí jehe ch'án, la ko jehe ch'án tjen tí tjejó sín. Tíhi mé noexínni kixin jehe ch'án tjejókoni ch'án kixin tí Nchakuen ch'án tsíkjanjon ch'án.

4*Tí Nchakuen Dios la ko tí nchakuen tí nkexro nínkakonhen Cristo*

¹ Kíchóni, chrókuitekákonhyará kaín tí sín ntáchro sín kixin Nchakuen Dios mé nixjaxin tí jehe sín. Náhi. Chrótsjehérá tí nkehe ch'e sín kixin chrókónohará kixin á chaxín chónta sín Nchakuen Dios o náhi, kixin tí chjasintajni la ixri nchónhya chojni ch'ia, ntáchro sín kixin nixja sín tí itén Dios.

² A ntá xíkaha mé chrókónoaxínra kixin á chaxín chónta sín Nchakuen Dios kixin kaín tí sín chaxín titekaon sín kixin Jesucristo ikui éxí chojni mé chónta sín Nchakuen Dios.

³ A ntá tí nkexro titekakonhya kixin xíkaha tsíki Jesús, na chóntahya sín Nchakuen Dios. Náhi. Chónta sín tí nchakuen tí nkexro nínkakonhen Cristo. Jahará ó kuínhínra kixin itsi tí nchakuen a, a ntá jie ó tsíki chjasintajni.

⁴ T'íkuan tí jahará éxí xjanna, kixin jahará la ó titekáonra Dios, a ntá kjuachará kixin kjuachahya tí sín ch'ia chrók'uetōan, kixin tí nkexro tjejókoará la imá t'etōan, a ntá tí nkexro t'etōan chjasintajni la kánhyó t'etōan.

⁵ Kíxin jehe sín la kuènte chjasintajni ó, méxra nixja sín tí nkehe kuènte chjasintajni ó. A ntá tí chojni kuènte chjasintajni ó mé tjejótinhin sín.

⁶ A ntá jeheni mé xjeen Dios. A ntá tí sín chóxin Dios mé tjejótinhin sín tí nkehe tjakoni. A ntá tí nkexro chónhya Dios mé tjinkakonhya sín chrókuinhin sín tí nkehe tjakoni. A ntá tíha mé tjatsoanxínni nkexro chónhta tí Nchakuen tí nkexro chaxín la ko nkexro chónhta tí nchakuen tí nkexro xrich'ia.

Dios mé tjuèheni

⁷ Kíchóni, méxra chrótjuèheni kíchó ni, kixin tí tjuèheni kíchó ni mé tixín tí tjen Dios. Kaín nkexro tjuèhe kíchó mé xjeen Dios, la ko chóxin Dios.

⁸ A ntá tí nkexro tjuèhya kíchó na mé chónhya Dios kixin Dios la xráxin tjuèhe chojni.

⁹ Dios la ó kjuakoxín ch'án kixin tjuèhe tí jeheni kixin tsíchr'án ch'án tí jnkokoá Xjeen ch'án chjasintajni kixin tsochóntaxínni kjuachón tí jehe ch'án.

¹⁰ A ntá tí tjuèheni Dios la mé tíhi: jehya kixin jeheni k'uetjuèheni tí jehe ch'án. Náhi. Jehe ch'án mé xráxin tjuèhe ch'án tí jeheni, a ntá ichr'án ch'án xjeen ch'án k'uenyákonhenni kixin tsotjuáxin tí jie chóntani.

¹¹ Kíchóni, a ntá tí xikaha Dios tjuèhe tí jeheni, a ntá kjaxinni jeheni xikaha chrótjuèheni kíchó ni.

¹² A ntá Dios la ninkexró k'uikonhya. Kjánchó tí chrótjuèheni kíchó ni la Dios ts'ejókoni ch'án, a ntá tsjinkítsa ch'án kixin chaxín tsotjuèheni kíchó ni.

¹³ Tíhi mé noexínni kixin tjejókoni Dios la ko jehe ch'án tjejóko tí jeheni kixin tsíkjanjon ch'án tí Nchakuen ch'án chóntani.

¹⁴ Jeheni mé k'uikonxín konni la mé chrónkaxínni kixin It'éni Dios tsíchr'án ch'án Xjeen ch'án kixin tsaáxin chojni síin chjasintajni.

¹⁵ A ntá jnkojín nkexro titekaon la ko chrónkaxín kixin Jesús mé Xjeen Dios mé tjejóko Dios la ko Dios mé tjejóko tí jehe sín.

¹⁶ Mé xikaha mé noexínni la ko titekaonni kixin Dios la tjuèhe tí jeheni. Dios mé xráxin tjuèhe chojni, a ntá tí nkexro tjuèhe Dios mé tjejóko Dios la ko Dios tjejóko tí jehe sín.

¹⁷ Mé xikaha chaxín chrótjuèheni Dios kixin ntá chróchrakonhyani tí yaon tsitoexín ijíeni kixin ó noheni kixin Jesucristo la tjuèheni ch'án la ko jeheni la kjaxin tjuèheni tí jehe ch'án.

¹⁸ Kíxin tí tjuèheni Dios la kohya kjuachrakon. Tí chaxín tjuèheni Dios la tíha mé tsakítsje tí kjuachrakon. A ntá chojni chrakon mé chaxín tsjasóte. A ntá jnkojín chojni chrakon la mé chaxínhya tjuèhe Dios.

¹⁹ A ntá jeheni la tjuèheni Dios kixin jehe ch'án senó tjuèhe ch'an tí jeheni.

²⁰ A ntá jnkojín nkexro ntáchro kixin jehe mé tjuèhe Dios, a ntá tuénxín nínkakohen kíchó mé kjuach'ia xriko. Tí tjuèhya ch'án tí kíchó chóxin ch'án, la kjaxin xitjahya tsotjuèhe Dios kixin tsík'ikonhya ch'án Dios.

²¹ Tíhi mé tsík'etōan Jesucristo kixin tí nkexro tjuèhe Dios la mé kjaxin chrótjuèhe kíchó.

5

Tí tinkáchónkini Dios la tsjachahya tí chjasintajni

¹ Kaín nkexro titekaon kixin Jesús mé tí Cristo la jehe mé tsík'axrjeníxin Dios; a ntá tí nkexro tjuèhe tí it'é tí xjan mé kjaxin tsotjuèhe tí xjeen tí nkexro a.

² A ntá tí tjuèheni Dios la ko nchexiteyáni tí nkehe t'etōan ch'án, a ntá noheni kixin kjaxin tjuèheni tí sín tsík'óna xjeen Dios.

³ Tí tjuèheni Dios la t'ichjánxin kixin chrókuitekaonni tí nkehe k'uetōan ch'án, kixin tí nkehe t'etōan ch'án la jehya ijnko nkehe imá xra

⁴ Kíxin kaín chojni tsík'óna xjeen Dios tsjacha, la ntá tí chjasintajni la náhí. A ntá tí tinkáchónkini Ìnchéni la mé tsjachaxinni la tsjachahya tí chjasintajni.

⁵ A ntá tí sín tinkáchónki kíxin Jesús mé tí Xjeen Dios mé tsjachahya tí chjasintajni ts'etuenhen sín.

Tí nkehe chrónkaxín nkexrí tjen tí Xjeen Dios

⁶ Tió kui Jesucristo la kjuakoxin tí ìntà la ko tí jni. La jehya kíxin jehó tí ìntà kjuakoxin ch'án. Náhí. Kjaxin ìntà la ko ijni kjuakoxin ch'án. A ntá tí Nchakuen Dios mé chrónkaxín tíha, kíxin tí Nchakuen Dios la chaxín ntoá.

⁷ Síin iní nkexro chrónkaxín nkaya nkajni: ijnko la It'éni, la ijnko la tí Palabra, la ijnko la tí Nchakuen ch'án. Tíha mé iní, kjánchó jnkokoá nkexro tíha.

⁸ A ntá síin iní tí nkehe chrónkaxín ntihi chjasintajni, mé tí Nchakuen Dios, la ko tí ìntà la ko tí jni; a ntá tí iní mé jnkokón chrónka.

⁹ ¿Á chrókuitekaonni tí nkehe chrónka chojni ó? A ntá tí nkehe tsíchrónka Dios, antsí má tjetoon kíxin táha la Dios tsíchrónkaxín kíxin nkexrí tjen tí Xjeen ch'án.

¹⁰ Tí nkexro titekaon tí Xjeen Dios na mé asén ó tónoexín tíha. A ntá tí sín titekakonhya sín Dios, la ntáchro sín kíxin Dios la ch'ia ch'án kíxin kuitekakonhya sín tí nkehe tsíntáchro Dios kíxin nkexrí tjen Xjeen ch'án.

¹¹ Tí nkehe tsíchrónka Dios mé tíhi kíxin tsjanjon ch'án kjuachón jnkochrín, a ntá tí kjuachón mé chóna tí Xjeen ch'án.

¹² A ntá tí nkexro chóna tí Xjeen Dios mé kjaxin chóna kjuachón; a ntá tí nkexro chónahya tí Xjeen Dios la mé chónahya kjuachón.

Chrónkaxín nkehe kuènte kjuachón

¹³ Tí nkehe mé kjinni kíxin jahará ó títekáonrá tí Xjeen Dios, kíxin mé tsonoaxínrá kíxin chaxín chontará kjuachón jnkochrín.

¹⁴ Tíhi mé chóxixínni Dios kíxin noheni kíxin ichrén nkehe tsjancheheni ch'án éxi tjinkaon ch'án la jehe ch'án la tsinhin ch'án.

¹⁵ A ntá tí xikaha ó noheni kíxin Dios tjetinhin tí nkehe nixjeheni ch'án, a ntá kjaxin ó noheni kíxin ó chóntani tí nkehe kjuancheheni ch'án.

¹⁶ A ntá jnkójnra ts'ikonra ijnko kíchuára tjasin jie, a ntá tí jehya ijnko jie chrók'uenxín ch'án, la chrókjuancheherá Dios kíxin chrókjuinchexraxinkaon ch'án kíxin kjuasin ch'án jie, a ntá Dios chrókjuanjon ch'án kjuachón, tí chaxín jehya ijnko jie chrók'uenxín chojni. A ntá tí jie chrók'uenxín chojni la ntáxrjan kíxin íchá jína chrókjuanchehyará Dios kíxin chrókjuinkítsa tí ch'ín a.

¹⁷ Kaín nkehe jínahya la ijie tíha. Kjánchó síin jie ts'énxínhya chojni.

¹⁸ Ó noheni kíxin tí nkexro tinkáchónki It'éni Dios tjasinhya sín jie, kíxin tí Xjeen Dios tjinkítsa tí jehe sín, a ntá tí Jínahya tsjachahya tsjachroe tí jehe sín.

¹⁹ Ó noheni kíxin Dios t'ayakonhen tí jeheni, a ntá tí Jínahya chóna kjuachaxin t'etuenhen kuenté chjasintajni.

²⁰ Ó noheni kjaxin kíxin Xjeen Dios kui, la ko kjuínkítsa ch'án tí jeheni kíxin chrókónoheni nkexrí tjen Dios chaxín. A ntá tjejókoni jnkokoá tí nkexro chaxín, tíha mé Jesucristo tí Xjeen Dios. Tíha mé Dios chaxín, la tsochóntaxínni ch'án kjuachón jnkochrín.

²¹ Éxi xjanna t'íkuan tí jahará, la tjtóherá tí dios tsíkjanoya. Amén. Ó tjen.

Yóxin xroon tsíkjin ch'ín Juan

¹ Janhan mé ijnko nkexro ó táda t'ayakonhen n̄inko mé ikjian tí xroon ts'áyéhe tí sín tsíkjeýá Dios tójnkotsé sín ntiha, la mé chaxín tjuahá sín: a ntá jehya janhván, la kjaxin kaín tí sín chóxin tí tan chaxín.

² Tjuahará tí jahará kixin tí tan chaxín ó chóna asénni, tíha mé ts'ejókoni jnkochrín.

³ It'éni Dios la ko Ìnchéni Jesucristo mé Xjeen Dios chrókjuintayaonrá ch'án la ko chrókuiikonóahará ch'án la ko chrótjáhará ch'án kjuaxróxin kixin chaxín tjuahará ch'án.

⁴ Imá chàna k'uíkuañ kixin isorá tjejorá titekáonrá tí nkehe chaxín, éxi tsík'etoan It'éni Dios.

⁵ A ntá jie jahará kichó ni, xrjanóahará kixin chrótjuèhéra kichuára. Méxra xikaha tjékjian tí xroon i, la jehya ijnko nkehe n̄ixin tsík'etoan Dios. Náhi. Tíha la mé tí nkehe tsík'áyéheni tí kjuák'e Ìnchéni Jesucristo.

⁶ A ntá tí tjuèheni kichó ni la mé tíhi kixin chrók'uejóni éxi tsík'etoan Dios; a ntá tí nkehe tsík'etoan Dios la mé ó tsíkinhínra jahará tí senó kixin chrótjuèheni kichó ni.

Tí chojni xrich'ia

⁷ Nchónhya chojni chjasintajni xrich'ia sín titekakonhya sín kixin Jesucristo kui k'óna chojni. A ntá tí chojni xikaha mé ixri xrich'ia la ko nínkakonhen Cristo.

⁸ Chrókóxakonhanrá kixin chrók'uitjáyanyha tí xra kjuich'erá kixin naxa chrók'uayéhéra tí nkehe tsjintaxín ts'ayéhéra.

⁹ A ntá tí siín ijnko nkexro kuítóhe tí nkehe kjuako Cristo ntá kjuichroe la mé chónahya sín Dios; a ntá tí nkexro títoehya tí nkehe kjuako Cristo mé chóna sín It'éni Dios la ko tí Xjeen ch'án.

¹⁰ A ntá jnkojín sín chrókjuijitsjehe tí jahará, a ntá ntoáhya chrókjuako sín, la chrókjuánjonhyará kjuachaxin chrókuitohe tí sín a ntóará la ko ni chrónixjeéhyará sín jnkojína.

¹¹ A ntá tí nkexro tsonixjehe tsontáchro kixin: “¿Á jína k'uinka?” na mé éxi tóxrjínhin sín tí nkehe jínahya ich'e tí sín a.

Tí tan tsjixixín

¹² Chonta nchónhya nkehe chrókuinhínra jahará, kjánchó tjínkakonhya chrókjian xroon ó. Náhi. Tjínkavan kixin tjoka chrókjuasántsahará tí jahará tsonixjahará kixin chrókjuintaxín chrókóchéheni.

¹³ Tí sín kichuára tójnkotsé kuénte n̄inko ntihi, mé tí sin kjaxin tsíkjeýá Dios, mé nixjahará sín. Amén. Ó tjen.

Tí níxin xroon tsíkjin ch'ín Juan

¹ Janhan mé tí nkexro t'ayakonhen nínko mé tjékjian tí xroon ts'áyéhe tí ch'ín choxian, mé tí ch'ín Gayo tí ch'ín chaxín tjuaha.

² Kíchóni, tjáncháha Dios kixin éxi jaha jína tjen tinkachónkia Ìnchéni la jína chrók'uaxrje kaín xra ch'e la ko jína chrókjuak'e jaha.

³ Imá kóchàna tió kui iso tí sín kíchó ni chrónka sín kixin jína tjákoxian tí tan chaxín.

⁴ Kohya ijnko nkehe antsí má nchechàna éxi tió kuínhan kixin tí sín t'íkuan éxi xjanna tjejóititekaon sín tí tan chaxín

⁵ Kíchóni, chaxín jína tjech'e xra tjínkítsa tí sín kíchó ni la ko antsí tjínkítsa tí sín tsíkjin ókjé chjasin.

⁶ A ntá tí tsíkójkotsé tí sín kíchó ni la tsíchrónka sín kixin nkexrí tjuèhé tí jehe sín. Jaha chrókjuínkítsa tí nkehe t'ichjánxin sín tí sátsji sín. Xikaha mé tóxrjínhin Dios.

⁷ Tió sákjuí sín kjuankíxin sín chrónka sín itén Ìnchéni la chrohya sín chrók'uáyéhe sín ninkehó nkehe kuènte tí sín chónhya Dios.

⁸ Méxra tí jeheni t'ichjánxin chrókjuinkítsani tí jehe sín kixin tsjacha sín tsochrónkaxín sín tí tan chaxín ntoá.

Ntoáhya kjuako ch'ín Diótrefes

⁹ Janhan ikjian ijnko xroon k'uáyéhe tí sín tójkotsé ntiha. Kjánchó ch'ín Diótrefes kuítekakonhya ch'án tí nkehe k'uètuènhenni ch'án kixin tjinkaon ch'án chrók'uètoan ch'án jehó ch'án.

¹⁰ Méxra xikaha tí sátsjia ntiha tsonixjaha ch'án kixin tí kjuach'ia ntáchro ch'án t'ántaxínhin ch'án tí jeheni. Jehya táhó ich'e ch'án. Kjaxin tjanjonhya ch'án kjuachaxín ts'ejó tí sín kíchó ni tjiji; a ntá tí sín tjinkaon chrókjuanjon kjuachaxin la t'ètoan ch'án kixin tsjanjonhya sín kjuachaxin la ko t'ètoan ch'án kixin tsochjinahya sín tí tójkotsé tí chojni.

¹¹ Kíchóni chrókjuákoxinhya tí nkehe jínahya. Íchá jína chrókjuákoxian tí nkehe jína. Tí nkexro ich'e nkehe jína na mé kuènte Dios. A ntá tí nkexro ich'e nkehe jínahya la mé tsík'ikonhya sín Dios.

Jína tjákoxin tí ch'ín Demetrio

¹² Kaín sín ntáchro sín kixin jína tjákoxin tí ch'ín Demetrio la mé chaxín tíha. Kjaxin tí jeheni chrónkani tíha la ko jahará ó nohará kixin tí nkehe ntoá chrónkani.

Kjuixixín nixja ch'án

¹³ Janhan chonta nchónhya nkehe tsontáxrjan, kjánchó tjínkakonhya tsokjian ó

¹⁴ kixin tjínkavan tjoka ts'íkuan tí jaha, a ntá tsjoni.

¹⁵ Kjuaxróxin chrókjuak'e jaha. Kaín nkexro choxian ntihi nixjaha sín. Tétuanhan nixjehé jnkojnko tí sín chóxinni.

Tí xroon tsíkjin ch'ín Judas

¹ Janhan Judas, t'ahā xra Jesucristo, la sana mé Jacobo la mé ikjian tí xroon í ts'áyéhe tí sín tsíkjeýá It'éni Dios tsíkjinchetjóá ch'án kixin tsinkáchónki sín ch'án. Mé xikaha Jesucristo t'ayakonhen ch'án tí jehe sín.

² Imá kuikonóahará ch'án ntá ts'ayéherá kjuaxróxin kixin tjuahará ch'án.

Tí sín ntoáhya tjako

(2 Pedro 2.1-17)

³ Kíchóni, imá tjínkavan tsokjian tí xroon ts'ayéherá tsochrónka nkexrí tsaáxinni kaín ni. A ntá t'íkuan kixin t'ichjánxin tsokjian tí xroon ts'ayéherá tsoxrjanóaxínrá kixin jína chrókiénxinrá nkehe chrókjuáteherá kixin nkexrí tinkachónkirá Ìnchéni kixin tí fe la mé ónaá tsík'áyéhó tí sín tsíkjinchetjóá Dios.

⁴ A ntá jie ó kuik'ixenhen iso sín ch'ia tí tjejorá. A ntá ósé nixja xroon itén Dios kuènte tí sín a kixin tsjasóte sín. Jehe sín la chojni jínahya ntá ntáchro sín kixin tinkáchónki sín Dios la ó ch'iaxón sín ntá imá tjasin sín jie. La titekakonhya sín Dios, jehó t'etoan, la ko titekakonhya sín Ìnchéni Jesucristo.

⁵ Jahará kjónté ó nohará la jehí tjínkavan sintaxráxinkáonrá inaá kixin Ìnchéni Dios kuakitsjexín ch'án Egipto tí sín chjasin Israel, ntá kjónté xikaha la chr'éxin kjuínchek'itjáyan ch'án tí sín kuítekakonhya sín tí jehe ch'án.*

⁶ Kjaxin tí sín ángel kuítekakonhya sín tí k'uetōan Dios ntá kuítóhe sín tí kjuachaxin tsíkjanjon Dios tsík'áyéhe sín la ko kuítóhe sín tí k'uék'ejó sín jína, a ntá jie Dios k'uetōan ch'án kixin ts'ejóchjina sín tí sítié la ts'ejóchónhen sín tsijia tí yaon tsitoexín ijje sín.

⁷ Kjaxin tí sín chjasin Sodoma la ko tí sín chjasin Gomorra la ko tí sín chjasin chjinaxón kóyóhe sín tí sín ángel kuítekakonhya la kjuasinko sín jie chojni chjin ókjé la ko kjuasinko sín jie kíchó sín kjónté jnkokón ntoá sín. Tíha mé chróxaxinkakonxín kaín chojni kixin nkexrí tsonhen tí sín titekakonhya tsjasótexín sín tí xrohi jnkochrín ts'ankahya.

⁸ Méxra kjaxin tí chojni a kotáchrién sín tsík'ikonxín kixin ó nchoxon chrókjuasinko sín jie chojni chjin ókjé la ko chrókuítekakonhya sín tí kjuachaxién Ìnchéni la ko chrók'uántaxínhin sín tí sín ángel chóna kjuachaxin t'etoan.

⁹ A ntá tí ch'ín arcángel Miguel kjuánjonko ch'án tí ch'ín Tsochren la ko ikjo sín kjuánjonxin sín nkehe tsonhen tí cuerpo kuènte ch'ín Moisés.† A ntá jehe ch'án kjónté xikaha la kjuínchekjasótehya ch'án tí ch'ín Tsochren. Jehó ntáche ch'án kixin: “Ìnchéni mé tsjentuáha tí jaha.”

¹⁰ A ntá tí chojni i t'ántaxínhin sín tí nkehe tienxínhya sín la tjenkayáxin sín éxí ko tienxínhya nchexiteyéhe tí nkehe ntáchro asén, mé xikaha tí nkehe jínahya kjuích'e sín ts'itjáyanxín.

¹¹ jNòa tí jehe sín! Chréhe sín éxí kjuích'e ch'ín Caín.‡ Tjinkaon sín chrókjuacha sín chichaon ntá ntoáhya kjuích'e sín éxí kjuích'e Balaam, la ko its'en sín éxí ik'uén ch'ín Coré kixin kuítekakonhya sín.§*

¹² Ijnko kjuatósuèhe kixin tjejóyákjanxín sín tí síin kia náxrjón chontará, kixin tjejóne sín la ko tjejót'i sín chéhe sín la kjónté xikaha la ninkehó kjuasáya chóntahya sín. Tjejó sín éxí tí sín t'ayakonhen kolélo kjánchó jehe sín t'ayakonhen sín asén sín ó. Jehe sín la éxí tjuí chóntahya ntá tjakáko xrinto; la

* 1:5 Éxodo 12.51 Números 14.29-30 † 1:9 Deuteronomio 34.6 ‡ 1:11 Génesis 4.3-8 § 1:11 Números 31.16 * 1:11 Números 16.1-3

ko éxí ijnko nta t'ónahya to tí nitjó chrók'óna to, éxí yáya tsík'en tsík'axrjenkíxin nuèé.

¹³ Jehe sín na mé éxí ntayaon jiehe síxróji lóxrjo ó chóntahya nta jína mé xikaha chónkó tí nkehe ch'e sín mé ijnko kjuatósuehë tíha; la ko éxí konotsé kjuíchroe sákjuí ókjé; a nta tjechónhen sátsji sín tsjasóte sín sítié jnkochrín.

¹⁴ A nta kjuák'e ch'ín Adán, a nta yatoxin chr'éxin kui ch'ín Enoc nixjaxin kjuachaxiën Dios ntáchro ch'án kixin k'uíkon ch'án itjen Ìnchéni kuikao nchónhya mil tí sín ángel kuènte ch'án,

¹⁵ kixin sinchekitoexin ch'án ijie kaín tí sín jínahya kixin kaín tí jínahya kjuích'e sín la ko kaín nkehe k'uénixja tí sín jínahya k'uántaxínhin sín tí jehe ch'án.

¹⁶ Xráxín tóxrjienhya sín nkehe sítónhen la ko ixri sín tjonta kíchó sín. Jehó xritjeyá sín tí nkehe tóxrjínhin sín tjenkayáxin sín. Ihnke sín nixja sín la ko itjo sín jína chojni kixin nta tí sín a chrókjuinkítsa jehe sín.

Nchexraxinkaon ch'án tí sín tinkáchónki Cristo

¹⁷ A nta jahará kíchó ni, xráxinkáonrá kixin tí sín tsíkjeyá Ìnchéni Jesucristo

¹⁸ ntáchro sín kixin tí yaon tsjixín tsjejexin chjasintajni ts'ixin chojni tsitekakonhya sín ts'ántaxínhin sín tí nkehe tjinkaon Dios la ko tsotjinkaon sín sinchexiteyehë sín tí nkehe jínahya ntáchro asén sín ó.

¹⁹ Tí sín a mé tjinkaon ts'óxika tí sín jnkokoá tjejótojnkotsé kixin naxa tóxrjínhin sín sich'e sín nkehe siín chjasintajni kixin chóntahya sín Nchakuen Dios.

²⁰ A nta jahará kíchó ni tjuahará, antsí jína chrók'uejorá tinkachónkirá Ìnchéni. Chrónixjeexínrá Dios tí kjuachaxin kuènte Nchakuen ch'án.

²¹ Jína chrók'uejorá kixin tjuahará Dios ts'ejochonhénrá tí yaon tsokjan Ìnchéni Jesucristo kixin kjuasáyé ch'án tsotjáhará ch'án kjuachón jnkochrín.

²² Chrókuikonóehérá tí sín naxa tienxínhya.

²³ Jnkojín sín chrókjuinchekaará chrókuakitsjekjanxínrá sín chríkjan xrohi, la ko chrókuikonóehérá í so sín kjánchó chróchontará cuidado tí jehe sín kixin kjónté ti iké sín kjaxin chóna jie.

Tjanchia ch'án kjuasáya

²⁴⁻²⁵ Jnkokoá Dios tjen mé imá nohe ch'án la ko sinchekaáni ch'án la chóna ch'án kjuachaxin ts'ayakonhenni ch'án kixin chrókjuasinhyani jie la ko tió tsjijini tí tjen ch'án la ninkehó jie chróchóntahyani, imá tsöchéheni tí tjen ch'án ntiha. Kjuasáyé Dios imá chóna ch'án kjuachaxin t'etqan ch'án la ko kjuínchekaáni ch'án kjuachaxin Ìnchéni Jesucristo. Jehe ch'án jnkochrín tjen ch'án chóna ch'án kénxín kjuachaxin. Amén. Ó tjen.

Tí nkehe chrónka Jesucristo k'uíkon ch'ín Juan

¹ 18

Kaín tí nkehe i mé chénka Dios Jesucristo kixin jehe ch'án tsochénka tí sín ch'ehe ch'án xra tí nkehe tjoka tsonhen. Ntá Jesucristo kjuínchenohe ijnko ángel kuènte ch'án kixin nkexrí chrókónohe tí ch'ín Juan ch'ehe ch'án xra.

² A ntá jehe ch'án mé k'uítuenhen ch'án ntá chrónkaxín tí nkehe chaxín tsíntácho Dios la ko tí nkehe chrónka Jesucristo la ko kaín tí nkehe tsík'ikon ch'án nkexrí kjuakoxin Dios.

³ Náxrjón tjejó tí sín nchekuáxin tí xroon i la ko kjaxin tí sín tjejótinhin tí palabra chrónka nkehe tsonhen la ko tóxrjínhin sín titekaon sín nkehe nixja tí xroon i kixin ó kuichjina tí hora tsoxiteyá tíha.

Ch'ín Juan ikjin ch'án xroon ts'áyéhe tí yato nínko

⁴ Janhan Juan ikjian tí xroon tsochr'anhan tí yato nínko tjejó estado Asia. Jahará chrók'uayéhérá kjuasáyé Dios la ko kjuaxróxin. Jehe ch'án mé itjen ch'án la ko xráxin tjen ch'án la ko jehe ch'án mé xiki ch'án inaá la ko kjaxin tí yato Nchakuen ch'án tjejó tí trono t'etoxín ch'án mé tjanjon kjuaxróxin.

⁵ La ko kjaxin kjuasáyé Jesucristo. Jehe ch'án chaxín chrónka kaín nkehe ntoá la ko jehe ch'án mé xrankíxín xechón kjónté tsík'en kixin tjetoan ch'án kixin t'etuenhen ch'án kjónté kaín tí sín rey la ko tí sín t'etoxin siín chjasintajni. Jehe ch'án mé tjuèheni ch'án la ko tí ijnié ch'án mé k'uíjmáxinni kaín tí jie chóntani.

⁶ Jehe ch'án mé tsíkjanjon kjuachaxin tsík'ónani nchát'á kixin sich'eheni xra It'éni Dios. Tí kjuachaxin kuènte ch'án me ts'etoxin jnkochrixín. Mé xikaha tsoxiteyá. Amén.

⁷ Ts'ikon chojni kixin Cristo la ó tsi chríkjan tjuí. Kaín chojni ts'ikon ch'án la ko kjaxin tí sín k'uékónínkakohenen tí jehe ch'án tsíkjinchekjasóte sín ch'án mé ts'ikon sín ch'án la ko kaín chojni chjasin siín chjasintajni tsotsjánka sín tió ts'ikon sín tí jehe ch'án. Mé xikaha tsonhen. Amén.

⁸ Janhan mé tí xrankíxín la ko tí tsjixín éxí tí letra xrankíxín A la tsjixín Zeta. Mé xikaha ichro Ìnchéni Dios, tí nkexro imá t'etoxin. Jehe ch'án mé itjen ch'án la ko xráxin tjen ch'án la ko jehe ch'án mé xiki ch'án inaá.

Ch'ín Juan tsík'ikon ch'án kixin Cristo chónka kjuachaxin

⁹ Janhan Juan mé ijnko kichó tí jahará mé tjékian Jesús la ko tí kjuachaxin kuènte Dios chonta la mé jahará la ko jeheni jnkokón tjejójtjasóteni la jehe ch'án tjinkitsani kixin tsjachani. Kjuákua itén Dios éxí chrónka Jesucristo la mé tíha kjuak'échjinaxián tí isla it'in Patmos.

¹⁰ A ntá ijnko yaon xraxinkakonxinni Ìnchéni la ikui kjuachaxin Nchakuen Dios tí tjén tí janhan la kuínhan kixin nóton tí janhan ijnko nkexro nixja imá itsen éxí itén ijnko trompeta.

¹¹ Mé ntácho ch'án kixin:

—Janhan mé tí xrankíxín la ko tí tsjixín éxí tí letra xrankíxín A la tsjixín Zeta. Mé tsokjian jaha ijnko xroon kaín tí nkehe k'uíkuan kixin tsochr'enhén tí yato nínko tjejó tí estado Asia na mé tí nínko tjen chjasin Éfeso, la Esmirna, la Pérgamo, la Tiatira, la Sardis, la Filadelfia, la ko Laodicea —ichro ch'án.

¹² Ntá nkátjía tsjaha kixin nkexro itén tí tjenixjana ntá xrínahya k'uíkuan yato candelero tsík'óna chica oro.

¹³ A ntá chríkjan tí yato candelero k'uíquuan ijnko nkexro éxí yóhē Xjeen Dios tsík'óna chojni. Ntá tí iké ch'án la ika kjínjin tjenkáya ch'án hasta tsíkóyóhē toté ch'án la ko mé chóna ijnko cinta jehó oro tjenkáni ntakuin ch'án.

¹⁴ Tí kaxihí ch'án la tjóá éxí kaxree kolélo tjóá o éxí chrinta tsjehe la ko tí ikon ch'án la éxí xrohi nene tsjehe.

¹⁵ Ntá tí toté ch'án la éxí chica sine tjákini na ntá tsík'axrjexín tja. A ntá tí itén ch'án la itsen éxí tóvéntó nchónhya ntarío.

¹⁶ A ntá tí tja ch'án chjina mé chóna yato konotsé. A ntá tí ir'va ch'án k'uaxrjexín chica espada iyo, yánjin taté. A ntá imá tjákini tsjehe ikon ch'án la éxí yaon t'inkaséyanxín imá.

¹⁷ A ntá tí k'uíquuan xikaha la kjuáchr'ítsinka toté ch'án éxí tsík'éna. A ntá jehe ch'án kjuak'etja tja ch'án chjina chrítaón tí janhan ntá nixjana ch'án ntáchro ch'án kixin:

—Chrakonhya jaha. Janhan mé tí xrankíxixín la ko tí tsjixixín.

¹⁸ Janhan tí nkexro tjechón. Ik'uén, a ntá ijie la tjéchuān inaá la itjén jnkochrín. Amén. Janhan chonta llave kuente chojni its'en la ko kuente tí siín tí sín tsík'en.

¹⁹ Méxra ikjian jaha tí nkehe k'uíquuan mé tí nkehe siín ijie la ko tí nkehe tsonhen chr'éxin.

²⁰ Ninkexró k'uékiénxínhya nkexrí t'axrjexín tí yato konotsé k'uíquuan chonta tjana chjina, la ko tí yato candelero tsík'óna chica oro. Mé tí yato konotsé t'axrjexín kixin tí yato ángel t'ayakonhen tí yato nínko la ko tí yato candelero k'uíquuan me kjaxin t'axrjexín tí yato nínko.

2

Tí tan k'uáyéhe tí yato nínko: Tí tan k'uáyéhe tí sín chjasin Éfeso

¹ Tsokjian tí nkehe ts'áyéhe tí ángel t'ayakonhen tí nínko Éfeso: “Xikaha ichro tí nkexro chóna yato konotsé itja ch'án chjina la ko xritjak'e ch'án jnkosiné tí yato candelero tsík'óna oro. Ntáchro xikihi:

² Janhan nóna kaín tí xra ch'erá la ko nóna kixin tóxrjánhyará tí sín jínahya. Janhan la ó nóna kixin kjuich'erá prueba tí sín ntáchro kixin apóstol tí jehe sín la ntá jehya la ntá kónoxín kixin xrich'ia tí jehe sín.

³ Nchónhya kjuasótiará la kjónté chonhénra kóninkákonhyará la imá kjuich'erá xra kixin tinkachónkirá nina la ko nunca kóxrjéhyará.

⁴ Kjánchó tjánchía ijnko jie tí jahará kixin tinkachónkihyará éxí kjuankíxixínra k'uétjuanará.

⁵ Méxra chróxráinkáonra kixin ó kuitohérá tí k'uétjuanará la ntá chrókjuínkirá tí nkehe tjenkayáxinra la ko chrókjuich'erá xra éxí tí kjuankíxixínra. A ntá tí náhi, la tjoka tsjasán la tsjakíyan tí candelero tí tjejorá tí nunca tsjínkíhyará tí nkehe jínahya tjenkayáxinra la tí tsokjanhyará tsoxráinkáonra Dios.

⁶ Kjánchó chrókónohará kixin tóxrjina tí nkehe tjejoch'erá kixin tóxrjánhyará tí xra ch'e tí sín nicolaítas kixin kjaxin janhan nínkakonhan tí nkehe ch'e sín.

⁷ Tí nkexro tjinkaon chrókuinhin la chrókuinhin sín tí nkehe nixjehe Nchakuen Dios tí nínko ntáchro kixin: Tí sín tsjacha sinchexiteyàna sín la tsotjahá sín kjuachaxin sine sín tí to t'óna tí nta tjanjon kjuachón itjen tí tjen Dios.”

Tí tan k'uáyéhe tí sín chjasin Esmirna

⁸ Ikjian tí nkehe ts'áyéhe tí ángel t'ayakonhen tí nínko Esmirna: “Xikaha ichro tí nkexro xrankíxixín la tsjixixín, mé tí nkexro ik'uén la ntá jie tjechón:

⁹ Janhan la ó nòna kaín nkehe tjejoch'erá. Ó nòna kixin nkexrí tjejótjasótiará la ko ó nòna kixin nòará kjánchó jehya. Náhí. Jehe sín mé tójkotsé sín tí nínkoé tí Jínahya.

¹⁰ Kjánchó chrakonhyará kjónté tsjasótiará. Tí ch'ín Tsochren tsochr'ánxanhanrá ntóechiso jnkójín tí jahará kixin tsotsjexín nkexrí tí jahará ntá t'ichjánxin tsjasótiará iso yaon. Kjánchó chrókuítóéhyará Dios kjónté chrók'uenrá ntá janhan tsotjáhará tí kjuachón chr'éxin.

¹¹ Tí nkexro tjinkaon chrókuinhin la chrókuinhin tí nkehe nixjehē Nchakuen Dios tí nínko: Tí nkexro tsjacha sinchexiteyàna sín la í tsjasótehya, la tí yóxin its'en chojni la í ts'enhya tí jehe sín."

Tí tan k'uáyéhe tí sín chjasin Pérgamo

¹² 'Tsokjian tí nkehe ts'áyéhe tí ángel t'ayakonhen tí nínko Pérgamo: "Mé xíkaha ichro tí nkexro chóna chica espada yánjín taté:

¹³ Janhan ó nòna kaín nkehe tjejoch'erá la ko ó nòna nketí tjejorá kixin tí tjejorá la t'etóan ch'ín Satanás la kjónté la jína kuinkachónkirá tí janhan. Jahará kuítóéhyará kuinkachónkirá tí janhan kjónté tí yaon tsík'en ch'ín Antipas, ijnko nkexro kjuínchexiteyàna jína. Jehe sín tsík'óyánxin sín ch'án tí tjejorá ntiha kixin ntaha t'etóan ch'ín Satanás.

¹⁴ Kjánchó janhan tjánchíá ijnko jie tí jahará kixin iso nkehe ntoáhya ch'erá. Siín ntiha chjasin Pérgamo tí tjejorá iso sín tjinkakonhya sín tsítóhe sín tí nkehe k'uékjako ch'ín Balaam, tí nkexro k'uék'etuenhen ch'án tí ch'ín Balac kixin tí sín israelita chrókjuasin sín jie chrókjóné sín tí nkehe tsíkjokehe sín tí nkehe tsíkjanoya la ko chróchóna sín chojni chjin ókjé chrókjuasinko sín jie.

¹⁵ Kjaxin xíkaha tí tjejorá la siín iso sín tjinkakonhya sín tsítóhe sín tí nkehe tjako tí sín nicolaítas. Janhan mé tjínkakonhya tí sín a.

¹⁶ Méxra chrókjanrá chrókuinkachónkirá Dios. A ntá tí náhí, la tjoka tsjasán tí tjejorá la tsjánjonkianxian sín tí espada t'axrjexín ir'va.

¹⁷ Tí nkexro tjinkaon chrókuinhin la chrókuinhin sín tí nkehe nixjehē Nchakuen Dios tí nínko ntáchro kixin: Tí nkexro tsjacha sinchexiteyàna sín la tsotjahā sín kjuachaxin chrókjóné sín maná tjechónhen la ko tsotjahā sín ijnko xro tjóá la tí xro la ts'ínixín ihnié sín nixin chónhya ninkexró. Jehó tí nkexro ts'áyéhe mé tsonohē."

Tí tan k'uáyéhe tí sín chjasin Tiatira

¹⁸ 'Tsokjian tí nkehe ts'áyéhe tí ángel t'ayakonhen tí nínko chjasin Tiatira: "Mé xíkaha chro tí Xjeen Dios, tí nkexro ikon éxí yóhe xrohi nene sít'axrjexín la ko toté éxí chica sine tjákiní tsjehe.

¹⁹ Janhan ó nòna kaín tí nkehe tjejoch'erá la ko ó nòna kixin tjuanará la ko tinkachónkirá tí janhan la ko ó nòna tí xra tjejoch'erá la ko ó nòna kixin tjejochonhénrá tóninkákonhyará. La ko ó nòna kixin antsí tjejoch'erá xra ijie ntá tí kjuankíxixínrá la kénhyó.

²⁰ Kjánchó tjánchíá ijnko jie tí jahará kixin tjánjonrá kjuachaxin tjako tí tjan Jezabel. Kjaxin ntáchro tjan kixin nixja tjan itén Dios kjánchó ch'iyehē tjan tí sín ch'ena xra kixin kjaxin sín chrókjuasinko sín jie chojni chjin ókjé la ko chrókjóné sín tí nkehe tsík'óyán sín tsíkjokehe sín tí nkehe tsíkjanoya.

²¹ A ntá janhan ó kuítóhā tjan intsí kixin chrókjuinkí tjan tí tjenkayáxin tjan kjánchó tjinkakonhya tjan sich'e tjan xíkaha la tjinkakonhya tjan chrókuítóhe tjan tí jie tjasinko tjan chojni ntoa.

²² A ntá jie tsjánjuan kjuachaxin tsoníhi tjan tsjak'eták'á tjan cama la ko kjaxin tsjasóte kaín tí nkexro kjuasinko tjan jie tí nunca tsítóehya sín tí nkehe tjinkaon tjan sich'e tjan.

²³ A ntá janhan ts'oyán tí xjeen tí jehe tjan. Ntá kaín tí nínko tsonoexín sín kixin janhan choxian nkehe tónhen asén kaín chojni. A ntá jnkojnko tí jahará la tsjénkahará nkexrí tí xra kjuich'erá.

²⁴ A ntá tí í sorá tjejórá chjasin Tiatira tí chréhyará tí nkehe ntoáhya tjako sín la ko tjinkákonhyará chrókónohará tí nkehe jínahya kuènte ch'in Tsochren la xikahó la í tsétuanhyará í jnko xra.

²⁵ A ntá jahará la tí nkehe ó chontará la t'ayakonhénra hasta tsokjan janhan.

²⁶ A ntá tí sín tsjacha sinchexiteyàna sín la ko xikaha sich'e sín hasta tsjixixín kixin janhan tjínkavan xikaha chrókjuich'e sín na mé janhan tsjánjuan kjuachaxin ts'etuénhen sín kaín nación.

²⁷ Na mé xikaha T'aná mé chjina kjuachaxin tsétuan la kjaxin xikaha jehe sín mé ts'etuénhen sin tí nación yóhe chróchóna sín ijnko chica vara kixin chróchjéhe sín tí chj chrók'ókuen tí chj tsík'óna nchetje.

²⁸ Me kjaxin tsotjahá sín tí konotsé tí tji nchítjen.

²⁹ A ntá tí nkexro tjinkaon chrókuinhin la chrókuinhin tí nkehe nixjehé Nchakuen Dios tí nínko.”

3

Tí tan k'uáyéhe tí sín chjasin Sardis

¹ 'Tsokjian tí nkehe ts'áyéhe tí ángel t'ayakonhen tí nínko chjasin Sardis: “Xikaha ichro tí nkexro chóna yato Nchakuen kuènte Dios la ko chóna tí yato konotsé: Janhan nòna kaín nkehe ch'erá, ó nòna kixin éxí tsík'en tí xra ch'erá kjónté nchehnkerá kixin tjejóhónra.

² T'ayará. Naxa t'ayakonhénra kjónté í tsjéhya tí nkehe kuitohe kixin kjaxin tíha mero its'en. Ó k'uikuán kixin tí xra ch'erá la t'ikon tí Dios kuèntana kixin ntoáhya.

³ Chróxráxinkáonra tí nkehe tsíxrakohará la ko tíha chrókjuich'erá la chrókjanra chróxráxinkáonra Dios. A ntá tí naxa tjejóchrinra la titaya tsjasán éxí ijnko síchee la tsonoahyará nkesá tíha.

⁴ Kjánchó naxa síin iso chojni ntaha chjasin Sardis naxa kjuínchekjítahya sín iké sín la jehe sín la ts'ájikian sín kixin chóna sín ka tjóá kixin jehe sín la jina sín.

⁵ Tí sín tsjacha sinchexiteyána sín la ts'áyéhe sín ka tjóá ts'inkáya sín la ko tsoxíkahya ihnié sín chóna tí libro ts'inixín ihnié tí sín tsaá la ko tsochoxian sín nkayakon T'aná la ko nkayakon tí sín ángel kuènte ch'án.

⁶ Tí nkexro tjinkaon chrókuinhin la chrókuinhin tí nkehe nixjehé Nchakuen Dios tí nínko.”

Tí tan k'uáyéhe tí sín chjasin Filadelfia

⁷ 'Tsokjian tí nkehe ts'áyéhe tí ángel t'ayakonhen tí nínko chjasin Filadelfia: “Xikaha ichro tí nkexro tjóá la ko chaxín mé tí nkexro chóna llave kuènte ch'in rey David. A ntá tí tsakitjehé ch'án puerta la ninkexró tsjachahya ts'ikjéhe, a ntá tí ts'ikjéhe ch'án puerta la ninkexró tsjachahya tsakitjehé.

⁸ Janhan ó nòna kaín nkehe tjejóh'erá. Kjuaké tí tjejórá ijnko puerta xitjehé la ninkexró xitjahya ts'ikjéhe. Kjónté intsíkoá kjuachaxin chontará la jahará kjuínchexiteyará tí nkehe kjuákua la ko kjuínchemáhyará tí janhan.

⁹ Tí sín tsíkitekaon Satanás la ntáchro sín kixin judío sín kjánchó jehya sín, xrich'ia sín la chr'éxin tsétuanhan sín ts'ejóxin toch'in sín chrínkí totará la ntá tsonohe sín kixin chaxín janhan tjuahará.

¹⁰ Ó kuítekáonrá tí nkehe kuétuáhanhá la jína tjejórá la mé xíkaha janhan ts'ayakonhanhá tí ichrén nkehe tsonhanhá tíó tsi tí nkehe tsonhen kuénté chjasintajni kixin ó jehí xíkaha tsonhen kaín chojni tjejó chjasintajni.

¹¹ Janhan mé tjoka ts'inka. Méxra t'ayakonhénhá tí nkehe chontará kixin ninkexró chrókuakitsjahará tí nkehe ó kjuachará.

¹² Tí nkexro tsjacha sinchexiteyàna la ts'óna sín columna kuènte nínko kuènte Dios kuéntana la nunca xitjahya sátsjixin sín ntiha. La janhan tsokjian ihnié tí Dios kuéntana tsjiko sín la ko tsokjian ihnié chjasén Dios kuéntana mé tí Jerusalén nixin tsixin nkajní tí tjen Dios kuéntana. Kjaxin tsokjian nina nixin tsochóna sín.

¹³ Tí nkexro tjinkaon chrókuinhin la chrókuinhin tí nkehe nixjehé Nchakuen Dios tí nínko.”

Tí tan k'uáyéhe tí sín chjasin Laodicea

¹⁴ Tsokjian tí nkehe ts'áyéhe tí ángel t'ayakonhen tí nínko chjasin Laodicea: “Xíkaha ichro tí nkexro chaxín ntoá mé tí nkexro chrónka tí nkehe chaxín. Tí kjuachaxién ch'án kjuích'énaxín Dios kaín nkehe.

¹⁵ Ó nòna kaín nkehe tjejóh'erá. Ó nòna kixin jahará la ní jehya kinrá o sóará. Chrókóchaxín chrókókinrá o chrókóchaxín chrókósóará.

¹⁶ A ntá jahará la yásorá la jehya ikinrá la jehya sóará. A ntá ijie ir'va ó tsíkia tí jahará la ts'itjia.

¹⁷ Ntáchrórá kixin jahará rícorá la imá jína tjejórá la ko ninkehó t'itjáyanyha tí tjejórá, ichrorá. Kjánchó chontahyará kjuachéhe la ko jehya jína tjejórá la ko nòará la ko ntakótánhá la ko tjóchínhá.

¹⁸ Méxra ijie ntaxraxinkáonhá janhan sintakjihará tí nkehe oro náxrjón ts'ík'axrjexín tja kixin ntá chaxín ts'ónará rico. La ko janhan sintakjihará ika tjóá kixin ts'ínkayará ntá tsjinhanhá kjuatósuehe kixin í tjóchínhyará. La ko janhan tsjánjuan xroan kolirio tsjiansí ikonrá kixin ts'ikonrá.

¹⁹ Janhan mé tsjéntuáha kaín tí sín tjuaha. Méxra íchá jína chrókjan sín chrókuinkáchónki sín Dios.

²⁰ Tsjehérá janhan itjén ntója puerta, tjét'eya. A ntá jnkójín nkexro chrókuinhin tí tanná ntá chrókuakitjehé tí puerta ntá chrók'uixanhan ntóe sín la chrókjónékian sín la ko jehe sín la ko janhan.

²¹ A ntá tí sín chrókjuacha chrókjuinchexiteyàna la tsjánjuan kjuachaxin ts'ejókian sín tí tétóanxian ntiha la éxí xíkaha janhan kjuacha ntá T'aná kjuanjón kjuachaxin tjékian ch'án tí tjen ch'án t'etóan ch'án ntiha.

²² Tí nkexro tjinkaon chrókuinhin la chrókuinhin tí nkehe nixjehé Nchakuen Dios tí nínko.”

4

Tí sín tjikosáyehe Dios nkaya nkajní

¹ Ntá chr'éxin janhan k'uíkuan ijnko puerta tjexrankehe nkaya nkajní. Ntá kuinhan ijnko itén nkexro éxí trompeta mé tí nkexro nixjana tí xrankíxixín, ntá jehe ch'án nixjana ch'án, ntáchro ch'án kixin:

—T'it'ótjen ntihi ntá tsjáqoha kaín nkehe tsonhen chr'éxin.

² Ntá tuénxín ikui tí kjuachaxin kuènte Nchakuen Dios k'uayáha ntá k'uíkuan tí trono itjen nkaya nkajní ntá ntiha tjetjaxin ijnko nkexro.

³ A ntá tí ch'ín tjetjaxin tí trono mé tjákini tsjehe éxí ixro jaspe o ixro cornalina. A ntá jnkontatjen tí trono itjen ijnko konchecha tjákini tsjehe éxí ijnko xro esmeralda.

⁴ **A** ntá kjaxin jnkontatjen tí trono k'uíkuan í so veinticuatro trono kjaxin tjejótxajin veinticuatro sín táda, iké sín la tjóá la ko tjejóya kja sín corona tsík'óna chica oro.

⁵ **A** ntá tí trono kuènte Dios la ntiha sít'axrjexín tí sítjónkíxín la ko sítjonta. **A** ntá nkayakon tí trono a kjaxin tjejóche yato xrohi la mé tí yato Nchakuen Dios.

⁶ **A** ntá nkayakon tí trono la kjaxin itjen ijnko ntayaon éxí xroxrjo tsjehe.

A ntá tí jnkosiné la ko jnkontatjen tí trono tjejó noó nkexro tjejóchón chóna nchónhya ikon nkayakon la ko nóton.

⁷ **A** ntá tí nkexro tjechón k'uíkuan saxín mé éxí koxra tsjehe. **A** ntá tí nkexro yóxin tóyóhe éxí koxinta, a ntá tí nkexro níxin tsjehe éxí chojni. **A** ntá tí noóxin la éxí kotjuanhko xritjaká tsjehe.

⁸ **A** ntá jnkojnko tí noó nkexro tjejóchón chóna injon kanenee sín la chóna nchónhya ikon nóton la ko nkaxenhen, la nchakotjin la ko tie títoehya sín ntáchro sín kíxin:

Santo, santo, santo,

Ìnchéni Dios, jaha chonta kaín kjuachaxin,

jaha xráxín tjen la ko itjen ijie la ko jaha ts'inka ínaá.

⁹ **A** ntá tí nkexro tjejóchón jnkoyaxon tió tjanchia sín kjuasáyé Dios la ko tjikosáyehé sín ch'án la ko nixjehe sín ch'án chjéhe sín kjuasáyé tí nkexro tjetjaxin tí trono mé tí nkexro tjechón jnkochrín.

¹⁰ La ntá tí veinticuatro tí sín táda tjejóxin toch'in sín nkayakon ch'án ntiha la tjikosáyehé sín tí jehe ch'án kíxin jehe ch'án tjechón jnkochrín la ko tjakjinjin sín corona tjoka sín tí tjen tí trono la ntáchro sín kíxin:

¹¹ Ìnchéni Dios kuènteni, jaha la imá jína la t'ayéhé kjuasáya kíxin tjikosáyahani tí jaha kíxin tí kjuachaxin chonta;

kíxin jaha kjuich'éna kaín nkehe síin kíxin jaha kóxrínhan xikaha k'óna.

5

Tí libro la ko tí Kolélo

¹ **A** ntá tí tja chjina tí nkexro tjetjaxin tí trono, k'uíkuan ijnko libro mé tsíkjin sín nkaxenhen la ko nóton la ko mé tsíkjèxin yato sello.

² La k'uíkuan ijnko ángel chóna kjuachaxin ntá kjuanchankí ch'án itsen ntáchro ch'án kíxin:

—¿Nkexro tí jína chrókuacha chrókuakitjehe tí libro la ko chróchrítõn tí sello chóna?

³ La ninkexró ní nkajní o ní chjasintajni o ní chrínkí nonte tsjachahya tsakitjehe tí libro la ní komáhya sín.

⁴ **A** ntá janhan la imá tsjanka kíxin naxa tónoxínhya ninkexró chrókuacha chrókuakitjehe tí libro o chrókuinchekuáxin tí libro o chrókomá nkehe tí ntáchro tí libro.

⁵ Ntá ijnko tí sín táda ntá nixjana ntáchro kíxin:

—Tsjankahya, tsjehé ntihi tí Koxra k'uaxrjeníxin Judá la ko tsík'axrjeníxin rey David. Mé kjuacha la ó tsjacha tsakitjehe tí libro la ko tsóchrítõn tí yato sello —ichro ch'án.

⁶ **A** ntá jnkosiné tí trono la ko tí tjejó tí noó tí nkexro tjejóchón la ko jnkosiné tí tjejó tí sín táda ntaha mé k'uíkuan tjexín toté ijnko Kolélo tsjehe éxí tsík'óyán sín mé chóna yato ntéé la ko yato ikon. **A** ntá tí kon mé tí yato Nchakuen Dios la táha mé tsík'ítuenhen t'ayakonhen kuenté chjasintajni.

⁷ **A** ntá tí Kolélo a kuákja tí libro itjen tja chjina tí nkexro tjetjaxin tí trono.

⁸ **A** ntá tió k'uáyéhe ch'án tí libro la ntá tí noó sín tjejóchón la ko tí veinticuatro tí sín táda k'uéjóxin toch'in sín nkayakon tí Kolélo. **A** ntá kaín

tí jehe sín chón̄ta sín ison arpa la ko xraá sín ihnti tsík'óna chica oro tsíkaón ch̄j̄inco. Tíha mé oración nix̄jehe Dios kaín tí sín tsík̄j̄inchetjóá ch'án.

⁹ Itsje sín nkehe n̄ixin ntáchro k̄ixin:

Jaha mé ijnko nkexro j̄ina k̄juacha kuák̄ja tí libro la ko kóchrítuan tí sello; k̄ixin tsík'óyán sín tí jaha la ko tí ij̄niá k'ueñaxian tí jeheni ts'áyéhe Dios, mé ts'áyéhe ch'án kenxín chojni k̄j̄onté nkexrí tsjehe sín la ko k̄j̄onté nkexrí nix̄ja sín la ko chojni kénxín ch̄jasin la ko kaín nación.

¹⁰ Jaha tsík̄j̄ich'énani reyes la ko nch̄at'á sich'ehe ni x̄ra Dios kuènteni, la ko jaha tsík̄j̄ánjuan k̄juachaxin ts'et̄oanni ch̄jasintajni.

Mé x̄ikaha ichro sín.

¹¹ Ntá tuénxín k'uíkuan la ko kuñhan itén nchónhya sín ángel tjejó sín jnkot̄at̄jen tí trono la ko tí sín tjejóchón la ko tí veinticuatro tí sín táda. Nchónhya millones la ko millones tí jehe sín.

¹² Itsen nix̄ja sín ntáchro sín k̄ixin:

Tí Kolélo tsík'óyán sín,

tíha mé k̄juacha k'uáyéhe k̄juachaxin ts'et̄oan la ko k'uáyéhe tí nkehe t̄jete kuènte Dios,

la ko tí k̄juaxrexinkaon j̄ina la ko k̄juachaxin sich'e x̄ra

la ko mé x̄ikaha tjikosáyeheni ch'án.

¹³ K̄j̄axin kuñhan k̄ixin kaín nkehe k̄juích'éna Dios siín nkajní la ko ch̄jasintajni la ko tí nkehe siín chrínkí nonte la ko kaín nkehe siín ntayaon la kaín tíha mé ntáchro k̄ixin:

Ch̄j̄eheni k̄juasáya tí nkexro t̄jet̄j̄axin tí trono la ko tí Kolélo

k̄ixin chón̄ta k̄juachaxin jnkochrín̄in.

¹⁴ A ntá tí noó sín tjejóchón ntáchro sín k̄ixin:

—X̄ikaha tsonhen. Amén.

La ko tí veinticuatro tí sín táda k'uejóxin toch'in sín la ch̄j̄ehe sín k̄juasáyé tí nkexro t̄jehón jnkochrín̄in.

6

Tíyato sello

¹ A ntá k'uíkuan k̄ixin tí Kolélo kóchrít̄on tí x̄ránk̄ixixín tí yato sello ntá kuñhan ijnko tí noó tí noó tí sín tjejóchón nix̄ja ch'án éxí k̄j̄onta, la ntáchro ch'án k̄ixin:

—X̄rákiá tsjehé.

² Ntá k'uíkuan ijnko kok̄ate t̄jóá. A ntá tí nkexro t̄jekjen tí kok̄ate chón̄ta ch'án ijnko arco tí t̄ja ch'án la tsík'áyéhe ch'án ijnko corona. Jehe ch'án mé k̄juacha ch'án la nax̄a xikjacha ch'án ínaá.

³ A ntá tí Kolélo kóchrít̄on tí yóxin sello ntá kuñhan tí nkexro yóxin t̄jehón ntáchro k̄ixin: —X̄rákiá tsjehé.

⁴ Ntá sákjuí í jnko kok̄ate k̄j̄at̄se. A ntá tí ch'in t̄jekjen k'uáyéhe ch'án k̄juachaxin ts̄jak̄j̄iin tí k̄juaxróxin siín ch̄jasintajni k̄ixin ntá chojni mé ts'óyán k̄ichó sín k̄ixin jehe ch'án mé tsík'áyéhe ch'án ijnko espada ijié.

⁵ A ntá tí Kolélo kóchrít̄on tí n̄ixin sello la ntá kuñhan nix̄ja tí n̄ixin nkexro t̄jehón ntáchro k̄ixin:

—X̄rákiá tsjehé.

Ntá k'uíkuan ijnko kok̄ate tié. A ntá tí nkexro t̄jekjen tí kok̄ate chón̄ta it̄ja ch'án ijnko báscula.

⁶ La ntá kuñhan itén ijnko nkexro jnkosiné tí tjejó tí noó sín tjejóchón mé ntáchro k̄ixin:

—Jehó ijnko kilo trigo ijnko chichaon denario la ko iní kilo cebada ijnko chichaon denario. Kjánchó chrókjuinchek'itjáyanhya tí aceite la ko tí vino. (Tíha mé t'axrjexín tsokjinta.)

⁷ A ntá tí Kolélo kóchrítõn tí noóxin sello ntá kuinhan tí noóxin tí nkexro tjechón ntáchro kíxin:

—Xrákiá tsjehé.

⁸ Ntá k'uíkuan ijnko kokate sine. A ntá tí ch'ín tjejen va a mé it'in ch'án Muerte. A ntá nóton tí jehe ch'án la ikui nkehe tóyóhe tí tjejó tí sín tsík'en. Jehe ch'án k'uáyéhe kjuachaxin ts'etõan ch'án noóxin parte chjasintajni kíxin ntá ts'óyán kichó sín la tsokjinta la ko ts'enxín sín ichin la ko kaín ko jiehe siín chjasintajni mé tsjaya va.

⁹ A ntá tí Kolélo kóchrítõn tí n'óxin sello ntá k'uíkuan chrínkí tí altar tí asén tí sín tsík'enxín tí tan kuente Dios tsíchrónka sín.

¹⁰ Ntáchro sín itsen kíxin:

—Jaha mé Ìnchéni tjóá jina la jaha mé sinchexiteyá tí nkehe tsintáchrúa, ¿la nkesá sinchekitoexián ijéé tí sín siín chjasintajni tsík'óyán tí jeheni? —ichro sín.

¹¹ A ntá tí sín a mé k'uáyéhe sín iké sín tjóá ntá k'uituenhen sín naxa ts'ok'éhe sín í so yaon tsoxetajia tí número tí kichó sín ch'ehe xra Cristo naxa ts'enxín sín éxí k'uén tí jehe sín.

¹² A ntá tí Kolélo kóchrítõn tí injonxin sello ntá xrínahya imá kuínkí nonte. A ntá tí yaon la kótié éxí ika tjiko chojni tsík'en. A ntá nitjó k'óna kjátse éxí jni.

¹³ A ntá konotsé sít'ánótjenxin nkajní sítjtsínka nonte éxí yóhe tí inta t'óna to higo la síxènjín tí to yoa tió tsjixraya tí nta kíxin tí imá fuerte chjéhe xrintõ.

¹⁴ A ntá nkajní k'uitjáyan éxí ijnko xroon tsíxrèya. Ntá kaín jna la ko tí nonte ntsíntsí siín jnkosiné ntayaon sákjuí ókjé.

¹⁵ A ntá kaín tí sín reyes siín chjasintajni la kjaxin tí sín t'etõan la ko chojni rico la ko comandante la ko tí sín chóna kjuachaxin la ko kaín tí sín ch'exón xra la ko tí chojni náhi mé k'uixenhen sín tjo siín nteje ts'ejómáxin sín.

¹⁶ Ntáche sín tí jna la ko tí tjo kíxin:

—Xrákiá xrátja tí jeheni nchemáni kíxin chrók'uikonhyani tí nkexro t'etõan tjetjaxin trono la ko chrókjuasótehyani tí kjuachrakon jie tsjanjon tí Kolélo.

¹⁷ Kíxin ó kui tí yaon imá jie kuente kjuachrakon la, ¿xá nkexro chrókjuacha chrók'uejó ntiha?

7

Tí sín israelita chóna sello

¹ A ntá chr'éxin k'uíkuan noó sín ángel tjejóxin toté sín la jnkoinko sín tjejó sín tí chrínta chjasintajni chónthehe sín tí noó xrintõ kíxin tsochjéhya xrintõ chjini chrítaón chjasintajni la ko ní chrítaón ntayaon la ko nijnko tí nta yoa.

² Kjaxin k'uíkuan í jnko ángel kjuixin nó tjitõxin yaon la chóna sello kuente Dios tjechón. Ntá tí ángel mé k'uíyehé ch'án itsen tí noó ángel tsík'áyéhe kjuachaxin sincheníhi nonte la ko ntayaon.

³ Ntáchro ch'án kíxin:

—Náhi, sincheníehya nonte la ko ntayaon la ko kjaxin tí nta la náhi tí naxa tsíkahya sello totjen tí sín ch'ehe xra Dios kuènteni.

⁴ Kuinhan tí número tí sín tsíka sello la me ciento cuarenta y cuatro mil kain tí sín tsík'axrjeníxin tí sín israelita.

⁵ Teyó mil tí sín tsíka sello tsík'axrjeníxin tí Judá la ko teyó mil tí sín tsíka sello tsík'axrjeníxin Rubén la ko teyó mil tí sín tsíka sello tsík'axrjeníxin sín Gad

⁶ la ko teyó mil tí sín tsíka sello tsík'axrjeníxin sín Aser, la ko teyó mil tí sín tsíka sello tsík'axrjeníxin sín Neftalí la ko teyó mil tí sín tsíka sello tsík'axrjeníxin sín Manasés

⁷ la ko teyó mil tí sín tsíka sello tsík'axrjeníxin sín Simeón la ko teyó mil tí sín tsíka sello tsík'axrjeníxin sín Leví la ko teyó mil tí sín tsíka sello tsík'axrjeníxin Isacar

⁸ la ko teyó mil tí sín tsíka sello tsík'axrjeníxin sín Zabulón la ko teyó mil tí sín tsíka sello tsík'axrejeníxin José la ko teyó mil tí sín tsíka sello tsík'axrjeníxin sín Benjamín.

Sín nchónhya chojni chóna ka tjóá

⁹ Ntá kjuixin tíha ntá k'uíkuan nchónhya chojni kaín xín nación la ko kaín xín nkexrí tsjehe sín la ko kaín xín nkíva la ko kaín xín chjasin mé tjejóxin toté sín nkayakon tí trono la ko nkayakon tí Kolélo. Nchónhya sín la kohya ninkexró tsjacha ts'ekin nkekjaín tí jehe sín la tjejóya sín ka tjóá la tjejóya kajni tja sín.

¹⁰ Kaín sín itsen nixja sín ntáchro sín kíxin:

Dios kuènteni mé kjuínchekaáni.

Jehe ch'án mé tjetjaxín tí trono tí tjen tí Kolélo kjuínchekaáni.

¹¹ Kaín tí sín ángel tjejóxin toté sín jnkontatjen tí trono la ko jnkontatjen tí sín táda la ko tí noó sín tjejóchón la ntá k'uejóxin toch'in sín la k'uísen sín hasta káxin ikja sín nonte nkayakon tí trono la tjanchehe sín kjuasáye Dios.

¹² Ntáchro sín kíxin:

Amén. Kjuíncheyaonni Dios la tsochjéheni Dios kjuasáya kíxin kaín tí kjuaxrexinkaon jína tjanjon ch'án la ko tjancheheni ch'án kjuasáya.

Tsjikosáyeheni tí kjuachaxin kuènte ch'án kíxin tjinkitsani ch'án jnkochrín. Amén.

¹³ A ntá ijnko tí sín táda kjuanchankína, ntáchro kíxin:

—A ntá tí sín tjejóya ika tjóá la, ¿xá nkexro tíha? la ko ¿xá nketí tsíkjixín sín?

¹⁴ Ntá janhan ntáxrjan kíxin:

—Ínchéni, jaha ó noha. Ntá jehe ch'án ntáchro ch'án kíxin:

—Tí sín i tsíkjixín sín tí kjuaxróxinhya k'uék'ejó sín, la tí sín a mé tsíjen sín iké sín la ko tsíkótjuáxin ijnié tí Kolélo.

¹⁵ Méxra xíkaha ntá ijie tjejó sín nkayakon tí trono kuènte Dios la tjejóch'ehe sín xra Dios nchakotjin la ko tie tí nkaxenhen nínko kuènte ch'án. A ntá tí nkexro tjetjaxín chrítaón tí trono mé t'ayakonhen ch'án sín.

¹⁶ A ntá tí sín a mé ts'enxinhya sín kjinta la ko ts'enxinhya sín ìnta la ko tsochjánxinhya sín yaon la ko ni sóa kohya nkehe sich'ehe sín.

¹⁷ Kíxin tí Kolélo tjen jnkosiné tí trono mé t'ayakonhen ch'án tí jehe sín éxí iko kuènte ch'án la ko sátjiko ch'án tí tjiá ntá tjanjon kjuachón la Dios mé sinchexámá kaín tí ntakon tí jehe sín.

8

Tí yatoxin sello la ko tí ihnti oro

¹ A ntá tí Kolélo kóchríton tí yatoxín sello kuènte tí libro la ntá kohya ninkehó ruido nkajní chjina it'ò hora.

² Ntá tuénxín k'uíkuan yato ángel tjejóxin toté nkayakon Dios la jnkoinko sín k'uáyéhe sín jnkoinko trompeta.

³ Ntá chr'éxin ikui í jnko ángel xraá ihnti tsík'óna chica oro la kjuák'exín toté nkayakon tí altar. K'uáyéhe ch'án nchónhya chjincó tsjak'e ch'án kíxin sátsjiko tí oración kuènte kaín tí sín tsíkjinchetjóá Dios kíxin tsjak'e chrítaón tí altar oro nkayakon tí trono.

⁴ A ntá tí ihnchi kuènte chjincõ chrìinxín tja tí ch'ín ángel tí tjen Dios la ko kjaxin tí oración kuènte chojni tsíkjinchetjóá Dios.

⁵ A ntá tí ch'ín ángel kuákja ch'án tí ihnti kjuínchekaón ch'án xrinta kuènte xrohi kuènte tí altar la ik'ue ch'án chjasintajni. La ntá kjónta la ko nchónhya ruido la ko sítjónkíxín la ko kuínkí nonte.

Tí trompeta

⁶ A ntá tí yato ángel mé chóna sín jnkojnko trompeta ó yaxínhin sín kíxin ts'ánoa sín.

⁷ A ntá tí ángel saoxín k'uánoa trompeta ntá k'uániá toni la ko xrohi tsínkíkjan jni mé xíkaha ikui chrítaón chjasintajni. A ntá iche níxin parte nonte la ko níxin parte tí nta la ko kaín tí kayoa siín.

⁸ A ntá tí yóxin ángel k'uánoa trompeta la ijnko nkehe yóhe tsjehe éxí ijnko jna jíe tjeche la sákjuí kjuíankí ntayaon la ntá níxin parte tí ntayaon la k'óna jni.

⁹ A ntá tí níxin parte kaín tí nkehe siín tí ntayaon la ik'uén la ko níxin parte kaín tí ntabárcõ la xíka.

¹⁰ A ntá tí níxin ángel k'uánoa trompeta la ntá xrínahya k'uánótjen ijnko konotsé jíe k'uánótjexin nkajní mé tjeche éxí ijnko xrohi jíe. K'uánótjen chrítaón níxin parte ntarío la ko tí sít'axrje nta.

¹¹ Tí konotsé mé it'in Itsjá la tsíkjiankí níxin parte tí nta ntá kótsjá tí nta la nchónhya chojni ik'uén kíxin tí nta xíkaha tsíkótsjá.

¹² A ntá tí noóxin ángel k'uánoa trompeta la kjuíncheníhi ijnko níxin parte tí yaon la ko níxin parte tí nitjó la ko níxin parte tí konotsé. Méxra tí níxin parte kuitõhe sítie la í kohya t'inkaséyan tí níxin parte tí nchakotjin la ko tí tie.

¹³ Nta tuénxín k'uíkuan la ko kuinhan ijnko ángel tjetjaká jnkosiné nkajní t'èya ch'án itsen, ntáchro ch'án kíxin:

—Nòà tí sín tjejó chjasintajni tió tsontáchro tí trompeta ts'ánoa tí iní ángel inaá.

9

¹ A ntá tí n'óxin ángel k'uánoa trompeta la k'uíkuan ijnko konotsé tsík'ánótjexin nkajní chrítaón chjasintajni ntá k'uáyéhe tí llave kuènte tí tòye ninka.

² A ntá tuénxín xitjehe tí tòye ninka ntá ntiha chrìinxín nchónhya ihnchi kuènte tja ntá tí t'inkaséyanxín yaon la ko tí xrinto k'uixin tié kíxin tí ihnchi kuènte tí tòye.

³ A ntá tí ihnchi mé k'uaxrjexín kochjoa xritjaká chrítaón chjasintajni. A ntá tí kochjoa k'uáyéhe kjuachaxin éxí tí chóna konchja siín chjasintajni.

⁴ K'uítuenhen va kíxin sincheníehya va tí kayoa siín chjasintajni la ko ninkehó nkehe yoa la ko ninkehó ntayoa. Jehó chojni chónahya sello kuènte Dios tí totjen mé sincheníhi va.

⁵ Kjánchó k'uáyèhya va kjuachaxin ts'óyan chojni. Jehó sinchekjoté va chojni hasta in'ó nitjó la tí kjuatjoté mé yóhe kjuatjoté éxí chojni tsíkjinehe konchja.

⁶ A ntá tí yaon a tsotjinkaon chojni chrók'uen sín la ntá xitjahya its'en sín. Kjónté tjinkaon sín chrók'uen sín la tí muerte sátsíkji ókjé.

⁷ A ntá tí kochjoa éxí kokate tsjehe, listo tjen sátsjikjanjon va. A ntá tí ikja va itjen nkehe tóyóhe ijnko corona tsík'óna oro la ko tí kàré la tóyóhe éxí kàré chojni.

⁸ A ntá tí kaxree va tsjehe tóyóhe éxí kaxihi chojni chjin, a ntá tí neno va la tóyóhe neno koxra.

⁹ A ntá tí cuérpóé la tjekjanjin nkehe tsík'óna chica kíxin kohya nkehe tsonhen va. A ntá ruido kuènte kanenee la éxi nchónhya carro tinkánkákjen kokate tió xritinká tí siín kjuanínkaon.

¹⁰ A ntá tí ntané va mé tsjiate chojni la éxi ntané konchia, la tíha mé tsochónta kjuachaxin sincheníhi chojni hasta in'ó nitjó.

¹¹ A ntá tí kochjoá mé chónta ijnko nkexro t'etoan mé ijnko ángel kuènte tí tòye ninka. Tí ángel mé nkiva hebreo mé it'in Abadón la nkiva griego la mé Apolión mé t'axrjxín kíxin táha mé sinchek'itjáyan nkehe.

¹² Mé xikaha kónhen tí kjuachrakon xrankíxixín. A ntá naxa t'itjáyan yaá inaá.

¹³ A ntá tí injonxin ángel k'uanoa trompeta la kuinhan ijnko itén nkexro k'uaxrjxín tí tjejó tí noó ntée kuènte tí altar oro tí tjen Dios.

¹⁴ A ntá tí itén tí nkexro ntáche tí injonxin ángel chónta trompeta kíxin:
—Tjasintankehé tí noó ángel kuènte tí jínahya tjejóchroé chjinaxón tí ntarío jíe it'in Eufrates.

¹⁵ Ntá xikaha xintankehe tí noó sín ángel kíxin ts'óyán sín tí níxin parte chojni. Mé xikaha yaxínhin sín sátsji sín tí hora la tí yaon la tí nitjó la tí nánó.

¹⁶ Ntá kuinhan tí número tí soldado la ko tí kokate la doscientos millones.

¹⁷ Mé xikaha xrínahya k'uíkuan tí kokate. A ntá tí sín tjejókjen kokate la tí ntakuin sín chónta nkehe tsík'óna chica kjátse la azul la sine. A ntá tí kokate la ikja la éxi kja koxra la tí ir'va la k'uaxrjxín xrohi la ko ihnchi la ko azufre.

¹⁸ A ntá níxin parte chojni tsík'enxín tí iní clase tí chin tsík'axrjxín ir'va kokate mé xrohi la ihnchi la azufre.

¹⁹ Tí kjuachaxin chónta tí kokate la k'uaxrjxín ir'va va la ko tí ntané va. A ntá ntané la éxi konche tsjehe la tí kja va mé sincheníhi chojni.

²⁰ A ntá tí í so chojni kuítohe k'uéxinhya tí chin a la kjónté kjuinkíhya sín tí nkehe tjenkayáxin sín la kuítoehya sín tinkáchónki sín nchakuen jínahya la ko tí nkehe tsíkjanoya chica oro la ko chica plata la ko chica bronce la ko ixro la ko inta, mé tí nkehe t'ikonhya la ko tienhya la ko tjihya.

²¹ La kjónté xikaha la kuítoehya sín tí nkehe jínahya ch'e la ko tí chrók'óyán kíchó la ko tí nchekjiko kíchó la ko tí chónta sín chojni chjin ókjé la ko tí tjinkaon sín chrókueé.

10

Ijnko ángel la ko tí librito ntsí

¹ Ntá k'uíkuan í jnko ángel imá chonta kjuachaxin k'uínkajinxin nkajní tjenkakjan ch'án tjuj la ko ijnko konchecha chrítaón tí ikja ch'án. A ntá tí kàré ch'án imá tjákini tsjehe éxi yaon, a ntá tí toté la éxi xrohi síchr'ákjen.

² Tjexraá ch'án ijnko libro ntsí tjexrankehe, la ntá toté ch'án chgina la chrítaón ntayaon la ntá toté ch'án kjon la chrítaón nche.

³ Ntá xrínahya k'ueya ch'án itsen éxi ijnko koxra tsjánka va tí tónínkaon va mé xikaha k'ueya la yato kjónta kjuáteyá tí itén ch'án.

⁴ Ntá kjuixin ntáchro tí yato kjónta la chrókjian ntá kuinhan ijnko itén nkexro nkaya nkajní ntáchro kíxin:

—Chróchronkahya tí nkehe ntáchro tí yato kjónta la ko ni chrókjinhya tíha.

⁵ Ntá tuénxín tí ángel k'uíkuan ijnko toté tjekjen ntayaon la ijnko toté tjekjen nche ntá kjuaya tja chgina nó nkajní.

⁶ Ntá kjuasin ch'án testigo tí nkexro tjen jnkochrxín mé tí nkexro a mé kjuích'ena nkajní la ko chjasintajni la ko ntayaon la ko kaín xín nkehe siín la ntáchro ch'án kíxin:

—Í séhya má naxa tsoxrjen

⁷ ntá tsjixraká tí yaon tí yatoxin ángel ts'ánoa trompeta ntá tsoxiteyá tí nkehe jehó Dios nohe kixin xikaha tsíchénka ch'án tí sín k'uékjich'ehe ch'án xra ósé k'uéchrónka sín itén ch'án.

⁸ A ntá tí itén nkexro kuinhan k'uaxrjexín nkaya nkajní ntá xínixjana inaá ntáchro kixin:

—Sátjia tákjá tí libro ntsí tjexrankehe tjexraá tí ángel itjen toté ch'án chrítaón ntayaon la ko chrítaón nche.

⁹ Ntá sákjuia kjuáncháha tí ángel tí libro ntsí ntá jehe ch'án ntáchro ch'án kixin:

—Tákjá la inte. A ntá tí ir'va la tsoxé éxí tsjen kjánchó tí tsaa la tsotsjá.

¹⁰ Ntá kuákjaá tí libro ntsí tjexraá tí ángel ntá kjonè. A ntá ir'va kóxé éxí tsjen ntá chr'éxin la kótsjá nkaya tsena.

¹¹ Ntá tuénxín k'uetuanna ch'án kixin:

—Inaá tsochronkaxián itén Dios tsinhin nchónhya chjasin la nación la ko nkiva la ko tsinhin tí sín reyes.

11

Iyó testigo

¹ A ntá chjina ch'án ijnko ntavara éxí tji tsjehe tsjáchroaxián ntá ntáchro ch'án kixin:

—T'áyá tjáχροa nkaxenhen ninko kuente Dios la ko tí altar la tékia nkekjaín nkexro tjejó ntiha tinkáchónki Dios.

² Kjánchó tí ntasin itjen ntója ninko la tjáχροahya kixin táha ó tsík'áyéhe tí sín tsíkjixin kjín la ntá jehe sín tsjikosáyehya sín tí chjasin tjóá Jerusalén ijnko cuarenta y dos nitjó.

³ A ntá mé janhan tsochr'an iyó testigo kuéntana tsonixjaxinna mil doscientos sesenta yaon. Tí iké sín la ika tié ts'ejóya sín.

⁴ Tí yaá testigo i mé iyó nta olivo la ko iyó candelero tjejó tí tjen Ìnchéni kuente chjasintajni.

⁵ A ntá tí jnkojín sín tjinkaon sich'ehe sín daño la jehe sín la xrohi ts'axrjexín ir'va sín la tsoche kaín tí sín nínkakonhen sín la mé xikaha its'en kaín tí sín tjinkaon sich'ehe sín daño tí jehe sín.

⁶ A ntá tí testigo i chóna kjuachaxin ts'ikjehe nkaya nkajní kixin í ts'aniáhya chrín tí tsonixja sín kuente Dios la ko kjaxin chóna sín kjuachaxin tsontáche sín tí nta kixin ts'óna jni la ko sinchekjasótexín sín chojni chjasintajni nchónhya clase chin nchónhya veces éxí tí tjinkaon sín.

⁷ A ntá tí kjuixinhin sín tí xra ntá tí ko jiehe ts'axrjexín tí tòye ninka mé tsjankixin tsjanjonko tí jehe sín ntá tsjacha va ts'óyán va tí jehe sín.

⁸ A ntá tí cuérpoé sín tsitohé sítsínka tí calle kuente chjasin jieé tí tsíkjak'enkani sín Ìnchéni ntacruz mé tí chjasin mé kjaxin nchek'in sín Sodoma la ko Egipto.

⁹ A ntá iní yaon ko t'o la kaín chojni itsjé chjasin la ko kaín nkexrí tsjehe sín la ko nchónhya nkiva la ko nchónhya nación ts'ikon sín tí chojni tsík'en tjejótsínka sín ntiha la ko tsjanjonhya sín kjuachaxin tsoxravá tí chojni tsík'en a.

¹⁰ A ntá tí sín tjejó chjasintajni tsochéhe sín kixin xikaha tsík'en tí sín a la antsí má tsochéhe sín la tsochr'án sín nchónhya nkehe nchekitonhen kichó sín kixin xikaha ik'uén tí yaá sín k'uéchrónka itén Dios kixin jehe sín kjuaxróxinhya k'uék'ixin sín tí chjasintajni tí k'uék'ejó tí sín a.

¹¹ A ntá chr'éxin ó k'uátsínka iní yaon ko t'o la ntá Dios kjuínchexechón tí iyó tí sín a inaá la k'uàya sín inaá la ntá kaín chojni k'uíkon la imá chrakon sín.

¹² Ntá tuénxín tí iyó sín testigo kuínhin sín ijnko nkexro nixja itsen nkaya nkajní ntáchro kixin:

—Chriyan xrákiá antsí ntihi.

Ntá chrìinxín sín nkajní ijnko tjuj. A ntá kaín tí sín nínkakonhen sín la k'uíkon sín kixin xikaha kónhen sákjuj tí iyó sín a.

¹³ Ntá tuénxín imá kuínkí nonte la ntá ijnko ite parte chjasin ntiha la k'uitjáyan la yato mil chojni tsík'en kixin tí kuínkí nonte. A ntá kaín tí sín xéhe imá chrakon sín la kjuankíxin sín tinkáchónki sín Dios la tjanchia sín kjuasáya.

¹⁴ Mé xikaha kónhen tí yóxin kjuaxikaon la ntá tuénxín itsi tí nixin kjuachrakon ínaá.

Tí yatoxin trompeta

¹⁵ A ntá tí yatoxin ángel k'uánoa trompeta ntá kuínhin sín ijnko tan nkajní itsen ntáchro kixin:

A ntá tí sín k'uáyéhe kjuachaxin kuènte chjasintajni la ó kjaxin nchexiteyéhe sín

Ìnchéni Jesucristo

kixin jehe Jesucristo mé ts'etōan ch'án jnkochrín.

¹⁶ A ntá tí veinticuatro tí sín táda tjejótjaxin sín trono nkayakon Dios la mé k'uísén sín hasta káxin ikja sín nonte la tjanchehe sín kjuasáya Dios.

¹⁷ Ntáchro sín kixin:

Tjáhani kjuasáya jaha Ìnchéni Dios imá chonta kjuachaxin.

Jaha itjen la ko xráxin tjen la ko jaha ts'inka ínaá.

Kixin jaha k'uayéhe kjuachaxin jíe kixin xráxin tétōan.

¹⁸ A ntá kaín tí nación kónínkaon,

a ntá ó kui tí yaon jaha sinchekjasóte sín

la ko kjaxin jaha sinchekitoexián ijíe tí sín tsík'en

la ko tsjénkehé tí sín kjuít'aha xra chrónkaxín itán

la ko tí sín ó kjuinchetjóá la ko tí sín kjuikosáyehe tí ihniá,

mé tí chojni nteto la ko tí sín chánjan ntsíntsi.

Jaha tjoka sinchek'itjáyan tí sín chrókjuinçek'itjáyan chjasintajni.

¹⁹ A ntá xitjehe tí nínkōe Dios tjen nkaya nkajní, a tí nkaxenhen kónoxín tí caja tjinká tí nkehe tsík'etōan Dios. A ntá sítjónkíxín la ko nchónhya ruido sítjonta la ko kuínkí nonte la ko imá tsanká k'uániá toni.

12

Tí chojni chjin la ko tí dragón

¹ A ntá kónoxín nkajní ijnko kjuaxroan jíe mé ijnko chojni chjin iké tjákiní éxí yaon tsjehe la chrínkí toté tjan itjen nitjó. A ntá tí kja tjan tjenkáya ijnko corona chóna teyó konotsé.

² A ntá tí chojni chjin a mé tjejá tjan la t'èya tjan kixin tjeté tjan kixin sinchekokjíhi tjan xjeen tjan.

³ Kjaxin kónoxín í jnko kjuaxroan nkajní mé ijnko dragón kjátse chóna yato kja la ite ntèe la jnkójnko corona jnkójnko kja. [Tí dragón mé ijnko kots'aja jíe.]

⁴ Tí ntané mé nkánkákjen nixin parte konotsé kuènte nkajní la ik'ue chrítaón chjasintajni. A ntá tí dragón kjuák'e chók'èxin tí tjen tí chojni chjin mero tsokjíhi xjeen kixin tjinkaon tjoka chrókjóne tí xjan tsokjíhi.

⁵ A ntá tí xjan kjuínchekokjíhi tjan mé xjan ntoá kixin jehe ch'án mé ts'etuenhen ch'án kaín nación la tsochóna ch'án ijnko vara chica ts'etōanxín ch'án. Ntá tí xjeen tjan la mé Dios sákjuiko tí tjen ch'án t'etōan ch'án.

⁶ A ntá tí chojni chjin la kuinká tjan sákjuí tjan nteje kixin tsíkjincheyóxin Dios nketí sátsji tjan kixin ntaha tsoxranjon nkehe sine tjan mil dos cientos sesenta yaon.

⁷ Ntá chr'éxin xrínahya k'uúxin kjuanínkaon jié nkajní la mé tí arcángel Miguel la ko tí í so ángel xriko ch'án mé kjuánjonko sín tí dragón, la tí dragón la ko tí ángel kuènte mé kjuánjon sín.

⁸ Kjánchó kjuachahya tí dragón la kohya lugar kuènte nkaya nkajní.

⁹ Mé xikaha kuakitsjexín sín tí dragón nkajní. Jehe mé tí konche ósé ikjí mé nchek'in sín diablo la ko Satanás. Jehe mé k'uékjich'iyehé tí chojni kuenté chjasintajni. Jehe la ko tí sín ángel kuènte k'uaxrjexín ntiha la kjuítsínka chjasintajni.

¹⁰ Ntá kuínhan itén ijnko nkexro nkaya nkajní itsen nixja ntáchro kíxin:

—Ó kui ti tsaáxinni tí kjuachaxién tí Dios kuénténi la ko tí kjuachaxin t'etoan Cristo kíxin ó k'uaxrjexín nkajní tí nkexro t'eka jie tí kíchó ni mé kjuanchia jie nchakotjin la ko tie nkayakon Dios kuénténi.

¹¹ Tí sín kíchó ni la kjuacha sín kuaáxin sín kíxin tí ijnié tí Kolélo k'uitji la ko kíxin jehe sín chrónkaxín sín tí tan tsík'áyéhe sín la chrakonhya sín kjónté chrók'uenxín sín.

¹² A ntá jie la tócháhará kaín rá tjejorá nkajní. Ntá nòa tí sín tjejó chjasintajni la ko ntayaon kíxin k'uínkajin tí ch'ín diablo la imá nínkaon ch'án kíxin ó nohe ch'án kíxin í kánhyó sé tsjak'e ch'án.

¹³ Ntá tí ch'ín dragón ó nohe kíxin k'uánótjenxin nkajní ikui chjasintajni ntá sákjuíchréhe tí chojni chjin chóna tí xjan ntoa kíxin chrókjuinchek'itjáyan tjan.

¹⁴ Kjánchó tí chojni chjin k'uáyéhe yaá kanenee kuènte kotjuanhnko ijié kíxin jína tsjaká tjan sátsji nteje kíxin ntá ikjín tsitöhe tí konche. Sátsji tjan kíxin ntiha tsoxranjon nkehe sine tjan iní nánó ko t'ò.

¹⁵ A ntá tí konche mé k'uaxrjexín ntá ir'va kíxin ts'óna ijnko ntario kíxin tjinkaon va chrók'uátjoáko tí tjan a tí ntá a.

¹⁶ A ntá tí nonte kjuínkítsa tí tjan a kíxin xitjehe ir'va nonte la kaín tí ntá k'uaxrjexín ir'va tí konche la ntahó sákjuí k'uúxenhen.

¹⁷ A ntá tí dragón la imá kónínkakohen tí tjan a ná imá kónínkaon kjuánjonko tí í so sín naxa kjéhya tí tjan a kíxin naxa titekaon sín tí nkehe tsík'etoan Dios la naxa tinkáchónki sín tí nkehe tsíchrónka Jesucristo.

13

Tí yaá bestia

¹ Tí kjuak'é chrínta ntayaon ntá ntaha k'uúkuan chríinxín ijnko bestia chóna yato kja la ko ite ntéé chojni t'ántaxínhin Dios.

² Tí bestia k'uúkuan mé tóyóhe kotigre la chóna toté éxí toté ko oso la ko tí ir'va la éxí ir'va koxra. Tí dragón kjuanjón kjuachaxin imá ts'etoan tí bestia a.

³ A ntá ijnko kja tí bestia chóna ijnko tsíchrít'ò jie chóna chrók'uenxín ntá tsíkítóhe jína ntá kuenté chjasintajni la chrakon chojni ntá chréhe sín tí bestia.

⁴ Kjuikosáyehe sín tí dragón kíxin jehe kjuanjón tí kjuachaxin k'uáyéhe tí bestia ntá kjaxin kjuikosáyehe sín tí bestia la ntáchro sín kíxin:

—¿Xá nkexro chrókóyóhe tí bestia la xá nkexro chrókjuacha chrókjuanjónko tí jehe?

⁵ Kjaxin tí bestia k'uáyéhe kjuachaxin tsontáchro kíxin chóna kjuachaxin má la ts'ántaxínhin Dios la tsochóna kjuachaxin cuarenta y dos nitjó.

⁶ Ntá mé xikaha kjuích'e k'uántaxínhin Dios la ko k'uántaxínhin ihnié Dios la ko k'uántaxínhin tí njnko tjen nkaya nkajní la ko kaín tí sín tjejó ntiha.

⁷ Kjaxin tsík'áyéhe kjuachaxin tsjanjonko tí sín tinkáchonki Dios hasta tsjacha ts'etuenhen tí sín ntá k'uáyéhe kjuachaxin ts'etuenhen kaín xín nkexrí tsjehe chojni la ko kaín xín chjasin la ko kaín xín tan la ko kaín xín nación.

⁸ A ntá tí bestia mé kaín xín chojni siín chjasintajni mé tsjikosáyehe sín tí bestia. Tí chojni a mé ts'ínixínhya ihnié tió k'óna chjasintajni, mé ts'ínixínhya ihnié sín tí libro ts'ínixín ihnié tí sín tsaá. Tí xroon a mé chóna tí Kolélo tsík'óyán sín.

⁹ La jnkojín nkexro tjinkaon chrókuinhin la chrókuinhin tíhi.

¹⁰ Tí nkexro sátsjiko tsjik'ikjehe í so chojni la kjaxin ch'án ts'ikjehe ch'án la tí nkexro tsjayaxin espada la kjaxin espada ts'énxín. A ntá tí nkexro tinkáchónki Dios la t'ichjánxin tsonínkakonhya la ko tsochóna fe.

¹¹ A ntá chr'éxin k'uíquuan í jnko bestia k'uaxrjexín nonte, chóna yaá ntèé éxí tsjehe ntèé coronta la mé nixja éxí nixja tí dragón.

¹² Tí bestia la chóna kaín xín kjuachaxin éxí k'uéchóna tí bestia saoxín tí k'ué la t'etuenhen tí sín siín chjasintajni kixin tinkáchónki sín tí bestia saoxín mé tí bestia tsíchrít'oxin kja ntá tsíkitohe jína.

¹³ Kjaxin kjuasin kjuaxroan jié hasta xrohi k'uánótjénxin nkajní ikui nonte ntá nchónhya chojni k'uíkonxín kon sín kixin xikaha kónhen.

¹⁴ Mé xikaha tí bestia tsík'áyéhe kjuachaxin kjuasin kjuaxroan tí tjen tí bestia saoxín la kjuích'iyehé nchónhya chojni siín chjasintajni. La ntá k'uétuenhen tí sín siín chjasintajni sich'éna sín ijnko nkehe tsíkjanoya éxí yóhé tsjehe tí bestia tsíchrít'oxin espada la kjónté xikaha naxa kjuák'echón.

¹⁵ A ntá tí yóxin bestia k'uáyéhe kjuachaxin tsochjéhe kjuachón tí nkehe tsíkjanoya tóyóhe tí bestia saoxín kixin ntá tí nkehe tsíkjanoya la jína tsonixja la ko jína ts'etōan its'en kaín nkexro tinkáchónkihya tí jehe.

¹⁶ Kjaxin ts'etōan kixin kaín chojni tsochóna marca, á chojni hyé o chojni ntsíntsí, la á chojni rico, la á chojni nōa la á chojni ch'exón xra la ko chojni náhí, mé kaín sín tsochóna sín marca, á tja sín chjina o totjen sín.

¹⁷ Ntá ninkexró xitjahya ts'ena la ko ninkexró xitjahya sinchekji tí chónahya sín marca o ihnié tí bestia o chónahya sín número kuènte ihnié tí bestia.

¹⁸ T'ichjánxin chrókienxínrá tíhi. Tí nkexro tienxín la chrókónohe tí número chóna tí bestia kixin tíhi mé tí número chóna ijnko chojni la mé tí número mé seiscientos sesenta y seis.

14

Tí nkehe itsje tí ciento cuarenta y cuatro mil

¹ A ntá k'uíquuan tí Kolélo tjexín toté chrítaón tí jna Jerusalén. Jehe ch'án tjeko ch'án ciento cuarenta y cuatro mil chojni ts'ínixín totjen sín ihnié tí Kolélo la ko ihnié It'é ch'án.

² Ntá tuénxín kuinhan ijnko itén nkexro kuixin nkaya nkajní mé ijnko ruido éxí nchónhya ntarío la ruido éxí sítjonta itsen la éxí ijnko ruido nchónhya chojni it'in sín isón arpa.

³ Itsje sín nkehe nixin nkayakon tí trono la ko nkayakon tí noó nkexro tjejóchón la ko tí sín táda. Nijnko nkexro chrók'uitjahya tí nkehe tjejótsje sín; jehó tí sín ciento cuarenta y cuatro mil mé sín tsíkaá k'uék'ejó chjasintajni.

⁴ Tí sín a mé k'uéchónahya sín itsjé chojni chjin la tjóá sín la chréhe sín tí Kolélo kjónté nketí k'uáji. Tí sín a mé kuaá sín tí k'uék'ixin chojni k'uékjasin jje la ko tí sín a mé éxí ijnko ofrenda xrankixín k'uáyéhe Dios la ko tí Kolélo kjaxin.

⁵ Kónoxínhya ninkehó kjuach'ia k'uaxrjexínhya ir'va sín. La tí sín la ninkehó jje chónahya sín tí tjejó sín nkayakon tí trono kuènte Dios.

Tí nkehe chrónka tí iní ángel

⁶ A ntá k'uikuān í jnko ángel tjetjaká jnkosiné nkajní chrónka tí tan tsaáxinni jnkochrín tsinhin tí sín siín chjasintajni, mé tsinhin kaín nación la ko kaín nkexrí tsjehe chojni la ko kaín xín tan la ko kaín chjasin.

⁷ Ntá t'èya itsen ntáchro kixin:

—Chróchrakonrá la chróxráxinkáonrá Dios la chróchjeherá ch'án kjuasáya kixin ó kjuixraká tí yaon sinchekitoexín ch'án ijíe chojni. Tjikosáyehérá ch'án kixin jehe ch'án kjuích'éna ch'án nkajní la ko chjasintajni la ko ntayaon la ko tí sít'axrje ntá.

⁸ Ntá xíki yóxin ángel, ntáchro kixin:

—Ó kjuixin kjuítsínka, ó kjuixin kjuítsínka tí chjasin jíe Babilonia. Mé ntiha kuixín tí vino kókuānxín sín kaín nación ntá kjuasin sín jíe chóna sín chojni chjin ókjé.

⁹ Ntá xíki tí níxin ángel nixja itsen, ntáchro kixin:

—Jnkójín sín tsjikosáyehe sín tí bestia la ko tí nkehe tsíkjanoya kuènte o tsítóhe sín tsochóna tí marca tí totjen sín o tí tja sín,

¹⁰ mé t'ichjánxin its'i sín tí vino tsjasótexín sín kuixín tí tjen Dios kixin xíkaha tjechónhen tí kjuanínkaon kuènte Dios ntá ntiha tsjasótexín sín tí xrohi la ko azufre mé xíkaha tsonhen tí sín a ts'ikon tí sín ángel kuènte Dios la ko tí Kolélo.

¹¹ Tí ihnchi kuènte xrohi sítjasótexín sín síchrìn jnkochrín la tí sín a kuinkáchónki tí bestia la ko tí nkehe tsíkjanoya kuènte o chóna sín ihníe kuènte.

¹² A ntá tí sín tinkáchónki Dios la kuítekaon sín tí nkehe k'uetōan ch'án la ko naxa jina tinkáchónki sín Jesús mé t'ichjánxin chrókuítóehya sín titekaon sín ch'án.

¹³ Ntá kuinhan itén ijnko nkexro kuixín nkajní ntáchro kixin:

—Ikjian tíhi: “Náxrjón tjejó tí nkexro kjónté its'en sín ijie o chr'éxin kixin tinkáchónki sín Ìnchéni.” Kjá jina, ichro Nchakuen Dios, kixin tí jehe sín ts'ok'éhe sín kixin ó kjuích'e sín xra la tí xra kjuích'e sín mé kjuacha sín.

Tí nkehe tsík'óna chjasintajni

¹⁴ Ntá xríñaha k'uikuān ijnko tjuí tjóá la chrítaón tí tjuí tjetjaxín ijnko nkexro éxi yóhe tsjehe tí Xjeen Dios Tsík'óna Chojni tjenkáya ijnko corona tsík'óna chica oro tí kja ch'án la ko ijnko chica hoz imá taté tjepraá ch'án.

¹⁵ A ntá nkaxenhen nínko mé k'uaxrjexín í jnko ángel itsen nixja ch'án nixjehe ch'án tí nkexro tjetjaxín chrítaón tjuí ntáchro ch'án kixin:

—Tjankíxian tātēxian chica hoz kixin ó kjuixraká tí yaon tsotjá tí nkehe siín chjasintajni kixin tí nkehe tsík'óna chjasintajni la ó tsícha.

¹⁶ Ntá tuénxín tí nkexro tjetjaxín chrítaón tjuí ntá kjuínchek'átsínka ch'án chica hoz kuenté chjasintajni la kjuenájín ch'án nkehe tsík'óna chjasintajni.

¹⁷ Ntá k'uaxrjexín í jnko ángel tí nínko tjen nkaya nkajní la kjaxín sákjuíko ch'án ijnko chica hoz imá taté.

¹⁸ Ntá sákjuíxin í jnko ángel tí tjen altar la chóna ch'án kjuachaxin kuènte xrohi la itsen k'uíyehē ch'án tí nkexro chóna tí chica hoz imá taté la ntáchro ch'án kixin:

—Tjankíxian tātēxian tí chica hoz taté la tjankíxian itja tí racimos to uva tsík'óna chjasintajni kixin ó tsíchjé to —ichro ch'án.

¹⁹ A ntá tí ángel kjuínchek'átsínka tí chica hoz chrítaón tí nonte ntá chrínjin tí to uva tsík'óna tí nonte ntiha. Ntá sákjuík'enka ch'án to tí tjat'o ts'ényaxín sín to. Tíha mé t'axrjexín kixin xíkaha Dios sinchekjasóte chojni.

²⁰ A ntá tí to uva tsík'ényaxín sín tjat'o tí ikon chjasin a ntá tí tjat'o a mé k'uaxrjexín nchónhya jni noixín éxi tí freno tjinká ir'va kokate la trescientos kilómetro kjínxin sátsíkji tí jni a.

15

Tí yato tí ángel la ko tí chin tsjixixín

¹ Ntá k'uíkuañ tí nkajní í jnko kjuaxroan jié mé ijnko kjuachrakon: mé tí yato sín ángel kuikao tí yato chin tsjixixín tsoníexín chojni. Tíha mé tí kjuanínkaon kuènte Dios tsjixixín.

² Kjaxin k'uíkuañ ijnko nkehe tóyóhe ijnko ntayaon tsík'óna éxí xrosenta tsínkíkjan xrohi. La tí sín tsíkjacha kixin kuinkáchónkihya sín tí bestia la ko tí nkehe tsíkjanoya kuènte la ko kuáhya sín tí número kuènte ihnié tí bestia mé tjejóxin toté sín chjinaxón ntayaon tsík'óna éxí xrosenta la ko chóna sín isón arpa tsíkjanjon Dios tsík'áyéhe sín.

³ Itsje sín isón k'uétsje ch'ín Moisés, tí nkexro kjuích'ehe xra Dios la ko isón kuènte tí Kolélo la mé ntáchro kixin: Imá ijié tí kjuaxroan kuéntá kixin kaín nkehe tsíkjich'éna.

Jaha Ìnchéni Dios kaín kjuachaxin chonta.

Ntoá la ko chaxín tí ntja kuéntá.

Jaha mé ijnko Rey t'etqan kuènte chjasintajni.

⁴ ¿Xá nkexro chrakuanhya tí jaha Ìnchéni?

¿Xá nkexro tjáhya kjuasáya kixin jaha mé ijnko nkexro jína tjóá?

Kuenté chjasintajni tsjikosáyehe sín tí jaha

kixin k'uíkon sín tí xra tsíkjich'e la jína tíha.

⁵ Kjuixin tíha la k'uíkuañ nkajní tjexrankehe tí nínko la ko tí cuarto tjóá t'inkachjina tí nkehe tsík'etqan Dios.

⁶ A ntá tí nínko a k'uaxrjexín yato ángel kuikao yato chin. Tí iké sín la ika tjete tjóá tjákini. A ntá tí cinta chóna ntakuin sín mé jehó oro.

⁷ A ntá ijnko tí noó tí nkexro tjejóchón mé kjuanjon ijnko copa k'uáyéhe jnkojnko tí yato ángel mé copa tsík'óna chica oro tsíkaón tí nkehe tsjasótexín chojni kuixin tí tjen Dios tí nkexro tjechón jnkochríxín.

⁸ A ntá tí nkaxenhen nínko la tsíkaón ihnchi kuixin tí kjuachaxin jié kuènte Dios la nijnko nkexro xitjahya ts'íxenhen ntiha tsjixinjian ts'átsínka tí yato tí chin kuikao tí yato ángel.

16

Tí copa tjinká nkehe tsjasótexín chojni

¹ Ntá kuñhan ijnko itén ijnko nkexro imá itsen k'uaxrjexín nkaxenhen nínko, ntáche tí yato sín ángel kixin:

—Sátjia tikíkjanjian chrítaón chjasintajni tí nkehe tjiá tí yato copa la táha mé tsjasótexín chojni kuixin tí tjen Dios —ichro ch'án.

² A ntá tí ángel saxín sákjuík'itji tí nkehe tjiá tí copa chrítaón chjasintajni. A ntá kaín tí chojni chóna marca kuènte tí bestia la ko tjikosáyehe sín tí nkehe tsíkjanoya kuènte tí bestia mé tsík'ayan sín tosóa, imá tjetéhe sín.

³ A ntá tí yóxin ángel sákjuík'itji tí nkehe tjiá copa chrítaón ntayaon. A ntá tí ntayaon la k'óna jni éxí ijnié ijnko chojni tsík'óyán kichó la kaín ko sínkánki ntayaon ik'uén.

⁴ A ntá tí nixin ángel sákjuík'itji tí nkehe tjiá copa chrítaón ntario la ko chrítaón tí nta sit'axrje tóye, la ntá tí nta k'óna jni.

⁵ Ntá tuénxín kuñhan nixja tí ángel kuènte nta ntáchro kixin:

—Jaha mé ijnko nkexro jína kixin kjuinchekitoexián ijié chojni. Ìchéni jaha ijnko Dios jína, ósé tjen la ko naxa tjen ijie

⁶ kixin jehe sín k'óyán tí sín tinkáchónki tí jaha la ko tí sín tsíchrónka itan la ntá jaha Ìnchéni chjehé sín ijni its'i sín kixin mé xikaha sitjasóte tí jehe sín.

⁷ Kjaxin kujnhan nó altar ijnko nkexro ntáchro kixin:

—Chaxín Ìnchéni Dios, jaha mé chonta kaín kjuachaxin la ntoá jína kjuinchekitoexián tí ijié a.

⁸ A ntá tí noóxin ángel sákjuík'itji tí nkehe tjiá copa chrítaón yaon, a ntá tí yaon antsí k'uáyéhe kjuachaxin tsosóa kixin tsochjánxin chojni tí sóa kuènte.

⁹ A ntá kaín chojni chjánxin tí imá sóa kuènte yaon la k'uántaxínhin sín ihnié Dios mé jehe ch'án mé tí nkexro chóna kjuachaxin kuènte tí chin a. La kjónté kjuinkíhya sín tí nkehe tinkáchónki sín la xraxinkakonhya sín Dios.

¹⁰ A ntá tí in'óxin ángel sákjuík'itji tí nkehe tjiá copa chrítaón tí trono t'etoanxín tí bestia. A ntá kaín tí k'uéchóna kjuachaxin k'uék'etoan tí bestia la k'uixin tié. A ntá tí chojni a la netja nejen sín kixin tjetéhe sín.

¹¹ La kjónté xikaha la kjuinkíhya sín tí nkehe jínahya ch'e sín. Náhí. Íchá má k'uántaxínhin sín Dios tjen nkaya nkajní kixin tjetéhe sín kixin xikaha kónhen sín.

¹² A ntá tí injonxin ángel sákjuík'itji tí nkehe tjiá copa chrítaón ijnko ntarío jié it'in Eufrates. A ntá tí ntarío la kjuixié kixin jína tsakitjehe sín ijnko ntia tsjixin tí sín rey tsjixin nó tjitoxin yaon.

¹³ A ntá k'uikuán kixin ir'va tí dragón la ko ir'va tí bestia la ko ir'va tí profeta ntoáhya tjako mé k'uaxrjexín iní nchakuen tí jínahya éxí korána tsjehe.

¹⁴ Tíha mé nchakuen tí jínahya kjuasixín sín kjuaxroan. A ntá sákjuikjinchejónkotsé kaín rey siín chjasintajni kixin tsjanjon sín ijnko yaon jié kuènte Dios chóna kaín kjuachaxin.

¹⁵ “Tsjehe, janhan titàya ts'inké éxí ijnko xichee. Chéhe tí nkexro tjejótsjehe la t'ayakonhen tí iké kixin ts'itjáyannya kixin chrók'uajihya sín tjóchin sín la chrókósuehya sín kixin chrókónoxín kixin tjóchin sín.”

¹⁶ A ntá tsojnkotsé tí sín rey tí nonte it'in Armagedón nkiva Hebreo.

¹⁷ A ntá tí ángel yatoxin sákjuík'itji nkehe tjiá copa chrítaón tí xrínto ntá nkaxenhen njnko nkaya nkajní k'uaxrjexín ijnko itén chojni itsen nixja mé kuixin tí tjen tí trono la ntáchro kixin:

—Ó kjuixin kónhen tíha.

¹⁸ A ntá sítjónkixín la ko ruido sítjonta la ntá imá kuínkí nonte fuerte. La desde tí kjuankixin k'uixin chojni chjasintajni la xikahya kónhen kuínkí nonte a ntá jié antsí fuerte kuínkí nonte.

¹⁹ A ntá tí chjasin jié xitjehe nonte la iní k'óna, chjenca. La koí kaín chjasin siín chjasintajni tsík'oya. A ntá Dios xraxinkaon kixin chrókjuínchekjásóte tí sín siín tí chjasin jié Babilonia la k'uetoan ch'án its'i sín tí vino tsjasótexín sín kixin mé xikaha kónínkaon ch'án.

²⁰ A ntá kain tí nonte sínkátaón ntayaon k'uániankí nta la ko tí jna k'uitjayan.

²¹ A nta nkajní k'uánótjenxin toni ijié xrátja chojni mé cuarenta kilo yexín jnkojnko toni. A ntá chojni na antsí má k'uántaxínhin sín Dios kixin tí xikaha kónhen sín xratja sín toni la imá kjoté sín.

17

Tsjasóte tí tjan jínahya

¹ A ntá ikui ijnko tí yatoxin ángel chóna tí yato copa la ntáchro ch'án kixin:

—Xrákiá tsjakoaha nkexrí tsjasóte tí chojni chjin tjasin jié tjetjaxin tjan chrítaón tí nchónhya nta.

² Tí sín rey t'etoan chjasintajni kjuasinko tjan jié la ko tí chojni siín chjasintajni kókuaxin sín tí vino a mé kjaxin kjuasixín sín jié.

³ **A** ntá tuénxín Nchakuen Dios sákjuikian nteje ntá k'uíkuan ijnko chojni chjin tjetjaxin chrítaón ijnko bestia kjátse la kuenté tí ko a la síma ihnié náxrjónhya tsík'ántaxíenxín sín Dios la chóna yato kja la ko ite ntéé.

⁴ **A** ntá jehe tjan chóna tjan iké tjan morado la ko kjátse la teyá tjan chica oro la ko xro náxrjón la ko perla. Tjexraá tjan ijnko copa tsík'óna chica oro tsíkaón nkehe jínahya tsjasixín tjan jie.

⁵ Tí totjen tjan ts'ínixín ijnko ihnié kohya nkexro tienxín. “Tíha mé tí chjasin jie Babilonia, mé ìné tí chojni chjin tjasin jie la ko kain chojni jínahya ch'e síin chjasintajni.”

⁶ Ntá kónona kixin tí tjan a la tsékanxin tí ijnié tí sín tinkáchónki Dios la ko tí ijnié tí sín tsík'enxín tí chrónka sín kixin tinkáchónki sín Jesús. Ntá k'uíkuan xikaha imá chrakonna.

⁷ **A** ntá ijnko ángel ntáchro ch'án kixin:

—¿Nkekuènté chrakuan? Ntá ijie sintonoha tí nkehe tienxínhya chojni kuènte tí tjan a la ko kuènte tí bestia tjejen tjan chóna yato kja la ko ite ntéé.

⁸ Tí bestia k'uíkuan jaha kjuák'e ósé la ijie tjechónhya kjánchó senó tsochríinxín tí tõe nínka ntá chr'éxin ts'itjayan. **A** ntá tí sín síin chjasintajni ts'ínixínhya ihnié sín tí libro ts'ínixín ihnié chojni tsaá desde k'óna chjasintajni, la mé jehe sín tsochrakon sín tió ts'ikon sín tí bestia kjuák'e ósé la tsík'en la ntá ijie xikjan inaá.

⁹ Tí jnkójín nkexro chrókienxín la mé tí yato kja la t'axrjexín yato jna tjejen tí chojni a.

¹⁰ **A** ntá tí kja kjaxin t'axrjexín yato rey la ntá in'ó tí sín rey la í t'etuanhya sín ijie la ijnko tí jehe sín t'etuan ijie la í jnko naxa tjihya. **A** ntá tió tsji tí yatoxin la í kánhyó sé ts'etuan.

¹¹ **A** ntá tí bestia kjuák'e senó la ijie tjechónhya mé tí jnixin rey la jehe ch'án kuènte tí yato rey la chr'éxin la ts'itjayan.

¹² **A** ntá tí ite ntéé tsík'ikuan mé ite rey naxa t'etuanhya. **A** ntá ijie la ts'áyéhe sín kjuachaxin ts'etuanke tí bestia kjánchó kánhyó sé.

¹³ Tí ite tí rey la jnkokoá tsjenkayáxin sín la tsjanjon sín kjuachaxin kuènte sín kixin ts'etuan tí bestia.

¹⁴ Tsjanjonko sín tí Kolélo a ntá tí Kolélo la tsjacha ts'etuan kixin jehe ch'án mé ìnché kaín chojni la ko jehe ch'án mé tí Rey ts'etuenhen kaín rey la ko tí sín tjejóko ch'án mé tsík'íyehé Dios la tsík'eyá ch'án sín la jína nchexiteyá sín.

¹⁵ Kjaxin ntáchro tí ch'ín ángel kixin:

—Tí nta k'uíkuan la chrítaón tjetjaxin tí chojni chjin tjasin jie la mé t'axrjexín kixin nchónhya chjasin la ko nchónhya chojni la ko nchónhya nación la ko nchónhya nkiva.

¹⁶ **A** ntá tí bestia k'uíkuan la ko tí ite ntéé la tíha mé tsonínkakohenen tí tjan tjasin jie la tsitohe tjan tjóchin tjan la sine tí bestia tí nto chóna cuérpóé tjan la ko tsoche tí huésóé tjan.

¹⁷ Dios tsík'etuenhen asén sín kixin xikaha sich'e sín éxí tjinkaon ch'án kixin jnkokoá tsjenkayáxin sín la ko tsjanjon sín kjuachaxin kuènte tí sín rey kixin ts'etuan tí bestia tsoxiteyája tí nkehe tsintáchro Dios.

¹⁸ **A** ntá tí chojni chjin k'uíkuan la táha mé tí chjasin jie t'etuan tí sín rey t'etuan chjasintajni.

18

Kjuítsínka chjasin Babilonia

¹ Ntá chr'éxin k'uíkuan í jnko ángel k'uínkajinxin nkajni chóna nchónhya kjuachaxin ntá chjasintajni antsí k'uínkaséyanni tí tjákiní tsjehe ch'án.

² Ntá k'uíyato ch'án itsen ntáchro ch'án kixin:

—Ó kjuítsínka, ó kjuítsínka tí chjasin jié Babilonia. Ntá tí jínahya ó kjuacha k'uíxehen t'etōan ntiha la ntiha síin kaín xín clase nchakuen jínahya la ko síin kaké ko xritjaká tjuáhya la ko jínahya.

³ A ntá kaín xín naciōn kókuaxín tí vino kjuínchekji tjan ntá kjuasinko tjan sín jiē la ko tí sín rey t'etōan chjasintajni kjaxin kjuasinko tjan jiē. La tí sín nchekji nkehe chjasintajni kórícoxín sín kixin k'uēna tjan nchónhya nkehe.

⁴ Ntá kuñhan í jnko itén nkexro kuixín nkaya nkajní ntáchro kixin:

—T'axrjéxinrá tí chjasin ntiha kixin tí jahará tinkachónkirá tí janhan kixin chrók'uícahyará tí ijíé sín la ko chrókjuasótexínhyará tí nkehe tsonhen sín.

⁵ Kixin tí nchónhya jiē tinkák'ánkí hasta kjuixraká nkajní la Dios ó nohe tí jiē chóna sín.

⁶ Ch'ehérá tjan éxí tí jehe tjan kjuích'ehe tjan í so chojni kixin xikaha tsjasótexín tjan. Chrókjuenkehérá tjan iyó veces éxí tí tsíkjich'éna tjan ik'ui í so chojni.

⁷ Antsí chrókjuasóte tjan tóyóhe tí nkehe kjuích'e tjan kixin kjuínchehnke tjan la ko k'uéchóna tjan kaín nkehe tóxrjínhin tjan. Jehe tjan ntáche asén tjan kixin: “Ntihi tjetjaxian éxí ijnko reina. Jehya ik'ána kixin chrókjuasótena.”

⁸ Mé xikaha kjaxin jnkokoá yaon itsi tí kjuaxikaon tsonhen tjan mé its'en tjan la ko tsjasótexín tjan kjinta la tsoche tjan kixin Ìnchéni imá chóna kjuachaxin la jehe ch'án sinchekjasóte ch'án tjan.

⁹ A ntá tí sín rey síin chjasintajni tsíkjasinko sín tjan jiē la ko nchónhya nkehe kjuínchexenko sín tjan la mé tsotsjánka sín la ts'èya sín tió ts'ikon sín ts'aya ihnchi tió tsoche tjan.

¹⁰ Ntá jehe sín tsitōhe sín ikjín kixin chrakon sín kixin xikaha tsjasóte tjan la tsontáchro sín kixin:

—Nòa tí jaha chjasin jié Babilonia, chjasin imá t'etōan kixin titàya kjuasótia.

¹¹ Tí sín xrinchekji nkehe la kjaxin tsjánka sín, t'èya sín kixin xikaha kónhen tí chjasin ntiha kixin kohya nkexro ts'enehe sín tí nkehe sinchekji sín.

¹² Kjuínchekji sín chica oro la chica plata la ko ixrō náxrjón la ko perla la ko ika náxrjón lino la ko ka seda la ko ika color morado la kjátse la ko kjaxin kaín xín clase nta náxrjón xraxé la ko tí nkehe tsík'óna neno elefante la ko inta náxrjón la ko bronce la ko ixrō chica la ko ixrō mármol.

¹³ Kjaxin xrinchekji sín canela la ko xroan xraxé náxrjón la ko chjincō la ko xroan mirra la ko crema la ko vino la ko aceite la ko harina náxrjón la ko noa trigo la ko iko tamá nkehe la ko kolélo la ko kokatē la ko carreta la ko chojni ch'exón xra kjaxin kjuínchekji sín.

¹⁴ Tsontáche sín tí chjasin a kixin:

—Í chontahya kain to tjete imá k'uékóxrjínhan. Ó k'uitjáyán kaín nkehe náxrjón tjete k'uéchonta.

¹⁵ Tí sín k'uékjinchekji tí nkehe la kóríco sín kixin kjuacha sín tí xra kjuích'e sín tí chjasin ntiha. Ikjín k'uéjo sín kixin chrakon sín kixin xikaha kónhen kjuasóte tí chjasin. Tsjánka sín la t'èya sín

¹⁶ la tsontáchro sín kixin:

—Nòa tí chjasin jié. Éxí ijnko chojni chjin tsík'itsa ka lino náxrjón la ko ika morado la kjátse la ko teyá nkehe oro la ko xro náxrjón tjete la ko perla.

¹⁷ A ntá jnkorato koá kjuixin kjuéje tí nkehe imá tjete —ichro sín.

Kaín tí nkexro t'etōan tí ntabárco la ko tí sín tsík'ixehen tí ntabárco la ko tí sín ch'e xra chrítaón ntayaon kuítóhe sín ikjín

¹⁸ la tió k'uíkon sín tí ihnchi síche tí chjasin ntiha la k'óyako sín kixin:

—¿Xá nkexéhe í jnko chjasin chrókóyóhe tí chjasin jié í?

¹⁹ La tǵikjanjin kja sín nche la tsǵánka sín t'èya sín kǵixin:
—Nòa tí chjasin jié. Kóricó tí sín k'uéchóna ntabárcø chrítaón ntayaon kǵixin tí chjasin i la ntá jnkórató koá kjuixin k'uítǵayan tí nkehe chóna sín.

²⁰ A ntá jahará tjejorá nkajní tócháhará kǵixin xǵikaha kónhen tí chjasin a. Tócháhará jahará k'uájikoará Ìnchéni la ko jahará k'uéchronkará itén Dios la ko kaín rá kuinkachónkirá tí jehe ch'án kǵixin Dios kjuínchekjasóte tí chjasin a kǵixin tí jié kjuasin sín kjuínchekjasótiará sín tí jahará.

²¹ A ntá ijnko ch'ín ángel chóna kjuachaxin kjuatsen ijnko xro éxí ijnko xro jié kuènte molino la k'uenkí ch'án ntayaon la ntá ntáchro ch'án kǵixin:

—Mé xǵikaha tsonhen tí chjasin Babilonia, tí chjasin jié la nunca ts'ikonhya chojni chr'éxin.

²² Nunca tsienhya sín música kuènte isón arpa la ko flauta la ko trompeta tí ntǵa la ko ninkexró xitjahya sich'e ninkehó xra ntiha la ko kǵaxin tsienhya sín ninkehó tóvéntó xro molino.

²³ Í ts'inkaséyanxínhya xrohi kuènte ninkehó lámpara la kǵaxin í tsienhya sín ts'ixin kia tsotehe chojni ntiha. Tí sín k'uékjinchekji nkehe ntiha la imá k'uék'etøan kuènte chjasintajni la tí sín k'uékjich'iyehe tí sín síin chjasintajni la k'uékjich'e sín jínahya, k'uédkjinchexroan sín.

²⁴ A ntá tí chjasin jié ntiha tsíkónoxín ijnǵié tí sín tsík'en k'uéchronka itén Dios la ko tí sín tinkáchónki tí jehe ch'án la ko kain tí sín tsík'enxín chjasintajni.

19

¹ Ntá chr'éxin ntá kuinhan itén nchónhya nkexro tjejó nkaya nkajní itsen nixja, ntáchro sín kǵixin:

¡Aleluya! Kjuasáyé Dios kuaáxinni la ko jehe ch'án t'inkaséyanxín ch'án ti jeheni la imá chóna kjuachaxin Dios kuènteni.

² Kǵixin jehe ch'án ntoá kjuínchekjasóte ch'án tí tjan kjuasin nchónhya jié kǵixin jehe tjan kjuachroe tjan chojni síin chjasintajni kǵixin tí nkehe jínahya k'uékjich'e tjan.

Dios kjuínchekjasóte tjan kǵixin k'óyán tjan tí sín k'uékjich'ehe ch'án xra.

³ La ntá kǵaxin inaá xíntáchro kǵixin:

—¡Aleluya! Kjuasáyé Dios kǵixin tí ihnchi síchexín tí jehe tjan tsítóehya chrìn hasta tí ntihi.

⁴ A ntá tí veinticuarto tí sín táda la ko tí noó nkexro tjejóchón tjejóxin toch'in sín hasta káxin kja sín nonte kjuikosáyéhe sín Dios tí nkexro tjetǵaxin tí trono la ntáchro sín kǵixin:

—¡Amén! ¡Aleluya! ¡Kjuasáyé Dios!

⁵ Ntá xrínahya kuínhin sín itén ijnko nkexro tjen nó trono ntáchro kǵixin:

Chjehérá kjuasáya tí Dios kuènteni kaín rá ch'ehérá ch'án xra

la kuítekákónhénrá ch'án,

mé kaín tí jahará kǵonte chánjan ntsíntsí ø chojni nteto.

Tí kia tsotehe tí Kolélo

⁶ Kǵaxin kuinhan nkehe éxí itén nchónhya chojni éxí nchónhya ntǵarío sítóvéntó la ko imá itsen sítjonta la ntáchro kǵixin:

¡Aleluya! Kjuasáyé Ìnchéni ó kjuankǵixin t'etøan Ìnchéni Dios kuènteni chóna kaín kjuachaxin.

⁷ Chrókóchéheni la chrókjuikosáyeheni Dios

kǵixin ó kjuixraká tí yaon ts'ixin kia kuènte Kolélo.

La tí tjan tsotehe la tsíkóyaxínhin tjechónhen,

⁸ mé tsík'áyéhe kjuachaxin tsík'itsa ka lino náxrjón tjóá tjákini.

A ntá tí ka lino náxrjón a mé t'axrjexín kǵixin tí jína k'uéjó tí sín tinkáchónki Dios.

⁹ Ntá tí ch'ín ángel k'uətoan ch'án kixin:

—Ikjian tíhi: “Náxrjón tjejó tí nkexro k'uáyéhe kjuachaxin sátsji tí kia tsotehe tí Kolélo.”

À ntá ntá chro ch'án inaá kixin:

—Tí palabra a mé chaxín ntoá nixja Dios.

¹⁰ Ntá kjuak'éxiān toh'iañ toté tí ángel kixin chrókjuikosáyaha ch'án, kjánchó jehe ch'án ntá chro ch'án kixin:

—Xikahya chrokjuich'e kixin janhan kjaxian t'aha xra Dios éxi tí jaha la ko éxi tí sín kichuá kuítóehya kuítekaon tí tan jina chrónka Jesús. Jehó Dios mé chrókjuíkosáyehé jaha.

Tí nkehe k'uéchrónka Jesús mé k'uéchrónka tí sín profeta.

Tí nkexro kjuák'ekjen kokate tjóá

¹¹ Ntá k'uíkuan kixin nkajní tjexrankehe la ntaha kónoxín ijnko kokate tjóá la ko tí nkexro tjejen va mé it'in Jina la ko Chaxín kixin ntoá kjuínchekitoexín ch'án ijíé chojni la ko ntoá kjuánjonko ch'án chojni.

¹² À ntá tí ikon ch'án mé tjákiní éxi xrohi nene xikaha tsjehe. À ntá tí kja ch'án la chóna nchónhya corona la ko ts'ínixín ijnko ihnié ijnko nkexro la jehó ch'án mé nohe ch'án tíha.

¹³ Tjenkáya ch'án ijnko ka tsík'ixikjanjin jni ntá ihnié ch'án mé Itan Kuènte Dios.

¹⁴ Chréhe tí sín soldado kuènte nkajní. Iké sín mé ka lino náxrjón tjóá la tjejókjen sín kokate tjóá.

¹⁵ Ir'va tí jehe ch'án k'uaxrjexín espada imá taté kixin táha mé tsjik'óyáñxin ch'án tí sín siín kaín nación la ko ts'etoanxín ch'án ijnko chica vara. Jehe ch'án mé sinchekitoexín ch'án ijíé sín éxi t'énxin sín to uva toté sín mé xikaha ts'etuñhen ch'án kixin its'i sín vino tsjasótexín sín kixin mé xikaha tsixín tí kjuanínkaon kuènte Dios chóna kaín kjuachaxin.

¹⁶ Iké ch'án mé ts'ínixín kixin jehe ch'án me Rey t'etuñhen kaín rey la ko jehe ch'án mé Inché kain chojni.

¹⁷ Ntá tuénxín k'uíkuan ijnko ángel tjexín toté tí tjen yaon la k'uéyato ch'án itsen k'uéyatohe ch'án tí ko xritjaká, ntá chro ch'án kixin:

—Xrákirá tójkotsérá ntihi kixin Dios tsjanjon nkehe sinterá ijie.

¹⁸ Sinterá cuerpo kuènte reyes la ko sinterá cuerpo kuènte tí sín comandante la ko cuerpo kuènte chojni jiehe la ko ntøe kokate la ko cuerpo kuènte tí sín tsíkjiták'á va la ko cuerpo kuènte kaín chojni libre o chojni ch'exón xra la chojni hyé o chojni ntsíntí.

¹⁹ K'uíkuan tí bestia la ko tí sín reyes t'etoan chjasintajni la ko tí soldado kuènte sín, tsíkójkotsé sín tsjanjonko sín tí nkexro tjejen kokate la ko koí tí sín soldado kuènte ch'án.

²⁰ À ntá itsé sín tí bestia kixin sátsji tsjasóte la ko kjaxin itsé sín tí nkexro ntoáhya k'uékjako itén Dios la ko k'uékjasin ch'án kjuaxroan náxrjón nkayakon tí bestia mé xikaha kjuích'e tí nkexro ntoáhya kjuako, kjuích'iyehé ch'án tí sín tsíkítóhe tsíka marca kuènte tí bestia la ko kjuikosáyehé sín tí nkehe tsíkjanoya kuènte tí bestia. Ntá tí bestia la ko tí nkexro ntoáhya kjuako itén Dios mé k'uítuñhen sín sátsji tí siín xrohi tsoche tjejóchónxinhín sín tsochéxin azufre.

²¹ À ntá tí í so sín la ts'enxín tí espada k'uaxrjexín tí ir'va tí nkexro tjejen tí kokate tjóá la kaín ko xritjaká ts'ixin tí siín tí cuerpo kuènte tí jehe sín la hasta tsokjehe va sine va.

20

Tí mil nánó

¹ Ntá xrínahya k'uíkuañ ijnko ángel k'uínkajinxin nkajní tjexraá llave kuènte tí tòye ninka la ko ijnko cadena jié tjexraá ch'án.

² A ntá tí ángel a itsé tí dragón mé tí konche ósé kjí mé tíha tí ch'ín diablo la ko Satanás la kjuak'echroé ch'án ijnko mil nánó.

³ Ich'án ch'án sákjuí tòye ninka ntá k'uikjehe ch'án la ko kjuak'e ch'án ijnko sello chrítaón puerta kíxin ntá tí dragón chrókjuich'iyehya tí chojni siín kaín nación hasta chrók'uatsínkajia tí mil nánó. A ntá ts'atsínka tí mil nánó ntá tsoxintankehe kjánchó séhya its'e.

⁴ Ntá tuénxín k'uíkuañ tí trono la ko tí sín tjejótxajin tsík'áyéhe sín kjuachaxin sinchekitoexín ijíé chojni. Kjaxin k'uíkuañ asén chojni tsíchrínjin kja kíxin kuítekaon sín Jesús la ko tsíchrónkaxín sín itén Dios. Jehe sín la kuínkáchónkihya sín tí bestia la ko tí nkehe tsíkjanoya kuènte la ko kuítóehya sín ikuá sín marca tí totjen sín o tí itja sín. Mé k'uíkuañ kíxin tsíxechón sín la ko ts'etqanko sín Cristo ijnko mil nánó.

⁵ Ntá í so chojni tsík'en la naxa xechónhya hasta ts'atsínkajia tí mil nánó. Tíha mé xrankíxixín tsoxechón chojni.

⁶ Náxrjón tjejó tí sín tsíkjinchetjóá Dios mé tí sín a mé senó tsoxechón sín. A ntá tí yóxin chrók'uen sín la tíha chóntahya ninkehó kjuachaxin naxa xikaha chrókónhen sín. Jehe sín mé nch'at'á kuènte Dios la ko kuènte Cristo la ts'etqanko sín ch'án tí mil nánó.

⁷ A ntá ts'átsínka tí mil nánó ntá ch'ín Satanás tsoxintankehe tí kjíchroé.

⁸ La sátsjikjich'iyehé tí chojni siín kuenté chjasintajni la ko sátsjikjich'iyehé tí chjasin Gog la ko Magog. La tsojnkotsé sín kíxin tsjanjon sín la ko tí soldado kuènte tí jehe sín. Nchónhya sín tsojnkotsé ntiha éxí tí nchesen siín ntayaon.

⁹ Mé xikaha sátsji sín tí tonxín la ko tí tekaxin nonte la ts'ántatjen sín tí tjejó tí sín tsíkjinchetjóá Dios mé tí chjasin jié tjuéhe ch'án. A ntá xrohi tsíxixín nkajní kíxin tsochexín tí sín jínahya ts'itjáyaxín sín.

¹⁰ A ntá tí diablo tsíkjich'iyehé tí jehe sín kjaxin sátsji tsochexín xrohi la ko azufre tí sátsíkji tsíchexín tí bestia la ko tí nkexro ntoáhya kjuako itén Dios. Mé ntiha mé tsjasótexín nchakotjin la ko tie jnkochríxín.

Tsitoexín ijíé chojni tí tjen tí trono jié tjóá

¹¹ Ntá k'uíkuañ ijnko trono jié tjóá la ko tí nkexro tjetjaxin nó ntiha. A ntá tí tjen ch'án ntiha la ó k'uitjáyankoá nonte la ko nkajní la í kónoxínhya ínaá tí nonte.

¹² Ntá k'uíkuañ tí sín tsík'en; chojni hyé la ko chojni ntsíntsi tjejóxin toté sín nkayakon Dios la ntá xitjehe iso libro la ko xitjehe í jnko libro ts'ínixín ihníé tí sín tsaá. Ntiha tsitoexín ijíé chojni tsík'en éxí nixja tí í so libro nkehe tí xra kjuích'e sín ts'ínixín ntiha.

¹³ Tí sín tsík'enxín ntayaon la ntiha xrakuaxin sín la tí sín sátsíkji tí siín chojni tsík'en la ntiha xrakuaxin sín kaín sín tsochjina sín tsitoexín ijíé jnkojnko sín kíxin nkexrí tí xra kjuích'e sín.

¹⁴ Ntá tí kjuachaxin kuènte kjuach'én la ko tí tsík'ejó tí asén tí sín tsík'en sátsji tsoche tí xrohi tsochexín, mé tí muerte yóxin tíha.

¹⁵ La ko ntaha sátsji tí chojni ts'ínixínhya ihníé sín tí libro ts'ínixín ihníé chojni tsaá.

21

Nkajní nixin la ko nonte nixin

¹ Ntá k'uíkuañ ijnko nkajní nixin la ko ijnko nonte nixin kíxin tí nkajní saoxín la ko tí nonte saoxin tsík'itjáyan la ko kjaxin kohya ntayaon.

² Janhan Juan k'uíkuan tí chjasin jié tjóá. Táha mé tí Jerusalén nixin k'uínkajinxin nkajní kuixin tí tjen Dios la kuenté tsíkóyóxin éxí ijnko chojni chjin tsotehe tsík'itsa kixin tsákja tí xì.

³ Ntá kuinhan ijnko itén ijnko nkexro itsen kuixin nkajní ntáchro kixin:

—Dios itjen tí siín chojni, la ts'ejóko sín tí jehe ch'án la jehe sín mé ts'óna chjasén ch'án la Dios a mé ts'ejóko sín ntiha la mé ts'óna Dios kuènte sín.

⁴ Jehe ch'án mé sinchexámá kaín ntakon sín la í tsokohya nkexro its'en la tsokohya nkexro tsotsjánka la ko ts'áváhya sín la ko tsokohya kjuatjoté kixin kaín tí nkehe k'uékónhen ósé la ó kjuixin k'uátsínka.

⁵ A ntá tí nkexro tjetjaxin tí trono ntáchro ch'án kixin:

—Janhan mé t'ána kaín nkehe nixin.

Kjaxin ntáchro ch'án kixin:

—Ikjian tíha kixin tíha mé palabra chaxín la chrókuítekávan kaín tíha.

⁶ Ntá chr'éxin chrónka ch'án kixin:

—Kaín nkehe la ó kjuixin tsík'óna. Janhan la tí xrankíxixín la ko tí tsjixixín éxí tí letra xrankíxixín A la ko tsjixixín Zeta. Tí nkexro t'enzín ntá la janhan tsotjahá sín tí ntá its'i sín mé tí ntá tjanjon kjuachón la ninkehó ts'ixinkíehya sín tíha.

⁷ Tí nkexro tsjacha tsítóehya tí janhan la ts'áyéhe sín kaín tí nkehe tsotjahá sín. La janhan mé ts'óna Dios kuènte sín, a ntá jehe sín mé xjanna ts'íkaan tí jehe sín.

⁸ A ntá tí chojni chrakon la chojni titekakonhya la tí sín chjinoxínhin la ko tí chojni ts'óyán kichó la ko tí chojni tsákja chojni chjin ókjé la ko tí chojni xrinchexroan la ko chojni tinkáchónki nkehe tsíkjanoya la ko kain chojni ch'ia mé tí sín a mé ts'ítuenhen sátsji sín tí siín xrohi tsochexín sín azufre tió itsi tí yóxin muerte.

Tí Jerusalén nixin

⁹ Ntá ikui ijnko tí yatoxin ángel chóna tí yatoxin copa tsíkaón tí yatoxin chin tsjixixín tsjasótexín chojni. Ntá ntáchro ch'án kixin:

—Xrákia tsjákoaha tí tjan tsotehe tí Kolélo.

¹⁰ Ntá k'uíkuan ijnko nkehe kjuakoxin Nchakuen Dios la ntá tí ángel sákjuíkian ijnko jnā jié la ko noi la kjuakona ch'án tí chjasin jié tjóá mé tí Jerusalén ts'inkajinxin nkajní tsíkixin tí tjen Dios.

¹¹ A ntá tí chjasin a mé tjákinixin kjuachaxin kuènte Dios. A ntá tjákiní éxí ijnko xro imá náxrjón tjete éxí xro jaspe éxí xrosentá tsjehe.

¹² A ntá jnkontatjen tí chjasin chóna tjat'o noi la chóna teyó puerta la jnkoinko ángel jnkoinko puerta tjejónta la ihnié tí teyó tí sín tsík'axrjeníxin sín Israel ts'ínixín jnkoinko puerta.

¹³ La iní puerta la nó tjitoxin yaon la iní puerta la nó norte la iní puerta la nó tjiatóxin yaon la iní puerta la nó sur.

¹⁴ Tí tjat'o tsík'antatjen tí chjasin chóna teyó xro chóntaxín fuerza tí tjat'o la jnkoinko ihnié tí teyó tí sín k'uájiko tí Kolélo a mé ts'ínixín jnkoinko tí xro a.

¹⁵ A ntá tí ángel tjenixjana chóna ijnko nta vara oro, éxí tji tsjehe, tsjachoxín tí chjasin la tí puerta kuènte chjasin la ko tí tjat'o t'inkákuènxin.

¹⁶ Tí chjasin la cuadrada la tí kjinjinxin jnkokón la ko tonxín la jnkokón. A ntá tí ángel kjuachoxín tí chjasin tí nta vara éxí tji tsjehe tsíkjachoa ch'án tí chjasin mé chóna dos mil dos cientos kilómetro tí kjinjinxin la ko tí ntetoxín la ko tí tonxín la jnkokón.

¹⁷ Ntá tsíkjachoa ch'án tí tjat'o tsíkjintajin tí chjasin a la chóna sesenta y cuarto metro kixin éxí tjachroa chojni chjasintajni mé xikaha kjuachoa tí ángel.

18 Tí t̄jat'ò tsík'ántatjen tsík'óna x̄ro jaspe, a ntá tí chjasin tsík'óna jehó chica oro tóyóhe jehó x̄rosent̄a t̄jóá.

19 Tí x̄ro tsík'óna xrankíxixín tsík'ántatjen tí t̄jat'ò la nchónhya x̄ro ch̄jini náxrjón tsínkíkjan. A ntá tí x̄ro xrankíxixín la jaspe, a ntá tí x̄ro yóxin la zafiro, la tí x̄ro níxin la ágata, a ntá tí noóxin la esmeralda.

20 A ntá tí n'óxin x̄ro la x̄ro mármol la tí injonxin la cornalina, la tí yatoxin la crisólito, a ntá tí jnixin la berilo, la tí x̄ro naxin la topacio, la tí texin la crisoprasa. A ntá tí tejnkoxin la jacinto, a ntá tí teyóxin la amatista.

21 A ntá tí teyó puerta mé t̄jejó perla la jnkojnko puerta tsík'óna jnkokoá perla. A ntá tí nt̄ia jié kuènte chjasin la tsík'óna jehó chica oro éxi x̄rosent̄a tsjehe.

22 Ntaha la k'uíkõnha ninkehó n̄nko tí chjasin a, kixin Ìnchéni Dios chóna kaín xín kjuachaxin la jehe ch'án la ko tí Kolélo mé tí n̄nko ntiha.

23 Tí chjasin a mé t'ichjánxinhya yaon la ko ni nit̄jó ts'inkaséyanxín. Kixin tí t'inkaséyanxín la Dios la ko tí Kolélo mé tí xrohi kuènte.

24 A ntá tí chojni kuènte kaín nación tsíkaá la ts'ikonxín tí xrohi kuènte tí chjasin la tí sín tsík'óna reyes chjasintajni la ntiha tsjanjon sín tí nkehe k'uéchóna sín.

25 A ntá tí puerta kuènte chjasin la tsík̄jèhya tí nch̄akotjin la ntaha la tsokohya ts'ixin tie.

26 Ntaha sátsjiko kaín xín nación tí nkehe náxrjón k'uéchóna sín chjasintajni.

27 A ntá ntaha mé xitjahya ts'ixenhen ninkehó nkehe t̄juáhya, la ninkexró ch̄jinoxínhin o chojni ch'ia. Jehó ts'ixenhen tí sín ts'ínixín ihnié tí libro ts'ínixín ihnié tí sín tsaá, mé tí libro chóna tí Kolélo.

22

1 A ntá tí ángel kjuákõna ijnko ntarío t̄jóá, a ntá tí n̄ta a mé tjanjon kjuachón. Táha mé t'ikonxínni éxi x̄rosent̄a la mé k'uaxrjexín tí trono kuènte Dios la ko tí Kolélo.

2 A ntá jnkosiné tí calle t̄jetoan kuènte tí chjasin a la ko nanánko tí ntarío ntiha itjen tí inta tjanjon kjuachón mé t'óna to teyó veces jnkojnko nánó kixin t'óna to jnkojnko nit̄jó. Tí ka kuènte tí nta la x̄roan tsit̄oexín jína tí nación siín ntiha.

3 La mé ntiha tsokohya ninkehó kjuach̄jinoxínhin la tí trono kuènte Dios la ko kuènte tí Kolélo la ntiha t̄jen tí chjasin. La tí sín ch'ehe ch'án x̄ra la mé tsjikosáyehe sín ch'án.

4 Ts'ikon sín tí k̄aré Dios la ko tsochóna sín ihnié ch'án tí totjen sín.

5 Ntiha la tsokohya ts'ixin tie la tí sín siín ntiha la t'ichjánxinhya sín xrohi kuènte lámpara la ko ni xrohi kuènte yaon kixin Ìnchéni Dios mé ts'inkaséyanxín sín ntiha la ko tsochóna sín kjuachaxin kuènte Dios jnkochŕxín.

Tí itsi Ìnchéni la kánhyó sé

6 A ntá tí ángel mé nixjana ch'án ntáchro kixin:

—Tí itan a mé chaxín la chrókuítekákonhén tí tan a. La ko Ìnchéni mé tí Dios nchexraxinkaon tí sín nixja kjuachaxin ihnié ch'án mé ichr'án ch'án tí ángel kuènte ch'án kixin ts̄jakuexin ch'án tí sín ch'ehe ch'án x̄ra, tí nkehe tjoka tsonhen.

7 —¡Tjoka ts'inka janhan!

Náxrjón t̄jejó tí sín titekaon tí itén Dios nixja tí libro i.

8 Janhan Juan, kuñhan la ko k'uíkuañ tíha. A ntá chr'éxin kjuixin kuñhan la ko k'uíkuañ tíha ntá kjuak'éxian toçh'ian chŕnkí toté tí ángel kixin x̄ikaha kjuákõna la ntá chrók̄juíkósáyah̄a ch'án.

⁹ A ntá jehe ch'án ntáchro ch'án kixin:

—Xikahya sich'e kixin janhan kjaxin t'ahā xra Dios éxí tí jaha xikaha la ko éxí tí sín kichuá mé tí sín nixja itén Dios la ko kaín tí sín tjinkaon chrókuitekaon nkexrí nixja tí libro i. Mé jehó Dios chrókjuíkosáyehé.

¹⁰ Kjaxin k'uetuanna ch'án kixin:

—Chrókjuak'echjinahya tí nkehe jahvá kuinhín kuènte Dios éxí nixja tí libro i kixin ó kuichjina tí yaon tsoxiteyá.

¹¹ A ntá tí sín ch'e jínahya ája nohe sín ch'e sín tí jínahya. A ntá tí nkexro ntoáhya ch'e la ája nohe ch'e tí nkehe ntoáhya. A ntá tí nkexro ch'e nkehe tóxrjínhín Dios la naxa chrókjuich'e xikaha la ko tí nkexro tsíkjinchetjóá Dios la naxa jína chrók'uejó sín chrókuitekaon sín tí jehe ch'án.

¹² —Chaxín tjoka ts'inka janhan la ts'inkakian tí nkehe tsotjāhará jnko-jnkorá kixin nkexrí tí xra chuich'erá.

¹³ Janhan mé tí xrankíxixín la ko tí tsjixixín la janhan mé tí saoxín la ko tí tsjixixín éxí tí letra xrankíxixín A la tsjixixín Zeta.

¹⁴ Náxrjón ts'ejó tí nkexro tsíkjen iké kixin tsochóna sín kjuachaxin tsochjinehe sín tí nta tjanjon kjuachón kixin jína ts'ixenxín sín tí puerta kuènte chjasin.

¹⁵ A ntá ntója tsitohe tí chojni jínahya kuítekakonhya la ko tí chojni nhexroan la ko tí sín chóna nchónhya chojni chjin la ko tí chojni tjāya la ko tí chojni tinkáchónki tí nkehe tsíkjanoya la ko tí chojni tóxrjínhín xrich'ia.

¹⁶ —Janhan Jesús mé ichr'an tí ángel kuèntana kixin tsochénka kaín ninko kaín tíha. Janhan mé k'uaxrjeníxian tí rey David la ko janhan tí konotsé itji tí chjina t'inkáséyan.

¹⁷ Tí Nchakuen Dios la ko tí sín tinkáchónki tí Kolélo ntáchro kixin:

—Xrákiá.

La tí sín tjejótinhin la ntáchro sín kixin:

—Xrákiá.

A ntá tí nkexro t'enxín nta tjinkaon nta la chrók'ui tí nta tjanjon kjuachón la ninkehó ts'ixinkíhya tíha.

¹⁸ Kaín nkexro tjejótinhin itén Dios ts'ínixín tí libro i la chrókónohe sín tíha: Jnkojín sín chrókjuich'éna í so nkehe chrónixja la Dios mé antsí sinchekjasóte tí jehe sín tsoníhi sín éxí nixja tí libro i.

¹⁹ A ntá jnkojín nkexro tsjatsen jnkojín palabra chóna tí libro i la Dios tsjatsen tí nkehe chrók'uáyéhe sín chóna tí libro ts'ínixín ihnié tí sín tsaá la ko Dios tsjatsen tí nkehe chróchóna sín tí tjen tí chjasin tjóá kixin éxí nixja tí libro i.

²⁰ A ntá tí nkexro chrónkaxín tí tan i mé ntáchro kixin:

—Tjoka ts'inka janhan.

Amén. ¡Xrákiá. Ìnchéni Jesús!

²¹ Ìnchéni Jesucristo mé sincheyaonrá kaín rá. Amén.